


Tupanaarü Ore i Tóru Cori ya Ngechuchu ya

Cristuchiga



New Testament in Ticuna (PE:tca:Ticuna)

Tupanaarü Ore i Tóru Cori ya Ngechuchu ya Cristuchiga New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

9d5dc22a-30be-5d26-85a9-76047f4c89e6

Contents

MATEU	1
MARCU	70
LUCA	110
CUÁŮ	181
PURACŮGŮ	232
DUMACŮĀX	294
1 CORĪTIUCŮĀX	326
2 CORĪTIUCŮĀX	354
GÁRATAANECŮĀX	372
EPÉCHIUCŮĀX	383
PIRIPUCŮĀX	394
COROCHACŮĀX	401
1 TECHARÓNICACŮĀX	408
2 TECHARÓNICACŮĀX	414
1 TIMUTÉU	418
2 TIMUTÉU	426
TITU	432
FILEMŮŮ	436
EBRÉUGŮ	438
CHAŮTIÁGU	463
1 PEDRU	470
2 PEDRU	478
1 CUÁŮ	484
2 CUÁŮ	491
3 CUÁŮ	492
YUDA	494
APOCARÍCHIU	497

ORE I MEXÛ GA MATEU ÜMATÛXÛ

*Ngechuchu ya Cristu natanüwa ngóxü ga duïxügüchiga
(Lc 3.23-38)*

- ¹ Ñaã nixĩ ga yema nuxcümáxügüxü ga duïxügü ga Ngechuchu ya Cristu natanüwa ngóxü. Rü yematanüwa rü Dabí nixĩ ga wüxi, rü Abráü nixĩ ga to.
- ² Rü Abráü rü Ichaánatü nixĩ.
Rü nüma ga Ichaá rü Acóbunatü nixĩ.
Rü nüma ga Acóbo rü Yudánatü rü naëneëgünatü nixĩ.
- ³ Rü Yudá rü Fárenatü rü Záranatü nixĩ. Rü Támara iyixĩ ga norü mamá.
Rü nüma ga Fáre rü Eróñnatü nixĩ.
Rü nüma ga Eróñ rü Aráñnatü nixĩ.
- ⁴ Rü Aráñ rü Aminadánatü nixĩ.
Rü nüma ga Aminadá rü Nachóñnatü nixĩ.
Rü nüma ga Nachóñ rü Charmóñnatü nixĩ.
- ⁵ Rü Charmóñ rü Boónatü nixĩ, rü Raá iyixĩ ga naë.
Rü nüma ga Boó rü Obénatü nixĩ, rü nae rü Rux iyixĩ.
Rü nüma ga Obé rü Ichaxínatü nixĩ.
- ⁶ Rü nüma ga Ichaxí rü ãëxgacü ga Dabínatü nixĩ.
Rü nüma ga ãëxgacü ga Dabí rü Charomóñnatü nixĩ. Rü ngima ga Bechabé ga Uría namëxchirëx ixícü iyixĩ ga naë ga Charomóñ.
- ⁷ Rü Charomóñ rü Roboáñnatü nixĩ.
Rü nüma ga Roboáñ rü Abíanatü nixĩ.
Rü nüma ga Abía rü Achánatü nixĩ.
- ⁸ Rü Achá rü Yochapánatü nixĩ.
Rü Yochapá rü Yoráñnatü nixĩ.
Rü nüma ga Yoráñ rü Uchíanatü nixĩ.
- ⁹ Rü Uchía rü Yotáñnatü nixĩ.
Rü Yotáñ rü Acánatü nixĩ.
Rü nüma ga Acá rü Echequíanatü nixĩ.
- ¹⁰ Rü Echequía rü Manachénatü nixĩ.
Rü Manaché rü Amóñnatü nixĩ.
Rü nüma ga Amóñ rü Yochíanatü nixĩ.
- ¹¹ Rü Yochía rü Yeconíanatü rü naëneëgünatü nixĩ. Rü yexguma nixĩ ga Babiróniãcũãx ga churaragü Yudíugüxü íyauñxü rü Babiróniãñewa nagagüãxü.
- ¹² Rü yexguma Babiróniãwa Yudíugüxü nagagüguwena, rü Yeconía nane ga Charatíe nabu. Rü nüma ga Charatíe rü Chorobabénatü nixĩ
- ¹³ Rü Chorobabé rü Abiúnatü nixĩ.
Rü Abiú rü Eriaquíñnatü nixĩ.
Rü nüma ga Eriaquíñ rü Achónatü nixĩ.
- ¹⁴ Rü Achó rü Chadóxnatü nixĩ.
Rü Chadóx rü Aquíñnatü nixĩ.
Rü nüma ga Aquíñ rü Eriúnatü nixĩ.
- ¹⁵ Rü Eriú rü Ereachánatü nixĩ.
Rü Ereachá rü Matáñnatü nixĩ.
Rü nüma ga Matáñ rü Acóbunatü nixĩ.
- ¹⁶ Rü Acóbu rü Yúchenatü nixĩ. Rü nüma ga Yúche rü María ngíte nixĩ. Rü ngima ga María rü Ngechuchu ya Cristu naë iyixĩ. Rü guma Ngechuchuxü nixĩ ga naxunetaxü ga Tupana.

17 Rū yemaãcū Abráŭwa inaxügü ga yema duŭxügü rü 14 nixĩ ñuxmata Dabíwa nangu. Rū yemawena to ga 14 inaxügü ga Dabíwa rü ñuxmata Babiróniãcŭãx ga churaragü Yudíugŭxŭ íyauŭxguwa nangu. Rū yemawena to ga 14 inaxügü ga yexguma Yudíugŭxŭ ínayauŭxguwena rü ñuxmata Cristu buxguwa nangu.

*Ngechuchu ya Cristuarü buxchiga
(Lc 2.1-7)*

18 Rū ñaãcū nixĩ ga yexguma nabuxgu ga Ngechuchu. Rū naë ga María rü marü Yúchemaã ixãtechaŭ. Natürü naxŭpa ga nügüna na nangugŭxŭ rü marü Tupanaãë i Üünexŭãrŭ ñnãxŭ ixãxãcŭ.

19 Rū Yúche ga María ngítechaŭ ixĩcŭ rü wüxi ga mecü nixĩ. Rū yemacèx tama nanangoxëëchaŭ ga yema na naxãxãcŭxŭ ga María. Rū nagu narŭxĩnŭ ga bexmamare ngĩxŭ na ínatãxŭ. 20 Rū yexguma yemagu ínaxĩnŭyane, rü wüxi ga daxŭcŭãx ga Tupanaãrŭ orearü ngeruŭ, rü nanegüwa naxcèx nangox rü namaã nidexa. Rū ñanagürü nüxŭ: —Pa Yúche Pa Dabítanŭxŭx, ¡tãxŭ i ngĩxŭ cuxoxŭ i María na ngĩmaã cuxãmaxŭ! Erü Tupanaãë i Üünexŭ ngĩxna ñnŭxŭgagu nixĩ i naxãxãcŭxŭ. 21 —Rü ngĩma tá ngĩxŭ nangëxma ya wüxi ya ngine, rü cuma rü tá Ngechuchugu cunaxüéga. Rū ngëma naega rü ‘maxëeruxŭ’ ñaxŭchiga nixĩ, erü nüma tá norü pecadugüwa ínananguxŭxëë i norü duŭxügü —ñanagürü. 22 Rū guxŭma ga yema orearü ngeruŭ nüxŭ ixuxŭ rü nangupetü na yanguxŭcèx ga Cori ga Tupanaãrŭ ore ga nuxcŭmaŭxŭ ga norü orearü uruŭwa nüxŭ yaxuxŭ ga ñaxŭ:

23 “Rü tá tauemacü ngĩxŭ inayarütaxu i ngëma nge i taguma yatŭxŭ cuèxcŭ. Rū tá nayatü. Rū Emanue tá nixĩ i naega. Rū ngëma naega rü ‘Tupana tatanüwa nangu’, ñaxŭchiga nixĩ”, ñanagürü. 24 Rū yexguma pewa nabèiãchigu ga Yúche, rü nanaxü ga yema Tupanaãrŭ orearü ngeruŭ ga daxŭcŭãx namaã nüxŭ ixuxŭ. Rū Mariamaã naxãmèx. 25 Natürü taguma ngĩxŭnexŭ nacuèx ñuxmata nabu ga guma ngĩne. Rū Ngechuchugu nanaxüéga.

2

Ngechuchuxŭ ínayadaugü ga yatügü ga nüxŭ cuèxŭchigŭxŭ

1 Rū Ngechuchu rü Yudeáanewa yexmane ga ñãne ga Beréŭgu nabu ga yexguma Erode ãëxgacü ixĩxgu ga yema nachiŭãnewa. Rū yexguma nixĩ ga ñãne ga Yerucharéŭwa nangugŭxŭ ga ñuxre ga yatügü ga nüxŭ cuèxŭchigŭxŭ ga woramacuriwa ngüexŭ ga yaxŭwa ne íxŭ ga üèxcŭ ne ŭxŭwa. 2 Rū duŭxŭgüna nacagüe, rü ñanagürügü: —¿Ngextá nixĩ i nangëxmaxŭ ya yima Yudíugŭarŭ ãëxgacü ya ngexwacèx bucü? Toma rü yéama tochiŭãnewa nüxŭ tatau ya norü woramacuri rü ngëmacèx núma taxĩ na nüxŭ tayarücuèxŭgŭxŭcèx —ñanagürügü. 3 Rū yexguma yemachigaxŭ nacuèxgu ga ãëxgacü ga Erode rü poraãcŭ naxoegaãë. Rū guxŭma ga duŭxügü ga Yerucharéŭcŭãxgü rü ta naxoegaãëgü. 4 Rū yexguma ga ãëxgacü ga Erode rü naxcèx nangema ga guxŭma ga paigŭarŭ ãëxgacügü rü ngüexëeruŭgü ga ore ga mugüwa nguxëëtaegŭxŭ. Rū nüxna naca, rü ñanagürü: —¿Ngexta nixĩ i nabuégaxŭ ya Cristu? —ñanagürü. 5 Rū nümagü nanangãxŭgü, rü ñanagürügü: —Nuã Yudeáanewa ngëxmane ya ñãne ya Beréŭgu tá nixĩ i nabuxŭ. Yerü nuxcŭmaŭcŭ ga Tupanaãrŭ orearü uruŭ rü nachiga nanaxümatü, rü ñanagürü ga yema ore:

6 “Rü Beréŭ ya ñãne ya Yudeáanewa ngëxmane, rü yima rü tama wüxi ya ngexnerüünemare ya ñãne nixĩ, erü nagu tá nabu i ngëma ãëxgacü i taxŭ

i Cristu. Rū nūma tá nūxna nadau i guxūma i Tupanaārū duūxūgū i Yudiūgū”,
 ñanagürü. ⁷ Rū yexguma ga ãëxgacū ga Erode rü bexma naxcèx naca ga yema yatūgū ga nūxū cuèxūchigūxū ga yaxūwa ne īxū. Rū nūxna naca ga tēxacū rü ngunexū na nangóxū ga noxri ga guma woramacuri. ⁸ Rū ñuxūchi ga Erode rü Beréūwa nanamugū ga yema yatūgū. Rū ñanagürü nūxū: — ¡Rū ngēma pexī rü meã naxcèx peyadēux i ngēma buxū. Rū ngēxguma nūxū ipeyangauxgu rü chomaã nūxū pixu na choma rü ta ngēma chaxūxūcèx, na nūxū chayarūcuèxūxūcèx i ngēma buxū! —ñanagürü. ⁹ Rū yexguma yema orexū naxīnūēguwena, rü inaxīāchi ga yema yatūgū. Rū guma woramacuri ga noxri nūxū nadaugūcū rü napēxegu nixūchigū rü ñuxmata guma bucū ga Ngechuchu íyexmaxūetūwa nangu. Rū yéma nayachaxāchi. ¹⁰ Rū yexguma guma woramacurixū nadaugūga ga yema yatūgū, rü poraācū nataēgū. ¹¹ Rū nagu nichocu ga guma ī ga nawa nayexmane, rü yexma nūxū nayangau ga guma bucū ngīmaã ga naē ga María. Rū guma bucūpegu nacaxāpūxūgū, rü nūxū nicuèxūūgū. Rū ñuxūchi nayawāxna ga norū baúxacūgū, rü õxchanana nanaxāmaregū ga uiru rü pumaragū ga yixichixū. ¹² Rū yemawena, ga yexguma napeeyane ga yema yatūgū, rü nanegūwa Tupana nayaxucuxēgū na tama Erodecèx nawoeguxūcèx. Rū yemacèx to ga namagu nachiuñānecèx nawoegu.

Equituanewa nabuxmū

¹³ Rū yexguma marū íyaxīxguwena ga yema yatūgū rü wūxi ga daxūcūāx ga Tupanaārū orearū ngeruū, rü nanegūwa Yúchecèx nangox, rü ñanagürü nūxū: —¡Nabèixāchi rü írūda! ¡Rū ínaxūxū namaã ya yima bucū rü naē rü Equituanewa naxū! ¡Rū ngēma pengēxmagū ñuxmatáta choma cumaã nūxū chixu na ñuxgu tá cutaeguxū! Erū ãëxgacū i Erode rü yima bucūcèx tá nadau na yamáaxūcèx —ñanagürü nūxū. ¹⁴ Rū yexguma ga Yúche rü nabèixāchi rü ínarūda. Rū yexgumatama chūtacū namaã inaxūāchi ga guma bucū ga Ngechuchu rü naē. Rū Equituanewa naxī. ¹⁵ Rū Equituanewa nayexmagū ñuxmata nayux ga ãëxgacū ga Erode. Rū yemaācū nangupetū na yanguxūcèx ga Tupanaārū ore ga nuxcūmaūcū ga norū orearū uruū nūxū ixuxū ga ñaxū: “Naxcèx changema ya Chaune rü Equituanena chanataeguxē”, ñaxū ga yema ore.

Erode nanamu na tūxū nadèixūcèx ga buxegū

¹⁶ Rū yexguma ãëxgacū ga Erode nūxū cuèxgu ga to ga namagu na nawoeguxū ga yema yatūgū ga nūxū cuèxūchigūxū ga yaxūwa ne īxū, rü poraācū nanu. Rū Beréūwa nanamugū ga norū churaragū na guxū ga yema naānewa tūxū nadèixūcèx ga guxāma ga guxema buxegū ga iyatūxe ga yexwacèx buexe rü ñuxmata taxre ga taunecū tūxū yexmagūxewa nangu. Yerū yema yatūgū ga yaxūwa ne īxū rü marū nūxū nixugūgū rü taxre ga taunecū nixī ga noxri na nangóxū ga guma woramacuri. ¹⁷ Rū yemaācū ningu ga ore ga nuxcūmaūxū ga Tupanaārū orearū uruū ga Yeremíā ūmatūxū ga ñaxū:

¹⁸ “Rū Ramáwa nūxū taxīnūē i wūxi i naga i poraācū ngechaūgaācūma auxexū. Rū Raquera iyixī i ngīxācūgūcèx poraācū auxcū. Rū taxuacūma ngīxū tataāēxēēga, erū nayue i ngīxācūgū”,

ñanagürü ga yema ore. ¹⁹ Natürü yexguma marū nayuxguwena ga ãëxgacū ga Erode, rü Equituanewa rü wūxi ga daxūcūāx ga Tupanaārū orearū ngeruū rü nanegūwa Yúchecèx nangox. Rū ñanagürü nūxū: ²⁰ —Pa Yúchex, ¡írūda, rü pechiñānecèx namaã pewoegu ya yima bucū ya Ngechuchu! Erū marū

nayue i ngema duñxügü ya yima bucüxü imèxgüchaxüxü —ñanagürü. ²¹ Rü yexguma ga Yúche rü ínarüda rü nachitüñecèx namañ nataegu ga guma bucü rü naë. ²² Natürü yexguma Yúche nüxü cuáchigagu na Aqueránu ãëxgacüxü ingucuchixü nanatü ga Erodechicüü ga Yudéaanewa, rü namuñ ga Yúche ga yéma na naxüxü. Yerü wüxi ga daxüçüãx ga Tupanaärü orearü ngeruñ nanegüwa nanaxucüxë na tama yéma Yudéaanewa na naxüxüçèx. Rü yemacèx Gariréaanewa naxü. ²³ Rü yexguma Gariréaanewa nangugügu, rü ñãne ga Nacharétuwa naxí, rü yexma naxächitügü. Rü yemañcü nangupetü na yangüçèx ga yema ore ga nuxcümañgüxü ga Tupanaärü orearü uruñgü nüxü ixugüxü ga ñaxü:

“Ngechuchu ya Cristu rü Nacharétuçüãxmañ tá nanaxugü”,
ñaxü.

3

Cuáñ ga baiñxëeruñ nüxü nixu ga Tupanaärü ore ga dauxchitawa ga ngextá taxúema íxãpataxüwa

(Mr 1.1-8; Lc 3.1-9, 15-17; Cu 1.19-28)

¹⁻² Rü yexguma Nacharétuwa nayexmagu ga Ngechuchu, rü Cuáñ ga baiñxëeruñ inanaxügü ga Tupanaärü orexü na yaxuxü ga Yudéaanewa ga dauxchitawa ngextá taxúema íxãpataxüwa. Rü duñxügümañ nüxü nixu rü ñanagürü: —¡Nüxü perüxoe i pecüma i chixexü! Erü marü ningaica na perü ãëxgacü na yïxü ya Tupana —ñanagürü. ³ Rü guma Cuáñ ga baiñxëeruñchiga nixí ga naxümatüãxü ga nuxcümañcü ga Tupanaärü orearü uruñ ga Ichaxía ga yexguma ñaxgu:

“Rü dauxchitawa i ngextá taxúema íxãpataxüwa tá nangëxma i wüxi i duñxü i ngema tagañcü ñaxü: ‘¡Pegü pemexëëx naxcèx ya Cori! ¡Rü naxcèx ipeyanawëxächixëëx i perü maxü!’ ”

ñaxü. ⁴ Rü naxchiru ga Cuáñ rü cameyutëxanaxcèx nixí, rü norü goyexü rü naxchëxmünaxcèx nixí. Rü beruremañ rü munümañ naxãwemü. ⁵ Rü yéma Cuáñxütawa inayarüxñüëgüxü ga duñxügü ga Yerucharéçüãx, rü duñxügü ga guxü ga Yudéaanewa ne íxü, rü duñxügü ga natü ga Yudáñärü ngaicamagu áchitügüxü. ⁶ Rü guxema duñxëgü ga nüxü ixugüexe ga tümaärü pecadugü, rü Cuáñ rü tüxü ínabaiñxëë ga natü ga Yudáñwa. ⁷ Natürü yexguma Cuáñ nüxü dëuxgu ga naxütawa na nangugüxü ga muxüma ga ãëxgacügü ga Parichéugü rü Chaduchéugü na ínabaiñxëëãxüçèx, rü Cuáñ ñanagürü nüxü: —Pa Áxtapearü Duñxügüx, çrü texé pemañ nüxü tixu na naxchaxwa pibuxmüxüçèx i ngëma Tupanaärü poxcu i ãñcümáxü i marü ingaicaxü? ⁸ —¡Rü penaxwëxe na Tupana naxwëxexüñcüma pemaxëxü na ngëmañcü guxüma i duñxügü nüxü nadaugüxüçèx na aixcüma marü nüxü perüxoexü i ngëma pecüma i chixexü! ⁹ —Erü Tupanapëxewa rü taxuwama name na pegü pixuxü na Abráñtanüxü i Yudíugü pixíngüxü erü tama ngëmacèx nixí ya Tupana i duñxügüxü nayaxuxü. Rü pemañ nüxü chixu rü ngëxguma Tupana naxwëxegu, rü tama nüxü naguxcha na daa nutawa Abráñtanüxü nanguxüxëëxü. ¹⁰ —Rü Tupanaärü yuema rü marü ímemare na nadaxüxüçèx i ngëma nanetügü i tama mexü. Rü guxüma i nanetügü i chixearü õðxü rü tá nadaxü, rü ñuxüchi tá ínagu —ñanagürü. ¹¹ Rü ñanagürü ta ga Cuáñ: —Choma rü aixcüma dexáwamare pexü íchabaiñxëë na togü i duñxügü nüxü cuáñcèx na aixcüma marü nüxü perüxoexü i pecüma i chixexü. Natürü chowëama tá ínangu i to i Tupanaärü orearü uruñ. Rü nüma tá pexütawa nanamu i Tupanañë i üñnexü na naporaexëëãxü i ngëma Tupanawe rüxíxü, rü nüma tá nanapoxcue i ngëma Tupanaxü oexü. Erü nüma rü porañcü choxü

narüyexera na âêxgacü yîxü. Rü choma rü napêxewa rü taxuwama chame rü bai i norü chapatuarü ngewaxüra chame. ¹²—Rü nüma rü marü ínamemare na ñoma i naânewa yadexechiãxüçèx i norü duüxügü ñoma wüxi i yatü trigu naâtüna idexechixürü. Rü ngêmaäcü tá nayadexechi i ngêma noxrü ixîgüxü na naxütawa nangêxmagüxüçèx, natürü ngêma tama noxrü ixîgüxü rü tá ínanagu nawa ya yima üxü ya taguma ixoxüne —ñanagürü ga Cuáü.

Ngechucharü baiechiga

(Mr 1.9-11; Lc 3.21-22)

¹³ Rü yexguma nixî ga Gariréaanewa ne naxüxü ga Ngechuchu. Rü Cuáüxütawa nanguxü ga Yudáü ga natüwa, na Cuáü ínabaieixêxüçèx. ¹⁴ Rü noxri rü tama Ngechuchuxü ínabaieixêxüçèx ga Cuáü. Rü ñanagürü nüxü: —Choxü waxi nixî i namexü na ícubaieixêxü. ¿Rü ñuxäcü i cuma i chauxütawa cuxüxü na choma cuxü íchabaieixêxüçèx? —ñanagürü. ¹⁵ Natürü ga Ngechuchu rü ñanagürü nüxü: —Name nixî i choxü ícubaieixêxü i ñuxmax. Erü name nixî i tanaxü i guxüma i ngêma Tupana tüxü muxü —ñanagürü. Rü yexguma ga Cuáü rü: —Ngü —ñanagürü. ¹⁶ Rü yexguma marü Cuáü Ngechuchuxü íbaieixêxüguwena, rü dexáwa ínaxüächigu ga Ngechuchu. Rü yexgumatama niwãxna ga daxüguxü ga naâne, rü Ngechuchu nüxü nadau ga Tupanaãe i Üünexü ga wüxi ga muxtucurü na inagoxü rü nüxna na nanguxü. ¹⁷ Rü dauxüwa inanaxü ga wüxi ga naga ga ñaxü: —Daa nixî ya Chaune ya nüxü changechaüxüchicü, rü poraäcü namaã chataãxüchicü —ñaxü.

4

Ngechuchuxü naxü ga Chataná

(Mr 1.12-13; Lc 4.1-13)

¹ Rü yemawena rü Tupanaãe i Üünexü rü wüxi ga nachica ga ngextá taxüema íxãpataxüwa Ngechuchuxü naga na yéma Chataná nüxü üxüçèx. ² Rü taguma nachibü ga 40 ga ngunexü rü 40 ga chütaxü. Rü yemawena rü nataiwa. ³ Rü yexguma ga ngoxo ga Chataná rü Ngechuchuxütawa nangu, na nüxü naxüçèx. Rü ñanagürü nüxü: —Ega aixcüma Tupana Nane quixîgu, ¡rü daa nutagüxü namu na pãüxü nanguxüçèx! —ñanagürü ga Chataná. ⁴ Natürü Ngechuchu nanangãxü, rü ñanagürü: —Tupanaärü ore i ümatüxü rü ñanagürü:

“Tãütáma pãüxíca nanamaxêxêe i duüxügü, natürü guxüma i ore i Tupana nüxü ixuxü nixî i duüxügüxü maxêxêxü”,

ñanagürü. ⁵ Rü yexguma ga ngoxo ga Chataná rü guma ñãne ga üünene ga Yerucharéüwa nanaga. Rü tupauca ga taxünetapêxegu nanamunagü. ⁶ Rü ñanagürü nüxü: —Ega aixcüma Tupana Nane quixîgu, ¡rü nuã cugü rütáe! Erü Tupanaärü ore i ümatüxüwa rü ñanagürü:

“Tupana tá nanamu i norü orearü ngeruügu i daxüçüãx na cuxna nadaugüçèx. Rü naxmêxmaã tá cuxü niyauxgü na tama çacü rü nutagu cungüçèx”,

ñanagürü. ⁷ Rü Ngechuchu nanangãxü rü ñanagürü: —Rü Tupanaärü ore i ümatüxü rü ñanagürü ta:

“¡Tama name i nüxü na cuxüxü ya Cori ya curü Tupana!”

ñanagürü. ⁸ Rü yexguma wenaxärü ga ngoxo ga Chataná rü wüxi ga mëxpüne ga máxpüxüchinetapêxewa nanaga. Rü yéma Ngechuchuxü nanawêx ga guxüma ga nachiuãnegü na ñuxäcü yamexêchixü. ⁹ Rü Chataná rü ñanagürü nüxü: —Choma chi cuxna chanaxã i guxüma i ñãã cuxü chawéxü i ngêxguma chi chopêxegu cucaxãpüxügu rü choxü quicuèxüügu —ñanagürü. ¹⁰ Rü

yexguma ga Ngechuchu rü ñanagürü nüxü: —¡Choxna ixügachi, Pa Chataná! Erü Tupanaärü ore i ümatüxü rü ñanagürü:

“¡Nüxü icuèxüü ya Cori ya curü Tupana, rü yimaãxüxĩcatama napuracü!” ñanagürü. ¹¹ Rü yexguma ga ngoxo ga Chataná rü Ngechuchuna nixügachi. Rü Ngechuchuxütawa nangugü ga daxüçüãx ga Tupanaärü orearü ngeruügü. Rü Ngechuchuxü narüngüxëëgü rü nüxna nadaugü.

*Ngechuchu rü inanaxügü ga norü puracü ga Gariréanewa
(Mr 1.14-15; Lc 4.14-15)*

¹² Rü yexguma Ngechuchu nüxü ñnugu ga na napoxcuxü ga Cuáü ga baiüxëëruü, rü Gariréanewa naxü. ¹³ Natürü tama ñãne ga Nacharétugu narüxãüx, rü ñãne ga Capernáüwa naxü na yexma yaxãchiüxüçèx. Rü guma ñãne rü naxtaxa ga Gariréacutüwa nayexma ga Chaburãütanüxü rü Netarítanüxü ga duüxügü ixãchiügüxüwa. ¹⁴ Rü yema nangupetü na yangüçèx ga ore ga nuxcümaüçü ga Tupanaärü orearü uruü ga Ichaxía ümatüxü ga ñaxü:

¹⁵⁻¹⁶ “Rü duüxügüçèx tá nangox i wüxi i ngóonexëëruü i Chaburãüärü naãnewa, rü Netaríarü naãnewa, rü Yudáüärü tocutüwa rü ngëma nama i taxtücutüwa nadaxüwa, rü Gariréanewa i ngextá duüxügü i tama Yudíugü ixígüxü ixãchiügüxüwa. Rü ngëmaãçü i ngëma duüxügü ga noxri eãnexüwa yexmagüxü, rü tá nüxü nadaugü i wüxi i taxü i ngóonexëëruü. Rü ngëma duüxügü ga noxri yutüüwa yexmagüxü rü tá nüxü nabaxi i ngëma ngóonexëëruü”,

ñanagürü ga yema Ichaxíaarü ore. ¹⁷ Rü yexgumaüçüü nixĩ ga inaxügüãxü ga Ngechuchu ga nüxü na yaxuchigaxü ga norü ore ga ñaxü: —¡Nüxü perüxoe i pecüma i chixexü! Erü marü ningaica na perü ãëxgacü na yíxü ya Tupana —ñaxü.

*Ngechuchu rü naxcèx naca ga ãgümüçü ga püchaetanüxü
(Mr 1.16-20; Lc 5.1-11)*

¹⁸ Rü yexguma naxtaxa ga Gariréaanacügu yaxüxgu ga Ngechuchu, rü yéma nüxü nadau ga taxre ga yatü ga nügüeneëgü ixígüxü. Rü wüxi rü Chimáü ga Pedrugu ãegaxü nixĩ. Rü to rü Aüdrégu ãegaxü nixĩ. Rü nümagü rü ñnapüchaegü, yerü woetama püchaetanüxü nixígü. ¹⁹ Rü yexguma ga Ngechuchu rü ñanagürü nüxü: —¡Chowe perüxĩ! Rü chorü puracüwa tá pexü chamugü na chauxütawa penagagüxüçèx i duüxügü —ñanagürü. ²⁰ Rü yexgumatama ga yema taxre, rü yéma nanatëxgü ga norü püchagü. Rü Ngechuchuwe narüxĩ. ²¹ Rü yéamaxüra naxü ga Ngechuchu, rü yéma nüxü nadau ga to ga taxre ga nügüeneëgü. Rü Acobu nixĩ ga wüxi, rü Cuáü nixĩ ga to. Rü Zebedéu nanegü nixĩ ga nümagü. Rü nanatümaã wüxi ga nguewa nayexmagü. Rü yéma ñanangáitagü ga norü püchagü. Rü Ngechuchu naxcèx naca. ²² Rü yexgumatama yéma nguewa tüxü natëxgü ga nanatü. Rü Ngechuchuwe narüxĩ.

*Ngechuchu nanangüexëë ga muxüma ga duüxügü
(Lc 6.17-19)*

²³ Rü guxü ga Gariréaanegu nixügüchigü ga Ngechuchu. Rü wüxichigü ga ñãnewa, rü duüxügüarü ngutaquëxepataüwa ningüxëëtaechigü. Rü duüxügümaã nüxü nixuchiga ga ore ga mexü na ñnuxãçü ãëxgacü yíxü ya Tupana. Rü guxüma ga duüxügü ga yema idaaweexü rü nanameëxëë ga woo nañuxraüxü ga norü ñaawe nüxü yexmaxü, rü naxcèx nitaanegü. ²⁴ Rü Ngechuchuxü nacuáchigagü ga guxüma ga duüxügü ga Chíríaanecüãx. Rü naxütawa nanagagü ga nagúxüraüxü ga ñaxweanemaã idaaweexü. Rü

yematanüwa nayexma ga duüxügü ga ngúanemaã idaaweexü, rü duüxügü ga poraãcü naxünewa nangúxü, rü duüxügü ga ngoxo nawa yexmaxü, rü duüxügü ga óxwaãxgüxü, rü duüxügü ga nawãixãchigüxü. Rü Ngechuchu nanameëxëë ga guxüma ga yema. ²⁵ Rü Ngechuchu narüxí ga muxüma ga duüxügü ga Gariréaanecüãx, rü Decaporíchiuanecüãx rü Yerucharéüçüãx, rü Yudeaanecüãx, rü natü ga Yudáũârü tocutüçüãx.

5

Ngechuchu rü mëxpúnewa nüxü nixu ga Tupanaãrü ore

¹ Rü yexguma Ngechuchu nüxü deüxgu ga yema muxüma ga duüxügü, rü wüxi ga mëxpúnewa ínaxüãchi namaã ga norü ngúexügü. Rü yéma narüto, rü norü ngúexügü nüxü ínachomaëguãchi.

Yíxema taãëgüxechiga (Lc 6.20-23)

² Rü inanaxügü ga Ngechuchu ga na nangúexëëãxü, rü ñanagürü: ³ —Tataãëgü ya yíxema nüxü icuèxãchitanüxë i tümaãrü pecadu rü nüxü rüxoexe. Erü tümacèx nixí i ngema daxügüxü i naane i Tupana ãëxgacü íxíxüwa. ⁴ —Tataãëgü ya yíxema ngechaüğüxe, erü Tupana tá tüxü nataãëxëë. ⁵ —Tataãëgü ya yíxema tama tügü icuèxüxügüxe, erü tá tanayauxgü i ñoma i naãne i Tupana tümamaã ixunetaxü. ⁶ —Tataãëgü ya yíxema poraãcü tüxü nangúchaüxë na Tupanapëxewa meã tamaxëxü, erü Tupana tá tüxna nanaxã i ngëma maxü i mexü i naxcèx tadaugüxü. ⁷ —Tataãëgü ya yíxema togü i duüxügü tüxü ngechaütümüğüxe, erü tümagü rü tá ta Tupanaãxü tangechaütümüğü. ⁸ —Tataãëgü ya yíxema tama chixexügu rüxínüxë i tümaãëwa, erü yíxemagü tá tixígü ya Tupanaxü daugüxe. ⁹ —Tataãëgü ya yíxema togüarü chogürüü ixígüxe, erü Tupana rü nanegümaã tá tüxü naxu. ¹⁰ —Tataãëgü ya yíxema togü i duüxügü tümachi aiexe naxcèx na Tupana naxwèxexüãcüma meã tamaxëxü. Erü tümacèx nixí i ngema daxügüxü i naane i Tupana ãëxgacü íxíxüwa. ¹¹ —Petaãëgü i pema ega duüxügü tacü pemaã ixugüegu, rü chixri pemaã namaxëgu, rü chaugagu doramaã poraãcü chixri pechiga yad exagügu. ¹² —Rü petaãëgüama rü tama pexoegaãëgü! Erü daxügüxü i naãnewa tá penayauxgü i wüxi i perü ãmare i mexëchixü. Rü ngëma ñüxma pexü ngupetüxürüü nixí ga nüxü nangupetüxü ga nuxcümaüğüxü ga Tupanaãrü orearü uruüğü, yerü ga duüxügü rü naxchi rü ta naxaie.

Yucürarüü rü omürüü pixígü i ñoma i naãnewa (Mr 9.50; Lc 14.34-35)

¹³ —Pema rü ñoma yucürarüü pixígü i ñoma i naãnewa. Erü yima yücüra rü õna na namexëëxürüü, rü ngëxgumarüü ta i pema rü ñoma i naãnecüãx i duüxügüarü mexëëruü pixígü. Natürü ngëxguma chi nangeacagu ya yücüra, çrü tacüwa chi i namexü i ngëxgumax? Rü dücax, rü taxuwama name, rü ítanatèxmare, rü ngema duüxügü nawa nangagü. ¹⁴ —Pema rü ñoma i naãnecüãxãrü ngóonexëëruü pixígü. Rü wüxi ya ñane ya wüxi ya mëxpúnewa ngëxmane, rü taxuacüma inicux. ¹⁵ —Rü taxúema wüxi i omüwa tanangixichi na wüxi i caichãütüügu na tayaxücuchixüçèx. Natürü wüxi i omüwa tanangixichi na norü üchicaügu tanaxünagüxüçèx, na ngema tüxü nabaxixüçèx ya guxãma ya yíxema yima ñwa ngëxmagüxe. ¹⁶ —Rü name nixí i duüxügüpëxewa na meã pemaxëxü. Erü ngëmaãcü i pema rü omügürüü tá pinaígü. Rü ngëmaãcü duüxügü tá nüxü nadaugü i ngëma mexü i pexüxü, rü tá nüxü nicuèxüüğü ya Penatü ya daxüwa ngëxmacü.

Ngechuchu nanangúexëë ga mugüchiga

17 —Tama name i nagu perüxĩnũẽ na núma chaxũxũ na ichayanaxoxẽxũcèx i Tupanaãrũ mugũ ga Moĩché ùmatũxũ, rü yema ore ga nuxcũmaũgũxũ ga Tupanaãrũ orearũ uruũgũ namaã nguxẽẽtaegũxũ. Natürũ núma chaxũ na meã chayanguxẽẽxũcèx i ngẽma mugũ, rü tama na ichayanaxoxẽẽxũcèx. 18 —Rü aixcũma pemaã nüxũ chixu, rü ñuxma na tama nangupetũxũ i daxũguxũ i naane rü ñoma i naãne rü taxucürüwa naxũchicũxũ i ngẽma mugũ, rü bai i írarüwa ñuxmatáta yangu i guxũma i ngema mugũ nüxũ nixuxũ. 19 —Rü ngẽmacèx ya yíxema tama naga ñnũxẽ i ngẽma mugũ, rü woo i ñacũ i íraxũ i ngẽma nüxũ yaxuxũ rü duũxũgũxũ tangúexẽẽxgu na nümagũ rü ta tama naga naxĩnũẽxũcèx, rü yíxema rü tá guxũãrũ yexera wixweama tatèx i Tupana ãẽxgacũ íxĩxũwa. Natürũ yíxema naga ñnũxẽ i Tupanaãrũ mugũ rü duũxũgũxũ ngúexẽẽxè na tũmagũ rü ta naga taxĩnũẽxũcèx, rü guxũpèxewa tá taxũ i Tupana ãẽxgacũ íxĩxũwa. 20 —Rü pemaã nüxũ chixu, rü ngẽxguma tama Parichéugũ rü ngúexẽẽruũgũ i ore i mugüwa nguxẽẽtaegũxũãrũ yexera meã pemaxègu, rü tagutáma Tupana íngexmaxũwa pichocu.

*Ngechuchu nanangúexẽẽ na tama namexũ na texé tũmaẽneẽmaã na nuxũ
(Lc 12.57-59)*

21 —Pema rü marũ nüxũ pexĩnũẽ ga Moĩchéarũ ore ga nuxcũmaũgũxũ ga duũxũgũmaã nüxũ yaxuxũ ga ñaxũ:

“¡Tãxũ i pemáẽtagũxũ! Erü texé yamáẽtaxe rü tá tapoxcu”,

ñaxũ. 22 —Natürũ choma rü pemaã nüxũ chixu rü texé ya tũmaẽneẽmaã nuxẽ, rü tá tapoxcu. Rü texé ya ñacũ tũmaẽneẽmaã ixugũxe, rü ãẽxgacũgũpèxewa tá tũxũ nagagũ na tũxũ napoxcuxũcèx. Rü texé ya tũmaẽneẽxũ ngoxo wogũxe, rü ãũcũmaxũwa tangẽxma, erü ngürũãchi tá tapoxcu nagu ya yima üxũ ya ngoxo nagu poxcuene. 23-24 —Rü ngẽxguma tupaucawa Tupanana cunaxãxgu i curũ díeru, rü ngẽma nüxna cucuèxãchigu na ñacũcèx cumaã nanuxũ i cueneẽ, ¡rü ngẽxma tupaucagutama naxũ i ngẽma curũ ãmare i Tupanana cuxãxchaũxũ! ¡Rü cueneẽxũtawa naxũ, rü namaã yamexẽẽxĩra i ngẽma cuxchi na naxaixũ! Rü ngẽmawena rü marũ name i tupaucacèx cutaegu na Tupanana cuyaxãmarexũcèx i curũ díeru. 25 —Rü ngẽxguma chi wüxie wüxi i ngetanücèx cuxũ íxuaxũgu, rü ãẽxgacũxũtawa cuxũ tagaxgu, rü name nixĩ i namawatama tũxũ curũngũxmũxẽẽ na tama ãẽxgacũpèxewa cuxũ tagaxũcèx. Erü wüxicana na ãẽxgacũxũtawa cunguxũ, rü ãẽxgacũ tá purichíagũna cuxũ namu na cuxũ napoxcuxũcèx. 26 —Rü aixcũma cumaã nüxũ chixu rü tãũtáma ngema poxcupataũwa ícunguxuchi ñuxmatáta ngĩxũ cuxũtanũ i guxcũ i ngẽma díeru i nüxũ ngĩxũ cungetanücũ. Rü name nixĩ i paxa Tupanana peca na pexũ nüxũ nangechaũxũcèx i perũ pecadugũ na tama pexũ napoxcuexũcèx.

Ngechuchu namaã nangúexẽẽtae na tama namexũ na wüxi i ngemaã chixexũgu rüxĩnũxũ

27 —Pema marũ nüxũ pexĩnũẽ ga Tupanaãrũ mu ga Moĩché nuxcũma nüxũ ixuxũ ga ñaxũ:

“¡Tama name i naĩ i ngemaã na icupexũ!”

ñaxũ. 28 —Natürũ choma rü pemaã nüxũ chixu, rü yíxema texé ya wüxi i ngexũ dawenüxẽ rü tũxũ nangúchaũxẽ na ngĩmaã itapexũ, rü Tupanapèxewa rü marũ chixexũ ngĩmaã taxũ i tũmaãẽwa. 29 —Rü ngẽxguma chi yima curũ tũgũnèxètü pecadu cuxũ üxèẽgu rü ¡noxtacũma nayaxu rü yaxũgu naña! Erü narũmemaẽ nixĩ na yima cuxetüxicatama iyarũtaxuxũ na tama guxũ i cuxune iyarũtaxuxũcèx nagu ya yima üxũ ya ngoxogũ nagu poxcuene. 30 —Rü ngẽxguma chi yima curũ tũgũnemèxè pecadu cuxũ üxèẽgu, rü name nixĩ i noxtacũma ícunadae rü yaxũgu cuyaña. Erü narũmemaẽ nixĩ na yima

cuxmëxīcatama iyarütaxuxū na tama guxū i cuxune iyarütaxuxūcèx nagu ya yima üxü ya ngoxogü nagu poxcuene. Rü ngēmaācū ega woo pexū naguxchagu rü name nixī i nüxna pixīgachi i guxūma i chixexū i nagu piyixchaūxū —ñanagürü.

Ngechuchu namaā nangúexēētae na tama namexū na texé tümamèxū ítáxū
(Mt 19.9; Mr 10.11-12; Lc 16.18)

³¹ Rü ñanagürü ta ga Ngechuchu: —Moiché rü ũpa nüxū nixu rü yíxema tümamèxū ítaxe, rü tanaxwèxe i ngīxna tanaxā i wüxi i popera i nawa nüxū tixuxū na marü ngīxū ítátáxū. ³² —Natürü choma rü pemaā nüxū chixu, rü ngēxguma wüxi ya yatü naxmèxū ítèxgu, rü chi tama naī ya yatümaā nangēāxūgagu yixīgu, rü āücūmaxūwa ngīxū tangēxmaxēē erü ngēmaācū ngürüāchi pecadu ixü. Rü yíxema ngīmaā āmaxē i wüxi i nge i marü ngīte ngīxū ítèxcü, rü tümā rü ta pecadu taxü.

Ngechuchu namaā nangúexēētae ga unetachiga

³³ Rü ñanagürü ta ga Ngechuchu: —Pema rü marü nüxū pexīnüē ga Moichéarü ore ga nuxcūmaūgūxū ga duūxūgūmaā nüxū yaxuxū ga ñaxū: “Ngēxguma Tupanaēgagu texémaā tacüçèx icuxunetagu, rü name nixī i cuyanguxēē i ngēma curü uneta”, ñaxū. ³⁴ —Natürü choma rü pemaā nüxū chixu rü tama name i texéégagu rü éxna tacüégagu wüxi i duūxūmaā ipexuneta. Rü tama name i daxūgūxū i naāneēgagu ipexuneta, erü ngēma narüto ya Tupana. ³⁵ —Rü tama name i ñoma i naāneēgagu ipexuneta, erü Tupanaārü cuaixcutüchica nixī. Rü tama name i Yerucharéūēgagu ipexuneta, erü Tupana ya guxūārü āēxgacüarü īāne nixī. ³⁶ —Rü tama name i cugüégagu icuxuneta, erü woo wüxitama i cuyae rü taxucürüwa cunaxüchicüü na nachóxūcèx rü éxna nawaxūxūcèx. ³⁷ —Rü ngēmacèx rü ngēxguma icuxunetagu rü narümemaē nixī i: —Ngū, tá chanaxū —ñaperügü, rü éxna: —Tāütāma chanaxū —ñaperügü. Erü guxūma i to i ore i namaā icuxunetaxū, rü ngoxo i Chatanáwa ne üxū nixī.

Ngechuchu namaā nangúexēētae na ñuxācū namexū na namaā ichopetüxū i ngēma duūxūgü i chixri tamaā maxèxū

³⁸ Rü ñanagürü ta ga Ngechuchu: —Pema rü marü nüxū pexīnüē ga Tupanaārü mu ga Moiché nuxcūma nüxū ixuxū ga ñaxū: “Ngēxguma texé wüxi i duūxūxū icháixetüxēēgu, rü tümaxētümaātama tayangutanüxēē. Rü texé wüxi i duūxūxū ibüepütagu, rü tümapütamaātama tayangutanüxēē”, ñaxū. ³⁹ —Natürü choma rü pemaā nüxū chixu rü tama name i pegütama ípexoxū nüxna i duūxū i chixecūmaxū. Rü ngēxguma texé cuxū pechíwegu, rü marü name i curü tochiwe rü ta icunaxā na ngēma rü ta cuxū tapechiwexūcèx rü tama name na cuxütanüxū. ⁴⁰ —Rü ngēxguma texé cuxū íyaxuaxūgu rü cuxna tayapuchaxūgu i curü daxū, rü name nixī i curü gáuxūchiru rü ta noxtacūma tüxna cunaxā. ⁴¹ —Rü ngēxguma texé cuxū muxgu na wüxi i kilómetrugu tacü tüxū quingexūcèx, rü name nixī i taxre i kilómetrugu tüxū cuyange. ⁴² —Rü ngēxguma texé curü ngēmaxūcèx cuxna caxgu, rü name nixī i tüxna cunaxā. Rü tama name na namaā cuxaūxū i curü ngēmaxūgü ega texé paxaāchi cuxna naxcèx caxgu.

Name nixī i nüxū tangechaū i ngema tamaā rüwanügüxū

⁴³ Rü ñanagürü ta ga Ngechuchu: —Pema rü marü nüxū pexīnüē ga Tupanaārü mu ga Moiché nuxcūma nüxū ixuxū ga ñaxū: “¡Nüxū nangechaū i cumücü, rü naxchi naxai i curü uwanü!”

ñaxũ. ⁴⁴ —Natürü i choma rü pemaã nüxũ chixu rü: —¡Nüxũ pengechaũ i perü uwanügü! ¡Rü naxcèx peyumüxẽ i ngẽma duũxügü i chixexũmaa pewe ingexütanüxũ! ⁴⁵ —Rü ngẽxguma ngẽmaãcü pemaxẽgu rü aixcüma Penatü ya daxügücü nanegü tá pixígü. Erü nüma rü inanabáixẽẽ ya üexcü naxcèx i mexü i duũxügü rü chixexü i duũxügü. Rü nanapuxẽẽ naxcèx i duũxügü i meã maxẽxü rü duũxügü i chixri maxẽxü. ⁴⁶ —Rü ngẽxguma chi ngẽma duũxügü i pexü ngechaügüxüxüxĩcatama pengechaügügu, ¿rü tacü rü ãmare tá Tupanaxütawa peyauxgü naxcèx i ngẽma? Erü ngẽma yatügü i Dumaãrü ãxgacücèx dïeru ngĩxü ideetanüxüwa puracüexü rü ngẽxgumarüũ nanaxügü. ⁴⁷ —Rü ngẽxguma chi peeneëgüxüxĩcatama perümoxëgu, rü guxü i duũxügürüütama pixígü. Erü woo ngẽma duũxügü i tama Tupanaxü cuèxgüxü, rü ngẽxgumarüütama nanaxügü. ⁴⁸ —Rü ngẽmacèx penaxwae na aixcüma namexü i perü maxü naxrũxü ya Penatü ya Tupana ya aixcüma mearü maxüãcü.

6

Ngechuchu rü norü ngúetanüxüxü nangúexẽẽ na ñuxãcü mexü naxügüxü

¹ Rü ngẽxguma tacü rü mexü pexüxchaügu, rü name nixĩ i pexuãẽ na tama duũxügüpëxewa penaxüxü i ngẽma na duũxügü pexü dauxücèx rü pexü yacuèxüügüxücèx. Erü ngẽxguma duũxügü pexü icuèxüügüxücèx mexü pexüxgu, rü Penatü ya daxügücü rü tãütáma ãmare pexna naxã. ² —Rü ngẽmacèx ngẽxguma texéxü curüngüxẽẽchaügu, rü name nixĩ i tama poraãcü nüxü quixuchiga i ngẽma. Rü tama name i ngẽma duũxügü i togüpëxewa meã maxënetaxürüũ na quiixü. Erü nümagü rü norü me nixĩ i ngutaquëxepataügüwa rü ítamügüwa nüxü nixuchiga ega tacü rü mexü naxügügu. Rü ngẽmaãcü nanaxügü na togü meã nachiga ídexagüxücèx. Natürü choma rü aixcüma pemaã nüxü chixu rü ngẽma na duũxügü nüxü icuèxüügüxü nixĩ i norü ãmare, rü tãütáma nanayauxgü i to i ãmare i Tupanaxütawa. ³⁻⁴ —Natürü i cuma rü ngẽxguma tacü tuxna cuxãxgu ya yíxema ngearü ngẽmaxüãxgüxe, rü name nixĩ i taxúema cuxü dauãcüma na cunaxüxü i ngẽma. Rü woo cumücüxüchi rü tama name i nüxü na nacuáxü i ngẽma. Rü Cunatü ya daxügücü ya nüxü daucü i ngẽma cuxicatama cuxüxü, rü tá cuxna nanaxã i curü ãmare.

Ngechuchu nanangúexẽẽ ga yumüxëchiga (Lc 11.2-4)

⁵ —Rü ngẽxguma peyumüxëgügu, rü tama name i ngẽma duũxügü i togüpëxewa meã maxënetaxürüũ pixígü. Erü nümagü rü ngẽxguma nayumüxëgügu, rü norü me nixĩ na chiãcü nayumüxëgüxü i ngutaquëxepataügüwa rü ítamügüwa na duũxügü nüxü na daugüxücèx. Rü aixcüma pemaã nüxü chixu rü ngẽma na duũxügü nüxü daugüxüxĩcatama nixĩ i norü ãmare. ⁶ —Natürü ngẽxguma cuyumüxëgu, rü name nixĩ i curü ucapugu cuxücu, rü cunawãxta i curü ñãx, rü ngẽma cuyumüxë namaã ya Cunatü ya bexma cumaãĩcatama ngẽma ngẽxmacü. Rü ngẽxguma ya yima Cunatü ya Tupana ya nüxü daucü i ngẽma cúãcü cuxüxü, rü nüma tá cuxna nanaxã i curü ãmare. ⁷ —Rü tama name i natücèxma cunamëxëẽ i curü yumüxë naxrũü i ngẽma duũxügü i tama Tupanaxü cuèxgüxü. Erü nümagü rü nagu narüxĩnüẽ rü ngẽma na namëxëëgüãxücèx i norü yumüxë rü Tupana tá nüxü naxĩnü. ⁸ —Rü tama name i ngẽma duũxügürüũ pixígü, erü woo tauta naxcèx ípecaxgu rü Penatü ya Tupana rü marü nüxü nacuèx na tacü pexü taxuxü. ⁹ —Rü ngẽmacèx rü ñaãcü tá peyumüxëgü i pemax:

“Pa Tonatü ya Daxügücüx, rü aixcüma üü necü quixĩ i cumax. ¹⁰ ;Rü núma naxü na torü ãëxgacü quiixücèx! Rü tanaxwèxe i curü ngúchaü na naxügüxü i duüxügü i ñoma i nañnewa ngëxgumarüü i daxügüxü i nañnewa na curü ngúchaü ínaxügüxürüü. ¹¹ ;Rü toxna naxã i torü õna i ñoma i ngunexücèx ixixü! ¹² ;Rü toxü nüxü nangechaü i torü chixexü i taxüxü ngëxgumarüü i toma rü tüxü nüxü na tangechaüxürüü ya yixema chixexü tomaã ügüxe! ¹³ ;Tãxü i tacü rü chixexüpëxewa toxü cuwogüxü na tama nagu tayixücèx! Natürü tanaxwèxe i toxna cudau na tama ngëma chixexü taxügüxücèx. Erü cuma rü guxüguma guxüärü ãëxgacü quixĩ rü cuporaxüchi rü cumexëchi. Rü ngëmaãcü yĩ”.

¹⁴—Rü ngëxguma pema nüxü nüxü pengechaügu i ngëma duüxügü i chixexü pemaã ügüxü, rü Penatü ya daxügücü rü tá ta pexü nüxü nangechaü i perü pecadugü. ¹⁵ —Natürü ngëxguma tama nüxü nüxü pengechaügu i ngëma duüxügü i chixexü pemaã ügüxü, rü Penatü ya daxügücü rü tá ta tãütáma pexü nüxü nangechaü i perü pecadugü.

Ngechuchu nanangüexë ga aurechiga

¹⁶—Rü ngëxguma tama pechibüëãcüma peyumüxëgügu rü tama name i pegü pengechaüchíwexë naxrüü i ngëma duüxügü i togüpëxewa meã maxënetaxü. Erü nümagü rü ngëmaãcü nanaxügü na togü nüxü na daugüxücèx i ngëma na Tupanacèx naxaureexü. Rü aixcüma pemaã nüxü chixu rü ngëma na duüxügü nüxü daugüxüxícatama nixĩ i norü ãmare. ¹⁷—Natürü ngëxguma cuma rü tama cuchibüãcüma cuyumüxëgu rü name nixĩ i meã cugü cuyauxchiwe rü meã cugü curüxíxëru. ¹⁸—Rü ngëmaãcü i togü i duüxügü rü tãxütáma nüxü nacüèxgü na tama cuchibüãcüma cuyumüxëxü. Rü Cunatü ya bexma cumaã ngëma ngëxmacüxícatátama cuxü nadau, rü tá cuxna nanaxã i curü ãmare naxcèx i ngëma cuxüxü.

Ñuxãcü tüxü nangëxma i tórü meruügu i daxügüxü i nañnewa (Lc 12.33-34)

¹⁹—Rü tama name i pegücèx penanutaquëxe i muxüma i perü meruügu i ñoma i nañnewa. Erü ñoma i nañnewa rü paxama nagux i perü ngëmaxügü, rü naweane rü paxama nanachixexëë, rü ngítèèxgüxü rü naxcèx nangixgü. ²⁰—Rü narümemaë nixĩ i penamuxëë i perü meruü i daxügüxü i nañnewa. Erü ngëma rü tãxütáma nagux, rü naweane rü tãxütáma nanachixexëë, rü ngítèèxgüxü rü tãxütáma ngexma nachocu na naxcèx nangixgüxücèx. ²¹—Erü ngextá ínangëxmaxüwa i perü ngëmaxügü, rü ngëxma nixĩ i perüxĩnüëxü.

Taxüneãrü omüchiga (Lc 11.34-36)

²²—Cuxetügü rü ñoma wüxi i omürüü nixĩ i cuxunecèx. Rü ngëxguma ngëma Tupana cuxü naxwèxexücèx cudèuxgu, rü guxüma i curü maxü rü name. ²³—Natürü ngëxguma ñoma i nañneãrü ngúchaüçèx cudèuxgu, rü guxüma i curü maxü rü chixexüwa nangëxma. Rü aixcüma nataxuma i eãnexü i ngëmaãrü yexera ixixü i Tupanapëxewa.

¿Texécèx tá cumaxü, Tupanacèx rü ëxna dīerucèx? (Lc 16.13)

²⁴—Taxucürüwa wüxi i duüxü rü nataxrearü coriãx. Erü wüxi i norü corichi rü tá naxai, rü ngëma to rü tá nüxü nangechaü. Rü ëxna wüxícèx rü tá meã napuracü, rü ngëma to rü tá nüxü naxo. Rü taxucürüwa Tupanacèx pemaxë, ega perü dīerugama perüxĩnüëgu.

*Tupana rü naxãcüguna nadau
(Lc 12.22-31)*

²⁵—Rü ngëmacèx pemaã nüxü chixu rü: ¡Tãxü i pexoegaãëgüxü naxcèx na tacü tá pengõxgüxü rü tacü tá pixaxgüxü, rü tacümaã tá na pexãxchirugüxü! Erü perü maxü rü õnaãrü yexera nixi, rü pexene rü naxchiruarü yexera nixi.
²⁶—¡Dücèx penangugü i werigü i tama toegüchiréxü, rü tama nanetüarü o ibuxgüxü, rü ngepatagüxü na ngexta namaã nanguxügüxüçèx i norü õna! Natürü Penatü ya daxügücü rü nanaxüwemü. Rü pema rü Tupanacèx rü guxüma i werigüarü yexera pixigü. ²⁷—Rü taxuwama name na tacüçèx pexoegaãëgüxü. Erü taxucürüwa ya wüxie i pema rü wüxi i oragu rü ipenamèxãchixëë i perü maxü ega woo poraãcü naxcèx pexoegaãëgügu. ²⁸—¿Rü tüxcüü pexoegaãëgü naxcèx i pexchiru? ¡Dücèx penangugü i ngëma putüragü i ngextámare yaexü i tama puracüexü, rü tama nügü üxchirugüxü!
²⁹—Natürü pemaã nüxü chixu rü woo guma äëxgacü ga Charumóu ga na namexëchixü ga naxchiru, rü taguma wüxi ga putürachacurüü namexëchi.
³⁰—Rü ngëxguma Tupana ngëmaãcü nangëxãëgu i ngëma putüragü i ñuxma ngëxmagüxü natürü moxü rü marü taxuxü, rü yexera tá pexna nadau i pemax, Pa Yatügü i Tama Aixcüma Meã Yaxõgüxüx. ³¹—Rü ngëmacèx tama name i pexoegaãëgü rü ñaperügügü: —¿Tacü tá tangõxgü? rü ëxna —¿tacü tá tixaxgü? rü ëxna —¿tacümaã tá taxãxchirugü? —ñaperügügü. ³²—Erü ñoma i naãnecüãx i duüxügü rü naxcèx nadaugü i guxüma i ngëma pemaã nüxü chixuxü. Natürü pema rü pexü nangëxma ya Penatü ya daxügücü ya nüëchama nüxü cuácü i pexü na nataxuxü i guxüma i ngëma.
³³—Natürü narümemaë nixi i Tupanacèxira pedaugü na ngëma nüma pexü nanaxwëxexüxira pexügüxüçèx. Rü naëtü tá pexna nanaxã i guxüma i tacü i pexü taxuxü. ³⁴—¡Tãxü i naxcèx pexoegaãëgüxü i ngëma moxü tá üpetüxü! Erü ngëma moxüãrü ngunexü rü tá nüxü nangëxma i guxchaxügü i namaã ínanguxü. Erü wüxichigü i ngunexü rü nüxü nangëxma i noxrütama guxchaxügü, rü ngëmacèx tama name i moxüãrü guxchaxügüçèx pexoegaãëgü i ñuxmax —ñanagürü.

7

*Tama name i toguexü tixu
(Lc 6.37-38, 41-42)*

¹ Rü Ngechuchu rü ñanagürü ta: —¡Rü taxü i togüxü pixuxü! Rü ngëxguma ya Tupana rü tãxütãma pexü nixu na pechixexü. ²—Erü ngëxgumarüü na togüxü pixuxü rü Tupana rü tá pexü nixu na pechixexü. Rü ngema na togüxü pepoxcuexü, rü ngemaãcü tátama nixi ya Tupana i pexü napoxcuexü. ³—¿Rü tüxcüü i nüxü cudawenüxü i ngëma cueneëãrü üxaxetüxü i íraxü, ega chi tama naxcèx cuxoegaãëgu i ngëma cuxetüwatama ngëxmaxü i naïpüta i taxü?
⁴—Rü ngëxguma cuxetüwatama nangëxmagu i wüxi i naïpüta i taxü ¿rü ñuxãcü i cueneëxü cuchixewexü, rü ñácuxü nüxü:
“¡Pa Chaueneëx, cuxü chanayauxchaü i ngëma curü üxaxetüxü!” —ñácuxü?
⁵—Pa Duüxü i Meã Maxnetaxüx, rü name nixi i cunayauxira i ngëma naïpüta i cuxetüwatama ngëxmaxü, rü ngëmaãcü tá mea nüxü cudau na cunayaxuxüçèx i ngëma cueneëãrü üxaxetüxü. [Rü ngëmacèx name nixi i cuxira nüxü curüxo i ngëma chixexü i taxü i cumatama cuxüxü, rü ngëxguma tá cume na nüxü curüngüxëëxüçèx i cueneë na nüxü naxoxüçèx i ngëma chixexü i íraxü i naxüxü.] ⁶—Rü tama name i Tupanaãrü ore i üünexümaã penachixewe i ngëma duüxügü i chixecümagüxü i tama yaxõgüchaüxü, erü ngürüãchi

ngëmacèx tá pexü nimèxgü. Rü ngëxgumarüü tama name i Tupanaärü oremaã penachixewe i ngëma duüxügü i tama nüxü cuèxgüchaüxü, erü tá ínanatèxgü.

Name nixĩ i tórü yumüxëwa Tupanana naxcèx taca rü naxcèx tadaugü rü ãxwa: Tu tu tu, ñatarügügü

(Lc 6.31, 11.9-13)

⁷—iTupanana naxcèx peca! rü nüma tá pexna nanaxã. iRü Tupanaxütagu naxcèx pedau! rü tá nüxü ipeyangau. iRü norü ãxwa: Tu tu tu, ñapegü! rü tá pexcèx nayawãxna. ⁸—Erü guxãma ya yíxema naxcèx ícaxe, rü tanayaxu. Rü guxãma ya naxcèx dauxe, rü nüxü itayangau. Rü guxãma ya yixema ãxwa: Tu tu tu, ñagüxe, rü tá tümacèx niwãxna. ⁹—Rü dücax i pemax, rü ngëxguma chi wüxi i pexacü pãücèx ícaxgu, rü ¿ñuxãcü chi wüxi ya nuta nüxna pexãxü? ¹⁰—Rü ngëxguma chi choxnicèx pexna nacaxgu rü ¿ñuxãcü chi i äxtape nüxna pexãxü? ¹¹—Rü pema na pichixecümachiréxü rü nüxü pecuèx na mexü i ämare pexacügüna pexãxü. Natürü Penatü ya daxügücü rü ngëma pema pexacügüna pexãxüärü yexera tá tüxna naxã ya yíxema naxütawa naxcèx ícaxe. ¹²—Rü pemaã nüxü chixu, rü ngëma pema penaxwèxexü i togü pemaã na naxüxü, rü name nixĩ i pema rü ta ngëmaãcütama namaã penaxü. Erü ngëmaãcü tüxü namu i Tupanaärü ore ga Moïché ümatüxü rü yema ore ga nuxcümaügüxü ga Tupanaärü orearü uruügü ümatüxü.

Ïax i íraxüchiga

(Lc 13.24)

¹³—Name nixĩ i ngëma ãx i íraxüwaama pichocu. Erü ngëma ãx i yuwa tüxü gaxü rü ngëma nama i yuwa daxü rü nata. Rü muxüchixüma i duüxügü nagu naxĩ. ¹⁴—Natürü ngëma nama i maxüwa nadaxü rü ngëma ãx i maxücèx nawa ixücuxü rü naxíra. Rü noxretama nixĩ i duüxügü i nüxü iyangaugüxü.

Wüxi i nanetü rü norü owa nixĩ i nüxü icuáxü

(Lc 6.43-44)

¹⁵—Rü naxcèx pexuãégü i ngëma doratèèxgüxü i nügü ixugünetaxü na Tupanaärü orearü uruügü yixügüxü. Erü nümagü rü petanüwa nangugü, rü nügü mexü i duüxügüneta nixügüxë. Natürü naãewa rü poraãcü chixexügu narüxñü. ¹⁶—Rü pema rü nacümawa tá nüxü pecuèx i ngëma duüxügü, ngëxgumarüü i wüxichigü i nanetügü rü norü owa na nüxü icuáxürüü ngoxi name rü éxna tama. Rü wüxi i torawa rü taxucürüwama ubagü tayaxu. Rü wüxi i chuchuxüwa rü taxucürüwama orix i igu tayaxu. ¹⁷—Erü guxüma i nanetü i mexü rü name i norü o. Rü guxüma i nanetü i chixexü rü nachixe i norü o. ¹⁸—Rü wüxi i nanetü i mexü rü taxucürüwama nachixe i norü o. Rü wüxi i nanetü i chixexü rü taxucürüwama name i norü o. ¹⁹—Rü guxüma i nanetü i tama mexü i norü o rü tayadaxüchi, rü ñuxüchi tayagu. ²⁰—Rü ngëxgumarüü nacümawa tá nüxü pecuèx i ngëma duüxügü i Tupanaärü orearü uruügüneta ixügüxü.

Tãütáma guxüma i duüxügü nichocu i ngextá Tupana äëxgacü íixüwa

(Lc 13.25-27)

²¹—Rü tama guxüma i duüxügü i nügü ixügüxü na chorü duüxügü yixügüxü rü tá nichocu i ngextá Tupana äëxgacü íixüwa. Natürü yíxema aixcüma Chaunatü ya daxügücüga Ìnüèxëícatátama tixĩ ya ngëma ichocuxe. ²²—Rü ngëxguma ngëma ngunexü i naãneärü guxwa nanguxgu, rü muxüma i duüxügü rü choxü tá ñanagürügü: —Pa Corix, toma rü togü i duüxügümaã nüxü tixu i curü ore, rü cuégagu ítanawoxü i ngoxogü, rü cuégagu tanaxü i muxüma i mexü i taxü i Tupanaärü poramaã taxüxü —ñanagürügü tá choxü.

23 —Natürü ngëxguma rü tá ñacharügü nüxü: —Taguma chorü duüxügü pixĩgü. ¡Rü choxna pixĩgachi i pema i chixexü ügüe! —ñacharügü tá.

Yatü i Cristuga ññüxü rü yatü i tama Cristuga ññüxüchiga
(Mr 1.22, Lc 6.47-49)

24 —Rü ngëmacèx ya yíxema choxü ññüxë rü naxúxe i ngëma choma tüxü chamuxü, rü wüxi ga yatü ga meã naãëxü cuácü ga nutsa ga tacüétügu üpatacürüü tixĩ. 25 —Rü pucü ga tacü ínangu, rü narümèx ga taxtü, rü nixüüchi ga wüxi ga tacü ga buanecü rü guma ñgu nanguema. Natürü guma ñ rü tama niwèxtaü yerü wüxi ga nutsaétügu naxü. 26 —Natürü yíxema choxü ññüxë rü tama naxúxe i ngëma choma tüxü chamuxü, rü wüxi ga yatü ga tama naãëxü cuácü ga naxnücügumare üpatacürüü tixĩ. 27 —Rü pucü ga tacü ínangu, rü narümèx ga taxtü, rü wüxi ga tacü ga buanecü nixüüchi rü nagu nanguema ga guma ñ. Rü niwèxtaü, rü yexma nayarüxo ga guxüma —ñanagürü ga Ngechuchu. 28 Rü yexguma yagüegagu ga Ngechuchu ga na yadexaxü, rü ga duüxügü rü nabèixächiaëgü namaã ga norü nguxëëtae. 29 Yerü nüma rü Tupanaãrü poramaã nanangüexëë, rü tama yema ngüexëëruügü ga ore ga mugüwa nguxëëtaegüxürüü nixĩ.

8

Ngechuchu rü wüxi ga rüchaxünexüçèx nayataanexëë
(Mr 1.40-45; Lc 5.12-16)

1 Rü yexguma guma mëxpúnewa yanaxüegu ga Ngechuchu, rü muxüma ga duüxügü nawe narüxĩ. 2 Rü Ngechuchucèx nixü ga wüxi ga yatü ga chaxünemaã idaawecü. Rü Ngechuchupéxegu nayacaxápüxü, rü ñanagürü nüxü: —Pa Corix, ngëxguma chi cuma cunaxwèxegu, rü chi cuxü natauxcha na choxü curümexëëxü —ñanagürü. 3 Rü yexguma ga Ngechuchu rü nüxü ningögü, rü ñanagürü nüxü: —Ngü, chanaxwèxe. ¡Rüme! —ñanagürü. Rü yexguma yema ñaxgu ga Ngechuchu, rü naxcèx nitaane ga guma yatü ga na nachaxüneãxü. 4 Rü Ngechuchu rü ñanagürü nüxü: —¡Dücèx, taxuemaã tá nüxü quixu! ¡Natürü ngema paixütawa naxü, rü cugü iyawëx! ¡Rü nüxna naxã i ngëma ãmare ga Moïché tüxü muxü na duüxügü nüxü cuáxüçèx na curümexü! —ñanagürü.

Ngechuchu rü Dumacüãx ga churaragüarü ãëxgacüarü duüxüxü narümexëë
(Lc 7.1-10)

5-6 Rü Capernáüwa naxü ga Ngechuchu. Rü yexguma yéma nanguxgu, rü wüxi ga churaragüarü ãëxgacü ga capitáü ga Dumacüãx rü Ngechuchucèx nixü. Rü Ngechuchuxü nacèxü, rü ñanagürü: —Pa Corix, chorü duüxü rü nanawãixächi. Rü ngürücarewa nangëxma i chopatawa, rü poraãcüxüchima ngüxü ninge —ñanagürü. 7 Rü Ngechuchu rü ñanagürü nüxü: —Marü tá ngema chaxü na naxcèx chayataanexëëxüçèx —ñanagürü. 8 Natürü nüma ga capitáü nanangãxü, rü ñanagürü: —Pa Corix, choma rü taxuwama chame na chopatagu na cuxücuxüçèx. Rü chanaxwèxe i curü orewaxicatama nüxü quixu, rü tá naxcèx nitaane i chorü duüxü. 9 —Erü choma rü ta rü chorü ãëxgacümëxëwa changëxma. Rü choxmëxwa nangëxmagü ta i ñuxre i churaragü. Rü ngëxguma chanamuxgu i wüxi na ngextá naxüxüçèx, rü ngema naxü. Rü ngëxguma chaugüxütawa naxcèx changemagu i to, rü chauxütawa nangu. Rü ngëxguma wüxi i chorü duüxüxü chamuxgu na tacü na naxüxüçèx, rü choxü nanaxü —ñanagürü. 10 Rü yexguma yemaxü naxñügu ga Ngechuchu rü nabèixächiaë. Rü ñanagürü nüxü ga yema duüxügü ga nawe rüxüxü: —Aixcüma pemaã nüxü chixu rü taxuüma i Yudíugütanüwa nüxü

ichayangau i wüxi i duüxü i ñaã yatürüü aixcüma yaxõxü. ¹¹ —Rü choma rü pemaã nüxü chixu rü muxüchixü i duüxügü rü guxüwama tá ne naxi, rü Tupana ãëxgacü íixixüwa tá nachibüe namaã ya tórü oxigü ya Abráü rü Ichaá, rü Acobu. ¹² —Natürü muxüma i Abráütanüxügü i Yudiügü rü tãütama nichocu i ngextá Tupana ãëxgacü íixixüwa. Rü eãnexüwa tá nawogü. Rü ngema tá naxauxe, rü tá nixüxchapütagü —ñanagürü. ¹³ Rü yexguma ga Ngechuchu rü ñanagürü yema capitáüxü: —¡Cupatacèx nataegu! Rü tá naxcèx nitaane i curü duüxü, erü cuyaxõ na naxcèx tá yataanexü —ñanagürü. Rü yexgumatama naxcèx nitaane ga yema capitáüärü duüxü.

Ngechuchu rü Pedru nèxècèx nayataanexë
(Mr 1.29-31; Lc 4.38-39)

¹⁴ Rü Pedrupatawa naxü ga Ngechuchu. Rü yéma ngixü nadau ga Pedru nèxè ga ngürücaregu irüxãüxcü yerü iyaxaxüne. ¹⁵ Rü Ngechuchu ngixmëxgu ningögü, rü yexgumatama igèuxächi ga yema na yaxaxünexü. Rü íirüda ga ngĩmax. Rü ñuxüchi naxcèx inamexë ga õna.

Ngechuchu rü muxüma ga idaaweexüçèx nayataanexë
(Mr 1.32-34; Lc 4.40-41)

¹⁶ Rü yexguma marü yanaxücuchaügu ga üèxcü, rü Ngechuchuxütawa nanagagü ga muxüma ga duüxügü ga ngoxoãxgüxü. Rü wüxitama ga oremaã Ngechuchu ínanawoxü ga yema ngoxogü. Rü nanameëxë ta ga guxüma ga yema togü ga idaaweexü. ¹⁷ Rü yemaãcü Ngechuchu nayanguxë ga yema ore ga nuxcümaüxü ga Tupanaärü orearü uruü ga Ichaxía nüxü ixuxü ga ñaxü:

“Rü nüma rü tüxü naporaexë i ngëxguma ituraegu, rü tüxü narümeexë i ngëxguma idaaweegu”,
ñaxü.

Duüxügü ga Ngechuchuwe rüxixchaüxüchiga
(Lc 9.57-62)

¹⁸ Rü yexguma Ngechuchu nüxü dèuxgu ga muxüma ga duüxügü na nüxü íchomaëguächixü, rü norü ngüexügümaã nüxü nixu, rü ñanagürü: —¡Rü ngixã, rü naxtaxaarü tocutüwa taxí! —ñanagürü. ¹⁹ Rü wüxi ga ngüexëruü ga ore ga mugüwa ngüxëtaexü, rü Ngechuchucèx nixü, rü ñanagürü nüxü: —Pa Ngüexëruü Pa Ngechuchux, cuwe charüxüxchaü i ngextá cuma ícuxüxüwa —ñanagürü. ²⁰ Rü Ngechuchu nanangãxü rü ñanagürü: —Ngowagü rü nüxü nangëxma i naxmaügu, rü werigü rü nüxü nangëxma i naxchiãügu. Natürü choma i Tupana Nane na duüxüxü chiixü, rü nataxuma i chauchica i ngextá nagu chicuxeruxü —ñanagürü. ²¹ Rü wüxi ga to ga norü ngüexü, rü ñanagürü nüxü: —Pa Corix, cuwe charüxüxchaü, natürü chanaxwèxe i chaunatü tüxü ichayatèxira —ñanagürü. ²² Rü Ngechuchu nanangãxü, rü ñanagürü nüxü: —¡Noxtacüma chowe rüxü! Rü nüe i ngëma cutanüxü i tama yaxögüxü iyatèxgü i ngëma yuexü —ñanagürü.

Ngechuchu rü buanecüxü rü yuapexü ínayachaxächixë
(Mr 4.35-44; Lc 8.22-25)

²³ Rü yexguma ga Ngechuchu rü wüxi ga ngegu nixü. Rü norü ngüexügü rü ta ínayaxümücügü, rü inaxiãchi. ²⁴ Rü ngürüächi naxtaxaarü ngãxütügu nüxü naxü ga wüxi ga buanecü ga taxüchicü. Rü guma nguewa rü niyau-cuchichigü ga dexá. Natürü ga Ngechuchu rü nape. ²⁵ Rü yexguma ga norü ngüexügü rü ínanabèixgügü, rü ñanagürügü nüxü: —Pa Corix, ¡toxü rüngüxë, erü ngëmama itabaxügü! —ñanagürügü. ²⁶ Rü Ngechuchu nanangãxü, rü

ñanagürü nüxü: —Pa Duñxügü i Tama Aixcuma Yaxögüxüx, ¿tüxcüü pemuñê? —ñanagürü. Rü yexguma ga Ngechuchu rü ínarüda. Rü buanecü rü yuapena nachogü. Rü ínayachaxâchi ga buanecü, rü inayarüxo ga yuape, rü ínachaxanemare. ²⁷ Rü nümagü ga norü ngúexügü rü nabèixâchiãégü, rü nügümaã ñanagürügü: —¿Tâcü êxna nixî i ñaã yatü rü ngêmacèx woo ya buanecü rü yuape rü naga naxîñüêxü? —ñanagürügü.

*Yatügü ga Gadâracüãx ga ngoxogü nawa yexmagüxü
(Mr 5.1-20; Lc 8.26-39)*

²⁸ Rü Ngechuchu rü norü ngúexügü rü naxtaxaarü tocutüwa nangugü ga Gadâraarü naãnewa. Rü yexguma yéma nangugügu, rü Ngechuchucèx yéma nibuxmü ga taxre ga yatügü ga duñxêchíquêxetanügu yarüxauchigütanüñêxü. Rü yema taxre rü ningoxoãx, rü nidüraexüchi. Rü yemacèx taxucürüwama texé yéma namawa taxüpetü. ²⁹ Rü yema taxre rü aita naxüe, rü ñanagürügü: —¿Tüxcüü toxü nuã cuyachixewe, Pa Ngechuchu ya Tupana Nane? ¿Êxna nuã cuxü na toxü ícuyawoxüxücèx tauta nawa nanguyane na Tupana toxü poxcuexü? —ñanagürügü. ³⁰ Rü yema nachicaarü ngaicamana nachibüe ga muxüma ga cuchigü. ³¹ Rü yema ngoxogü rü Ngechuchuxü nacèèxügü, rü ñanagürügü: —Rü ngêxguma toxü ícuwoxügu, ¿rü ngêma cuchigügu toxü nachocuxêê! —ñanagürügü. ³² Rü yexguma ga Ngechuchu, rü ñanagürü nüxü: —Êcü, ¿ngema pexî! —ñanagürü. Rü yexguma ga yema ngoxogü rü ínachoxü nawa ga yema taxre ga yatügü, rü yema cuchigügu nayachocu. Rü ñuxüchi guxüma ga yema cuchigü rü inaxüãchi, rü naxtaxacutüarü mëxpúxüwa nayarüyuxgü, rü yexma nayi. ³³ —Rü yema cuchigüarü dauruügü rü nabèixâchiãégü, rü ñanecèx nibuxmü. Rü yexguma ñanewa nangugügu, rü nüxü nixugügü ga guxüma ga yema ngupetüxü ga ñuxâcü naxcèx na yataanegüxü ga yema taxre ga yatügü ga ngoxoãxgüxü. ³⁴ —Rü yexguma ga guxüma ga yema ñanecüãx ga duñxügü, rü Ngechuchuxütawa naxî. Rü yexguma Ngechuchuxü nadaugügu, rü nüxü nacèèxügü na ínaxüxüxücèx ga yema norü naãnewa.

9

*Ngechuchu rü wüxi ga yatü ga nawãixâchicücèx nayataanexêê
(Mr 2.1-12; Lc 5.17-26)*

¹ Rü yexguma ga Ngechuchu rü wüxi ga ngegu nixüe. Rü naxtaxaarü tocutüwa naxü, rü noxrütama ñanewa nangu. ² Rü yéma guma ñanewa rü duñxügü rü Ngechuchuxütawa nanangetaügü ga wüxi ga yatü ga nawãixâchicü. Rü yexguma Ngechuchu nüxü dèuxgu ga ñuxâcü aixcuma na yaxögüãxü ga yema duñxügü rü ñanagürü nüxü ga guma idaawecü: —¿Nataãê, Pa Chaunex! Erü curü pecadugü rü marü cuxü nüxü changechaü —ñanagürü. ³ Rü yéma nayexma ga ñuxre ga ngúexêêruügü ga ore ga mugüwa nguxêêtaegüxü. Rü nümagü rü naãxêgüwa ñanagürügü: —¿Ñaã yatü rü tacü Tupanamaã nixugü? —ñanagürügü. ⁴ Natürü ga Ngechuchu rü nüxü nacuèxama ga yema naãewa naga naxîñüêxü. Rü yemacèx ñanagürü nüxü: —¿Tüxcüü chixexügu perüxîñüê? ⁵ —¿Tâcü nixî i ngêma rütauxchamaêxü na namaã nüxü ixuxü ya daa nawãixâchicü:

“Rü curü pecadugü rü marü cuxü nüxü changechaü”, rü êxna:

“¿Inachi rü íxü!” ñagüxü nüxü? ⁶ —Natürü i ñuxma rü tá pexü nüxü chadauxêê na Chaunatü ya Tupana núma choxü muxü na duñxügüaxü nüxü changechaüxücèx i norü pecadugü —ñanagürü. Rü yexguma rü ñanagürü nüxü ga guma nawãixâchicü: —¿Inachi, rü nayaxu i curü carü, rü cupatawa

naxũ! —ñanagürü. ⁷ —Rü yexgumatama ga guma nawãixãchicü rü inachi, rü napatawa naxũ. ⁸ Rü yexguma yemaxũ nadaugügu ga duũxügü, rü poraãcü namuũẽ. Rü Tupanaxũ nicuèxüügü, rü ñanagürügü: —Moxẽ, Pa Tupanax, erü cunaporaxẽẽ i ñaã yatü na ngẽmaãcü mexũ toxçèx naxüxcèx —ñanagürügü.

Mateucèx naca ga Ngechuchu
(Mr 2.13-17; Lc 5.27-32)

⁹ Rü yexguma yéma inaxüãchigu ga Ngechuchu, rü yéma nüxũ nadau ga wüxi ga yatü ga Mateugu aegaxũ ga yéma rütoxũ ga ngextá Dumaãrũ aẽxgacücèx dïeru ngixũ ínayauxgüxüwa yerü woetama yemawa napuracü. Rü Ngechuchu rü ñanagürü nüxũ: —¡Chowe rüxũ! —ñanagürü. Rü yexguma ga Mateu rü inachi, rü nawe narüxũ. ¹⁰ Rü Mateupatawa naxũ ga Ngechuchu, rü yéma nachibü. Rü ínangugü ta ga muxüma ga togü ga duũxügü ga Dumaãrũ aẽxgacücèx dïeru ngixũ yauxgüxüwa puracüexũ, rü togü ga duũxügü ga taxúema nacümamaã taãgüxũ. Rü yema duũxügü rü yéma mechawa narütogü namaã ga Ngechuchu rü norü ngúexügü. ¹¹ Natürü yexguma yemaxũ nadaugügu ga Parichéugü, rü Ngechuchuarü ngúexügüna nacagü, rü ñanagürügü: —¿Ñuxãcü i perü ngúexẽẽruũ rü namaã nachibü i aẽxgacüarü duũxügü i dïeruarü yauxwa puracüexũ, rü duũxügü i pecaduãxgüxũ? —ñanagürügü. ¹² Rü yexguma yemaxũ naxĩnúgu ga Ngechuchu, rü ñanagürü nüxũ ga Parichéugü: —Ngẽma poraexũ rü tama nanaxwèxegü ya duturu, natürü ngẽma idaaweexũ nixĩ i naxwèxegüxũ. ¹³ —¡Rü ípixĩ, rü nawa pengúe i Tupanaãrũ ore i ümatüxũ i ñaxũ:

“Choma rü tama chanaxwèxe i chauxcèx peyamèx i carnerugü, natürü chanaxwèxe i togü pexũ nangechaütümüügü”,
ñaxũ! Rü ñanagürü ta ga Ngechuchu: —Choma rü tama mexügüna na chaxuxçèx nixĩ i núma chaxüxũ, natürü núma chaxũ na nüxna chaxuxçèx i ngẽma pecaduãxgüxũ na ngẽmaãcü nüxũ naxoexçèx i nacümagü i chixexügü —ñanagürü.

Ngechuchuna nacagüe ga aurechiga
(Mr 2.18-22; Lc 5.33-39)

¹⁴ Rü yexguma ga Cuáũ ga baiüxẽẽruũãrũ ngúexügü, rü Ngechuchucèx naxĩ, rü nüxna nacagüe, rü ñanagürügü: —Toma i Cuáũãrũ ngúexügü na tixígüxũ rü nümagü i Parichéugü rü muẽxpüxcüna tama tachibüeãcüma tayumüxègü. ¿Rü tüxcüũ i curü ngúexügü rü tama toxrüũ tama nachibüãcüma nayumüxègü? —ñanagürügü. ¹⁵ Rü Ngechuchu nanangãxũ rü ñanagürü: —¿Éxna wüxi i ngígüarü petawa rü pexcèx namexũ na nangechaüxũ rü naxaureexũ i ngẽma nüxna naxugüxũ ega natanüwa nangẽxmagu i ngẽma yatü i ngexwacèx amaxũ? Maneca tama nixĩ. Natürü wüxi i ngunexügu rü ngẽma yatü i ngexwacèx amaxũ rü tá namücügüna nixügachi. Rü ngẽma ngunexügu tá nixĩ i aixcüma naxaureexũ i namücügü. ¹⁶ —Rü taxúema tanapaita i wüxi i naxchiru i ngauxũ namaã i wüxi i natüchi i ngexwacaxüxũ i tauta nañaãchimüxũ. Erü ngẽxguma nayauxgu i ngẽma naxchiru rü tá nügü ínanaxíraxãchi i ngẽma natüchi i ngexwacaxüxũ, rü tá nanagauxẽẽ i ngẽma wexachiru. Rü noxriarü yexera tá nixĩ i na nagauxũ. ¹⁷ —Rü ngẽxgumarüũ ta rü taxúema ngexwacaxücü ya binu rü nagu tayabacuchi i wüxi i naxchixũ i marü ngauxũ i naxchèxmünaxcèx. Erü ngẽxguma ngẽmaãcü naxüxgu rü yima binu ya ngexwacaxücü rü narüngu, rü tá nayawãixẽẽ i ngẽma naxchixũ i ngauxũ i naxchèxmünaxcèx. Rü ngẽxma tá nayarütaxu ya binu rü ngẽma naxchixũ rü ta. Rü ngẽmacèx tanaxwèxe

ya ngexwacaxücü ya binu rü ngexwacaxüxü i naxchixügu tayabacuchi. Rü ngēmaäcü tãütáma inayarütaxu. [Rü chorü nguxēētae i ngexwacaxüxü rü ngēxgumarüü ta nixĩ na taxucürüwama namaã nawüxiguxü i ngēma nuxcúmaüxü i pecümagü —ñanagürü ga Ngechuchu.]

*Yáiruxacüchiga rü yema nge ga Ngechuchuchirugu ingōgücüchiga
(Mr 5.21-43; Lc 8.40-56)*

¹⁸ Rü yexguma yemaäcü ínangüxēētaeyane ga Ngechuchu, rü naxütawa nangu ga wüxi ga äëxgacü ga Yudíugüarü. Rü Ngechuchupēxegu naya-caxápüxü, rü ñanagürü nüxü: —Pa Corix, chauxacü rü ngexwacèx iyu. Natürü ngēxguma chi ngema cuxüxgu rü ngíxü quingōgügu, rü wena chixarü imaxü —ñanagürü. ¹⁹ Rü inachi ga Ngechuchu, rü norü ngüexügümaã yema äëxgacüwe narüxü. ²⁰ Rü yexguma yéma naxüyane ga Ngechuchu rü wüxi ga ngecü ga 12 ga taunecü ägüechacü rü naweama ne ixü. Rü naxpechinüchirugu iyangōgü. ²¹ Yerü ngíma rü nagu irüxñü rü yexguma chi naxchiruxüxĩcatama yangōgümaregu, rü chi ngíxcèx nitaane. ²² Natürü nüma ga Ngechuchu rü nügü ínidau, rü ngíxü nadau ga yema nge. Rü ñanagürü ngíxü: —¡Nataãë, Pa Chauxacü! Marü cuxcèx nitaane, erü cuyaxō —ñanagürü. Rü yexgumatama ngíxcèx nitaane. ²³ Rü yexguma yema äëxgacüpatawa nanguxgu ga Ngechuchu, rü nüxü nadau ga paxetatanüxü ga marü na ínamemaregüxü na ngíxü iyatèxgüxü ga yema bucü. Rü ga duüxügü rü nixáicha rü naxauxe. ²⁴ Rü Ngechuchu ñanagürü nüxü ga yema duüxügü: —¡Ípechoxü i nuã! Erü ngēma bucü rü tama iyu. Rü ipemare —ñanagürü. Natürü nümagü ga duüxügü rü Ngechuchuxü nacugüeama. ²⁵ Rü yexguma Ngechuchu ínachoxüxēëxgu ga duüxügü, rü yema bucüarü ucapugu naxücu. Rü ngíxmèxgu nayayauxächí, rü yexgumatama írüda ga ngímax. ²⁶ Rü guxüwama ga yema naãnewa, rü duüxügü nüxü nixuchigagü ga yema Ngechuchu üxü.

Ngechuchu naxcèx nayataanexē ga taxre ga yatü ga ingexetüxü

²⁷ Rü yexguma yéma ínaxüüxgu ga Ngechuchu, rü taxre ga ngexetüxü rü nawe nangēgü. Rü tagaäcü ñanagürügü: —Pa Ngechuchux, Pa Dabítanüxüx, ¡cuxü tangechaütümüügü! —ñanagürügü. ²⁸ Rü yexguma Ngechuchu guma ï ga nagu napexünegu naxücuxgu, rü yema taxre ga ngexetüxü rü naxcèx naxĩ. Rü Ngechuchu nüxna naca, rü ñanagürü: —¿Peyaxōgüxü yíxü na chaporaxü na pexü charümeëxēxüçèx? —ñanagürü. Rü nümagü nanangāxügü, rü ñanagürügü: —Ngü, Pa Corix, tayaxōgü —ñanagürügü. ²⁹ Rü yexguma ga Ngechuchu rü naxētügügu ningōgü, rü ñanagürü nüxü: —¡Cü pexcèx yataane, erü peyaxōgü! —ñanagürü. ³⁰ Rü naxcèx nitaanegü. Rü Ngechuchu rü poraäcü nayaxucuxēgü na taxúemaãma nüxü na yaxugüxüçèx ga yema nüxü ngupetüxü. ³¹ Natürü yema taxre rü yexguma yéma ínachoxügu rü guxüwama ga yema naãnewa rü nüxü nixugüeama ga yema Ngechuchu üxü.

Ngechuchu rü naxcèx nayataanexē ga wüxi ga yatü ga tama idexacü

³² Rü yexguma yema taxre ga yatü íchoüxguwena, rü ñuxre ga duüxügü rü Ngechuchuxütawa nanagagü ga wüxi ga yatü ga tama idexacü yerü ngoxo nawa nayexma. ³³ Rü Ngechuchu ínanatèxüchi ga yema ngoxo. Rü yexgumatama inanaxügü ga na yadexaxü ga guma yatü. Rü nümagü ga duüxügü rü nabèixächíãëgü. Rü ñanagürügü: —Taguma nüxü tadau i nuã tachiüãnewa i tacü i ñaärüü ixíxü —ñanagürügü. ³⁴ Natürü ga Parichéugü rü ñanagürügü: —Ñaa yatü rü ngoxogüarü äëxgacü i Chatanáärü poramaã nixĩ i ínawoxüãxü i ngoxogü —ñanagürügü.

Ngechuchuaxü nangechaütümüügü ga duüxügü

³⁵ Rũ yema naãnewa rũ guxũnema ga ããnegũgu rũ ããnexãcũgũgu nixũgũchigũ ga Ngechuchu. Rũ wũxichigũ ga ããnewa, rũ duũxũgũarũ ngutaquẽxepataũwa ninguxẽẽtaechigũ. Rũ duũxũgũmaã nũxũ nixuchigũ ga ore ga mexũ na ñuxãcũ ãẽxgacũ na yĩixũ ya Tupana. Rũ nanameẽxẽẽ ga duũxũgũ ga idaaweexũ. Rũ woo nañuxraũxũ ga norũ daawe nũxũ yexmaxũ, rũ nanameẽxẽẽ. ³⁶ Rũ yexguma Ngechuchu nũxũ deũxgu ga yema muxũma ga duũxũgũ ga naxũtawa ngugũxũ, rũ nũxũ nangechaũtũmũgũ. Yerũ carnerugũ ga ngearũ dauruũãxũrũ nanaxixãchiãẽgũ, rũ tama nataãẽgũ. ³⁷ Rũ yexguma ga Ngechuchu rũ ñanagũrũ nũxũ ga norũ ngũexũgũ: —Aixcũma pemaã nũxũ chixu rũ nangẽxma i muxũchixũ i duũxũgũ i ímemaregũxũ na yaxõgũãxũ i Tupanaãrũ ore. Natũrũ nanoxreẽxpũx i Tupanaãrũ puracũtanũxũ na namaã nũxũ yaxugũxũcèx i ngẽma ore. ³⁸ Rũ ngẽmacèx name nixĩ i duũxũgũarũ yora ya Tupanana naxcèx peca i perũ yumũxẽwa na yamugũãxũcèx i norũ puracũtanũxũ i orearũ uruũgũ na ngẽma duũxũgũmaã nũxũ yaxugũxũcèx i norũ ore i mexũ —ñanagũrũ ga Ngechuchu.

10

Ngechuchu nanade ga 12 ga norũ ngũexũgũ na toxnamana namugũãxũcèx (Mr 3.13-19; Lc 6.12-16)

¹ Rũ yexguma ga Ngechuchu, rũ yema 12 ga norũ ngũexũgũcèx naca. Rũ nũxna naxãga rũ nanaporaexẽẽ na ínawoxũãxũcèx ga ngoxogũ rũ nameẽxẽẽãxũcèx ga duũxũgũ ga idaaweexũ ga woo nañuxraũxũ ga daawe nũxũ yexmaxũ. ² Rũ ñaã nixĩ ga naegagũ ga yema 12 ga Ngechuchuarũ ngũexũgũ ga imugũxũ. Rũ natanũwa rũ Chimãũ ga Pedrugũ ãegacũ nixĩ ga naẽru ixĩxũ. Rũ to nixĩ ga Pedrueneẽ ga Aũdré. Rũ to nixĩ ga Chaũtiãgu rũ to nixĩ ga Chaũtiãgueneẽ ga Cuãũ. Rũ yema taxre rũ Zebedeu nanegũ nixĩgũ. ³ Rũ togũ nixĩ ga Piripĩ, rũ Baturumé, rũ Tumachi, rũ Mateu ga Dumaãrũ ãẽxgacũcèx dũeruarũ yauxwa puracũchirécũ. Rũ togũ nixĩ ga Chaũtiãgu ga Arupéu nane, rũ Tadéu. ⁴ Rũ to nixĩ ga Chimãũ ga iporaãecũcũ. Rũ to nixĩ ga Yuda ga Icariũte ga yixcama bexma cúãcũ Ngechuchuxũ íxuaxũxũ.

Ngechuchu rũ norũ ngũexũgũxũ nimugũ na nũxũ yanaxugũexũcèx ga norũ ore (Mr 6.7-13; Lc 9.1-6)

⁵ Rũ Ngechuchu nayamugũ ga yema 12 ga norũ ngũexũgũ. Rũ nũxna naxãga, rũ ñanagũrũ: —¡Tãũtãma natanũwa pexĩ i ngẽma duũxũgũ i tama Yudiũgũ ixĩgũxũ! ¡Rũ tãũtãma Chamãriacũãx i duũxũgũarũ ããnegũwa pexĩ! ⁶—Natũrũ chanaxwẽxe i ngẽma Yudiũgũ i carnerugũrũ iyarũtauxexũtanũwa pexĩ. ⁷ —¡Rũ ngẽma natanũwa nũxũ peyarũxu na marũ yangaicaxũ ya Tupana na norũ ãẽxgacũ yĩixũ! ⁸ —¡Rũ penameẽxẽẽx i ngẽma duũxũgũ i idaaweexũ! ¡Rũ wena penamaxẽxẽẽx i ngẽma duũxũgũ i marũ yuexũ! ¡Rũ penameẽxẽẽx i ngẽma duũxũgũ i chaxũnemaã idaaweexũ! Rũ ngẽma duũxũgũ i ngoxogũ nawa ngẽxmagũxũ ¡rũ nũxũ ípenawoxũx! Rũ tama name i penaxãtanũ ega texèxũ perũmexẽẽxgu, erũ pema rũ pexũ nangetanũmare i ngẽma pora. ⁹⁻¹⁰ —¡Rũ tãũtãma ípingearũ dũeruãxgũ na perũ tacũcèx petaxegũxũcèx rũ bai i perũ choca i perũ namawaũ! ¡Rũ wũxitama i pexchiru ípinge, rũ bai i perũ chapatu, rũ bai ya perũ caxũchigũxũ ya naĩxmenèxã ípinge! Rũ pemaã nũxũ chixu rũ wũxi i puracũtanũxũ rũ name nixĩ i ngẽma duũxũ i nũxũ napuracũũxũtawa nachibũ. ¹¹ —Rũ ngẽxguma wũxi ya ããnewa rũ ãxna wũxi ya ããnexãcũwa pengugũgu i pemax, ¡rũ naxcèx pedèux i wũxi i duũxũ i mecũmaxũ! ¡Rũ ngẽmaxũtagu perũcho ñuxmatãta ipexĩãchi i ngẽma ããnewa! ¹² —Rũ ngẽxguma yima ípatagu pechocugu, rũ meã tá

nüxü perümoxëgü i ngëma duüxügü i ngëma ngëxmagüxü rü: “¡Tupana pexü rüngüxëx!” ñaperügügü tá nüxü. ¹³—Rü ngëxguma ngëma duüxügü rü meã pexü nayauxgu rü Tupana tá nüxü narüngüxëe. Natürü ngëxguma tama meã pexü nayauxgu i napatawa rü ñaperügügü tá nüxü:

“Marü name i toxnamana taxĩ”, ñaperügügü tá. ¹⁴—Rü ngëxguma wüxi ya ñwa rü ëxna wüxi ya ñanewa duüxügü tama meã pexü yauxgügu rü tama nüxü naxñüëchaügu i perü ore, ¡rü ípechoxü! Rü ngëxguma ípechoüxgu, ¡rü meã pegü ipepagücutü i perü üxaxücutü, na ngëmawa nüxü nacüëxgüxüçèx na chixexü na naxügüxü i ngëma duüxügü! ¹⁵—Rü aixcüma pemaã nüxü chixu rü ngëma ngunexü i nagu nagüxü i naãne, rü Chodomacüãx rü Gomoracüãx i duüxügüarü yexera Tupana tá nanapoxcue i ngëma duüxügü i tama meã pexü yauxgüxü.

Guxchaxügümaã tá pewé ningexütanü i duüxügü

¹⁶—Düçèx, äücümaxüwa pexü chamugü, ngëxgumarüü i carnerugüxü aigütanüwa imugüxürüü. ¡Rü ngëmacèx penaxwëxe i äxtapegürüü pexuãëgü, natürü muxtucugürüü taxuüma i chixexü pexügü! ¹⁷—¡Rü pegüna pedaügu! Erü duüxügü rü tá pexü ínayauxü, rü äëxgacügüxütawa tá pexü nagagü na pexü napoxcuexüçèx. Rü ngutaquëxepataügügu tá pexü nicuaixgü. ¹⁸—Rü chaugagu tá äëxgacügü ya tacügüpëxewa pexü nagagü. Rü ngëmaäcü tá chauchigagu pidexagü napëxewa i ngëma äëxgacügü rü napëxewa i ngëma duüxügü i tama Yudüügü ixügüxü. ¹⁹—Natürü ngëxguma äëxgacügüpëxewa pexü nagagügu na pexü napoxcuexüçèx, ¡rü taxucëxtáma pexoegaãëgü na tacümaã tá penangäxüxü rü ëxna tacüxü tá namaã na pixuxü! Erü ngëxguma nawa nanguxgu na pidexagüxü, rü Tupanaãe tá pexü nanguxëe na tacüxü tá namaã pixuxü. ²⁰—Rü täütáma pema nixĩ i pidexagüxü, natürü Tupanaãe i Üünexü tá nixĩ i pewa idexaxü. ²¹—Rü nügüeneëgüwa rü tá nügü ínaxuaxügü na äëxgacügü yamëxgüxüçèx. Rü ngëxgumarüü tá ta nanatügü rü naxäcügüxü ínaxuaxügü, rü naxäcügü rü nanatügüxü tá ínaxuaxügü na äëxgacügü tüxü imëxgüxüçèx. ²²—Rü chaugagu tá guxü i duüxügü pexchi naxaie. Natürü yíxema aixcüma yaxõdmáxë i chorü ore rü tama choxü ítáxe, rü yíxema tá tixĩ ya nayaxúxe i ngëma maxü i taguma gúxü. ²³—Rü ngëxguma wüxi ya ñanewa rü duüxügü pexü daixchaügu, rü name nixĩ i pibuxmü ya yima ñanewa, rü náí ya ñanewa pexĩ. Rü aixcüma pemaã nüxü chixu rü täütáma guxüne ya Yudüügüarü ñanewa pengugü naxüpa na chataeguxü i chomax. ²⁴—Rü taxuüma i wüxi i ngúexü rü norü ngúexëëruüxü narüyexera. Rü taxuüma i wüxi i coriarü duüxü rü norü corixü narüyexera. ²⁵—Rü ngëma norü ngúexëëruüxü üpetüxürüü tátama nüxü naxüpetü i ngëma norü ngúexü. Rü ngëma norü corixü üpetüxürüü tátama nüxü naxüpetü i ngëma norü duüxü. Rü ngëxguma duüxügü rü ngoxo i Bechëbú choxü nawogüegu, ¿rü ñuxäcü tá pexü naxu i pemax?

Name nixĩ na Tupanaxü pemuüëxü (Lc 12.2-7)

²⁶—Rü ngëmacèx ¡täxü i nüxü pemuüëxü i ngëma duüxügü! Erü guxüma i ngëma cúäcü üxü rü tá nangoxoma. Rü guxüma i ngëma ñuxma duüxügüçèx ëxügüxü, rü yixcüra rü tá nüxü nacüëxgüama. ²⁷—Rü guxüma i ngëma pemaãxícatama nüxü chixuxü, ¡rü meã duüxügüçèx penangoxëëx! Rü guxüma i ngëma bexma pemaã nüxü chixuxü, ¡rü tagaäcü guxü i duüxügümaã nüxü pixu! ²⁸—¡Rü täxü i nüxü pemuüëxü i ngëma duüxügü i pexü daixchaüxü! Erü taxünexüxícatama nimëxgü. ¡Natürü name nixĩ i nüxü pemuüë ya yima Tupana! Erü nüma nüxü nangëxma i pora na napoxcuäxüçèx i pexene rü peãe

rü ta i ngēma ngoxogüxü ínapoxcuexügu. ²⁹—¿Tama ēxna wüxitachinü i dīerugu namaã petaxe i taxre i werixacügü? Natürü bai i wüxi i ngēma werixacü rü ñaxtüanegu nangu, ega tama nanaxwèxegu ya Penatü ya Tupana. ³⁰—Rü woo i peyae rü Tupana rü wüxichigü rü nayaxugü, rü nüxü nacuèx na ñuxre ngēxmaxü. ³¹—Rü ngēmacèx ¡tāxü i pemuñèxü! Erü pema rü muxüma i werixacügüarü yexeraxüchi pexü nangechaü ya Tupana.

Yíxema duixügüpëxewa tügü ixuxe na Ngechuchu ya Cristuarü duixügü tixü

(Lc 12.8-9)

³²—Rü guxāma ya texé i ñoma i nañewa i duixügüpëxewa tügü ixuxe na chorü duixü tixü, rü choma rü tá ta Chaunatü ya daxügücüpëxewa tüxü chixu na chorü duixü tixü i tümax. ³³—Natürü texé ya ñoma i nañewa i duixügüpëxewa tügü ixuxe na tama chorü duixü tixü, rü choma rü tá ta Chaunatü ya daxügücüpëxewa tüxü chixu na tama chorü duixü tixü i tümax.

Ngechuchugagu nixi i yatoyexü i duixügü

(Lc 12.51-53; 14.26-27)

³⁴—Rü tama name i nagu perüxñnüë na núma chaxüxü na guxü i duixügü rü wüxigu naxñnüëxüçèx. Natürü pemaã nüxü chixu rü núma chaxü na chaugagu yatoyexüçèx i duixügü. ³⁵—Rü nuã chaxü na wüxi ya yatü rü tama nanatümaã wüxigu naxñnüëxüçèx, rü wüxi i paxü rü tama naēmaã wüxigu naxñnüëxüçèx, rü wüxi i naneãx rü tama ngixēmaã na wüxigu naxñnüëxüçèx. ³⁶—Rü ngēmaãcü wüxi ya İwa, rü nügütanüxümaã tátama naxuwanüãxgü. ³⁷—Rü yíxema texé ya choxü na tangechaüxüarü yexera tümanatüxü rü ēxna tümaëxü ngechaüxë, rü taxucürüwama chorü duixü tixi. Rü yíxema texé ya choxü na tangechaüxüarü yexera tümanexü rü ēxna tümaxäcüxü ngechaüxë, rü taxucürüwama chorü duixü tixi. ³⁸—Rü yíxema tama yaxna namaã ñnüxë i ngēma guxchaxügü i chaugagu tümacèx ínguxü rü ngēmaãcü chowe rüxüxë, rü taxucürüwama chorü duixü tixi. ³⁹—Rü texé ya tügü maxēchaüxë rü tá itayarütaxu. Natürü texé ya chauxcèx yuxe rü tá tanayaxu i maxü i taguma gúxü.

Āmarechiga

(Mr 9.41)

⁴⁰—Rü texé ya pexü yaxúxe rü choxü nixi i tayaxuxü. Rü texé ya choxü yaxúxe rü yima núma choxü mucü ya Chaunatüxü nixi i tayaxuxü. ⁴¹—Rü texé ya wüxi i orearü uruü i Tupana ngema muxüxü yaxúxe, rü ngēmatama āmare i wüxi i orearü uruü yaxuxüraüxü tátama tayaxu. Rü texé ya wüxi i yatü i mecümaxüxü yaxúxe erü namecüma, rü ngēmatama āmare i wüxi i yatü i mecümaxü yaxuxüraüxü tátama tayaxu. ⁴²—Rü texé ya wüxi i pochiyuäcu i dexá i gèuxchiüxü nüxna āxë i ngëxürüüxü i chorü buxügü i chowe rüxixü, rü aixcümaxüchi tá tanayaxu i tümaärü āmare —ñanagürü ga Ngechuchu.

11

Cuáü ga baiüxëeruü nanamu ga ñuxre ga norü duixügü na Ngechuchuxütawa iyadaugüxüçèx

(Lc 7.18-35)

¹ Rü yexguma nüxü nachauxgu ga Ngechuchu ga na yaxucüxëgüãxü ga yema 12 ga norü ngüexügü, rü inaxüãchi ga yéma na duixügüxü nangüexëxüçèx rü nüxü yaxüxüçèx ga ore ga mexü ga guxüne ga ñānegü ga yema nañewa yexmagünewa. ²⁻³ Rü Cuáü ga baiüxëeruü rü yexguma poxcupataxüwa nayexmayane, rü nüxü nacuáxchiga ga yema Ngechuchu

üxü. Rü yemacèx ga Cuáü rü Ngechuchuxütawa nanamugü ga ñuxre ga norü duüxügü na nüxna yacagüxcèx rü aixcüma Cristu ga ínguxëëgücü yî, rü éxna to tá yî ya Cristu. ⁴ Rü Ngechuchu nanangãxü rü ñanagürü nüxü ga yema duüxügü: —¡Pewoegu rü Cuáümaã nüxü peyarüxu i ngëma pematama nüxü pedaugüxü rü nüxü pexínüéxü! ⁵ —¡Rü namaã nüxü pixu rü ngëma ngexetügüxü rü marü nidauchigü, rü ngëma ichixeparaxü rü marü inachigü, rü ngëma chaxüneãxgüxü rü marü naxcèx nitaanegü, rü ngëma ngauchixëgüxü rü marü ningoxnamachixëgü, rü ngëma yuexü rü wenaxãrü namaxë, rü ngëma ngearü ngëmaxüãxgüxü rü marü namaã nüxü tixu i Tupanaãrü ore i mexü! ⁶ Rü tataãë ya yíxema texé ya tama nüxü rüxoxe na choxü tayaxõxü —ñanagürü ga Ngechuchu. ⁷ Rü yexguma nawoeguxgu ga yema Cuáü ga baiüxëëruüãrü duüxügü, rü Ngechuchu inanaxügü ga guma Cuáüchiga na yadexaxü. Rü ñanagürü nüxü ga duüxügü: —¿Tacü nixí ga pema ípeyadaugüxü ga dauxchitawa ga ngextá taxúema íxãpataxüwa? —¿Éxna wüxi ga ngëxürüüxümare ga yatü ga ñoma dexne ga buanecü yaxíãxtanücüüxëëcürüü ixíxü nixí ga ípeyadaugüxü? ⁸ —Rü éxna ega tama guma ípeyadaugügu, ¿rü tacü nixí ga ípeyadaugüxü? ¿Éxna wüxi ga yatü ga poraãcü nügü ngëxãëxü yíxü ga ípeyadaugüxü? Pema nüxü pecuèx i ngëma poraãcü nügü ngëxãëgüxü rü äëxgacügü ya tacügüpatawa nangëxmagü. ⁹ —¿Tacü éxna nixí ga ípeyadaugüxü? ¿Éxna wüxi ga Tupanaãrü orearü uruüxü? Ngëmaãcü aixcüma yema nixí ga ípeyadaugüxü. Rü pemaã nüxü chixu rü Cuáü ya baiüxëëruü rü tama wüxi i ngëxürüüxümare i Tupanaãrü orearü uruü nixí. ¹⁰ —Rü Cuáüchiga nixí ga naxümatüxü ga yema Tupanaãrü ore ga ñaxü: “Cupëxegu chayamu i chorü orearü ngeruü na cuxcèx namexëëãxüçèx i duüxügüarü maxü”,

ñaxü. ¹¹ —Rü aixcüma pemaã nüxü chixu rü guxü i duüxügütanüwa rü nataxuma i Tupanaãrü orearü uruü i Cuáü ya baiüxëëruüãrü yexera ixíxü. Natürü yíxema Tupana äëxgacü íxíxüwa wixwexüchi üxe, rü Cuáüãrü yexera tixí. ¹² —Rü yexguma noxri Cuáü ya baiüxëëruü inaxügügu na nüxü yaxúxü i ñuxãcü Tupana äëgacü ixíxüwa nangugüxü i duüxügü, rü nüma ga duüxügü rü norütama ngúchaxümaã nawa nangugüchaxü i ngema nachica. Rü ñuxma rü ta ngemagutama narüxñü. ¹³ —Rü guxüma ga Tupanaãrü orearü uruügüarü orewa, rü ore ga mugü ga Moíché ümatüxüwa rü nüxü nixuchi-gagü na ínanguégaxü ya Cristu na äëxgacü na yíxüçèx. Rü yemaãcü nixí ñuxmata ínangu ga Cuáü. ¹⁴ —Rü ngëxguma chi peyaxögüchaügu i ñaã chorü ore, rü pemaã nüxü chixu rü Cuáü ya baiüxëëruü nixí ya yima yanguxëëcü ga yema ore ga guma nuxcümaãcü ga orearü uruü ga Ería ga ípenanguxëëcüchiga ümatüxü. ¹⁵ —Rü yíxema ächixëgüxe, ¿rü naga taxínüë i ngëma ore! —ñanagürü. ¹⁶ Rü ñanagürü ta ga Ngechuchu: —¿Tacügu tá chanangu i ñaã duüxügü i ñuxma maxëxü? Maneca ñaã duüxügü rü taxumaãma nataãëgü ngëxgumarüü i ñuxre i buxügü i nügümaã íãxtüwa rütogüxü, rü íxñüçèxwëxegüxü, rü tagaãcü namücügüxü ñagüxü:

¹⁷ “Marü wowerumaã pexcèx tapaxetagü, natürü tama ípixüãchitanüxü. Rü marü ngechaü i wiyaeegu pexcèx tawiyægü, natürü tama pexauxe”, ñagüxü. Rü ngëma buxügürüü nixí i ñaã duüxügü. ¹⁸ —Yerü núma naxü ga Cuáü ga baiüxëëruü rü tama pâü nangõx rü tama binu nayaxaxü. Rü yexguma ga nümagü rü: “Nangoxoãx” ñanagürügü nüxü. ¹⁹ —Rü ñuxüchi núma chaxü i choma ya Tupana Nane na duüxüxü chiixü. Rü choma rü õna changõx rü binu chayaxaxü. Rü ngëxguma i nümagü rü taanüxüchixü rü ngãxwëxexü choxü nawogü. Rü nüxü nixugü rü pecaduãxgüxümaã chaxämücü, rü

namaã chaxãmücü i ngẽma duũxügü i Dumaãrũ ãẽxgacücèx dïeru ngĩxũ ideetanũxũ. Natürü Tupanaãrũ cuèx rü meãma nangox tümawa ya yíxema aixcũma nawe rüxĩxẽ —ñanagürü ga Ngechuchu.

*Ĩãnegü ga tama Tupanaga ñnüene
(Lc 10.13-15)*

²⁰ Rũ yexguma ga Ngechuchu rü inanaxügü ga na yangagüãxũ ga yema duũxügü ga guma ñãnegücũãx ga ngextá yexeraãcü ínaxüaxũwa ga taxũ ga mexügü ga Tupanaãrũ poramaã naxũxũ. Rũ poraãcü nayangagü, yerü yema duũxügü rü tama nüxũ narüxoe ga norü chixexũ. ²¹ Rũ ñanagürü ga Ngechuchu: —Rũ wüxi i ngechaũ nixĩ i pexcèx, Pa Corachíũcũãxgü rü Pa Bechaídacũãxgüx, yerü yexguma chi Tiruarü ñãnewa rü Chidãũãrũ ñãnewa chanaxüxgu ga yema mexügü ga cuèxruügü ga Tupanaãrũ poramaã petanüwa chaxũxũ, rü woo ga na poraãcü yachixexũ ga yema duũxügü rü nuxcũmama chitama nüxũ narüxoe ga yema nacũma ga chixexũ, rü poraãcüxüchi chima nügũmaã nangechaügü rü naxauxe, yerü chi nügü nicuèxãchitanü ga na yapecaduãxgüxũ. ²² —Natürü pemaã nüxũ chixu rü ngẽma ngunexũ i Tupana nagu napoxcuexũ i pecaduãxgüxũ, rü ngẽma ngunexügu rü Tirucũãxgü rü Chidãũcũãxgüarü yexera tá pexũ napoxcue i pemax, Pa Corachíũcũãxgü rü Bechaídacũãxgüx. ²³ —Rũ pemax, Pa Capernáũcũãxgü i Duũxügüx, ¿rũ pema nagu perüxĩnüëgu rü daxügüxũ i naãnewa tá ipexĩxũ? Pemaã nüxũ chixu rü naãnetüüwa i ngextá Tupana Chatanáxũ ípoxcuxũwa tá nixĩ i pewogüxũ. Rũ yexguma chi Chodomaãrũ ñãnewa chanaxüxgu ga yema mexügü ga cuèxruügü ga Tupanaãrũ poramaã petanüwa chaxũxũ, rü guma ñãne ga nuxcũma norü pecadugagu iyarüxoxũne rü ñuxma rü chi nangẽxma. ²⁴ —Natürü pemaã nüxũ chixu rü ngẽma ngunexũ i Tupana nagu napoxcuexũ i pecaduãxgüxũ, rü ngẽma ngunexügu rü Chodomacũãxgüarü yexera tá pexũ napoxcue i pemax, Pa Capernáũcũãxgüx —ñanagürü.

*Chauxcèx pexĩ na chauxütagu perüngüẽxüçèx
(Lc 10.21-22)*

²⁵ Rũ yexguma rü ñããcü nayumüxẽ ga Ngechuchu, rü ñanagürü: —Pa Chaunatü ya Daxügüxũ i Naãne rü Ñoma i Naãneãrũ Yorax, cuxũ chicuèxüũ, erü ñãã chorü ngüexügüxũ nüxũ cucuèxẽẽ i ñãã ore i naxchaxwa iquicúxũ i duũxügü i ñoma i naãnewa nüxũ cuèxüchigüxũ. ²⁶ —Rũ moxẽ cuxna chaxã, Pa Chaunatüx, erü cuma cunaxwèxe na ngẽmaãcü cunaxüxũ —ñanagürü. ²⁷ Rũ ñanagürü ta ga Ngechuchu: —Chaunatü choxna nanaxã i guxũma i tacü i ngẽxmaxũ. Rũ Chaunatüxicatama choxũ nacuèx na texé chiĩxũ i choma i Nane. Rũ tama guxũma i duũxügü aixcũma nüxũ nacuèx na texé yĩĩxũ ya Chaunatü. Rũ choma ya Nane, rü ngẽma duũxügü i Chaunatüxũ nüxũ chadauxẽẽchaũxüxĩcatama nixĩ i aixcũma nüxũ cuèxgüxũ na texé yĩĩxũ ya Chaunatü. ²⁸ —¡Rũ nuã chauxütawa pexĩ i guxãma i pema ya ipaexe nagagu i perü chixexügü rü perü íxãchiãëgü! Rũ choma rü tá pexna chanayaxu i pexweta na iperüngüẽxüçèx. ²⁹ —¡Rũ ñuxüchi penayaxu i chorü ucuxëgü rü naxcèx pedauxütaegü i chaucũma! Erü choma rü yaxna pemaã chaxĩnũ rü taguma chaugü chicuèxüxũ. Rũ ngemaãcü tá nüxũ ipeyangau i ngema taãẽ i aixcũma ixĩxũ. ³⁰ —Erü ngẽma pexũ chamuxũ rü natauxcha na naga pexĩnüexũ. Rũ ngẽma pexũ chanaxwãexũ rü tama naguxcha na penaxüxũ —ñanagürü ga Ngechuchu.

12

Ngechucharü ngúexüğü rü trigu nicãũêtanü ga ngüchigaarü ngunexügu
(Mr 2.23-28; Lc 6.1-5)

¹ Rû wüxi ga ngüxchigaarü ngunexügu rü Ngechuchu rü norü ngúexüğümaã trigunecügu nixü. Rû natayae ga norü ngúexüğü, rü yemacèx inaxĩãcüma yoxocüne triguta nicãũêtanü, rü inayangõêtanü. ² Rû yexguma yemaxü nadaugügu ga Parichéugü rü ñanagürüğü Ngechuchuxü: —Dücèx i curü ngúexüğü rü chixexü naxüe. Erü ngüxchigaarü ngunexügu napuracüe, rü nachuxu nixĩ i ngêma —ñanagürüğü. ³ Rû Ngechuchu nanangãxü, rü ñanagürü: —¿Taguma êxna poperawa nüxü pedau ga tacü na naxüxü ga nuxcümaücü ga ãêxgacü ga Dabí ga yexguma natayèxgu ga nüma rü natanüxüğü? ⁴ —Rü Tupanapatagu naxücu rü nanangõx ga yema pãü ga üünexü ga Dabícèx rü natanüxüğücèx chuxuxü ga na nangõxgüãxü. Yerü paigücèxicatama nixĩ ga yema pãü. ⁵ —Rü pemax, Pa Parichéugüx ¿taguma êxna nawa pengúe ga yema ore ga mugüpanegu Moïché ümatüxü ga ñaxü rü marü name i paigü rü ngüxchigaarü ngunexügu napuracüe i tupauca ya taxünewa? Rû ngêma rü tama wüxi i pecadu nixĩ naxcèx i ngêma paigü. ⁶ —Natürü pemaã nüxü chixu rü nuã petanüwa nangêxma i wüxi i duüxü i tupauca ya taxüneärü yexera ixixü i Tupanapêxewa. ⁷ —Natürü pema rü tama nüxü pecuèx i ñuxü ñaxüchiga nixĩ i ngêma Tupanaärü ore i ümatüxü i ñaxü:

“Choma rü tama chanaxwèxe i chauxcèx peyamèx i carnerugü, natürü chanaxwèxe i togü pexü nangechaütümüüğü”,
ñaxü. Rû ngêxguma chi meã nüxü pecuèxgügu i ngêma ore, rü tãü chima chixri nachiga pidexagü i ñaã chorü ngúexüğü i taxuüma i chixexü ügüxü i Tupanapêxewa. ⁸ —Rü choma i Tupana Nane na duüxüxü chiixü, rü aixcüma ngüxchigaarü yora chixĩ —ñanagürü ga Ngechuchu.

Wüxi ga yatü ga yumécüchiga
(Mr 3.1-6; Lc 6.6-11)

⁹ Rû yexguma yema nachicawa ínaxüüxgu ga Ngechuchu, rü guma ñãneärü ngutaquèxepataügu naxücu. ¹⁰ Rû yéma nayexma ga wüxi ga yatü ga norü wüxichacüüwa yumécü. Rû nümagü ga Parichéugü rü naxcèx nadaugü ga ñuxãcü norü ãêxgacügüxütawa Ngechuchuxü na ínaxuaxüğüxü. Rû yemacèx Ngechuchuna nacagüe, rü ñanagürüğü: —¿Namexü yixü na texé naxcèx yataanexèèxü i wüxi i daawexü i ngüxchigaarü ngunexügu? —ñanagürüğü. ¹¹ Rû Ngechuchu nanangãxü, rü ñanagürü: —¿Texé i petanüwa rü ngêxguma chi ngüxchigaarü ngunexügu wüxi i perü carneru puchugu nguxgu, rü taux êxna i ngêxgumatama ípeyadaugüxü rü ípenatüächixü woo ngüxchigaarü ngunexü yixügu? ¹² —Natürü Tupanapêxewa rü wüxi i duüxü rü poraãcüxüchima wüxi i carneruarü yexera nixĩ. Rû ngêmacèx name nixĩ i mexü taxü i woo ngüxchigaarü ngunexü yixügu —ñanagürü. ¹³ Rû ñuxüchi ga Ngechuchu rü ñanagürü nüxü ga guma yatü ga yumécü: —¿Iyarüwèxächimèxê! —ñanagürü. Rû guma yatü rü inayarüwèxächimèxê, rü yexgumatama narümemèx, rü naĩ ga naxmèx ga mexünerüü nixĩ. ¹⁴ Rû yexguma yemaxü nadaugügu ga Parichéugü, rü ínachoxü ga yéma. Rû inanaxüğüe na naxcèx nadaugüxü ga ñuxãcü tá na Ngechuchuxü yamèxgüxü.

Nuxcümaüxü ga ore ga Ngechuchuchiga

¹⁵ Rû yexguma Ngechuchu nüxü cuáchigagu na Parichéugü na yamèxgüchaüxü, rü ínaxüxü ga guma ñãnewa. Rû muxüma ga duüxüğü rü nawe narüxĩ. Rû nüma ga Ngechuchu rü nanameèxèe ga guxüma ga

yema duñxügü ga idaaweexü. ¹⁶ Rü duñxügüna naxãga na tama nüxü yaxugüexücèx na texe na yïixü ga nümax. ¹⁷ Rü yemaãcü nanaxü ga Ngechuchu na yanguxêãxücèx ga yema ore ga nuxcümaücü ga Tupanaãrü orearü uruü ga Ichaxía nüxü ixuxü ga ñaxü:

¹⁸ “Daa nixi ya chorü duñ ya chomatama nüxü chaxunetacü rü nüxü changechaücü rü namaã chataãëxüchicü. Rü Chauãe i Ünexü rü nüxna tá chanamu. Rü nüma tá guxü i duñxügü i tama Yudíugü ixíngüxümaã nüxü nixu i ore i mexü i aixcüma ixixü. ¹⁹ Rü tagutáma ngextá texémaã niporagacüü rü taxúemaãtáma ngextá nipura. Rü tagutáma texé ñaneãrü ítamüğüwa nüxü taxínü na natagaxü. ²⁰ Rü nüma rü táütáma nanadai i ngéma duñxügü i norü öwa turaexü, rü táütáma inayanaxoxêe i ngéma duñxügü i írarüwatama yaxögüxü. Rü ngémaãcü tá nixi ñuxmatáta guxü i naãnewa nangu i ngéma norü ore i aixcüma ixixü. ²¹ Rü guxü i duñxügü i tama Yudíugü ixíngüxü rü tá naxcèx naxi na ngémaãcü naxütawa nayauxgüãxücèx i norü maxü i taguma gúxü”, ñanagürü ga Ichaxía.

*Parichéugü rü Ngechuchuxü nixugüie na ngoxoarü poramaã napuracüxü
(Mr 3.20-30; Lc 11.14-23, 12.10)*

²² Rü Ngechuchuxütawa nanagagü ga wüxi ga yatü ga ngoxoãcü ga ngexetücü rü tama idexacü. Rü Ngechuchu nanamexêe. Rü guma yatü rü yexgumatama nidauchi rü nidexa. ²³ Rü guxüma ga duñxügü rü nabèixächiaëgü ga yexguma yemaxü nadaugügu. Rü ñanagürügü: —¿Taux éxna daa yïixü ya Dabí nane ya Cristu? —ñanagürügü. ²⁴ Natürü yexguma yemaxü naxínüëgu ga Parichéugü, rü ñanagürügü: —Ñaa yatü i Ngechuchu, rü ngoxogünatü i Behebúarü poramaã nixi i ínawoxüãxü i ngoxogü —ñanagürügü. ²⁵ Natürü nüma ga Ngechuchu rü nüxü nacüexama ga tacügu na naxínüëxü. Rü yemacèx ñanagürü nüxü: —Ngëxguma chi wüxi i nachüãñecüãx i duñxügü nügü itoyegu rü nügütanüwa chitama nügü nadaixgu, rü nügü chitama naguxêe. Rü ngëxguma chi wüxi ya ñanecüãx rü éxna wüxi ya ícüãx nügümaã nuëechagu rü nügü nadaixgu, rü nügü chitama naguxêe. ²⁶ —Rü ngëxguma chi Behebú nügütama ítèxüchigu rü nügütama yamëxgu, ¿rü ñuxãcü chi ãëxgacüecha yïixü? ²⁷ —Rü pemax, Pa Parichéugüx, rü choxü pixuxgu rü Behebúarü poramaã íchanawoxü i ngoxogü. Natürü ngëxguma chi Behebúarü poramaã íchanawoxüxgu i ngoxogü, ¿rü texéarü poramaã nixi i perü ngúexügü rü ínawoxüãxü i ngoxogü? Rü dücax, rü ngéma perü ngúexügütama nixi i pexcèx nangoxêëxü na ípetüexü. ²⁸ —Natürü pemaã nüxü chixu rü aixcüma Tupanaãe i Ünexüãrü poramaã nixi i íchanawoxüxü i ngoxogü. Rü ngëmawa pexü nüxü chacüexêe na marü núma petanüwa nanguxü ya Tupana, na perü ãëxgacü yïixücèx. ²⁹ —¿Rü ñuxãcü texé wüxi ya yatü ya poracüpatagu taxücu na tanapuxüxücèx i norü ngëmaxügü, ega tama tayanëixiragu i noxrix? Rü ngëxguma tayanëixiraguxicatama nixi i nüxna tanapuxüxü i norü ngëmaxügü ya yima yatü ya poracü. ³⁰ —Rü yíxema tama choxü ngechaüxë rü chauxchi taxai. Rü yíxema tama choxü rüngüxêexë na Tupanacèx tananutaquëxexü i duñxügü rü chauxchawa tanangianexêe. ³¹ —Rü ngëmacèx pemaã nüxü chixu rü Tupana tá nüxü nüxü nangechaü i guxüma i pepadugü i duñxügü ügüxü rü guxüma i norü dexagü i chixexü. Natürü yíxema Tupanaãe i Ünexümaã tacü ixugüxe, rü Tupana rü tagutáma tüxü nüxü nangechaü i ngéma chixexü. ³² —Rü guxãma ya texé ya tacü chomaã ixugüxe rü Tupana tá tüxü nüxü nangechaü i ngéma. Natürü texé ya Tupanaãe i Ünexümaã tacü

ixugüxe, rü Tupana rü tagutáma tüxü nüxü nangechaü i ngēma, rü bai i ñoma i nañewa, rü bai i daxüguxü i nañewa.

Wüxi i nanetü rü norü owa nixĩ i nüxü icuáxü na tacü rü nanetü yixü
(Lc 6.43-45)

³³—Rü ngëxguma wüxi i nanetü rü namexgu, rü norü o rü ta name. Natürü ngëxguma wüxi i nanetü rü nachixëxgu, rü norü o rü ta nachixe. Rü wüxi i nanetü rü norü owa nixĩ i nüxü icuáxü ngoxi name rü éxna tama. ³⁴—Pa Æxtapearü Duüxügüx, ¿ñuxácü i mexü i orexü pixuxü ega pematama rü pichixecümagu? Erü ngēma ore i peëxmaã nüxü pixuxü rü peãewa nixĩ i ne naxüxü. ³⁵—Wüxi ya mecü ya yatü rü mexü i orexü nixu, erü naãewa rü aixcüma mexügu narüxñü. Natürü wüxi i yatü i chixecümaxü rü chixexü i orexü nixu, erü naãewa rü chixexügu narüxñü. ³⁶—Rü choma pemaã nüxü chixu rü ngēma ngunexü i nagu nagúxü i nañe, rü Tupana rü tá nüxna naca i guxü i duüxügü naxcèx i guxüma i ore i chixexü i nüxü yaxuxü i ñoma i nañewa. ³⁷—Erü ngēma curü dexagüwa rü Tupana tá cuyü nangugü, rü tá cumaã nüxü nixu ngoxita cume i napëxewa rü éxna tama —ñanagürü ga Ngechuchu.

Duüxügü ga tama yaxögüchaixü rü naxcèx ínacaqü ga to ga cuèxruü ga Tupanaärü poramaã üxü
(Mr 8.12; Lc 11.29-32)

³⁸Rü yexguma rü ñuxre ga Parichéugü rü Yudíugüarü ngúexëëruügü ga ore ga mugüwa nguxëëtaegüxü rü ñanagürügü Ngechuchuxü: —Pa Ngúexëëruüx, cuyü tadauxchaü na cunaxüxü i wüxi i cuèxruü i mexü i Tupanaärü poramaã cuyüxü —ñanagürügü. ³⁹Rü Ngechuchu nanangãxü, rü ñanagürü: —Ñã duüxügü i chixecümagüxü rü tama yaxögüxü rü naxcèx ínacaqü i wüxi i cuèxruü i mexü i Tupanaärü poramaã üxü. Natürü yema cuèxruü ga nuxcümaücü ga Tupanaärü orearü uruü ga Yonáxü ngupetüxüxüxica tátama nadaugü. Rü taxuütáma i to i cuèxruü nüxü tadauxëë i ñã duüxügü. ⁴⁰—Rü yexgumarüü ga Yoná ga tomaëxpüx ga ngunexü rü tomaëxpüx ga chütaxü choxni ga taxü ga bayenaänüwa na nayexmaxü rü wenaxärü na nangóxü, rü ngëxgumarüü tá ta nixĩ i choma i tomaëxpüx i ngunexü rü tomaëxpüx i chütaxü i chatáxüwa changëxmaxü. Natürü wena táxaru changox. ⁴¹—Rü ngëxguma nañeärü guxgu rü Tupana rü ñã duüxügüna nacaxgu i norü pecaduchiga, rü nuxcümaügüxü ga Nínibecüãx ga duüxügü rü tá inachigü. Rü Tupanapëxewa tá ínanaxuaxügü i ñã duüxügü i ñuxma maxëxü. Yerü nümagü ga Nínibecüãx rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera ixixü. ⁴²—Rü ngëxguma nañeärü guxgu rü Tupana rü ñã duüxügüna nacaxgu i norü pecaduchiga, rü ngíma ga nuxcümaücü ga Chabaaneärü ãëxgacü rü tá iichi. Rü tá ínanaxuaxü i ñã duüxügü i ñuxma maxëxü. Yerü ngíma rü yaxüwaxüchi ne ixü na ãëxgacü ga Charumóüxü naxñüxücèx ga ñuxácü poraãcü nüxü na nacüxüchixü. Natürü ñuxma nuã petanüwa nangëxma i wüxi i Charumóüärü yexera ixixü.

ngoxo i taeguxüchiga
(Lc 11.24-26)

⁴³⁻⁴⁴—Rü ngëxguma wüxi i ngoxo rü wüxi ya yatüwa ínaxüüxgu, rü dauxchitawa i ngextá taxúema íxãpataxüwa rü nu ne nanaxümare. Rü naxcèx nadau na ngexta na nangüxücèx. Rü ngëxguma taxuxguma nüxü iyangauxgu na ngexta nangüegaxü, rü nagu narüxñü na wena nataeguxü naxcèx ya yima yatü ga noxri nawa ínaxüxüchirécü. Rü ngëxguma nataegugu, rü nüxü

inayangau ya yima yatü na wüxi ya ï ya ngëäcüne rü mexëene rü meã nabixichinerüü na yïxü. ⁴⁵ —Rü ngëma ngoxo rü ínixü rü naxcèx nayadau i to i 7 i ngoxogü i norü yexera i chixexü. Rü guxüma i ngëma rü yima yatügu nayachocu, rü ngëxma naxächüügü. Rü ngëxguma ya yima yatü rü noxriarü yexera nachixe. Rü ngëxgumarüü tá ta nüxü naxüpetü i ñaã duüxüügü i chixecümagüxü —ñanagürü ga Ngechuchu.

Ngechuchuarü mamá rü naëneëgüchiga
(Mr 3.31-35; Lc 8.19-21)

⁴⁶ Rü yexguma duüxüügümaã íyadexayane ga Ngechuchu, rü yéma tangu ga naë rü naëneëgü. Rü ípataarü düxétügu tarücho, rü Ngechuchumaã tidexagüchaü. ⁴⁷ Rü wüxi ga duüxü Ngechuchumaã nüxü nixu, rü ñanagürü: —Yéa düxétüwa tangëxma ya cue rü cueneëgü, rü cumaã tidexagüchaü —ñanagürü nüxü. ⁴⁸ Natürü Ngechuchu nanangãxü ga yema duüxü ga namaã nüxü ixuxü ga yema ore, rü ñanagürü nüxü: —¿Texé tixí ya chaue? ¿Rü texégü tixí ya chaueneëgü? —ñanagürü. ⁴⁹ Rü yexguma ga Ngechuchu rü norü ngúexüügüxü naxuneta, rü ñanagürü: —Dücèx, daxe tixí ya chaue, rü daagü nixí ya chaueneëgü. ⁵⁰ —Erü guxãma ya texé ya naxüxe i Chaunatü ya daxüguçüarü ngüchaü, rü yíxema tixí ya chaueneë rü chaueyèx rü chaue —ñanagürü ga Ngechuchu.

13

Ore ga toecügu ixuxü
(Mr 4.1-9; Lc 8.4-8)

¹ Rü yematama ngunexügu ga Ngechuchu rü ínaxüxü nawa ga guma ï ga naga napexüne. Rü naxtaxaãnacüwa nayarüto. ² Rü muxüma ga duüxüügü rü yéma naxcèx nangutaquëxegü. Rü yemacèx düxwa wüxi ga ngegu nixüe ga Ngechuchu, rü guma nguewa narüto. Rü guxüma ga duüxüügü rü yexma naxnecütëxegu nachigü. ³ Rü yexguma ga Ngechuchu rü muxüma ga ore ga cuèxruüwa nanangúexëe ga duüxüügü. Rü norü nguxëëtaewa rü ñanagürü: —Rü wüxi ga yatü ga toecü rü trigumaã nanagüane. ⁴ —Rü yexguma trigumaã nagüaneãgu, rü ñuxre ga guma trigu rü namacüwagu nayi. Rü ínangugü ga werigü, rü nanawecu. ⁵ —Rü náigü ga trigu rü nutatanügu nayi ga ngextá ínachíxcaxüwa ga waixüümü. Rü paxa narüxüügü ga guma trigu, yerü ga waixüümü rü tama nayaxcü. ⁶ —Rü yexguma nangunagügu ga üèxcü, rü narüngëxgü ga guma trigu. Rü nayue yerü tama poraãcü nixãmèxã. ⁷ —Rü náigü ga trigu rü tuxunecügu nayi. Rü yexguma nayaegu ga tuxugü, rü guma triguxü inawocu, rü nanadai. ⁸ —Natürü náigü ga trigu rü mexü ga waixüümügu nayi. Rü yexguma nayaegu rü muxüma ga trigu nawa ínanguxuchi. Rü nümaxü rü wüxireewa rü 100 püxü ínanguxuchi ga norü o, rü náireegüwa rü 60, rü náireegüwa rü 30. ⁹ —Rü yíxema áchixëgüxe, ¡rü naga tarüxínüë i ngëma ore! —ñanagürü.

Tacücèx nixí ga yema ore ga cuèxruüügügu ixuxü
(Mr 4.10-12; Lc 8.9-10)

¹⁰ Rü yexguma ga norü ngúexüügü rü Ngechuchucèx naxí, rü nüxna nacagüe, rü ñanagürügü: —Pa Corix, ¿Tüxcüü i cuèxruüügügu cuyaxuãcüma cunangúexëëxü i ñaã duüxüügü? —ñanagürügü. ¹¹ Rü Ngechuchu nanangãxü, rü ñanagürü nüxü: —Tupana rü pexüxícatama nüxü nacuèxëe i ngëma ëxüügüxü na ñuxãcü äëxgacü yïxü i nümax. Natürü nüma i togü i duüxüügü rü tama nüxü nüxü nacuèxëe i ngëma. ¹² —Rü texé ya aixcüma naga ínuxë i chorü ore, rü Tupana rü yexeraãcü tá tüxü nüxü nacuèxëe. Rü ngëmaãcü tá tüxü

nangẽxma i taxũ i cuèx. Natürü texé ya tama naga ñnuxẽ i ñaã ore rü Tupana tá tũxna nanayaxu i ngẽma íraxũ i cuèx i tũxũ ngẽxmachiréxũ. ¹³—Rü ngẽmacèx nixĩ i ore i cuèxruũmaã chanangúexẽxũ i ngẽma duũxũgü. Erü nũmagü rü woo nüxũ nadaugügu, rü ñoma tama nüxũ nadaugũxũrüü nixĩgü. Rü woo nüxũ naxĩnüëgu, rü ñoma tama nüxũ naxĩnüëxũrüü nixĩgü. Rü tama nüxũ nacuèxgüéga. ¹⁴—Rü aixcũma ngẽma duũxũgüchiga nixĩ ga yema Tupanaãrũ ore ga nuxcũmaũcü ga norü orearü uruũ ga Ichaxía nüxũ ixuxũ ga ñaxũ:

“Rü ngẽma duũxũgü rü tá aixcũma nüxũ naxĩnüë, natürü tãütáma nüxũ nacuèxgüéga i tacüchiga na yĩixũ i ngẽma nüxũ naxĩnüëxũ. Rü aixcũma tá nüxũ nadaugü, natürü tãütáma nüxũ nacuèxgü na tacüchiga yĩixũ i ngẽma nüxũ nadaugũxũ. ¹⁵ Erü ngẽma duũxũgü rü tãütáma nüxũ nacuèxgüchaũ i chorü ore, rü naxchaxwa tá nügü narütütamachixẽgü rü tá naxchaxwa napexetügü. Rü ngẽmaãcü tá nanaxügü na tama nüxũ nadaugũxũcèx i ngẽma mexũ i naxcèx chaxũxũ, rü tama nüxũ naxĩnüëxũcèx i chorü ore, rü tama nüxũ nacuèxgũxũcèx na ñuxãcü choma chanaxwèxexũãcüma na namaxèxũ, rü tama chauxcèx nadaugũxũcèx na chanamaxèxèxũcèx”,

ñanagürü. ¹⁶ Rü ñanagürü ta ga Ngechuchu: —Natürü pemax, Pa Chorü Ngúexügüx, rü petaãgü erü pexetügümaãtama nüxũ pedaugü i ngẽma chaxũxũ rü pexmachixẽmaãtama nüxũ pexĩnüë i chorü ore. ¹⁷—Rü aixcũma pemaã nüxũ chixu rü muxũchixũ ga nuxcũmaũgũxũ ga Tupanaãrũ orearü uruũgü rü muxũchixũ ga duũxũgü ga imecũmaxũ, rü nüxũ nadaugüchaũ i ngẽma ñuxma chauxütawa nüxũ pedaugũxũ. Natürü tama nüxũ nadaugü. Rü nüxũ naxĩnüëchaũ i ngẽma ore i ñuxma chauxütawa nüxũ pexĩnüëxũ. Natürü tama nüxũ naxĩnüë —ñanagürü.

*Ngechuchu rü meã nanangoxẽẽ ga yema ore ga toecüchigagu yaxuxũ
(Mr 4.13-20; Lc 8.11-15)*

¹⁸ Rü ñanagürü ta ga Ngechuchu: —¡Dücèx, iperũxĩnüë na ñuxũ ñaxũchiga yĩixũ i ngẽma ore i cuèxruũ i toecüchiga! ¹⁹—Rü guma trigu ga namagu yixũnerüü tixĩgü ya yixema nüxũ ñnuxẽ i ore i mexũ na ñuxãcü ãëxgacü yĩixũ ya Tupana natürü tama nüxũ cuèxgũxe i ñuxũ ñaxũchiga na yĩixũ i ngẽma ore. Rü tümáxütawa nangu i Chataná, rü tũxũ nüxũ inayarüngümaëxẽẽ i ngẽma ore i tümããëwa ngẽxmachiréxũ. ²⁰—Rü guma trigu ga nutatanügu yixũnerüü nixĩ i ngẽma duũxũgü i nüxũ ñnuxẽ i Tupanaãrũ ore rü taãëãcüma nayauxgũxũ. ²¹—Natürü ngẽma na tama aixcũma nagu naxĩnüëxũ i ngẽma ore, rü paxaãchitama nayaxõgü, rü yixcũra ngẽxguma ngẽma oregagu guxchaxũgü nüxũ üpetügu rü èxna duũxũgü naxchi aiegu, rü ínanatèxgü i ngẽma ore. ²²—Rü guma trigu ga tuxunecügu yixũnerüü nixĩ i ngẽma duũxũgü i Tupanaãrũ orexũ ñnuxẽxũ rü yaxõgũxũ. Natürü ñoma i naãneãrũ ngẽmaxũgüçèx oegaãgũxũ, rü ngẽmaguama rüxĩnüëxũ, rü düxwa nüxũ inayarüngümaë i ngẽma ore. Rü guxũma i ngẽma rü Tupanaãrũ orexũ nüxũ narüxoxèẽ na tama aixcũma meã Tupanawe naxĩxũcèx i ngẽma duũxũgü. ²³—Natürü guma trigu ga mexũ ga waixũmügu yixũnerüü nixĩ i ngẽma duũxũgü i nüxũ ñnuxẽxũ i Tupanaãrũ ore, rü nüxũ cuèxgũxũ i tacüchiga na yĩixũ, rü naga ñnuxẽxũ rü meã naxcèx maxèxũ. Rü tümáxè rü guma trigu ga 100 pũxü nawa ínguxuchinerüü tixĩ. Rü tümáxè rü guma 60 pũxü nawa ínguxuchinerüü tixĩ. Rü tümáxè rü guma 30 pũxü nawa ínguxuchinerüü tixĩ —ñanagürü ga Ngechuchu.

Ore ga chixexũ ga natüane ga trigutanügu toxũchigagu ixuxũ

²⁴ Rü Ngechuchu rü to ga ore ga cuèxruũxũ duũxũgümaã nixu, rü ñanagürü: —Rü nüma ya Tupana rü ñoma wüxi ga yatü ga mexũne ga triguchire naãnegu tocürüü tá nanaxü. ²⁵—Rü guma yatü rü yexguma ínapeyane rü wüxi ga norü

uwanü ga naxchi aixü rü yéma naxü. Rü naëchita yexma trigunecügu nay-atogü ga chixexü ga natüane. Rü ñuxüchi ínixü. ²⁶ —Rü yexguma naxügüga ga trigu rü nayaegu rü yexwacèx yaxoxgu, rü yema natüane rü ta nangox. ²⁷ —Rü yexguma ga yema yatüarü duüxügü, rü namaã nüxü nayarüxugü, rü ñanagürügü:

“Pa Corix, cuma rü cuanegu rü triguxicachirëx ngëxma cuto. ¿Natürü ñuxäcü i ñuxma rü chixexü i natüane rü ta ngema naxügüxü?” ñanagürügü. ²⁸ —Rü yexguma ga yema naãneärü yora, rü ñanagürü nüxü:

“Maneca wüxi i chorü uwanü i chauxchi aixü nixi i ngema ngexü wagüxü” ñanagürü. Rü yexguma ga norü duüxügü rü nüxna nacagü, rü ñanagürügü:

“Pa Corix, ¿cunaxwëxexü na tanabëxü i ngema chixexü i natüane?” ñanagürügü. ²⁹ —Naturü nüma ga norü cori rü ñanagürü nüxü ga yema norü duüxügü:

“¡Nüetama ngema nangëxmagü! Erü ngëxguma chi penabëxgu, rü ngürüächi trigumaã chi ta penangauxëe na penabëxü. ³⁰ —Rü narümemaë nixi i nüetama ngema nayae ñuxmatáta triguarü buxgüwa nangu. Rü ngëxguma rü ngema tá chanamugü i chorü puracütanüxü, rü tá nanabëxira i ngema chixexü i natüane. Rü tá ínanagoxücüta, rü ñuxüchi tá ínanagu. Rü ngëmawena tá nayabuxgü i trigu, rü naxchiügu tá choxü namaã nanguxügü” ñanagürü.

Ore ga motachachiregu ixuxü

(Mr 4.30-32; Lc 13.18-19)

³¹ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü ngëma Tupanaarü ore rü yexera nixüchigü. Rü ñoma wüxi ya motachachire ya wüxi ya yatü naãnegu toxünerüü nixi. ³² —Rü woo naxíraxüchichirëx ya yima naxchire, natürü ngëxguma naxüxgu rü nayèxgu, rü wüxi i nanetü i taetaxü nixi. Rü ngëmacèx i werigü rü natanüwa naxi, rü ngëxma nayarüxüxchiãügü —ñanagürü.

Ore ga pãüärü puxëëruügu ixuxü

(Lc 13.20-21)

³³ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü Tupanaarü ore rü duüxügütanüwa nangu. Rü nixüchigü rü nanaxüchicüxü i norü maxü. Rü ñoma írxaxü i pãüärü puxëëruü i wüxi i nge taxü i ngürü pãüchara namaã ipuxëëxürüxü nixi —ñanagürü ga Ngechuchu.

Cuèxruügu ixuxü ga oremaã nidexa ga Ngechuchu na yanguxëëãxüçèx ga Tupanaärü ore

(Mr 4.33-34)

³⁴ Rü guxüma ga yema ore ga Ngechuchu duüxügümaã nüxü ixuxü, rü cuèxruügu yaxuäcüma namaã nüxü nixu. Rü yemaäcüxicatama nixi ga namaã nüxü yaxuxü. ³⁵ Rü yemaäcü nanaxü ga Ngechuchu na yanguxëëãxüçèx ga yema Tupanaärü ore ga nuxcümaücü ga norü orearü uruü ga Ichaxía ümatüxü ga ñaxü:

“Choma rü cuèxruügu ixuxü i oremaã tá duüxügümaã chidexa. Rü tá namaã chanangoxëë i ngëma cuèx i ëxüguxü ga yexguma noxri naãne ixügügumama iicüxü”, ñaxü.

Ngechuchu nanangoxëë na tacüchiga yïxü ga yema ore ga chixexü ga natüane ga trigutanügu toxüchigagu ixuxü

³⁶ Rü Ngechuchu ínayamugü ga duüxügü, rü guma i ga nagu napexünegu naxücu. Rü norü ngúexügü rü yéma naxcèx naxi, rü ñanagürügü nüxü: —Pa Corix, ¡tomaã nangoxëë na tacüchiga yïxü i ngëma chixexü i natüanegu ixuxü

i ore! —ñanagürügü. ³⁷ Rū yexguma ga Ngechuchu rü ñanagürü nüxü: — Rū yima mexü i trigumaã toecü, rü nüma nixi ya Tupana Nane ya duüxüxü ixücü. ³⁸ —Rū ngēma naāne i nagu natoexü, rü ñoma i naāne nixi. Rū ngēma mexü i trigu rü ngēma nixi i duüxügü i Tupanaärü duüxügü ixigüxü. Rū ngēma chixexü i natüane, rü ngēma nixi i duüxügü i Chatanáärü ixigüxü. ³⁹ —Rū ngēma norü uwanü i chixexü i natüanemaã naēchita naānegu yatoexü, rü ngēma nixi i Chataná. Rū ngēma ngunexü i nagu nabuxuxü i trigu rü naāneärü gúxchiga nixi. Rū ngēma puracütanüxü i triguarü buxwa puracüexü, rü Tupanaärü orearü ngeruüü i daxüçüãx nixigü. ⁴⁰ —Rū ngēxgumarüü i ngēma chixexü i natüane rü na nabéxü rü ñuxüchi na ínaguxü, rü ngēxgumarüü tá ta nixi i naāneärü guxgu. ⁴¹ —Rū choma i Tupana Nane na duüxüxü chiixü, rü tá chanamu i chorü orearü ngeruüü i daxüçüãx na nadeäxüçèx i ngēma duüxügü i chixexü ügüxü rü ngēma duüxügü i toguãxü chixexü ügüxü. Rū tá ínanawoxü. ⁴² —Rū tá üxüxetüwa nayawocu. Rū ngēma tá naxauxe rü tá nixüxchapütagü. ⁴³ —Natürü guxüma i ngēma duüxügü i Tupanaga ínüexü, rü tá üexürüü inabaixgü i ngextá Tanatü ya Tupana äëxgacü íixüwa. Rū yixema ächixëgüxe, jrü nüxü taxinüë i ngēma ore! —ñanagürü.

Ore ga taxü ga dïeru ga icüxügu ixuxü

⁴⁴ Rū Ngechuchu rü to ga ore ga cuëxruüxü duüxügümaã nixu, rü ñanagürü: —Rū ngēma na äëxgacü yixü ya Tupana rü duüxügüçèx rü namexechi ñoma wüxi i uiru i wüxi i naānegu icüxürüxü. Rū wüxi ya yatü rü ngēxguma nüxü iyangauxgu i ngēma uiru, rü paxa wena ngēma naānegu nayacux. Rū taäëäcüma namaã nataxe i guxüma i norü ngēmaxügü na naxcèx nataxexüçèx i ngēma naāne na noxrü yixüçèx i ngēma uiru —ñanagürü.

Ore ga nuta ga ngëxäëruü ga tatanüçügu ixuxü

⁴⁵ Rū ñanagürü ta ga Ngechuchu: —Rū duüxügü rü ñoma wüxi i taxetanüxü i nutagü ya ngëxäëruüçèx dauxürüü nixigü na poraäcü Tupanaxcèx nadaugüxü na nüma norü äëxgacü yixüçèx. ⁴⁶ —Rū ngēma taxetanüxü rü ngëxguma düxwa nüxü iyangauxgu ya wüxi ya nuta ya ngëxäëruü ya guxüärü yexera mexëchicü, rü namaã nataxe i guxüma i norü ngēmaxügü na naxcèx nataxexüçèx ya yima nuta ya mexëchicü, na noxrü yixüçèx.

Ore ga püchagu ixuxü

⁴⁷ —Rū ngēma Tupana na äëxgacü yixü rü wüxi i pücha i nagüxüraüxü i choxni namaã iyaxuxüxürüü nixi. ⁴⁸ —Rū ngëxguma naxäëcuxgu i ngēma pücha, rü ngēma püchaetanüxü rü naxnecüpechinügu ínanatüächigü. Rū ngēma narütogü rü nayadexechi i ngēma mexü i choxni, rü pexchigu nananucu. Rū ngēma tama ingöxü i choxni rü ínanawogü. ⁴⁹⁻⁵⁰ —Rū ngëxgumarüü tá nixi i ngëxguma naguxgu i naāne. Erü Tupanaärü orearü ngeruüü i daxüçüãx, rü nüma tá naxi. Rū tá nayadexechi i ngēma mexü i duüxügü nüxna i ngēma ichixexü, rü tá üxüxetüwa nayawocu i ngēma duüxügü i chixexü. Rū ngēma tá naxauxe, rü tá nixüxchapütagü —ñanagürü ga Ngechuchu.

Ngëxwacaxügüxü rü nuxcümäügüxü i ngëmaxügüchiga

⁵¹ Rū yexguma ga Ngechuchu rü norü ngüexügüna naca, rü ñanagürü: —¿Nüxü pecuáxü yixü na çacüchiga yixü i ngēma pemaã nüxü chixuxü? —ñanagürü. Rū nümagü nanangäxügü rü ñanagürügü: —Ngëmääcü, Pa Corix, nüxü tacüex —ñanagürügü. ⁵² Rū yexguma ga Ngechuchu rü ñanagürü nüxü: —Rū ngëxguma wüxi i ngüexëëruü i ore i mugüwa ngüxëëtaexü aixcüma nüxü cuëxgu na ñuxäcü äëxgacü yixü ya Tupana, rü nanaxwëxe na meã nüxü nacuáxü i ngēma nuxcümäüxü i Tupanaärü ore rü ñaã ngëxwacaxüxü i chorü

ore rü ta, ngëxgumarüü i wüxi i cori i norü taxepatawa duüxügücèx inawéxü i norü ngëmaxügü i ngexwacaxügüxü rü norü ngëmaxügü i nuxcümaügüxü ta —ñanagürü ga Ngechuchu.

Ngechuchu rü Nacharétuwa nayexma

(Mr 6.1-6; Lc 4.16-30)

⁵³ Rü yexguma Ngechuchu nüxü rüchaxgu ga yema ore ga cuèxruügüxü na yaxuxü, rü inaxüâchi ga yéma. ⁵⁴ Rü guma ñâne ga nawa nayaxüne ga Nacharétuwa naxü. Rü guma ñâneärü ngutaquëxepataügu naxücu rü yéma nanangüexëë ga duüxügü. Rü yema duüxügü rü nabèixächiaëgü namaã ga norü ore. Rü ñanagürügü: —¿Ngextá nüxü nacuèx i ngëma nguxëëtae? ¿Rü ñuxäcü nüxü nacuèx na naxüâxü i ngëma mexügü i taxügü i Tupanaärü poramaã naxüxü? ⁵⁵ —¿Taux êxna i daa yiixü ya carpinteru ya Yúche nane ya María ngïne, ya Chaütiágu rü Yúche rü Chimáü rü Yuda naëneë ixïcü? ⁵⁶ —¿Rü taux êxna i naëyëxgü rü nuxma tatanügu naxächüügüxü? ¿Rü ngëxguma i ngextá yiixü i nayauxâxü i ngëma nüxü nacuáxü? —ñanagürügü. ⁵⁷ Rü yemacèx ga duüxügü rü tama nüxü inarüxñüëchaü. Natürü Ngechuchu rü ñanagürü nüxü: —Guxüma i togü i duüxügü rü namaã nataãëgü i wüxi i Tupanaärü orearü uruü. Natürü ngëma orearü uruüchiüñanewatama rü duüxügü rü tama namaã nataãëgü —ñanagürü. ⁵⁸ Rü yema duüxügütanüwa rü tama poraäcü nanaxü ga mexügü ga taxügü ga Tupanaärü poramaã naxüxü, yerü tama nüxü nayaxögüchaü ga yema duüxügü.

14

Nayu ga Cuáü ga baiüxëëruü

(Mr 6.14-29; Lc 9.7-9)

¹ Rü yema ngunexügügu nixi ga Gariréaaneärü äëxgacü, ga Erode rü Ngechuchuxü nacuáchigaxü. ² Rü Erode rü norü duüxügümaã ñanagürü: —Yima nixi ya Cuáü ga baiüxëëruü rü marü wena namaxü. Rü ngëmacèx nüxü nangëxma i pora na naxüâxü i ngëma mexügü i taxügü i Tupanaärü poramaã naxüxü —ñanagürü. ³ Rü yema ñanagürü, yerü nümatama ga Erode rü üpaacü norü churaragüxü namu na Cuáüxü yayauxgüxücèx rü cademaã yanëixgüäcüma poxcupataüwa nagagüâxücèx. Rü yemaäcü nanaxü ga Erode, yerü yemaäcü naxcèx íca ga naxmèx ga Erodía ga naëneë ga Piripi naxmèxchirëx ixïcü. ⁴ Rü Erode rü Cuáümaã nanu yerü ga Cuáü rü ñanagürü nüxü: —Tama name na cuxumèxmaã cuxãmaxü —ñanagürü. ⁵ Rü Erode rü Cuáüxü nimáxchaü, natürü duüxügüxü namu yerü guxüma ga duüxügü rü nagu narüxñüë rü aixcüma Tupanaärü orearü uruü nixi ga Cuáü. ⁶ Natürü yexguma norü taunecüarü ngunexüwa nanguxgu ga Erode rü wüxi ga peta naxü. Rü yema petawa rü Erodíaxacü rü íyayüxparachigüxü napëxewa ga yema petatanüxü. Rü nüma ga äëxgacü ga Erode rü poraäcü norü me nixi ga yema naxüxü ga naxäcürücü. ⁷ Rü yemacèx ngímaã inaxuneta rü ñanagürü ngixü: —¡Choxna naxcèx naca i tacü i cunaxwëxexü, rü aixcüma tá cuxna chanaxá! —ñanagürü. ⁸ Rü yexguma ga ngíma rü ngíëxütawa ixü, rü ngíëna iyaca, rü ngígürügü: —Pa Ma, ¿tacü i cunaxwëxexü na naxcèx íchacaxü? —ngígürügü. Rü ngíë ngixü ingäxü, rü ngígürügü: —¡Naxcèx ínaca i Cuáü ya baiüxëëruüëru! —ngígürügü ga ngíë. Rü yexguma ga yema pacü rü ngígürügü nüxü ga Erode: —Chanaxwëxe i wüxi ya poratugu choxna cunaxá i Cuáü ya baiüxëëruüëru —ngígürügü. ⁹ Rü yexguma ga äëxgacü ga Erode rü inayarümaächí namaã ga yema ore, natürü norü unetacèx rü norü petatanüxücèx rü tama ngixü nawomüxëëchaü. Rü nanamu ga ñuxre ga norü churaragü na ngixna naxägüâxücèx ga yema naxcèx ínacaxü. ¹⁰ Rü

yemaãcü poxcupataũwa nanamu na yéma Cuáũxũ yanadaenaãxúcèx. ¹¹ Rũ yemawena wũxi ga poratugu ngĩxũtawa nanange ga Cuáũẽru, rũ yema pacũna nayaxã. Rũ ngĩma rũ ñuxũchi ngĩẽna iyaxã. ¹² Rũ yexguma ga Cuáũãrũ ngúexũgũ rũ yéma naxĩ, rũ nayangegũ ga naxũne, rũ inayatèxgũ. Rũ yemawena rũ Ngechuchumaã nũxũ nayarũxugũe.

Ngechuchu rũ nanachibũexẽẽ ga 5000 ga yatũgũ
(Mr 6.30-44; Lc 9.10-17; Cu 6.1-14)

¹³ Rũ yexguma yemaxũ nacuáchigagu ga Ngechuchu, rũ nũxĩcatama wũxi ga nguegu nixũe, rũ ínaxũxũ ga yéma. Rũ wũxi ga nachica ga taxúema íxãpataxũwa naxũ. Natürũ ga duũxũgũ rũ nũxũ nacuèxgũama ga ngextá na naxũxũ. Rũ ínachoxũ ga norũ ãnegũwa, rũ dauxchitagu nawe narũĩ. ¹⁴ Rũ yexguma nguewa ínaxũegu ga Ngechuchu rũ nũxũ nadau ga yema muxũma ga duũxũgũ. Rũ nũxũ nangechaũtũmũgũ. Rũ nanameẽxẽẽ ga yema duũxũgũ ga idaaweexũ ga naxcèx yéma nagagũxũ. ¹⁵ Rũ yexguma marũ nachũtachaũgu rũ Ngechuchucèx naxĩ ga norũ ngúexũgũ, rũ ñanagürũgũ nũxũ: —Marũ nachũtachaũ, rũ ñuxũchi taxúema nuxma taxãpata i nuã. Rũ name nixĩ ícuyamugũ i ñãã duũxũgũ na ãnẽxãcũgũ ya ngaicamana ngẽxmagũnewa naxĩxúcèx, rũ ngema norũ õnatèèx yataxegũxúcèx — ñanagürũgũ. ¹⁶ Natürũ ga Ngechuchu rũ ñanagürũ nũxũ: —Taxuacũma nawoegu. ¡Rũ pematama penachibũexẽẽx! —ñanagürũ. ¹⁷ Rũ nũmagũ nanangãxũgũ, rũ ñanagürũgũ: —Natürũ nuã rũ wũximẽẽxpũx i pãũ rũ taxre i choxnixĩcatama toxũ nangẽxma —ñanagürũgũ. ¹⁸ Rũ Ngechuchu nanangãxũ rũ ñanagürũ: —¡Nuã chauxũtawa penana! —ñanagürũ. ¹⁹ Rũ yexguma ga Ngechuchu rũ duũxũgũxũ namu na maxètèxewa natogũxúcèx. Rũ ñuxũchi nanade ga yema wũximẽẽxpũx ga pãũ rũ yema taxre ga choxnigũ. Rũ daxũgu nadawenũãcũma Tupanana moxẽ naxã, rũ ñuxũchi inanabũcu ga yema pãũgũ. Rũ norũ ngúexũgũna nanana, rũ yema duũxũgũxũ nayanu. ²⁰ Rũ guxũma ga yema duũxũgũ rũ meãma nachibũe. Rũ yemawena rũ 12 ga pexchigũ nanapagũamatama namaã ga yema pãũ rũ choxnichipèxegũ ga iyaxũgũxũ. ²¹ Rũ yema yéma chibũexũ rũ 5000 ga yatũgũ nixĩ, natürũ ga ngexũgũ rũ buxũgũ rũ tama nayaxugũ.

Dexáétũgu nixũ ga Ngechuchu
(Mr 6.45-52; Cu 6.16-21)

²² Rũ yemawena ga Ngechuchu rũ duũxũgũxũ íyamugũyane rũ wũxi ga nguegu nayachũxẽẽ ga norũ ngúexũgũ na yoxni naxtaxaarũ tocutũwa naxĩxúcèx. ²³ Rũ yexguma duũxũgũxũ íyamugũguwena rũ guma mèxpũnewa ínaxũãchi ga Ngechuchu na nũxĩca yéma yayumũxèxúcèx. Rũ yexma nũxĩcatama nachũtaũ. ²⁴ Natürũ ga norũ ngúexũgũ rũ naxtaxaarũ ngãxũtũchiũgu nixãgũ ga yexguma. Rũ tacũ ga buanecũ yexma nũxũ naxũ, rũ poraãcü nayuape. ²⁵ Rũ yexguma marũ yangunechaũgu rũ norũ ngúexũgũwe ínaxũãchi ga Ngechuchu. Rũ dexáchiũétũgu nixũ naxcèx ga norũ ngúexũgũ. ²⁶ Rũ yexguma norũ ngúexũgũ nũxũ daugũgu ga dexáchiũétũgu na yaxũxũ, rũ poraãcü nabèixãchiãègũ. Rũ norũ muũmaã aita naxũe, rũ ñanagürũgũ: —Wũxi i naxchiximare nixĩ —ñanagürũgũ. ²⁷ Natürũ ga Ngechuchu rũ namaã nidexa rũ ñanagürũ nũxũ: —¡Peporae! rũ choma chixĩ. ¡Rũ tãxũ ipemuũèxũ! —ñanagürũ. ²⁸ Rũ yexguma ga Pedru rũ Ngechuchumaã nidexa rũ ñanagürũ: —Pa Corix, ega chí cuma quixĩgu, ¡rũ choxũ namu na choma rũ ta dexáétũgu chixũxúcèx rũ cuxũtawa na chaxũxúcèx! —ñanagürũ. ²⁹ Rũ Ngechuchu ñanagürũ nũxũ: —Ècü ¡nuã naxũ! —ñanagürũ. Rũ yexguma ga Pedru rũ ínaxũe ga nguewa. Rũ inanaxũgũ ga dexáétũgu na yaxũxũ na Ngechuchuxũtawa

naxũxũcèx. ³⁰ Natürü yexguma nũxũ yacuèxãchigu ga na naporaxũ ga buanecü rü namuũ, rü inanaxügü ga na dexáchiügu nanguxũ. Rü aita naxũ rü ñanagürü: —Pa Corix, ¡choxũ rüngũxẽẽ! —ñanagürü. ³¹ Rü yexgumatama ga Ngechuchu rü Pedrumẽxẽgu nayayauxãchi, rü ñanagürü nũxũ: —Cuma rü Írarüwatama cuyaxõ. ¿Rü tüxcüũ tama aixcüma cuyaxõxõchi? —ñanagürü. ³² Rü yexguma ngegu yachoũgu ga Ngechuchu rü Pedru, rü nangupetü ga guma buanecü. ³³ Rü guxũma ga norü ngúexũgü ga nguewa yexmagũxũ rü Ngechuchupẽxegu nacaxãpũxügü rü nũxũ nicuèxüũgü, rü ñanagürügü nũxũ: —Aixcümaxũchi cuma nixĩ i Tupana Nane quiĩxũ —ñanagürügü.

Yenecharétuanewa Ngechuchu nanameẽxẽẽ ga idaaweexũ
(Mr 6.53-56)

³⁴ Rü yexguma marü yanguũgu ga naxtaawa, rü Yenecharétuanewa nangugü rü yéma ínachoũ. ³⁵ Rü yexguma yema duũxũgü ga yémacũãx nũxũ icuèxãchitanügu ga Ngechuchu na yĩxũ ga guma, rü guxũma ga yema naãnewa nanguchiga ga yéma na nayexmaxũ ga Ngechuchu. Rü yemacèx naxũtawa nanagagü ga yema duũxũgü ga idaaweexũ. ³⁶ Rü Ngechuchuxũ nacèexũgü na naxchirupechinügamare yangõgũgũxũcèx. Rü guxũma ga yema naxchirupechinügu ingõgüexũ rü narümeẽ.

15

Tacü nixĩ i Tupanapẽxewa duũxũgüxũ chixexẽẽxũ
(Mr 7.1-23)

¹ Rü Ngechuchucèx naxĩ ga ñuxre ga Parichéugü rü ngúexẽẽruũgü ga ore ga mugüwa nguxẽẽtaegũxũ ga Yerucharéüwa ne ìxũ. Rü Ngechuchuna nacagü, rü ñanagürügü: ² —¿Tüxcüũ i curü ngúexũgü rü tama nagu naxĩ i nuxcümaũgũxũ i tórü oxigücüma? ¿Rü tüxcüũ tama nayanguxẽẽgü i ngẽma nacüma na Tupanacèx nayauxmẽxgũxũ naxũpa na nachibüexũ? —ñanagürügü. ³ Natürü ga Ngechuchu rü nũxna naca ga yema Parichéugü rü ngúexẽẽruũgü, rü ñanagürü nũxũ: —¿Rü tüxcüũ i pema rü nũxũ pexo i Tupanaãrü mu na nagu pexĩxũcèx i pecümagütama? ⁴ Erü Tupana rü norü orewa rü ñanagürü:

“¡Tüxũ nangechaũ ya cunatü rü cue!”

ñanagürü. Rü ngẽma orewa rü ñanagürü ta:

“Rü texé ya tümanatümaã rü éxna tümaẽmaã guxchigaxe rü name nixĩ i noxtacüma ngẽmacèx tüxũ tayuxẽẽ”,

ñanagürü. ⁵ Natürü pema rü ñaperügü:

“Marü name ega wüxi ya yatü nanatüxũ rü naẽxũ ñaxgu: ‘Taxucürüwa chorü ngẽmaxümaã cuxũ charüngũxẽẽ erü guxũma i chorü ngẽmaxũ rü marü Tupanana chanaxã’,” ñaxgu. ⁶ Rü ngẽxguma texé ngẽma ñagügu rü pexcèx rü marü namexũ na tama tümanatüxũ rü tümaẽxũ tarüngũxẽẽxũ. Rü ngẽmaãcü ipeyanaxoxẽẽ i Tupanaãrü mu na nagu pexĩxũcèx i pecümagütama. ⁷ Pema nixĩ i duũxũgü i togüpẽxewa rü meã pemaxẽnetaxũ, natürü peãewa rü chixexũgu perüxĩnüẽ. Rü aixcüma nixĩ ga yema ore ga nuxcümaũcü ga Tupanaãrü orearü uruũ ga Ichaxía pechiga ümatüxũ ga ñaxũ:

⁸ “Ñaa duũxũgü rü naãxmaãmare choxũ nicuèxüũgü. Natürü naãewa rü tama aixcüma chaugu narüxĩnüẽ. ⁹ Rü taxuwama name na ngẽmaãcü natüçexma choxũ yacuèxüũgüxũ. Rü guxũma i norü nguxẽẽtae rü yatügüarü mugümare nixĩ rü tama aixcüma chorü mu nixĩ”,

ñaxũ. ¹⁰ Rü ñuxũchi ga Ngechuchu rü duũxũgüçèx naca, rü ñanagürü nũxũ: —¡Meã iperüxĩnüẽ i ñaa chorü ore, rü nagu perüxĩnüẽ! ¹¹ Ngẽma õna i duũxũgü ngõxũ rü tama ngẽma nixĩ i napecaduãxẽẽgüxũ. Natürü ngẽma

ore i chixexũ i nüxũ yaxuxũ, rü ngẽma waxi nixĩ i napecaduãxẽẽgũxũ — ñanagürü. ¹² Rü ñuxũchi ga norü ngúexũgü rü naxcèx naxĩ, rü ñanagürügü nüxũ: —¿Pa Corix, tama éxna nüxũ cucuèx na Parichéugüãẽwa nangúxũ i ngẽma ore i namaã nüxũ quixuxũ? —ñanagürügü. ¹³ Natürü nüma ga Ngechuchu rü nanangaxũ rü ñanagürü nüxũ: —Guxũma i ngema nanetü i tama Chaunatu itoxũ rü tá nanabẽx. ¹⁴ Rü nüetama i ngẽma Parichéugü, erü namaãrü cuèxruũgü i ngexetüxürüü nixĩgü. Rü ngẽxguma wüxi i ngexetüxũ rü naxrüü ngexetüxũmaã inacuèxgu rü ngürüãchi ngẽma taxre rü wüxi i ãxmaxũgu tá nügümaã nayayicu —ñanagürü. ¹⁵ Rü ñuxũchi ga Pedru rü Ngechuchuna naca, rü ñanagürü: —¿Tomaã meã nangoxẽẽ na ñuxũ ñaxũchiga yĩxũ i ngẽma ore i tomaã nüxũ quixuxũ! —ñanagürü. ¹⁶ Rü Ngechuchu nanangãxũ rü ñanagürü: —¿Éxna pema rü ta tama nüxũ pecuèxgüéga i ngẽma ore? ¹⁷ ¿Tama éxna nüxũ pecuèx rü guxũma i ngẽma õna i duũxũgü ngõxũ rü naãnüwa naxũ, rü yixcama rü ñuxũchi ínaxũxũ? ¹⁸ Natürü guxũma i ngẽma ore i duũxũgü nüxũ ixuxũ rü naãẽwa nixĩ i ne naxũxũ. Rü ngẽma ore i chixexũ waxi nixĩ i napecaduãxẽẽgũxũ i ngẽma duũxũgü. ¹⁹ Erü naãẽwa nixĩ i chixexũgu naxĩnũxũ i duũxũgü. Rü ngema ne naxũ na namáẽtaxũ, rü to i ngexũ i ãtexũmaã na inapexũ, rü na nangẽãẽmarexũ, rü na nangĩxũ, rü na yadoratèxáxũ, rü na naguxchigawèxexũ. ²⁰ Rü guxũma i ngẽma chixexũ waxi nixĩ i duũxũgüxũ pecaduãxẽẽxũ. Natürü ngẽma na tama nayauxmẽxgũxũ naxũpa na nachibüexũ, rü ngẽma rü tama nanapecaduãxẽẽ i duũxũgü — ñanagürü.

Wüxi ga ngecü ga to ga nachiiãnecũãx ga Ngechuchuaxũ yaxõxcüchiga (Mr 7.24-30)

²¹ Rü yexguma yéma inaxũãchigu ga Ngechuchu, rü Tiruane rü Chidãũãneãrü ñãnegüwa naxũ. ²² Rü Ngechuchuxũtawa ingu ga wüxi ga ngecü ga Canácũãx ga Tiruanegu ãchiũcü. Rü tagaãcü ngĩgürügü nüxũ: —Pa Cori Pa Dabitanũxũx, ¡cuxũ changechaũtümüü! Erü chauxacü rü wüxi i ngoxo ngĩwa nangẽxma i poraãcü ngĩxũ chixewexũ —ngĩgürügü. ²³ Natürü ga Ngechuchu rü tama ngĩxũ nangãxũ. Rü düxwa ga norü ngúexũgü rü naxcèx naxĩ, rü Ngechuchuxũ nacèxũgü, rü ñanagürügü: —Pa Corix ¡Ngĩmaã nüxũ ixu i ngẽma nge rü íyaxũ, erü tawe iyacaechigü! —ñanagürügü. ²⁴ Rü yexguma ga Ngechuchu rü ñanagürü: —Tupana núma choxũ namu na Yudíugü i pecaduãxgüxũcèxicatama na chadauxũcèx —ñanagürü. ²⁵ Natürü ngĩma ga yema nge ga tama Yudíu ixĩcü rü Ngechuchucèx iyaxũ. Rü napẽxegu iyacaxãpüxü, rü ngĩgürügü nüxũ: —Pa Corix ¡choxũ rüngũxẽẽ! —ngĩgürügü. ²⁶ Natürü Ngechuchu rü ñanagürü: —Tama name i taxacügüna tanapu i norü õna na airugüna naxãxũcèx —ñanagürü. [Rü yema ñanagürü yerü nümagü ga Yudíugü rü nügü nixugüe na Tupanaxãcügüxüchi yĩgüxũ rü yema togü rü ñoma airugürüü na yixĩgüxũ.] ²⁷ Natürü ngĩma ga yema nge rü ngĩgürügü: —Rü aixcüma nixĩ i curü ore, Pa Corix, natürü airugü rü ta norü yoraarü õnatüchi i mechawa rüyixũ nangõx —ngĩgürügü. ²⁸ Rü yexguma ga Ngechuchu rü ñanagürü ngĩxũ: —Pa Ngecüx, aixcümaxũchi cuyaxõ. Marü tá chanaxü i ngẽma cuma cunaxwèxexũ —ñanagürü. Rü yexgumatama ngĩxcèx nitaane ga ngĩãcü.

Ngechuchu rü nanameẽxẽẽ ga muxũma ga idaaweexü

²⁹ Rü yemawena ga Ngechuchu rü inaxũãchi ga yema naãnewa, rü nax-taxa ga Gariréacutüwa naxũ. Rü ñuxũchi wüxi ga mèxpúnewa ínaxũãchi, rü yéma nayarüto. ³⁰ Rü muxũma ga duũxũgü naxũtawa nangugü. Rü yéma naxũtawa nanagagü ga duũxũgü ga ichixeparagüxũ, rü ngexetügüxũ, rü

tama idexagüxü, rü chixechacüügüxü, rü muxüma ga togü ga idaaweexü. Rü Ngechuchupëxegu nayamugü, rü nüma ga Ngechuchu rü nanameëxë. ³¹ Rü ga duüxügü rü poraãcü nabèixãchiãëgü ga yexguma nüxü nadaugügu ga ñuxãcü yema noxri tama idexagüxü rü marü na yadexagüxü, rü yema noxri chixechacüügüxü rü marü naxcèx na yataanegüxü, rü yema noxri chixeparagüxü rü marü na nameparagüxü, rü yema noxri ngexetügüxü rü marü na yadauchigüxü. Rü yemacèx ga duüxügü rü Tupanaxü nicuëxüügü.

*Ngechuchu nanachibüexë ga 4000 ga yatügü
(Mr 8.1-10)*

³² Rü ñuxüchi ga Ngechuchu rü norü ngúexügücèx naca, rü ñanagürü nüxü: —Choxü nangechaütümügü i ñaã duüxügü, erü marü tomaëxpüx i ngunexü nuã chauxütawa nangëxmagü, rü nüxü nataxuma i norü òna. Rü taxuacüma ngëmaãcümare nachiuüwa chanamugü, erü ngürüãchi namagu tá nayaturae —ñanagürü. ³³ Rü norü ngúexügü rü ñanagürügü nüxü: —¿Natürü ngextá tá tanayaxu i òna naxcèx i guxüma i ñaã duüxügü? Erü taxüema nuxma taxãpata i nuã —ñanagürügü. ³⁴ Rü Ngechuchu nüxna naca, rü ñanagürü: —¿Ñuxre i pãü pexü nangëxma i pemax? —ñanagürü. Rü nanangãxügü, rü ñanagürügü: —Toxü nangëxma i 7 i pãü rü noxretama i choxnixãcügüxicatama —ñanagürügü. ³⁵ Rü ñuxüchi ga Ngechuchu rü duüxügüxü namu na ñaxtüanewa natogüxüçèx. ³⁶ Rü nanade ga yema 7 ga pãü rü yema choxnigü. Rü Tupanana moxë naxã. Rü ñuxüchi inanabücu. Rü norü ngúexügüna nanana na duüxügüxü yanüãxüçèx. ³⁷ Rü guxüma ga duüxügü rü meãma nachibüe. Rü yemawena rü 7 ga pexchigü nanapagüamatama namaã ga yema pãü rü choxnichipëxegü ga íyaxügüxü. ³⁸ Rü yema yéma chibüexü rü 4,000 ga yatügü nixí, natürü ga ngexügü rü buxügü rü tama nayaxugü. ³⁹ Rü yemawena ga Ngechuchu rü duüxügüxü ínimugü. Rü ñuxüchi wüxi ga nguegu nixüe, rü Magadárü naãnewa naxü.

16

*Parichéugü rü Chaduchéugü naxcèx ínacagü na nüxü nüxü nadauxëëgüxüçèx
ga wüxi ga cuèxruü ga Tupanaãrü poramaã naxüxü
(Mr 8.11-13; Lc 12.54-56)*

¹ Rü ga Parichéugü rü Chaduchéugü rü Ngechuchuxü ínayadaugü. Rü Ngechuchuna nacagüe na nüxü nüxü nadauxëëgüxüçèx ga wüxi ga cuèxruü ga Tupanaãrü poramaã naxüxü, yerü nüxü naxügüchaümare. ² Natürü nüma ga Ngechuchu rü nanangãxü, rü ñanagürü nüxü: —Pema rü yáuanecü rü ñaperügügü:

“Name tá nixí i moxüãrü ngunexü, erü nadautüweane”, ñaperügügü. ³ Rü ngëxguma pèxmama nadautüweanegu rü poraãcü nacaixanegu, rü:

“Nachixe tá nixí i ngunexü” ñaperügügü. Pema nixí i duüxügü i togüpëxewa meã pemaxënetaxü, natürü chixexügu perüxínüë. Rü pema nüxü pecuèx na penangugüxü i ñuxgu tá nameãnexü rü ñuxgu tá nachixeanexü. Natürü ñuxma na yanguxü i ngëma cuèxruügü ga nuxcüma Tupana pemaã ixunetaxü rü tama nüxü pecuëxgüéga na ñacüchiga yíxü —ñanagürü.

⁴ Rü ñanagürü ta ga Ngechuchu: —Ñaã duüxügü i chixecümagüxü rü tama yaxögüxü rü naxcèx ínacagü i wüxi i cuèxruü i Tupanaãrü poramaã üxü. Natürü yema cuèxruü ga nuxcümaücü ga Tupanaãrü orearü uruü ga Yonáxü ngupetüxürüüxicatátama nadaugü. Rü yexgumarüü na bayenaãnüwa na ínaxüxüxü, rü choma rü ichatáxüwa tá íchaxüxü. Rü taxuxütáma i to i cuèxruüxü nüxü chadauxëë i ñaã duüxügü —ñanagürü. Rü ñuxüchi nüxna yéma nixü ga Ngechuchu, rü inaxüãchi.

*Parichéugüarü pãũârü puxêëruũchiga
(Mr 8.14-21)*

⁵ Rũ yexguma naxtaxaarü tocutüwa naxĩxgu ga norü ngúexũgü, rü nüxũ inayarüngümaẽ na nawemü ta íyangegüxũ. ⁶ Rũ yexguma ga Ngechuchu rü ñanagürü nüxũ: —¡Dücèx, pexuãëgü naxcèx i Parichéugü rü Chaduchéugüarü pãũârü puxêëruũ! —ñanagürü. ⁷ Rũ yema norü ngúexũgü rü inanaxügüe ga nügü na ñagüxũ: —Ngẽma ñanagürü tüxũ, erü tama tawemüta ítingegü —ñanagürügü. ⁸ Natürü ga Ngechuchu rü nüxũ nacuèxama ga ñuxãcü na yadexagüxũ ga norü ngúexũgü. Rũ yemacèx ñanagürü nüxũ: —¿Tüxcüũ,

“Tüxũ nataxu i tawemü” ñaperügü? Pema rü tama aixcüma peyaxõgü. ⁹ —¿Tama êxna nüxũ pecuèxgüega rü nüxna pecuèxãchie ga yema wüximêëxpüx ga pãũ ga yema 5,000 ga yatügücèx ichabücuxũ? ¿Rü ñuxre ga pexchi penaxüãcuxũ namaã ga yema naxchipëxegü ga íyaxügüxũ? ¹⁰ —¿Rü tama êxna nüxna pecuèxãchie ga yema 7 ga pãũ ga yema 4,000 ga yatügücèx ichabücuxũ? ¿Rü ñuxre ga pexchi penaxüãcuxũ namaã ga yema naxchipëxegü ga íyaxügüxũ? ¹¹ —¿Rü ñuxãcü nixĩ i tama nüxũ pecuáxũ i tama pãũchiga na chidexaxũ i ngëxguma ñachagu:

“¡Pexuãëgü naxcèx i Parichéugü rü Chaduchéugüarü pãũârü puxêëruũ!” ñachagu? —ñanagürü ga Ngechuchu. ¹² Rũ yexguma ga norü ngúexũgü rü nüxũ nacuèxgü ga tama pãũârü puxêëruũchiga na yadexaxũ ga Ngechuchu, natürü Parichéugü rü Chaduchéugüarü nguxêëtaechiga na yĩxũ ga na yadexaxũ.

*Pedru nanangoxêë na Cristu na yĩxũ ga Ngechuchu
(Mr 8.27-30; Lc 9.18-21)*

¹³ Rũ yexguma Checharéa ga Piripuaneârü ngaicamana nanguxgu ga Ngechuchu, rü norü ngúexũgüna naca, rü ñanagürü: —¿Ñuxũ ñaxũ i duũxũgü i chauchiga na texé chiĩxũ i chomax? —ñanagürü. ¹⁴ Rũ nüma ga norü ngúexũgü rü nanangãxũ rü ñanagürügü: —Nangëxma i duũxũgü rü:

“Cuáũ ya baiũxêëruũ quixĩ” ñagüxũ. Rũ togü i:

“Ería quixĩ” ñagüxũ. Rũ togü i:

“Yeremíã quixĩ” ñagüxũ. Rũ togü rü:

“Wüxi ga nuxcümaãcü ga Tupanaârü orearü uruũ quixĩ” ñagüxũ —ñanagürügü. ¹⁵ Rũ yexguma ga Ngechuchu rü nüxna naca rü ñanagürü: —¿Rü pema i ñuxũ ñapegüxũ choxũ na texé chiĩxũ? —ñanagürü. ¹⁶ Rũ Chimáũ ga Pedru nanangãxũ, rü ñanagürü nüxũ: —Cuma nixĩ i Cristu ya Tupana ya maxücü Nane quiĩxũ —ñanagürü. ¹⁷ Rũ Ngechuchu nanangãxũ rü ñanagürü nüxũ: —Cuma rü aixcüma cutaãë, Pa Chimáũx, Pa Yoná Nanex, erü taxuũma i duũxũ nixĩ i cuxũ nüxũ cuèxêëxũ i ngẽma, natürü Chaunatü ya daxügücü nixĩ ya cuxũ nüxũ cuèxêëcü na Nane chiĩxũ. ¹⁸ —Rü choma cumaã nüxũ chixu rü cuma rü Pedru quixĩ. Rũ ngẽma cuéga rü “nuta” ñaxũchiga nixĩ. Rũ cuma tá nixĩ i chorü duũxũgüarü dauruũ quiĩxũ. Rũ Chataná rü tãütáma nüxũ narüyexera i ngẽma chorü duũxũgü. ¹⁹ —Rü choma rü tá cuxna chanaxã i chorü ore na duũxũgümaã nüxũ quixuxüçèx na nüxũ nacuèxgüxüçèx na ñuxãcü daxügüxũ i naãnewa nangugüxũ i ngextá Tupana ãëxgacü íixũwa. Rũ yixema tama cuxũ irüxĩnüëxê i ngẽma ore rü tãütáma ngẽma tichocu. Natürü yixema meã cuxũ irüxĩnüëxê i ngẽma ore rü aixcüma ngẽma Tupana ãëxgacü íixũwa tá tangugü —ñanagürü. ²⁰ Rũ yexguma ga Ngechuchu rü norü ngúexũgümaã nüxũ nixu, rü ñanagürü: —¡Taxúemaãtáma nüxũ pixu na choma rü Cristu chiĩxũ! —ñanagürü.

*Ngechuchu nanaxunagü ga norü yuxchiga
(Mr 8.31-9.1; Lc 9.22-27)*

21 Rū yemawena inanaxügü ga norü ngúexügümaã nüxü na yaxuxü ga tacü tá nüxü na üpetüxü. Rū ñanagürü: —Choma rü Yerucharéüwa tá chaxü, rü ngema poraãcü ngúxü tá choxü ningexëëgü. Rū choxü tá nimèxgü i Yudiügüarü ãëgacügüerugü rü paigüarü ãëxgacügü rü ngúexëëruügü i ore i mugüwa nguxëëtaegüxü. Natürü tomaëxpüx i ngunexü ngupetügu rü wena táxarü chamaxü —ñanagürü. 22 Rū yexguma ga Pedru rü nüxica noxrüwama Ngechuchuxü naga, rü inanaxügü ga na naxucuxëãxü, rü ñanagürü: —Pa Corix, Tupana rü tama nanaxwèxe na ngëmaãcü quidexaxü. Rū täütáma ngëmaãcü cuxü nangupetü i cumax —ñanagürü. 23 Natürü ga Ngechuchu rü Pedrucèx nadaueguãchi, rü ñanagürü nüxü: —¡Choxna ixügachi, Pa Chatanáx, erü chixexügu choxü cunguxëëchaü! Rū tama Tupana nagu rüxñüxügü curüxñü, rü yatügü nagu rüxñüxügumare curüxñü i cumax —ñanagürü. 24 Rū yexguma ga Ngechuchu rü norü ngúexügüxü ñanagürü: —Rü ngëxguma texé chowe rüxüxchaügu, ¡ëcü nüxü tarüxo i tümaãrü ngúchaü, rü namaã tabora i ngëma guxchaxügü i tümacèx ínguxü i ñoma curuchawa tipotaxürüü tüxü ixixëëxü, rü ngëmaëtüwa chowe tarüxüãma! 25 Erü yixema tügü maxëchaxëëchaüxë rü tá tayu. Natürü yixema chaucèx yúxe rü aixcüma tá tüxü nangëxma i maxü i taguma gúxü. 26 Rū ¿Tacüwa i nüxü namexü ya wüxi ya yatü ega nayauãxgu i guxüma i ñoma i naãneãrü ngëmaxügü, natürü iyanatauxëëãgu i norü maxü? Erü taxucürüwama wüxi ya yatü rü norü díerumaã naxcèx nataxe i norü maxü. 27 Erü choma i Tupana Nane na duüxüxü chiixü rü wena táxarü núma chaxü. Rū ngëxguma rü Chaunatü ya Tupanarüü tá ãëxgacü chixi, rü daxücüãx i orearü ngeruügümaã tá íchangu. Rū ngëxguma tá nixi i nüxü chanaxütanüxü i wüxichigü i duüxügü i ngëma ñuxãcü chaucèx na namaxëxürüüãcüma maxëxü. 28 Rū aixcüma pemaã nüxü chixu rü nangëxma i ñuxre i duüxügü i núma ngëxmagüxü rü täütáma nayu ñuxmatáta choxü nadaugü na yuwa ícharüdaxü rü aixcüma ãëxgacü ya poracü na chiixü —ñanagürü ga Ngechuchu.

17

Ngechuchu rü toraxüãcü nangox (Mr 9.2-13; Lc 9.28-36)

1 Rū 6 ga ngunexüguwena rü Ngechuchu ínayagagü ga Pedru rü Chaütiágu rü Cuáü ga Chaütiágueneë. Rū nüxicatama wüxi ga mèxpúnewa noxrüwama namaã naxü. 2 Rū yéma yema ngúexügüpëxewa rü toraxüãcü nangox ga Ngechuchu. Rū üèxcürüü nixi ga nachiwe ga na yayauracüüxü. Rü naxchiru rü ta üèxcüemarüü nixi ga na nangóonexëëãxü. 3 Rū ngürüãchi yéma naxcèx nangoxgü ga Moiché rü Ería. Rü Ngechuchumaã yéma nidexagü. 4 Rū yexguma ga Pedru rü ñanagürü Ngechuchuxü: —Pa Corix, name nixi nuã tangëxmagü. Rū ngëxguma cunaxwèxegu rü tá tanaxü ya tomaëxpüx ya düxenü, rü wüxi ya cuxcèx, rü náí ya Moíhcèx, rü náí ya Eríacèx —ñanagürü. 5 Rū yexguma íyadexayane ga Pedru rü wüxi ga caixanexü ga nangóonexëëxü rü natanügu nayangaixema. Rū yema caixanexüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü rü namaã chataãëxüchicü. ¡Rü naga pexñüë! —ñanagürü. 6 Rū yexguma yemaxü naxñüëgu ga yema ngúexügü, rü ñaxtúanegu nanangücuchiãchitanü, yerü poraãcü namuë. 7 Natürü ga Ngechuchu rü naxcèx nixü, rü nüxü nayarüngögü, rü ñanagürü nüxü: —¡Ipechigü rü tãxü ipemuüëxü! —ñanagürü. 8 Rū yexguma wenaxãrü nadaunagütanügu, rü Ngechuchuxüxícatama nadaugü rü taxúema ga toguexü nadaugü. 9 Rū yexguma ínaxígügu ga guma mèxpúnewa, rü Ngechuchu nayaxucuxëgü ga taxúemaãma na nüxü yaxugüexücèx ga yema

yéma nüxü nadaugüxü, ñuxmatáta yuwa ínadxgu rü wena namaüxgu. ¹⁰ Rü ñuxüchi ga yema ngúexüğü rü Ngechuchuna nacagü, rü ñanagürüğü: — ¿Tüxcüü i ngéma ngúexëeruüğü i ore i mugüwa nguxëëtaegüxü rü ñanagürüğü:

“Ería tá nixí ya nüxíra cuxüpa nuã ücü?” ñanagürüğü. ¹¹ Rü Ngechuchu nanangäxü, rü ñanagürü: —Aixcüma nixí i Ería na nüxíra tá núma naxüxü na chauxüpa Tupanacèx yamexëëxüçèx i duüxüğü. ¹² Natürü choma pemaã nüxü chixu, rü Ería rü marü núma naxü, natürü duüxüğü rü tama nüxü nacuèxgü na texe yüxü. Rü yemacèx chixri namaã nachopetü. Rü ngëxgumarüü tá ta nixí na chixri tá chomaã nachopetüxü i duüxüğü — ñanagürü. ¹³ Rü yexguma ga yema ngúexüğü rü nüxü nicuèxächitanü ga Cuáü ga baiüxëeruüchiga na yüxü ga yema Ngechuchu namaã nüxü ixuxü.

*Ngechuchu rü nanamexëë ga wüxi ga bucü ga ngoxo nawa yexmacü
(Mr 9.14-29; Lc 9.37-43)*

¹⁴ Rü yexguma duüxüğü íyexmaxüwa nangugügu, rü wüxi ga yatü Ngechuchucèx nixü. Rü napëxegu nayacaxäpüxü rü ñanagürü nüxü: ¹⁵ —Pa Corix, ¡nüxü nangechaü ya chaune rü naxcèx yataanexëë! Erü muëxpüxcüna rü naxäüäëxü, rü poraäcü nüxü nangux. Rü muëxpüxcüna rü üxüxetügu nayanguxëë, rü ëxna dexágu. ¹⁶ —Rü nuã curü ngúexüğüütawa chanaga, natürü nümagü rü tama nüxü nacuèxgü na namexëëgüãxü —ñanagürü. ¹⁷ Rü yexguma Ngechuchu nanangäxü, rü ñanagürü nüxü ga yema duüxüğü ga yéma yexmagüxü: —Pa Duüxüğü i Tama Yaxögüxü i Chixri Maxëxüx, ¿ñuxguratáta i pemaã chanuxmaxü rü yaxna pemaã chaxínüxü? ¡Nuã penaga ya yima bucü! —ñanagürü. ¹⁸ Rü Ngechuchu nananga ga yema ngoxo ga guma bucüwa yexmaxü. Rü yemaäcü ínanatëxüchi ga yema ngoxo. Rü yexgumatama naxcèx nitaane ga guma bucü. ¹⁹ Rü yemawena ga norü ngúexüğü rü noxrüwama Ngechuchumaã nidexagü. Rü nüxna nacagüe, rü ñanagürüğü nüxü: —Pa Corix, ¿tüxcüü i toma rü taxuacüma ítanatëxüchi i ngéma ngoxo? —ñanagürüğü. ²⁰ Rü Ngechuchu nanangäxü, rü ñanagürü nüxü: —Pema rü taxuacüma ípenatëxüchi erü tama aixcüma peyaxögü. Rü aixcüma pemaã nüxü chixu, rü ngëxguma chi woo wüxi ya motachachirerüxü naxiraxüchigu i perü õ, rü chi daa mëxpünemaã nüxü pixuxgu na yaxügachixüçèx, rü chi pega naxínü. Rü taxuxü chima pexü naguxcha ega aixcüma peyaxögügu. ²¹ —Natürü ñaärüü i ngoxo rü tama ínaxüxü ega tama ixaureäcüma iyumüxëgu —ñanagürü.

*Ngechuchu rü wenaxärü nanaxunagü ga norü yuxchiga
(Mr 9.30-32; Lc 9.43-45)*

²² Rü yexguma norü ngúexüğümaã Gariréaarü naãnegu yaxüxgu ga Ngechuchu, rü norü ngúexüğümaã nüxü nixu, rü ñanagürü: —Choma ya Tupana Nane na duüxüxü chiixü, rü chixri tá chomaã nachopetü rü äëxgacügüna tá choxü namugü i duüxüğü. ²³ —Rü tá choxü nimëxgü, natürü tomaëxpüx i ngunexüguwena rü wena táxarü chamaxü —ñanagürü. Rü yexguma yema orexü naxínüëgu ga norü ngúexüğü, rü poraäcü nangechaüğü.

*Ngechuchu ngüxü naxütanü ga yema dïëru ga tupauca ga taxü necèx ngüxü
nayauxgücü*

²⁴ Ngechuchu rü norü ngúexüğümaã Capernáüärü íänewa naxí. Rü yexguma yéma nangugügu rü Pedruxü ínayadaugü ga yema yatüğü ga tupauca ga taxü necèx dïëru ngüxü yauxgüxü. Rü Pedruna nacagüe rü ñanagürüğü: —¿Yima curü Cori rü tama ëxna ngüxü naxütanü i ngéma dïëru i tupauca ya

taxũneãrũ ixĩcũ? —ñanagũrũgũ. ²⁵ Rũ Pedru nanangãxũ, rũ ñanagũrũ: — Ngẽmaãcũ nanaxũtanũ —ñanagũrũ. Rũ yixcama ga yexguma Ìxgu naxũcuxgu ga Pedru, rũ Ngechuchuxira Pedrumaã nidexa, rũ ñanagũrũ nüxũ: —¿Ñuxũ ñacuxũ i cumax, Pa Pedrux, rũ ngextá nixĩ i nayauxgũãxũ i norũ dĩeru i guxũ i nachiũãneãrũ ãëxgacũgũ? ¿Cuxcèx i nũgũtanũwatama rũ ëxna togũ i duũxũgũtanũwa? —ñanagũrũ. ²⁶ Rũ Pedru nanangãxũ, rũ ñanagũrũ: — Maneca togũ i duũxũgũtanũwa nixĩ i nayauxgũãxũ —ñanagũrũ. Rũ ñuxũchi Ngechuchu nanangãxũ rũ ñanagũrũ: —Rũ ngëxguma ngẽmaãcũ yixĩgu, rũ yixema na Tupanaãrũ ixĩgũxũ rũ taxucèxma tanaxũtanũgũ. ²⁷ —Natũrũ ngẽma na taxũema tamaã nuxũcèx, rũ chanaxwèxe i cuyaxũtanũ i ngẽma dĩeru. ¡Rũ yéa naxtaawa naxũ, rũ ngema yapoxwaxe! ¡Rũ ngẽma nüxĩraũxũ i choxni i cunapoxwaũxũ rũ naãxwa tá nüxũ icuyangau i wũxi i dĩeru i nagu mexũ na yangutanũxëëxũcèx i chauxcèx rũ cuxcèx rũ ta! ¡Rũ tupauca ya taxũnewa nange i ngẽma dĩeru, rũ yaxũtanũ! —ñanagũrũ.

18

*¿Texé tá tixĩ ya guxããrũ yexera ixĩxë?
(Mr 9.33-37; Lc 9.46-48)*

¹ Rũ yexguma ga norũ ngũexũgũ rũ Ngechuchucèx naxĩ rũ nüxna nacagũ, rũ ñanagũrũgũ: —¿Pa Corix, texé tá tixĩ ya guxũãrũ yexera ixĩxë i ngẽma Tupana ãëxgacũ íixĩxũwa? —ñanagũrũgũ. ² Rũ yexguma ga Ngechuchu rũ wũxi ga buxũcèx naca, rũ norũ ngũexũgũarũ ngãxũtanũgu nanachixëë. ³ Rũ ñuxũchi ñanagũrũ nüxũ: —Dücèx, Pa Chorũ Ngũexũgũx, aixcũma pemaã nüxũ chixu, rũ ngëxguma tama nüxũ perũxoegu i ngẽma na togũarũ yexera pegũ pixĩgũxëëchaũxũ rũ ñuxũchi tama ñaã buxũrũũ pegũ íperũxĩragu, rũ taxucũrũwa pichocu i ngextá Tupana ãëxgacũ íixĩxũwa. ⁴ —Rũ aixcũma yixema tũgũ írũxĩraxe rũ ñaã buxũrũũ ixĩxë, rũ yixema tá tixĩ ya guxũãrũ yexera ixĩxë i ngextá Tupana ãëxgacũ íixĩxũwa. ⁵ —Rũ texé ya chauégagu meã nayaxũxe i wũxi i buxũ i ñaãrũũ ixĩxũ rũ choxũ nixĩ i tayaxuxũ.

*Naxãücũma nixĩ na pecadugu inguxũ
(Mr 9.42-48; Lc 17.1-2)*

⁶ —Rũ texé ya pecadugu nanguxëexë i wũxi i ñaã buxũgũ i choxũ yaxõgũxũ rũ tũmacèx rũ narũmemaë chi nixĩ na noxtacũma wũxi ya nuta tũmanaãwa nayangacuchixũ, rũ ñuxũchi ngẽmaãcũ taxtũchiũwa tũxũ nayarũtaëxũ na ngëxma tayuxũcèx. ⁷ —Ñoma i naãnecũãx i duũxũgũcèx rũ wũxi i taxũ i ngechaũ nixĩ na nangëxmaxũ i muxũchixũ i tacũ i pecadugu nayixëëxũ. Rũ guxũguma tá nangëxma i ngẽma chixexũgũ, natũrũ wũxi i ngechaũxũchi tá nixĩ naxcèx i ngẽma yatũ i togũxũ pecadugu nguxëëxũ. ⁸ —Rũ ngẽmacèx i ngëxguma chi cuxmëx rũ ëxna cucutũ pecadugu cuxũ nguxëëgu, rũ name nixĩ i noxtacũma ícunadae rũ yaxũgu cyaña. Erũ narũmemaë nixĩ i cuboxmëxãcũma rũ ëxna cubocutũãcũma na cunayaxuxũ i curũ maxũ na tama guxũne ya cuxmëxmaã rũ ëxna guxũne ya cucutũmaã üxũ ya taguma ixoxũnewa quitèxcuchixũcèx. ⁹ —Rũ ngëxguma chi cuxetũ pecadugu cuxũ nguxëëgu, rũ name nixĩ i ícunacaxũchi, rũ yaxũgu cunaña. Erũ narũmemaë nixĩ i wũxixetũmaã na cunayaxuxũ i curũ maxũ na tama guxũne ya cuxetũmaã üxũ ya ngoxogũ nagu poxcuenewa na quitèxcuchixũcèx. [Rũ ngẽmaãcũ woo cuxũ naguxchagu, natũrũ name nixĩ i nüxna quixũgachi i guxũma i ngẽma chixexũgũ i nagu cunguchaũxũ.]

*Ore ga carneru ga iyarũtaxuxũgu ixuxũ
(Lc 15.3-7)*

10 —Rü tama name i nüxü pexoox i wüxi i buxü i ñaärüü choxü yaxõxü. Erü ngẽma norü dauruügü i orearü ngeruügü i daxüçüãx rü guxüguma Chaunatü ya daxügucüpẽxewa nangẽxmagü na ngẽma ngẽma buxüetüwa nachogüxücèx. 11 —Rü choma i Tupana Nane na duüxüxü chiixü rü núma chaxü na chanamaxẽxẽxücèx i duüxügü iyarütauxexü. 12 —¿Rü ñuxü ñapegüxü i pema ega wüxi ya yatü rü nüxü nangẽxmagu i 100 i carnerugü rü wüxi nüxü iyarütauxgu? ¿Taux êxna i nachitaügu namugüãxü i ngẽma 99, rü ñuxüchi naxcèx yadauxü i ngẽma nüxü iyarütaxuxü? 13 —Rü ngẽxguma nüxü iyan-gauxgu, rü namaã nataãxüchi i ngẽma norü carneru. Rü woo guxüguma namaã nataãe i ngẽma 99 i tama iyarütauxexü, natürü yexeraãcüxüchi namaã nataãe i ngẽma wüxi i iyarütaxuxü, erü marü nüxü inayangau. 14 —Rü ngẽxgumarüü ta nixi ya Penatü ya daxügucü na tama nanaxwèxexü na wüxi i ñaã buxü na iyarütaxuxü.

*Ñuxãcü tamüçüxü na ingechaüxüchiga
(Lc 17.3)*

15 —Rü ngẽxguma cueneẽ chixexü cumaã üxgu, rü name nixi i nüxicatama namaã quidexa, rü nüxna nüxü cucuèxãchixẽe i ngẽma norü chixexü i cumaã naxüxü. Rü ngẽxguma cuga naxinügu, rü marü wenaxarü mexücèx cunataeguxẽe i ngẽma cueneẽ. 16 —Natürü ngẽxguma tama cuga naxinügu i ngẽma cueneẽ, rü name nixi i naxcèx cuca i wüxi rü êxna taxre i duüxügü na nümagü rü ta namaã yadexagüxücèx i ngẽma cueneẽ. 17 —Rü ngẽxguma rü ta tama nüxü inaxinügu i ngẽma taxre i duüxügüarü ore, rü name nixi i guxü i yaxõgüxümaã nüxü quixu na ngẽma cueneẽmaã yadexagüxücèx. Rü ngẽxguma rü ta tama nüxü inaxinügu i ngẽma yaxõgüxüarü ore, rü name nixi i wüxi i duüxü i tama yaxõxürüügu namaã curüxünü. 18 —Rü aixcüma pemaã nüxü chixu rü yixema núma ñoma i naãnewa tama pexü irüxünüxè i chorü ore rü täütáma Tupana aëxgacü íixüüwa tichocu. Natürü yixema meã pexü irüxünüxè i ngẽma ore rü aixcüma ngẽma tá tangu. 19 —Rü pemaã nüxü chixu rü ngẽxguma chi taxre i pema i núma ñoma i naãnewa rü wüxigu tacücèx ípecaxgu i Chaunatü ya daxügucüxütawa, rü nüma ya Chaunatü rü tá pexna nanaxã. 20 —Erü ngẽma ngextá taxre rü êxna tomaëxpüx i duüxügü chauégagu íngutaquèxexüwa, rü choma rü ta norü ngãxütanüwa changẽxma —ñanagürü. 21 Rü yexguma ga Pedru rü Ngechuchucèx nixü, rü nüxna naca, rü ñanagürü: —¿Pa Corix, ngẽxguma chaueneẽ chixexü chomaã üxgu, rü ñuxreëxpüxcüna i namexü na nüxü nüxü changechaüxü naxcèx i ngẽma chixexü i chomaã naxüxü? ¿Rü marü namexü i cuxcèx ega 7 èxpüxcüna yixigu na nüxü nüxü changechaüxü? —ñanagürü. 22 Rü Ngechuchu nanangãxü rü ñanagürü: —Tama name i 7 èxpüxcünaxicatama nüxü nüxü cungechaü. Natürü guxügutáma nixi i nüxü nüxü na cungechaüxü woo 70 èxpüxcüna i 7 wa nangu —ñanagürü.

Ore ga aëxgacüarü duüxü ga tama namüçüaxü nüxü ngechaüxü ga norü ngetanügu ixuxü

23 Rü Ngechuchu rü ñanagürü: —Rü ngẽma Tupana na aëxgacü íixü, rü ñoma wüxi ga nachüãneärü aëxgacü ga norü duüxügü ga nüxü nange-tanügüxümaã namexëechaüxürüü nixi. 24 —Rü yexguma inaxügüãgu ga meã nüxü na yadaugüxü ga yema nüxü nangetanügüxüpane, rü naxütawa nanagagü ga wüxi ga norü duüxü ga taxüchicü ga dïeru nüxü ngixü nge-tanüxü. 25 —Natürü ga yema norü duüxü rü nangearü dïeruãx, rü taxuacüma norü cori ga aëxgacüaxü nanaxütanüega. Rü yemacèx ga yema aëxgacü rü norü churaragüxü namu na to ga corixü namaã nataxegüxücèx ga yema

yatü, wüxigu tümamaã ga naxmèx rü naxãcügü rü norü yemaxügü, na yema natanü ga dîerumaã naxütanüãxücèx ga norü ngetanü. ²⁶ —Rü yexguma ga yema norü duüxü rü norü ãëxgacüpëxegu nacaxãpüxü, rü nüxü nacèèxü, rü ñanagürü:

“Pa Corix ¡choxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. ²⁷ —Rü yema norü ãëxgacüaxü nangechaütümüü, rü yemacèx namaã nüxü nixu ga marü tama nüxü na naxütanüãxücèx ga yema norü ngetanü. Rü ñuxüchi ínananguxuchixëë. ²⁸ —Natürü yexgumatama yéma ãëxgacüxütawa ínaxüüxgu ga yema yatü, rü nüxü inayangau ga wüxi ga namücü ga írarüwatama nüxü nangetanüxü. Rü yema yatü rü nüxna natüxüe, rü nananuxnaxã, rü ñanagürü nüxü:

“¡Choxü ngïxü naxütanü i ngëma dîeru i ngïxü cungetanücü!” ñanagürü. ²⁹ —Rü yexguma ga yema namücü rü yema yatüpëxegu nacaxãpüxü, rü nüxü nacèèxü, rü ñanagürü:

“Pa Chomücüx, ¡choxü nangechaü! Rü marü tá chapuracü, rü tá cuxü chanaxütanü i guxüma”, ñanagürü. ³⁰ —Natürü ga yema yatü rü tama nüxü nacuáxchaü ga yema ore. Rü poxcupataügu tüxü napoxcuama ñuxmata nüxü tanaxütanü ga yema tümaärü ngetanü. ³¹ —Rü yexguma togü ga yema ãëxgacüarü duüxügü nüxü daugügu ga yema ngupetüxü, rü poraãcü naãëwa nangux ga yema naxüxü ga yema yatü. Rü norü corixütawa naxï rü nüxü nayarüxugüe ga guxüma ga yema ngupetüxü. ³² —Rü yexguma ga yema ãëxgacü rü nanamu ga norü churaragü na naxütawa nagagüãxücèx ga yema yatü. Rü yexguma naxütawa nanguxgu, rü ñanagürü nüxü:

“Wüxi i chixexü i chorü duüxü quixï. Choma rü cuxü nüxü changechaü ga yema choxü cungetanüxü, erü choxü cucèèxü na tama cuxü chapoxcuxücèx. ³³ —Rü cuma rü chita nüxü nüxü cungechaü i ngëma cumücü i cuxü nange-tanüxü, yexgumarüü ga choma rü cuxü nüxü na changechaüxürüü ga yema choxü cungetanüxü”, ñanagürü nüxü. ³⁴ —Rü poraãcü nanuxüchi ga yema ãëxgacü. Rü norü churaragüxü namu na napoxcugüãxücèx ga yema yatü ñuxmata guxü nüxü naxütanü ga yema nüxü nangetanüxü —ñanagürü ga Ngechuchu. ³⁵ Rü ñuxüchi ñanagürü ta: —Rü ngëxgumarüü tá pemaã nanaxü ya Chaunatü ya daxügücü i ngëxguma tama wüxichigü aixcüma peenexëgüaxü nüxü perüngümaegu i ngema chixexü i pemaã naxüxü —ñanagürü.

19

Parichéugü rü Ngechuchuna nacagüe i táxmèxchiga (Mr 10.1-12; Lc 16.18)

¹ Rü yema ñaxguwena ga Ngechuchu rü inaxüãchi ga Gariréaarü naãnewa. Rü natü ga Yudáüãrü tocutüwa naxü ga Yudéaarü naãnewa. ² Rü muxüma ga duüxügü nawe narüxï, rü nüma ga Ngechuchu rü yéma nanameëxëë ga yema idaaweexü. ³ Rü Ngechuchucèx naxï ga ñuxre ga Parichéugü, rü nüxna nacagü rü ñanagürügü: —¿Cuxcèx namexü i wüxi i yatü na ínatáxmèxmarexü ega ¡acü rü chixexü taxüxgu ya naxmèx? —ñanagürügü. Rü yemaãcü nüxna nacagü yerü Ngechuchuxü chixexügu nanguxëëgüchaü. ⁴ Rü Ngechuchu nanangãxü rü ñanagürü: —¿Taguma ëxna nawa pengüe i ngëma Tupanaärü ore i ümatüxü i nüxü ixuxü ga noxri Tupana naxüxgu ga duüxügü, rü yatüxü rü ngecüxü na naxüxü? ⁵ —Rü ñanagürü ga Tupana:

“Rü ngëmacèx ya yatü rü tá nanatü rü naëna nixügachi na namèxmaã in-axãüxücèx. Rü ngëmaãcü i ngëma taxre rü ñoma wüxitama i duüxürüü tá nixïgü”.

6 —Rü ñuxũchi tama taxre nixĩ, rü wũxitama nixĩ. Rü ngẽmacèx taxucürüwa texé nügũna tayaxĩgachitanũxẽẽ i ngẽma taxre i Tupana nügũna mugũxũ — ñanagürü. 7 Rü yexguma Ngechuchuna nacagü rü ñanagürügü: —¿Tũxcüũ nixĩ ga Moĩché ga duũxũgũmaã nüxũ yaxuxũ rü ngẽxguma texé tümamèxũ ítáxchaũgu rü name nixĩ i wũxi i popera i tèxgũpane ngĩxna taxã, rü ñuxũchi ngĩxũ ítatèx? ñaxũ —ñanagürügü. 8 Rü Ngechuchu nanangãxũ, rü ñanagürü nüxũ: —Pegagu nixĩ ga Moĩché ga tama pexna nachúxãxũ na pexmèxũ ípetãxũ. Yerü nüma nüxũ nacuèx na tama aixcũma peyaxõgũxũ. Natürü noxriarü ügũgu rü tama yemaãcü nixĩ. 9 —Rü choma pemaã nüxũ chixu rü tama name na texé tümamèxũ ítãxũ ega tama naĩ ya yatũmaã nangẽãèxũgagu yixĩgu. Rü ngẽxguma chi yima yatü rü ñuxũchi naĩ i ngemaã naxãxmèxgu, rü chixexũ naxü, rü ñoma naĩ i ngemaãmare nangẽãèxürüũ nixĩ. Rü texé ya ngĩmaã ãmaxẽ i ngẽma nge i ngĩte ngĩxũ ítèxcü, rü ñoma naĩ i ngemaãmare itapexürüũ tixĩ —ñanagürü ga Ngechuchu. 10 Rü ñuxũchi ga norü ngúexũgü rü ñanagürügü nüxũ: —Ega ngẽmaãcü yixĩgu rü name nixĩ i noxtacũma tama naxãmèx ya yatü rü tama ixãte i nge —ñanagürügü. 11 Rü Ngechuchu norü ngúexũgũxũ nangãxũ rü ñanagürü: —Taxucürüwa guxũma i duũxũgü nüxũ nacuèx i ñacũchiga na yĩxũ i ngẽma nguxẽètae. Natürü yixema Tupana tũxũ nüxũ cuèxèxèxĩcatama tixĩ ya nüxũ cuèxgũxe. 12 —Rü nangẽxma i nagúxũraũxũ i guxchaxũ na tama naxãmèxũcèx ya yatü. Erü nümaxũ i yatü rü woetama taxucürüwa naxãmèx erü norü bucũma nangepũxũchare. Rü nümaxũ i yatü rü taxucürüwa naxãmèx erü nayauxpũxũcharee. Rü togü tama naxãmèx erü Tupanaãrü ngúchaũxĩcatama naxũgũchaũ. Rü texé ya ngẽmaãcü maxchaũxẽ rü marü name i ngẽmaãcü tamaxũ —ñanagürü ga Ngechuchu.

*Ngechuchu rü buxũgũxũ nameãxẽ
(Mr 10.13-16; Lc 18.15-17)*

13 Rü duũxũgü rü Ngechuchuxũtawã nanagagü ga ñuxre ga buxũgü na Ngechuchu nüxũ ingõgũxũcèx rü namaã nayumũxèxũcèx. Natürü ga Ngechuchuarü ngúexũgü rü inanaxũgũe ga na yangagũãxũ ga yema duũxũgü ga Ngechuchuxũtawã buxũgũxũ gagũxũ. 14 Natürü ga Ngechuchu rü ñanagürü nüxũ ga norü ngúexũgü: —Marü name i chauxũtawã naxĩ i buxũgü. ¡Rü tãxũ i nüxna penachuxuxũ! Erü Tupana ãèxgacü íxixũwa rü tümacèx nixĩ ya yixema ñãã buxũgürüũ meã yaxõgũxe —ñanagürü. 15 Rü ñuxũchi ga Ngechuchu rü yema buxũgüetü naxũmèx. Rü yemawena inaxũãchi ga yéma.

*Wũxi ga ngextũxũcü ga dĩeruãxũchicü Ngechuchumaã nidexã
(Mr 10.17-31; Lc 18.18-30)*

16 Rü wũxi ga ngextũxũcü rü Ngechuchuxũtawã nangu, rü nüxna naca, rü ñanagürü: —Pa Ngúexẽèruũ ya Mecüx, ¿tacü tá chaxũxũ na chanayaxuxũcèx i maxũ i taguma gũxũ? —ñanagürü. 17 Rü Ngechuchu nanangãxũ rü ñanagürü nüxũ: —¿Tũxcüũ “Mecü” ñacurügü choxũ? Erü Tupanaxĩcatama nixĩ ya mecü ixĩcü, rü nataxuma i to. Natürü ngẽxguma cunayauxchaũgu i maxũ i taguma gũxũ, rü ñnaga naxĩnü i Tupanaãrü mugü! —ñanagürü. 18 Rü yexguma ga guma ngextũxũcü rü ñanagürü: —¿Ngẽxürüxũ tá nixĩ i Tupanaãrü mugü i naga chaxĩnüxũ? —ñanagürü. Rü Ngechuchu nanangãxũ rü ñanagürü nüxũ: —¡Tãütãma cumãeta, rü tãütãma naĩ i ngemaã icupe, rü tãütãma cungĩtèèx, rü tãütãma doraxũ quixu i togũchiga! 19 —¡Rü tümaga naxĩnü ya cunatü rü cue, rü nüxũ nangechaũ i cumücũgü ngẽma na cugü cungechaũxürüũ! —ñanagürü. 20 Rü yexguma ga guma ngextũxũcü rü ñanagürü: —Guxũma i ngẽma mugü i nüxũ quixuxũ rü woetama chorü bucũma meã chayanguxẽẽ. ¿Rü tacü rü to

tá chaxü na choxü nangëxmaxüçèx i maxü i taguma gúxü? —ñanagürü. ²¹ Rü Ngechuchu nanangãxü rü ñanagürü nüxü: —Ega aixcüma Tupanapëxewa mecü quixïxchaügu, rü name nixï i namaã cutaxe i guxüma i curü ngëmaxüğü rü togü i ngearü ngëmaxüãxgüxüna cunaxã i ngëma curü natanü. Rü ngëxguma tá cuxü nangëxma i cuchica i daxüguxü i naãnewa. Rü ñuxüchi marü name i chowe curüxü —ñanagürü. ²² Natürü yexguma yemaxü naxïnügu ga guma ngextüxüçü rü poraãcü nangechaü, yerü namuãrü dïeruãxüchi. ²³ Rü yexguma ga Ngechuchu rü norü ngüexüğüxü ñanagürü: —Aixcüma pemaã nüxü chixu rü naguxchaxüchi nixï na wüxi i duüxü i dïeruãxüchixü rü Tupana ãëxgacü íixïxüwa na nanguxü. ²⁴—Rü aixcüma pemaã nüxü chixu rü ñoma wüxi i cameyu na taxucürüwama wüxi ya ucumaxëtüwa naxüpetüxüãrü yexera narüguxchamaë naxçèx i wüxi i duüxü i dïeruãxüchixü na yaxücuxü i ngextá Tupana ãëxgacü íixïxüwa —ñanagürü. ²⁵ Rü yexguma yemaxü naxïnüëgu ga norü ngüexüğü rü poraãcü nabëixãchiãëgü. Rü nügüna nacagüe rü ñanagürügü: —¿Rü texé tá ëxna tixï ya nayaxúxe i maxü i taguma gúxü? —ñanagürügü. ²⁶ Rü Ngechuchu nüxü nadawenü rü ñanagürü nüxü: —Duüxüğü rü taxuacüma nügü namaxëë, natürü Tupanaãxü rü natauxcha na namaxëxëãxü —ñanagürü. ²⁷ Rü yexguma ga Pedru rü ñanagürü nüxü: —Pa Corix, toma rü marü ítanawogü ga guxüma ga torü yemaxüğü na cuwe tarüxïxüçèx. ¿Rü tacü tá nixï i torü natanü i ñuxmax? —ñanagürü. ²⁸ Rü Ngechuchu nanangãxü rü ñanagürü nüxü: —Aixcüma pemaã nüxü chixu rü ngëma ngunexü i Tupana nagu nangexwacaxüxëxü i guxüma, rü choma rü ãëxgacü ya tacü tá chixï. Rü chorü tochica i mexëchixüwa tá charüto. Rü pema i 12 i chorü ngüexüğü na chowe perüxïxü rü pema rü tá ta pexü nangëxma i perü tochicaxü i mexëchixü i chauxütawa. Rü ngëma tá perütogü na norü maxüchigacèx nüxü picagüxü i guxüma i Yudíugü. ²⁹ Rü guxãma ya yixema tümapata chauxcèx ítaxe, rü ëxna tümaëneëgü rü tümaëyëxgüxü chauxcèx ítaxe, rü ëxna tümanatü rü tümaëxü chauxcèx ítaxe, rü ëxna tümamèx rü tümaxãcügüxü rü tümaãrü naãne chauxcèx ítaxe, rü 100 ëxpüxcüna i ngëma noxri tüxü ngëxmaxüãrü yexera tá tayaxu. Rü naëtü tá tanayaxu i maxü i taguma gúxü. ³⁰—Natürü muxüma i nümaxü i ñoma i naãnewa duüxüğü wixpëxewa ügüxëxü, rü daxüguxü i naãnewa rü Tupana tá wixweama nanaxügüxëë. Rü muxüma i nümaxü i ñoma i naãnewa duüxüğü wixweama ügüxëxü, rü daxüguxü i naãnewa rü Tupana tá wixpëxewa nanaxügüxëë.

20

Ore ga puracütanüxügu ixuxü

¹ —Rü ngëma Tupana ãëxgacü íixïxüwa rü ñoma wüxi ga ubanecüarü yora ga pëxmama norü puracütanüxü ta yadaucürü nixï. ² Rü yema puracütanüxümaã nanamexëë na wüxitchinü ga dïerugu nüxü na naxütanüãxüçèx ga wüxichigü ga ngunexüğü. Rü ñuxüchi naãnewa nanamugü na yéma yapuracüexüçèx. ³ —Rü yixcama ga 9 arü oragu rü ínayadau ga ngextá yatüğü ga puracüçèx daugüxü íngutaquëxegüxüxüwa. Rü yexma nüxü nayangau ga ñuxre ga yatüğü ga ngearü puracüãxgüxü. ⁴—Rü ñanagürü nüxü:

“¡Ngëma chorü ubanecüwa peyapuracüe! Rü meã tá pexü chanaxütanü”, ñanagürü. Rü nümagü rü yéma naxï. ⁵ —Rü yema ubanecüarü yora rü tocuchigu rü wenaxãrü togü ga puracütanüxü ta nayadau. Rü tomaëxpüxarü oragu ga yáuanecü rü wenaxãrü yexgumarü ta nayadau. ⁶—Rü yixcama ga wüximëxpüxarü oragu ga yáuanecü rü wenaxãrü ínayadau ga ngextá yatüğü

ga puracüçèx daugüxü íngutaquëxegüxüxüwa. Rü yexma nüxü nayangau ga ñuxre ga togü ga yatügü ga ngearü puracüãxgüxü. Rü ñanagürü nüxü:

“¿Tüxcüü i pema rü nuxã perüchomare i guxü i ñoma i ngunexügu, rü tama pepuracüe?” ñanagürü. ⁷—Rü nümagü nanangãxügü, rü ñanagürügü nüxü:

“Tama tapuracüe erü taxúema toxçèx tadau na tüxü tapuracüexüçèx”, ñanagürügü. Rü yexguma ga yema naãneärü yora rü ñanagürü nüxü:

“¡Pema rü ta ngema chorü ubanecüwa pexi rü peyapuracüe! Rü meã tá pexü chanaxütanü”, ñanagürü. ⁸—Rü yexguma marü nachütagu rü yema naãneärü yora, rü naxçèx naca ga norü puracütanüxüärü dauruü, rü ñanagürü nüxü:

“¡Naxçèx naca i ngëma puracütanüxü. Rü nüxïra nüxü naxütanü i ngëma wixwenaxüchima ngëma íxü, rü nawa tá icuyacuëxëë i ngëma nüxïra ngëma puracüexü!” ñanagürü. ⁹—Rü yéma naxï ga yema puracütanüxü ga wüximëxpüxaru oragu ga yáuanecü puracüwa íxü. Rü wüxichigü ngïxü nayauxgü ga wüxítachinü ga díëru. ¹⁰—Rü yemawena rü yéma naxï ga yema nüxïrama puracüexü ga puracütanüxü. Rü nümagü nagu naxïnüëgu rü yexera tá ngïxü nayauxgü ga díëru, natürü nümagü rü ta ngïxü nayauxgü ga wüxítachinütama ga díëru ga wüxichigü. ¹¹—Rü yexguma ngïxü nayauxgügu rü inanaxügüe ga chixri na yadexagüxü nachigagu ga yema naãneärü yora. ¹²—Rü ñanagürügü:

“Yixema rü guxü i ngunexügu üëxcüxetüwa tapuracüe, natürü i ñaã puracütanüxü i wixwenaxüchi íngugüxü rü wüxi i oratama napuracüe. Natürü ngëma tüxü naxütanüãxüëxpüxtama nüxü nanaxütanü”, ñanagürügü. ¹³—Natürü ga yema ubanecüaru yora nanangãxü, rü ñanagürü nüxü ga wüxi ga yema puracütanüxü:

“Pa Chomücüx, tama cuxü changïx. ¿Tama ëxna i wüxítachinügu yïxü ga chomaã cunamexëëxü na cuxü chanaxütanüxü i ngëma puracü? ¹⁴—¡Ñaã i curü díëru, rü íxü! Rü ngëma puracütanüxü i wüxi i oratama puracüexü, rü choma nüxna ngïxü chaxãxchaü i ngëma cuxna ngïxü chaxãcüëxpüx. ¹⁵—¿Tama ëxna name i ngëma choma chanaxwëxexüãcüma ngïmaã na chaxüxü i chorü díëru? ¿Rü ëxna quixãüxãchi erü ngëmaãcü chamecüma?” ñanagürü. ¹⁶—Rü yixema ñuxma duüxügü wixweama tüxü ügüxëëxë, rü daxügüxü i naãnewa rü Tupana tá wixpëxewa tüxü naxügüxëë. Rü yixema ñuxma duüxügü wixpëxewa tüxü ügüxëëxë rü daxügüxü i naãnewa rü Tupana tá wixweama tüxü naxügüxëë. Erü Tupana rü muxüchiena naxu, natürü noxre-tama tixi ya yixema tüxü nadexe —ñanagürü ga Ngechuchu.

*Ngechuchu rü norü tomaëxpücüna nanaxunagü ga norü yuxchiga
(Mr 10.32-34; Lc 18.31-34)*

¹⁷ Rü yexguma namagu yaxüxgu ga Ngechuchu ga Yerucharéüwa na naxüxü rü noxrüwama naxçèx naca ga yema 12 ga norü ngüexügü, rü ñanagürü nüxü: ¹⁸—Pema nüxü pecüex na marü ingaicaxü na Yerucharéüwa íngugüxü. Rü ngëma rü duüxügü rü tá chixri chomaã nachopetü. Rü tá paigüaru ãëxgacügü rü ngüexëëruügü i ore i mugüwa ngüxëëtaegüxüna tá choxü namugü. Rü nümagü rü tá chomaã nanaxuegugü na chayuxüçèx. ¹⁹—Rü tá to i nachüãnecüãxna choxü namugü. Rü ngëmagü tá nixi i chaugu idauxcürãügüxü rü choxü çuaxgüxü. rü ñuxüchi tá curuchawa choxü nipotagü na ngëxma chayuxüçèx. Natürü tomaëxpüx i ngunexüguwena rü tá wenaxärü chamaxü —ñanagürü.

*Wüxi ga ngüxëëçèx íca ga Chaütiágu rü Cuáüärü mamá
(Mr 10.35-40)*

²⁰ Rū yéma iyexma ga naē ga Chaŭtiágu rü Cuáŭ. Rū yema taxre rü Zebedéu nanegü nixĩgü. Rū ngĩma rü Ngechuchucèx iyaxũ namaã ga yema taxre ga ngĩnegü. Rū Ngechuchupèxegu iyacaxãpũxũ, rü wüxi ga ngũxèècèx nüxna iyaca. ²¹ Rū nūma ngĩxna naca, rü ñanagürü: —¿Tacü nixĩ i cunaxwèxexũ? — ñanagürü. Rū ngĩma inangãxũ rü ngĩgürügü: —Pa Corix, ngèxguma ãèxgacũxũ quingucuchigu rü chanaxwèxe i cunamu na wüxi i ñaã chaune rü curü tügünecüwawa na natoxũ, rü ngēma to i curü toxwecüwawa na natoxũ — ngĩgürügü. ²² Natürü Ngechuchu ngĩxũ nangãxũ rü ñanagürü: —Pema rü tama nüxũ pecuèx na tacücèx ípeçaxũ. ¿Namaxã chi peporaexũ i ngēma ngúxũ i tá choxũ üpetũxũ? —ñanagürü. Rū nūmagü nanangãxũgü rü ñanagürügü: —Ngēmaãcü namaã tá taporae —ñanagürügü. ²³ Rū Ngechuchu nanangãxũ rü ñanagürü nüxũ: —Aixcūma tá nixĩ i chauxrüü ngúxũ pingegũxũ. Natürü ngēma chorü tügünecüwawa rü chorü toxwecüwawa na perütogüxütcèx, rü tama choxmèxwa nangèxma na pexna chanaxãxũ. Rū Chaunatumèxèwa nixĩ na nangèxmaxũ i ngēma, rü nūma tá tũxna nanaxã ya yixema tümacèx íyĩxè —ñanagürü. ²⁴ Rū yexguma yemaxũ naxĩnũègu ga yema togü ga 10 ga Ngechuchuarü ngúexũgü, rü Chaŭtiágumaã rü Cuáŭmaã nanuē. ²⁵ Natürü Ngechuchu naxcèx naca rü ñanagürü nüxũ: —Pema nüxũ pecuèx rü guxũ i nachĩŭñegüarü ãèxgacügü rü poraãcü nanamu i norü duũxũgü. Rū ngēma ãèxgacügü i taxũgü rü norü duũxũgüarü yora nügü nixĩgüxèè. ²⁶ —Natürü tãütáma ngēmaãcü nixĩ i petanüwa. Rū ngèxguma texé naxwèxegu na ãèxgacü tiĩxũ i petanüwa, rü name nixĩ i noxri rü guxãärü ngũxèèruũ tixĩ. ²⁷ — Rū ngèxguma chi texé i petanüwa naxwèxegu na tümamücügüeru na tiĩxũ, rü name nixĩ i noxri rü guxũma i tümamücügüarü ngũxèèruũ tixĩ. ²⁸ — Yerü chomatama i Tupana Nane na duũxũxũ chiĩxũ rü tama togü choxũ rüngũxèèxütcèx nixĩ i nūma chaxũxũ. Natürü nūma chaxũxũ na duũxũgüxũ charüngũxèèxütcèx rü naxcèx na chayuxütcèx rü ngēmaãcü chanaxütanüxütcèx na muxũma i nūmagü rü nüxũ nangèxmaxütcèx i maxũ i taguma gúxũ — ñanagürü.

*Ngechuchu nanameèxèè ga taxre ga ngexetügüxũ
(Mr 10. 46-52; Lc 18.35-43)*

²⁹ Rū yexguma Ngechuchu norü ngúexũgümaã Yericúarü ñanewa íchoũxgu, rü muxũma ga duũxũgü nawe narüxĩ. ³⁰ Rū yéma namacüwawa narütogü ga taxre ga ingexetüxũ. Rū yexguma nüxũ naxĩnũègu na Ngechuchu yéma üpetũxũ, rü tagaãcü Ngechuchuna nacagüe, rü ñanagürügü: —Pa Corix, Pa Dabítanüxũx, ¡Cuxũ tangechaŭtümüügü! —ñanagürügü. ³¹ Rū yema duũxũgü ga Ngechuchuwe rüxĩxũ rü nayangagü na iyanangeèxgüxütcèx. Natürü nūmagü ga yema ingexetüxũ rü yexeraãcü Ngechuchuna nacagüe, rü ñanagürügü: —Pa Corix, Pa Dabítanüxũx, ¡cuxũ tangechaŭtümüügü! — ñanagürügü. ³² Rū yexguma ga Ngechuchu rü yexma nayachiãchi rü naxcèx naca ga yema ingexetüxũ. Rū nüxna naca rü ñanagürü: —¿Tacü i penaxwèxexũ na pexcèx chanaxũxũ? —ñanagürü. ³³ Rū nūmagü nanangãxũgü rü ñanagürügü: —Pa Corix, tanaxwèxe na toxũ quidauchitanügüxèèxũ — ñanagürügü. ³⁴ Rū yexguma ga Ngechuchu rü nüxũ nangechaŭtümüügü, rü naxètügügu ningõgü. Rū yexgumatama nidauchigü, rü Ngechuchuwe narüxĩ.

21

*Yerucharéŭgu naxücu ga Ngechuchu
(Mr 11.1-11; Lc 19.28-40; Cu 12.12-19)*

¹ Rū yexguma marū yangaicagūgu ga Yerucharéŭwa na nangugūxŭ, rū nawa nangugū ga guma ãne ga Bechagué ga Oríbunecüarū mēxpŭneārū ngaicamana yexmane. Rū Ngechuchu nanamu ga taxre ga norū ngúexŭgŭ. ² Rū ñanagürü nüxŭ: —¡Gua tórü toxmextawa ngēxmane ya ãnexácüwa pexĩ! Rū ngēxma tá ngixŭ pengau i wŭxi i buru i ngēxma ngaxŭcŭ namaã i wŭxi i ngixácü i yatŭxŭ i ngixŭtagu irŭxãŭxŭ. ¡Rū ngixŭ piwēxŭ, rū nuã chauxŭtawa ngixŭ pega namaã i ngixácü! ³ Rū ngēxguma texé pexna caxgu na tacŭcèx ngixŭ piwēxŭxŭ, ¡rŭ tŭmamaã nüxŭ pixu rŭ ñapegŭgŭ:

“Torü Cori nangixwēxe namaã i ngixácü, natürü paxa tá ngixŭ nawoeguxēē”, ñapegŭgŭ tŭxŭ! —ñanagürü. ⁴ Rū yema naxŭpetŭ yerŭ yemaácü Tupana nayanguxēē ga norū ore ga nuxcŭmaŭxŭ ga norū orearŭ uruŭ ũmatŭxŭ ga ñaxŭ:

⁵ “¡Yerucharéŭcŭãxgŭmaã nüxŭ pixu rŭ ñapegŭ: ‘¡Dŭcèx ya perŭ ãēxgacŭ ya nuã pexŭtawa ũcŭ! Rŭ nŭma rŭ tama nŭgŭ yacuèxŭŭácü ínangu, rŭ wŭxi i buruxacŭétŭgumare naxaunagŭ!’ ”

ñanagürü ga yema ore. ⁶ Rū yexguma ga yema taxre ga norū ngúexŭgŭ rŭ yéma naxŭ, rŭ nanaxŭgŭ ga yema Ngechuchu namaã nüxŭ ixuxŭ. ⁷ Rū Ngechuchuxŭtawa ngixŭ nagagŭ ga yema buru ngixacŭmaã. Rŭ yema norū ngúexŭgŭ rŭ naxchirumaã naxchatagŭ ga yema ngixacŭ, rŭ ñuxŭchi ga Ngechuchu rŭ natagu naxaunagŭ. ⁸ Rū yema muxŭma ga duŭxŭgŭ ga nawe rŭxŭxŭ rŭ naxchirumaã nayachamatanŭ ga nama. Rŭ togŭ rŭ naŭxátŭ ta nadaŭgŭ rŭ yemamaã nayachamatanŭ ga nama. ⁹ Rū yema duŭxŭgŭ ga napēxegu āgŭxŭ, rŭ yema togŭ ga wixweama āgŭxŭ, rŭ tagaácü ñanagürŭgŭ: —¡Nŭxŭ ticuèxŭxŭgŭ ya daa ãēxgacŭ ya Dabítanŭxŭ! ¡Rŭ namecŭmaxŭchi ya daa Tupanaegagu núma ũcŭ! ¡Rŭ pema rŭ ta, Pa Daxŭcŭãx, rŭ nüxŭ picuèxŭxŭgŭ ya Tupana! —ñanagürŭgŭ. ¹⁰ Rū yexguma Ngechuchu Yerucharéŭwa ixŭcuxgu, rŭ guxŭma ga yema ãnecŭãx rŭ nanaxixachiãēgŭ, rŭ ñanagürŭgŭ: —¿Texe nixŭ ya daa? —ñanagürŭgŭ. ¹¹ Rū yema Ngechuchuwe rŭxŭxŭ ga duŭxŭgŭ rŭ nanangãxŭgŭ rŭ ñanagürŭgŭ: —Daa nixŭ ya Tupanaärŭ orearŭ uruŭ ya Ngechuchu ya Gariréaanewa ngēxmane ya ãne ya Nacharétucŭãx ixŭcŭ —ñanagürŭgŭ.

Ngechuchu rŭ tupauca ga taxŭnewa ñanawoxŭ ga duŭxŭgŭ ga yéma taxegŭxŭ

(Mr 11.15-19; Lc 19.45-48; Cu 2.13-22)

¹² Rū tupauca ga taxŭnegu naxŭcu ga Ngechuchu, rŭ ñanawoxŭ ga yema yéma tacŭmaã taxegŭxŭ rŭ naxcèx taxegŭxŭ. Rŭ nanangŭegutanŭ ga norŭ mechagŭ ga yema duŭxŭgŭ ga yéma Tupanaarŭ amarewa mexŭ ga díerumaã taxegŭxŭ rŭ muxtucugŭmaã taxegŭxŭ. ¹³ Rū ñanagürü nüxŭ ga yema duŭxŭgŭ: —Tupanaärŭ ore i ũmatŭxŭwa rŭ ñanagürü: “Chopata rŭ yumŭxēpataŭ nixŭ”.

Natürü pema rŭ ngítèèxgŭxŭpataŭ peyaxŭxŭ —ñanagürü. ¹⁴ Rŭ yéma tupauca ga taxŭnewa rŭ Ngechuchucèx naxŭ ga ñuxre ga ingexetŭgŭxŭ rŭ ichixeparagŭxŭ. Rŭ Ngechuchu nanameèxēē. ¹⁵ Natürü ga paigŭarŭ ãēxgacŭgŭ rŭ ngúexēerŭgŭ ga ore ga mugŭwa nguxēētaegŭxŭ, rŭ nüxŭ nadaugŭ ga yema mexŭgŭ ga taxŭgŭ ga Tupanaärŭ poramaã naxŭxŭ ga Ngechuchu rŭ buxŭgŭxŭ naxŭnŭe ga na ñagŭxŭ: —¡Namexŭchi ya daa ãēxgacŭ ya Ngechuchu ya Dabítanŭxŭ! —ñagŭxŭ. Rŭ yemacèx ga yema ãēxgacŭgŭ rŭ nanuē. ¹⁶ Rŭ ñanagürŭgŭ Ngechuchuxŭ: —¿Nŭxŭ cuxŭnŭxŭ i ngēma buxŭgŭ namaã idexagŭxŭ? —ñanagürŭgŭ. Rŭ Ngechuchu nanangãxŭ, rŭ ñanagürü: —Ngŭ, nüxŭ chaxŭnŭ. ¿Natürü taguma ēxna nawa pengŭe i Tupanaärŭ ore i ũmatŭxŭ i ñaxŭ:

“Rü ngēma buxūgū i íraxüchixū rü òxchanagü rü tá ta cuxū nicuèxūgū”, ñaxū? —ñanagürü. ¹⁷ Rü yexguma ga Ngechuchu rü nüxna yéma nixū, rü ñuxūchi ínaxūxū ga guma ñānewa. Rü ñāne ga Betániawa naxū, rü yexma nāyape.

*Ngechuchu rü orix ga iguera ga ngearü oðxūmaã chixexū naxuegu
(Mr 11.12-14, 20-26)*

¹⁸ Rü moxūãcū ga pèxmama rü yexguma wenaxārü Yerucharéüçèx nataegugu ga Ngechuchu rü nataiya. ¹⁹ Rü namacüwawa nüxū nadau ga wüxi ga orix ga iguera. Rü naxcèx nixū, natürü taxuūma ga norü oxū inayangau, rü naätüxūxīcatama inayangau. Rü yemacèx ñanagürü nüxū ga yema orix: —Rü tagutáma wena cuxox, —ñanagürü. Rü yexgumatama narüñexē ga yema orix. ²⁰ Rü yexguma yemaxū nadaugūgu ga norü ngúexūgū, rü nabèixāchiãēgū. Rü Ngechuchuna nacagüe rü ñanagürügü: —¿Rü ñuxācū i ñāã orix i paxama nañexēxū? —ñanagürügü. ²¹ Rü Ngechuchu nanangāxū rü ñanagürü: —Aixcūma pemaã nüxū chixu rü ngēxguma chi meã peyaxōgūgu rü tama ngēma igueramaã chaxūxūxīca chi pexū. Natürü yexeraxū chi pexū. Rü ngēxguma chi daa mèxpūnemaã nüxū pixuxgu na yaxūgachixüçèx rü taxtū i taxūchiüwa naxūxüçèx, rü pega chi naxīnū. ²² Rü guxūma i tacü i naxcèx ípeçaxū i perü yumüxēwa, rü tá penayauxgü ega aixcūma peyaxōgüãcūma naxcèx ípeçaxgu.

*Ngechuchuna nacagüe na texégagu tupauca ga taxūnewa nanguxēētaexū
(Mr 11.27-33; Lc 20.1-8)*

²³ Rü Ngechuchu rü tupauca ga taxūnegu naxücu. Rü yexguma yéma ínanguxēētaeyane rü naxcèx naxī ga paigüarü ãēxgacügü rü Yudíugüarü ãēxgacügüerugü. Rü Ngechuchuna nacagüe rü ñanagürügü: —¿Rü texégagu nixī i cunaxūxū i ngēma núma cuxūxū? ¿Rü texé cuxū tamu na cunaxūxüçèx i ngēma? —ñanagürügü. ²⁴⁻²⁵ Rü Ngechuchu nanangāxū rü ñanagürü: —Choma rü tá ta pexna chaca, rü ngēxguma choxū pengāxūgu i ngēma pexna naxcèx chaçaxū, rü choma rü tá ta pemaã nüxū chixu na ngēxürüxūxū i ãēxgacü na choxū muxū na nuã changuxēētaexū. ¿Rü texé tanamu ga Cuáü na duüxügüxū ínabaiüxēēxüçèx? ¿Pexcèx rü Tupana yīxū ga namucü rü ēxna duüxügümare? —ñanagürü. Rü yexguma ga yema ãēxgacügü rü inanaxügüe ga nügümaã na yaporagatanüçüxū. Rü nügümaãtama ñanagürügü: —¿Ñuxū ñagügüxū tá? Erü ngēxguma chi nüxū ixuxgu na Tupana núma namuxū rü nüma rü tá ñanagürü tüxū:

“¿Rü tüxcüü ga tama nüxū peyaxōgüxū?” ñanagürü tá. ²⁶ —Rü ngēxguma chi nüxū ixuxgu na yatügümare núma namuxū rü taxcèx rü tá naxāüçüma, erü duüxügü tá tüxū nadai. Erü nümagü i duüxügü rü nagu narüxīnūé na Tupana yīxū ga Cuáüxū núma mucü —ñanagürügü. ²⁷ Rü yemacèx Ngechuchuxū nangāxūgü rü ñanagürügü: —Tama nüxū tacuèx ga texé núma na namuxū ga Cuáü ga baiüxēēruü —ñanagürügü. Rü yexguma ga Ngechuchu rü ñanagürü nüxū: —Choma rü tá ta tãütáma pemaã nüxū chixu na texé choxū muxū na chanaxūxū i ngēma choxna naxcèx peçaxū —ñanagürü.

Ore ga taxre ga nanegügu ixuxū

²⁸ Rü ñanagürü ta ga Ngechuchu —¿Ñuxū ñapegüxū naxcèx i ñāã ore i tá pemaã nüxū chixuxū? Rü wüxi ga yatü rü nüxū nayexma ga taxre ga nane. Rü wüxi ga guma nanemaã nüxū nixu rü ñanagürü nüxū:

“Pa Chaunex, chanaxwèxe i yéa chorü ubaarü buxgüwa cuyapuracü”, ñanagürü. ²⁹ —Rü guma nane nanangāxū rü ñanagürü:

“Choxũ nawèxtümüũ na ngema chaxũxũ”, ñanagürü. Natürü ga yixcamaxũra rü nagu narüxĩnũ rü düxwa yéma nayapuracü. ³⁰ —Rü yixcũra ga guma nanatü rü naĩ ga nanexũtawa naxũ, rü yexgumarüũ ta nüxũ yema ñanagürü. Rü guma nane nanangãxũ rü ñanagürü:

“Marü name, Pa Pa, rü ngema tá chaxũ”, ñanagürü. Natürü tama aixcũma yéma naxũ. ³¹ —Rü ñuxma chanaxwèxe i chomaã nüxũ pixu rü ngexcürüücü ga guma taxre ga nane ga aixcũma naxücü ga yema nanatü naxwèxexũ —ñanagürü. Rü nũmagü nanangãxũgü rü ñanagürügü: —Ga guma nüxĩra namuãcü nixĩ ga naga ĩnücü —ñanagürügü. Rü yexguma ga Ngechuchu rü ñanagürü nüxũ: —Aixcũma pemaã nüxũ chixu rü ngẽma yatügü i Dumaãrũ ãëxgacüçèx dĩëru ngĩxũ dexũ rü ngẽma ngexũgü i chixri maxèxũ tá nixĩ i pexũpa nüxĩra ichocuxũ i ngextá Tupana ãëxgacü íxĩxũwa. ³² —Yerü Cuáũ ga baiũxèëruũ rü núma naxũ na pemaã nüxũ yaxuxüçèx na ñuxãcü tá na pemaxèxũ, natürü ga pema rü tama nüxũ peyaxögü. Natürü ga yema yatügü ga Dumaãrũ ãëxgacüçèx dĩëru ngĩxũ dexũ rü yema ngexũgü ga chixri maxèxũ rü Cuáũãxũ nayaxögü. Natürü ga pema rü woo nüxũ na pedaugũxũ ga ñuxãcü na yaxögũãxũ, rü tama nüxũ perüxoechaũ i pecũma i chixexũ na peyaxögũxüçèx —ñanagürü.

*Ore ga chixexũ ga puracũtanũxũgu ixuxũ
(Mr 12.1-12; Lc 20.9-19)*

³³ Rü ñanagürü ta ga Ngechuchu: —Rü chanaxwèxe i iperüxĩnũe i ñaã to i ore i cuèxruũ i tá pemaã nüxũ chixuxũ. Rü nayexma ga wüxi ga yatü ga nüxũ nayexmacü ga wüxi ga norü naãne. Rü yexma nanato ga muxũma ga orix ga uba. Rü ñuxũchi ínanapoxegu, rü nanaxü ga wüxi ga ubaarü yaxtũxũchica rü wüxi ga dauxũtaechica. Rü ñuxũchi ñuxre ga puracũtanũxũna nüxũ nadauxèë. Rü namaã nanamexèë na ngãxũgu namaã ngĩxũ yatoyexüçèx ga yema ubatanü. Rü ñuxũchi ga yema naãneãrũ yora rü wüxi ga to ga nachĩũãne ga yaxũguxũwa naxũ. ³⁴ —Rü yexguma norü ubaarü buxgũwa nanguxgu, rü yema naãneãrũ yora rü yéma nanamugü ga ñuxre ga norü duũxũgü na yema puracũtanũxũna ngĩxcèx yaçaxüçèx ga yema ubatanü ga nüxna ücü. ³⁵ Natürü ga yema puracũtanũxũgü rü ínanayauxũ ga yema coriarü duũxũgü. Rü nanaçuaixgü ga wüxi, rü ga to rü nayamèxũchigü, rü ga yema to rü nutamaã ínanamuxũchigü. ³⁶ —Rü yema naãneãrũ yora rü wenaxãrũ noxriarü yexera rümumaèxũ ga norü duũxũgü yéma namugü. Natürü ga yema puracũtanũxũgü rü yema togürũtama chixri namaã nachopetü. ³⁷ —Rü düxwa ga yema naãneãrũ yora rü yéma nanexũchixũ namu yerü nüma nagu naxĩnũgu rü chi nanega naxĩnũe ga yema puracũtanũxũgü. ³⁸ —Natürü yexguma yema cori nanexũ nadaugũgu ga yema puracũtanũxũgü, rü nügũmaã ñanagürügü:

“Ngẽmaãrũ tá nixĩ i ñaã naãne i yixcama. ¡Rü ngĩxã tayamèxgü na tóxrü yĩxüçèx!” ñanagürügü. ³⁹ —Rü nayayauxgü, rü toxnamana nanagagü, rü yexma nayamèxgü —ñanagürü. ⁴⁰ Rü yexguma ga Ngechuchu rü yema paigũarü ãëxgacügũna naca rü ñanagürü: —¿Rü ngẽxguma ínanguxgu i ngẽma naãneãrũ yora, rü tacü tá yema puracũtanũxũmaã naxü? —ñanagürü. ⁴¹ Rü yema ãëxgacügü rü Ngechuchuxũ nangãxũgü, rü ñanagürügü: —Ngẽma naãneãrũ yora rü tama nüxũ nangechaũtümũũãcũma tá nanadai i ngẽma puracũtanũxũgü i chixri maxèxũ. Rü ñuxũchi togü i puracũtanũxũgü i meã namaã ngĩxũ itoyexũ i dĩëruna tá nüxũ nadauxèë —ñanagürügü. ⁴² Rü Ngechuchu rü ñanagürü nüxũ: —¿Taguma èxna nawa pengúe i Tupanaãrũ ore i úmatũxũ? Erü ngẽmawa rü ñanagürü:

“Rü yima nuta ya mecü ya ñärü üruügü nüxü oechirécü rü ñuxma rü yimatama nixi ya Tupana nüxira yaxücuchicü na namaã inaxügüãxücèx ya ñpata. Rü tórü Cori ya Tupana nixi ga naxücü ga yema, rü ñuxma rü namexèchi i taxcèx”,

ñanagürü i ngēma ore. ⁴³ —Rü ngēmacèx pemaã nüxü chixu rü woo pexcèxchirèx na yixü i ngēma naãne i ngextá Tupana ãëxgacü íxixüwa, natürü pexna tá nanapu. Rü togü i duixügü i aixcuma Tupanaga ñnüëxüna tá nanaxã. ⁴⁴ —Rü yima nuta ega texé namaã yarüñaxgu rü tá itapoügü. Rü yixema tümaetügu nanguxe ya yima nuta, rü tá tüxü niñaïxmü —ñanagürü ga Ngechuchu. ⁴⁵ Rü yexguma ga paigüarü ãëxgacügü rü Parichéugü nüxü ñnüëgu ga yema ore ga cuèxruü ga Ngechuchu namaã nüxü ixuxü, rü nüxü nicuèxächitanü ga nachiga na yixü ga yema ore. ⁴⁶ Rü yexgumatama ga yema ãëxgacügü rü Ngechuchuxü niyauxgüéga. Natürü taxucürüwama nayayauxgü yerü duixügüxü namuñë, yerü nümagü ga duixügü rü nayaxögü ga aixcuma Tupanaärü orearü uruü na yixü ga Ngechuchu.

22

Ore ga ngigüarü petagu ixuxü (Lc 14.15-24)

¹ Rü Ngechuchu rü wenaxärü nanangüexëë. Rü ore ga cuèxruügu namaã nayaxu, rü ñanagürü nüxü: ² —Rü ngēma Tupana na ãëxgacü íxixü rü ñoma wüxi ga nachiüãneärü ãëxgacü ga naneärü ngigü üchiücürüü nixi. ³ —Rü norü duixügüxü namu na naxcèx yaçaxücèx ga yema duixügü ga marü üpaacü nüxna naxuxü. Natürü yema duixügü ga marü nüxna naxuchiréxü rü tama yéma naxixchaü. ⁴ —Rü wenaxärü togü ga norü duixügüxü yéma namugü. Rü ñanagürü nüxü:

“¡Ngēma pexi naxütawa i ngēma duixügü i nüxna chaxuchiréxü, rü namaã nüxü peyarüxu rü marü íname i chorü ñna i taxü. Rü marü chanadai i chorü wocagü i ingüexü rü guxüma marü ínamemare. Rü chanaxwèxe i paxa nuã naxi naxcèx i ñna chorü peta!” ñanagürü. ⁵ —Natürü yema duixügü ga nüxna naxuchiréxü rü tama naga naxinüë. Rü wüxi rü nañnewa naxü, rü ga to rü norü taxepataüwa naxü. ⁶ —Rü ga togü rü yema ãëxgacüarü duixügüxü ñnayauxü rü nayaçuaixgü ñuxmata nayuexëëã. ⁷ —Rü yexguma ga guma ãëxgacü rü poraãcü nanu. Rü norü churaragüxü yéma namugü na yadaiãxücèx ga yema duixügü ga máetagüxü, rü na yagugüãxücèx ga guma norü ñane. ⁸ —Rü ñuxüchi ñanagürü nüxü ga norü duixügü:

“Guxüma i chorü peta rü marü ínamemare. Natürü ga yema duixügü ga nüxna chaxuchiréxü rü woetama nüxü chaxo na nuã naxixücèx. ⁹ —¡Rü yéa taxü i ítamüwa pexi, rü nüxna peyaxu i guxü i duixügü i ngēma nüxü pedauxü, na núma chorü petawa naxixücèx!” ñanagürü. ¹⁰ —Rü yema ãëxgacüarü duixügü rü yéma ítamüwa naxi. Rü nüxna nixuetanü ga guxüma ga duixügü ga mexügü rü chixexügü ga nüxü iyangaugüxü. Rü yemaãcü duixügümaã nanapa ga guma ãëxgacüpata. ¹¹ —Rü yexguma ga guma ãëxgacü rü nixücu nawa ga yema ucapu ga nawa peta naxüxü, yerü ñayadau ga yema duixügü ga nüxna naxuxü. Natürü yéma nüxü nadau ga wüxi ga yatü ga tama norü ngèxãéchirugu icúxü. ¹² —Rü ñanagürü nüxü:

“Pa Chomücüx ¿ñuxãcü i nuxã cuxücuxü na tama curü ngèxãéchirugu quicúxü?” ñanagürü. Natürü nüma ga yema yatü rü nangeèxmare. ¹³ —Rü yexguma ga guma ãëxgacü rü ñanagürü nüxü ga yema norü duixügü:

“¡Meã peyanèxpara rü peyanèxchacügü i ñna yatü, rü yéma düxétüwa i poraãcü ñaxëñexüwa peyatá! Rü ngēma tá narüdoxü rü tá nixüxchapüta

erü poraãcü tá nüxũ nangux”, ñanagürü. ¹⁴—Rü Tupana rü muxũchíena naxu, natürü noxretama tixĩ ya yíxema aixcüma Tupana tüxũ ndexe —ñanagürü ga Ngechuchu.

Dĩeru i ãëxgacüna ngixũ ixãcüchiga
(Mr 12.13-17; Lc 20.20-26)

¹⁵ Rü yexguma ga Parichéugü rü nixĩgachi. Rü noxrüwama nügümaã nayamexëëgü na tacü rü oremaã tá Ngechuchuna nacagüexüçèx na chixexügu nanguxëëgüãxüçèx rü ñuxüchi ãëxgacüxütawa na ínaxuaxüğüãxüçèx. ¹⁶ Rü yemacèx Ngechuchuxütawa nanamugü ga ñuxre ga norü duüxüğü namaã ga ñuxre ga Erodearü duüxüğü na yema oremaã Ngechuchuna na yacagüexüçèx. Rü yexguma Ngechuchuxütawa nangugügu rü ñanagürüğü: —Pa Ngúexëëruüx, nüxũ tacüx rü aixcüma nixĩ i ngëma nüxũ quixuxũ i curü ore. Rü aixcüma cunangüexëë i duüxüğü na Tupana naxwëxexüãcüma namaxëxüçèx. Rü tama duüxüğügamare cuxĩnũ, erü tama norü düxëtüxünegu cudawenü, natürü nacüma nixĩ i cungugüxũ. ¹⁷ —¡Rü tomaã nüxũ ixu! rü ngëma dĩeru ya ãëxgacü ya tacü ya Dumacüãx totanüwa yayauxchaüxũ, çrü namexũ yĩxũ na nüxna ngĩxũ taxãxũ rü ëxna tama? —ñanagürüğü. ¹⁸ Natürü Ngechuchu nüxũ nacüexama na chixexügu naxĩnüëxũ ga yema duüxüğü, rü yemacèx ñanagürü nüxũ: —Pema nixĩ i togüpëxewa meã pemaxënetaxũ, natürü peãewa rü chixexügu perüxĩnüë. ¿Rü tüxçüü i chixexügu choxũ penguxëëchaüxũ? ¹⁹ —¡Choxũ ngĩxũ pewé i wüxi i dĩeru i ngĩmaã ãëxgacüaxũ penaxütanüçü! —ñanagürü. Rü yéma naxütawa ngĩxũ nangegü ga wüxitachinü ga yema dĩeru. ²⁰ Rü yexguma Ngechuchu ngĩxũ dëuxgu, rü nüxna naca, rü ñanagürü —¿Rü texéhicünëxã rü texéega nixĩ i ngĩgu üxũ? —ñanagürü. ²¹ Rü nümagü nanangãxüğü, rü ñanagürüğü: —Dumacüãx ya ãëxgacü ya tacüchicünëxã nixĩ —ñanagürüğü. Rü yexguma ga Ngechuchu rü ñanagürü nüxũ: —¡Ãëxgacüna ngĩxũ pexã i ngëma ãëxgacüarü ixĩcü, rü Tupanana ngĩxũ pexã i ngëma Tupanaarü ixĩcü! —ñanagürü. ²² Rü yexguma yema orexũ naxĩnüëgu, rü nabëixãchiãëgü. Rü Ngechuchuna ínixĩ.

Ngechuchuna nacagüe rü ngoxi yuwa ínadaqü i duüxüğü
(Mr 12.18-27; Lc 20.27-40)

²³ Rü yematama ngunexügu rü ñuxre ga Chaduchéugü rü Ngechuchuxütawa naxĩ. Rü nümagü nixĩ ga nagu naxĩnüëxũ na yuexũ rü tagutáma wena namaxëxũ. Rü yemacèx Ngechuchuna nacagüe, rü ñanagürüğü: ²⁴—Pa Ngúexëëruüx, Moíché nüxũ ixuxgu rü ngëxguma wüxi ya yatü naxãmèx rü nangexacüyane nayuxgu, rü name nixĩ i naëneëtama ngĩmaã naxãmèx i ngëma yutecü i naxümmèx, na ngëmaãcü naxãxãcüxüçèx nüxũ ya yima naëneë ya marü yucü —ñanagürü ga yema ore. ²⁵ Rü ñanagürüğü ta ga Chaduchéugü: —Nayexma ga totanüwa ga 7 ga nügüeneë. Rü naxãmèx ga guma yacü, natürü tauta naxãxãcüyane nayu. Rü yexguma ga naĩ ga naëneë nüxĩ ngĩmaã naxãmèx ga yema ngeçü. ²⁶—Rü guma rü ta nayu, rü nangexacü. Rü yexguma rü naĩ ga naëneë nüxĩ ngĩmaã naxãmèx. Rü yemaãcü gucüma ga guma 7 ga nügüeneë rü ngĩmaã naxãmèx ga yema nge. Rü gucüma nayue tauta naxãxãcüyane. ²⁷—Rü yemawena rü ngĩma rü ta iyu ga yema nge. ²⁸—Rü ngëxguma yuexũ wena maxëgu, çrü ngexcürüçü ga guma 7 ga nügüeneë naxmèx tá iyixĩ i ngëma nge? Yerü gucüma ga guma 7 ga nügüeneë ngĩmaã naxãmèx —ñanagürüğü. ²⁹ Rü yexguma ga Ngechuchu rü nanangãxũ, rü ñanagürü: —Pema rü ípetüe erü tama nüxũ pecüx i Tupanaarü ore i úmatüxũ, rü tama nüxũ pecüx i ñuxãcü na yĩxũ i Tupanaarü pora. ³⁰—Rü ngëxguma yuexũ wena maxëgu rü taxúetáma tixãmèxgü rü ëxna tixãtegü. Erü daxüçüãx

i Tupanaärü orearü ngeruüggürüü tá tixīgü i ngëxguma. ³¹ —Pema choxna peca i yuexüärü dagüchiga. ¿Natürü tama êxna nawa pengúe i Tupanaärü ore i ümatüxü i ngextá Tupanatama ngëmachigaxü pemaã íyaxuxüwa? Erü ngema rü ñanagürü ya Tupana:

³² “Choma nixi i Abráüärü Tupana, rü Ichaáarü Tupana, rü Acobuarü Tupana”,

ñanagürü. Rü ngëma orewa nüxü tacuèx rü woo ñoma i naãnewa nayuegu i duüxügü, natürü Tupanaarü ñüwa rü guxüguma namaxë —ñanagürü ga Ngechuchu. ³³ Rü yexguma yemaxü naxñüëgu ga duüxügü, rü guxüma nabëixächiaëgü namaã ga norü nguxëëtae ga Ngechuchu.

Ngëma Tupanaärü mu i guxü i norü mugüarü yexera ixixü
(Mr 12.28-34)

³⁴ Rü nangutaguëxegü ga Parichéugü ga yexguma nüxü naxñüëgu ga ñuxäcü Ngechuchu rü yema Chaduchéugüxü na iyanangeëxgüëëxü. ³⁵ Rü wüxi ga yema Parichéugü ga ore ga mugüwa nguxëëtaexü rü Ngechuchuxü chixexügu nanguxëëchaü. Rü yemacëx Ngechuchuna naca rü ñanagürü: ³⁶ — Pa Ngúexëëruüx, ¿ngëxürüxü i Tupanaärü mu nixi i guxü i norü mugüarü yexera ixixü? —ñanagürü. ³⁷ Rü Ngechuchu nanangãxü rü ñanagürü: — Ngëma Tupanaärü mu i guxü i norü mugüarü yexera ixixü, rü ñanagürü:

“¡Rü nüxü nangechaü ya Cori ya curü Tupana i guxüne ya curü maxñnemaã, rü guxü i cuãëmaã, rü guxü i nagu curüxñnuxümaã!”

ñanagürü. ³⁸ —Rü ngëma nixi i Tupanaärü mu i guxü i norü mugüarü yexera ixixü. Rü ngëma nixi i nüxñraüxü i norü mu ga duüxügüna naxãxü ga Tupana.

³⁹ —Rü ngëma norü taxre i Tupanaärü mu, rü ngëma nüxñraüxü i norü murüütama nixi, rü ñanagürü:

“¡Nüxü nangechaü i cumücü ngëma na cugü cungechaüxürüü!” ñanagürü.

⁴⁰ —Rü ngëma taxre i Tupanaärü mugüwa nixi inaxügüxü i guxüma i Tupanaärü mugü ga Moïché ümatüxü rü nuxcümaügüxü ga Tupanaärü orearü uruügü namaã nguxëëtaegüxü —ñanagürü.

¿Texétaa yixü ya Cristu?
(Mr 12.35-37; Lc 20.41-44)

⁴¹⁻⁴² Rü yoxni ga Parichéugü rü yéma nangutaquëxegü, rü Ngechuchu nüxna naca, rü ñanagürü: —¿Rü ñuxü ñapegüxü i pema nüxü ya Cristu? ¿Rü texétaa yixü? —ñanagürü. Rü nümagü ga Parichéugü rü nanangãxügü rü ñanagürügü: —Cristu rü nuxcümaücü ga ãëxgacü ga Dabítaa nixi — ñanagürügü. ⁴³ Rü yexguma ga Ngechuchu rü ñanagürü: —¿Tüxcüü ga Dabí ga norü Corimaã naxuaxü ga Cristu ga yexguma Tupanaãe ga Üünexü Dabíxü idexaxëëgu? Yerü ga Dabí rü ñanagürü:

⁴⁴ “Tupana rü chorü Cori ya Cristuxü ñanagürü: ‘¡Nuã chorü tügüncüwawa rüto ñuxmatáta nüxü charüporamaë i curü uwanügü na cuga naxññüëxüçèx!’ ” ⁴⁵ —Natürü ¿ñuxücürüwa i Dabítaa yixü ya Cristu ega nümatama ga Dabí rü norü Corimaã naxuãgu? —ñanagürü ga Ngechuchu. ⁴⁶ Rü taxumaãma nanangãxügüéga ga yema Parichéugü, rü bai ga wüxi ga oremaã. Rü yemawena rü guxüma namuë na tacüçèx Ngechuchuna nacagüexü.

23

Ngechuchu rü duüxügütanüwa ínanaxuaxü ga Parichéugü rü ngúexëëruügü ga Moïchéarü mugüwa nguxëëtaegüxü
(Mr 12.38-40; Lc 11.37-54, 20.45-47)

¹ Rū yemawena ga Ngechuchu rū duūxūgūxū rū norū ngúexūgūxū ñanagürü: ² —Ngēma ngúexēēruūgū i ore i mugūwa nguxēētaegūxū rū Parichéugū, rū meāma nūxū nacuèxgū ga Tupanaārū ore ga Moīché ūmatūxū. ³ —Rū ngēmacèx name i naga pexīnūē i guxūma i ngēma pemaā nūxū yax-ugūxū. Natürü tama name i nūma namaxēxūācūma pemaxē, erü nūma nūxū nixugū i mexū i ore natürü chixri namaxē. ⁴ —Erü nūma rū poraācū pexū namu na naga pexīnūēxūcèx i norū mugū i guxchaxū i taxucürüwama texé aurexū. Natürü nūmagütama rū bai i írarüwa naga na naxīnūēxū i ngēma nawa pexū namuxū. ⁵ —Rū guxūma i ngēma naxūgūxū, rū nanaxūgū na duūxūgū nūxū daugūxūcèx. Rū ina-yangegū i Tupanaārū ore na ngēmaācū duūxūgū nagu rūxīnūēgu rū aixcūma Tupanaārū duūxūgū na yīīgūxū. Rū nūgū nangèxāēgū na duūxūgū nūxū rūdaunūxūcèx. ⁶ —Rū petagüarü ònawa rū nūmagū i Parichéugū rū nanaxwèxegū i ònaārū yoraxūtawaxūchi na natogūxū na duūxūgū ngēma nūxū rūdaunūxūcèx. Rū ngutaquēxepataūgūwa rū nanaxwèxegū na napēxewaxūchi ūgūxū i naxmèxwèxegūwa natogūxū. ⁷ —Rū ñāneārū ítamūgūwa rū nanaxwèxegū na duūxūgū meā nūxū rūmoxēgūxū ñoma āēxgacūxū meā rūmoxēxūrū. Rū nanaxwèxegū na duūxūgū rū: “Pa Ngúexēēruūx” ñagūxū nūxū. ⁸ —¡Natürü pema rū tāūtāma ngēmagu perūxīnūē! Erü guxāma i pema rū pegūeneēgū pixīgū, rū wūxixicatama nixī ya perü ngúexēēruū ixīcū. ⁹ —Rū tama name i ñoma i naānecūāxmaā pexānatū, erü wūxixicatama nixī ya Penatū, rū nūma rū daxūwa nangēxma. ¹⁰ —Rū tama name i texé: “Pa Āēxgacūx” ñatarūgū pexū. Erü chaxicatama nixī i perü āēxgacū chíxū. ¹¹ —Rū yīxema petanūwa guxāārū yexera ixīxē rū tanaxwèxe na guxūma i tūmamūcūarū ngūxēēruū tíxū. ¹² —Erü yīxema tūgū írütaxe rū Tupana tá tūxū naxānexēē. Natürü yīxema tūgū írūxíraxe, rū Tupana tá tūxū nicuèxū. ¹³ —Pa Ngúexēēruūgū i Ore i Mugūwa Nguxēētaegūxū rū Pa Parichéugūx, pema nixī i togū i duūxūgūpēxewa meā pemaxēnetaxū natürü peāēwa rū chixexūgu perūxīnūēxū. Rū wūxi i ngechaū nixī i pexcèx erü pegagu nixī na tama Tupanaxūtawa nangugūxū i togū i duūxūgū. Rū pema rū ta rū tāūtāma ngēxma pechocu, Rū ngēxgumarū ta rū nūxū penaguxchaxēē na tama ngēxma nachocuxūcèx i togū i ngēxma chocuchaūxū. ¹⁴ —Pa Ngúexēēruūgū i Ore i Mugūwa Nguxēētaegūxū rū Pa Parichéugūx, pema nixī i togū i duūxūgūpēxewa meā pemaxēnetaxū natürü peāēwa rū chixexūgu perūxīnūēxū. Rū wūxi i ngechaū nixī i pexcèx erü tūxna penapuxū ya tūmapata ya yīxema yutegūxe. Rū ñuxūchi penamèxēē i perü yumūxēgū na duūxūgū nagu rūxīnūēgu rū aixcūma mexū i Tupanaārū duūxūgū na pixīgūxū. Rū ngēmacèx pema tá nixī i togū i duūxūgūarū yexera pepoxcuxū. ¹⁵ —Pa Ngúexēēruūgū i Ore i Mugūwa Nguxēētaegūxū rū Pa Parichéugūx, pema nixī i togū i duūxūgūpēxewa meā pemaxēnetaxū natürü peāēwa rū chixexūgu perūxīnūēxū. Rū wūxi i ngechaū nixī i pexcèx erü guxūwama pexī na togū i duūxūgūmaā nūxū peyarūxuxūcèx i ore na wūxitama ya duūxē pexrū na yaxōxūcèx. Rū ngēxguma marū pexū tanguūxgu, rū tūxū pechixexēē na dūxwa taxreēxpūxcūna perü yexera chixexūwa tangēxmaxūcèx. ¹⁶ —Pa Ngúexēēruūgū i Ore i Mugūwa Nguxēētaegūxū rū Pa Parichéugūx, pema rū ñoma cuèxruūgū i ngexetūxūrū pixīgū. Rū wūxi i ngechaū nixī i pexcèx, erü nūxū pixuxgu rū:

“Ngēxguma texé ya tupauca ya taxūneegagu tacūcèx ixunetagu, rū marū name ega tama tayanguxēēgu i ngēma tūmaārū uneta”, ñaperūgūgū. Natürü ngēxguma texé tupauca ya taxūneārū dīēruégagu tacūcèx ixunetagu, rū:

“Tanaxwèxe i aixcūma tayanguxēē i ngēma tūmaārū uneta”, ñaperūgūgū. ¹⁷ —Pema rū pengēāēgū rū ñoma pengexetūgūxūrū pixīgū. ¿Pexcèx rū tacū

nixĩ i yexera rümemaẽxũ, tupauca ya taxũneãrũ dĩẽru rü ěxna nümatama ya tupauca ya nagagu naxüünene i ngẽma dĩẽru? ¹⁸ —Rü tupauca ya taxũnewa nangẽxma i ngẽma ãmarechica i ngexta Tupanacèx ínadaiaxũwa i naxũnagü na Tupanana naxãmarexũcèx. Rü pema rü ñaperügügü:

“Rü ngẽxguma texé ya tupauca ya taxũneãrũ ãmarechicaégagu ñacücèx ixunetagu, rü marü name ega tama tayanguxẽẽgu i ngẽma tümaãrũ uneta. Natürü ngẽxguma texé tupauca ya taxũneãrũ ãmarechicawa ngẽxmaxũ i ãmareégagu ñacücèx ixunetagu, rü tanaxwèxe i aixcüma tayanguxẽẽ i ngẽma tümaãrũ uneta”, ñaperügügü. ¹⁹ —Pema rü pengẽãẽgü rü ñoma pengexetügüxürüũ pixĩgü. ¿Pexcèx rü ñacü nixĩ i yexera rümemaẽxũ, rü yima tupauca ya taxũneãrũ ãmarechicawa ngẽxmaxũ i ãmare rü ěxna nümatama ya tupauca ya taxũneãrũ ãmarechica i nagagu naxüünexũ i ngẽma ãmare? ²⁰ —Erü yíxema tupauca ya taxũneãrũ ãmarechicaégagu ñacücèx ixunetaxe, rü tama ngẽma nachicaégaguxicatama itaxuneta, natürü ngẽma ãmare i ngẽma nachicawa ngẽxmaxũégagu rü ta itaxuneta. ²¹ —Rü yíxema tupauca ya taxũneégagu ñacücèx ixunetaxe, rü tama ngẽma tupaucaégaguxicatama itaxuneta, natürü Tupana ya ngẽma maxũcüégagu rü ta itaxuneta. ²² Rü yíxema daxüguxũ i naãneégagu ñacücèx ixunetaxe, rü Tupanaãrũ toruñégagu rü ta itaxuneta, rü ngẽxgumarüũ ta Tupana ya ngẽma rütocüégagu rü ta itaxuneta. ²³ —Pa Ngúexẽẽruügü i Ore i Mugüwa Nguxẽẽtaegüxũ rü Pa Parichéugüx, pema nixĩ i togü i duũxügüpèxewa meã pemaxẽnetaxũ, natürü peãewa rü chixexügu perüxĩnũexũ. Rü wüxi i ngechaũ nixĩ i pexcèx, erü woo ñacü i íraxũ i pexũ ngẽxmaxũ rü Tupanana penaxã i ngẽma nüxna üxũ. Natürü tama naga pexĩnüẽ i Tupanaãrũ mugü i guxũ i mugüarü yexera ixĩxũ. Erü pexũ nataxu na ãẽxgacügü i aixcüma meãma duũxügümaã icuèxgüxũ na pixĩgüxũ, rü pexũ nataxu na duũxügü pexũ nangechaũtümüügüxũ, rü aixcüma meã Tupanamaã pixaixcümagüxũ. Rü guxũma i ngẽma nixĩ i Tupana naxwèxexũ na penaxüxũ, tama nüxũ ipeyarüngümaẽãcüma i ngẽma mexũ i marü pexüxũ. ²⁴ —Pa Cuèxruügü i Ngexetügüxũx, pema rü guxũma i mugü i woo íraxüchixũ rü meãma penaxaure, natürü tama Tupana naxwèxexũãcüma pemaxẽ. Pema rü ñoma wüxi i duũxũ i tunücèx norü axexũ bapetüxũ rü ñuxũchi arü wüxi i cameyu ixaxwetaũxürüũ pixĩgü. ²⁵ —Pa Ngúexẽẽruügü i Ore i Mugüwa Nguxẽẽtaegüxũ rü Pa Parichéugüx, pema nixĩ i togü i duũxügüpèxewa meã pemaxẽnetaxũ natürü peãewa rü chixexügu perüxĩnũexũ. Rü wüxi i ngechaũ nixĩ i pexcèx, erü perü düxétüxũnewaxicatama pegü pemexẽẽchaũ, natürü perü maxüwa rü poraãcü pichixe. Erü penawomüxẽẽãcüma poraãcü naxcèx pengĩx i duũxügüarü ngẽmaxügü, rü pegüguxicatama perüxĩnüẽ. ²⁶ —Pa Parichéugü i Ñoma Ngexetüxürüũ Ixĩgüxũx, name nixĩ i pegü pimexẽẽ i perü aixepewa i perü maxüwa. Rü ngẽxguma tá nixĩ i perü düxétüwa rü tá ta pimexũ. ²⁷⁻²⁸ —Pa Ngúexẽẽruügü i Ore i Mugüwa Nguxẽẽtaegüxũ rü Pa Parichéugüx, pema nixĩ i togü i duũxügüpèxewa meã pemaxẽnetaxũ natürü peãewa rü chixexügu perüxĩnũexũ. Rü wüxi i ngechaũ nixĩ i pexcèx, erü ñoma yuetachiquèxegü i düxétüwa cómuxũmaã chauxetügüxũ natürü aixepewa rü yuetachinaxãmaã rü nagúxüraũxũ i ãũachixũmaã napagüxürüũ pixĩgü. Erü perü düxétüwa i duũxügü nüxũ ídaugüxũwaxicatama pime, natürü aixepewa i peãewa rü poraãcü pichixe. ²⁹ —Rü wüxi i ngechaũ nixĩ i pexcèx, Pa Ngúexẽẽruügü i Ore i Mugüwa Nguxẽẽtaegüxũ rü Pa Parichéugüx. Pema rü peyamecagü ga naxchiquèxegü ga nuxcümaũgüxũ ga Tupanaãrũ orearü urügü rü yema duũxügü ga imexũ ga yuexũ. ³⁰ —Rü ñuxũchi ñaperügügü:

“Rü yexguma chi nuxcümaũgüxũ ga tórü oxigü maxẽyane imaxẽgu, rü tãũ chima nüxũ tarüngüxẽẽ ga na nadaiãxũ ga yema nuxcümaũgüxũ ga

Tupanaärü orearü uruügü”, ñaperügü. ³¹ —Rü ngēma oremaã rü pegü pengoxēē na nataagü pixīgüxü ga yema duüxügü ga nuxcūmaügüxü ga Tupanaärü orearü uruügüxü dèixü. ³² —¡Ēcū, noxtacūma chomaã rü ta peyanguxēēx ga yema chixexü ga nuxcūmaügüxü ga perü oxigü ügüexü! ³³ —Pa Āxtapearü Duüxügüx, pema rü poraãcū pichixe. ¿Ñuxãcū tá naxchaxwa pibuxmü ya yima üxü ya Tupana tá namaã pexü poxcuene? ³⁴ —Rü ngēmacèx i choma rü tá pexcèx núma chanamugü i Tupanaärü orearü uruügü, rü yatügü i mexügü i nüxü cuèxüchigüxü, rü ngúexēēruügü i mexügü. Natürü pema rü tá curuchawa peyapotagüácūma penadai i ñuxre. Rü togü rü ngutaquēxepataügüwa rü tá peyaçuaixgü, rü togü rü ñānechigüwa rü tá nawe pingēxütanü na chixexü namaã pexügüxüçèx. ³⁵ —Natürü Tupana tá pexü napoxcue naxcèx i guxüma ga norü duüxügü ga imexügü ga perü oxigü dèixü. Rü Abéwa nixi ga inaxügüãxü ga na nadaiãxü rü Chacaríga ga tupauca ga taxūnegu peyamèxgücügu nixi ga yacuáxü ga yema. ³⁶ —Rü aixcūma pemaã nüxü chixu rü guxüma ga yema chixexüçèx rü Tupana tá nanapoxcue i duüxügü i ñomaüçüü maxèxü —ñanagürü ga Ngechuchu.

*Ngechuchu rü Yerucharéüçüãx ga duüxügüçèx naxaxu
(Lc 13.34-35)*

³⁷ Rü ñanagürü ta ga Ngechuchu: —Pa Yerucharéüçüãx, pema penadai i Tupanaärü orearü uruügü, rü nutamaã ípenamuxüchigü i Tupanaärü orearü ngeruügü i pexcèx núma namugüxü. Rü ñuxreēxpüxcūna wüxigu chaugüxütagu pexü chanutaquēxexēēchaü ñoma wüxi i ota i naxãcüxã nügütüügu tüxü nutaquēxexürüü. Natürü pema rü tama penaxwèxe. ³⁸ —Düçèx i ñuxma ya perü ñāne, rü Tupana tá ínanatèx. ³⁹ —Rü pemaã nüxü chixu rü täütáma wena choxü pedau ñuxmatáta daxügüxü i nañewa ne chaxü. Rü ngèxguma rü tá choxü pedaugü rü tá ñaperügü:

“Namexèchi nixi ya yima Cori ya Tupana núma namucü”, ñaperügü tá —ñanagürü ga Ngechuchu.

24

*Ngechuchu nanaxunagü na tupauca ga taxūne rü tá nagu na napogüexü
(Mr 13.1-2; Lc 21.5-6)*

¹ Rü yexguma tupauca ga taxūnewa ínaxüxgu ga Ngechuchu, rü norü ngúexügü naxcèx naxi. Rü ñanagürügü nüxü: —Düçèx, Pa Corix, ñuxãcü nimexèchi ya daa tupauca ya taxūneärü ípatagü —ñanagürügü. ² Natürü Ngechuchu nanangãxü rü ñanagürü: —Pema nüxü pedaugü ya guxünema ya yima tupauca ya taxūneärü ípatagü. Natürü pemaã nüxü chixu rü aixcūma guxünema ya daa ípatagü rü tá nagu napogüe. Rü naxtapüxarü nutagü rü taxucütáma nügüétü naxüxüra, rü bai ya wüxi —ñanagürü.

*Cuèxruügü i tá nüxü idauxü naxüpa na nagúxü i nañe
(Mr 13.3-23; Lc 17.22-24, 21.7-24)*

³ Rü ñuxüchi guma Mèxpüne ga Oríbunecügu äeganewa naxi. Rü yexguma guma mèxpünewa natoxgu ga Ngechuchu rü norü ngúexügüxicatama naxütawa naxi na noxrüwama nüxna nacagüexüçèx. Rü ñanagürügü: —Tanaxwèxe i tomaã nüxü quixu na ñuxgu tá nangupetüxü i ngēma nüxü quixuxü. ¿Rü tacü tá nixi i norü cuèxruü i nawa nüxü tacuáxü i ñuxgu tá wena núma na cuxüxü rü tá na nagúxü i nañe? —ñanagürügü. ⁴ Rü yexguma ga Ngechuchu rü ñanagürü nüxü: —¡Pexuãgü na taxúema pexü womüxēēxüçèx! ⁵ —Erü muxüchixü i duüxügü tá ínangugü, rü chaugu tá nügü nicüxgü rü tá ñanagürügü:

“Choma nixĩ i Cristu”, ñanagürügü tá. Rũ muxũchixũ i duũxũgũxũ tá nawomũxẽẽ. ⁶—Rũ tá nüxũ pexĩnüẽchiga na nügũ nadèixũ i ñuxre i nachiuãnegũ rü nügũ na nadaixchaũxũ i togũ i nachiuãnegũ. ¡Natürü tãütáma ngẽmacèx pebèixãchiãegũ! Erü woetama ngẽmaãcü tátama nangupetü i noxrix. Natürü tãütáma naãneärü gux nixĩ i ngẽma. ⁷—Erü wüxi i nachiuãne rü to i nachiuãnemaã tá nügũ nadai. Rũ wüxi i ãëxgacü rü to i ãëxgacümaã tá nanu, rü norü churaragü rü ngẽma to i ãëxgacüarü churaragümaã tá nügũ nadai. Rũ tá taiya nangux, rü tá nataxüchi i daaweanegü, rü muxũma i nachicawa rü tá naxĩãxãchiane. ⁸—Rũ guxũma i ngẽma pemaã nüxũ chixuxũ, rü ngẽma nixĩ i norü ügũmare i ngẽma ngúxũ i tá ngupetüxũ. ⁹—Rũ ngẽxguma i togũ i duũxũgü rü tá pexũ ínayauxũ na chixexũ pemaã naxüxũcèx. Rũ tá pexũ nadai. Rũ guxũ i naãnewa i duũxũgü rü tá pexchi naxaie, erü chorü duũxũgü pixĩgü. ¹⁰—Rũ ngẽxguma rü tá muxũchixũ i chorü duũxũgü ínatanèxgü i chorü ore, rü nügütanüwa rü tá nügüchi naxaie. Rũ nügüechita tá ãëxgacüxũtawa nügü ínayauxũgü. ¹¹—Rũ muxũchixũ i orearü uruũgüneta tá ínangugü. Rũ tá nüxũ nixugügü na Tupana yĩxũ ya núma namugücü na nüxũ yaxugüxũcèx i ore. Rũ ngẽmaãcü tá muxũchixũ i duũxũgũxũ nawomũxẽẽgü. ¹²—Rũ poraãcü tá nangẽxma i chixexũ, rü ngẽmagagu rü muxũchixũtáma i duũxũgü rü tãütáma nügü nangechaũgü. ¹³—Natürü yixema naetüwa meã Tupanaãxũ yaxõómáxẽ rü yixema tá tixĩ ya aixcũma nayaxúxe i maxũ i taguma gúxũ. ¹⁴—Rũ ngẽma Tupanaãrü ore i mexũ rü guxũ i naãnewa tá nüxũ nixugügü na guxũ i duũxũgü nüxũ na cuèxgüxũcèx. Rũ ngẽmawena tá nixĩ i nagúxũ i naãne. ¹⁵—Rũ nuxcũmaũcü ga Tupanaãrü orearü uruũ ga Danié nachiga nanaxümatü i ngẽma chixexũ i Tupanapèxewa ãũãchixũ i ínguxchaũxũ. Rũ ngẽxguma nüxũ pedèuxgu na tupauca ya taxũnewa nangóxũ i ngẽma chixexũ i Tupanapèxewa chixexũchixũ, rü name nixĩ i pexuãegü. ¹⁶—Rũ ngẽxguma ngẽma üpetügu, rü ngẽma Yudeaanewa ngẽxmagüxũ i duũxũgü rü nanaxwèxe na mèxpũneãnewa nabuxmüxũ. ¹⁷—Rũ ngẽma ngunexũgu ega texé tümapataèxtüwa ngẽxmagu, rü tama name i tümapatagu tayangaxi na tümäärü ngẽmaxũ tayayaxuxũcèx. ¹⁸—Rũ texé ya tümäänewa ngẽxmaxẽ rü tama name i tümapatacèx tataegu na tümachirugü tayayaxuxũcèx. ¹⁹—Rũ ngẽma ngunexũgügu rü wüxi i ngechaũ tá nixĩ i tümacèx ya yixema ngeãxtagü ya tacharaũgüxe rü yixema imaĩãcügüxe. ²⁰—¡Rũ Tupanana naxcèx peça i perü yumüxèwa na tama gáuane ixüyane rü èxna ngüxchigaarü ngunexũguyane pexũ na nangupetüxũcèx i ngẽma chixexũ! ²¹—Erü ngẽma ngunexũgügu rü poraãcü tá nangẽxma i ngúxũ ga noxri naãne ixügügumama taguma yexmaxũ, rü ngẽmawena rü tagutáma wena nangẽxma. ²²—Rũ ngẽxguma Tupana tama nanoxrexèẽgu i ngẽma ngunexũgü, rü taxúetáma tamaxũ. Natürü Tupana tá nananoxrexèẽ i ngẽma ngunexũgü tümacèx ya yixema nüma tüxũ nadexe. ²³—Rũ ngẽxguma texé pexũ ñagügu:

“Dücèx, daa nixĩ ya Cristu” ñagügu, rü èxna:

“Gua nixĩ ya Cristu” ñagügu, ¡rü tama name i nüxũ peyaxõgü! ²⁴—Erü Cristugüneta rü Tupanaãrü orearü uruũgüneta tá ínangugü. Rũ tá nanaxügü i muxũma i cuèxruũgü i taxũgü na ngẽmaãcü, ega nüxũ natauxchagu, na tüxũ nawomũxẽẽgüxũcèx èixrüxe ya yixema duũxègü ya Tupanatama tüxũ dexe. ²⁵—Dücèx, naxüpa na nangupetüxũ i guxũma i ngẽma ngúxũ, rü marü pemaã nüxũ chixu i nachiga. ²⁶—Rũ ngẽmacèx i ngẽxguma duũxũgü ñagügu pexũ:

“Dücèx, yéa taxúema íxãpataxũwa nangẽxma ya Cristu”, ñagügu, rü tama name i ngẽma pexĩ. Rũ ngẽxguma ñagügu pexũ:

“Dücèx, nuã ucapuwa nangẽxma ya Cristu”, ñagügu, rü tama name i nüxũ peyaxõgü. ²⁷—Erü ñoma wüxi i bèixbèxane i guxũwama nangónexèẽxürüü

tá nixĩ i ngëxguma wenaxârũ núma chaxũxgu i choma i Tupana Nane na duũxũxũ chiĩxũ. ²⁸ Rũ duũxũgũ rũ tá chauxcèx nangutaquëxegũ ñoma êxchagũ nawemücèx ngutaquëxexũrũ.

*Ñuxãcü tá nixĩ i ngëxguma nataegugu ya Tupana Nane ya duũxũxũ ixĩcü
(Mr 13.24-37; Lc 21.25-33, 17.26-30, 34-36)*

²⁹—Rũ nawena i ngëma ngúxũgũ rũ tá nixo ya üèxcü, rũ tãütáma inabáxi ya tauemacü. Rũ woramacurigũ rũ êxtagũ rũ tá narüyi. Rũ guxũma i ñoma i naãne rũ üèxcü rũ tauemacü rũ woramacurigũ rũ êxtagũ rũ tá naxĩãxãchitanũ rũ tá nu ne nanaxĩmare. ³⁰—Rũ ñuxũchi duũxũgũ tá nüxũ nadaugũ na ñuxãcü daxũwa ne chaxũxũ. Rũ guxũ i nachiũãnecũãx i duũxũgũ rũ tá naxauxe. Rũ tá choxũ nadaugũ i ngëxguma caixanexũgũgu ícharũxĩxgu rũ núma chaxũxgu. Rũ ngëxguma i choma rũ ãëxgacü ya poraxũchicü rũ mexëchicü tá chixĩ. ³¹—Rũ tá chanamu i chorũ orearũ ngeruũgũ i daxũcũãx na yacuegũãxũcèx ya norũ cornetagũ na ngëmaãcü naxĩtaquëxexëãxũcèx i guxũma i ngëma duũxũgũ i chadexũ i guxũwama ngëxmagũxũ ñuxmata naãne iyacuáxũwa ngëxmagũxũ. ³²—¡Iperũxĩnũë i ñaã ore i cuèxruũ i orix i iguerachiga, rũ naxcèx pengúe! Rũ ngëxguma ngexwacaxũxũ i nachacüügũ iyarüyixgu rũ naxüátügu, rũ ngëmawa nüxũ pecuèx na paxa tá taunecü na yĩxũ. ³³—Rũ ngëxgumarũũ tá nixĩ i ngëxguma nagúxchaũgu i naãne. Erũ ngëxguma nüxũ pedèuxgu na nangu-petũxũ i ngëma pemaã nüxũ chixuxũ, rũ ngëmawa tá nüxũ pecuèx na marũ chingaicaxũchixũ. ³⁴—Rũ aixcũma pemaã nüxũ chixu rũ guxũma i ngëma nüxũ chixuxũ rũ tá nangupetü naxũpa na nayuexũ i duũxũgũ i ñomaũcüü maxëxũ. ³⁵—Rũ ñoma i naãne rũ ngëma daxũwa nüxũ idauxũ rũ tá nagux. Natürũ chorũ ore rũ tagutáma inayarũxo rũ aixcũma tá ningü. ³⁶—Natürũ ngëma ngunexũ rũ ora i nagu tá nangupetũxũ i ngëma pemaã nüxũ chixuxũ, rũ Chaunatü ya Tupanaxĩcatama nüxũ nacuèx na ñuxgu tá nangupetũxũ i ngëma, rũ taxúema ya togue nüxũ tacuèx. Rũ woo i norũ orearũ ngeruũgũ i daxũcũãx rũ tama nüxũ nacuèxgũ, rũ woo i choma i Nane na chiĩxũ rũ tama nüxũ chacuèx na ñuxgu tá nangupetũxũ i ngëma. ³⁷—Rũ yexgumarũũ ga duũxũgũxũ ngupetũxũ ga yexguma Noë maũxgu, rũ ngëxgumarũũ tá ta nüxũ nangupetü i ngëxguma íchanguxgu i choma i Tupana Nane na duũxũxũ chiĩxũ. ³⁸—Rũ yexguma, naxũpa ga guma mucü ga taxũchicü ga guxũwama inanguanexëcũ, rũ ga duũxũgũ rũ nachibüë, rũ naxaxegũ, rũ nixãmèxgũ rũ nixütexacüügũ ñuxmata nawa nangu ga yema ngunexũ ga nagu Noë naweũgu ixüexũ. ³⁹—Rũ noxri ga yema duũxũgũ rũ tama nüxũ nacuèxgüëga ga tacü tá nüxũ na ngupetũxũ. Natürũ yexguma ínanguxgu ga guma mucü ga taxũchicü ga yema duũxũgũxũ daicü, rũ yexguma nixĩ ga nüxũ yacuèxãchitanũxũ. Rũ ngëxgumarũũ tá ta nixĩ i ngëxguma wenaxârũ núma chaxũxgu i choma i Tupana Nane na duũxũxũ chiĩxũ. ⁴⁰—Rũ ngëma ngunexũgu rũ taxre i yatüügũ rũ wüxi i naãnewa tá nügümaã nangëxmagũ. Rũ wüxi tá nixĩ i Tupana igaxũ rũ ngëma to rũ tá ngëma natèx. ⁴¹—Rũ taxre i ngexũgũ tá nügümaã ínacaegũ. Rũ wüxi tá nixĩ i Tupana igaxũ rũ ngëma to rũ tá ngëma natèx. ⁴²—¡Rũ pexuãëgũ! Erũ tama nüxũ pecuèx i tacü rũ ora tá íchangu i chomax. ⁴³—¡Rũ nagu perũxĩnũë i ñaã ore! Rũ ngëxguma chi wüxi i ípataarũ yora nüxũ cuèxgu na tacü rũ oragu tá ínanguxũ i ngítèxáxũ rũ tãũ chima nape. Erũ nüxna chi nadau ya napata na tama ngëxma naxücxũcèx i ngëma ngítèxáxũ na tacücèx ngëma yangĩxũcèx. ⁴⁴—Rũ ngëmacèx name nixĩ i pexuãëgũ i pemax. Erũ ngëma ngunexũ i tama nagu íperũxĩnũëxũgu tá nixĩ i ngürũãchi íchanguxũ i choma i Tupana Nane na duũxũxũ chiĩxũ.

Wüxi ga duüxü ga meã norü coriga ñnuxü rü to ga tama meã norü coriga ñnuxüchiga

(Lc 12.41-48)

⁴⁵ —¿Rü texé tiixü ya tümaärü coriarü duüxü ya aixcüma yanguxëexë rü tümaãëxü cuáxe? ¿Tama éxna yíxema tiixü ya tümaärü cori tüxna ágaxe na meã nüxna tadauxücèx rü meã oragu tanachibüexëëxücèx i norü duüxügü? ⁴⁶ Rü tataãe ya yíxema coriarü duüxë ega ngëxguma ínanguxgu i tümaärü cori rü tüxü íyanguexügu na meãma ítanaxüxü i ngëma puracü i nagu tüxü namuxü. ⁴⁷ —Rü aixcüma pemaã nüxü chixu rü ngëma tümaärü cori rü tá guxüma i norü ngëmaxügüarü dauruüxü tá tüxü nixíxëe. ⁴⁸⁻⁵⁰ —Natürü ngëxguma chi ngëma coriarü duüxü rü wüxi i yatü i chixexü yixígu, rü chi nagu naxínügu na tãütama paxa ínanguxü i norü cori, rü chi inaxügüãgu na chixri namuãxü i namücügü i norü coriarü duüxügü, rü chi ngãxëxütanügu naxãxgu na namaã nachibüxücèx rü naxaxexücèx, rü ngürüãchi ngëma ngunexü rü ngëma ora i tama nagu ínanguxëãxügu rü tá ínangu i norü cori. ⁵¹ —Rü poraãcüxüchima tá nanapoxcu i ngëma norü duüxü, ñoma meã maxënetaxü i duüxügüxü napoxcuexürü. Rü ngëma tá narüdoxü rü nixüxchapüta.

25

Ore ga 10 ga pacügu ixuxü

¹ Rü ñanagürü ga Ngechuchu: —Pemaã tá nüxü chixu i wüxi i ore na nawa nüxü pecuáxücèx i ñuxãcü tá duüxügüarü ãëxgacü na yíixü ya Tupana i ngëxguma naguxgu i naãne. Rü iyexma ga 10 ga pacü ga ngürü daparinamaã ngígüarü petawa ícü na yaxümücügüãxücèx ga guma yatü ga ingíxchaücü. ² —Rü 5 ga yema pacü rü tama ixuãëgü. Rü yema naí ga 5 ga pacü rü meãma ixuãëgü. ³ —Rü yema tama uãëgücü, rü yexguma ngürü daparina íyangegügu rü tama to ga ngürü queruchinu ta íyangegü. ⁴ —Natürü ga yema uãëgücü rü to ga ngürü queruchinu ta íyangegü. ⁵ —Natürü ga guma yatü ga ingíxchaücü rü tama paxa ínangu. Rü düxwa ga yema pacügü rü ipee yerü iyaxtae. ⁶ —Rü yexguma ngãxücüüwa nanguxgu, rü yema pacügü nüxü ixínüë ga wüxi ga naga ga ñaxü:

“Domama nixí ya yima yatü ya ingíxchaücü. ¡Rü íperüdagü, rü ípeyadaugü!” ñaxü. ⁷ —Rü guxcüma ga yema pacügü rü írüdagü, rü iyamexëëgü ga ngürü daparinagü. ⁸ —Rü yexguma ga yema 5 ga pacügü ga tama uãëgücü rü ngígürügügü ngíxü ga yema pacügü ga uãëgücü:

“¡Íraxü i perü queruchinu toxnata pexã, erü torü omügü rü nixogü!” ngígürügügü. ⁹ —Natürü ga yema pacügü ga uãëgücü rü ngíxü ingãxügü, rü ngígürügügü:

“Taxucürüwa pexna ta taxã, erü ngëxguma chi pexna ta taxãxgu rü tãü chima ningu i toxcèx rü pexcèx. Rü ngëmacèx narümemaë nixí i ngextá namaã íntaxegüxüwa pegüxü nawa pexí”, ngígürügügü. ¹⁰ —Natürü yexguma ga yema 5 ga pacügü ga tama uãëgücü ngürü queruchinuwa naxíyane, rü ínangu ga guma yatü ga ingíxchaücü. Rü ga yema pacügü ga uãëgücü rü iyachocu nawa ga guma í ga nawa iyangíxüne. Rü ñuxüchi narüwãxta ga íãx. ¹¹ —Rü yemawena íngügü ga yema pacügü ga tama uãëgücü, rü ngígürügügü:

“¡Pa Corix, toxcèx yawãxna i íãx!” ngígürügügü. ¹² —Natürü nüma ga cori, rü ngíxü nangãxü, rü ñanagürü:

“Pemaã nüxü chixu rü aixcüma tama pexü chacuèx na texégü pixígüxü”, ñanagürü. ¹³ Rü ñuxüchi ñanagürü ga Ngechuchu: —¡Ípexuãëgü! Erü tama nüxü pecuèx i tacü rü ngunexü rü tacü rü ora tá íchangu i choma i Tupana Nane na duüxüxü chiixü —ñanagürü.

*Ore ga dīerugu ixuxū
(Lc 19.11-27)*

¹⁴ Rū ñanagürü ta ga Ngechuchu: —Rü ngēma Tupana na duūxūgüarü ãëxgacü na ixīxū rü ñoma wüxi ga yatü ga ixūächichaücü ga to ga nachiuñanewa na naxūxüçexrūü nixī. Rū nüma ga guma yatü rü norü duūxūgücex naca, rü nüxna ngīxū naxā ga dīeru na nüxū ngīmaã nanguxūxüçex rü ngīmaã na ínapuracüexüçex. ¹⁵ —Rü wüxi ga yema norü duūxūna ngīxū naxā ga 5000 tachinü ga dīeru. Rū yema tona ngīxū naxā ga 2000 tachinü ga dīeru. Rū yema tona ngīxū naxā ga 1000 tachinü ga dīeru. Rū yemaãcü nanangugü na ñuxãcü tá yema dīerumaã napuracüexü ga wüxichigü ga norü duūxūgü rü yemaãcü wüxichigüna ngīxū naxā ga yema dīeru. Rū ñuxüchi inaxūãchi ga yema cori na to ga nachiuñanewa naxūxüçex. ¹⁶ —Rü yema norü duūxū ga 5000 tachinü ga dīeru ngīxū yaxuxū, rü ngīmaã napuracü, rü naĩ ga 5000 tachinü ngīmaã nayaxu. ¹⁷ —Rü yexgumarüü ta ga yema norü duūxū ga 2000 tachinü ga dīeru ngīxū yaxuxū, rü ngīmaã napuracü, rü naĩ ga 2000 tachinü ngīmaã nayaxu. ¹⁸ —Natürü ga yema norü duūxū ga 1000 tachinü ga dīeru ngīxū yaxuxū, rü ngīmaã ínixū. Rū ngīxū nixaixmaü, rü yexma ngīxū natèx ga yema norü coriarü dīeru. ¹⁹ —Rü nuxcüxürama nataegu ga yema duūxūgüarü cori. Rū yexguma ínanguxgu rü inanaxügü ga norü duūxūgümaã na namexëëãxü ga norü dīeruchiga. ²⁰ —Rü nüxīra norü corixütawa naxū ga yema norü duūxū ga 5000 tachinü ga dīeru ngīxū yaxuxū. Rū norü corina ngīxū naxā ga yema 5000 tachinü. Rū ngīetü ngīxū inaxā ga naĩ ga 5000 tachinü ga ngīxū nayaxucü ngīmaã ga yema norü cori nüxna ngīxū äcü ga dīeru. Rū ñanagürü norü corixü:

“Düçex Pa Corix, ñaã iyixī ga yema 5000 tachinü ga dīeru ga choxna ngīxū cuxãcü. Marü ngīmaã chapuracü rü ngīmaã cuxü ngīxū chayaxu i ñaã naĩ i 5000 tachinü”, ñanagürü. ²¹ —Rü norü cori rü ñanagürü nüxü:

“Pa Chorü Duūxūx, wüxi i mexëchixü quixī, rü meãma cupuracü. Rū meã nüxna cudau ga yema noxre ga dīeru ga cuxna ngīxū chaxãcü, rü meãma ngīmaã cupuracü. Rū ngēmacèx i ñuxma rü tá rümumaëcüna cuxü chadauxëë. ¡Rü ixücu i chopatawa rü ngīxā tataãëgü!” ñanagürü. ²² —Rü yemawena ínangu ga yema to ga norü duūxū ga 2000 tachinü ga dīeru ngīxū yaxuxū. Rū ñanagürü norü corixü:

“Düçex Pa Corix, ñaã iyixī ga yema 2000 tachinü ga dīeru ga choxna ngīxū cuxãcü. Marü ngīmaã chapuracü rü ngīmaã cuxü ngīxū chayaxu i naĩ i 2000 tachinü. Rū ñaã iyixī”, ñanagürü. ²³ —Rü norü cori rü ñanagürü nüxü:

“Pa Chorü Duūxūx, wüxi i mexëchixü quixī, rü meãma cupuracü. Rū meã nüxna cudau ga yema noxre ga dīeru ga cuxna ngīxū chaxãcü, rü meãma ngīmaã cupuracü. Rū ngēmacèx i ñuxmax rü tá rümumaëcüna cuxü chadauxëë. ¡Rü ixücu i chopatawa rü ngīxā tataãëgü!” ñanagürü. ²⁴ —Natürü yexguma norü corixütawa nanguxgu ga yema norü duūxū ga 1000 tachinü ga dīeru ngīxū yaxuxū, rü ñanagürü norü corixü:

“Düçex Pa Corix, choma nüxü chacuèx rü wüxi i yatü i aüxü quixī. Rū cunayaxu i nanetüarü o i ngextá tama ícutuoxüwa, rü cunabuxarü oõx i nanetü i tama icutoxü. ²⁵ —Rü yemacèx chamuü. Rū waixümügu ngīxü chixaixmaü rü ngīxü ichatèx. Natürü ñaã iyixī i ngēma curü dīeru”, ñanagürü. ²⁶ Rū yexguma ga norü cori rü nanangãxü rü ñanagürü:

“Pa Chorü Duūxūx, wüxi i chixexü rü oxü i chorü duūxü quixī. Rū cuma meãma nüxü cucuèx rü ngextá tama íchatoexüwa rü chanayaxu i nanetüarü o, rü chanabuxarü oõx i nanetü i tama ichatoxü. ²⁷ —Rü yemacèx narümemaë chi nixī ga bancugu choxü ngīmaã na cunguxüxü ga chorü dīeru na ngēma choxü ngīxü yamuxëëgüxüçex, rü ngēmaãcü mucü ngīxü na chayaxuxüçex i

ngëxguma íchanguxgu”, ñanagürü. ²⁸—Rü yexguma ga yema cori rü nanamu ga yema togü ga norü duüxügü ga yéma yexmagüxü, rü ñanagürü nüxü:

“¡Nüxna ngixü peyax i ngëma díëru, rü ngëma yatü i 10,000 i díëru nüxü ngëxmaxüna ngixü pexä! ²⁹—Erü yixema tüxü nangëmèxcü rü yexera tá tüxna ngixü taxä, rü ngëmaäcü tá tüxü imuxüchi. Natürü yixema tüxü natauxcü rü woo ngëma noxre i tüxü ngëmèxcü rü tá tüxna ngixü tayaxu. ³⁰—¡Rü yéama düxétüwa i poraäcü ínaxëänexüwa peyatá i ñaä chorü duüxü i taxuwama mexü! Rü ngëma tá narüdoxü rü tá nixüxchapüta”, ñanagürü.

Naãneärü guxgu rü Cristupëxegu tá nangutaquëxegü i guxü i nachiüñanecüäx i duüxügü na yadexechiäxüçèx i ngëma mexügü rü na napoxcueäxüçèx i ngëma chixexügü

³¹ Rü ñanagürü ga Ngechuchu: —Rü ngëxguma wenaxärü núma chaxüxgu i choma i Tupana Nane na duüxüxü chiixü, rü chorü orearü ngeruügü i daxüçüäx rü tá choxü naxümücügü. Rü äëxgacü ya tacü tá chixí rü chorü tochica i mexëchixüwa tá charüto. ³²—Rü guxü i nachiüñanecüäx i duüxügü rü tá chopëxegu nangutaquëxegü. Rü choma rü tá chayadexechi ñoma wüxi i carneruarü dauruü i norü carnerugü rü chibugü noxrüwama mugüxürüü. ³³—Rü ngëma choxrü ixigüxü rü chorü tügüncüwawa tá chanangëxmagüxëë. Rü ngëma tama choxrü ixigüxü rü chorü toxwecüwawa tá chanangëxmagüxëë. ³⁴—Rü ngëxguma i choma i tá äëxgacü ya tacü na chiixü rü ñacharügü tá nüxü i ngëma chorü duüxügü:

“¡Nuã pexí i pema ya texé ya Chaunatü ya Tupana tüxü rüngüxëëgüxe, rü penayaxu i ngëma pechica i ngextá núma äëxgacü íyixüwa! Yerü Chaunatü rü pexçèx nanamexëë i ngëma pechica ga yexguma tauta naãne naxüxgu. ³⁵—Rü ngëmaäcü tá pemaã namecüma yerü yexguma chataiyagu rü pema rü choxü pechibüxëë. Rü yexguma chitawagu rü choxü pexaxexëë. Rü yexguma tama nüxü pecuëxgu na texé chiixü rü meã choxü peyaxgü ga pepatawa. ³⁶—Rü yexguma changexchirugu rü choxü pexüxchiru. Rü yexguma chidaawegu rü choxü perüngüxëë. Rü yexguma poxcupataüwa chayexmagu rü choxü ípeyadau”, ñacharügü tá nüxü. ³⁷—Rü ngëxguma i ngëma duüxügü i chadexü rü ñanagürügü tá choxü:

“Pa Corix, ¿ñuxgu ga cuxü tadauxü ga na cutaiyaxü rü cuxü tachibüxëëxü? ¿Rü ñuxgu ga cuxü tadauxü ga na quitaawaxü rü cuxü taxaxëëxü? ³⁸— ¿Rü ñuxgu ga tochixüwa cunguxü rü meã cuxü tayauxgüxü ga woo tama cuxü tacuëxgügu? ¿Rü ñuxgu ga cungexchiruxü rü cuxü taxüxchirugüxü? ³⁹—¿Rü ñuxgu ga cuxü tadaugüxü na quidaawexü rü ëxna poxcupataüwa cuyexmaxü rü cuxü ítayadaugüxü?” ñanagürügü tá choxü. ⁴⁰—Rü choma na äëxgacü ya tacü na chiixü, rü tá chanangäxü, rü ñacharügü tá:

“Aixcüma pemaã nüxü chixu rü yexguma nüxü perüngüxëëgügu i ngëma chorü duüxü i yexeraäcü ngearü ngemaxüáxü, rü choxü nixí ga perüngüxëëgüxü”, ñacharügü tá nüxü. ⁴¹ Rü ñuxüchi i choma na äëxgacü ya tacü na chiixü, rü ñacharügü tá nüxü i ngëma tama chorü duüxügü ixigüxü:

“¡Choxna pixigachi i pema i perü chixexüçèx poxcuexe! ¡Rü ngëma pexí nawa ya yima üxü ya taguma ixoxüne ya Tupana ímexëene naxçèx i ngoxo i Chataná rü norü duüxügü! ⁴²—Yerü yexguma chataiyagu rü pema rü tama choxü pechibüxëë. Rü yexguma chitawagu rü tama choxü pexaxëë. ⁴³—Rü yexguma tama nüxü pecuëxgu na texé chiixü rü tama meã choxü peyaxgü ga pepatawa. Rü yexguma changexchirugu rü tama choxü pexüxchirugü. Rü yexguma chidaawegu rü poxcupataüwa chayexmagu rü tama choxü ípeyadaugü”, ñacharügü tá nüxü. ⁴⁴—Rü ngëxguma i nümagü i tama chorü duüxügü ixigüxü, rü ñanagürügü tá choxü:

“Pa Corix, ¿ñuxgu tochixüwa cingu rü tama meã cuxü tayauxgü yerü tama cuxü tacuèxgü? ¿Rü ñuxgu ga cuxü tadaugüxü ga na cutaiyaxü, rü éxna na quitaawaxü, rü éxna na cingexchiruxü, rü éxna quidaawexü, rü éxna poxcupataüwa na cuyexmaxü, rü tama cuxü tarüngüxëègüxü?” ñanagürügü tá choxü. ⁴⁵—Rü choma na äëxgacü ya tacü na chíxü, rü tá chanangäxü, rü ñacharügü tá nüxü:

“Aixcüma pemaã nüxü chixu rü yexguma tama nüxü perüngüxëègügu ga wüxi ga duüxü ga yexeraäcü ngearü ngemaxüáxü, rü choxü rü ta tama perüngüxëègü”, ñacharügü tá nüxü. ⁴⁶—Rü ñuxüchi i ngëma duüxügü i tama chorü duüxügü ixügüxü rü tá poxcu i taguma gúxüwa naxi. Natürü ngëma duüxügü i aixcüma meã chauxcèx maxëxü rü tá nanayauxgü i maxü i taguma gúxü, —ñanagürü ga Ngechuchu.

26

Yudügarü äëxgacügü naxcèx nadaugü na ñuxäcü Ngechuchuxü yayauxgüxü

(Mr 14.1-2; Lc 22.1-2; Cu 11.45-53)

¹ Rü yexguma Ngechuchu nüxü rüchauxgu ga yema orexü na yaxuxü, rü ñanagürü norü ngúexügüxü: ²—Pema nüxü pecuèx rü taxre i ngunexü nataxu na nangöxgüäxücèx i ngëma òna i Üpetüchigaarü petacèx naxügüxü. Rü ngëxguma tá nixi i choxü yayauxgüxü i chorü uwanügü na curuchawa choxü yapotagüxücèx —ñanagürü. ³ Rü yexgumaücüü ga paigüarü äëxgacügü, rü ngúexëèruügü ga ore ga mugüwa nguxëètaegüxü, rü Yudügarü äëxgacügüerügü rü nangutaquëxegü ga napatawa ga Caipá ga paigüarü äëxgacü ixicü. ⁴ Rü yéma nügümaã nanamexëègü na Ngechuchuxü nawomüxëègüäcüma na yayauxgüäxücèx rü na yamëxgüäxücèx. ⁵ Natürü nügümaã ñanagürügü: —Taxucürüwama i ñuxma petagu tayayauxgü, erü duüxügü rü tá tamaã nanuë —ñanagürügü.

Wüxi ga nge rü Ngechuchuerugu inaba ga pumara

(Mr 14.3-9; Cu 12.1-8)

⁶ Rü Ngechuchu rü Betániäwa nayexma napatawa ga Chimáü ga rüchaxü necümaã naxugüäcü. ⁷ Rü Ngechuchucèx yéma iyaxü ga wüxi ga ngecü ga yéma nangecü ga wüxiweü ga pumara ga tatanüxüchixü ga mexëchicü ga butiyamaã ächiüxü. Rü yexguma mechawa ínachibüyane ga Ngechuchu, rü ngíma rü naërugu inaba ga yema pumara. ⁸ Rü yexguma yemaxü nadaugügu ga Ngechuchuarü ngúexügü, rü naäëwa nanguxgü, rü inanaxügüe ga na ñagüxü. —¿Tüxcüü ngëxma inaxaiyaxü i ngëma pumara? ⁹—Rü narümemaë chi nixi i tatanüxügu namaã itaxe, rü ñuxüchi ngëma díerumaã nüxü irüngüxëè i ngëma duüxügü i ngearü ngëmaxüäxgüxü —ñanagürügü. ¹⁰ Rü Ngechuchu nüxü naxinü. Rü ñuxüchi ñanagürü norü ngúexügüxü: —¿Tüxcüü ngixü pechixewe i ngëma nge? Erü ngëma chomaã naxüxü rü wüxi i mexü nixi. ¹¹—Ngëma ngearü ngëmaxüäxgüxü rü guxügutáma petanüwa nangëxmagü. Natürü choma rü tãütáma guxügu petanüwa changëxma. ¹²—Rü ngëma chomaã naxüxü i ñaã ngecü na chaxunegu nabaäxü i ngëma pumara i yixixü, rü ngëmaäcü inaxü erü paxa tá chayü rü tá choxü inatëxgü. Rü ngëmacèx nixi i chaxunegu nabaäxü i ngëma pumara. ¹³—Rü aixcüma pemaã nüxü chixu rü guxü i naänewa i ngextá duüxügü nüxü íxugügüxüwa i Tupanaärü ore i mexü, rü ñaã ngecü chomaã üxü rü tá ta nüxü nixugügü. Rü ngëmaäcü tá ngixna nacuèxächie i duüxügü —ñanagürü ga Ngechuchu.

Yuda rü ãëxgacügümaã nanamexëë na ñuxãcü Ngechuchuxü yayauxgüxüçèx (Mr 14.10-11; Lc 22.3-6)

¹⁴ Rü ñuxüchi ga wüxi ga Ngechucharü ngúexü ga Yuda ga Icariúte rü paigüarü ãëxgacügüxütawa naxü rü namaã nayarüdexa. ¹⁵ Rü Yuda rü ñanagürü nüxü: —¿Ñuxre tá choxü penaxütanüxü i ngëxguma pexü chanatauxchaxëëgu na Ngechuchuxü piyauxgüxüçèx? —ñanagürü. Rü yexguma ga nümagü ga paigüarü ãëxgacügü rü 30 tachinü ga dïerugu namaã naxuneta. ¹⁶ Rü yexgumama inanaxügü ga Yuda ga naxcèx na nadauxü ga ñuxãcü nüxü na natauxchaxëëgüãxü na Ngechuchuxü yayauxgüxüçèx.

Coriarü ðnachiga

(Mr 14.12-25; Lc 22.7-23; Cu 13.21-30; 1 Co 11.23-26)

¹⁷ Rü nawa nangu ga ngunexü ga nagu inaxügüxü ga yema peta ga pãü ga ngearü puxëëruüãxü nagu nangõxgüxü. Rü norü ngúexügü rü Ngechuchucèx naxï, rü ñanagürügü nüxü: —¿Ngextá tá tanamexëë i nachica i nawa nangõxgüxü i ðna i Üpetüchigaarü petagu ingõxü? —ñanagürügü. ¹⁸ Rü nüma ga Ngechuchu rü ñanagürü nüxü: —¿Ngema ñãnewa pexï, rü yima yatü ya pemaã nüxü chaxunetacüpatawa pexï! ¡Rü namaã nüxü pixu rü ñapegügü: “Torü ngúexëëruü rü ñanagürü: ‘Marü ningaicaxüchi na chayuxü rü nuã cupatawa rü chorü ngúexügümaã chanangupetüxëëchaü i Üpetüchigaarü peta’,” ñaperügügü tá nüxü! ¹⁹ Rü yéma naxï ga yema norü ngúexügü. Rü yema Ngechuchu namaã nüxü ixuxürüü nanaxügü. Rü nanamexëëgü ga yema ðna ga Üpetüchigaarü petagu tá nangõxgüxü. ²⁰ Rü yexguma nachütagu rü yéma mechawa nachibü ga Ngechuchu namaã ga yema 12 ga norü ngúexügü. ²¹ Rü yexguma ínachibüeyane, rü Ngechuchu rü ñanagürü nüxü: —Aixcüma pemaã nüxü chixu rü wüxie i petanüwa tá tixï ya bexma chauechita choxü íyaxuaxüxë —ñanagürü. ²² Rü yexguma ga nümagü ga norü ngúexügü rü poraãcü nangechaügü. Rü wüxichigü nüxna nicachigü, rü ñanagürügü: —Pa Corix, ¿choma éxna tá chiixü ya yíxema cuxü íyaxuaxüxë? —ñanagürügü. ²³ Rü nüma ga Ngechuchu nanangãxü rü ñanagürü: —Ngëma wüxi ya poratuwa namaã tá chachibüxü, rü ngëma tá nixï i chauechita choxü íyaxuaxüxü. ²⁴ —Rü choma i Tupana Nane na duüxüxü chiixü rü tá chayü ngëxgumarüü i Tupanaarü ore i ümatüxü nüxü ixuxürüü. Natürü wüxi i ngechaüxüchi nixï naxcèx i ngëma yatü i choxü íyaxuaxüxü. Rü narümemaë chi nixï ga noxtacüma tãü chima na nabuxü —ñanagürü. ²⁵ Rü nadexaãchi ga Yuda ga naëchita íyaxuaxüxü, rü ñanagürü: —Pa Ngúexëëruüx, ¿tãütáma choma nixï? —ñanagürü. Rü Ngechuchu nanangãxü rü ñanagürü: —Ngëmáãcü cuma nixï —ñanagürü. ²⁶ Rü yexguma ínachibüeyane rü Ngechuchu nanayaxu ga wüxi ga pãü. Rü Tupanana moxë naxã, rü inanabücu, rü norü ngúexügüxü nayanu. Rü ñanagürü: —Ñãã pãü rü chaxunechiga nixï. Rü ¡penangõ! —ñanagürü. ²⁷ Rü yemawena rü nanayaxu ga wüxi ga pochiyu ga binumaã ããcuxü. Rü yexgumarüü ta Tupanana moxë naxcèx naxãxïra, rü ñuxüchi norü ngúexügüna nanaxã, rü ñanagürü nüxü: —¡Rü guxãma i pema rü peyaxëüx ya daa binu! ²⁸ —Erü daa binu rü nachiga nixï ya chaugü ya muxüma i duüxügüçèx tá ibacü na ngëmaãcü Tupana nüxü nüxü nangechaüxüçèx i norü pecadugü. Rü yimawa Tupana nanangoxëë na aixcüma yíixü i norü uneta. ²⁹ —Rü pemaã nüxü chixu rü tagutáma wena binu chayaxaxü ñuxmatáta Chaunatü ya Tupana ãëxgacü íixüwa ngexwacaxücü ya binu pemaã chayaxëüx —ñanagürü.

Ngechuchu nüxü nixu rü Pedru rü taxütáma nügü nixu na norü ngúexü yíixü (Mr 14.26-31; Lc 22.31-34; Cu 13.36-38)

³⁰ Rū ñuxũchi nawiyaegü ga wüxi ga Tupanaãrũ wiyaeü. Rũ yemawena rũ guma Mèxpũne ga Oríbunecügu ãeganewa naxĩ. ³¹ Rũ yexguma ga Ngechuchu rũ ñanagürũ nüxũ ga norũ ngúexũgü: —Guxãma i pema rũ tá choxũ ípetèxgü i ñoma i chütaxũgu. Erũ Tupanaãrũ ore i ümatũxũwa rũ ñanagürũ: “Tá chayamèx ya carneruarũ dauruũ, rũ tá nanaxüanemare i carnerugũ”, ñanagürũ i ngẽma ore. ³² —Natürũ ngẽxguma marũ yuwa ícharüdxguwena, rũ tá chaxira pexũpa Gariréaanewa chaxũ —ñanagürũ. ³³ Rũ yexguma ga Pedru rũ nanangãxũ rũ ñanagürũ: —Rũ woo guxũma i togü cuxũ ítèxgu, natürũ i chomax rũ tãütãma cuxũ íchatèx —ñanagürũ. ³⁴ Rũ Ngechuchu ñanagürũ nüxũ: —Aixcũma cumaã nüxũ chixu rũ ñomatama i chütaxũgu rũ naxũpa na otá icaxũ, rũ tomaèxpũxcũna tá cugü iquicux na chorũ duũxũ quiĩxũ. ³⁵ Rũ Pedru nanangãxũ rũ ñanagürũ: —Rũ woo wüxigu cumaã chayuxgu rũ tãütãma chaugü ichicux na curũ duũxũ chiĩxũ —ñanagürũ. Rũ guxũma ga togü ga norũ ngúexũgü rũ ta yema ñanagürũgü.

Ngechuchu rũ Yechemaníwa nayayumüxẽ
(Mr 14.32-42; Lc 22.39-46)

³⁶ Rũ Ngechuchu rũ norũ ngúexũgũmaã nawa nangugü ga wüxi ga nachica ga Yechemanígu ãegaxũ. Rũ Ngechuchu rũ ñanagürũ nüxũ: —¡Nuã perütogü! Rũ paxa yoxni yéa chayayumüxẽ —ñanagürũ. ³⁷ Rũ Ngechuchu nügüwe nanagagü ga Pedru rũ Zebedéu nanegü ga Chaũtiágu rũ Cuáũ. Rũ Ngechuchucèx inaxügü ga na poraãcü nangechaũxũ rũ naxĩxãchiãèxũ. ³⁸ Rũ yexguma ga Ngechuchu rũ ñanagürũ nüxũ: —Poraãcü changechaũ rũ nagu charũxĩnũ rũ ngẽmamaã tá chayü. ¡Rũ nuxa perücho i pemax, rũ chauxrũũ ipedaue! —ñanagürũ. ³⁹ Rũ yexguma ga Ngechuchu rũ yéaxüra naxũ. Rũ waixũmüãnegu nanangücuchi. Rũ nayumüxẽ rũ ñanagürũ: —Pa Chaunatũx, ngẽxguma cuma cunaxwèxegu, ¡rũ nüxna choxũ ínanguxuchixèẽ i ñãã ngúxũ i tá choxũ üpetũxũ! Natürũ chanaxwèxe i cuxrütama ngúchaũ cuxü rũ tama i choxrũ —ñanagürũ. ⁴⁰ Rũ yemawena ga Ngechuchu rũ nataegu ga yema norũ ngúexũgü íyexmagüxũwa. Rũ nüxũ inayangau ga na ínapeexũ. Rũ ñanagürũ Pedruxũ: —Pa Pedrux, ¿taxucürũwama éxna namaã peporae na chomaã ipedauexũ, rũ bai i wüxi i ora? ⁴¹ —¡Rũ pexuãègü rũ Tupanana naxcèx peça na pexũ nangũxèèxücèx na tama choxũ ípetáxücèx ega ngẽxguma tacü rũ guxchaxũ pexũ üpetũgu! Erũ aixcũma peãewa rũ ípememare, natürũ pexene nixĩ ituraxũ —ñanagürũ. ⁴² Rũ yexguma rũ wenaxãrũ noxri ínayumüxèxücèx nataegu ga Ngechuchu. Rũ wenaxãrũ nayumüxẽ, rũ ñanagürũ: —Pa Chaunatũx, ngẽxguma tama cunaxwèxegu na nawa choxũ ícunguxuchixèèxũ i ñãã ngúxũ i tá chingexũ, rũ marũ name i ngẽma cuma cunaxwèxèxũãcũma chomaã cunaxü —ñanagürũ. ⁴³ Rũ ñuxũchi wenaxãrũ norũ ngúexũgü íyexmagüxũwa naxũ. Rũ nüxũ inayangau ga na ínapeexũ, yerũ poraãcü nayaxtaexũchi. ⁴⁴ Rũ yéma nüxna nixũ, rũ wenaxãrũ nayayumüxẽ. Rũ noxriãcütama nayumüxẽ. ⁴⁵ Rũ yemawena rũ norũ ngúexũgü íyexmagüxũwa naxũ. Rũ ñanagürũ nüxũ: —¡Ñuxma waxi pepepe rũ iperüngũẽ! Erũ marũ nawa nangu i ora na chorũ uwanũ choxũ iyauxgüxũ rũ pecaduãxgüxũna choxũ namugüxũ. ⁴⁶ ¡Ipechigü rũ ngĩxã ítixĩ! Erũ marũ ñomatãma nixĩ i ngẽma choxũ íyaxuaxũxũ —ñanagürũ.

Ngechuchuxũ niyauxgü
(Mr 14.43-50; Lc 22.47-53; Cu 18.2-11)

⁴⁷ Rũ yexguma íyadexayane ga Ngechuchu, rũ ínangu ga Yuda ga norũ ngúexũchirèx ixĩxũ. Rũ nawe narüxĩ ga muxũma ga duũxũgü ga taramaã rũ naĩmaã ixãxnexũ. Rũ yema nixĩ ga duũxũgü ga paigüarũ ãèxgacügü rũ Yudíugarũ ãèxgacügüerugü yéma mugüxũ. ⁴⁸ Rũ ga Yuda ga ínaxuaxũxũ

rü marü yema duüxügümaã nanamexëë, rü ñanagürü: —Ngëma nüxü chachúxuxü tá nixí i Ngechuchu. Rü ngëma tá nixí i piyauxgüxü —ñanagürü: ⁴⁹ Rü yexguma Ngechuchucèx nixü, rü ñanagürü nüxü: —Nuxmaë Pa Ngúexëëruüx —ñanagürü. Rü ñuxüchi nüxü nachúxu. ⁵⁰ Rü Ngechuchu nanangãxü rü ñanagürü: —Pa Chomücüx, ¿tacüwa nuã cuxü? —ñanagürü. Rü yexgumatama Ngechuchuxü niyauxgü ga yema duüxügü ga Yudawe rüxüxü. ⁵¹ Rü wüxi ga Ngechuchumücü nanawëxechi ga norü tara, rü paigüarü äëxgacüarü duüxüxü ínadaechinü. ⁵² Rü yexguma ga Ngechuchu rü ñanagürü: —¡Naxchiügu yaxücuchi i curü tara! Erü guxãma ya yíxema taramaã nuëxë, rü taragu tátama tayue. ⁵³ —¿Tama ëxna nüxü cucuëx rü ngëxguma chi choma chanaxwëxegu, rü Chaunatüna chi naxcèx chaca na choxü núma namugüãxüçèx i muxüma i norü orearü ngeruügu i daxüçüãx na choxü yanangüxëëgüxüçèx? ⁵⁴ —Natürü ngëxguma chi ngëma chaxüxgu, rü ¿ñuxãcü chi ningu i Tupanaãrü ore i ümatüxü i nüxü ixuxü na choma rü tá chayuxü? ⁵⁵ Rü yexguma ga Ngechuchu rü ñanagürü nüxü ga yema duüxügü: —¿Tüxcüü taragü rü naixmenëxãgümaã chauxcèx nuã pexí na choxü peyarüyaxgüxüçèx ñoma wüxi i ngítëxáxü chiixürüü? Rü guxü ga ngunexügu rü tupauca ga taxünewa changüxëëtae natürü taguma yexma choxü piyauxgü. ⁵⁶ —Natürü guxüma i ñaã ñuxma ngupetüxü, rü ngëmaãcü nangupetü na yanguxüçèx i Tupanaãrü ore ga nuxcümaügüxü ga norü orearü uruügu ümatügüxü —ñanagürü. Rü yexguma ga guxüma ga norü ngúexügü rü nüxna nibuxmü. Rü nüxícatama yéma nanatëxgü ga Ngechuchu.

Äëxgacügü ga taxügüpëxewa Ngechuchuxü nagagü

(Mr 14.53-65; Lc 22.54-55, 63-71; Cu 18.12-14, 19-24)

⁵⁷ Rü Caipá ga paigüarü äëxgacüxütawa Ngechuchuxü nagagü ga yema duüxügü ga yayauxgüxü. Rü yexma nixí ga nangutaquëxegüxü ga ngúexëëruügu ga ore ga mugüwa nguxëëtaegüxü rü Yudíugüarü äëxgacügüerugü. ⁵⁸ Natürü ga Pedru rü yaxügu nawe nixächigü ñuxmata paigüarü äëxgacü ga Caipáxütawa nangu. Rü purichíagü ga tupaucaarü dauruügümaã yéma ñaxtüwa narüto, yerü nüxü nadauxchaü ga tacü tá Ngechuchumaã na naxüexü. ⁵⁹ Rü ga paigüarü äëxgacügü rü guxüma ga Yudíugüarü äëxgacügüerugü rü naxcèx nadaugü ga wüxi ga ore ga doramare ixü na yemamaã Ngechuchuxü ínaxuaxügüxüçèx na yamëxgüãxüçèx. ⁶⁰⁻⁶¹ Natürü woo muxüma ga duüxügü doraxümare nachigaxü yéma yarüxügüe, natürü taxuxüma ga chixexü inayangaugü ga naxcèx tá yamëxgüãxü. Rü düxwa yéma naxí ga taxre ga yatügü ga doraxümare yéma yarüxügüxü. Rü ñanagürügü: —Toma nüxü taxínüë i ñaã yatü rü ñanagürü:

“Tá nagu chapogü ya daa tupauca ya taxüne ya Tupanaãrü, rü tomaëxpüx i ngunexügu tá wenaxãrü íchanadaxëë”, ñanagürügü. ⁶² Rü yexguma ga paigüarü äëxgacü ga Caipá rü inachi, rü ñanagürü Ngechuchuxü: —¿Rü tacümaã cunangãxü i ñuxmax? ¿Rü ñuxü ñaxü yíxü i ngëma cuchiga i nüxü yaxügüxü? —ñanagürü. ⁶³ Natürü ga Ngechuchu rü nangeëxmare. Rü yemacèx ga paigüarü äëxgacü ga Caipá rü ñanagürü nüxü: —Tupana ya Maxüçüéagagu chanaxwëxe i aixcüma tomaã nüxü quixu na texé quiixü. ¿Rü cuma ëxna i Cristu ya Tupana Nane quiixü, rü ëxna tama? —ñanagürü. ⁶⁴ Rü Ngechuchu nanangãxü rü ñanagürü: —Ngü, rü ngëma nüxü quixuxü chixí. Rü pemaã nüxü chixu rü tá choxü pedaugü i ngëxguma Chaunatü ya Poracüxütawa charütöxgu rü ngëxguma caixanexügu wenaxãrü núma chaxüxgu —ñanagürü. ⁶⁵ Rü yexguma ga paigüarü äëxgacü rü norü numaã nügüchirugu nagaugü. Rü ñanagürü: —Rü ñaã yatü rü tacü Tupanamaã nixugü. Rü taxucèxma marü tanaxwëxe i ñuxma i to i ore na napoxcuxüçèx

i ñaã yatü. Rü pematama marü nüxü pexĩnüë na ñuxãcü chixexümaã na yadexaxü. ⁶⁶ —¿Ñuxü ñapegüxü i pemax? —ñanagürü. Rü nümagü ga togü ga ãëxgacügü rü nanangãxügü rü ñanagürügü: —Ngẽmaãcü chixexü naxü. Rü name nixĩ i noxtacüma nayu —ñanagürügü. ⁶⁷ Rü yexguma rü Ngechuchuchiwewa naçuaixgüe. Rü nüxna nanaçuaixcagü. Rü togü rü nanapegüchiwegü. ⁶⁸ Rü ñanagürügü: —Pa Cristux, jñuxü nacuèx na texé cuxü pegüchiwegüxü rü cuxna naçuaixcagüxü! —ñanagürügü.

Pedru rü tama nügü nixu na Ngechuchuxü nacuáxü
(Mr 14.66-72; Lc 22.56-62; Cu 18.15-18, 25-27)

⁶⁹ Rü yoxni ga Pedru rü ãëxgacüpataèxtüwa narüto. Rü wüxi ga pacü ga ãëxgacüarü duüxü ixĩcü, rü Pedrucèx iyaxü. Rü ngĩgürügü nüxü: —Cuma rü ta namücü quixĩ i ngẽma Ngechuchu i Gariréaanecüãx —ngĩgürügü. ⁷⁰ Natürü ga Pedru rü guxü ga yema duüxügüpëxewa rü tama nügü nixu na Ngechuchuarü duüxü yĩxü, rü ñanagürü: —Choma rü tama nüxü chacuèx i tacüchiga nixĩ i ngẽma nüxü quixuxü —ñanagürü. ⁷¹ Rü yexguma marü yema İpataèxtüarü İãxwa İnaxüxgu ga Pedru, rü naĩ ga pacü nüxü idau. Rü ngĩgürügü namaã ga yema duüxügü ga yéma yexmagüxü: —Ñaã yatü rü Ngechuchu ya Nacharétucüãxmücü nixĩ —ngĩgürügü. ⁷² Natürü ga Pedru rü wenaxärü tama nügü nixu na Ngechuchuarü duüxü yĩxü. Rü ñanagürü: —Choma rü tama nüxü chacuèx i ngẽma yatü. Rü Tupana choxü poxcux ega tama aixcüma yixĩgu i chorü ore —ñanagürü. ⁷³ Rü yixcamaxüra rü yema duüxügü ga yéma yexmagüxü rü Pedrucèx naxĩ, rü ñanagürügü nüxü: —Aixcüma nixĩ i cuma rü ta rü ngẽma Ngechuchutanüxü quiixü, erü wüxi i Gariréaanecüãx idexaxürüü quidexa —ñanagürügü. ⁷⁴ Rü nüma ga Pedru rü poraãcü nügü nixã, rü ñanagürü nüxü: —Rü aixcüma tama nüxü chacuèx i ngẽma yatü. Rü ngëxguma doraxü chixuxgu rü Tupana choxü poxcux —ñanagürü. Rü yexgumatama nica ga otá. ⁷⁵ Rü nüma ga Pedru rü yexguma nüxna nacuèxãchi ga yema ore ga Ngechuchu namaã nüxü ixuxü ga ñaxü:

“Rü naxüpa na otá içaxü, rü cuma rü tomaëxpüxcüna cugü tá quixã na chorü duüxü quiixü”, ñaxü. Rü yéma İnaxüxü ga Pedru rü poraãcüxüchima naxaxu.

27

Yudügüarü ãëxgacügü rü Piratuxütawa nanagagü ga Ngechuchu
(Mr 15.1; Lc 23.1-2; Cu 18.28-32)

¹ Rü yexguma yangunegu rü guxüma ga paigüarü ãëxgacügü rü Yudügüarü ãëxgacügüerügü, rü nügümaã nanamexëëgü na ñuxãcü Ngechuchuxü yamëxgüxü. ² Rü nayanëixgüchacüügü rü yemaãcü ãëxgacü ga Piratuxütawa nanagagü. Piratu nixĩ ga Dumacüãx ga ãëxgacü ga Yudeaanemaã icuácü.

Nayu ga Yuda

³ Rü nüma ga Yuda ga Ngechuchuxü İyaxuaxüxü rü nüxü nadau ga Ngechuchuxü na napoxcuexü. Rü poraãcü nagu narüxĩnü ga yema chixexü ga nümatama naxüxü. Rü yéma naxü naxütawa ga yema paigüarü ãëxgacügü rü yema Yudügüarü ãëxgacügüerügü. Rü ngĩxü nayataeguxëë ga yema 30 tachinü ga dïeru ga nüxna ngĩxü naxãgücü. ⁴ Rü ñanagürü nüxü: —Choma rü marü chixexü chaxü, erü naëchita İchayaxuaxü i wüxi i yatü i taxuüma i chixexü üxü, rü ñuxma rü tá ngëmagagu nayu —ñanagürü. Natürü nümagü ga ãëxgacügü rü nanangãxügü, rü ñanagürügü: —Toma rü tama nüxü tacuáxchaü i ngẽma. Cugagutama nixĩ, rü cuma i nüxü cucuáxü na ñuxãcü cugümaã cunamexëëxü i ngẽma —ñanagürügü. ⁵ Rü yexguma ga Yuda rü

yexma tupauca ga taxũnechiãgu ngĩxũ nawotanũ ga yema dĩeru. Rũ ñuxũchi ínixũ rũ nũgũ nayawẽxnaxã. ⁶ Rũ ga paigũarũ ãẽxgacũgũ rũ ngĩxũ nade ga yema dĩeru. Rũ ñanagũrũgũ: —Taxucũrũwa tupauca ya taxũneãrũ dĩeruchiũgu ngĩxũ tanu i ñãã dĩeru, erũ ngẽmamaã tanaxũtanũ i ngẽma yatũ i tá yuxũ — ñanagũrũgũ. ⁷ Rũ ñuxũchi nũgũmaã nanamexẽẽgũ na yema dĩerumaã naxcẽx nataxegũxũcẽx ga wũxi ga naãne ga waixũmũ ga üwechixũ nawa nayauxgũxũ. Rũ yema naãnecẽx nataxegũ na nũxũ nayexmaxũcẽx ga nachica ga ngexta na natẽxgũãxũcẽx ga yema duũxũgũ ga togũ ga nachiũãnecũãx ixĩgũxũ. ⁸ Rũ ngẽmacẽx i ñuxma rũ ta i ngẽma naãne rũ Nagũchitaũgu naxãega. ⁹ Rũ yemaãcũ ningu ga Tupanaãrũ ore ga nuxcũmaũcũ ga norũ orearũ uruũ ga Yeremĩã umatũxũ ga ñaxũ:

“Rũ nũmagũ ngĩxũ nade ga yema 30 tachinũ ga dĩeru ga Cristutanũ Yudĩugũ ngĩxũ ixãgũcũ. ¹⁰ Rũ yema dĩerumaã naxcẽx nataxegũ ga wũxi ga naãne ga waixũmũ ga üwechixũ nawa nayauxgũxũ, yema Cori ga Tupana chomaã nũxũ ixuxũrũ”, ñaxũ.

Piratupẽxewa nayexma ga Ngechuchu

(Mr 15.2-5; Lc 23.3-5; Cu 18.33-38)

¹¹ Rũ ãẽxgacũ ga Piratuxũtawa Ngechuchuxũ nagagũ. Rũ nũma ga Piratu rũ Ngechuchuna naca, rũ ñanagũrũ: —¿Cuma quiĩxũ i Yudĩugũarũ ãẽxgacũ ya tacũ? —ñanagũrũ. Rũ Ngechuchu nanangãxũ, rũ ñanagũrũ: —Ngũ, rũ ngẽma nũxũ quixuxũ chixĩ i chomax —ñanagũrũ. ¹² Rũ Ngechuchuxũ ínaxuaxũgũ ga paigũarũ ãẽxgacũgũ rũ Yudĩugũarũ ãẽxgacũgũerugũ. Natũrũ ga Ngechuchu rũ taxuxũmaãma nanangãxũ. ¹³ Rũ yexguma ga Piratu rũ ñanagũrũ: —¿Tama õxna nũxũ cuxĩnũ i ngẽma ore i namaã cuxũ ínaxuaxũgũxũ? —ñanagũrũ. ¹⁴ Natũrũ ga Ngechuchu rũ taxuxũmaãma nanangãxũ. Rũ yemacẽx poraãcũ nabẽxãchiãẽ ga ãẽxgacũ ga Piratu.

Piratu rũ Ngechuchumaã nanaxuegu na nayuxũcẽx

(Mr 15.6-20; Lc 23.13-25; Cu 18.38-19.16)

¹⁵ Rũ guxũguma ga yema Üpetũchigaarũ petagu, rũ Piratu ínanguxuchixẽẽxũ ga wũxi ga poxcuxũ ga duũxũgũ naxcẽx ícagũxũ, yerũ yema nixĩ ga nacũma. ¹⁶ Rũ yema nayexma ga wũxi ga poxcuxũ ga guxũ ga duũxũgũ meã nũxũ cuãxũ. Rũ Barabã nixĩ ga naega. ¹⁷ Rũ yexguma yema nangutaquẽxegũga ga duũxũgũ, rũ Piratu nũxna naca, rũ ñanagũrũ: —¿Rũ ngexũrũxũxũ i penaxwãexũ na íchananguxuchixẽẽxũ? ¿Penaxwẽxexũ na Barabãxũ íchananguxuchixẽẽxũ rũ õxna Ngechuchu i Cristumaã naxugũxũxũ íchananguxuchixẽẽxũ? —ñanagũrũ. ¹⁸ Rũ yema ñanagũrũ ga Piratu yerũ nũxũ nacuẽx na Ngechuchuchi naxaieũ ga Yudĩugũarũ ãẽxgacũgũ, rũ yemacẽx nixĩ ga naxũtawa nagagũãxũ. ¹⁹ Rũ yexguma norũ tochicawa natoxgu ga Piratu, rũ naxmẽx yema imuga, rũ ngĩgũrũgũ: —Tama name i cunapoxcu i ngẽma yatũ i taxuũma i chixexũ üxũ. Yerũ nagagu ñe chũtacũ rũ poraãcũ chachixenegũ —ngĩgũrũgũ. ²⁰ Natũrũ yema paigũarũ ãẽxgacũgũ rũ Yudĩugũarũ ãẽxgacũgũerugũ, rũ duũxũgũxũ naxucũxẽgũ na naxcẽx ínacagũxũcẽx na Barabãxũ ínanguxuchixẽẽxũcẽx rũ Ngechuchuxũ na nayuxẽẽgũxũcẽx. ²¹ Rũ ãẽxgacũ ga Piratu rũ wenaxãrũ duũxũgũna naca, rũ ñanagũrũ: —¿Ngẽxũrũũxũ i ngẽma taxrewa i pema penaxwẽxexũ na íchananguxuchixẽẽxũ? —ñanagũrũ. Rũ nũmagũ ga duũxũgũ nanangãxũgũ, rũ ñanagũrũgũ: —Tanaxwẽxe i Barabãxũ ícunguxuchixẽẽ —ñanagũrũgũ. ²² Rũ yexguma ga ãẽxgacũ ga Piratu rũ nũxna naca, rũ ñanagũrũ: —¿Tacũ tá chaxũxũ namaã i ngẽma Ngechuchu i Cristugu ãegaxũ? —ñanagũrũ. Rũ guxũma ga duũxũgũ rũ nanangãxũgũ, rũ ñanagũrũgũ: —¿Curuchawa

yapota! —ñanagürügü. ²³ Rû yexguma ga Piratu rû ñanagürü nüxü: —¿Natürü tacü rû chixexü naxü? —ñanagürü. Natürü ga nûmagü ga duüxügü rû wenaxârü tagaãcü ñanagürügü: —¡Curuchawa yapota! —ñanagürügü. ²⁴ Rû yexguma Piratu nüxü dèuxgu ga marü taxucürüwama Ngechuchuxü na ínguxuchixèegaxü, yerü ga duüxügü rû marü nanaxixâchiãegüchaü, rû yemacèx wüxi ga norü duüxüxü namu ga dexá naxütawa na tanangexüçèx. Rû nügü nayauxmèx ga Piratu napèxewa ga guxüma ga yema duüxügü. Rû ñanagürü: —Tama chaugagu tá nixí i na nayuxü i ñaã yatü i taxuüma i chixexü üxü, rû pegagu tátama nixí —ñanagürü. ²⁵ Rû guxüma ga yema duüxügü nanangâxügü, rû ñanagürügü: —Togagu rû toxocügügaugu tá nixí i nayuxü —ñanagürügü. ²⁶ Rû yexguma ga Piratu rû Barabâxü ínguxuchixèë. Rû ñuxüchi norü churaragüxü namu na Ngechuchuxü nacuaixgüxüçèx, rû yemawena curuchawa na yanapotagüãxüçèx. ²⁷ Rû ñuxüchi ga yema churaragü rû Piratupataarü aixepewa Ngechuchuxü nagagü. Rû yexma Ngechuchuxütagu nanangutaquèxèë ga guxüma ga churaragü. ²⁸ Rû ñuxüchi Ngechuchuxü ínacuxuchigü, rû wüxi ga máxü ga naxchiru ga dauxügu nayacuxèëgü. ²⁹ Rû naëruwa nayangèxcuchigü ga wüxi ga boxü ga chuchuxüwa naxügüxü. Rû wüxi ga naïxmenèxãxãcüxü nüxü nayayauxâchixèë ga norü tügünemèxèwa. Rû ñuxüchi napèxegu nacaxâpüxügü, rû nüxü nacugüe, rû ñanagürügü: —¡Namaüx ya Yudíugüarü Æxgacü ya Tacüx! —ñanagürügü. ³⁰ Rû nüxna nacuaixgüe. Rû nüxna nanayauxgü ga guma naïxmenèxãxãcü, rû naëruwa namaã nanaçuaixcagü. ³¹ Rû yexguma nüxü nacugüeguena rû ínacuxuchigü ga yema naxchiru ga daucharaxü. Rû wenaxârü naxchirugutama nayacuxèëgü. Rû ñuxüchi nayagagü na curuchawa yanapotagüãxüçèx.

*Ngechuchuxü curuchawa nipotagü
(Mr 15.21-32; Lc 23.26-43; Cu 19.17-27)*

³² Rû yexguma yéma inaxíãchigu, rû nüxü nadaugü ga wüxi ga yatü ga Chirénecüãx ga Chimáügu ãegacü. Rû guma yatüxü ngíxü iningexèëgü ga Ngechuchuarü curucha. ³³ Rû nawa nangugü ga wüxi ga nachica ga Górgutagu ãegaxü. Rû ngéma naega rû Duüxèërchinèxã ñaxüchiga nixí. ³⁴ Rû nüxna nanaxâgü ga binu ga ngúxüârü naächixèëruümaã ãexücü na yaxaxãxüçèx. Rû Ngechuchu nüxü naxaxneta, natürü tama nayaxaxü. ³⁵ Rû yexguma marü curuchawa yapotagüãxguena rû ga churaragü rû nanade ga Ngechuchuchiru. Rû ñuxüchi wüxi ga díëru ngíxü nañanagügü na yemawa nüxü nacüèxgüxüçèx na tacü tá nayaxuxü ga wüxichigü. ³⁶ Rû ñuxüchi yéma narütogü ga churaragü na Ngechuchuna yéma nadaugüxüçèx. ³⁷ Rû norü curuchatapèxewa nayapocuchi ga wüxi ga mürapewa ga ãegatachinüxü ga nüxü ixuxü ga tacüçèx Ngechuchuxü curuchawa na yapotagüxü. Rû ñanagürü: “Ñaã nixí i Ngechuchu i Yudíugüarü Æxgacü ya Tacü”, ñanagürü. ³⁸ Rû yexgumarüü ta curuchawa nayapotagü ga taxre ga máëtagüxü. Rû wüxi rû Ngechuchuarü tügünecüwawa naxü, rû to ga norü toxwecüwawa. ³⁹⁻⁴⁰ Rû yema duüxügü ga yéma chopetüxü, rû Ngechuchumaã naguxchigagü, rû nanexãërugüãcüma ñanagürügü: —Düçèx, cuma cunangutaüxèëga ya tupauca ya taxüne, rû tomaèxpüx i ngunexügu wenaxârü ícunadaxèëga. ¡Cugütama namaxèë i ñuxmax! Rû ngèxguma chi aixcüma Tupana Nane quixígu, rû ¡ruxí i curuchawa! —ñanagürügü. ⁴¹ Rû yexgumarüü ta Ngechuchuxü nacugüecüraxü ga paigüarü ãëxgacügü, rû ngüxèëruügü ga ore ga mugüwa nguxèëtaegüxü, rû Parichéugü, rû Yudíugüarü ãëxgacügüerugü. Rû nügümaã ñanagürügü: ⁴² —Rû nüma rû

togüxü namaxëxëë natürü i ñuxma rü tama nüxü nacuèx na nügütama namaxëëxü. Rü ngëxguma chi aixcüma Yudiügüarü äëxgacü yixïgu, jrü ñuxma rü ínaxïx i curuchawa na nüxü yaxögüxüçèx! ⁴³ —Rü nüma nagu naxïnügu rü Tupana tá nüxü narüngüxëë. Êcü, ñuxma rü Tupana nüxü rüngüxëëx ega aixcüma nüxü nangüxëëchaügu. ¿Tama êxna nümatama tamaã nüxü yaxuxü na Tupana Nane yïxü? —ñanagürügü. ⁴⁴ Rü woo ga yema máëtagüxü ga naxrüü curuchawa ipotagüxü, rü namaã naguxchigagü.

Nayu ga Ngechuchu

(Mr 15.33-41; Lc 23.44-49; Cu 19.28-30)

⁴⁵ Rü yexguma rü guxü ga naãnewa naxëãne. Rü tocuchigu inaxügü ga yema ñuxmata tomaëxpüxarü orawa nangu ga yáuanecü. ⁴⁶ Rü yema tomaëxpüxarü oragu nixï ga Ngechuchu ga tagaãcü aita naxüxü, rü ñaxü: —Eri, Eri, ¿damá chabátani? —ñanagürü. Rü ngëma rü ñaxüchiga nixï:

“Pa Chorü Tupana, Pa Chorü Tupanax, ¿tüxcüü choxna quixügachixü?” ñaxüchiga nixï. ⁴⁷ Rü nümaxü ga duüxügü ga yéma yexmagüxü rü nüxü naxïnüë, rü ñanagürügü: —Ñã yatü rü nuxcümaücü ga Tupanaãrü orearü uruü ga Eriacèx naca —ñanagürügü. ⁴⁸ Rü yexgumatama rü wüxi ga yema duüxügü ga yéma yexmagüxü rü inañaãchi rü Ngechuchuxütawa nanange ga wüxi ga tüaxmü ga binu ga marü ngüchièxüchicümaã yawaixëëxü. Rü wüxi ga dexnewa nayanèïx. Rü ñuxüchi Ngechuchuèxgu nanawëx na nüxü natuxuxüçèx. ⁴⁹ Natürü ga yema togü ga duüxügü ga yéma yexmagüxü rü ñanagürügü: —Yixrüma. Rü ngïxã itarüdaunü ngoxita Eria nuã ü na nüxü yanangüxëëxüçèx —ñanagürügü. ⁵⁰ Rü wenaxärü tagaãcü aita naxü ga Ngechuchu, rü ñuxüchi nayu. ⁵¹ Rü yexgumatama ga tupauca ga taxüneärü tüyemachiãxü rü taxregu narügaute. Rü daxüwa inanaxügü ga na nagautexü rü ñuxmata ñaxtüwa nangu. Rü naxïãxãchiane, rü narüngüxtegü ga nutagü ga itacü. ⁵² Rü yuetamaügu rü ningenagü. Rü wena namaxë ga muxüma ga duüxügü ga yuechiréxü ga Tupanaãxü yaxögüxü. ⁵³ Rü yexguma Ngechuchu wena maüxguwena, rü naxmaüwa ínachoxü ga yema duüxügü ga wena maxëxü. Rü Yerucharéüwa naxï. Rü muxüma ga duüxügü nüxü nadaugü. ⁵⁴ Rü yema churaragüarü äëxgacü rü norü churaragü ga Ngechuchuna ídaugüxü, rü nüxü nadaugü ga na naxïãxãchianexü rü guxüma ga yema ngupetüxü. Rü yexguma rü poraãcü namuüë, rü ñanagürügü: —Aixcüma nixï ya daa yatü i Tupana Nane na yïxü —ñanagürügü. ⁵⁵ Rü iyexmagü ga mucüma ga ngecügü ga yéma yaxüwa nüxü rüdaunücü. Rü yema ngecügü iyixï ga Ngechuchuxü íxümücügücü rü nüxü rüngüxëëgücü ga yexguma Gariréaanewa ne naxüxgu. ⁵⁶ Rü yema ngecügütanüwa iyexma ga María ga Magadácüãx, rü María ga Chaütiágu rü Yúche naë, rü Zebedéu namèx ga Chaütiágu rü Cuáü naë.

Ngechuchu rü naxmaügu nayaxüchigü

(Mr 15.42-47; Lc 23.50-56; Cu 19.38-42)

⁵⁷ Rü yexguma marü nachütachaügu, rü yéma nangu ga wüxi ga yatü ga Arimatéacüãx ga taarü diëruãcü ga Yúchegu äegacü. Rü nüma rü ta Ngechuchuaxü nayaxö. ⁵⁸ Rü nüma rü Piratuna nayaca rü ngoxita name na nayauxãxü ga Ngechuchuxüne ga curuchawa. Rü Piratu norü churaragüxü namu na nüxna naxägüãxüçèx ga Ngechuchuxüne. ⁵⁹ Rü Yúche nanayaxu ga Ngechuchuxüne ga curuchawa. Rü wüxi ga naxchápenüü ga ngëmataxümaã nananuque. ⁶⁰ Rü yema naxmaü ga yexwacaxüxü ga Yúche nügüçèxtama duüxügüxü yacaxmaxëëxü ga nuta ga tacüarü mëxpüxüwa yexmaxügu nayaxüchü ga Ngechuchuxüne. Rü ñuxüchi nanangüxtaü namaã ga wüxi

ga nuta ga taxüchicü. Rü yemawena rü ínixü. ⁶¹ Rü yéma Ngechuchumañärü toxmèxtawa irütogü ga María ga Magadácüñx rü nañ ga María.

Purichíagü nüxna nadaugü ga yema naxmañ ga Ngechuchuxü nagu yaxüchigüxü

⁶² Rü moxüãcü ga ngüxchigaarü ngunexügu rü paigüarü ãëxgacügü rü Parichéugü rü yéma Piratuxütawa naxí. ⁶³ Rü ñanagürügü nüxü: —Pa Corix, nüxna tacuëxãchie ga yema yatü ga Ngechuchu ga idoratëxáxü rü yexguma namañxgu rü ñanagürü tomaã:

“Ngëxguma chayüxgu rü tomaëxpüx i ngunexüguwena rü wena táxarü ícharüda”, ñanagürü tomaã. ⁶⁴ —Rü ngëmacëx tanaxwëxe i churaragü ngëma cumugü na nüxna yadaugüxüçëx i ngëma naxmañ ñuxmatáta tomaëxpüx i ngunexüwa nangu na tama chütacü ngëma naxíxüçëx i norü ngúexügü na yayauxgüãxüçëx i naxüne rü ñuxüchi duñxügümaã nüxü na yaxugüxüçëx na marü wena namaxüxü. Erü ngëxguma chi ngëmaãcü naxüpetügu, rü noxriarü yexera tá nixí na duñxügüxü nawomüxëëxü —ñanagürügü. ⁶⁵ Rü Piratu ñanagürü nüxü: —Ngëãgü nixí i churaragü i pexcëx. ¡Ëcü ngëma namaã pexí na meãma pema penaxwëxexüãcüma nüxna pedaugüxüçëx i naxmañ! —ñanagürü. ⁶⁶ Rü yema churaragümaã yéma naxí, rü meãma nayataixëëgü ga guma nuta ga Ngechuchumaxü namaã rüngüxütaücü. Rü nanaxüarü cuëxruñxgü na taxúema naëchita ínaxügachigüxüçëx ga guma nuta. Rü ñuxüchi yexma nanamugü ga churaragü na nüxna nadaugüxüçëx.

28

Yuwa ínarüda ga Ngechuchu

(Mr 16.1-8; Lc 24.1-12; Cu 20.1-10)

¹ Rü sabaduarü ngunexüguwena ga yüxüarü pëxmama, rü yéma naxmañwa íyadaugü ga María ga Magadácüñx rü nañ ga María. ² Rü ngürüãchi poraãcü naxíãxãchiane, yerü wüxi ga daxüçüñx ga Cori ga Tupanaärü orearü ngeruñ ínarüxí, rü naxmañwa nangu rü ínanangüxgachi ga guma nuta ga namaã nangüxütaücü ga yema naxmañ. Rü ñuxüchi guma nutaétüwa narüto. ³ Rü yema orearü ngeruñ rü wüxi ga bèixbëxanexürüñ niyauracüü. Rü nacómüxüchi ga naxchiru. ⁴ Rü yexguma yemaxü nadaugügu ga churaragü rü norü muñmaã niduruxe, rü yexma niyuãchitanü. ⁵ Rü yexguma ga yema orearü ngeruñ, rü ñanagürü ngíxü ga yema ngecügü: —¡Tãxü i pemuñëxü! Choma nüxü chacuëx rü naxcëx pedaugü ya Ngechuchu ga guma curuchawa yapotagüãcü. ⁶ Nataxuma i nuã, erü marü wena namaxü, yema nüma üpa pemaã nüxü yaxuxürüñ. ¡Rü nuã pexí, rü ípeyadëux i naxmañ i ngëma ínaxügüãxüwa ga naxüne! ⁷ ¡Rü paxa ípixí, rü norü ngúexügümaã nüxü peyarüxugüe rü marü ínarüda rü wena namaxü ya Ngechuchu! Rü ñuxma rü marü pexüpa nüxíra Gariréaanewa naxü i nümax. Rü ngëma tá nixí i nüxü peyadauxü. Rü ngëma nixí i ore i pemaã nüxü chayarüxuxü —ñanagürü. ⁸ Rü yexguma ga yema ngecügü rü paxama nüxna íyaxí ga yema naxmañ. Rü imuñë, natürü itaãëgü ta. Rü poraãcü iixüãchi na Ngechuchuarü ngúexügümaã nüxü na yanaxugüexüçëx ga yema ore ga daxüçüñx ngímaã nüxü ixuxü. ⁹ Rü yexguma ínaxüãchiyane, rü ngürüãchi yéma ngíxcëx nangox ga Ngechuchu, rü ngíxü narümoxë. Rü ngímagü rü Ngechuchucëx iyabuxmü rü nüxü iyacuëxüügü, rü naparawa ínëixãchitanü. ¹⁰ Rü nüma ga Ngechuchu rü ñanagürü ngíxügü: —¡Tãxü i pemuñëxü! ¡Rü ípixí rü chaueneëgü i chorü ngúexügümaã nüxü peyarüxu rü Gariréaanewa naxí! Rü ngëma tá nixí i choxü nadaugüxü —ñanagürü.

Churaragü rü paigüarü ãëxgacügümaã nüxü nayarüxugüe ga yema ngu-petüxü

¹¹ Rü yexguma ga yema ngecügü rü namagu naxĩyane, rü ñuxre ga churaragü ga yéma naxmaüwa dauxütaegüxü rü Yerucharéüwa naxĩ. Rü paigüarü ãëxgacügümaã nüxü nayarüxugüe ga guxüma ga yema ngupetüxü.

¹² Rü yema paigüarü ãëxgacügü rü namaã nayarüdexagü ga Yudíugüarü ãëxgacügüerugü. Rü nügümaã nanamexëëgü ga tacümaã tá churaragüxü na yaxucuxëgüxü. Rü ñuxüchi nüxna ngĩxü naxãgü ga tacü ga dïëru. ¹³ Rü namaã nüxü nixugüe rü ñanagürügü: —¡Pema rü ñaperügügü tá:

“Ngëxguma chütacü tapeeyane, rü norü ngüexügü toechita ngema naxĩ rü nayayauxgü ga naxüne” ñaperügügü tá! ¹⁴ Rü ngëxguma ãëxgacü ya Piratu tá nüxü cuëxgu i ngëma ngupetüxü, rü toma rü tá namaã tidexagü rü namaã tá tanamexëë na taxuüma pemaã naxüxcèx —ñanagürügü. ¹⁵ Rü yexguma ga yema churaragü rü ngĩxü nayauxgü ga yema dïëru. Rü yema ãëxgacügü namaã nüxü ixugüxürüü duüxügümaã nüxü nixugüe. Rü ñuxma rü ta ngëmatama dexa nixĩ i nüxü yaxugüxü i Yudíugü.

Ngechuchu nanamu ga norü ngüexügü

(Mr 16.14-18; Lc 24.36-49; Cu 20.19-23)

¹⁶ Rü yema 11 ga Ngechuchuarü ngüexügü rü Gariréa- anewa naxĩ ga guma mèxpüne ga Ngechuchu namaã nüxü ixuxñewa. ¹⁷ Rü yexguma Ngechuchuxü nadaugügu rü nüxü nicuëxüügü, woo ñuxre ga norü ngüexügü rü tama aixcüma nayaxögü na Ngechuchu yïixü. ¹⁸ Rü yexguma ga Ngechuchu rü naxcèx nixü, rü ñanagürü nüxü: —Tupana rü ãëxgacüxü choxü nixixëë i guxü i daxügüxü i nañewa rü guxü i ñoma i nañewa. ¹⁹ —Rü ñuxma rü chanaxwèxe i guxü i nachiüñanewa pexĩ i guxü i duüxügütanüwa. ¡Rü chorü duüxügüxü peyaxïgüxëëx! ¡Rü ípenabaiüxëëx chauégagu rü Chaunatuégagu rü Naãë i Üünexüegagu! ²⁰ ¡Rü penangüexëëx na naga naxĩnüëxcèx i guxüma i ngëma pexü chamuxü! ¡Rü dücax, guxügutáma pexütawa changëxmaëcha ñuxmatáta nagú i nañe! —ñanagürü ga Ngechuchu.

ORE I MEXÛ GA MARCU ÜMATÛXÛ

Cuáŭ ga baiŭxêëruŭ nüxŭ nixu ga Tupanaärü ore ga dauxchitawa ga ngextá taxúema íxãpataxŭwa

(Mt 3.1-12; Lc 3.1-9, 15-17; Cu 1.9-28)

¹ Ñaã nixí i norü ügü i ore i mexŭ ya Ngechuchu ya Cristu ya Tupana Nanechiga. ² Rŭ nuxcŭmaŭcŭ ga Tupanaärü orearü uruŭ ga Ichaxía ümatŭxŭ ga Tupanaärü ore, rŭ ñanagŭrŭ:

“Cupêxegu chayamu i chorü orearü ngeruŭ na namexêëxŭcèx i cumaŭ. ³ Rŭ dauxchitawa i ngextá taxúema íxãpataxŭwa rŭ tá nangêxma i wŭxi i duŭxŭ i ngema tagaãcŭ ñaxŭ: ‘¡Pegü pemexêëx naxcèx ya Cori. Rŭ naxcèx ipeyanawêëxãchixêëx i perü maxŭ!’ ”

ñaxŭ tá. ⁴ Rŭ Cuáŭ rŭ dauxchitawa ga ngextá taxúema íxãpataxŭwa nangox rŭ yéma ínanabaiŭxêë ga duŭxŭgü. Rŭ namaã nüxŭ nixu ga na namexŭ na Tupanacèx nadaugŭxŭ rŭ ínabaiŭxŭ na Tupana nüxŭ nüxŭ nangechaŭxŭcèx ga norü pecadugü. ⁵ Rŭ guxŭma ga duŭxŭgü ga Yudéaanecŭãx rŭ ñãne ga Yerucharéŭcŭãx rŭ yéma Cuáŭxŭtawa naxŭxŭ ga na nüxŭ iyanaxŭnŭxŭcèx. Rŭ nümagü rŭ norü pecadugŭxŭ yéma nayarŭxugŭxŭ, rŭ Cuáŭ rŭ natü ga Yudáŭwa ínayabaiŭxêëtanü. ⁶ Rŭ naxchiru ga Cuáŭ rŭ cameyutèxanaxcèx nixí, rŭ norü goyexŭ rŭ naxchèxmŭnaxcèx nixí. Rŭ beruremaã rŭ munümaã naxãwemü. ⁷ Rŭ Cuáŭ rŭ yema nüxŭ yaxuxŭ ga orewa, rŭ ñanagŭrŭ: — Choweama tá ne naxŭ ya choxŭ rŭyexeracŭ. Rŭ choma rŭ taxuwama chame rŭ bai na ichayarŭmaxãchixŭ na íchayawêëxŭcèx i norü chapatucunŭgü. ⁸ — Choma rŭ dexáwamare pexŭ íchabaiŭxêë, natürü nüma rŭ tá Tupanaãe i Üünexŭ pexna nanguxêë —ñanagŭrŭ ga Cuáŭ.

Ngechuchuarü baiechiga

(Mt 3.13-17; Lc 3.21-22)

⁹ Rŭ yema ngunexŭgügu, rŭ Ngechuchu rŭ ínaxŭxŭ nawa ga guma ñãne ga Nacharétu ga Gariréanewa yexmane. Rŭ Cuáŭ rŭ natü ga Yudáŭwa ínanabaiexêë. ¹⁰ Rŭ yexguma dexáwa ínaxŭãchigu, rŭ Ngechuchu nüxŭ nadau ga na yangenaxŭ ga daxŭwa. Rŭ yema Tupanaãe i Üünexŭ rŭ wŭxi ga muxtucurŭŭ inanago, rŭ Ngechuchuna nangu. ¹¹ Rŭ daxŭwa inanaxŭ ga wŭxi ga naga ga ñaxŭ: —Cuma nixí i Chaune i cuxŭ changechaŭxŭchixŭ rŭ cumaã chataãexŭchixŭ —ñaxŭ.

Ngechuchuxŭ naxŭ ga Chataná

(Mt. 4.1-11; Lc 4.1-13)

¹² Rŭ yemawena rŭ Tupanaãe i Üünexŭ rŭ dauxchitawa ga ngextá taxúema íxãpataxŭwa Ngechuchuxŭ naga. ¹³ Rŭ yéma nayexma ga 40 ga ngunexŭ. Rŭ naëŭgü ga idüraexŭ íyexmagŭxŭwa nayexma, rŭ ngoxo ga Chataná rŭ nüxŭ naxŭ. Natürü Tupanaärü orearü ngeruŭgü ga daxŭcŭãx rŭ Ngechuchuxŭ narŭngŭxêëgü.

Ngechuchu rŭ Gariréanewa inanaxŭgü ga norü puracŭ

(Mt 4.12-17; Lc 4.14-15)

¹⁴ Rŭ nawena ga poxcupataŭgu na napoxcuxŭ ga Cuáŭ, rŭ Gariréanewa naxŭ ga Ngechuchu na naxunagŭãxŭcèx ga Tupanaärü ore i mexŭ. ¹⁵ Rŭ ñanagŭrŭ: —Marü nawa nangu i ngunexŭ ga Tupana nagu unetaxŭ, rŭ pexcèx ningaica na perü ãexgacŭ na yŭxŭ. ¡Rŭ ñuxma rŭ name nixí i Tupanacèx pedaugü rŭ peyaxŭgü i ngema norü ore i mexŭ! —ñanagŭrŭ.

Ngechuchu rü ägümücü ga püchaetanüxücèx naca
(Mt 4.18-22; Lc 5.1-11)

¹⁶ Rü yexguma naxtaxa ga Gariréaanacügu yaxüxgu ga Ngechuchu, rü yéma nüxü nadau ga Chimáü rü naëneë ga Aüdré. Rü nümagü rü woetama püchaetanüxü nixigü rü yéma naxtaawa napüchaegü. ¹⁷ Rü Ngechuchu rü ñanagürü nüxü: —¡Chowe perüxí rü tá pexü charüngüxëë na chauxütawa penagagüxücèx i duüxügü! —ñanagürü. ¹⁸ Rü yexgumatama ga yema taxre, rü yéma nanawogü ga norü püchagü. Rü Ngechuchuwe narüxí. ¹⁹ Rü yéamaxüra naxü ga Ngechuchu, rü yéma nüxü nadau ga Chaütiágu rü naëneë ga Cuáü. Rü Zebedéu nanegü nixigü ga nümagü. Rü wüxi ga nguwa nayexmagü, rü yéma ínanangáitagü ga norü püchagü. ²⁰ Rü yexgumatama Ngechuchu naxcèx naca. Rü nümagü rü yéma nguwa tüxü natèxgü ga nanatü ga Zebedéu namaã ga tümaãrü puracütanüxügü, rü Ngechuchuwe narüxí.

Wüxi ga yatü ga ngoxo nawa yexmaxüchiga
(Lc 4.31-37)

²¹ Rü íãne ga Capernáüwa nangugü. Rü yexguma ngüxchigaarü ngunexüwa nanguxgu, rü Ngechuchu rü ngutaquëxepataüwa naxü rü yexma naxücu. Rü yéma inanaxügü ga na nangüxëëtaexü. ²² Rü duüxügü rü nabèixächiãëgü namaã ga norü ngüxëëtae, yerü aixcüma Tupanaãrü poramaã meã nanangüxëë rü tama ngüxëëruügü ga Moíchéarü mugüwa ngüxëëtaegüxürüü nixí. ²³⁻²⁴ Rü guma íãneãrü ngutaquëxepataüwa nayexma ga wüxi ga yatü ga ngoxo nawa yexmaxü. Rü aita yéma naxü, rü ñanagürü: —¿Tüxcüü totanüwa cuxü, Pa Ngechuchu Pa Nacharétucüãx? ¿Nuã cuxü na toxü cuyadèixücèx? Choma rü cuxü chacuèx na Tupana Nane ya Üünecü quíxü —ñanagürü. ²⁵ Rü Ngechuchu nüxü naxoox ga yema ngoxo, rü ñanagürü: —¡Iyarüngeèx rü ínaxüxü nawa ya yima yatü! —ñanagürü. ²⁶ Rü yexguma ga yema ngoxo rü guma yatüxü niyuãchixëë, rü tagaãcü aita naxüãcüma nawa ínaxüxü. ²⁷ Rü guxüma ga duüxügü rü nabèixächiãëgü, rü namücügüna nicachigü rü ñanagürügü: —¿Tacü nixí i ñaã? Maneca wüxi i ngexwacaxüxü i ngüxëëtae nixí. Nüma rü aixcüma Tupanaãrü poramaã meã nangüxëëtae. Rü woo i ngoxogü rü naga naxínüë i ngëxguma namuãxgu —ñanagürügü. ²⁸ Rü yemaãcü nixí ga paxa guxüwama ga Gariréaanewa rü Ngechuchuchigaxü nacüèxgüxü ga duüxügü.

Ngechuchu rü Chimáü ga Pedru nëxècèx nayataanexëë
(Mt 8.14-15; Lc 4.38-39)

²⁹ Rü yexguma ngutaquëxepataüwa ínaxüxügu ga Ngechuchu, rü Chaütiágu rü Cuáümaã Chimáü rü Aüdrépatawa naxü. ³⁰ Rü Chimáü nëxë rü ngürücarewa iyexma, yerü iyaxaxüne. Rü Ngechuchumaã ngüxü nixugü. ³¹ Rü ngüxcèx nixü, rü ngüxmëxgu nayayauxãchi, rü ngüxü ínarüdaxëë. Rü yexgumatama igèuxãchi ga na yaxaxünexü. Rü írüda, rü ínaxügü ga naxcèx na namexëëãxü ga õna.

Ngechuchu rü muxüma ga idaaweexücèx nayataanexëë
(Mt 8.16-17; Lc 4.40-41)

³² Rü yexguma marü yanaxücuxgu ga üèxcü ga na nachütachaüxü, rü Ngechuchuxütawa nanagagü ga guxüma ga duüxügü ga idaaweexü rü guxüma ga ingoxoãxgüxü. ³³ Rü guxüma ga yema íãnecüãx rü yexma guma ípataarü íãxwa naxcèx nangutaquëxegü. ³⁴ Rü nüma nanameëxëë ga muxüma ga duüxügü ga nagüxüraüxü ga ðaawemaã idaaweexü. Rü ínanawoxü ga muxüma ga ngoxogü, natürü nüxna nanachüxu ga na yadexagüxü, yerü nümagü ga ngoxogü rü nüxü nacüèxgü na texé yíxü.

*Ngechuchu rü nanaxunagü ga ore ga mexü ga ngutaquëxepataüwachigü
(Lc 4.42-44)*

³⁵ Rü ngunetüü ga tauta yangóonegu, rü inaxüãchi ga Ngechuchu. Rü ñâneärü yéaxüra ga ngextá taxúema íxãpataxüwa naxü na yéamaxüra yayumüxëxücèx. ³⁶ Rü Chimáü rü namücügümaã Ngechuchucèx nayadaugü. ³⁷ Rü yexguma nüxü iyangaugügu, rü ñanagürügü nüxü: —Guxüma i duüxügü rü cuxcèx nadaugü —ñanagürügü. ³⁸ Natürü ga nüma rü nanangãxü rü ñanagürü nüxü: —¡Ngïxã rü toxnamana taxï náigü ya ñanexãcügü ya ngaicamagünewa na ngema rü ta chanaxunagüxücèx i ore i mexü! Erü woetama ngëmacèx nixï i Capernáüärü ñanewa íchaxüxüxü. ³⁹ Rü yemaãcü ga Ngechuchu rü guxüma ga Gariréaanegu nixüãgüchigü. Rü wüxichigü ga ñâneärü ngutaquëxepataüwa rü nüxü nixuchigü ga ore ga mexü, rü ñayawoxüëtanü ga ngoxogü.

*Ngechuchu rü wüxi ga rüchaxünexüçèx nayataanexëë
(Mt 8.1-4; Lc 5.12-16)*

⁴⁰ Rü Ngechuchucèx nixü ga wüxi ga yatü ga chaxünemaã idaawecü. Rü napëxegu nayacaxãpüxüãcüma ñanagürü nüxü: —Pa Corix, ngëxguma cunaxwëxegu na choxü curümexëëxü, rü cuxü natauxcha na chauxcèx cuyataanexëëxü —ñanagürü. ⁴¹ Rü Ngechuchuaxü nangechaütümüü ga guma yatü. Rü nüxü ningögü rü ñanagürü nüxü: —Ngü, chanaxwëxe. ¡Marü curüme! —ñanagürü. ⁴² Rü yexgumatama nüxü inayarüxo ga na nachaxünexü ga guma yatü. Rü meãma naxcèx nitaane. ⁴³⁻⁴⁴ Rü Ngechuchu rü yexgumatama ñayamu. Rü meãma nanaxucuxë rü ñanagürü nüxü: —¡Düçèx, tãxütãma texémaã nüxü quixu! ¡Natürü ngema paixütawa naxü, rü cügü nüxü yadauxëë! ¡Rü curü mexëëçèx nüxna yaxuaxü i curü ñmare ga yema Moïché tüxü muxü na nüxü nacuáxüçèx i duüxügü na curümexü nawa i curü daawe! —ñanagürü. ⁴⁵ Natürü nüma ga guma yatü rü ñnixü rü ñanaxügü ga na guxãmaãma nüxü yaxuxü ga yema nüxü ngupetüxü. Rü yemacèx ga Ngechuchu rü marü taxucürüwa ngóxüwama duüxügüpëxewa ñanegügu naxücu. Natürü dauxchitagu ga ngextá duüxügü ítaxuxügu narüxãüx. Rü yéma naxcèx naxïxü ga duüxügü ga guxüãnewa ne íxü.

2

*Ngechuchu rü wüxi ga yatü ga nawãixãchicüçèx nayataanexëë
(Mt 9.1-8; Lc 5.17-26)*

¹⁻² Rü yixcama ga ñuxre ga ngunexüwena rü wenaxãrü Capernáüärü ñanegu naxücu ga Ngechuchu. Rü yexguma duüxügü nüxü cuáchigagügu na ñpatawa nayexmaxü, rü yéma nangutaquëxegü ga muxüma ga duüxügü. Rü düxwa ga ñãxtüwa rü nanapá. Rü nüma ga Ngechuchu rü namaã nüxü nixu ga ore i mexü. ³ Rü yéma nangugü ga ñgümücü ga yatügü ga yéma nangetaügüxü ga wüxi ga yatü ga nawãixãchicü. ⁴ Natürü yema na namuxüchixü ga duüxügü, rü taxucürüwama Ngechuchuxütawa nangugü. Rü yemacèx ñanapogüëtü ga Ngechuchu íyexmaxüwa ga guma ñpata. Rü yéma norü caruügu ñanaçhüxüetaügü ga guma nawãixãchicü. ⁵ Rü yexguma Ngechuchu nüxü deüxgu ga ñuxãcü aixcüma na yaxögüãxü ga yema duüxügü, rü ñanagürü nüxü ga guma nawãixãchicü: —Pa Chaunex, curü pecadugü rü marü cuxü nüxü changechaü —ñanagürü. ⁶⁻⁷ Natürü ñuxre ga ngüexëëruügu ga Moïchéärü mugüwa nguxëëtaegüxü rü yéma narütogü. Rü naãewa ñaxügu narüxñüë: —¡Ñuxãcü tama namuü na ngëmaãcü yadexaxü? ¡Rü tacü Tupanamaã yaxugüxü? Erü Tupanaxïcatama nixï ya duüxügüärü pecaduxü ngechaücü —ñaxügu narüxñüë. ⁸ Natürü yexgumatama ga Ngechuchu

rü nüxü nicuèxâchi ga yema nagu naxĩnũxũ, rü yemacèx nüxna naca rü ñanagürü nüxü: —¿Tũxcüü ngẽmagu perũxĩnũë i pemax? ⁹ —¿Tacü nixĩ i rütauchamaèxü na namaã nüxü ixuxü ya daa nawãixãchicü:

“Curü pecadugü rü marü cuxü nüxü changechaü”, rü ãxna:

“¡Inachi, rü nayaxu i curü caruü, rü íxü!” ñaxü? ¹⁰⁻¹¹ —Natürü ñuxma rü tá pexü nüxü chadauxẽë na Chaunatü núma choxü muxü na duũxügüaxü nüxü changechaüxcèx i norü pecadugü —ñanagürü. Rü yexguma yema ñaxguwena rü guma nawãixãchicüxü ñanagürü: —Cumaã nüxü chixu rü ¡inachi, rü nayaxu i curü caruü, rü cupatawa naxü! —ñanagürü. ¹² Rü yexgumatama inachi ga guma idaawecü. Rü nanayaxu ga norü caruü, rü ínaxũxü napèxewa ga guxüma ga yema duũxügü ga yéma yexmagüxü. Rü yemacèx ga yema duũxügü rü nabèixãchiãëgü, rü Tupanaxü nicuèxüügü, rü ñanagürügü: —Taguma nüxü tadau i tacü i ñaãrüü ixĩxü —ñanagürügü.

Lebícèx naca ga Ngechuchu
(Mt 9.9-13; Lc 5.27-32)

¹³ Rü yemawena rü wenaxãrü naxtaacutüwa naxü ga Ngechuchu. Rü yema muxüma ga duũxügü rü naxcèx naxĩ. Rü nüma rü nanangüexẽë. ¹⁴ Rü yexguma yéma naxüpetügu ga Ngechuchu, rü yéma nüxü nadau ga Lebí ga Arupéu nane. Rü nüma ga Lebí rü yéma narüto nawa ga yema nachica ga duũxügüna dñeru ngĩxü ínayaxuxüwa naxcèx ga Dumacüãxãrü ãëxgacü yerü woetama yema nixĩ ga norü puracü. Rü Ngechuchu rü ñanagürü nüxü: —¡Chowe rüxü! —ñanagürü. Rü inachi ga Lebí, rü nawe narüxü. ¹⁵ Rü yéma Lebípatawa nachibü ga Ngechuchu. Rü yéma nachibüë ga muxüma ga duũxügü ga Lebírüü Dumaãrü ãëxgacücèx dñeru ngĩxü yauxgüxü. Rü nayexmagü ta ga togü ga duũxügü ga taxúema nacümamaã taãëgüxü ga yéma mechawa rütogüxü namaã ga Ngechuchu rü norü ngúexügü. Yerü namu ga yema nawe rüxĩxü. ¹⁶ Rü yéma nayexmagü ta ga ñuxre ga Parichéugü rü ngúexẽëruügü ga Moíchéarü mugüwa nguxẽëtaegüxü. Rü yexguma nüxü nadaugügu ga yema togümaã na nachibüxü ga Ngechuchu, rü norü ngúexügüna nacagü, rü ñanagürügü: —¿Ñuxãcü i perü ngúexẽëruü rü namaã nachibü i ãëxgacüarü duũxügü i dñeruarü yauxwa puracüexü rü duũxügü i pecaduãxgüxü? —ñanagürügü. ¹⁷ Rü yexguma yemaxü naxĩnügü ga Ngechuchu rü ñanagürü nüxü: —Ngẽma poraxü rü tama nanaxwèxe ya duturu, natürü ngẽma idaaweexü waxi nixĩ i naxwèxexü ya duturu. Choma rü tama mexügüna na chaxuxücèx nixĩ ga núma chaxüxü, natürü núma chaxü na nüxna chaxuxücèx i pecaduãxgüxü —ñanagürü.

Ngechuchuna aurechigacèx nacagüë
(Mt 9.14-17; Lc 5.33-39)

¹⁸ Rü wüxi ga ngunexügu rü tama nachibüë yerü Tupanacèx naxauree ga Cuáü ga baiũxẽëruüãrü ngúexügü rü Parichéugüarü ngúexügü. Rü yemaxü nadaugügu ga ñuxre ga duũxügü, rü Ngechuchuxütawa naxĩ rü nüxna nayacagüë, rü ñanagürügü: —Ngẽma Cuáüãrü ngúexügü rü Parichéugüarü ngúexügü rü naxauree. ¿Rü tũxcüü i curü ngúexügü i tama naxaureexü? —ñanagürügü. ¹⁹ Rü Ngechuchu nanangãxü rü ñanagürü nüxü: —¿Ëxna wüxi i ngĩgüarü petawa rü pexcèx namexü na naxaureexü i ngẽma nüxna naxugüxü ega natanüwa nangẽxmagu i ngẽma yatü i ngexwacèx ãmaxü? Pemaã nüxü chixu rü ngẽxguma natanüwa nangẽxmayane i ngẽma yatü i ngexwacèx ãmaxü rü taxucürüwama naxauree i ngẽma nüxna naxugüxü. ²⁰ —Natürü wüxi i ngunexü rü ngẽma yatü i ngexwacèx ãmaxü rü tá namücügüna nixügachi.

Rü ngēma ngunexūgu tá nixĩ i naxaureexū. [Rü chorü ngúexūgü rü taxucürüwama naxauree i ñuxma erü natanüwa changēxma. Natürü ínangu tá i ngēma ngunexū na nuxna chixūgachixū, rü ngēxguma tá nixĩ i naxaureexū.] ²¹ —Rü taxúema wüxi i naxchirutüchi i ngexwacaxūxūmaã tanapaita i wüxi i naxchiru i ngauxū. Erü ngēxguma nañaãchimügu i ngēma natüchi i ngexwacaxūxū, rü tá nanagáuxēē i ngēma ngauxū i naxchiru. Rü noxriarü yexera tá narügáú. ²² —Rü ngēxgumarüü ta taxúema ngexwacaxūcū ya binu rü wüxi i marü ngauxū i naxchiü i naxchèxmünaxcèxgu tayabacuchi. Erü ngēxguma ngēmaãcū naxūxgu rü yima binu ya ngexwacaxūcū rü narüngu, rü tá nayawāixēē i ngēma naxchiü i ngauxū i naxchèxmünaxcèx. Rü ngēxma tá inayarüxo ya binu rü naxchiü rü ta. Rü ngēmacèx tanaxwèxe ya ngexwacaxūcū ya binu rü ngexwacaxūxū i naxchiügu tayabacuchi. [Rü chorü nguxēētae i ngexwacaxūxū rü ngēxgumarüü ta nixĩ na taxucürüwama namaã nawüxiguxū i ngēma nuxcūmaūxū i pecūmagü —ñanagürü ga Ngechuchu.]

Ngechucharü ngúexūgü rü trigu nibuxetanü ga ngüxchigaarü ngunexūgu (Mt 12.1-8; Lc 6.1-5)

²³ Wüxi ga ngüxchigaarü ngunexūgu ga Ngechuchu rü norü ngúexūgümaã trigunecüwa nachopetü. Rü nümagü ga norü ngúexūgü rü inaxĩácüma inanaxügüe ga trigu na yabuxetanūxū. ²⁴ Rü yema Parichéugü rü Ngechuchuna nacagü rü ñanagürügü: —Dücèx ¿rü tüxcüü i curü ngúexūgü rü nanaxügü i ngēma tama mexü i ngüxchigaarü ngunexūgu na naxūxü? —ñanagürügü. ²⁵ Natürü nüma ga Ngechuchu rü ñanagürü nüxü: —¿Taguma ēxna poperawa nüxü pedau ga tacü na naxūxü ga nuxcūmaūcū ga ãëxgacü ga Dabí rü natanūxūgü ga yexguma òna nüxü tauxgu rü nataiyaegu? ²⁶ Rü yexguma paigüarü ãëxgacü yixüga ga Abiatáru, rü Dabí rü Tupanapatagu naxücu. Rü nanangōx ga yema pãü ga üünexū ga paigücèxicatama ixixü. Rü nüma ga Dabí rü natanūxūmaã rü ta nangau ga yema pãü —ñanagürü. ²⁷ Rü ñanagürü ta ga Ngechuchu: —Ngēma ngüxchigaarü ngunexū rü duūxügücèx nixĩ ga naxūxü. Rü tama ngüxchigaarü ngunexūcèx nixĩ ga naxūxü ga duūxügü. ²⁸ —Rü ngēmacèx ya Tupana Nane ya duūxūxü ixicü rü namaã inacuèx ta i ngüxchigaarü ngunexū —ñanagürü.

3

Wüxi ga yatü ga yumécüchiga (Mt 12.9-14; Lc 6.6-11)

¹ Rü wenaxârü ngutaquëxepataügu naxücu ga Ngechuchu. Rü yéma nayexma ga wüxi ga yatü ga norü wüxichacüüwa yumécü. ² Rü yema Parichéugü, rü Ngechuchuxū nangugügü ngoxi tá namexēēã ga ngüxchigaarü ngunexūgu, na yemaãcü nüxü nayexmaxūcèx ga tacücèx na ínaxuaxügüãxü. ³ Rü yexguma ga Ngechuchu rü ñanagürü nüxü ga guma yumécü: —¡Írüda, rü nuxã ngãxūtanügu yachi! —ñanagürü. ⁴ Rü yexguma ga Ngechuchu rü yema togü ga yéma yexmagüxūna naca, rü ñanagürü nüxü: —¿Tacü nixĩ i mexü na naxūxü i ngüxchigaarü ngunexūgu? ¿Namexü na naxūxü i mexü rü ēxna chixexü? ¿Rü namexü na namaxēēxü rü ēxna yamáxü? —ñanagürü. Natürü ga nümagü rü yexma nayarüngeëxgümare. ⁵ Rü nüma ga Ngechuchu rü nuchametüácüma nüxü nidaugüãchi ga yema nüxü íchomaëguãchixü. Rü nangechaü yerü tama inaxĩnüëchaü ga yema duūxügü. Rü guma yatüxü ñanagürü: —¡Iyanawēxãchixēē ya cuxmëx! —ñanagürü. Rü yexguma ga guma yatü rü nügü inayarüwēxãchimëxëxēē. Rü yexgumatama rü narümexmëx. ⁶ Natürü yexguma yemaxü nadaugügu ga Parichéugü, rü

ínachoxũ ga yéma. Rũ Erodetanũxũmaã inanaxũgũe ga na naxcèx nadaugũxũ ga ñuxãcü tá na Ngechuchuxũ yamèxgũxũ.

Naxtaacutüwa Ngechuchucèx nangutaquëxegü ga muxũma ga duũxũgü

⁷ Rũ Ngechuchu rũ norü ngúexũgũmaã naxtaacutüwa naxũ. Rũ muxũma ga duũxũgü ga Gariréaanecũãx rũ nawe narũxĩ. ⁸ Rũ yexguma nüxũ nacuáchigagũgu ga guxũma ga yema mexũgü ga naxũxũ ga Ngechuchu, rũ naxcèx naxĩtaquëxe ga muxũma ga duũxũgü ga Yudéaanecũãx, rũ Yerucharéũcüãx, rũ Iduméããnecũãx, rũ Yudáũãrũ tocutücüãx rũ yema naãne ga Tiru rũ Chidáũãrũ ñãnegü nawa yexmaxücüãx. ⁹ Rũ yemacèx ga Ngechuchu rũ norü ngúexũgũxũ namu na wüxi ya ngue naxcèx namexëëgũxüçèx na tama yéma yaxũxtüğüãxüçèx ga yema muxũma ga duũxũgü. ¹⁰ Yerü nüma rũ nanameëxëë ga muxũma, rũ yemacèx guxũma ga yema idaaweexũ rũ naxcèx naxĩ na nüxũ yangögügũxüçèx. ¹¹ Rũ yexguma yema ngoxoãxgũxũ ga duũxũgü nüxũ daugũgu, rũ napëxegu nacaxãpũxügü rũ tagaãcü ñanagürügü: —Cuma nixĩ ya Tupana Nane quiĩxũ —ñanagürügü. ¹² Natürü nüma ga Ngechuchu rũ poraãcü nayaxucuxëgü na tama duũxũgũmaã nüxũ yaxugüexüçèx ga nachiga.

Ngechuchu nanade ga 12 ga norü ngúexũgü na toxnamana namugüãxüçèx (Mt 10.1-4; Lc 6.12-16)

¹³ Rũ yemawena ga Ngechuchu rũ wüxi ga mèxpúnewa ínaxũãchi. Rũ yéma naxcèx naca ga yema ngúexũgü ga nüma nanaxwèxexũ. Rũ naxũtagu naxĩtaquëxegü. ¹⁴ Rũ yematanüwa nayadexechi ga 12 ga norü ngúexũgü na namüçügũxüchi yiĩxüçèx, rũ na yamugüãxüçèx ga norü orearü unagüwa. Rũ yemagü rũ Imugũxũgu nanaxüéga. ¹⁵ Rũ pora nüxna naxã na Tupanaãrũ poramaã ínawoxũãxüçèx ga ngoxogü. ¹⁶ Rũ ñaãgü nixĩ ga naega ga yema 12 ga norü ngúexũgü ga nadexũ. Rũ wüxi nixĩ ga Chimáũ ga Pedrugü naxüégaxũ. ¹⁷ Rũ togü nixĩ ga Chaũtiágu rũ naëneë ga Cuáũ. Rũ nümagü rũ Zebedéu nanegü nixĩ. Rũ Ngechuchu rũ Boanéregü nanaxüéga. Rũ ngëma nixĩ i Duruanexũ Nanegü —ñaxũchiga. ¹⁸ Rũ togü nixĩ ga Aũdré, rũ Piripi, rũ Baturumé, rũ Mateu, rũ Tumachi, rũ Chaũtiágu ga Arupéu nane, rũ Tadéu, rũ Chimáũ ga iporaëcüücü. ¹⁹ Rũ to nixĩ ga Yuda ga Icariüte ga yixcama bexma Ngechuchuxũ íxuaxũxũ.

Ngechuchuxũ nixugüe na ngoxoarü poramaã napuracüxũ (Mt 12.22-32; Lc 11.14-23, 12.10)

²⁰ Rũ yemawena rũ wüxi ga ñpatagu naxücu ga Ngechuchu. Rũ wenaxãrũ naxcèx nangutaquëxegü ga muxũma ga duũxũgü. Rũ yemacèx woo na nachibüexüçèx rũ nangechicagü ga nüma rũ norü ngúexũgü. ²¹ Rũ yexguma yemaxũ taxĩnüëgu ga guxema natanũxũgü ga Ngechuchu, rũ ítayadaugü na tayagagũxüçèx, yerü nüxũ tixugügü rũ: —Naxãũãëmare —ñanagürügü. ²² Rũ yexgumarüũ ta ga yema ngúexëëruũgü ga Moĩchearü mugüwa nguxëëtaegũxũ ga Yerucharéũwa ne íxũ, rũ ñanagürügü: —Ñãã yatü i Ngechuchu, rũ ngoxogünatü i Bechebúarü poramaã nixĩ i ínawoxũãxũ i ngoxogü —ñanagürügü. ²³ Natürü ga Ngechuchu rũ naxcèx naca ga yema ngúexëëruũgü. Rũ wüxi ga ore ga cuèxruũxũ namaã nixu, rũ ñanagürü: —¿Rũ ñuxãcü i Chataná i nügütama ínatèxüchixũ? ²⁴ —Rũ ngëxguma chi wüxi i nachiũãnecũãx i duũxũgü rũ nügütanũxũwatama nügü nadaixgu, rũ taxuacüma natai i ngëma nachiũãne. ²⁵ —Rũ ngëxguma chi wüxi ya ñpatacũãx nügü itoyegu, rũ taxuacüma natai ya yima ñpata. ²⁶ —Rũ ngëxgumarüũ chi ta nixĩ i Chataná ega nügümaã nanuxgu rũ nügü yamèxgu, rũ taxuacü chima natai i ngëxguma. Rũ chi ngëxma nagux. ²⁷ —Rũ taxuacüma texé wüxi ya yatü ya poracüpatagu

taxücu na nüxna tanapuxüxcèx i norü ngēmaxüğü, ega tama tayanèixiragu. Erü ngēmaäcücica tá nixĩ i tüxü nanguxüxü na tanapuxüxü i norü ngēmaxüğü. ²⁸ —Rü aixcüma pemaã nüxü chixu rü Tupana tá nüxü nüxü nangechaü i duüxüğü i guxüma i norü pecadugü rü guxüma i tacü i chixexü i namaã yadexagüxü. ²⁹ —Natürü texé ya chixexü namaã ixugüxe i Tupanaãe i Ünexü, rü tagutáma tüxü nüxü nangechaü ya Tupana. Rü guxügutáma chixexüwa tüxü natèx —ñanagürü. ³⁰ Rü yema ñanagürü ga Ngechuchu, yerü yema ngúexèèruüğü ga Moïchearü mugüwa nguxèètaegüxü rü: “Nangoxoãx” ñanagürüğü nüxü.

Ngechucharü mamá rü naēneēgüchiga
(Mt 12.46-50; Lc 8.19-21)

³¹ Rü yexgumayane rü ítangugü ga Ngechucharü mamá rü naēneēgü. Natürü ípataarü düxétügu tarücho, rü naxcèx yéma tangemagü. ³² Rü yema duüxüğü ga Ngechuchuxü íchomaēguächixü, rü ñanagürüğü nüxü: —Curü mamá rü cueneēgü rü cueyèxgü, rü yéa düxétüwa tangèxmagü, rü cuxcèx tadaugü —ñanagürüğü. ³³ Rü nüma nanangãxü, rü ñanagürü: —¿Texé tixĩ ya chaue rü chaueneēgü? —ñanagürü. ³⁴ Rü yema nüxü íchomaēguächixüxü nidaugüächi, rü ñanagürü: —Rü daxegü tixĩ ya chaue rü chaueneēgü. ³⁵ —Erü guxáma ya texé ya naxüxe i Tupanaärü ngúchaü, rü yíxema tixĩ ya chaueneē rü chaueyèx rü chaue —ñanagürü.

4

Ore ga toecügu ixuxü
(Mt 13.1-9; Lc 8.4-8)

¹ Rü wenaxärü inanaxüğü ga Ngechuchu ga na nangúexèèãxü ga duüxüğü ga guma naxtaxaãnacüwa. Rü muxüma ga duüxüğü yexma naxcèx nangutaquèxegü. Rü yemacèx düxwa wüxi ga ngue ga yéma naxtaawa yexmanegu nixüe ga Ngechuchu, rü gumawa narüto. Rü yema duüxüğü rü naxtaxaãnacügu narücho. ²⁻³ Rü yexguma ga Ngechuchu rü inanaxüğü ga muxüma ga ore ga cuèxruüwa na nangúexèèãxü ga duüxüğü. Rü norü nguxèètaewa rü ñanagürü: —¡Dücèx, íperüxĩnüe i ñaã ore! Wüxi ga yatü ga toecü rü triguarü towa naxü. ⁴ —Rü yexguma triguchiremaã nagüaneãgu, rü ñuxre ga triguchire rü namagu nayi. Rü ínangugü ga werigü, rü nanawecu. ⁵ —Rü náigü ga triguchire rü nutatanügu nayi ga ngextá ínachicaxüwa ga waixüümü. Rü paxa narüxüğü ga guma triguchire, yerü ga waixüümü rü tama nayaxcü. ⁶ —Natürü yexguma nangunagügu ga üexcü, rü ínanagu ga guma trigu rü narüñexgü. Rü nayue, yerü tama poraãcü nixãmaxã. ⁷ —Rü náigü ga triguchire rü toranecügu nayi. Rü yexguma nayaegu ga tora, rü guma triguxü inawocu, rü yemacèx tama nixo. ⁸ —Natürü náigü ga triguchire rü mexü ga waixüümügu nayi. Rü meãma nayae, rü muxüma ga trigu nawa ínanguxuchi. Rü nümaxüneyèxawa rü 30 püxü ínanguxuchi ga norü o, rü náigüwa rü 60, rü náigüwa rü 100 ínanguxuchi —ñanagürü. ⁹ Rü ñuxüchi ñanagürü ta: —Rü yíxema ächixègüxe, ¡rü nüxü taxĩnüe i ñaã ore! —ñanagürü.

Tacüchiga nixĩ ga yema ore ga cuèxruüğügu ixuxü
(Mt 13.10-17; Lc 8.9-10)

¹⁰ Rü yemawena ga yexguma nanüxcèxgu ga Ngechuchu, rü yema naxütagugüxü wüxigu namaã ga yema 12 ga norü ngúexüğü, rü nüxna nacagüe ga na tacüchiga yíxü ga yema ore ga cuèxruüğügu ixuxü. ¹¹⁻¹² Rü nüma nanangãxü rü ñanagürü nüxü: —Tupana rü pexü nüxü nacuèxèe i ngēma èxügüxü i taxüma i togü nüxü cuáxü na ñuxãcü äèxgacü na

yïxũ i nümax. Natürü ngēma togü i tama tatanüxũ ixĩxũcèx rü cuèxruũgu chayaxuãcüma namaã nüxũ chixu i ore na woo nüxũ nadaunügu rü ñoma tama nüxũ nadaugüxürüü na yïxũcèx, rü woo nüxũ naxĩnüègu rü tama nüxũ na nacuèxgüxũcèx. Rü ngēmaãcü namaã nüxũ chixu na tama nüxũ naxoexũcèx i nacüma i chixexũ rü tama Tupana nüxũ nüxũ ngechaũxũcèx i norü pecadugü —ñanagürü.

Ngechuchu rü meã nanangoxẽẽ ga yema ore ga cuèxruũ ga toecüchigagu ixuxũ

(Mt 13.18-23; Lc 8.11-15)

¹³ Rü Ngechuchu ñanagürü nüxũ: —¿Pema rü ta éxna tama nüxũ pecuèxgü na tacüchiga yïxũ i ngēma ore i cuèxruũ i nüxũ chixuxũ? ¿Rü ñuxücürüwa tá nüxũ nacuèxgü i ngēma togü? ¹⁴ —Rü yixema toexe, rü yixema tixĩ ya ore i mexũ unagüxe. ¹⁵ —Rü nangēxma i duũxũgü i guma triguchire ga namagu yixũnerüü ixĩgüxũ. Rü nümagü rü nüxũ naxĩnüè i ore i mexũ, natürü yixcama marü nüxũ naxĩnüèguwena, ngēma nangu i Chataná rü nüxna nanapu i ngēma ore i mexũ ga noxri yaxõgüxũ. ¹⁶ —Rü togü rü ngēma triguchire ga nutatanügu yixũnerüü nixĩgü. Rü ngēmagü nixĩ i nüxũ ñnüèxũ i ore i mexũ, rü taãèãcüma nayauxgüxũ. ¹⁷ —Natürü ngēma na tama aixcüma nagu naxĩnüèxũ i ngēma ore, rü paxaãchitama nayaxõgü. Rü ngēmacèx i yixcama ngēxguma ngēma oregagu guxchaxũgü nüxũ üpetügu rü éxna duũxũgü naxchi aiegu, rü nüxũ narüxoe i ngēma ore ga noxri yaxõgüxũ. ¹⁸⁻¹⁹ —Rü togü rü guma triguchire ga toranecügu yixũnerüü nixĩgü. Nümagü rü nüxũ naxĩnüè i ngēma ore i mexũ, natürü ñoma i naãneärü ngēmaxũgücèx naxoegaãègü rü norü dñeruguama narüxĩnüè, rü nanaxwèxegü i nüxũ na nangēxmaxũ i muxüma i to i norü ngēmaxũgü. Rü guxüma i ngēma rü nüxũ nüxũ inayarüngümaèxèè i ngēma ore i mexũ rü nüxũ nüxũ narüxoexèè na tama naxügüãxũcèx i ngēma mexũ i Tupana nüxũ naxwèxexũ. ²⁰ —Rü togü rü guma triguchire ga mexũ ga waixüümügu yixũnerüü nixĩgü. Ngēmagü nixĩ i nüxũ ñnüèxũ i ore i mexũ rü nayauxgüxũ rü meã Tupana naxwèxexũãcüma maxèxũ. Rü nümaxũ rü guma trigu ga 30 püxü nawa ínguxuchinerüü nixĩgü. Rü nümaxũ rü guma 60 püxü nawa ínguxuchinerüü nixĩgü. Rü nümaxũ rü guma 100 püxü nawa ínguxuchinerüü nixĩgü —ñanagürü.

Ore ga omügu ixuxũ

(Lc 8.16-18)

²¹ Rü yexgumarüü ta ñanagürü nüxũ: —¿Éxna nuã tanange i wüxi i omü na wüxi i caichãütüügu rü éxna wüxi i pechicatüügu na yaxücuchixũcèx? Tama ngēmaãcü nixĩ, erü wüxi i omü rü dauxnagu tanaxünagü na ngēma inabaxixũcèx. ²² —Rü ngēxgumarüü ta i guxüma i tacü iicúxũ, rü yixcúra rü duũxũgü rü tá nüxũ nacuèxgüama. Rü guxüma i ngēma ñuxma duũxũgücèx èxũgüxũ rü tá nangõxoma i yixcúra. ²³ —Rü yixema açhixègüxe, jrü nüxũ taxĩnüè i ngēma ore! —ñanagürü. ²⁴ Rü yexgumarüü ta ñanagürü nüxũ: —¿Meã naga pexĩnüè i ngēma nüxũ pexĩnüèxũ! Rü ngēma pema naga na pexĩnüèxürüü tá nixĩ i Tupana i pexna naxããxũ i cuèx. Rü naetü tá poraãcü pexũ narüngüxèè. ²⁵ —Rü pemaã nüxũ chixu, rü texé ya aixcüma naga ñnüèxè i ñaã ore i mexũ rü Tupana rü yexeraãcü tá tüxũ nüxũ nacuèxèè. Natürü yixema tama naga ñnüèxè i ñaã ore rü Tupana tá tüxna nanayaxu i ngēma íraxũ i cuèx i tüxũ ngēxmachiréxũ —ñanagürü.

Ore ga triguchire ga rüxüxũgu ixuxũ

²⁶ Rü Ngechuchu rü ñanagürü ta: —Pemaã tá nüxũ chixu i wüxi i ore i cuèxruũ na nüxũ pecuáxũcèx na ñuxãcü àèxgacü na yïxũ ya Tupana. Rü

wüxi ya yatü rü waixümügu nanato ya triguchire. ²⁷ —Rü nüma ya yatü rü chütacü nape rü moxüãcü ínarüda, rü yoxni ya yima triguchire rü narüxü rü niyachigü. Natürü nüma ya yatü rü tama nüxü nacuèx na ñuxãcü na naxüxü rü na nayaxü. ²⁸ —Rü ngẽmaãcü i ngẽma waixümü rü nüechamatama nanaxüxëe ya yima triguchire. Rü naätügüxira narüxü rü yixcama i nachacu rü ngẽmawena nachacuwa nanguxü i norü o. ²⁹ —Rü ngëxguma marü yadauxgu i ngẽma norü o, rü nanabuxu erü marü nawa nangu i norü buxgu —ñanagürü.

Ore ga motachachiregu ixuxü
(Mt 13.31-32; Lc 13.18-19)

³⁰ Rü ñanagürü ta ga Ngechuchu: —Rü Tupanaarü ore rü yexera nixüchigü ¿Rü nanaçacüraxü rü çacügu tanangu? ³¹⁻³² —Rü ñoma wüxi ya motachachire ya waixümügu itoxünerü nixi. Rü woo guxünema ya nanetüchirexü narüxíramaë, natürü ngëxguma inatoxgu, rü narüxü rü naya ñuxmata guxüma i togü i nanetüxü nayexera. Rü nachacüü rü nita, rü woo werigü rü natanügu nixüachiãü —ñanagürü.

Cuèxruügu ixuxü ga oremaã nidexa ga Ngechuchu
(Mt 13.34-35)

³³ Rü yemaãcü ga Ngechuchu rü muxüma ga nayexgumaãchiraüxü ga ore ga cuèxruügümaã nanangüexëe ga duüxügü. Natürü yema cuèxruügü rü tama yema duüxügüarü cuèxü nangupetü. ³⁴ Rü ore ga cuèxruügu ixuxüxícatama nixi ga norü nguxëetae. Rü yixcama ga yexguma nanüxícèxgügu, rü norü ngüexügüçèx meãma nanangoxëe ga guxüma.

Ngechuchu rü buanecüxü rü yuapexü ínayachaxãchixëe
(Mt 8.23-27; Lc 8.22-25)

³⁵ Rü yematama ngunexügu ga marü nachütachaügu, rü Ngechuchu rü ñanagürü nüxü ga norü ngüexügü: —¡Ngíxã rü naxtaxaarü tocutüwa taxí! —ñanagürü. ³⁶ Rü yexguma duüxügüna yéma inaxíãchi. Rü norü ngüexügü rü Ngechuchuxü nigagü nagu ga guma ngue ga marü nawa nayexmane. Rü yexgumarüü ta ga togü ga duüxügü rü náigü ga nguegügu ínayaxümücügü. ³⁷ Rü yexguma yaxãüyane rü inaxü ga wüxi ga buanecü ga taxüchicü. Rü yema na nataxüchixü ga buanecü, rü guma nguegu niyauxcuchichigü ga yuape, rü yexma nabaxügüchaü. ³⁸ Natürü ga Ngechuchu rü guma nguechinüwa wüxi ga cüxeruügu naca, rü yéma nape. Rü ínabaixgügü, rü ñanagürügü nüxü: —Pa Ngüexëeruüx, ¿éxna curü me nixi na nuxma ibaxügüxü? —ñanagürügü. ³⁹ Rü yexguma ínarüda ga Ngechuchu. Rü buanecüna nachogü rü ñanagürü nüxü ga guma naxtaxa: —¡lyarüchiane rü íyachaxãchi! —ñanagürü. Rü ínayachaxãchi ga buanecü rü guxüwama ínachaxanemare. ⁴⁰ Rü yemawena ga Ngechuchu rü norü ngüexügüxü ñanagürü: —¿Tüxcüü ngẽmaãcü poraãcü pemuë? ¿Ñuxma rü ta éxna tama aixcüma peyaxögü? —ñanagürü. ⁴¹ Natürü nümagü ga norü ngüexügü rü poraãcü namuë. Rü nügüna nacagüe rü ñanagürügü: —¿Texe éxna nixi ya daa rü èjxrucü ya buanecü rü yuape rü naga naxínüëxü? —ñanagürügü.

5

Yatü ga Gadaráciãx ga ngoxogü nawa yexmagüxü
(Mt 8.28-34; Lc 8.26-39)

¹ Rü naxtaxaarü tocutüwa nangugü ga Gadáranewa. ²⁻³ Rü yexguma marü nguewa ínaxüegu ga Ngechuchu, rü yéma naxcèx nixü ga wüxi ga yatü ga ngoxo nawa yexmaxü. Rü yema yatü rü duüxëgüchíquëxewa

ne naxũ, yerũ yexma nixĩ ga yanaxauchigũnaxũ. Rũ taxũexũma nanguxũ na tayanáixũ, woo cadenamaã. ⁴ Rũ woo muẽxpũxcũna cadenamaã nayanẽxparagũ rũ nayanẽxchacũgũ, natũrũ nũma rũ guxũguma íraxũgu inanacauũgũama, rũ yemaãcũ taxũexũma nanguxũ. ⁵ Rũ ngunecũ rũ chũtacũ rũ yuetachiquẽxetanũgu rũ naxpũxgũgu nanaxauchigũane. Rũ yexma nanacaeane, rũ nutamaã nũgũgu napogũ. ⁶ Natũrũ yexguma yaxũgutama Ngechuchuxũ nadẽuxgu, rũ naxcẽx inaãñaãchi, rũ napẽxegu nayacaxãpũxũ. ⁷ Rũ aita naxũãcũma ñanagũrũ nũxũ: —¿Tũxcũũ nuã choxũ cuyachixewe, Pa Ngechuchux, Pa Tupanaxũchi Nanex? Rũ Tupanaegagu cuxũ chacẽexũ na tama ngũxũ choxũ quingexẽexũ —ñanagũrũ. ⁸ Rũ yemaãcũ nidexa ga yema ngoxo yerũ Ngechuchu rũ marũ ñanagũrũ nũxũ: —Pa ngoxox, ¡inaxũxũ nawa ya yima yatũ! —ñanagũrũ. ⁹ Rũ yexguma ga Ngechuchu rũ nũxna naca, rũ ñanagũrũ: —¿Tacũ nixĩ i cuẽga? —ñanagũrũ. Rũ nũma ga ngoxo nanangãxũ, rũ ñanagũrũ: —Muxũchixũ nixĩ i chauẽga, erũ tamu i tomax —ñanagũrũ. ¹⁰ Rũ poraãcũ Ngechuchuxũ nacẽexũgũ na tama ínawoxũãxũcẽx ga yema naãnewa. ¹¹ Rũ yema nachicaarũ ngaicamana ga naxpũxpechinũwa rũ nayexmagũ ga muxũma ga cuchigũ ga yẽma chibũexũ. ¹² Rũ yemacẽx ga yema ngoxogũ rũ Ngechuchuxũ nacẽexũgũ, rũ ñanagũrũgũ: —¡Ngema cuchitanũwa toxũ namugũ na nagu tachocuxũcẽx! —ñanagũrũgũ. ¹³ Rũ Ngechuchu rũ: —Ngũ —ñanagũrũ. Rũ yexguma ga yema ngoxogũ rũ guma yatũwa ínachoxũ, rũ yema cuchigũgu nayachocu. Rũ yema cuchigũ ga wixgu 2000 ixĩgũxũ rũ inaxũãchi, rũ naxtaacutũarũ mẽxpũxũwa nayarũyuxgũ. Rũ yexma nayi. ¹⁴ Rũ yema cuchigũarũ dauruũgũ rũ íãnewa nabuxmũ. Rũ íãnewa rũ yema íãneãrũ ngaicamana ipeagũxũ ga duũxũgũtanũwa nũxũ nayarũxugũga ga yema ùpetũxũ. Rũ ga duũxũgũ rũ ínayadaugũ. ¹⁵ Rũ yexguma Ngechuchu íyexmaxũwa nangugũgu, rũ yẽma nũxũ nadaugũ ga guma yatũ ga ngoxoãxchirẽcũ. Rũ yẽma narũto, rũ naxãxchiru, rũ meãma naãẽxũ nacuẽx. Rũ poraãcũ nabaixãchiãẽgũ ga duũxũgũ. ¹⁶ Rũ yema cuchigũarũ dauruũgũ ga nũxũ daugũxũ ga tacũ na nũxũ ngupetũxũ ga guma yatũ ga ngoxoãxchirẽcũ rũ tacũ nũxũ na ngupetũxũ ga yema cuchigũ, rũ yema nixĩ ga togũ ga duũxũgũmaã nũxũ ixugũexũ ga guxũma ga yema ngupetũxũ. ¹⁷ Rũ yexguma yemaxũ naxĩnũẽgu ga duũxũgũ, rũ inanaxũgũe ga Ngechuchuxũ na nacẽexũgũxũ ga na ínaxũxũxũcẽx ga yema naãnewa. ¹⁸ Rũ yexguma wenaxãrũ ngegu yaxũegu ga Ngechuchu, rũ guma yatũ ga ngoxoãxchirẽcũ, rũ nũxũ nacẽexũ na Ngechuchuwe naxũxũcẽx. ¹⁹ Natũrũ ga Ngechuchu rũ tama nanaxwẽxe, rũ ñanagũrũ nũxũ: —¡Cuchiũwa naxũ rũ cutanũxũmaã nũxũ yarũxu i guxũma i ngẽma cuxcẽx naxũxũ ya Cori ya Tupana, rũ ñuxãcũ nũxũ na cungechaũtũmũũxũ! —ñanagũrũ. ²⁰ Rũ nũma ga guma yatũ rũ ínixũ. Rũ inanaxũgũ ga guxũma ga Decaporíchiuanewa yexmagũne ga íãnegũwa nũxũ na yaxuxũ ga yema Ngechuchu naxcẽx ùxũ. Rũ guxũma ga duũxũgũ rũ nabaixãchiãẽgũ.

Yáiruxacũchiga rũ yema nge ga Ngechuchuchirugu ingõgũcũchiga
(Mt 9.18-26; Lc 8.40-56)

²¹ Rũ yexguma ngegu naxtaxaarũ tocutũwa nataegugu ga Ngechuchu, rũ muxũma ga duũxũgũ rũ naxcẽx yẽma nangutaquẽxegũ. Rũ nũma rũ naxtaapechinũwa nayexma. ²² Rũ yexguma yẽma nayexmayane, rũ yẽma naxũtawana nangu ga ngutaquẽxepataũãrũ ãẽxgacũ ga Yáirugu ãegacũ. Rũ yexguma Ngechuchuxũ nadẽuxgu, rũ napẽxegu nanangũcuchi. ²³ Rũ poraãcũ nũxũ nacẽexũ, rũ ñanagũrũ nũxũ: —Chauxacũ rũ ituraxũchi. Rũ chanaxwẽxe i ngema cuxũ na ngĩxũ cuyarũngõgũxũcẽx na ngĩxcẽx yataanexũcẽx rũ namaxũxũcẽx —ñanagũrũ. ²⁴ Rũ yexguma ga Ngechuchu rũ nawe narũxũ.

Rü muxüma ga duüxügü ínayaxümücügü. Rü yéma nayaxüxtügü. ²⁵ Rü yema muxü ga duüxügütanüwa iyexma ga wüxi ga nge ga 12 ga taunecü idaawecü namaã ga na naxãgüechaxü. ²⁶ Rü muxüma ga duturugü ngixü naxüxügü rü poraãcü ngúxü ngixü ningexëëgü. Rü yemaãcü natüçexma ngixü iguxëë ga guxcü ga ngirü dïeru. Natürü tama ngixcèx nitaaneega, rü niyexeraguchigüama ga ngirü ðaawe. ²⁷ Rü üpaacü togüexwa Ngechuchuchigaxü ixinü. Rü yemacèx yéma ixü. Rü natanüwa ga yema muxüma ga duüxügü rü Ngechuchuweama ne ixü rü naxchirugu iyangögü. ²⁸ Yerü ñaxügu irüxinü: —Ngëxguma chi naxchiruxümare chingögügu, rü chi chauxcèx nitaane —ñaxügu irüxinü. ²⁹ Rü yexgumatama ínayachaxãchi ga ngigü, rü nüxü iyacuèxãchi ga ngixinewa ga na ngixcèx yataanexü. ³⁰ Natürü ga Ngechuchu rü nüxü nicuèxãchi ga na nawa ínaxütxü ga pora. Rü naxcèx nadauegu ga yema muxüma ga duüxügü, rü nüxna naca, rü ñanagürü: —¿Texé tixí ya chauxchirugu ingögüxe? —ñanagürü. ³¹ Rü norü ngüexügü nanangãxügü, rü ñanagürügü: —Cuma nüxü cudau i ñuxre i duüxügü ngema cuxü na yaxütügüxü rü ngëxguma rü ta:

“¿Texé ya choxü ingögüxe?” ñacuxü —ñanagürügü. ³² Natürü ga Ngechuchu rü nüxü nidaugüãchiana na tüxü nadauxcèx ga na texé na tixü ga guxema nüxü ingögüxe. ³³ Rü yexguma ga yema nge rü ngirü muümaã yaduruxãcüma naxütawa ingu, yerü nüxü icuèx ga tacü na ngixü ngupetüxü. Rü napëxegu iyacaxãpüxü, rü aixcümamaxüchi namaã nüxü iyaxu ga guxüma. ³⁴ Rü nüma ga Ngechuchu rü ñanagürü ngixü: —Pa Chauxacüx, curüme erü cuyaxõ. ¿Rü taãëãcüma íixü, erü marü naxüxü i curü ðaawe! —ñanagürü. ³⁵ Rü yexguma íyadexayane, yéma nangugü ga ñuxre ga natanüxügü ga guma ngutaquëxepataüãrü ãëxgacü rü ñanagürügü nüxü: —Cuxacü rü marü iyu. ¿Tüxcüü nüxü cuchixeweëcha ya Ngüexëëruü? —ñanagürügü. ³⁶ Natürü ga Ngechuchu rü tama nüxü nacuáxchaü ga yema duüxügüarü dexa. Rü yemacèx guma ngutaquëxepataüãrü ãëxgacüxü ñanagürü: —¿Tãxü i cumüxü, rü yaxõmare! —ñanagürü. ³⁷ Rü yexguma ga Ngechuchu rü ínayagagü ga Pedru rü Chaütiágu rü Cuáü ga Chaütiágueneë. Natürü tama nanaxwëxe na texé ga togue nawe rüxixü. ³⁸ Rü yexguma guma ngutaquëxepataüãrü ãëxgacüpatawa nangugügu, rü Ngechuchu nüxü nadau ga na íyacuxcuxü rü poraãcü aita naxüëãcüma naxauxexü ga duüxügü. ³⁹ Rü guma ípatagu naxücu ga Ngechuchu, rü ñanagürü: —¿Tüxcüü ípicuxcu rü ngëmaãcü pexauxe? Ngëma bucü rü tama iyu. Rü ipemare —ñanagürü. ⁴⁰ Rü nüxü nacugüecüraxüãma ga duüxügü. Natürü nüma ga Ngechuchu rü íãxtüwa nanamugü ga guxüma. Rü yema bucünatüçèx naca rü ngië, rü yema namücügü, rü namaã nixücu ga ínayexmaxüwa ga yema bucü. ⁴¹ Rü ngixmëxgu nayayauxãchi, rü ñanagürü ngixü: —Tarita cumi —ñanagürü. Rü ngëma ore rü ñaxüchiga nixí:

“¿Inachi, Pa Bucü, ñacharügü cuxü!” ñaxüchiga nixí. ⁴² Rü yexgumatama ga yema bucü ga 12 ga taunecü ngixü yexmëxcü, rü íirüda rü iyaxü. Rü poraãcü nabaixãchiãëgü ga duüxügü. ⁴³ Natürü ga Ngechuchu rü poraãcü nüxna nanachuxu na taxüemaãma nüxü yaxugüexüçèx ga yema ngupetüxü. Rü ñuxüchi nanamu na ngixü naxüwemügüxüçèx ga yema bucü.

6

Nacharétuwa nayexma ga Ngechuchu (Mt 13.53-58; Lc 4.16-30)

¹ Rü yéma inaxüãchi ga Ngechuchu, rü guma íãne ga Nacharétu ga nawa nayaxünewatama naxü. Rü norü ngüexügü rü nawe narüxí. ² Rü yexguma ngüxchigaarü ngunexüwa nanguxgu rü inanaxügü ga na nangüexëëtaexü ga

ngutaquẽxepataũwa. Rũ yema muxũma ga duũxũgũ ga yema irũxĩnũẽxũ, rũ nabaixãchiãẽgũ. Rũ nũgũna nacagũe rũ ñanagũrũgũ: —¿Ngextá naxcèx nangux i guxũma i ngẽma nguxẽẽtae? ¿Rũ ngextá nanayaxu i ngẽma cuèx? ¿Rũ ñuxãcũ nanaxũ i ngẽma mexũgũ i taxũgũ i naxũxũ? ³ —¿Taux õxna ñaã yĩxũ i carpinteru i Ngechuchu, i Mariane, ya Chaũtiágu rũ Yúche rũ Chimáũ rũ Yudaẽneẽ ixĩcũ? ¿Rũ taux õxna i naẽyèxgũ rũ nuxma tatanũgu naxãchiũgũxũ? —ñanagũrũgũ. Rũ yemacèx ga yema duũxũgũ rũ tama naga naxĩnũechaũ. ⁴ Natũrũ ga Ngechuchu rũ ñanagũrũ nũxũ: —Wũxi i Tupanaãrũ orearũ uruũ rũ guxũwama i duũxũgũ rũ nũxũ nangechaũgũ. Natũrũ norũ ãñewatama rũ natanũxũgũtanũwatama rũ napatawatama rũ tama aixcũma nũxũ nangechaũgũ —ñanagũrũ. ⁵ Rũ yemacèx taxuacũma yema nanaxũ ga muxũma ga mexũgũ ga Tupanaãrũ poramaã naxũxũ. Rũ noxretama ga duũxũgũ ga idaaweexũxũĩcatama ningõgũ rũ naxcèx nayataanexẽẽgũ. ⁶ Rũ nabaixãchiãẽ ga Ngechuchu, yerũ yema duũxũgũ rũ tama nũxũ nayaxõgũ.

Ngechuchu rũ norũ ngũexũgũxũ nimugũ na nũxũ yanaxugũexũcèx ga Tupanachiga

(Mt 10.5-15)

Rũ Ngechuchu rũ guma ngaicamagũne ga ãñexãcũgũgu nixũgũchigũ, rũ nayangũexẽẽtanũ ga duũxũgũ. ⁷ Rũ naxcèx naca ga yema 12 ga norũ ngũexũgũ, rũ inanaxũgũ ga na namuãxũ ga taxrechigũ. Rũ nũxna nanaxã ga pora na ínawoxũãxũcèx ga ngoxogũ. ⁸ Rũ nũxna naxãga ga na taxuxũma íyangegũxũcèx ga norũ namawaxũ, rũ bai ga choca rũ bai ga pãũ rũ bai ga norũ díeru. Rũ nanaxwèxe ga naxnetũxũĩcatama na íyangegũxũ. ⁹ Rũ namaã nũxũ nixu na nacuaixcuxũ ga norũ chapatu. Natũrũ tama nanaxwèxe ga taxre ga naxchiru na íyangegũxũ. ¹⁰ Rũ ñanagũrũ nũxũ: —Rũ ngẽxguma wũxi ya ãñewa wũxi ya ãgu pechocuxgu, ¡rũ ngẽxma pepegu ñuxmata pema ñuxgu ngema ipexĩãchix nawa ya yima ãñe! ¹¹ —Rũ ngẽxguma ngexnerũũne ya ãñewa tama meã pexũ nayauxgũchaũgu rũ tama pexũ inaxĩnũechaũgu, ¡rũ ípechoxũ i ngema! Rũ ngẽxguma ipexĩãchigu, ¡rũ ipenapagu i perũ ùxaxũcutũ na ngẽmawa nũxũ nacuèxgũxũcèx na nataxũchixũ tá i norũ poxcu i ngẽxguma naguxgu i naãne! —ñanagũrũ. ¹² Rũ yexguma inaxĩãchi ga norũ ngũexũgũ. Rũ duũxũgũmaã nũxũ nixugũe ga na nũxũ naxoexũcèx ga nacũma ga chixexũ rũ Tupanacèx na nadaugũxũcèx. ¹³ Rũ ínanawoxũ ta ga muxũma ga ngoxogũ. Rũ chixũmaã yachagũãcũma nanameẽxẽẽ ga muxũma ga idaaweexũ.

Nayu ga Cuáũ ga baiũxẽẽruũ

(Mt 14.1-12; Lc 9.7-9)

¹⁴ Rũ Ngechuchuchigaxũ naxĩnũ ga ãẽxgacũ ga Erode, yerũ guxũwama duũxũgũ poraãcũ nachiga nidexagũ. Rũ yexguma ga Erode rũ ñanagũrũ: —Rũ ngẽma Ngechuchu nixĩ i Cuáũ i baiũxẽẽruũ ixĩxũ rũ wena namaxũ, rũ ngẽmacèx nixĩ i nũxũ nangẽxmaxũ i pora na naxũãxũcèx i ngẽma taxũ i mexũ i Tupanaãrũ poramaã naxũxũ. ¹⁵ Natũrũ ga togũ rũ ñanagũrũgũ: —Nuxcũmaũcũ ga orearũ uruũ ga Ería nixĩ —ñanagũrũgũ. Rũ togũ rũ ñanagũrũgũ: —Wũxi i Tupanaãrũ orearũ uruũ i nuxcũmaũgũxũrũũ nixĩ —ñanagũrũgũ. ¹⁶ Natũrũ yexguma yemaxũ naxĩnũgu ga Erode, rũ ñanagũrũ: —Rũ ngẽma Ngechuchu nixĩ i Cuáũ ga chorũ churaragũxũ chidayenaxãxẽẽchiréxũ, rũ ñuxma rũ wenaxãrũ namaxũ —ñanagũrũ. ¹⁷ Rũ yema ñanagũrũ ga Erode yerũ marũchiréx Cuáũxũ niyaxu rũ poxcupataũgu cadenamaã nayachota. Rũ yemaãcũ nanaxũ ngĩgagu ga naxmèx ga Erodía ga naẽneẽ ga Piripimèxchiréx ixĩcũ ga ngĩxũ napucũ ga Erode. ¹⁸ Yerũ ùpaacũ ga Cuáũ rũ Erodemaã ñanagũrũ: —Tama name i cuxmèxũ cuyaxĩxẽẽ

i cueneēmèx —ñanagürü. ¹⁹ Rū yemacèx ga Erodía rü poraäcü Cuáüchi ixai rü inaxwèxe ga na yamáãxü, natürü poraäcü ngixü naguxcha. ²⁰ Yerü ngite ga Erode rü Cuáüxü namuü, yerü nüxü nacuèxchirèx na wüxi ga yatü ga mecü rü üüncü na yixü, rü yemacèx nixi ga naetüwa nachogüxü. Rü yexguma Cuáüärü orexü naxinügu ga Erode, rü naxoegaäe, natürü meä nüxü inarüxinü. ²¹ Natürü wüxi ga ngunexü nawa nangu na ngixü natauxchaxü na yamáãxücèx ga Cuáü, ga yexguma Erodearü taunecüarü ngunexüwa nanguxgu rü wüxi ga peta ga taxü naxüxgu naxcèx ga norü ñatügumaëgüxü ga äëxgacügü, rü norü churaragüarü äëxgacügü rü yema Gariréaanecüäx ga corigü ga taxügü. ²² Rü yema petawa iyaxücu ga Erodíaxacü, rü yema petatanüxpèxewa íyañaächixüchigüxü. Rü poraäcü norü me iyixi ga Erode rü norü petatanüxügü. Rü yemacèx ga nüma ga äëxgacü ga Erode rü ñanagürü ngixü ga yema pacü: —¡Choxna naxcèx naca i tacü i cunaxwèxexü, rü tá cuxna chanaxã! —ñanagürü. ²³ Rü aixcümáxüchi ngímaã inaxuneta, rü ñanagürü: —Ngèxürüxü i tacü i choxna naxcèx cuçaxü rü tá cuxna chanaxã, woo ngäxügu i chorü naäne yixigu —ñanagürü. ²⁴ Rü nüxna iyaxügachi, rü ngiëna iyaca, rü ngigürügü: —¿Tacü i cunaxwèxexü na naxcèx íchaçaxü? —Ngigürügü. Rü ngië ngixü ingäxü, rü ngigürügü: —¡Naxcèx ínaca i Cuáü ya baiüxëëruüëru! —ngigürügü. ²⁵ Rü yexgumatama ga yema pacü rü paxa iyaxücu ga äëxgacüxütawa rü ngigürügü: —Chanaxwèxe i ñuxmatama paxa wüxi ya poratugu choxna cunaxã i Cuáü ya baiüxëëruüëru —ngigürügü. ²⁶ Rü nüma ga äëxgacü rü poraäcü inayarümaächi, natürü yema norü petatanüxpèxewa marü ngímaã na inaxunetaxücèx, rü tama ngixü nawomüxëëchaü. ²⁷ Rü yemacèx ga Erode rü yexgumatama yéma ínapoxcuxüwa nanamu ga wüxi ga churara na naxütawa nangeaxücèx ga Cuáüëru. ²⁸ Rü poxcupataüwa naxü ga yema churara, rü Cuáüxü nidaeru. Rü wüxi ga poratugu äëxgacüxütawa nanange ga yema naëru. Rü yema pacüna nanaxã. Rü ngíma rü ngiëna iyaxã. ²⁹ Rü yexguma yemaxü nacuéachigagügu ga norü ngüexügü ga Cuáü, rü yéma poxcupataüwa nayayauxgü ga naxüne, rü inayatèxgü.

*Ngechuchu rü nanachibüexëë ga 5000 ga yatügü
(Mt 14.13-21; Lc 9.10-17; Cu 6.1-14)*

³⁰ Rü yemawena rü yema norü ngüexügü ga yamugüxü rü Ngechuchumaã nangutaquèxegü. Rü namaã nüxü nixugüe ga guxüma ga yema naxügüxü rü yema nangüxëëtaegüxü. ³¹ Rü Ngechuchu rü ñanagürü nüxü: —¡Nuã pexi, rü ngixã, wüxi i nachica i ngextá taxúema íxãpataxüwa taxí, na paxaächi ngèxma yarüngügüxücèx! —ñanagürü. Rü yema ñanagürü yerü namu ga duüxügü ga yéma ingügütanücüxü rü woeguxü ga togü. Rü yemacèx ga Ngechuchu rü norü ngüexügü rü woo na nachibüexücèx rü nangechicagü. ³² Rü yemacèx wüxi ga nguëgu nichoü, rü noxrüwama wüxi ga nachica ga taxúema íxãpataxüwa naxí. ³³ Natürü muxüma ga duüxügü nüxü nadaugü ga yexguma inaxiãchigu, rü nüxü nacuèxgü ga texégü na yixü. Rü yemacèx guxüne ga guma ñänegücüäx ga duüxügü, rü dauxchitagu nibuxmü rü napèxegu nayayi. ³⁴ Rü yexguma nguëwa ínaxüegu ga Ngechuchu, rü nüxü nadau ga yema muxüma ga duüxügü. Rü nüxü nangechaütümüügü yerü ñoma carnerugü ga ngearü dauruüäxgüxürüü nixigü. Rü inanaxügü ga na nangüexëëãxü ga muxüma ga norü ore. ³⁵ Rü yexguma marü nayáuanegu, rü norü ngüexügü rü naxcèx naxí, rü ñanagürügü: —Marü nayáuanexüchi rü ñaã rü wüxi i nachica i taxúema nagu äpataxü nixí. ³⁶ —Rü ngëmacèx name nixí i ícuyamugü i duüxügü na namapechinüwa ipeagüxü i duüxügüxütawa

rü ñānexācūgü ya ngaicamagūnewa naxīxūcèx na ngema norü ònacèx yatax-egūxūcèx —ñānagürügü. ³⁷ Natürü ga Ngechuchu rü nanangāxū, rü ñānagürü nüxū: —¡Pematama penaxüwemü! —ñānagürü. Rü nümagü nanangāxūgü rü ñānagürügü: —¿Ēxna cunaxwèxe i 200 tachinü i dīeru naguxū i pāücèx nüxū tayataxexū na ngēmamañ tanachibüexēxūcèx? —ñānagürügü. ³⁸ Rü yexguma ga Ngechuchu rü ñānagürü nüxū: —¿Ñuxre i pāü pexū nangēxma? ¡Rü İpeyadēux! —ñānagürü. Rü yexguma İyadaugūāgu, rü ñānagürügü nüxū: —Toxū nangēxma i wūximēxpūx i pāü rü taxre i choxni —ñānagürügü. ³⁹ Rü yexguma ga Ngechuchu rü duūxūgūxū namu na ñuxrechigü nügūxūtawa rütogūxūcèx ga maxētēxewa. ⁴⁰ Rü İnarütogü ga 100 chigü rü 50 chigü ga duūxūgü. ⁴¹ Rü yexguma ga Ngechuchu rü nanade ga yema wūximēxpūx ga pāü rü yema taxre ga choxni. Rü daxūguxū ga naānegu nadawenüācūma Tupanana moxē naxā. Rü inanabūcu ga yema pāü, rü norü ngúexūgūna nanana na yema duūxūgūxū yanūāxūcèx. Rü yema taxre ga choxni rü ta guxūma ga yema duūxūgūxū nüxū nayanuxē. ⁴² Rü guxūma nachibüe ñuxmata meāma nüxū yangu. ⁴³ Rü yemawena rü 12 ga pexchigü nanapagūamatama namañ ga yema pāü rü choxni ga İyaxūgūxū. ⁴⁴ Rü yema yéma pāügü ngōxgūxū rü 5000 ga yatügü nixī.

Dexáétügu nixū ga Ngechuchu
(Mt 14.22-27; Cu 6.16-21)

⁴⁵ Rü yemawena ga Ngechuchu rü duūxūgūxū İyamugūyane rü wūxi ga nguogu nayachoūxē ga norü ngúexūgü na yoxni naxtaxaarü tocutüwa Bechaídawa naxīxūcèx. ⁴⁶ Rü yexguma duūxūgūxū İyamugūguwena, rü mēxpūnewa naxū ga Ngechuchu na yéma yayumūxēxūcèx. ⁴⁷ Rü yexguma marü nachūtagu, rü naxtaxaarü ngāxūtüwa nayexmagü ga norü ngúexūgü. Rü Ngechuchu rü nüxīcatama dauxchitawa nayaxūāchi. ⁴⁸ Rü nüxū nadau na guxchaxūācūma yaxāgūxū ga norü ngúexūgü, yerü ga buanecü rü nawaama nabuxuchi. Rü yexguma marü yangunechaūgu, rü Ngechuchu rü dexáétügu nawe narūxū. Natürü ñoma nüxū naxūpetüchaūxūrü nügü nixīxē. ⁴⁹⁻⁵⁰ Rü yexguma norü ngúexūgü nüxū daugügu ga dexáétügu na yaxūxū, rü nagu narūxīnūē ga wūxi ga naxchiximare na yīxū. Rü yemacèx aita naxūe, yerü guxūma nüxū nadaugü rü poraācū nañaxāchiāēgü. Natürü yexgumatama ga Ngechuchu rü namañ nidexa rü ñānagürü nüxū: —¡Peprae! Rü chomachirēxtama chixī. ¡Tāxū i pemuūxū! —ñānagürü. ⁵¹⁻⁵² Rü nguogu nixūe, rü inarūxó ga buanecü. Natürü nümagü ga norü ngúexūgü rü nañaxāchiāēgūmare yerü woo nüxū na nadaugūxū ga yema mexū ga Tupanaärü poramañ naxūxū ga Ngechuchu ga yexguma yema pāü yamuxēēgu, natürü tama nüxna nacué x-āchie na Tupana Nane na yīxū yerü nüxū naguxcha na yaxōgūāxū.

Yenecharétuanewa Ngechuchu nanameēxē ga İdaaweexū
(Mt 14.34-36)

⁵³ Rü yexguma marü yangūgu ga naxtaawa, rü Yenecharétuanewa nangugü. Rü yexma naxānacūgu nanangaxūgü ga naweū. ⁵⁴ Rü yexguma nguowa İnachoūgu, rü yexgumatama ga duūxūgü rü nüxū nicuēxāchitanü ga Ngechuchu na yīxū. ⁵⁵ Rü yema naānewa rü guxūne ga İgūwa nabuxmü ga yema duūxūgü. Rü yexguma nüxū nacuéxgūgu ga ngextá na nayexmaxū ga Ngechuchu, rü yéma norü caruūgūgu naxcèx nanagagü ga İdaaweexū. ⁵⁶ Rü guxūwama ga ngextá İyanguchigūxūwa ga Ngechuchu, ga ñānexācūgūwa rü ñānegü ga itaxūnewa, rü ñānepechinūwa, rü yexma İtamūpechinūgu naxcèx nayamugü ga İdaaweexū. Rü nüxū nacèxūgü na tama nüxna nachūxāxūcèx

na naxchirupechinügumare yangögügüxcèx. Rù guxüma ga yema nüxü ingögüexü, rù naxcèx nitaanegü.

7

Tacü nixi i Tupanapëxewa duixügüxü chixexëexü (Mt 15.1-20)

¹ Rù Ngechuchucèx naxi ga Parichéugü namaã ga ñuxre ga ngüexëëruügü ga mugüwa nguxëëtaegüxü ga Yerucharéüwa ne ìxü. ² Rù yexguma ñuxre ga Ngechuchuarü ngüexügüxü nadaugügu ga tama Yudiügücüma na yanguxëëgüxü, rù tama Yudiügü yauxmëxgüxürüü na nayauxmëxgüxü naxüpa na nachibüexü, rù chixri nachiga nidexagü. ³ Yerü nümagü ga Parichéugü rù guxüma ga togü ga Yudiügü rù nagu naxi ga norü oxigücüma na nayauxmëxiraxü na yemaãcü Tupanapëxewa nügü yamexëëgüxü naxüpa ga na nachibüexü. ⁴ Rù ngëxguma taxepataüwa ne naxixgu ga nümagü rù tama nachibüe ega tama ngëmaãcü nügü nayauxmëxiragu. Rù nangëxma i muxüma i togü i nuxcümaüxü i nacümagü. Rù ngëmacèx nagu naxi i ngëma nacümagü na Tupanacèx nayauxgüãxü i norü pochiyugü rù basugü rù paneragü rù pechicaxügü. ⁵ Rù yemacèx ga yema Parichéugü rù ngüexëëruügü rù Ngechuchuna nacagü, rù ñanagürügü: —¿Tüxcüü i curü ngüexügü i tama nagu naxixü i ngëma tórü oxigücüma rù tama toma tayauxmëxgüxürüü nayauxmëxgüxü naxüpa na nachibüexü? —ñanagürügü. ⁶ Natürü Ngechuchu nanangãxü rù ñanagürü: —Pa Duixügü ya Pegü Naxaixcümarãügüxe, rù aixcüma pechiga nixi ga yema ore ga nuxcümaücü ga Tupanaãrü orearü uruü ga Ichaxía ümatüxü ga ñaxü:

“Ñã duixügü rù naãxmaãmare choxü nicuëxüügü, natürü naãëwa rù tama chaugu narüxinüë. ⁷ Rù taxuwama name na ngëmaãcü natücèxma choxü yacuëxüügüxü. Erü guxüma i ngëma norü nguxëëtae rù yatügüarü mugümare nixi, rù tama aixcüma chorü mu nixi”, ñaxü. ⁸ —Rù pema i ñuxma rù aixcüma nüxü perüxoe i Tupanaãrü mugü na nagu pexixücèx i ngëma duixügücümamare ixixü —ñanagürü. ⁹ Rù yexgumarü ta ñanagürü nüxü: —Pema rù penangexrü i Tupanaãrü mugü na pecümagügutama pexixücèx. ¹⁰ —Yerü ga Moïché rù ñanagürü: “¡Tüxü nangechaü ya cunatü rù cue!”

ñanagürü. Rù ñanagürü ta:

“Texé ya tümanatümaã rù ëxna tümaëmaã chixexü ixugüxe, rù ãëxgacü tá tümamaã nanaxuegu na tayuxücèx”,

ñanagürü. ¹¹ —Natürü pema rù ñaperügügü:

“Marü name ega wüxi ya yatü nanatüxü rù naëxü ñaxgu: ‘Taxucürüwama chorü ngëmaxümaã cuxü charüngüxëë, erü guxüma i chorü ngëmaxü rù marü Tupanana chanaxã’,” ñaxgu. ¹² —Rù ngëxguma texé ngëma ñagügu, rù pexcèx rù marü namexü na tama tümanatüxü rù tümaëxü tarüngüxëëxü. ¹³ —Rù ngëmaãcü ipeyanaxoxëë i Tupanaãrü mugü, na nagu pexixücèx i pecümagütama i togüwa pexüexëëxü. Rù ngëxgumarü ta muxüma i to i pecümagü i ngëmarü ixixügu pexi —ñanagürü. ¹⁴ Rù yexgumawena duixügücèx naca ga Ngechuchu, rù ñanagürü nüxü: —¡Meã choxü iperüxinüë, rù nüxü pecuá i ñãã chorü ore! ¹⁵ —Rù taxuüma i tacü i düxëtüwa ne üxü rù taëxwa ixücuxü nixi i Tupanapëxewa tüxü chixexëëxü. Natürü ngëma taãëwa ne üxü, rù ngëma waxi nixi i tüxü chixexëëxü i Tupanapëxewa.

¹⁶ —Rù ngëxguma pixächixëgu, ¡rù nüxü pexinüë i ngëma ore! —ñanagürü.

¹⁷ Rù yexguma Ngechuchu duixügüna ixügachigu rù ñpatagu naxücuxgu, rù norü ngüexügü nüxna nacagü nachiga ga yema nguxëëtae. ¹⁸ Rù nüma rù

ñanagürü nüxü: —¿Pema rü ta éxna tama nüxü pecuèxéga i ngēma? ¿Éxna tama i nüxü pecuáxü na taxuüma i tacü i düxétüwa ne üxü rü taèxwa ixücuxü yïxü i Tupanapëxewa tüxü chixexëëxü? ¹⁹ —Erü guxüma i ngēma düxétüwa ne üxü rü taèxwa ixücuxü, rü tama taäëwa nangu. Natürü taanüwa naxümare na yixcama taxünewa ínaxüxüxcèx —ñanagürü. Rü yemaäcü nüxü nixu na guxüma i òna rü namexü na nangõxü. ²⁰ Rü ñanagürü ta: —Rü ngēma duüxüäëwa ne üxü, rü ngēma waxi nixi i Tupanapëxewa nachixexëëxü. ²¹⁻²² —Erü norü aixepewa i naäëwa nixi i ne naxüxü i muxüma i chixexügu. Rü ngēma nixi i chixexügu na naxinüxü, rü naxüneärü ngüchaüwe na naxüxü, rü na nangixü, rü na namáëtaxü, rü naí i ngemaä na inapexü, rü togüarü ngēmaxü na nüxü nanguchaüxü, rü chixexü na naxüxü, rü na yadoratèxáxü, rü chixexü i nacümagügu na naxäüxü, rü na yaxäüxächiwèxexü, rü na nax-oregütèxáxü, rü nügü na yacuèxüüxü, rü tama meä naäëxü na nacuáxü. ²³ —Rü guxüma i ngēma chixexügu rü duüxüärü aixepewa nixi i ne naxixü, rü ngēma nixi i Tupanapëxewa nachixexëëxü —ñanagürü.

*Wüxi ga ngecü ga to ga nachiuñanecüñax ga Ngechuchuaxü yaxöcüchiga
(Mt 15.21-28)*

²⁴ Rü yemawena rü ñäne ga Tiru nawa yexmaxü ga naänewa naxü ga Ngechuchu. Rü yéma wüxi ga ñpatawa nangu, natürü tama nanaxwèxe na texé nüxü cuáxü ga yéma na nanguxü. Natürü taxuacüma nügü inicux. ²⁵ Rü paxama nüxü icuáchiga ga wüxi ga nge ga ngixäcüwa ngoxo yexmèxcü. Rü yéma ixü, rü Ngechuchupëxegu iyacaxápüxü. ²⁶ Rü yema nge rü to ga nachiuñanecüñax ga Chiropeníchiucüñax iyixi. Rü Ngechuchucèx iyaxü, rü nüxü icèèxü na ngixäcüwa ínatèxüchiäxüxcèx ga yema ngoxo. ²⁷ Natürü ga Ngechuchu rü ñanagürü ngixü: —Name nixi i taxacügüxüxira tachibüexëë. Erü tama name i taxacügüna tanayaxu i norü òna na airügüna naxäxüxcèx —ñanagürü. [Rü yema ñanagürü yerü nümagü ga Yudíugü rü nügü nixugüe na Tupanaxäcügüxüchi yixigüxü rü yema togü rü ñoma airügürü na yixigüxü.] ²⁸ Natürü ngima ga yema nge rü inangäxü, rü ngigürügü: —Aixcüma nixi i curü ore, Pa Corix, natürü woo airügü rü ta nanangõx i ngēma ònatüchi i mechatüügu nayixëëxü i ngēma ñpataarü yoraxacügü —ngigürügü. ²⁹ Rü yexguma ga Ngechuchu rü ñanagürü ngixü: —Aixcüma name nixi i ngēma nüxü quixuxü. Rü marü name i cutaegu, erü ngēma ngoxo rü marü ínaxüxü ngiwa i cuxacü —ñanagürü. ³⁰ Rü yexguma ngipatawa nanguxgu ga yema ngecü, rü yema ngirü ngürücarewa ngixü iyanguéü ga ngirü bucü. Natürü marü ngixna ínaxüxü ga yema ngoxo.

Ngechuchu nanamexëë ga wüxi ga yatü ga ngauchixëcü rü moxücü

³¹ Rü Tiruanewa nataegu ga Ngechuchu. Rü Chidäüärü ñänewa naxüpetü, rü ñuxüchi Decaporíchiuaneärü ñänegüwa rü ta naxüpetü rü ñuxmata Gariréaaneärü naxtaawa nangu. ³² Rü yéma naxütawa nanagagü ga wüxi ga yatü ga ngauchixëcü rü moxücü, rü nüxna naxcèx nacagü ga nüxü na yangögüxüxcèx. ³³ Rü yexguma ga Ngechuchu rü noxrüwama duüxügüna nanaga. Rü naxmachixëgu nixuxmëx, rü naxbüxágümaä nügü yawaixmëxëëäcüma norü conügu ningögü. ³⁴ Rü yemawena rü daxü nadawenüäcüma yaxna narüngü, rü guma yatüxü ñanagürü: —Epéta —ñanagürü. Rü ngēma rü: “¡Ingoxna!” ñaxüchiga nixi. ³⁵ Rü yexgumatama ningoxnamachixë ga guma ngauchixëcü, rü norü conü rü marü narüme rü meä nidexa. ³⁶ Rü Ngechuchu rü duüxügüxü namu na taxüemaäma nüxü yaxugüexüxcèx. Natürü yexguma yexeraäcü duüxügüna nachüxägu ga na taxüemaäma nüxü yaxugüexüxcèx ga nachiga rü yexeraäcü nüxü nixugüeama.

³⁷ Rū poraãcū nabaixãchiãëgü ga duũxügü, rü ñanagürügü: —Meãma nanaxü i guxüma rü woo ngauchixëgüxü rü nayangoxnamachixëgüxëë, rü ngeëxgüxü rü nayadexagüxëë —ñanagürügü.

8

Ngechuchu nanachibüexëë ga 4000 ga duũxügü (Mt 15.32-39)

¹ Rū wüxi ga ngunexügu wenaxãrū naxcèx naxĩtaquëxe ga muxüma ga duũxügü, rü nüxü nataxuma ga norü õnagü. Rū Ngechuchu rü norü ngúexügücèx naca, rü ñanagürü nüxü: ² —Choxü nangechaütümüügü i ñãã duũxügü, erü marü tomaëxpüx i ngunexü nuã chauxütawa nangëxmagü, rü nataxuma i nawemü i nangoxgüxü. ³ —Rü ngëxguma chi ngëmaãcümare íchayamugügu, rü chi ngürüãchi namagu tá nayaturae, erü nümaxügü rü yaxüwama ne naxĩ —ñanagürü. ⁴ Rū norü ngúexügü rü nanangãxügü, rü ñanagürügü: —¿Natürü ñuxãcü tá tanachibüexëë i núma i ngextá taxúema íxãpataxüwa? —ñanagürügü. ⁵ Rū Ngechuchu nüxna naca, rü ñanagürü: —¿Ñuxre i pãü pexü nangëxma i pemax? —ñanagürü. Rū nümagü nanangãxügü, rü ñanagürügü: —Toxü nangëxma i 7 i pãü —ñanagürügü. ⁶ Rū ñuxüchi ga Ngechuchu rü duũxügüxü namu na ñaxtüanewa natogüxücèx. Rū nanade ga yema 7 ga pãü, rü Tupanana moxë naxã. Rū ñuxüchi inanabücu, rü norü ngúexügüna nanana. Rū nümagü rü duũxügüxü nayanu. ⁷ Rū nüxü nayexma ta ga ñuxre ga choxnixãcügü. Rū Ngechuchu rü Tupanana moxë naxã, rü ñuxüchi norü ngúexügüxü namu na iyanuãxücèx. ⁸ Rū guxüma ga yema duũxügü rü meãma nachibüe ñuxmata meã nüxü yangu. Rū yexguma rü ta 7 ga pexchi nanapagü namaã ga yema íyaxügüxü. ⁹ Rū yema duũxügü ga yema chibüexü rü maneca 4000 nixĩ. Rū yemawena ga Ngechuchu rü duũxügüxü ínimügü. ¹⁰ Rū ñuxüchi wüxi ga ngegu nixüe namaã ga norü ngúexügü, rü Damanútaanewa naxü.

Parichéugü naxcèx ínacagü ga wüxi ga cuèxruü ga Tupanaãrü poramaã üxü (Mt 16.1-4; Lc 12.54-56)

¹¹ Rū Ngechuchuxütawa nangugü ga Parichéugü, rü inanaxügüe ga na namaã yaporagatanücüxü. Rū nüxna nacagüe na nüxü nüxü nadauxëëxücèx ga wüxi ga cuèxruü ga Tupanaãrü poramaã naxüxü, na yemaãcü nüxü naxügüxücèx, rü nüxü nacuèxgüxücèx ngoxi aixcüma Tupana Nane yĩxü. ¹² Rū Ngechuchu rü poraãcü yaxna narüngü, rü ñanagürü: —¿Tüxcüü i ñãã duũxügü naxcèx ínacagü i wüxi i cuèxruü i Tupanaãrü poramaã üxü? Rū aixcüma pemaã nüxü chixu rü bai i wüxi i cuèxruü tá nüxü chawëx —ñanagürü. ¹³ Rū yema ñaxguwena, rü nüxna yema nixü ga yema duũxügü. Rū wenaxãrü ngegu nixüe rü naxtaxaarü tocutüwa naxü.

Parichéuarü pãüãrü puxëëruüchiga (Mt 16.5-12)

¹⁴ Natürü ga norü ngúexügü rü nüxü inayarüngümaë ga norü õna na íyangegüxü, rü wüxixicatama ga pãü nüxü nayexma ga nguewa. ¹⁵ Rū yexguma ga Ngechuchu rü nayaxucuxëgü, rü ñanagürü nüxü: —¿Dücèx, pexuãë naxcèx i Parichéugüarü rü Erodearü pãüãrü puxëëruü! —ñanagürü. ¹⁶ Rū yema norü ngúexügü rü inanaxügüe na nügümaã ñagüxü: —Ngëma ñanagürü tüxü erü tama tawemü ta ítingegü —ñanagürügü. ¹⁷ Natürü ga Ngechuchu rü nüxü nacuèxama na yema ñagüxü, rü yemacèx ñanagürü nüxü: —¿Tüxcüü “Tangearü õnaãx”, ñaperügügü? ¿Éxna ñuxma rü ta tama nüxü pecuèxgüéga rü tama nüxü picuèxãchitanü i ngëmachiga? ¿Éxna pexcèx naxë

i ngēma? ¹⁸ Pema rü pexāxētügüchirēx, ¿rü ñuxācü i tama nüxü pedauxü? Rü pexāxmachixēgüchirēx, ¿rü ñuxācü i tama nüxü pexīnüēxü? ¿Rü ēxna tama nüxna pecuēxāchie ga yexguma chayamuxēēgu ga yema pāü rü choxni? ¹⁹ — Rü yexguma yema 5000 ga duūxügüxü chayanuxgu ga yema wüximēēxpüx ga pāü, ¿rü ñuxre ga pexchigü yīxü ga napagücü ga yexguma penadexgu ga yema íyaxügüxü? —ñanagürü. Rü nümagü nanangāxügü rü ñanagürügü: — Rü 12 ga pexchigü —ñanagürügü. ²⁰ Rü ñuxüchi ñanagürü ta ga Ngechuchu: —Rü yexguma yema 4000 ga duūxügüxü chayanuxgu ga yema 7 ga pāü, ¿rü ñuxre ga pexchigü yīxü ga napagücü ga yexguma penadexgu ga yema íyaxügüxü? —ñanagürü. Rü nanangāxügü rü ñanagürügü: —7 ga pexchigü —ñanagürügü. ²¹ Rü yexguma rü ñanagürü nüxü: —¿Rü ñuxma rü ta taütama nüxü pecuēxgüégaxü na Parichéugücüma rü Erodecüma i chixexüchiga yīxü i ngēma pāüärü puxēēruügu pemaã chixuxü? —ñanagürü.

Ngechuchu rü nanamexēē ga wüxi ga ngexetücü ga Bechaídawa

²² Rü yemawena rü Bechaídaarü iānewa nangugü. Rü yéma Ngechuchuxütawa nanagagü ga wüxi ga ngexetücü. Rü nüxü nacèēxügü na nüxü yangögüxücèx. ²³ Rü Ngechuchu rü guma ngexetücümēxēgu nayayauxāchi, rü iāneärü yéamaxüra nanaga. Rü yéma naxbüxágümaã nayawaixetüxēē, rü ñuxüchi naxētügu ningögü, rü nüxna naca ngoxi marü tacüxü nadau. ²⁴ Rü yexguma ga guma ngexetücü rü inanaxügü ga na yadauchixü. Rü ñanagürü: —Nüxü chadau i duūxügü i ñoma naīgü i ixīxünerü i ixīgüxü —ñanagürü. ²⁵ Rü yexguma ga Ngechuchu rü wenaxärü naxētügu ningögü. Rü nüma ga guma yatü rü meãma inadawenü. Rü yemaäcü naxcèx nitaane rü meãma naxcèx nangox ga guxüma. ²⁶ Rü yemawena ga Ngechuchu rü napatawa nanamu. Rü namaã nüxü nixu na tama iānecèx nataeguxü.

Pedru nüxü nixu rü Ngechuchu nixī ya yima Tupana nüxü unetacü ya Cristu (Mt 16.13-20; Lc 9.18-21)

²⁷ Rü yemawena rü Checharéa ga Piripuanewa yexmane ga iānexācügüwa naxü ga Ngechuchu norü ngúexügümaã. Rü namawa rü Ngechuchu rü norü ngúexügüna naca, rü ñanagürü nüxü: —¿Ñuxü ñagüxü i duūxügü i chauchiga na texé chiixü i chomax? —ñanagürü. ²⁸ Rü norü ngúexü nanangāxügü rü ñanagürügü: —Nangēxma i duūxügü rü:

“Cuáü ya baiüxēēruü quixī”, ñagüxü, rü togü i:

“Eria quixī”, ñagüxü, rü togü rü:

“Wüxi ga nuxcümaücü ga Tupanaärü orearü uruü quixī”, ñagüxü —ñanagürügü. ²⁹ Rü yexguma Ngechuchu rü nüxna naca rü ñanagürü: —¿Rü pema i ñuxü ñapegügüxü choxü na texé chiixü? —ñanagürü. Rü Pedru nanangāxü rü ñanagürü: —Cuma nixī i Cristu i Tupana cuxü unetacü quixü —ñanagürü. ³⁰ Rü yexguma ga Ngechuchu rü norü ngúexügüxü namu na taxüemaãma nüxü yaxugüexücèx ga yema ore ga nachiga.

Ngechuchu nanaxunagü ga norü yuchiga (Mt 16.21-28; Lc 9.22-27)

³¹ Rü yemawena rü Ngechuchu inanaxügü ga norü ngúexügümaã nüxü na yaxuxü ga tacü tá nüxü na üpetüxü. Rü ñanagürü nüxü: —Choma i Tupana Nane na duūxüxü chiixü, rü poraäcü ngúxü tá chinge. Rü choxü tá naxoxgü i Yudiügüarü äēxgacügüerugü, rü paigüarü äēxgacügü, rü ngēma ngúexēēruügü i Moïchéarü mugüwa nguxēētaegüxü. Rü tá choxü nimèxgü, natürü tomaēxpüx i ngunexügu rü wena táxarü chamaxü —ñanagürü. ³² Rü yema ore rü meãma namaã nanangoxēē. Natürü yexguma ga Pedru rü

nüxĩca noxrüwama Ngechuchuxü naga, rü inanaxügü ga na naxucuxẽãxü na tama yemaãcü yadeaxüçèx. ³³ Natürü ga Ngechuchu rü nadauegu, rü norü ngúexügüxü nadawenü. Rü Pedruxü nanga, rü ñanagürü: —¡Choxna ixügachi, Pa Chatanáx! Cuma rü tama Tupana nagu rüxĩnũxügu curüxĩnũ, erü yatügü nagu rüxĩnũxügumare nixĩ i curüxĩnũxü —ñanagürü. ³⁴ Rü yexguma ga Ngechuchu rü norü ngúexügüçèx rü duüxügüçèx naca. Rü ñanagürü nüxü: —Rü ngẽxguma texé chowe rüxüxchaügu, ¡çècü nüxü tarüxo i tumaãrü ngúchaü, rü ñoma wüxi i curucha ngĩxü tayaxuxürüü namaã tabora i guxüma i ngúxü i chauxcèx tingexü, rü chowe tarüxü! ³⁵ —Erü yixema tügü maxèchaxèèchaüxè rü tá tayu. Natürü yixema chaugagu rü ore i mexügagu yuxe, rü aixcüma tá tamaxü. ³⁶ —¿Rü ¡acüwa nüxü namexü ya yatü ega ngẽxguma nayauxãgu i guxüma i ñoma i naãneãrü ngẽmaxügü, natürü norü maxü iyanatauxèẽgu? ³⁷ —Rü ngẽxgumarüü ta, ¿rü ñuxre i dẽru iyangu na ngẽmamaã naxcèx nataxexü i norü maxü i wüxi ya yatü? ³⁸ —Rü ngẽxguma texé i ñaã duüxügü i pecaduãxgüxü i tama yaxögüxüpèxewa chauxcèx taxãnegu rü naxcèx taxãnegu i chorü ore, rü choma i Tupana Nane i duüxüxü na chüxü rü tá ta tümacèx chaxãne i ngẽxguma Chaunatüarü poramaã rü norü orearü ngeruügü i daxüçüãx i üünegüxümaã wenaxãrü núma chaxüxgu.

9

¹ Rü yexgumarüü ta ga Ngechuchu rü ñanagürü nüxü: —Aixcüma pemaã nüxü chixu rü ñuxre i duüxügü i nuã ngẽxmagüxü rü tãütãma nayu ñuxmatãta nüxü nadèux na ñuxãcü aẽxgacü ya poracü na yĩxü ya Tupana —ñanagürü.

Ngechuchu rü toraxüãcü nangox (Mt 17.1-13; Lc 9.28-36)

² Rü 6 ga ngunexüguwena rü Ngechuchu rü wüxi ga mèxpünewa naxü. Rü ínayagagü ga Pedru rü Chaütiãgu rü Cuáüxĩcatama. Rü yéma yema ngúexügüpèxewa toraxüãcü nangox ga Ngechuchu. ³ Rü niyauracüü ga naxchiru rü nacómüxüchi. Rü nataxuma i yaxchiruxü i nüxü cuáxü na ngẽmaãcü nacómüxèẽãxü. ⁴ Rü nüxü nadaugü ga Ería rü Moĩché ga yéma Ngechuchumaã idexagüxü. ⁵ Rü yexguma ga Pedru rü ñanagürü Ngechuchuxü: —Pa Ngúexèèruüx, namexèchi nixĩ na nuã ingẽxmagüxü. Rü tá tanaxü ya tomaèxpüx ya düxenü, rü wüxi ya cuxcèx, rü naĩ ya Moĩchéçèx, rü naĩ ya Eríacèx —ñanagürü. ⁶ Rü yema na poraãcü nabaixãchiãègüxü ga yema ngúexügü, rü yemacèx ga Pedru rü tama nüxü nacuèx ga na ñuxü ñaxü. ⁷ Rü yexgumatama wüxi ga caixanexü ínaxüxü, rü natanügu nayangèixema. Rü yema caixanexüwa inanaxü ga wüxi ga naga ga ñaxü: —Daa nixĩ ya Chaune ya nüxü changechaüxüchicü. ¡Rü nüxü iperüxĩnũè! —ñaxü. ⁸ Rü yexgumatama nügücüwagu ínadaueguãchitanü, rü taxúexüma ga toguexü nadaugü, rü Ngechuchuxüxĩcatama. ⁹ Rü yexguma ínaxĩgügu nawa ga guma mèxpüne, rü Ngechuchu nüxna naxãga ga taxúemaãma na nüxü yaxugüexü ga yema yéma nüxü nadaugüxü, ñuxmatãta yuwa ínadxgu ga nümax. ¹⁰ Rü yemacèx ga yema ngúexügü rü bexma nüxü nacuèxgü ga yema nüxü nadaugüxü. Natürü nügüna nacagü ga ¡acüchiga na yĩxü ga:

“Yuwa ínadxgu”, ñaxü. ¹¹ Rü ñuxüchi ga yema ngúexügü rü Ngechuchuna nacagü, rü ñanagürügü: —¿Tüxcüü i ngúexèèruügü i ore i mugüwa nguxèètaegüxü rü ñanagürügü:

“Ería tá nixĩ ya nüxĩra cuxüpa núma ücü?” ñanagürügü. ¹² Rü Ngechuchu nanangãxü, rü ñanagürü nüxü: —Aixcüma nixĩ i Ería na nüxĩra núma naxüxü na chauxüpa namexèèãxüçèx i guxüma. ¿Natürü tüxcüü i ore i ümatüxüwa i ñaxü:

“Rü Tupana Nane ya duüxüxü ixĩcü rü tá ngúxü ninge, rü duüxügü rü tá nüxü naxoe”,
ñaxü? ¹³ Natürü i choma rü pemaã nüxü chixu, rü Ería rü marü núma naxü. Natürü ga duüxügü rü nümagü nanaxwèxegüxüãcüma poraãcü chixri namaã nachopetü, yexgumarüü ga ore ga ümatüxüwa nüxü yaxuxürüü —ñanagürü.

Ngechuchu nanamexëë ga wüxi ga buxü ga ngoxo nawa yexmaxü
(Mt 17.14-21; Lc 9.37-43)

¹⁴ Rü yexguma yema togü ga norü ngúexügütanüwa nangugügu, rü yéma nüxü nadaugü ga muxüma ga duüxügü ga yema ngúexügüxü íchomaëguächixü. Rü ñuxre ga ngúexëëruügü ga Moíchéarü mugüwa nguxëëtaegüxü, rü yéma niporagatanücüü namaã ga yema ngúexügü. ¹⁵ Rü yexguma Ngechuchuxü nadaugügu ga yema muxüma ga duüxügü, rü poraãcü nabaixächiãëgü. Rü guxüma naxcèx nibuxmü na nüxü yanamoxëgüxüçèx. ¹⁶ Rü nüma ga Ngechuchu rü nüxna naca, rü ñanagürü nüxü: —¿Täcü nixĩ i pema namaã naxcèx ípiporagatanücüüxü? —ñanagürü. ¹⁷ Rü wüxi ga yema duüxügü ga yéma yexmagüxü rü nanangãxü, rü ñanagürü: —Pa Ngúexëëruüx, nuã cuxcèx tüxü chaga ya chaune, erü tümawa nangëxma i wüxi i ngoxo i tüxü ngegaxëëxü. ¹⁸ —Rü ngextá ítangëxmaxüwa rü ngëxma tüxü yaxuxgu rü waixümüãnegu tüxü naña. Rü tarüchièx, rü tixüxchapüta, rü ngëxma tiyuãchi. Rü marü nüxü chacèxü i curü ngúexügü na tümawa ínatëxüchiãxüçèx i ngëma ngoxo, natürü tama nüxü inaxĩnü —ñanagürü. ¹⁹ Rü Ngechuchu nanangãxü, rü ñanagürü: —Pa Duüxügü i Tama Yaxõgüxü, ¿ñuxguratáta i pemaã chanuxmaxü rü yaxna pemaã chaxĩnüxü? ¡Nuã penaga ya yima bucü! —ñanagürü. ²⁰ Rü Ngechuchuxütawa nanagagü ga guma bucü. Natürü yexguma Ngechuchuxü nadëuxgu ga yema ngoxo, rü guma bucüxü naxü ga na yayuãchixëëãxü. Rü yexma ñaxtúanegu nayangu. Rü yexma nidixegugü, rü narüchièx. ²¹ Rü Ngechuchu rü guma bucünatüna naca, rü ñanagürü: —¿Rü ñuxgumama nixĩ ga naxcèx inaxügüxü ga yema? —ñanagürü. Rü guma bucünatü nanangãxü rü ñanagürü: —Nabuxgumamatama. ²² Rü muëxpüxcüna i ngëma ngoxo rü üxüxetügu rü dexágu nanañaüxü na ngëmaãcü yamáãxüçèx. Rü ngëmacèx ega cumaã nanguxügu na tacü toxçèx cuxüxü, ¡rü cuxü tangechaütümüügü, rü toxü rüngüxëë! —ñanagürü. ²³ Rü yexguma ga Ngechuchu rü ñanagürü nüxü: —¿Rü tüxcüü “ega chomaã nanguüxgu”, ñacurügü? Erü guxüma natauxcha tümacèx ya yixema yaxõxë —ñanagürü. ²⁴ Rü yexguma ga guma bucünatü rü tagaãcü ñatarügü: —Chayaxõ. ¡Choxü rüngüxëë na yexeraãcü chayaxõxüçèx! —ñatarügü. ²⁵ Rü yexguma Ngechuchu nüxü dëuxgu na muxüma ga duüxügü marü yexma ngutaquëxexü, rü nananga ga yema ngoxo. Rü ñanagürü nüxü: —Pa ngoxo i Ngegaxëëruü rü Ngauchixëxëëruüx, ¡choma cuxü chamu na nawa ícuxüxüxü ya daa bucü, rü tagutáma wena nagu cuyaxücuxü! —ñanagürü. ²⁶ Rü yexguma ga yema ngoxo rü aita naxü, rü wenaxârü guma bucüxü niyuãchixëë. Rü ñuxüchi nawa ínaxüxü, rü ñoma nayuxuchixürüü yéma nanatëx. Rü yemacèx ga muxüma ga duüxügü rü ñanagürügü: —Marü nayuxuchi nixĩ —ñanagürügü. ²⁷ Natürü ga Ngechuchu rü naxmëxgu nayayauxãchi, rü ínanadaxëë. Rü nüma ga guma bucü rü inachi. ²⁸ Rü yemawena ga Ngechuchu rü wüxi ga ípatagu nayaxücu namaã ga norü ngúexügü. Rü yéma nüxĩca nüxna nacagü, rü ñanagürügü nüxü: —Pa Corix, ¿tüxcüü i toma rü taxuacüma ítanatëxüchi i ngëma ngoxo? —ñanagürügü. ²⁹ Rü Ngechuchu nanangãxü rü ñanagürü: —Tama ngëmaãcümare ítanatëxüchi i ngëmarüü ixĩxü i ngoxo. Natürü tanaxwèxe i Tupanana tanaxuaxü i tórü yumüxëwa na nüma ínatëxüchiãxüçèx. Rü ngëmaãcüxicatama nixĩ i ínaxüxüxü —ñanagürü.

Ngechuchu ru wenaxãrũ nanaxunagũ ga norũ yuchiga
(Mt 17.22-23; Lc 9.43-45)

³⁰⁻³¹ Rũ yéma inaxĩãchi rũ Gariréaanewa nachopetũ. Natürũ ga Ngechuchu rũ tama nanaxwèxe ga texé nüxũ na cuáxũ ga na yéma nayexmaxũ, yerũ norũ ngúexũgũxũ íngúexẽẽ. Rũ ñanagürũ nüxũ: —Tupana Nane ya duũxũxũ ixĩcũ, rũ duũxũgũ tá nayayauxgũ rũ tá nayamèxgũ. Natürũ tomaẽxpũx i ngunexũgu rũ wena tá ínarũda —ñanagürũ. ³² Natürũ ga nümagũ rũ tama meã nüxũ nacuèxgũ ga ñacũchiga na yĩxũ ga yema ore, rũ namuũẽ ga nüxna na nacagũexũ.

¿Texé tá tixĩ ya guxããrũ yexera ixĩẽ?
(Mt 18.1-5; Lc 9.46-48)

³³ Rũ Capernáũãrũ ñãnewa nangugũ. Rũ yexguma íxwa nayexmagũgu, rũ Ngechuchu nüxna naca, rũ ñanagürũ: —¿Rũ ñacũ nixĩ ga pegũmaã naxcèx piporagaetanũxũ ga namawa? —ñanagürũ. ³⁴ Natürũ ga nümagũ rũ nangeèxgũmare, yerũ ga namawa rũ nachigagu nügũmaã niporagaetanũ ga texé tíxũ ga natanũwa rüyexeramaẽxẽ. ³⁵ Rũ yexguma ga Ngechuchu rũ ínarũto, rũ naxcèx naca ga yema 12 ga norũ ngúexũgũ, rũ ñanagürũ nüxũ: —Rũ ngèxguma texé naxwèxegu na guxãetũwa na taxũxũ, rũ name nixĩ i noxri rũ guxããrũ ñaxtũmaẽwa tũgũ taxũxẽẽ na guxããrũ ngũxẽẽruũ tíxũ —ñanagürũ. ³⁶ Rũ yemawena rũ norũ ngãxũtanũgu nayachixẽẽ ga wũxi ga buxũ. Rũ ñũxũchi nachacũũgu yayauxãchiãcũma ñanagürũ: ³⁷ —Rũ texé ya chauégagu meã nayaxúxe i wũxi i buxũ i ñããrũũ, rũ choxũ nixĩ i tayaxuxũ. Rũ texé ya choxũ yaxúxe, rũ tama choxũxĩcatama tayaxu, natürũ yima núma choxũ mucũ ya Chaunatũxũ rũ ta nixĩ i tayaxuxũ —ñanagürũ.

Texé ya tama taxchi aixe rũ torũ ngũxẽẽruũ tixĩ
(Mt 10.42; Lc 9.49-50)

³⁸ Rũ yexguma ga Cuáũ rũ ñanagürũ nüxũ: —Pa Ngúexẽẽruũx, nüxũ tadau ga wũxi ga yatũ ga cuégagu ngoxogũ íwoxũxũ. Natürũ toma nüxna tanachũxu ga yema, yerũ tama tatanũxũ nixĩ ga nümax —ñanagürũ. ³⁹ Natürũ Ngechuchu nanangãxũ, rũ ñanagürũ: —Tama name i nüxna na penachũxuxũ. Erũ texé ya chauégagu naxúxe i wũxi i mexũ i Tupanaãrũ poramaã üxũ, rũ taxucürwama yixcama chixri chauchiga tidexa. ⁴⁰ Erũ texé ya tama taxchi aixe, rũ tórũ ngũxẽẽruũ tixĩ. ⁴¹ Rũ texé ya woo wũxitama i pochiyuãcu i dexá pexna ãxẽ naxcèx na chorũ duũxũgũ pixĩgũxũ, rũ aixcũma pemaã nüxũ chixu rũ tá tũxũ nangèxma i tũmaãrũ ãmare —ñanagürũ.

Naxãũcũma nixĩ na pecadugu inguxũ
(Mt 18.6-9; Lc 17.1-2)

⁴² Rũ ñanagürũ ta: —Texé ya pecadugu nanguxẽexẽ i wũxi i ñãã buxũgũ i choxũ yaxõgũxũ, rũ tũmacèx rũ narũmemaẽ chi nixĩ i noxtacũma wũxi ya nuta ya tacũ tũmanaxãwa tayangacuchi, rũ ngẽmaãcũ taxtũchiũwa tũxũ tayatáe. ⁴³⁻⁴⁴ —Rũ ngèxguma chi wũxi ya cuxmèx pecadugu cuxũ nguxẽẽgu, rũ name nixĩ i noxtacũma ícunadae. Erũ narũmemaẽ nixĩ i cuboxmèxãcũma cunayaxu i curũ maxũ na tama guxũne ya cuxmèx ya mexũnemaã nawa quitèxcuchixũcèx ya yima üxũ ya ngoxogũ nagu poxcuene ya taguma ixoxũne. ⁴⁵⁻⁴⁶ —Rũ ngèxguma chi wũxi ya cucutũ pecadugu cuxũ nguxẽẽgu, rũ name nixĩ i noxtacũma ícunadae. Erũ narũmemaẽ nixĩ i cubocutũãcũma cunayaxu i curũ maxũ na tama guxũne ya cucutũ ya mexũnemaã nawa quitèxcuchixũcèx ya yima üxũ ya ngoxogũ nagu poxcuene. ⁴⁷⁻⁴⁸ —Rũ ngèxguma chi wũxi ya cuxetũ pecadugu cuxũ nguxẽẽgu, rũ name nixĩ i

noxtacüma ícunacaxüchi. Erü narümemaë nixĩ i wüxitama ya cuxetümaã Tupana ãëxgacü íixĩxüwa quixücu, na tama guxüne ya cuxetü ya mexünemaã nawa quitèxcuchixüçèx ya yima üxü ya taguma ixoxüne ya ngoxogü nagu poxcuene i ngextá õxmigü taguma íyuexüwa. ⁴⁹—Rü aixcüma ñoma õnawa yücüra nagüxürüü tá nixĩ na guxátama guxchaxüwa chopetüxü. ⁵⁰—Name ya yücüra. Natürü ngëxguma chi nangeacagu, ¿rü ñuxácü tá wenaxârü naxããca? ¿Rü meã pegüna pedaugü na ñoma yücüra ya taguma iyarüngeacacürüü na namexüçèx i perü maxü! ¿Rü meã pegümaã pemaxë! —ñanagürü.

10

Ngechuchu namaã nangúexëëtae na tama namexü na texé tümamèxü ítáxü (Mt 19.1-12; Lc 16.18)

¹ Rü yexguma ga Ngechuchu rü Capernáũârü ñãnewa inaxüãchi. Rü Yudéaanewa naxüpetü rü ñuxmata natü ga Yudáũârü tocutüwa nangu. Rü yéma rü wenaxârü naxçèx nangutaquëxegü ga duüxügü. Rü nüma rü inanaxügü ga na nangúexëëtaexü guxügürüü. ² Rü ñuxre ga Parichéugü rü naxçèx naxĩ ga na nüxü yaxügüxüçèx yerü chixexügu nananguxëëgüchaü. Rü yemacèx nüxna nacagüe, rü ñanagürügü: —¿Namexü i cuxçèx na wüxi ya yatü rü naxmèxü ínatáxü? —ñanagürügü. ³ Rü nüma nanangãxü, rü ñanagürü nüxü: —¿Rü tacü yíixü ga Moíché pexü muxü? —ñanagürü. ⁴ Rü nümagü nanangãxügü, rü ñanagürügü: —Moíché nüxü nixu ga na tama nachuxuxü na wüxi ya yatü rü ínatámaxü, ega wüxi i popera i tèxgüpane ngíxna naxãxgu —ñanagürügü. ⁵ Rü yexguma ga Ngechuchu rü nanangãxü, rü ñanagürü nüxü: —Rü yema na taxúegama na pexĩnüëxügagu nixĩ ga Moíché ga tama pexna nachúãxü ga pexmèxü na ípetáxü. ⁶ —Natürü noxriarü ügügu, rü Tupana nanaxü ga yatüxü rü ngexü. ⁷—Rü ngëmacèx ya yatü rü tá nanatü rü naëna nixügachi na naxmèxmaã inaxãüxüçèx. ⁸—Rü ngëmaãcü i ngëma taxre rü ñoma wüxitama i duüxürüü tá nixígü. Rü marü tãütáma taxre nixĩ, erü wüxi tátama nixĩ. ⁹—Rü ngëmacèx taxucürüwa texé nügüna tayaxígachixëë i ngëma taxre i Tupana nügüna mugüxü —ñanagürü. ¹⁰ Rü yexguma marü ípatawa nangugügu, rü norü ngúexügü rü wenaxârü nüxna nacagüe naxçèx ga yema. ¹¹ Rü Ngechuchu rü ñanagürü nüxü: —Rü yíxema tümamèxü ítáxe rü naĩ i ngemaã ãmaxë rü pecadu taxü ngímaã i ngëma noxriüçü i tümamèx. ¹²—Rü ngëxgumarüü ta, ega wüxi i nge ítèxtegu rü naĩ ya yatümaã naxãtegu, rü ngíma rü ta pecadu ixü —ñanagürü.

Ngechuchu rü buxügüxü nameãxë (Mt 19.13-15; Lc 18.15-17)

¹³ Rü yéma Ngechuchuxütawa tüxü nagagü ta ga ñuxre ga buxegü na tüxü yangögügüxüçèx. Natürü ga yema norü ngúexügü rü inanaxügüe ga tüxü na yangagüxü ga guxema tümãxãcüxegüxü Ngechuchuxütawa gagüxe. ¹⁴ Rü yexguma yemaxü nadèuxgu ga Ngechuchu, rü naãëwa nangux, rü ñanagürü nüxü: —Chanaxwëxe i chauxütawa naxĩ i buxügü. ¿Rü tãxü i nüxna penachuxuxü! Erü Tupana ãëxgacü íixĩxüwa rü tümacèx nixĩ ya yíxema ñaã buxügürüü taxuüma i chixexüxü icuáxe. ¹⁵—Rü aixcüma pemaã nüxü chixu rü texé ya tama wüxi i buxürüü Tupanaxü yaxúxe na tümãârü ãëxgacü yíixüçèx, rü tagutáma nagu taxücu i ngëma naãne i Tupana ãëxgacü íixĩxüwa —ñanagürü. ¹⁶ Rü nüma rü tüxü naganagütanü ga guxema buãxta, rü tümãërugügu naxümëxãcüma ñanagürü tüxü: —¿Tupana pexü rüngüxëëx! —ñanagürü.

*Wüxi ga yatü ga dïeruãxüchixü Ngechuchumaã nidexa
(Mt 19.16-30; Lc 18.18-30)*

¹⁷ Rü yexguma marü inaxüãchichaügu ga Ngechuchu, rü yéma naxcèx niña ga wüxi ga yatü. Rü napëxegu nayacaxãpüxü, rü nüxna naca rü ñanagürü nüxü: —Pa Ngúexëëruü ya mecüx, ¿tacü tá chaxüxü na chanayaxuxüçèx i maxü i taguma gúxü? —ñanagürü. ¹⁸ Rü Ngechuchu nanangãxü, rü ñanagürü nüxü: —¿Tüxcüü, “Mecü” ñacurügü choxü? Erü Tupanaxĩcatama nixĩ ya mecü ixĩcü, rü nataxuma i to. ¹⁹ Cuma rü marü nüxü cucuèx i Tupanaãrü mugü i ñaxü:

“¡Tãütáma cumáëta, rü tãütáma naĩ i ngemaã icupe, rü tãütáma cungtèèx, rü tãütáma doraxü quixu i togüchiga, rü tãütáma quidoratèèx, rü tümaga naxĩnü ya cunatü rü cue!”

ñaxü —ñanagürü. ²⁰ Rü yexguma ga guma yatü rü ñanagürü nüxü: —Pa Ngúexëëruüx, rü chorü bucúmatama meã chanaxaure i guxüma i ngëma mugü i nüxü quixuxü —ñanagürü. ²¹ Rü yexguma ga Ngechuchu rü nüxü nangechaüãcüma nüxü nadawenü, rü nanangãxü rü ñanagürü: —Rü wüxixicatama cuxü nataxu. ¡Rü íixü, rü namaã yataxe i guxüma i curü ngëmaxügü, rü ñuxüchi togü i ngearü ngëmaxüãxgüxüna naxã i ngëma curü natanü! Rü ngëmaãcü tá cuxü nangëxma i cuchica i daxüguxü i naãnewa. Rü ngëmaxüma rü marü name i chowe curüxü —ñanagürü. ²² Natürü nüma ga guma yatü rü nanaxixãchiãë ga yexguma nüxü naxĩnügu ga yema ore. Rü nangechaüãcüma ínixü, yerü namuxüchi ga norü yemaxügü. ²³ Rü Ngechuchu rü nüxü nidaugüãchi, rü ñanagürü norü ngúexügüxü: —Naguxchaxüchi tá nixĩ na Tupana ãëxgacü íyĩxüwa na yachocuxü i ngëma dïeruãxüchigüxü —ñanagürü. ²⁴ Rü nabaixãchiãëgü ga norü ngúexügü namaã ga yema ore. Natürü ga Ngechuchu rü wenaxãrü namaã nüxü nixu, rü ñanagürü: —Pa Chauxacügüx, ñuxãcü wüxi i guxchaxüchixü nixĩ na Tupana ãëxgacü íyĩxüwa na yaxücuxü i wüxi i duüxü. ²⁵ —Rü aixcüma pemaã nüxü chixu rü ñoma wüxi i cameyu na taxucürüwama wüxi ya ucumaxëtüwa naxüpetüxüãrü yexera narüguxchamaë naxcèx i wüxi i duüxü i dïeruãxüchixü na yaxücuxü i ngextá Tupana ãëxgacü íixüwa —ñanagürü. ²⁶ Rü yexguma yemaxü naxĩnüëgu ga norü ngúexügü, rü yexeraãcü nabaixãchiãëgü. Rü nügüna nacagüe, rü ñanagürügü: —¿Rü texé tá ëxna tixĩ ya nayaxúxe i maxü i taguma gúxü? —ñanagürügü. ²⁷ Rü Ngechuchu rü nüxü nadawenü, rü nanangãxü rü ñanagürü nüxü: —Yatügü rü taxuacüma nügü namaxëë, natürü Tupanaãxü rü natauxcha i ngëma, erü Tupanacèx rü nataxuma i tacü i guxchaxü —ñanagürü. ²⁸ Rü yexguma inanaxügü ga Pedru ga na yadexaxü, rü ñanagürü nüxü: —Toma rü marü yéma tanawogü ga guxüma ga torü yemaxügü na cuwe tarüxüçèx —ñanagürü. ²⁹⁻³⁰ Rü Ngechuchu nanangãxü, rü ñanagürü: —Aixcüma pemaã nüxü chixu rü texé ya chaugagu rü ore i maxëxëëruügagu tümapatana, rü ëxna tümãeneëgüna, rü ëxna tümãeyèxgüna, rü ëxna tümãëna, rü ëxna tümãanatüna, rü ëxna tümãacügüna, rü ëxna tümããnegüna ngema ixüxë, rü tá tanayaxu i tümããrü natanü. Rü aixcüma ñuxma i ñoma i naãnewa rü tá tanayaxu i 100 ëxpüxcüna ya tümapatagü, rü tümãeneëgü, rü tümãeyèxgü, rü tümãëgü, rü tümãacügü, rü tümããnegü. Natürü ngëxgumarüü tá ta tanayaxu i ngúxügü i togü tá tüxü ingexëëgüxü. Natürü yixcamaxüra i daxüguxü i naãnewa rü tá tanayaxu i maxü i taguma gúxü. ³¹ —Natürü muxüma i nümaxü i ñuxma ñoma i naãnewa duüxügü wixpëxewa ügüxëëxü, rü daxüguxü i naãnewa rü Tupana tá wixweama nanaxügüxëë. Rü muxüma i nümaxü i ñuxma ñoma i naãnewa duüxügü wixweama ügüxëëxü, rü daxüguxü i naãnewa rü Tupana tá wixpëxewa

nanaxügüxëë —ñanagürü.

*Ngechuchu rü wenaxärü nanaxunagü ga norü yuxchiga
(Mt 20.17-19; Lc 18.31-34)*

³² Rü Yerucharéüwaama naxĩ. Rü nüma ga Ngechuchu rü norü ngúexügüpëxegu nixü. Rü nümagü rü nabaixächiaëgü, rü yema togü ga duüxügü ga wixweama ägüxü rü namuë. Rü Ngechuchu rü wenaxärü noxrüwama naxcèx naca ga yema 12 ga norü ngúexügü. Rü inanaxügü ga namaã nüxü na yaxuxü ga tacü tá nüxü na ngupetüxü. ³³ Rü ñanagürü nüxü: —Pema nüxü pecuèx na marü ingaicaxü na Yerucharéüwa ingugüxü. Rü ngema rü duüxügü rü tá chixri chomaã nachopetü. Rü paigüarü äëxgacügü rü ngúexëeruügü i ore i mugüwa nguxëëtaegüxüna tá choxü naxuaxügü. Rü nümagü rü tá chomaã nanaxuegugü na chayuxü, rü tá ngëma Dumacüãxgüna choxü namugü. ³⁴ Rü ngëmagü tá nixĩ i chaugu idauxcüräügüxü. Rü tá choxna nacuaixgüe, rü tá choxna nanaçuaixcagü, rü tá choxü nayuxëëgü. Natürü tomaëxpüx i ngunexüguwena táxarü chamaxü —ñanagürü.

*Chaütiágu rü Cuáü rü wüxi ga ngüxëëcèx ínacaü
(Mt 20.20-28)*

³⁵ Rü Ngechuchucèx naxĩ ga Chaütiágu rü Cuáü ga Zebedéu nanegü, rü ñanagürügü nüxü: —Pa Ngúexëëruüx, tanaxwèxe i toxcèx cunaxü i ngëma ngüxëë i naxcèx tá cuxna taçaxü —ñanagürügü. ³⁶ Rü nüma rü nüxna naca, rü ñanagürü: —¿Tacü nixĩ i penaxwèxexü na pexcèx chanaxüxü? —ñanagürü. ³⁷ Rü ñanagürügü: —Rü ngëxguma äëxgacüxü quingucuchigu, rü tanaxwèxe na wüxie i toma rü curü tügünecüwawa tarütöxü, rü togue i curü toxwecüwawa —ñanagürügü. ³⁸ Rü Ngechuchu nanangäxü, rü ñanagürü nüxü: —Pema rü tama nüxü pecuèx na tacücèx ípëçaxü. ¿Rü pexü chi natauxchaxü i na peyaxaxüxü i ngëma axexü i üxchiüxü i choma tá chixaxüxü? ¿Rü namaã chi peporaexü i ngëma ngúxü i tá chingexü? —ñanagürü. ³⁹ Rü nümagü nanangäxügü rü ñanagürügü: —Ngëmaãcü, namaã tá taporae —ñanagürügü. Rü Ngechuchu nanangäxü, rü ñanagürü nüxü: —Aixcüma tá nixĩ i chauxrüü peyaxaxüxü i ngëma axexü i üxchiüxü rü chauxrüü ngúxü na pingegüxü. ⁴⁰ —Natürü ngëma chorü tügünecüwawa rü chorü toxwecüwawa na perütogüxüçèx, rü tama choxmëxwa nangëxma na pexna chanaxäxü, erü Chaunatü tá tüxna nanaxä ya yixema tümacèx íyiixë —ñanagürü. ⁴¹ Rü yexguma yemaxü naxĩnüëgu ga yema togü ga 10 ga ngúexügü, rü Chaütiágumaã rü Cuáümaã nanuë. ⁴² Natürü Ngechuchu naxcèx naca rü ñanagürü nüxü: —Pema nüxü pecuèx i togü i nachiuñnegüwa rü nangëxmagü i äëxgacügü i nügü nacuèxgügu na namexü na nuäcü namuãxü i norü duüxügü. Rü ngëma äëxgacügü i taxügü rü norü duüxügüarü yora nügü nixigüxëë. ⁴³ —Natürü täütáma ngëmaãcü nixĩ i petanüwa. Erü ngëxguma texé naxwèxegu na guxãärü yexera na tiixü i petanüwa, rü name nixĩ i noxri rü guxãärü ngüxëëruü na tiixü. ⁴⁴ —Rü ngëxguma chi texé i petanüwa naxwèxegu na tümamücügüeru na tiixü, rü name nixĩ i noxri rü guxüma i tümamücügüarü ngüxëëruü na tiixü. ⁴⁵ —Rü woo i choma i Tupana Nane na duüxüxü chiixü, rü tama togü choxü rüngüxëëxüçèx nixĩ i núma chaxüxü. Natürü núma chaxü na duüxügüxü charüngüxëëxüçèx rü naxcèx ichanaxäxüçèx i chorü maxü, na ngëmaãcü chanaxütanüxüçèx na norü pecadugüna ínanguxüxüçèx i muxüma i duüxügü —ñanagürü.

*Bartiméu ga ngexetüçüxü narümexëë ga Ngechuchu
(Mt 20.29-34; Lc 18.35-43)*

46 Rū Yericúarū ñānewa nangugū. Rū Ngechuchuwe narūxī ga norū ngúexūgū rū muxūma ga togū ga duūxūgū. Rū yexguma guma ñāneārū guxwa nangugūchaūgu ga nūxna na ínachoxūxū, rū yéma namacūwawa narūto ga wūxi ga ngexetūcū ga Bartiméūgu āegacū ga Timéū nane. 47 Rū yexguma guma ngexetūcū nūxū ínūgu ga Ngechuchu ga Nacharétucūāx na yīxū ga guma yéma ūpetūcū, rū inanaxūgū ga porācū aita na naxūxū, rū: —Pa Ngechuchu ya Dabítanūxūx, ꝑcuxū changechaūtūmūū! —ñānagūrū. 48 Natūrū muxūma ga yema duūxūgū rū ínānangaxūchigūama ga na iyanangeáxūcèx. Natūrū ga nūma rū yexeraācū aita naxūama, ñaxūmaā: —Pa Dabítanūxūx, ꝑcuxū changechaūtūmūū! —ñaxūmaā. 49 Rū yexguma ga nūma ga Ngechuchu rū inayachiāchi, rū ñānagūrū: —ꝑNaxcèx peca! —ñānagūrū. Rū guma ngexetūcūcèx nacagū, rū ñānagūrūgū: —ꝑNataāē rū inachi! Rū cuxcèx nixī i naçaxū —ñānagūrūgū. 50 Rū guma ngexetūcū rū yexacū nanaña ga norū gáuxūchiru. Rū inayuxnagū rū Ngechuchucèx nixū. 51 Rū Ngechuchu nūxna naca, rū ñānagūrū nūxū: —ꝑTacū nixī i cunaxwèxexū na cuxcèx chanaxūxū? —ñānagūrū. Rū nūma ga guma ngexetūcū, rū nanangāxū, rū ñānagūrū: —Pa Ngúexēruūx, chanaxwèxe na chidauchixū —ñānagūrū. 52 Rū yexguma ga Ngechuchu, rū ñānagūrū nūxū: —ꝑĒcū, íxū! Rū marū cuxcèx nitaane erū cuyaxō —ñānagūrū. Rū yexgumatama ga guma ngexetūcū rū nidauchi, rū Ngechuchuwe narūxū ga namawa.

11

Ngechuchu rū Yerucharéūgu naxūcu (Mt 21.1-11; Lc 19.28-40; Cu 12.12-19)

1 Rū marū Yerucharéūārū ngaicamana nangugū ga Oríbunecūarū Mèxpúneārū ngaicamana yexmagūne ga ñānexācūgū ga Bechagué rū Betániā. Rū yexguma yéma nangugūgu, rū Ngechuchu nanamu ga taxre ga norū ngúexūgū. 2 Rū ñānagūrū nūxū: —ꝑGua tórū toxmèxtawa ngēxmane ya ñānexācūwa pexī! Rū ngēxguma nawa pengugūgu, rū ngēxma tá nūxū peyangau i wūxi i buru i ngēxma ngaxūxū i taguma texé natagu aunagūxū. ꝑRū peyawēxū rū nuā penaga! 3 —Rū ngēxguma texé pexna caxgu na ꝑacūcèx peyawēxūxū i ngēma buru, ꝑrū tūmamaā nūxū pixu rū ñapegūgū:

“Torū Cori nanaxwèxe, rū ñuxma tátama nanataeguxēē”, ñapegūgū! 4 Rū yéma naxī. Rū yexma namacūwagu nūxū nayangaugū ga yema buru ga wūxi ga ĩpataēxūtagu ngaxūxū. 5 Rū ñuxre ga duūxūgū ga yéma yexmagūxū rū nūxna nacagūe, rū ñānagūrūgū: —ꝑTacū ĩpexūe? ꝑRū tūxcūū peyawēxū i ngēma buru? —ñānagūrūgū. 6 Rū nūmagū ga yema ngúexūgū, rū yema ore ga Ngechuchu namaā nūxū ixuxūācū nanangāxūgū. Rū yemacèx tama nūxna nanachūxgū. 7 Rū natagu nanachagūmū ga naxchirugū. Rū yemaācū Ngechuchuxūtawa nanagagū. Rū nūma ga Ngechuchu rū natagu naxaunagū. 8 Rū muxūma ga duūxūgū rū naxchirumaātama nanachamagū. Rū togū rū naīxātūgū ga naānewa nadaūxūmaā nayachamagū. 9 Rū yema duūxūgū ga napēxegu āgūxū rū yema togū ga wixweama āgūxū, rū tagaācū ñānagūrūgū: —ꝑCuxū ticuèxūxūgū! ꝑRū naxūūne ya daa Tupanaegagu nūma ūcū! 10 ꝑRū āēxgacū ya Dabírūxū namecūmaxūchi ya daa āēxgacū ya nūma ngucū! ꝑRū pema rū ta, Pa Daxūcūāx, rū nūxū picuèxūxūgū ya Tupana! —ñānagūrūgū. 11 Rū Yerucharéūgu naxūcu ga Ngechuchu, rū tupauca ga taxūnecèx nixū. Rū meāma guxūwama inanadauaxūne. Rū ñuxūchi yema norū 12 ga ngúexūgūmaā Betániāārū ñānecèx nataegu, yerū marū nayáuane.

Ngechuchu rü orix ga iguera ga ngearü oõxümaã chixexü naxuegu
(Mt 21.18-19)

¹² Rü moxüãcü yexguma Betániãwa inaxiãchigu ga Ngechuchu rü nataiya. ¹³ Rü yaxügu nüxü nadau ga wüxi ga orix ga iguera ga äätüxü. Rü nüma ga Ngechuchu rü naxcèx nixü na íyadauãxüçèx rü ngoxi nayexmèx ga norü o. Natürü yexguma naxütawa nanguxgu, rü taxuüma inayangau, rü naätüxüxĩcatama, yerü tauta norü owa nangu. ¹⁴ Rü yexguma rü ñanagürü igueraxü: —¡Tagutáma texé wena cuxü tamúãrü oõx! —ñanagürü. Rü norü ngüexügu rü nüxü naxĩnüë ga yema.

Ngechuchu ínanawoxü ga yema tupauca ga taxünewa taxegüxü ga duüxügu
(Mt 21.12-17; Lc 19.45-48; Cu 2.13-22)

¹⁵ Rü yexguma Yerucharéüwa nangugügu, rü Ngechuchu rü tupauca ga taxünegu naxücu. Rü inanaxügu ga na ínawoxüãxü ga yema yéma ñacümaã taxegüxü rü naxcèx taxegüxü. Rü nanangüegutanü ga norü mechagü ga yema duüxügu Tupanaarü ãmarewa mexü ga dñerumaã taxegüxü rü muxtucumaã taxegüxü. ¹⁶ Rü nanachuxu ga texé ñacü na yéma ngepetüxü tupauca ga taxünemachiawa. ¹⁷ Rü inanaxügu ga na nangüexëëtaexü, rü ñanagürü: —Tupanaãrü ore i ümatüxüwa rü ñanagürü: “Chopata rü guxüma i nachiüãnecüãxgüarü yumüxëpataügu tá naxãega”, ñanagürü. Natürü pema rü ngíteëxgüxüpataü peyaxĩxëë —ñanagürü. ¹⁸ Natürü yexguma yemaxü naxĩnüëgu ga paigüarü ãëxgacügü rü ngüexëëruügu ga Moíchéarü mugüwa ngüxëëtaegüxü, rü inanaxügüë ga naxcèx na nadaugüxü ga ñuxãcü Ngechuchuxü na yamëxgüxü. Natürü duüxügüxü namuüë, rü yemacèx taxucürüwama duüxügüpegu nayayauxgü. Yerü nüma ga duüxügü rü namaã nataãxëgü ga yema Ngechuchuarü ngüxëëtae. ¹⁹ Natürü yexguma marü nayáuanegu, ga Ngechuchu rü norü ngüexügümaã nawa ínachoxü ga guma íãne.

Narüñexë ga yema iguera ga ngearü oõxü
(Mt 21.20-22)

²⁰ Rü moxüãcü pèxmama rü igueraxütawa nachopetü. Rü yéma nüxü nadaugü ga na nañexëxü ñuxmata naxchúmèxãwa nangu. ²¹ Rü yexguma ga Pedru rü nüxna nacüexãchi ga yema íneãcü ngupetüxü, rü ñanagürü Ngechuchuxü: —Pa Ngüexëëruüx, dücax i iguera ga chixexü namaã cuxuegüxü, rü marü narüñexë —ñanagürü. ²² Rü Ngechuchu nanangãxü, rü ñanagürü: —¡Nüxü peyaxögü ya Tupana! ²³ —Rü aixcüma pemaã nüxü chixu rü ngëxguma chi wüxie daa mëxpünexü tamuxgu na yaxügachixüçèx rü taxtü i taxüchiüwa nügü na yatáexüçèx, rü chi pega naxĩnü, ega aixcüma peyaxögüãcüma nüxü ngëma ñapegügu. ²⁴ —Rü ngëmacèx pemaã nüxü chixu rü guxüma i ñacü i naxcèx ípeçaxü i perü yumüxëwa, rü name nixĩ na peyaxögüxü na marü penayaxuxü, rü aixcüma tá penayaxu. ²⁵ —Rü ngëxguma peyumüxëgügu, natürü nangëxmagu i ñacüçèx texémaã na penuëxü, ¡rü tüxü nüxü pengechaü! na Penatü ya daxügücü rü ta pexü nüxü nangechaüxüçèx i perü pecadugü. ²⁶ —Natürü ngëxguma pema tama tüxü nüxü pengechaügügu, rü Penatü ya daxügücü rü tá ta täütáma pexü nüxü nangechaü —ñanagürü.

Ngechuchuna nacagüë na texéarü oregagu tupauca ga taxünewa nangüxëëtaexü
(Mt 21.23-27; Lc 20.1-8)

²⁷ Rü yemawena rü Yerucharéüçèx nawoegu. Rü yexguma Ngechuchu rü tupauca ga taxünegu yaxügüchigüyane, rü naxcèx naxĩ ga paigüarü

ãëxgacügü, rü ngúexëëruügü ga Moïchéarü mugüwa nguxëëtaegüxü, rü Yudiügüarü ãëxgacügüerügü. ²⁸ Rü nüxna nacagüe, rü ñanagürügü: —¿Texéarü mugagu nixĩ i cunaxüxü i ngëma núma cuxüxü? ¿Rü texé cuxü tamu na cunaxüxüçèx i ngëma? —ñanagürügü. ²⁹⁻³⁰ Rü yexguma ga Ngechuchu rü nanangãxü, rü ñanagürü nüxü: —Choma rü tá ta pexna chaca, rü ngëxguma choxü pengãxügu i ngëma pexna naxcèx chaçaxü, rü choma rü tá ta pemaã nüxü chixu na texé choxü muxü na chanaxüxüçèx i ngëma. ¿Rü texé tanamu ga Cuáü na duüxügüxü ínabaiüxëëxüçèx? ¿Rü Tupana yĩxü ga namucü rü éxna duüxügümare? —ñanagürü. ³¹ Rü yexguma ga nümagü rü inanaxügüga ga nügümaã na yaporagatanüçüxü, rü ñanagürügü: —Rü ngëxguma chi:

“Tupana núma nanamu”, ñagügügu, rü nüma rü chi ñanagürü tüxü:

“¿Tüxcüü ga tama nüxü peyaxögüxü?” ñanagürü chi tüxü. ³² ¿Rü ñuxüçürüwa rü:

“Yatügümare núma nanamu”, ñatarügügü tá? Rü yema ñanagürügü yerü duüxügüxü namuë. Yerü guxüma ga duüxügü rü nayaxögü rü aixcüma Tupana nanamu ga Cuáü na nüxü yaxuxüçèx ga norü ore. ³³ Rü yemacèx Ngechuchuxü nangãxügu, rü ñanagürügü: —Tama nüxü tacüx ga texé núma na namuxü ga Cuáü ga baiüxëëruü —ñanagürügü. Rü yexguma ga Ngechuchu rü nanangãxü rü ñanagürü nüxü: —Choma rü ta tãütama pemaã nüxü chixu na texé choxü muxü na chanaxüxü i ngëma choxna naxcèx peçaxü —ñanagürü.

12

Ore i puracütanüxü i chixexügügu ixuxü (Mt 21.33-46; Lc 20.9-19)

¹ Rü Ngechuchu rü inanaxügü ga ore ga cuèxruügügu ixuxümaã na nangúexëëtaexü. Rü ñanagürü nüxü: —Nayexma ga wüxi ga yatü ga norü naãnegu ubanecü ücü. Rü ínanapoxegu, rü nanaxü ga wüxi ga ubaarü yauxtüxüchica, rü wüxi ga dauxütaechica na meã nüxna nadauxüçèx ga guxüma. Rü ñuxüchi ñuxre ga puracütanüxüna nüxü nadauxëë. Rü namaã nanamexëë na ngãxügu namaã ngĩxü yatoyexüçèx ga yema ubatanü. Rü ñuxüchi ga yema naãneärü yora rü to ga nachiuãnewa naxü. ² —Rü yexguma nawa nanguxgu ga na yadauxü ga yema ubagü, rü guma yatü rü yéma puracütanüxügüxütawa nanamu ga wüxi ga norü duüxüxü na naxcèx íyaçaxüçèx ga yema ubagü ga nüxna üxü. ³ —Natürü yema puracütanüxügü rü nayayauxgü, rü nanaçuaixgü ga guma yatüarü duüxü. Rü taxuüma ga ubagü nüxna naxägü, rü yemaäcü ínayamugü. ⁴ —Rü yexguma ga guma yatü rü to ga norü duüxüxü yéma namu. Natürü ga guma rü nayamèxèrugü, rü namaã naguxchigagü. ⁵ —Rü yexguma rü to ga norü duüxüxü yéma namu. Natürü nayamèxgü. Rü yemawena, rü yéma nanamugü ga muxüma ga togü ga norü duüxügü. Natürü ga yema puracütanüxügü rü nayaçuaixgü ga ñuxre, rü togü rü nanadai. ⁶ —Rü yexguma rü nüxü ínayaxü ga nanexüchi ga poraäcü nüxü nangechaücü. Rü düxwa guma nanexü yéma namu, yerü nüma nagu naxĩnúgu rü chi nanega naxĩnüë ga yema puracütanüxügü. ⁷ —Natürü yexguma guma cori nanexü nadaugügu ga yema puracütanüxügü, rü nügümaã ñanagürügü:

“Ngëmaärü tá nixĩ i ñaã naãne i yixcama. ¿Rü ngĩxã tayamèxgü na tóxrü na yĩxüçèx!” ñanagürügü. ⁸ —Rü yemaäcü nayayauxgü, rü nayamèxgü. Rü yema ubanecüpechinüwa nayatèxgü ga naxüne. ⁹ —Rü ñuxma rü pexna chaca, ¿pexcèx rü tacü tá naxü ya yima ubanecüarü yora namaã i ngëma puracütanüxügü i chixexügü? Rü dücax, rü ngëma tá naxü, rü tá nanadai i

ngēma puracūtanūxūgū, rü togūna tá nanaxā i ngēma ubanecū. ¹⁰ —¿Taguma ēxna nawa pengúe i Tupanaârü ore i ūmatūxū? Erü ngēmawa rü ñanagürü: “Rü yima nuta ya mecü ya ñârü ūruūgū nüxū oechirécü, rü ñuxma rü yimatama nixī ya Tupana nüxīra yaxücuchicü na namaã inaxūgūāxūcèx ya ĩpata. ¹¹ Rü tórü Cori ya Tupana nixī ga naxücü ga yema, rü ñuxma rü namexēchi i taxcèx”, ñanagürü i ngēma ore. ¹² Rü yexguma ga yema paigüarü āēxgacügü, rü ngúexēeruūgü ga Moĩchérü mugüwa ngúxēētaegüxū, rü Yudíugüarü āēxgacügüerugü, rü Ngechuchuxū niyauxgüchaū. Yerü nüxū nacuèxgü ga nachiga na yīxū ga yema ore ga cuèxruūgu yaxuxū. Natürü duūxūgüxū namuūē rü yemacèx taxuūma namaã naxüe. Rü nüxna yéma ĩnixĩmare.

Āēxgacüaxū dīērumaã naxūtanūxūchiga
(Mt 22.15-22; Lc 20.20-26)

¹³ Rü yexguma ga yema āēxgacügü rü Ngechuchuxūtawa nanamugü ga ñuxre ga norü duūxūgü ga Parichéugü rü Erodetanūxūgü na nüxna yacagüexūcèx, rü ngoxi tacü rü chixexū ga dexamaã nüxū nangāxū na yemaãcü āēxgacügüxūtawa na ĩyaxuaxūgüāxūcèx. ¹⁴ Rü nümagü rü naxūtawa naxī, rü ñanagürügü nüxū: —Pa Ngúexēeruūx, nüxū tacuèx rü aixcūma nixī i ngēma nüxū quixuxū i ore. Rü tama duūxūgügamare cuxĩnū, erü tama norü düxétūxūnegu cudawenü, natürü nacūma nixī i cungugüxū. Rü aixcūma cunangúexēē i duūxūgü na Tupana naxwèxexūācūma namaxēxūcèx. ¡Tomaã nüxū ixu! Rü ngēma dīēru ya āēxgacü ya tacü ya Dumacūāx totanüwa ngĩxū yauxchaūcü ¿rü namexū yīxū na nüxna ngĩxū taxāxū, rü ēxna tama? —ñanagürügü. ¹⁵ Natürü ga Ngechuchu rü nüxū nacuèxama ga na chixexügu namaã naxĩnūēxū ga yema duūxūgü woo meã namaã na yanadexagüxū. Rü yemacèx ñanagürü nüxū: —¿Tūxcüū chixexügu choxū penguxēēchaūxū? ¡Nuã ngĩxū pinge i wüxitachinü i dīēru na ngĩxū chadauxūcèx! —ñanagürü. ¹⁶ Rü yéma naxūtawa ngĩxū nangegü ga wüxitachinü ga dīēru. Rü Ngechuchu rü ñanagürü nüxū: —¿Texéchicünèxā rü texééga nixī i ngĩgu ūxū? —ñanagürü. Rü nümagü nanangāxūgü, rü ñanagürügü: —Dumacūāx ya āēxgacü ya tacüchicünèxā nixī —ñanagürügü. ¹⁷ Rü yexguma ga Ngechuchu rü ñanagürü nüxū: —¡Āēxgacūna ngĩxū pexā i ngēma āēxgacüarü ixīcü, rü Tupanana ngĩxū pexā i ngēma Tupanaârü ixīcü! —ñanagürü. Rü yexguma yema orexū naxĩnūēgu, rü namaã nabaixāchiāēgü.

Ngechuchuna nacagüe rü ngoxi wena namaxē i duūxūgü
(Mt 22.23-33; Lc 20.27-40)

¹⁸ Rü yemawena rü Ngechuchuxūtawa ĩnayadaugü ga ñuxre ga Chaduchéugü. Rü nümagü nixī i nüxū yaxugüexū na tagutáma wena namaxēxū i yuexū. Rü yemacèx Ngechuchuna nayacagüe, rü ñanagürügü: ¹⁹ —Pa Ngúexēeruūx, Moĩchérü mugüwa rü ñanagürü: “Rü ngēxguma wüxi ya yatü naxmèx ngexacüyane nayuxgu, rü name nixī i naēneētama ngĩmaã naxāmèx i ngēma yutecü i naxūmèx, na ngēmaãcü naxāxācūxūcèx ya naēneē ga marü yucü”, ñanagürü ga yema ore. ²⁰ —Dücèx, nayexma ga 7 ga nügüeneēgü. Rü naxāmèx ga guma yacü, natürü tauta naxāxācüyane nayu. ²¹⁻²² —Rü yexguma ga naĩ ga naēneē nüxī ngĩmaã naxāmèx ga yema ngecü, natürü guma rü ta nayu rü nangexacü. Rü yexguma ga guma norü tomaēxpūx ga naēneē nüxī ngĩmaã naxāmèx, natür ü yexgumarüūtama nüxū nangupetü. Rü yemaãcü, gucūma ga guma 7 ga nügüeneē rü ngĩmaã naxāmèx ga yema nge. Rü gucūma nayue tauta naxāxācüyane. Rü düxwa ngĩma rü ta iyu ga yema nge. ²³ —Rü dūcax,

ngëxguma yuexũ wena maxëgu, ¿rũ ngexcürüücü naxmèx tá iyixĩ i ngëma nge? Yerü gucüma ga guma 7 ga nügüeneëgü ngĩmaã naxãmèx —ñanagürügü. ²⁴ Rũ yexguma ga Ngechuchu rü nanangãxũ, rü ñanagürü nüxũ: —Pema rü ípetüe erü tama nüxũ pecuèx i Tupanaârü ore i ümatüxũ, rü tama nüxũ pecuèx i ñuxãcü na naporaxũ ya Tupana. ²⁵ —Rũ ngëxguma yuexũ wena maxëgu, rü taxúetáma tixãmèxgü rü êxna tixãtegü. Erü daxüçüãx i Tupanaârü orearü ngeruügürüü tá tixĩgü i ngëxguma. ²⁶ —Pema choxna peca i yuexũârü dagüchiga. ¿Natürü tama êxna nawa pengüe i Tupanaârü ore ga Moĩché ümatüxũ ga naĩxãcü ga íyiauxratanünechigaxũ íyaxuxüwa? Erü yema orewa rü Moĩchéxũ ñanagürü ga Tupana:

“Choma nixĩ i Abráũârü Tupana, rü Ichaárü Tupana, rü Acobuarü Tupana”, ñanagürü. ²⁷ —Rũ ngëma orewa nüxũ tacuèx rü Tupana rü maxëxũârü Tupana nixĩ rü tama yuexũârü Tupana nixĩ, erü Tupanaârü ñüwa rü taxúema tayu. Rũ ngëmaãcü i pema rü poraãcü ípetüe —ñanagürü.

*Ngëma Tupanaârü mu i guxũ i norü mugüarü yexera ixĩxũ
(Mt 22.34-40)*

²⁸ Rũ wüxi ga ngúexëëruũ ga Moĩchéarü mugüwa nguxëëtaexũ, rü nüxũ naxĩnü ga yema togü ga namücügü ga Ngechuchumaã na íyaporagatanüçüxũ. Rũ nüma rü nüxũ nicuèxãchi ga meãma na nangãxũãxũ. Rũ yemacèx Ngechuchucèx nixũ, rü nüxna naca, rü ñanagürü nüxũ: —Pa Ngúexëëruũx, ¿ngëxürüxũ i Tupanaârü mu nixĩ i guxũ i norü mugüarü yexera ixĩxũ? —ñanagürü. ²⁹ Rũ Ngechuchu nanangãxũ, rü ñanagürü: —Ngëma Tupanaârü mu i guxũ i norü mugüarü yexera ixĩxũ, rü ñaã nixĩ, ñanagürü:

“¡Iperüxĩnüë, Pa Iraéanecüãxgü! Rũ nüma ya Cori ya tórü Tupana, rü yixicatama nixĩ ya tórü Cori. ³⁰ ¡Rũ nüxũ nangechaũ ya Cori ya curü Tupana guxũne ya curü maxünemaã, rü guxũ i cuãemaã, rü guxũ i nagu curüxĩnüxũmaã, rü guxũ i curü poramaã!”

ñanagürü. ³¹ —Rũ ngëma norü taxre i Tupanaârü mu, rü ñanagürü:

“¡Rũ nüxũ nangechaũ i cumücü na cugü cungechaũxürüũ!”

ñanagürü. Rũ nataxuma i to i Tupanaârü mu i ngëmagüarü yexera ixĩxũ —ñanagürü. ³² Rũ yexguma ga yema ngúexëëruũ ga mugüwa nguxëëtaexũ, rü ñanagürü Ngechuchuxũ: —Marü name, Pa Ngúexëëruũx, erü aixcüma nixĩ i ngëma nüxũ quixuxũ na wüxixicatama na yĩxũ ya Tupana, rü nataxuma ya naĩ. ³³ —Rũ ngëma Tupanaxũ na ingechaũxũ guxũne ya tórü maxünemaã, rü guxũ i nagu rüxĩnüxũmaã, rü guxũ i tórü poramaã, rü nüxũ na ingechaũxũ i tamücü i yigü na ingechaũxürüũ, rü ngëma rü guxũma i carnerugü i Tupanacèx idèixũ rü íguxũarü yexera narümemaë —ñanagürü. ³⁴ Rũ yexguma Ngechuchu nüxũ dèuxgu ga mexügu na naxĩnüãcüma na nangãxũãxũ ga yema ngúexëëruũ ga mugüwa nguxëëtaexũ, rü ñanagürü nüxũ: —Marü tama taxũ cuxũ nataxu na cunayaxuxũ ya Tupana na curü ãëxgacü yĩxüçèx —ñanagürü. Rũ yemawena rü marü taxuũma nügü naporaxëë na nüxna yacachigüxüçèx.

*¿Texé nane nixĩ ya Cristu?
(Mt 22.41-46; Lc 20.41-44)*

³⁵ Rũ yexguma tupauca ga taxũnema ínangúexëëtaeyane ga Ngechuchu, rü duũxüguna naca, rü ñanagürü: —¿Tüxcüü nixĩ i ngëma ngúexëëruũgü i mugüwa nguxëëtaegüxũ i ñagüxũ:

“Yima Cristu ya Tupana nüxũ unetacü rü nuxcümaüçü ga ãëxgacü ga Dabítaa nixĩ”, ñagüxũ? ³⁶ —¿Rũ ñuxãcü i ngëmaãcü yadexagüxũ? Yerü

nümatama ga Dabí, rü yexguma Tupanaãe i Ünexü naãewa ideaxgu rü ñanagürü:

“Cori ya Tupana rü chorü Corixü ñanagürü: ‘¡Nuã chorü tügüncüwawa rüto ñuxmatáta nüxü charüporamae i curü uwanügu na cuga naxĩnüëxüçèx!’”

ñanagürü ga yema orewa. ³⁷ —¿Natürü ñuxücürüwa i Dabítaa yĩxü ya Cristu, ega nümatama ga Dabí, rü norü Corimaã naxuãgu? —ñanagürü. Rü yema muxüma ga duüxügu ga yema yexmagüxü, rü taãëcüma Ngechuchuaxü inarüxĩnüë.

Ngechuchu rü nüxü nixu na tama yameãrü maxüãxgüxü ga yema ngüexëëruügu ga Moïchéarü mugüwa nguxëëtaegüxü

(Mt 23.1-36; Lc 11.37-54, 20.45-47)

³⁸ Ngechuchu rü norü nguxëëtaewa rü ñanagürü: —¡Pexuãëgü naxcèx i ngëma ngüexëëruügu i Moïchéarü mugüwa nguxëëtaegüxü! Erü nümagü rü norü me nixi i mexü i naxchirumaã na naxĩãneãxü. Rü nanaxwèxegü na ítamüwa duüxügu meã nüxü na rümoxëgüxü. ³⁹ —Rü ngutaquëxepataüguwa rü norü me nixi i ãëxgacügümëxwëxewa na natogüxü. Rü õnagü i taxüwa rü ngëma õnaãrü yoraxütawa ügüxü i nachicacèx nadaugü. ⁴⁰ —Natürü tüxna nanapuxü ya tümapatagü ya yixema yutegüxe. Rü ñuxüchi nanamëxëë i norü yumüxëgü na ngëmagu nügu yacuxgüxüçèx rü duüxügu nagu rüxĩnüëxüçèx na aixcüma mexügu na yixigüxü. Natürü nümagü tá nixi i yexeraãcü napoxcuxü —ñanagürü.

Yutecü ga ngearü dïëruãxcü ga Tupanacèx dïëru ngixü ixãcü

(Lc 21.1-4)

⁴¹ Wüxicana ga Ngechuchu rü tupauca ga taxüneãrü dïëruchiüãrü toxmèxtawa narüto. Rü yema inadawenü ga ñuxãcü duüxügu yexma ngixü yanaxücuchigüxü ga norü dïërugü. Rü muxüma ga duüxügu ga idïëruãxgüxüchixü rü yexma ngixü nayarüxücuchigü ga muxüchicü ga norü dïëru. ⁴² Rü ngürü yema ingu ga wüxi ga yutecü ga ngearü dïëruãxcü. Rü ngïma rü wüxi ga yema dïëruchiügu ngixü iyarüxücuchi ga taxretachinü ga dïëruyacü ga ítanücü. ⁴³ Rü yexguma ga Ngechuchu rü norü ngüexügüçèx naca, rü ñanagürü nüxü: —Aixcüma pemaã nüxü chixu rü ñaã ngecü i yutecü i ngearü dïëruãxcü, rü guxü i ngëma togü i dïëruchiügu dïëru ngixü ixücuchigüxüãrü yexera ngixü ixã. ⁴⁴ Erü guxüma i togü rü ngixü inaxãgü i ngëma nüxü iyaxügücü. Natürü ngïma ngixü natauxyane ngixü ixã i guxcüma i ngixü ngëxmëxcü i ngïrü õnatanü —ñanagürü.

13

Ngechuchu nanaxunagü na tupauca ga taxünegu tá na napogüexü

(Mt 24.1-2; Lc 21.5-6)

¹ Rü yexguma tupauca ga taxünewa ínaxüxügu ga Ngechuchu, rü wüxi ga norü ngüexügü rü ñanagürü nüxü: —Pa Ngüexëëruüx ¡dücax ñuxãcü nimexëchi ya daa tupauca ya itaxüne rü naxtapüxarü nutagü! —ñanagürü.

² Natürü Ngechuchu nanangãxü, rü ñanagürü: —Pema nüxü pedaugü ya guxünema ya yima tupauca ya taxüneãrü ípatagü. Natürü pemaã nüxü chixu rü aixcüma guxünema ya daa ípatagü rü tá nagu napogüe. Rü norü nutagü rü taxucütáma nügüëtü naxüxüra, rü bai tá ya wüxi —ñanagürü.

Cuëruügu i tá nüxü idauxü naxüpa na nagüxü i naãne

(Mt 24.3-28; Lc 21.7-24, 17.22-24)

³⁻⁴ Rü yemawena rü Oríbunecüarü Mèxpüne ga tupauca ga taxüneãrü toxmèxtawa yexmanewa naxi. Rü yema narüto ga Ngechuchu. Rü Pedru

rü Chaütiágu rü Cuáü rü Aüdré rü naxütawa naxĩ na noxrüwama nüxna nacagüexüçèx. Rü ñanagürügü: —Tanaxwèxe i tomaã nüxü quixu na ñuxgu tá nangupetüxü i ngēma nüxü quixuxü. ¿Rü tacü tá nixĩ i norü cuèxruü i nawa nüxü tacuáxü ega nawa tá nanguxgu i ngēma? —ñanagürügü. ⁵ Rü yexguma ga Ngechuchu rü nanangāxü rü ñanagürü nüxü: —¡Pexuãégü na taxúema pexü womüxèèxüçèx! ⁶—Erü muxüchixü i duüxügü tá ínangugü, rü chaugu tá nügü nicuxgü, rü ñanagürügü tá:

“Choma nixĩ i Cristu”, ñanagürügü tá. Rü muxüchixü i duüxügüxü tá nawomüxèè. ⁷ —Rü ngëxguma nüxü pexĩnüègu na nügü nadèixü i nachiuñnegü i ngaicamagüxü rü togü i nachiuñnegü i yaxügugüxü, ¡rü tãütáma ngēmacèx peñaxiãchiãégü! Erü woetama ngēmaãcü tá nangupetü. Natürü tãütáma naãneärü gux nixĩ i ngēma. ⁸ —Erü wüxi i nachiuñne rü to i nachiuñnemaã tá nügü nadai. Rü wüxi ya ãëxgacüarü churaragü rü to i ãëxgacüarü churaragümaã tá nügü nadai. Rü muxüma i nachicawa rü tá naxiãxãchiane. Rü tá taiya nangux. Natürü guxüma i ngēma rü norü ügümare nixĩ i ngēma ngúxü i tá ínguxü. ⁹ —¡Rü meã pegüna pedaugü! Erü ãëxgacügüpèxewa tá pexü nagagü, rü ngutaquèxepataügü tá pexü nicuaxgü. Rü nachiuñnegüarü ãëxgacügüpèxewa tá pexü nagagü naxcèx na chorü duüxügü na pixígüxü. Natürü ngēmaãcü tá pexü natauxcha na ngēma ãëxgacügümaã nüxü pixuxü i chauchiga. ¹⁰ —Natürü naxüpa na nagúxü i naãne rü tá nüxü nixugüe i Tupanaärü ore i guxü i nachiuñnegüwa. ¹¹ —Natürü ngëxguma ãëxgacügüpèxewa pexü nagagügu, ¡rü tãütáma pexoe-gaãégü naxcèx na tacümaã tá penangāxüxü! ¡Rü namaã nüxü pixu i ngēma ore i ngëxgumatama Tupana pexna äxü na nüxü pixuxüçèx! Erü tãütáma pema nixĩ na pidexagüxü, natürü Tupanaãe i Üünexü tá nixĩ i pewa idexaxü. ¹² —Rü nügüeneégüwa tátama rü ãëxgacügüxütawa nügü ínayaxuaxügü na ngēmaãcü tüxü nadèixüçèx. Rü ngëxgumarü tá ta i papágü rü mamágü rü tá naxácügüxü ínayaxuaxügü. Rü nümagü i naxácügü rü tá nanatügümaã rü naégümaã nanuè, rü tá tüxü ínayaxuaxügü na ãëxgacügü tüxü nadèixüçèx. ¹³ —Rü guxü i naãnewa rü duüxügü tá pexchi naxaie naxcèx na chorü duüxügü pixígüxü. Natürü yíxema naetüwa meã Tupanaäxü yaxõõmáxè, rü yíxema tá tixĩ ya aixcüma nayaxúxe i maxü i taguma gúxü. ¹⁴ —Rü ngëxguma nüxü pedèuxgu i ngēma ãüächixü rü ãücümaxüchixü i chixexèeruü i ngextá tama ínaxwèxexüwa na nangëxmaxü, rü ngëxguma ya yíxema Yudéaanewa ngëxmagüxe, rü tanaxwèxe i mëxpüñeãnewa tabuxmü. Rü texé ya yíxema nüxü daumatüxe, ¡rü name nixĩ i meã nagu tarüxñü i ngēma! ¹⁵ —Rü ngēma ngunexügu texé tümapataèxtüwa ngëxmagu, rü tama name i tümapatagu tayan-gaxi na tacü i tümäärü ngëmaxü tayayaxuxüçèx. ¹⁶ —Rü texé ya tümãnewa ngëxmaxè rü tama name i tümapatacèx tataegu na tümachirugü tayayaxuxüçèx. ¹⁷ —Rü ngēma ngunexügügu, rü wüxi i ngechaü tá nixĩ i tümacèx ya yíxema ngexegü ya itacharaügüxe rü yíxema maixãcügüxe. ¹⁸ —¡Rü Tupanana naxcèx peca i perü yumüxèwa na tama gáuane ixüyane pexü na nangupetüxüçèx i ngēma chixexü! ¹⁹—Erü ngēma ngunexügügu rü poraãcü tá nangëxma i ngúxü ga noxri Tupana naãne ixügügumama taguma yexmaxü, rü ngēmawena rü tagutáma nangëxma. ²⁰ —Rü ngëxguma Tupana tama nanoxrexèègu i ngēma ngunexügü, rü taxúetáma tamaxü. Natürü Tupana rü marü nananoxrexèè i ngēma ngunexügü erü tüxü nangechaü ya yíxema noxrüxü tüxü nadexe. ²¹ —Rü ngëxguma texé pexü ñagügu:

“Düçèx, daa nixĩ ya Cristu”, ñagügu, rü èxna:

“Gua nixĩ ya Cristu”, ñagügu, ¡rü tãxü i nüxü peyaxõgüxü! ²² —Erü Cristugüneta rü Tupanaärü orearü uruügüneta tá ínangugü. Rü tá nanaxügü

i muxūma i cuèxruūgū i taxūgū. Rū ngēmaācū, ega nūxū natauxchagu, rū tá tūxū nawomūxēēgū woo ya yíxema duūxēgū ya Tupanatama tūxū dexe. ²³ — ¡Pexuāēgū! Erū guxūma i ngēma tá ngupetūxū, rū marū naxūpa pemaā nūxū chixu.

Ñuxācū tá nixī i ngēxguma nataegugu ya Tupana Nane ya duūxūxū ixīcū
(Mt 24.29-35, 42, 44; Lc 21.25-36)

²⁴ — Natürü marū nangupetūgu i ngēma ngúxūgū, rū ngēma ngunexūgūgu rū tá nixo ya üèxcū rū tāūtáma inabaxi ya tauemacū. ²⁵ — Rū woramacurīgū rū èxtagū rū tá narūyi. Rū guxūma i daxūwa ngēxmaxū rū tá naxīāxāchitanū rū nachicana tá nixīgachitanū. ²⁶ — Rū ngēxguma i duūxūgū rū tá nūxū nadaugū ya Tupana Nane ya duūxūxū ixīcū na caixanexūgu ínaxīxū i guxūma i norū poramaā rū norū ngóonexūmaā. ²⁷ — Rū tá nanamu i norū orearū ngeruūgū i daxūcūāx na tūxū nanutaquēxexūcèx ya yíxema Tupana tūxū idexechixe ya guxūwama ngēxmagūxe ñuxmatáta naāne íyacuáxūwa nangu. ²⁸ — ¡perūxīnūē i ñāā nguxēētae i orix i iguerachiga, rū naxcèx pengúe! Rū ngēxguma ngexwacaxūxū i nachacūxácūgū iyarūyixgu rū naxūátūgu, rū ngēmawa nūxū pecuèx na paxa tá taunecū yīxū. ²⁹ — Rū ngēxgumarūū ta, rū ngēxguma nūxū pedèuxgu na nangupetūxū i ngēma pemaā nūxū chixuxū, rū ngēmawa tá nūxū pecuèx na paxaxūchi tá ínanguxū ya Tupana Nane ya duūxūxū ixīcū. ³⁰ — Rū guxūma i ngēma ñuxma pemaā nūxū chixuxū rū aixcūma tá nangupetū naxūpa na nayuexū i ngēma duūxūgū i ngēxguma maxēxū. ³¹ — Daxūguxū i naāne rū ñoma i naāne rū tá inayarūxo. Natürü chorū ore rū tagutáma inayarūxo, rū aixcūma tá ningu. ³² — Natürü ngēma ngunexū rū ora i nagu tá nangupetūxū i ngēma pemaā nūxū chixuxū, rū Tanatū ya Tupanaxīcatama nūxū nacuèx i ñuxgu tá na nangupetūxū i ngēma, rū taxúema ya togue nūxū tacuèx. Rū woo i norū orearū ngeruūgū i daxūcūāx rū tama nūxū nacuèxgū, rū woo i choma na Nane chíxū rū tama nūxū chacuèx i ñuxgu tá na nangupetūxū i ngēma. ³³ — Rū ngēmacèx, ¡pedaue rū pexuāēgū! Erū tama nūxū pecuèx i tacū rū ora tá íchangu i chomax. ³⁴ — Rū guxūma i ngēma pemaā nūxū chixuxū, rū ñoma wūxi ga yatū ga ixūāchichaūcū na to ga nachiūānewa naxūxūcèxrūxū nixī. Rū yemacèx norū puracūtanūxūna naxāga na mea nūxna nadaugūxūcèx ga guma napata. Rū ñuxūchi wūxichigūna nanaxā ga norū puracū. Rū yēma íāxārū dauruū rū nagu nanamu na mea nadauxūtaegūxūcèx. ³⁵⁻³⁶ — ¡Rū ngēmacèx i pema rū name na ípexuāxēgūxū! Erū tama nūxū pecuèx i ñuxgu tá ínangu ya yima cori ya ípataarū yora, rū bexmana noxri nachūtagu, rū ēxna ngāxūcūūgu, rū ēxna otá icaxgu, rū ēxna noxri yangóonegu. ¡Rū ngēmacèx ipedaue na ngürūāchi ínanguxgu tama ípepeeyane pexū na íyanguéūxūcèx! ³⁷ — Rū ngēma ore i pemaā nūxū chixuxū, rū guxū i duūxūgūcèx nixī. ¡Rū ipedauecha! —ñanagürü.

14

Āēxgacūgū naxcèx nadaugū na ñuxācu Ngechuchuxū yayauxgūxū
(Mt 26.1-5; Lc 22.1-2; Cu 11.45-53)

¹ Rū taxre ga ngunexū nataxu ga na nawa nanguxū ga Yudúgüarū peta ga Üpetūchiga ga nagu nangōxgūāxū ga pāū ga ngearū puxēēruūāxū. Rū ga paigüarū āēxgacūgū rū ngúexēēruūgū ga mugūwa nguxēētaegūxū rū naxcèx nadaugū ga ñuxācū bexma duūxūgūechita Ngechuchuxū na yayauxgūxū rū na yamèxgūāxūcèx. ² Yerü nümaxū rū ñanagürügū: —Taxucürūwama ñuxma petagu tayayauxgū, erū duūxūgū rū tá tamaā nanuē —ñanagürügū.

*Wüxi ga nge rü Ngechuchuerugu inaba ga pumara
(Mt 26.6-13; Cu 12.1-8)*

³ Rü Ngechuchu rü Betániãwa naxũ napatawa ga Chimáũ ga rüchaxü necümaã naxugüãcü. Rü yexguma mechawa natoyane, rü yéma ingu ga wüxi ga ngecü ga wüxiweũ ga pumara ga yixichixũ ga tatanüxũchixũ yéma ngecü. Rü iyapoyenagu ga yema pumarachixũ ga nuta ga mexêchicünaxcèx, rü Ngechuchuerugu inaba. ⁴ Natürü ñuxre ga yema yéma yexmagüxũ rü nanuẽ naxcèx ga yema naxüxũ ga yema ngecü, rü nügümaã ñanagürügü: —¿Tüxcüũ ngẽxma inaxaiyaxũ i ngẽma pumara? ⁵ —Rü narümemaẽ chi nixĩ i 300 tachinü i dïerugu namaã itaxe, rü ñuxũchi ngẽma dïerumaã nüxũ irüngüxèẽ i ngẽma duũxügü i ngearü dïeruãxgüxũ —ñanagürügü. Rü yemaãcü ngĩchiga nidexagü ga yema nge. ⁶ Natürü ga Ngechuchu rü ñanagürü nüxũ: —¡Ngexrüma! ¿Tüxcüũ ngĩxũ pechixewe? Erü ngẽma chomaã naxüxũ, rü wüxi i mexũ nixĩ. ⁷ —Rü ngẽma ngearü dïeruãxgüxũ rü guxügutáma petanüwa nangẽxmagü, rü ngẽmaãcü pexũ natauxcha na nüxũ perüngüxèẽxũ i ngẽxguma penaxwèxegu. Natürü i choma rü tãütáma guxügu petanüwa changẽxma. ⁸ —Rü ñãã nge rü inaxü i guxüma i ngẽma ngĩxũ tauxchaxũ, rü ngẽmacèx yoxni choxũ ipumaraxüne naxüpa na ichatáxũ. ⁹ —Rü aixcüma pemaã nüxũ chixu rü guxü i naãnewa i ngextá duũxügü nüxũ íixugügüxüwa i ore i maxèxèẽruũ, rü ñãã ngecü chomaã üxũ rü tá ta nüxũ nixugügü. Rü ngẽmaãcü tá ngĩxna nacüèxãchie i duũxügü —ñanagürü ga Ngechuchu.

*Yuda rü ãëxgacügümaã nanamexèẽ na ñuxãcü tá na Ngechuchuxũ
yayauxgüxüçèx
(Mt 26.14-16; Lc 22.3-6)*

¹⁰ Rü Yuda Icariúte ga wüxi ga yema 12 ga ngúexütanüxũ ixĩxũ, rü Yudiugüarü paigüarü ãëxgacügütanüwa naxü na namaã yamexèẽãxüçèx na ñuxãcü tá na Ngechuchuxũ yayauxgüxüçèx. ¹¹ Rü yexguma yemaxũ naxĩnüegu, rü nümagü ga yema ãëxgacügü rü nataãëgü. Rü dïeru Yudana ngĩxũ naxuaxügü. Rü yexgumama inanaxügü ga Yuda ga naxcèx na nadauxũ ga ñuxãcü nüxũ na natauxchaxèẽgüãxũ na duũxügüechita Ngechuchuxũ yayauxgüxüçèx.

*Coriarü õnachiga
(Mt 26.17-29; Lc 22.7-23; Cu 13.21-30; 1 Co 11.23-26)*

¹² Rü nawa nangu ga ngunexũ ga nagu inaxügüxũ ga yema peta ga pãũ ga ngearü puxèẽruũãxũ nagu nangõxgüxũ. Rü yema nixĩ ga ngunexũ ga nagu carneruxacü naxcèx yamèxgüxũ ga Üpetüchigaarü peta. Rü yexguma ga norü ngúexügü rü Ngechuchuna nacagüe, rü ñanagürügü: —¿Ngextá cunaxwèxe na tanamexèẽxũ i õna i Üpetüchigaarü petagu ingõxũ? —ñanagürügü. ¹³ Rü yexguma ga nüma rü nanamu ga taxre ga norü ngúexügü, rü ñanagürü nüxũ: —¡Ëcü, yéa ñãnewa pexĩ! Rü ngẽxma tá nüxũ peyangau i wüxi i yatü i wüxi ya tüxũ ya dexámaã ããcuxe ngẽxma tüxũ ingexũ. ¡Rü nawe perüxĩ! ¹⁴ —¡Rü yima ñpata ya nagu yaxücune i ngẽma yatü, rü yima ñãrü yoramaã nüxũ pixu, rü ñapegügü nüxũ:

“Torü ngúexèẽruũ nüxũ nacüáxchaũ na ngẽxũ yĩxũ i ngẽma ucapu i norü ngúexügümaã tá nawa nachibüxũ i Üpetüchigaarü õnagu”, ñapegügü nüxũ! ¹⁵ —Rü nüma tá pexũ nüxũ nadauxèẽ i wüxi i ucapu i taxũ i marü meã mexèẽxũ i norü daxüchiüwa ngẽxmaxũ. ¡Rü ngẽma penamexèẽx i tórü õna i Üpetüchigacèx ixĩxũ! —ñanagürü nüxũ. ¹⁶ Rü inaxĩãchi ga yema taxre ga ngúexügü, rü ñãnewa naxĩ. Rü yexma nüxũ inayangaugü ga guxüma yema Ngechuchu namaã nüxũ ixuxürüũ. Rü yéma nanamexèẽ ga õna ga

Ûpetüchigacèx ixĩxũ. ¹⁷ Rũ yexguma marũ nachütachaũgu, rũ ínangu ga Ngechuchu namaã ga yema 12 ga norũ ngúexũgũ. ¹⁸ Rũ yexguma mechawa ínachibüeyane, rũ Ngechuchu rũ ñanagürũ nüxũ: —Aixcũma pemaã nüxũ chixu rũ wüxie ya petanüwa i ñuxma chomaã nuã chibüxe tá tixĩ ya bexma choxũ íyaxuaxũxẽ —ñanagürũ. ¹⁹ Rũ yexguma ga nümagũ ga norũ ngúexũgũ rũ poraãcü nangechaũgũ. Rũ inanaxügũe ga na wüxichigũ nüxna icachigũxũ, rũ ñanagürũgũ: —Pa Corix, ¿choma tá chiĩxũ i cuxũ íchayaxuaxũxũ? —ñanagürũgũ. ²⁰ Rũ nüma ga Ngechuchu nanangãxũ rũ ñanagürũ nüxũ: —Wüxi i pema i 12 tanüwa i daatama poratuwa norũ pãũ iwaixẽxũ, rũ ngẽma tá nixĩ i choxũ íyaxuaxũxũ. ²¹ —Rũ choma i Tupana Nane na duũxũxũ chiĩxũ, rũ tá chayü ngẽma Tupanaãrũ ore i ümatüxũ nüxũ ixuxürũ. Natürũ wüxi i ngechaũxũchi nixĩ naxcèx i ngẽma yatü i choxũ íyaxuaxũxũ. Rũ narümemaẽ chi nixĩ ga noxtacũma tãũ chima na nabuxũ —ñanagürũ. ²² Rũ yexguma ínachibüeyane, rũ Ngechuchu nanayaxu ga pãũ. Rũ Tupanana moxẽ naxã, rũ inanabücu, rũ norũ ngúexũgũxũ nayanu. Rũ ñanagürũ nüxũ: —¡Penayax i ñãã pãũ! Rũ ngẽma rũ chaxunehiga nixĩ —ñanagürũ. ²³ Rũ yemawena nanayaxu ga wüxi ga pochiyu ga binumaã ããcuxũ. Rũ yexgumarũ ta Tupanana moxẽ naxcèx naxãxĩra, rũ ñuxũchi norũ ngúexũgũna nanaxã. Rũ guxũma nawa naxaxegũ. ²⁴ Rũ ñanagürũ nüxũ: —Daa binu ya chaugũ i muxũma i duũxũgücèx íbacüchiga nixĩ. Rũ yimawa Tupana meãma nanangoxẽẽ na aixcũma yĩxũ i norũ uneta. ²⁵ —Rũ aixcũma pemaã nüxũ chixu rũ tãxütãma wena chayaxaxũ ya daa binu ñuxmatãta Tupana ãẽxgacũ íixũwa binu ya ngexwacaxũcü chayaxaxũx —ñanagürũ.

Ngechuchu nüxũ nixu rũ Pedru rũ taxütãma nügũ nixu na norũ ngúexũ yĩxũ (Mt 26.30-35; Lc 22.31-34; Cu 13.36-38)

²⁶ Rũ ñuxũchi nawiyaegũ ñuxre ga Tupanaãrũ wiyaegu. Rũ yemawena rũ Oríbunecüarũ Mèxpúnewa naxĩ. ²⁷ Rũ yexguma ga Ngechuchu rũ ñanagürũ nüxũ: —Guxãma i pema rũ tá choxũ ípetèxgũ. Erũ ngẽmaãcü nüxũ nixu i Tupanaãrũ ore i ümatüxũ i ñaxũ: “Tã chayamèx ya carneruarũ dauruũ, rũ tá nanaxüanemare i carnerugũ”, ñaxũ. ²⁸ —Natürũ ngẽxguma marũ yuwa ícharüdaxguwena, rũ chaxira tá pexüpa Gariréaanewa chaxũ —ñanagürũ. ²⁹ Rũ yexguma ga Pedru rũ ñanagürũ nüxũ: —Woo guxũma i togũ cuxũ ítèxgu, rũ choma rũ tãütãma cuxũ íchatèx —ñanagürũ. ³⁰ Rũ Ngechuchu nanangãxũ rũ ñanagürũ nüxũ: —Aixcũma cumaã nüxũ chixu rũ ñomatama i chütaxũgu rũ naxüpa na taxreèxpüxcũna yaçaxũ i otã, rũ tomaèxpüxcũna taxütãma cugũ quixu na chorũ duũxũ quiĩxũ —ñanagürũ. ³¹ Natürũ nüma ga Pedru rũ ñanagürũama: —Woo wüxigu cumaã chayuxgu, rũ tãxütãma chaugũ ichicux na curũ duũxũ chiĩxũ —ñanagürũ. Rũ guxũma ga togũ ga norũ ngúexũgũ rũ ta yema ñanagürũgũ.

Ngechuchu rũ Yechemaníwa nayayumüxẽ (Mt 26.36-46; Lc 22.39-46)

³² Rũ yemawena rũ Ngechuchu rũ norũ ngúexũgũ rũ nawa naxĩ ga wüxi ga nachica ga Yechemanígu ãegaxũ. Rũ Ngechuchu rũ ñanagürũ nüxũ: —¡Nuã perütogũ yoxni paxa yéa chayayumüxẽ! —ñanagürũ. ³³ Rũ ñuxũchi ínayagagũ ga Pedru, rũ Chaũtiágu, rũ Cuáũ. Rũ naxcèx inaxügũ ga na poraãcü nangechaũxũ rũ naxixãchiãxũ. ³⁴ Rũ yexguma rũ ñanagürũ nüxũ: —Poraãcü changechaũ, rũ nagu charüxĩnũ na ngẽmamaã tá chayuxũ. ¡Rũ nuxa perücho i pemax, rũ ipedaue! —ñanagürũ. ³⁵ Rũ yexguma ga Ngechuchu rũ yéaxüra naxũ. Rũ ñaxtúanegu nanangücuchi. Rũ Tupanana naxcèx naca na nawa ínanguxuchixüçèx ga yema ngüxũ ga yexguma chi Tupanaãrũ ngúchaũ yixĩgu.

³⁶ Rū norū yumūxēwa rü ñanagürü: —Pa Chaunatūx, cuxcèx rü guxūma natauxcha. ¡Rü nüxna choxū ínanguxuchixēē i ñaã ngúxū i tá choxū üpetūxū! Natürü chanaxwèxe i cunaxü i cuxrütama ngúchaū rü tama i choxrü —ñanagürü. ³⁷ Rū ñuxūchi nataegu ga norū ngúexūgü íyexmagūxūwa. Rū nüxū inayangau ga na ínapeexū. Rū ñanagürü Pedruxū: —Pa Chimáúx, ¿ícupe? ¿Tama éxna namaã cupora na icudauxū, rü bai i wüxi i ora? ³⁸ —¡Rü ipedaue, rü Tupanana naxcèx peça na pexū nangūxēēxūcèx na tama choxū ípetáxūcèx i ngēxguma tacü rü guxchaxū pexū üpetügu! Erü aixcūma peãēwa rü ípememare, natürü pexene nixī i ngēma turaxū —ñanagürü. ³⁹ Rū wenaxârü ínixū, rü noxrirüütama nayayumūxē. ⁴⁰ Rū yexguma wenaxârü norū ngúexūgücèx nataegugu, rü nüxū inayangau ga na wenaxârü ínapeexū, yerü poraãcü nayaxtaexūchi. Rū yemacèx ga nūmagü rü tama nüxū nacuèxgü ga na tacūmaã tá nangāxūgūāxū. ⁴¹ Rū norū tomaēxpūxcūna wenaxârü norū ngúexūgücèx nataegu, rü ñanagürü nüxū: —¿Ñuxma rü ta éxna ípepeeama rü iperüngūēāma? ¡Rü marütama! Erü choma i Tupana Nane na duūxūxū chiūxū rü marü nawa nangu i ora na choxū na yayauxgūxū rü nüxna na choxū namugūxūcèx i duūxūgü i chixexū i pecaduāxgūxū. ⁴² —¡Rü ipechigü, rü ngīxā ítixī! Erü marü ñomama nixī i ngēma choxū íyaxuaxūxū —ñanagürü.

Ngechuchuxū niyauxgü

(Mt 26.47-56; Lc 22.47-53; Cu 18.2-11)

⁴³ Rū yexguma íyadexayane ga Ngechuchu, rü ínangu ga Yuda ga norū ngúexūchiréx ixīxū. Rū nawe narūxī ga muxūma ga duūxūgü ga taramaã rü naímaã ixāxnexū. Rū yema nixī ga duūxūgü ga yéma namugūxū ga paigüarü āēxgacügü rü ngúexēēruūgü ga mugüwa nguxēētaegūxū rü Yudiugüarü āēxgacügüerugü. ⁴⁴ Rū Yuda ga ínaxuaxūxū rü marü yema duūxūgūmaã nanamexēē, rü ñanagürü:

“Ngēma nüxū chachúxuxū nixī i Ngechuchu. Rū ngēma tá nixī i piyauxgūxū rü meã peyanáíácūma peyagagūxū” —ñanagürü. ⁴⁵ Rū yemaãcü Ngechuchucèx nixū, rü ñanagürü nüxū: —Pa Ngúexēēruūx —ñanagürü. Rū ñuxūchi nanachúxu. ⁴⁶ Rū yexgumatama Ngechuchuxū niyauxgü. ⁴⁷ Natürü wüxi ga Ngechuchutanūxū nanawéxechi ga norü tara, rü yemamaã paigüarü āēxgacüarü duūxūxū ínadaechinü. ⁴⁸ Rū yexguma ga Ngechuchu rü yema duūxūgūna naca, rü ñanagürü nüxū: —¿Tūxcüū taragü rü naíxmenèxāgūmaã chauxcèx nuã pexī na choxū peyarüyauxgūxūcèx ñoma wüxi i ngítèxáxū chiūxürüü? ⁴⁹ —Rü guxū ga ngunexūgu rü petanüwa chayexma ga yexguma tupauca ga taxūnewa changūxēētaegu, rü taguma choxū piyauxgü. Natürü ñaã ñuxma ngupetūxū, rü nangupetü na yanguxūcèx i Tupanaârü ore i ümatūxū —ñanagürü. ⁵⁰ Rū yexguma ga guxūma ga norü ngúexūgü rü nüxna nibuxmü. Rū nüxīcatama yéma nanatèxgü ga Ngechuchu. ⁵¹ Natürü wüxi ga ngextūxücü ga düxruūmaāxīca nügü nuquecū nawe nixūchigü. Rū yema duūxūgü rü nayayauxgü. ⁵² Natürü nūma rü nüxū ningēx ga yema düxruū, rü yemaãcü ngexchiruācūma niña.

Āēxgacügüpēxewa Ngechuchuxū nagagü

(Mt 26.57-68; Lc 22.54-55, 63-71; Cu 18.12-14, 19-24)

⁵³ Rū yexguma ga yema duūxūgü rü paigüarü āēxgacüpēxewa nana-gagü ga Ngechuchu. Rū yexma nangutaquēxegü ga guxūma ga togü ga paigü ga āēxgacügü ixīgūxū, rü yema Yudiugüarü āēxgacügüerugü, rü yema ngúexēēruūgü ga mugüwa nguxēētaegūxū. ⁵⁴ Natürü ga Pedru rü yaxūgu nawe nixāchigü ñuxmata guma paigüarü āēxgacüpataèxtüwa nangu. Rū purichíagü ga tupauca ga taxūneârü dauruūgūmaã yéma íāxtüwa narüto.

Rü nügü yéma nanaixũ üxüxtawa. ⁵⁵ Rü yema paigüarü ãëxgacügü rü guxüma ga yema togü ga ãëxgacügü ga itaxü rü naxcèx nadaugü ga ñuxãcü Ngechuchuxü na ínaxuaxügüxü rü na yamèxgüãxücèx. Natürü taxucürüwa nüxü inayangaugü ga tacücèx tá na yamèxgüãxü. ⁵⁶ Yerü woo muxüma ga duüxügü rü nüxü nixugüe ga doramare ga nachiga, natürü nügütanüwatama rü tama nawüxigu ga norü ore. ⁵⁷⁻⁵⁸ Rü ñuxre ga togü inachigü rü doraxümare nixugüe ga Ngechuchuchiga. Rü ñanagürügü: —Toma nüxü taxĩnüë ga na ñaxü:

“Tá chanangutaxüxëë ya daa tupauca ya taxüne ya duüxügü üxüne. Rü tomaëxpüx i ngunexügu tá chanaxü ya náí ya tama duüxügü üxüne”, ñaxü —ñanagürügü. ⁵⁹ Natürü woo yema oremaã, rü tama nawüxiguéga ga norü ore. ⁶⁰ Rü yexguma ga guma paigüarü ãëxgacü rü guxüpèxewa inachi. Rü Ngechuchuna naca, rü ñanagürü: —¿Éxna taxuxümaãma cunangãxü i ñuxmax? ¿Rü tacü nixĩ i ngëma nüxü yaxugüxü i cuchiga? —ñanagürü. ⁶¹ Natürü ga Ngechuchu rü nangeëxmare, rü taxuxümaãma nanangãxü. Rü yemacèx ga nüma ga paigüarü ãëxgacü rü wenaxãrü nüxna naca, rü ñanagürü: —¿Rü cuma quiixü ya Cristu ya Tupana ya mecü Nane? —ñanagürü. ⁶² Rü Ngechuchu rü ñanagürü nüxü: —Ngü. Ngëma nüxü quixuxü chixĩ. Rü tá choxü pedaugü i ngëxguma Tupana ya poracüarü tügü necüwawa charütöxgu rü ngëxguma caixanexügu wenaxãrü núma chaxüxgu —ñanagürü. ⁶³ Rü yexguma ga guma paigüarü ãëxgacü rü norü numaã nügüchirugu nagaugü. Rü ñanagürü: —¿Tüxcüü marü tanaxwèxe i to i duüxü i nüxü ixugüxü i nachiga? ⁶⁴ —Rü pematama marü nüxü pexĩnüë na ñuxãcü Tupanamaã naguxchigaxü. ¿Rü ñuxü ñapegüxü i ñuxmax? —ñanagürü. Rü guxüma wüxigu narüxĩnüë rü: —Aixcüma nixĩ na chixexü naxüxü rü namexü na nayuxü —ñanagürügü. ⁶⁵ Rü ñuxre ga nümagü rü inanaxügüe ga nüxna na naçuaixgüexü. Rü nanatüxetügü rü ñuxüchi nüxü nidagügü ñaxümaã: —¡Nüxü nacuèx na texé cuxü idagüxü! —ñanagürügü. Rü yema tupauca ga taxüneärü dauruügü ga purichíagü rü nanapechiwegü.

*Pedru rü tama nügü nixu na Ngechuchuxü nacuáxü
(Mt 26.69-75; Lc 22.56-62; Cu 18.15-18, 25-29)*

⁶⁶ Rü yoxni ga Pedru rü ñaxtüwa ãëxgacüpataëxtüwa nayexma. Rü yexgumayane yéma ingu ga wüxi ga pacü ga guma ãëxgacüarü duüxü ixícü. ⁶⁷ Rü yexguma Pedruxü nadèuxgu ga yéma üxüxtawa nügü na nanaixüxü, rü meã nüxü idawenü, rü ngĩgürügü nüxü: —Cuma rü ta namücü quixĩ i ngëma Ngechuchu i Nacharétucüãx —ngĩgürügü. ⁶⁸ Natürü ga Pedru rü nügü inicux na Ngechuchuarü duüxü yĩxü, rü ñanagürü: —Choma rü tama nüxü chacuèx ya yima. Rü tama nüxü chacuèx i tacüchiga nixĩ i ngëma nüxü quixuxü —ñanagürü. Rü yexguma ga nüma rü ñpataëxtüarü düxétüwa naxü. Rü yexgumatama nica ga otá. ⁶⁹ Natürü ga yema pacü rü wenaxãrü Pedruxü idau, rü inaxügü ga yema togümaã nüxü na yaxuxü, rü ngĩgürügü: —Ñaa rü wüxi i natanüxü nixĩ —ngĩgürügü. ⁷⁰ Natürü nüma ga Pedru rü wena tama nügü nixu. Rü yixcamaxüra rü yema duüxügü ga yéma yexmagüxü rü wenaxãrü ñanagürügü nüxü: —Aixcüma nixĩ na cuma rü ta ngëma Ngechuchutanüxü na quiixü, erü wüxi i Gariréaanecüãx quixĩ —ñanagürügü. ⁷¹ Rü yexguma ga Pedru rü poraãcü nügü nixã, rü ñanagürü: —Rü aixcüma tama nüxü chacuèx i ngëma yatü i nachiga pidexagüxü. Rü ngëxguma doraxü chixuxgu rü ¡Tupana choxü poxcux! —ñanagürü. ⁷² Rü yexgumatama norü taxreëxpüxcüna nica ga otá. Rü yexguma ga Pedru rü nüxna nacuèxãchi ga yema ore ga üpaacü Ngechuchu namaã nüxü ixuxü ga ñaxü:

“Rü naxüpa na taxreëxpüxcüna otá içaxü, rü cuma rü tá tomaëxpüxcüna cugü quicux na chorü duüxü quiixü”, ñaxü. Rü yexguma ga Pedru rü poraäcüxüchima naxaxu.

15

Piratupëxewa nayexma ga Ngechuchu (Mt 27.1-2, 11-14; Lc 23.1-5; Cu 18.28-38)

¹ Rü yexguma yangunegu, rü nangutaquëxegü ga äëxgacügü ga taxügu ga paigüarü äëxgacügü rü Yudíugüarü äëxgacügüerugü rü ngüxëëruügu ga mugüwa nguxëëtaegüxü rü guxüma ga togü ga yema äëxgacügütanüwa ügüxü. Rü Ngechuchuxü yanëixgüchacüüäcüma äëxgacü ga Piratuxütawa nanagagü. ² Rü nüma ga Piratu rü Ngechuchuna naca rü ñanagürü: —¿Cuma quiixü i Yudíugüarü äëxgacü ya tacü? —ñanagürü. Rü Ngechuchu nanangäxü, rü ñanagürü: —Ngü, yima nüxü quixucü chixi —ñanagürü. ³⁻⁴ Natürü yema paigüarü äëxgacügü rü poraäcü inanaxuaxügüama, rü yemacëx ga Piratu rü wenaxärü Ngechuchuna naca, rü ñanagürü: —¿Éxna taxuxümaäma cunangäxü? ¿Düçëx i ñuxre i cuchiga i nüxü yaxugüexü! —ñanagürü. ⁵ Natürü ga Ngechuchu rü taxuxümaäma nanangäxü. Rü yemacëx ga Piratu rü poraäcü nabaixächiaë.

Piratu rü Ngechuchumaä nanaxuegu na nayuxüçèx (Mt 27.15-31; Lc 23.13-25; Cu 18.38-19.16)

⁶ Rü gucü ga taunecügu ga yexguma yema Üpetüchigaarü petawa nanguxgu rü Piratu inananguxuchixëëxü ga wüxi ga poxcuxü ga duüxügü naxcëx ícagüxü, yerü yema nixi ga nacüma. ⁷ Rü wüxi ga yatü ga Barabágu äegaxü, rü poxcupataügu napoxcu wüxigu namaä ga togü ga natanüxü ga máëtagüxü ga yexguma äëxgacüxü inatëxüchigüchaügu. ⁸ Rü yema duüxügü rü yema Piratuxütawa nangugü. Rü inanaxügüe ga Piratuna na nacagüexü na naxcëx yangéäxüçèx ga wüxi ga poxcuxü aixrügumarü. ⁹ Rü Piratu nanangäxü, rü ñanagürü: —¿Penaxwëxexü na pexcëx íchananguxuchixëëxü ya yima Ngechuchu ya duüxügü Yudíugüarü äëxgacümaä naxugüäcü? —ñanagürü. ¹⁰ Rü yema ñanagürü ga Piratu yerü nüxü nacüçèx ga na yema paigüarü äëxgacügü rü na yaxauxächixüçèx yixü ga Ngechuchu nüxna yamugüäxü. ¹¹ Natürü ga yema paigüarü äëxgacügü rü duüxügüxü namugü ga na tagaäcü naxcëx ínacagüxü ga na Barabáxü yangéxüçèx. ¹² Rü yexguma ga Piratu rü nüxna naca, rü ñanagürü: —¿Rü tacü nixi i penaxwëxexü na chanaxüxü namaä ya yima Yudíugüarü Äëxgacügu pexüégacü? —ñanagürü. ¹³ Rü nümagü ga duüxügü rü tagaäcü nanangäxügü, rü ñanagürügü: —¿Curuchawa yapota! —ñanagürügü. ¹⁴ Rü yexguma ga Piratu rü ñanagürü nüxü: —¿Natürü tacü rü chixexü naxü? —ñanagürü. Natürü ga nümagü rü wenaxärü tagaäcü ñanagürügü: —¿Curuchawa yapota! —ñanagürügü. ¹⁵ Rü yexguma ga Piratu rü Barabáxü íanguxuchixëë, yerü duüxügüxü nataäëxëëchaü. Rü yexguma churaragüxü Ngechuchuxü naçuaixëëguwena ga Piratu, rü ñüxüchi nüxna nanamu na curuchawa yanapotagüäxüçèx. ¹⁶ Rü yexguma ga nümagü ga churaragü rü äëxgacüpataëxtüwa nanagagü. Rü yema nanangutaquëxexëë ga guxüma ga namücügü ga churaragü. ¹⁷ Rü ñüxüchi ga yema churaragü rü wüxi ga máxü ga daucharaxü ga naxchirugu nayacuxëëgü. Rü naëruwa nayangëxcuchigü ga wüxi ga boxü ga chuchuxüwa naxügüxü. ¹⁸ Rü yemawena inanaxügüe na tagaäcü ñagüxü: —¿Namaxü ya Yudíugüarü äëxgacü! —ñagüxü. ¹⁹ Rü wüxi ga naixmenëxämaä naëruwa nanaçuaixcagü, rü nüxna nacuaixgüe. Rü napëxegu nacaxäpüxügü rü nüxü

nicuèxüügüneta. ²⁰ Rü yexguma yemaãcü nagu yadauxcüraxüügüwena, rü ínanacuxchigü ga yema naxchiru ga daucharaxü. Rü wenaxãrü naxchirugutama nayacuxëëgü. Rü ñuxüchi ínanagaxüchigü na curuchawa yanapotagüãxücèx.

Ngechuchuxü curuchawa nipotagü
(Mt 27.32-44; Lc 23.26-43; Cu 19.17-27)

²¹ Rü yéma naxüpetü ga wüxi ga yatü ga Chirenecüãx ga Chimáügu ãegacü ga Areyáüdrü rü Rufu nanatü ixícü ga naãnewa ne ücü. Rü yexguma yéma naxüpetügu rü yema churaragü rü guma yatüxü ngíxü iningexëëgü ga Ngechuchuarü curucha. ²² Rü Ngechuchuxü nawa nagagü ga wüxi ga nachica ga Górgutagu ãegaxü. Rü yema naega rü: Duüxëëruchinèxãchitaü, ñaxüchiga nixí. ²³ Rü nüxna nanaxãgü ga binu ga miramaã ãeücü. Natürü nüma ga Ngechuchu rü tama nayaxaxü. ²⁴ Rü yemawena curuchawa nayapotagü. Rü nümagü ga churaragü rü wüxi ga díeru ngíxü nañanagügü na yemawa nüxü nacuèxgüxücèx na ñuxãcü tá nügümaã yatoyeãxücèx ga Ngechuchuchiru, rü tacü tá na yangexü ga wüxichigü. ²⁵ Rü meãma 9 arü oragu ga pèxmama nixí ga curuchawa yapotagüãxü. ²⁶ Rü yéma nayapocuchi ga wüxi ga mürapewa ga ãegatachinüxü ga nüxü ixuxü ga tacücèx curuchawa na yapotagüãxü. Rü yema naega ga mürapewagu üxü, rü ñanagürü: “Yudíugüarü Æëxgacü”, ñanagürü. ²⁷ Rü naxrüü curuchawa nayapotagü ga taxre ga máëtagüxü rü wüxi ga norü tügünecüwawa rü to ga norü toxwecüwawa. ²⁸ Rü yemaãcü ningu ga Tupanaãrü ore ga ümatüxü ga ñaxü:

“Ngëma chixexü ügüxütanüwaama natèx”,

ñaxü. ²⁹⁻³⁰ Rü yema duüxügü ga yéma chopetüxü, rü Ngechuchumaã naguxchigagü, rü nanexãërugüãcüma ñanagürügü: —¡Dücèx! Cuma cunangutaüxëëga ya tupauca ya taxüne, rü tomaëxpüx i ngunexügu wenaaxãrü ícunadaxëëga. ¡Écü! ¡Cugütama namaxëë i ñuxmax, rü íruxí i curuchawa! —ñanagürügü. ³¹ Rü yexgumarüü ta Ngechuchuxü nacugüecüraxü ga paigüarü ãëxgacügü, rü ngüxëëruügü ga ore ga mugüwa nguxëëtaegüxü. Rü ñanagürügü: —Nüma rü togüxü namaxëëë, natürü taxucürüwama nügütama namaxëë. ³² —¡Ñuxma rü ínaxíx i curuchawa i ngëma Cristu i Iraéanecüãxãrü Æëxgacü na nüxü idaugüxücèx rü nüxü yaxögüxücèx! —ñanagürügü. Rü woo ga yema máëtagüxü ga naxrüü curuchawa ipotagüxü, rü namaã naguxchigagü.

Nayu ga Ngechuchu
(Mt 27.45-56; Lc 23.44-49; Cu 19.28-30)

³³ Rü yexguma tocuchiwa nanguxgu, rü guxü ga naãnewa naxëãne ñuxmata yáuanecü tomaëxpüxarü orawa nangu. ³⁴ Rü yematama oragu rü tagaãcü aita naxü ga Ngechuchu, rü ñanagürü: —Eríx, Eríx, ¿damá chabátani? —ñanagürü. Rü ngëma rü ñaxüchiga nixí: “Pa Chorü Tupanax, Pa Chorü Tupanax ¿tüxcüü choxü nuã cutèx?” ñaxüchiga nixí. ³⁵ Rü nümaxü ga duüxügü ga yéma yexmagüxü, rü nüxü naxínüë rü ñanagürügü: —¡Dücèx, nüxü pexínüë! Nuxcümaücü ga Tupanaãrü orearü uruü ga Eríacèx naca —ñanagürügü. ³⁶ Rü yexguma rü wüxi ga yema duüxügü ga yéma yexmagüxü, rü inañaãchi rü wüxi ga tüaxmü niwaixëë namaã ga binu ga marü ngüchièxüchicü. Rü wüxi ga dexnewa nayanèix, rü ñuxüchi Ngechuchuèxgu nanawëx na nüxü natuxuxücèx. Rü yema togüxü ñanagürügü: —¡Yixrüma! ¡Ngíxã rü itarüdaunü ngoxita Ería nuã ü na curuchawa ínaxíxëëãxücèx! —ñanagürügü. ³⁷ Natürü nüma ga Ngechuchu rü tagaãcü aita naxü, rü ñuxüchi nayu. ³⁸ Rü yexguma ga tupauca ga taxüneãrü tüyemachiãxü rü taxregu

narügaute. Rü daxüwa inaxügü ga na nagautexü rü ñuxmata ñaxtüwa nangu. ³⁹ Rü guma churaragüarü ãëxgacü ga Dumacüãx ga Ngechuchupëxewa yexmacü, rü yexguma nüxü nadëuxgu ga na nayuxü, rü ñanagürü: —Aixcüma nixi ya daa yatü i Tupana Nane na yixü —ñanagürü. ⁴⁰ Rü iyexmagü ta ga ñuxre ga ngecügü ga yéma yaxüwa nüxü rüdaunü. Rü yematanüwa iyexmagü ga María ga Magadacüãx, rü Charumé, rü María ga Yúche rü Chaütiágu ga rübumaëcü naë. ⁴¹ Rü yema ngecügü iyixi ga Ngechuchuxü íxümücügücü rü nüxü rüngüxëëgücü ga yexguma Gariréaanewa nayexmagu. Rü yexgumarü ta yéma iyexmagü ga mucüma ga naïgü ga ngecügü ga Ngechuchuwa rüxücü ga yexguma Yerucharéüwa naxüxgu.

Ngechuchu rü naxmaxügu nayanaxücuchigü

(Mt 27.57-61; Lc 23.50-56; Cu 19.38-42)

⁴²⁻⁴³ Rü yexguma marü nachütachaügu ga yema ngunexü ga Yudíugü nagu nügü imexëëgüxü naxcèx ga ngüxchigaarü ngunexü, rü noxtacüma Piratuxütawa naxü ga Yúche ga Arimatéacüãx. Rü nüma ga guma Yúche rü Yudíugüarü ãëxgacügü ga tacütanüwa naxü, rü wüxi ga ãëxgacü ga poraäcü nüxü nangechaügücü nixi. Rü nüma rü ta ínananguxëë na Tupana norü ãëxgacü yixüçèx. Rü Piratuxütawa naxcèx ínayaca ga Ngechuchuxüne. ⁴⁴ Rü nabaixächiaë ga Piratu ga marü na nayuxü. Rü yemacèx norü churaragüarü ãëxgacücèx nangema na nüxna naçaxüçèx na ñuxgumama yixü ga marü na nayuxü. ⁴⁵ Rü yexguma norü churaragüarü ãëxgacü namaã nüxü ixuxgu ga marü na nayuxü, rü nüma ga Piratu rü Yúchena nanaxã ga naxüne. ⁴⁶ Rü yexguma ga Yúche rü naxcèx nataxe ga wüxi ga naxchápenüü ga mexëchixü. Rü curuchawa nanayaxu ga Ngechuchuxüne, rü yema naxchápenüümaã nananuque. Rü wüxi ga mëxpüne ga nutanaxcèxgu üpaacü yacaxmaügüxü ga naxmaxügu nayanaxücuchi. Rü ñuxüchi wüxi ga nuta ga tacümaã nanangüxtaü. ⁴⁷ Rü María ga Magadacüãx rü María ga Yúche naë rü nüxü irüdaunü ga ngexta na yanaxücuchigüãxü.

16

Wenaxärü namaxü ga Ngechuchu

(Mt 28.1-10; Lc 24.1-12; Cu 20.1-10)

¹ Rü sabaduarü ngunexüguwena, rü María ga Magadacüãx, rü Charumé, rü María ga Chaütiágu naë naxcèx itaxegü ga pumara na namaã nachaãxüçèx ga Ngechuchuxüne. ² Rü pëxmamaxüchi ga noxri üèxcü iyarügoxgu ga yüxüarü ngunexügu, rü yema ngecügü rü íyadaugü ga yema naxmaxü ga nagu yanaxücuchigüãxüwa. ³ Rü ngígü ngígürügü: —¿Texé tá taxcèx ítanaxügachi ya yima nuta ya namaã nangüxtaücü? —ngígürügü. ⁴ Natürü yexguma meãma nüxü nadaunügu, rü nüxü idaugü ga marü na ínaxügachixü ga guma nuta ga tacü ga namaã nangüxtaücü ga yema naxmaxü. ⁵ Rü yexguma nagu nadaugügu ga yema naxmaxü, rü nüxü idaugü ga wüxi ga ngextüxücü ga mëxchiruxü ga cómüchiruxü ga yéma naxmaxüarü tügünecüwawa rütöxü. Rü poraäcü ibaixächiaëgü ga yema ngecügü. ⁶ Natürü nüma rü ñanagürü ngixü: —¡Tãxü i pebaixächiaëxü! Pema rü naxcèx pedaugü ya Ngechuchu ya Nacharétucüãx ga guma curuchawa yapotagüãcü. Marü wena namaxü, rü nataxuma i nuã. ¡Düçèx, meã nüxü pedëux i ñaã nachica ga nagu naxügüãxü! ⁷ —¡Rü paxa ípixi rü Pedrumaã rü ngëma togü i ngüexügümaã nüxü peyarüxugüe, rü ñapegügü nüxü:

“Nüma ya Ngechuchu rü marü nüxüra pexüpa Gariréaanewa naxü. Rü ngema tá nüxü peyadaugü ngëma pemaã nüxü yaxuxürü”, ñapegügü nüxü! —ñanagürü. ⁸ Rü yexguma ga yema ngecügü rü nüxna íiyabuxmü ga yema

naxmaxũ, yerũ ngĩrũ muũẽmaã poraãcü iyaduruxe. Rũ taxúemaãma nũxũ iyaxugũgũ, yerũ poraãcü imuũẽ.

Ngechuchu rũ ngĩxcèx nangox ga María ga Magadácũãx
(Cu 20.11-18)

⁹ Rũ yexguma Ngechuchu yuwa írüdaxguwena ga noxri yangunegu ga yũxũarũ ngunexũgu, rũ ngĩxcèxira nangox ga María ga Magadácũãx ga ngĩwa ínawoxũãcü ga 7 ga ngoxogũ. ¹⁰ Rũ ngĩma rũ íiyaxũ, rũ namaã nũxũ iyarũxu ga yema Ngechuchumücũgũ ga íngechaũgũxũ rũ íxauxexũ. ¹¹ Natürũ ga nũmagũ rũ tama nayaxõgũchaũ ga yexguma nũxũ naxĩnũẽgu ga na namaxũxũ ga Ngechuchu rũ na nũxũ nadauxũ ga ngĩmax.

Ngechuchu rũ taxre ga norũ ngúexũgũcèx nangox
(Lc 24.13-35)

¹² Rũ yemawena ga Ngechuchu rũ tõõcü nangox naxcèx ga taxre ga norũ ngúexũgũ ga yexguma nama ga naãnewaama nadaxũgu naxĩxgu. ¹³ Rũ nũmagũ rũ nawoegu, rũ yema togũ ga ngúexũgũmaã nũxũ nayarũxugũ. Natürũ yemagũaxũ rũ ta tama nayaxõgũ.

Ngechuchu nanamu ga norũ ngúexũgũ
(Mt 28.16-20; Lc 24.36-49; Cu 20.19-23)

¹⁴ Rũ yemawena ga Ngechuchu rũ naxcèx nangox ga yema 11 ga norũ ngúexũgũ ga yexguma mechawa ínachibüeyane. Rũ nayangagũ naxcèx ga tama aixcũma na yaxõgũãxũ rũ tama na inaxĩnũẽxũ. Yerũ ga nũmagũ rũ tama nũxũ nayaxõgũchaũ ga yema nũxũ daugũxũ ga marũ wena na namaxũxũ. ¹⁵ Rũ ñanagürũ nũxũ: —¡Guxũ i naãnewa pexĩ rũ guxũ i duũxũgũmaã nũxũ peyarũxu i ore i mexũ! ¹⁶ —Rũ yíxema yaxõxẽ rũ íbaiexe rũ tá tüxũ nangẽxma i maxũ i taguma gúxũ. Natürũ yíxema tama yaxõxẽ rũ tá tapoxcu. ¹⁷ —Rũ ñaã tá nixĩ i cuèxruũgũ i nawa nũxũ icuáxũ i ngẽma yaxõgũxũ. Rũ chauégagu tá ínawoxũ i ngoxogũ. Rũ ngexwacaxũxũ i nagagũwa tá nidexagũ. ¹⁸ —Rũ naxmẽxmaã tá nũxũ nayayauxãchi i ãxtapegũ. Rũ ngẽxguma yaxaxgũãgu i tacũ i nawa iyuxũ, rũ tãütáma nanachixexẽẽ. Rũ tá tüxũ ningõgũgũ ya idaaweexe rũ tá tümacèx nitaanegũ —ñanagürũ.

Ngechuchu rũ daxũguxũ ga naãnewa naxũ
(Lc 24.50-53)

¹⁹ Rũ nũma ga Cori ga Ngechuchu rũ yexguma norũ ngúexũgũmaã yadeaxguwena, rũ Tupana rũ daxũguxũ ga naãnewa nanaga. Rũ Tupanaãrũ tũgũnecũwawa nayarũto. ²⁰ Rũ nũmagũ ga norũ ngúexũgũ rũ inaxĩãchi na guxũwama nũxũ yanaxugũexũ ga ore i mexũ. Rũ nũma ga Cori rũ nũxũ narũngũxẽẽ, rũ nanangoxẽẽ na aixcũma yĩixũ ga yema ore, yerũ wũxigu namaã napuracũ na naxũgũãxũcèx ga mexũ ga taxũgũ ga Tupanaãrũ poramaã naxũgũxũ.

ORE I MEXÜ GA LUCA ÜMATÜXÜ

Norü ügü i ore ga Ngechuchuchiga

¹⁻² Pa Mecü Pa Teóquirux, nayexma ga tacü ga totanüwa ngupetüxü. Rü muxüma ga duüxügü rü marü nanaxümatügü ga yemachiga, yexgumarüü ga tomaã nüxü na yaxugüexürüü ga yema duüxügü ga noxriarü ügügumama Ngechuchuxü daugüxü rü nüxü rüngüxëëgüxü ga norü orearü uchigawa. ³⁻⁴ Rü ngëmacëx, Pa Teóquirux, rü choma rü ta meãma naxcëx íchaca ga nachiga ga guxüma ga yema Ngechuchu üxü. Rü ñuxma rü chauxcëx rü name na meãma cuxcëx chanaxümatüxü i ngëma na meãma nüxü cucuáxücëx na aixcüma yíixü ga yema ore ga marüchirëx cuxü nangüxëëgüxü ga togü.

Tupanaãrü orearü ngeruü ga daxüçüãx nanaxunagü ga Cuáü ga baiüxëëruüãrü buxchiga

⁵ Rü yexguma Erode äëxgacü ixixgu ga Yudéaanewa, rü yéma nayexma ga wüxi ga Yudíugüarü pai ga Zacaríagu äegacü. Rü pai ga Arãütaa ga Abíatanüxü nixí ga nümax. Rü namëxéga rü Erichabé nixí. Rü tüma rü ta pai ga Arãütanüxü tixí. ⁶ Rü nüma ga Zacaríá rü namëx ga Erichabé rü meãma Tupanapëxewa, namaxë rü aixcüma naga naxínüë ga norü mugü. Rü yemaãcü taxucürüwa texé chixri nachiga tidexagü. ⁷ Natürü nangexacügü yerü namëx rü ingexacü. Rü ñuxüchi ga nümagü rü marü yaguãxgü nixígü. ⁸ Rü wüxi ga ngunexügu rü yema paigütücümü ga Zacaríá natanüwa üxügu nangu na tupauca ga taxünewa Tupanaãrü puracü naxügüxücëx. ⁹ Rü yema paigü rü nacüma nixí ga nüxü na naxunetagüxü ga wüxi ga natanüxü na tupaucaarü aixepegu naxücuxücëx rü yéma Tupanacëx na yaguãxücëx ga pumara ga yixixü. Rü yema ngunexügu rü Zacaríagu nangu na tupaucaarü aixepegu naxücuxücëx na yéma yaguãxücëx ga pumara. ¹⁰ Rü yema pumara íyaguyane rü guxüma ga duüxügü ga düxétüwa yexmagüxü rü ínayumüxëgü. ¹¹ Rü ngürüãchi Zacaríacëx nangox ga wüxi ga Tupanaãrü orearü ngeruü ga daxüçüãx. Rü yema nachica ga pumara nawa yagugüüxüãrü tügünecüwagu nachi. ¹² Rü yexguma Zacaríá nüxü dëuxgu ga yema Tupanaãrü orearü ngeruü ga daxüçüãx, rü poraãcü nabaixãchiãë, rü poraãcü namuü. ¹³ Natürü yema daxüçüãx ga Tupanaãrü orearü ngeruü rü ñanagürü nüxü: —Pa Zacaríax, jtãxü i cumuüxü! Erü Tupana rü marü nüxü naxínü i curü yumüxë. Rü cuxmëx i Erichabé rü cuxü tá ixãxãcü, rü Cuáügu tá cunaxüéga. ¹⁴ —Rü cuma rü tá poraãcü cutaãëxüchi i ngëxguma nabuxgu. Rü muxüma i togü i duüxügü rü tá ta nataãëgüxüchi. ¹⁵ —Erü yima cune rü Tupanapëxewa rü tá wüxi ya mexëchicü nixí. Rü tãütáma binu nayaxaxü, rü taxuüma to i tacü rü ngúchixáxü tá nixaxü. Rü tauta nabuyane rü Tupanaãë i Üünexü rü tá nüxna nangu. ¹⁶ —Rü nüma tá muxüma i Yudíugüxü narüngüxëë na norü Cori ya Tupanacëx nawoeguxücëx. ¹⁷ —Rü nüma ya Cuáü rü tá Cori ya Cristupëxegu nixü. Rü nuxcümaücü ga Tupanaãrü orearü uruü ga Eríarüü tá nixí erü tá nüxü nangëxma i Tupanaãë i poraxü. Rü ngëmaãcü tá nüxü narüngüxëë i papágü na naxãcügüxü nangechaüxü, rü ngëma tama Tupanaga ñnüëchaüxü rü na aixcüma inaxínüëxücëx. Rü ngëmaãcü tá duüxügüxü ínamexëë naxcëx ya Cori ya Cristu —ñanagürü ga yema daxüçüãx. ¹⁸ Rü Zacaríá rü yema daxüçüãxna naca, rü ñanagürü: —¿Ñuxãcü tá nixí i ngëma na naxãxãcüxü i choxmëx? Erü marü chayaxüchi i chomax rü ngíma rü ta marü iya —ñanagürü. ¹⁹ Rü Zacaríaxü nangãxü ga yema daxüçüãx, rü ñanagürü: —Choma

nixĩ i Gabi i Tupanaãrũ puracũ chaxũxũ. Rũ nũma nũma choxũ namu na cumaã nũxũ na chixuxũcèx i ñaã ore i mexũ. ²⁰ —Natürũ ñuxma i cuma rũ tama choxũ cuyaxõ i ngẽma ore i cumaã nũxũ chixuxũ. Rũ ngẽmacèx i ñuxma rũ tá cungega ñuxmatáta nabu i ngẽma cune. Natürũ ngẽma cumaã nũxũ chixuxũ, rũ aixcũma tá ningu nagu i ngẽma ngunexũ i Tupana ixunetaxũ — ñanagürũ. ²¹ Rũ yoxni ga duũxũgũ rũ tupaucarũ düxétüwa Zacaríaxũ nananguxẽẽgũ. Rũ nũgũna nacagũe ga tacũcèx na tama paxa yéma ínaxũxũxũ. ²² Rũ yexguma Zacaríá tupaucawa íxũxgu, rũ taxucürüwa duũxũgũmaã nidexa, yerũ nangega. Rũ nũmagũ ga duũxũgũ rũ nũxũ nicuèxãchitanũ ga tacũxũ na nadauxũ ga Zacaríá ga tupaucarũ aixepena. Rũ Zacaríá rũ naxmẽxmaã duũxũgũxũ nũxũ nacuèxẽẽ ga tacũ nũxũ na üpetũxũ, yerũ nangega. ²³ Rũ yexguma Zacaríá naguxẽẽgu ga na naxũãxũ ga Tupanaãrũ puracũ ga tupauca ga taxũnawa, rũ wenaxãrũ napatacèx nataegu. ²⁴ Rũ yemawena rũ Zacaríá namèx ga Erichabé rũ ixããcũ. Rũ ngĩpatagu irũxãũẽcha, rũ wũximẽxpũx ga tauemacũ taguma düxétüwa ixũ. ²⁵ Rũ ngĩxĩcatama ngĩgürũgũ: —Cori ya Tupana rũ poraãcũ choxũ narũngũxẽẽ. Rũ ñuxma rũ marũ tãütáma chixri chauchiga nidexagũ i duũxũgũ naxcèx na changexacũxũ —ngĩgürũgũ.

Wüxi ga Tupanaãrũ orearũ ngeruũ ga daxũcũãx nũxũ nixu ga Ngechuchuarũ buxchiga

²⁶ Rũ 6 ga tauemacũ marũ ngĩxũ mexgu ga Erichabé ga yema na naxããcũxũ, rũ Gariréanawa yexmane ga ñãne ga Nacharétuwa Tupana nanamu ga norũ orearũ ngeruũ ga Gabi. ²⁷ Rũ ngĩxũtawa naxũ ga wüxi ga pacũ ga taguma yatũ ngĩmaã maũxcũ. Rũ María nixĩ ga ngĩega. Rũ ngĩma rũ ixãtechaũ namaã ga wüxi ga yatũ ga Yúchegu ãegacũ. Rũ nũma ga Yúche rũ nuxcũmaũcũ ga ãẽxgacũ ga Dabítanũxũ nixĩ. ²⁸ Rũ yema nachica ga María nawa yexmaxũgu naxũcu ga Gabi, rũ ñanagürũ ngĩxũ: —Nuxmaẽ Pa Maríax. Tupana rũ poraãcũ cumaã nataãẽ. Rũ Cori ya Tupana rũ cuxũtawa nangẽxma, rũ guxũ i ngexũgũarũ yexera marũ cuxũ narũngũxẽẽ —ñanagürũ. ²⁹ Natürũ yexguma María nũxũ dèuxgu ga yema daxũcũãx ga Tupanaãrũ orearũ ngeruũ, rũ namaã íbaixãchiãẽ ga yema norũ ore ga ngĩmaã nũxũ yaxuxũ. Rũ ngĩgũãẽwa nagu irũxĩnũ ga tũxcũũ yemaãcũ ngĩxũ na namoxèxũ. ³⁰ Rũ yexguma ga Gabi rũ ñanagürũ ngĩxũ: —Pa Maríax, tama name na cumuũxũ, erũ Tupana rũ poraãcũ cumaã nataãẽ. ³¹ —Rũ ñuxma rũ tá tauemacũ cuxũ inayarũtaxu, rũ tá cuxããcũ, rũ tá nayatũ i cuxacũ. Rũ Ngechuchugu tá cunaxüega. ³² —Rũ nũma rũ wüxi ya ãẽxgacũ ya taxũchicũ tá nixĩ. Rũ Tupana ya Taxũchicũ Nane tá nixĩ i naega. Rũ Cori ya Tupana rũ tá nuxcũmaũcũ ga ãẽxgacũ ga Dabírũ ãẽxgacũxũ nayaxĩxẽẽ. ³³ —Rũ nũma rũ guxũgutáma Yudíugũarũ ãẽxgacũ nixĩ. Rũ tagutáma ínanguxuchi na ãẽxgacũ na yĩxũ —ñanagürũ. ³⁴ Rũ yexguma ga María rũ Gabina ica, rũ ngĩgürũgũ: —¿Ñuxãcũ tá nixĩ i ngẽma na chaxããcũxũ, erũ tauta chaxãte? —ngĩgürũgũ. ³⁵ Rũ nũma ga Gabi rũ ngĩxũ nangãxũ, rũ ñanagürũ: —Tupanaãẽ i Üünexũ tá cuxna nangu. Rũ Tupana ya Tacũarũ pora rũ wüxi i caixanexũrũ tá cugu nayangaixema. Rũ ngẽmacèx ngẽma õxchana i namaã cuxããcũxũ rũ Tupanapẽxewa mecũxuchi tá nixĩ, rũ Tupana Nanemaã tá nanaxugũ i duũxũgũ. ³⁶ —Rũ cutanũxũ i Erichabé rũ marũ ixããcũ woo marũ yaguãxchirèx na yĩxũ. Rũ woo ga duũxũgũ rũ:

“Tagutáma ixããcũ” ñanagürũgũ ngĩxũ, natürũ i ñuxma rũ marũ 6 ya tauemacũ ngĩxũ name na marũ naxããcũxũ. ³⁷ —Erũ Tupanaãxũ rũ taxuũma naguxcha —ñanagürũ. ³⁸ Rũ yexguma ga María rũ ngĩgürũgũ: —Chorũ Cori ya Tupanaãrũ duũxũ chixĩ i chomax. Rũ marũ name i chomaã

nanaxü i ngēma chomaã nüxü quixuxüãcūma —ngīgürügü. Rü yexguma ngĩxna ínixü ga yema Tupanaãrü orearü ngeruü ga daxüçüãx ga Gabi.

María rü Erichabéxütagu inaxüãne

³⁹ Rü yexgumaüçüü ga María rü paxama nawa ixü ga guma iãne ga Zacaríapata nawa yexmane ga Yudéaaneãrü dauxchitawa. ⁴⁰ Rü Zacaríapatawa ingu, rü iyaxücu, rü Erichabéxü irümoxë. ⁴¹ Rü yexguma Erichabé nüxü ñnügu ga Maríaarü moxë, rü ngĩrü õxhana ga ngĩãnüwa yexmaxü rü nixiãxcüü. Rü Tupanaãe ga Ünexü rü Erichabéna nangu. ⁴² Rü yexguma ga Erichabé rü tagaãcü Maríaxü ngīgürügü: —Guxü i ngexügüarü yexera Tupana cuxü narüngüxëe. Rü ngëxgumarüü ta cunexü narüngüxëe. ⁴³ —¿Tacüwa chame na nuã chauxütagu cunaxüãnexü? Pa Chorü Cori Naëx. ⁴⁴ —Erü ngëxguma nüxü chaxĩnügu i curü moxë, rü chauxacü i chauanüwa ngëxmaxü rü norü taãemaã nixiãxcüü. ⁴⁵ —Cuma rü cutaãe erü nüxü cuyaxõ i norü ore ya Tupana. Rü ngëmacëx Tupana tá nayanguxëe i ngēma ore i cumaã nüxü yaxuxü —ngīgürügü ga Erichabé. ⁴⁶ Rü yexguma ga María rü ngīgürügü: —Choma rü chauãewa poraãcü Tupanaxü chicuëxüü. ⁴⁷ —Rü chorü Cori ya chorü Maxëeruümaã chataãexüchi. ⁴⁸ —Rü woo wüxi i Tupanaãrü duüxü i ngearü dñeruãxë chixĩ, natürü Tupana chaugu narüxĩnü. Rü ñuxmaüçüü i duüxügü rü taãëxcümaã guxügutáma choxü naxugüe. ⁴⁹ —Erü Tupana ya Poracü rü taxü i mexü chauxcëx naxü. Rü naxüüne i naega ya Tupana. ⁵⁰ —Rü nüma ya Tupana rü guxügutáma nüxü tangechaütümüügü ya guxãma ya yixema aixcüma nüxü muüxë. ⁵¹ —Rü guxü ga norü poramaã tüxü narüyexera ga guxema tügütama icuëxüügüxe. ⁵² —Rü marü ínanawoxü ga yema ãëxgacügü ga nügü icuëxüügüxü. Natürü guxema duüxëgü ga tama tügü icuëxüügüxe, rü poraãcü tüxü narüngüxëe. ⁵³ —Rü guxema tüxü nataxüxe, rü muxüma tüxna naxã. Natürü guxema muãrü dñeruãxgüxe rü taxuüma tüxna naxãcüma tüxü ínimugü. ⁵⁴ —Rü poraãcü nüxü narüngüxëe ga norü duüxügü ga Yudíugü. Rü tama nüxü inarüngüma na nüxü ingechaütümüügüxü, yexgumarüü ga nuxcümaügüxü ga tatanüxümaã na inaxunetaxü. ⁵⁵ —Yerü yemaãcü inaxuneta namaã ga tórü õxi ga Abráü rü namaã ga tatanüxügü na guxügutáma tüxü nangüxëexü —ngīgürügü ga María. ⁵⁶ Rü tomaëxpüx ga tauemacü Erichabéxütagu irüxãüx ga María. Rü ñuxüchi ngĩpatacëx itaegu.

Cuáü ga baiüxëeruüãrü buxchiga

⁵⁷ Rü nawa nangu ga ngunexü ga na naxíraxacüxü ga Erichabé. Rü nayatü ga ngĩxãcü. ⁵⁸ Rü yexguma nüxü nacüëxgügu na ñuxãcü Tupana ngímaã mecümaxü, rü ngĩrü ngaicamagu pegüxü ga duüxügü rü ngĩtanüxügü rü ngĩxü ínayadaugü, rü ngĩxü narümoxëgü rü ngĩxü nayataãëgüxëe. ⁵⁹ Rü 8 ga ngunexüguwena rü ínayawiechëxmüpëxechiraügü ga guma ngíne. Rü nanatü ga Zacaríagu nanaxüégagüchaü ga duüxügü. ⁶⁰ Natürü naë ga Erichabé rü tama inaxwëxe. Rü ngīgürügü: —Narümemaë nixĩ i Cuáügu tanaxüéga —ngīgürügü. ⁶¹ Rü duüxügü rü ñanagürügü ngĩxü: —¿Tüxcüü cunaxwëxe i ngēma naega? Erü cutanüxütanüwa rü tataxuma ya texé ya ngēmagu äegaxe —ñanagürügü. ⁶² Rü yexguma ga duüxügü rü naxmëxwa nanatü ga Zacaríana nacagüe ga tacü rü naegagu tá na naxüégaãxü. ⁶³ Rü yexguma ga Zacarí rü poperaxü naxuneta na yexma na naxümatüãxüçëx ga naega. Rü yexma nanaxümatü, rü ñanagürü:

“Cuáü tá nixĩ i naega”, ñanagürü ga namatü. Rü guxüma ga duüxügü rü nabaixãchiãëgü ga yexguma yema naegaxü nadaugügu. ⁶⁴ Rü yexgumatama wenaxãrü nidexa ga Zacarí. Rü inanaxügü ga Tupanaxü na yacuëxüüxü. ⁶⁵ Rü yemacëx guxüma ga yema duüxügü ga norü ngaicamagu äpatagüxü

rü poraãcü nabaixãchiãëgü. Rü guxüwama ga yema naãnewa ga Yudéaanewa rü duüxügü nüxü nixuchigagü ga yema ngupetüxü. ⁶⁶ Rü guxüma ga nüxü cuáchigagüxü ga yema ngupetüxü, rü nügüãxëwa nagu narüxĩnũëëcha, rü ñanagürügü: —¿Tacü tá nixĩ i ngëma buxü? Erü Tupana rü aixcüma naxütawa nangëxma —ñanagürügü.

Zacaría rü Tupanaxü nicuëxüü

⁶⁷ Rü nanatü ga Zacaríana nangu ga Tupanaãë i Üünexü. Rü nüxü nixu ga yema ore ga Tupana namaã nüxü ixuxü. ⁶⁸ Rü ñanagürü: —Name nixĩ i nüxü ticuëxüügü ya tórü Cori ga nuxcümaücü ga tórü oxĩ ga Iraéarü Tupana. Erü núma tatanüwa nangu na tüxü yamaxëxëxüçèx i yixema i norü duüxügü na ixĩgüxü. ⁶⁹ —Rü ngëmacèx tüxna nanamu ya wüxi ya poracü ya tórü maxëxëëruü ga nuxcümaücü ga norü duüxü ga Dabítanüxüwa ne ücü. ⁷⁰ —Rü yemaãcü Tupana tamaã inaxuneta nawa ga yema nuxcümaügüxü ga norü orearü uruügü ga üünegüxü. ⁷¹ —Rü yema orearü uruügüwa nüxü nixu rü tá tüxü Ínanguxüxëë naxmëxwa i tórü uwanügü rü guxüma i ngema duüxügü i taxchi aixü. ⁷² —Rü nuxcümaügüxe ga tórü oxigümaã nüxü nixu na nüxü tangechaütümüügüxü rü tagutáma nüxü iyanangümaxü ga yema tümamaã inaxunetaxü. ⁷³⁻⁷⁵ —Rü yemaãcü ga Tupana rü nuxcümaücü ga tórü oxĩ ga Abráümaã inaxuneta. Rü namaã nüxü nixu rü tá tüxü Ínanguxüxëë nüxna i tórü uwanügü na tama imuüëácüma naxüxüçèx i Tupanaärü puracü rü aixcüma mecü na ixĩgüxü napëxewa i guxü i tórü maxüwa i wüxichigü i ngunexügu —ñanagürü ga Zacarí. ⁷⁶ Rü ñanagürü ta: —Cumax, Pa Chaunex, rü Tupana ya Taxüchicüarü orearü uruümaã tá cuxü naxugü. Erü cuma rü tá Corixüpa yoxni duüxügümaã nüxü quixu i nachiga ya Cori. ⁷⁷ —Cuma rü Coriarü duüxügüxü tá nüxü cucuëxëë na Tupana tá nüxü nüxü ngechaüxü i norü pecadugü na ngëmaãcü nayauxgüãxüçèx i maxü i taguma gúxü. ⁷⁸⁻⁷⁹ —Erü nüxü tangechaütümüügü ya Tupana ya poraãcü tüxü ngechaücü. Rü ngëmacèx daxüguxü i naãnewa taxcèx ne nanamu i ñoma i naãneärü ngóonexëëruü i ngexwacaxüxü na nangóonetanüxëëãxüçèx i ngëma duüxügü ga noxri guxügüma norü chixexügüagu äñcümaxüwa yexmagüxü. Rü nüma tá tüxü narüngüxëë na Tupanamaã rüngüxmüëxüçèx —ñanagürü ga Zacarí. ⁸⁰ Rü yema buxü rü niyachigü rü wüxichigü ga ngunexügu yexeraãcü Tupanaxü nicuáchigü. Rü dauxchita ga ngextá taxúema Íxãpataxüwa nayexma ñuxmata yema ngunexüwa nangu ga na Yudíugüxü nügü nacuëxëëxü.

2

Ngechucharü buxchiga

(Mt 1.18-25)

¹ Rü yexguma Agutu äëxgacü ga tacü ixĩxgu ga Dumawa, rü nanaxunagü ga na yaxugüãxü ga guxüma ga duüxügü ga guxü ga naãnewa. ² Rü yema nüxĩraüxü ga duüxügüarü ugüchiga, rü nanaxü ga yexguma Quirinu äëxgacü ixĩxgu ga Chíriaarü naãnewa. ³ Rü guxüma ga duüxügü rü wüxichigü norü ñãne ga nagu nabuxünewa nixüchigü ga yéma na yaxugüãxüçèx. ⁴ Rü yemacèx ga Yúche rü Gariréaanewa yexmane ga ñãne ga Nacharétuwa Ínaxüxü, rü Yudéaarü naãnewa yexmane ga ñãne ga Beréüwa naxü. Rü guma nixĩ ga ñãne ga nuxcümaücü ga äëxgacü ga Dabí nagu buxüne. Rü yemacèx nixĩ ga Yúche ga yéma naxüxü, yerü Dabítanüxü nixĩ ga nümax. ⁵ Rü Beréüwa naxü ga Yúche na yaxugüxüçèx wüxigu ngĩmaã ga María ga ngĩmaã naxãmëxchaücü. Natürü ga María rü itacharaü ga na naxããcüxü. ⁶ Rü yexguma Beréüwa nayexmagüyane, ngĩxna nangu ga ngĩrü ngunexü ga na naxíraxacüxü ga

María. ⁷ Rū yexma nabu ga nūxīraūcū ga ngīne. Rū naxchápenūūmaā inanuque. Rū wūxi ga wocārū chibūchicagumare inacanagūxēē, yerū marū guxūma nixāācu ga ucapu nawa ga guma pegūpataū.

Tupanaārū orearū ngeruū ga daxūcūāx rū carnerugūarū dauruūcèx nangox

⁸ Rū Beréūārū ngaicamana nayexmagū ga űuxre ga carnerugūarū dauruūgū ga chūtacū nachitaūwa norū carnerugūna ídaugūxū. ⁹ Rū ngürūāchi yema carnerugūarū dauruūgūcèx nangox ga wūxi ga orearū ngeruū ga daxūcūāx. Rū Cori ya Tupanaārū üüne rū nawa nayexma rū yemacèx poraācū nangóone. Rū yema carnerugūarū dauruxūgū rū poraācū namuūē. ¹⁰ Natürū yema orearū ngeruū ga daxūcūāx, rū űanagürū nūxū: —¡Tāxū i pemuūēxū! erū pexcèx nuā chanange i wūxi i ore i mexēchixū i guxū i duūxūgūarū taāēxēēruū tá ixīxū. ¹¹ —Erū űuxma rū Beréūgu nabu ya perū maxēxēēruū. Rū nūma rū Cori ya Cristu nixī. ¹² —Rū űaā tá nixī i perū cuèxruū. Rū tá nūxū ipeyangau i wūxi i õxchana i naxchápenūūmaā nuquexū rū wocārū chibūchicagu caxū —űanagürū. ¹³ Rū yexgumatama ngürūāchi yema daxūcūāx ga orearū ngeruūxūtawa nangox ga muxūma ga togū ga daxūcūāx ga orearū ngeruūgū. Rū Tupanaxū nicuèxūūgū, rū űanagürūgū: ¹⁴ —Rū űuxma rū Tupanaxū ínicuèxūūgū rū ínataāēgū i daxūguxū i naānawa. Rū pema i űoma i naānecūāx i Tupana pemaā taāēgūe, rū name nixī i pegūmaā perūngūxmūē —űanagürūgū. ¹⁵ Rū yexguma daxūwa naxīxguwena ga yema orearū ngeruūgū rū yema carnerugūarū dauruūgū rū nūgūmaā űanagürūgū: —¡Ngīxā ítayadau i Beréūwa i ngēma ngupetūxū i Cori ya Tupana tamaā nūxū ixuxū nawa i norū orearū ngeruūgū! —űanagürūgū. ¹⁶ Rū paxa inaxīāchi, rū yéma naxī. Rū yexma inayangaugū ga Yúche rū María rū guma bucū ga wocārū chibūchicagu cacū. ¹⁷ Rū yexguma yema bucūxū nadaugūgu ga yema carnerugūarū dauruūgū, rū duūxūgūmaā nūxū nixugūe ga yema ore ga Tupanaārū orearū ngeruū ga daxūcūāx namaā nūxū ixuxū ga guma bucūchiga. ¹⁸ Rū guxūma ga duūxūgū ga nūxū ínūēxū ga yema carnerugūarū dauruūgūarū ore rū namaā naxāixāchiāēgū. ¹⁹ Natürū ga María rū inayaxu ga guxūma ga yema ngupetūxū rū ngīāēgu namaā inguxū rū nagu irūxīnūēcha. ²⁰ Rū nawoegu ga yema carnerugūarū dauruūgū. Rū taāēācūma Tupanaxū nicuèxūūgū naxcèx ga guxūma ga yema nūxū naxīnūēxū rū nūxū nadaugūxū yerū aixcūma yema orearū ngeruū ga daxūcūāx namaā nūxū ixuxūācūma nangupetū.

Bucū ga Ngechuchu rū tupauca ga taxūnewa nanagagū

²¹ Rū yexguma 8 ga ngunexū nūxū yexmagu ga na nabuxū ga õxchana, rū ínanawiechèxmüpèxechiraūgū. Rū Ngechuchugu nanaxūégagū. Rū yematama nixī ga naēga ga daxūcūāx ga Tupanaārū orearū ngeruū Maríamaā nūxū ixuxū ga tauta namaā naxāxācūgu. ²² Rū yexguma marū yanguxgu ga yema ngunexū na tupauca ga taxūnewa Tupanapèxewa na nūgū yamexēēgūxū rū yéma naxī na yemaācū Tupanapèxewa yanguxēēgūāxūcèx ga yema Moīchēarū mugū nūxū ixuxūrūū. Rū Yerucharéūwa ga tupauca ga taxūnewa nanagagū ga guma bucū na Tupanana namugūāxūcèx. ²³ Rū yemaācū nanaxūgū yerū Tupanaārū mugūwa naxūmatū, rū űanagürū:

“Ngēxguma wūxi i nge rū nayatūgu i nūxīraūxū i ngīxācū, rū name i Cori ya Tupanana inamu”,
űanagürū. ²⁴ Rū yéma naxī rū yéma nanagagū ga taxre ga muxtucugū ga yexwacèx yaexū, na Tupanacèx nadaiāxūcèx ga paigū ga tupaucawa, yerū yema űanagürū ga Tupanaārū mugūwa. ²⁵⁻²⁶ Rū yexgumaācūū Yerucharéūgu naxāchiū ga wūxi ga yatū ga Chimeūgu āegacū. Rū wūxi ga yatū ga mecūmacū

nixĩ ga nümax, rü aixcüma Tupanaxü ngechaücü nixĩ. Rü nüma rü guxüguma ínananguxẽẽ na ñuxguacü tá ínanguxü ya Yudíugüarü nguxüxẽẽruü ya Cristu. Rü Tupanaãe i Üünexü rü Chimeüxütawa nayexma, rü nüxü nüxü nacuèxẽẽ na tãütãma nayuxü ega tama nüxü nadauxiragu ya Cristu ya Cori ya Tupana núma namucü. ²⁷ Rü yema ngunexügu rü tupauca ga taxünewa Chimeüxü naxüxẽẽ ga Tupanaãe i Üünexü. Rü yéma nayexma ga Chimeü ga yexguma Yúche rü María tupaucawa nagagügu ga guma bucü ga Ngechuchu na Tupanana namugüãxüçex na yemaãcü yanguxẽẽgüãxüçex ga Moíchéarü mu. ²⁸ Rü Ngechuchuxü naganagü ga Chimeü. Rü Tupanaxü nicuèxüü, rü ñanagürü: ²⁹ —Pa Corix, ñuxma rü marü name na chayuxü, erü marü cuyanguxẽẽ ga yema chomaã icuxunetaxü. ³⁰⁻³¹ —Rü chauzetümaãxüchi nüxü chadau ya daa Maxẽxẽẽruü ya guxü i duüxügüçex núma cunamucü. ³² —Rü nüma nixĩ i ngóonexẽẽruü naxcèx i guxüma i duüxügü i tama Yudíugü ixĩgüxü. Rü ñaã õxchanagagu rü togü i duüxügü tá nüxü nicuèxüügü i curü duüxügü i Yudíugü —ñanagürü. ³³ Rü Yúche rü María rü nabaixãchiãẽgü namaã ga Chimeüãrü ore ga ñuxãcü guma õxchanachigamaã na yadexaxü. ³⁴ Rü yexguma ga Chimeü rü Tupanana naca na meã nüxü nangupetügüxüçex ga Yúche rü María rü guma õxchana. Rü ñanagürü ngĩxü ga María ga Ngechuchu naẽ: —Düçex, daa õxchana rü tá nanamaxẽxẽẽ i muxüma i Yudíugü, natürü ngẽma tama nüxü yaxõgüchaüxü rü tá inayarütauxe. Rü nüma rü wüxi i cuèxruü tá nixĩ i duüxügüçex, rü muxüma tá nüxü naxoe. ³⁵ —Rü ngẽmaãcü tá nanangoxẽẽãma i guxüma i naãewa nagu naxĩnüèxü i muxüma i duüxügü. Rü guxüma i ngẽma tá ñaã õxchanaxü ngupetüxü rü ñoma wüxi i cüxchi i curü maxünewa yarüwãxürü tá cuxü nangux, Pa Maríax —ñanagürü. ³⁶ Rü yéma ta iyexma ga wüxi ga ngecü ga Tupanaãrü orexü ixücü. Rü Ana nixĩ ga ngẽga. Rü Panuexãcü iyixĩ, rü Ácherutanüxü iyixĩ. Rü marü yaguãxüchi iyixĩ. Rü yexguma napaxüchigutama ixãte. Natürü 7 ga taunecü- guxicatama ngĩtemaã iyarüxüüxü, yerü nayu ga ngĩte. ³⁷ Rü yemaãcü wüxi ga yutecü ga yaguãxüchi iyixĩ, yerü 84 nixĩ ga ngĩrü taunecü. Rü taguma tupauca ga taxünewa íxüxü. Rü guxüguma ngunecü rü chütacü rü naxaureãcüma iyumüxẽẽcha. Rü yemaãcü Tupanaxü iyacuèxüü rü inataxẽẽ. ³⁸ Rü yexgumatama Chimeü ídexayane, rü yéma ingu ga Ana. Rü Tupanana moxẽ ixã. Rü iinaxügü ga õxchana ga Ngechuchuchiga na yadexaxü napèxewa ga guxüma ga yema Yudíugü ga Yerucharéüçüãx ga Cristuxü ínanguxẽẽgüxü na norü nguxuchixẽẽruü yĩxüçex.

Íãne ga Nacharétucèx nawoegu

³⁹ Rü yexguma marü yanguxẽẽgüãguwena ga guxüma ga yema Tupanaãrü mugü nüxü ixuxü, rü Yúche rü María rü naxcèx nawoegu ga norü íãne ga Nacharétu ga Gariréañewa yexmane. ⁴⁰ Rü guma bucü rü niyachigü, rü yexeraãcü niporachigü, rü yexeraãcü nüxü nicuáchigü. Rü Tupana rü poraãcü nüxü narüngüxẽẽ.

Bucü ga Ngechuchu rü tupauca ga taxünewa naxo

⁴¹ Nanatü rü naẽ rü gucü ga taunecügu Yerucharéüwa taxĩxü naxcèx ga Üpetüchigaarü peta. ⁴² Rü yexguma Ngechuchu 12 ga taunecü nüxü yexmagu, rü Yerucharéüwa taxĩ namaã ga nanatü rü naẽ, yerü yema nixĩ ga Yudíugüçüma naxcèx ga Üpetüchigaarü peta. ⁴³ Rü yexguma yagüechigagu ga Üpetüchigaarü peta, rü tümachiüçex tawoegu ga nanatü rü naẽ. Natürü ga Ngechuchu rü tümãèchita tüxna Yerucharéügu narüxãüx. ⁴⁴ Rü tümã nüxü tacuèxgügu rü yema muxü ga duüxügü ga tümaweama

ixĩxũtanũxũtanũgu naxã ga Ngechuchu. Rũ yemaãcũ marũ itaxĩ ga wũxi ga ngunexũ. Natũrũ yexguma naxcẽx tadaugũgu tũmatanũxũtanũgu rũ yema tũxũ cuẽxgũxũtanũgu rũ tama nũxũ itayangaugũ. ⁴⁵ Rũ yemacẽx wenaxãrũ Yerucharẽũcẽx tawoegu na yexma naxcẽx tayadaugũxũcẽx. ⁴⁶ Rũ tomaẽxpũx ga ngunexũguwena Ngechuchuxũ itayangaugũ ga tupauca ga taxũnegu. Rũ yẽma narũto natanũwa ga yema ngũexẽẽruũgũ ga Tupanaãrũ mugũwa ngũxẽẽtaegũxũ, rũ inarũxĩnũ ga norũ ngũxẽẽtae, rũ nũxna nicachigũ. ⁴⁷ Rũ guxũma ga yema duũxũgũ ga Ngechuchuxũ ñnũẽxũ, rũ nabaixãchiãẽgũ na ñnũãcũ nũxũ nacuẽxũchixũ rũ meãma nangãxũãxũ. ⁴⁸ Rũ yexguma nanatũ rũ naẽ nũxũ daugũgu rũ tabaixãchiãẽgũ. Rũ naẽ rũ ñatarũgũ nũxũ: —Pa Chaunex, ¿tũxcũũ tomaã ngexũ cuwagũ? Cunatũ rũ choma rũ poraãcũ cuxcẽx taxoegaãẽãcũma cuxcẽx tadaugũecha —ñatarũgũ. ⁴⁹ Rũ yexguma ga Ngechuchu rũ ñanagũrũ: —¿Tũxcũũ chauxcẽx pedaugũ? ¿Tama ãxna nũxũ pecuẽx na woetama Chaunatuũchiũwa tá changẽxmaxũ? —ñanagũrũ. ⁵⁰ Natũrũ ga tũmagũ rũ tama nũxũ tacuẽxgũẽga ga yema tũmamaã nũxũ yaxuxũ. ⁵¹ Rũ yexguma ga Ngechuchu rũ tũmawe nataegu ga Nacharẽtuwa. Rũ guxũguma meã tũmaga naxĩnũẽcha. Rũ naẽ ga María rũ ngĩãẽwa nagu irũxĩnũẽcha ga guxũma ga yema ngupetũxũ. ⁵² Rũ niyachigũ ga Ngechuchu, rũ yexeraãcũ nũxũ nicuãchigũ. Rũ Tupana rũ namaã nataãe, rũ guxũma ga duũxũgũ rũ ta namaã nataãegũ.

3

Cuãũ ga baiũxẽẽruũ nũxũ nixu ga Tupanaarũ ore ga dauxchitawa ga ngextã taxũema íxãpataxũwa

(Mt 3.1-12; Mr 1.1-8; Cu 1.19-28)

¹ Rũ yexguma Tibériu 15 ga taunecũ Dumaarũ ãẽxgacũ yixĩxgu, rũ yexguma nixĩ ga Põũchiu Piratu rũ Yudéaaneãrũ ãẽxgacũ yĩxũ, rũ Erode rũ Gariréaaneãrũ ãẽxgacũ yĩxũ, rũ naẽneẽ ga Piripi rũ Itúreaane rũ Tracóníteaneãrũ ãẽxgacũ yĩxũ, rũ Lichániã rũ Abiríníããneãrũ ãẽxgacũ yĩxũ. ² Rũ yexguma ga Anã rũ Caipã rũ paigũeru nixĩgũ. Rũ yexguma nixĩ ga Zacaríã nane ga Cuãũmaã yadexaxũ ga Tupana ga dauxchitawa ga ngextã taxũema íxãpataxũwa. ³ Rũ guxũma ga yema nachicagũ ga Yudãũcutũarũ ngaicamana yexmagũxũgu nixũgũchigũ ga Cuãũ. Rũ duũxũgũmaã nũxũ nixuchigũ na nũxũ naxoexũcẽx ga nacũmagũ ga chixexũ rũ ínabaiũxũcẽx na yemaãcũ Tupana nũxũ nũxũ rũngũmaxũcẽx ga norũ pecadugũ. ⁴ Rũ guma nuxcũmaũcũ ga Ichaxíã ga Tupanaãrũ orearũ uruũ naxũmatũxũrũ nixĩ ga nangupetũxũ. Yerũ duũxũgũarũ maxũãrũ mexẽẽchigaxũ nixu ga yexguma ñaxgu:

“Ngẽma nachica i ngextã taxũema íxãpataxũwa rũ tá nangẽxma i wũxi i duũxũ i ngema tagaãcũma ñaxũ: ‘¡Pegũ pemexẽẽ naxcẽx ya Cori! ¡Rũ naxcẽx ipeyanawẽxãchixẽẽ i perũ maxũ!’ ⁵ Rũ guxããrũ maxũ rũ tá inayarũwẽxãchi ñoma wũxi i ngatexũ rũgũtaxũrũ na iyawẽxũcẽx i nama. Rũ guxãma ya yíxema togũtũwa tũgũ ngẽxmaxẽẽgũxe rũ tá ítarũxĩ ñoma wũxi ya mẽxpũne rũ wũxi i ngũchitaeru idoxochixẽẽxũrũ. Rũ guxũma i nacũma i wũxũ rũ tá inayarũwẽxãchigũ. Rũ ngẽma duũxũgũarũ maxũwa tama mexũ rũ tá nayamexẽẽgũ. ⁶ Rũ guxũma i duũxũgũ rũ tá nũxũ nadaugũ ya yima Maxẽẽẽruũ ya Tupana núma namucũ”

ñanagũrũ ga Ichaxíã ũmatũxũ ga ore. ⁷ Rũ yexguma Cuãũxũtawa naxĩxgu ga duũxũgũ na ínabaiũxẽẽãxũcẽx, rũ núma ga Cuãũ rũ ñanagũrũama nũxũ: —Pa ãxtapearũ Duũxũgũx ¿Rũ ñnũãcũ nagu perũxĩnũe na naxchaxwa pibuxmũxũ i ngema poxcu i marũ ingaicamaxũ ega tama nũxũ perũxoegu i pecũma

i chixexü? ⁸ —¡Rü meã pemaxë na ngëmaãcü guxüma i duüxügü nüxü daugüxücèx na aixcüma marü nüxü perüxoexü i pecüma i chixexü! Rü tama name i ñaperügügü:

“Täütáma Tupana toxü napoxcue, erü Abráütanüxü tixîgü” ñaperügügü. Erü tama ngëmacèx nixî ya Tupana i duüxügüxü nayaxuxü. Rü pemaã nüxü chixu rü ngëxguma Tupana naxwèxegu rü tama nüxü naguxcha na daa nutawa Abráütanüxü nanguxüxëxü. ⁹ —Tupanaärü yuema rü marü íimemare na yadaxüãxücèx i ngëma nanetügü i tama mexü. Rü guxüma i nanetügü i chixearü õõxü rü tá nadaxü, rü ñuxüchi üxüwa tá ínagu —ñanagürü ga Cuáü. ¹⁰ Rü yexguma ga duüxügü rü Cuáüna nacagü, rü ñanagürügü: —¿Tacü éxna nixî i mexü na tanaxüxü? —ñanagürügü. ¹¹ Rü Cuáü rü nanangäxü rü ñanagürü: —Texé ya taxrearü gáuxüchiruãxë rü name nixî i texé ya tüxü nataxüxena tanaxã. Rü texé ya õnaãxë rü name nixî i texé ya ngearü õnaãxëmaã tangau i tümaärü õna —ñanagürü. ¹² Rü Cuáüxütawa naxî ta ga ñuxre ga yatügü ga Dumaärü äëxgacücèx díeru ngîxü ideetanüxü. Rü nanaxwèxegü ga Cuáü na ínabaiüxëxü. Rü Cuáüna nacagü, rü ñanagürügü: —Pa Ngúexëëruüx, ¿Tacü nixî i mexü na tanaxüxü i tomax? —ñanagürügü. ¹³ Rü Cuáü rü ñanagürü nüxü: —Tama name i äëxgacü pemaã nüxü ixuxüärü yexera penayauxgü i díeru i duüxügüxütawa —ñanagürü. ¹⁴ Rü ñuxre ga churragü rü ta Cuáüna nacagüe, rü ñanagürügü: —¿Toma rü tacü nixî i mexü na tanaxüxü? —ñanagürügü. Rü nanangäxü ga Cuáü rü ñanagürü: —Tama name i texéxü pexãxüneãcüma tümaärü ngëmaxügü pepuxü. Rü tama name i tacü rü doraxü tümachigaxü pixu na ngëmaãcü tümaärü ngëmaxügü pepuxüxücèx. Rü name nixî i ngëma díeru i äëxgacü pexü ngîmaã naxütanücümaãtama petaãëgü rü tama yexeracücèx ípeca —ñanagürü. ¹⁵ Rü yexguma ga duüxügü rü poraãcü ínananguxëëgü na paxa ínanguxü ga Tupana Nane ga Cristu. Rü nagu narüxîñüë ga na bexmana Cuáü rü Cristu yîixü. ¹⁶ Natürü ga Cuáü rü guxãxü ñanagürü: —Aixcüma i choma rü dexáwamare pexü íchabaiüxëë, natürü tá ínangu i to i Tupanaärü orearü uruü, rü nüma tá pexna nananguxëë i Tupanaãë i Üünexü wüxi i üxüemarüü. Erü nüma rü poraãcü choxü narüyexera na äëxgacü yîixü. Rü choma rü napëxewa rü taxuwama chame rü bai i norü chapatucunüärü wëgüwa chame. ¹⁷ —Rü nüma rü marü ínamemare na ñoma i naãnewa yadexechiãxücèx i norü duüxügü ñoma wüxi ya yatü trigu naãtüna idexechixürüü. Rü ngëmaãcü tá nayadexechi i ngëma noxrü ixîgüxü na naxütawa nangëxmagüxücèx, natürü ngëma tama noxrü ixîgüxü, rü tá ínangu nawa ya yima üxü ya taguma ixoxüne —ñanagürü. ¹⁸ Rü yema oremaã rü muxüma ga to ga ucuxëgümaã, rü Cuáü duüxügümaã nüxü nixu ga ore ga mexü ga Ngechuchuchiga. ¹⁹ Rü Cuáü rü äëxgacü ga Erodexü nanga, yerü ngîmaã naxãmèx ga Erodía ga naëneë ga Piripi namèx. Rü nananga ta naxcèx ga yema togü ga chixexü ga naxüxü. ²⁰ Natürü ga Erode rü tama Cuáüga naxînü. Rü yexeraxü ga chixexü naxü, yerü poxcupataüwa Cuáüxü namu.

Ngechucharü baiechiga
(Mt 3.13-17; Mr 1.9-11)

²¹ Rü yexguma taxüta napoxcugu ga Cuáü, rü guxü ga duüxügüxü ínabaiüxëëxyane, rü yexguma ta nixî ga Ngechuchuxü ínabaiexëëxü. Rü yexguma Ngechuchu íyumüxëyane rü ningena ga daxüguxü ga naãne. ²² Rü Tupanaãë i Üünexü rü wüxi ga muxtucurüü inanago rü Ngechuchuna nangu. Rü daxüwa inanaxü ga wüxi ga naga ga ñaxü: —Cuma nixî, Pa Chaunex, i cuxü changechaüxüchixü rü cumaã chataãëxü —ñaxü.

*Ngechuchu ya Cristu natanüwa ngóxü ga duïxügüchiga
(Mt 1.1-17)*

²³ Ngechuchu rü 30 ga taunecü nüxü nayexma ga yexguma ínaxügüãgu na guxüwama duïxügümaã nüxü yaxuxü ga Tupanaarü Ore. Rü duïxügü nagu narüxñüë rü Yúche nane nixĩ ga nümax.

Rü Yúche rü Erí nane nixĩ.

²⁴ Rü Erí rü Matáx nane nixĩ.

Rü Matáx rü Lebí nane nixĩ.

Rü Lebí rü Merequí nane nixĩ.

Rü Merequí rü Yana nane nixĩ.

Rü Yana rü Yúche nane nixĩ.

²⁵ Rü Yúche rü Matatía nane nixĩ.

Rü Matatía rü Amó nane nixĩ.

Rü Amó rü Naũũ nane nixĩ.

Rü Naũũ rü Echi nane nixĩ.

Rü Echi rü Nagaí nane nixĩ.

²⁶ Rü Nagaí rü Maãx nane nixĩ.

Rü Maãx rü Matatía nane nixĩ.

Rü Matatía rü Chemeĩ nane nixĩ.

Rü Chemeĩ rü Yuchéx nane nixĩ.

Rü Yuchéx rü Yudá nane nixĩ.

²⁷ Rü Yudá rü Yuanáũ nane nixĩ.

Rü Yuanáũ rü Récha nane nixĩ.

Rü Récha rü Chorobabé nane nixĩ.

Rü Chorobabé rü Charatía nane nixĩ.

Rü Charatía rü Nerí nane nixĩ.

²⁸ Rü Nerí rü Merequí nane nixĩ.

Rü Merequí rü Adí nane nixĩ.

Rü Adí rü Cocháũ nane nixĩ.

Rü Cocháũ rü Elmadáũ nane nixĩ.

Rü Elmadáũ rü Erú nane nixĩ.

²⁹ Rü Erú rü Yochué nane nixĩ.

Rü Yochué rü Erieché nane nixĩ.

Rü Erieché rü Yoriũ nane nixĩ.

Rü Yoriũ rü Matáx nane nixĩ.

Rü Matáx rü Lebí nane nixĩ.

³⁰ Rü Lebí rü Chimeũũ nane nixĩ.

Rü Chimeũũ rü Yudá nane nixĩ.

Rü Yudá rü Yúche nane nixĩ.

Rü Yúche rü Yonáũ nane nixĩ.

Rü Yonáũ rü Eriaquíũ nane nixĩ.

³¹ Rü Eriaquíũ rü Meréa nane nixĩ.

Rü Meréa rü Ména nane nixĩ.

Rü Ména rü Matáta nane nixĩ.

Rü Matáta rü Natáũ nane nixĩ.

Rü Natáũ rü Dabí nane nixĩ.

³² Rü Dabí rü Ichaxí nane nixĩ.

Rü Ichaxí rü Obé nane nixĩ.

Rü Obé rü Boó nane nixĩ.

Rü Boó rü Cháru nane nixĩ.

Rü Cháru rü Nachóũ nane nixĩ.

³³ Rü Nachóũ rü Aminadá nane nixĩ.

Rü Aminadá rü Admiũ nane nixĩ.

Rü Admiũ rü Arni nane nixĩ.

Rü Arni rü Esróũ nane nixĩ.

Rü Esróũ rü Fare nane nixĩ.

Rü Fare rü Yudá nane nixĩ.

³⁴ Rü Yudá rü Acóbu nane nixĩ.

Rü Acóbu rü Ichaá nane nixĩ.

- Rü Ichaá rü Abráũ nane nixĩ.
 Rü Abráũ rü Taré nane nixĩ.
 Rü Taré rü Nacúx nane nixĩ.
 35 Rü Nacúx rü Cherúx nane nixĩ.
 Rü Cherúx rü Ragáu nane nixĩ.
 Rü Ragáu rü Peréx nane nixĩ.
 Rü Peréx rü Ebéx nane nixĩ.
 Rü Ebéx rü Cháru nane nixĩ.
 36 Rü Cháru rü Caináũ nane nixĩ.
 Rü Caináũ rü Arpacháx nane nixĩ.
 Rü Arpachá rü Chéũ nane nixĩ.
 Rü Chéũ rü Noe nane nixĩ.
 Noe rü Laméx nane nixĩ.
 37 Rü Laméx rü Matucharéũ nane nixĩ.
 Rü Matucharéũ rü Enóx nane nixĩ.
 Rü Enóx rü Yaréx nane nixĩ.
 Rü Yaréx rü Maararéx nane nixĩ.
 Rü Maararéx rü Caináũ nane nixĩ.
 38 Rü Caináũ rü Enóx nane nixĩ.
 Rü Enóx rü Chex nane nixĩ.
 Rü Chex rü Adáũ nane nixĩ.
 Rü Adáũ rü Tupana nane nixĩ.

4

Ngechuchuxũ naxũ ga Chataná *(Mt 4.1-11; Mr 1.12-13)*

¹ Ngechuchuxütawa nayexma ga Tupanaãe i Üünexũ. Rü yexguma Yudáũchiüwa ínaxũächigu ga Ngechuchu, rü Tupanaãe i Üünexũ rü dau-chitawa ga ngextá taxúema íxãpataxüwa nanaga. ² Rü yéma nayexma ga 40 ga ngunexũ. Rü ngoxo ga Chataná rü nüxũ naxũ. Rü yexguma yéma nayexmagu rü taguma nachibü. Natürü ga yixcama rü nataiya. ³ Rü yexguma ga ngoxo ga Chataná rü ñanagürü nüxũ: —Ega aixcüma Tupana Nane quixĩgu, rü jdaa nutamaã nüxũ ixu na pãuxũ nanguxuchixüçèx! —ñanagürü ga Chataná. ⁴ Rü Ngechuchu nanangãxũ rü ñanagürü: —Tupanaãrü ore i ümatüxüwa rü ñanagürü:

“Tãütáma õnamaãxĩca namaxẽ i duũxügü, natürü guxüma i ore i Tupana nüxũ ixuxũ tá nixĩ i duũxügüxũ maxẽxẽxũ”,

ñanagürü. ⁵ Rü yexguma ga ngoxo ga Chataná rü wüxi ga mëxpünechitaeruwa nanaga. Rü yéma paxaãchi nüxũ nüxũ nadauxẽe ga guxüma ga nachiũãnegü ga ñoma ga naãnecũãx. ⁶ Rü Chataná rü ñanagürü nüxũ: —Guxũ i ñaã nachiũãnegü i mexũ rü norü ngẽmaxügü rü chi cuxna chanaxã. Erü choxrü nixĩ i guxüma i ñaãgü, rü tüxna chanaxã ya texé ya choma chorü me ixixẽ na tüxna na chanaxãxũ. ⁷—Rü ngẽxguma chi chopẽxegu cucaxãpüxügu rü choxũ quicuèxüügu rü cuxrü chi nixĩ i guxüma i ñaã cuxũ chawéxũ —ñanagürü.

⁸ Natürü ga Ngechuchu rü nanangãxũ, rü ñanagürü: —¡Choxna ixügachi! Pa Chata- náx. Erü Tupanaãrü ore i ümatüxüwa rü ñanagürü:

“¡Nüxũ icuèxüü ya Cori ya curü Tupana, rü yimaãxũxĩcatama napuracü!”

ñanagürü. ⁹ Rü yexguma ga ngoxo ga Chataná rü Yerucharéũ ga ñãnewa nanaga. Rü tupauca ga taxünetapẽxegu nanamunagü. Rü ñanagürü nüxũ: —Ega aixcüma Tupana Nane quixĩgu, rü jnuã cugü rütae! ¹⁰—Erü Tupanaãrü ore i ümatüxüwa rü ñanagürü:

“Tupana tá nanamu i norü orearü ngeruügü i daxüçũãx na cuxna nadaugüxüçèx. ¹¹ Rü naxmẽxmaã tá cuxũ niyauxgü na tama çacü rü nutaga cunguxüçèx”,

ñanagürü. ¹² Rü Ngechuchu nanangãxũ rü ñanagürü: —Tupanaãrũ ore i ñamatũxũwa rü ñanagürü ta:

“¡Tama name i nüxũ na cuxũxũ ya Cori ya curũ Tupana!”,

ñanagürü. ¹³ Rü yexguma marũ taxucürũwama Ngechuchuxũ naxũxgu, rü nüma ga Chataná rü nüxna niña ñuxmata nüxũ iyangau na ñuxãcü wena nüxũ na naxũxũ.

*Ngechuchu rü Gariréaanewa inanaxügü ga norü puracü
(Mt 4.12-17; Mr 1.14-15)*

¹⁴ Rü Ngechuchu rü Gariréaanecèx nataegu. Rü Tupanaãe i Üünexũ rü naxũtawa nayexma rü poraãcü nanaporaxẽe. Rü ga duũxũgü rü nachiga nidexagü ga guxũ ga yema naãnewa. ¹⁵ Rü wũxichigü ga ñãneãrũ ngutaquẽxepataũgüwa rü nanguxẽetae. Rü guxũma ga duũxũgü rü nüxũ nicuèxũgü.

*Nacharétuwa nayexma ga Ngechuchu
(Mt 13.53-58; Mr 6.1-6)*

¹⁶ Rü Nacharétuwa naxũ ga Ngechuchu. Rü guma nixĩ ga ñãne ga nanatügü nawa nayaxẽegüne. Rü ngũxchigaarũ ngunexũgu rü ngutaquẽxepataũgu naxũcu, yerũ yema nixĩ ga nacũma ga guxũ ga ngũxchigaarũ ngunexũgu. Rü yema inachi rü duũxũgücèx nüxũ nadaumatũ ga Tupanaãrũ ore ga ñamatũxũ. ¹⁷ Rü nüxna nanaxãgü ga popera ga Tupanaãrũ orearũ uruũ ga Ichaxía ñamatũxũ. Rü yexguma yangenaãtũãgu, rü nüxũ inayangau ga ngextá ñanaxũmatũxũwa ga ore ga ñaxũ:

¹⁸ “Cori ya Tupanaãe rü chauxũtawa nangẽxma. Rü nüma rü choxũ naxuneta na nüxũ chixuxũcèx i ore i mexũ namaã i ngẽma duũxũgü i ngearũ ngẽmaxũãxgũxũ. Rü choxũ namu na ngẽma duũxũgü i pecadutũũwa ngẽxmagũxũmaã nüxũ na chixuxũcèx rü tá na ñanguxũxũ. Rü choxũ namu na chayadauchixetũxẽegũxũcèx i ngẽma ingexetũgũxũ rü na íchananguxũxẽexũcèx i ngẽma duũxũgü i togũmẽxewa ngẽxmagũxũ.

¹⁹ Rü núma choxũ namu na duũxũgũmaã nüxũ chixuxũcèx na Tupana nüxũ rüngũxẽechaũxũ i ngẽma nüxũ yaxõgũxũ”,

ñanagürü ga yema ore. ²⁰ Rü yexguma ga Ngechuchu rü nügũna nananuxãchiátũ ga popera. Rü ngutaquẽxepataũãrũ dauruũna nanaxã rü ñuxũchi ñarũto. Natürũ guxũma ga yema ngutaquẽxepataũwa yexmagũxũ ga duũxũgü rü nüxũ narũdaunũecha. ²¹ Rü yexguma ga Ngechuchu rü inanaxügü ga na yadexaxũ, rü ñanagürü: —Ñuxmatama nixĩ i pepẽxewa Tupana yanguxẽexũ i ñãã ore ga Ichaxía ñamatũxũ —ñanagürü. ²² Rü guxũma ga duũxũgü rü meã Ngechuchuchiga nidexagü. Rü nabaixãchiãegü namaã ga yema ore ga mexũ ga namaã nüxũ yaxuxũ. Natürũ tama aixcũma nayaxõgũchaũ. Rü yemacèx nügũna nacagü rü ñanagürügü: —¿Taux õxna daa yĩxũ ya Yúche nane? —ñanagürügü. ²³ Rü Ngechuchu rü ñanagürü nüxũ: —Choma nüxũ chacuèx rü tá chomaã penaxuxuchi i ngẽma ore i ñaxũ:

“Pa Duturux ¡Cugũtama rü mexẽe!” ñaxũ. Rü õxna tá choxũ ñaperügügü:

“Yema mexũ ga taxũ ga nüxũ taxĩnũexũ ga Tupanaãrũ poramaã cuxũxũ ga Capernáũwa, rü tanaxwèxe i nuã curũ ñãnewa rü ta na cunaxũxũ”, ñaperügügü tá. ²⁴ Rü nayadaxẽe ga Ngechuchu na yadexaũ rü ñanagürü: —Aixcũma pemaã nüxũ chixu rü guxũma i Tupanaãrũ orearũ uruũ, rü norũ ñãnewatama i duũxũgü rü tama meã nanayauxgü. ²⁵ —Rü aixcũma pemaã nüxũ chixu rü Iraéanewa rü nayexma ga muxũchixũma ga ngexũgü ga iyutegũxũ ga yexguma Ería maũxgu. Rü yexguma nixĩ ga tomaẽxpũx ga taunecũarũ ngãxũ rü taguma napuxũ, rü poraãcü nangũxũ ga taiya

ga guxũ ga ñaa nachixũanewa. ²⁶ —Natürü ga Tupana rü tama wüxi ga Iraéanecũãx ga yutecũxõtawa Eríaxũ namu. Natürü ngĩxõtawa nanamu ga yema yutecũ ga Charépacũãx ga Chidãũãrũ ñãneãrũ ngaicamagu ãchiũcũ. ²⁷ —Rü yexguma namaũxgu ga Erichéu, rü Iraéanewa nayexmagũ ta ga muxũma ga duũxũgũ ga chaxũnemaã idaaweexũ. Natürü taxuũma ga yema idaaweexũ ga Iraéanewa yexmagũxũ rü naxcèx nitaaneẽ. Rü Namáũ ga Chíríaanecũãxĩcatama nixĩ ga guma naxcèx yataanecũ —ñanagürü ga Ngechuchu. ²⁸ Rü yexguma yema orexũ naxĩnũëgu, rü guxũma ga yema duũxũgũ ga guma ngutaquẽxepataũwa yexmagũxũ rü poraãcũ naxcèx nanuẽ. ²⁹ Rü inachigũ ga duũxũgũ rü Ngechuchuxũ ínatèxũchigũ ga guma ñãnewa. Rü guma mèxpũne ga guma ñãne nawa yexmanechitaeruwa nanagagũ na yéma yanataegũãxũcèx. ³⁰ Natürü ga Ngechuchu rü norü ngãxũtanüwa ínaxũxũãma, rü ínixũ.

*Wüxi ga yatü ga ngoxo nawa yexmaxũchiga
(Mr 1.21-28)*

³¹ Rü yexguma ga Ngechuchu rü Gariréaaneãrũ ñãne ga Capernáũwa naxũ. Rü ngũxchigaarũ ngunexũgu yéma duũxũgũxũ nangúexẽẽ. ³² Rü duũxũgũ rü nabaixãchiãëgũ namaã ga norü nguxẽëtae, yerü Tupanaãrũ poramaã nidexa. ³³ Rü guma ngutaquẽxepataũwa nayexma ga wüxi ga yatü ga ngoxo nawa yexmaxũ. Rü aita yéma naxũ, rü ñanagürü: ³⁴ —¡Toxna ixũgachi! ¿Tũxcũũ totanüwa cuxũ, Pa Ngechuchux, Pa Nacharétucũãx? ¿Nuã cuxũ na toxũ cudèixũcèx? Choma cuxũ chacuèx na Tupana Nane ya Üünecũ na quiĩxũ —ñanagürü. ³⁵ Rü Ngechuchu nananga ga yema ngoxo rü ñanagürü: —¡Iyarüngeèx rü ínaxũxũ nawa ya yima yatü! —ñanagürü. Rü yexguma ga yema ngoxo rü duũxũgũpèxegu nayanguxẽẽ ga guma yatü, rü nawa ínaxũxũ. Natürü tama nanapixẽẽ. ³⁶ Rü guxũma ga duũxũgũ rü nabaixãchiãëgũ. Rü nügümücũgũmaãchigũ nachiga nidexagũ, rü ñanagürügũ: —¿Tacü rü ore nixĩ i ngẽma? Erü ñãã yatü rü aixcũma ngẽma ngoxogũmaã inacuèx rü poraãcũ nanamu. Rü nũmagũ rü naga naxĩnũë, rü ínachoũ —ñanagürügũ. ³⁷ Rü guxũwama ga yema naãnewa rü Ngechuchuchigaxũ nixugũe ga duũxũgũ.

*Ngechuchu rü Chimáũ ga Pedru nèxècèx nayataanexẽẽ
(Mt 8.14-15; Mr 1.29-31)*

³⁸ Rü guma ngutaquẽxepataũwa ínaxũxũ ga Ngechuchu rü Chimáũpatawa naxũ. Rü Chimáũ nèxè rü poraãcũ iyaxaxũne. Rü Ngechuchuna nacagũe ga ngĩxcèx na yataanexẽẽãxũcèx. ³⁹ Rü nũma rü ngĩxõtagu nayachi rü narümèxãchi rü nananga ga yema axũne. Rü yexgumatama igèuxãchi ga na yaxaxũnèxũ. Rü yexgumatama írũda, rü naxcèx inamexẽẽ ga òna.

*Ngechuchu rü muxũma ga idaaweexũcèx nayataanexẽẽ
(Mt 8.16-17; Mr 1.32-34)*

⁴⁰ Rü yexguma marü yanaxũcuchaũgu ga üèxcũ, rü Ngechuchuxõtawa nanagagũ ga guxũma ga duũxũgũ ga nagúxũraũxũ ga ðaaweanemaã idaaweexũ. Rü ga Ngechuchu rü wüxichigũ ga yema duũxũgũxũ ningõgũ, rü yemaãcũ naxcèx nayataanexẽẽchigũ. ⁴¹ Rü nanameẽxẽẽ ga muxũma ga duũxũgũ ga idaaweexũ ga ngoxo nawa yexmagũxũ. Rü yema ngoxogũ rü aita naxũe, rü ñanagürügũ: —Cuma nixĩ i Tupana Nane quiĩxũ —ñanagürügũ. Natürü ga Ngechuchu rü nayangagũ ga yema ngoxogũ. Rü nũxna nanachuxu ga na yadexagũxũ, yerü yema ngoxogũ rü nũxũ nacuèxgũ na Cristu yiĩxũ.

*Ngechuchu rü nanaxunagũ ga ore ga mexũ ga ngutaquẽxepataũwachigũ
(Mr 1.35-39)*

⁴² Rū yexguma noxri yangóonegu rü yema ñanewa ínaxũxũ ga Ngechuchu. Rū wüxi ga nachica ga taxúema íxãpataxũwa naxũ. Natürü ga duũxũgü rü naxcèx nadaugü rü düxwa naxütawa nangugü. Rū nüxũ nacèxũgü ga tama na ínaxũxũcèx ga yema norü nañewa. ⁴³ Natürü ga Ngechuchu rü ñanagürü nüxũ: —Taxucürüwama petanügu charüxãũêcha erü chanaxwèxe na náigü ya ñanegüwa ngëxmagüxũ i duũxũgümaã rü ta nüxũ chixuxũ na ñuxãcü ãëxgacü yĩxũ ya Tupana. Erü woetama ngëmacèx núma choxũ namu —ñanagürü. ⁴⁴ Rū yemaãcü Ngechuchu nüxũ nixuchigü ga ore ga ngutaquëxepataũgüwachigü ga guxũma ga Gariréaanewa.

5

Muxũma ga choxni na ínayauxũxũchiga (Mt 4.18-22; Mr 1.16-20)

¹ Rū wüxicana ga yexguma naxtaxa ga Yenecharétuanacüwa nayexmagu ga Ngechuchu, rü muxũma ga duũxũgü rü naxütawa nangugü. Rū düxwa yéma nayaxãütügü, yerü nüxũ naxĩnũêchaũ ga Tupanaãrü ore. ² Rū Ngechuchu yéma nüxũ nadau ga taxre ga ngue ga ingeãcune. Rū guma nguegü rü naxnecüpechinüwa nanadagü, yerü ga püchaetanüxũ rü nüxna yéma ínachoũ, yerü norü pücha niyauxgü. ³ Rū wüxi ga guma nguegu nixüe ga Ngechuchu. Rū guma ngue rü Chimáũãrü nixĩ. Rū Chimáũna naca ga naxnecüpechinüãrü ngãxütüwaxüra na nangeaxüçèx. Rū guma nguewa narüto ga Ngechuchu. Rū yéma inanaxügü ga duũxũgüxũ na nangüexëxũ. ⁴ Rū yexguma yagüegagu ga Ngechuchu ga na yadexaxũ, rü Chimáũxũ ñanagürü: —¡yéa ínamátamaxũwa namaã naxã ya daa ngue. Rū ngema penatáe i perü pücha na choxnita piyauxgüxüçèx! —ñanagürü. ⁵ Rū Chimáũ nanangãxũ, rü ñanagürü nüxũ: —Pa Ngüexëëruũx, ngewèx rü guxũ i chütaxũ rü tapüchae, natürü taxuũma i choxni tiyaxu. Natürü ñuxma na choxũ cumuxũ rü wena táxarü íchanatáe i chorü pücha —ñanagürü. ⁶ Rū yexguma ínatægüãgu ga norü pücha, rü muxũma ga choxni ínayauxũ. Rū düxwa narügáuxchaũ ga norü pücha yerü namuxũchi ga choxni. ⁷ Rū naxmëxmaã náí ga nguewa yexmagüxũ ga natanüxügüçèx nacagü na nüxũ yanangüxëëgüxüçèx. Rū yéma naxĩ ga yema natanüxügü ga naxcèx nacagüxũ. Rū nanaxüãcugü ga guma taxre ga ngue rü wixgutaèx inangutaũgü yerü namuxũchi ga choxni. ⁸ Rū yexguma yemaxũ nadèuxgu ga Chimáũ ga Pedru, rü Ngechuchupëxegu nayacaxãpüxü, rü ñanagürü nüxũ: —¡Choxna ixügachi! Pa Corix. Erü choma rü wüxi i duũxũ i pecaduãxũ chixĩ —ñanagürü. ⁹ Rū yema ñanagürü ga Chimáũ yerü nüma rü guxũma ga natanüxügü rü namaã nabaixãchiãëgü ga yema muxũma ga choxni na ínayauxũxũ. ¹⁰ Rū nabaixãchiãëgü ta ga Chimáũmücügü ga Chaũtiágu rü Cuáũ ga Zebedéu nanegü. Natürü Ngechuchu rü Chimáũxũ ñanagürü: —¡Tãxũ i cumuũxũ! Erü ñuxmacürüwa rü tá choxũ cupuracü na chauxütawa cunagagüxüçèx i duũxũgü —ñanagürü. ¹¹ Rū yexguma naxãnacüwa namaã nangugügu ga naweũgü, rü yéma nanawogü ga norü guxũma rü Ngechuchuwe narüxĩ.

Ngechuchu rü wüxi ga rüchaxünexüçèx nayataanexë (Mt 8.1-4; Mr 1.40-45)

¹² Rū yexguma wüxi ga yéma yexmagüne ga ñanewa nayexmagu ga Ngechuchu, rü yéma naxütawa nangu ga wüxi ga yatü ga chaxünemaã idaawexũ. Rū yexguma Ngechuchuxũ nadèuxgu rü napëxegu nayacaxãpüxü rü yexma nanangücuchi. Rū Ngechuchuxũ nacèxũ, rü ñanagürü: —Pa Corix, ngëxguma cuma cunaxwèxegu, rü cuxũ natauxcha na choxũ curümexëxũ nawa i chorü ñaawe —ñanagürü. ¹³ Rū yexguma ga Ngechuchu

rü nüxü ningögü, rü ñanagürü nüxü: —Ngü, chanaxwèxe. ¡Rüme! — ñanagürü. Rü yexguma yema ñaxgu ga Ngechuchu, rü naxcèx nitaane ga yema yatü ga chaxüneañxü. ¹⁴ Rü Ngechuchu nanaxucuxê rü ñanagürü nüxü: —¡Dücèx, taxúemaãtáma nüxü quixu, natürü paixü cugü yadauxêê na curümexü rü yanguxêê i ngêma Tupana Moïchéwa nüxü ixuxü na duüxügü nüxü cuáxücèx na marü curümexü nawa i curü daawe! —ñanagürü. ¹⁵ Natürü ga Ngechuchuchiga rü guxüwama ninguchigüama. Rü muxüma ga duüxügü rü naxcèx naxítaquëxegü na norü orexü naxĩnüëxücèx, rü naxcèx na yataaneëxêãxücèx ga norü daawegüwa. ¹⁶ Natürü Ngechuchu rü ñuxguacü rü ngextá taxúema íxãpataxüwa naxüüxü. Rü yéma nayayumüxëxü.

*Ngechuchu rü wüxi ga yatü ga nawãixãchicücèx nayataanexêê
(Mt 9.1-8; Mr 2.1-12)*

¹⁷ Rü wüxi ga ngunexü Ngechuchu íngxêetaeyane, rü yéma narütogü ga ñuxre ga Parichéugü rü ñuxre ga ngúexêëruüügü ga Moïchéarü mugümaã nguxêëtaegüxü ga guxü ga Gariréaaneärü ñanexãcügüwa ne íxü, rü Yudéaanewa ne íxü, rü Yerucharéüwa ne íxü. Rü Tupana rü poraãcü Ngechuchuwa inanawëx ga norü pora rü muxüma ga idaaweexü narümeëxêê. ¹⁸ Rü Ngechuchuxütawa nangugü ga ñuxre ga yatügü, rü naxcèx yéma nanange-taügü ga wüxi ga yatü ga nawãixãchicü. Rü ípatagu nanangecuchi-taügüchaü na Ngechuchupëxegu yaxütaügüãxücèx. ¹⁹ Natürü taxuacüma yexma nanangecuchitaügüéga, yerü namuxüchi ga duüxügü. Rü yemacèx ñacèxwëxgu naxígü. Rü meãma Ngechuchu íyexmaxüetüwa ínanapogüãxügü ga guma ípata. Rü yéma duüxügütanüwa Ngechuchupëxewa ínanachüxüetaügü ga guma nawãixãchicü. ²⁰ Rü yexguma Ngechuchu nüxü dëuxgu ga na nüxü yaxögüãxü ga yema yatügü, rü ñanagürü guma nawãixãchicüxü: — Pa Chaunex, marü cuxü nüxü changechaü i curü pecadugü —ñanagürü. ²¹ Natürü yema ngúexêëruüügü ga Moïchéarü mugüarü nguxêëtaeruüügü rü Parichéugü, rü nagu narüxĩnüë, rü nügüãéwa ñanagürügü: —¿Tãcü nixí i ñaã yatü ecèx Tupanamaã chixexü yaxugüxü? Erü taxúema pora tuxü nangëxma na duüxügüaxü pecaduxü tangechaüxü. Rü Tupanaxícatama nixí ya nüxü nangëxmacü i ngêma pora —ñanagürügü naãéwa. ²² Natürü ga Ngechuchu rü nüxü nacüèx ga tacügu na ínaxĩnüëxü. Rü yemacèx ñanagürü nüxü: — ¿Tüxcüü ngê-magu perüxĩnüë i pemax? ²³ —¿Tãcü nixí irütauxchamaëxü na namaã nüxü ixuxü ya daa yatü ya nawãixãchicü:

“Curü pecadugü rü marü cuxü nüxü changechaü”, rü éxna:

“¡Inachi rü íxü!” ñágüxü nüxü? ²⁴ —Natürü ñuxma rü tá pexü nüxü chadauxêê na Chaunatü núma choxü muxü na duüxügüaxü nüxü changechaüxücèx i norü pecadugü —ñanagürü. Rü yexguma yema ñaxguwena rü guma nawãixãchicüxü ñanagürü: —Cumaã nüxü chixu rü jinachi, rü nayaxu i curü caruü, rü cupatawa naxü! —ñanagürü. ²⁵ Rü yexgumatama guxü ga duüxügüpëxewa inachi ga guma nawãixãchicü. Rü nanayaxu ga norü caruü ga nagu nacaxü. Rü Tupanaxü yacuèxüüchigüãcüma napatawa naxü. ²⁶ Rü guxüma ga duüxügü rü nabaixãchiãëgü. Rü Tupanaxü nicuèxüügü. Rü poraãcü namuüëãcüma ñanagürügü: —Ñuxma rü nüxü tadaugü i ñuxre i Tupanaärü puracügü i aixcüma mexëchixügü —ñanagürügü.

*Lebícèx naca ga Ngechuchu
(Mt 9.9-13; Mr 2.13-17)*

²⁷ Rü yemawena ga Ngechuchu rü ínaxüxü ga guma íwa. Rü wüxi ga yatü ga Dumaärü ãëxgacücèx dïëru ngixü ideetanüxüxütawa naxüpetü. Rü guma yatü rü Lebí nixí ga naega. Rü yéma dïëru ngixü ínadexüwa narüto.

Rü Ngechuchu rü ñanagürü nüxü: —¡Chowe rüxü! —ñanagürü. ²⁸ Rü inachi ga Lebí, rü yéma nanatèx ga norü guxüma, rü Ngechuchuwe narüxü. ²⁹ Rü yixcama ga Lebí rü Ngechuchucèx napatawa wüxi ga taxü ga òna naxü. Rü muxüma ga yatügü ga Lebírüü díëruarü degüwa puracüexü, rü muxüma ga togü ga duüxügü rü ta yéma mechawa narütogü. ³⁰ Natürü ga yema Parichéugü rü ngúexëëruügü ga Moïchéarü mugüarü nguxëëtaeruügü, rü inanaxügü na Ngechuchuarü ngúexügüchigagu chixri yadexagüxü. Rü ñanagürügü: —¿Tüxcüü wüxiwa pechibüe rü namaã pexaxegü i ngëma yatügü i Dumaärü äëxgacücèx díëru ngíxü dexü rü ngëma pecaduãxgüxü? —ñanagürügü. ³¹ Rü Ngechuchu nanangãxü, rü ñanagürü nüxü: —Ngëma poraexü rü taxucèxma duturu nanaxwèxegü, natürü ngëma idaaweexü nixí i duturu naxwèxegüxü. ³² —Choma rü tama mexügüna na chaxuxücèx nixí i núma chaxüxü, natürü pecaduãxgüxüna na chaxuxücèx nixí i núma chaxüxü na ngëmaãcü nüxü naxoexücèx i nacümagü i chixexügü rü Tupanawe naxíxü —ñanagürü.

*Ngechuchuna nacagüe ga aurechiga
(Mt 9.14-17; Mr 2.18-22)*

³³ Rü yexguma Ngechuchuna nacagüe ga duüxügü, rü ñanagürügü: —Cuáü ya baiüxëëruüarü ngúexügü rü Parichéugüarü ngúexügü rü nayumüxëgüecha, rü muëxpüxcüna rü naxauree rü tama nachibüe erü Tupanagu narüxíñüë. Natürü i curü ngúexügü, rü guxüguma nachibüe rü naxaxegümare —ñanagürügü. ³⁴ Natürü ga Ngechuchu rü nanangãxü, rü wüxi ga ore ga nügüchigaxütama namaã nixu, rü ñanagürü: —¿Éxna wüxi i ngígüarü petawa rü pexcèx namexü na penaxaureexëëxü i ngëma nüxna naxugüxü ega natanüwa nangëxmagu i ngëma yatü i ngexwacèx ãmaxü? Rü tama nixí. ³⁵ —Natürü wüxi i ngunexü rü ngëma yatü i ngexwacèx ãmaxü, rü tá namücügüna nixügachi. Rü ngëma ngunexügu tá nixí i aixcüma naxaureexü i namücügü —ñanagürü. ³⁶ Rü yexguma ga Ngechuchu rü namaã nüxü nixu ga wüxi ga ore ga yema duüxügücüma ga nuxcümaüxüchiga rü noxrütama nguxëëtae i ngexwacaxüxüchiga. Rü ñanagürü: —Taxüema wüxi i ngexwacaxüxü i naxchiruta tiyo na namaã tanapaitaxücèx i wüxi i naxchiru i marü ngauxü. Erü ngëxguma ngëmaãcü tanaxüxgu rü tanachixexëë i ngëma naxchiru i ngexwacaxüxü. Rü ñuxüchi ngëma natüchi i ngexwacaxüxü rü tama nüxü nayatãxü i ngëma naxchiru i marü ngauxü. ³⁷ —Rü ngëxgumarüü ta rü taxüema ngexwacaxücü ya binu rü nagu tayabacuchi i wüxi i naxchiü i marü ngauxü i naxchëxmünaxcèx. Erü ngëxguma ngëmaãcü naxüxgu rü yima binu ya ngexwacaxücü rü tá narüngu, rü tá nayawãixëë i ngëma naxchiü i ngauxü i naxchëxmünaxcèx. Rü ngëxma tá nayarütaxu ya binu rü ngëma naxchiü rü ta. ³⁸ —Rü ngëmacèx tanaxwèxe na yima ngexwacaxücü ya binu rü ngexwacaxüxü i naxchiügu yabacuchixü. Rü ngëmaãcü rü taxuütáma inayarütaxu. ³⁹ —Rü taxüema ya texé ya tümamaã yaxúxe na ngúchiacü ya binu tayaxaxüxü rü tüxü nangúchaü na tayaxaxüxü ya binu ya ngexwacaxücü ya maïcuracü. Rü ngëxgumarüü ta nixí i ngëma duüxügü i marü namaã yaxüxü i nuxcümaüxü i nacüma i chixexü rü tama nanayauxgüchaü i ngëma mexü i nguxëëtae i ngexwacaxüxü —ñanagürü ga Ngechuchu.

6

*Ngechuchuarü ngúexügü rü trigu nicãüëtanü ga ngüxchigaarü ngunexügu
(Mt 12.1-8; Mr 2.23-28)*

1 Rū wūxi ga ngūxchigaarū ngunexūgu rü Ngechuchu rü norū ngúexūgūmaã trigunecüwa nachopetü. Rū norū ngúexūgü rü inaxĩãcūma yoxocüne trigu nicãütanü. Rū naxmēxmaã nanadaxi ga trigu rü nayangōētanü. 2 Rū ñuxre ga Parichéugü rü yema ngúexūgūna nacagü, rü ñanagürügü: —¿Tüxcüũ ngūxchigaarū ngunexūgu penabuxu i trigu? Erü ngūxchigaarū ngunexūgu rü nachuxu na texé puracūxü —ñanagürügü. 3 Rū Ngechuchu nanangāxü, rü ñanagürü: —¿Taguma ēxna poperawa nūxü pedau ga tacü na naxūxü ga nuxcūmañcü ga ãēxgacü ga Dabí ga yexguma nataiyagu ga nūma rü natanūxūgü? 4 —Rü Tupanapatagu naxücu rü nūxü nadau ga yema pãu ga üünexü ga yexma nuxü. Rü yema pãu rü nachuxu ga ngexerūxemare na nangōxü, rü paigücèxicatama nixĩ. Natürü Dabí nanayaxu ga yema pãu rü nanangōx, rü natanūxūmaã rü ta nangau —ñanagürü. 5 Rū ñanagürü ta ga Ngechuchu: —Tupana Nane ya duñxūxü ixĩcü rü namaã inacüèx i ngūxchigaarū ngunexü —ñanagürü.

*Wūxi ga yatü ga yumécüchiga
(Mt 12.9-14; Mr 3.1-6)*

6 Rū to ga ngūxchigaarū ngunexūgu rü Ngechuchu rü ngutaquēxepataūgu naxücu. Rū inanaxūgü ga na nanguxēētaexü. Rū yéma nayexma ga wūxi ga yatü ga norü tūgūnewa yumécü. 7 Rū yema ngúexēēruūgü ga Moĩchearü mugüwa nguxēētaegūxü rü Parichéugü, rü Ngechuchuxü nangugügu ngoxita ngūxchigaarū ngunexūgu guma yumécüxü namexēē, yerü naxcèx nadaugü ga ñuxácü norü ãēxgacügūxütawa na ínaxuaxūgūãxü. 8 Natürü nūma ga Ngechuchu rü nūxü nacüèx ga yema naãēwa nagu naxĩnūēxü ga yema yatügü. Rū yemacèx guma yumécüxü ñanagürü: —¡Írūda rü nuxã ngāxütanūgu yachi! —ñanagürü. Rū guma yumécü rü inachi rü norü ngāxütanūgu nayachi. 9 Rū yexguma ga Ngechuchu rü nūxna naca ga yema Parichéugü rü yema mugüwa nguxēētaegūxü, rü ñanagürü nūxü: —¿tacü nixĩ i ngema mexü ixüxü i ngūxchigaarū ngunexūgu? ¿Rü ngema mexü rü ēxna chixexü? ¿Rü namexü i na namaxēēxü rü ēxna yamáxü? —ñanagürü. 10 Rū yexguma Ngechuchu nūxü nidaugüãchi ga yema duñxūgü ga yéma yexmagūxü. Rū guma yumécüxü ñanagürü: —¡Iyanawēxāchixēē ya cuxmēx! —ñanagürü. Rū guma yatü rü nügü inayarüwēxāchimēxēē, rü narümemēx. 11 Natürü yema Parichéugü rü ngúexēēruūgü ga Moĩchearü mugüwa nguxēētaegūxü, rü poraãcü nanuē. Rū nügü nixucūxēgü na ñuxácü tá Ngechuchuxü na yamèxgūxü.

*Ngechuchu nanade ga 12 ga norü ngúexūgü na tóxnamana namugüãxücèx
(Mt 10.1-4; Mr 3.13-19)*

12 Rū yexguma ga Ngechuchu rü dauxchitawa, wūxi ga mēxpūnewa naxü na yéma yayumūxēxücèx. Rū guxü ga yema chütaxūgu rü yéma nayumūxē. 13 Rū yexguma yangóonegu, rü Ngechuchu norü ngúexūgücèx naca. Rū natanüwa nayadexechi ga 12. Rū yema nixĩ ga yatügü ga Ngechuchu nūxü unetagūxü na tóxnamana nangegüãxücèx ga norü ore. 14 Rū yema yatügü ga nadexü rü Chimáũ ga Pedrugu nanaxüéga nixĩ ga wūxi. Rū to nixĩ ga Aũdré ga Chimáũ naēneē, rü Chaũtiágu rü Cuáũ, rü Piripi, rü Baturumé, 15 rü Mateu, rü Tumachi, rü Chaũtiágu ga Arupéu nane rü Chimáũ ga iporaãēcüücü, 16 rü Yuda ga Chaũtiágueneē, rü Yuda Icariúte ga yixcama Ngechuchuxü íxuaxūxü naēchita.

*Ngechuchu rü muxüma ga duñxūgūxü nangúexēē
(Mt 4.23-25)*

17 Rū Ngechuchu rü yema yatügu ga nadexümaã ínarüxügu nawa ga guma mèxpüne. Rū wüxi ga nachica ga ínametachinüãnexüwa nayachaxãchitanü. Rū yéma nayexmagü ga muxüma ga duüxügu ga guxü ga Yudéaanewa ne íxü, rü Yerucharéüwa ne íxü, rü taxtü ga taxüãnacüwa ga Chidãüwa rü Tiruwa ne íxü. Rū yéma naxí yerü Ngechuchuxü naxínüëchaü, rü nanaxwèxegü ga Ngechuchu na nameëxëxü ga norü ðaawegüwa. 18 Rū yema duüxügu ga chixexü ga naã nawa yexmagüxü rü ta naxcèx nitaanegü. 19 Rū guxüma ga duüxügu rü Ngechuchuxü ningögügüchaü, yerü norü poramaã nanameëxë.

Duüxügu i taãëgüxüchiga rü duüxügu i ngechaügüxüchiga
(Mt 5.1-12)

20 Rū yexguma Ngechuchu rü norü ngüexüguxü nadawenü, rü ñanagürü nüxü: —¡Petaãëgü i pema ya ingearü ngëmaxüãxgüxe! Rū Tupana ãëxgacü íixüwa rü pema rü tá ta pexãchica. 21 —¡Rü petaãëgü i pema i ñuxma taiyaexe! ¡Rü tá meãma pingãxcharaügu! ¡Rü petaãëgü i pema i ñuxma auxexe! Rū yixcama rü tá pecugüe. 22 —¡Rü petaãëgü i pema i ngëxguma duüxügu pexchi aiegu, rü pexü ínawoüxgu, rü ðacü pemaã yaxugüegu, rü chaugagu chixri pechiga yadexagügu! 23 —Rü ngëxguma ngëma pexü üpetügu, rü ¡petaãëgüama rü tama pexoegaãëgü! Erü daxügüxü i naãnewa rü tá penayauxgü i wüxi i perü ãmare i mexëchixü. Rü dücax, ñaã duüxügu i ñuxma pexchi aiexüärü oxigü rü yexgumarü ta nixí ga naxchi na naxaixü ga nuxcümaüguxü ga Tupanaärü orearü uruügu. 24 —Natürü wüxi i ngechaü tá nixí i pexcèx i pema ya muärü ngëmaxüãxgüxe erü núma ñoma i naãnewa rü marü petaãëgü. 25 —Rü wüxi i ngechaü tá nixí i pexcèx i pema ya marü ingaxcharaügüxe erü tá petaiyae. Rü wüxi i ngechaü tá nixí i pexcèx i pema i ñuxma marü cugüexe, erü yixcama rü perü ngechaümaã tá pexaxe. 26 —Rü wüxi i ngechaü tá nixí i pexcèx i ngëxguma guxüma i duüxügu pexü icuèxüügu. Erü ngëma duüxügu i ñuxma pexü icuèxüügüxüärü oxigü rü yexgumarü nüxü nicuèxüügu ga nuxcümaüguxü ga orearü uruüguneta.

Name nixí i nüxü tangechaü i ngëma tamaã rüxüwanüguxü
(Mt 5.38-48, 7.12)

27 —Natürü pema i ñuxma na choxü pexínüëxü rü pemaã nüxü chixu rü: —¡Nüxü pengechaü i ngëma pemaã rüxüwanüguxü! ¡Rü meã nüxü perüngüxëëx i ngëma pexchi aiexü! 28 —¡Rü meã nachiga pidexagü rü naxcèx ípeca i Tupanaärü ngüxëë naxcèx i ngëma pemaã guxchigagüxü! ¡Rü naxcèx peyumüxëgü i ngëma chixri pechigamaã idexagüxü! 29 —Rü ngëxguma texé cumaã nuxgu rü cuxü tapechiwegu rü name nixí i tama cuxütanü ega woo curü tochiwewa rü ta cuxü tapechiwegu. Rü ngëxguma texé cuxü napuarü gáuxüchiruãxgu, rü name nixí i tüxü cungechaüãma ega woo curü daxü rü ta cuxna tanapuxgu. 30 —¡Rü tüxna naxã ya texé ya curü ngëmaxüçèx ícaxe! Rü ngëxguma texé curü ngëmaxü cuxna napuxgu, rü tama name i naxcèx cüngema. 31 —Rü ngëma mexü i pema penaxwèxexü na togü pemaã naxüxü, rü name nixí i pema rü ta ngëmaãcü mexü namaã pexü. 32 —Rü ngëxguma pema rü ngëma duüxügu i pexü ngechaüxüxüxícatama pengechaügu, rü ðtacüwa namexü i ngëma? Erü ngëma duüxügu i tama yaxögüxü rü ngëmaãcü nanaxügu. 33 —Rü ngëxguma ngëma duüxügu i cuxü rüngüxëëxüxüxícatama curüngüxëëgu, rü ðtacüwa namexü i ngëma? Erü ngëma duüxügu i tama yaxögüxü rü ngëmaãcü nanaxügu. 34 —Rü ngëxguma ngëma duüxügu i ixãärü díëruãxüxüxícatama cunaxãxgu i curü díëru, rü ðtacüwa namexü i ngëma? Erü ngëma duüxügu i tama yaxögüxü rü ngëmaãcü nanaxügu, erü nüxü nacuèxgü rü tá nüxü nanataeguxëë i ngëma díëru. 35 —Natürü pema rü name nixí i nüxü

pengechaũ i ngema pemaã rüxuwangüxũ, rü nüxũ perüngüxẽẽ. Rü ngëxguma tacüçex pexna nacaxgu, rü name nixĩ i tama pexoegaãẽãcũma nüxna penaxã ega woo nagu perüxĩnũegu na ngürüachi tãütama pexũ nataeguxẽẽãxũ. Erü ngëxguma ngëmaãcü penaxüxgu, rü Tupana rü ngëmaãrũ yexera tá poraãcü pexũ nanataeguxẽẽ, rü naxãcügũ tá pixĩgũ ya yima Tupana ya Poraxüchicũ ya nüxũ rüngüxẽẽcü ta i ngëma taguma moxẽ nüxna ägüxũ rü ngëma chixecümagüxũ. ³⁶—Rü pema rü name nixĩ i pengechaũwaxegũ, ngëma Penatũ ya Tupana na ngechaũwaxexürũ.

*Tama name i chixexũgu namaã perüxĩnũe i togü
(Mt 7.1-5)*

³⁷—¡Rü taxũ i togüxũ pixuxũ! Rü ngëxguma ya Tupana rü tãxütama pexũ nixu na pechixexũ. ¡Rü taxũ i poxcu namaã pexueguxũ i togü! Rü ngëxguma ya Tupana rü tãxütama poxcu pemaã naxuegu. ¡Rü nüxũ nüxũ perüngümae i norü chixexũ i togü! Rü ngëxguma ya Tupana rü tá pexũ nüxũ narüngüma i perü chixexũ. ³⁸—¡Rü togümaã pengau i perü ngemaxügü! Rü ngëxguma ya Tupana rü tá pexna nanaxã. Rü ñoma wüxi i choca i meãma napaxürũ rü meama ípoõcuxürũ tá Tupana pexna nanaxã. Erü ngema nguruxũ i namaã cumücũna cuxãxũ i curü ngemaxũ rü ngematama nguruxũmaã tá Tupana cuxna nanaxã —ñanagürü. ³⁹ Rü Ngechuchu rü ñaã cuèxruũ norü ngüexüğümaã nixu, rü ñanagürü: —¿Ñuxãcü i wüxi i ngexetüxũ rü to i ngexetüxüxũ namaxũ nacüxẽẽxũ? Erü ngëma taxre i ngexetüxũ rü wüxi i äxmaxügu tá nügümaã nayayicu. ⁴⁰—Rü taxuũma i ngüexũ rü norü ngüxẽẽruũxũ narüyexera. Natürü ngëxguma meã nangüxgu rü tá naxrũxũ nixĩ ya norü ngüxẽẽruũ. ⁴¹—¿Rü tüxcüũ nachiga quidexa i cumücü naxcèx i ngëma íraxũ i chixexũ i naxüxũ natürü tama cugütama cungugü naxcèx i ngëma chixexũ i taxũ i cuxüxũ? ⁴²—Rü ngëxguma tama nüxna cucuèxãchigu i ngëma chixexũ i taxũ i cumatama cuxüxũ, rü ¿ñuxücürüwa i nagu curüxĩnũxũ na cunamexẽẽxũ i ngëma cumücũarü chixexũ i íraxũ? Pa Duũxũ i Meã Maxnetaxũx, name nixĩ i cuxira nüxũ curüxo i ngëma chixexũ i taxũ i cumatama cuxüxũ, rü ngëxguma tá cume na nüxũ curüngüxẽẽxüçex i cumücü na nüxũ naxoxüçex i ngëma chixexũ i íraxũ i naxüxũ.

*Wüxi i nanetü rü norü owa nixĩ i nüxũ icuáxũ
(Mt 7.17-20, 12.34-35)*

⁴³—Nataxuma i nanetü i mexũ i chixearü oóxũ. Rü nataxuma i nanetü i chixexũ i meãrũ oóxũ. ⁴⁴—Rü wüxichigü i nanetü rü norü owa nixĩ i nüxũ icuáxũ. Rü wüxi i torawa rü taxucürüwama wüxi i orix i imüxũ tayaxu. Rü wüxi i chuxchuxüwa rü taxucürüwa uba tayaxu. ⁴⁵—Rü wüxi ya mecü ya yatü rü mexũ i orexũ nixu, erü naãewa rü aixcũma mexügu narüxĩnũ. Natürü wüxi i yatü i chixecümaxũ rü chixexũ i orexũ nixu, erü chixexügu narüxĩnũ. Rü ngëma naãewa ngexmaxũ i chixexũ nixĩ i nüxũ yaxuxũ.

*İpata ya nutaétügu üxũne rü İpata ya naxnücüétügu üxũnechiga
(Mt 7.24-27)*

⁴⁶—¿Tüxcüũ i pema rü: “Pa Torü Corix” ñaperügü choxũ, natürü tama penaxü i ngëma pemaã nüxũ chixuxũ? ⁴⁷—Rü ñuxma tá pemaã nüxũ chixu na ñuxãcü tĩxũ ya yixema chowe rüxüxẽ rü choxũ İnũxẽ rü naxüxe i ngëma tümamaã nüxũ chixuxũ. ⁴⁸—Rü tümã rü wüxi ga yatü ga üpatacũ rü yamèxmaũcü ga norü caxta ñuxmata nutawa nangucürüũ tixĩ. Rü yëxguma namèxgu ga taxtũ rü yabaixügu ga napata, rü woo ga na naporaũchiüxũ, rü tama niwèxtaũ, yerü meãma inapugüarü caxtaãx ga guma İ. ⁴⁹—Natürü yixema nüxũ İnũmarexe i chorü ore natürü tama naxüxe i ngëma tümamaã nüxũ

chixuxũ, rü wüxi ga yatü ga naxnücütügumare üpatacürüũ tixĩ. Rü yexguma namèxgu ga taxtũ, rü nibaixũ ga napata, rü naporaũchiü. Rü niwèxtaũ ga napata, rü yexma nayarüxo ga guma ã.

7

Ngechuchu rü Dumacũãx ga churaragüarü ãëxgacüarü duũxũxũ narümexëẽ (Mt 8.5-13)

¹ Rü yexguma nüxũ nachauxgu ga duũxügümaã na yadexaxũ ga Ngechuchu, rü Capernáüwa naxũ. ² Rü yéma nayexma ga wüxi ga churaragüarü capitáũ ga Dumacũãx. Rü guma capitáũ rü nüxũ nayexma ga wüxi ga norü duũxũ ga poraãcü nüxũ nangechaũxũ. Rü yema norü duũxũ rü nidaawe, rü naturaxüchi. ³ Rü yexguma Ngechuchuxũ naxĩnüchigagu ga guma capitáũ, rü Ngechuchuxütawa nanamugü ga ñuxre ga Yudíugüarü ãëxgacügüerugü. Rü ñanagürü nüxũ: —¡Ngema Ngechuchuxütawa pexĩ na nüxũ pecèèxügüxcèx rü núma naxũ na chorü duũxücèx yanataanexëẽãxücèx! —ñanagürü. ⁴ Rü Ngechuchuxütawa naxĩ, rü poraãcü nüxũ nacèèxügü, rü ñanagürügü: —Name nixĩ i nüxũ curüngüxëẽ ya torü capitáũ. ⁵ —Erü núma rü guxũ i Yudíugüxũ nangechaũ. Rü nümatama nanaxütanü na naxügüãxücèx ga torü ngutaquëxepataũ —ñanagürügü. ⁶ Rü yexguma ga Ngechuchu rü nawe narüxũ. Natürü yexguma marü capitáũpataxũ yangaicagu, rü núma ga capitáũ rü Ngechuchucèx yéma nanamu ga ñuxre ga namücügü na namaã nüxũ yanaxugüxcèx ga norü ore ga ñaxũ: —Pa Corix, tama cuxũ chachixewechaũ na chopatawa cunguxũ erü choma rü taxuwama chame na chopatagu na cuxücuxũ. ⁷ —Rü ngëmacèx nixĩ i tama chomatama cuxcèx chayaçaxũ. Rü chanaxwèxe i curü orewaxicatama nüxũ quixu na naxcèx yataanexũ tá i chorü duũxũ. ⁸ —Erü choma rü ta chorü ãëxgacümèxëwa changëxma, rü choxmèxwa nangëxmagü ta i ñuxre i churaragü. Rü ngëxguma chanamuxgu i wüxi na ngextá naxüxcèx, rü ngema naxũ. Rü ngëxguma chaugüxütawa naxcèx changemagu i to, rü chauxütawa nangu. Rü ngëxguma chorü duũxũxũ chamuxgu na tacü na naxüxcèx, rü choxũ nanaxü —ñanagürü. ⁹ Rü núma ga Ngechuchu rü yexguma nüxũ naxĩnügu ga yema capitáũarü ore rü nabaixãchiãë. Rü yema duũxügü ga nawe rüxixũxũ nadawenü, rü ñanagürü: —Aixcüma pemaã nüxũ chixu rü taxuüma i Yudíugütanüwa nüxũ ichayangau i wüxi i duũxũ i ngëma yatürüũ aixcüma yaxõxũ —ñanagürü. ¹⁰ Rü yexguma nawoegugu ga yema capitáũmücügü ga Ngechuchuxütawa namugüxũ, rü nüxũ inayangaugü ga marü naxcèx na yataanexũ ga yema capitáũarü duũxũ.

Ngechuchu ínanadaxëẽ ga wüxi ga yutecü ngĩne

¹¹ Rü yemawena ga Ngechuchu rü wüxi ga ããne ga Naígu ãeganewa naxũ. Rü nawe narüxĩ ga norü ngüexügü, rü muxüma ga togü ga duũxügü. ¹² Rü yexguma guma ããneãrü ngaicamana nanguxgu, rü tüxũ nadau ga wüxi ga yueta ga tëxgüwa tüxũ nangegüxe. Rü guxema yuetaarü mamá rü tayute rü guma yucü rü guxicatama nixĩ ga tümane ixĩcü. Rü muxüma ga duũxügü ga guma ããnecũãx rü tüxũ ínixümücügü. ¹³ Rü yexguma Cori ga Ngechuchu guma yucüarü mamaxũ dèuxgu, rü nüxũ ingechaütümüũ. Rü ñanagürü ngĩxũ: —¡Tãxũ i cuxaxuxũ! —ñanagürü. ¹⁴ Rü yexguma ga Ngechuchu rü yuetacèx nixü, rü nüxũ ningögü ga tümachiũ. Rü yema tüxũ ingetaũgüxũ rü tümamaã inayachiãchitanü. Rü ñanagürü ga Ngechuchu tüxũ ga guxema yueta: —Pa Ngextüxcüx, ¡írüda! —ñanagürü. ¹⁵ Rü yexguma ga guxema yuchiréxe rü ítarüto, rü itanaxügü ga na tidexaxũ. Rü Ngechuchu rü tümãëna tüxũ namu. ¹⁶ Rü yexguma yemaxũ nadaugügu ga duũxügü, rü guxüma namuë.

Rü inanaxügüe ga Tupanaxü na yacuèxüügüxü. Rü ñanagürügü: —Wüxi i Tupanaärü orearü uruü i poraxü tatanüwa nangox. Rü ñanagürügü ta: —Tupana nuã naxü na norü duüxügüxü yanangüxëxüçèx —ñanagürügü. ¹⁷ Rü guxüma ga Yudéaanewa rü norü ngaicamana, rü duüxügü nüxü nacuáchigagü ga yema Ngechuchu üxü.

Cuáü ga baiüxëëruü rü Ngechuchuxütawa nanamugü ga taxre ga norü duüxügü

(Mt 11.2-19)

¹⁸ Rü Cuáü ga baiüxëëruü rü nüxü nacuáchiga ga guxüma ga yema Ngechuchu üxü, yerü norü ngüexügü ga Cuáü rü namaã nüxü nixügü. Rü yemacèx ga Cuáü rü taxre ga norü ngüexügüçèx naca. ¹⁹ Rü Ngechuchuxütawa nanamugü. Rü Cuáü rü ñanagürü nüxü: —¡Ngema pexí rü Ngechuchuna peca rü ñapegügü nüxü: “¿Cuma yíxü i Cristu i cuxü ítanangüxëxü, rü éxna to tá yixí i Cristu?” ñapegügü nüxü! ²⁰ Rü yema yatügü ga Cuáü Ngechuchuxütawa mugüxü, rü Ngechuchucèx naxí. Rü ñanagürügü nüxü: —Cuáü ya baiüxëëruü núma cuxütawa toxü namugü na cuxna tayacagüxüçèx rü ¿aixcüma cuma quiüxü i Cristu ya núma ngxuchaücü, rü éxna to tá yixí i Cristu? —ñanagürügü. ²¹ Rü yexgumatama Ngechuchuxütawa nangugügu ga Cuáüärü ngüexügü, rü Ngechuchu nanameëxëë ga muxüma ga duüxügü ga nagüxüraüxü ga daawemaã idaaweexü rü yema ingoxoãxü. Rü nayadauchigüxëë ga muxüma ga ingexetüxü. ²² Rü yemacèx Ngechuchu nanangãxü rü ñanagürü: —¡Pewoegu rü Cuáümaã nüxü peyarüxu i ngëma pematama nüxü pedauxü rü nüxü pexínüëxü! ¡Rü namaã nüxü pixu i ñuxácü i ngëma ingexetüxü rü marü nidauchigü, rü ngëma ichixeparaxü rü marü inachigü, rü ngëma chaxüneãxgüxü rü marü naxcèx nitaanegü, rü ngëma ngauchixëgüxü rü marü ningoxnamachixëgü, rü ngëma yuexü rü wenaxärü namaxë, rü ngëma ingearü ngëmaxüãxümaã rü marü nüxü tixu i Tupanaärü ore i mexü! ²³ —Rü tataãë ya yíxema texé ya tama choxü rüxoxe —ñanagürü ga Ngechuchu. ²⁴ Rü yexguma nawoeguxgu ga yema duüxügü ga Cuáü yéma mugüxü, rü Ngechuchu inanaxügü ga guma Cuáüchiga na yadexaxü. Rü duüxügümaã nüxü nixu, rü ñanagürü: —¿Tacü nixí ga pema ípeyadaugüxü ga dauxchitawa ga taxüema íxãpataxüwa? ¿Éxna wüxi ga yatü ga turaxü ga ñoma dexne ga buanecü yaxíãxtanüçüxëëçürüü ixíxü nixí ga ípeyadaugüxü? ²⁵ —Rü éxna tama guma ípeyadaugügu, ¿rü tacü nixí ga ípeyadaugüxü? ¿Éxna wüxi ga yatü ga poraãcü nügü ngëxãëcü ípeyadaugü? Pema nüxü pecuèx i ngëma poraãcü nügü ngëxãëgüxü rü ãëxgacügü ya tacügüpatawa nangëxmagü, rü taxucèxma dauxchitawa nangëxmagü. ²⁶ —¿Tacü éxna nixí ga ípeyadaugüxü? ¿Éxna wüxi ga Tupanaärü orearü uruü? Ngëmaãcü aixcüma yema nixí ga ípeyadaugüxü. Rü pemaã nüxü chixu rü Cuáü ya baiüxëëruü rü tama wüxi i ngëxürüüxü i Tupanaärü orearü uruü nixí. ²⁷ —Rü Cuáüchiga nixí ga naxümatüxü ga yema Tupanaärü ore ga ñaxü:

“Cupëxegu chayamu i chorü orearü ngeruü na cuxcèx namexëëãxüçèx i duüxügüarü maxü”,

ñaxü. ²⁸ —Rü pemaã nüxü chixu rü guxü i duüxügütanüwa rü nataxuma i Tupanaärü orearü uruü i Cuáü ya baiüxëëruüärü yexera. Natürü yíxema Tupana ãëxgacü íxíxüwa wixwexüchi üxe, rü Cuáüärü yexera tixí —ñanagürü. ²⁹ Rü guxüma ga duüxügü rü woo yema yatügü ga Dumaärü ãëxgacüçèx díëru ngíxü ideetanüxü, rü nüxü naxínüë ga yema Ngechuchuarü ore rü ñuxüchi Tupanaxü nicuèxüügü yerü nüxü nicuèxãchitanü na aixcüma mecü yíxü ga Tupana. Rü yema nixí ga duüxügü ga üpaacü Cuáü íbaiüxëëxü.

³⁰ Natürü yema Parichéugü rü yema ngúexēēruügü ga Moïchéarü mugüwa nguxēētaegüxü rü tama nanaxwèxegü ga Cuáü na Ínabaiüxēēxü. Rü yemaäcü nüxü naxoe ga yema mexü ga Tupana naxcèx üxchaüxü. ³¹ Rü nüma ga Cori ga Ngechuchu rü ñanagürü: —¿Tacügu tá chanangu i ñomaücüü maxēxü i duüxügü? ¿Rü nanatacüräügü? ³² —Rü ñaã duüxügü rü taxuxümaãma nataãegü ngëxgumarüü i ngema buxügü i ñaxtüwa rütogüxü, rü íxñücèxwèxegüxü, rü tagaäcü namücügüxü ñagüxü:

“Marü wowerumaã pexcèx tapaxetagu natürü tama ípixüächitanüxü. Rü marü ngechaüxü i wiyaegu pexcèx tawiyaegü natürü tama pexauxe”, ñagüxü. Rü ngëma buxügürüü taxuxümaãma nataãegü i ñomaücüü i duüxügü. ³³ —Yerü ga Cuáü ga baiüxēēruü rü núma naxü, rü tama páü nangõx rü tama binu nayaxaxü. Rü yexguma ga pema rü: “Nangoxoãx” ñaperügü nüxü. ³⁴ —Rü ñuxüchi núma chaxü i choma ya Tupana Nane na duüxüxü chiüxü, rü õna changõx rü binu chayaxaxü. Rü ngëxguma i pema rü ñaperügügü choxü:

“Choma rü chataanüxüchi rü changãxwèxe, rü pecaduã x-güxü i duüxügümaã chaxãmücü, rü yatügü i Dumaärü äëxgacücèx díeru ngíxü ideetanüxümaã chaxãmücü”, ñaperügügü choxü. ³⁵ —Natürü Tupanaärü cuèx rü meãma nangõx tümawa ya yíxema aixcüma nawe rüxíxē —ñanagürü ga Ngechuchu.

Ngechuchu rü Chimáü ga Parichéupatawa nayexma

³⁶ Rü wüxi ga Parichéu rü Ngechuchuna naxu na napatawa nachibüxüçèx. Rü yéma naxü ga Ngechuchu rü yema Parichéuarü mechawa nayarüto. ³⁷ Rü wüxi ga ngecü ga chixri maüxcü ga guma ñanecüãx, rü yexguma nüxü nacuáchigagu na Parichéupatawa tá na nachibüxü ga Ngechuchu, rü yéma ixü. Rü yéma inange ga wüxi ga pumara ga yixixü ga wüxi ga butiya ga nutanaxcèxmaã äxchiüxü. ³⁸ Rü naxauxäcüma Ngechuchucutüxütawa iyarüttoxõchi. Rü ngíxgüxüxëtümaã iyawaicutüxēē. Rü ngíyaemaã ínapicutü, rü inachuxcutü. Rü ñuxüchi yema pumaramaã inachacutü. ³⁹ Rü yexguma yemaxü nadèuxgu ga yema Parichéu ga Ngechuchuna uxü, rü naãewa nagu narüxñü rü nügümaãtama ñanagürü: —Ngëxguma chi ñaã Ngechuchu rü aixcüma wüxi i Tupanaärü orearü uruü yixígu, rü nüxü chi nacuèx na tacü yíxü i ñaã ngexü i nüxü ingõgüxü rü ñuxäcü na namaxüxü rü poraäcü na napecaduãxü —ñanagürü ga naãewa. ⁴⁰ Rü yexguma ga Ngechuchu rü nüxü nacuèxama rü Parichéuxü ñanagürü: —Pa Chimáüx, choxü nangëxma i wüxi i ore i cumaã nüxü chixuxchaüxü —ñanagürü. Rü nüma ga Parichéu rü Ngechuchuxü nangãxü, rü ñanagürü: —jËcü, chomaã nüxü ixu, Pa Ngúexēēruüx! —ñanagürü. ⁴¹ Rü ñanagürü ga Ngechuchu: —Taxre ga yatügü rü wüxi ga corixütawa nanangetanü. Rü wüxi nanangetanü ga 500 tachinü ga díeru rü to nanangetanü ga 50 tachinü. ⁴² —Natürü yema taxre rü taxuacü nanaxütanü ga norü ngetanü. Rü yemacèx düxwa yema norü cori rü nüxü nüxü narüngüma ga yema nüxü na nangetanügüãxü. Rü ñuxmax, Pa Chimáüx, rü jchomaã nüxü ixu! rü ¿ngëxürüüxü ga yema taxre ga yatügü rü yexeraäcü norü corixü nangechaü? —ñanagürü. ⁴³ Rü Ngechuchuxü nangãxü ga Chimáü, rü ñanagürü: —Chauxcèx ga yema yexeraäcü nüxü nangetanüxü nixí ga yexeraäcü norü corixü ngechaüxü —ñanagürü. Rü Ngechuchu rü ñanagürü nüxü: —Ngëmaäcü aixcüma nüma nixí —ñanagürü. ⁴⁴ Rü yexguma ga Ngechuchu rü ngíxü nadawenü ga yema ngecü, rü ñanagürü Chimáüxü: —¿Ngíxü cudauxü i ñaã ngecü? Rü cupatagu chaxücu i chomax, Pa Chimáüx, natürü tama dexá choxnata cuxã chorü yauxcutüruü. Natürü ñaã ngecü rü ngíxgüxüxëtümaã choxü iyawaicutüxēē, rü ngíyaemaã choxü ípicutü. ⁴⁵ —Cuma rü tama choxü cuchuxu i noxri

choxũ curümoxëgu, natürü ngĩma i ñaã ngecü rü noxri núma changuxgumama rü choxũ iyachuxcutüchigü. ⁴⁶ —Cuma rü tama pumaramaã choxũ cuchaeruxüra, natürü ngĩma i ñaã ngecü rü chaucutügu inaba i pumara. ⁴⁷ —Rü ngëmacèx woo namu i ngĩrũ pepadugü natürü Tupana ngĩxũ nüxũ nangechaũ i guxüma, erü ngĩma rü aixcüma choxũ ingechaũ. Natürü yixema tama aixcüma ngechaüçèx íyaçaxe, rü tama poraãcü Tupanaxũ tangechaũ —ñanagürü. ⁴⁸ Rü yexguma ga Ngechuchu rü yema ngecüxũ ñanagürü: —Curü pepadugü rü marü cuxũ nüxũ changechaũ —ñanagürü. ⁴⁹ Rü yema togü ga nüxna naxugüxũ ga yéma Ngechuchumaã mechawa yexmagüxũ, rü inanaxügü ga nügümücügümaãchigü na yadexagüxũ. Rü ñanagürügü: —¿Tacü nixĩ i ñaã yatü, ecèx ngëmaãcü duüxügüaxũ pepaduxũ nangechaũxũ? —ñanagürügü. ⁵⁰ Natürü Ngechuchu rü ñanagürü ngĩxũ ga yema ngecü: —Marü cuxũ nangëxma i maxũ i taguma gúxũ, erü choxũ cuyaxõ. ¡Ñuxma rü taãècüma cuchüwa naxũ! —ñanagürü.

8

Ngexügü ga Ngechuchuxũ rüngüxëëgüxũ

¹ Rü yemawena ga Ngechuchu rü Gariréaaneärü ñanagügu nixüãgüchigü. Rü duüxügümaã nüxũ nixuchigü ga Tupanaärü ore na ñuxãcü ãëxgacü yĩxũ ya Tupana. Rü ínayaxümücügü ga yema 12 ga ngúexügü ga marü nadexũ. ² Rü yexgumarü ta íiyaxümücügü ga ñuxre ga ngecügu ga üpaacü ngoxogü ngĩwa ínawoxücü rü ngĩrũ daaweewa ngĩxũ nameëxëëcü. Rü yematanüwa iyexma ga María ga Magadácüãxmaã ngĩxũ naxugücü ga üpaacü Ngechuchu 7 ga ngoxo ngĩwa ínawoxücü. ³ Rü yéma iyexma ta ga Cuána ga Cuchu naxmèx. Rü Cuchu nixĩ ga wüxi ga ãëxgacü ga Erodeaxũ puracüxũ. Rü yéma nayexmagü ta ga Chuchana rü mucüma ga náigü ga ngecügu ga ngĩrũ dñerumaã Ngechuchuxũ rüngüxëëgücü.

Ore ga toecügu ixuxũ (Mt 13.1-9; Mr 4.1-9)

⁴ Rü muxüma ga yema ñanagüçüãx ga duüxügü, rü Ngechuchuxütawa ínayadaugü. Rü yexguma yéma nangutaquëxegügu ga muxüma ga duüxügü, rü Ngechuchu namaã nüxũ nixu ga wüxi ga ore ga cuëxruũ, rü ñanagürü nüxũ: ⁵ —Wüxi ga yatü ga toecü rü trigumaã nanagüane. Rü yexguma trigumaã nagüaneãgu rü ñuxre ga trigu, rü namagu nayi. Rü duüxügü nawa nangagüxũ, rü werigü rü nanawecu. ⁶ —Rü náigü ga trigu rü nutatanügu nayi. Rü yexguma naxügügu ga guma trigu, rü nipagü rü nayuemare, yerü nataxuma ga norü waianexũ. ⁷ —Rü náigü ga trigu rü tuxunecügu nayi. Natürü yexguma nayaegu ga tuxugü rü guma triguxũ inawocu rü nanadai. ⁸ —Natürü náigü ga trigu rü mexũ ga waixümügu nayi. Rü yemacèx ga yexguma nayaegu rü muxüma ga trigu nawa ínanguxuchi. Rü wüxipüxü ga triguwa ínanguxuchi ga 100 püxü ga trigu —ñanagürü. Rü yemawena rü Ngechuchu tagaãcü ñanagürü nüxũ ga duüxügü: —Rü yixema ãchixëgüxe, rü ¡naga taxĩnüë i ngëma ore! —ñanagürü.

Tacüchiga nixĩ ga yema ore ga cuëxruügu ixuxũ (Mt 13.10-17; Mr 4.10-12)

⁹ Rü yexguma ga norü ngúexügü rü nüxna nacagüë na tacüchiga yĩxũ ga yema ore ga yatü ga toecügu ixuxũ. ¹⁰ Rü Ngechuchu ñanagürü nüxũ: —Tupana rü pexũ nüxũ nacüëxëë i ngëma ëxügüxũ i taxuüma i togü nüxũ cuáxũ i ñuxãcü ãëxgacü na yĩxũ i nümax. Natürü togüçèx rü cuëxruügu chayaxüãcüma namaã nüxũ chixu i ore. Rü ngexguma woo nüxũ nadaugügu

rü ñoma tama nüxü nadaugüxürüü nixīgü, rü woo nüxü naxĩnüëgu rü ñoma tama nüxü naxĩnüëxürüü nixīgü —ñanagürü.

Ngechuchu rü meã nanangoxëë ga yema ore ga toecüchigagu yaxuxü
(Mt 13.18-23; Mr 4.13-20)

¹¹ Rü Ngechuchu rü ñanagürü: —Ngëma ore i toecüchigagu pemaã chixuxü rü ñaãchiga nixĩ. Rü ngëma trigupüxü rü Tupanaärü orechiga nixĩ. ¹² —Rü guma trigu ga namagu yixünerüü nixĩ i duüxügü i ngëma orexü ñnüëxü. Natürü Chataná rü ngëma duüxügüxü nüxü inayarüngümaëxëë i ngëma ore, na tama yaxögüãxücèx rü tama nayauxgüãxücèx i maxü i taguma gúxü. ¹³ —Rü guma trigu ga nutatanügu yixüne, rü ngëma nixĩ i duüxügü i nüxü ñnüëxü i Tupanaärü ore rü taãëäcüma yaxögüxü. Natürü tama aixcüma nanayauxgü i ngëma ore, erü paxaãchi nayaxögü, rü yixcüra guxchaxü nüxü üpetügu, rü nüxü narüxoe i ngëma ore. ¹⁴ —Rü guma trigu ga tuxunecügu yixüne, rü ngëma nixĩ i duüxügü i Tupanaärü orexü ñnüëxü rü yaxögüxü natürü ñoma i naãneärü ngëmaxücèx oegaãëgüxü, rü norü ngëmaxüguama rüxĩnüëxü rü tama nüxü rüxoechaüxü i norü ngúchaügü. Rü ngëmagagu düxwa tama Tupanacèx namaxë. ¹⁵ —Natürü guma trigu ga mexü ga waixümügu yixüne, rü ngëma nixĩ i duüxügü i aixcüma taãëäcüma nayauxgüxü i Tupanaärü ore, rü naga ñnüëxü, rü meã naxcèx maxëxü. Rü ngëma nixĩ i duüxügü i aixcüma Tupanawe rüxüxü rü naxügüxü i ngëma nüma nanaxwèxexü.

Cuèxruxü ga omügu ixuxü
(Mr 4.21-25)

¹⁶ —Taxüema wüxi i omüwa tanangixichi na tanatüxpechitaxücèx rü ëxna tümaärü pechicatüügu tayaxücuchixücèx. Natürü ngóxügu tanaxü na tüxü nabaxixücèx ya yíxema ngexma chocuxe. ¹⁷ —Rü ngëxgumarüü ta i guxüma i tacü i cúäcüma ixüxü rü yixcüra rü duüxügü tá nüxü nacüëxgüama. Rü guxüma i ngëma ñüxma duüxügücèx ëxügüxü rü tá nangoxoma. ¹⁸ —¡Meã iperüxĩnüë i ñüxmax! Erü texé ya naga ñnüëxë i ngëma ore i mexü, rü Tupana tá yexeraäcü tüxü nüxü nacüëxëë. Natürü yíxema tama naga ñnüëxë, rü yexeraäcü tá tüxna nanayaxu i ngëma íraxü i tümaärü cuèx i noxri tüxü ngëxmachiréxü —ñanagürü.

Ngechucharü mamá rü naëneëgüchiga
(Mt 12.46-50; Mr 3.31-35)

¹⁹ Rü naë ga Ngechuchu rü naëneëgü, rü yema Ngechuchu íyexmaxüwa tangugü. Natürü taxuacü naxütawaxüchi tangugü, yerü namuxüchi ga duüxügü. ²⁰ Rü wüxi ga duüxü Ngechuchumaã nüxü nixu, rü ñanagürü: —Yéa düxétüwa tangëxma ya cue rü cueneëgü, rü cuxü tadaugüchaü —ñanagürü. ²¹ Natürü nüma ga Ngechuchu rü ñanagürü nüxü ga duüxügü: —Rü yíxema nüxü ñnüëxe i Tupanaärü ore rü nagu maxexe rü yíxema tixĩ ya chaue rü chaueneëgü ixīgüxe —ñanagürü.

Ngechuchu rü buanecüxü rü yuapexü ínayachaxãchixëë
(Mt 8.23-27; Mr 4.35-41)

²² Rü wüxi ga ngunexügu ga Ngechuchu rü norü ngúexügümaã wüxi ga ngegu nichoü. Rü ñanagürü nüxü: —¡Ngíxã daa naxtaxaarü tocutüwa taxĩ! —ñanagürü. Rü inaxĩächi. ²³ Rü yexguma yaxãüyane rü nipechigü ga Ngechuchu. Rü ngürüächi yexma nüxü naxü ga wüxi ga tacü ga buanecü. Rü guma nguewa rü niyauxcuchichigü ga dexá. Rü düxwa inayangutaügüchaü. ²⁴ Rü yemacèx nüma ga norü ngúexügü rü Ngechuchuxü nacagü ga na ínaxaxücèx. Rü ñanagürügü nüxü: —Pa Ngúexëëruüx, ngëmama itabaxügü —ñanagürügü. Rü yexguma ga Ngechuchu rü ínarüda, rü buanecüxü rü

yuapexũ nanga. Rũ ínayachaxãchi ga buanecũ, rũ inayarũxo ga yuape, rũ ínachaxanemare. ²⁵ Rũ yexguma ga Ngechuchu rũ ñanagũrũ nũxũ ga norũ ngũexũgũ: —¿Tacũ pexũ naxũpetũ ecèx tama meã peyaxõgũxũ? —ñanagũrũ. Natũrũ ga nũmagũ rũ nabaixãchiãẽgũ. Rũ nũgũmũcũgũna nicachigũ, rũ ñanagũrũgũ: —¿Tacũ ãxna nixĩ i ñaã yatũ rũ ngẽmacèx ẽixrũcũ ya buanecũ rũ yuape rũ naga naxĩnũẽxũ? —ñanagũrũgũ.

*Yatũ ga Gadãracũãx ga ngoxogũ nawa yexmagũxũ
(Mt 8.28-34; Mr 5.1-20)*

²⁶ Rũ dũxwa naxtaxaarũ tocutũwa nangugũ ga Gadãraarũ naãnewa. Rũ yema naane rũ Garirẽaaneãrũ toxmẽxtawa nayexma. ²⁷ Rũ yexguma marũ nguewa ínaxũegu, ga Ngechuchu, rũ naxcèx nixũ ga wũxi ga yatũ ga guma ñãnecũãx ga mucũ ga taunecũ ngoxogũ nawa yexmagũcũ. Rũ guxũguma nangexchiruecha. Rũ tama ñwa nayexma, yerũ duũxẽchĩquẽxetanũgu nayarũxaxchigũnẽxũ. ²⁸ Rũ yexguma Ngechuchuxũ nadẽuxgu, rũ napẽxegu nayacaxãpũxũ. Rũ aita naxũãcũma ñanagũrũ: —¿Tũxcũũ nuã choxũ cuyachixewe, Pa Ngechuchux, Pa Tupana ya Tacũxũchi Nanex? Rũ cuxũ chacèexũ na tama ngũxũ choxũ quingexẽexũ —ñanagũrũ. ²⁹ Rũ yema ñanagũrũ yerũ Ngechuchu marũ nanamu ga yema ngoxogũ na ínachoxũxũcèx. Rũ muẽxpũxcũna rũ guma yatũxũ naxãũãẽxẽexũ ga yema ngoxogũ. Rũ duũxũgũ rũ cadenamaã nayanẽixchacũũgũxũ rũ nayanẽixparagũxũ na taxuwama naxũxũcèx. Natũrũ nũma rũ nagu nacaugũama ga cadenagũ. Rũ yema ngoxogũ rũ dauxchitawa ga taxũema íxãpataxũwa nanagagũ. ³⁰ Rũ Ngechuchu nũxna naca rũ ñanagũrũ: —¿Tacũ nixĩ i cuẽga? —ñanagũrũ. Rũ nũma rũ Ngechuchuxũ nangãxũ, rũ ñanagũrũ: —Muxũchixũ nixĩ i chauẽga —ñanagũrũ. Rũ yema ñanagũrũ yerũ namuxũchi ga yema ngoxogũ ga guma yatũgu chocuxũ. ³¹ Rũ yema ngoxogũ rũ Ngechuchuna nacagũ ga tama ngẽma poxcuchica i ãxmaxũ i taguma iyacuãxũgu na nawocuãxũcèx. ³² Rũ guma mẽxpũneãrũ tuãchiwa nayexmagũ ga muxũma ga cuchigũ ga yẽma chibũexũ. Rũ yemacèx ga yema ngoxogũ rũ Ngechuchuxũ nacèexũgũ na yema cuchigũgu nayachocuxũcèx. Rũ Ngechuchu rũ: —Ngũ —ñanagũrũ. ³³ Rũ yexguma ga yema ngoxogũ rũ guma yatũwa ínachoxũ rũ yema cuchigũgu nayachocu. Rũ guxũma ga yema cuchigũ rũ inaxũãchi, rũ naxtaacutũarũ mẽxpũxũwa nayarũyuxgũ, rũ yexma nayi. ³⁴ Rũ yexguma yema cuchigũarũ dauruũgũ nũxũ daugũgu ga yema ngupetũxũ, rũ nabaixãchiãẽgũ rũ ínibuxmũ. Rũ ñãnewa nũxũ nayarũxugũe, rũ yema ñãneãrũ ngaicamana ipeagũxũ ga duũxũgũtanũwa rũ ta nũxũ nayarũxugũgũ. ³⁵ Rũ ga duũxũgũ rũ ínayadaugũ ga yema ngupetũxũ. Rũ yexguma Ngechuchuxũtawa nangugũgu, rũ yẽma nũxũ nadaugũ ga guma yatũ ga ngoxoãxchirécũ. Rũ Ngechuchucutũxũtawa narũto, rũ marũ tama naxãũãẽ. Rũ namuũẽ ga duũxũgũ. ³⁶ Rũ yema duũxũgũ ga nũxũ daugũxũ ga yema ngupetũxũ, rũ yema íyadaugũxũmaã nũxũ nixugũgũ ga ñuxãcũ Ngechuchu na namexẽexũ ga guma yatũ ga ngoxoãxchirécũ. ³⁷ Rũ yexguma yemaxũ naxĩnũẽgu, rũ guxũma ga yema Gadãraanecũãx ga duũxũgũ, rũ Ngechuchuxũ nacèexũgũ na ínaxũxũxũcèx ga yema naãnewa, yerũ porãcũ namuũẽ. Rũ yemacèx ga Ngechuchu rũ nguẽgu nixũe, rũ inaxũãchi. ³⁸ Rũ guma yatũ ga ngoxoãxchirécũ rũ Ngechuchuxũ nacèexũ ga nawe na naxũxũcèx. Natũrũ ga Ngechuchu rũ nanamu ga yexma na naxãũxũcèx, rũ ñanagũrũ nũxũ: ³⁹ —¿Cuchiũwa naxũ, rũ duũxũgũmaã nũxũ yarũxu ga tacũ cuxcèx na naxũxũ ga Tupana! —ñanagũrũ. Rũ ínixũ ga guma yatũ, rũ guxũma ga yema ñãnecũãx ga duũxũgũmaã nũxũ nayarũxu ga tacũ naxcèx na naxũxũ ga Ngechuchu.

*Yáiruxacüchiga rü yema nge ga Ngechuchuchirugu ingögücüchiga
(Mt 9.18-26; Mr 5.21-43)*

⁴⁰ Rü yexguma Ngechuchu wenaxârü taegugu ga naxtaxaarü tocutüwa, rü duüxügü rü taãëácüma nanayauxgü, yerü guxüma ínananguxëëgü. ⁴¹ Rü yéma Ngechuchuxütawa nangu ga wüxi ga yatü ga Yáiru ga naega. Rü nüma ga Yáiru rü wüxi ga ngutaquëxepataüârü ãëxgacü nixî. Rü Ngechuchupëxegu nayacaxâpüxü rü nüxü nacëëxü ga napatawa na naxüxücëx. ⁴² Yerü nüxü iyexma ga wüxi ga naxâcü ga ngîgümaã wüxicacü, rü iyadaawe, rü ituraxüchi. Rü ngîma rü maneca 12 ga taunecü ngîxü nayexma. Rü yexguma Yáirupatawa naxüxgu ga Ngechuchu, rü muxüchixü ga duüxügü nawe narüxî, rü düxwa ínayaxüxtügü. ⁴³ Rü yema duüxügütanüwa iyexma ga wüxi ga ngecü ga 12 ga taunecü ägüechacü. Rü yemamaã iyadaawechea. Rü duturugüxütagu ngîxü iguxëë ga guxcü ga ngîrü dîëru, natürü taxúema ga texé ngîxcëx tayataanexëëga. ⁴⁴ Rü yema ngecü ga Ngechuchuweama ne ixü, rü naxpechinüchirugu iyangögü. Rü yexgumatama ínayachaxâchi ga na naxâgüxü. ⁴⁵ Rü yexguma ga Ngechuchu rü duüxügüna naca, rü ñanagürü: —¿Texé tixî ya choxü ingögüxe? —ñanagürü. Rü guxüma ga duüxügü rü: —Taxúema —ñanagürügü. Rü yexguma ga Pedru rü namücügü rü ñanagürügü: —Pa Ngúexëëruüx, cuma nüxü cudau i ñuxre i duüxügü nge ma cuxü na nayaxüxtügüxü, rü ngëxguma rü ta:

“¿Texé ya choxü ingögüxe?” ñacuxü —ñanagürügü. ⁴⁶ Natürü ga Ngechuchu rü ñanagürü: —Ngëmaãcü wüxie choxü tingögü, erü nüxü chîcuëxâchi na chorü poramaã tüxü na charümexëëxü —ñanagürü. ⁴⁷ Rü yexguma nangoxomagu ga na nüxü nacüëxamaxü ga Ngechuchu ga yema nüxü na yangögüxü, rü yaduruxâcüma naxütawa ixü ga yema ngecü. Rü napëxegu iyacaxâpüxü. Rü guxü ga duüxügüpëxewa namaã nüxü iyaxu ga tacücëx nüxü na yangögüxü, rü ñuxâcü yexgumatama ngîxcëx na yataanexü. ⁴⁸ Rü yexguma ga Ngechuchu rü ñanagürü ngîxü: —Pa Chauxacüx, cuxcëx nitaane, erü cuyaxô. ¡Rü ñuxma rü taãëácüma íxü! —ñanagürü. ⁴⁹ Rü yexguma iyadexayane ga Ngechuchu, rü yéma nangu ga wüxi ga duüxü ga ngutaquëxepataüârü ãëxgacü ga Yáirupatawa ne üxü. Rü ñanagürü Yáiruxü: —Cuxacü rü marü iyu. ¡Rü tâxü i cuyachixewechigüxü ya Ngúexëëruü! —ñanagürü. ⁵⁰ Natürü yexguma yema orexü naxînúgu ga Ngechuchu, rü ñanagürü Yáiruxü: —¡Tâxü i cuyanguãëxü! Erü ngëxguma cuyaxôxgu rü cuxacü rü tá wena imaxü —ñanagürü. ⁵¹ Rü yexguma Yáirupatawa nangugügu, rü Ngechuchu nayachocuxëë ga Pedru rü Chaütiágu rü Cuáü rü ngînatü rü ngîë ga yema bucü ga yuxcü. Natürü tama nanaxwëxe na togü yexma chocuxü. ⁵² Rü guxüma ga duüxügü ga yéma yexmagüxü rü naxauxe rü ngîxcëx nangechaügü. Natürü Ngechuchu rü ñanagürü nüxü: —¡Tâxü i pexauxexü! Erü ngëma bucü rü tama nixî i nayuxü. Rü ipemare —ñanagürü. ⁵³ Natürü ga yema duüxügü rü Ngechuchuxü nacugüeama, yerü ngîxü nadaugü rü aixcüma marü iyu. ⁵⁴ Rü yexguma ga Ngechuchu rü ngîxmëxgu nayayauxâchi, rü tagaãcü ñanagürü: —Pa Bucüx, ¡rüda! —ñanagürü. ⁵⁵ Rü yexguma ga ngîma rü wena imaxü, rü yexgumatama írüda. Rü Ngechuchu rü duüxügümaã nüxü nixu na ngîxü naxüwemügüxücëx. ⁵⁶ Rü ngînatü rü ngîë ga yema bucü, rü poraãcü tabaixâchiãëgü. Natürü Ngechuchu rü tüxü namu na taxúemaãma nüxü na tixuxücëx ga yema ngupetüxü.

9

Ngechuchu norü ngúexügüxü namu na nüxü yanaxugüexücëx ga Tupanaarü

ore

(Mt 10.5-15; Mr 6.7-13)

¹ Rū Ngechuchu rü nanangutaquëxexëë ga yema 12 ga norü ngúexügü. Rū pora nüxna naxã rü nüxna naxãga na ínawoxüãxüçèx ga nagúxüraüxü ga ngoxogü, rü na nameëxëëãxüçèx ga duüxügü ga idaaweexü. ² Rū nayamugü na duüxügümaã nüxü yaxugüexüçèx ga ore ga mexü na ñuxãcü ãëxgacü yïixü ya Tupana, rü na nameëxëëãxüçèx ga duüxügü ga idaaweexü. ³ Rū ñanagürü nüxü: —¡Rü taxuxütáma ípinge i perü namawaü, rü bai ya perü caxüchigüxü ya naïxmenëxã, rü bai i perü choca, rü bai i perü pãü, rü bai i perü dïëru. Rū wüxitama i perü daxü ípinge, rü tama i taxre! ⁴—Rü ngëxguma wüxi ya ñãnewa pengugügu, ¡rü wüxi ya ípatagutama perücho rü ñuxmata ipexiãchi nawa ya yima ñãne! ⁵—Rü ngextá tama pexü ínayauxgüxüwa, ¡rü ípechoxü nawa ya yima ñãne! Rū ngëxguma ngëma ipexiãchigu ¡rü ipepagücutü i perü üxaxücutü na ngëmawa nüxü nacuëxgüxüçèx na chixexü naxügüxü i ngëma duüxügü! —ñanagürü. ⁶ Rū inaxiãchi, rü guxüma ga ñãnexãcügüwa naxi. Rü nüxü nixugüetanü ga Tupanaärü ore ga mexü. Rü guxüwama nanameëxëëtanü ga duüxügü ga idaaweexü.

Eróde rü tama nüxü nacuëxéga na texe yixü ga Ngechuchu

(Mt 14.1-12; Mr 6.14-29)

⁷ Rū Gariréaaneärü ãëxgacü ga Erode, rü nüxü nacuáchiga ga guxüma ga yema Ngechuchu üxü. Rū poraãcü nagu narüxñü rü naxoegaãë ga Erode, yerü nümaxü ga duüxügü rü ñanagürügü: —Cuáü ya baiüxëëruü nixi ya yima, rü marü wena namaxü —ñanagürügü. ⁸ Natürü togü rü ñanagürügü: —Nuxcümaücü ga Tupanaärü orearü uruü ga Ería nixi, rü wena nangox —ñanagürügü. Rü togü rü ñanagürügü: —Bexmana náí ga nuxcümaücü ga Tupanaärü orearü uruü nixi, rü wena namaxü —ñanagürügü. ⁹ Natürü Erode rü ñanagürü: —Chomatama chanamu ga churaragü na Cuáüxü yadae-naxãgüxüçèx. ¡Rü tacü éxna nixi i ngëma yatü i duüxügü ngëmaãcü poraãcü nüxü ixuchigagüechaxü? —ñanagürü. Rü Erode rü nüxü nangüchxüxüchi na ñuxãcü Ngechuchuxü na nadauxü.

Ngechuchu rü nanachibüexëë ga 5000 ga yatügü

(Mt 14.13-21; Mr 6.30-44; Cu 6.1-14)

¹⁰ Rū yexguma nawoeguxgu ga yema Ngechuchuarü ngúexügü ga yamugüxü, rü Ngechuchumaã nüxü nixugüe ga yema naxügüxü. Rü nüma ga Ngechuchu rü yema norü ngúexügümaã nixügachi, rü Bechaídaarü ñãnewa namaã naxü. ¹¹ Natürü yexguma duüxügü nüxü cuëxgügu ga ngextá na nayexmaxü, rü Ngechuchuwe narüxi. Rü Ngechuchu rü meãma yema duüxügüxü nayaxu, rü namaã nüxü nixu na ñuxãcü ãëxgacü yïixü ya Tupana. Rü nanameëxëë ga yema duüxügü ga idaaweexü. ¹² Rū yexguma marü nayáuanegu, rü Ngechuchucèx naxi ga yema 12 ga ngúexügü ga yamugüxü. Rū ñanagürügü nüxü: —¡Íyamugü i ñã duüxügü na ñãnexãcügü rü ípatagü ya ngaicamana ngëxmagünewa na naxixüçèx, rü ngëxma na napegüxüçèx rü norü õnatèex yataxegüxüçèx! Erü nuã íngëxmagüxüwa rü nataxuma i tacü rü õna —ñanagürügü. ¹³ Natürü Ngechuchu rü ñanagürü nüxü: —¡Pematama penaxüwemü! —ñanagürü. Rū nanangãxügü, rü ñanagürügü: —Wüximëëxpüx i pãü rü taxre i choxnixicatama toxü nangëxma. ¡Rü éxna cunaxwëxe na naxcèx tayataxegüxü i õna naxcèx i guxüma i ñã duüxügü? —ñanagürü. ¹⁴ Rū 5000 ga yatügü nixi ga yema yema yexmagüxü. Natürü Ngechuchu rü ñanagürü nüxü ga norü ngúexügü: —¡Ëcü ípenatogüxëëx rü 50 chigü i wüxi tücumüwachigü! —ñanagürü. ¹⁵ Rū yemaãcü nanaxügü ga norü ngúexügü. Rū ínanatogüxëë ga guxüma ga duüxügü. ¹⁶ Rū yexguma

ga Ngechuchu rü nanade ga yema wüximēxpüx ga pãu rü yema taxre ga choxni. Rü daxügu nadawenüäcüma Tupanana moxē naxã, rü ñuxüchi inanabücu ga yema pãu rü choxni. Rü norü ngúexügüna nanaxã na nüxü yanüaxücèx ga yema duüxügü. ¹⁷ Rü guxüma ga yema duüxügü rü meãma nachibüe. Rü yemawena rü 12 ga pexchigü nanapagüamatama namaã ga yema pãu rü choxnichipëxegü ga iyaxügüxü.

*Pedru nanangoxëë na Cristu na yïxü ga Ngechuchu
(Mt 16.13-19; Mr 8.27-29)*

¹⁸ Rü wüxi ga ngunexü rü Ngechuchu norü ngúexügümaã noxrüwama yayumüxëgu, rü nüma rü norü ngúexügüna naca, rü ñanagürü: —¿Ñuxü ñaxü i duüxügü i chauchiga i choma na texé chiïxü? —ñanagürü. ¹⁹ Rü norü ngúexügü nanangãxügü rü ñanagürügü: —Nangëxma i duüxügü rü:

“Cuáü ya baiüxëëruü quixi”, ñagüxü, rü togü rü:

“Eria quixi”, ñagüxü, rü togü rü:

“Wüxi ga nuxcümaücü ga Tupanaärü orearü uruü i wena maxücü quixi”, ñagüxü —ñanagürügü. ²⁰ Rü yexguma Ngechuchu nüxna naca rü ñanagürü: —¿Rü pema i ñuxü ñapegüxü choxü na texé chiïxü? —ñanagürü. Rü Pedru nanangãxü rü ñanagürü: —Cuma nixi i Cristu i Tupana Nane —ñanagürü.

*Ngechuchu nanaxunagü ga norü yuxchiga
(Mt 16.20-28; Mr 8.30-9.1)*

²¹ Rü Ngechuchu rü nayaxucuxëgü ga norü ngúexügü na taxúemaãma nüxü yaxugüexücèx ga nüma rü Cristu na yïxü. ²² Rü ñanagürü nüxü ga norü ngúexügü: —Choma i Tupana Nane na duüxüxü chiïxü, rü poraäcü ngúxü tá chinge. Rü choxü tá naxooxgü i Yudíugüarü äëxgacügüerugü, rü paigüarü äëxgacügü, rü ngëma ngúexëëruügü i Moïchéarü mugüwa nguxëëtaegüxü. Rü tá choxü nimëxgü, natürü tomaëxpüx i ngunexügu rü wena táxarü chamaxü —ñanagürü. ²³ Rü yixcama rü guxüma ga norü ngúexügüxü ñanagürü: —Rü ngëxguma texé chowe rüxüxchaügu, jëcü nüxü tarüxo i tümaärü ngúchaü, rü namaã tapora i ngëma guxchaxügü i tümacèx ínguxü i ñoma curuchawa tipotaxürüü tüxü ixixëëxü, rü ngëmaetüwa chowe tarüxüãma! ²⁴ —Erü yixema tügü maxëchaxëëchaüxë rü tá tayu, natürü yixema chauxcèx yuxe rü aixcüma tá tüxü nangëxma i maxü i taguma gúxü. ²⁵ ¿Rü tacüwa i nüxü namexü ya wüxi ya yatü ega nayauxägu i guxüma i ñoma i naãneärü ngëmaxügü, natürü iyanatauxëëägu i norü maxü? ²⁶ —Rü ngëxguma texé chauxcèx änegu rü naxcèx taxãnegu i chorü ore, rü choma i Tupana Nane i duüxüxü na chiïxü rü tá ta tümacèx chaxãne i ngëxguma äëxgacü chixiäcüma núma chaxüxgu. Rü ngëxguma wenaxärü núma chaxüxgu rü Chaunatü ya Tupanarüü tá chapora, rü daxücüãx i Tupanaärü orearü ngeruügü i üünegüxürüü tá chamexëchi. ²⁷ —Rü aixcüma pemaã nüxü chixu rü ñuxre i duüxügü i nuã ngëxmagüxü rü tá nüxü nadaugü na ñuxäcü äëxgacü na yïxü ya Tupana naxüpa na nayuxëü —ñanagürü.

*Ngechuchu rü toraxü nangox
(Mt 17.1-8; Mr 9.2-8)*

²⁸ Rü 8 ga ngunexüguwena ga na yema ñaxü, rü Ngechuchu rü wüxi ga mëxpünewa naxü na yëma yayumüxëxücèx. Rü ínayaxümücügü ga Pedru rü Chaütiägu rü Cuáü. ²⁹ Rü yexguma ínayumüxëyane ga Ngechuchu rü nachiwe rü ngürüächi niyauracüü, rü naxchiru rü ta niyauracüü, rü poraäcüxüchima nacómü. ³⁰ Rü yexguma rü yëma nangox ga taxre ga yatügü ga Ngechuchumaã idexagüxü. Rü Moïché nixi ga wüxi, rü Eria nixi ga to. ³¹ Rü yema taxre íyexmagüxüwa rü poraäcüxüchi nangóone. Rü ínidexagü nachiga ga

ñuxãcü Yerucharéügu tá na nayuxü ga Ngechuchu. ³² Rü woo ga Pedru rü namücügü rü poraãcü na nayaxtaexü rü tama napee. Rü nüxü nadaugü ga ñuxãcü poraãcü na nangóonexü ga naxütawa ga Ngechuchu rü yema taxre ga yatügü ga namaã yexmagüxütawa. ³³ Rü yexguma yema taxre ga yatügü Ngechuchuna ixigachitanügu, rü Pedru rü ñanagürü Ngechuchuxü: — Pa Ngúexëëruüx, namexëchi nixi na nuã ingëxmagüxü. ¡Rü ngixã tanaxü ya tomaëxpüx ya düxenü, rü wüxi ya cuxcèx, rü náí ya Moïchécèx, rü náí ya Eríacèx! —ñanagürü. Natürü ga Pedru rü tama nüxü nacuèx ga na ñuxü ñaxü yerü poraãcü nabaixãchiãë. ³⁴ Rü yexguma íyadexayane ga Pedru, rü wüxi ga caixanexü natanügu nayangëixema. Rü poraãcü namuë ga yema ngúexügü ga yexguma yema caixanexü natanügu yangëixemagu. ³⁵ Rü yema caixanexüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü. ¡Rü naga pexinüë! —ñaxü. ³⁶ Rü yexguma yema ñaxguwena ga yema naga rü Ngechuchuarü ngúexügü rü taxúexüma ga toguexü nadaugü, rü Ngechuchuxüxícatama nadaugü. Rü yema ngúexügü rü taxúemaãma nüxü nixugüe ga yema nüxü nadaugüxü.

Ngechuchu rü nanamexëë ga wüxi ga bucü ga ngoxo nawa yexmacü
(Mt 17.14-21; Mr 9.14-29)

³⁷ Rü yexguma moxüãcü ga guma mèxpúnëwa yanachoügu, rü muxüma ga duüxügü yexma Ngechuchuxü nayangaugü. ³⁸⁻³⁹ Rü yema duüxügütanüwa rü wüxi ga yatü tagaãcü Ngechuchuxü ñanagürü: —Pa Ngúexëëruüx, ¡choxü rüngüxëë, rü tüxü nadau ya chaune! Erü tügümaã choxü tawüxicèx, rü wüxi i ngoxo tümawa nangëxma. Rü ngëxguma tüxü naxüxgu, rü aita tüxü naxüxëë, rü tüxü naxãüãëxëë, rü tüxü narüchiëxëë. Rü chixexü tümamaã naxü, rü tama tüxü ningëxchaü. ⁴⁰ Rü marü nüxü chacèxü i curü ngúexügü na tümawa ínatëxüchigüãxüçèx i ngëma ngoxo, natürü tama nüxü inaxinü —ñanagürü. ⁴¹ Rü yexguma Ngechuchu nanangãxü, rü ñanagürü: —Pa Duüxügü i Tama Yaxögüxüx, ¿Ñuxgurátá i pemaã chanuxmaxü rü yaxna pemaã cha xí-nüxü? ¡Nuã naga ya cune! —ñanagürü. ⁴² Natürü yexguma Ngechuchuxütawa nanguxgu ga guma bucü, rü yema ngoxo rü guma bucüxü ñaxtüanegu nayanguxëë, rü nanaxãüãëxëë. Natürü Ngechuchu nananga ga yema ngoxo, rü nanamexëë ga guma bucü. Rü ñuxüchi nanatüxütawa nanamu. ⁴³ Rü guxüma ga duüxügü rü nabaixãchiãëgü ga yexguma nüxü nadaugügu ga ñuxãcü na naporaxü ya Tupana.

Ngechuchu rü wenaxãrü nanaxunagü ga norü yuxchiga
(Mt 17.22-23; Mr 9.30-32)

Rü yexguma duüxügü namaã baixãchieyane ga yema Ngechuchu üxü, rü ñanagürü ga Ngechuchu nüxü ga norü ngúexügü: ⁴⁴ —¡Meã iperüxínüë i ñaã ore i pemaã nüxü chixuxü! ¡Rü täütáma nüxü ipeyarüngümaë! Choma i Tupana Nane na duüxüxü chiixü, rü chauechita tá choxü ínaxuaxügü i duüxügü na äëxgacügü choxü iyauxgüxüçèx —ñanagürü. ⁴⁵ Natürü ga norü ngúexügü rü tama nüxü nacuèxgüéga ga yema namaã nüxü yaxuxü. Yerü Tupana rü tama naxcèx nanangoxëë ga yema ore na nüxü nacuèxgüxüçèx. Rü yema ngúexügü rü namuë ga Ngechuchuna na nacagüxü na meã namaã nangoxëëãxüçèx ga yema namaã nüxü yaxuxü.

¿Texé tá tixi ya guxãrü yexera ixixë?
(Mt 18.1-5; Mr 9.33-37)

⁴⁶ Rü yexguma ga norü ngúexügü rü inanaxügüe ga nügümaã na yaporaganücüüxü nachiga ga texé tá tixü ya natanüwa guxãrü yexera ixixë. ⁴⁷ Natürü Ngechuchu rü nüxü nacuèxama ga yema norü ngúexügü nagu

rüxĩnũxũ. Rü yemacèx wüxi ga buxũ nügüxtawa naga, rü nügüxtagu nayachixẽẽ. ⁴⁸ Rü ñanagürü nüxũ ga norü ngúexũgü: —Texé ya ñaã buxũxũ meã yaxúxe chauégagu, rü choxũ nixĩ i tayaxuxũ. Rü yíxema meã choxũ yaxúxe, rü Chaunatü ya núma choxũ mucũxũ rü ta meã tayaxu. Rü yíxema guxããrũ yexera tũgü írũxíraxe, rü yíxema tixĩ ya guxããrũ yexera ixĩxẽ —ñanagürü.

Texé ya tama taxchi aixe rü tórü ngüxẽẽruũ tixĩ
(Mr 9.38-40)

⁴⁹ Rü yexguma ga Cuáũ rü ñanagürü nüxũ: —Pa Ngúexẽẽruũx, nüxũ tadau ga wüxi ga yatü ga cuégagu ngoxogü íwoxũxũ. Rü toma nüxna tanachuxu ga yema yerü tama tatanũxũ nixĩ ga nümax —ñanagürü. ⁵⁰ Natürü Ngechuchu rü ñanagürü nüxũ: —Tama name i nüxna na penachuxuxũ. Erü texé ya tama taxchi aixe, rü tórü ngüxẽẽruũ tixĩ —ñanagürü.

Ngechuchu nayangagü ga Chaũtiágu rü Cuáũ

⁵¹ Rü yexguma marü yangaicagu ga Ngechuchu ga daxũguxũ ga naãnewa na naxũxũ, rü tama namuãcũma inaxũãchi ga Yerucharéũwa na naxũxũ. ⁵² Rü nügüpẽxegu nayamugü ga ñuxre ga norü orearü ngeruũgü. Rü nümagü rü nawa naxĩ ga wüxi ga ñanexãcü ga Chamáriaanewa yexmane, na yexma naxcèx yadaugüxcèx ga wüxi ga ñ na Ngechuchu nagu pexünexũ. ⁵³ Natürü yema Chamáriaanecũãx rü tama nanayauxgüchaũ, yerü nüxũ nacuèxgü ga Yerucharéũwa tá na naxũxũ. ⁵⁴ Rü yexguma yemaxũ nadaugügu ga norü ngúexũgü ga Chaũtiágu rü Cuáũ, rü ñanagürü Ngechuchuxũ: —Pa Corix, ¿cunaxwèxexũ na Tupanana naxcèx tacaxũ na daxũwa ne namuãxũcèx ya üxü na naguxẽẽãxũcèx i guxũma i ñaã duũxũgü, yema nuxcũmaũcü ga Tupanaãrũ orearü uruũ ga Ería üxũrũ? —ñanagürü. ⁵⁵ Rü yexguma ga Ngechuchu rü nüxũ nadawenü, rü nayangagü, rü ñanagürü nüxũ: —Pema rü tama nagu perũxĩnũẽ na texéarü duũxũgü pixĩgũxũ. ⁵⁶ —Erü choma i Tupana Nane na duũxũxũ chiĩxũ, rü tama duũxũgüarü tauxexẽẽwa núma chaxũ, natürü núma chaxũ na duũxũgũxũ chamaxẽẽxũcèx —ñanagürü. Rü yexguma rü náĩ ga ñanexãcüwa naxĩ.

Duũxũgü ga Ngechuchuwe rüxĩxchaũxũchiga
(Mt 8.19-22)

⁵⁷ Rü yexguma namagu naxĩxgu rü wüxi ga yatü Ngechuchuxũ ñanagürü: —Pa Corix, cuwe charũxũxchaũ i ngextá cuma ícuxũxũwa —ñanagürü. ⁵⁸ Rü Ngechuchu nanangãxũ rü ñanagürü: —Ngowagü rü nüxũ nangẽxma i naxmaxũgü, rü werigü rü nüxũ nangẽxma i naxchiãũgü, natürü choma i Tupana Nane na duũxũxũ chiĩxũ, rü nataxuma i chauchica i ngextá nagu chicuxeruxũ —ñanagürü. ⁵⁹ Rü Ngechuchu ñanagürü nüxũ ga wüxi ga to ga yatü: —¿Chowe rüxũ! —ñanagürü. Natürü núma ga yema yatü rü ñanagürü nüxũ: —Pa Corix, noxri chanawèxe i chaunatũxũ ichayatèxira —ñanagürü. ⁶⁰ Rü Ngechuchu nanangãxũ rü ñanagürü: —Nüẽ ngẽma cutanũxũ i tama yaxõgũxũ iyatèxgü i ngẽma naxrũü yuexũ, natürü cuma rü curü puracü nixĩ na paxa duũxũgũmaã nüxũ cuyarũxuxũ i Tupanaãrũ ore na ñuxãcü guxããrũ ãxgacü na yĩxũ i nümax —ñanagürü. ⁶¹ Rü wüxi ga to ga duũxũ rü ñanagürü Ngechuchuxũ: —Pa Corix, ngẽmaãcü cuwe charũxũxchaũ, natürü noxri chanaxwèxe i nüxũ chayarũmoxẽ i ngẽma chopatacũãxgü —ñanagürü. ⁶² Natürü Ngechuchu rü ñanagürü nüxũ: —Texé ya yíxema inaxũgũxe na Tupanaãrũ puracüwa tapuracũxũ natürü tũmaãrũ ngẽmaxũguama rüxĩnũxẽ, rü tama tame na Tupanaãxũ tapuracũxũ —ñanagürü.

10

Ngechuchu nayamugü ga 72 ga norü ngúexüğü

¹ Rü yemawena ga Cori ga Ngechuchu rü nayadexechi ga 72 ga to ga norü ngúexüğü. Rü taxrechigü inayamugü na yoxni guxü ga yema ñānegü rü nachicagü ga Ngechuchu nawa üxchaüxüwa na naxixüçèx. ² Rü ñānagürü nüxü: —Aixcümāxüchi nangēxma i muxüchixü i duüxüğü i yaxögüchaüxü natürü ngema Tupanaarü orearü uwa puracüexü rü noxretama nixi. Rü ngēmacèx name i perü yumüxēwa nüxna peca ya yima puracüarü yora na ngema norü puracüwa namugüāxüçèx i to i puracütanüxü. ³ —;Rü ipexiāchi rü ngema pexi! Rü dücax, ñoma carnerugü i aigütanüwa imugüxürü nixi i pexü chimugüxü. ⁴ —;Rü täütāma choca ípinge, rü bai i perü dīeru, rü bai i perü chapatu! Rü tama chanaxwèxe i namagu penuxcü i ngēxguma namawa texéxü perümoxēgügu. ⁵ —Rü ngēxguma wüxi ya ñwa pengugügu, rü ñāācü tá nüxü perümoxēgü i ngēma duüxüğü:

“;Petaāxē erü Tupana rü napetanügu!”, ñaperügügu tá. ⁶ —Rü ngēxguma ngema nangēxmagu i duüxüğü i Tupanaxü cuèxgüchaüxü rü Tupana rü tá nüxna nanaxā i taāxē. Natürü ngēxguma ngema nataxuxgu i duüxüğü i Tupanaxü cuèxgüchaüxü, rü ngema Tupanaarü taāxē rü pexrütāma nixi. ⁷ —;Rü wüxi ya ígutama perücho, rü ngema pechibüe rü peyaxü i ngēma nüxü ngēxmagü i ngēma ícūāxgü! Erü wüxi i puracütanüxü rü name nixi na nayauxāxü i norü natanü naxcèx i norü puracü. Rü yima ñānewa pengēxmagüyane rü tama chanaxwèxe i náí ya ígu peyapegü. ⁸ —Rü ngēxguma wüxi ya ñāne ya nawa meā pexü nayaxunewa pengugügu, ;rü penangō i ngēma òna i pexna naxāgüxü! ⁹ —;Rü penameēxēx i ngēma ídaaweexü i yima ñānewa ngēxmagüxü! ;Rü namaā nüxü pixu rü ñapegügu nüxü:

“Tupanaarü pora rü marü pexna nangaicama rü napexütāgu”, ñapegügu nüxü! ¹⁰ —Natürü ega nawa pengugügu ya wüxi ya ñāne i ngextá duüxüğü tama meā pexü íyaxgüxüwa, ;rü ngēma ítamügu ípechoxü rü ñapegügu nüxü i ngēma ñānecūāx!:

¹¹ “Rü woo ñāā perü ñānearü üxaxü i tocutüwa yaxüxü, rü itanapagü, na ngēmawa nüxü pecuāxüçèx na Tupana rü tama pemaā nataāēxü. ;Natürü tama nüxü ipeyarüngümaē na marü pexna nangaicamaxüchichiréxü ya Tupana na perü āēxgacü yīxü”, ñaperügügu tá nüxü i ngēma ñānecūāx! ¹² —Rü pemaā nüxü chixu rü ngēma ngunexü i nagu nagüxü i naāne, rü Chodomacūāx i duüxügüarü yexera Tupana tá nanapoxcue i ngēma duüxüğü i tama meā pexü yaxgüxü.

Ñānegü ga tama Tupanaga ññüēne

(Mt 11.20-24)

¹³ —Rü wüxi i ngechaü nixi i pexcèx, Pa Corachicūāx rü Bechaídacūāx i Duüxügüx, yerü yexguma chi Tiruarü ñānewa rü Chidāñarü ñānewa chanaxüxgu ga yema mexüğü ga cuèxruüğü ga Tupanaarü poramaā petanüwa chaxüxü, rü woo ga na poraācü yachixexü ga yema Tirucūāx rü Chidāñarü ga duüxüğü rü nuxcümama chitama nüxü narüxoe ga nacüma ga chixexü, rü poraācüxüchi chima nügümaā nangechaüğü rü naxauxe, yerü chi nügü nicuèxāchitanü ga na yapedacūāxgüxü. ¹⁴ —Natürü pemaā nüxü chixu rü ngēma ngunexü i Tupana nagu napoxcuexü i pecaducūāxgüxü, rü ngēma ngunexügu rü Tirucūāx rü Chidāñarü yexera tá pexü napoxcue i pemax. ¹⁵ —Rü pemax, Pa Capernāñarü i Duüxügüx ¿éxna pema nagu perüññüēgu rü daxügüxü i naānewa tá pexixü? Pemaā nüxü chixu rü naānetüüwa i ngextá Tupana Chatanáxü ípoxcuxüwa tá nixi i pewogüxü. ¹⁶ Rü

ñuxũchi norũ ngúexũgũxũ ñanagũrũ: —Rũ yíxema pega ñnũexẽ, rũ chauga rũ ta taxĩnũe. Natũrũ yíxema tama pega ñnũexẽ, rũ chauga rũ ta tama taxĩnũe. Rũ yíxema tama chauga ñnũexẽ, rũ tama naga taxĩnũe ya Chaunatũ ya nũma choxũ mucũ —ñanagũrũ ga Ngechuchu.

Nawoegu ga yema 72 ga Ngechucharũ ngúexũgũ

¹⁷ Rũ taãẽacũma nawoegu ga yema 72 ga norũ ngúexũgũ ga yamugũxũ. Rũ ñanagũrũgũ nũxũ: —Pa Corix, ngẽxguma cuégagu tidexagũgu, rũ èixrũxũ i ngoxogũ rũ toga naxĩnũe —ñanagũrũgũ. ¹⁸ Rũ Ngechuchu rũ ñanagũrũ nũxũ: —Ngẽmãacũ aixcũma nixĩ. Yerũ nũxũ chadau ga Chataná ga daxũguxũ ga naãnewa na natáexũ wũxi ga ãẽmacũrũũ. ¹⁹ —Rũ choma nixĩ ga pexna chanaxãxũ ga pora na tama chixexũ pemaã naxũgũxũcèx ega woo ãxtapegũwa rũ èxna tuxchinawegũwa pengagũgu. Rũ yexgumarũũ ta pexna chanaxã ga pora na nũxũ perũ- yexeraxũcèx i guxũma i Chatanáãrũ pora na ngẽmãacũ taxucũrũwama tacũ rũ chixexũ pemaã naxũxũcèx. ²⁰ —¡Natũrũ tãxũ i petaãegũxũ naxcèx i ngẽma na pega naxĩnũexũ i ngoxogũ! Rũ narũmemaẽ nixĩ i petaãegũ naxcèx na marũ naxũmatũxũ i peéga i Tupanaãrũ poperawa i daxũguxũ i naãnewa —ñanagũrũ.

Ngechuchu rũ nataãẽ (Mt 11.25-27, 13.16-17)

²¹ Rũ yexgumatama ga Tupanaãẽ ga Üünexũ rũ poraãcũ Ngechuchuxũ nataãẽxẽe. Rũ ñanagũrũ ga Ngechuchu: —Pa Chaunatũ, Pa Daxũguxũ i Naãne rũ Ñoma i Naãneãrũ Yorax, cuyũ chicuèxũũ, yerũ ñãã chorũ ngúexũgũxũ nũxũ cucuèxẽe i ñãã ore ga naxchaxwa iquicũxũ ga duũxũgũ i ñoma i naãnewa nũxũ cuèxũchigũxũ. Rũ yemaãcũ cunaxũ, Pa Chaunatũx yerũ yemaãcũ nixĩ ga cunaxwèxexũ —ñanagũrũ. ²² Rũ ñanagũrũ ga Ngechuchu: —Chaunatũ choxna nanaxã i guxũma i tacũ i ngẽxmaxũ. Rũ taxũema choxũ tacuèx na Tupana Nane chiĩxũ. Rũ Chaunatũxicatama nixĩ ya choxũ cuácũ na Nane chiĩxũ. Rũ ngẽxgumarũũ ta taxũema nũxũ tacuèx na texe yĩĩxũ ya Chaunatũ. Rũ choma ya Nane rũ ngẽma duũxũgũ i Chaunatũxũ nũxũ chadauxẽẽchaũxũĩcatama nixĩ i nũxũ cuèxgũxũ na texe yĩĩxũ —ñanagũrũ. ²³ Rũ yexguma norũ ngúexũgũxũ nadawenũ, rũ namaãxĩca ñanagũrũ: —Tataãegũ ya yíxema tũmaxètũmaãxũchi nũxũ daugũxe i ñãã ñuxma pema nũxũ pedaugũxũ. ²⁴ —Erũ pemaã nũxũ chixu, rũ muxũma ga nuxcũmaũgũxũ ga Tupanaãrũ orearũ uruũgũ rũ ãẽxgacũgũ ga tacũgũ, rũ nũxũ nangúchaũ ga nũxũ na nadaugũchaũxũ i ñãã ñuxma pema chauxũtawa nũxũ pedaugũxũ. Natũrũ tama nũxũ nadaugũ. Rũ nũxũ nangúchaũ ga nũxũ na naxĩnũechaũxũ i ñãã ñuxma pema chauxũtawa nũxũ pexĩnũexũ. Natũrũ tama nũxũ naxĩnũe —ñanagũrũ.

Ore ga mecũ ga Chamãriacũãxgu ixuxũ

²⁵ Rũ yexguma inachi ga wũxi ga ngúexẽẽruũ ga Moĩchearũ mugũwa nguxẽẽtaexũ, rũ Ngechuchuxũtawa naxũ na namaã yanadexaxũcèx. Rũ Ngechuchuxũ naxũxchaũ, rũ yemacèx nũxna naca rũ ñanagũrũ: —Pa Ngúexẽẽruũ ya Ngechuchux, ¿Tacũ nixĩ i mexũ na chanaxũxũ na choxũ nangẽxmaxũcèx i maxũ i taguma gũxũ? —ñanagũrũ. ²⁶ Rũ Ngechuchu nanangãxũ, rũ ñanagũrũ: —¿Ñuxũ ñaxũ i ngẽma ore i Moĩchearũ mugũwa ũmatũxũ? ¿Rũ tacũxũ i cumaã yaxuxũ? —ñanagũrũ. ²⁷ Rũ yema ngúexẽẽruũ ga Moĩchearũ mugũwa nguxẽẽtaexũ, rũ Ngechuchuxũ nangãxũ, rũ ñanagũrũ: —¡Nũxũ nangechaũ ya Cori ya curũ Tupana i guxũma i curũ maxũmaã, rũ guxũ i cuãẽmaã, rũ guxũ i curũ poramaã, rũ guxũ i nagu curũxĩnũxũmaã! ¡Rũ nũxũ nangechaũ i cumũcũ ngẽma na cugũtama cungechaũxũrũũ! —ñanagũrũ. ²⁸ Rũ yexguma ga Ngechuchu rũ ñanagũrũ nũxũ: —Ngẽma ore i choxũ namaã

cungãxũxũ rü marü name. Rü ngëxguma ngëma ore quinguxëëxgu, rü tá cunayaxu i maxũ i taguma gúxũ —ñanagürü. ²⁹ Natürü ga yema ngúexëëruũ ga Moïchëarü mugüwa nguxëëtaexũ, rü nügüëtüwa nachogüchaũ. Rü yemacëx Ngechuchuna naca, rü ñanagürü: —¿Rü texé tixĩ ya chomücü? —ñanagürü. ³⁰ Rü yexguma ga Ngechuchu rü nanangãxũ, rü ñanagürü nüxũ: —Wüxi ga yatü Yerucharëüwa ne naxũ, rü Yericú ga ñanewa naxũ. Rü namagu nüxũ nangaugü ga ngítèèxgüxũ. Rü guxũma ga norü yemaxüçèx nangĩxgü, rü èixrũxũ ga naxchiru rü ta naxcèx nangĩxgü. Rü nanaçuaixgü, rü nayayuãchixëëgü, rü yemaãcü yéma nanatèxgü. ³¹ —Rü yematama namawa naxüpetü ga wüxi ga Yudíugüarü pai. Natürü yexguma yema yatüxũ nadèuxgu rü nüxũ yéma naxüpetümare. ³² —Rü yéma naxüpetü ta ga wüxi ga Lebítanüxũ ga tupauca ga taxñewa puracüxũ. Rü yexguma yema yatüxũ nadèuxgu, rü nüma rü ta nüxũ naxüpetümare. ³³ —Natürü yixçüra rü wüxi ga Chamáriaanecüãx ga yatü rü yematama namawa naxüpetü. Rü yexguma guma yatüxũ nadèuxgu rü nüxũ nangechaütümü. ³⁴ —Rü guma yatüçèx nixũ. Rü chixũ rü binumaã nanaxüxũ ga norü oxrigü, rü meãma nayanëixgü ga yema norü oxrigü. Rü ñuxũchi norü burugu nanamunagü, rü wüxi ga pegüchicawa nanaga. Rü yéma nüxna nadau. ³⁵ —Rü moxüãcü ga yexguma inaxüãchigu ga yema Chamáriaanecüãx, rü ngĩxũ nayaxu ga taxretachinü ga norü díeru, rü yema pegüchicaarü yorana ngĩxũ naxã. Rü ñanagürü nüxũ:

“¡Nüxna nadau i ñaã yatü! Rü ngëxguma yexeragu naxãtanügu na nuã nangëxmaxũ, rü choma tá cuxũ chanaxütanü i ngëxguma chataeguxgu”, ñanagürü. ³⁶ Rü ñanagürü ga Ngechuchu nüxũ ga yema ngúexëëruũ ga Moïchëarü mugüwa nguxëëtaexũ: —Ñuxma chanaxwëxe i chomaã nüxũ quixu i ngëxürüxũ ga yema tomaëxpüxtanüwa ga aixçüma namücü ixĩxũ ga yema yatü ga ngítèèxgüxũ imèxgüxũ —ñanagürü ga Ngechuchu. ³⁷ Rü yexguma ga yema ngúexëëruũ ga Moïchëarü mugüwa nguxëëtaexũ rü ñanagürü: —Yema Chamáriaanecüãx nixĩ ga yema yatümücü ixĩxũ, yerü nüxũ nangechaütümü —ñanagürü. Rü yexguma ga Ngechuchu rü ñanagürü nüxũ: —¡Ñuxma rü íixũ rü yema Chamáriaanecüãx üxürüũ naxü! —ñanagürü nüxũ.

Marta rü Maríapatawa nangu ga Ngechuchu

³⁸ Rü yexguma Ngechuchu namagu ixüxgu norü ngúexüğümaã rü wüxi ga ñanexãcüwa nangu. Rü yéma guma ñanexãcüwa rü wüxi ga nge ga Martagu äegacü ngígüpatawa inanguxëë. ³⁹ Rü Martaaxũ iyexma ga wüxi ga ngíeyèx ga Maríagu äegacü. Rü ngíma rü Ngechuchucutüxütawa irüto na inaxínüxüçèx ga Ngechuchuarü ore. ⁴⁰ Natürü ga Marta rü itaarü puracüãx rü yemaãcü ngürü puracüguama irüxĩnü. Rü yemacëx Ngechuchucèx iyaxũ, rü ngígürügü nüxũ: —Pa Corix, ¿tama ëxna nagu curüxĩnü i ngëma na chataarü puracüãx rü ngëma chaueyèx rü choxnaxĩca na nataãxũ i guxũma i ngëma puracü? ¡Rü namaã nüxũ ixu na choxũ nangüxëëxüçèx! —ngígürügü. ⁴¹ Natürü Ngechuchu rü ngĩxũ nangãxũ, rü ñanagürü ngĩxũ: —Pa Martax, cuma rü poraãcü curü puracüçèx cuxoegaãë, rü muxũma i ngëmaxügu curüxĩnü. ⁴² —Natürü wüxixicatama nixĩ i guxüãrü yexera i mexũ na nagu rüxĩnüxũ. Rü María iyixĩ i ngëmagu rüxĩnücü. Rü taxüetãma ngĩxna tayanuxũ i ngëma —ñanagürü ga Ngechuchu.

11

Ngechuchu nanangúexëë ga yumüxëchiga
(Mt 6.9-15, 7.7-11)

¹ Rū wüxicana wüxi ga nachicawa nayumüxê ga Ngechuchu. Rū yexguma nüxü nachauxgu, rü wüxi ga norü ngúexü rü ñanagürü nüxü: —Pa Corix ;toxü nangúexê na ñuxácü tayumüxêgüxü, yema Cuáü ga baiüxêëruü norü ngúexügüxü nangúexêëxürüü! —ñanagürü. ² Rū Ngechuchu ñanagürü nüxü: —Rū ngêxguma peyumüxêgügu rü ñaperügügu tá:

“Pa Tonatü ya Daxügücüx, rü aixcüma Üüncü quixî i cumax. ;Rü núma naxü na torü âêxgacü quiüxücèx! Rū tanaxwèxe i curü ngúchaü na naxügüxü i duüxügü i ñoma i naãnewa, ngêma daxügüxü i naãnewa na curü ngúchaü ínaxügüxürüü. ³ ;Rü toxna naxâ i torü òna i wüxichigü i ngunexücèx ixîxü! ⁴ ;Rü toxü nüxü nangechaü i torü pepadugü, erü toma rü ta tüxü nüxü tangechaü ya guxâma ya yíxema chixri tomaã chopetüxe! ;Rü tâxü i ;tacü rü chixexüpêxewa toxü cuwogüxü na tama nagu tayixücèx!”

ñanagürü. ⁵ Rū ñanagürü ta ga Ngechuchu: —Ngêxguma chi wüxie i pema rü tüxü nangêmaxgu i wüxi i tümamücü, rü chi ngâxücüü napatawa taxüxgu rü ñatagügu nüxü:

“Pa Chomücüx, ;tomaêxpüx i pãu choxna naxâ! ⁶ —Erü wüxi i chomücü rü yaxüwa ne naxü, rü ngexwacèx chopatawa nangu. Rū choma rü changearü ònaãx, rü taxuümaãma chanachibüxêëega”, ñatagügu. ⁷ —Rü ngêma tümamücü i napatawa ngêxmaxü, rü chi tüxü nangäüxgu rü ñaxgu:

“;Tâxü i choxü cuchixewexü! Chorü îãx rü marü narüwãxta, rü choma rü chauxacügü rü ngürücarewa tangêxmagü. Rū ngêmacèx taxucürüwa ícharüda na ;tacü cuxna na chaxãxücèx”, ñaxgu chi tüxü. ⁸ —Rü pemaã nüxü chixu, rü ngêma na tümamücü yîxücèx rü tãütãma ínarüda na ;tacü tüxna naxãxücèx. Natürü tá ínarüda na tama tanachixeweechaxücèx, rü tá tüxna nanaxâ i guxüma i ;tacü i tanaxwèxexü. ⁹ —Rü ngêmacèx pemaã nüxü chixu rü, ;Naxcèx ípeça rü Tupana rü tá pexna nanaxâ! ;Rü Tupanacèx pedèux rü tá nüxü ipeyangau! ;Rü îãxwa: Tu tu tu ñapegü, rü tá pexcèx niwãxna i îãx! ¹⁰ —Erü guxâma ya yíxema naxcèx íçaxe rü tanayaxu, rü guxâma ya naxcèx dauxe rü nüxü itayangau. Rū guxâma ya îãxwa: Tu tu tu ñagüxe, rü tümacèx tá niwãxna i îãx. ¹¹ —;Rü ñuxácü i wüxi i pema na papágü piüxü rü penena penaxãxü ya wüxi ya nuta ega pãücèx pexna nacaxgu, rü êxna wüxi i äxtape ega choxnicèx pexna nacaxgu? ¹² —;Rü texé i petanüwa rü penena penaxã i tuxchinawe ega wüxi ya otacharaücèx pexna nacaxgu? ¹³ —Rü ngêma pema na pichixecümachiréxü natürü nüxü pecuèx na ñuxácü mexü i âmare pexacügüna na pexãxü, rü pemaã nüxü chixu rü Penatü ya Daxügücü rü perü yexera tá nixî na pexna mexü naxãxü. Rū guxâma ya yíxema Tupanaxütawa Naãê i Üünexücèx íçaxe, rü tá tüxna nanaxâ —ñanagürü ga Ngechuchu.

*Ngechuchuxü nixugüe na ngoxoarü poramaã napuracüxü nawogüe
(Mt 12.22-30; Mr 3.20-27)*

¹⁴ Rū Ngechuchu ínanatèxüchi ga wüxi ga ngoxo ga wüxi ga yatüxü nge-gaxêëxü. Rū yexguma ínaxüüxgu ga yema ngoxo rü guma yatü rü nidexa. Rū guxüma ga duüxügü rü nabaixãchiãêgü ga yexguma yemaxü nadaugügu. ¹⁵ Natürü ñuxre ga duüxügü rü ñanagürügü: —Ñã yatü i Ngechuchu, rü Bechëbú i ngoxogüarü âêxgacüarü poramaã nixî i ínanawoxüãxü i ngoxogü —ñanagürügü. ¹⁶ Natürü ga togü rü nüxü naxügüchaü, rü yemacèx naxcèx ínacagü ga nüxü na nawéaxü ga wüxi ga cuèxruü ga daxücüãx na yemawa nüxü nacuèxgüxücèx rü ngoxi aixcüma Cristu yî. ¹⁷ Natürü núma ga Ngechuchu rü nüxü nacuèxama ga ;tacügu na naxînüèxü, rü yemacèx ñanagürü nüxü: —Ngêxguma chi wüxi i nachüãñecüãx i duüxügü nügü itoyegu rü nügütanüwa chítama nügü nadaixgu, rü nügü chítama nagüxêë. Rū ngêxguma

chi wüxi ya ícũãx nügümaã nuẽẽchagu rü nügü nadaixgu, rü nügü chitama naguxẽẽ. ¹⁸ —¿Rü ngëxguma chi Chataná nügümaãtama nuxgu, rü nügütama yamëxgu, rü ñuxãcü chi i ãëxgacüecha yĩxũ? Rü ngëma ñacharügü i ñuxma erü pema choxũ pixuxgu rü Behebúarü poramaã íchanawoxũ i ngoxogü. ¹⁹ —Natürü ngëxguma chi Chatanáârü poramaã íchanawoxũgu i ngoxogü, rü perü ngüexũgü rü chita Chatanáârü poramaã ínanawoxũ i ngoxogü. Rü ngëmawa meã nüxũ tacuèx na pema rü ípetüexũ. ²⁰ —Natürü pemaã nüxũ chixu rü aixcüma Tupanaârü poramaã nixĩ i íchanawoxũxũ i ngoxogü. Rü ngëmawa pexũ nüxũ chacuèxẽẽ na núma petanüwa nanguxũ ya Tupana na ãëxgacü yĩxũcèx. ²¹ —Rü ngëxguma wüxi ya yatü ya poracü rü meãma nügü naxüxnegu rü nüxna nadèuxgu ya napata, rü taxúetáma naxcèx tangix i norü ngëmaxũ i napatawa ngëxmaxũ. ²² —Natürü ngëxguma ínanguxgu i to i yatü i nüxũ rüporamaëxũ, rü nüxũ nayexeragu, rü tá nüxna nanapuxũ ya naxne ya nügü namaã ínaporaãxũne, rü tá nüxna nanapuxũ i guxüma i norü ngëmaxũ, rü tá nayana. ²³ —Yíxema tama choxũ ngechaũxë rü chauxchi taxai. Rü yíxema tama choxũ rüngüxëexë na Tupanacèx tayagagüxũ i duüxügü rü chauxchawa tanangianexẽẽ.

ngoxo i taeguxũchiga

(Mt 12.43-45)

²⁴ —Rü ngëxguma wüxi i ngoxo rü wüxi ya yatüwa ínaxũũxgu, rü dauxchitagu nanañaãne, rü naxcèx nadau na ngextá na nangüxũ. Rü ngëxguma taxuguma nangüegagu, rü nügü ínicuèx rü ñanagürü:

“Maneca naxcèx tá chataegu ya yima yatü ga noxri nawa íchaxũxũchirécü”, ñanagürü. ²⁵ —Rü ngëxguma nataegugu, rü yima yatüxũ inayangau na ñoma wüxi ya í ya mexëene rü meã nabixichinerüũ na yĩxũ. ²⁶ —Rü ínixũ rü naxcèx nayadau i to i 7 i ngoxogü i norü yexera i chixexũ. Rü guxüma i ngëma ngoxogü rü wüxigu yima yatügu nachocu, rü ngëxma naxãchiügü. Rü ngëxguma ya yima yatü rü noxriarü yexera nachixe —ñanagürü.

Taãe i aixcüma ixĩxũchiga

²⁷ Rü yemaxũ íyaxuyane, rü wüxi ga ngecü rü duüxügütanüwa tagaãcü ngĩgürügü: —Tataãe ya yíxema tügüanüwa cuxũ yaxëexë rü tügü nixüwa cuxũ maixë —ngĩgürügü. ²⁸ Natürü ga Ngechuchu rü ñanagürü: —Yexeraãcü tataãe ya yíxema nüxũ ñnuxë i Tupanaârü ore rü naga ñnuxë —ñanagürü.

Duüxügü ga tama yaxõgüchaũxũ rü naxcèx ínacagüama ga to ga cuèxruũ ga Tupanaârü poramaã üxũ

(Mt 12.38-42; Mr 8.12)

²⁹ Rü nimuëtanü ga duüxügü ga Ngechuchuxütawa ngutaquëxegüxũ. Rü inanaxügü ga Ngechuchu ga namaã na yadexaxũ. Rü ñanagürü: —Ñã duüxügü i ñomaücüü maxëxũ rü nichixecüma. Rü naxcèx ínacagü i wüxi i cuèxruũ i mexũ i Tupanaârü poramaã üxũ. Natürü Tupana rü wüxixicatama i cuèxruũ tá nüxũ nawëx. Rü ngëma nixĩ i cuèxruũ ga Tupanaârü orearü uruũ ga Yonáwa duüxügüxũ nawéxũ na nüxũ nacuèxgüxũcèx na aixcüma Tupana yĩxũ ga guma yéma namucü. ³⁰ —Rü yexgumarüũ ga Yoná rü wüxi ga cuèxruũ nixĩ naxcèx ga Nínibecũãx ga duüxügü, rü ngëxgumarüũ tá ta nixĩ ya Tupana Nane ya duüxüxũ ixícü na wüxi i cuèxruũ tá yĩxũ naxcèx i ñomaücüü maxëxũ i duüxügü. ³¹ —Rü ngëxguma naãneârü guxgu rü Tupana rü ñomaücüü maxëxũ i duüxügüna nacèxgu i norü pecaduchigacèx, rü ngĩma ga nuxcümaücü ga Chabaaneârü ãëxgacü tá írüda rü tá ínaxuaxũ i ñomaücüü maxëxũ i duüxügü. Yerü ngĩma rü yaxüwaxüchi ne ixũ ga na ãëxgacü ga Charumóüxũ naxĩnuxüçèx ga ñuxãcü poraãcü nüxũ na nacuèxüchixũ. Natürü

ñuxma nuã petanüwa nangëxma i wüxi i Charumóũärü yexera ixĩcü. ³² —Rü ngëxguma naãneärü guxgu rü Tupana rü ñomaũcüü maxëxü i duũxügüna nacëxgu norü pecaduchigacëx, rü nuxcümaũgüxü ga Nínibecũãx ga duũxügü rü tá ínarüdagü rü tá ínanaxuaxügu i ñomaũcüü maxëxü i duũxügü. Yerü nümagü ga Nínibecũãxgü ga duũxügü rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera ixĩxü.

Taxüneärü omüchiga
(Mt 5.15, 6.22-23)

³³ —Taxüema wüxi i omüwa tanangixichi rü ñuxüchi itayacux rü éxna tacütüügu tayaxücuchi. Natürü norü üchicaügu tanaxünagü na ngema tüxü nabaxixüçëx ya yíxema duũxëgü ya yima ígu chocuxe. ³⁴ —Cuxetügü rü ñoma wüxi i omürüü nixĩ i cuxunecëx. Rü ngëxguma ngëma Tupana cuxü naxwëxëçëx cudëuxgu, rü guxüma i curü maxü rü name. Natürü ngëxguma ñoma i naãneärü ngüchaüçëx cudëuxgu, rü guxüma i curü maxü rü chixexüwa nangëxma. ³⁵ —Meã cugüna nadau na tama eãnexüxü nanguxuchixüçëx i ngëma ore i mexü i cuxü ngëxmaxü, i ñoma wüxi i omürüü ixĩxü! ³⁶ —Ngëxguma chi guxü i curü maxüwa nangëxmagu i Tupanaärü ngóonexü rü taxuwama nachixëxgu i curü maxü, rü meã chi nüxü cucuëx i Tupanaärü ngüchaü ñoma wüxi i omü i cuxü baxixürüü —ñanagürü.

Ngechuchu rü duũxügütanüwa ínanaxuaxü ga Parichéugü rü ngüexëëruügu ga Moïchéarü mugüwa nguxëëtaegüxü

(Mt 23.1-36; Mr 12.38-40; Lc 20.45-47)

³⁷ Rü yexguma nüxü nachauxgu ga na yadexaxü ga Ngechuchu rü wüxi ga Parichéu nüxna naxu ga napatawa na yachibüxüçëx. Rü yema Parichéupatawa naxü, rü mechawa nayarüto. ³⁸ Rü yema Parichéu rü nabaixãchiãë ga yexguma Ngechuchuxü nadëuxgu na tama yanguxëëãxü ga yema Moïchéarü mu na nayauxmëxgüxiraxü ga yexguma nachibüegu. ³⁹ Natürü nüma ga Cori ga Ngechuchu rü ñanagürü nüxü: —Pema i Parichéugü rü ñoma pochiyu rü poratu i düxëtüwaxicatama iyaxuxürüü pixígü. Natürü i peãëwa rü nagu perüxñüë na pengíxü rü chixexü pexüxü. ⁴⁰ —Pa Naëchitamare Maxëxüx, çtama éxna nüxü pecuëx na guma Tupana ga naxücü i ngëma tórü düxëtüxünewa ngëxmaxü, rü gumatama yíxü ga naxücü ga tórü maxü i tórü aixepewa ngëxmaxü? ⁴¹ —Rü name nixĩ i Tupanana penaxã i perü maxü na aixcüma naxcëx pemaxëxüçëx. Rü ngëmaãcü tá pime i guxüwama. ⁴² —Natürü wüxi i ngechaü nixĩ i pexcëx, Pa Parichéugüx, erü pema rü perü ngëmaxüwa rü meã Tupanana penaxã i ngëma noxrü ixĩxü, natürü perü maxüwa rü tama aixcüma naga pexñüë rü tama nüxü pengechaü. Rü marü name na perü ngëmaxüwa Tupanana penaxãxü i ngëma noxrü ixĩxü. Natürü perü maxüwa rü ta penaxwëxe i meã naga na pexñüëxü rü nüxü na pengechaüxü. ⁴³ —Rü wüxi i ngechaü nixĩ i pexcëx, Pa Parichéugüx, erü pema rü pexü nangüchaü i ãëxgacüchicagüwa na perütogüxü i ngutaquëxepataüguwa. Rü penaxwëxe na ñoma ãëxgacüxü rümoxëxürüü na meã pexü namoxëgüxü i duũxügü i ítamüguwa. ⁴⁴ —Rü wüxi i ngechaü nixĩ i pexcëx, erü ñoma yuetamaügu i tama nüxü idauxü i duũxügü naëchitamare naëtüwa chopetüxürüü pixígü. Erü woo perü düxëtüwa pime, natürü aixepewa i peãëwa rü poraãcü pichixe —ñanagürü ga Ngechuchu. ⁴⁵ Rü wüxi ga ngüexëëruü ga Moïchéarü mugüwa nguxëëtaexü, rü Ngechuchuxü nangãxü rü ñanagürü: —Pa Ngüexëëruü Pa Ngechuchux, rü ngëma na ngëma ñacuxü, rü toma rü toãëwa nangux —ñanagürü. ⁴⁶ Natürü Ngechuchu

rü ñanagürü nüxü: —Wüxi i ngechaü nixi i pexcèx, Pa Ngúexêëruüğü i Moïchéarü Mugüwa Nguxêëtaegüxüx, erü poraäcü penamu i duüxüğü na naga naxĩnüëxüçèx i ngëma Moïchéarü mugü i guxchaxü i pematama bai i írarüwa naga pexĩnüëchaüxü. ⁴⁷—Rü wüxi i ngechaü nixi i pexcèx, erü peyamexêëğü i tümamaüğü ga guxema nuxcümaüğüxe ga Tupanaârü orearü uruüğü ga perü oxigü tüxü dèixe. ⁴⁸—Rü ngëmawa nüxü tacuèx na pema rü ta ipexägüxü nawa ga yema chixexü ga perü oxigü ügüxü. Yerü nümagü rü tüxü nadai ga guxema Tupanaârü orearü uruüğü, rü ñuxma i pema rü peyamexêëğü i tümamaüğü. ⁴⁹—Rü yemacèx nixi ga Tupana ga ñaxü:

“Ngëma duüxüğütanüwa tá chanamugü i chorü orearü uruüğü rü chorü orearü ngeruüğü. Natürü ngëma duüxüğü i chixexüğü rü tá nanadai i nümaxü rü togüxü rü tá nachixewegü rü tá nawe ningëxütanü”, ñaxü ga Tupana. ⁵⁰⁻⁵¹ Rü ñanagürü ga Ngechuchu: —Rü pemaã nüxü chixu rü Tupana tá nayapeguächixêë i pema i ñuxma maxêë erü pema rü ta perü oxigüçümüga pexi. Nümagü rü noxritama nañeârü ügügumama rü nanadai ga muxüma ga Tupanaârü orearü uruüğü. Rü nüxira nayamëxgü ga Abé rü gumawena nayadaietanü ga muxüma ga togü ñuxmata Zacaría ga tupauca ga taxünegu yamëxgüäcüwa nangu. Rü guxüma ga yema orearü uruüğü ga perü oxigü dèixüçèx rü Tupana tá pexna naca, erü pema rü ta perü oxigürüütama pixigü rü tama nüxü perüxoechaü i ngëma chixexü i pexüxü. ⁵²—Rü wüxi i ngechaü nixi i pexcèx, Pa Ngúexêëruüğü i Moïchéarü Mugüwa Nguxêëtaegüxüx, erü duüxüğüchaxwa ipeyacux i Tupanaârü ore i aixcüma ixixü i pematama tama pixögüxü. Rü nüxna penachuxu i togü i duüxüğü i aixcüma yaxögüchaüxü na nümagü rü ta tama yaxögüäxüçèx —ñanagürü ga Ngechuchu. ⁵³⁻⁵⁴ Rü yexguma Ngechuchu yema ñaxgu, rü yema ngúexêëruüğü ga Moïchéarü mugüwa nguxêëtaegüxü rü yema Parichéugü rü poraäcü Ngechuchumaã nanuë. Rü inanaxüğü ga nüxna na nacagüexü naxcèx ga muxüma ga ore ga guxchaxümaã na yemaäcü chi nüxü iyangaugüxüçèx ga ore ga chixexü na yemamaã norü äëxgacügüxü- tawa Ngechuchuxü íyaxuaxügüxüçèx.

12

Ngechuchu nanangúexêë na tama namexü na duüxügüpëxewa meã imaxnetaxü natürü taãewa rü chixexügu rüxĩnüxü

¹ Rü yoxni yexma nangutaquëxegü ga muxüchixü ga duüxüğü. Rü yema na namuxüchixüçèx rü düxwa nügücutüwa ningagüetanü ga duüxüğü. Rü Ngechuchu inanaxüğü ga norü ngúexüğümaãxira na yadexaxü, rü ñanagürü: —¡Pexuãëgü naxcèx i Parichéugü! Erü duüxügüpëxewa meã namaxënetatürü naãewa rü chixexügu narüxĩnüë. ²—Natürü guxüma i tacü i wüxie cúäcü üxü rü tá nangoxoma. Rü guxüma i tacü iicüxü rü yixcüra rü tá duüxüğü nüxü nacüëxgüama. ³—Rü ngëmacèx guxüma i ngëma ore i ëänexüwa cúäcü nüxü pixuxü rü yixcüra rü tá nangoxoma rü guxü i duüxüğü tá nüxü naxĩnüë. Rü ngëma ore i ucapuarü aixepewa cúäcü nüxü pixuxü, rü yixcüra rü guxäpëxewa tá nüxü nixugüğü i duüxüğü.

Name nixi na Tupanaxü pemuüëxü
(Mt 10.26.31)

⁴—Rü ngëmacèx i pemax, Pa Chomüçügüx, rü pemaã nüxü chixu rü ¡tama nüxü pemuüë i ngëma duüxüğü i pexü daixchaüxü! Erü taxünexüxicatama nimëxgü, natürü taxucürüwama taãëxü nimëxgü. ⁵—Natürü pemaã tá nüxü chixu na texéxü tá na pemuüëxü. ¡Nüxü pemuüë ya Tupana! Erü nüma nüxü nangëxma i pora na yamáãxü i pexene, rü napoxcuãxü i peã i ngextá

ngoxogüxü ínapoxcuxügu. ¡Rü yimaxü tá nixí i pemuüëxü! ⁶ —¿Tama éxna taxretachinü i díeruxacügu namaã petaxe i wüximëëxpüx i werixacügu? Natürü Tupana rü tama tüxü inayarüngüma ya yíxema werixacüãxgü, rü bai ya wüxi. ⁷ —Rü woo i peyaegü rü Tupana nüxü nacuèx na ñuxre i peyae ngëxmaxü. Rü ngëmacèx, ¡tãxü i pexoegaãëgüxü! Erü pema rü muxüma i werixacügüarü yexeraxüchi pexü nangechaü ya Tupana.

Yíxema duüxügüpëxewa tügü ixuxe na Ngechuchu ya Cristuarü duüxü tiixü (Mt 10.32-33, 12.32)

⁸ —Rü pemaã nüxü chixu rü guxãma ya texé i ñoma i naãnewa duüxügüpëxewa tügü ixuxe na chorü duüxü tiixü, rü choma i Tupana Nane na duüxüxü chiixü, rü napëxewa i Tupanaãrü orearü ngeruügü i daxüçüãx rü tá tüxü chixu na chorü duüxü tiixü i tümax. ⁹ —Natürü texé ya ñoma i naãnewa duüxügüpëxewa tügü ixuxe na tama chorü duüxü tiixü, rü choma rü tá ta napëxewa i Tupanaãrü orearü ngeruügü i daxüçüãx rü tá tüxü chixu na tama chorü duüxü tiixü i tümax. ¹⁰ —Rü guxãma ya texé ya chixri chauchiga idexaxe i choma i Tupana Nane na duüxüxü chiixü, rü Tupana tá tüxü nüxü nangechaü i ngëma. Natürü texé ya Tupanaãë i Üünexüchiga chixri idexaxe, rü Tupana rü täütáma tüxü nüxü nangechaü i ngëma. ¹¹ —Rü ngëxguma duüxügü ngutaquëxepataügüwa rü éxna äëxgacügüpëxewa pexü nagagügu na pexü napoxcuexüçèx, rü ¡tãxü i pexoegaãëgüxü na ¡acümaã tá penangãxüxü rü éxna ¡acüxü tá namaã na pixuxü! ¹² —Erü ngëxguma nawa nanguxgu na pidexagüxü, rü Tupanaãë i Üünexü tá pexü nanguxëë na ¡acüxü tá namaã pixuxü —ñanagürü ga Ngechuchu.

Wüxi i äüçümaxü nixí na imuãrü díeruãxü

¹³ Rü yema duüxügütanüwa rü wüxi ga yatü Ngechuchuxü ñanagürü: —Pa Ngüexëëruüx, ¡namaã nüxü ixu ya chaueneë rü choxna naxãã i ngëma chauratü ga yucüarü ngëmaxü i choxna üxü! —ñanagürü. ¹⁴ Natürü Ngechuchu rü ñanagürü nüxü: —Pa Yatüx, ¿texé perü äëxgacüxü choxü tingucuchixëë na chayatoyexüçèx i ngëma penatüarü ngëmaxü? —ñanagürü. ¹⁵ Rü ñanagürü ta ga Ngechuchu: —¡Pexuãë na tama pexü nangúchaüxüçèx i togüarü ngëmaxü! Erü wüxi i duüxü rü tama ngëma na namuãrü ngëmaxüãxüçèx nixí i nayauxãxü i norü maxü i taguma gúxü —ñanagürü. ¹⁶ Rü yexguma wüxi ga ore ga cuèxruüxü namaã nixu, rü ñanagürü: —Nayexma ga wüxi ga yatü ga muãrü díeruãcü, rü guxüma ga yema nanetügü ga naãnegu natogüxü rü meãma nüxü nixo. ¹⁷ —Rü guma yatü rü nagu narüxñü rü naãëwa ñanagürü:

“¿¡acü tá chaxüxü i ñuxmax? Erü nataxuma i chorü nachica i ngexta namaã na changuxüxü i chaunetügüarü o”, ñanagürü. ¹⁸ —Rü naãëwa ñanagürü:

“Marü nüxü chacuèx na ¡acü tá chaxüxü. Rü nagu tá chapogü ya guxünema ya chorü ¡patagü ga nagu namaã changuxüne ga chaunetügüarü o. Rü náí ya taxüragüne tá chaxü na ngëxma namaã changuxüxüçèx i guxüma i chaunetügüarü o rü guxüma i chorü ngëmaxügü. ¹⁹ —Rü ngëxguma marü namexgu i guxüma, rü chaugümaã tá ñacharügü: ‘Ñuxma rü tá icharüngü rü meã tá chachibü rü meã chaxaxe rü ngëmaãcü tá chataãë. Erü namuxüchi i chorü ngëmaxügü, rü mucüma ya taunecü tá choxü natai’, ñacharügü tá chaugümaã”. ²⁰ —Natürü Tupana rü ñanagürü guma yatüxü:

“Pa Yatüx, cüngëãëmare i cuma erü ñoma i chütaxügu tátama cuyu. Rü ngëma curü ngëmaxügü i namaã cünguxüxü, rü ¿texéarü tá nixí i ngëxguma?” ñanagürü ga Tupana. ²¹ —Rü ngëxgumarüü tá ta namaã nangupetü i ngëma duüxügü i nügüçèxtama norü ngëmaxügümaã nguxüxü rü tama nügü ímexëëxü i Tupanapëxewa —ñanagürü ga Ngechuchu.

*Tupana rü naxãcüguna nadau
(Mt 6.25-34)*

²² Rü yemawena rü norü ngúexügxü ñanagürü ga Ngechuchu: —Pemaã nüxü chixu ;rü tãxü i pexoegaãëgxü naxcèx i tacü tá na pengõxü rü tacümaã tá na pixãxchiruxü! ²³ —Erü perü maxü rü õnaärü yexera nixi, rü pexene rü naxchiruarü yexera nixi. ²⁴ —;Dücèx penangugü i werigü i tama toegüchiréxü, rü tama nanetüarü o ibuxgüxü, rü ngepatagüxü na ngexta namaã nanguxügxüçèx i norü õna! Natürü Tupana rü nanaxüwemü. Rü pema rü Tupanacèx rü poraãcü guxüma i werigüarü yexera pixigü. ²⁵ —Rü taxuwama name na pexoegaãëgxü. Erü taxucürüwama wüxie i pema rü pegütama ipemèxãchixëë ngãxü ya metrugü ega woo poraãcü naxcèx pexoegaãëgügu. ²⁶ —Rü ngëxguma tama pemaã nanguxü i ngëma íraxü rü taxucürüwama pegütama ipemèxãchixëë ega woo naxcèx pexoegaãëgügu, rü çtüxcüü i ngëxguma rü ta tacü i togü i ngëmaxügüçèx pexoegaãëgxü? ²⁷ —;Dücèx penangugü i putüragü na ñuxãcü nayaexü i nachacu! Rü tama napuracüexü, rü tama nügü üxchirugüxü. Natürü woo guma äëxgacü ga Charumõu ga na namexëchixü ga naxchiru rü taguma wüxi ga putürachacuarü mexürü nixi. ²⁸ —Rü marü nüxü pedau i ñuxãcü Tupana na nangèxãëxü i putüragü i ñuxma naãnewa rüxügümarexü natürü moxü rü marü taxuxü. Rü ngëxguma Tupana ngëmaãcü nangèxãëgu i putüragü rü pema rü tá ngëmaärü yexera pexchiru pexna naxã, Pa Duüxügü i Írarüwatama Yaxõgüxü. ²⁹ —Rü ngëmacèx tama name i pexoegaãë naxcèx i tacü tá na pengõxü rü tacü tá na pixaxüxü. ³⁰ —Erü ñoma i naãneçüãx i duüxügü rü naxcèx nadaugü i guxüma i ngëma pemaã nüxü chixuxü. Natürü pema rü pexü nangëxma ya Penatü ya Tupana ya nüechama nüxü cuácü na pexü nataxuxü i guxüma i ngëma. ³¹ —Rü ngëmacèx narümemaë nixi na Tupanaärü ngüchaüçèx pedaugüxü na perü äëxgacü yixüçèx. Rü ñuxüchi nüma rü tá pexna nanaxã i guxüma i tacü i pexü taxuxü.

*Ñuxãcü tüxü nangëxma i tórü ngëmaxügü i daxügüxü i naãnewa
(Mt 6.19-21)*

³² —;Tãxü i pemuüëxü, Pa Chauxacügüx! Pema rü noxretama pixigü natürü Penatü ya Tupana rü norü ngüchaü nixi na pexna naxãxü i pechica i ngextá nüma äëxgacü íyixüwa. ³³ —;Rü namaã petaxe i perü ngëmaxügü rü togü i duüxügü i nüxü nataxuxüna penaxã i ngëma díeru! Rü ngëmaãcü tá pegüxü penangëxmaxëë i perü ngëmaxügü i taguma pexü ngauxü rü taguma gúxü i daxügüxü i naãnewa i ngextá tama íyaxücüxüwa i ngítèxáxü rü naweane tama ínachixexëëxüwa. ³⁴ —Erü ngextá ínangëxmaxüwa i perü ngëmaxügü, rü ngëxma nixi i perüxñüëxü.

Name nixi i yigü ítamexëëgü naxüpa na ínanguxü ya Cristu

³⁵ —;Rü ípememare namaã i perü omügü i naigüxü! ³⁶ —Rü name nixi i wüxi i coriarü duüxügü i ímemaregüxürü na pixigüxü. Rü penaxwëxe na ñoma duüxügü i íãxwa norü corixü nanguxëëgüxürü na pixigüxü. Rü ngëxguma norü cori rü wüxi i ngigüarü petawa ne naxüxgu rü: Tu tu tu ñaxgu, rü paxa naxcèx nayawãxnagü i íãx. ³⁷ —Rü nataãëgü i ngëma coriarü duüxügü ega inadauegu i ngëxguma ínanguxgu i norü cori. Rü pemaã nüxü chixu rü ngëma cori rü norü mechawa tátama nanatogüxëë i ngëma norü duüxügü i nüxü ínanguxëëgüxü, rü nüma tátama ngëma norü duüxügüxü inaxüwemü. ³⁸ —Rü woo ngãxüçüü ínanguxgu rü éxna marü yangunechaügu rü nataãëgü i ngëma coriarü duüxügü ega inadauegu i ngëxguma ínanguxgu i norü cori. ³⁹ —Rü ngëxguma chi wüxi ya íärü yora nüxü cuèxgu na ñuxguacü ínanguégaxü

i ngítèxáxũ, rü tãũ chima nape. Rü chi nüxna nadau ya napata na tama yawãxnaãxúcèx rü tama na nüxũ nangĩxúcèx. ⁴⁰—Rü pema rü ta penaxwèxe na ípememarexũ. Erü ngürüãchi tama nagu íperüxĩnũeyane tá íchangu i choma i Tupana Nane na duũxũxũ chiĩxũ —ñanagürü ga Ngechuchu.

Wüxi ga duũxũ ga meã norü coriga ñnũxũ rü to ga tama meã norü coriga ñnũxũchiga

(Mt 24.45-51)

⁴¹ Rü yexguma ga Pedru rü Ngechuchuna naca rü ñanagürü: —Pa Corix, ¿toxcèxicatama éxna nixĩ i ñaã ore i cuèxruũ i tomaã nüxũ quixuxũ, rü éxna guxũ i duũxũgücèx yĩĩxũ? —ñanagürü. ⁴² Rü ñanagürü ga Cori ga Ngechuchu: —¿Texé tiĩxũ ya yíxema tümaãrũ coriarũ duũxẽ ya aixcüma yanguxẽexẽ rü meã tümaãèxũ cuáxe? ¿Tama éxna yíxema tiĩxũ ya tümaãrũ cori tüxna ágaxe na meã nüxna tadauxúcèx rü meã oragu tanachibüexẽxúcèx i norü duũxũgũ? ⁴³ —Rü tataãe ya yíxema coriarũ duũxẽ i ngëxguma ínanguxgu i tümaãrũ cori rü tüxũ íyanguẽgu na meãma ítanaxũxũ i ngẽma puracũ i nagu tüxũ namuxũ. ⁴⁴ —Rü aixcüma pemaã nüxũ chixu rü ngẽma tümaãrũ cori rü tá guxũma i norü ngẽmaxũgũarũ dauruũxũ tá tüxũ nixĩxẽe. ⁴⁵⁻⁴⁶ —Natürü ngëxguma chi ngẽma duũxũ nagu rüxĩnũgu rü norü cori rü tama paxa na ínanguxũ, rü inaxũgũãgu na chixri namuãxũ i natanũxũgũ i yatũxũgũ rü ngexũgũ, rü peta naxũxgu rü nachibũxgu, rü naxaxegu, rü nügũ nangãxẽegu, rü ngürüãchi ngẽma ngunexũ rü ngẽma ora i tama nagu ínanguxẽãxũgu tá ínangu i norü cori. Rü poraãcüxũchi tá nanapoxcu ngẽma duũxũgũ i tama norü coriga ñnũxũxũ napoxcuexürũ. ⁴⁷ —Rü ngẽma coriarũ duũxũ i nüxũ cuèxchiréxũ na tacü nanaxwèxexũ i norü cori, natürü tama nügũ ímexẽèxũ rü tama norü coriga ñnũxũ, rü tá poraãcü nanaçuaxi. ⁴⁸ —Natürü ngẽma coriarũ duũxũ i tama nüxũ nacuáãcüma chixri norü coriga ñnũxũ, rü chixexũ üxũ, rü tá írarüwaxüra nanaçuaxi. Rü texé ya Tupana muxũma tüxna ãxẽ, rü muxúcèxtáma tüxna naca. Rü texé ya muxũna tüxũ nadauxẽexẽ rü tá yexeraãcü tüxna naca.

Ngechuchugagu nixĩ i yatoyexũ i duũxũgũ

(Mt 10.34-36)

⁴⁹ —Núma chaxũ na ñoma i naãnewa duũxũgũxũ chidauchitanũxẽèxúcèx. Rü chierü aixcüma marü yadauchitanũgu. ⁵⁰ —Rü choma rü tá poraãcü ngúxũ chinge, rü chanaxixãchiãe ñuxmatáta yangu i ngẽma. ⁵¹ —Rü tama name i nagu perüxĩnũe na núma chaxũxũ na guxũ i duũxũgũ rü wüxigu naxĩnũexúcèx. Natürü pemaã nüxũ chixu rü núma chaxũ na chaugagu yatoyexúcèx i duũxũgũ. ⁵² —Erü ñaãwena ega wüxi ya ípatawa nangëxmagu i wüximẽèxpüx i duũxũgũ, rü tomaèxpüx tá choxũ nayaxõgũ rü taxre i tama, rü éxna taxre tá choxũ nayaxõgũ rü tomaèxpüx i tama. ⁵³ —Rü wüxi i papá tá nayaxõ rü nane rü tãütáma nayaxõ, rü éxna nane tá nayaxõ natürü nanatũ i tama. Rü ngëxgumarũũ ta wüxi i mamá tá iyaxõ rü ngĩxãcü rü tãütáma iyaxõxchãũ, rü éxna ngĩxãcü tá iyaxõ rü ngĩe rü tãütáma iyaxõxchãũ. Rü wüxi ya ngĩxẽ tá iyaxõ rü ngĩneãx rü tãütáma iyaxõ, rü éxna ngĩneãx tá iyaxõ rü ngĩxẽ rü tãütáma iyaxõ —ñanagürü ga Ngechuchu.

Cuèxruũgũ i nachiga i tacü tá nangupetũxũ

(Mt 16.1-4; Mr 8.11-13)

⁵⁴ Rü Ngechuchu ñanagürü ta nüxũ ga duũxũgũ: —Ngëxguma nüxũ pedèuxgu na naxẽächianexũ, rü nagu perüxĩnũe tá na napuxũ. Rü aixcüma ngẽmaãcü nixĩ. ⁵⁵ —Rü pema nüxũ pecuèx na ñuxãcü penangugũxũ ya buanecü, rü ngẽmaãcü nüxũ pecuèx rü tá na nanguxetũxũ. Rü aixcüma

ngēmaācū nixī. ⁵⁶ —Pa Duūxūgūx, pema rü togū i duūxūgūpēxewa meā pemaxēneta, natürü peāēwa rü chixexūgu perūxīnūē. Pema nūxū pecuèx na ñuxācū penangugūxū ega tá napuxgu rü ēxna tá nanguxetūgu. ¿Rü ñuxācū i ñuxma i tama nūxū pecuáxū na Tupana yīxū ya petanūwa ngucū?

*Name nixī na curūngūxmūxū namaā i curū uwanū
(Mt 5.25-26)*

⁵⁷ —Rü tüxcūū tama nūxū pecuáxchaū i ngēma nama i mexū i Tupana pexū naxwèxexū na nagu pexīxū. ⁵⁸ —Rü ngēxguma chi wūxie wūxi i ngetanūcèx cuxū íxuaxūgu rü āēxgacūxūtawa cuxū tagaxgu, rü name nixī i namawatama tüxū icurūngūxmūxēē na tama āēxgacūpēxewa cuxū tagaxūcèx. Erü wūxicana na āēxgacūxūtawa cunguxū rü āēxgacū tá purichíagūna cuxū namu. Rü purichíagū tá cuxū napoxcu. ⁵⁹ —Rü cumaā nūxū chixu rü ngēxma poxcuchicagu tá curūxāūx ñuxmatáta ngīxū cuxūtanū i guxcū i dīēru i nūxū ngīxū cungetanūcū. [Rü aixcūma ngēxgumarūū tá cumaā nanaxū ya Tupana ega tama namaā cunamexēēxgu i curū maxū —ñanagürü ga Ngechuchu.]

13

Wūxi i mexū nixī na nūxū rüxoexū i tacūma i chixexū

¹ Rü yexgumatama Ngechuchuxūtawa nangugū ga ñuxre ga duūxūgū. Rü Ngechuchumaā nūxū nixugū ga na ñuxācū āēxgacū ga Piratu namuxū ga norū churaragū na nadaiāxūcèx ga ñuxre ga yatūgū ga Gariréaanecūāx ga yexguma yema yatūgū rü Tupanacèx carneru nadaixgu tupauca ga taxūnewa. ² Rü Ngechuchu nūxna naca rü ñanagürü nūxū: —¿Pema nagu perūxīnūēgu rü yemaācū nūxū nangupetū ga yema yatūgū, yerü yema togū ga Gariréaanecūāxārū yexera nipecaduāxgū? ³ —Pemaā nūxū chixu rü tama nixī. Rü ngēxguma chi pema rü tama nūxū perūxoegu i pecūma i chixexū, rü guxāma i pema rü tá ta ipeyarūtauxe. ⁴ —¿Rü ēxna pema nagu perūxīnūēgu rü guxū ga Yerucharéucūāxārū yexera nipecaduāxgū ga yema 18 ga yatūgū ga yuexū ga yexguma Chiruéwa yexmaxū ga dauxūtaechica naetū rüngutaūgu? ⁵ —Pemaā nūxū chixu rü tama nixī. Rü ngēxguma chi pema rü tama nūxū perūxoegu i pecūma i chixexū, rü guxāma i pema rü tá ta ipeyarūtauxe —ñanagürü ga Ngechuchu.

Ore ga nanetū ga iguera ga ngearū òōxūgu ixuxū

⁶ Rü nūma ga Ngechuchu rü nūxū nixu ga wūxi ga ore ga igueragu ixuxū, rü ñanagürü: —Rü wūxi ga yatū nūxū nayexma ga wūxi ga ubanecū. Rü yexma nanato ga wūxi ga iguera. Rü nūma ga guma yatū rü ínayadauuxū ga yema iguera rü ngoxi naxōō, natürü taxuxūma ga norū oxū inayangau. ⁷ —Rü yemacèx yema norū duūxū ga norū naānena dauxūxū ñanagürü:

“Dücèx, tomaēxpūx ya taunecū guxūguma íchayadauxū i ñaā iguera, rü taguma naxo. Rü ngēmacèx chanaxwèxe na cuyadaxūchixū na tama natūcèxma nuā naānewa naxíaneāxūcèx”, ñanagürü nūxū. ⁸ —Natürü ga yema norū duūxū ga norū naānena dauxū, rü norū corixū nangāxū, rü ñanagürü:

“Pa Corix, ¡nūētama doma taunecūxicatama nangēmèx! Rü tá chanaxaimūānepūne rü waxmūānexūmaā tá chanagūpūne. ⁹ —Rü bexmana ngēxguma rü tá naxo. Natürü ngēxguma tāūtáma naxoxgu rü tá chayadaxūchi”, ñanagürü.

Ngechuchu rü ngūxchigaarū ngunexūgu ngīxcèx nayataanexēē ga wūxi ga ngecū ga pūcèxwecū

¹⁰ Rü wūxi ga ngūxchigaarū ngunexūgu rü Ngechuchu nanguxēētae ga wūxi ga ngutaquēxepataūwa. ¹¹ Rü yéma iyexma ga wūxi ga ngecū ga 18 ga

taunecü idaawecü. Rü ipücèxwe yerü wüxi ga ngoxo ngĩxũ napücèxwexẽẽ, rü taxuacüma iyarüwẽxãchi. ¹² Rü yexguma Ngechuchu ngĩxũ dèuxgu rü ngĩxcèx naca, rü ñanagürü ngĩxũ: —Pa Ngecux, ñuxma rü marü cuxcèx nitaane i curü daawewa —ñanagürü. ¹³ Rü yexguma rü ngĩxũ ningögü, rü yexgumatama iyarüwẽxãchiwemüxũ, rü inaxügü ga Tupanaxũ na yacuèxüüxũ. ¹⁴ Natürü yema ngutaquẽxepataũârü ãẽxgacü rü nanu, yerü Ngechuchu rü ngüxchigaarü ngunexügu ngĩxũ narümexẽẽ ga yema nge. Rü yemacèx ga yema ãẽxgacü rü ñanagürü duüxügüxũ: —Nangẽxma i 6 i ngunexü i nagu namexü na ipuracüexü. Rü ngẽma ngunexügügu nixĩ i namexü na nuã pexĩxũ na pegü peyarümexẽẽgüxücèx rü tama i ngüxchigaarü ngunexügu —ñanagürü. ¹⁵ Rü yexguma ga Cori ga Ngechuchu rü nanangãxũ, rü ñanagürü: —Pa Duüxügüx, pema rü togü i duüxügüpẽxewa meã pemaxëneta, natürü peãewa rü chixexügu perüxĩnũ. ¿Tama õxna guxã i pema rü ngüxchigaarü ngunexügu peyawẽxü i perü woca rü õxna perü buru na peyaxaxexẽẽgüxücèx? ¹⁶—Rü ñãã ngecü rü Abráũtanüxũ iyixĩ, rü Chataná rü 18 ya taunecü ngĩxũ nachixexẽẽ namaã i ñãã daawe. ¿Rü taux õxna i namexü na ngĩxcèx chayataanexẽẽxũ i ngüxchigaarü ngunexügu? —ñanagürü. ¹⁷ Rü yexguma yema ñaxgu ga Ngechuchu, rü guxũma ga norü uwanügü rü poraãcü naxãneẽ. Natürü guxũma ga togü ga duüxügü rü nataãẽgü ga yexguma nüxũ nadaugügu ga yema mexügü ga Ngechuchu üxũ.

Ore i motacha- chiregu ixuxũ
(Mt 13.31-32; Mr 4.30-32)

¹⁸ Rü ñanagürü ga Ngechuchu: —¿Ñuxãcü nixĩ i ãẽxgacü na yĩxũ ya Tupana, rü nañuxraũxũ i nüma ãẽxgacü íyĩxũwa? ¿Rü tacügu tá chanangu? ¹⁹ —Maneca wüxi ya motachachire ya wüxi ya yatü naãnegu toxũnerüü nixĩ. Rü woo naxíraxüchichirẽx ya naxchire natürü narüxü, rü naya ñuxmata wüxi i nanetü i taetaxü nixĩ. Rü ngẽmacèx i werigü rü natanügu nixüachiãũ —ñanagürü.

Ore i pãũârü puxẽẽruũgu ixuxũ
(Mt 13.33)

²⁰ Rü ñanagürü ta ga Ngechuchu: —¿Ñuxãcü nixĩ i Tupana ãẽxgacü íixĩxũwa? ¿Rü tacügu tá chanangu? ²¹ —Rü pãũârü puxẽẽruũrũ nixĩ na guxüwama nanguxũ. Erü wüxi i ngecü rü íraxũ- tama i pãũârü puxẽẽruũmaã inaxüéü i taxũ i ngĩrũ pãũchara. Rü ngẽma pãũârü puxẽẽruũ rü woo naxíra rü nayapuxẽẽ i guxũma i ngĩrũ pãũchara —ñanagürü ga Ngechuchu.

Ïãx i íraxüchiga
(Mt 7.13-14, 21-23)

²² Rü inixüchigü ga Ngechuchu ga Yerucharéüwa na naxüxũ. Rü yexguma namagu yaxüxgu rü ñãnegüwa rü ñãnexãcügüwa nixüpetüchigü, rü yéma nayangüexẽẽtanü ga duüxügü. ²³ Rü wüxi ga duüxũ nüxna naca rü ñanagürü: —Pa Corix ¿noxretátama nixĩ i ngẽma nayauxgüxũ i maxũ i taguma gúxũ? —ñanagürü. Rü nüma ga Ngechuchu nanangãxũ, rü ñanagürü: ²⁴ —Daxügüxũ i naãneãrũ ñãx rü naxíraxüchi. ¿Rü paxa naxcèx pedau na nawa pichocuxücèx! Erü pemaã nüxũ chixu rü muxüchixũma i duüxügü tá nüxũ nangüchaũ na nawa yachocuxũ, natürü tãütáma nawa nichocu. ²⁵ —Erü ngẽxguma ñãrũ yora marü nawãxtagu i ñãx, rü pema i düxétüwa ngẽxmagüxe rü tá penatutuãũ. Rü ñaperügügü tá:

“Pa Corix, ¿paxa toxcèx yawãxna i ñãx!” ñaperügügü tá. Natürü nüma i cori rü tá pexũ nangãxũ, rü ñanagürü tá:

“Tama pexũ chacuèx na ngextácũãx pixĩgũxũ”, ñanagürü tá pexũ. ²⁶ —Rü ngëxguma rü tá ñaperügügü nüxũ:

“Cumaãchirëx wüxiwa tachibüe rü taxaxegü. Rü toxũ cungúexëe ga torü ñaneärü ítamügüwa”, ñaperügügü tá. ²⁷ —Natürü nüma rü tá pexũ nangãxũ rü ñanagürü tá: “Marü pemaã nüxũ chixu rü tama pexũ chacuèx na ngextácũãxgü pixĩgũxũ. ¡Rü ípixĩ i nuã chauxütawa i guxãma i pemax, Pa Chixri Maxëxũ!” ñanagürü tá. ²⁸ —Rü ngema tá pexauxe, rü tá pixũxchapütägü i ngëxguma nüxũ pedëuxgu i Abrãü rü Ichaá rü Acobu rü guxũma i Tupanaärü orearü uruügü na Tupana ãëxgacü íxixũwa na nangëxmagüxũ rü pema rü nüxna na ípewoxũxũ. ²⁹ —Erü guxũwatãma ne naxĩ i duũxügü. Rü Tupana ãëx- gacü íxixũwa tá nangëxmagü. Rü ngema tá narütogü na ngema nachibüexçèx. ³⁰ —Rü tá nangëxma i nümaxũ i ñoma i naãnewa duũxügü nüxũ oexũ, natürü daxüguxũ i naãnewa rü Tupana tá wixpëxewa nanaxügüxëe. Rü tá nangëxma i nümaxũ i ñoma i naãnewa duũxügü nüxũ icuèxüügüxũ, natürü daxüguxũ i naãnewa rü Tupana rü tá wixweama nanaxügüxëe —ñanagürü ga Ngechuchu.

*Ngechuchu rü Yerucharéücũãx ga duũxügüçèx naxaxu
(Mt 23.37-39)*

³¹ Rü yematama ga ngunexũgu rü Ngechuchuxütawa nangugü ga ñuxre ga Parichéugü. Rü ñanagürügü Ngechuchuxũ: —¡Íxũ i nuã! Erü ãëxgacü ya Erode rü cuxũ nimèxéga —ñanagürügü. ³² Natürü nüma ga Ngechuchu nanangãxũ rü ñanagürü: —¡Naxütawa pexĩ i ngëma yatü i nüxũ cuèxüchixũ na ñuxãcü duũxügüxũ nawomüxëexũ, rü namaã nüxũ pixu rü ñuxma rü moxũ rü tá íchana- woxũ i ngoxogü, rü tá chanameëxëe i ngëma duũxügü i idaaweexũ, rü pëxmaãcü tá chanaguxëe! ³³ —Natürü chanaxwèxe i ichixüchigü i ñuxma rü moxũ rü paxmaãcü ñuxmatáta Yerucharéüwa changu. Erü Yerucharéügu nixĩ i na nayuexũ i guxũma i Tupanaärü orearü uruügü. ³⁴ —Rü dücax, Pa Yerucharéücũãx, pema peyadaietanü i Tupanaärü orearü uruügü, rü nutamaã ípenamuxüchigü i Tupanaärü orearü ngeruügü i pexçèx núma namugüxũ. Rü ñuxreëxpüxcüna wüxigu chaugüxütägu pexũ chanutaquëxexëëchaũ, ñoma wüxi i ota ya naxãcüãx nügütüügu tüxũ nutaquëxexürü. Natürü pema rü tama penaxwèxe. ³⁵ —Düçèx i ñuxma ya perü ñane, rü Tupana tá ínanatèx. Rü pemaã nüxũ chixu rü täütãma wena choxũ pedau ñuxmatáta daxüguxũ i naãnewa ne chaxũ. Rü ngëxguma rü tá choxũ pedau rü tá ñaperügügü:

“Namexëchi nixĩ ya yima Cori ya Tupana núma namucü”, ñaperügügü tá — ñanagürü ga Ngechuchu.

14

Ngechuchu rü naxçèx nayataanexëe ga wüxi ga yatü ga rüchaxünexũ

¹ Rü wüxi ga ngüxchigaarü ngunexũgu rü Ngechuchu rü wüxi ga Parichéupatawa nayachibü. Rü yéma nayexmagü ga togü ga Parichéugü ga yéma bexma Ngechuchuxũ ngugüxũ. ² Rü yéma nayexma ta ga wüxi ga yatü ga idaawexũ ga rüchaxünexũ. ³ Rü yexguma ga Ngechuchu rü yema ngúexëeruügü ga Moíchéarü mugüwa nguxëetaegüxũna rü Parichéugüna naca, rü ñanagürü: —¿Tama penachuxuxũ ega ngüxchigaarü ngunexũgu chanamexëëxgu i wüxi i idaawexũ? —ñanagürü. ⁴ Natürü ga nümagü rü nangeëxgümare. Rü yexguma ga Ngechuchu rü naxmëxgu nayayauxãchi ga yema idaawexũ, rü nanamexëe. Rü namaã nüxũ nixu ga na íyaxüxçèx. ⁵ Rü Ngechuchu rü ñanagürü Parichéugüxũ: —¿Texé i pema i ngëxguma perü

buru rü ěxna perü woca puchugu nagoxgu, rü taux ěxna i ngëxgumatama ípeyadauxü rü ípe- yatúächixü i woo ngüxchigaarü ngunexügu? —ñanagürü.
⁶ Rü nümagü rü taxuümaãma nanangãxüğü.

Duüxüğü ga ngĩgüarü petawa nüxna naxugüxüchiga

⁷ Rü yexguma mechawa natogüchaügu ga yema nüxna naxugüxü, rü Ngechuchu nüxü nadau na wüxichigü rü ñarü yoraxütawaxüchi natoxchaüxü. Rü yexguma yemaxü nadëuxgu rü nayaxucuxëğü, rü ñanagürü: ⁸—Ngëxguma texé cuxna uxgu i wüxi i ngĩgüarü petawa, rü tama name i petaarü yoraxütawaxüchi üxü i naxmëxwëxewa cuyarüto. Erü yixcúra ngürüächi tá ínangu i to i nüxna naxuxü i curü yexeraxüchi ixixü. ⁹—Rü ngëma petaarü yora i pexna uxü, rü tá cumaã nüxü nayarüxu na icuchixüçèx i ngëma nachicawa na ngema natoxëëãxüçèx i ngëma to i curü yexera ixixü. Rü ngëxguma i cuma rü poraãcü cuxãneãcüma rü nawa iyacuáxü i naxmëxwëxewa tá cuyarüto. ¹⁰—Rü narümemaë ega texé cuxna uxgu, rü nawa iyacuáxü i naxmëxwëxewa curüto. Rü ngëxguma i ngëma petaarü yora i cuxna uxü rü ñanagürü tá cuxü:

“Pa Chomücüx, ¡nuã chauxütawa yarüto!” ñanagürü tá cuxü. Rü ngëmaãcü ngëma petaarü yora rü wüxi i mexü tá cumaã naxü napëxewa i guxüma i duüxüğü i nüxna naxuxü i cumaã ngëma rütogüxü. ¹¹—Erü texé ya tügü írütaxe rü Tupana tá tüxü naxãnexëë. Natürü texé ya tügü íruxírxaxe rü Tupana tá tüxü nicuëxüü —ñanagürü ga Ngechuchu. ¹² Rü ñanagürü ta ga Ngechuchu nüxü ga yema yatü ga nüxna uxü: —Rü ngëxguma wüxi i õnacèx rü ěxna petacèx texéna cuxuxchaügu, rü tama name i nüxna cuxu i cumücüğü, rü bai i cueneëğü, rü bai i cutanüxüğü, rü bai i curü ngaicamagu pegüxü i duüxüğü i dïëruãxgüxü. Erü nümagü rü tá nüxü cuxna naxugüe, rü ngëmaãcü tá cuxü nanaxütanüğü. ¹³—Natürü ngëxguma wüxi i peta cuxüxgu, rü narümemaë nixü i nüxna cuxu i duüxüğü i ngearü dïëruãxgüxü, rü duüxüğü i taxucürüwama puracüexü, rü ngëma ichixeparagüxü, rü ngëma ingexetügüxü. ¹⁴—Rü tá cutaãëxüchi i ngëxguma erü nümagü rü taxucürüwa cuxü nanaxütanüğü. Natürü tá cunayaxu i curü natanü i ngëxguma wena namaxëgu i Tupanaârü duüxüğü i mexü —ñanagürü.

*Ore i taxü i õnagu ixuxü
(Mt 22.1-10)*

¹⁵ Rü yexguma yemaxü naxĩnügu ga wüxi ga yatü ga mechawa rütöxü rü Ngechuchuxü ñanagürü: —Rü tataãe ya yixema Tupana ãëxgacü íixixüwa chibüxe —ñanagürü. ¹⁶ Rü yexguma ga Ngechuchu rü ñanagürü nüxü: —Wüxi ga yatü nanaxü ga wüxi ga õna ga taxü. Rü norü duüxüxü namu na nüxna yaxuxüçèx ga muxüma ga duüxüğü. ¹⁷—Rü yexguma marü namexgu ga norü õna, rü wena norü duüxüxü namu na yema duüxüğü ga marü nüxna naxugüxümaã nüxü na yanaxuxüçèx ga marü na namemarexü ga norü õna, rü paxa yéma na naxixüçèx. ¹⁸—Natürü guxüma ga yema nüxna naxugüxü, rü inanaxüğü ga nüğü na ínaxuegüxü. Rü yema nüxira nüxna naxu rü ñanagürü:

“Ngexwacaxtama naxcèx chataxe i wüxi i naãne. Rü paxa tá íchayadau. ¡Rü namaã nüxü i xü i cori rü taxucürüwama ngëma chaxü!” ñanagürü. ¹⁹—Rü ga yema to rü ñanagürü:

“10 i wocagü i puracürüçèx chataxe, rü tá ngëmaxü chayaxü. ¡Rü namaxã nüxü i xü i cori rü taxucürüwama ngëma chaxü!” ñanagürü. ²⁰—Rü ga to rü ñanagürü:

“Ngexwacaxtama chaxãmëx rü ngëmacèx taxucürüwama ngëma chaxü”, ñanagürü. ²¹—Rü yexguma nataegugu ga yema coriarü duüxü, rü norü

corimaã nüxü nixu ga guxüma ga yema ore. Rü yexguma ga norü cori rü nanu, rü ñanagürü nüxü ga norü duüxü:

“¡Paxa ngema ñtamügü i taxüwa rü ñtamüacügüwa naxü, rü nuã nagagü i ngema duüxügü i ngearü dïeruãxgüxü, rü ngema duüxügü i taxucürüwama puracüexü, rü ngema ichixeparagüxü, rü ngema ingexetügüxü!” ñanagürü.
²²—Rü yixcamaxüra ga yema norü cori namaã nüxü ixuxü naxüxguwena rü yema norü duüxü ñanagürü nüxü:

“Pa Corix, marü chanaxü i ngema chomaã nüxü quixuxürüü, natürü naxächicaaneãmatama i nuã cupatawa”, ñanagürü. ²³—Rü yexguma ga norü cori rü ñanagürü nüxü:

“¡Paxa ngema nama i taxügüwa rü nama i íraxügüwa naxü, rü nuã nagagü i togü i duüxügü na nuxã chopatagu nachocuxüçèx, rü ngemaãcü na naxããcuxüçèx ya daa chopata! ²⁴Erü pemaã nüxü chixu rü taxuüma ga yema nüxüra nüxna chaxuxü rü nuã chorü ñnawa tá nachibüe”, ñanagürü.

Tama natauxcha na Cristuwe rüxüxü *(Mt 10.37-38)*

²⁵ Rü muxüchixüma ga duüxügü Ngechuchuwa narüxü. Rü nadauegu ga Ngechuchu, rü ñanagürü nüxü: ²⁶—Rü ngëxguma texé chowe rüxüxchaügu, rü tanaxwëxe i choxü tangechaü tümanatüarü yexera, rü tümaëärü yexera, rü tümamëxärü yexera, rü tümaxãcügüarü yexera, rü tümaëneëgüarü yexera, rü tümaëyëxgüarü yexera, rü tümaärü maxüärü yexera rü ta. Rü ngëxguma tama ngemaãcü choxü tangechaügu rü taxucürüwama aixcüma chorü ngüexü tixü. ²⁷—Rü yixema tama naxwëxexë na chaugagu ngüxü tingeãcüma chowe tarüxüxü, rü taxucürüwama chorü ngüexü tixü. ²⁸—Rü ngëxguma chi wüxie i petanüwa rü wüxi ya ípata ya taxüne taxüxchaügu, ¿rü tama ëxna i noxri i tanangugüxiraxü na ñuxre i dïeru tá nagu ngüxü ítatáxü? Rü ngëmawa nüxü tacuèx rü marü tüxü iyangu i ngema tümaärü dïeru i tüxü ngëxmacü na tayanguxëëxüçèx ya yima í. ²⁹—Erü ngëxguma chi tama meã tanangugügu i tümaärü dïeru na ñuxregu tá naxãtanüxü ya yima í, rü norü caxtaxica chi itapugügu rü yixcüra rü taxucürüwa chi tanaguxëëgu i ngema puracü, rü guxüma i duüxügü i nüxü daugüxü i ngema tümaärü puracü rü tá tüxü nacugüe. ³⁰—Rü ñanagürügü tá:

“Ngema yatü inanaxügü na naxüpataxü, natürü taxucürüwama nayanguxëë”, ñanagürügü tá. ³¹—Rü ngëxguma wüxi i nachüüãneärü ãëxgacü rü to i nachüüãneärü ãëxgacümaã nügü nadaixchaügu, ¿rü tama ëxna i noxri inangugüãxü rü ngoxi 10,000 i churaragü rü yangu na nügü nadaixüçèx namaã i norü uwanü i 20,000 i churaragü nüxü ngëxmaxü? ³²—Rü ngëxguma nangugüãgu na tama yanguxü i norü churaragü rü, ¿taux ëxna i ngëxguma yaxüwa nangëxmagutama i norü uwanü, rü naxütawa namugüãxü i norü orearü ngeruügü, rü namaã nüxü na yanaxugüexüçèx na nügümaã nangüxmüëxü? ³³—Rü ngëxgumarüü tá ta nixü i pemax, erü ngëxguma ngexerüxüxe i petanüwa tama ngema tanawogügu i guxüma i tüxü ngëxmaxü na chowe tarüxüxüçèx, rü taxucürüwama aixcüma chorü ngüexü tixü.

Ngëxguma nangeacagu ya yücüra rü taxuwama name *(Mt 5.13; Mr 9.50)*

³⁴—Pema rü ñoma yücürarüü pixügu i ñoma i naãnewa, erü yima yücüra rü ñna na namexëëxürüü rü pema rü ñoma i naãnecüãx i duüxügütanüwa rü norü mexëëruü pixügu. Name ya yücüra. Natürü ngëxguma chi nangeacagu, ¿rü ñuxãcü tá wenaxärü naxããca? ³⁵—Rü taxuwama name. Rü woo waixüümüärü waxmüãnexëëruüçèx rü tama name. Rü ítanatëxmare. Rü yixema aixcüma ãchixexë, ¿rü name nixü i nagu tarüxüñüë i ñaã ore! —ñanagürü.

15

Ore i carneru i iyarütaxuxŭgu ixuxŭ (Mt 18.10-14)

¹ Rŭ guxŭma ga yema yatŭgŭ ga Dumaârŭ ãëxgacŭcèx dĭëru ngĭxŭ idee-tanŭxŭ, rŭ togŭ ga duŭxŭgŭ ga chixexŭ ga nacŭmagu ĭxŭ, rŭ Ngechuchucèx naxĭ na iyanaxĭnŭëxŭcèx ga norŭ ore. ² Rŭ yemacèx ga Parichéugŭ rŭ ngŭexëëruŭgŭ ga Moĭchéarŭ mugŭwa nguxëëtaegŭxŭ, rŭ Ngechuchuxŭ nixugŭe, rŭ ñanagŭrŭgŭ: —Ñaa yatŭ rŭ norŭ me nixĭ i pecaduãxgŭxŭmaã na naxãmŭcŭxŭ, rŭ namaã na nachibŭxŭ —ñanagŭrŭgŭ. ³ Rŭ yexguma ga Ngechuchu rŭ ñaa ore ga cuèxruŭxŭ namaã nixu, rŭ ñanagŭrŭ: ⁴ —¿Texé i petanŭwa rŭ ngëxguma tŭxŭ nangëxmagu i 100 i tŭmaârŭ carnerugŭ rŭ wŭxi tŭxŭ iyarŭtauxgu, rŭ taux ěxna i nachitaŭwa tanawogŭxŭ i ngëma 99, rŭ naxcèx tayadauxŭ i ngëma tŭxŭ iyarŭtaxuxŭ ñuxmata nŭxŭ itayangau? ⁵ —Rŭ ngëxguma nŭxŭ itayangëuxgu rŭ taãëcŭma tŭgŭãtŭgu tayagaxŭ. ⁶ —Rŭ ngëxguma tŭmapatawa tanguxgu, rŭ tanangutaquëxexëë i tŭmamŭcŭgŭ, rŭ duŭxŭgŭ i tŭmaârŭ ngaicamagu pegŭxŭ, rŭ ñatagŭxŭ nŭxŭ:

“¡Wŭxigu chomaã petaãëgŭ, Pa Chomŭcŭgŭx! Erŭ marŭ nŭxŭ ichayangau i ngëma chorŭ carneru ga iyarŭtaxuxŭ”, ñatagŭxŭ nŭxŭ. ⁷ —Rŭ pemaã nŭxŭ chixu rŭ ngëxgumarŭŭ ta nataãëgŭ i daxŭcŭãx i ngëxguma nangëxmagu i 99 i duŭxŭgŭ i mexŭgŭ i marŭ Tupanaârŭ ixĭgŭxŭ, natŭrŭ yexeraãcŭ nataãëgŭ i ngëxguma wŭxi i duŭxŭ i pecaduãxŭ nŭxŭ rŭxoxgu i nacŭma i chixexŭ rŭ Tupanaãxŭ yaxõõgu —ñanagŭrŭ.

Ore ga dĭëru ga iyarŭtauxcŭgu ixuxŭ

⁸ Rŭ Ngechuchu rŭ wŭxi ga to ga ore ga cuèxruŭxŭ nixu, rŭ ñanagŭrŭ: —Ngëxguma chi wŭxi i ngecŭaxŭ nangëxmagu i 10 tachinŭ i dĭëru, rŭ wŭxi ngĭxŭ iyarŭtauxgu, ¿rŭ taux ěxna i omŭwa nangixichiãxŭ rŭ nabixichiãxŭ ya ngĭpata, rŭ meãma ngĭxcèx nadauxŭ ñuxmata ngĭxŭ iyangau? ⁹ —Rŭ ngëxguma ngĭxŭ iyangauxgu, rŭ inangutaquëxexëë i ngĭmŭcŭgŭ i ngexŭgŭ rŭ ngĭtanŭxŭgŭ i ngĭrŭ ngaicamagu pegŭxŭ, rŭ ngĭxŭ nŭxŭ:

“¡Wŭxigu chomaã petaãëgŭ, Pa Chomŭcŭgŭx! Erŭ marŭ ngĭxŭ ichayangau i ngëma chorŭ dĭëru ga iyarŭtauxchirëxcŭ”, ngĭxŭ. ¹⁰ —Rŭ pemaã nŭxŭ chixu rŭ ngëxgumarŭŭ ta nataãëgŭ i daxŭcŭãx i Tupanaârŭ orearŭ ngeruŭgŭ i ngëxguma wŭxi i duŭxŭ i pecaduãxŭ nŭxŭ rŭxoxgu i nacŭma i chixexŭ rŭ Tupanaãxŭ yaxõõgu —ñanagŭrŭ ga Ngechuchu.

Ore ga wŭxi ga ngextŭxŭcŭ ga nanatŭna ixŭcŭgu ixuxŭ

¹¹ Rŭ ñanagŭrŭ ta ga Ngechuchu: —Nayexma ga wŭxi ga yatŭ ga taxre ga nane nŭxŭ yexmacŭ. ¹² —Rŭ guma rŭbumaëcŭ, rŭ nanatŭxŭ ñanagŭrŭ:

“Pa Pa, ¡choxna naxã i ngëma curŭ ngëmaxŭgŭ i choxna ŭxŭ!” ñanagŭrŭ. Rŭ yexguma ga nanatŭ rŭ yema taxre ga nanemaã nayatoye ga norŭ yemaxŭgŭ. ¹³ —Rŭ ñuxre ga ngunexŭguwena rŭ guma nane ga rŭbumaëcŭ rŭ nananutaquëxe ga guxŭma ga norŭ yemaxŭgŭ rŭ namaã nataxe. Rŭ yema dĭërumaã rŭ to ga nachiuãnewa naxŭ. Rŭ chixri yéma namaxŭ, rŭ yemaãcŭ ngĭxŭ naguxëë ga guxcŭma ga norŭ dĭëru. ¹⁴ —Natŭrŭ yexguma marŭ ngĭxŭ naguxëëguwena ga guxcŭma ga norŭ dĭëru, rŭ poraãcŭ nataxu ga õna ga yema nachiuãnewa. Rŭ yemacèx ga guma ngextŭxŭcŭ rŭ inanaxŭgŭ ga taiya nŭxŭ na ngŭxŭ. ¹⁵ —Rŭ yexguma rŭ norŭ puracŭcèx nadau naxŭtagu ga wŭxi ga yatŭ ga yema nachiuãnecŭãx. Rŭ nŭma ga yema yatŭ rŭ norŭ naãnewa nanamu na yéma norŭ cuchigŭna yadauxŭcèx. ¹⁶ —Rŭ dŭxwa nŭxŭ nachixéga ga yema cuchiwemŭ, yerŭ poraãcŭ nataiyaxŭchi. Natŭrŭ taxŭema õna nŭxna taxã. ¹⁷ —Rŭ yexguma naãëwa nagu narŭxĭnŭ, rŭ ñanagŭrŭ:

“¿Ñuxre i chaunatüarü puracütanüxü rü nüxü nangëxma i òna rü nüxü ínayaxü? Rü choma i nuã rü taiyamaã tá nuxma chayü. ¹⁸—Rü chaunatücèx tá chataegu, rü ñachagürü tá tüxü: ‘Pa Papax, marü chixexü Tupanapewa chaxü rü cupewa rü ta. ¹⁹—Rü tama marü chame na Chaune, ñacuxü choxü. ¡Rü wüxi i curü puracütanüxüxü choxü ixixëé!’ ñacharügü tá tüxü ya chaunatü”, ñanagürü. ²⁰—Rü inaxüãchi rü nanatüpatacèx nataegu. Rü yexguma yangaicagu ga nanatüpata, rü yaxügu nüxü tadau ga nanatü, rü tüxü nangechaütümüü. Rü naxcèx tiña, rü nüxna tanëixãchi, rü nüxü tachüxu. ²¹—Rü yexguma ga nüma ga tümane rü ñanagürü tüxü:

“Pa Papax, marü chixexü Tupanapewa chaxü, rü cupewa rü ta. Rü ngemacèx marü tama name na ‘Chaune’ ñacuxü choxü”, ñanagürü. ²²—Natürü tüma ga nanatü rü tümaãrü duüxügüxü ñatarügü:

“¡Paxa nuã penange i naxchiru i mexëchixü rü peyacüxcuchix! ¡Rü wüxi i anera ta naxmëxwa ngixü pingëxcuchix! ¡Rü chapatu rü ta nuãta penge, rü peyacuaixcuchix! ²³—¡Rü peyayaxux i ngëma wocaxacü i rüngümaexü, rü peyamá, rü ngixã namaã tachibüe rü tapetae! ²⁴—Erü daa chaune rü chauxcèx rü marü nayu, natürü maxücü chauxcèx ínangu. Rü marü inayarütaxchirëx, rü wenaxãrü nangox”, ñanagürü. Rü yexguma inanaxügüe ga na napetaegüxü. ²⁵—Rü yoxni ga guma nane ga rüyamaëcü, rü naãnewa nayexma. Rü yexguma nataegugu rü marü ñarü ngaicamana nangugu, rü nüxü naxinü ga na ínapaxetagüxü rü íyaxüãchitanüxüxü. ²⁶—Rü wüxi ga nanatüarü duüxücèx naca, rü nüxna naca ga tacü na ínaxüexü ga ñwa. ²⁷—Rü yema nanatüarü duüxü rü nanangãxü, rü ñanagürü: “Cueneë rü marü ínangu. Rü ngëmacèx cunatü toxü tamu na tayamáxücèx i ngëma wocaxacü i rüngümaexü, erü cueneë rü mecü ínangu rü tama niðaawe”, ñanagürü nüxü. ²⁸—Natürü ga guma naëneë ga rüyamaëcü rü nanu, rü tama ñgu naxücuchaü. Rü yemacèx düxwa ga nanatü rü naxcèx ítaxüxü, rü nüxü tayacèxèxü na yaxücüxcèx. ²⁹—Rü nüma rü ñanagürü tüxü ga nanatü:

“Cuma nüxü cucuèx i ñuxre ya taunecü cuxü chapuracü, rü taguma chixri cuga chaxinü. Rü bai i ñuxgu wüxicana wüxi i chibuxacü choxna cumu na chomücügümaã chapetaexücèx. ³⁰—Natürü ñuxma na ínanguxü i ngëma cune i chixri curü diëru ngixü guxëexü nagu i ngexügü i ngëãexü, rü naxcèx cuyamèx i ngëma wocaxacü i rüngümaexü”, ñanagürü. ³¹—Rü yexguma ga nanatü rü ñatarügü nüxü:

“Pa Chaunex, cuma rü guxüguma chauxütawa cungëxma, rü guxüma i chorü ngëmaxügü rü cuxrü nixi. ³²—Natürü ñuxma rü name nixi na ipetaegüxü rü na itaãgüxü erü cueneë ga guma chauxcèx rü marü yucü, rü maxücü taxcèx ínangu. Rü woo tüxna inayarütaxu, rü wenaxãrü taxcèx nangox”, ñatarügü.

16

Ore ga yatü ga chixri norü coriarü yemaxüna dauxügu ixuxü

¹ Rü ñanagürü ta ga Ngechuchu norü ngüexügüxü: —Nayexma ga wüxi ga cori ga muãrü yemaxüãxüchixü. Rü nüxü nayexma ga wüxi ga norü duüxü ga norü yemaxüãrü dauruü. Natürü togü ga duüxügü rü norü corimaã nüxü nixugü na yema norü duüxü rü chixri norü yemaxüna na nadauxü. ²—Rü yexguma ga yema cori rü yema norü duüxücèx naca, rü ñanagürü nüxü:

“Dücèx, cuchigaxü chomaã nixugügü i duüxügü. ¡Rü tacü nixi i ngëma? ¡Rü chomaã nüxü ixu rü ñuxãcü nixi i curü puracü, erü marü täütáma chorü ngëmaxüãrü dauruüxü cuxü chixixëé!” ñanagürü nüxü. ³—Rü yexguma ga yema coriarü duüxü rü nagu narüxinü, rü nügüãëwa ñanagürü:

“¿Tacü tá chaxü i ñuxmax, erü chorü cori rü marü choxü ínatèxüchi i ngēma chorü puracüwa? Tama chapora na nañnewa chapuracüxüçèx, rü chaxãne na díerucèx na íchaçaxü nüxna i togü. ⁴—Rü marü nüxü chacuèx na tacü tá na chaxüxü na choxü nangēxmaxüçèx na texé tümapatawa choxü yaxuxü i ngēxguma changearü puracüãxgu”, ñanagürü. ⁵—Rü yexguma nügüxütawa naxcèx naca ga wüxichigü ga yema duüxügü ga norü coriaxü yangetanügüxü. Rü yema nüxíra yéma naxütawa nguxüna naca, rü ñanagürü:

“¿Ñuxre i nüxü cungetanüxü i chorü cori?” ñanagürü. ⁶—Rü nüma nanangãxü, rü ñanagürü:

“Nüxü chanangetanü i 100 i data i chixü”, ñanagürü. Rü yema coriarü duüxü rü ñanagürü nüxü:

“Ñañ nixí i popera i curü ngetanü nawa ngóxü. ¡Rü paxa íruto rü to i popera naxü, rü 50 i dataguxicatama naxü i curü ngetanü!” ñanagürü. ⁷—Rü yemawena rü yema to ga duüxü ga norü coriaxü nangetanüxüna naca, rü ñanagürü:

“¿Cuma rü ñuxre yíxü i nüxü cungetanüxü i chorü cori?” ñanagürü. Rü nüma rü nanangãxü, rü ñanagürü:

“Nüxü chanangetanü i 100 i choca i trigu”, ñanagürü. Rü yema coriarü duüxü rü ñanagürü nüxü:

“Ñañ nixí i popera i curü ngetanü nawa ngóxü. ¡Rü paxa íruto rü to i popera naxü rü 80 i chocaguxicatama naxü i curü ngetanü!” ñanagürü. ⁸—Rü norü cori rü nüxü nicuèxüüãma ga yema norü duüxü ga chixexü, yerü nüxü nadau ga ñuxãcü na naxããxüchixü. Rü pemaã nüxü chixu rü ñoma i nañnecüãx i duüxügü, rü ngēma Tupanaãxü yaxögüxü i duüxügüarü yexera paxa naxcèx nadaugü na ñux-ãcü nüxü natúxü i duüxügü. ⁹—Rü pemaã nüxü chixu rü ngēma ñoma i nañne i chixexüwa pexü ngēxmaxü rü name nixí i ngēmamaã nüxü penangúchaüxëë i duüxügü na Tupanaxütawa nangugüxü. Rü ngēmaãcü i ngēxguma naguxgu i ngēma ñoma i nañnewa pexü ngēxmaxü rü peyuxgu, rü tá pexü nangēxma ya Penatü ya pexü yaxucü i daxüguxü i nañnewa. ¹⁰—Yíxema meã namaã icuáxe ega woo noxretama tümamëxëwa ngēxmagu, rü ngēxguma muxüma tümamëxëwa ngēxmagu rü tá ta meã namaã itacuèx. Natürü yíxema chixri namaã icuáxe ega noxretama tümamëxëwa ngēxmagu, rü ngēxguma muxüma tümamëxëwa ngēxmagu rü ngēxgumarüü tá ta chixri namaã itacuèx. ¹¹—Rü ngēxguma tama meã namaã ipecuèxgu i ngēma pexmëxwa ngēxmaxü i ñoma i nañne i chixexüwa, ¿rü texé tá pexmëxgu tanaxü i ngēma aixcüma mexü i Tupanaãrü ixíxü? ¹²—Rü ngēxguma tama meã namaã ipecuèxgu i ngēma Tupana pexna äxü i ñoma i nañnewa, ¿rü ñuxãcü tá pexna nanaxã i pechica i daxüguxü i nañnewa? ¹³—Taxucürüwama i wüxi i duüxü rü nataxrearü coriãx. Erü wüxi i norü corichi rü tá naxai, rü ngēma to rü tá nüxü nangechaü. Rü ëxna wüxicèx rü tá meã napuracü rü ngēma to rü tá nüxü naxo. Rü pema rü taxucürüwama Tupanacèx pemaxë ega perü díeruguxicatama perüxñüëgu —ñanagürü ga Ngechuchu. ¹⁴Natürü ga yema Parichéugü rü poraãcü norü díeruguama narüxñüë. Rü yemacèx Ngechuchuxü nacugüe ga yexguma nüxü naxñüëgu ga guxüma ga yema ore. ¹⁵Rü yexguma ga Ngechuchu rü ñanagürü nüxü: —Pema nixí i duüxügüpëxewa meã pemaxënetaxü, natürü Tupana pexü nacuèx na tacügu perüxñüëxü. Rü woo duüxügü pexü nicuèxüüüü naxcèx i ngēma pexüxü, natürü Tupana rü nañëwa nangux i ngēma —ñanagürü ga Ngechuchu.

Tupanaãrü mugü ga Moïché ümatüxü rü ñuxãcü ãëxgacü na yíxü ya Tupanachiga

16 Rū yexguma ga Ngechuchu rü ñanagürü: —Noxri nayexma ga Tupanaärü mugü ga Moïché duñxügüxü nguxëëxü, rü yema nguxëëtae ga nuxcümañgüxü ga Tupanaärü orearü uruügü duñxügüxü namaã nguxëëxü. Natürü yexguma Cuáñ ga baiñxëëruñ ínguxguwena, rü marü duñxügümaã nüxü chixuchiga i Tupanaärü ore i mexü i ñuxácü ãëxgacü na yíñxü. Rū ñuxma rü guxüma i ngëma duñxügü rü poraãcü nügü naporaexëe na yachocuxüçèx i ngëma Tupana ãëxgacü íxixüwa. 17 —Naxüpa na yanguxü i Tupanaärü mugü rü woo wüxi i mu i íramarexü yixígu, rü naguxchaxüchi na iyanaxoxü i ngëma nüxü yaxuxü. Natürü aixcüma narütauxchamaë nixí na iyanaxoxü i ñoma i naãne rü guxüma i ngëma daxüwa nüxü idauxü.

Ngechuchu namaã nangúexëëtae na tama namexü na texé tümamaxü ítáñü
(Mt 19.1-12; Mr 10.1-12)

18 —Ngëxguma wüxi ya yatü ítámèxgu rü nañ i ngëmaã naxãmèxgu rü Tupanapëxewa rü pecadu naxü. Rü texé ya yíxema ngímaã ãmaxë i wüxi i nge i ngíte ngíñü ítèxcü, rü Tupanapëxewa rü tüma rü ta pecadu taxü.

Yatü i dñëruñxüchixüchiga rü Dácharuchiga

19 —Nayexma ga wüxi ga yatü ga dñëruñxüchixü ga guxüguma mexëchixü ga naxchirugu icúñxü. Rü guxü ga ngunexügu rü taxüma ga òna naxü rü napetaexü. 20 —Rü nayexma ta ga wüxi ga yatü ga ngearü dñëruñxüchixü ga Dácharugu ãëgacü. Rü guxüguma yema dñëruñxüchixüpataèxwa nayarütooxü. 21 —Rü guma Dácharu rü nanangõxchañ ga yema ònatüchi ga yema yatü ga dñëruñxüchixüärü mechawa rüyíñxü. Rü naxcèx naxí ga airugü, rü nanawearü oxriñxü. 22 —Rü wüxi ga ngunexü nayu ga guma ngearü dñëruñxüchixü, rü daxüçñax ga Tupanaärü orearü ngeruügü rü daxüguxü ga naãnewa nanagagü na wüxiwa Abráñmaã nayexmaxüçèx. Rü nayu ta ga yema yatü ga dñëruñxüchixü, rü inayatèxgü ga duñxügü. 23 —Rü ngëma nachica i Tupana ngoxogüxü nagu poxcuxüwa naxü ga yema yatü ga dñëruñxüchixü rü yema poraãcü ngúñxü ninge. Rü daxü nadau, rü yaxügu Abráñxü nadau na Dácharumaã wüxiwa nayexmaxü ga daxüguxü ga naãnewa. 24 —Rü yexguma ga yema yatü ga dñëruñxüchixüchiréxü rü aita naxü rü ñanagürü:

“Pa Oxi Pa Abráñx, ¡cuxü changechañtümüñ, rü nuã namu ya Dácharu na dexámaã nügü yawaixpëxemëxëácüma choxü yanawaixpëxearü conüñxüçèx! Erü poraãcü choxü nangux i nuã üxüwa”, ñanagürü. 25 —Natürü Abráñ rü ñanagürü nüxü:

“Pa Chaunex, ¡nüxna nacuèxãchi na taxuñma cuzü taxuxü ga yexguma cumañxgu! Natürü Dácharu rü poraãcü chixexü nüxü naxüpetü. Rü ngëmácèx i ñuxma rü nuã mexüwa nangëxma, rü cuma rü ngëma poxcuchicawa ngúñxü quinge. 26 —Rü ñuxüchi nangëxma i wüxi i taxüchixü i ngatexü i tórü ngãñüwa üxü. Rü ngëmácèx ega númacüñax ngëma íxchañgu, rü taxucürüwama ngëma naxí. Rü woo ngëmácüñax núma íxchañgu rü taxucürüwama núma naxí”, ñanagürü. 27 —Rü yexguma ga yema yatü ga dñëruñxüchixüchiréxü rü ñanagürü:

“Cuxü chacèxü, Pa Oxi, Pa Abráñx, na chaunatüpatawa cunamuxüçèx ya Dácharu. 28 —Erü ngëma nangëxmagü ya wüximëñxpüx ya chaueneëgü. Rü chanaxwèxe na namaã nüxü na yanaxuxüçèx na tama nuã ñaã poxcuchica i poraãcü choxü ínangúñüwa naxíñxüçèx”, ñanagürü. 29 —Natürü ga Abráñ rü ñanagürü nüxü:

“Cueneëgü nüxü nangëxma i Tupanaärü mugü ga Moïché ümatüxü rü yema ore ga nuxcümañgüxü ga Tupanaärü orearü uruügü ümatüxü. Rü name nixí i ngëma orega na naxíñüxü”, ñanagürü. 30 —Rü yexguma ga yema yatü ga dñëruñxüchixüchiréxü rü Abráñxü nangãñxü, rü ñanagürü:

“Ngēmáãcü, Pa Oxi, Pa Abráũx, natürü ngëxguma chi wüxi i duũxũ i yuchiréxũ ngema ũxgu rü namaã nüxũ yanaxuxgu, rü chi nüxũ narüxoe i nacüma i chixexũ”, ñanagürü. ³¹—Natürü Abráũ, rü ñanagürü nüxũ:

“Ngëxguma tama naga naxĩnüëgu ga yema ore ga Moĩché ümatüxũ rü yema ore ga nuxcümaũgüxũ ga Tupanaärü orearü uruũgü ümatüxũ, rü woo chi wüxi i marü yuwa írüdaxũ i duũxũ ngema ũxgu, rü namaã nüxũ yanaxuxgu i ore, rü tãu chima nüxũ nayaxõgü”, ñanagürü.

17

Naxãücüma nixĩ na pecadugu inguxũ (Mt 18.6-7, 21-22; Mr 9.42)

¹ Rũ Ngechuchu rü norü ngúexũgüxũ ñanagürü: —Rũ guxũgutáma nangëxma i tacü i duũxũgüxũ pecaduãxëxũ. Natürü wüxi i ngechaũ tá tümacèx nixĩ ya yíxema duũxë ya togüxũ pecadugu nguxëxë. ²⁻³—Rũ tümacèx rü narümemae nixĩ na tümanaxãwa yangacuchixũ ya wüxi ya nuta ya tacü rü ngëmaãcü taxtüwa tüxũ na itáexũ naxüpa na pecadugu tananguxëxũ i wüxi i chorü duũxũ. ¡Rũ ngëmacèx name nixĩ i pexuãëgü i pemax! Rũ ngëxguma wüxi i cueneë chixexũ cumaã ũxgu rü ¡meã naxuxcuxë! Rũ ngëxguma nüxũ naxoxgu i nacüma i chixexũ rü ¡nüxũ nüxũ nangechaũ i ngëma! ⁴—Rũ woo 7 ëxpüxcüna chixexũ cumaã naxüxgu i wüxi i ngunexũgu, rü 7 ëxpüxcüna cuxna yacaxgu na nüxũ nüxũ cungechaũxücèx, rü name nixĩ i nüxũ nüxũ cungechaũ —ñanagürü ga Ngechuchu.

Ñuxãcü tapora ega yaxõxgu

⁵ Rũ norü ngúexũgü ga norü orearü uwa namugüxũ rü ñanagürügü: —Pa Corix, ¡toxũ rüngüxëë na yexeraãcü tayaxõgüxücèx! —ñanagürügü. ⁶ Rũ yexguma ga Cori ga Ngechuchu rü ñanagürü nüxũ ga norü ngúexũgü: —Rũ ngëxguma chi woo naxíraxüchigu i perü õ, rü daa naĩ rü chi pega naxĩnü ega ñapegügu:

“¡Cugü nabëx i nuã rü taxtüchiügu cugü yato!” ñapegügu, rü chi pega naxĩnü.

Wüxi i ngüxëëruũärü puracüchiga

⁷ —Ngëxguma chi wüxie i petanüwa rü tüxũ nangëxmagu i wüxi i tümaärü duũxũ i tümañewa ne ũxũ i puracüwa rü ëxna carneruarü dauwa, rü tama nügücèxira naxüwemü. ⁸ —Natürü norü corixũxĩra naxüwemü na nachibüxücèx rü naxaxexücèx, rü nüma rü yixcama nachibü. ⁹ —Rũ norü cori rü tama moxë nüxna naxã na naxüwemüãxücèx, erü woetama ngëma nixĩ i norü puracü i ngëma norü duũxũ. ¹⁰ —Rũ ngëxgumarüũ tá pixĩgü i pemax. Erü ngëxguma ngëma Tupana pexũ üxëëxüxĩcatama pexüxgu, rü penaxwëxe i pegü ñaperügügu:

“Puracütanüxũ i taxuwama mexũ tixĩgü, erü ngëma nawa tüxũ namuxüxĩcatama nixĩ i tinguxëëxũ”, ñaperügügu —ñanagürü ga Ngechuchu.

Ngechuchu nanameëxëë ga 10 ga yatügü ga chaxüneãxgüxũ

¹¹ Rũ yexguma namagu yaxüxgu ga Ngechuchu ga Yerucharéüwa na naxüxũ, rü Chamáriaane rü Gariréaane nügümaã íxüyexüwa naxüpetü. ¹² Rũ yexguma wüxi ga ñanexãcüwa nanguxgu, rü yexma napëxegu nayayi ga 10 ga yatügü ga chaxünemaã idaaweexũ. Rũ yaxügu nüxũ nachigü. ¹³ Rũ tagaãcü ñanagürügü nüxũ: —Pa Ngechuchux, Pa Ngúexëëruũx, ¡cuxũ tangechaũtümüügu! —ñanagürügü. ¹⁴ Rũ yexguma Ngechuchu nüxũ dëuxgu, rü ñanagürü nüxũ: —¡Yéa paigüxütawa pexĩ, rü nüxũ pegü peyawëxgü! —ñanagürü. Rũ yexguma namagu naxĩyane, rü naxcèx nitaanetanü ga yema yatügü. ¹⁵ Natürü natanüwa rü nayexma ga wüxi ga Ngechuchucèx taeguxũ

ga yexguma marü nügü nadèuxgu ga naxcèx na yataanexü. Rû tagaãcü Tupanaxü nicuèxüüchigü. ¹⁶ Rû Ngechuchupèxegu nanangücuchi rû moxè nüxna naxã. Rû yema yatü rû Chamáriaanecüâx nixĩ. ¹⁷ Rû yexguma ga Ngechuchu rû ñanagürü: —¿Taux èxna i 10 chirèx pixīgüxü na pexcèx chayataanexèègüxü? ¿Ngèxügü nixĩ i ngèma togü i 9 i yatügü? ¹⁸—¿Rû ñaã to i nachiuñanecüâx i duüxüxĩcatama nixĩ itaeguxü na Tupanaxü yacuèxüüxücèx? —ñanagürü. ¹⁹ Rû yexguma rû guma yatüxü ñanagürü: —¡Inachi rû íxü! Cuxcèx nitaane, erü cuyaxõ —ñanagürü.

*Ñuxãcü tá nixĩ i ngèxguma ínanguxgu ya Tupana na ãèxgacü yĩxü
(Mt 24.23-28, 36-41)*

²⁰ Rû Parichéugü rû Ngechuchuna nacagü, rû ñanagürügü: —¿Ñuxgu tá nixĩ na yangucuchixü ya Tupana na ãèxgacü yĩxücèx i núma? —ñanagürügü. Rû Ngechuchu nanangãxü, rû ñanagürü: —Norü nguchiga ya Tupana rû tama wüxi i tacü i nüxü idauxürüü nixĩ. ²¹—Rû taxuacüma ñaperügügü:

“Daa nixĩ”, rû èxna “Gua nixĩ”, ñaperügügü. Erü marü petanüwa nangu ya Tupana na ãèxgacü yĩxücèx —ñanagürü. ²² Rû yexguma norü ngúexügüxü ñanagürü: —Rû tá pexcèx ínangu i ngunexü i nagu poraãcü tá choxü pedaugüchaüxü woo wüxi i paxaächicèxtama yixigu. Natürü tãütáma choxü pedaugü i ngèxguma. ²³—Rû duüxügü rû tá ñanagürügü pexü:

“Daa nixĩ ya Cristu”, rû èxna, “Gua nixĩ ya Cristu”, ñanagürügü tá. Natürü pemax ¡rû tãütáma nüxü peyaxögü, rû tãütáma nawe perüxĩ! ²⁴—Rû ngèxguma íchanguxgu i choma i Tupana Nane na duüxüxü chiixü, rû wüxi i ãèmacü i guxüñaneguma baxixürüü tá chixĩ. ²⁵—Natürü noxri rû tá poraãcü ngúxü chinge, rû ñoma i nañanecüâx i duüxügü i ñuxma maxèxü rû tá choxü naxoe. ²⁶—Rû yexgumarüü ga duüxügü na chixri maxèxü ga yexguma Noe maüxgu, rû ngèxgumarüü tá ta chixri namaxè i duüxügü i ngèxguma íchanguxgu i choma i Tupana Nane na duüxüxü chiixü. ²⁷—Rû ga duüxügü ga yexguma rû nachibüe, rû naxaxegü, rû nixãmèxgü, rû nixütexacügü ñuxmata nawa nangu ga yema ngunexü ga Noe naweügu nagu ixüexü. Rû ínangu ga mucü ga taxüchicü, rû guxüma ga yema duüxügü rû nayue. ²⁸—Rû yexgumarüü ta nangupetü ga yexguma nuxcümaücü ga Lox maüxgu. Rû duüxügü rû nachibüe, rû naxaxegü, rû norü yemaxücèx nataxegü, rû namaã nataxegü, rû nixüanegü rû nitoegü, rû nixüpatagü. ²⁹—Natürü yexguma Lox ixüxgu nawa ga guma ñane ga Chodoma, rû daxüwa narüyi ga üxü ga naxĩchine, rû nanadai ga guxüma ga yema duüxügü. ³⁰—Rû ngèxgumarüü tá ta nangupetü i ngèxguma íchanguxgu i choma i Tupana Nane na duüxüxü chiixü. ³¹ Rû ngèma ngunexügu rû texé tama tümapataarü aixepewa ngèxmagu, rû tama name i tümapatagu tayangaxi na tümaärü ngèmaxügü tayatoxücèx. Rû texé ya tümañewa ngèxmaxè, rû tama name i tümapatacèx tataegu na tacü ngema tayayaxuxücèx. ³²—Rû nüxna pecuèxãchie ga ñuxãcü ngixü na naxüpetüxü ga Lox namèx ga na nayuxü, ga yexguma ngígüweama nadèuxgu. ³³—Erü yixema tügü maxèchaxèèchaüxè rû tá itayarütaxu, natürü yixema chauxcèx yuxe rû aixcüma tá tüxü nangèxma i maxü i taguma gúxü. ³⁴—Rû pemaã nüxü chixu rû ngèma chütaxügu rû wüxi i ngürücarewa tá nangèxmagü i taxre i duüxügü. Rû wüxi tá niga, rû ngèma to rû tá ngema natèx. ³⁵—Rû taxre i ngexügü tá nügümaã ínacaegü. Rû wüxi tá niga rû ngèma to rû tá ngema natèx. ³⁶—Rû taxre i yatügü rû wüxi i nañewa tá nangèxmagü. Rû wüxi tá niga rû ngèma to rû tá ngema natèx —ñanagürü ga Ngechuchu. ³⁷ Rû yemaxü naxĩnüegu ga norü ngúexügü, rû Ngechuchuna nacagü, rû ñanagürügü: —Pa Corix, ¿ngextá tá nixĩ i nangupetüxü i ngèma nüxü quixuxü? —ñanagürügü. Rû

nüma ga Ngechuchu rü nanangãxũ, rü ñanagürü: —Duũxũgü rü tá chauxcèx nangutaquëxegü ñoma ëxchagü nawemücèx ngutaquëxexürü —ñanagürü.

18

Ore ga ãëxgacügu rü yutecügu ixuxũ

¹ Rü Ngechuchu rü wüxi ga to ga orexũ namaã nixu na yemawa nangúexëãxücèx na ñuxãcü nanaxwëxexũ na taguma nüxũ nachaueãcüma guxũguma nayumüxëgüxũ. ² Rü ñanagürü nüxũ ga norü ngúexũgü: —Wüxi ga ñnewa nayexma ga wüxi ga ãëxgacü ga tama Tupanaga ñnüxũ rü taxúexũma ngechaũxũ. ³ —Rü guma ñnewatama iyexma ga wüxi ga nge ga yutecü ga ngxũ nayexmacü ga wüxi ga guxcha namaã ga to ga duũxũ. Rü yemacèx yema ãëxgacüxütawa ixüxecha na ngxũ namexëãxücèx ga yema guxcha. ⁴ —Rü muëxpüxcüna yéma ixüxũ, natürü yema ãëxgacü rü tama ngĩxũ narüngũxëëchaũ. Natürü düxwa nagu narüxĩnü ga yema ãëxgacü rü naãëwa ñanagürü:

“Choma rü tama Tupanaxũ changechaũ, rü taxúexũma chacuáxchaũ. ⁵ —Natürü ngëma choxũ na nachixeweechaxücèx i ñaã nge, rü noxtacüma tá ngĩxũ charüngũxëë na tama yeücürü choxũ nachixeweechaxücèx”, ñanagürü. ⁶ Rü Cori ga Ngechuchu rü ñanagürü: —Yema nixĩ ga norü ore ga yema ãëxgacü ga chixexũ. ⁷ —¿Taux ëxna i Tupana rü paxa tũxũ ínapoxũxũ ya yíxema duũxë ya tũxũ nayaxuxe i ngëxguma chütacü rü ngunecü rü norü ngüxëëcèx nüxna tacaxgu i tümaãrü yumüxëwa? ⁸ —Rü pemaã nüxũ chixu rü Tupana rü paxatáma tũxũ narüngũxëë. Natürü ngëxguma wenaxãrü núma chaxũxgu i choma i Tupana Nane na duũxũxũ chiĩxũ, ¿rü ñuxre i duũxũgü i aixcüma yaxögüxũxũ tá ichayangau i ñoma i naãnewa? —ñanagürü ga Ngechuchu.

Ore i Parichéu gu ixuxũ rü dïëruarü deruũgu ixuxũ

⁹ Rü Ngechuchu rü nüxũ nixu ga ñaã ore nachiga ga yema duũxũgü ga nügü írümegünetaxũ rü tama togüxũ cuáxchaũgüxũ. ¹⁰ Rü ñanagürü: —Taxre ga yatü rü tupauca ga taxũnewa nayayumüxëgü. Rü wüxi rü Parichéu nixĩ, rü yema to rü wüxi ga yatü ga Dumaãrü ãëxgacücèx dïëru ngĩxũ dexũ nixĩ. ¹¹ —Rü yema Parichéu rü yexma nachi, rü ñaããcü nayumüxë:

“Pa Tupanax, moxë cuxna chaxã erü tama togü i duũxũgürü chixĩ. Rü tama togürüũ changitèx, rü tama ngëmarüũ taxũ i chixexũ chaxü rü ëxna wüxi i nge i ãtecümaã ichape. Rü bai i ñaã yatü i Dumaãrü ãëxgacücèx dïëru ngĩxũ dexürü chixĩ. ¹² —Choma rü guxcü ya yüxügu rü taxreëxpüxcüna chaxaure rü tama chachibü na cugu charüxĩnüxücèx. Rü chorü dïëruwa rü guxũguma meã cuxna chanaxã i ngëma cuxna üxũ”, ñanagürü. ¹³ —Natürü ga guma yatü ga Dumaãrü ãëxgacücèx dïëru ngĩxũ decü, rü yaxũgu narüxãũx. Rü namuũ ga daxũ na nadawenüxũ, rü yema norü ngechaũmaã nügü napaxremü, rü ñanagürü:

“Pa Tupanax, ¡Cuxũ changechaütümüũ! Erü wüxi i pecaduãxũ chixĩ”, ñanagürü ga guma yatü. ¹⁴ —Rü ngëmacèx pemaã nüxũ chixu rü guma yatü ga Dumaãrü ãëxgacücèx dïëru ngĩxũ decü rü yexguma napatacèx nataegugu rü Tupanapëxewa rü mecü nixĩ. Natürü yema Parichéu rü Tupana rü tama namaã nataãë. Erü texé ya tügü icuèxüxüxe rü Tupana tá tũxũ naxãnexëë. Natürü texé ya tama tügü icuèxüxüxe rü Tupana rü tá tũxũ nicuèxüxũ —ñanagürü ga Ngechuchu.

*Ngechuchu rü meã buãxgüxũ nayaxu
(Mt 19.13-15; Mr 10.13-16)*

15 Rū yéma Ngechuchuxūtawa tūxū tagagū ta ga buāxgū na tūxū yangōgūchigūxūcèx. Natürü yexguma norü ngúexūgū yemaxū dauxgūgū rü tūxū ningagū ga guxema tūmaxācūegū Ngechuchuxūtawa tūxū gagūxe. 16 Natürü Ngechuchu rü nūgūxūtawa tūmacèx naca ga guxema buāxta rü ñanagürü norü ngúexūgūxū: —Chanaxwèxe i chauxūtawa naxī i buxūgū. ¡Rū tāxū i nūxna penachuxuxū! Erü Tupana āēxgacū íxīxūwa rü tūmacèx nixī ya yíxema ñaā buxūgürü ixīgūxe. 17 —Aixcūma pemaā nūxū chixu rü texé ya tama wūxi i buxūrū Tupanaxū yaxúxe na tūmaārü āēxgacū na yīxūcèx, rü tagutáma nagu taxūcu i Tupana āēxgacū íxīxūwa —ñanagürü ga Ngechuchu.

*Wūxi ga yatū ga dīeruāxūchicū Ngechuchumañ nidexa
(Mt 19.16-30; Mr 10.17-31)*

18 Rū wūxi ga yema Yudíugüarü āēxgacū rü Ngechuchuna naca rü ñanagürü: —Pa Ngúexēeruū ya Mecūx, ¿tácū tá chaxūxū na chanayaxuxūcèx i maxū i taguma gúxū? —ñanagürü. 19 Rū Ngechuchu nanangāxū rü ñanagürü nūxū: —¿Tūxcūū “Mecū” ñacurūgū choxū? Erü Tupanaxīcatama nixī ya mecū ixīcū, rü nataxuma i to i mecū ixīxū. 20 —Cuma nūxū cucuèx i Tupanaārü mugū i ñaxū:

“¡Tāūtáma naī i ngemaā icupe, rü tāūtáma cumáēta, rü tāūtáma cungtèèx, rü tāūtáma doraxū quixu i togūchiga, rü tūmaga naxīnū ya cunatū rü cue!” ñaxū. 21 Rū yexguma ga guma yatū rü ñanagürü Ngechuchuxū: —Woetama chorü bucūma meāma chayanguxēē i guxūma i ngēma mugū i nūxū quixuxū —ñanagürü. 22 Rū yemaxū naxīnūgu ga Ngechuchu rü ñanagürü: —Wūxixicatama cuxū nataxu, rü ngēma nixī na namaā cutaxexū i guxūma i curü ngēmaxūgū rü togū i ngearü ngēmaxūāxgūxūna na cunaxāxū i curü natanū, rü ngēxguma rü tá cuxū nangēxma i cuchica i daxūguxū i naānewa. Rū ñuxūchi marū name i chowe curūxū —ñanagürü. 23 Natürü yemaxū naxīnūgu ga guma yatū rü poraācū inayarūmaāchi, yerü namuārü dīeruāxūchi. 24 Rū yexguma Ngechuchu nūxū dēuxgu ga ñuxācū na nangechaūxū, rü ñanagürü nūxū ga norü ngúexūgū: —Naguxchaxūchi tá nixī na Tupana āēxgacū íxīxūwa na yachocuxū i ngēma dīeruāxūchigūxū. 25 —Rü dūcax, wūxi i cameyu rü taxucürūwama wūxi ya ucumaxētūwa naxūpetū. Rū ngēxgumarū ta nixī i wūxi i duūxū i dīeruāxūchixū rü taxucürūwama Tupana āēxgacū íxīxūwa nixūcu [ega norü dīeruguama naxīnūgu rü tama yaxōōgu —ñanagürü.] 26 Rū yexguma yemaxū naxīnūgu ga duūxūgū rü ñanagürügū: —¿Éxna texé tá ya nayaxúxe i maxū i taguma gúxū? —ñanagürügū. 27 Rū Ngechuchu ñanagürü nūxū: —Duūxūgū rü taxuacūma nūgū namaxēē, natürü Tupanaāxū rü natauxcha na namaxēxēāxū —ñanagürü. 28 Rū Pedru ñanagürü Ngechuchuxū: —Pa Corix, toma rü yéma tanawogū ga guxūma ga torü yemaxūgū na cuwe tarūxīxūcèx —ñanagürü. 29-30 Rū yexguma ga Ngechuchu rü ñanagürü nūxū ga norü ngúexūgū: —Aixcūma pemaā nūxū chixu rü texé ya Tupanacèx tūmapatana, rü éxna tūmanatūna, rü éxna tūmaēna, rü éxna tūmaēneēgūna, rü éxna tūmaēyèxgūna, rü éxna tūmamèxna, rü éxna tūmaxācūgūna ngēma ixūxē na Tupanaāxū tapuracūxūcèx, rü ñoma i naānewa tátama poraācū tanayaxu i tūmaārü natanū. Rū daxūguxū i naānewa rü tá ta tanayaxu i maxū i taguma gúxū —ñanagürü.

*Ngechuchu rü wenaxārü nanaxunagū ga norü yuxchiga
(Mt 20.17-19; Mr 10.32-34)*

31 Rū Ngechuchu rü noxrūwama naxcèx naca ga norü ngúexūgū, rü ñanagürü nūxū: —Ñuxma rü Yerucharéūwa tá taxī na ngema yanguxūcèx i guxūma ga yema ore ga nuxcūmaūgūxū ga Tupanaārü orearü uruūgū

ümatüxü ga chauchiga. ³² —Rü Yerucharéüçüãx i duüxüğü rü tá to i nachiuãnecüãxna choxü namugü. Rü ngëma duüxüğü rü tá chaugu nidauxcüraüğü, rü tá chomaã naguxchigagü, rü tá chauchiwewa nacuaixgüe. ³³ —Rü tá choxü naçuaixgü, rü yixcüra rü tá choxü nimèxgü. Natürü tomaëxpüx i ngunexüguwena rü tá wenaxârü chamaxü —ñanagürü. ³⁴ Natürü yema norü ngüexüğü rü tama nüxü nacüèxgüéga ga na tacüchiga yüxü ga yema ore ga namaã nüxü yaxuxü. Yerü poraãcü nüxü naguxcha ga aixcüma nüxü na nacüèxgüxücèx.

Ngechuchu nanamexëë ga wüxi ga ngexetücü ga Yericúwa
(Mt 20.29-34; Mr 10.46-52)

³⁵ Rü yexguma Ngechuchu ñãne ga Yericúwa nguxchaügu, rü yéma namacüwawa narüto ga wüxi ga yatü ga ngexetücü ga dïerucèx yéma iwémécü. ³⁶ Rü yexguma guma ngexetücü nüxü ñnügü ga muxüma ga duüxüğü na yéma chopetüxü, rü duüxüguna naca ga tacü na ngupetüxü. ³⁷ Rü nanangãxüğü, rü ñanagürüğü: —Ngechuchu ya Nacharétucüãx nuã naxüpetü —ñanagürüğü. ³⁸ Rü yexguma ga guma ngexetücü rü tagaãcü ñanagürü: —Pa Ngechuchux, Pa Dabítanüxüx, jcuxü changechaütümüü! —ñanagürü. ³⁹ Rü yema duüxüğü ga Ngechuchupëxegu íxü, rü nanangagü ga na iyanangeáxücèx. Natürü guma ngexetücü rü yexeraãcü tagaãcü ñanagürü: —Pa Dabítanüxüx, jcuxü changechaütümüü! —ñanagürüama. ⁴⁰ Rü yexma nayachiãchi ga Ngechuchu, rü duüxügxü namu na naxütawa nagagüãxücèx. Rü yexguma marü naxütawa nanguxgu, rü guma ngexetücüna naca ga Ngechuchu, rü ñanagürü: ⁴¹ —¿Tacü i cunaxwèxexü na cumaã chanaxüxü? —ñanagürü. Rü guma ngexetücü nanangãxü rü ñanagürü: —Pa Corix, chanaxwèxe na choxü quidauchixëëxü —ñanagürü. ⁴² Rü Ngechuchu ñanagürü nüxü —¿Idauchi! Rü marü cuxcèx nitaane erü cuyaxõ —ñanagürü. ⁴³ Rü yexgumatama nidauchi ga guma ngexetücü, rü Ngechuchuwe narüxü, rü Tupanaxü nicuèxüüchigü. Rü guxüma ga duüxüğü ga nüxü daugüxü ga yema ngupetüxü rü Tupanaxü nicuèxüüğü ta.

19

Ngechuchu rü Zaquéuchiga

¹ Rü Ngechuchu rü Yericúarü ñanewa naxüpetü. ² Rü yéma nayexma ga wüxi ga yatü ga dïeruãxüchixü ga Zaquéugu äegaxü. Rü nüma nixí ga naëru ga yema yatüğü ga Dumaârü äëxgacücèx dïeru ngixü ideetanüxü. ³ Rü yema Zaquéu rü poraãcü nüxü nangúchaü ga Ngechuchuxü na nadauxü na nüxü nacüáxücèx. Natürü taxuacüma nüxü nadau, yerü namuxüchi ga duüxüğü, rü ñuxüchi nanuxchanexüchi ga nümax. ⁴ Rü yemacèx Ngechuchupëxegu nayangu, rü namacüwawa wüxi ga naïgu naxíngü na Ngechuchuxü nadauxücèx ga yexguma yéma naxüpetüğü. ⁵ Rü yexguma yéma naxüpetüğü ga Ngechuchu, rü daxü nadau natüüwa ga guma naí. Rü ñanagürü nüxü: —Pa Zaquéux, jpaxa íruxí i ngëma! Erü cupatawa tá changu i ñuxma —ñanagürü. ⁶ Rü paxa ínarüxí ga Zaquéu, rü taãëacüma Ngechuchuxü nayaxu. ⁷ Rü yexguma yemaxü nadaugüğü ga duüxüğü, rü guxüma inanaxügüe ga chixri Ngechuchuchiga na yadexagüxü. Rü ñanagürüğü: —¿Ñuxãcü i nüma rü wüxi i duüxü i pecaduãxüpatawa nangu? —ñanagürüğü. ⁸ Rü yexguma ga Zaquéu rü inachi rü ñanagürü Ngechuchuxü: —Dücèx, Pa Corix, choma rü ngearü dïeruãxgüxüna tá chanaxã i ngãxüğü i guxüma i chorü ngëmaxüğü. Rü ngëxguma chi texé tüxü chawomüxëëacüma tüxü changixgu, rü ägümücüëxpüxcüna tá tüxü ngixü chataeguxëë i ngëma

tümaärü dīeru —ñanagürü. ⁹ Rū Ngechuchu rü ñanagürü nüxü: —Rü ñoma i ngunexügu cupatawa nangu i maxü i taguma gúxü, erü cuma rü ta rü Abráürüü cuyaxõ. ¹⁰—Rü choma i Tupana Nane na duüxüxü chiixü, rü ñoma i nañewa chaxü na naxcèx chayadauxücèx i ngēma duüxügü i iyarütaxexü na chanamaxèxèxücèx —ñanagürü.

Ore i dīeru gu ixuxü
(Mt 25.14-30)

¹¹ Rū yoxni yema Ngechuchuarü ore inaxĩnüeyane ga duüxügü, rü Ngechuchu rü wüxi ga to ga ore ga cuèxruüxü namaã nixu, yerü marü Yerucharéüxü ningaica, rü duüxügü nagu rüxĩnüegu rü paxa tá ínangu ga Tupana na norü ãëxgacü yĩxücèx. ¹² Rū yexguma ga Ngechuchu rü nügüchiga nidexa rü ñanagürü nüxü: —Nayexma ga wüxi ga yatü ga taxü ga cori ixicü ga nayaxucü ga ore na nachiuãneärü ãëxgacüxütawa naxüxücèx ga yaxüwa na yema ãëxgacü nüxü unetaxücèx na guma nawa ne naxüxüne ga ãneärü ãëxgacü yĩxücèx. ¹³—Rü yexguma tauta inaxüãchigu, rü naxcèx nangema ga 10 ga norü duüxügü. Rü wüxichigüna ngixü naxã ga wüxitchinü ga tatanücü ga dīeru. Rü ñanagürü nüxü:

“¡Ngĩmaã pepuracüe rü ngixü pimuxèë i ñaã dīeru ñuxmatáta chataegu!” ñanagürü. ¹⁴—Natürü yema ãneçüãx ga duüxügü rü naxchi naxaie ga guma cori. Rū yemacèx nawenaãma nayamugü ga ñuxre ga orearü ngeruügü na nachiuãneärü ãëxgacümaã nüxü yanaxugüxücèx na tama nanaxwèxegüxü na norü ãëxgacüxü na yĩxücèx ga guma cori. ¹⁵—Natürü nachiuãneärü ãëxgacü rü nayangucuchixèëãma ga guma cori. Rū ñuxüchi ga guma cori rü norü ãneçèx nataegu na yéma ãëxgacü na yĩxücèx. Rū yexguma ínanguxgu rü naxcèx nangema ga yema 10 ga norü duüxügü ga dīeru nüxna ngixü naxãxü, yerü nüxü nacuáxchaü ga ñuxrechigü ngixü na yamuxèëxü ga norü dīeru ga wüxichigü ga yema norü duüxügü. ¹⁶—Rü yema nüxira dīeru nüxna ngixü naxãxü rü norü corixütawa nangu, rü ñanagürü:

“Pa Corix, curü dīeru rü 10 èxpüxcüna ngixü chimuxèë”, ñanagürü. ¹⁷—Rü guma Cori ga yexwaca ãëxgacüxü ingucuchicü rü nanangãxü, rü ñanagürü:

“Wüxi i mexü i chorü duüxü quixi. Maneca meãma namaã cupuracü i ngēma íraxü i dīeru i cuxna chaxãxü. Rū ñuxma rü 10 ya ãnegüarü ãëxgacüxü tá cuxü chixixèë”, ñanagürü. ¹⁸—Rü yéma nangu ga to ga norü duüxü, rü ñanagürü:

“Pa Corix, curü dīeru rü wüximèèxpüxcüna ngixü chimuxèë”, ñanagürü. ¹⁹—Rü norü cori nanangãxü rü ñanagürü nüxü:

“Cuma rü wüximèèxpüx ya ãnegüarü ãëxgacüxü tá cuxü chixixèë”, ñanagürü. ²⁰—Rü yéma nangu ga to ga norü duüxü rü ñanagürü nüxü:

“Pa Corix, ñaã iyixi i curü dīeru. Rū wüxi ya dechugu ngixü chanuque, rü ngēmaãcü ngĩmaã changuxü. ²¹—Yerü cuxcèx chamuü, erü wüxi i yatü i aüxü quixi. Rū cunayauxtanü i ngēma tama cuxrü ixixü, rü cunayaxu i nanetüarü o i ngextá tama cuma ícutoexüwa”. ²²—Rü yexguma ga guma ãëxgacü rü ñanagürü nüxü:

“Wüxi i chorü duüxü i chixexü quixi i cumax. Rū curü oretama nixi i cuxü ixuxü na cuchixexü. Marü nüxü cucuèxchirèx ga na chaxaüxü, rü chanayautanüxü i ngēma tama choxrü ixixü, rü chanayaxuxü i nanetüarü o i tama choma ichatoxü. ²³—¿Natürü tüxcüü tama bancugu choxü ngĩmaã cunguxü i chorü dīeru na ngēma choxü ngixü yamuxèègüxücèx, rü ngēmaãcü mucü ngixü na chayaxuxücèx i ngèxguma íchanguxgu?” ñanagürü. ²⁴—Rü yexguma ga ãëxgacü rü yema yexmagüxümaã nüxü nixu, rü ñanagürü:

“¡Nüxna ngĩxũ peyaxu i ngẽma dĩaeru, rü ngẽma 10 i dĩaeru nüxũ ngẽxmaxũna ngĩxũ pexã!” ñanagürü. ²⁵—Rü nümagü rü nanangãxũgü, rü ñanagürügü:

“Natürü, Pa Corix, nüma rü marü nüxũ ingẽxma i 10 i dĩaeru”, ñanagürügü. ²⁶—Rü guma ãẽxgacü nanangãxũ, rü ñanagürü:

“Pemaã nüxũ chixu rü texé ya chauga ñnuxẽ rü yexera tá tüxna chanaxã. Natürü texé ya tama chauga ñnuxẽ rü tá tüxna chanayaxu i woo ngẽma íraxũ i tüxũ ngẽxmaxũ. ²⁷—Rü yema chorü uwanügü ga tama naxwèxegüxũ ga norü ãẽxgacüxũ na chiixũ, ¡rü nuã penagagü, rü nuã chopẽxegu peyadai!” ñanagürü.

*Ngechuchu rü Yerucharéũgu naxücu
(Mt 21.1-11; Mr 11.1-11; Cu 12.12-19)*

²⁸ Rü yema orexũ yaxuxguwena ga Ngechuchu, rü inixũchigü ga Yerucharéũwa na naxũxũ. ²⁹ Rü yexguma marü nawa nangugüchaũgu ga guma ñãnegü ga Bechagué rü Betániã ga Oríbunecüarü Mèxpüneãrü ngaicamana yexmagüne, rü Ngechuchu nanamu ga taxre ga norü ngúexũgü. ³⁰ Rü ñanagürü nüxũ: —¡Gua ñãnexãcüwa pexĩ! Rü ngẽxma tá nüxũ peyangau i wüxi i buru i ngexwaca yaxũ i ngẽxma ngaxũxũ i taguma texé natagu aunagüxũ. ¡Rü peyawẽxũ, rü nuã penaga! ³¹—Rü ngẽxguma texé pexna çaxgu na tacücèx peyawẽxũxũ i ngẽma buru, ¡rü tümamaã nüxũ pixu rü ñapegügü:

“Torü Cori nanaxwèxe”, ñapegügü tüxũ! ³² Rü yéma naxĩ ga yema taxre ga norü ngúexũgü. Rü yexma nüxũ nayangau ga yema buru ga Ngechuchu namaã nüxũ ixuxürü. ³³ Rü yexguma yawẽxũgüãgu ga yema buru, rü norü yoragü rü yema ngúexũgüna nacagüe, rü ñanagürügü: —¿Tüxcüũ peyawẽxũ i ngẽma buru? —ñanagürügü. ³⁴ Rü nümagü nanangãxũgü, rü ñanagürügü: —Rü tayawẽxũ erü torü Cori nanaxwèxe —ñanagürügü. ³⁵ Rü Ngechuchuxütawa nanagagü ga yema buru. Rü yema norü ngúexũgü rü norü gáuxũchirumaã nanatütägü. Rü ñuxũchi Ngechuchuxũ natagu naxaunagüxẽegü. ³⁶ Rü duũxũgü rü Ngechuchupẽxewa norü gáuxũchirumaã nayachamagü ga nama. ³⁷ Rü yexguma inaxügüãgu na ínaxĩgüxũ nawa ga yema nama ga Oríbunecüarü Mèxpúnewa yarüdaexũ, rü guxüma ga yema duũxũgü ga yaxõgüxũ ga nawe rüxixũ rü inanaxügü ga taãẽacüma aita na naxüexũ rü tagaãcü Tupanaxũ na yacuèxüügüxũ naxcèx ga guxüma ga yema cuèxruũgü ga taxũ ga nüxũ nadaugüxũ ga Tupanaãrü poramaã naxüxũ ga Ngechuchu. ³⁸ Rü ñanagürügü: —¡Namecümáxüchi ya daa tórü ãẽxgacü ya Tupanaégagu núma ücü! ¡Rü pema rü ta, Pa Daxücüãx, rü petaãxégü rü nüxũ picuèxüügü ya Tupana! —ñanagürügü. ³⁹ Rü yéma duũxũgütanüwa nayexmagü ga ñuxre ga Parichéugü. Rü ñanagürügü Ngechuchuxũ: —Pa Ngúexẽeruũx, ¡Yangagü i ngẽma cuwe rüxixũ i duũxũgü na yanachianegüxücèx! —ñanagürügü. ⁴⁰ Natürü Ngechuchu nanangãxũ rü ñanagürü nüxũ: —Pemaã nüxũ chixu rü ngẽxguma chi iyanangeèxgügu i ñãã duũxũgü, rü daa nutagü ya namacüwawa ngẽxmagücü rü chi nüxĩ aita naxüe —ñanagürü. ⁴¹ Rü yexguma Yerucharéũãrü ngaicamana nanguxgu ga Ngechuchu, rü guma ñãnecũãx ga duũxũgücèx naxaxu. ⁴² Rü ñanagürü: —Pa Yerucharéũcüãxgü, chierü ñoma i ngunexũgu nüxũ pecuèxgu na texé aixcüma taãè pexna ãxũ. Natürü ngẽma rü pexchawa inicux i ñuxma, rü taxuacüma nüxũ pecuèx. ⁴³—Rü tá guxchaxũgü pexũ naxüpetü. Rü perü uwanügü tá nanaxü i norü poxũchica i norü guxücüwawa ya perü ñãne. Rü norü churaragü tá pexũ ínachoeguãchi, rü guxücüwawa tá pexcèx ne naxĩ. ⁴⁴—Rü tá nagu napogüe ya perü ñãne, rü tá pexũ nadai. Rü taxucütáma ya nuta

ngextá nügüxétü nanugüxüra i perü ñaneärü poeguxütapüwa. Rü ngēmaācü tá pexü naxüpetü, yerü tama nüxü pecuèxgüchañ ga yexguma Tupana petanügu naxüñaneü —ñanagürü.

Ngechuchu rü tupauca ga taxñewa ínanawoxü ga duñxügu ga yéma taxegüxü

(Mt 21.12-17; Mr 11.15-19; Cu 2.13-22)

⁴⁵ Rü Ngechuchu rü tupauca ga taxñewa nangu rü yexma naxücu. Rü ínanaxügu na ínanawoxüñxü ga yema duñxügu ga tupauca ga taxñewa taxegüxü. ⁴⁶ Rü Ngechuchu rü ñanagürü nüxü: —Tupanaärü ore i ümatüxüwa rü ñanagürü:

“Chopata rü yumüxēpatañ nixi”.

Natürü pema rü ngñtèèxgüxüpatañ peyaxixēē —ñanagürü. ⁴⁷ Rü guxü ga ngunexügu rü tupauca ga taxñewa nayangüxēētae ga Ngechuchu. Natürü ga paigüarü ãëxgacügü, rü ngüxēēruügu ga Moñchearü mugüwa ngüxēētaegüxü, rü Yerucharéñarü ãëxgacügü, rü naxcèx nadaugü ga ñuxācü tá na yamèxgüñxücèx. ⁴⁸ Natürü taxucürüwa tacü namañ naxügu, yerü guxüma ga duñxügu rü namañ natañgü, rü meñ inarüxññüē ga norü ore.

20

Ngechuchuna nacagü na texearü oregagu tupauca ga taxñewa nangüxēētaexü

(Mt 21.23-27; Mr 11.27-33)

¹ Wüxi ga ngunexü ga Ngechuchu rü tupauca ga taxñewa nayexma. Rü nanangüxēē ga duñxügu, rü namañ nüxü nixu ga Tupanaärü ore. Rü yexguma íyadexayane rü yéma nangugü ga paigüarü ãëxgacügü, rü ngüxēēruügu ga Moñchearü mugüwa ngüxēētaegüxü, rü Yudiugüarü ãëxgacügüerugü. ² Rü ñanagürügü nüxü: —¿Texearü mugagu nixi i cunaxüxü i ngēma núma cuxüxü? ¿Rü texé cuxü tamu na cunaxüxücèx i ngēma? —ñanagürügü. ³ Rü yexguma ga Ngechuchu rü ñanagürü nüxü: —Choma rü tá ta pexna chaca, rü chanaxwèxe i choxü pengāxügu. ⁴ —¿Rü texé tanamu ga Cuáñ na duñxügüxü ínabaiñxēēñxücèx? ¿Pexcèx rü Tupana yññxü ga namucü rü ãxna duñxügümare? —ñanagürü. ⁵ Rü yexguma ga Parichéugü rü ínanaxügüe ga nügümañ na yaporagatanücüxü. Rü nügümañtama ñanagürügü: —¿Ñuxü ñagügüxü tá? Erü ngēxguma chi:

“Tupana núma nanamu”, ñagügu, rü núma rü chi ñanagürü tüxü:

“¿Rü tüxcüñ ga tama nüxü peyaxögüxü?” ñanagürü chi tüxü. ⁶ —Rü ngēxguma chi ñagügu:

“Yatügümare nuñ nanamu”, ñagügu, rü guxü i duñxügu chi nutamañ tüxü ínamuxüchigü, rü tüxü chi nadai. Erü nümagü i duñxügu rü nagu narüxññüē na Tupana yññxü ga Cuáñxü mucü. ⁷ Rü Ngechuchuxü nangāxügu rü ñanagürügü: —Tama nüxü tacuèx ga texé núma na namuxü ga Cuáñ ga baiñxēēruñ —ñanagürügü. ⁸ Rü yexguma ga Ngechuchu rü ñanagürü nüxü: —Choma rü ta tññtama pemañ nüxü chixu na texé choxü muxü na chanaxüxücèx i ngēma choxna naxcèx pecaxü —ñanagürü.

Ore ga puracñtanñxü ga chixexügu ixuxü

(Mt 21.33-44; Mr 12.1-11)

⁹ Rü ínanaxügü ga Ngechuchu ga duñxügümañ na yadexaxü. Rü ñañ ore ga cuèxruññxü namañ nixu, rü ñanagürü: —Nayexma ga wüxi ga yatü ga wüxi ga ubanecü ücü ga norü nañnewa. Rü ñuxñchi ñuxre ga puracñtanñxüna nanaxñ na nüxna nadaugüxücèx rü yixcama rü norü yoramañ na yayauxyegüñxücèx

ga yema norü o. Rü ñuxũchi ga guma yatü rü nixũ ga yéma rü nuxcũma nataegu. ¹⁰—Rü yexguma nawa nanguxgu ga na yadauxũ ga yema ubagü, rü guma yatü rü yéma puracütanüxũgũxũtawawa nanamu ga wüxi ga norü duũxũ na naxcèx íyaçaxũcèx ga yema ubagü ga nüxna üxũ. Natürü yema puracütanüxũgü rü nanaçuaixgü ga guma yatüarü duũxũ, rü taxuũma ga uba nüxna naxãgü. Rü yemaãcü ínyamugü. ¹¹—Rü yexguma ga guma yatü rü wenaxãrü to ga norü duũxũ yéma ta namu. Natürü ga yema puracütanüxũgü rü chixexũ namaã nixugüe, rü nanaçuaixgü, rü taxuũma ga uba nüxna naxãgü. Rü yemaãcü ínyamugü. ¹²—Rü wenaxãrü to ga norü duũxũ yéma ta namu ga guma yatü. Natürü ga yema puracütanüxũgü rü nanapixẽẽ, rü ínanatèxüchigü ga yema naãnewa. ¹³—Rü düxwa ñanagürü ga guma naãneãrü yora:

“¿Tacü tá chaxũxũ i ñuxmax? Rü name nixĩ i chaune ya nüxũ changechaũcü ngema chanamu. Rü ngẽxguma nüxũ nadaugügu rü bexmana naga tá naxĩnüẽ”, ñanagürü. ¹⁴—Natürü ga yema puracütanüxũgü rü yexguma guma yatü nanexũ nadaugügu, rü nügümaã ñanagürügü:

“Ñaãrü tá nixĩ i ñaã naãne i yixcama. ¿Rü ngĩxã tayamèxgü na tórü na yĩxũcèx!” ñanagürügü. ¹⁵—Rü ínanatèxüchigü ga yema naãnewa, rü nayamèxgü —ñanagürü ga Ngechuchu. Rü yexguma ga Ngechuchu rü duũxũgüna naca, rü ñanagürü: —¿Tacü tá ngẽma puracütanüxũmaã naxü i ngẽma naãneãrü yora i ñuxmax? ¹⁶—Rü ngema tá naxü rü tá nanadai i ngẽma puracütanüxũgü, rü togüna tá nanaxã i norü naãne —ñanagürü ga Ngechuchu. Rü yexguma yemaxũ naxĩnüẽgu ga duũxũgü rü ñanagürügü: —Chierü tama ngẽmaãcü nangupetüxẽẽãxgu ya Tupana —ñanagürügü. ¹⁷Natürü Ngechuchu rü nüxũ nadawenü, rü ñanagürü nüxũ: —¿Natürü ñuxũ ñaxũchiga nixĩ i ngẽma Tupanaãrü ore i ümatüxũ i ñaxũ?:

“Yima nuta ya mecü ya ñãrü üruũgü nüxũ oechirécü, rü ñuxma rü yimatama nixĩ ya Tupana nüxĩra yaxücuchicü na namaã inaxügüãxũ ya ñpata”, ñaxũ. ¹⁸ Rü ñanagürü ta ga Ngechuchu: —Texé ya yima nutamaã yarüñaxẽ, rü tá itapoũgü. Rü yixema tümaetügu nanguxe ya yima nuta, rü tá tüxũ niñáixmü —ñanagürü ga Ngechuchu. ¹⁹ Rü ga paigüarü ãẽxgacügü rü ngüexẽẽruũgü ga Moĩchearü mugüwa nguxẽẽtaegüxũ, rü yexgumatama Ngechuchuxũ niyauxgüchaũ. Yerü nüxũ nacuèxgü ga nachiga na yĩxũ ga yema ore ga cuèxruũ ga nüxũ yaxuxũ. Natürü tama nayayauxgü, yerü duũxũgüxũ namuũẽ.

Ãẽxgacüaxũ dĩẽrumaã naxütanüxũchiga

(Mt 22.15-22; Mr 12.13-17)

²⁰ Rü yemacèx ga yema paigüarü ãẽxgacügü rü Ngechuchuxũtawawa nanamugü ga ñuxre ga norü duũxũgü na mexũ i duũxũgürüũ yéma iyanaxĩnüẽxũcèx natürü naxcèx na nadaugüxũcèx ga ñuxãcü nachiũãneãrü ãẽxgacüxũtawawa Ngechuchuxũ na ínaxuaxũgüxũcèx. ²¹ Rü yemacèx Ngechuchuna nacagü rü ñanagürügü: —Pa Ngüexẽẽruũx, toma nüxũ tacuèx rü aixcũma nixĩ i ngẽma nüxũ quixuxũ rü ngẽma namaã cungüexẽẽtaexũ. Rü tama duũxũãrü düxètüxũnegu cudawenü erü nacũma nixĩ i cungugüxũ. Rü aixcũma cunangüexẽẽ i duũxũgü na Tupana naxwèxexũãcũma namaxẽxũcèx. ²²—Rü dücax, ngẽma ñãneãrü dĩẽru i ãẽxgacü ya tacü ya Dumacũãx naxwèxexũ na tanaxütanüxũ, ¿rü namexũ yĩxũ na nüxũ tanaxütanüxũ rü õxna tama? —ñanagürügü. ²³ Natürü Ngechuchu nüxũ nacuèxama na chixexũgu naxĩnüẽxũ ga yema duũxũgü, rü yemacèx ñanagürü nüxũ: —¿Tüxcüũ i chixexũgu choxũ penguxẽẽchaũ? ²⁴—¿Choxũ ngĩxũ pewé i wüxi i dĩẽru na ngĩxũ chadauxũcèx! ¿Rü texéhicünèxã rü texéega ngĩgu üx? —ñanagürü. Rü nanangãxũgü rü

ñanagürügü: —Dumacüãx ya ãëxgacü ya tacüchicünèxã nixĩ —ñanagürügü.
²⁵ Rü yexguma ga Ngechuchu rü ñanagürü nüxü: —¿Ëxgacüna ngixü pexã i ngëma ãëxgacüarü ixicü, rü Tupanana ngixü pexã i ngëma Tupanaarü ixicü! —ñanagürü. ²⁶ Rü yemaacü ga Ngechuchu rü woo norü orewa rü taxucürüwama chixexügu nananguxëëgü ga duüxügüpëxewa, yerü meãma nanangãxü. Rü guxüma ga duüxügü rü nangeëxgümare yerü nabaixãchiãëgü namaã ga yema norü ore.

*Chaduchéugü rü Ngechuchuna nacagüe rü ngoxi wena namaxë i duüxügü
 (Mt 22.23-33; Mr 12.18-27)*

²⁷ Rü Ngechuchuxütawa ínayadaugü ga ñuxre ga Chaduchéugü. Rü nümagü nixĩ ga nagu naxĩnüëxü na tagutãma wena namaxëxü i yuexü. Rü yemacëx Ngechuchuxü ñanagürügü: ²⁸ —Pa Ngúexëëruüx, Moïchéarü mugüwa rü ñanagürü:

“Ngëxguma wüxi ya yatü naxmëx ngexacüyane nayuxgu, rü name nixĩ i naëneëtama ngĩmaã naxãmëx i ngëma yutecü i naxümeëx, na ngëmaacü naxãxãcücëx nüxü ya naëneë ya marü yucü”,
 ñanagürü ga yema ore. ²⁹ Rü ñanagürügü ta ga Chaduchéugü: —Nayexma ga 7 ga nügüeneë. Rü naxãmëx ga guma yacü, natürü tauta naxãxãcüyane nayu. ³⁰ —Rü yexguma naĩ ga naëneë nüxĩ ngĩmaã naxãmëx ga yema ngecü. Rü guma rü ta nayu, rü nangexacü. ³¹ —Rü yexguma rü naĩ ga naëneë nüxĩ ngĩmaã naxãmëx. Rü yemaacü gucüma ga guma 7 ga nügüeneëgü rü ngĩmaã naxãmëx ga yema nge. Rü gucüma nayue tauta naxãxãcüyane. ³² —Rü ngĩma rü ta düxwa iyu ga yema nge. ³³ Rü ngëxguma yuexü wena maxëgu, ¿rü ngecürüücü naxmëx tá iyixĩ i ngëma nge? Yerü yexguma namaxëgu rü gucüma ga guma 7 ga nügüeneë ngĩmaã naxãmëx —ñanagürügü. ³⁴ Rü yexguma ga Ngechuchu rü nanangãxü rü ñanagürü: —Ñoma i naãnewa rü yatügü rü nixãmëxgü rü ngexügü rü nixãtegü. ³⁵ —Natürü ngëma duüxügü i Tupanapëxewa mexü na wena namaxëxü na daxüguxü i naãnewa naxixücëx rü ngëma rü tãütãma nixãmëxgü rü ëxna nixãtegü. ³⁶ —Erü ngëma rü tagutãma nayue. Rü daxücüãx i Tupanaarü orearü ngeruügürüü tá nixĩgü. Rü aixcüma Tupanaxãcügü nixĩgü erü yuwa ínarüdagü. ³⁷ —Rü yema ore ga naixãcü ga iyauratanücüxünechigawa, rü Moïché tüxü nüxü nacuëxëë rü yuexü rü tá wena na namaxëxü. Erü yema orewa, rü ñanagürü ga Cori ga Tupana:

“Choma nixĩ i Abráüarü Tupana, rü Ichaáarü Tupana, rü Acobuarü Tupana”, ñanagürü. ³⁸ —Rü ngëmawa nüxü tacuëx rü woo ñoma i naãnewa nayuegu i duüxügü, natürü Tupanacëx rü guxüguma namaxë —ñanagürü. ³⁹ Rü yexguma ga ñuxre ga ngúexëëruügü ga Moïchéarü mugüwa nguxëëtaegüxü rü ñanagürügü: —Aixcüma meãma nüxü quixu, Pa Ngúexëëruüx —ñanagürügü. ⁴⁰ Rü yemawena rü marü namuëë ga tacüchigacëx Ngechuchuna na nacagüexü.

*¿Texé nane nixĩ ya Cristu?
 (Mt 22.41-46; Mr 12.35-37)*

⁴¹ Rü Ngechuchu rü ñanagürü nüxü: —¿Tüxcüü duüxügü nüxü nixügü rü Cristu rü nuxcümaücü ga ãëxgacü ga Dabítã nixĩ? ⁴²⁻⁴³ —Yerü Dabítãma ñaãacü nanaxümatü ga Wiyaegüarü poperawa:

“Tupana rü chorü Cori ya Cristuxü ñanagürü: ‘¿Nuã chorü tügüneëwawa rüto, ñuxmatáta cuxmëxwa chanangëxmagüxëë i curü uwanügü na namaã icucuáxücëx!’ ”

ñaãcũ nanaxumatũ. ⁴⁴ Rũ ñanagürũ ga Ngechuchu: —¿Ñuxücürüwa i Dabítaa yĩxũ ya Cristu ega numatama ga Dabí rü norü Corimaã naxuãgu? —ñanagürũ.

Ngechuchu rü nüxũ nixu na tama nameärü maxũãxgũxũ ga yema ngúexẽruũgũ ga Moĩchearũ mugüwa nguxẽtaegũxũ

(Mt 23.1-36; Mr 12.38-40; Lc 11.37-54)

⁴⁵ Rũ guxũma ga duũxũgũ rü yéma inarũxĩnũe ga yexguma Ngechuchu norü ngúexũgũxũ ñaxgu: ⁴⁶ —¡Pexuãẽgũ naxcèx i ngẽma ngúexẽruũgũ i Moĩchearũ mugüwa nguxẽtaegũxũ! Erü nũmagü rü norü me nixĩ i mexũ i naxchirumaã na naxĩãneãxũ. Rũ ítamũwa nanaxwèxegü na duũxũgũ meã nüxũ rümoxẽgũxũ. Rũ ngutaquẽxepataũgüwa rü norü me nixĩ i ãẽxgacügümèxwèxewa na natogũxũ. Rũ õna i taxũwa rü ngẽma õnaärü yoraxũtawa ügũxũ i nachicacèx nadaugũ. ⁴⁷ —Rũ tüxũ nawomüxẽẽgũãcũma tüxna nanapuxũ ya tümapatagü ya yixema yutegüxe. Rũ ñuxũchi nanamèxẽẽ i norü yumüxègü na duũxũgũ nagu rüxĩnũèxücèx na aixcũma mexügü yĩgũxũ. Natürü nũmagü tá nixĩ i yexeraãcü napoxcuxũ —ñanagürũ.

21

Yutecüarü ãmarechiga

(Mr 12.41-44)

¹ Rũ yexguma tupauca ga taxũnawa nayexmagu ga Ngechuchu, rü yéma nüxũ nadau ga ñuxãcü duũxũgũ ga idĩeruãxũ Tupanana ngĩxũ na naxãgũxũ ga norü dĩeru ga tupaucaarü dĩeruchiũwa. ² Rũ ngĩxũ nadau ta ga wüxi ga ngecü ga yutecü ga ngearü dĩeruãxcü ga tupaucaarü dĩeruchiũgu taxretachinü ga íraxüchicü ga dĩeru ngĩxũ ixücuchicü. ³ Rũ ñanagürũ ga Ngechuchu: —Aixcũma pemaã nüxũ chixu rü ñaã ngecü i yutecü i ngearü dĩeruãxcü rü guxũ i togü i dĩeru ngĩxũ ixãgũxũãrũ yexera ngĩxũ ixã. ⁴ —Erü guxũma i togü rü ngĩxũ inaxã i ngema nüxũ íyaxügücü. Natürü ngĩma ngĩxũ natauxyane ngĩxũ ixã i guxcũma i ngĩxũ ngexmaxcü i ngĩrũ õnatanü —ñanagürũ.

Ngechuchu nanaxunagü na tupauca ya taxũnegu tá napogüexũ

(Mt 24.1-2; Mr 13.1-2)

⁵ Rũ ñuxre ga norü ngúexũgũ rü nidexagü nachiga ga tupauca ga taxũne ga ñuxãcü na namexèchixũ ga naxtapüx ga nutanaxcèxgü, rü na namexèchixũ ga guxũma ga guma tupaucaarü yemaxũgü ga duũxũgü nüxna ãmarexũ. Rũ yexguma ga Ngechuchu rü ñanagürũ: ⁶ —Rũ nawa tá nangu i ngunexũgü i guxũnetama ya daa tupauca ya nüxũ pedauxũne, rü tá nagu napogüe. Rũ naxtapüxarü nutagü rü taxucütãma nügüetü naxüxüra, rü bai ya wüxi —ñanagürũ.

Cuèxruũgü i tá nüxũ idauxũ naxũpa na nagũxũ i naãne

(Mt 24.3-28; Mr 13.3-23)

⁷ Rũ yexguma ga norü ngúexũgü rü Ngechuchuna nacagü, rü ñanagürũgü: —Pa Ngúexẽruũx, ¿ñuxgu tá nixĩ i nangupetüxũ i ngẽma nüxũ quixuxũ? ¿Rü tacüwa tá nüxũ tacüèx na nangupetüxũ tá i ngẽma? —ñanagürũgü. ⁸ Rũ Ngechuchu rü ñanagürũ: —¡Pexuãẽgũ tá na taxuũma pexũ womüxẽẽxücèx! Erü muxüchixũ tá chaugu nügü nicuxgü rü tá ínangugü rü ñanagürũgü tá:

“Choma nixĩ i Cristu, rü paxa tá nagux i naãne”, ñanagürũgü tá pexũ. ¡Natürü tãütãma nüxũ peyaxõgü! ⁹ —Rũ ngèxguma tá nüxũ pexĩnũègu na nügü nadèixũ i wüxi i nachiũãne to i nachiũãnemaã, rü èxna nüxũ pexĩnũègu na wüxi i nachiũãnewatama rü duũxũgü rü norü ãẽxgacũmaã nügü nadèixũ, ¡rü tãütãma pebaixãchiãgü! Erü ngẽmaãcü tá nangupetü i noxrix. Natürü tãütãma naãneärü gux nixĩ i ngẽma. ¹⁰ —Erü wüxi i ãẽxgacüarü churaragü

rü to i ãëxgacüarü churaragümaã tá nügü nadai. Rü wüxi i nachiuãne rü to i nachiuãnemaã tá nügü nadai. ¹¹ —Rü nümaxü i nachiuãnegüwa rü poraãcü tá naxiãxãchiane, rü poraãcü tá nangux i taiya, rü tá nataxüchi i ðaaweane. Rü duüxügü tá nüxü nadaugü i daxüwa i tacü i namaã nabaixãchiexü, rü taxü i cuèxruügü. ¹² —Natürü naxüpa i guxüma i ngëma rü duüxügü tá pexü ínayauxü, rü tá pewe ningëxütanü. Rü ngutaquëxepataügüwa tá pexü nagagü na ngëma pexna nacagüxcèx, rü tá pexü napoxcue. Rü nachiuãnegüarü ãëxgacügüpëxewa tá pexü nagagü, naxcèx na chorü duüxügü pixigüxü. ¹³ —Rü ngëmaãcü tá pexü natauxcha na ãëxgacügümaã nüxü pixuxü i chauchiga. ¹⁴ —Rü ngëxguma tá ngëma pexü nagagügu, jrü tâxü i pexoegaãëgüxü naxcèx na tacümaã tá penangãxüxü na pegüétüwa pechogüxcèx! ¹⁵ —Erü choma tá pexü charüngüxëë na nüxü pecuáxcèx na tacümaã penangãxüxü i perü uwanügü. Rü nümagü rü tãütama nüxü nacuèxgü na tacümaã pexü nangãxügüxü i ngëxguma. ¹⁶ —Natürü pema rü woo penatügü, rü peegü, rü peeneëgü, rü peeyëxgü, rü petanüxügü, rü pemücügü rü tá napeechitaegü na purichíagüxütawa pexü íyaxuaxügüxü. Rü purichíagü rü tá pexü nadai i ñuxre i pemax. ¹⁷ —Rü guxü i naãnewa rü duüxügü tá pexchi naxaie, erü choxü peyaxögü rü chorü duüxügü pixigü. ¹⁸ —Natürü woo tacü pexü üpetügu rü Tupanamëxëwa tá pengëxmagü, rü nüma tá pexü ínapoxü rü bai i wüxi i peyae tá ínayarütaxu. ¹⁹ —Rü ngëxguma aixcüma peyaxögüamagu rü tama choxü ípetëxgu, rü tá penayauxgü i maxü i taguma gúxü. ²⁰ —Rü ngëxguma nüxü pedëuxgu na perü uwanügüarü churaragü Yerucharéüxü íchomaëguãchixü, rü ngëmawa tá nüxü pecuèx na paxa tá nagu napogüexü ya yima ñãne. ²¹ —Rü yíxema Yudéaanewa ngëxmagüxe rü name nixí i mëxpüneãnewa tabuxmü. Rü yíxema Yerucharéüwa ngëxmagüxe rü tanaxwëxe na paxa ítachoxüxü. Rü yíxema tümaãnewa ngëxmagüxe rü tama name na ñãnecèx tawoeguxü. ²² —Erü ngëma ngunexügügu tá ínangu i Tupanaärü poxcu. Rü ngëmaãcü tá nayanguxëë i guxüma i ngëma norü ore i ümatüxüwa nüxü yaxuxü. ²³ —Rü ngëma ngunexügügu rü tá poraãcü tüxü naguxcha ya yíxema ngexegü ya iitacharaügüxe rü yíxema imaixãcügüxe. Erü tá nangëxma i taxü i ngúxü, rü Tupana rü poraãcü tá nanapoxcue i ngëma duüxügü. ²⁴ —Rü ñuxre, rü tá norü uwanügü taramaã nanadai. Rü togü, rü tá ínayauxü na to i nachiuãnewa nagagüãxcèx. Rü ñuxüchi i ngëma norü uwanügü rü tá nagu napogüe ya yima ñãne ya Yerucharéü. Rü ngëmaãcü tá nangupetü ñuxmatáta nawa nangu na Tupana ínamuxüxü i ngëma.

Tupana Nanearü taeguchiga
(Mt 24.29-35, 42-44; Mr 13.24-37)

²⁵ —Rü ngëxguma rü tá nangox i cuèxruügü. Rü üèxcü rü tauemacü rü woramacurígü rü tá nixígachitanü i nachicawa.. Rü guxü i nachiuãnegüwa rü duüxügü rü tá nanaxixãchiãëtanü rü tá nabaixãchiãëgü namaã na poraãcü naxãügaãchixü i taxü i taxtü rü norü yuapegü. ²⁶ —Rü duüxügü rü norü muümaã tá inayayiãxë i ngëxguma nüxü nadaugu i ngëma üpetüchaüxü i ñoma i naãnewa. Erü woo guxüma i tacü i daxüwa nüxü idauxü rü tá naxiãxãchitanü rü tá nu ne nanaxímare. ²⁷ —Rü ngëxguma rü guxü i duüxügü i ñoma i naãnecüãx rü tá choxü nadaugü i ngëxguma wüxi i caixanexügu ícharüxíxgu rü núma chaxüxgu namaã i chorü pora rü üüne. ²⁸ —Rü ngëxguma inaxügügu na naxüpetüxü i ngëma pemaã nüxü chixuxü, rü name nixí na petaãëgüxü rü meã pedaunagüxü, erü paxa tá íchangu na pexü íchangüxüxëëxcèx —ñanagürü. ²⁹ Rü yemawena rü wüxi ga ore ga cuèxruüxü namaã nixu ga Ngechuchu, rü ñanagürü: —jDücèx penangugü i iguera, rü

ẽxna ngẽxũrũxũmare i to i naĩgũ! ³⁰ —Rũ ngẽxguma nũxũ pedẽuxgu na ngexwaca naxuatũxũ, rũ ngẽmawa nũxũ pecuèx na paxa tá taunecũ na yĩxũ. ³¹ —Rũ ngẽxgumarũ ta i ngẽxguma nũxũ pedẽuxgu na nangupetũxũ i ngẽma pemaã nũxũ chixuxũ, rũ ngẽmawa tá nũxũ pecuèx na yimama yĩxũ ya Tupana na ãẽxgacũ yĩxũcèx. ³² —Aixcũma pemaã nũxũ chixu rũ guxũma i ngẽma nũxũ chixuxũ rũ tá ningu naxũpa na nayuexũ i duũxũgũ i ñuxma maxẽxũ. ³³ —Daxũguxũ i naãne rũ ñoma i naãne rũ tá nagux. Natürũ chorũ ore rũ tagutáma inayarũxo. ³⁴ —¡Pexuãẽgũ na tama tacũ rũ chixexũgagu dũxwa nũxũ perũxoexũ na peyaxõgũxũ! Rũ ngẽmacèx penaxwèxe na pegũna pedaugũxũ na tama pengãxèxũ rũ ẽxna ñoma i naãneãrũ ngúchaũguama na perũxĩnũxũ. Erũ ngürũãchi ngẽmagu íperũxĩnũeyane tá pexũ íchayabaixgũ. ³⁵ —Rũ ñoma wũxi ya yũta ya ngürũãchi tacũ iyaxũnerũ tá nixĩ naxcèx i guxũma i duũxũgũ i ñoma i naãneçũãx i ngẽxguma wenaxãrũ núma chaxũxgu. ³⁶ —Rũ ngẽmacèx name nixĩ i pegũ ípemexẽẽgũ. ¡Rũ guxũguma peyumũxẽgũ na ngẽmaãcũ tama pexũ naxũpetũxũcèx i ngẽma ãucũmaxũgũ, rũ aixcũma pimexũcèx i ngẽxguma chopẽxewa pengugũgu! —ñanagürũ ga Ngechuchu. ³⁷ Rũ guxũ ga ngunexũgũgu rũ tupauca ga taxũnewa nayexma ga Ngechuchu, rũ duũxũgũxũ nangúexẽ. Rũ chũtacũ rũ guma Mèxpũne ga Oríbunecũgu ãeganegu nayapeexũ. ³⁸ Rũ guxũma ga duũxũgũ rũ pèxmamaxũchi tupauca ga taxũnewa nangugũxũ na Ngechuchuxũ naxĩnũxũcèx.

22

Ãẽxgacũgũ naxcèx nadaugũ na ñuxãcũ Ngechuchuxũ yayauxgũxũ (Mt 26.1-5, 14-16; Mr 14.1-2, 10-11; Cu 11.45-53)

¹ Rũ marũ ningaica ga Yudíugũarũ peta ga Üpetũchiga ga nagu nangõxgũãxũ ga pãũ ga ngearũ puxẽẽruũãxũ. ² Rũ ga paigũarũ ãẽxgacũgũ rũ ngúexẽẽruũgũ ga Moĩchearũ mugũwa nguxẽẽtaegũxũ rũ naxcèx nadaugũ ga ñuxãcũ duũxũgũechita Ngechuchuxũ na yamèxgũxũ, yerũ duũxũgũxũ namuũẽ. ³ Rũ yexguma ga Chataná rũ Yuda ga Icaríutegu nangaxi. Rũ nũma ga Yuda rũ yema 12 ga Ngechuchuarũ ngúexũgũ ga imugũxũtanũxũchirẽx nixĩ. ⁴ Rũ nũma ga Yuda rũ ínayadau natanũwa ga paigũarũ ãẽxgacũgũ rũ tupauca ga taxũneãrũ purichíagũarũ ãẽxgacũgũ. Rũ namaã nũxũ nixu ga ñuxãcũ na natauxchaxũ ga Ngechuchuxũ na yayauxgũxũcèx. ⁵ Rũ nũmagũ ga yema ãẽxgacũgũ rũ nataãẽgũ. Rũ díeru Yudana ngĩxũ naxuaxũgũ. ⁶ Rũ Yuda rũ ngixũ nayaxu ga yema díeru. Rũ inanaxũgũ ga naxcèx na nadauxũ ga ñuxãcũ duũxũgũechita Ngechuchuxũ na yayauxgũxũ ga ãẽxgacũgũ.

Üpetũchigaarũ õnawa nachibũ ga Cori (Mt 26.17-29; Mr 14.12-25; Cu 13.21-30; 1 Co 11.23-26)

⁷ Rũ nawa nangu ga yema petaarũ ngunexũ ga nagu nangõxgũãxũ ga pãũ ga ngearũ puxẽẽruũãxũ. Rũ yema nixĩ ga ngunexũ ga nagu carneruxacũ yamèxgũxũ naxcèx ga Üpetũchigaarũ peta. ⁸ Rũ Ngechuchu nanamu ga Pedru rũ Cuáũ, rũ ñanagürũ nũxũ: —¡Peyamexẽẽx i tórũ õna i Üpetũchigacèx! —ñanagürũ. ⁹ Rũ nũmagũ Ngechuchuxũ nangãxũgũ, rũ ñanagürũgũ: —¿Ngextá nixĩ i cunaxwèxexũ na tanamexẽẽxũ? —ñanagürũgũ. ¹⁰ Rũ Ngechuchu nanangãxũ, rũ ñanagürũ: —Ngẽxguma Yerucharéũwa pengugũgu rũ ngẽxma tá nũxũ peyangau i wũxi ya yatũ i wũxi i tũxũ i dexámaã ããcuxcũ ngĩxũ ingexũ. ¡Rũ nawe perũxĩ ñuxmatáta napatawa pengugũ! ¹¹ —¡Rũ yima ípata ya nagu yaxũcune ya yima yatũ, rũ yima íãrũ yoramaã nũxũ pixu rũ ñapegũgũ nũxũ:

“Torũ ngúexẽẽruũ rũ nũxũ nacuáxchaũ na ngẽxũrũxũ yĩxũ i ngẽma ucapu i norũ ngúexũgũmaã tá nawa nachibũxũ i Üpetũchigaarũ õnacèx”, ñapegũgũ

nüxü! ¹²—Rü tá pexü nüxü nadauxëë i wüxi i ucapu i taxü i marü mexëëxü i norü daxüchiüwa ngëxmaxü. ;Rü ngëmawa tá penamexëë i ngëma òna i Üpetüchigacëx ixixü! —ñanagürü nüxü. ¹³ Rü yéma naxí ga nümagü rü nüxü inayangaugü ga guxüma yema Ngechuchu namaã nüxü ixuxürü. Rü yéma nanamexëëgü ga òna ga Üpetüchigacëx ixixü. ¹⁴ Rü yexguma nawa nanguxgu ga ora ga na nachibüexü, rü mechawa narüto ga Ngechuchu namaã ga norü ngúexügü. ¹⁵ Rü yexguma ga Ngechuchu rü ñanagürü: —Ñuxäcü poraäcü choxü nangüchaü na pemaã chachibüxü i ñaã Üpetüchigaarü ònawa naxüpa na chayuxü. ¹⁶—Natürü pemaã nüxü chixu rü täütáma wenaxârü Üpetüchigaarü ònawa chachibü, ñuxmatáta chowa yangu i ngëma Tupana naxwëxexü —ñanagürü. ¹⁷ Rü yexguma nanayaxu ga wüxi ga pochiyu ga binumaã ääcuxü. Rü Tupanana moxë naxãxíra, rü ñuxüchi ñanagürü nüxü ga norü ngúexügü: —;Peyaxaxü ya daa binu, rü pegümaã pengau! ¹⁸ —Erü pemaã nüxü chixu rü tagutáma wena chayaxaxü ya binu ñuxmatáta nawa nangu na pecaduarü ütanücëx chayuxü na aixcüma pemaã inacuáxücëx ya Tupana —ñanagürü. ¹⁹ Rü nanayaxu ta ga pãü, rü Tupanana moxë naxcëx naxã. Rü ñuxüchi inanabücu, rü norü ngúexügüna nanaxã. Rü ñanagürü nüxü: —Ñaã pãü rü chaxune i pexcëx yuxüchiga nixí. ;Rü ñaãwena rü ñaãcü tá penaxü na choxna pecuëxãchiexücëx! —ñanagürü. ²⁰ Rü marü chibüwena rü to ga pochiyu ga binumaã ääcuxü norü ngúexügüna naxã, rü ñanagürü: —Daa binu rü Tupanaarü uneta i ngexwacaxüxüarü cuëxruü nixí. Rü chaugü ya pexcëx ibacüwa Tupana pexü nüxü nadauxëë na aixcüma yíixü i ngëma norü uneta. ²¹—Natürü ngëma yatü i chauechita äëxgacügüna choxü muxchaüxü, rü nuã mechawa tamaã narüto i ñuxmax. ²²—Rü choma i Tupana Nane na duüxüxü chiixü, rü Chaunatü ixunetaxürü tá chayü. Natürü wüxi i ngechaüxüchi tá nixí naxcëx i ngëma yatü i äëxgacügüna choxü muxü. ²³ Rü yexguma ga norü ngúexügü rü inanaxügüe ga nügüna na nacagüexü, rü ñanagürügü: —¿Texé tá tixí ya yíxema naëchita äëxgacügüna namuxë? —ñanagürügü.

Norü ngúexügü rü nügüna nacagüe na texé tá tixixü ya guxãxü rüyexeraxe i natanüwa

²⁴ Rü yexguma ga yema ngúexügü rü nügümaã niporagatanücüü nachiga na texé tá tiixü ya natanüwa guxãarü yexera ixixë. ²⁵ Natürü ga Ngechuchu rü ñanagürü nüxü: —Ñoma i naãnewa rü guxü i nachiüãnegüarü äëxgacügü, rü poraäcü norü duüxügüxü namugü. Rü ñuxüchi nügü yaxugügu rü norü duüxügüarü dauruü i mexügü nixígü. ²⁶ —;Natürü pema rü täütáma ngëxgumarüü pixígü! Rü ngëxguma texé naxwëxegu na guxãarü yexera tiixü i petanüwa, rü name nixí na tügü ítarüxíraxü i guxüma i tümamücügütanüwa. Rü texé naxwëxegu na peeru tiixü i petanüwa, rü name nixí i noxri rü guxãarü ngüxëëruü tixí. ²⁷ —Rü ñoma i naãnewa rü corigü rü mechawa narütogü na nachibüexücëx, rü norü duüxügü nixí i ngëma naxcëx òna ixuxü rü nüxü rüngüxëëxü. Natürü tatanüwa rü tama ngëmaäcü nixí, erü choma i perü cori na chiixü rü perü ngüxëëruü chixí. ²⁸ —Rü pemagü nixí ga guxügüma chauxütawa peyexmagüxü ga yexguma ngúxü chingexgu. ²⁹ —Rü ngëmacëx i choma rü äëxgacügüxü pexü chixígüxëë yema chaunatü äëxgacüxü choxü ingucuchixëëxürü. ³⁰ —Rü ngëmaäcü äëxgacü íchixüüwa rü chomaã tá pechibüe rü tá pexaxegü. Rü äëxgacüchicawa tá perütogü na norü maxücëx nüxna pecagüxü i guxüma i Yudíugü —ñanagürü.

Ngechuchu nüxü nixu na Pedru tá nügü icüxü na norü ngúexü yíixü (Mt 26.31-35; Mr 14.27-31; Cu 13.36-38)

³¹ Rū Pedruxũ ñanagürü ta ga Cori ga Ngechuchu: —Pa Pedrux, Chataná rü pexcèx ínaca na chixexũmaã poraãcü pexũ naxũxũcèx. ³² —Natürü choma rü Chaunatũxũ cuxcèx chacèxũ na taguma nüxũ curũxoxũcèx na cuyaxõxũ. Rü ngẽmacèx i cumax, Pa Pedru, rü ngẽxguma chauxcèx cutaeguxgu, rü chanaxwèxe i nüxũ curũngũxẽẽ i cumũcũgũ na nümagũ rü yaxõgũechaãxũcèx —ñanagürü. ³³ Rū ñanagürü ga Pedru: —Pa Corix, choma rü marü íchamemare na wũxigu cumaã na chapoxcuxũ rü êxna wũxigu cumaã na chayuxũ —ñanagürü. ³⁴ Natürü Ngechuchu rü ñanagürü nüxũ: —Pa Pedrux, cumaã nüxũ chixu rü ñomatama i chũtaxũgu naxũpa na otá icaxũ, rü cuma rü tomaẽxpũxcũna tá nüxũ quixu na tama choxũ cucuáxũ —ñanagürü.

Marü ningaica ga na guxchaxũgũ nüxũ üpetũxũ

³⁵ Rū yexguma ga Ngechuchu rü norü ngúexũgũna naca, rü ñanagürü: —Yexguma pexũ chimugũgu ngearü chocaãxgũxemaã rü ngearü dïeruãxgũxemaã rü ngearü chapatuãxgũxemaã, ¿rũ tacũ pexũ taxuxũ ga yexguma? —ñanagürü. Rū nümagũ nanangãxũgũ rü ñanagürügũ: —Taxuũma —ñanagürügũ. ³⁶ Rū yexguma norü ngúexũgũxũ ñanagürü ga Ngechuchu: —Natürü ñuxma rü texé ya petanüwa ya chocaãxẽ rü tanaxwèxe na ítayangexũ i tümaãrũ choca rü tümaãrũ dïeruchixũ rü ta. Rū ngẽxguma texé ngearü taraãxgu rü tanaxwèxe i namaã tataxe i tümaãrũ gáuxũchiru na tümaãrũ poxũruũ i taracèx tataxexũcèx. ³⁷ —Erü pemaã nüxũ chixu rü chauchiga nixĩ i ngẽma Tupanaãrũ ore i ümatũxũ i ñaxũ:

“Wüxi i máetaxũrũ tá nanapoxcugũ rü tá nayamèxgũ”,
ñaxũ. Erü guxũma i ngẽma chauchiga ümatũxũ i Tupanaãrũ ore i ümatũxũwa rü aixcũma ngẽmaãcü tá ningu —ñanagürü. ³⁸ Rū yexguma ga norü ngúexũgũ rü ñanagürügũ: —Pa Corix, nuã nangẽxma i taxre i tara —ñanagürügũ. Rū nüma ga Ngechuchu rü nanangãxũ rü ñanagürü: —Marü ningu i ngẽma —ñanagürü.

Ngechuchu rü Yechemaníwa nayayumũxẽ

(Mt 26.36-46; Mr 14.32-42)

³⁹ Rū yexguma ga Ngechuchu rü ínaxũxũ ga guma ñãnewa. Rū Oríbunecüarũ Mèxpũnewa naxũ, yerü woetama nacũma nixĩ ga yéma na naxũũxũxũ. Rū norü ngúexũgũ rü ta nawe narũxĩ. ⁴⁰ Rū yexguma yema nachicawa nanguxgu, rü norü ngúexũgũxũ ñanagürü: —¡Tupanana naxcèx peça na pexũ nangũxẽxũcèx na tama Chatanáãrũ ügagu chixexũgu peyixũcèx! —ñanagürü. ⁴¹ Rū yexguma ga Ngechuchu rü yéamaxũra 50 ga metruwa norü ngúexũgũna naxũ. Rū yexma nacaxãpũxũ rü nayumũxẽ. ⁴² Rū ñanagürü: —Pa Chaunatũx, ngẽxguma cuma cunaxwèxegu, ¡rũ nüxna choxũ ínanguxuchixẽẽ i ñãã ngúxũ i tá choxũ üpetũxũ! Natürü chanaxwèxe i cunaxũ i curũ ngúchaũ rü tama i choxrũ —ñanagürü. ⁴³ Rū yexguma wüxi ga daxũcũãx ga Tupanaãrũ orearũ ngerũ rü naxcèx nangõx, rü nanaporaxẽẽ. ⁴⁴ Rū poraãcü nanaxixãchiãẽ ga Ngechuchu, rü yemacèx yexeraãcü nayumũxẽ. Rū yema na naxixãchiãẽxũmaã poraãcü nanaxaiyaãchi. Rū guma norü aiyacũmaã nichuruxũne. Rū ñoma nagũ waixũmũãnewa ichuruxũrũ nixĩ ga norü aiyacũ. ⁴⁵ Rū yema ínayumũxẽxũwa rü inachi ga Ngechuchu, rü norü ngúexũgũtanüwa naxũ. Rū nüxũ inayangau ga na ínapeexũ yerü norü ngechaũmaã düxwa nayaxtae. ⁴⁶ Rū yexguma ga Ngechuchu rü ñanagürü nüxũ: —¿Tũxcũũ ípepee? ¡Íperüdagũ rü Tupanana naxcèx peça na pexũ nangũxẽxũcèx na tama Chatanáãrũ ügagu chixexũgu peyixũcèx! —ñanagürü.

Ngechuchuxũ niyauxgũ

(Mt 26.47-56; Mr 14.43-50; Cu 18.2-11)

⁴⁷ Rū yexguma íyadexayane ga Ngechuchu, rü yéma nangugü ga muxüma ga duüxügü. Rū Yuda ga Ngechuchuarü ngúexüchirëx ixixü nixi ga naxüpëxexü. Rū Ngechuchucèx nixü na nüxü nachúxãcúma nüxü namoxëxücèx. ⁴⁸ Rū Ngechuchu rü ñanagürü: —Pa Yudax, ¿tüxcüü wüxi i chúxumaã cuchauechitae? —ñanagürü. ⁴⁹ Rū yema togü ga Ngechuchuarü ngúexügü ga naxütawa yexmagüxü, rü yexguma nüxü nadaugügu ga yema ngupetüxü rü ñanagürügü nüxü: —Pa Corix, ¿cunaxwëxexü na taramaã tanadëixü? —ñanagürügü. ⁵⁰ Rū wüxi ga Ngechuchuarü ngúexü rü paigüarü äëxgacüarü duüxüxü nanapixëë, rü ínanadae ga norü tügünechinü. ⁵¹ Natürü Ngechuchu rü ñanagürü: —¡Ngexrüma na pegü namaã pedëixü! —ñanagürü. Rū yexguma ga Ngechuchu rü yema yatü ga ídaechinüxüxü ningögü, rü nanamexëë. ⁵² Rū Ngechuchu namaã nidexa ga yema äëxgacügü ga norü yauxwa yéma íxü. Rū yema äëxgacügütanüwa nayexmagü ga paigüarü äëxgacügü, rü tupauca ga taxüneärü purichíagüarü äëxgacügü, rü Yudíugüarü äëxgacügüerugü. Rū Ngechuchu rü ñanagürü nüxü: —¿Tüxcüü taragü rü naíxmenëxãgümaã chauxcèx nuã pexi ñoma wüxi i ngítëxáxü chiixürüü? ⁵³ — Rū guxü ga ngunexügu ga yexguma petanüwa chayexmagu ga tupauca ga taxünewa, rü tama choxü piyauxgü. Natürü marü nawa nangu na pexü natauxchaxü na choxü piyauxgüxü, erü ñoma nixi i ora na naporaxü i Chataná —ñanagürü.

Pedru inayacux na Ngechuchuxü nacuáxü

(Mt 26.57-58, 69-75; Mr 14.53-54, 66-72; Cu 18.12-18)

⁵⁴ Rū Ngechuchuxü niyauxgü, rü paigüarü äëxgacüpatawa nanagagü. Rū Pedru rü nawe narüxü, natürü yaxüguma nüxü nixüchigü. ⁵⁵ Rū yéma paigüarü äëxgacüpataëxtüarü ngãxüwa, rü purichíagü nanaxügü ga wüxi ga üxü. Rū nüxü ínachomaëguãchi. Rū Pedru rü ta yéma natanüwa narüto. ⁵⁶ Rū yexguma yéma üxücutüwa natoxgu ga Pedru, rü wüxi ga ngecü ga äëxgacüarü duüxü nüxü idau. Rū meãma nüxü idawenü, rü ngígürügü: —Ñaa yatü rü Ngechuchutanüxü nixi —ngígürügü. ⁵⁷ Natürü Pedru rü tama nüxü nacuáxchaü ga yema ore, rü ñanagürü: —Pa Ngecüx, choma rü tama nüxü chacuèx ya yima Ngechuchu —ñanagürü. ⁵⁸ Natürü yixcamaxüra rü to ga duüxü Pedruxü nadau, rü ñanagürü nüxü: —Cuma rü ta Ngechuchutanüxü quixi —ñanagürü. Natürü Pedru nanangãxü rü ñanagürü: —Tama nixi, Pa Yatüx. Tama natanüxü chixi —ñanagürü. ⁵⁹ Rū wüxi ga ora ngupetüguwena rü to ga duüxü rü nüxü ñanagürüama: —Aixcümáxüchi ñaa yatü rü Ngechuchutanüxü nixi, erü Gariréaanecüãx nixi —ñanagürü. ⁶⁰ Rū yexguma ga Pedru rü ñanagürü: —Pa Yatüx, tama nüxü chacuèx na tacüchigaxü quixuxü —ñanagürü. Rū yexgumatama Pedru ídëxayane rü nica ga otá. ⁶¹ Rū yexguma ga Cori ga Ngechuchu rü Pedrucèx nügü ínidau. Rū nüma ga Pedru rü nüxna nacuèxãchi ga yema ore ga Cori ga Ngechuchu namaã nüxü ixuxü ga ñaxü:

“Ñomatama i chütaxügu naxüpa na otá icaxü, rü tomaëxpüxcüna taxütáma cügü quixu na chorü duüxü quiixü”, ñaxü. ⁶² Rū yexguma ga Pedru rü ínaxüxü ga yéma. Rū poraãcüxüchi naxaxu.

Ngechuchugu nidaux- cüraüğü

(Mt 26.67-68; Mr 14.65)

⁶³ Rū yema yatügü ga Ngechuchuna daugüxü, rü nagu nidauxcüraüğü, rü nüxna nanaçuaixcagüxü. ⁶⁴ Rū nayadüxëtügü, rü nachiwegu nidagügü, rü ñanagürügü: —¡Nüxü nacuèx na texé cuxü na idagüxü! —ñanagürügü. ⁶⁵ Rū muxüma ga to ga ore ga chixexü namaã nixugüe.

Āëxgacügü ga tacügüpëxewa nanagagü ga Ngechuchu
(Mt 26.59-66; Mr 14.55-64; Cu 18.19-24)

⁶⁶ Rü yexguma yangunegu rü nangutaquëxegü ga Yudíugüarü äëxgacügüerugü, rü paigüarü äëxgacügü, rü ngüexëëruügü ga Moïchéarü mugüwa nguxëëtaegüxü. Rü ñuxüchi norü purichíagüxü namu na napëxewa Ngechuchuxü nagagüxücëx. Rü yéma Ngechuchuna nacagü, rü ñanagürügü: ⁶⁷—Toma rü nüxü tacuáxchaü rü cuma quiixü i Cristu rü éxna tama. ¡Tomaã cugü ixu! —ñanagürügü. Rü Ngechuchu nanangãxü rü ñanagürü: —Ngëxguma chi pemaã nüxü chixuxgu na choma chiixü i Cristu, rü tãu chima choxü peyaxögü. ⁶⁸—Rü ngëxguma chi pexna chacaxgu na tacücëx choxna peçaxü, rü tãu chima choxü pengãxüga, rü tãu chima choxü pingëxgü. ⁶⁹—Natürü ñuxmawena rü choma i Tupana Nane na duüxüxü chiixü rü Chaunatü ya Tupana ya poracüxütawa tá changëxma —ñanagürü. ⁷⁰ Rü yexguma guxüma ga yema äëxgacügü nüxna nacagü, rü ñanagürügü: —¿Éxna cuma quiixü i Tupana Nane? —ñanagürügü. Rü Ngechuchu nanangãxü, rü ñanagürü: —Ngü. Tupana Nane chixi ngëxgumarüü i pematama nüxü pixuxürüü —ñanagürü. ⁷¹ Rü yexguma nügümaã ñanagürügü ga yema äëxgacügü: —Ñuxma rü marü taxucëxma naxcëx tadau i to i duüxügü i nüxü ixuxü i ñaã yatüchiga. Erü yixematama marü naãxwatama nüxü taxñüë i norü ore na ñuxü ñaxü —ñanagürügü.

23

Piratupëxewa nayexma ga Ngechuchu
(Mt 27.1-2,11-14; Mr 15.1-5; Cu 18.28-38)

¹ Rü guxüma ga yema äëxgacügü rü inachigü, rü äëxgacü ga Dumacüãx ga Piratuxütawa Ngechuchuxü nagagü. ² Rü yéma Piratupëxewa inanaxügüe ga Ngechuchuxü na yaxugüexü. Rü ñanagürügü: —Ñaã yatü rü nüxü itayangaugü na cumaã nanuëxëëãxü i duüxügü. Rü tomaã nüxü nixu na tama namexü na äëxgacü ya Dumawa ngëxmacüaxü na tanaxütanüxü. Rü nügü nixu na nüma na yíxü i torü äëxgacü i Cristu —ñanagürügü. ³ Rü yexguma ga Piratu rü Ngechuchuna naca rü ñanagürü: —¿Cuma quiixü i Yudíugüarü äëxgacü? —ñanagürü. Rü Ngechuchu nanangãxü rü ñanagürü: —Ngëmaãcü, ngëma nüxü quixuxü chixi i chomax —ñanagürü. ⁴ Rü yexguma ga Piratu rü ñanagürü nüxü ga paigüarü äëxgacügü rü togü ga duüxügü: —Chauxcëx rü taxuüma i chixexü naxü i ñaã yatü —ñanagürü. ⁵ Natürü nümagü rü yexeraãcü Ngechuchuxü nixugüeama, rü ñanagürügü: —Nüma rü guxü i Yudéaanewa nanangüexëë i duüxügü na cuxchi naxaieüxücëx. Rü Gariréaanewa inanaxügü ga yemaãcü na duüxügüxü nangüexëëxü, rü ngëmaãcü nanaxü ñuxmata núma Yudéaanewa nangu —ñanagürügü.

Erodepëxewa nayexma ga Ngechuchu

⁶ Rü yexguma yemaxü naxñügu ga Piratu, rü duüxügüna naca rü ngoxi Gariréaanecüãx yixi ga Ngechuchu. ⁷ Rü yexguma Piratu nüxü ñnügu ga aixcüma Gariréaanecüãx na yíxü ga Ngechuchu rü Gariréaanearü äëxgacü ga Erodexütawa nanamu, yerü Yerucharéüwa nayexma ga Erode ga yexguma. ⁸ Rü yexguma Ngechuchuxü nadëuxgu ga Erode rü nataãëxüchi. Yerü nuxcümama poraãcü nüxü nadauxchaü, yerü üpaacü nüxü naxñü ga nachiga. Rü ínananguxëë na Ngechuchuxü nadauxchaüxü na napëxewa naxüãxü ga wüxi ga mexü ga taxü ga Tupanaärü poramaã naxüxü. ⁹ Rü muëxpüxcüna Ngechuchuna naca ga Erode. Natürü Ngechuchu rü tama nanangãxü. ¹⁰ Rü yéma nayexmagü ta ga paigüarü äëxgacügü rü

ngúexēēruūgü ga Moïchéarü mugüwa nguxēētaegüxü. Rü nümagü rü poraäcü Ngechuchuxü ínaxuaxügü. ¹¹ Rü yexguma ga Erode rü norü churaragü rü poraäcü chixri Ngechuchumaã nachopetü. Rü nagu nidauxcüraügü. Rü ñuxüchi wüxi ga äëxgacüchirugu nayacuxēēgü na yemaäcü nüxü nacugüexüçèx. Rü yemawena Piratuxüta wenaxârü Ngechuchuxü namu ga Erode. ¹² Rü woo üpaacü ga Piratu rü Erodemaã nügüchi na naxaieüxü, natürü yema ngunexügu nixi ga nügümaã nangüxmüëxü.

Piratu rü Ngechuchumaã nanaxuegu na nayuxüçèx
(Mt 27.15-26; Mr 15.6-15; Cu 18.39-19.16)

¹³ Rü yexguma ga Piratu rü nanangutaquëxexēē ga paigüarü äëxgacügü, rü togü ga Yudíugüarü äëxgacügü, rü guxüma ga duüxügü ga yéma yexmagüxü. ¹⁴ Rü Piratu ñanagürü nüxü: —Pema nuã chauxcèx penaga i ñaã yatü, rü nüxü pixu na chomaã nanuëxēēäxü i duüxügü. Natürü pepëxewa nüxna chaca i ngëmachiga rü ñuxma rü marü nüxü pedau na taxuüma nawa ichayangauxü i ngëma chixexü i naxcèx ípenaxuaxüxü. ¹⁵ —Rü Erode rü ta taxuüma nawa inayangau i ngëma chixexü, rü ngëmacèx wenaxârü taxcèx nanamuëgu. Rü dücax, taxuüma i chixexü naxü na ngëmagagu nayuxüçèx. ¹⁶ —Rü ngëmacèx chorü churaragüxü tá chamu na naçuaixgüäxüçèx, rü ñuxüchi tá chayangëx —ñanagürü. ¹⁷ Rü nüma ga Piratu rü guxüguma ga yexguma yema petawa nanguüxgu rü duüxügüxü nataäëxēēchaü namaã ga na yangéäxü ga wüxi ga yatü ga poxcuxü. ¹⁸ Natürü guxüma ga yema duüxügü rü wüxigu inanaxügüe ga aita na naxüexü. Rü ñanagürügü: —¡Napoxcu i ngëma Ngechuchu! ¡Rü Barabáxü waxi ínanguxuchixēē! —ñanagürügü. ¹⁹ Rü yema Barabá rü napoxcu yerü üpaacü Yerucharéüwa äëxgacümaã nananuëxēē ga duüxügü, rü ñuxüchi namáéta. ²⁰ Natürü ga Piratu rü wenaxârü duüxügümaã nidexa, yerü nüma rü Ngechuchuxü ningéxchaü. ²¹ Natürü ga duüxügü rü yexeraäcü aita naxüe rü ñanagürügü: —¡Curuchawa yapota! ¡Curuchawa yapota! —ñanagürügü. ²² Rü Piratu norü tomaëxpüxcüna duüxügümaã nidexa, rü ñanagürü: —Dücèx, çtacü rü chixexü ëxna naxü? Choma rü taxuüma i chixexüxü nawa ichayangau na ngëmacèx chanayuxēëxü. Rü chorü churaragüxü tá chamu na naçuaixgüäxüçèx, rü ñuxüchi tá chayangëx —ñanagürü. ²³ Natürü nümagü ga duüxügü rü yexeraäcü aita naxüeama, rü naxcèx ínacagü na curuchawa yapotaäxüçèx. Rü yema na nayexeragüamaxü ga yema duüxügü rü düxwa ga Piratu rü duüxügüga naxinü. ²⁴ Rü nüma ga Piratu rü norü churaragüxü namu na naxügüäxüçèx ga yema duüxügü naxwëxegüxü. ²⁵ Rü Barabáxü ningëx, yerü yema nixi ga duüxügü naxcèx ícagüxü. Rü yema Barabá nixi ga poxcuxü naxcèx na duüxügüxü äëxgacümaã nanuëxēëxü rü namáétaxü. Rü yexguma ga Piratu rü duüxügüna Ngechuchuxü namu na namaã naxügüäxüçèx ga yema nümagü nanaxwëxegüxü.

Ngechuchuxü curuchawa nipotagü
(Mt 27.32-44; Mr 15.21-32; Cu 19.17-27)

²⁶ Rü yema duüxügü rü Ngechuchuxü nigagü na curuchawa yanapotagüäxüçèx. Rü yexguma Ngechuchuxü yagagüyane, rü yexma namagu nüxü nangaugü ga wüxi ga yatü ga Chireneçüäx ga naãnewa ne ücü. Rü Chimáü nixi ga naega. Rü Chimáüxü niyauxgü ga duüxügü, rü naätügu ngixü naxünagügü ga curucha na Ngechuchuwe ngixü nangexüçèx. ²⁷ Rü muxüma ga duüxügü rü nawe narüxi. Rü yema duüxügütanüwa nayexmagü ga muxüma ga ngexügü ga auxexü rü aita üexü, yerü Ngechuchucèx nangechaügü. ²⁸ Natürü ga Ngechuchu rü yema ngexügüxü nadawenü,

rü ñanagürü nüxü: —Pa Ngecügüx, Pa Yerucharéüçüãx ¡tãxü i chauxcèx pexauxexü, natürü pegüçèxtama pexauxe rü pexacügüçèx! ²⁹ —Erü nawa tá nangu i ngunexügü i nagu ñagüxü tá i duüxügü:

“Tataãëgü ya yíxema ngeãxta ya taxuacüma ãxácügüxe, rü taguma tacharaügüxe, rü taguma maïxácügüxe, erü taxucatáma tümaxácügüçèx taxauxe”, ñagüxü. ³⁰—Rü ngëxguma i duüxügü rü tá mèxpüñegüxü nacèèxügü rü ñanagürügü tá:

“¡Toétügu rübuemü!” ñanagürügü tá. Rü tá ngüchitaerugüxü nacèèxügü, rü ñanagürügü tá:

“¡Toxü idüxétügü!” ñanagürügü tá. ³¹ —¿Erü ñuxácü tá namaã nachopetü i ngëma duüxügü i aixcüma chixexü ügüxü, ega ñaã chixexü chomaã naxügügu na woo taxuüma i chixexü chaxüchiréxü? —ñanagürü ga Ngechuchu. ³² Rü yéma nanagagü ta ga taxre ga máëtagüxü na Ngechuchurüü curuchawa yanapotagüãxüçèx. ³³ Rü yexguma nawa nangugügu ga yema nachica ga Duüxëeruchinèxãgu ãegaxü, rü yéma curuchawa Ngechuchuxü nipotagü. Rü yema taxre ga máëtagüxü rü ta Ngechuchurüü curuchawa nipotagü, wüxi ga norü tügüñecüwawa rü to ga norü foxwecüwawa. ³⁴ Rü yexguma Ngechuchuxü curuchawa íyapotagüyane, rü ñanagürü ga Ngechuchu: —Pa Chaunatüx, ¡nüxü nangechaü i ñaã duüxügü, erü tama nüxü nacüèxgü na tacü rü chixexü naxüexü! —ñanagürü. Rü yema churaragü rü nanade ga Ngechuchuchiru. Rü ñuxüchi wüxi ga díeru ngíxü nañanagügü na yemawa nüxü nacüèxgüxüçèx na texéarü tá yíxü ga yema Ngechuchuchiru. ³⁵ Rü duüxügü rü yéma inarüdaunü. Natürü yema Yudíugüarü ãëxgacügü rü Ngechuchuxü nacügüe, rü ñanagürügü: —Nüma rü togüxü namaxëxëë. ¡Ëcü, ñuxma rü nügütama namaxëë ega aixcüma Cristu ya Tupana nüxü unetacü yixígu! —ñanagürügü. ³⁶ Rü yema churaragü rü ta Ngechuchuxü nacügüe. Rü naxütawa naxí, rü nüxna nanaxã ga binu ga üxchiücü. ³⁷ Rü ñanagürügü nüxü: —Ega Yudíugüarü ãëxgacü ya tacü quixígu, ¡rü cügütama rüñgüxëë i ñuxmax, na ícunguxuchixüçèx! —ñanagürügü. ³⁸ Rü norü curuchatapëxewa nipota ga wüxi ga mürapewaxacü ga ãegatachinüxü ga Griégügügawa rü Dumacüãxgügawa rü Yudíugügawa ümatüxü ga ñaxü: —Daa nixí ya Yudíugüarü ãëxgacü ya Tacüxüchi —ñaxü. ³⁹ Rü wüxi ga yema máëtaxü ga naxrüü curuchawa ipotaxü rü Ngechuchumaã naguxchiga, rü ñanagürü: —Ega aixcüma Cristu quixígu, ¡rü cügütama rüñgüxëë na ícunguxuchixüçèx, rü toxü rü ta rüñgüxëë na ítangüxüçèx! —ñanagürü. ⁴⁰ Natürü ga yema to ga máëtaxü rü namücüxü ínangaxüchiamá, rü ñanagürü nüxü: —Cuma rü naxrüü na curuchawa quipotachiréxü, ¿rü ngëxguma rü ta tama Tupanaxü cumuüxü? ⁴¹ —Yixema rü name nixí na ipoxcuexü erü tagagutama nixí i ngúxü ingegüxü erü ngëma nixí i tórü natanü naxcèx ga yema chixexü ga ixügüxü. Natürü daa yatü rü taxuüma i chixexü naxü —ñanagürü. ⁴² Rü yexguma ga yema máëtaxü rü ñanagürü: —Pa Ngechuchux, ¡choxna nacüèxãchi i ngëxguma wenaxãrü núma cuxüxgu rü ãëxgacüxü ícunguxgu! —ñanagürü. ⁴³ Rü Ngechuchu nanangãxü rü ñanagürü: —Aixcüma cumaã nüxü chixu rü ñomatátama i ngunexügu chomaã cüngëxma i mexëchixü i nañewa —ñanagürü.

Nayu ga Ngechuchu

(Mt 27.45-56; Mr 15.33-41; Cu 19.28-30)

⁴⁴ Rü yexguma tocuchiwa nanguxgu rü guxüwama naxëãne ñuxmata tomaëxpüxarü orawa nangu ga yáuanecü. ⁴⁵ Rü ga üèxcü rü nixo. Rü tupauca ga taxüñeãrü tüyemachiüxü rü ngãxügu narügau. ⁴⁶ Rü yexguma ga Ngechuchu rü poraãcü aita naxü rü ñanagürü: —Pa Chaunatüx, cuxmëxwa

chanangëx i chauãê —ñanagürü. Rû yema ñaxguwena rû nayu. ⁴⁷ Rû yexguma yema churaragüarü ãëxgacü ga Dumacüãx nüxü dëuxgu ga yema ngupetüxü, rû Tupanaxü nicuëxüü, rû ñanagürü: —Aixcuma ñaã yatü rû taxuüma i chixexü naxü —ñanagürü. ⁴⁸ Rû guxüma ga yema togü ga duüxügü ga yéma yexmagüxü rû nüxü daugüxü ga yema ngupetüxü, rû poraãcü nangechaügüãcüma napatacëx nawoegu. ⁴⁹ Natürü guxüma ga yema duüxügü ga aixcuma Ngechuchuxü cuëxgüxü rû yaxüwa- tama nüxü narüdaunü ga yema ngupetüxü. Rû yema duüxügütanüwa ta iyexmagü ga yema ngecügü ga Ngechuchuwe rüxücü ga yexguma Gariréaanewa ne naxüxgu.

Ngechuchu rü naxmaügu nayanaxüchigü
(Mt 27.57-61; Mr 15.42-47; Cu 19.38-42)

⁵⁰ Rû nayexma ga wüxi ga yatü ga Yudéaanewa yexmane ga ñãne ga Arimatéacüãx, rû Yúche nixi ga naega. Rû nüma rû Yudügarü ãëxgacügütanüwa naxü, natürü namecüma rû meã namaxü. ⁵¹ Rû nüma rû poraãcü ínananguxëê na ínanguxü ga Tupana na yéma ãëxgacü yixüçëx. Rû yemacëx tama norü me nixi ga yema Ngechuchumaã naxügüxü ga yema togü ga namücügü ga ãëxgacügü. ⁵² Rû nüma ga Yúche rû Piratuxütawa naxü, rû Ngechuchuxü necëx ínayaca. ⁵³ Rû curuchawa nayayaxu ga Ngechuchuxüne, rû wüxi ga düxruümaã nananuque. Rû wüxi ga naxmaü ga nutaarü mëxpüxüwa yacaxmaügüxügu nayanaxücuchi. Rû yema naxmaü rû nayexwacaxü, rû taguma texëxü nagu yaxüchigüxü nixi. ⁵⁴ Rû yema nixi ga ngunexü ga nagu Yudügarü nügü imexëëgüxü naxcëx ga ngüxchigaarü ngunexü. Rû marü ningóonechaü ga yema ngüxchigaarü ngunexü. ⁵⁵ Rû yema ngecügü ga Ngechuchumaã Gariréaanewa ne ícü, rû Ngechuchuxü íyaxüchigüxüwa íyadaugü. Rû nüxü idaugü ga ñuxãcü na íyaxüchigüãxü ga naxüne. ⁵⁶ Rû yexguma ngípatawa nangugügu, rû inamexëëgü ga pumara rû chixü. Rû irüngügü ga ngüxchigaarü ngunexügu, yerü yema nixi ga Tupanaärü mu.

24

Yuwa ínarüda ga Ngechuchu
(Mt 28.1-10; Mr 16.1-8; Cu 20.1-10)

¹ Rû pëxmamaxüchi ga yüxüarü ngunexügu, rû yema ngecügü rû wenaxärü naxmaüwa íyadaugü. Rû yéma inangegü ga yema pumara ga yamexëëgüxü. Rû naígü ga ngecügü rû ta ngixü íyaxümücügü. ² Rû yexguma yéma nangugügu, rû nüxü iiyangaugü ga marü na ínaxügachixü ga guma nuta ga naxmaüärü ngüxtaüxü. ³ Rû yexma nagu ichocu, natürü taxuüma idaugü ga naxüne ga Cori ga Ngechuchu. ⁴ Rû yema ngecügü rû poraãcü ibaixãchiãëgü, rû tama nüxü icuëxgüéga ga tacü na naxügüxü. Rû ngürüãchi nüxü idaugü ga taxre ga yatügü ga ngixütagu chigüxü ga poraãcü iyaurachirutanüçüxü. ⁵ Rû yema ngecügü rû iyarümaxãchierügü, yerü poraãcü imuë. Rû yemacëx ga yema yatügü rû ñanagürügü ngixü: —¿Tüxcüü nuxã yuetamaügu naxcëx peyadau ya yima maxücü? ⁶ —Nataxuma i nuã ya Ngechuchu, erü marü wena namaxü. ¡Rû nüxna pecuëxãchie ga yema ore ga pemaã nüxü yaxuxü ga yexguma Gariréaanewa nayexmagu! ⁷ —Yerü pemaã nüxü nixu ga ñuxãcü pecaduãxgüxü tá na yayauxgüxü, rû curuchawa na yapotagüãxü, rû ñuxãcü tomaëxpüx i ngunexügu tá wena na namaxüxü —ñanagürügü ga yema yatügü. ⁸ Rû yexguma ga yema ngecügü rû nüxna icuëxãchie ga yema Ngechuchuarü ore. ⁹ Rû nüxna iwoegu ga yema naxmaü. Rû yema 11 ga Ngechuchuarü ngüexügümaã nüxü iyarüxugüe ga guxüma ga yema

nüxü nadaugüxü. Rü guxüma ga togü ga yaxögüxü ga yéma yexmagüxümaã rü ta nüxü iyarüxugüe. ¹⁰ Rü María ga Magadácüãx, rü Cuána, rü María ga Chaütiágu naẽ, rü naĩgü ga ngecügü iyixĩ ga wüxigu yéma Ngechucharü ngúexügüütawa nangegücü ga yema ore. ¹¹ Natürü yema ngúexügücèx rü ìnucamare nixĩ ga yema ore, rü tama ngĩxü nayaxögüchaü. ¹² Natürü ga Pedru rü inaãaãchi, rü ìnayadau ga naxmaüwa. Rü yexguma nagu yadaucuchigu ga naxmaü, rü nüxü nadau ga düxruügü ga wüxicüwagu na nanuxü. Rü poraãcü nabaixãchiãẽ namaã ga yema ngupetüxü, rü ìaixãchiãẽãcüma napatacèx nataegu.

Emaüärü namawa nangox ga Ngechuchu
(Mr 16.12-13)

¹³ Rü yema ngunexügutama rü taxre ga yema Ngechucharü ngúexügü rü wüxi ga ìãne ga Emaüwa naxĩ. Rü norü yaxü ga guma ìãne rü 11 ga kilómetru nixĩ nüxna ga Yerucharéü. ¹⁴ Rü yexguma namagu naxĩyane, rü nachigagu nidexatanü ga guxüma ga yema ngupetüxü. ¹⁵ Rü yexguma yemachigagu iyadexatanüyane, rü nümatama ga Ngechuchu rü ngürüãchi naxcèx yéma nixü, rü natanügu nixüchigü. ¹⁶ Natürü yema ngúexügü rü woo Ngechuchuxü nadaugü, rü tama nüxü nacuèxgüéga na Ngechuchu yĩxü, yerü Tupana rü nanatoõégü na tama Ngechuchuxü nacuèxgüxücèx. ¹⁷ Rü yexguma ga Ngechuchu, rü yema taxre ga ngúexügüna naca, rü ñanagürü: —¿Tacüchiga nixĩ i pidexatanüxü na nuxã namagu na pexixü? ¿Rü tacücèx nixĩ i pengechaüëxü? —ñanagürü. ¹⁸ Rü wüxi ga yema ngúexü ga Creopágu ãegaxü nanangãxü, rü ñanagürü: —Guxüma i duüxügü nixĩ i nüxü cuáxü ga yema yexwaca ngupetüxü ga Yerucharéüwa. Rü cuma na yexma cunaxüãnechiréxü rü maneca cuxicatama nixĩ i tama nüxü cucuáxü ga yema ngupetüxü —ñanagürü. ¹⁹ Rü yexguma ga nüma ga Ngechuchu rü ñanagürü: —¿Tacü nangupetü ga Yerucharéüwa? —ñanagürü. Rü nanangãxügü ga yema ngúexügü, rü ñanagürügü: —Poraãcü chixexü nüxü naxüpetü ga Ngechuchu ga Nacharétucüãx. Nüma ga Ngechuchu rü Tupanaärü orearü uruü ga mecü nixĩ. Rü Tupanapëxewa rü duüxügüpëxewa namecüma rü nanaxü ga taxü ga cuèxruügü ga Tupanaärü poramaã naxüxü, rü meã duüxügüxü nangúexë. ²⁰ —Natürü ga paigüarü ãëxgacügü rü tórü ãëxgacügü rü nayayauxgü. Rü Dumacüãx ga ãëxgacügüna nanamugü na curuchawa yapotagüãcüma nayuxëëgüãxücèx. Rü yemaãcü nayamèxgü. ²¹ —Toma nüxü tacuèxgu rü nüma tá nixĩ i tomaã naporaxü na ìnanguxuchixücèx i tachiüãne nüxna i Dumacüãxärü ãëxgacü. Rü ñuxma rü marü tomaëxpüx i ngunexü nawena nixĩ ga na yamèxgüãxü. ²²⁻²³ —Natürü tama ngëxĩcatama nixĩ, yerü ñuxre ga ngexügü ga totanüxü rü toxü ìnayabaixgügü. Yerü yema ngexügü rü pèxmamaxüchi ìnayadaugü ga naxmaüwa, rü tama nüxü ìnyangaugü ga naxüne ga guma Ngechuchu. Rü yemacèx ga yema ngexügü rü toxcèx nawoegu, rü tomaã nüxü nayarüxugüe ga nüxü na nadaugüxü ga Tupanaärü orearü ngeruügü ga daxücüãx. Rü yema daxücüãxgü rü namaã nüxü nixugügü ga Ngechuchu rü na namaxüxü —ñanagürügü. ²⁴ Rü yexguma yema ngexügüarü orexü taxĩnüëgu, rü ñuxre ga tomücügü rü naxmaüwa ìnayadaugü. Rü yema ngexügü nüxü ixugüxürü nüxü ìnyangaugü ga naxmaü. Natürü tama Ngechuchuxü nadaugü —ñanagürügü. ²⁵ Rü yexguma ga Ngechuchu rü ñanagürü nüxü: —¿Tüxcüü tama peãeta ipexü i pemax? ¿Rü ñuxgura tá ta ipeyaxögüxü i nuxcümaügüxü ga Tupanaärü orearü uruügüarü ore? ²⁶ ¿Rü tama ëxna nüxü pecuèx ga yema ngúxü tá na yangexü ga Cristu naxüpa na daxügüxü i naãnewa naxüxü, na ngema ãëxgacü yĩxücèx? —ñanagürü. ²⁷ Rü yexguma ìnanaxügü ga namaã na nangoxëëãxü ga guxüma ga Tupanaärü

ore ga nachiga ümatüxü. Rü yema Tupanaärü ore ga Moïché ümatüxümaã inanaxüğü. Rü ñuxüchi namaã nüxü nixu ga guxüma ga yema Tupanaärü ore ga nuxcümaüğüxü ga Tupanaärü orearü uruüğü ümatüğüxü. ²⁸ Rü yexguma yema ñane ga Emaüwa nangugügu, rü Ngechuchu rü nümaxü toxnamana nüğü naxüëñeta. ²⁹ Natürü ga yema ngüexüğü rü nüxü nacëexüğü na yexma naxäüxcëx, rü ñanagürüğü: —¡Nuxma toxütagu nape, erü marü nayáuane, rü paxa tá nachüta! —ñanagürüğü. Rü yexguma ga Ngechuchu rü nawe yexma narüxäüx. ³⁰ Rü yexguma chibücëx wüxiwa mechawa natogügu, rü Ngechuchu nanayaxu ga päü. Rü Tupanana moxë naxcëx naxä. Rü ñuxüchi inanabücu, rü wüxichigüna nanaxä. ³¹ Rü yexgumatama naäëxü nicuëxächitanü. Rü nüxü nacuëxgü na guma yüxü ga Ngechuchu. Natürü yexgumatama ngürüächi inayarütaxu ga nümax. ³² Rü yema taxre ga ngüexüğü rü nüğümaã ñanagürüğü: —¿Tama ëxna ga itaãëgüxü ga törü maxünewa ga yexguma namawa tamaã yadeaxgu rü tamaã nangoxëëägu ga Tupanaärü ore i ümatüxü? —ñanagürüğü. ³³ Rü yexgumatama ga yema taxre ga ngüexüğü rü inaxiächi ga Yerucharéücëx na nawoeguxü. Rü yexma nüxü nayangau ga na ínangutaquëxegüxü ga yema 11 ga Ngechucharü ngüexüğü rü togü ga natanüxüğü. ³⁴ Rü yema duüxüğü ga íngutaquëxegüxü rü ñanagürüğü nüxü: —Aixcüma nixí i marü wena namaxüxü ya Cori ya Ngechuchu. Rü Chimáü ga Pedru rü marü nüxü nadau —ñanagürüğü. ³⁵ Rü yexguma ga yema taxre ga ngüexüğü rü ta nüxü nixugüğü ga yema nüxü ngupetüxü ga namawa, rü ñuxäcü nüxü na yacuëxächitanüxü ga guma na yüxü ga Ngechuchu ga yexguma päü inabücuüxgu.

*Ngechuchu rü norü ngüexügücëx nangox
(Mt 28.16-20; Mr 16.14-18; Cu 20.19-23)*

³⁶ Rü yexguma yemaäcü iyadexagüyane, rü ngürüächi norü ngäxütanügu nachi ga Ngechuchu. Rü nüxü narümoxë, rü ñanagürü: —Nuxmaë Pa Chorü Duüxüğüx —ñanagürü. ³⁷ Natürü nümagü rü nabaixächiäëgü, rü poraäcü namuñë, yerü nagu naxñnüëgu rü wüxi ga naxchixixümare nadaugü. ³⁸ Natürü ga Ngechuchu rü ñanagürü nüxü: —¿Tüxcüü pebaixächiäëgü rü tama peyaxögü na choma chüxü? ³⁹ —¡Düxcëx, nüxü pedëux ya choxmëxgü rü chaucutüğü! Rü chomatama chixí. ¡Rü choxü pingögü rü meã choxü perüdaunü! Erü wüxi i naxchixi rü tama choxü pedauxürüü naxämachi rü naxäxchinëxä —ñanagürü. ⁴⁰ Rü yema ñaxguwena, rü nüxü nanawëx ga naxmëx rü nacutü. ⁴¹ Natürü ga yema duüxüğü rü yexguma rü ta tama nüxü nayaxögü, yerü nabaixächiäëgü rü nataäëgü. Rü yemacëx ga Ngechuchu rü nüxna naca rü ñanagürü nüxü: —¿Pexü nangëxmaxü i ñna i nuã? —ñanagürü. ⁴² Rü yexguma nüxna nanaxägü ga wüxi ga choxni ga iguxüchipëxe rü wüxiweü ga berure. ⁴³ Rü nüma ga Ngechuchu rü nanayaxu. Rü yema duüxügüpëxewa nanangöx. ⁴⁴ Rü ñuxüchi ñanagürü nüxü: —Rü yema choxü ngupetüxü rü yema nixí ga pemaã nüxü chixuxü ga yexguma tauta chayuxgu rü petanüwa chayexmagu. Yerü yexguma rü pemaã nüxü chixu rü ñacharüğü:

“Rü tá ningu i guxüma i Tupanaärü ore i chauchiga ümatüxü i Wiyaegüarü poperawa, rü Moïché ümatüxü i mugüwa, rü ore i nuxcümaüğüxü ga Tupanaärü orearü uruüğü ümatüxüwa”, ñacharügüchirëx pexü. ⁴⁵ Rü yemaäcü namaã nanangoxëë ga Tupanaärü ore ga ümatüxü. ⁴⁶ Rü ñanagürü nüxü: —Tupanaärü ore i ümatüxüwa rü nüxü nixu rü choma i Cristu rü tá chayü, rü tomaëxpüx i ngunexügu rü tá wena chamaxü. ⁴⁷ —Rü yematama ore i ümatüxüwa nüxü nixu rü tá chauégagu tá nixí i nüxü yaxugüxü i ore i mexü. Rü Yerucharéüwa tá inaxüğü i ngëma ñuxmatáta guxü i nañnewa nangu na ngëmaäcü duüxüğü nüxü rüxoëxcëx i nacüma i chixexü na Tupana nüxü

nüxũ ngechaũxücèx i norü pecadugü. ⁴⁸—Rü ñuxma rü pematama nixĩ i chorü orearü uruũgü, rü tá duũxũgümaã nüxũ pixu ga yema chauxũtawana nüxũ pedaugũxũ rü nüxũ pexĩnüèxũ. ⁴⁹—Rü dücax, choma rü pexcèx tá núma chanamu i Naãe i Üünexũ ga pexcèx nüxũ naxunetaxũ ya Chaunatü. Natürü chanaxwèxe i númatátama daa ããne ya Yerucharéũwa pengẽxmagü, ñuxmatáta penayauxgü i ngẽma Tupanaãe i Üünexũ i daxũwa ne üxũ i tá pexũ poraexẽèxũ —ñanagürü.

Ngechuchu rü daxũguxũ ga naãnewa naxũ
(Mr 16.19-20)

⁵⁰ Rü yexguma ga Ngechuchu rü Yerucharéũärü toxnamana norü ngúexũgũxũ nagagü, ñuxmata Betániãärü ngaicamana nangugü. Rü yéma norü ngúexũgüétü nawémèx, rü Tupanana naxcèx naca na nüxũ nangũxẽèxücèx. ⁵¹ Rü yexguma yema ngúexũgücèx nayumüxẽguwena rü nüxna nixũgachi. Rü Tupana daxũguxũ ga naãnewa nanaga. ⁵² Rü nümagü ga norü ngúexũgü rü Ngechuchuxũ nicuèxüũgü. Rü ñuxũchi taãècũma Yerucharéũcèx nawoegu. ⁵³ Rü guxũguma tupauca ga taxũnewa naxĩxũ, rü yéma Tupanaxũ nicuèxüũgü. Rü ngẽmaãcü yiĩ.

ORE I MEXŨ GA CUÁŨ ŨMATŨXŨ

Tupana Nane rŭ duŭxŭãcŭ nangox

¹ Naxŭpa ga guxŭma, rŭ marŭ nayexma ga Tupana Nane. Rŭ Tupanamaã nayexma rŭ woetama Tupana nixŭ ga nŭmax. Nŭma rŭ Tupanaãrŭ Ore nixŭ i naega erŭ tamaã nŭxŭ nixu i Tupanachiga. ² Rŭ naxŭpa ga guxŭma rŭ nŭma ga Tupana Nane rŭ naxŭtawatama nayexma. ³ Rŭ guma Nanexŭ nixŭ ga namuxŭ ga Tupana na naxŭãxŭcèx ga guxŭma. Rŭ nataxuma i tacŭ i ñuxma ngèxmaxŭ i tama nŭma naxŭxŭ. ⁴ Rŭ Nanewa nixŭ i nangexmaxŭ i maxŭ. Rŭ ngema maxŭ rŭ guxŭ i duŭxŭgŭarŭ ngóonexêeruŭ nixŭ. ⁵ Rŭ yima Nane rŭ woo chixexŭ íporaxŭwa rŭ duŭxŭgŭxŭ nŭxŭ nacuèxêe i Tupanachiga. Rŭ ngema chixexŭ rŭ taxucŭ-rŭwama ngema mexŭxŭ narŭyexera. ⁶⁻⁷ Rŭ nayexma ga wŭxi ga yatŭ ga Cuáŭ ga baiŭxêeruŭgu ãegacŭ. Rŭ guma nixŭ ga Tupana nŭma namucŭ na nŭxŭ yaxuxŭcèx ga nachiga ga guma ngóonexêeruŭ na yemaãcŭ guxãma nŭxŭ yaxŭgŭxŭcèx. ⁸ Rŭ nŭma ga Cuáŭ rŭ tama Tupana Nane ya duŭxŭgŭarŭ ngóonexêeruŭ nixŭ. Natŭrŭ nŭma nixŭ ga Tupana nŭma namuxŭ na nŭxŭ yaxuxŭcèx ga nachiga ga guma ngóonexêeruŭ. ⁹ Rŭ ñoma ga naãnewa nangu ya yima aixcŭma Tupana Nane ixŭcŭ i guxŭma i duŭxŭgŭxŭ ngóonetanŭxêecŭ. ¹⁰ Rŭ nŭma ga guma Nane ga Tupanaãrŭ Ore ixŭcŭ rŭ ñoma ga naãnewa nayexma. Rŭ woo nagagu nixŭ ga naxŭãxŭ ga guxŭma ga ñoma ga naãne, natŭrŭ ñoma ga naãne-cŭãx ga duŭxŭgŭ rŭ tama nŭxŭ nacuèxgŭ na texe yŭxŭ. ¹¹ Nuã norŭ naãnewatama nangu, natŭrŭ norŭ duŭxŭgŭ ga Yudŭgŭ rŭ tama nanayauxgŭ. ¹² Natŭrŭ guxema nayauxgŭxe rŭ nŭxŭ yaxŭgŭxe rŭ tŭxŭ nanatauxchaxêe na Tupanaxãcŭgŭ tixŭgŭxŭ. ¹³ Rŭ ñuxma rŭ Tupanaxãcŭgŭ tixŭgŭ ga guxema yaxŭgŭxe. Natŭrŭ tama noxri tabuexŭgagu nixŭ i ngema rŭ tama tŭmanatŭgŭarŭ ngŭchaŭgagu nixŭ. Natŭrŭ i ñuxma rŭ Tupanaxãcŭgŭ tixŭgŭ ga guxema yaxŭgŭxe yerŭ nŭmatama ga Tupana rŭ naxãcŭgŭxŭ tŭxŭ nixŭgŭxêe. ¹⁴ Rŭ nŭma ya yima Nane ya Tupanaãrŭ ore ixŭcŭ rŭ duŭxŭãcŭ nangox. Rŭ totanŭwa nayexma rŭ poraãcŭ toxŭ nangechaŭ rŭ aixcŭma nixŭ ga norŭ ore. Rŭ toma nŭxŭ tadaugŭ ga ñuxãcŭ na naxŭnèxŭ. Rŭ Nanatŭxŭtawa nanayaxu ga yema ũne yerŭ nŭgŭmaã nŭxŭ nawŭxicèx ga nŭma. ¹⁵ Rŭ gumachigaxŭ nixŭ ga yaxuxŭ ga Cuáŭ ga yexguma ñaxgu: —Daa nixŭ ga guma pemaã nŭxŭ chixuchigacŭ ga yexguma ñachaxgu:

“Rŭ yima choweama ne ũcŭ rŭ choxŭ rŭyexeracŭ nixŭ, yerŭ woetama marŭ nayexma ga tauta chabuxgu ga chomax”, ñanagŭrŭ ga Cuáŭ. ¹⁶ Rŭ yima Tupana Nane rŭ namecŭmaxŭchi rŭ naxmèxwa nangèxma i guxŭma. Rŭ naxŭtawa nixŭ i nayauxgŭxŭ i guxŭma i ngŭxêegŭ. ¹⁷ Rŭ Moŭchéxŭ nixŭ ga namuxŭ ga Tupana na tŭxŭ nangŭexêexŭcèx ga yema norŭ mugŭ. Natŭrŭ Ngechuchu ya Cristuxŭ nixŭ ga namuxŭ na tŭxŭ nangŭexêexŭcèx na yigŭ ingechaŭgŭxŭ rŭ nagu imaxèxŭcèx i ore i aixcŭma ixŭxŭ. ¹⁸ Taguma texé ñuxgu nŭxŭ tatau ga Tupana. Natŭrŭ Nane ya nŭgŭmaã nŭxŭ wŭxicacŭ nixŭ ya tŭxŭ nŭxŭ cuèxêecŭ. Rŭ yima Nane rŭ Tupanaxŭchi nixŭ, rŭ Nanatŭmaã wŭxiwa nangèxmagŭ.

Cuáŭ ga baiŭxêeruŭ rŭ nŭxŭ nixu ga Ngechuchu ya Cristuchiga (Mt 3.11-12; Mr 1.7-8; Lc 3.15-17)

¹⁹ Rŭ yema Yudŭgŭarŭ ãexgacŭgŭ ga Yerucharéŭcŭãx rŭ Cuáŭ ga baiŭxêeruŭxŭtawa nanamugŭ ga paigŭ rŭ Lebítanŭxŭgŭ na nŭxna yacagŭexŭcèx na texe yŭxŭ. ²⁰ Rŭ nŭma ga Cuáŭ rŭ meãma nŭgŭ nixu, rŭ ñanagŭrŭ: —Tama nixŭ i Cristu chiŭxŭ i chomax —ñanagŭrŭ. ²¹ Rŭ

wenaxãrũ nüxna nacagũ rũ ñanagürũgũ: —¿Texé êxna quixĩ? ¿Êxna cuma ga nuxcũmaũcũ ga Tupanaãrũ orearũ uruũ ga Ería quiĩxũ? —ñanagürũgũ. Rũ Cuáũ nanangãxũ rũ ñanagürũ: —Tama Ería chixĩ —ñanagürũ. Rũ nümagũ rũ wenaxãrũ nüxna nacagũe rũ ñanagürũgũ: —¿Êxna cuma quiĩxũ ya yima orearũ uruũ ga Moĩché nüxũ ixucũ ga ínguxchaũcũ? —ñanagürũgũ. Rũ Cuáũ nanangãxũ rũ ñanagürũ: —Tama yima chixĩ —ñanagürũ. ²² Rũ yexguma ñanagürũgũama: —¿Êxna texé quiĩxũ? Erũ tanaxwèxe i ngẽma núma toxũ mugũxũxũtawa tanange i curũ ngãxũga. ¿Rũ ñuxũ ñacuxũ i ñuxma na texé quiĩxũ? —ñanagürũgũ. ²³ Rũ Cuáũ nanangãxũ rũ ñanagürũ nüxũ: —Choma nixĩ i ngẽma duũxũ i dauxchitawa i ngextá taxúema íxãpataxũwa tagaãcũ ñachaxũ:

“¡Rũ nüxũ perũxoe i pecũma i chixexũ rũ ipeyanawẽxãchixẽẽx i perũ maxũ naxcèx ya Cori ya Tupana!” ñachaxũ, guma nuxcũmaũcũ ga orearũ uruũ ga Ichaxía nüxũ ixuxũrũũ —ñanagürũ. ²⁴⁻²⁵ Rũ yexguma ga yema paigũ rũ Parichéugũ yéma mugũxũ ga Cuáũmaã na yanadexagũxũcèx rũ wenaxãrũ nüxna nacagũe, rũ ñanagürũgũ: —Rũ ngẽxguma tama Cristu quixĩgu, rũ tama Ería quixĩgu, rũ tama yima orearũ uruũ ya ínguxchaũcũ quixĩgu, ¿rũ tũxcũũ i duũxũgũxũ ícubaiũxẽẽxũ i ñuxmax? —ñanagürũgũ nüxũ. ²⁶⁻²⁷ Rũ Cuáũ nanangãxũ rũ ñanagürũ: —Choma rũ dexáwamare íchanabaiũxẽẽ i duũxũgũ. Natürũ petanũwa nangẽxma ya yima tama nüxũ pecuácũ ya choweama ne ũcũ. Rũ choma rũ napẽxewa rũ taxuwama chame, rũ bai i norũ chapatucunũgũarũ wẽgũwa chame —ñanagürũ ga Cuáũ. ²⁸ Rũ yema nachica ga Betániãgu ãegaxũwa nixĩ ga Cuáũ ga nüxũ yaxuxũ ga yema ore. Rũ natũ ga Yudáũãrũ tocutũwa nixĩ ga yema nachica ga ngextá Cuáũ duũxũgũxũ íbaiũxẽẽxũwa.

Ngechuchu nixĩ ga Tupana núma namucũ na duũxũgũarũ pecaducèx nayuxũcèx

²⁹ Rũ moxũãcũ ga Cuáũ rũ Ngechuchuxũ nadau ga naxcèx na yaxũxũ. Rũ ñanagürũ ga Cuáũ: —¡Rũ dũcax! Daa nixĩ ya yima Tupana núma namucũ na nayuxũcèx na ñoma i naãnecũãx i duũxũgũarũ pecaduxũ iyanaxoxẽẽxũcèx. ³⁰ —Rũ choma rũ daa Ngechuchuchigaxũ nixĩ ga chixuxũ ga yexguma ñachagu:

“Rũ choweama ne naxũ ya wũxi ya chorũ yexeracũ, yerũ nüma rũ woetama nayexma ga tauta chabuxgu ga chomax”, ñachagu. ³¹ —Rũ chomatama ga noxri rũ tama nüxũ chacuèx ga texe na yĩxũ ga nümax. Natürũ núma chaxũ na dexáwamare duũxũgũxũ íchibaiũxẽẽtanũxũcèx na tatanũxũ i Yudíugũ nüxũ cuèxgũxũcèx na texé yĩxũ —ñanagürũ. ³² Rũ ñanagürũ ta ga Cuáũ: —Rũ chomatama nüxũ chadau ga Tupanaãe ga Üünexũ ga yexguma wũxi ga muxtucurũũ daxũwa ínaxexeegu rũ Ngechuchuxũnegu yanawèxgux. ³³ —Choma rũ noxri tama nüxũ chacuèx ga texe na yĩxũ ga nümax. Natürũ ga Tupana ga choxũ mucũ na dexáwamare duũxũgũxũ íchabaiũxẽẽxũcèx, rũ ñanagürũ choxũ:

“Rũ yima nüxũ cudaucũ ya chauãe i Üünexũ naetũgu íruxexeecũ, rũ yima tá nixĩ ya chauãe i Üünexũ duũxũgũna nguxẽẽcũ”, ñanagürũ choxũ. ³⁴ —Choma rũ marũ yima Ngechuchuxũ chadau rũ pemaã nüxũ chixu na nüma rũ aixcũma Tupana Nane yĩxũ —ñanagürũ.

Nüxĩraũxũ ga norũ ngúexũgũ ga Ngechuchu

³⁵ Moxũãcũ rũ wenaxãrũ Cuáũmaã yema nachicawa tayexmagũ ga toma ga taxre ga norũ ngúexũgũ. ³⁶ Rũ yexguma Ngechuchuxũ nadèuxgu ga yéma na naxüpetũxũ, rũ Cuáũ rũ ñanagürũ toxũ: —¡Dũcèx! Yima nixĩ

ya Tupana núma namucü na pecaducèx nayuxüçèx —ñanagürü. ³⁷ Rü toma ga CuáŨärü ngúexüğü rü nüxü taxĩnüë ga yexguma yema ñaxgu. Rü Ngechuchuwe tarüxĩ. ³⁸ Rü nügü ínıdau ga Ngechuchu, rü toxü nadau ga nawe na tarüxĩxü. Rü toxna naca rü ñanagürü toxü: —¿Tacüçèx pedau? —ñanagürü. Rü tomagü rü ñatarügügü: —Pa Ngúexëeruüx, ¿ngexta nixĩ i cupeçü? —ñatarügügü. ³⁹ Rü Ngechuchu toxü nangãxü, rü ñanagürü toxü: —¡Nuã chowe perüxĩ rü ípeyadèux! —ñanagürü. Rü nawe tarüxĩ, rü nüxü tadaugü ga na ngexta napexü. Rü yexguma yéma tangugügu, rü marü ägümücüarü orawa nangu ga na nayáuanexü. Rü yexma naxütagu tarücho rü ñuxmata nachüta. ⁴⁰ Rü choma chixĩ ga noxri CuáŨ ga baiüxëeruüxü chaxĩnúxü ga yixcama Ngechuchuwe charüxüxü. Rü chomücü rü Aüdré nixĩ. Rü núma rü Pedru ga Chimáüëneë nixĩ. ⁴¹ Rü yexgumatama ga Aüdré, rü naëneë ga Chimáüçèx nayadau. Rü ñanagürü nüxü: —Rü marü nüxü itayangau ya yima Cristu ga nuxcüma Tupana nüxü unetacü —ñanagürü. ⁴² Rü yemawena, rü Ngechuchu íyexmaxüwa Chimáüxü naga ga Aüdré. Rü yexguma Ngechuchu Chimáüxü dèuxgu, rü ñanagürü nüxü: —Cuma nixĩ i Chimáü i CuáŨ nane quiüxü. Natürü i ñuxmawena rü Nuta tá nixĩ i cuéga —ñanagürü. Rü ngëma naega rü Pedru ñaxüchiga nixĩ.

Ngechuchu rü naxcèx naca ga Piripi rü Natanae

⁴³ Rü moxüäcü ga Ngechuchu rü nügü namexëë na Gariréaanewa naxüxüçèx. Rü Piripixü inayangau rü ñanagürü nüxü: —¡Chowe rüxü! —ñanagürü. ⁴⁴ Rü núma ga Piripi rü ñane ga Bechaídacüãx nixĩ. Rü yémacüãx ta nixĩ ga Aüdré rü Pedru. ⁴⁵ Rü Piripi rü Natanaeçèx nayadau, rü ñanagürü nüxü: —Marü nüxü itayangau ya yima Cristu ga Moïché nachiga naxümatüçü ga mugüarü poperawa, rü nuxcümaügüxü ga Tupanaärü orearü uruüğü ta nachiga naxümatügücü. Yima nixĩ ya Yúche nane ya Ngechuchu ya Nacharétucüãx —ñanagürü. ⁴⁶ Rü ñanagürü ga Natanae: —¿Ñuxäcü i tacü rü mexü i Nacharétuwa ne naxüxü? —ñanagürü. Rü Piripi nanangãxü, rü ñanagürü nüxü: —¡Düçèx, ngĩxã rü ítayadau! —ñanagürü. ⁴⁷ Rü yexguma Ngechuchu Natanaexü dèuxgu ga naxcèx na yaxüxü, rü ñanagürü: —¡Düçèx! Yéa ne naxü i wüxi i yatü i aixcüma Yudíu ixixü i aixcüma ngearü chixexüãxü —ñanagürü. ⁴⁸ Rü yexguma ga Natanae rü Ngechuchuna naca, rü ñanagürü nüxü: —¿Ñuxäcü i choxü cucuáxü? —ñanagürü. Rü Ngechuchu nanangãxü rü ñanagürü nüxü: —Naxüpa ga Piripi cuxcèx na yaçaxü, rü choma rü cuxü chadau ga yexguma orix ga igueratüügu curüxãüxgux —ñanagürü. ⁴⁹ Rü Natanae nanangãxü rü ñanagürü nüxü: —Pa Ngúexëeruüx, cuma rü Tupana Nane quixĩ. Rü cuma nixĩ i guxüma i Yudíugüarü Äëxgacü quiüxü —ñanagürü. ⁵⁰ Rü Ngechuchu nanangãxü, rü ñanagürü nüxü: —Cuma rü choxü cuyaxõ erü cumaã nüxü chixu na igueratüüwa cuxü na chadauxü. Rü ngëmacèxicatama nixĩ i cuyaxõxü. Natürü ngëma ñuxma nüxü cudauxüärü yexera tá nixĩ i nüxü cudauxü i yixcüra —ñanagürü. ⁵¹ Rü ñanagürü ta ga Ngechuchu: —Rü aixcüma pemaã nüxü chixu rü tá nüxü pedaugü na yawãxnaxü i daxüguxü i naäne. Rü tá nüxü pedaugü i Tupanaärü orearü ngeruüğü i daxüçüãx i ngëma daxü ïgüxü rü írüxĩgüxü i naetüwa ya Tupana Nane na duüxüxü ixĩcü —ñanagürü.

2

Ngĩarü peta ga ñane ga Canáwa üxü ga Gariréaanewa

¹ Rü yexguma marü tomaëxpüx ga ngunexü Gariréaanearü ñane ga Canáwa nayexmagu ga Ngechuchu, rü nayexma ga wüxi ga ngĩarü peta. Rü yemawa

ngixna naxugü ga naë ga Ngechuchu. ² Rü Ngechuchuna rü toxna rü ta naxugüe na yéma taxixücèx. ³ Rü nagux ga norü axexü ga binu. Rü Ngechuchu naë ngigürügü nüxü ga Ngechuchu: —Marü nagúarü binuãxgü —ngigürügü. ⁴ Natürü Ngechuchu ngixü nangãxü, rü ñanagürü: —Pa Mamax, ¿tüxcüü chomaã nüxü quixu i ngëma? Erü tauta nawa nangu na chanaxüxcèx i tacü rü mexü i Tupanaärü poramaã üxü —ñanagürü. ⁵ Natürü ga ngïma ga naë rü ngigürügü nüxü ga yema baegüxü namaã ga binuchiü: —¡Penaxüx i guxüma i ngëma nüma pemaã nüxü yaxuxü! —ngigürügü. ⁶ Rü yéma iyexma ga 6 ga tüxü ga nutagüngixcèx. Rü wüxichigü ga yema tüxüwa rü maneca yexma name ga 50 rü éxna 70 litrugü ga dexá. Rü yema tüxügü iyixi ga yema Yudíugü ngixü ixügüãcugücü ga yexguma dexámaã nügü yayauxmëxgüchaügu na Tupanacèx nügü yamexëëgüxcèx. ⁷ Rü Ngechuchu rü yema baegüxüxü namu, rü ñanagürü: —¡Dexámaã ngixü pixügüãcu i ñaã tüxügü! —ñanagürü. Rü nümagü ga yema baegüxü rü meãma ngixü nixügüãcu. ⁸ Rü Ngechuchu ñanagürü nüxü: —Rü ñuxma chanaxwëxe i íraxü peyaxu, rü petaarü yoraxütawa penange —ñanagürü. Rü yemaãcü nanaxügü ga yema baegüxü. ⁹ Rü yema petaarü yora nüxü naxaxneta ga yema dexá ga binuxü nacèxichixü. Natürü tama nüxü nacüxcèx ga ngextá na nayauxgüãxü. Rü yema baegüxüxücatama nixi ga nüxü cuèxgüxü ga dexámare na yíxü ga noxrix. Rü yexgumatama ga yema petaarü yora rü yema yatü ga ingixücèx naca. ¹⁰ Rü ñanagürü nüxü: —Guxü i naãnewa rü duüxügü rü noxri rü namaã nabae ya mecü ya binu. Rü ngëxguma marü meãma guxüma axegügu i ngëma nüxna naxuxü, rü ngëmawena rü nüxna nanaxã ya ngexcürüücümare ya binu. Natürü i cuma rü marü nagúxchaügu i peta, rü mexëchicü ya binumaãtama cuyaxaxegüxëë i duüxügü —ñanagürü. ¹¹ Rü guma Gariréaanewa yexmane ga ñãne ga Canáwa nixi ga yema naxüxü ga Ngechuchu. Rü yema nixi ga nüxíraüxü ga cuèxruü ga Tupanaärü poramaã üxü ga nawa nügü inawéxü ga Tupana Nane na yíxü. Rü toma ga norü ngúexügü rü nüxü tayaxögü. ¹² Rü yemawena rü Capernáü ga ñãnewa naxü ga Ngechuchu. Rü naë rü naëneëgü rü toma ga norü ngúexügü rü ta ítayaxümücügü. Rü yéma guma ñãnewa tayexmagü ga ñuxre ga ngunexü.

Ngechuchu rü tupauca ga taxünewa ínanawoxü ga yema duüxügü ga yéma taxegüxü

(Mt 21.12-13; Mr 11.15-18; Lc 19.45-46)

¹³ Rü toma ga Yudíugü rü marü ningaica ga torü peta ga Üpetüchiga. Rü yemacèx ga Ngechuchu rü Yerucharéüwa naxü. ¹⁴ Rü yexma tupauca ga taxünegu nüxü nayangau ga duüxügü ga yéma norü wocagümaã rü carnerugümaã rü muxtucugümaã taxegüxü. Rü yéma nüxü nadau ta ga duüxügü ga norü taxechicawa rütogüxü rü Tupanaarü amarewa mexü ga díërumaã yéma taxegüxü. ¹⁵ Rü yexguma yemaxü nadëuxgu ga Ngechuchu, rü nanaxü ga wüxi ga cuaixruü ga naxchëxmünaxcèx. Rü yemamaã tupauca ga taxünewa ínanawoxü ga yema duüxügü guxüma ga norü carnerugümaã rü wocagümaã. Rü yema díërucèx taxegüxüärü díëru rü ngixü narüwoü ñaxtüanegu. Rü norü mechagü rü ta nüxü nawoneta. ¹⁶ Rü yema muxtucugümaã taxegüxüxü ñanagürü: —¡Ípeyana i ngëma perü muxtucugü i nuã! Tama name i taxepataüxü peyaxíxëë ya daa Chaunatüpata —ñanagürü. ¹⁷ Rü yexguma ga toma ga norü ngúexügü rü nüxna tacüxãchie ga nuxcümaüxü ga ümatüxü ga ñaxü:

“Duüxügü rü tá chauxchi naxaie erü chanachuxu i tacü i chixexü na naxügüxü i Tupanapatawa”,

ñaxŭ. ¹⁸ Rŭ yexguma ga yema ãëxgacŭgŭ rŭ Ngechuchuna nacagŭ, rŭ ñanagŭrŭgŭ: —¿Tacŭ rŭ cuèxruŭxŭ toxŭ cudadaxë na nawa nŭxŭ tacuáxŭcèx na aixcŭma Tupana yŭxŭ ya cuxŭ mucŭ na ícunawoxŭxŭcèx i ñaã duŭxŭgŭ i nuã? —ñanagŭrŭgŭ. ¹⁹ Rŭ Ngechuchu nanangãxŭ, rŭ ñanagŭrŭ: —¡Nagu pepogŭe ya daa tupauca ya taxŭne! Rŭ choma rŭ tomaëxpŭx i ngunexŭgu rŭ tá wena íchanadaxë —ñanagŭrŭ. ²⁰ Rŭ yexguma ga yema ãëxgacŭgŭ rŭ nanangãxŭgŭ, rŭ ñanagŭrŭgŭ: —Rŭ 46 ga taunecŭ nawa napuracŭe ga duŭxŭgŭ na naxŭgŭãxŭcèx ga daa tupauca ya taxŭne. ¿Rŭ ñuxãcŭ tá i cuma i tomaëxpŭx i ngunexŭ tátama wena ícunadaxëxŭ? —ñanagŭrŭgŭ. ²¹ Natŭrŭ guma Tupanapata ga Ngechuchu nachiga idexane rŭ naxŭnechigatama nixŭ. ²² Rŭ yemacèx ga toma ga norŭ ngúexŭgŭ, rŭ yexguma Ngechuchu yuwa írŭdaxgu, rŭ nŭxna tacuèxãchie ga yema ore ga Ngechuchu nŭxŭ ixuxŭ. Rŭ aixcŭma tayaxŭgŭ ga yema ore ga nŭxŭ yaxuxŭ rŭ yema Tupanaãrŭ ore ga nuxcŭmaŭgŭxŭ ga orearŭ uruŭgŭ Ngechuchuchigagu ũmatŭgŭxŭ.

Ngechuchu rŭ nŭxŭ nacuèx i guxŭma i duŭxŭgŭ

²³ Rŭ yexguma Ngechuchu Ũpetŭchigaarŭ petacèx Yerucharéŭwa yexmagu, rŭ muxŭma ga duŭxŭgŭ rŭ nŭxŭ nayaxŭgŭ, yerŭ nŭxŭ nadaugŭ ga yema taxŭ ga mexŭgŭ ga Tupanaãrŭ poramaã naxŭxŭ. ²⁴ Natŭrŭ ga nŭma ga Ngechuchu rŭ tama yema duŭxŭgŭmëxëwa nŭgŭ nayexmaxëëchaŭ, yerŭ woetama marŭ nŭxŭ nacuèx ga tacŭgu na naxŭnŭèxŭ ga guxŭma ga yema duŭxŭgŭ. ²⁵ Rŭ yemacèx ga nŭma rŭ taxucèxma texé namaã nŭxŭ tixu na tacŭgu naxŭnŭèxŭ ga yema duŭxŭgŭ. Yerŭ nŭmatama marŭ nŭxŭ nacuèx ga tacŭgu na naxŭnŭèxŭ ga naãëwa ga wŭxichigŭ.

3

Ngechuchuxŭtagu nanaxŭãne ga Nicodému

¹ Nayexma ga wŭxi ga Parichéu ga Nicodémugu ãegacŭ. Rŭ nŭma rŭ wŭxi ga ãëxgacŭ ga nŭxŭ nangechaŭgŭcŭ nixŭ ga Yudŭgŭtanŭwa. ² Rŭ guma Nicodému rŭ Ngechuchuxŭtagu nanaxŭãne ga chŭtacŭ. Rŭ ñanagŭrŭ Ngechuchuxŭ: —Pa Ngúexëëruŭx, toma nŭxŭ tacuèx na aixcŭma Tupana nŭma cuxŭ muxŭ na toxŭ cungúexëëxŭcèx. Erŭ taxucŭrŭwa texé cuxrŭŭ tanaxŭ i ngëma taxŭ i mexŭgŭ i Tupanaãrŭ poramaã ŭxŭ, ega tama Tupana tŭmaxŭtawa ngëxmagu —ñanagŭrŭ. ³ Rŭ Ngechuchu nanangãxŭ rŭ ñanagŭrŭ nŭxŭ: —Aixcŭma cumaã nŭxŭ chixu, rŭ yŭxema tama wenaxãrŭ buxe rŭ taxucŭrŭwama Tupana ãëxgacŭ íxŭxŭwa tangu —ñanagŭrŭ. ⁴ Rŭ Nicodému rŭ Ngechuchuna naca, rŭ ñanagŭrŭ nŭxŭ: —¿Natŭrŭ ñuxãcŭ i wŭxi i yatŭ i marŭ yaxŭ i wena nabuxŭ? ¿Éxna wena naëãnŭgu naxŭcuxŭ rŭ ngëmaãcŭ wena nabuxŭ? —ñanagŭrŭ. ⁵ Rŭ Ngechuchu nanangãxŭ rŭ ñanagŭrŭ: —Rŭ aixcŭma cumaã nŭxŭ chixu rŭ yŭxema tama nŭxŭ rŭxoxe i tŭmaãrŭ pecadu rŭ tama Tupanaãë i Ũnŭxŭwa nayaxŭxe i maxŭ i ngexwacaxŭxŭ, rŭ taxucŭrŭwama Tupana ãëxgacŭ íxŭxŭwa tichocu ⁶—Yŭxema duŭxŭwa buxe rŭ duŭxŭtama tixŭ. Natŭrŭ yŭxema Naãë i Ũnŭxŭwa nayaxŭxe i maxŭ i ngexwacaxŭxŭ, rŭ Tupanaxãcŭ tixŭ. ⁷—¡Tãŭtãma cubaixãchiãë na cumaã nŭxŭ chixuxŭ na Tupana naxwèxexŭ na guxŭma i duŭxŭgŭ rŭ wena nabuexŭ! ⁸—Ya buanecŭ rŭ nŭma ínanaxwèxexŭwa nabu. Rŭ nŭxŭ cuxŭnŭ i naga, natŭrŭ tama nŭxŭ cucuèx na ngextãama ne naxŭxŭ rŭ ngextãama na naxŭxŭ. Rŭ ngëxgumarŭŭ ta tixŭgŭ ya guxãma ya yŭxema Naãë i Ũnŭxŭwa nayaxŭxe i maxŭ i ngexwacaxŭxŭ —ñanagŭrŭ. ⁹ Rŭ Nicodému wenaxãrŭ Ngechuchuna naca, rŭ ñanagŭrŭ: —¿Natŭrŭ ñuxãcŭ nixŭ i ngëma? —ñanagŭrŭ. ¹⁰ Rŭ Ngechuchu nanangãxŭ, rŭ ñanagŭrŭ nŭxŭ: —Cuma rŭ Yudŭgŭarŭ ngúexëëruŭ i nŭxŭ cuáxŭ quixŭ.

¿Rü ñuxãcü chi i cuma i tama nüxũ cucuáxũ i ngẽma? ¹¹ —Aixcüma cumaã nüxũ chixu rü toma rü namaã tidexagü i ngẽma nüxũ tacuáxũ. Rü norü uruũ tixĩgü i ngẽma nüxũ tadaugüxũ. Natürü pema rü tama toxũ peyaxõgü i ngẽma pemaã nüxũ tixuxũ. ¹² —Rü ñuxma na tama choxũ peyaxõgüxũ i ngẽma pemaã nüxũ chixuxũ i ñoma i naãneãrũ ngẽmaxũchiga, rü ¿ñuxãcü tá peyaxõgüxũ ega pemaã nüxũ chixuxgu i daxũguxũ i naãneãrũ ngẽmaxũchiga? ¹³ —Taguma texé daxũguxũ i naãnewa taxũ. Natürü i choma i Tupana Nane na duũxũxũ chiĩxũ, rü chaxicatama nixĩ i ngẽma ne chaxũxũ rü ngẽma tá chaxũxũ. ¹⁴⁻¹⁵ —Pema nüxũ pecuèx ga ñuxãcü nuxcümaxũchima yema nachica ga ngextá taxúema íxãpataxũwa, rü Moĩché wüxi ga naĩgu nanaxünagü ga yema äxtape ga dñerumünaxcèx. Rü ngẽxgumarũũ tá ta i choma i Tupana Nane i duũxũxũ chiĩxũ, rü wüxi i naĩgu tá choxũ naxünagügü i duũxũgü na guxãma ya texé ya choxũ yaxõgüxe rü tüxũ nangẽxmaxũcèx i maxũ i taguma gúxũ.

Tupana rü poraãcü nüxũ nangechaũ i ñoma i naãnecũãx

¹⁶ —Rü Tupana rü poraãcü nüxũ nangechaũ i ñoma i naãnecũãx i duũxũgü. Rü yemacèx inanamu ga Nane ga nügümaã wüxicacü na guxãma ya texé ya nüxũ yaxõgüxe rü tama itarütauxexũcèx rü tüxũ nangẽxmaxũcèx i maxũ i taguma gúxũ. ¹⁷ —Yerü ga Tupana rü tama ñoma ga naãnewa nanamu ga Nane na duũxũgümaã naxueguãxũcèx na napoxcuexũ. Natürü núma nanamu na namaxẽẽãxũcèx i duũxũgü. ¹⁸ —Rü yixema Tupana Naneãxũ yaxõxẽ, rü Tupana rü tama tümamaã nanaxuegu na tapoxcuxũ. Natürü yixema tama nüxũ yaxõxẽ, rü marü tümamaã nanaxuegu na tapoxcuxũ, erü tama nüxũ tayaxõ ya yima Tupana Nane ya nügümaã wüxicacü. ¹⁹ —Rü yixema tama nüxũ yaxõgüxe, rü Tupana rü marü tümamaã nanaxuegu na tapoxcuexũ. Yerü yexguma ñoma ga naãnewa nanguxgu ga Tupana Nane ya duũxũgüarü ngõonexẽẽruũ, rü tama nawe tarüxĩchaũ. Natürü yexera tümäärü me nixĩ ga èãnexũwaama na tayexmagüxũ, yerü chixexũ taxügü. ²⁰ —Guxãma ya yixema chixexũ ügüxe rü naxchi taxaie i ngõonexũ. Rü tama nüxna tangaicamagüchaũ erü tama tanaxwèxe na nangóxũ i ngẽma chixexũ i ítaxügüxũ. ²¹ —Natürü yixema aixcüma Tupanaãrü ore nüxũ ixuxũãcüma meã maxẽxẽ rü nüxna tangaicama i ngẽma ngõonexũ. Rü ngẽmaãcü tanaxü na meã nangóxũcèx na Tupanaãrü ngüchaũãcüma na yĩxũ i guxũma i ngẽma taxügüxũ —ñanagürü.

Cuáũ ga baiũxẽẽruũ rü wenaxãrũ nüxũ nixu ga Ngechuchuchiga

²² Rü yemawena rü tomaã Yudéaanewa naxũ ga Ngechuchu. Rü ñuxre ga ngunexũ tomaã yéma nayexma rü yéma duũxũgüxũ ítabaiũxẽẽgü. ²³ Rü Cuáũ ga baiũxẽẽruũ rü Enóãrũ ñãnewa ga Charíarü ngaicamana rü ínanabaiũxẽẽ ta ga duũxũgü yerü yéma nayexma ga taxũ ga dexá. Rü yema yéma íngugüetanũxũ ga duũxũgü, rü Cuáũ ínayabaiũxẽẽtanü. ²⁴ Rü yemaãcü nangupetü naxüpa ga na poxcupataũgu yatèxcuchixũ ga Cuáũ. ²⁵ Rü yexguma rü ñuxre ga norü ngúexũgü ga Cuáũ, rü wüxi ga Yudíumaã niporagatanücüü nachiga ga nacümagü na ñuxãcü namexũ na Tupanacèx nügü yamexẽẽgüxũ ga duũxũgü. ²⁶ Rü Cuáũmaã nüxũ nayarüxugüe, rü ñanagürügü: —Pa Ngúexẽẽruũx, dücax guma yatü ga tomaã nüxũ quixücü rü cumaã yexmacü ga natü i Yudáũãrũ tocutüwa, rü yima rü ñuxma rü duũxũgüxũ ínbaiũxẽẽ, rü guxũma i duũxũgü rü nawe narüxĩ —ñanagürügü. ²⁷ Rü Cuáũ nanangãxũ rü ñanagürü nüxũ: —Taxúema tacü tüxũ nangẽxma ega Tupana tama tüxna naxãxgu. ²⁸ —Pematama rü marü choxũ pexĩnüë ga yexguma ñachagu:

“Choma rü tama Cristu chixĩ. Natürü choma chixĩ i Tupana yima Cristupêxegu choxũ imuxũ na nüxũ chixuxüçèx i nachiga”, ñachagu. ²⁹ — Rü wüxi i ngĩgüwa rü yima yatü ya ingĩcü rü naxmèxârü yora nixĩ. Rü yima yatümücü i naxütawa ngëxmaxũ rü nüxũ inarüxĩnü i norü ore. Rü nataãe i ngëxguma nüxũ naxĩnügu i ngëma na yadexaxũ. Rü ngëxgumarüũ i choma rü aixcüma Cristumaã chataãëxüchi i ñuxmax. ³⁰ — Nüma rü tá nixĩnagüchigü na ãëxgacü yĩxũ, natürü i choma rü tá ícharüxĩchigü.

Yima daxüwa ne üxcüchiga

³¹ — Rü yima Cristu ya daxüwa ne üxcü rü guxãetüwa nangëxma. Natürü i choma rü ñoma i naãnewa changëxma, rü ñoma i naãnecüãx chixĩ, rü ngëma ñoma i naãnewa ngëxmaxüchigaxũ chixu. Natürü i nüma ya Cristu ya daxüwa ne üxcü, rü guxãetüwa nangëxma. ³² — Rü nüma rü tamaã nüxũ nixuchiga ga yema nüxũ nadauxũ rü nüxũ naxĩnüxũ. Natürü noxretama nüxũ nayaxôgü i ngëma nüxũ yaxuxũ. ³³ — Natürü ngëxguma texé nüxũ yaxôxgu i norü ore, rü ngëmaãcü tanangoxëe na aixcüma yĩxũ i ngëma Tupana nüxũ ixuxũ. ³⁴ — Rü yima Tupana núma namucü, rü Tupanaãrü orexũ nixu. Erü Tupana rü nüxna nanamu i Naãe i Üünexũ na guxüguma naxütawa nangëxmaxüçèx. ³⁵ — Rü Tanatü ya Tupana rü Nanexũ nangechaũ. Rü ngëmacèx marü naxmèxwa nanangëxmaxëe i guxüma i tacü i ngëxmaxũ. ³⁶ — Rü yixema Tupana Naneãxũ yaxôxë rü tüxũ nangëxma i maxũ i taguma gúxũ. Natürü yixema tama nüxũ yaxôxchaũxë ya Tupana Nane, rü tãütama tüxũ nangëxma i ngëma maxũ i taguma gúxũ. Natürü tá tanayaxu i ngëma ãücümaxũ i poxcu i Tupana tá namaã tüxũ poxcuxũ —ñanagürü ga Cuáũ ga baiüxëeruũ.

4

Ngechuchu rü Chamáriaanecüãx ga ngecü

¹ Rü Parichégü rü nüxũ nacuáchigagü ga Ngechuchu rü Cuáũãrü yexera nüxũ na nayexmaxũ ga norü ngüexügü, rü norü yexera duüxügüxũ na ínabaiüxëexũ. ² Natürü tama Ngechuchu nixĩ ga ínabaiüxëecü ga duüxügü. Rü toma ga norü ngüexügü tixĩ ga tanaxüxũ ga yema. ³ Rü yexguma Ngechuchu nüxũ ñnügu ga Parichégü rü nachigagu na yadexagüxũ, rü yéma Yudéaanewa ítachoxũ na Gariréaanecèx tawoeguxũ. ⁴ Natürü ga yema nama ga nagu tawoeguxũ rü Chamáriaanewa nadapetü. ⁵ Rü yemacèx ga toma rü nawa tangugü ga wüxi ga Chamáriaaneãrü ñãne ga Chicaru. Rü guma ñãneãrü ngaicamana nayexma ga yema naãne ga nuxcümaücü ga Acobuaxũ yexmaxũ rü yixcama rü nane ga Yúchena naxãxũ. ⁶ Rü yéma nayexma ga wüxi ga puchu ga duüxügü dexácèx ixaixmaügücü ga Acobuarü Puchugu ãegacü. Rü poraãcü nipa ga Ngechuchu ga namagu na yaxüxũ. Rü yemacèx guma puchuxütawa nayarütoóchi. Rü tocuchiwa nanguxchaũ ga yexguma. ⁷⁻⁸ Rü toma ga norü ngüexügü rü guma ñãnewa taxĩ na torü ñnacèx tayataxegüxüçèx. Rü towena yéma ingu ga wüxi ga ngecü ga Chamáriaanecüãx ga guma puchuwa dexáwa ücü. Rü Ngechuchu rü ñanagürü ngĩxũ: —¡Íraxũ i dexá choxna naxã! —ñanagürü. ⁹ Natürü ga yema nge rü ñbaixãchiãe yerü ga Yudíugü rü Chamáriaanecüãxgümaã nügüchi naxaie rü yemacèx ga yema nge rü inangãxũ rü ngĩgürügü nüxũ: —¿Ñuxãcü i cuma na Yudíu quiixũ i dexácèx choxna cuçaxũ i choma na Chamáriaanecüãx chiixũ? —ngĩgürügü. ¹⁰ Rü Ngechuchu ngĩxũ nangãxũ, rü ñanagürü: —Ngëxguma chi nüxũ cucuèxgu i ngëma mexũ i Tupana cuxna ãxchaũxũ, rü chi nüxũ cucuèxgu na texé yĩxũ ya yima dexá cuxna taçacü, rü cuma rü chi nüxnata cuca i dexá i maxũ nawa ngëxmaxũ rü nüma rü chi cuxna nanaxã i ngëma dexá —ñanagürü. ¹¹ Rü

yema ngecũ inangãxũ, rü ngĩgürügü nüxũ: —Pa Corix, ¿ñuxãcü tá i dexáta cuyaxu? Erü daa puchu rü namátamaxũchi rü cuxũ nataxuma na tacümaã cunayaxuxũcèx i dexá. ¿Rü ngextá tá i cunayaxuxũ i ngẽma dexá i maxũ nawa ngẽxmaxũ na choxna cunaxãxũcèx? ¹² —Nuxcũmaũcü ga tórü oxu ga Acobu toxçèx núma Chamáriaanewa nanatèx ga daa puchu. Rü gumawa nixĩ ga naxaxexũ ga núma rü nanegü rü norü wocagü. ¿Rü ñuxãcü chi i cuma i norü yexera quiixũ? —ngĩgürügü. ¹³ Rü Ngechuchu ngĩxũ nangãxũ, rü ñanagürü: —Rü guxãma ya texé ya daa puchuarü dexáwa axexe, rü wena táxarü tiṭawae. ¹⁴ —Natürü texé ya yixema choma tüxna chaxãxũ i dexáwa axexe, rü tagutáma wena tiṭawa. Erü ngẽma dexá i choma tüxna chaxãxũ rü wüxi ya puchu ya guxũguma ibaibecürüũ tá nixĩ i tümawa, erü ngẽma dexáwa nangẽxma i maxũ i taguma gúxũ —ñanagürü. ¹⁵ Rü ngĩma ga yema nge rü inangãxũ rü ngĩgürügü: —Pa Corix, ¿choxna naxã i ngẽma dexá na taguma wena chitawaxũcèx, rü taguma wena daa puchuwa dexáwa chaxũxũcèx! —ngĩgürügü. ¹⁶ Rü Ngechuchu ñanagürü ngĩxũ: —Íyadau ya cute, rü naxçèx yaca, rü nuã pexĩ! —ñanagürü. ¹⁷ Rü yema ngecũ rü inangãxũ, rü ngĩgürügü nüxũ: —Nataxuma ya chaute —ngĩgürügü. Rü Ngechuchu ñanagürü ngĩxũ: —Aixcũma nixĩ i ngẽma nüxũ quixuxũ na nataxuũma ya cute. ¹⁸ —Yerü wüximẽxpũxchirẽx nixĩ ga cute, rü yima ñuxma cuxũtawa ngẽxmacü rü tama aixcũma cutexũchi nixĩ. Rü ngẽmacèx aixcũma nixĩ i curü ore i chomaã nüxũ quixuxũ —ñanagürü. ¹⁹ Rü yexguma yemaxũ naxĩnũgu ga yema ngecũ, rü ngĩgürügü: —Pa Corix, nüxũ chicuèxãchi rü cuma rü wüxi i Tupanaãrũ orearü uruũ quixĩ. ²⁰ —Nuxcũmaũgũxũ ga torü oxigü ga Chamáriaanecũãxgü rü daa mèxpũne ga Garachiũwa Tupanaxũ nicuèxũgü. Natürü i pema i Yudiũgü rü ñaperũgü:

“Rü Yerucharéũ nixĩ i nachica i mexũ i ngextá Tupanaxũ ticuèxũgü”, ñaperũgü. ²¹⁻²² Rü Ngechuchu ngĩxũ nangãxũ rü ñanagürü: —Pema i Chamáriaanecũãxgü rü tama aixcũma nüxũ pecuèxgü ya yima nüxũ picuèxũgücü. Natürü toma i Yudiũgü rü aixcũma nüxũ tacuèx ya yima nüxũ ticuèxũgücü, erü Yudiũgügagu nixĩ i Tupana namaxèxèxũ i guxũma i duũxũgü. ¿Choxũ yaxõ, Pa Ngeçũ! Rü aixcũma ínangu tá i ngunexũ na tãütáma daa mèxpũnewa rü èxna Yerucharéũwa tá nüxũ na picuèxũgũxũ ya Tanatü ya Tupana. ²³ —Erü yixema aixcũma Tupanaxũ icuèxũgũxe rü nüetama nixĩ i ngèxürüxũmare i nachicawa Tupanaxũ ticuèxũgü. Erü ñuxma rü ngẽma Naãe i Üünexũ naxwèxexũ nixĩ na guxũma i tümaãemaã rü tümaãrũ maxũmaã aixcũma Tupanaxũ ticuèxũgũxũ. Rü ngẽmaãcü nixĩ i nanaxwèxexũ ya Tanatü na nüxũ ticuèxũgũxũ. ²⁴ —Erü Tupana rü wüxi i Naãe nixĩ. Rü ngẽmacèx yixema texé ya nüxũ icuèxũgũxe rü tanaxwèxe i guxũma i tümaãemaã rü tümaãrũ maxũmaã na aixcũma nüxũ ticuèxũgũxũ, ngẽma Naãe i Üünexũ naxwèxexũãcũma —ñanagürü. ²⁵ Rü yema ngecũ inangãxũ rü ngĩgürügü: —Choma nüxũ chacuèx rü tá ñoma i naãnewa nangu ya yima Cristu ya Tupana nüxũ unetacü. Rü ngèxguma yima núma üxgu rü tá tamaã nanangoxèe i guxũma i Tupanachiga —ngĩgürügü. ²⁶ Rü Ngechuchu rü ñanagürü ngĩxũ: —Choma na cumaã chidexaxũ, rü yima chixĩ —ñanagürü. ²⁷ Rü yexguma iyadexayane rü ítangugü ga toma ga norü ngüexũgü. Rü tabaixãchiãegü yerü ga Ngechuchu rü wüxi ga ngecũmaã ínindexa. Natürü taxúema ga toma rü togü taporaxèe ga nüxna na tacagũxũ ga tacü ngĩmaã na nanaxwèxexũ rü tacũchiga yĩxũ ga ngĩmaã na iyadexaxũ. ²⁸ Rü yexguma ga yema ngecũ rü yéma ngĩxũ itèx ga ngĩrũ tũxũ. Rü ñãnewa ixũ na duũxũgũmaã nüxũ yanaxuxũcèx. ²⁹ Rü ngĩgürügü: —¿Ngĩxã rü ítayadaugü

i wüxi i yatü i chomaã nüxü ixuxü ga guxüma ga tacü ga chaxüxü! ¿Taux êxna yima yïxü ya Cristu? —ngïgürügü. ³⁰ Rû inaxïãchi ga yema ïãnecüãx, rû Ngechuchu íyexmaxüwa naxï. ³¹ Rû yoxni ga toma ga norü ngúexügü rû Ngechuchuxü tachixewegü na nachibüxücèx. ³² Natürü ga nüma rû ñanagürü toxü: —Choma rû choxü nangëxma i chowemü i pema tama nüxü pecuáxü —ñanagürü. ³³ Rû yexguma ga toma ga norü ngúexügü rû togüna tacagüe, rû ñatarügügü: —Bexmana marü ¿texé nuã tanange i nawemü? —ñatarügügü. ³⁴ Natürü ga Ngechuchu rû ñanagürü toxü: —Ngëma õna i choxü poraxëëxü nixï na chanaxüxü i norü ngúchaü ya yima nuã choxü mucü ya Chaunatü, rû na chayanguxëëxü i norü puracü. ³⁵ —Rû pema rû ñaperügügü:

“Rû ägümücü ya tauemacü nataxu na yabuxgüxü i trigu”, ñaperügügü. Natürü i choma rû ñacharügü pexü:

“¡Dücèx, rû meã penangugü i duüxügü! Erü marü ínamegü na Tupanaxü nayauxgüxücèx, ngëxgumarüü i wüxi i trigunecü i marü nawa nanguxü na yabuxgüxü erü marü nidau”. ³⁶ —Rû yíxema Tupanacèx nadexe i duüxügü rû tá tanayaxu i tümaãrü natanü. Rû guxüma i ngëma duüxügü i tüxü irüxïnüëxü rû tá nanayauxgü i maxü i taguma gúxü. Rû ngëmaãcü rû wüxigu tá tataãgü ya yíxema tüxira ngëma duüxügümaã Tupanaãrü orexü ixuxe rû yíxema yixcama ngëma duüxügüxü Tupanacèx dexe. ³⁷ —Rû aixcüma nixï i ngëma ore i ñaxü:

“Wüxie tixï ya namaã toexe i trigu rû togue tixï ya yíxema yabuxgüxe i norü o”, ñaxü. [Rû ngëxgumarüü rû wüxie tixï ya tüxira duüxügümaã nüxü ixuxe i Tupanaãrü ore, rû togue tixï ya yixcama ngëma duüxügüxü dexe Tupanacèx.] ³⁸ —Rû noxri rû togü nixï ga duüxügümaã nüxü ixuxü ga Tupanaãrü ore, natürü ga duüxügü rû tama nayaxögü ga yexguma. Rû yemawena rû pexü chamu na yema duüxügümaã nüxü pixuxücèx ga yema ore. Rû pema nixï ga yema duüxügüxü pedexü Tupanacèx, yerü nayaxögü ga yexguma namaã nüxü pixuxgu ga yema ore. Rû yemaãcü ga pema rû marü peyoxnië nawa ga togüarü puracü —ñanagürü. ³⁹ Rû muxüma ga guma Chamáriaanewa yexmane ga ïãnecüãx rû Ngechuchuaxü nayaxögü, yerü nüxü nayaxögü ga yema ore ga yema ngecü namaã nüxü ixuxü ga yexguma ngïxgu:

“Guxüma ga tacü ga üpa chaxüxü rû chomaã nüxü nixu” ngïxgu. ⁴⁰ Rû yemacèx ga yema Chamáriaanecüãxgü rû yexguma Ngechuchuxütawa nangugügu rû nüxü nacèxügü ga yexma natanügu na naxãüxücèx. Rû taxre ga ngunexü yexma natanügu narüxãüx ga Ngechuchu. ⁴¹ Rû muxüma ga togüamachigü ga Chamáriaanecüãxgü rû Ngechuchuaxü nayaxögü ga yexguma nüxü naxïnüëgu ga yema norü ore ga nümatama nüxü yaxuxü. ⁴² Rû yexguma ga yema duüxügü rû ñanagürügü ngïxü ga yema ngecü: —Ñuxma waxi nixï i aixcüma nüxü tayaxögüxü erü tomatama nüxü taxïnüë i ngëma norü ore i tomaã nüxü yaxuxü. Rû ngëmawa nüxü tacuèx na aixcüma yima yïxü ya Cristu ya ñoma i naãnecüãx i duüxügüarü maxëëëruü. Rû tama ngëma cuma tomaã nüxü quixuxücèxicatama tayaxögü —ñanagürügü.

Ngechuchu rû nanamexëë ga wüxi ga äëxgacü nane

⁴³ Rû taxre ga ngunexügüwena ga Ngechuchu rû tomaã inaxüãchi ga Chamáriaanewa na Gariréaanewa naxüxücèx. ⁴⁴ Rû nümatama ga Ngechuchu ga üpaacü rû ñanagürü: —Wüxi i Tupanaãrü orearü uruü, rû norü naãnewatama i duüxügü rû tama meã nanayauxgü —ñanagürü. ⁴⁵ Natürü yexguma Gariréaanewa tangugügu, rû yema naãnecüãx ga duüxügü rû meãma nanayauxgü. Yerü nümagü ga yema naãnecüãxgü rû Yerucharéüwa naxï ta naxcèx ga Üpetüchigarü peta, rû yéma nüxü nadaugü ga yema taxü

ga mexŭgŭ ga Tupanaärŭ poramaã naxŭxŭ ga Ngechuchu ga yexguma. ⁴⁶ Rŭ ga Ngechuchu rŭ tomaã nataegu naxcèx ga guma ãne ga Caná ga Gariréaanewa yexmane. Rŭ guma ãnewa nixŭ ga binuxŭ nanguxuchixèèãxŭ ga dexá. Rŭ ãne ga Capernáŭwa nayexma ga wŭxi ga tacŭ ga ãëxgacŭ, rŭ niðaawe ga wŭxi ga nane. ⁴⁷ Rŭ yexguma guma ãëxgacŭ nŭxŭ cuáchigagu ga Ngechuchu rŭ Gariréaanewa na nanguxŭ ga Yudéaanewa na ne naxŭxŭ, rŭ naxŭtawa naxŭ. Rŭ nŭxŭ nayacèèxŭ na napatawa naxŭxŭcèx, rŭ naxcèx na yanataanexèèãxŭcèx ga guma nane ga marŭ turaxŭchicŭ. ⁴⁸ Rŭ Ngechuchu nanangãxŭ, rŭ ñanagŭrŭ nŭxŭ: —Pema rŭ tama peyaxŭgŭ ega tama nŭxŭ pedauxiragu i taxŭ i cuèxruŭgŭ i Tupanaärŭ poramaã ŭxŭ —ñanagŭrŭ. ⁴⁹ Natŭrŭ ga guma ãëxgacŭ rŭ ñanagŭrŭ nŭxŭ: —Pa Corix, jpxa chowe rŭxŭ naxŭpa na nayuxŭ ya chaune! —ñanagŭrŭ. ⁵⁰ Rŭ Ngechuchu nanangãxŭ rŭ ñanagŭrŭ nŭxŭ: —¡Nataegu i cupatawa! Erŭ cune rŭ marŭ naxcèx nitaane —ñanagŭrŭ. Rŭ guma yatŭ rŭ nayaxŭ ga yema ore ga Ngechuchu namaã nŭxŭ ixuxŭ. Rŭ napatacèx nataegu. ⁵¹ Rŭ yexguma napatawa nanguxchaŭgu ga guma ãëxgacŭ, rŭ norŭ duŭxŭgŭ napèxegu nayayi, rŭ ñanagŭrŭgŭ nŭxŭ: —Cune rŭ marŭ naxcèx nitaane —ñanagŭrŭgŭ. ⁵² Rŭ yexguma rŭ norŭ duŭxŭgŭna naca, rŭ ñanagŭrŭ nŭxŭ: —¿Tacŭ rŭ oragu inaxŭgŭxŭ na naxcèx yataanexŭ? —ñanagŭrŭ. Rŭ yema norŭ duŭxŭgŭ nanangãxŭ rŭ ñanagŭrŭgŭ: —Íne tocuchiguwena nixŭ ga nŭxŭ nangupetŭxŭ ga na yaxaxŭnexŭ —ñanagŭrŭgŭ. ⁵³ Rŭ guma bucŭ nanatŭ rŭ nŭxna nacuèxãchi ga yema oragu na yŭxŭ ga Ngechuchu ga ñaxŭ nŭxŭ:

“Cune rŭ marŭ naxcèx nitaane” ñaxŭ. Rŭ nŭma ga guma ãëxgacŭ rŭ guxŭma ga napatacŭãx rŭ Ngechuchuxŭ nayaxŭgŭ. ⁵⁴ Rŭ yexguma Yudéaanewa ne naxŭxgu ga Ngechuchu, rŭ yema nixŭ ga norŭ taxre ga cuèxruŭ ga taxŭ ga Tupanaärŭ poramaã duŭxŭgŭxŭ nawéxŭ ga Gariréaanewa.

5

Ngechuchu rŭ nanamexèè ga wŭxi ga yatŭ ga idaawexŭ ga Betchawa yexmaxŭ

¹ Rŭ ñuxre ga ngunexŭgŭ ngupetŭguwena rŭ nayexma ga wŭxi ga peta ga Yudŭgŭ auregŭxŭ na yemaãcŭ Tupanaxŭ yacuèxŭgŭxŭcèx. Rŭ yemacèx ga Ngechuchu rŭ Yerucharéŭcèx nataegu. ² Rŭ guma ãneärŭ poxeguxŭ rŭ nŭxŭ nayexma ga wŭxi ga ãx ga Carneruarŭ Choxŭchicagu ãegaxŭ. Rŭ yema ãxärŭ ngaicamana nayexma ga wŭxi ga puchu ga Yudŭgŭgawa Betchagu ãegaxŭ. Rŭ guma puchuanacŭwa nayexma ga wŭximéèxpŭx ga chopetŭchica ga ãxpataŭetŭgŭxŭ. ³ Rŭ yema chopetŭchicagu nacagŭ ga muxŭma ga duŭxŭgŭ ga idaaweexŭ. Rŭ nŭmaxŭ rŭ nangexetŭgŭ, rŭ togŭ rŭ nachixeparagŭ, rŭ togŭ rŭ nanawãxãchigŭ. Rŭ yema idaaweexŭ rŭ yema nananguxèègŭ ga guma puchu ga na naxŭãxãchichiŭxŭcèx. ⁴ Yerŭ ñuxguacŭ rŭ guma puchugu ínarŭxŭxŭ ga wŭxi ga daxŭcŭãx ga Tupanaärŭ orearŭ ngeruŭ, rŭ nayaxŭãxchiŭcŭxŭèèxŭ. Rŭ guxema tŭxira tŭgŭ yema táexe nachŭwa ga guma puchu ga yexguma yaxŭãxchiŭcŭgŭ, rŭ tŭmacèx nitaane woo ga ngèxŭrŭm̄mare ga ðaawe tŭxŭ yexmaxè. ⁵ Rŭ yema natanŭwa nayexma ga wŭxi ga yatŭ ga marŭ 38 ga tauncŭ idaawecŭ. ⁶ Rŭ yexguma Ngechuchu nŭxŭ dèuxgu ga guma yatŭ ga yexma na nacaxŭ, rŭ nŭxŭ nacuáchiga ga marŭ mucŭma ga tauncŭ na yaðaawexŭ. Rŭ yemacèx nŭxna naca rŭ ñanagŭrŭ nŭxŭ: —¿Cunaxwèxexŭ i cuxcèx na yataanexŭ? —ñanagŭrŭ. ⁷ Rŭ Ngechuchuxŭ nangãxŭ ga guma idaawecŭ, rŭ ñanagŭrŭ: —Pa Corix, tataxuma ya texé ya choxŭ rŭngŭxèèxè na ngema choxŭ tatáexŭcèx i ngèxguma naxŭãxãchichiŭgu ya daa puchu. Rŭ guxŭguma i ngèxguma ngema

chaugü chatáechaŭgu, rü yoxni i togü rü marü nüxïra nügü ngema nataégü —ñanagürü. ⁸ Rü Ngechuchu rü ñanagürü nüxŭ: —¡Inachi, rü nayaxu i curü caruŭ, rü íixŭ! —ñanagürü. ⁹⁻¹⁰ Rü yexgumatama naxcèx nitaane ga guma yatü. Rü nanayaxu ga norü caruŭ, rü ínixŭ. Natürü ga yema ngunexŭ rü ngŭxchigaarü ngunexŭ nixï. Rü yemacèx ga yémacŭâxgü ga Yudíugüarü âëxgacügü rü ñanagürügü nüxŭ ga guma yatü ga naxcèx itaanecü: —Ñoma nixï i ngŭxchigaarü ngunexŭ. Rü ngëmacèx nachuxu nixï na cuyangexŭ i curü caruŭ erü yemaâcü tamaã nüxŭ nixu ga Moïché —ñanagürügü. ¹¹ Natürü ga guma yatü rü yema Yudíugüarü âëxgacügüxŭ nangãxŭ, rü ñanagürü: —Yima choxŭ rümexëëcü rü ñanagürü choxŭ:

“¡Nayaxu i curü caruŭ rü íixŭ!” ñanagürü. ¹² Rü yexguma ga yema âëxgacügü rü nüxna nacagü, rü ñanagürügü: —¿Texé ngëma ñatarügü cuxŭ:

“¡Nayaxu i curü caruŭ rü íixŭ!” ñatarügü cuxŭ? —ñanagürügü. ¹³ Natürü ga guma yatü rü tama nüxŭ nacuèx ga texé naxcèx na yataanexëëxŭ, yerü namuxŭchi ga duŭxügü ga yéma, rü yexma nayarütaxu ga Ngechuchu. ¹⁴ Natürü yixcama ga Ngechuchu rü tupauca ga taxŭnegu nüxŭ nayan-gau ga guma yatü, rü ñanagürü nüxŭ: —¡Dücèx i ñuxma marü cuxcèx na yataanexŭ, rü tãütáma wena chixexŭ cuxŭ na tama quidaawexŭcèx namaã i wüxi i ñaawe i ngëma marü cuxŭ ngupetüxŭârü yexera íixŭ! —ñanagürü. ¹⁵ Rü ínixŭ ga guma yatü, rü Yudíugüarü âëxgacügümaã nüxŭ nayarüxu ga Ngechuchu na yïxŭ ga guma namexëëcü. ¹⁶ Rü yemacèx nixï ga yema âëxgacügü ga Ngechuchucèx nadaugŭxŭ na yamèxgüâxŭcèx, yerü ngŭxchigaarü ngunexŭgu napuracü. ¹⁷ Natürü ga Ngechuchu rü ñanagürü nüxŭ: —Chaunatü ya Tupana rü guxŭ i ngunexŭgu napuracü rü mexŭ naxü. Rü ngëmacèx i choma rü ta naxrüŭ chapuracü —ñanagürü. ¹⁸ Rü yemacèx ga yema Yudíugüarü âëxgacügü rü yexeraâcü Ngechuchuxŭ nimèxgüchaŭ. Yerü tama naxrüŭ nanaxaure ga ngŭxchigaarü ngunexŭ rü ñuxŭchi nüxŭ nixu ga Nanatüxŭchi na yïxŭ ga Tupana, rü yemaâcü nügü nixu ga Nanatü ga Tupanamaã na nawüxiguxŭ.

Nüma ga Tupanatama nixï ga Nanena naxããxŭ ga pora

¹⁹ Rü yexguma ga Ngechuchu rü ñanagürü nüxŭ ga yema âëxgacügü: —Aixcüma pemaã nüxŭ chixu rü choma i Tupana Nane rü tama chorü poramaã chanaxü i ñacü rü puracü i mexŭ. Natürü ngëma nüxŭ chadauxŭ i Chaunatü üxŭxïcatama nixï ichaxŭxŭ. Rü guxŭma i ngëma Chaunatü üxŭ, rü choma ya Nane rü ta chanaxü. ²⁰ —Chaunatü ya Tupana rü choxŭ nangechaŭ, rü ngëmacèx choxŭ nüxŭ nadauxëë i guxŭma i ñacü i nüma naxŭxŭ. Rü ngëma ñuxma choxŭ nüxŭ nadauxëëxŭârü yexera tá choxŭ nüxŭ nadauxëë i yixcüra. Rü ngëxguma i pema ega ngëmaxŭ pedaugügu, rü tá pebaixãchiãégü namaã. ²¹ —Rü Chaunatü rü ínanadagüxëë i yuexŭgü rü wena nanamaxëëë. Rü ngëxguma-rüŭ ta i choma i Nane rü tüxna chanaxã i maxŭ ya yixema chatümawèxéxe na tüxna chanaxãxŭ. ²²⁻²³ —Rü tama Chaunatü nixï ya duŭxügüxŭ icagücü i norü maxŭchiga. Natürü choxŭ nixï i namuxŭ na chanaxŭcèx i ngëma, na choxŭ yacuèxüügüxŭcèx i duŭxügü, ngëma Chaunatüxŭ na yacuèxüügüxŭrŭ. Rü yixema tama choxŭ icuèxüxŭxë, rü tama nüxŭ ticuèxüŭ ta ya Chaunatü ya choxŭ nuã mucü. ²⁴ —Aixcüma pemaã nüxŭ chixu rü yixema texé ya choxŭ irüxŭnuxë i chorü ore, rü nüxŭ yaxõxë ya yima Chaunatü ya núma choxŭ mucü, rü tüxŭ nangëxma i maxŭ i taguma gúxŭ. Rü Chaunatü rü tãütáma tümamaã nanaxuegu na tapoxcuxŭ erü marü nawa ítanguxuchi na tayuxŭ, rü tüxŭ nangëxma i maxŭ i taguma gúxŭ. ²⁵ —Rü aixcüma pemaã nüxŭ chixu rü marü nawa tá nangu i ngunexŭ rü ñuxmatama nixï i chauga naxŭnëxŭ tá i ngëma duŭxügü i norü pecadugu yuexŭ rü

iyarütaxexũ. Rũ texé ya chauga ñnũxẽ rũ tá tamaxẽ. ²⁶—Nũma ya Chaunatũ rũ nũxũ nangẽxma i pora na namaxẽxẽãxũcèx i duũxũgũ. Rũ ngẽma pora rũ choxna nanaxã ya Chaunatũ na choma rũ ta duũxũgũxũ chamaxẽxẽãxũcèx. ²⁷—Rũ Chaunatũ ya Tupana choxũ namu na duũxũgũna chaçaxũcèx naxcèx i norũ maxũchiga, erũ choma nixĩ i Nane i duũxũxũ chiĩxũ. ²⁸—;Tãxũ i pebaixãchiãgũxũ namaã i ñãã ore i pemaã nũxũ chixuxũ! Erũ tá ínangu i ngẽma ngunexũ i nagu guxũma i duũxũgũ i yuexũ rũ tá na nũxũ naxĩnũxũ i chauga. ²⁹—Rũ naxmaũgũwa tá ínachoxũ. Rũ ngẽma meã maxẽxũ, rũ tá ínarũdagũ na nayauxgũãxũcèx i maxũ i taguma gũxũ. Natürũ ngẽma chixexũ ügũxũ, rũ tá ínarũdagũ na napoxcuexũcèx.

Nawa nũxũ icuáxũ na Tupana yĩxũ ga Ngechuchuna naxãcü ga pora

³⁰—Choma rũ taxucürũwa tacũ chaxũ chauechamatama ega tama choxũ naxũxẽãgu ya Chaunatũ. Rũ Chaunatũ chomaã nũxũ ixuxũãcüma nixĩ i nũxna chaçaxũ i duũxũgũ i norũ maxũchiga. Rũ ngẽxguma nũxna chacaxgu rũ aixcüma meãma chanangugũ i duũxũgũ. Erũ tama choxrũtama ngũchaũ nixĩ i ngẽma chaxũxũ, natürũ Chaunatũ ya nuã choxũ mucũarũ ngũchaũ nixĩ i ngẽma chaxũxũ. ³¹—Rũ ngẽxguma chi chauchigaxũtama chixuxgu rũ taxuwama name i ngẽma. ³²—Natürũ nangẽxma i to i chauchigaxũ ixuxũ. Rũ nũxũ chacuèx rũ aixcüma nixĩ i norũ ore i pemaã nũxũ yaxuxũ. ³³ Pema rũ Cuáũ ya baiũxẽeruũxũtawa penamugũ ga perũ duũxũgũ na nũxũ pecuáxũcèx ga ore ga aixcüma ixĩxũ ga chauchiga. Rũ yema ore ga Cuáũ pexũ namaã ngãxũxũ rũ aixcüma nixĩ. ³⁴—Natürũ i choma rũ tama chanaxwèxe i tacũ rũ yatũ chauétũwa nachogũ, erũ choma tátama chaugũna chadau. Natürũ pemaã nũxũ chixu i ngẽma Cuáũãrũ ore na choxũ peyaxõgũxũcèx rũ na penayauxgũxũcèx i maxũ i taguma gũxũ. ³⁵—Cuáũ rũ wũxi ga omũ ga iyauracũxũ rũ pexũ baxixũ-rũ nixĩ ga pexcèx. Rũ pema rũ paxaãchi namaã petaãgũ. ³⁶—Natürũ nangẽxma i tacũ i Cuáũãrũ orearũ yexera chauétũwa íchogũxũ. Rũ ngẽma nixĩ ga yema taxũgũ ga cuèxruũgũ ga Chaunatũ choxũ muxũ na norũ poramaã chanaxũxũcèx. Rũ yemawa pexũ nũxũ chadauxẽ na aixcüma Chaunatũ ya Tupana yĩxũ ga núma choxũ mucũ. ³⁷—Rũ ngẽxgumarũ ta ya Chaunatũ ga guma núma choxũ mucũ, rũ marũ chauétũwa ínachogũ, woo taguma nũxũ pexĩnũe ga naga rũ taguma nũxũ pedau. ³⁸—Rũ ngẽma Chaunatũarũ ore rũ ta tama peãewa nixũcu, erũ tama choxũ peyaxõgũ woo Chaunatũ núma choxũ na muxũ. ³⁹⁻⁴⁰—Pema meãma nawa pengúe i Tupanaãrũ ore i ümatũxũ, erũ nagu perũxĩnũe rũ ngẽmawa tá nũxũ ipeyangau i perũ maxũ i taguma gũxũ. Natürũ woo ngẽmatama Tupanaãrũ ore i ümatũxũwa rũ chauchiga meã na yadexaxũ, natürũ i pema rũ tama choxũ peyaxõgũchaũ na ngẽmaãcü penayauxgũxũcèx i ngẽma maxũ. ⁴¹⁻⁴²—Rũ choma rũ tama chanaxwèxe na choxũ picuèxũgũxũ erũ meãma pexũ chacuèx, rũ nũxũ chacuèx na tama aixcüma Tupanaxũ pengechaũgũxũ. ⁴³—Chaunatũ ya Tupana nixĩ ga núma choxũ mucũ, natürũ i pema rũ tama choxũ peyauxgũchaũ. Natürũ ngẽxguma chi tomare i yatũ nagagutama núma üxgu, rũ ngẽma chi nixĩ i taããcüma peyauxgũxũ. ⁴⁴—;Rũ ñuxãcü chi choxũ peyaxõgũ ega penaxwèxegu na pemũcũgũtama pemaã taãxũ rũ tama naxcèx pedaugũgu na Tupanaxũchi pemaã taãxũ? ⁴⁵—;Tãxũ i nagu perũxĩnũxũ na choma tá yĩxũ na pexũ chixugũxũ i Chaunatũxũtawa! Erũ Moĩché ga guma perũ maxũcèx nũxũ peyaxõgũcü tátama nixĩ ya yima pexũ ixugũcü i Chaunatũxũtawa. ⁴⁶—Rũ ngẽxguma chi peyaxõgũgu i ngẽma ore ga Moĩché ümatũxũ, rũ choxũ rũ chi ta peyaxõgũ. Yerũ ga Moĩché rũ chauchigagu nixĩ ga naxũmatũãxũ ga norũ poperawa. ⁴⁷—Natürũ ngẽxguma tama peyaxõgũgu

i ngēma Moïché ümatüxü i ore, ¿rü ñuxácü tá peyaxögü i ngēma choma pemaã nüxü chixuxü? —ñanagürü ga Ngechuchu.

6

Ngechuchu rü nanachibüexē ga 5000 ga yatügü (Mt 14.13-21; Mr 6.30-44; Lc 9.10-17)

¹ Rü yemawena ga Ngechuchu rü naxtaxa ga Gariréagu ãeganearütocutüwa tomaã naxü. Rü norü toéga ga guma naxtaxa rü Tibéria nixí. ² Rü muxüma ga duüxügü rü nawe narüxí. Yerü üpaacü rü marü nüxü nadaugü ga ñuxácü Ngechuchu na naxüxü ga taxü ga mexügü ga Tupanaärü poramaã üxü ga yexguma duüxügü ga idaaweegüxcèx yataanexēgüãgu. ³ Rü yexguma ga Ngechuchu rü wüxi ga mëxpúnewa tomaã ínaxüãchi. Rü wüxigu tomaã yéma narüto. ⁴ Rü marü ningaica ga yema Yudíugüarü peta ga Üpetüchiga. ⁵ Rü yexguma Ngechuchu nüxü dawenügu rü nüxü nadau ga muxüma ga duüxügü ga nawe rüxíxü. Rü yemacèx Piripina naca, rü ñanagürü: —¿Rü ngextá tá naxcèx tataxe i nawemü i ñaã duüxügü na nachibüexēxüxcèx? —ñanagürü. ⁶ Rü nümatama ga Ngechuchu rü marü nüxü nacüèx ga tacü tá na naxüxü. Natürü yema ñanagürü Piripixü, yerü nüxü nacüáxchaü ga tacümaã tá na nangäxüãxü. ⁷ Rü yexguma Ngechuchuxü nangäxü ga Piripi, rü ñanagürü: —Woo chi naxcèx itaxegügu i 200 i dñeru naguxü i pãü, rü tãü chima nüxü ningu ega woo wüxichigüna íraxü ixächigügu —ñanagürü. ⁸⁻⁹ Rü yexguma ga Aüdré ga Ngechuchuarü ngüexü ga Pedru ga Chimáü naēneē, rü ñanagürü: —Nuã nangëxma i wüxi i buxü rü nüxü nangëxma i 5 i pãü i chebadanaxcèx rü taxre ta i choxni. ¿Natürü tacüwa name i ngēma naxcèx i ñaã muxüchixü i duüxügü? —ñanagürü. ¹⁰ Rü yexguma ga Ngechuchu rü ñanagürü toxü: —¡Ëcü, namaã nüxü pixu i duüxügü na ínatogüxcèx! —ñanagürü. Rü yema nachicawa rü nametëxéane ga guma maxë. Rü gumatëxewa narütogü ga duüxügü. Rü maneca 5000 wa nangu ga yexguma yatügüxica ixugügu. ¹¹ Rü yexguma ga Ngechuchu rü nanade ga yema pãügü, rü Tupanana moxë naxã. Rü yemawena rü toxü nayanu na yema duüxügü ga yéma rütogüxüxü tayanuxüxcèx. Rü yexgumarüü ta ga choxni rü nüxü toxü nayanuxëē, ñuxmata meãma nachibüe ga guxüma ga yema duüxügü. ¹² Rü yexguma marü meã nachibüegu ga guxüma, rü Ngechuchu toxü namu rü ñanagürü toxü: —¡Penade i ngēma naxchipëxegü i íyaxügüxü na tama inaxaiyèxüxcèx! —ñanagürü. ¹³ Rü tanade ga yema naxchipëxegü ga yema 5 ga pãüwa íyaxüxü, rü 12 ga pexchi namaã tanaxüãcugü. ¹⁴ Rü yexguma yema duüxügü nüxü daugügu ga yema mexü ga taxü ga Tupanaärü poramaã naxüxü ga Ngechuchu, rü ñanagürügü: —Aixcümaxüchi daa nixí ya Tupanaärü orearü uruü ga guma ínangüxëécü —ñanagürügü. ¹⁵ Natürü ga Ngechuchu rü nüxü nicüèxãchi ga duüxügü rü na norü ãëxgacüxü yangucuchixëégüchaüãxü. Rü yemacèx nüxna nixügachi rü yéamaxüra naxü nawa ga guma mëxpüne na nüxícatama nayexmaxüxcèx.

Dexáétügu nixü ga Ngechuchu (Mt 14.22-27; Mr 6.45-52)

¹⁶ Rü yexguma marü nachütagu, rü toma ga Ngechuchuarü ngüexügü rü wenaxärü naxtaacutüwa taxí. ¹⁷ Rü poraãcü naxëãne. Rü tama ínangu ga Ngechuchu. Rü yemacèx wüxi ga ngue ga taxünegu tichoü, rü itaxíãchi ga na tocutüwa taxíxü ga Capernáüärü íãnewa na tangügüxcèx. ¹⁸ Rü yexguma tixãüyane rü inaxügü ga na poraãcü yabuaxü. Rü yemagagu rü poraãcü nayuape. ¹⁹ Rü yexguma marü 5 ga kilómetru tixãügu, rü Ngechuchuxü

tadaugü ga na dexáchiüétügu yaxüxü. Rü toma ga norü ngúexüğü rü poraãcü tamuüë. ²⁰ Natürü nüma ga Ngechuchu rü ñanagürü toxü: —Choma chixi. ¡Rü tãxü i pemuüëxü! —ñanagürü. ²¹ Rü yexguma ga toma ga norü ngúexüğü rü taãëãcüma tanayauxgüchaü ga toweüwa. Rü yexgumatama ítangügü ga yema ítaxüüwa.

Ngechuchucèx nadaugü ga duüxüğü

²² Rü moxüãcü ga yema duüxüğü ga naxtaxaarü tocutügu rüchoxü, rü nüxü nicuëxãchitanü ga toma ga Ngechucharü ngúexüğü ga marü nagu na taxüxü ga guma ngue ga taxüne ga nügümaã wüxicane. Rü nüxü nacuëxgü ta ga Ngechuchu rü tama towe na naxüxü. ²³ Rü yexguma yemagu ínaxüñüëyane, rü yoxocüne ínangügü ga náigü ga ngue ga itaxüne ga Tibériaarü íãnewa ne íxüne. Rü norü ngaicamana nangügü ga yema nachica ga ngextá Ngechuchu ínachibüexëëxüwa ga yema muxüma ga duüxüğü ga yexguma moxë ínaxãxgu naxcèx ga yema pãü. ²⁴ Rü yexguma yema duüxüğü nüxü daugügu ga guma nguewa na Ngechuchu rü toma ga na tatauxexüma rü yexma guma ngegügu nichoü na Ngechuchucèx yadaugüxü Capernáüãrü íãnegu.

Ngechuchu nixi i pãü i maxü tüxna äxü

²⁵ Rü yexguma guma naxtaxaarü tocutüwa nangügüga yema duüxüğü, rü Ngechuchuxü yexma nayangaugü. Rü nüxna nacagü, rü ñanagürügü: —Pa Ngúexëëruüx, ¿ñuxgu nixi i nuã cunguxü? —ñanagürügü. ²⁶ Rü Ngechuchu nanangãxü, rü ñanagürü nüxü: —Aixcüma pemaã nüxü chixu rü tama yema nüxü na picuëxãchitanüxüçèx ga yema mexüğü ga Tupanaarü poramaa chaxüxü nixi i chauxcèx pedaugüxü. Natürü chauxcèx pedaugü yerü meãma pechibüe nawa ga yema õna ga pexna chaxãxü. ²⁷ —¡Tãxü i naxcèx pepuracüexü i õna i paxama gúxü! Rü narümemae nixi i naxcèx pepuracüe i ngema maxü i aixcüma ixüxü i taguma gúxü. Rü ngëma nixi i maxü i choma i Tupana Nane ya duüxüxü chixücü tá pexna chaxãxü, erü Chaunatü ya Tupana rü marü nanangoxëë na aixcüma Nane chiüxü —ñanagürü. ²⁸ Rü yexguma ga nümagü rü nüxna nacagü, rü ñanagürügü: —¿Tacü tá taxüe na tayanguxëëxüçèx i ngëma Tupana toxü naxwëxexü? —ñanagürügü. ²⁹ Rü Ngechuchu nanangãxü rü ñanagürü nüxü: —Rü Tupana rü núma choxü namu. Rü ngëma nüma pexü nanaxwëxexü nixi na choxü peyaxögüxü —ñanagürü. ³⁰ Rü yexguma ga nümagü rü nüxna nacagü, rü ñanagürügü nüxü: —¿Tacü rü cuëxruüxü tá toxü cudauxëë na cuxü tayaxögüxüçèx na aixcüma Cristu quiüxü? ¿Rü tacü i to i mexü tá toxcèx cuxüxü i ñuxmax? ³¹ Yerü nuxcümaügüxü ga tórü oxigü, rü nanangögüga yema pãü ga Tupana nüxna äxü ga chianexüwa ga ngextá taxüema íxãpataxüwa. Rü Tupanaãrü ore i ümatüxüwa rü ñanagürü:

“Tupana rü daxüçüãx ga pãümaã nanachibüexëë ga duüxüğü”, ñanagürü i ngëma orewa. ³² Rü Ngechuchu nanangãxü rü ñanagürü nüxü: —Aixcüma pemaã nüxü chixu rü tama nixi ga Moíché yüxü ga nüxna naxãxü ga yema pãü ga daxü- çüãx, natürü Chaunatü ga Tupana nixi ga nüxna naxãcü. Rü nüma nixi i ñuxma i pexna naxããxü i pãü i aixcüma ixüxü i daxüwa ne üxü. ³³ —Erü ngëma pãü i Tupana ixãxü, rü daxügüxü i naãnewa ne naxü rü nanamaxëëë i ñoma i naãnecüãx i duüxüğü —ñanagürü. ³⁴ Rü nümagü rü naxcèx ínacagü, rü ñanagürügü nüxü: —Pa Corix, ¡guxüguma toxna naxãëcha i ngëma pãü! —ñanagürügü. ³⁵ Rü Ngechuchu ñanagürü nüxü: —Choma nixi i ngëma pãü i maxëëëruü chiüxü. Rü yixema texé ya chauxütawa üxë rü tagutáma tataiya. Rü texé ya choxü yaxöxë rü tagutáma titawa. ³⁶ —Natürü marü pemaã nüxü chixu rü woo na choxü pedaugüxü rü tama choxü

peyaxōgü i pemax. ³⁷—Rü guxāma ya yíxema duūxēgü ya Chaunatü choxna tüxü mugüxe rü chorü duūxügü tixīgü. Rü texé ya choxü yaxōgüxe rü tãütáma tüxü chaxoox. ³⁸—Yerü tama choxrütama ngúchaŭ na chaxüxücèx nixĩ ga daxüguxü ga nañewa ne chaxüxü. Natürü núma chaxü na chanaxüxücèx i norü ngúchaŭ ya Chaunatü ya núma choxü mucü. ³⁹—Rü ngēma norü ngúchaŭ ya Chaunatü ya Tupana ya núma choxü mucü nixĩ i na taxúexüma ichayarütaxüxü ya yíxema choxna tüxü namugüxe. Erü núma ya Chaunatü nanaxwae na tüxü yuwa ícharüdagüxēxü i nañeärü guxgu. ⁴⁰—Choma nixĩ i Tupana Nane chiixü. Rü ngēma norü ngúchaŭ ya Chaunatü ya Tupana ya núma choxü mucü nixĩ na tüxü nangēxmaxü i maxü i taguma gúxü ya guxāma ya texé ya choxü daugüxe rü choxü yaxōgüxe. Erü choma tá nixĩ i tüxü ícharüdagüxēxü i nañeärü guxgu —ñanagürü. ⁴¹ Rü yexguma yema orexü naxĩnūēgu ga yema Yudíugü, rü inanaxügüe ga Ngechuchuchiga na yadexagüxü. Yerü ñanagürü ga Ngechuchu: —Choma nixĩ i pãu i daxüguxü i nañewa ne chaxüxü —ñanagürü. ⁴² Rü ñanagürügü: —¿Taux ēxna ñaã yíxü i Ngechuchu i Yúche nane? Rü yixema rü tüxü tacuèx ya nanatü rü naē. ¿Rü ñuxäcü i núma i “Daxüwa ne naxüxü”, ñaxü? —ñanagürügü. ⁴³ Rü Ngechuchu ñanagürü nüxü: —¡Nüxü perüxoe na choxü na pixuechaxü! ⁴⁴ —Taxúema chauxütawa tangu ega tama choxna tüxü namuxgu ya chaunatü ga guma núma choxü mucü. Rü texé ya chauxütawa ngugüxe rü choma rü tá wena tüxü chamaxēxē i nañeärü guxgu. ⁴⁵—Nuxcümaügüxü ga Tupanaärü orearü uruügüarü poperawa naxümatü i ore i ñaxü:

“Tupana tá guxāxü nangüexēē”,

ñaxü. Rü ngēmacèx guxāma ya texé ya Chaunatüxü ñnuxē rü naxütawa ngüxe, rü chauxütawa taxĩ. ⁴⁶—Taguma texé Chaunatü ya Tupanaxü tadau. Rü chaxicatama nixĩ i nüxü chadauxü erü naxütawa ne chaxü. ⁴⁷—Aixcüma pemaã nüxü chixu rü texé ya choxü yaxōxē rü tüxü nangēxma i maxü i taguma gúxü. ⁴⁸—Choma nixĩ i pãu i maxēxēeruü chiixü. ⁴⁹—Rü perü oxigü ga nuxcümaügüxü rü nanangōx ga yema pãu ga Tupana nüxna äxü ga yema nachica ga ngextá taxúema íxāpataxüwa. Natürü woo nanangōxgü ga yema pãu rü nayueamatama. ⁵⁰—Natürü ñaã pãu i pemaã nüxü chixuxü i daxüwa ne üxü rü chomatama chixĩ. Rü guxāma ya texé ya choxü yaxúxe ñoma pãu tangōxürüü rü tá tamaxēcha. ⁵¹—Chomatama nixĩ i pãu i maxēxēeruü i daxüwa ne chaxüxü. Rü texé ya ñoma chomaã taxāwemüxürüü choxü yaxōxē rü guxügutáma tamaxēcha. Erü ngēma pãu i choma tüxna chaxāxü rü chaxunetama nixĩ. Rü ichanaxā i chaxune na namaxēxücèx i ñoma i nañecüāx i duūxügü —ñanagürü ga Ngechuchu. ⁵² Rü yexguma ga yema Yudíugü rü poragaäcü nügüna nacagüe, rü ñanagürügü: —¿Nuxäcü tá i ñaã yatü i naxüne tátama tüxü nangōxēxü? —ñanagürügü. ⁵³ Rü Ngechuchu ñanagürü nüxü: —Rü choma i Tupana nane na duūxüxü chiixü rü aixcüma pemaã nüxü chixu rü ngēxguma pema rü tama chaxunemaã pexāwemügügu rü tama nawa pexaxegügu ya chaugü, rü tãütáma pexü nangēxma i maxü i taguma gúxü. ⁵⁴—Texé ya chaxunemaã āwemüxē rü chaugüwa axexe rü tüxü nangēxma i maxü i taguma gúxü. Erü choma rü tá tüxü chamaxēē ega nañeärü guxgu. ⁵⁵—Erü chaxune rü ñnaxüchi nixĩ rü chaugü rü axexüxüchi nixĩ. ⁵⁶—Texé ya chaxunemaã āwemüxē rü chaugüwa axexe rü chowa tayaxüx rü choma i tümawa. ⁵⁷—Chaunatü ga núma choxü mucü rü namaxü. Rü núma choxna nanaxā i maxü. Rü ngēxgumarüü ta i choma rü tá tüxna chanaxā i maxü ya yíxema choxü yaxúxe rü choxü yaxōxē. ⁵⁸—Marü pemaã nüxü chixu na choma rü pãu i daxüwa ne üxü chiixü. Natürü choma rü tama yema pãu ga nuxcümaügüxü ga perü oxigü ngōxgüxü ga pãürüü chixĩ. Yerü

woo ga yema pãu na nangõxgũxũ ga perũ oxigũ rũ nayueamatama. Natürũ texé ya choxũ yaxúxe, ñoma pãu tangõxürũ, rũ choxũ yaxõxẽ rũ guxũgutáma tamaxũ —ñanagürũ. ⁵⁹ Rũ Ngechuchu rũ duũxũgũmaã nüxũ nixu ga yema ore ga yexguma nangúexẽãgu ga Yudíugüarũ ngutaquẽxepataũwa ga ñane ga Capernáũwa.

Ngechucharũ orewa nangẽxma i maxũ i taguma gúxũ

⁶⁰ Rũ yexguma nüxũ naxĩnũegu ga yema nguxẽẽtae, rũ muxũma ga yema duũxũgũ ga nawe ruxĩxũ rũ ñanagürũgũ: —Rũ ngẽma tamaã nüxũ yaxuxũ, rũ naguxchaxüchi na nüxũ icuáxũ na ñuxũ ñaxũ. ¿Ñuxãcü texé tüxũ natauxcha na naga taxĩnũxũ? —ñanagürũgũ. ⁶¹ Natürũ ga Ngechuchu rũ nüxũ nacuèxama ga yemaãcü nũgũmaã na iyadexagũxũ naxcèx ga yema nguxẽẽtae, rũ yemacèx nüxna naca, rũ ñanagürũ: —¿Éxna peãẽwa nangux i ngẽma ore? ⁶² —Rũ ngẽxguma peãẽwa nanguxgu i ngẽma ore i pemaã nüxũ chixuxũ, rũ ¿tacügu chi perũxĩnũẽxũ ega choxũ pedèuxgu na wenaxãrũ daxũ na chaxĩxũ, ga noxri ne chaxũxũwa na chaxũxũ i choma i Tupana Nane na duũxũxũ chiĩxũ? ⁶³ —Tupanaãe i Üünexũ nixĩ i inaxãxũ i maxũ i taguma gúxũ. Rũ tama pexene nixĩ i pexũ maxẽxẽxũ. Rũ ngẽma ore i pemaã nüxũ chixuxũ rũ peãcèx nixĩ, rũ nawa nangẽxma i maxũ i taguma gúxũ. ⁶⁴ —Natürũ tangẽxma i petanũwa ya ñuxre ya tama yaxõgũxe —ñanagürũ. Rũ yema ñanagürũ ga Ngechuchu yerũ noxriarũ ügũgumama marũ nüxũ nacuèx ga texé tá nüxũ na yaxõgũxũ, rũ texé tá cúãcü ínaxuaxũxũ. ⁶⁵ Rũ ñanagürũ ta: —Rũ ngẽmacèx marũ pemaã nüxũ chixu rũ taxuacũma texé chauxũtawa tangu ega tama Chaunatũ chauxũtawa tüxũ gaxgu —ñanagürũ. ⁶⁶ Rũ yexguma inanaxũgũe ga nüxna na yaxĩgũxũ ga muxũma ga yema duũxũgũ ga noxri nawe ruxĩchiréxũ. Rũ marũ tama nawe ínaxĩxũ. ⁶⁷ Rũ yexguma ga Ngechuchu rũ norũ 12 ga ngúexũgũna naca, rũ ñanagürũ nüxũ: —¿Éxna pema rũ ta choxna pixĩgachitanũchaũ? —ñanagürũ. ⁶⁸ Natürũ Chimáũ ga Pedru rũ nanangãxũ, rũ ñanagürũ: —Pa Corix, ¿Texéxũtawa chi taxĩxũ ega cuxna tixĩgachitanũgu? Erũ cuma rũ cuxũ nangẽxma i ore i nawa nangẽxmaxũ i maxũ i taguma gúxũ. ⁶⁹ —Toma rũ marũ cuxũ tayaxõgũ, rũ nüxũ tacuèx na cuma quiĩxũ ya Cristu ya Üünecũ ya Tupana Nane —ñanagürũ. ⁷⁰ Rũ Ngechuchu toxũ nangãxũ, rũ ñanagürũ: —¿Taux éxna choma yĩxũ ga pexũ chidexechixũ ga pema ga 12? Natürũ nangẽxma i wüxi i petanũwa i Chatanáãrũ duũxũ ixĩxũ —ñanagürũ. ⁷¹ Rũ Yuda ga Icariúte ga Chimáũ nanechiga nixĩ ga yadexaxũ ga Ngechuchu. Yerũ Yuda tá nixĩ ga cúãcü ínaxuaxũxũ rũ woo ga nüma rũ wüxi ga totanũxũchiréx na yĩxũ.

7

Ngechuchueneẽgũ rũ tama nüxũ nayaxõgũ

¹ Rũ yemawena ga Ngechuchu rũ Gariréaanewa yexmagũne ga ñanegũgu nixũãgũchigũ. Rũ tama Yudéaanewa nayexmachau yerũ yemacũãx ga Yudíugüarũ ãẽxgacũgũ rũ naxcèx nadaugũ ga na yamèxgũchaũãxũcèx. ² Natürũ marũ ningaica ga yema Yudíugüarũ peta ga nugu norũ düxenũgũ yaxũgũxũ na yemawa nüxna nacuèxãchiexũcèx ga ñuxãcü nuxcũmaũgũxũ ga norũ oxigũ na naxũgũxũ ga norũ düxenũgũ ga naĩxãtũnaxcèx ga yexguma Moĩchéwe naxĩxgu ga ngextá taxúema íxãpataxũwa. Rũ yemacèx nixĩ ga Düxenũgüarũ Petagu naxãegaxũ. ³ Rũ naẽneẽgũ ga Ngechuchu rũ ñanagürũgũ nüxũ: —Tama name i nuxã Gariréaarũ naãnegu curũxãũx. Rũ name nixĩ i petacèx Yudéawa cuxũ, na ngẽma duũxũgũ i cuwe ruxĩxũ i ngẽma ngẽxmagũxũ nüxũ daugũxũcèx i ngẽma cuèxruũgũ i mexũgũ i Tupanaãrũ

poramaã cuxüxü. ⁴—Erü ngëxguma chi wüxi ya yatü rü duüxügüxü nügü nacuèxëëchaügu rü tama cúäcü nanaxü i tacü i naxüxü. Rü ñuxma na cunaxüxü i muxüma i mexügü i Tupanaãrü poramaã cuxüxü, rü name nixi i guxü i duüxügüpëxewa cunaxü —ñanagürügü. ⁵ Rü yema ñanagürügü ga naëneëgü yerü woo ga nümagü rü ta tama nüxü nayaxögü. ⁶ Rü yexguma ga Ngechuchu rü nanangãxü, rü ñanagürü nüxü: —Tauta nawa nangu i ngunexü na petawa chaxüxü. Natürü pexcèx rü ngëxürüxümare i ngunexü nixi i mexü na petawa nagu pexixü. ⁷—Ngëma duüxügü i ñoma i naãnecüãx rü tama pexchi naxaie. Natürü chauxchi naxaie erü chanangoxëë i ngëma naxügüxü rü na nachixexü. ⁸—Name nixi i petawa pexi i pemax. Choma rü tauta ngëma chaxü erü tauta nawa nangu i ngunexü i nagu ngëma chaxüxü —ñanagürü ga Ngechuchu. ⁹ Rü yexguma yema ñaxguwena, rü Gariréaanegu narüxãüx.

Ngechuchu rü Düxenügüarü Petawa naxü

¹⁰ Natürü nawena ga naëneëgü ga petawa na naxixü, rü Ngechuchu rü ta yéma naxü. Natürü cúäcü yéma naxü, rü tama poraäcü duüxügüxü nügü nadauxëë. ¹¹ Rü yema Yudíugüarü äëxgacügü rü naxcèx nadaugü ga yema petawa, rü ñanagürügü: —¿Ngextá nangëxma i ngëma yatü? —ñanagürügü. ¹² Rü nügütanüwa ga yema duüxügü ga yéma yexmagüxü, rü poraäcü Ngechuchuchiga ínidexagü. Rü ñuxre ga yema duüxügü rü ñanagürügü: —Yima rü wüxi ya yatü ya mecü nixi —ñanagürügü. Natürü ga togü rü ñanagürügü: —Ngëma yatü rü tama name erü duüxügüxü nawomüxëë —ñanagürügü. ¹³ Natürü taxüüma ga duüxügü rü mea togüpëxewa Ngechuchuxü nicuèxüügüchaü, yerü yema Yudíugüarü äëxgacügüxü namuüë. ¹⁴ Rü yexguma marü yema petaarü ngãxüwa nanguxgu, rü nixücu ga Ngechuchu nawa ga tupauca ga taxüne. Rü inanaxügü ga na nanguxëëtaexü. ¹⁵ Rü yema Yudíugüarü äëxgacügü, rü nabaixãchiãëgü namaã ga yema ore ga Ngechuchu nüxü ixuxü. Rü ñanagürügü: —¿Nuxäcü i ngëmaäcü poraäcü nüxü nacuáxü, rü taguma texé nanguxëë? —ñanagürügü. ¹⁶ Rü Ngechuchu nanangãxü rü ñanagürü nüxü: —Ñãã chorü nguxëëtae rü tama choxrü nixi, erü Chaunatu ya núma choxü mucüarü nixi. ¹⁷—Ngëxguma texé naxüxchaügu i Tupanaãrü ngüchaü rü yixema tá nüxü tacuèx ngoxi aixcüma Tupanaxütawa chanayaxu i ngëma chorü nguxëëtae rü ëxna chaugüxütawatama chayaxuxü yixi i ngëma. ¹⁸—Yixema texé ya mexü i tümachigaxütama ixuxe rü ngëmaäcü tanaxü erü tanaxwëxe i duüxügü na tüxü icuèxüügüxü. Natürü texé nüxü tixu i ore i mexü nachiga i ngëma tüxü muxü, rü aixcüma nixi i tümaãrü ore. Rü tama dora nixi i ngëma nüxü tixuxü. ¹⁹—¿Tama ëxna aixcüma yixü ga Moïché pexna naxãxü ga Tupanaãrü mugü? Natürü taxüema i pema naga pexinüë i ngëma mugü. ¿Rü ñuxma rü tüxcüü nixi i choxü pimëxgüchaüxü? —ñanagürü. ²⁰ Rü yema duüxügü nanangãxügü, rü ñanagürügü: —Cuma rü ngoxo cuwa nangëxmamare. ¿Éxna texé cuxü timëxgüchaü? —ñanagürügü. ²¹ Natürü ga Ngechuchu rü ñanagürü nüxü: —Choma rü ngüxchigaarü ngunexügu chanamexëë ga wüxi ga yatü. Rü guxãma i pema rü penuãëgü naxcèx ga yema wüxitama ga mexü ga ngüxchigaarü ngunexügu chaxüxü. ²²—Natürü pema rü ta ngüxchigaarü ngunexügu pepuracüe na nagu pexixücèx ga Moïchéarü mugü. Rü Moïché pemaã nüxü nixu na tüxü ípewiechëxmüpëxechiraüxü ya guxãma ya yatüxe ya buxe. Natürü tama Moïché nixi ga inaxügücü ga yema, yerü nuxcümaügüxü ga perü oxigüwa nixi ga ne naxüxü. Rü ñuxma i pema rü yema mugagu rü tüxü ípewiechëxmüpëxechiraü ya guxãma

ya buxe ya yatüxe woo ngüxchigaarü ngunexü yixigu. ²³ —Rü ngēmaācü i pema rü ngüxchigaarü ngunexügu buxexü ípewiechēxmüpēxechiraü erü naga pexĩnüechaü i Moĩchéarü mugü. ¿Rü ñuxma rü tüxcüü yĩxü i chomaã penuēxü naxcèx na ngüxchigaarü ngunexügu chanamexēēxü ga wüxi ga yatü ga idaaweecü? ²⁴ —Rü ngēmacèx tama name i ngürümare penangugü i ngēma chaxüxü. Rü penaxwèxe i meã nagu perüxĩnüēxira, na aixcüma meã penangüxücèx —ñanagürü ga Ngechuchu.

Ngechuchu rü Tupana Nane nixĩ

²⁵ Rü ñuxre ga yema duüxügü ga Yerucharéügu āchiügüxü rü nügüna nacagüe, rü ñanagürügü: —¿Taux ēxna daa yĩxü ya yima yatü ya āēxgacügü naxcèx daugücü na yamēxgüchaüāxücèx? ²⁶ —¿Dücèx! Gua nixĩ rü yēa guxü i duüxügüpēxewa nidexa rü taxúema ñuxü ñatarügü nüxü. ¿Taux ēxna i tórü āēxgacügü i marü nüxü yaxōgüāxü na aixcüma Cristu na yĩxü i nümax? ²⁷ —Natürü i yixema rü nüxü tacuèxgü na ngextá ne naxüxü i nümax. Natürü ngēxguma aixcüma Cristu núma üxgu rü taxúetáma nüxü tacuèx na ngextá na ne naxüxü —ñanagürügü. ²⁸ Rü nüma ga Ngechuchu rü tupauca ga taxünewa ínanangüexēē ga duüxügü. Rü yexguma nüxü naxĩnügu ga yema ore ga Yudíugü nüxü ixugüexü ga nachiga, rü tagaācü ñanagürü: —Pema rü marü choxü pecuèx rü nüxü pecuèx na ngextá na ne chaxüxü. Natürü tama chaugagu nixĩ i núma chaxüxü. Choma núma chaxü yerü núma choxü namu ga Tupana ya naxwèxecü na nüxü yaxōgüxü natürü i pema rü tama nüxü pecuácü. ²⁹ —Choma rü nüxü chacuèx yerü naxütawa ne chaxü, rü nüma nixĩ i núma choxü namuxü —ñanagürü. ³⁰ Rü yexguma ga yema āēxgacügü rü Ngechuchuxü niyaxgüchaü. Natürü taxuüma nayayauxgü, yerü tauta nawa nangu ga ngunexü ga na yayauxgüāxü rü na yamēxgüāxücèx. ³¹ Natürü muxüma ga duüxügü rü nüxü nayaxōgü. Rü ñanagürügü: —¿Ngēxguma ínanguxgu ya Cristu rü tacü rü cuèxruü i taxü tá naxü ya daa yatü tama üxü i ñuxmax? —ñanagürügü.

Parichéugü rü Ngechuchuxü niyaxgüchaü

³² Rü yema Parichéugü rü duüxügüxü naxĩnüē ga yemaācü Ngechuchuchiga na yadexagüxü. Rü yemacèx ga nümagü rü paigüarü āēxgacügü rü yēma nanamugü ga tupauca ga taxüneärü purichíagü na Ngechuchuxü yanayauxgüxücèx. ³³ Rü yexguma ga Ngechuchu rü ñanagürü nüxü: —Paxaāchi tátama nixĩ i petanüwa changēxmaxü, rü ñuxüchi tá chataegu naxütawa ya yima núma choxü mucü. ³⁴ —Pema rü tá chauxcèx pedaugü, natürü tãütáma choxü ipeyangaugü. Erü ngēma ngextá tá íchangēxmaxüwa rü taxuacü ngēma pengugü. ³⁵ Rü yexguma ga yema Yudíugüarü āēxgacügü rü nügüna nacagüe, rü ñanagürügü: —¿Ngextá tá naxü ega taxuacütáma nüxü iyarüngaugügu? ¿Éxna ngēma Yudíugü i to i nachiüānewa ngēxmagüxütanüwa tá naxü rü ēxna ngēma tama Yudíugü ixīgüxütanüwa tá naxü na yangüexēēāxücèx? ³⁶ —¿Rü tacüchiga nixĩ i ngēma na ngēma ñaxü:

“Tá chauxcèx pedaugü natürü tãütáma choxü ipeyangaugü, erü taxuacütáma ngēma pexĩ i ngēma tá íchangēxmaxüwa”, ñaxü? —ñanagürügü.

Dexá i maxēēruüchiga nidexa ga Ngechuchu

³⁷ Rü yema nawa iyacuáxü ga petaarü ngunexü nixĩ ga guxü ga togü ga ngunexüärü yexera rümemaxü naxcèx ga Yudíugü. Rü yema ngunexügu nixĩ ga inachixü ga Ngechuchu rü tagaācü ñaxü: —Rü ngēxguma texé itawaxgu rü ñuã chauxütawa taxü rü tayaxaxe! ³⁸ —Rü “texé ya choxü yaxōxē rü tumaärü maxünewa tá nibaibe i taxü i dexá i maxēēruü” ngēma Tupanaärü

ore i ũmatũxũ nũxũ ixuxũrũũ —ñanagũrũ. ³⁹ Rũ yexguma yema ñaxgu ga Ngechuchu rũ Tupanaãe i Ũñexũchiga nixĩ ga yadexaxũ. Rũ nũxũ nixu ga guxũma ga yema nũxũ yaxõgũxũ rũ tá na nayauxgũãxũ i Naãe i Ũñexũ. Natũrũ tama yexgumatama nanayauxgũ, yerũ tauta wenaxãrũ daxũguxũ ga naãnecèx nataegu ga Ngechuchu na guxũãrũ ãexgacũ na yĩxũcèx.

Ngechuchugagu nũgũ nitoye ga duũxũgũ

⁴⁰ Rũ nũmaxũ ga yema duũxũgũ rũ yexguma nũxũ naxĩnũegu ga yema Ngechuchu nũxũ ixuxũ, rũ ñanagũrũgũ: —Aixcũma ñãã yatũ nixĩ i ngẽma Tupanaãrũ orearũ uruũ i Ínguxchaũxũ —ñanagũrũgũ. ⁴¹ Rũ togũ rũ ñanagũrũgũ: —Daa nixĩ ya Cristu —ñanagũrũgũ. Natũrũ togũ rũ ñanagũrũgũ: —Tama nixĩ, erũ taxucũrũwa Gariréaanecũãx nixĩ ya Cristu. ⁴² —Erũ Tupanaãrũ ore i ũmatũxũwa rũ ñanagũrũ:

“Cristu rũ tá Dabítaa nixĩ, rũ tá nangox i ñãne i Berẽũwa ga ngextá Dabí íbuxũwa”, ñanagũrũgũ. ⁴³ Rũ yemaãcũ Ngechuchugagu nũgũ nitoye ga duũxũgũ. ⁴⁴ Rũ ñuxre ga yema duũxũgũ rũ Ngechuchuxũ niyauxgũchaũ, natũrũ taxuũma nayauxgũ.

Yudũgũarũ ãexgacũgũ rũ tama Ngechuchuaxũ nayaxõgũchaũ

⁴⁵ Rũ yema tupauca ga taxũneãrũ purichíagũ, rũ Parichéugũcèx rũ paigũarũ ãexgacũgũcèx nawoegu. Rũ yema ãexgacũgũ rũ nũxna nacagũ, rũ ñanagũrũgũ: —¿Tũxcũũ tama nuã penaga? —ñanagũrũgũ. ⁴⁶ Rũ yema purichíagũ rũ nanangãxũgũ rũ ñanagũrũgũ: —Taguma texé tidexa i ñãã yatũ idexaxũrũũ —ñanagũrũgũ. ⁴⁷ Rũ yexguma ga Parichéugũ rũ ñanagũrũgũ nũxũ: —¿Éxna pexũ rũ ta marũ nawomũxẽe i nũmax? ⁴⁸ —Dũcèx, rũ taxúema i tomãx i Parichéugũ rũ taxuũma i tórũ ãexgacũgũ rũ nũxũ nayaxõgũ i ngẽma Ngechuchu. ⁴⁹ —Natũrũ ñãã duũxũgũ i tama Tupanaãrũ mugũxũ cuèxgũxũ rũ marũ nachixexũgugũ —ñanagũrũgũ. ⁵⁰ Natũrũ Nicodẽmu ga Parichéu ixĩcũ ga wũxicana Ngechuchuxũtagu naxũãnecũ, rũ ñanagũrũ nũxũ: ⁵¹ —Ngẽma tórũ mugũ i ũmatũxũwa rũ ñanagũrũ:

“Taxuacũma wũxi i yatũxũ tapoxcu ega tama nũxũ ixĩnũẽxĩragu i norũ dexa na nũxũ icuãxũcèx na tacũ na naxũxũ”, ñanagũrũ. ⁵² Rũ yexguma ga natanũxũgũ rũ nanangãxũgũ, rũ ñanagũrũgũ nũxũ: —¿Éxna cuma rũ ta Gariréaanecũãx quixĩ? ¡Nawa nangux i Tupanaãrũ ore i ũmatũxũ rũ ngẽma tá nũxũ cudau rũ taxuũtãma i Tupanaãrũ orearũ uruũ rũ Gariréaanecũãx nixĩ! —ñanagũrũgũ. ⁵³ Rũ yexguma ga wũxichigũ rũ nachiũwa naxĩ.

8

Nge ga ãtecũ ga naĩ ga yatũmaã ngẽãexcũ

¹ Rũ Ngechuchu rũ Oríbunecũgu ãegane ga mèxpũnewa naxũ. ² Rũ moxũãcũ ga yexguma yangunegu, rũ wenaxãrũ tupauca ga taxũnecèx nataegu. Rũ ga duũxũgũ rũ naxcèx naxĩ. Rũ nũma ga Ngechuchu rũ ínarũto, rũ inanaxũgũ ga na nangũexẽãxũ ga duũxũgũ. ³ Rũ yema ngũexẽeruũgũ ga Moĩchearũ mugũwa ngũxẽẽtaegũxũ rũ Parichéugũ, rũ Ngechuchuxũtãwa ngĩxũ nagagũ ga wũxi ga nge ga ãtecũ ga ngĩxũ nadaugũcũ ga naĩ ga yatũmaã na inapexũ. Rũ guxũma ga yema duũxũgũ ga yema yexmagũxũpèxegu ngĩxũ nayachixẽegũ. ⁴ Rũ ñanagũrũgũ Ngechuchuxũ: —Pa Ngũexẽeruũx, ñãã nge i ãtecũ rũ ngĩxũ itayangau na naĩ ya yatũmaã na inapexũ. ⁵ Moĩchearũ mugũwa tamaã nũxũ nixu na nutamaã ngĩxũ ímũxũchiãcũma ngĩxũ imãxũ i wũxi i nge i ngẽmaãcũ maxũcũ. ¿Ñuxũ ñacuxũ i cuma i ñuxmax? —ñanagũrũgũ.

⁶ Rŭ yema ñanagŭrŭgŭ ga nŭmagŭ, yerŭ Ngechuchuxŭ guxchaxŭgu nan-guxŕŕŕgŭchaŭ na nŭxŭŭ nayexmaxŭcèx ga tacŭcèx na ínaxuaxŭgŭãxŭ. Natŭrŭ ga Ngechuchu rŭ inayarŭmaxãchi rŭ inanaxŭgŭ ga naxmèxmaã waixŭmŭwa na naxŭmatŭãxŭ. ⁷ Natŭrŭ nŭxŭŭ nacèèxŭgŭama, rŭ yemacèx dŭxwa wenaxãrŭ nadaunagŭ ga Ngechuchu, rŭ ñanagŭrŭ nŭxŭŭ: —Ngexerŭxe i petanŭwa ya ngearŭ pecaduãxŕŕ rŭ tŭxira nuta ngŭxŭŭ tanaña —ñanagŭrŭ. ⁸ Rŭ wenaxãrŭ inayarŭmaxãchi ga Ngechuchu rŭ naxmèxmaã nanaxŭmatŭ ga waixŭmŭwa. ⁹ Natŭrŭ yexguma nŭxŭŭ naxŭnŭŕŕŕ ga yema ore ga Parichéugŭ rŭ inanaxŭgŭe ga nŭgŭ na yawŭxŭxŭŭ ga nŭgŭwe na ínachoxŭxŭ. Rŭ yaguãxgŭ ga Parichéugŭwa inaxŭgŭ ga na ínachoxŭxŭŭ rŭ dŭxwa guxŭma ínachoxŭ. Rŭ yexguma marŭ guxŭma ga Parichéugŭ íchoŭxgu, rŭ Ngechuchu rŭ yema ngecŭxicatama yéma duŭxŭgŭpèxewa nayaxŭgŭ. ¹⁰ Rŭ yexguma ga Ngechuchu rŭ wena nadaunagŭ. Rŭ ngŭxna naca rŭ ñanagŭrŭ ngŭxŭŭ: —Pa Ngecŭx, ¿Ngèxŭgŭ nixŭŭ i ngèma cuxŭŭ ixugŭexŭŭ? ¿Rŭ taxuŭma cuxŭŭ imáxchaŭŭ? —ñanagŭrŭ. ¹¹ Rŭ ngŭma rŭ ngŭgŭrŭgŭ nŭxŭŭ: —Taxuŭma Pa Corix —ngŭgŭrŭgŭ. Rŭ yexguma ga Ngechuchu rŭ ñanagŭrŭ ngŭxŭŭ: —Choma rŭ ta tama cuxŭŭ chapoxcu. Ñuxma rŭ marŭ name rŭ íquixŭŭ rŭ tama wena pecadu cuxŭŭ —ñanagŭrŭ.

Ngechuchu rŭ ñoma i naãneãrŭ ngóonex- èèruŭŭ nixŭŭ

¹² Rŭ wenaxãrŭ duŭxŭgŭmaã nidexa ga Ngechuchu, rŭ ñanagŭrŭ nŭxŭŭ: —Choma nixŭŭ i ñoma i naãnecŭãxãrŭ ngóonexèèruŭŭ. Rŭ yŭxema chowe rŭxŭxŕŕ rŭ chorŭ ngóonexŭwa tangèxma rŭ tŭxna chanaxã i maxŭŭ. Rŭ tá nŭxna ítanguxuchi i tŭmaãrŭ chixexŭŭ —ñanagŭrŭ. ¹³ Rŭ yexguma ga Parichéugŭ rŭ ñanagŭrŭgŭ nŭxŭŭ: —Cuma rŭ cugŭchigaxŭtama quixu. Rŭ ngèma cuchiga i nŭxŭŭ quixuxŭŭ rŭ taxuwama name —ñanagŭrŭgŭ. ¹⁴ Rŭ Ngechuchu nanangãxŭŭ rŭ ñanagŭrŭ nŭxŭŭ: —Rŭ ngèma ore i chauchiga nŭxŭŭ chixuxŭŭ rŭ aixcŭma nixŭŭ woo chomatama yixŭgu i namaã chaugŭétŭwa chidexaxŭŭ. Erŭ choma rŭ nŭxŭŭ chacuèx i ngextá ne chaxŭxŭŭ, rŭ ngextá tá chaxŭxŭŭ. Natŭrŭ pema rŭ tama nŭxŭŭ pecuèx na ngextá ne chaxŭxŭŭ rŭ tama nŭxŭŭ pecuèx na ngextá tá chaxŭxŭŭ. ¹⁵ Pema rŭ choxŭŭ pengugŭ i ñoma i naãnecŭãxŭŭ i duŭxŭgŭŭ nagu rŭxŭnŭŕŕŕãcŭmamare. Natŭrŭ i choma rŭ taxŭexŭma changugŭ. ¹⁶ Natŭrŭ ngèxguma chi texéxŭŭ changugŭgu rŭ aixcŭma meãma tŭxŭŭ changugŭ. Erŭ tama chaxicatama tŭxŭŭ changugŭ, natŭrŭ yima Chaunatŭ ga núma choxŭŭ mucŭmaã nixŭŭ i wŭxigu tŭxŭŭ tangugŭxŭŭ. ¹⁷ Rŭ ngèma mugŭ ga Moŭché ŭmatŭxŭŭ i nagu pexŭxŭŭ, rŭ ñanagŭrŭ:

“Ngèxguma taxre i duŭxŭgŭŭ rŭ wŭxitama i orexŭŭ yaxugŭgu, rŭ ngémawa ãèxgacŭŭ nŭxŭŭ nacuèx na aixcŭma yŭxŭŭ i ngèma nŭxŭŭ yaxugŭexŭŭ”, ñanagŭrŭ. ¹⁸ Rŭ dŭcax, choma nixŭŭ i wŭxi i chauchigaxŭŭ chixuxŭŭ rŭ Chaunatŭ ga núma choxŭŭ mucŭŭ nixŭŭ ya naŭ. ¿Rŭ tŭxcŭŭŭ tama choxŭŭ peyaxŭgŭchaŭŭ i ñuxmax? —ñanagŭrŭ. ¹⁹ Rŭ yexguma ga nŭmagŭŭ rŭ nŭxna nacagŭe rŭ ñanagŭrŭgŭŭ: —¿Ngexcŭŭ ya yima Cunatŭ? —ñanagŭrŭgŭ. Rŭ Ngechuchu nanangãxŭŭ rŭ ñanagŭrŭ: —Choxŭŭ rŭ tama pecuèx rŭ Chaunatŭxŭŭ rŭ ta tama pecuèx. Rŭ ngèxguma chi choxŭŭ pecuèxgŭgu rŭ Chaunatŭxŭŭ rŭ chi ta pecuèxgŭŭ —ñanagŭrŭ. ²⁰ Rŭ yema orexŭŭ nixu ga Ngechuchu ga yexguma nanguxŕŕŕtaegu ga tupauca ga taxŭnewa naxŭtawa ga yema nachica ga ngextá duŭxŭgŭŭ tupaucana dŭŕŕu ngŭxŭŭ íxãgŭxŭwa. Natŭrŭ taxuŭma Ngechuchuxŭŭ niyauxgŭŭ, yerŭ tauta nawa nangu ga yema ngunexŭŭ ga nagu yayauxgŭãxŭŭ.

Ngechuchu rŭ Parichéugŭmaã nŭxŭŭ nixu rŭ ngextá nŭma ínaxŭxŭwa rŭ tax-ucŭrŭwa ngema naxŭŭ

21 RŦ Ngechuchu rŦ wenaxārŦ namaā nŦxŦ nixu, rŦ ñanagŦrŦ: —Choma rŦ tá pexna chixŦ i nŦma, rŦ pema rŦ tá chauxcèx pedaugŦ, natŦrŦ tá perŦ pepadugu peyue. RŦ ngextá íchaxŦxŦwa rŦ taxucŦrŦwama ngema pexŦ — ñanagŦrŦ. 22 RŦ yexguma ga yema YudíugŦ rŦ ñanagŦrŦgŦ: —¿Éxna nŦgŦ tátama nimèx rŦ ngēmacèx tamaā nŦxŦ yaxuxŦ na taxucŦrŦwama ngema ixŦxŦ i ngēma ínaxŦxŦwa? —ñanagŦrŦgŦ. 23 RŦ Ngechuchu ñanagŦrŦ nŦxŦ: —Pema rŦ ñoma i naānecŦāx i duŦxŦgŦ pixŦgŦ, natŦrŦ i choma rŦ daxŦguxŦ i naānewa ne chaxŦ. Pema rŦ ñoma i naāneārŦ duŦxŦgŦ pixŦgŦ natŦrŦ i choma rŦ tama ñoma i naānecŦāx chixŦ. 24 —RŦ ngēmacèx pemaā nŦxŦ chixu rŦ tá perŦ pepadugu peyue. ErŦ ngēxguma tama choxŦ peyaxŦgŦgu na choma chíxŦ ya Cristu, rŦ perŦ pepadugu tá peyue —ñanagŦrŦ. 25 RŦ yexguma nŦxna nacagŦe, rŦ ñanagŦrŦgŦ: —¿NatŦrŦ texé quixŦ i cumax? —ñanagŦrŦgŦ. RŦ Ngechuchu nanangāxŦ, rŦ ñanagŦrŦ: —MarŦ noxritama pemaā nŦxŦ chixu na texé chíxŦ. 26 —RŦ choma rŦ choxŦ nangēxma i muxŦma i tacŦ i chomatama pexŦ changúexēēchaŦxŦ rŦ tacŦcèx pexna na chaçaxŦ, natŦrŦ táŦtáma chanaxŦ i ngēma. ErŦ yima ChaunatŦ ga nŦma choxŦ mucŦ chomaā nŦxŦ ixuxŦ i orexicatama nixŦ i ñoma i naānecŦāxgŦmaā nŦxŦ chixuxŦ. RŦ guxŦma i ngēma nŦxŦ yaxuxŦ ya ChaunatŦ, rŦ aixcŦma nixŦ —ñanagŦrŦ. 27 NatŦrŦ nŦmagŦ rŦ tama nŦxŦ nacuxŦgŦega ga NanatŦ ya Tupanachiga na yŦxŦ na yema ñaxŦ ga Ngechuchu. 28 RŦ yemacèx ga Ngechuchu rŦ ñanagŦrŦ nŦxŦ: —Choma nixŦ i Tupana Nane i duŦxŦxŦ chíxŦ. RŦ yixcŦra ngēxguma curuchawa choxŦ pipotagŦgu, rŦ tá nŦxŦ picuxŦchitanŦ na Cristu na chíxŦ. RŦ tá nŦxŦ pecuxŦ na taxuŦma chauechamatama chaxŦxŦ. RŦ ngēma ChaunatŦ chomaā nŦxŦ ixuxŦicatama nixŦ i pemaā nŦxŦ chixuxŦ. 29 —Yima nŦma choxŦ mucŦ ya ChaunatŦ rŦ chauxŦtawa nangēxma. RŦ taguma choxna nixŦgachi, erŦ choma rŦ guxŦguma chanaxŦ i ngēma norŦ ngúchaŦ ixŦxŦ —ñanagŦrŦ. 30 RŦ yexguma yema ñaxgu ga Ngechuchu rŦ muxŦma ga duŦxŦgŦ nŦxŦ nayaxŦgŦ.

YŦxema TupanaxācŦgŦ ixŦgŦxechiga, rŦ yŦxema pepadutŦŦwa ngēxmagŦxechiga

31 RŦ yexguma ga Ngechuchu rŦ ñanagŦrŦ nŦxŦ ga yema YudíugŦarŦ āēxgacŦgŦ ga nŦxŦ yaxŦgŦxŦ: —Ngēxguma pema meāma peyaxŦgŦechagu i ngēma pemaā nŦxŦ chixuxŦ, rŦ aixcŦmaxŦchi tá chorŦ ngúexŦgŦ pixŦgŦ. 32 —RŦ tá nŦxŦ pecuxŦ i ore i aixcŦma ixŦxŦ. RŦ ngēma ore tá pexŦ ínanguxŦxēē —ñanagŦrŦ. 33 RŦ nŦmagŦ rŦ NgechuchuxŦ nangāxŦgŦ, rŦ ñanagŦrŦgŦ: —Toma rŦ nuxcŦmaŦcŦ ga torŦ oxŦ ga AbráŦtaa tixŦgŦ rŦ taguma texémēxēwa tangēxmagŦ. ¿ÑuxācŦ i cumax rŦ tá na ítanguxŦxŦ, ñacuxŦ? —ñanagŦrŦgŦ. 34 RŦ Ngechuchu ñanagŦrŦ nŦxŦ: —AixcŦma pemaā nŦxŦ chixu rŦ guxāma ya pepaduxŦ rŦ pepadutŦŦwa tangēxmagŦ. 35 —WŦxi i coriarŦ duŦxŦmare rŦ tama norŦ coripatacŦāx nixŦ. NatŦrŦ wŦxi i cori nane rŦ guxŦguma nanatŦ nane nixŦ. 36 —Choma rŦ Tupana Nane chixŦ. RŦ ngēxguma chi choma pepaduna pexŦ íchanguŦxēēgu, rŦ aixcŦma tá nŦxna ípengŦ. 37 —MarŦ nŦxŦ chacuxŦ na AbráŦtaa pixŦgŦxŦ i pemax. NatŦrŦ choxŦ pimèxgŦchaŦ erŦ tama aixcŦma choxŦ peyaxŦgŦ i ngēma ore i pemaā nŦxŦ chixuxŦ. 38 —Choma rŦ yema ChaunatŦ choxŦ wéxŦ nixŦ i pemaā nŦxŦ chixuxŦ. NatŦrŦ pema rŦ penaxŦ i ngēma penatŦ pemaā nŦxŦ ixuxŦ —ñanagŦrŦ ga Ngechuchu. 39 RŦ nŦmagŦ rŦ NgechuchuxŦ nangāxŦ rŦ ñanagŦrŦgŦ: —TorŦ oxŦ nixŦ ga AbráŦ —ñanagŦrŦgŦ. NatŦrŦ Ngechuchu nanangāxŦ rŦ ñanagŦrŦ nŦxŦ: —Ngēxguma chi aixcŦma AbráŦtaa pixŦgŦgu rŦ chi AbráŦ ŦxŦrŦŦ penaxŦ. 40 —NatŦrŦ woo pemaā nŦxŦ chixu i ore i aixcŦma ixŦxŦ ga ChaunatŦ ga Tupana choxŦ nguxēēxŦ, rŦ pema rŦ choxŦ pimèxgŦchaŦ. NatŦrŦ ga AbráŦ rŦ taguma

yemaãcü nanaxü. ⁴¹ —Pema rü penaxü i penatügücümatama —ñanagürü. Rü yexguma ga nümagü rü ñanagürügü: —Toma rü tama tangürüwaŷgümare, rü toxü nangëxma ya wüxitama ya tonatü. Rü yima nixĩ ya Tupana —ñanagürügü. ⁴² Rü Ngechuchu nanangãxü, rü ñanagürü nüxü: —Ngëxguma chi aixcüma Tupana yixĩgu ya penatü rü choxü chi pengechaŷ, erü choma rü Tupanaxütawa nixĩ i ne chaxüxü, rü ngëmacèx chanuxma. Rü tama chauechamatama núma chaxü, natürü núma chaxü yerü Chaunatü ya Tupana núma choxü namu. ⁴³ —¿Tüxcüü tama nüxü pecuèxéga i ngëma pemaã nüxü chixuxü? Pexü naguxcha erü woetama tama iperüxĩnüëchaŷ i ngëma pemaã nüxü chixuxü i ore. ⁴⁴ —Penatü rü Chataná nixĩ rü pema rü naxãcügü pixĩgü. Rü ngëmacèx penaxü i ngëma núma pexü nanaxwëxexü. Rü ngëma Chataná rü noxriarü ügügumama wüxi i máétaxü nixĩ. Rü taguma ore i aixcümaxügu narüxĩnü rü taguma ore i aixcümaxü nixu. Rü ngëxguma yadeaxgu rü doraxüxĩcatama nixu, erü núma rü wüxi i doratëxáxü nixĩ. Rü guxüma i doratëxáxünatü nixĩ. ⁴⁵ —Natürü i pema rü tama choxü peyaxögüchaŷ erü ore i aixcümaxü chixu. ⁴⁶ —¿Texé ya petanüwa choxü dauxe na pecadu chaxüxü? Rü ñuxma na nüxü chixuxü i ore i aixcüma ixixü, rü ¿tüxcüü tama choxü peyaxögü? ⁴⁷ —Texé ya Tupanaärü duüxü ixixë rü itarüxĩnü i Tupanaärü ore. Natürü i pema rü tama Tupanaärü duüxügü pixĩgü, rü ngëmacèx nixĩ i tama iperüxĩnüëchaŷ i Tupanaärü ore —ñanagürü.

Tauta nangoxgu ga Abráŷ rü Cristu rü marü nayexma

⁴⁸ Rü yexguma ga yema Yudíugüarü ãëxgacügü rü ñanagürügü nüxü: —Rü aixcüma nixĩ ga yema torü ore ga yexguma ñatagügügu:

“Cuma rü wüxi i Chamáriacüãx quixĩ, rü ngoxo cuwa nangëxma”, ñatagügügu —ñanagürügü. ⁴⁹ Rü Ngechuchu nanangãxü, rü ñanagürü nüxü: —Chowa rü nataxuma i ngoxo. Rü ngëma chaxüxü nixĩ na Chaunatüxü chicuèxüüxü, natürü i pema rü chixri chauchiga pidexagü. ⁵⁰ —Choma rü tama naxcèx chadau na texé choxü icuèxüügüxüçèx. Natürü Tupana nixĩ ya naxwëxecü na duüxügü choxü icuèxüügüxü. Rü núma tá nanapoxcue i ngëma chauxchi aixü. ⁵¹ —Aixcüma pemaã nüxü chixu, rü texé ya naga ñnüxë i ngëma tümamaã nüxü chixuxü rü guxügutáma tamaxëcha —ñanagürü. ⁵² Rü yexguma ga yema Yudíugüarü ãëxgacügü, rü Ngechuchuxü nangãxügü, rü ñanagürügü: —Ñuxma rü meãxüchima nüxü tacuèx na cuwa nangëxmaxü i wüxi i ngoxo. Yerü ga Abráŷ rü guxüma ga nuxcümaügüxü ga Tupanaärü ore-arü uruügü rü nayue. Natürü cuma rü ñuxma tomaã nüxü quixu rü texé ya naga ñnüxë i ngëma curü ore rü guxügutáma tamaxëcha —ñacurügü. ⁵³ —¿Éxna cuma rü tórü oxi ga Abráŷärü yexera quixĩ? Yerü núma rü nayu rü guxüma ga nuxcümaügüxü ga Tupanaärü orearü uruügü rü ta nayue. ¿Rü cügüçèx rü texé quixĩ? —ñanagürügü. ⁵⁴ Rü Ngechuchu nanangãxü, rü ñanagürü nüxü: —Ega chaugü chitama chicuèxüügu rü ngëma rü taxuwama name. Natürü yima choxü icuèxüücü rü Chaunatü nixĩ. Rü yima Chaunatütama nixĩ ya perü Tupana ixĩcü —ñapegücü nüxü. ⁵⁵ —Natürü i pema rü tama aixcüma nüxü pecuèx ya Chaunatü ya Tupana. Natürü i choma rü ngëmáãcü nüxü chacuèx. Rü ngëxguma chi:

“Tama nüxü chacuèx”, ñachaxgu, rü pexrüü chi wüxi i doratëxáxü chixĩ. Natürü i choma rü aixcümaxüchima nüxü chacuèx ya Chaunatü ya Tupana, rü naga chaxĩnü i guxüma i norü ore i chomaã nüxü yaxuxü. ⁵⁶ —Perü oxi ga Abráŷ rü nataãë yerü aixcüma nayaxö rü tá na íchanguxü i ñoma i naãnewa. Rü yemaxü nacuèx rü yemacèx nataãë —ñanagürü ga Ngechuchu. ⁵⁷ Rü yexguma ga yema Yudíugüarü ãëxgacügü rü Ngechuchuxü nangãxügü,

rü ñanagürügü: —Cuma rü tauta 50 ya taunecü cuxũ nangẽxma. ¿Ñuxãcü Abráũxũ cudau ga tauta cungoxgux ga yexguma? —ñanagürügü. ⁵⁸ Rü Ngechuchu nanangãxũ rü ñanagürü nüxũ: —Aixcüma pemaã nüxũ chixu rü tauta Abráũ ngoxgu rü choma rü marü chayexma —ñanagürü. ⁵⁹ Rü yexguma ga nûmagü rü nutane nanayauxgü na gumamaã ínamuxũchigüãxũcèx. Natürü ga Ngechuchu rü naxchaxwa inicux. Rü yemaãcü ínaxũxũ nawa ga guma tupauca ga taxũne.

9

Ngechuchu nanamexẽẽ ga wüxi ga yatü ga norü bucüma ngexetücü

¹ Rü yexguma namagu tomaã yaxũxgu ga Ngechuchu, rü yéma nüxũ nadau ga wüxi ga yatü ga woetama norü bucüma ngexetücü. ² Rü toma ga norü ngüexügü rü nüxna tacagü, rü ñatarügügü: —Pa Ngüexẽẽruũx, ¿Tüxcüũ ngexetücüma nabu ya daa yatü? ¿Éxna nanatü rü naẽãrü pecadugagu rü éxna norü pecadugagutama? —ñatarügügü. ³ Rü Ngechuchu toxũ nangãxũ, rü ñanagürü toxũ: —Tama norü pecadugagu rü tama i nanatü rü naẽãrü pecadugagu nixĩ i ngẽmaãcü nabuxũ. Natürü ngẽmaãcü nabu na nawa nüxũ pedauxcèx na ñuxãcü Tupana tüxũ na rümexẽẽxũ. ⁴ —Rü ñoma rü ta nangune rü name nixĩ na paxama na naxũxũ i ngẽma puracü ya Chaunatü ga núma choxũ mucü tüxna ãxũ. Erü paxa tá nachüta rü ngẽxguma rü taxucürüwama texé tá tapuracü. ⁵ —Rü ñuxma na ñoma i naãnewa changẽxmaxũ rü ñoma i naãneãrü ngóonexẽẽruũ chixĩ —ñanagürü. ⁶ Rü yexguma yema ñaxguwena rü Ngechuchu waixũmüãnewa nacuaxi. Rü yema waixũmü ga iwaixũmaã nanachaxetü ga guma yatü ga ngexetücü. ⁷ Rü yexguma guma ngexetücüxũ ñanagürü: —¿Dexámaã cugü yayauxetü i Chiruéarü puchuwa! —ñanagürü. Rü ngẽma naega rü “Tüxũ muxũ”, ñaxũchiga nixĩ. Rü yéma naxũ ga guma ngexetücü rü nügü dexámaã nayauxetü. Rü yexguma nataegugu rü marü nidauchixetü. ⁸ Rü yexguma ga yema duũxügü ga guma ngexetücüpataarü ngaicamagu pegüxũ rü yema duũxügü ga üpaacü nüxũ daugüxũ ga na nangexetüxũ, rü ñanagürügü: —¿Taux éxna i ñaã yĩxũ ga yema yatü ga ngexetüchiréxũ ga duũxügüxũ dïerucèx cèèxũxũ? —ñanagürügü. ⁹ Rü nümaxũ rü ñanagürügü: —Ngẽmaãcü nüma nixĩ —ñanagürügü. Rü togü rü ñanagürügü: —Tama nixĩ i yima yĩxũ, natürü nanangẽxgumaraũxũchi —ñanagürügü. Natürü nümatama ga guma yatü ga ngexetüchirécü, rü ñanagürü: —Ngẽmaãcü choma chixĩ —ñanagürü. ¹⁰ Rü yexguma ga yema duũxügü rü nüxna nacagü rü ñanagürügü: —¿Rü ñuxãcü nixĩ i marü quidauchixũ i ñuxmax? —ñanagürügü. ¹¹ Rü nüma nanangãxũ rü ñanagürü: —Yima yatü ya Ngechuchugu ãegacü rü yima waixũmüãnewa nacuaxi. Rü yema waixũmü ga iwaixũmaã choxũ nachaxetü. Rü ñanagürü choxũ:

“¿Yéa Chiruéarü puchuwa naxũ rü ngẽma dexámaã cugü yayauxetü!” ñanagürü choxũ. Rü yéma chaxũ, rü yexguma dexámaã chaugü chayauxetügu rü chidauchi —ñanagürü ga guma yatü. ¹² Rü yexguma nüxna nacagüe, rü ñanagürügü: —¿Ngextá nangẽxmaxũ i ñuxma ya yima yatü ya cuxũ rümexẽẽcü? —ñanagürügü. Rü nüma ga guma yatü ga ngexetüchirécü rü ñanagürü: —Tama nüxũ chacuèx —ñanagürü.

Parichéugü rü guma ngexetücü ga Ngechuchu namexẽẽcüna nacagüe

¹³⁻¹⁴ Natürü yema ngunexũ ga Ngechuchu nagu namexẽẽxũ ga guma ngexetücü, rü ngüxchigaarü ngunexũ nixĩ. Rü yemacèx ga duũxügü rü Parichéugüxũtawa nanagagü ga guma yatü ga ngexetüchirécü. ¹⁵ Rü yexguma ga yema Parichéugü rü nüxna nacagüe ga guma yatü, rü

ñanagürügü: —¿Ñuxãcü i marü curümexëtüxũ i ñuxmax? —ñanagürügü. Rü nüma nanangãxũ rü ñanagürü: —Waixũmü ga naxbüxágümaã yawaixẽẽxũmaã choxũ nachaxetü ga Ngechuchu, rü ñuxũchi dexámaã chaugü chayayauxetü, rü ngẽmacèx marü chidauchi —ñanagürü. ¹⁶ Rü yexguma ga ñuxre ga Parichéugü rü ñanagürügü: —Yema yatü ga cuxũ rümexẽẽxũ rü tama Tupanaârü duũxũ nixĩ, erü tama nanaxaure i ngũxchigaarü ngunexũ —ñanagürügü. Natürü togü ga Parichéugü rü ñanagürügü: —¿Ñuxãcü nanaxü i ngẽma cuèxruũ i mexũ i taxũ ega wüxi i pecaduãxũ yixĩxgux? —ñanagürügü. Rü yemaãcü nügü nitoye ga nagu naxĩnüèxũwa ga yema Parichéugü. ¹⁷ Rü wena nüxna nacagüe ga guma yatü ga ngexetüchirécü, rü ñanagürügü: —¿Natürü cuma rü ñuxũ ñacuxũ nachiga i ngẽma yatü ga cuxũ rümexẽẽxũ? —ñanagürügü. Rü nüma nanangãxũ, rü ñanagürü: —Chauxcèx rü wüxi i Tupanaârü orearü uruũ nixĩ —ñanagürü. ¹⁸ Natürü ga yema Yudíugüarü ãëxgacügü rü tama nüxũ nayaxõgüchaũ ga nüma na yĩxũ ga na nangexetüchiréxũ ga noxrix, rü ñuxma rü marü na yadauchixũ. Rü yemacèx ga yema ãëxgacügü rü tümacèx nangemagü ga nanatü rü naë ga guma yatü ga rümexëtücü. ¹⁹ Rü tüxna nacagü, rü ñanagürügü: —¿Daa yĩxũ ga guma pene ga nüxũ pixucü ga woetama ngexetüãcü bucü? ¿Ñuxãcü i ñuxma i yadauchixũ? —ñanagürügü. ²⁰ Rü nanatü rü naë tanangãxũgü rü ñatarügügü: —Ngẽmáãcü nüxũ tacuèx rü daa nixĩ ya tone ga ngexetüãcüma buchirécü. ²¹ Natürü tama nüxũ tacuèx ga ñuxãcü na yadauchixũ i ñuxmax. Rü tama nüxũ tacuèx ga texé na namexëtüxẽẽxũ. ¡Ëcü nüxnatama pecagü! Erü nüma rü marü naya, rü nümatama pemaã nüxũ na yaxuxüçèx —ñatarügügü. ²² Rü yema ñatarügügü ga nanatü rü naë, yerü tamuũë. Yerü ga Yudíugüarü ãëxgacügü rü marü nügümaã nanamexẽẽgü na tüxũ ínatèxüchigüxüçèx ga ngutaquẽxepataũwa ga texé ga Ngechuchuaxũ yaxõxẽ na Cristu yĩxũ. ²³ Rü yemacèx nixĩ ga nanatü rü naë ga ñatagügüxũ: “¡Ëcü, nüxnatama pecagü! Erü nüma rü marü naya rü nümatama pemaã nüxũ na yaxuxüçèx”, ñatagügüxũ. ²⁴ Rü yexguma ga yema Yudíugüarü ãëxgacügü rü wenaxãrü naxcèx nacagü ga guma ngexetüchirécü. Rü ñanagürügü nüxũ: —Rü ñuxma tanaxwèxe i Tupanapèxewa rü aixcüma tomaã nüxũ quixu na texé cuxũ rümexẽẽxũ. Erü toma rü meãma nüxũ tacuèx i ngẽma Ngechuchu rü wüxi i pecaduãxũ na yĩxũ —ñanagürügü. ²⁵ Rü nüma nanangãxũ rü ñanagürü nüxũ: —Choma rü tama nüxũ chacuèx ega wüxi i pecaduãxũ yixĩgu rü èxna tama. Rü ngẽma nüxũ chacuáxũ nixĩ ga na changexetüchiréxũ ga noxrix rü ñuxma rü na chidauchixũ —ñanagürü. ²⁶ Rü wenaxãrü nüxna nacagüe, rü ñanagürügü: —¿Rü tacü nixĩ ga cumaã naxüxũ? ¿Rü ñuxãcü ga naxüãxũ ga cuxũ na yadauchixetüxẽẽxũ? —ñanagürügü. ²⁷ Rü nanangãxũ rü ñanagürü nüxũ: —Marü pemaã nüxũ chixu, rü tama choxũ iperüxĩnüèchaũ. ¿Tüxcüũ penaxwèxe na wena pemaã nüxũ chixuxũ? ¿Éxna pema rü ta nüxũ peyaxõgüchaũ? —ñanagürü. ²⁸ Rü yexguma rü guma yatümaã chixexũ nixugüe, rü ñanagürügü: —Cumaerü nixĩ i nüxũ cuyaxõxũ i ngẽma yatü, natürü i toma rü Moĩchéarü oreaxũ nixĩ i tayaxõgüxũ. ²⁹ —Toma rü nüxũ tacuèx ga Tupana rü aixcüma Moĩchémaã na yadexaxũ, natürü ngẽma Ngechuchu rü tama nüxũ tacuèx na ngextá na ne naxüxũ —ñanagürügü. ³⁰ Rü guma yatü nanangãxũ, rü ñanagürü nüxũ: —¿Ñuxãcü nixĩ i ngẽma? Nüma rü marü choxũ narümexëtüxẽẽ, natürü ¿ñuxãcü i pema i tama nüxũ pecuáxũ na ngextá ne naxüxũ? ³¹ —Rü guxãma i yixema rü meãma nüxũ tacuèx rü Tupana tama nüxũ naxĩnü i pecaduãxgüxũârü yumüxë. Natürü

Tupana rü tüxŦ nüxŦ naxĩnü i tümaârü yumüxê ya yixema nüxŦ icuèxüügüxe rü naxúxe i Tupanaârü ngúchaŦ. ³² —Taguma ñuxgu nüxŦ taxĩnüchiga i wüxi i yatü na yadauchixêêãxŦ i wüxi i duŦxŦ i norü bucüma ngexetüxŦ. ³³ —Rü ngêxguma chi tama Tupana núma namüxgux ya daa yatü ya choxŦ rümexêêcü, rü taxuacü chima mexŦ naxü —ñanagürü ga guma yatü ga ngexetüchirécü. ³⁴ Rü yexguma ga yema Yudíugüarü âêxgacügü, rü ñanagürügü nüxŦ: —Cuma na pecadugu na cubuxŦ, ¿rü ñuxãcü cunaxwêxe na toxŦ cungúexêêchaŦxŦ? —ñanagürügü. Rü ñuxŦchi ínatèxüchigü ga ngutaquêxepataŦwa.

DuŦxŦgü i tama yaxôgüxŦ rü ngexetüxŦrüü nixĩgü

³⁵ Rü Ngechuchu rü nüxŦ nacuáchiga ga na ínatèxüchigüãxŦ ga guma ngexetüchirécü. Rü yexguma nüxŦ nadêuxgu, rü ñanagürü nüxŦ: —¿NüxŦ cuyaxôxŦ ya Tupana Nane ya duŦxŦxŦ ixĩcü? —ñanagürü. ³⁶ Rü yexguma ga núma rü NgechuchuxŦ nangãxŦ rü ñanagürü: —Pa Corix, ¡chomaã nüxŦ ixu na texe yĩxŦ na nüxŦ chayaxôxŦcèx! —ñanagürü. ³⁷ Rü Ngechuchu nanangãxŦ, rü ñanagürü: —Marü nüxŦ cudau ya Tupana Nane. Rü chomatama nixĩ i cumaã na íchidexaxŦ chiŦxŦ —ñanagürü. ³⁸ Rü yexguma ga guma yatü ga ngexetüchirécü rü Ngechuchupêxegu nacaxãpüxü, rü nüxŦ nicuèxüŦ, rü ñanagürü nüxŦ: —Ngêmaãcü cuxŦ chayaxô, Pa Corix —ñanagürü. ³⁹ Rü yexguma ga Ngechuchu rü ñanagürü: —Rü ñoma i naãnewa chaxŦ na chayadexechixüçèx i chorü duŦxŦgü nüxna i ngêma duŦxŦgü i tama choxrü ixĩgüxŦ. Rü nuã chaxŦ na chanameêxêêxüçèx i ngêma duŦxŦgü i noxri tama TupanaxŦ cuèxgüxŦ. Rü ngêxgumarüŦ ta núma chaxŦ na duŦxŦgü i tama choxŦ cuèxgüchaŦxŦxŦ chanawéxŦ na duŦxŦgü i ngexetüxŦrüü na yixĩgüxŦ, erü tama choxŦ nayaxôgüchaŦ —ñanagürü. ⁴⁰ Rü ñuxre ga Parichéugü ga yema Ngechuchumaã yexmagüxŦ, rü yexguma yema orexŦ naxĩnüegu, rü Ngechuchuna nacagü, rü ñanagürügü: —¿Éxna toma rü ta tama TupanaxŦ tacuèxgü ñacuxŦ? —ñanagürügü. ⁴¹ Rü Ngechuchu nanangãxŦ rü ñanagürü nüxŦ: —Ngêxguma chi tama aixcüma TupanaxŦ pecuèxgügu rü tã chima pegagu nixĩ na pepecaduãxgüxŦ. Natürü ngêma na pegü pixuxŦ na TupanaxŦ pecuáxŦ rü ngêmacèx pegagutama nixĩ na pepecaduãxgüxŦ i ñuxmax —ñanagürü.

10

Carnerugüarü dauruŦ rü norü carnerugü

¹ Rü yexguma ga Ngechuchu rü ñanagürü: —Rü aixcüma pemaã nüxŦ chixu rü ngêma yatü i tama carnerupúxŦârü ñãxwa ixücuxŦ rü wüxi i ngítèxáxŦ nixĩ i ngêma, erü ngextámare nixücu. ² —Natürü ngêma carnerupúxŦârü ñãxwa meãma ixücuxŦ, rü ngêma nixĩ i norü dauruŦxŦchi i carnerugü. ³ —Rü ngêma yatü i carnerupúxŦârü ñãxna dauxŦ rü nayawãxna i ñãx na yaxücuxŦcèx i carnerugüarü dauruŦ. Rü núma i carnerugü rü nüxŦ nacuèxgü i naga i ngêma norü dauruŦ. Rü ngêma norü dauruŦ rü wüxichigü i norü carneru rü naegamaã naxcèx naca na ínamuxŦãxŦcèx i naxpúxŦwa. ⁴ —Rü ngêxguma ínamuxŦãxgu i guxŦma i norü carnerugü, rü núma i norü dauruŦ rü napêxegu nixüchigü. Rü nümagü i carnerugü rü nawe narüxĩ, erü nüxŦ nacuèxgü i naga. ⁵ —Natürü ngêxguma wüxi i yatü i tama aixcüma norü dauruŦ ixĩxŦ, rü tama nawe narüxĩ i ngêma carnerugü. Rü nüxna naxĩgü, erü tama nüxŦ nacuèxgü i naga i ngêma tama norü dauruŦ ixĩxŦ —ñanagürü ga Ngechuchu. ⁶ Rü Ngechuchu rü duŦxŦgümaã nüxŦ nixu ga yema ore ga cuèxruŦ, natürü ga nümagü rü tama nüxŦ nacuèxgüéga ga tacüchiga na yĩxŦ.

Ngechuchu rü carneruarü dauruü ya mecü nixĩ

⁷ Rü yexguma ga Ngechuchu rü wenaxârü ñanagürü nüxü: —Aixcüma pemaã nüxü chixu rü choma nixĩ i carnerupüxüârü ñax i nawa yachocuxüxü i carnerugü. ⁸ Guxüma ga yema chopegu nüxira núma ñxü rü ngítèèxgüxü rü máétagüxü nixĩgü. Natürü yema carnerugü rü tama naga naxĩnüë. ⁹ Choma nixĩ i ñax. Rü texé ya chowa ixücuxe rü tá tamaxü. Rü meãma tá tüxü naxüpetü ngëxgumarüü i wüxi i carneru i naxpüxügu ücuxü rü íxüxüxüxü rü nüxü iyangaucü ya mecü ya maxë. ¹⁰ Ngëma ngítèxáxü rü núma naxü na yangíxücèx rü namáétaxücèx rü nachixexëñxücèx. Rü ngëmacèxicatama núma naxü. Natürü i choma rü núma chaxü na chanamaxëñxücèx i duüxügü rü na aixcüma nüxü nangëxmaxücèx i maxü i taguma gúxü. ¹¹ Choma nixĩ i carneruarü dauruü ya mecü chiixü. Erü wüxi i carneruarü dauruü ya mecü rü norü carnerugüxü ínapoxü rü ñuxmata naxcèx nayux. ¹² Natürü ngëma díerucèxmare puracüxü, rü ega ngëxguma aixü nadèuxgux rü carnerugüna ngëma niña. Rü ngëmaãcü nanaxü erü tama aixcüma norü dauruü nixĩ i nümax, rü tama noxrü nixĩ i ngëma carnerugü. Rü ngëma ai rü carnerugüxü ínayauxü rü ngëxma tüxü naxüanexëmare. ¹³ Rü ngëma yatü rü niña, erü norü díerucèxicatama ngëma napuracü. Rü tama aixcüma carnerugügu narüxĩnü. ¹⁴⁻¹⁵ Choma nixĩ i carnerugüarü dauruü ya mecü chiixü. Rü ngëxgumarüü ya Chaunatü na choxü nacuáxü rü choma rü Chaunatüxü na chacuáxü, rü ngëxgumarüü ta nüxü chacuèx i chorü carnerugü, rü nümagü rü choxü nacuèxgü. Rü choma rü naxcèx chayü i chorü carnerugü. ¹⁶ Rü choxü nangëxmagü ta i togü i carnerugü i tama ñaã naxpüxüwa ngëxmagüxü. Rü ngëmagü rü tá ta nuã chanagagü, rü tá chauga naxĩnüë. Rü wüxitücumü tátama nixĩ rü choma tátama nixĩ i norü dauruü chiixü. ¹⁷ Chaunatü rü choxü nangechaü, erü chorü carnerugücèx chayü rü wena táxarü chamaxü. ¹⁸ Taxüema choxü tayuxëë, natürü chomatama chorü ngüchaümaãtama ichanaxã i chorü maxü. Erü choxmëxwa nangëxma na ichanaxãxücèx, rü wena na chanayaxuxücèx, yerü yemaãcü choxü namu ga Chaunatü —ñanagürü. ¹⁹ Rü yexguma yema orexü naxĩnüëgu ga yema Yudíugüarü ãëxgacügü rü wenaxârü nügü nitoye ga yema nagu naxĩnüëxüwa. ²⁰ Rü muxüma ga nümagü rü ñanagürügü: —¿Tüxcüü nüxü iperüxĩnüë i ñaã yatü i ngëãëxü i ngoxo nawa ngëxmaxü? —ñanagürügü. ²¹ Natürü ga togü rü ñanagürügü: —Taxuüma i yatü i ngoxo nawa ngëxmaxü rü ñaãrüü meã nidexa. ¿Ñuxãcü i wüxi i yatü i ngoxo nawa ngëxmaxü rü tüxü narümexëtüxëë ya wüxi ya ngexetüxe? —ñanagürügü.

Yudíugüarü ãëxgacügü rü Ngechuchuxü naxoe

²² Rü nawa nangu ga yema peta ga gucü ga taunecügu norü tupauca ga taxüncèx naxügüxü ga Yudíugü na nüxna nacuèxächigüxücèx ga yema ngunexü ga nagu yanguxü ga guma tupauca. Rü nagáuane ga Yerucharéüwa ga yexguma. ²³ Rü guma tupauca ga taxünewa nayexma ga wüxi ga chopetüchica ga Charumóüârü Chopetüchicagu ãegaxü. Rü yemagu narüxüxü ga Ngechuchu. ²⁴ Rü ga yema Yudíugüarü ãëxgacügü rü nüxü ínachomaëguãchi, rü ñanagürügü nüxü: —¿Ñuxguratáta tomaã quixaixcüma na cügü quixuxü na texé na quiixü? Ega aixcüma cuma rü Cristu quixĩgu, rü jmeã noxtacüma tomaã nüxü ixu! —ñanagürügü. ²⁵ Rü Ngechuchu nanangãxü, rü ñanagürü nüxü: —Marü pemaã nüxü chixu, natürü i pema rü tama choxü peyaxögü. Guxüma i tacü i chaxüxü rü Chaunatüarü poramaã nixĩ i chanaxüxü, rü ngëmawa meãma pexü nüxü chadauxëë na choma rü Cristu na chiixü. ²⁶ —Natürü pema rü tama peyaxögü, erü

tama chorü carnerugütanüxü pixīgü. ²⁷ —Chorü carnerugü rü nüxü nacuèx i chauga, rü choma rü chorü carnerugüxü chacuèx, rü nüma rü chowe narüxí. ²⁸ —Rü choma rü nüxna chanaxâ i maxü i taguma gúxü. Rü nümagü rü tagutâma inayarütauxe, rü taxúetâma choxna tanapuxü i choxmèxwa. ²⁹ —Rü yíxema Chaunatü choxna tüxü mugüxe ya chorü carnerugü, rü guxüârü yexera tixí i napèxewa. Rü taxúema texé nüxna tüxü tapuxü. ³⁰ —Chaunatü rü choma rü wüxitama tixīgü —ñanagürü. ³¹ Rü yexguma ga yema Yudíugüarü ãëxgacügü rü wenaxârü nutane nanayauxgü na gumamaã Ngechuchuxü ínamuxüchigüxücèx. ³² Natürü ga Ngechuchu rü ñanagürü nüxü: —Pepèxewa chanaxü i muxüma i mexügü i Chaunatüarü poramaã chaxüxü. ¿Rü ngèxürüxü i ngèma mexü i chaxüxücèx nixí i choxü nutamaã ípemuküchigüchaüxü? —ñanagürü. ³³ Rü yema Yudíugüarü ãëxgacügü rü Ngechuchuxü nangãxügü, rü ñanagürügü: —Tama wüxi i puracü i mexücèx cuxü ítamuxüchigüchaü. Natürü cuxü ítamuxüchigüchaü erü Tupanamaã rü tacü quixugü. Cuma rü wüxi i duüxümare quixí rü cugü Tupanaxü quixíxèchaü —ñanagürügü. ³⁴ Rü nüma ga Ngechuchu rü ñanagürü nüxü: —Perü mugüpanewa rü naxümatü i Tupanaârü ore i ñaxü:

“Rü pematama nixí i tupanagü pixīgüxü”,

ñaxü. ³⁵ —Rü ngèma Tupanaârü ore i ümatüxüwa nüxü yaxuxü, rü nüxü tacuèx rü taxucürüwama texé itayanaxoxèè. Rü ngèma orewa rü Tupana rü ñanagürü:

“Guxâma ya yíxema texé yanayauxgüxe i chorü ore rü tupanagü tixīgü”,

ñanagürü i ngèma orewa. ³⁶ —Rü Tupana choxü nayaxu na chanaxüxücèx i norü puracü, rü yemacèx ñoma ga naãnewa choxü namu. ¿Rü ñuxácü i pema nagu perüxínüègu rü chixexü Tupanamaã chaxüxü i ngèxguma Tupana Nane chixí —ñachagu pemaã? ³⁷ —Rü ngèxguma chi tama chanaxüxgu i ngèma mexü i Chaunatü üxü, rü marü name ega woo tama choxü peyaxögü. ³⁸ —Natürü ngèxguma chanaxüxgu i ngèma Chaunatü üxü, rü woo tama choxü peyaxögü, rü chanaxwèxe i nüxü peyaxögü i ngèma taxü i mexügü i Chaunatüarü poramaã chaxüxü. Erü ngèmawa tá nüxü pecuèx na Chaunatü rü chowa nangèxmaxü rü choma i nawa —ñanagürü. ³⁹ Rü wenaxârü Ngechuchuxü niyauxgüchaü ga yema Yudíugüarü ãëxgacügü. Natürü nüma ga Ngechuchu rü naxchaxwa niña. ⁴⁰ Rü yexguma ga Ngechuchu rü natü ga Yudaüârü tocutücèx tomaã nataegu. Rü yema nachica ga Cuáü duüxügüxü üpaacü nawa íbaiüxèèxügu tomaã narüxãüx. ⁴¹ Rü muxüma ga duüxügü rü Ngechuchuxü ínayadaugü, rü ñanagürügü: —Cuáü rü taxuüma ga taxü ga mexü ga cuèxruü naxü ga Tupanaârü poramaã. Natürü guxüma ga ore ga Cuáü tamaã nüxü ixuxü ga ñaã yatüchiga rü aixcüma nixí —ñanagürügü. ⁴² Rü yema nachicawa rü muxüma ga duüxügü rü Ngechuchuaxü nayaxögü.

11

Dácharuarü yuxchiga

¹ Nayexma ga wüxi ga yatü ga idaawecü ga Dácharugu äegacü. Rü nüma rü naèyèxgü ga María rü Marta rü ñane ga Betániãcüãx nixīgü. ² Rü yema María iyixí ga Cori ga Ngechuchucutügu pumara bacü rü ñuxüchi ngíyaemaã ínapicutücü. Rü guma Dácharu ga idaawecü nixí ga ngíeneè. ³ Rü poraãcü nidaawe ga Dácharu. Rü yemacèx ga naèyèxgü, rü Ngechuchuxütawa imugagü, rü ngígürügügü: “Pa Corix, cumücü ya Dácharu ya nüxü cungechaücü rü nidaawe”, ngígürügügü. ⁴ Rü yexguma yema orexü naxínügu ga Ngechuchu, rü ñanagürü: —Ngèma daawe rü tãütâma yumaã inayacuèx. Natürü nidaawe na duüxügü nüxü nadaugüxücèx na ñuxácü naporaxü ya Tupana rü ñuxácü

choma i Nane rü ta na chaporaxũ —ñanagürü. ⁵ Rü Ngechuchu poraãcũ María rü Marta rü Dácharuxũ nangechaũ. ⁶ Natürü yexguma nüxũ naxĩnügu ga na yaðaawexũ ga Dácharu, rü tama paxa ínayadau. Rü taxre ga ngunexũãmatama yexma narũãũx ga yema nachica ga nawa nayexmaxũwa. ⁷ Rü yixcama ga yemawena rü toxũ ñanagürü: —¡Ngĩã rü wena Yudéaanewa taxĩ! —ñanagürü. ⁸ Rü toma ga norü ngúexũgü rü ñatarügügü nüxũ: —Pa Ngúexẽruũx, yexwacatama nixĩ ga yémacũãx ga Yudíugüarü ãëxgacügü yexma nutamaã cuxũ ímuxũchigüchaũxũ. ¿Rü tüxcüũ wena ngema cuxũchaũ i ñuxmax? —ñatarügügü. ⁹ Rü Ngechuchu rü tomaã nüxũ nixu ga wüxi ga ore na nüxũ tacuèxgüxcèx na tauta nawa nanguxũ na nayuxũ ga nümax. Rü ñanagürü toxũ: —¿Taux éxna i wüxi i ngunexũ rü 12 i ora nawa ngèxmaxũ? Ngèxguma texé ngunecü ixũxgu rü tama tacümaã itayarüña, erü tümacèx nangóone. ¹⁰ —Natürü ngèxguma wüxie chütacü ixũxgu rü ngẽmaãcü tacümaã itayarüña, erü tümacèx naxẽãne —ñanagürü. Rü yemaãcü nanangoxẽẽ na tauta nawa nanguxũ na nayuxũ ga nümax. ¹¹ Rü yemawena ga Ngechuchu rü ñanagürü toxũ: —Tamücü ya Dácharu rü napemare. Natürü ñuxma rü tá chayabaixãchixẽẽ —ñanagürü. ¹² Rü yexguma ga toma ga norü ngúexũgü rü ñatarügügü: —Pa Corix, ega napemaregu, rü ngẽmawa nüxũ tacuèx na naxcèx tá yataanexũ —ñatarügügü. ¹³ Natürü ga Ngechuchu rü nüxũ nixuxchaũchiréx ga Dácharu ga marü na nayuxũ. Natürü ga toma nüxũ tacuèxgügu rü na napemarexũchigaxũ yĩxũ ga tomaã yaxuxũ. ¹⁴ Rü yexguma ga Ngechuchu rü meãma tomaã nüxũ nixu rü ñanagürü: —Dácharu rü marü nayu. ¹⁵ —Natürü choma rü chataãẽ na tama ngema changèxmaxũ, erü ngẽmaãcü nixĩ i namemaẽxũ i pexcèx na choxũ peyaxõgüxcèx. ¡Rü ngĩã rü ítayadaugü! —ñanagürü. ¹⁶ Rü yéma nayexma ga totanũxũ ga Tumachi ga Wüxigu Buexũ ga Taxrexpũxũmaã, naxugũxũ. Rü nüma ga Tumachi rü ñanagürü toxũ: —¡Ngĩã i yixema rü ta ngema taxĩ na wüxigu Ngechuchumaã iyuexcèx! —ñanagürü.

Ngechuchu nixĩ i wena namaxẽxẽxũ i yuexũ

¹⁷ Rü yexguma Betániãwa tomaã nanguxgu ga Ngechuchu, rü marü ägümücü ga ngunexũ nangupetü ga na iyatèxgüãxũ ga Dácharu. ¹⁸ Rü guma Betániã rü Yerucharéũãrũ ngaicamana nayexma. Rü tomaèxpũx ga kilómetru nixĩ ga norü yaxũ. ¹⁹ Rü muxũma ga Yudíugü rü Dácharueyèx ga Marta rü Maríaxũtawá naxĩ na ngĩxũ yataãxẽẽgüxcèx, yerü nayu ga ngĩẽneẽ. ²⁰ Rü yexguma Marta nüxũ cuèxgu ga marü na ínanguxũ ga Ngechuchu, rü nüxũ iyatüxãchi. Natürü ga María rü Íxgutama irũxãũx. ²¹ Rü Marta rü ngĩgürügü nüxũ ga Ngechuchu: —Pa Corix, yexguma chi cuma cunumèxgu rü tãũ chima nayu ga chaueneẽ. ²² —Natürü choma nüxũ chacuèx na woo i ñuxma na nayuxũ, rü Tupana tá cuxna nanaxã i guxũma i tacü i naxcèx ícuçaxũ —ngĩgürügü. ²³ Rü Ngechuchu ngĩxũ nangãxũ rü ñanagürü: —Cueneẽ rü wena tá namaxũ —ñanagürü. ²⁴ Rü Marta ngĩgürügü nüxũ: —Ngẽmaãcü nüxũ chacuèx rü wena tá namaxũ i ngèxguma naguxgu i naãne rü ngèxguma wena namaxègu i guxũma i yuexũ —ngĩgürügü. ²⁵ Rü yexguma ga Ngechuchu rü ñanagürü: —Choma nixĩ i íchanadagüxẽẽxũ i yuexũgü, rü wena chanamaxèxèxũ. Rü yíxema choxũ yaxõxè rü woo tayuxgu rü tá wenaxãrũ tamaxũ. ²⁶ —Rü guxãma ya texé ya maxũxè rü choxũ yaxõxè, rü guxũgutãma tamaxũ. ¿Cuyaxõxũ yĩxũ i ngẽma? —ñanagürü ga Ngechuchu. ²⁷ Rü ngĩma rü ngĩgürügü nüxũ: —Ngũ, Pa Corix, choma rü chayaxõ na cuma rü Tupana Nane ya Cristu ga ítanguxẽẽcü na quiĩxũ —ngĩgürügü.

Dácharu itáxŭwa naxaxu ga Ngechuchu

²⁸ Rŭ yema ñaxguwena rŭ Marta rŭ ngŭeyèx ga Maríacè x iyaca. Rŭ bexma ngŭmaã nüxŭ iyarŭxu, rŭ ngŭgŭrŭgŭ: —Marŭ nuã nangu ya Ngŭexèèruŭ ya Ngechuchu, rŭ choxŭ cuxcèx nayacaxèè —ngŭgŭrŭgŭ. ²⁹ Rŭ yexguma María nüxŭ Ìnŭgu ga marŭ yéma na nanguxŭ ga Ngechuchu, rŭ paxa ichi, rŭ Ngechuchuxŭ Ìiyadau. ³⁰ Rŭ Ngechuchu rŭ tauta Ìānewa nangu ga yexguma, rŭ yema nachica ga Marta nüxŭ Ìdauxŭwatama nixŭ ga nayexmaxŭ. ³¹ Rŭ Maríapatawa nayexma ga ñuxre ga yémacŭāx ga Yudíugŭarŭ āèxgacŭgŭ ga ngŭxŭ yéma taāèxèègŭxŭ. Rŭ yexguma ngŭxŭ nadaugŭgu ga paxa na inachixŭ rŭ na Ìnaxŭxŭxŭ, rŭ ngŭwe narŭxŭ. Yerŭ nŭma nüxŭ nacuèxgŭgu rŭ yéma Dácharu itáxŭwa ixŭ na yéma yaxaxuxŭcèx. ³² Rŭ yexguma Ngechuchuxŭtawa nanguxgu ga María, rŭ napèxegu iyacaxāpŭxŭ, rŭ ngŭgŭrŭgŭ: —Pa Corix, yexguma chi cuma cunumèxgu rŭ tãu chima nayu ga chaueneè ya Dácharu —ngŭgŭrŭgŭ. ³³ Rŭ yexguma Ngechuchu ngŭxŭ dèuxgu ga na naxaxuxŭ rŭ na naxauxexŭ ga yema Yudíugŭarŭ āèxgacŭgŭ ga ngŭwe rŭxŭxŭ, rŭ poraācŭ ngechaŭ nüxŭ nangux. ³⁴ Rŭ Ngechuchu nüxna naca rŭ ñanagŭrŭ: —¿Ngexta nixŭ i ipenatáxŭ? —ñanagŭrŭ. Rŭ nŭmagŭ nanangāxŭ rŭ ñanagŭrŭgŭ: —Pa Corix, ìdŭcax, nuã naxŭ, rŭ Ìyadau! —ñanagŭrŭgŭ. ³⁵ Rŭ naxaxu ga Ngechuchu. ³⁶ Rŭ yema Yudíugŭ rŭ ñanagŭrŭgŭ: —ìDŭcèx ñuxācŭ poraācŭ Dácharuxŭ nangechaŭ! —ñanagŭrŭgŭ. ³⁷ Natŭrŭ ñuxre ga yema āèxgacŭgŭ ga Yudíugŭarŭ rŭ ñanagŭrŭgŭ: —Daa nixŭ ga guma yatŭ ga ngexetŭcŭxŭ rŭmexèècŭ. ¿Rŭ tŭxcŭŭ taxucŭrŭwa tacŭ rŭ mexŭ Dácharucèx naxŭ na tama nayuxŭcèx? —ñanagŭrŭgŭ.

Wenaxŭrŭ namaxŭ ga Dácharu

³⁸ Rŭ Ngechuchu poraācŭ ngechaŭ nüxŭ nangux rŭ Dácharumaxŭcèx nixŭ. Rŭ wŭxi ga mèxpŭneārŭ āxmaxŭ nixŭ ga yema naxmaxŭ. Rŭ nayexma ga wŭxi ga nuta ga norŭ ngŭxtaŭruŭ. ³⁹ Rŭ Ngechuchu rŭ ñanagŭrŭ: —ìIpenangŭxgachix ya yima nuta ya namaã nangŭxtaŭcŭ! —ñanagŭrŭ. Natŭrŭ ga Marta ga Dácharueyèx rŭ ngŭgŭrŭgŭ: —Pa Corix, cuxá marŭ nayixane nixŭ, erŭ marŭ āgŭmŭcŭ i ngunexŭ naetŭ nixŭ ga na nayuxŭ —ngŭgŭrŭgŭ. ⁴⁰ Natŭrŭ ga Ngechuchu rŭ ñanagŭrŭ ngŭxŭ: ¿Taux èxna i marŭ cumaã nüxŭ chixuchirèxŭ rŭ ngèxguma cuyaxŭxgu rŭ tá nüxŭ cudau i wŭxi i mexŭ i taxŭ i Tupana ŭxŭ? —ñanagŭrŭ. ⁴¹ Rŭ yexguma Ìnanangŭxgachigŭ ga guma nuta. Rŭ Ngechuchu daxŭgu nadawenŭācŭma ñanagŭrŭ: —Pa Chaunatŭ Pa Tupanax, moxè cuxna chaxā erŭ marŭ choxŭ cuxŭnŭ. ⁴² —Choma nüxŭ chacuèx rŭ guxŭguma choxŭ cuxŭnŭ. Natŭrŭ moxè cuxna chaxā i ñuxma erŭ chanaxwèxe i ñāã duŭxŭgŭ na yaxŭgŭāxŭ na cuma nŭma choxŭ cumuxŭ —ñanagŭrŭ. ⁴³ Rŭ yexguma yema ñaxguwena, rŭ tagaācŭ ñanagŭrŭ: —Pa Dácharux, ìnaxŭxŭ i ngema! —ñanagŭrŭ. ⁴⁴ Rŭ Ìnaxŭxŭ ga Dácharu ga naxchāpenŭtŭmaã guxŭwama rŭbuxpŭxŭcŭ. Rŭ Ngechuchu ñanagŭrŭ nüxŭ ga duŭxŭgŭ: —ìIpeyawèxpŭxŭ na Ìyaxŭxŭcèx! —ñanagŭrŭ.

Āèxgacŭgŭ naxcèx nadaugŭ na ñuxācŭ Ngechuchuxŭ yayauxgŭxŭ (Mt 26.1-5; Mr 14.1-2; Lc 22.1-2)

⁴⁵ Rŭ yema Yudíugŭarŭ āèxgacŭgŭ ga Maríawe rŭxŭxŭ rŭ nüxŭ nadaugŭ ga yema Ngechuchu ŭxŭ, rŭ muxŭma Ngechuchuaxŭ nayaxŭgŭ ga yexguma nüxŭ nadaugŭgu ga ñuxācŭ wena Dácharuxŭ na namaxèèxŭ. ⁴⁶ Natŭrŭ ñuxre ga yema āèxgacŭgŭ rŭ Parichéugŭmaã nüxŭ nayarŭxugŭ ga yema Ngechuchu ŭxŭ. ⁴⁷ Rŭ yexguma ga yema Parichéugŭ rŭ paigŭarŭ āèxgacŭgŭ rŭ nangutaquèxegŭ namaã ga guxŭma ga yema āèxgacŭgŭtŭcumŭwa ŭgŭxŭ. Rŭ ñanagŭrŭgŭ: —¿Tacŭ tá taxŭe? Erŭ ñāã yatŭ i Ngechuchu rŭ nanaxŭ

i muxŭma i mexŭ i cuèxruŭgŭ. ⁴⁸ —Ngèxguma chi tama yayauxgŭgu, rŭ guxŭtáma i duŭxŭgŭ rŭ tá nŭxŭŭ nayaxŭgŭ, rŭ Dumacŭŭxgŭarŭ churaragŭ rŭ núma chi naxŭŭ rŭ nagu napogŭe ya tórŭ tupauca ya taxŭŭne, rŭ dŭxwa táŭ chima tóxrŭ nixŭŭ i ñaã tachiŭŭane —ñanagŭrŭgŭ. ⁴⁹ Natŭrŭ guma taunecŭgu rŭ yema paigŭtanŭwa rŭ Caipá nixŭŭ ga norŭ ãèxgacŭ. Rŭ núma rŭ ñanagŭrŭ nŭxŭŭ: —Pemagŭ rŭ taxuŭma pecuèx. ⁵⁰ —¿Éxna tama nŭxŭŭ pecuèx rŭ taxcèx rŭ na namemaèxŭŭ na wŭxitama i yatŭ guxŭŭ i duŭxŭgŭcèx na yuxŭŭ, na tama nayuexŭcèx i guxŭma i tachiŭŭanecŭŭx i duŭxŭgŭ? —ñanagŭrŭ. ⁵¹ Natŭrŭ ga Caipá rŭ tama nŭèchama yema ñanagŭrŭ, yerŭ guma taunecŭgu rŭ núma nixŭŭ ga paigŭarŭ ãèxgacŭ yŭŭxŭ. Rŭ yemacèx rŭ Tupana nixŭŭ ga Caipáwa idexacŭ ga yexguma nŭxŭŭ yaxuxgu na Ngechuchu rŭ guxŭma i Yudŭgŭcèx tá na nayuxŭŭ. ⁵² Rŭ yema orewa rŭ nanangoxèè na tama Yudŭgŭcèxicatama tá na nayuxŭŭ, natŭrŭ guxŭma i Tupanaarŭ duŭxŭgŭ i guxŭŭ i naãnewa ngèxmagŭxŭcèx rŭ tá ta na nayuxŭŭ, na ngèmaãcŭ wŭxigu nangutaquèxèxèx i guxŭma i ngèma duŭxŭgŭ i Tupanaarŭ ixŭgŭxŭ. ⁵³ Rŭ yexgumaŭcŭŭ nixŭŭ ga inaxŭgŭeãxŭŭ ga Yudŭgŭarŭ ãèxgacŭgŭ ga nagu na naxŭnŭèxŭŭ ga ñuxãcŭŭ tá na Ngechuchuxŭŭ yamèxgŭxŭŭ. ⁵⁴ Rŭ yemacèx ga Ngechuchu rŭ marŭ tama yema Yudŭgŭŭ ímuxŭtanŭgu naxã. Rŭ tomaã inaxŭxŭŭ ga Yudéaanewa, rŭ wŭxi ga ñanexãcŭŭ ga Efraŭgu ãeganewa naxŭŭ. Rŭ yexma tomaã narŭxãŭx. Rŭ guma ñane rŭ wŭxi ga nachica ga ngextá taxŭema íxãpataxŭarŭ ngaicamana nayexma. ⁵⁵ Rŭ marŭ ningaica ga yema Yudŭgŭarŭ peta ga Üpetŭchiga. Rŭ yemacèx muxŭma ga duŭxŭgŭ ga náŭ ga ñanecŭŭx rŭ Yerucharéŭwa naxŭŭ na Tupanacèx nŭgŭ yamexèègŭxŭcèx naxŭpa ga yema peta. ⁵⁶ Rŭ Ngechuchucèx nadaugŭ ga duŭxŭgŭ. Rŭ tupauca ga taxŭnewa nŭgŭna nicagŭetanŭ, rŭ ñanagŭrŭgŭ: —¿Ñuxŭŭ ñapegŭxŭŭ i pemax? ¿Ñoma i petawa tá naxŭxŭŭ rŭ éxna tama? —ñanagŭrŭgŭ. ⁵⁷ Rŭ yema Parichéugŭ rŭ paigŭarŭ ãèxgacŭgŭ rŭ duŭxŭgŭna naxãgagŭ, rŭ ñanagŭrŭgŭ: —Ngèxguma ngextá nŭxŭŭ pedaugŭgu i ngèma Ngechuchu, ¡rŭ tomaã nŭxŭŭ peyarŭxu na tayayauxgŭxŭcèx! —ñanagŭrŭgŭ.

12

*Wŭxi ga nge rŭ Ngechuchucutŭgu pumara iba
(Mt 26.6-13; Mr 14.3-9)*

¹ Rŭ 6 ga ngunexŭŭ naxŭpa ga Üpetŭchigaarŭ peta, rŭ Ngechuchu rŭ tomaã Betániãwa naxŭŭ. Rŭ guma ñane nixŭŭ ga nagu naxãchixŭŭne ga Dácharu ga Ngechuchu wena namaxèècŭ. ² Rŭ yema Dácharuchixŭŭwa Ngechuchucèx nanaxŭgŭ ga taxŭŭ ga òna. Rŭ totanŭwa ga yema mechawa yexmagŭxe rŭ Dácharu nixŭŭ ga Ngechuchuxŭtawama chibŭcŭ. Rŭ Marta iyixŭŭ ga inaxŭcŭŭ ga òna. ³ Rŭ yexguma ga María rŭ yema inange ga wŭxi ga taxŭraweŭxŭŭ ga pumara ga yixichixŭŭ rŭ tatanŭxŭchixŭŭ. Rŭ Ngechuchuxŭŭ namaã iyixcutŭ. Rŭ ñuxŭchi ngŭyaemaã ínapicutŭ. Rŭ guma í rŭ guxŭwama nayixmachŭŭ namaã ga yema pumara. ⁴⁻⁵ Rŭ yexguma ga Yuda ga Icariúte ga wŭxi ga totanŭxŭchirèx ixŭxŭŭ ga yixcama bexma cúãcŭ Ngechuchuxŭŭ íxuaxŭxŭŭ, rŭ ñanagŭrŭ: —¿Tŭxcŭŭŭ tama tatanŭxŭgŭŭ namaã itaxe i ngèma pumara na ngèma díerumaã nŭxŭŭ nangŭxèèxŭcèx i ngèma duŭxŭgŭŭ i ngearŭ díeruãxgŭxŭŭ? —ñanagŭrŭ. ⁶ Natŭrŭ ga Yuda rŭ tama aixcŭma nagu narŭxŭnŭ ga yema ngearŭ díeruãxgŭxŭŭ. Natŭrŭ yema ñanagŭrŭ yerŭ núma rŭ wŭxi ga ngŭtèxãxŭŭ nixŭŭ. Rŭ naxmèxwa nayexma ga yema choca ga díeru ngŭxŭŭ nagu taxŭgŭxŭŭ ga guxãma ga toma ga Ngechuchuarŭ ngúexŭgŭ. Rŭ Yuda rŭ ñuxguacŭŭ rŭ noxrŭxŭtama ngŭxne nangŭxŭxŭ. ⁷ Rŭ yexguma ga Ngechuchu rŭ

ñanagürü nüxũ: —¡Tãxũ i ngĩxũ cuchixewexũ! Erü choma rü paxa tá chayü rü tá ichatèx. Rü ngẽmacèx nixĩ i ngẽma pumaramaã choxũ nachaxũ. ⁸—Ngẽma ngearü dïeruãxgũxũ rü guxũgutáma petanüwa nangẽxmagü. Natürü i choma rü tãütáma guxũgu petanüwa changẽxma —ñanagürü.

Paigüarü ãëxgacügü rü nügümaã nanamexëëgü ga ñuxãcü Dácharuxũ tá na yamèxgũxũ

⁹ Rü muxüma ga Yudügü rü nüxũ nacuáchiga ga Betániãwa na nayexmaxũ ga Ngechuchu. Rü yéma naxĩ na nüxũ nadaugũxüçèx. Rü tama Ngechuchuxũxĩcatama nadaugüchaũ natürü nüxũ nadaugüchaũ ta ga Dácharu ga Ngechuchu wena namaxëëcü. ¹⁰ Rü yexguma ga paigüarü ãëxgacügü rü nügümaã nanamexëëgü ga Dácharuxũ rü ta na yamèxgũxüçèx. ¹¹ Yerü Dácharugagu nixĩ ga muxüma ga Yudügü ga Ngechuchuaxũ yaxögüãxũ rü yema paigüna naxĩgũxũ.

*Ngechuchu rü Yerucharéũgu naxücu
(Mt 21.1-11; Mr 11.1-11; Lc 19.28-40)*

¹² Rü muxüma ga duũxügü rü Yerucharéũwa naxĩ naxcèx ga Üpetüchigaarü peta. Rü moxüãcü duũxügü nüxũ nacuáchigagü ga Ngechuchu rü guma ñãnewa na nanguxchaũxũ. ¹³ Rü yexguma moruátüta nadaügü rü yemamaã Ngechuchuxũ nayatüxgütanüãchi. Rü tagaãcü ñanagürügü: —¡Rü naxüüne rü namecümáxüchi ya daa Tupanaégagu núma ücü! ¡Rü yixema na Iraétanüxũ ixĩgũxũ rü namecümáxüchi ya daa tórü ãëxgacü! —ñanagürügü. ¹⁴ Rü Ngechuchu nüxũ inayangau ga wüxi ga buru, rü naetügu naxaunagü ga yema Tupanaãrü ore ga ümatüxũ nüxũ ixuxürüũ ga yexguma ñaxgu:

¹⁵ “¡Tãxũ i pemuñèxũ, Pa Yerucharéũcüãxgũx! ¡Rü iperüdaunü na ngema ne naxüxũ ya perü ãëxgacü ya wüxi i buru i íraxüetügu aunagücü!”

ñaxũ. ¹⁶ Rü noxri ga toma ga norü ngüexügü rü tama nüxũ tacuèxgüéga ga Ngechuchuchiga na yĩxũ ga yema ore. Natürü yixcüra marü Ngechuchu Tupanaxütawa üxgu, rü yexguma nixĩ ga nüxna tacuèxãchiexũ ga guxüma ga yema Ngechuchuxũ ngupetüxũ, rü yema Tupanaãrü ore nüxũ ixuxũãcütama nüxũ na nangupetüxũ. ¹⁷ Rü yema duũxügü ga Ngechuchuxütawa yexmagüxũ ga yexguma Dácharuxũ wena namaxëëgu, rü nüxũ nixugüe ga yema nüxũ nadaugüxũ. ¹⁸ Rü yemacèx nixĩ ga duũxügü ga Ngechuchuxũ yatüxãchitanüxũ na nayauxgüãxüçèx, yerü nüxũ nacuáchigagü ga yema taxũ ga mexũ ga Tupanaãrü poramaã naxüxũ. ¹⁹ Natürü ga yema Parichéugü rü nügümaã ñanagürügü: —Marü nüxũ pedauxũ i ñuxma na taxucürüwama tacü namaã ixüxũ. ¡Rü dücax, guxüma i duũxügü rü nawe narüxĩ! —ñanagürügü.

Griégugü rü Ngechuchuxũ nadaugüchaũ

²⁰ Rü muxüma ga duũxügü rü petacèx Yerucharéũwa naxĩ na yéma Tupanaxũ na yanacuèxüũgüxüçèx. Rü yema duũxügütanüwa nayexma ga ñuxre ga Griégugü. ²¹ Rü yema Griégugü rü Piripicèx naxĩ. Rü núma ga Piripi rü Gariréaaneãrü ñãne ga Bechaídacüãx nixĩ. Rü nüxũ nacèexügü rü ñanagürügü: —Pa Corix, nüxũ tadauxchaũ ya Ngechuchu —ñanagürügü. ²² Rü Piripi rü Aüdrémaã nüxũ nayarüxu. Rü yema taxre rü wüxigu Ngechuchuxütawa naxĩ, rü namaã nüxũ nayarüxugü. ²³ Rü yexguma ga Ngechuchu rü ñanagürü nüxũ: —Rü marü nawa nangu tá na chayuxũ rü wenaxãrü Chaunatüxütawa tá na chaxüxũ i choma i Tupana Nane i duũxüxũ chiĩxũ. ²⁴ —Rü aixcüma pemaã nüxũ chixu rü ngëxguma chi wüxipüxü i trigu tama waixüümüãnegu toxgu rü wüxipüxüechatama nixĩ. Natürü ega waixüümügu natoxgu, rü ngema naxüxgu, rü muxüchinema ínanguxuchi. [Rü ngëxgumarüũ tá ta Tupanaxütawa nangugü i muxüma i duũxügü ega chayuxgux.] ²⁵ —Rü pemaã nüxũ chixu rü texé

ya yíxema tñmaãrũ maxũxũ ngechaũxẽ i ñoma i naãnewa rũ tá itayarũtaxu. Natũrũ texé ya yíxema tama tñmaãrũ maxũxũ ngechaũxẽ rũ tama yuxũ muũxẽ i ñoma i naãnewa, rũ tá tũxũ nangẽxma i maxũ i taguma gũxũ. ²⁶ — Rũ ngẽxguma texé choxũ puracũchaũgu rũ name nixĩ i chowe tarũxũ. Rũ ngẽma choma tá íchangẽxmaxũwa rũ ngẽma rũ tá ta tangẽxma i tũmax. Rũ ngẽxguma texé choxũ puracũgu rũ Chaunatũ ya Tupana rũ tá tũmamaã nataãẽ —ñanagũrũ.

Ngechuchu nanaxunagũ ga norũ yuxchiga

²⁷ —Rũ Ngechuchu ñanagũrũ: —Rũ ñũxma rũ poraãcũ changechaũ rũ chanaxixãchiãẽ. ¿Rũ tacũxũ tá Chaunatũmaã chixuxũ? Taxucũrũwa namaã nũxũ chixu na choxũ Ínanguxuchixẽxũcèx na tama chayuxũcèx, erũ woetama ngẽmacèx núma chaxũ —ñanagũrũ. ²⁸ Rũ ñanagũrũ: —Pa Chaunatũx, ¿Choxũ rũngũxẽẽ na duũxũgũpẽxewa cuzũ chataxẽẽxũcèx! —ñanagũrũ. Rũ yexguma ga yema duũxũgũ ga yema yexmagũxũ rũ nũxũ naxĩnũẽ ga wũxi ga naga ga daxũwa inaxũxũ ga ñaxũ: —Marũ cuzũ charũngũxẽẽ na choxũ cutaxẽẽxũ ga noxrix, rũ wena táxarũ cuzũ charũngũxẽẽ na choxũ cutaxẽẽxũcèx —ñanagũrũ ga yema naga. ²⁹ Rũ yema duũxũgũ ga yema yexmagũxũ ga nũxũ ñnũẽxũ ga yema naga, rũ ñanagũrũgũ: —Wũxi i duruanexũ nixĩ —ñanagũrũgũ. Natũrũ togũ rũ ñanagũrũgũ: —Wũxi i Tupanaãrũ orearũ ngerũ i daxũcũãx nixĩ i namaã idexaxũ —ñanagũrũgũ. ³⁰ Rũ yexguma ga Ngechuchu rũ ñanagũrũ nũxũ: —Tama chauxcèx nixĩ i nũxũ pexĩnũẽxũ i ngẽma naga. Rũ pexcèxtama nixĩ i nũxũ pexĩnũẽxũ. ³¹ —Rũ ñũxma tá nixĩ i Tupana inaxũgũãxũ na tũxũ napoxcuxũ ya duũxẽ naxcèx i tñmaãrũ pecadugũ. Rũ ñũxma tá nixĩ i Tupana ínatèxũchixũ i ngẽma ñoma i naãnewa poraxũ i Chataná. ³² —Rũ ngẽxguma curuchawa chipotagu rũ chaugũxũtawã tá chanagagũ i guxũma i duũxũgũ —ñanagũrũ ga Ngechuchu. ³³ Rũ yema orewa duũxũgũmaã nũxũ nixu ga ñũxãcũ tá na nayuxũ. ³⁴ Rũ yema duũxũgũ nanangãxũgũ, rũ ñanagũrũgũ: —Torũ mugũ i ùmatũxũwa nũxũ tadaugũ na guxũgutãma namaxèchaxũ ya Cristu. ¿Rũ ñũxãcũ i cuma rũ ñacurũgũ: “Rũ Tupana Nane ya duũxũxũ íxĩcũ rũ curuchawa tá nipota”, ñacurũgũ? ¿Rũ texé tixĩ ya yíxema Tupana Nane ya duũxũxũ íxĩxẽ? —ñanagũrũgũ. ³⁵ Rũ yexguma ga Ngechuchu rũ ñanagũrũ nũxũ: —Ñoma rũ ta petanũwa changẽxma na ñoma i naãnewa pexũ changũexẽẽxũcèx rũ ngẽmaãcũ pexũ changóonetanũxẽẽxũcèx. Natũrũ paxãchicèxicatama petanũwa changẽxma. Rũ name nixĩ i paxã choxũ peyaxõgũ ñoma rũ ta pexcèx chanangóonexẽẽ naxũpa na naxèãnexũ. Erũ yíxema èãnexũwa ngẽxmaxẽ rũ tama nũxũ tacuèx na ngextã taxũxũ. ³⁶ — Rũ ñoma rũ ta petanũwa changẽxma rũ name nixĩ i paxã choxũ peyaxõgũ na chorũ ngóonexũwa pengẽxmagũxũcèx —ñanagũrũ. Rũ yema ñaxguwena rũ natanũwa inaxũxũ ga Ngechuchu. Rũ naxchaxwa inicux.

Tacũcèx nixĩ ga Yudĩngũ ga tama Ngechuchuaũxũ yaxõgũãxũ

³⁷ Rũ woo ga Ngechuchu rũ duũxũgũpẽxewa nanaxũ ga muxũma ga taxũ ga mexũ ga cuèxruũgũ ga Tupanaãrũ poramaã naxũxũ, natũrũ yexguma rũ ta tama nũxũ nayaxõgũ ga duũxũgũ. ³⁸ Rũ yemaãcũ Tupana nayanguxẽẽ ga yema ore ga Ichaxía ùmatũxũ ga ñaxũ:

“Pa Corix, taxũema tayaxõ ga yema ore ga tũxũ tangũexẽẽxũ. Rũ woo nũxũ tadaugũ na ñũxãcũ naporaxũ ya Tupana, rũ tama tayaxõgũ”, ñaxũ. ³⁹⁻⁴⁰ Rũ yemaãcũ ga yema duũxũgũ rũ tama nayaxõgũ yema Ichaxía ùmatũxũwa nũxũ yaxuxũrũũ, rũ:

“Yema duũxũgũ rũ tama nũxũ nadaugũchaũ rũ tama nayaxõgũchaũ rũ tama Tupanacèx nawoeguchaũ. Rũ yemacèx ga Tupana rũ nũxna nixũ

na tama nüxũ nadaugũxũcèx rü tama yaxõgũãxũcèx rü tama naxcèx nawoeguxũcèx na nüma nüxna naxããxũcèx i maxũ i ngexwacaxũxũ”, ñaxũ. ⁴¹ Rü yema ñanagürü ga Ichaxía yerü nangoxetügu marü nüxũ nadau na ñuxãcü ãëxgacü ya tacüxüchi na yĩxũ ya Ngechuchu ya Cristu. Rü yemaãcü nachiga nidexa. ⁴² Natürü muxüma ga yema Yudiügüarü ãëxgacügü rü Ngechuchuaxũ nayaxõgü, rü woo ga ñuxre ga naërugü rü ta nayaxõgü, natürü tama nügü nixugüchaũ ga duũxügüpëxewa, yerü namuũ na Parichéugü ngutaquëxepataũwa ínawoxũxũ. ⁴³ Rü yemaãcü tama nügü nixugüchaũ, yerü norü me nixĩ ga duũxügü namaã nataãëgüxũ rü tama aixcüma naxcèx nadaugü na Tupana namaã taãëxũ.

Texé ya tama Ngechuchuarü oreaxũ yaxõxè rü tá tapoxcu

⁴⁴ Rü tagaãcü ñanagürü ga Ngechuchu: —Texé ya choxũ yaxõxè rü tama choxũxĩcatama tayaxõ. Natürü Chaunatü ya núma choxũ mucüaxũ rü ta tayaxõ. ⁴⁵ —Rü texé ya choxũ dauxe, rü Chaunatü ya núma choxũ mucüxũ rü ta tadau. ⁴⁶ —Choma na ngóonexëëruü chiĩxũ, rü ñoma i naãnewa changu na guxãma ya texé ya choxũ yaxõxè rü tama ëänexũwa na tangëxmagüechaxũcèx. ⁴⁷ —Natürü ngëxguma texé nüxũ ñnügü i chorü ore rü tama tayaxõxgu rü tama choma nixĩ i tüxũ chapoxcuxũ. Erü tama ñoma i naãnewa changu na chanapoxcuexũcèx i duũxügü, natürü núma chaxũ na chanamaxëëxũcèx. ⁴⁸ —Yíxema texé ya tama choxũ yaxõxè rü tama chauga ñnuxè rü marü tüxũ nangëxma na tacücèx tá Tupana tüxũ poxcuxũ. Erü ngëma ore i nüxũ chixuxügagu tátama nixĩ ya Tupana i tüxũ napoxcuxũ i naãneärü guxgu, erü tama tayaxõ i ngëma ore i nüxũ chixuxũ. ⁴⁹ —Tama chaugagutama chidexa, natürü guma Chaunatü ga núma choxũ mucü, rü guma nixĩ ga chomaã nüxũ ixücü na tacüxũ tá duũxügümaã chixuxũ rü ñuxãcü tá chanangüexëëxũ. ⁵⁰ —Rü nüxũ chacuèx na Chaunatüarü orewa nangëxmaxũ i maxũ i taguma gúxũ. Rü ngëmacèx i ngëma ore i nüxũ chixuxũ, rü ngëmatama ore nixĩ i Chaunatü choxũ muxü na nüxũ chixuxũ —ñanagürü ga Ngechuchu.

13

Ngechuchu rü norü ngüexũgüxũ niyauxgücutü

¹ Rü wüxi ga ngunexũ nataxu ga nawa na nanguxũ ga yema Yudiügüarü peta ga Üpetüchiga. Rü Ngechuchu nüxũ nacuèx ga marü nawa na nanguxũ ga ñoma ga naãnewa na yaxũxũ rü wenaxärü Nanatüxütawa na naxũxũ. Rü nüma rü yexguma ñoma ga naãnewa nayexmagu rü guxüguma tüxũ nangechaũ ga guxema noxrü ixĩgüxe. Rü yexgumarüũ ta ga yexguma toxna yaxüxchaũgu ga daxüguxũ ga naãnewa na naxũxũ, rü yemaãcü poraãcü toxũ nangechaũ. ²⁻⁴ Natürü ga Chataná rü marü Yuda ga Chimáũ ga Icariüte nanena nangu na bexma cúacü Ngechuchuxũ ínaxuaxũxũcèx. Rü Ngechuchu rü marü nüxũ nacuèx ga Nanatüxütawa na ne naxũxũ rü wena táxarü Nanatücèx na nataeguxũ. Rü nüxũ nacuèx ga Nanatü rü naxmëxgu na naxüãxũ ga guxüma ga pora. Rü yemacèx ga yema chütaxügu ga yexguma mechawa ítachibüeyane, rü inachi ga Ngechuchu. Rü ínacu xuchi ga norü gáuxüchiru, rü wüxi ga tuayamaã nügü nigoye. ⁵ Rü ñuxüchi yauxmëxüpáxügu dexáta naba, rü toxũ niyauxgücutü. Rü guma tuaya ga namaã yagoyecümaã toxũ ínapigücutü. ⁶ Rü yexguma Chimáũ ga Pedruxũ nayauxcutüchaũgu rü ñanagürü ga Pedru: —Pa Corix, ¿ñuxãcü tá i cuma i choxũ cuyauxcutüxũ? —ñanagürü. ⁷ Rü Ngechuchu nanangãxũ rü ñanagürü: —Ñuxma rü tama nüxũ cucuèx i tüxcüũ na chanaxüxũ i ñaã, natürü yixcama rü tá nüxũ cucuèx —ñanagürü. ⁸ Natürü ga Pedru

rü ñanagürü: —Choma rü täütáma chanaxwèxe na choxũ cuyauxcutüxũ — ñanagürü. Rü Ngechuchu nanangãxũ rü ñanagürü nüxũ: —Ngëxguma tama cuxũ chayauxcutügu, rü täütáma choxrü quixĩ —ñanagürü. ⁹ Rü yexguma ga Chimáũ ga Pedru rü ñanagürü nüxũ: —Pa Corix, ¡Tama choxũ cuyauxcutüxicatama! Natürü chanaxwèxe i choxũ cuyauxmëx rü choxũ cuyauxeru ta —ñanagürü. ¹⁰ Natürü Ngechuchu nanangãxũ rü ñanagürü nüxũ: —Texé ya ngexwacëx aiyaxe rü tanaxwèxe i tümacutüxicatama tayaxu, erü guxũwama tangemata. Rü pema rü marü pingematagü, natürü tama guxãma aixcüma tingemata —ñanagürü. ¹¹ Rü Ngechuchu nüxũ nacuëx na texé tá bexma cúãcü ínaxuaxũxũ, rü yemacëx ñanagürü nüxũ: —Natürü tama guxãma aixcüma tingemata —ñaxũ. ¹² Rü yexguma toxũ yayauxgücutüguwena, rü Ngechuchu wena nicuxcuchi ga norü gáuxũchiru. Rü wenaxãrü mechawa narüto. Rü ñanagürü toxũ: —¿Nüxũ pecuáxũ yĩxũ i ngëma chaxũxũ? ¹³ —Pema rü: “Pa Ngúexëëruũ” rü “Pa Corix”, ñaperügü choxũ. Rü marü name i ngëma ñaperügü, erü aixcümaxũchi ngëma chixĩ. ¹⁴ —Rü ñuxma i choma na ngúexëëruũ chixĩxũ rü pemaã na ichacuáxũ, rü pexũ chiyauxgücutü. Rü ngexgumarüxũ ta i pema rü name i wüxichigü i pemücxũ piyauxgücutü. ¹⁵ —Choma rü pexũ nüxũ chadauxëë na ñuxãcü tá penaxũxũ na pema rü ngema pemaã chaxũxũãcü penaxũxũcëx. ¹⁶ —Rü aixcüma pemaã nüxũ chixu rü taxuũma i wüxi i coriarü duũxũ rü norü coriëtüwa nügü nangexmaxëë. Rü taxuxũma i ãëxgacüarü orearü ngeruxũ i norü ãëxgacü i namuxüëtüwa nügü nangexmaxëë. ¹⁷ —Rü ngëxguma nüxũ pecuëxgu i chorü ore rü penaxũxgu i ngëma pemaã nüxũ chixuxũ, rü aixcüma tá petaãëgü. ¹⁸ —Rü tama guxãma i pechiga nixĩ i chidexaxũ. Erü choma rü tüxũ chacuëx rü texégü tixĩ ya yíxema tüxũ chidexechíxe. Natürü Tupana nayanguxëëchaũ i norü ore i ümatüxũ i ñaxũ: “Texé ya chomaã chibüxe rü chomaã tarüxuanü”, ñaxũ. Rü ngëmaãcü tá nangupetü na yanguxüçëx i ngema Tupanaarü ore. ¹⁹ —Natürü naxüpa na nangupetüxũ i ngëma, rü pemaã nüxũ chixu na choxũ peyaxögüxüçëx i ngëxguma nangupetüxgu. ²⁰ —Aixcüma pemaã nüxũ chixu rü texé ya tüxũ yaxúxe ya yíxema choma ngema tüxũ chamuxë, rü choxũ nixĩ i tayaxuxũ. Rü texé ya choxũ yaxúxe, rü Chaunatü ga núma choxũ mucüxũ nixĩ i tayaxuxũ —ñanagürü ga Ngechuchu.

*Ngechuchu nüxũ nixu ga Yuda rü tá bexma cúãcü na ínaxuaxũãxũ
(Mt 26.20-25; Mr 14.17-21; Lc 22.21-23)*

²¹ Rü yexguma yema ñaxguwena ga Ngechuchu rü poraãcü ngechaũ nüxũ nangux, rü meãma tomaã nanangoxëë, rü ñanagürü toxũ: —Aixcüma pemaã nüxũ chixu rü wüxie i petanüwa tá nixĩ i bexma cúãcü choxũ itaxuaxũxũ —ñanagürü. ²² Rü yexguma ga toma ga norü ngúexügu rü wüxichigü togü tadawenü, rü tama nüxũ tacuëxgü ga texéchiga na yema ñaxũ. ²³ Rü choma ga norü ngúexũ ga poraãcü choxũ nangechaũxë rü nacüwawa charüto ga Ngechuchu ga mechawa. ²⁴ Rü Chimáũ ga Pedru rü bexma choxũ naxuneta ga na Ngechuchuna chaçaxüçëx ga texéchiga na yĩxũ ga yema. ²⁵ Rü yexguma ga choma rü yexeraãcü Ngechuchuna chimaxcuchi rü nüxna chaca, rü ñacharügü: —Pa Corix, ¿texé tá tixĩ ya yíxema? —ñacharügü. ²⁶ Rü Ngechuchu choxũ nangãxũ, rü ñanagürü: —Wüxi i pãũãrü bücuxũ tá íchacúe, rü yíxema tüxna chanaxãxë, rü yíxema tixĩ —ñanagürü. Rü yexguma ínanacúe ga wüxi ga pãũãrü bücuxũ rü Yuda ga Icariúte ga Chimáũ nanena nanaxã. ²⁷ Rü yexgumatama Yuda nayauxgu ga yema pãũãrü bücuxũ rü ngoxo ga Chataná rü Yudagu naxücu. Rü yexguma ga Ngechuchu rü ñanagürü nüxũ: —Rü ngëma cuxüxchaũxũ, ¡rü paxa naxü! —ñanagürü. ²⁸ Natürü taxúema ga toma ga mechawa chibüxe nüxũ tacuëxgü ga çacüchiga na yĩxũ ga yema ñaxũ ga

Ngechuchu. ²⁹ Rũ nũma ga Yuda rũ dĩeruchiũãrũ dauruũ nixĩ. Rũ yemacẽx ñuxre ga toma nũxũ tacuẽxgũgu rũ Ngechuchu taxewa nanamu, na tacũcẽx yataxexũcẽx naxcẽx ga peta, rũ ěxna duũxũgũ ga ngearũ dĩẽruãxũna ngĩxũ na naxãxũcẽx ga dĩẽru. ³⁰ Rũ yexguma Yuda nayauxgu ga yema pãũ, rũ ínaxũxũ ga yema ucapuwa. Rũ marũ nachũta ga yexgumax.

Ngechuchu norũ ngũexũgũmaã nũxũ nixu ga yexwacaxũxũ ga norũ mu

³¹ Rũ yexguma Yuda íxũxguwena, rũ Ngechuchu rũ ñanagũrũ: —Rũ ñuxma rũ tá aixcũma nangox na ñuxãcũ naporaxũ ya Tupana Nane ya duũxũxũ íxĩcũ. Rũ yimawa tá nixĩ i nangoxẽẽãxũ ya Tupana i norũ pora. ³² —Rũ ngẽxguma yima Tupana Nane nangoxẽẽxgu i Tupanaãrũ pora, rũ ngẽxgumarũũ tá ta ya Tupana rũ nanangoxẽẽ i Naneãrũ pora. Rũ paxa tá nixĩ i ngẽma. ³³ —Pa Chauxacũãxgũx, tãũtãma muxũ i ngunexũ petanũwa changẽxma. Rũ pema rũ tá chauxcẽx pedaugũ, natũrũ ngẽma choma íchaxũxũwa rũ taxucũrũwama ngema pexĩ. Rũ ñaãtama ore nixĩ ga marũ Yudĩugũarũ ãẽxgacũgũmaã nũxũ chixuxũ, rũ ñuxma rũ pemaã rũ ta nũxũ chixuxũ. ³⁴ —Rũ pemaã nũxũ chixu i wũxi i ngexwacaxũxũ i mu. Rũ ngẽma pexũ chamuxũ nixĩ i pemũcũgũxũ na pengechaũxũ i wũxichigũ. Rũ ngẽma na choma pexũ changechaũxũrũũ, rũ chanaxwẽxe i wũxichigũ i pema rũ pemũcũgũxũ pengechaũgũ. ³⁵ —Rũ ngẽxguma wũxichigũ pemũcũgũxũ pengechaũgu, rũ guxũma i duũxũgũ tá nũxũ nicuẽxãchitanũ na chorũ ngũexũgũ pixĩgũxũ —ñanagũrũ.

Ngechuchu nũxũ nixu rũ Pedru rũ tãxũtãma nũgũ nixu na norũ ngũexũ yixĩxũ (Mt 26.31-35; Mr 14.27-31; Lc 22.31-34)

³⁶ Rũ Chimãũ ga Pedru rũ Ngechuchuna naca, rũ ñanagũrũ: —Pa Corix ¿ngextá tá cuxũ? —ñanagũrũ. Rũ Ngechuchu nanangãxũ, rũ ñanagũrũ: —Ngema íchaxũxũwa rũ taxucũrũwa chowe curũxũ i ñuxmax. Natũrũ yixcama rũ ngẽmããcũ tá chowe curũxũ —ñanagũrũ. ³⁷ Rũ yexguma ga Pedru rũ ñanagũrũ: —Pa Corix, ¿tũxcũũ taxucũrũwa cuwe charũxũ i ñuxmax? Erũ marũ íchamemare na cuxcẽx na chayuxũ —ñanagũrũ. ³⁸ Rũ Ngechuchu nanangãxũ, rũ ñanagũrũ: —¿Aixcũma yĩĩxũ i marũ ícumemarexũ na chauxcẽx cuyuxũ? Aixcũma cumaã nũxũ chixu rũ tãũtãtama yacaxgu ya otá, rũ tomaẽpũxcũna tá nũxũ quixu na tama choxũ cucuãxũ —ñanagũrũ ga Ngechuchu.

14

Ngechuchu rũ nama i Nanatũxũtawa nadaxũ nixĩ

¹ —¡Tãxũ i penaxĩxãchiãẽgũxũ i pemax! ¡Tupanaãxũ peyaxõgũ rũ choxũ rũ ta peyaxõgũ! ² —Chaunatũxũtawa nangẽxma i muxũchixũma i nachicagũ. Ngẽxguma chi natauxguma, rũ tãũ chima pemaã nũxũ chixu na pexcẽx chayamexẽẽxũcẽx i pechicagũ. ³ —Rũ ngẽxguma marũ ngema chaxũxgu rũ wũxi i pechica chamexẽẽxgu, rũ wena táxarũ núma chaxũ. Rũ pexũ tá chayagagũ na ngẽma nachica i chomatãtama nawa changẽxmaxũwa na pengẽxmagũxũcẽx i pemax. ⁴ —Rũ pema rũ nũxũ pecuẽx na ngextá tá na chaxũxũ, rũ marũ nũxũ pecuẽx i nama i ngema nadaxũ —ñanagũrũ ga Ngechuchu. ⁵ Rũ Tumachi rũ ñanagũrũ: —Pa Corix, tama nũxũ tacuẽx na ngextá na cuxũxũ. ¿Rũ ñuxãcũ tá i nũxũ tacuãxũ i ngẽma nama? —ñanagũrũ. ⁶ Rũ Ngechuchu nanangãxũ, rũ ñanagũrũ: —Choma nixĩ i ngẽma nama i Chaunatũxũtawa nadaxũ chiĩxũ. Rũ aixcũma nixĩ i ngẽma ore i nũxũ chixuxũ. Rũ choma nixĩ i duũxũgũxũ chamaxẽẽxũ. Rũ chaugaguxicatama nixĩ i Chaunatũxũtawa nangugũxũ i duũxũgũ. ⁷ —Rũ ngẽxguma chi pema rũ aixcũma meã choxũ pecuẽxgũgu, rũ Chaunatũxũ rũ chi ta pecuẽxgũ. Rũ

ñuxmaũcüü nixĩ i Chaunatũxũ pecuáxũ, erũ marũ nüxũ pedaugüecha — ñanagürũ. ⁸ Rũ yexguma ga Piripi rũ ñanagürũ: —Pa Corix, ¡Toxũ nüxũ nadauxẽẽ ya Cunatũ! Rũ ngẽxĩcatama i tanaxwèxegũxũ —ñanagürũ. ⁹ Rũ Ngechuchu nanangãxũ, rũ ñanagürũ: —Pa Piripix, ¿ñuxre ya taunecũ marũ petanũwa changẽxma rũ ñuxma rũ ta tama choxũ cucuèxégaxũ? Yíxema choxũ dauxe rũ Chaunatũxũ rũ ta tadau. ¿Rũ tüxcüũ i ngẽxguma rũ ta cunaxwèxexũ i pexũ nüxũ na chadauxẽẽxũ ya Chaunatũ? ¹⁰ —¿Tama êxna cuyaxõ na choma rũ Chaunatũmaã rũ wüxitama tixĩgũxũ? Rũ guxũma i ore i pemaã nüxũ chixuxũ rũ tama chauechama nüxũ chixu. Erũ yima Chaunatũ ya wüxiwa chomaã ngẽxmacũ, rũ yima nixĩ ya naxücũ i guxũma i noxrütama puracũ. ¹¹ —Chanaxwèxe i choxũ peyaxõgũ na choma rũ Chaunatũmaã wüxitama tixĩgũxũ. Natürũ woo tama ngẽma pixõgũgu rũ chanaxwèxe na choxũ peyaxõgũxũ naxcèx i ngẽma mexũgũ i taxũ i Tupanaãrũ poramaã chaxũxũ. ¹² —Aixcũma pemaã nüxũ chixu rũ yíxema choxũ yaxõxẽ rũ tá tanaxũ i guxũma i choma chaxũxũ. Rũ ngẽma chaxũxũãrũ yexera tá taxũ, erũ choma rũ tá Chaunatũxũtawa chaxũ. ¹³ —Rũ guxũma i ñacũ i chauégagu Tupanaxũtawa naxcèx ípeçaxũ rũ tá pexna chanaxã. Rũ ngẽmaãcü tá chanaxũ na chaugagu nangõxũcèx i Chaunatũarũ pora. ¹⁴ —Rũ choma tá chanaxũ i guxũma i ñacũ i chauégagu choxna naxcèx peçaxũ.

Ngechuchu rũ norũ ngúexũgũmaã inaxuneta na naxcèx tá núma namuãxũ i Naãẽ i Üünexũ

¹⁵ —Rũ ngẽxguma aixcũma choxũ pengechaũgu, rũ naga tá pexĩnüẽ i chorũ mugũ. ¹⁶ —Rũ choma tá Chaunatũna naxcèx chaca na núma pexcèx namuãxũcèx i to i perũ ngũxẽẽruũ i Naãẽ i Üünexũ, na guxũgutáma petanũwa nangẽxmaxũcèx. Rũ núma tá nixĩ i pexcèx nangõxẽẽãxũ i ore i aixcũma ixĩxũ. ¹⁷ —Rũ ñoma i naãnecũãx i duũxũgũ rũ taxucürũwama nanayauxgũ, erũ tama nüxũ nadaugũ rũ tama nüxũ nacuèxgũ. Natürũ i pema rũ marũ nüxũ pecuèx, erũ núma rũ petanũwa nangẽxma. Rũ guxũgutáma pemaã inarũxãũx. ¹⁸ —Rũ tãütáma núma pexũ chawogũmare i chomax, erũ wena táxarũ pexcèx chataegu, na petanũwa changẽxmaxũcèx. ¹⁹ —Rũ paxa tá nixĩ na tãütáma choxũ nadaugũxũ i ñoma i naãnecũãx i duũxũgũ. Natürũ i pema rũ tá choxũ pedaugũ. Rũ tá pemaxẽ, erũ choma rũ chamaxũ. ²⁰ —Rũ ngẽxguma yuwa ícharũdaxgu rũ wena chamaũxgu, rũ ngẽxguma tá nüxũ picuèxãchitanũ na choma rũ Chaunatũwa chamaũxũ rũ pema i chowa rũ choma i pewa. ²¹ —Yíxema texé ya nüxũ cuáxe rũ naga ñnüxẽ i chorũ mugũ, rũ tanangõxẽẽ na aixcũma choxũ tangechaũxũ. Rũ Chaunatũ tá tüxũ nangechaũ ya yíxema choxũ ngechaũxẽ, rũ choma rũ tá ta tüxũ changechaũ. Rũ tüxũ tá chaugũ chawèx —ñanagürũ ga Ngechuchu. ²² Rũ nayexma ga to ga Ngechucharũ ngúexũ ga Yudagu ãegaxũ ta. Rũ yema rũ ñanagürũ: —Pa Corix, ¿tüxcüũ toxũ cugũ cuwèx, rũ tama ñoma i naãnecũãx i duũxũgũxũ cugũ cuwèx? —ñanagürũ. ²³ Rũ Ngechuchu nanangãxũ, rũ ñanagürũ: —Yíxema choxũ ngechaũxẽ rũ naga taxĩnü i ngẽma ore i tümamaã nüxũ chixuxũ. Rũ Chaunatũ tá tüxũ nangechaũ. Rũ choma rũ Chaunatũmaã wüxigu tümaxũtawa tá tangẽxmagũ. ²⁴ —Yíxema tama choxũ ngechaũxẽ rũ tama naga taxĩnü i ngẽma chorũ ore. Rũ ngẽma ore i chauxũtawa nüxũ pexĩnüèxũ rũ tama chorũ ore nixĩ, natürũ guma Chaunatũ ga núma choxũ mucũarũ ore nixĩ. ²⁵ —Ñoma rũ ta petanũwa changẽxma rũ pemaã nüxũ chixu i guxũma i ngẽma ore i pexcèx choxũ ngẽxmaxũ. ²⁶ —Natürũ Chaunatũ rũ tá chauégagu núma nanamu i Naãẽ i Üünexũ na pexũ nangũxẽẽxũcèx. Rũ núma i Naãẽ i Üünexũ tá pexũ nangúexẽẽ i guxũma, rũ tá nüxna pexũ nacuèxãchixẽẽ i guxũma i ore ga

pemaã nüxũ chixuxũ. ²⁷ —Rũ ñuxma na pexna íchixũxũ, rũ pexna chanaxã i taãẽ. Natürũ ngẽma taãẽ i pexna chaxãxũ, rũ tama ñoma i naãnecũãx pexna ãxũ i taãẽrũũ nixĩ. Rũ tama chanaxwexe i penaxixãchiãẽgũ rũ pemuũẽ. ²⁸ —Marũ pemaã nüxũ chixu na pexna tá íchixũxũ rũ wena táxaru pexcẽx chataeguxũ na pemaã changẽxmaxũcẽx. Rũ choxũ pexĩnũẽ ga yexguma yema ñachaxgu. Rũ ngẽxguma aixcũma choxũ pengechaũgu rũ tá petaãẽgũ ega nüxũ pecuẽxgu na Chaunatũcẽx chataeguxũ, erũ Chaunatũ rũ chorũ yexera nixĩ. ²⁹ —Rũ naxũpa na nangupetũxũ i ngẽma, rũ pemaã nüxũ chixu na choxũ peyaxõgũxũcẽx i ngẽxguma nangupetũgu. ³⁰ —Marũ tãütãma poraãcũ pemaã chidexa, erũ marũ ínangu i Chataná i ñoma i naãneãrũ ãẽxgacũ ixĩxũ. Natürũ nüma rũ taxuwama choxũ narüyexera. ³¹ —Natürũ ngẽma tá choxũ ngupetũxũ, rũ ngẽmaãcũ tá nixĩ na guxũma i ñoma i naãnecũãx i duũxũgũ nüxũ nacuãxũcẽx na choma rũ Chaunatũxũ na changechaũxũ, rũ chanaxũxũ i ngẽma nüma choxũ namuxũ. ¡Rũ ipechigũ, rũ ngĩxã ítixĩ! —ñanagürũ ga Ngechuchu.

15

Ubanegu nüqũ nangu ga Ngechuchu

¹ Rũ ñanagürũ ga Ngechuchu: —Choma nixĩ i ñoma wüxi i ubanerũũ chiĩxũ rũ Chaunatũ nixĩ ya norũ yora ixĩcũ i ngẽma uba. ² —Rũ chorũ duũxũgũ rũ ngẽma ubachacũgürũũ nixĩgũ. Rũ ngẽma ubachacũũ i tama oxũ, rũ norũ yora rũ nayadae. Natürũ ngẽma nachacũũ i oxũ, rũ meã nanamexẽẽtanũ na yexeraãcũ poraãcũ naxoxũcẽx. ³ —Pema rũ marũ pime, yerũ naga pexĩnũẽ ga yema ore ga pexũ changũexẽẽxũ. ⁴ —Rũ name nixĩ i guxũguma chowa peyaxũxgũ, ngẽma na choma rũ pewa chayaxũxũrũũ. Erũ wüxi i ubachacũũ rũ tama nüxĩca naxo, ega tama nanewa yaxũxgux. Rũ ngẽxgumarũũ ta i pema rũ taxuacũma chauxcẽx pemaxẽ, ega tama chowa peyaxũxgũechagu. ⁵ —Choma nixĩ i ubane, rũ pema i nachacũgũ. Rũ yĩxema chowa yaxũẽchaxe rũ choma i tümawa, rũ aixcũma tá chauxcẽx tamaxũ. Rũ ngẽmaãcũ wüxi i ubachacũũ i oxũrũũ tá tixĩ. Natürũ ngẽxguma tama chowa peyaxũxgũechagu, rũ taxucürũwama tacũ pexũe. ⁶ —Rũ texẽ ya tama chowa yaxũẽchaxe rũ tá ítatẽxũchi. Rũ wüxi i ubachacũũ i daexũ rũ ipaxũ rũ iguxũrũũ tá tixĩ, rũ ngẽxma tá tayarũxo. ⁷ —Rũ ngẽxguma chowa peyaxũxgũechagu rũ taguma nüxũ ipeyarũngũmaẽgu i ngẽma ore i pexũ changũexẽẽxũ, rũ marũ name i naxcẽx ípeca i tacũ i penaxwẽxexũ, rũ choma rũ tá pexna chanaxã. ⁸ —Rũ ngẽxguma aixcũma meã chauxcẽx pemaxẽgu, rũ Chaunatũxũ tá nicuẽxũũgũ i duũxũgũ. Rũ ngẽmaãcũ aixcũma chorũ ngũexũgũ tá pixĩgũ. ⁹ —Choma rũ pexũ changechaũ ngẽma na Chaunatũ choxũ ngechaũxũrũũ. Rũ chanaxwexe i aixcũma meã chauga pexĩnũẽẽcha, erũ choma rũ guxũguma pexũ changechaũ. ¹⁰ —Choma rũ naga chaxĩnũ i Chaunatũarũ mugũ rũ nüma rũ guxũguma choxũ nangechaũ. Rũ ngẽxgumarũũ tá ta nixĩ ega naga pexĩnũẽgu i chorũ mugũ, rũ guxũgutãma pexũ changechaũẽcha. ¹¹ —Choma rũ ngẽmaãcũ pemaã nüxũ chixu na wüxigu chomaã petaãẽgũxũcẽx. Rũ ngẽmaãcũ tá aixcũma petaãẽgũ. ¹² —Rũ choma pexũ chamu na pemücũgũxũ pengechaũgũxũcẽx, ngẽma choma na pexũ changechaũxũrũũ. ¹³ —Rũ ngẽxguma wüxie aixcũma tümamücũxũ ngechaũgu, rũ nüxũ tangechaũãma rũ nüẽtama ega woo tümamücũcẽx tayuxgu. Rũ nataxuma i to i ngechaũ i ngẽmaãrũ yexera. ¹⁴ —Pema rũ chomücũgũ pixĩgũ i ngẽxguma chauga pexĩnũẽgu. ¹⁵ —Choma rũ marũ tama chorũ duũxũgũmareãcũ pexũ chaxu. Erũ wüxi i coriarũ duũxũmare rũ tama nüxũ nacuẽx i ngẽma norũ cori üxũ. Natürũ ñuxma rũ chomücũgũmaã pexũ

chaxu, erü pexũ nüxũ chachuẽẽ i guxũma i ore ga Chaunatü chomaã nüxũ ixuxũ. ¹⁶ —Pema rü tama pexira chauxcèx pedaugü, natürü chaxira nixĩ ga pexcèx chadauxũ rü pexũ chamuxũ na aixcũma chauxcèx pemaxẽxücèx rü chauxõtawa penagagũxücèx i muxũma i duũxũgü na guxũguma choxũ yaxõgũãxücèx. Rü Chaunatü ya Tupana tá pexna nanaxã i guxũma i tacü i chauégagu nüxna naxcèx pecaxũ. ¹⁷ —Rü ngẽma nixĩ i pexũ chamuxũ na pemücũgũxũ pengechaũgũxücèx.

Ñoma i naãnecũãx i duũxũgü rü Ngechuchuchi rü norü ngüexũgüchi naxaie

¹⁸ —Ngẽxguma ñoma i naãnecũãx i duũxũgü pexchi aiegu, rü ñnũxna pecuèxãchie ga chaxira chauxchi na naxaie xũ! ¹⁹ —Rü ngẽxguma chi ñoma i naãnecũãx i duũxũgürüũ pixĩgügu, rü ñoma i naãnecũãx i duũxũgü rü chi pexũ nangechaũgü ngẽma natanũxũgũxũ na nangechaũgũxürüũ. Natürü choma nixĩ ga pexcèx chadauxũ natanũwa ga ñoma ga naãnecũãx ga duũxũgü. Rü ngẽmacèx nixĩ i pexchi naxaie xũ, erü marü tama naxrũũ pixĩgü. ²⁰ — ñNũxna pecuèxãchie ga pemaã ñachagu:

“Taxuxũma i wüxi i coriarü duũxũ rü norü coriétüwa nügü nangexmaxẽẽ”, ñachagu! Rü yema na chauxchi na naxaie xũ, rü pexchi rü tá ta naxaie. Rü yexguma chi chauga naxĩnũëgu rü ñuxma rü chi ta pega naxĩnũë. ²¹ —Rü ngẽmaãcü ta chaugagu pexchi naxaie i ñoma i naãnecũãx i duũxũgü erü tama nüxũ nacuèxgü ya Chaunatü ga núma choxũ mucü. ²² —Rü ngẽxguma chi choma tama namaã chanangoxẽëgu na ñuxãcü chixri na namaxẽxũ, rü tãũ chima nüxũ nacuèxgü ga pecadu na naxũgũxũ. Natürü ñuxma namaã nüxũ na chixuxũ na ñuxãcü chixri namaxẽxũ, rü ngẽmacèx i ñuxma rü taxuacũma nüxũ nixugü na yangearü pecaduãxũ. ²³ —Rü guxũma i duũxũgü i chauxchi aie xũ rü Chaunatüchi rü ta naxaie. ²⁴ —Rü ngẽma duũxũgüpèxewa rü Tupanaãrü poramaã chanaxü i mexũgü i taxũ i taguma texé ya togue üxũ. Rü ngẽxguma chi tama napèxewa chanaxũxgu i ngẽma mexũgü rü tãũ chima Tupana namaã nanaxuegu na nagagutama yapecaduãxgũxũ. Natürü na woo marü nüxũ nadaugũxũ i ngẽma mexũgü i taxũ i Tupanaãrü poramaã chaxũxũ, rü ngẽxguma rü ta chauxchi naxaieama rü Chaunatüchi rü ta naxaie. ²⁵ —Natürü ngẽmaãcü nangupetü erü Tupana nayanguxẽëchaũ i norü ore i ümatũxũ i ñaxũ:

“Chauxchi naxaie woo taxuũma i chixexũ chaxũxgu”, ñaxũ. ²⁶ —Natürü choma rü tá Chaunatüégagu pexcèx núma chanamu i perü ngüxẽëruũ i Tupanaãë i Üünexũ i tá pexũ nüxũ cuèxẽëxũ i ore i aixcũma ixĩxũ. Rü nüma tá nixĩ i meãma pemaã nüxũ yaxuxũ i chauchiga. ²⁷ —Rü pema rü tá ta chauchigaxũ pixugüe, yerü noxri ichanaxũgügu ga duũxũgümaã nüxũ na chixuxũ ga chorü ore, rü woetama marü chauxõtawa peyexmagü — ñanagürü ga Ngechuchu.

16

¹ Rü Ngechuchu rü ñanagürü nüxũ: —Rü pemaã nüxũ chixu i ñãã ore na tama nüxũ na perüxoexücèx na choxũ peyaxõgũxũ. ² —Rü ngutaquẽxepataũgüwa tá pexũ ínawoxũ. Rü aixcũma tá nawa nangu na texé pexũ dèixũ rü tá nagu tarũxĩnũxũ na ngẽmaãcü mexũ Tupanacèx taxũxũ. ³ —Rü ngẽmaãcü tá pemaã namaxẽ i duũxũgü, erü taguma nüxũ nacuèxgü ya Chaunatü, rü choxũ rü ta tama nacuèxgü. ⁴ —Rü pemaã nüxũ chixu i ñãã ore i ñuxmax, na nüxna pecuèxãchie xücèx i ngẽxguma yixcũra ngẽmaãcü pexũ nangupetügu.

Tupanaãë i Üünexũãrü puracũchiga

—Noxri rü tama pemaã nüxũ chixu i ñaã ore, yerü petanügu charüxãũx.
⁵ —Natürü i ñuxma rü tá pexna íchixũ na Chaunatü ga núma choxũ mucüxütawa na changẽxmaxũcèx. Rü pema rü taxúema choxna peca na ngextá tá na chaxũxũ. ⁶ —Natürü poraãcü pengechaũgüama erü pemaã nüxũ chixu i ngẽma ore. ⁷ —Natürü aixcüma pemaã nüxũ chixu rü pexcèx narümemaẽ nixĩ na Chaunatücèx chataeguxũ. Rü ngẽxguma chi tama Chau-
 natüxütawa chaxũxgu rü tãũ chima núma naxũ i Naãe i Üünexũ i pexũ rüngũxẽxũ. Natürü ngẽxguma ngẽma chaxũxgu rü choma tá núma chanamu i Naãe i Üünexũ. ⁸ —Rü ngẽxguma Naãe i Üünexũ núma ùxgu rü tá guxũ i duũxũgũxũ nüxũ nacuèxẽẽ na yapedaduãxgũxũ. Rü tá nanangoxẽẽ i ñuxãcü na yĩxũ i ngẽma maxũ i Tupanapẽxewa aixcüma mexũ. Rü tá duũxũgũxũ nüxũ nacuèxẽẽ na Tupana tá napoxcuexũ i duũxũgũ naxcèx i norü pecadugü. ⁹ —Rü nüma i Naãe i Üünexũ tá duũxũgũxũ nüxũ nacuèxẽẽ na pecaduãxgũxũ yĩxũ erü tama choxũ nayaxõgü. ¹⁰ —Rü tá nanangúexẽẽ i ñuxãcü na yĩxũ i ngẽma maxũ i Tupanapẽxewa aixcüma mexũ, erü choma rü tá Chaunatüxütawa chaxũ, rü pema rü tãütáma marü choxũ pedaugü. ¹¹ —
 Rü Naãe i Üünexũ tá duũxũgũxũ nüxũ nacuèxẽẽ na Tupana tá napoxcuexũ i duũxũgũ i chixexũ ügũxũ, erü Tupana rü namaã nanaxuegu na marü napoxcuãxũ i Chataná i ñoma i naãnemaã icuáxũ. ¹² —Choma rü choxũ nangẽxma i muxüma i to i ore i pemaã nüxũ chixuxchaũchiréxũ. Natürü ega ñuxma chi pemaã nüxũ chixuxgu rü tãũ chima nüxũ pecuèxgü. ¹³ —Rü Tupanaãe i Üünexũ rü nüxũ nixu i ore i aixcüma ixĩxũĩcatama. Rü ngẽxguma núma naxũxgu rü nüma tá pexũ nangúexẽẽ i guxüma i ore i aixcüma ixĩxũ. Erü nüma rü tama nüèchama tá nidexa, natürü ngẽma ore i Chaunatüxütawa rü chauxütawa nüxũ naxĩnũxũxũxica tátama nixu. Rü tá pexũ nüxũ nacuèxẽẽ i guxüma i tacü i yixcúra tá ngupetüxũ. ¹⁴ —Rü nüma rü tá choxũ nataxẽẽ, erü chauxütawa tá nanayaxu i norü nguxẽẽtae, rü ñuxũchi tá pexũ nangúexẽẽ namaã i ngẽma nguxẽẽtae. ¹⁵ —Guxüma i Chaunatüaxũ ngẽxmaxũ rü choxrü ta nixĩ. Ngẽmacèx pemaã nüxũ chixu rü Naãe i Üünexũ rü chauxütawa tá nanayaxu i norü nguxẽẽtae, rü ñuxũchi pexũ tá namaã nangúexẽẽ. ¹⁶ —Rü paxa tãütáma choxũ pedau. Natürü ngẽmawena rü wena táxarü choxũ pedau erü Chaunatüxütawa tá chaxũ —ñanagürü ga Ngechuchu.

Ngema guxchaxũgü rü yixcüama rü tá taãxũ nananguxuchi

¹⁷ Rü yexguma ñuxre ga toma ga Ngechuchuarü ngúexũgü rü togüna tacagü, rü ñatarügügü: —¿Tacüchiga nixĩ na ngẽma ñaxũ:

“Rü paxa tãütáma choxũ pedaugü. Natürü ngẽmawena rü wena táxarü choxũ pedaugü”, ñaxũ? ¿Rü tacüchiga ta nixĩ na ñaxũ:

“Choma rü Chaunatüxütawa tá chaxũ”, ñaxũ? ¹⁸ —¿Rü tacüchiga ta nixĩ na ñaxũ:

“Rü paxa tãütáma choxũ pedaugü”, ñaxũ? Rü yixema rü tama nüxũ tacuèxgüéga na tacüchigaxũ tamaã yaxuxũ —ñatarügügü. ¹⁹ Rü Ngechuchu rü nüxũ nacuèxama ga nüxna na tacagüchaũxũ ga tomax. Rü yemacèx ñanagürü toxũ: —Choma rü marü pemaã nüxũ chixu rü paxa tãütáma choxũ pedau, natürü ngẽmawena rü wena táxarü choxũ pedau. ¿Rü ngẽma dexacèxtama i pegüna pecagüxũ? ²⁰ —Rü aixcüma pemaã nüxũ chixu rü pema rü tá pexauxe, rü tá pengechaũgü. Natürü ñoma i naãnecũãx i duũxũgü rü tá nataãgü. Natürü woo pema tá pengechaũgü, rü ngẽma perü ngechaũ rü tá taãxũ nananguxuchi. ²¹ —Ngẽxguma wüxi i nge íraxacüchaũgu rü in-
 axixãchiãe, erü inguxneca. Natürü ngẽxguma marü tabuxgu ya ngĩrũ õxchana, rü nüxũ iyarüngüma na ñuxãcü poraãcü ngĩxũ na nanguxchiréxũ i noxrix, erü

tümamaã itaãe ya ngĩrũ õxhana. ²²—Rũ ngẽxgumarũũ tá ta pexũ nangupetũ i pemax, erũ ñuxma rũ penaxixãchiãegũ. Natürũ wena táxarũ chataegu rũ pexũ íchayadau. Rũ ngẽxguma rũ tá pexũ nangẽxma i wũxi i taãe i taxucürũwama texé pexna yaxuxũ. ²³—Rũ ngẽxguma ínanguxgu tá i ngẽma ngunexũ na yanguxũ i ñaã pemaã nüxũ chixuxũ, rũ taxucẽxtama ÷acũcèx choxna pecagũ erũ aixcũma Chaunatũ tá nixĩ ya pexna naxãcũ i guxũma i ÷acũ i chauégagu nüxna naxcèx peçaxũ. ²⁴—Ñuxmarũta i pema rũ taxuũcèxma chauégagu ípecagũ. ¡Naxcèx ípeca rũ tá penayaxu i ngẽma naxcèx ípeçaxũ! Rũ ngẽmaãcũ rũ tá aixcũma petaãegũ.

Ngechuchu rũ marũ nüxũ narüyexera i guxũma i ÷acũ i ñoma i naãnewa ngẽxmaxũ

²⁵—Ñuxma rũ cuèxruũgũgu chayaxuãcũma pemaã nüxũ chixu i ore. Natürũ nawa tá nangu i ngunexũ i marũ tãütáma ngẽmaãcũ pemaã nüxũ chixu. Rũ ngẽxguma rũ tá noxtacũma meã pemaã chanangoxẽe i Chaunatũchiga. ²⁶⁻²⁷—Rũ ngẽma ngunexũgu i pema rũ Chaunatũxũtawa tá chauégagu naxcèx ípeca i ÷acũ i penaxwèxexũ. Rũ taxucèxma tüxcũũ choma tá Chaunatũxũtawa pexũ naxcèx íchaca, erũ nümatama ya Chaunatũ rũ woetama pexũ nangechaũ, erũ pema rũ choxũ pengechaũ rũ peyaxõgũ na naxũtawa ne chaxũxũ. ²⁸—Chaunatũxũtawa ne chaxũ na ñoma ga naãnewa chaxũxũcèx. Rũ ñuxma rũ tá nüxna chataegu i ñoma i naãne na wenaxãrũ Chaunatũxũtawa chaxũxũcèx —ñanagürũ. ²⁹ Rũ yexguma ga toma ga norũ ngúexũgũ rũ ñatarũgũgũ: —Ñuxma waxi nixĩ i meãxũchima tomaã cunangoxẽexũ i curũ ore i tomaã nüxũ quixuxũ. Rũ tama ÷acũgu ixuxũãcũma tomaã nüxũ quixu. ³⁰—Rũ ñuxma rũ nüxũ tacuèx na aixcũma guxũxũma na cucuáxũ. Rũ taxuacũma texé ñuxũ ñatagürũ cuxũ. Rũ ngẽmacèx nixĩ i tayaxõgũxũ na aixcũma Tupanaxũtawa na ne cuxũxũ —ñatarũgũgũ. ³¹ Rũ Ngechuchu toxũ nangãxũ rũ ñanagürũ: —¿Aixcũma peyaxõgũxũ i ñuxmax? ³²—Rũ nawa tá nangu i ngunexũ rũ ñuxmatátama nixĩ i na pegũ pewoonexũ. Rũ wũxichigũ i pema rũ tá pepatawa pexĩ, rũ chaxica tá nuã choxũ petèx. Natürũ tama chaxica tá icharũxãũx, erũ Chaunatũ rũ chauxũtawa nangẽxma. ³³—Rũ guxũma i ñaã ore rũ pemaã nüxũ chixu na chaugagu petaãegũxũcèx. Rũ ñoma i naãnewa rũ tá ngúxũ pingè. Natürũ ¡peporae! erũ choma rũ marũ nüxũ charüyexera i guxũma i ÷acũ i ñoma i naãnewa ngẽxmaxũ —ñanagürũ.

17

Ngechuchu rũ norũ ngúexũgũcèx nayumüxẽ

¹ Rũ yema ñaxguwena rũ Ngechuchu daxũgu nadawenũ, rũ ñanagürũ: —Pa Chaunatũx, marũ nawa nangu i ngunexũ na chayuxũ. Rũ chanaxwèxe na duũxũgũxũ nüxũ cucuèxèexũ na aixcũma choma rũ cune chiĩxũ. Rũ ngẽmaãcũ i choma rũ tá nüxũ nüxũ chacuèxèe na cuma rũ aixcũma Tupana na quiĩxũ. ²—Erũ marũ guxũ i duũxũgũarũ ãexgacũxũ choxũ quixĩxèe, na chanamaxèxèexũcèx i guxũma i duũxũgũ i choxna cumugũxũ. ³—Rũ ngẽma duũxũgũ tá nüxũ nangẽxma i maxũ i taguma gúxũ ega cuxũ nacuèxgũgu na cuxicatama Tupana na quiĩxũ, rũ choxũ nacuèxgũgu na choma rũ Cristu ga núma choxũ cumucũ na chiĩxũ. ⁴—Choma rũ marũ cuxũ chataxèe i ñoma i naãnewa rũ chayanguxèe i guxũma i puracũ ga nawa choxũ cumuxũ. ⁵—Rũ ñuxma Pa Chaunatũx, rũ chanaxwèxe i cugũxũtawa choxũ cungẽxmaxèe na choxũ nangẽxmaxũcèx ga yematama pora ga cumaã choxũ yexmaxũ ga noxri tauta naãne üxgu. ⁶—Rũ guxema duũxègũ ya tüxũ quidexechixe ga ñoma ga naãnewa na choxna tüxũ cumugũxũcèx, rũ marũ tüxũ nüxũ chacuèxèe

i texé na quiixũ i cumax. Rũ woetama cuxrũgũ tixĩgũ rũ cuma nixĩ ga choxna tũxũ cumugũxũ. Rũ tũmagũ rũ marũ naga taxĩnũe i curũ ore. ⁷—Rũ ñuxma rũ marũ nũxũ tacuèx rũ guxũma i ngẽma choxna cuxãxũ, rũ aixcũma cuxũtawã ne naxũ. ⁸—Rũ choma rũ marũ tũmamaã nũxũ chixu ga curũ ore ga chomaã nũxũ quixuxũ. Rũ tũmagũ rũ marũ tayaxõgũ i ngẽma ore. Rũ nũxũ ticuèxãchitanũ na aixcũma cuxũtawã na ne chaxũxũ i chomax. Rũ tayaxõgũ ga cuma núma choxũ na cumuxũ. ⁹—Rũ ngẽmacèx cuxna chaca na tũxũ na curũngũxẽxũcèx. Rũ tama cuxna chaca na nũxũ curũngũxẽxũcèx i ñoma i naãnecũãx i duũxũgũ, natũrũ cuxna chaca na tũxũ curũngũxẽxũcèx ya guxema choxna tũxũ cumugũxe, erũ curũ duũxũgũ tixĩgũ. ¹⁰Rũ guxãma ya yĩxema choxrũgũ ixĩgũxe rũ cuxrũgũ tixĩgũ. Rũ guxãma ya cuxrũgũ ixĩgũxe rũ choxrũgũ tixĩgũ. Rũ tũmagagu rũ duũxũgũ choxũ nicuèxũũgũ. ¹¹—Choma rũ marũ tãũtãma ñoma i naãnewã changẽxmaẽcha, natũrũ i tũmagũ rũ ngẽmaãcũ ñoma i naãnewã tá tangẽxmagũ ngẽxguma cuxũtawã chaxũyane. Pa Chaunatũ ya Üñecũx, rũ chanaxwèxe na curũ porã ga choxna cuxãxũmaã tũxna cudadũxũ ya yĩxema choxna tũxũ cumugũxe, na ngẽmaãcũ guxãma wũxigu rũxĩnũèxũcèx, ngẽma cuma rũ choma na wũxigu rũxĩnũèxũrũũ. ¹²—Rũ yexguma guxema choxna tũxũ cumugũxetanũwã chayexmagu ga ñoma ga naãnewã, rũ curũ porã ga choxna cuxãxũmaã tũxna chadau rũ tũxũ íchapoxũ. Rũ taxũema ga guxema choxna tũxũ cumugũxe rũ itayarũtauxe. Rũ Yuda ga woetama iyarũtaxuxũxicatama inayarũtaxu na yanguxũcèx i curũ ore i ùmatũxũ. ¹³—Rũ ñuxma rũ cuxũtawã tá chaxũ. Natũrũ ñomarũta ñoma i naãnewã changẽxma-yane rũ nũxũ chixu i ñãã curũ ore na tũmagũ rũ ta tũxũ nangẽxmaxũcèx i ngẽma taãe i aixcũma ixĩxũ i choma choxũ ngẽxmaxũ. ¹⁴—Choma rũ marũ tũmamaã nũxũ chixu i curũ ore. Natũrũ ñoma i naãnecũãx i duũxũgũ rũ tũmachi naxãie, erũ tũma rũ tama naxrũũ tixĩgũ, ngẽxgumarũũ i choma rũ tama ñoma i naãnecũãxrũũ chixĩ. ¹⁵—Tama cuxna tũmacèx chaca na tũxũ na quigagũxũcèx i ñoma i naãnewã. Natũrũ cuxna chaca na tũxũ na ícupoxũxũcèx nũxna i ngoxo i Chataná. ¹⁶—Choma rũ tama ñoma i naãnecũãx chixĩ. Rũ tũmagũ rũ ta tama ñoma i naãnecũãx tixĩgũ, erũ cuxrũgũ tixĩgũ i ñuxmax. ¹⁷—Curũ ore rũ aixcũma nixĩ. Rũ chanaxwèxe i tũxũ cungũxẽe i curũ ore, na aixcũma cupèxewã tixũñexũcèx ya yĩxema choxna tũxũ cumugũxe. ¹⁸—Rũ yexgumarũũ ga ñoma ga naãnecũãx ga duũxũgũtanũwã choxũ na cumuxũrũũ, rũ ngẽxgumarũũ i choma rũ ta ñoma i naãnecũãx i duũxũgũ-tanũwã tũxũ chamugũ. ¹⁹—Rũ tũmagagu chaugũ ichaxã na tũxũ changũxẽxũcèx i curũ ore i aixcũma ixĩxũ, na cupèxewã tixũñexũcèx ya yĩxema choxna tũxũ cumugũxe. ²⁰—Natũrũ tama yĩxema ñuxma yaxõgũxecèxicatama cuxna chaca. Natũrũ cuxna chaca ta tũmacèx ya yĩxema yixcũra tá yaxõgũxe nagagu i tũmaãrũ ore ya yĩxema ñuxma yaxõgũxe. ²¹—Rũ guxãma ya yĩxemacèx cuxna chaca na aixcũma wũxitama tixĩgũxũcèx. Rũ ngẽma cuma rũ choma na wũxitama ixĩgũxũrũũ, Pa Chaunatũx, rũ chanaxwèxe i guxãma i tũma rũ ta wũxitama tixĩgũ. Rũ ngẽmaãcũ i ñoma i naãnecũãx i duũxũgũ, rũ tá nayaxõgũ na cuma núma choxũ cumuxũ. ²²—Rũ choma rũ marũ tũxna chanaxã i ngẽmatama porã i cuma choxna cuxãxũ na ngẽmaãcũ wũxitama tixĩgũxũcèx ngẽma cuma rũ choma na wũxitama ixĩgũxũrũũ. ²³—Rũ chanaxwèxe na tũmawã changẽxmaxũ rũ cuma i chowã na cungẽxmaxũ na ngẽmaãcũ aixcũma wũxi-tama ixĩgũxũ i guxãma i yixema. Rũ ngẽmaãcũ i ñoma i naãnecũãx i duũxũgũ rũ tá nũxũ nicuèxãchitanũ na cuma núma choxũ cumuxũ, rũ tá nũxũ nicuèxãchitanũ na tũxũ cungechaũxũ ya yĩxema choxna tũxũ cumugũxe ngẽma na choxũ cungechaũxũrũũ. ²⁴—Pa Chaunatũx, cuma choxna tũxũ cumugũ. Rũ chanaxwèxe i chauxũtawã

tangëxmagü i ngema tá íchangëxmaxüwa, na nüxü tadaugüxücèx i chorü pora ga choxna cuxãxü. Yerü choxü cungechaü ga yexguma tauta naãne ixügügumama. ²⁵—Pa Chaunatü ya Mecüx, ñoma i naãnecüãx i duüxügü rü tama cuxü nacuèxgü. Natürü choma rü cuxü chacuèx. Rü yíxema choxna tüxü cumugüxe rü ta marü nüxü tacuèxgü na cuma núma choxü cumuxü. ²⁶—Rü marü tüxü nüxü chacuèxëë na texé quiixü. Rü guxügutáma tüxü nüxü chicuèxëëãmachigü na cuma choxü cungechaüxürüü tügü tangechaügüxücèx rü choma rü tümaxütawa na changëxmaxüçèx —ñanagürü ga Ngechuchu.

18

Ngechuchuxü niyauxgü

(Mt 26.47-56; Mr 14.43-50; Lc 22.47-53)

¹ Rü yema ñaxguwena ga Ngechuchu rü tomaã inaxüãchi, na Cheduruarü ngatexüärü tocutüwa taxíxücèx. Rü yéma nayexma ga wüxi ga nanetüncèx. Rü yemawa naxü ga Ngechuchu tomaã. ² Rü Yuda ga yema bexma cúãcü Ngechuchuxü íyaxuaxüxü rü nüxü nacuèx ga yema nachica, yerü Ngechuchu rü muëxpüxcüna yéma tomaã nangutaquëxexü. ³ Rü yéma nangu ga Yuda namaã ga ñuxre ga churaragü rü ñuxre ga tupauca ga taxüneärü purichíagü ga yéma namugüxü ga paigüarü ãëxgacügü rü parichéugü. Rü meãma nixãxne, rü yéma nanangegü ga omügü. ⁴ Natürü ga Ngechuchu rü marü nüxü nacuèx ga guxüma ga tacü tá nüxü na ngupetüxü. Rü yemacèx naxcèx nixü, rü nüxna naca, rü ñanagürü: —¿Texécèx nixí i pedaugüxü? —ñanagürü. ⁵ Rü nümagü rü Ngechuchuxü nangãxügü, rü ñanagü-rügü: —Nacharétucüãx i Ngechuchucèx nixí i tadaugüxü —ñanagürügü. Rü Ngechuchu nanangãxü, rü ñanagürü: —Choma chixí —ñanagürü. Rü Yuda ga bexma cúãcü ínaxuaxüxü rü yema churaragütanüwa nayexma. ⁶ Rü yexguma yema ñaxgu ga Ngechuchu: “Choma chixí”, ñaxgu, rü nügüweama nacaixütanü ga yema churaragü, rü yexma nayayi. ⁷ Rü yexguma ga Ngechuchu rü wena nüxna naca, rü ñanagürü: —¿Texécèx nixí i pedaugüxü? —ñanagürü. Rü nümagü rü nanangãxügü rü ñanagürügü: —Nacharétucüãx i Ngechuchucèx nixí i tadaugüxü —ñanagürügü. ⁸ Rü Ngechuchu rü wenaxärü ñanagürü nüxü: —Marü pemaã nüxü chixu rü choma chixí. Rü ngëxguma chauxcèx pedaugügu rü jípeyaxíxëë i ñaã chorü ngúexügü! —ñanagürü. ⁹ Rü yemaãcü nangupetü na yanguxücèx ga norü ore ga nümatama ga Ngechuchu nüxü yaxuxü ga ñaxgu:

“Yíxema Chaunatü choxna tüxü mugüxe rü taxúetáma itayarütaxe”, ñaxgu.

¹⁰ Rü Chimáü ga Pedru rü nüxü iyexma ga wüxi ga cüxchi. Rü ngíxü nayaxu ga norü cüxchi rü yemamaã ínanadaechinü ga paigüarü ãëxgacüarü duüxü ga Macugu äegaxü. Rü norü tügünechinü ínadae. ¹¹ Natürü ga Ngechuchu rü Pedruxü ñanagürü: —¡Ngíxchixügu ngíxü ixücuchi i curü cüxchi! ¿Tama ëxna nüxü cucuèx na choma rü tá ngúxü chingexü ngëma Chaunatü chomaã naxueguxürüü? —ñanagürü.

Anápatawa Ngechuchuxü nagagü

(Mt 26.57-58; Mr 14.53-54; Lc 22.54)

¹² Rü yexguma ga churaragüarü ãëxgacü, namaã ga norü churaragü rü tupaucaarü purichíagü, rü Ngechuchuxü niyauxgü. Rü nayanëixchacüügü. ¹³ Rü noxri rü ãëxgacü ga Anápatawa nanagagü. Rü Aná rü Caipánèxtü nixí. Rü guma taunecügu ga Caipá rü paigüeru nixí. ¹⁴ Rü yema Caipá nixí ga üpaacü yema Yudíugüarü ãëxgacügümaã nüxü ixuxü ga na namemaëxü ga wüxitama ga yatü guxüma ga Yudíugücèx na yuxü.

*Pedru rü Ngechuchuxü nixã**(Mt 26.69-70; Mr 14.66-68; Lc 22.55-57)*

¹⁵ Rŭ choma rŭ Chimãu ga Pedru rŭ wŭxigu Ngechuchuwe tarŭxĩ. Rŭ yema paigŭarŭ ãëxgacŭ rŭ choxŭ nacuèx. Rŭ yemacèx ga choma rŭ wŭxigu Ngechuchumaã tichocu ga ãëxgacŭpataèxtŭwa. ¹⁶ Natŭrŭ ga Pedru rŭ ãëxãrŭ dŭxétŭgutama narŭxãŭx. Rŭ yemacèx íchaxŭxŭ ga choma, rŭ yema ãëxãrŭ dauruŭ ga ngecŭmaã chayarŭdexa rŭ yexguma Pedruxŭ iyamucuchi. ¹⁷ Rŭ yexguma ga yema ngecŭ ga ãëxãrŭ dauruŭ, rŭ Pedruna ica, rŭ ngŭgŭrŭgŭ: —¿Tama èxna cuma rŭ ta wŭxi i norŭ ngŭexŭ quiŭxŭ i ngẽma yatŭ i yayauxgŭxŭ? —ngŭgŭrŭgŭ. Rŭ Pedru ngŭxŭ nangãxŭ, rŭ ñanagŭrŭ: —Tama nixĩ —ñanagŭrŭ. ¹⁸ Rŭ yema ãëxtŭwa rŭ ãëxgacŭarŭ duŭxŭgŭ rŭ purichíagŭ rŭ nanaxŭgŭ ga wŭxi ga ŭxŭ, yerŭ nagáuane. Rŭ guma ŭxŭxetŭarŭ ngaicamagu nachigŭ, rŭ yema nŭgŭ ninaŭxŭgŭ. Rŭ Pedru rŭ ta yema nŭgŭ nanaŭxŭ naxètŭwa ga guma ŭxŭ.

*Paigŭarŭ ãëxgacŭ rŭ Ngechuchuna naca**(Mt 26.59-66; Mr 14.55-64; Lc 22.66-71)*

¹⁹ Rŭ yema paigŭarŭ ãëxgacŭ rŭ inanaxŭgŭ ga Ngechuchuna na naçaxŭ, rŭ ñanagŭrŭ: —¿Tacŭ nixĩ ga duŭxŭgŭxŭ namaã cungúexèèxŭ? ¿Rŭ texégŭ tixĩ ya yíxema curŭ ngŭexŭgŭ? —ñanagŭrŭ. ²⁰ Rŭ Ngechuchu ñanagŭrŭ nŭxŭ: —Choma rŭ guxŭ ga duŭxŭgŭpèxewa nŭxŭ chixu ga chorŭ ore. Rŭ ngutaquèxepataŭgŭwa rŭ tupauca ya taxŭnewa i ngextá guxŭma i Yudíugŭ íngutaquèxegŭxŭwa chanangúexèè ga duŭxŭgŭ. Rŭ yemaãcŭ taxuŭma ichicŭx ga chorŭ ore. ²¹ —¿Rŭ tŭxcŭŭ i choxna cuçaxŭ i ñuxmax? Ècŭ, jnŭxna naca i ngẽma duŭxŭgŭ ga nŭxŭ ínŭèxŭ ga chorŭ ore! Rŭ nŭmagŭ tá cumaã nŭxŭ nixugŭe ga tacŭchigaxŭ namaã na chixuxŭ. Erŭ nŭmagŭ rŭ nŭxŭ nacuèxgŭ i guxŭma ga tacŭ ga namaã nŭxŭ chixuxŭ —ñanagŭrŭ. ²² Rŭ yexguma Ngechuchu yema ñaxgu, rŭ wŭxi ga tupauca ga taxŭneãrŭ purichía ga naxŭtagu chixŭ, rŭ Ngechuchuchiwegu nidagŭ. Rŭ ñanagŭrŭ Ngechuchuxŭ: —¿Tŭxcŭŭ ngẽmaãcŭ cunangãxŭ ya daa paigŭarŭ ãëxgacŭ? —ñanagŭrŭ. ²³ Rŭ Ngechuchu nanangãxŭ rŭ ñanagŭrŭ: —Rŭ ngèxguma tacŭ rŭ chixexŭxŭ chixuxgu, j rŭ nŭxŭ ixu na ñuxãcŭ chixri na chidexaxŭ! Natŭrŭ ega chorŭ ore rŭ aixcŭma yixígu, rŭ ¿tŭxcŭŭ i choxŭ quidagŭxŭ i ñuxmax? —ñanagŭrŭ. ²⁴ Rŭ yexguma ga Aná rŭ Ngechuchuxŭ yanáíãcŭma paigŭarŭ ãëxgacŭ ga Caipáxŭtawa nanamu.

*Pedru rŭ wenaxãrŭ tama Ngechuchuxŭ nacuèxneta**(Mt 26.71-75; Mr 14.69-72; Lc 22.58-62)*

²⁵ Rŭ yoxni ga Pedru rŭ ŭxŭarŭ ngaicamagu nachiecha, rŭ yema nŭgŭ nanaŭxŭãma. Rŭ yema yema yexmagŭxŭ rŭ nŭxna nacagŭe, rŭ ñanagŭrŭgŭ: —¿Tama èxna cuma rŭ ta norŭ ngŭexŭ quiŭxŭ i ngẽma yatŭ i yayauxgŭxŭ? —ñanagŭrŭgŭ. Natŭrŭ ga Pedru rŭ tama nŭgŭ nixu, rŭ ñanagŭrŭ: —Tama nixĩ —ñanagŭrŭ. ²⁶ Rŭ yema nayexma ga wŭxi ga paigŭarŭ ãëxgacŭarŭ duŭxŭ. Rŭ yema rŭ Pedru ídaechinŭxŭtanŭxŭ nixĩ. Rŭ Pedruna naca, rŭ ñanagŭrŭ: —¿Tama èxna cuma yíxŭ ga nanetŭnecŭwa Ngechuchumaã cuxŭ chadauxŭ? —ñanagŭrŭ. ²⁷ Rŭ Pedru rŭ wena tama nŭgŭ nixu. Rŭ yexgumatama nica ga otá.

*Ngechuchu rŭ Piratu-pèxewa nayexma**(Mt 27.1-2, 11-14; Mr 15.1-5; Lc 23.1-5)*

²⁸ Rŭ yexguma Ngechuchumaã nŭxŭ nachauegu ga nŭxna na nacagŭxŭ, rŭ Caipápatawa ínanagaxŭchigŭ rŭ Yudéaaneãrŭ ãëxgacŭ ga Dumacŭãxpatawa nanagŭ. Natŭrŭ marŭ ningóonechaŭ ga yexguma rŭ yemacèx ga yema

Yudíugü rü tama guma ãëxgacüpatagu nachocu, yerü norü mugü nüxü nixu rü taxü ga pecadu nixí na wüxi ga Dumacüãxpatagu na nachocuxü ga yema ngunexügu. Rü yemaãcü tama Tupanapëxewa nügu nixüxaarü maxüãxëëgüchaü, yerü yexguma nügu yaxüxaarü maxüãxëëgügu, rü taxucürüwa nanangõxgü ga õna ga Üpetüchigaarü petacèx namexëëxü. ²⁹ Rü yemacèx ga guma ãëxgacü ga Dumacüãx ga Piratu rü napatawa ínaxüxü ga duüxügümaã na yadexaxüçèx. Rü ñanagürü nüxü: —¿Tacüçèx ípenaxuaxü ya daa yatü? —ñanagürü. ³⁰ Rü nümagü rü Piratuxü nangãxügü, rü ñanagürügü: —Ngëxguma chi tama wüxi i taxü i chixexü naxüxgu, rü tãu chima cuxütawa tanaga —ñanagürügü. ³¹ Rü yexguma ga Piratu rü ñanagürü nüxü: —¿Ëcü perü ãëxgacügüxütawa penaga, rü perü mugü pemaã nüxü ixuxüãcüma penapoxcux! —ñanagürü. Natürü ga yema Yudíugü rü Piratuxü nangãxügü, rü ñanagürügü: —Natürü pema i Dumacüãxgü rü marü toxna penachuxu na texéxü timëxgüxü tümaärü chixexüçèx —ñanagürügü. ³² Rü yemaãcü ningu ga yema ore ga Ngechuchu üpaacü nüxü ixuxü ga ñuxãcü tá na nayuxü. ³³ Rü Piratu rü wenaxärü napatagu naxücu, rü Ngechuchucèx nangema. Rü nüxna naca, rü ñanagürü: —¿Cuma yíxü i Yudíugüarü ãëxgacü quíxü? —ñanagürü. ³⁴ Rü Ngechuchu ñanagürü nüxü: —¿Cuechamatama i nagu curüxínüxü na ngëmaãcü choxna cuçaxü, rü ëxna togü marü cumaã nüxü nixu na ngëmaãcü choxna cuçaxüçèx? —ñanagürü. ³⁵ Rü Piratu Ngechuchuxü nangãxü, rü ñanagürü: —¿Ëxna cuma nagu curüxínügu rü Yudíu chíxü? Rü ngëma cuchiüãnecüãxgü rü paigüarü ãëxgacügütama nixí i chauxütawa cuxü gagüxü. ¿Ëxna tacü rü chixexü cuxü? —ñanagürü. ³⁶ Rü yexguma ga Ngechuchu rü nanangãxü, rü ñanagürü: —Choma rü tama ñoma i naãnewa ãëxgacü chixí. Rü ngëxguma ñoma i naãnewa ãëxgacü chixígu, rü chorü duüxügü rü chi Yudíugüarü ãëxgacügümaã nügu nadai rü tãu chima choxü niyauxgü i ngëxguma. Natürü tama ñoma i naãnewa ãëxgacü chixí —ñanagürü. ³⁷ Rü yexguma ga Piratu rü ñanagürü nüxü: —¿Ëxna to i nachiüãneärü ãëxgacü quixí i cumax? —ñanagürü. Rü Ngechuchu nanangãxü rü ñanagürü: —Cumatama marü nüxü quixu na ãëxgacü chíxü. Rü yemacèx ga choma rü chabu rü ñoma ga naãnewa chaxü na duüxügümaã nüxü chayarüxuxüçèx i ore i aixcüma ixíxü. Rü guxãma ya texé ya nüxü cuáxchaüxë i ngëma ore i aixcüma ixíxü, rü choxü itarüxínüë i ngëma ore i nüxü chixuxü —ñanagürü. ³⁸ Rü Piratu rü ñanagürü nüxü: —¿Tacü nixí i ngëma ore i aixcüma ixíxü? —ñanagürü.

Ngechuchumaã nanaxuegu na yamëxgüãxü

(Mt 27.15-31; Mr 15.6-20; Lc 23.13-25)

Rü yemaãcü Ngechuchuna nacaxguwena ga Piratu, rü wenaxärü Yudíugümaã nayarüdexa. Rü ñanagürü nüxü: —Taxuüma i chixexüxü nawa chadau i ñaã yatü. ¿Rü tüxcüü chi inapoxcuxü? ³⁹ —Natürü guxüguma ega Üpetüchigaarü petawa nanguxgu, rü pecüma nixí na choxna naxcèx na peçaxü na íchananguxuchixëëxüçèx i wüxi i duüxü i poxcuxü. ¿Rü penaxwëxexü na peçcèx íchananguxuchixëëxü i ñaã perü ãëxgacü, Pa Yudíugüx? —ñanagürü. ⁴⁰ Rü yexguma ga guxüma ga yema duüxügü, rü tagaãcü aita naxüe, rü ñanagürügü: —Tama tanaxwëxe na cuya-ngéxü i ngëma yatü. Rü Barabá waxi nixí i tanaxwëxexü na cuyangéxü —ñanagürügü. Rü yema Barabá rü wüxi ga máëtaxü nixí.

19

¹ Rü yexguma ga Piratu rü churaragüxü namu na Ngechuchuxü naçuaixgüxüçèx. ² Rü yema churaragü rü chuchuxüwa nanaxügü ga

wüxi ga boxü, rü ñuxüchi naëruwa nayangèxcuchigü. Rü wüxi ga máxü ga naxchiru ga daucharaxügu nayacuxëëgü. ³ Rü ñuxüchi naxcèx naxï, rü nüxü nacugüëäcüma ñanagürügü nüxü: —¡Namaxü, Pa Yudíugüarü Äëxgacüx! —ñanagürügü. Rü nanapechiwegü. ⁴ Rü Piratu rü wenaxârü düxétüwa naxü, rü Yudíugüxü ñanagürü: —¡Dücèx! ñuxma tá nuã pepëxewa chanaga na nüxü pecuáxücèx na taxuüma i chixexüxü nawa chadauxü —ñanagürü. ⁵ Rü düxétüwa naxü ga Ngechuchu. Rü namaã nangëxcueru ga yema boxü ga chuchuxüwa naxügüxü. Rü nagu nicux ga yema máxü ga naxchiru ga daucharaxü. Rü yex-guma ga Piratu rü Yudíugüxü ñanagürü: —Daa nixï ya yima yatü —ñanagürü. ⁶ Natürü yexguma Ngechuchuxü nadaugügu ga paigüarü äëxgacügü rü purichíagü, rü inanaxügü ga aita na naxüexü. Rü ñanagürügü: —¡Curuchawa yapota! ¡Curuchawa yapota! —ñanagürügü. Rü Piratu rü ñanagürü nüxü: —¡Ëcü, peyaga rü pematama curuchawa peyapota! Erü choma rü taxuüma i chixexüxü nawa chadau —ñanagürü ga Piratu. ⁷ Natürü ga yema Yudíugü rü Piratuxü nangäxügü, rü ñanagürügü: —Toma toxü nangëxma i wüxi i torü mu. Rü ngëma torü mu toxü nüxü nacüëxë na namexü na nayuxü i ñaã yatü, yerü nüma rü nüxü nixu ga Tupana Nane na yïxü —ñanagürügü. ⁸ Rü yexguma yemaxü naxïnügu ga Piratu, rü yexeraäcü namü. ⁹ Rü wena Ngechuchumaã napatagu naxücu. Rü yema Ngechuchuna nayaca, rü ñanagürü: —¿Ngextácüãx quixï i cumax? —ñanagürü. Natürü ga Ngechuchu rü tama nanangäxü. ¹⁰ Rü yexguma ga Piratu rü Ngechuchuxü ñanagürü: —¿Éxna ngëma täütáma choxü cungäxü? ¿Tau éxna i nüxü cucuáxü na choxmëxwa cungëxmaxü na curuchawa cuxü chipotaxü rü éxna cuxü na íchanguxuchixëëxücèx? —ñanagürü. ¹¹ Rü Ngechuchu nanangäxü, rü ñanagürü: —Tãu chima cuxmëxwa changëxma, ega tama Tupana naxwëxegu. Rü ngëmacèx nixï i ngëma duüxügü i cuxna choxü mugüxü rü curü yexera poraäcü napecaduãxgü —ñanagürü. ¹² Rü yemawena rü Piratu nagu narüxïnü ga ñuxäcü Ngechuchuxü na ínanguxuchixëëgaxü. Natürü yema Yudíugü rü poraäcü aita naxüe, rü ñanagürügü: —Ngëxguma tá ícunanguxuchixëëxgu rü tama curü äëxgacü ya tacü ya Dumacüãx ya Chécharuxü cungechaü. Erü ngexerüxe ya äëxgacü ya tacüxü tügü ingucuchixëëxë, rü Dumacüãx ya äëxgacü ya tacü ya Chécharuarü uwanü tixï —ñanagürügü. ¹³ Rü yexguma yemaxü naxïnügu ga Piratu, rü churaragüxü namu ga Ngechuchuxü düxétüwa na nagagüxücèx. Rü nawa nayarüto ga wüxi ga tochicaü ga taxü ga nutagünaxcèx ga togawa rü Gabatagu äegaxü. Rü yema nachicawa nixï ga poxcuexü ga duüxügüna naçaxü ga äëxgacü. ¹⁴ Rü wüxi ga ngunexü nataxu ga Üpetüchigaarü petawa na nanguxü ga yexguma, rü marü tocuchiwa nangu. Rü Piratu rü Yudíugüxü ñanagürü: —¡Daa nixï ya yima perü äëxgacü! ñanagürü. ¹⁵ Natürü ga nümagü rü aita naxüe, rü ñanagürügü: —Tanaxwëxe na nayuxü. Rü ¡curuchawa yapota! —ñanagürügü. Rü Piratu nüxna naca rü ñanagürü nüxü: —¿Ñuxäcü i choma rü ichanamu na curuchawa yapotagüãxücèx ya perü äëxgacü? —ñanagürü. Natürü ga paigüarü äëxgacügü rü Piratuxü nangäxügü, rü ñanagürügü: —Yima äëxgacü ya tacü ya Chécharu ya Dumawa ngëxmacü rü yima nixï ya torü äëxgacü, rü nataxuma i to —ñanagürügü. ¹⁶ Rü yexguma ga Piratu rü yema Yudíugüna Ngechuchuxü namu na curuchawa yapotagüãxücèx. Rü nümagü rü nayagagü.

Curuchawa Ngechuchuxü nipotagü
(Mt 27.45-56; Mr 15.33-41; Lc 23.44-49)

¹⁷ Rŭ ínaxũxũ ga Ngechuchu, rŭ norŭ curucha ngĩxũ ininge. Rŭ yéma nana-gagũ nawa ga wũxi ga nachica ga “Duũxẽeruchinèxãgu” ãegaxũ. Rŭ yema rŭ Górguta nixĩ ga naega ga togawa. ¹⁸ Rŭ yéma curuchawa Ngechuchuxũ nayarŭpotagũ. Rŭ Ngechuchurũ curuchawa nayapotagũ ga taxre ga to ga yatũgũ, rŭ wũxi ga norŭ tũgũnecũwawa rŭ to ga norŭ toxwecũwawa. ¹⁹ Rŭ Piratu rŭ churaragũxũ namu na Ngechuchuarũ curuchatapèxewa na yapocuchigũãxũcèx ga wũxi ga mŭrapewaxacũ ga ãegatachinũxũ ga ñaxũ:

“Ngechuchu ya Nacharétucũãx ya Yudíugũarũ ãëxgacũ”, ñaxũ. ²⁰ Rŭ muxũma ga yema Yudíugũ nũxũ nadaumatũ ga yema namatũ ga mŭrapewaxacũgu üxũ. Yerũ yema nachica ga Ngechuchuxũ curuchawa íyanapotagũxũwa, rŭ ñãneãrũ ngaicamana nixĩ. Rŭ tomaèxpũx ga nagawa naxũmatũ ga yema naega ga yema mŭrapewawa. Rŭ togawa rŭ Griégugũgawa rŭ Dumacũãxgũgawa naxũmatũ. ²¹ Rŭ yemacèx ga yema Yudíugũarũ paigũarũ ãëxgacũgũ rŭ Piratuxũ ñanagũrũgũ: —Toma rŭ tama tanaxwèxe i cunaxũmatũ i “Yudíugũarũ ãëxgacũ”, ñaxũ. Rŭ narũmemaẽ nixĩ i cunaxũmatũ rŭ ñacurũgũ:

“Nũgũ ixucũ na Yudíugũarũ ãëxgacũ yĩxũ”, ñacurũgũ. ²² Natũrũ Piratu nanangãxũ rŭ ñanagũrũ: —Ngẽma chaxũmatũxũ rŭ marũ ngẽxma naxũmatũ —ñanagũrũ. ²³ Rŭ curuchawa marũ Ngechuchuxũ yapotagũguwena ga churaragũ, rŭ nanade ga Ngechuchuchiru. Rŭ yema ãgũmũcũ ga churaragũ rŭ nũgũmaã nayatoye ga naxchiru. Rŭ nanayauxgũ ta ga norũ gáuxũchiru ga máxũ. Natũrũ taxuwama narũngèixte, yerũ woetama yemaãcũ naxũ. ²⁴ Rŭ yemacèx ga yema churaragũ rŭ nũgũmaã ñanagũrũgũ: —¡Tãũtãma nagu tagaugũe! Rŭ narũmemaẽ nixĩ i naxcèx tá naxĩnũcèxwèxegũ rŭ ngĩxũ tañanagũgũ i wũxi i dũeru na ngẽmawa nũxũ icuèxgũxũcèx na texearũ tá na yĩxũ —ñanagũrũgũ. Rŭ yemaãcũ ningu ga Tupanaãrũ ore ga ũmatũxũ ga ñaxũ:

“Nũgũmaã nayatoye i chauxchiru, rŭ naxcèx ngĩxũ tanañanagũgũ i wũxi i dũeru”,

ñaxũ. Rŭ aixcũma yemaãcũ nixĩ ga naxũgũãxũ ga churaragũ. ²⁵ Rŭ Ngechuchuarũ curuchapũnewa iyexma ga naẽ ga María, rŭ ngĩyèx, rŭ María ga Creopá naxmèx, rŭ María ga Magadácũãx. ²⁶ Rŭ yexguma Ngechuchu naèxũ dèuxgu ga yexma chauxũtagu na nachixũ, rŭ ñanagũrũ ngĩxũ: —Pa Mamax, yima nixĩ ya cune, —ñanagũrũ. ²⁷ Rŭ yemawena, rŭ ñanagũrũ choxũ: —Ngẽma iyixĩ i cue —ñanagũrũ. Rŭ yexgumamama rŭ chopatawa ngĩxũ chayaxu. Rŭ chauxũtawa iyexmaẽcha.

Nayu ga Ngechuchu

²⁸ Rŭ Ngechuchu nũxũ nacuèx ga marũ na yanguxũ ga guxũma ga norũ puracũ ga ñoma ga naãnewa. Rŭ yema Tupanaãrũ ore ga ũmatũxũ na yanguxèxũcèx, rŭ ñanagũrũ: —Chitawa —ñanagũrũ. ²⁹ Rŭ yéma iyexma ga wũxi ga tũxũãcũ ga binu ga marũ ũxchiũcũmaã ããcuxcũ. Rŭ wũxi ga tũèxmũ guma binumaã niwaixèègũ, rŭ wũxi ga dexnemenèxãwa nayanèix. Rŭ yemamaã naãxgu nanawèxgũ. ³⁰ Rŭ Ngechuchu nayaxaxũ ga guma binu ga ũxchiũcũ rŭ ñanagũrũ: —Marũ ningu i guxũma i chorũ puracũ —ñanagũrũ. Rŭ ñuxũchi inayarũmaxãchieru, rŭ nayu.

Wũxi ga churara rŭ wocaxemaã Ngechuchuxũ nacanapacũtũxũ

³¹ Natũrũ ga yema Yudíugũarũ ãëxgacũgũ rŭ tama nanaxwèxegũ ga curuchagũwa na nayexmagũxũ ga yema naxũnegũ. Yerũ moxũãcũ rŭ ngũxchigaarũ ngunexũ nixĩ. Rŭ yema Yudíugũcèx rŭ yema nixĩ ga guxũ ga ngũxchigaarũ ngunexũãrũ yexera ga ũnèxũ, yerũ norũ peta ga

Ũpetüchigaarü ügü nixĩ. Rũ yemacèx Piratuna naxcèx nacagü na churaragü yéma namugüxcèx na yapoyeparagüãxcèx na paxa nayuexcèx ga yema curuchawa ipotagüxũ, rũ paxa na nadeãxcèx ga curuchawa naxũpa ga ngüxchigaarü ngunexũ. ³² Rũ yéma naxĩ ga churaragü rũ inanapoeparagü ga yema taxre ga yatügü ga Ngechuchumaã yéma curuchawa ipotagüxũ. ³³ Rũ Ngechuchucèx naxĩ ga churaragü, natürü nüxũ nadaugü ga marü na nayuxũ. Rũ yemacèx tama nayapoyeparagü. ³⁴ Natürü wüxi ga churara rũ Ngechuchuxũ nacanapacütüxũ. Rũ yexgumatama ínayèxüchi ga nagü rũ dexá. ³⁵ Rũ choma i Cuáũ rũ nüxũ chadau i guxũma ga ñaã pemaã nüxũ chixuxũ. Rũ aixcũma nixĩ i ñaã chorü ore. Rũ chomatama nüxũ chacuèx i aixcũma na yĩxũ, rũ pemaã nüxũ chixu na pema rũ ta peyaxögüxcèx. ³⁶ Rũ yema nangupetü na yangüxcèx i Tupanaärü ore i ümatüxũ i ñaxũ: “Rũ taxúnetáma ya naxchinèxã nipoyegü”, ñaxũ. ³⁷ Rũ toxnamana i Tupanaärü ore i ümatüxũwa rũ ñanagürü: “Tá nüxũ narüdaunü ya yima nacanapacütüxũgüãcü”, ñanagürü.

Ngechuchuxũ inatèxgü

(Mt 27.57-61; Mr 15.42-47; Lc 23.50-56)

³⁸ Rũ nayexma ga wüxi ga yatü ga Arimatéacũãx ga Yúchegu äegacü. Rũ nüma rũ ta Ngechuchuxũ nayaxõ, natürü cúãcü nayaxõ yerü natanüxũ ga Yudíugüarü äëxgacügüxũ namuũ. Rũ guma nixĩ ga Piratuna yaçacü na nayauxãxcèx ga Ngechuchuxüne. Rũ Piratu rü: —Ngũ, —ñanagürü. Rũ yexguma ga Yúche rü yéma naxũ ga curuchawa íyapotaxũwa, rũ curuchawa nayayaxu ga naxüne ga Ngechuchu. ³⁹ Rũ yéma nangu ga Nicodému ga ũpaacü chütacü Ngechuchuxũtagu naxũãnecü. Rũ yéma nanange ga 30 kilo naguxũ ga pumara ga yixichixũ na Ngechuchuxũ namaã nachaxünegüxcèx. ⁴⁰ Rũ yemaãcü ga Yúche rü Nicodému rü curuchawa nanayauxgü ga naxüne ga Ngechuchu. Rũ naxchiru ga marü pumarachaxũmaã nayanáixpüxügü. Yerü yema nixĩ ga tocüma ga toma ga Yudíugü ga yexguma wüxi ga yueta tüxũ itatèxgügu. ⁴¹ Rũ yema nachica ga Ngechuchu curuchawa íipotaxũwa nayexma ga wüxi ga nanetüncü. Rũ yema nanetüncüwa nayexma ga wüxi ga naxmaxũ ga yexwacaxũxũ ga taguma texéxũ nagu natèxgüxũ. ⁴² Rũ yema naxmaxügu nayaxücuchigü ga Ngechuchuxüne yerü nangaicama, rũ paxa tá ningune ga ngüxchigaarü ngunexcèx.

20

Ínarüda ga Ngechuchu

(Mt 28.1-10; Mr 16.1-8; Lc 24.1-12)

¹ Rũ yüxüarü pèxmamaxüchi ga tauta meã yangóonegu, rü María ga Magadácũãx rü Ngechuchuxũ íyaxücuchigüxũwa ixũ. Rũ nüxũ idau ga guma nuta ga Ngechuchumaxũ namaã rüngüxstaücü, rü marü na ínaxügachixũ. ² Rũ yexgumatama iiñaãchi, rü yema choma rü Chimáũ ga Pedrumaã ítayexmagüxũwa iña. Rũ ngígürügü toxũ: —Rũ marü nanayauxgü ya Cori ya Ngechuchu i naxmaxũwa. Rũ tama nüxũ tacuèx na ngexta na naxügüãxũ —ngígürügü. ³ Rũ yexguma ga choma rü Pedru rü Ngechuchuxũ íyaxücuchigüxũwa taxĩ. ⁴ Rũ wüxigu itaxũãchi ga tomox, natürü ga choma rü poraãcü Pedruarü yexera ichañaãchi. Rũ chaxira Ngechuchuxũ íyaxücuchixũwa changu. ⁵ Rũ ichayarümaxãchi na nagu chidaucuchixüxcèx. Rũ nüxũ chadau ga naxchiru ga namaã yanáixpüxügüãxũ ga yexma na naxüxũ. Natürü tama aixpegu chaxücu. ⁶ Rũ choweama ínangu ga Chimáũ ga Pedru. Rũ nüma rü yema naxmaxügu naxücu. Rũ nüma rü ta nüxũ nadau ga yema

naxchiru ga namaã yanáixpüxüchiréxü. ⁷ Rü nüxü nadau ta ga naxchiru ga namaã yanèixèrugüãxü ga meãma dixcumüxü ga nüxrüguma üxü. Rü tama wüxigu namaã nanu ga yema naxchiru ga namaã yanáixpüxügüãxü. ⁸ Rü yexguma ga choma ga chaxiraxüchi yéma na changuxü, rü choma rü ta chixücu. Rü nüxü chadau ga guxüma, rü chayaxõ ga Ngechuchu rü marü wena na namaxüxü. ⁹ Yerü noxri rü tama nüxü tacüexgüéga ga yema Tupanaärü ore ga ümatüxü ga ñaxü: “Cristu rü tá wena namaxü”, ñaxü. ¹⁰ Rü yexguma ga toma rü tochiücèx tawoegu.

*Ngechuchu rü ngïxcèx nangox ga María ga Magadácüãx
(Mt 16.9-11)*

¹¹ Natürü ga María rü yexma irüxãüx naxütagu ga Ngechuchumaxü. Rü yéma ixaxu. Rü naxauxãcuma iyarümaxãchi, rü nagu iyadaucuchi ga naxmaxü. ¹² Rü nüxü idau ga taxre ga daxücüãx ga Tupanaärü orearü ngeruügü ga icómüchiruxü. Rü Ngechuchuxüne ixüchiréxüwa narütogü, rü wüxi ga Ngechuchueru ixüxüwaama rü to ga nacütawaama. ¹³ Rü yema daxücüãx ga duüxügü rü ngïxna nacagüe, rü ñanagürügü: —Pa Ngecüx, ¿tacüçèx cuxaxu? —ñanagürügü. Rü ngïma rü inangãxü, rü ngïgürügü: —Chaxaxu erü nayangegü i naxüne ya chorü Cori, rü tama nüxü chacuèx na ngexta naxügüãxü —ngïgürügü. ¹⁴ Rü yexgumatama yema ngïxgu, rü ngïgüweama idau. Rü nüxü idau ga Ngechuchu ga ngïxütawa na nayexmaxü. Natürü tama nüxü icuèx ga Ngechuchu na yüixü ga guma. ¹⁵ Rü yexguma ga Ngechuchu rü ngïxna naca, rü ñanagürü: —Pa Ngecüx, ¿tacüçèx cuxaxu? ¿Rü texècèx nixi i cudauxü? —ñanagürü. Rü ngïma nüxü nacüexgu rü yema nixi ga yema nanetüncüarü dauruü. Rü yemacèx ngïgürügü nüxü: —Pa Corix, ega cuma cuyangexgu i naxüne ya Ngechuchu, rü ¿chomaã nüxü ixu na ngexta na cunaxüxü na choma chayayaxuxüçèx! —ngïgürügü. ¹⁶ Rü yexguma ga Ngechuchu rü ñanagürü ngïxü: —Pa Maríax —ñanagürü. Rü ngïma rü naxcèx idaueguãchi, rü togawa ngïgürügü nüxü: —Pa Rabunix —ngïgürügü. Rü ngëma rü “Pa Ngüexëeruüx”, ñaxüchiga nixi. ¹⁷ Rü Ngechuchu rü ñanagürü ngïxü: —¿Tãxü i choxü quingögüxü, erü tauta Chaunatüxütawa chaxü! ¿Natürü ngëma chaueneëgütanüwa naxü rü namaã nüxü yarüxu na choma rü tá Chaunatü ya chorü Tupana ya Penatü ya perü Tupanaxütawa chaxüxü! —ñanagürü. ¹⁸ Rü yexguma ga María ga Magadácüãx rü tomaã nüxü iyarüxu ga marü nüxü na nadauxü ga Cori ga Ngechu-chu. Rü ñuxüchi tomaã nüxü iyaxu ga yema ore ga Ngechuchu ngïmaã nüxü ixuxü.

*Norü ngüexügüçèx nangox ga Ngechuchu
(Mt 28.16-20; Mr 16.14-18; Lc 24.36-49)*

¹⁹ Rü yema yüxüarü ngunexüärü chütacü, rü tangutaquëxegü ga toma ga Ngechuchuarü ngüexügü. Rü togü tarüwãtaügü, yerü yema Yudügüarü äëxgacügüxü tamuüë. Rü Ngechuchu rü ngürüãchi yéma nangox, rü torü ngãxütanügu nachi. Rü toxü narümoxë, rü ñanagürü: —¿Petaãëgü! —ñanagürü. ²⁰ Rü yema ñaxguwena rü toxü nügü nawémëx, rü nügü inawépacütüxü. Rü tomagü ga norü ngüexügü rü tataãëgü, yerü nüxü tadaugü ga guma torü Cori. ²¹ Rü yexguma rü wenaxärü ñanagürü toxü: —¿Petaãëgü! Rü yema Chaunatü núma choxü na muxürüü tátama nixi i pexü chamuxü i chomax —ñanagürü. ²² Rü yexguma rü toétü “cue” ñanagürü ga Ngechuchu. Rü ñuxüchi ñanagürü toxü: —¿Penayauxgü i Tupanaãë i Üünexü! ²³ Rü ngëxguma duüxügü nüxü rüxoegu i norü pecadugü, rü pema rü pexü nangëxma i pora na namaã nüxü pixuxü na Tupana marü nüxü nüxü rüngümaxü i norü

pecadugü. Natürü ngëxguma duüxügü tama nüxü rüxoegu i norü pecadugü, rü pema rü pexü nangëxma i pora na namaã nüxü pixuxü na marü ngëma norü pecadugüwatama nangëxmagüxü —ñanagürü ga Ngechuchu.

Tumachi nüxü nadau ga Cori ga wena maxücü

²⁴ Natürü totanüxü ga Tumachi ga Wüxigu Buexümaã taxugüxü, rü tama totanüwa nayexma ga yexguma Ngechuchu toxçèx ngoxgu. ²⁵ Rü yixcama ga toma rü Tumachimaã nüxü tixugüe, rü ñatarügügü: —Marü nüxü tadau ya tórü Cori ya Ngechuchu —ñatarügügü. Natürü ga Tumachi rü toxü nangäxü rü ñanagürü: —Ngëxguma tama nüxü chadèuxgu i norü itapuamaxü i naxmëxwa rü tama nüxü chingögügu i ngëma itapuamaxü rü ngëma norü cana-pacütüxü, rü täütáma chayaxõ i ngëma ore i chomaã nüxü pixuxü —ñanagürü. ²⁶ Rü 8 ga ngunexüguwena rü wenaxârü tangutaquëxegü ga toma ga wüxi ga ìpatawa. Rü totanüwa nayexma ga Tumachi ga yexguma. Rü woo ga na nawäxtaxü ga ìãx, rü ngürüächì yéma nangox ga Ngechuchu, rü torü ngäxütanügu nachì. Rü toxü narümoxë, rü ñanagürü: —¡Petaãëgü! —ñanagürü. ²⁷ Rü yexguma Tumachixü ñanagürü ga Ngechuchu: —¡Nüxü ingögü i ñaã chorü itapuamaxü i choxmëxwa ngëxmaxü, rü nüxü nadau ya daa choxmëx! ¡Rü nuxa chorü canapacütüxügu ingögü! ¡Rü nüxü rüxo na tama cuyaxõxü! ¡Rü meãma yaxõ i ñuxmax! —ñanagürü. ²⁸ Rü yexguma ga Tumachi rü Ngechuchuxü nangäxü, rü ñanagürü: —Pa Chorü Corix, cuma nixì i chorü Tupana quiixü —ñanagürü. ²⁹ Rü Ngechuchu rü ñanagürü nüxü: —Pa Tumachix, cuma cuyaxõ i ñuxma erü choxü cudadu. Natürü tataãëgü ya yixema tama choxü daugüãcüma yaxögüxe —ñanagürü.

Tacüçèx naxümatü i ñaã popera

³⁰ Rü Ngechuchu rü topëxewa nanaxü ga muxüma ga to ga mexügü ga cuèxruügü i tama ñaã poperagu ümatüxü. ³¹ Natürü guxüma i ñaã poperagu ümatüxü, rü naxümatü na peyaxögüxüçèx na Ngechuchu rü Cristu ya Tupana Nane na yïixü. Rü ngëxguma nüxü peyaxögügu rü tá pexü nangëxma i maxü i taguma güxü.

21

Ngechuchu rü 7 ga norü ngüexügüçèx nangox

¹ Rü yemawena ga Ngechuchu rü wenaxârü toxçèx nangox naxtaxa ga Gariréaanacüwa. Rü Tibéria nixì ga to ga naega. Rü ñaãcü nixì ga toxçèx nangóxü. ² Rü wüxiwa tayexmagü ga choma rü Chaütüágu ga Zebedeu nanegü rü Chimáü ga Pedru, rü Tumachi ga Wüxigu Buexümaã taxugüxü, rü Natanae ga Gariréaanegune ga ìãne ga Canácüãx, rü to ga taxre ga tomücügü ga Ngechuchuarü ngüexügü. ³ Rü Chimáü ga Pedru rü ñanagürü toxü: —Tá chayapüchae —ñanagürü. Rü yexguma ga toma rü tanangäxügü, rü ñatarügügü nüxü: —Toma rü tá ta cuwe tarüxì —ñatarügügü. Rü yéma taxì, rü wüxi ga ngegu tichoü. Natürü yema chütaxügu rü taxuüma ga choxni tiyauxgü. ⁴ Rü yexguma noxri yangóonegu rü Ngechuchu toxçèx nangox ga naxtaxaanacüwa. Natürü ga toma rü tama nüxü tacüèxgü ga Ngechuchu na yïixü. ⁵ Rü yexguma ga Ngechuchu rü toxna naca, rü ñanagürü toxü: —Pa Ngextüxücügüx, çéxna taxuüma i choxni piyauxgü? —ñanagürü. Rü toma rü tanangäxügü rü ñatarügügü: —Taxuüma —ñatarügügü. ⁶ Rü yexguma ga Ngechuchu rü ñanagürü toxü: —¡Pewëüârü tügünecüwawaama penatáe i perü pücha! rü tá ìpenayauxü i choxni —ñanagürü. Rü yémaãma tanatáegü ga torü pücha, rü taxucürüwa ìtanatüächigü, yerü muxüchixü ga choxni tiyauxgü. ⁷ Rü yexguma ga choma rü Pedruxü ñacharügü: —Yima nixì ya Cori ya Ngechuchu

—ñacharügü. Rũ yexguma yemaxũ naxĩnũgu ga Pedru ga guma na yĩxũ ga Cori, rũ nicuxcuchi ga naxchiru yerũ noxri rũ ínacuxuchichirẽx. Rũ natũchiũwa nayuxu, rũ naxãnacũwa naxcẽx nawẽxẽ. ⁸ Rũ toma ga natanũxũ rũ nguemaãtama naxãnacũwa taxãgũ. Rũ yẽma tanatũgũ ga yema pũcha ga choxnimaã ããcuxũ yerũ 100 metruxicatama nataxu ga na naxãnacũwa na tangugũxũ. ⁹ Rũ yexguma nguewa ítachoũgu rũ yẽma nũxũ tadau ga wũxi ga ũxũ, rũ naxẽtũgu naxũ ga wũxi ga choxni. Rũ yẽma nayexma ta ga wũxi ga pãũ. ¹⁰ Rũ Ngechuchu rũ ñanagũrũ toxũ: —¡Nuãta penge i ñuxre i ngẽma choxni i ípeyauxũxũ! —ñanagũrũ. ¹¹ Rũ Chimãũ ga Pedru rũ nguogu nixũe. Rũ yema pũchamaã naxnũcũgu ínanatũãchuwetaũ ga choxni ga ínayauxũxũ. Rũ 153 ga choxni ga itaxũ nayexma nawa ga yema pũcha. Rũ woo ga na namuxũchixũ, rũ tama narũgãu ga pũcha. ¹² Rũ yexguma ga Ngechuchu rũ ñanagũrũ toxũ: —¡Nuã pexĩ rũ peyachibũe! —ñanagũrũ. Rũ taxũema ga toma rũ nũxna tacaxchaũ na texẽ yĩxũ ga nũmax, yerũ marũ nũxũ tacuẽxgũ ga guma na yĩxũ ga Cori ga Ngechuchu. ¹³ Rũ yexguma ga Ngechuchu rũ yẽma toxũtawã naxũ. Rũ nanayaxu ga pãũ rũ wũxichigũ toxna nanaxã. Rũ yexgumarũũ ta ga choxni rũ toxna nanaxã. ¹⁴ Rũ yema nixĩ ga norũ tomaẽxpũxcũna ga toxcẽx na nangóxũ ga Ngechuchu ga yuwa ínadxgũwena.

Ngechuchu rũ Pedrumã nidexa

¹⁵ Rũ yexguma chibũewa tingugũguwena rũ Ngechuchu rũ Chimãũ ga Pedrunã naca, rũ ñanagũrũ: —Pa Chimãũ Pa Cuãũ Nanex, ¿aixcũma choxũ cungechaũxũ i ñãã cumũcũgũxũ na cungechaũxũãrũ yexera? —ñanagũrũ. Rũ Pedru nanangãxũ, rũ ñanagũrũ: —Ngũ, Pa Corix, cuma nũxũ cucuẽx na cuxũ changechaũxũ —ñanagũrũ. Rũ Ngechuchu rũ ñanagũrũ nũxũ: —¡Nachibũexẽẽ i chorũ duũxũgũ! —ñanagũrũ. ¹⁶ Rũ wenaxãrũ Pedrunã naca, rũ ñanagũrũ: —Pa Chimãũ Pa Yonã Nanex, ¿aixcũma i choxũ cungechaũxũ? —ñanagũrũ. Rũ Pedru nanangãxũ, rũ ñanagũrũ: —Ngũ, Pa Corix, cuma nũxũ cucuẽx na cuxũ changechaũxũ —ñanagũrũ. Rũ Ngechuchu rũ ñanagũrũ nũxũ: —Ëcũ, ¡nũxna nadau i chorũ duũxũgũ! —ñanagũrũ. ¹⁷ Rũ norũ tomaẽxpũxcũna wenama Pedrunã naca, rũ ñanagũrũ: —Pa Chimãũ Pa Yonã Nanex, ¿aixcũmaxũchi yĩxũ i choxũ cungechaũxũ? —ñanagũrũ. Rũ yexguma ga Pedru rũ dũxwa nangechaũ, yerũ norũ tomaẽxpũxcũna Ngechuchu nũxna naca ngoxi aixcũma nũxũ nangechaũ. Rũ ñanagũrũ ga Pedru: —Pa Corix, cuma nũxũ cucuẽx i guxũma. Rũ cuma nũxũ cucuẽx na aixcũmaxũchi cuxũ changechaũxũ —ñanagũrũ. Rũ Ngechuchu ñanagũrũ nũxũ: —Ëcũ ¡nachibũexẽẽ i chorũ duũxũgũ! ¹⁸ —Rũ aixcũma cumaã nũxũ chixu rũ yexguma cunxextũxũgu rũ cugũ quicuxcuchi ga na ngextã cuma ícunaxwẽxũwa cuxũxũcẽx. Natũrũ ngẽxguma yaguãx quixĩgu rũ tá quixuuchichacũũ na togue cuxũ icuxcuchixũcẽx. Rũ ngẽma tama cuma ícunaxwẽxũwa tá cuxũ nagagũ —ñanagũrũ. ¹⁹ Rũ Ngechuchu rũ yema ñanagũrũ na nũxũ nũxũ nacuẽxẽxũcẽx ga ñuxãcũ tá na nayuxũ ga Pedru na yemaãcũ Tupanaxũ nataxẽxũcẽx. Rũ yemawena ga Ngechuchu rũ ñanagũrũ nũxũ: —¡Chowe rũxũ! —ñanagũrũ.

Yema ngũexũ ga Ngechuchu porããcũ nũxũ ngechaũxũchiga

²⁰ Rũ yexguma nũgũweama nadẽuxgu ga Pedru rũ choxũ nadau ga naweama na ne chaxũxũ. Rũ chomachirẽx nixĩ ga chibũwa Ngechuchucũwawa charũtoxũ rũ nũxna chaçaxũ rũ ñachaxũ:

“Pa Corix, ¿texẽ tá tixĩ ya yĩxema bexma cuechita cuxũ íxuaxũxẽ?” ñachaxũ.

²¹ Rũ yexguma Pedru choxũ dẽuxgu rũ Ngechuchuna naca, rũ ñanagũrũ: —Pa Corix, ¿ñãã Cuãũ rũ ãacũ tá nũxũ ũpetũxũ? —ñanagũrũ. ²² Rũ Ngechuchu

nanangãxŭ, rŭ ñanagŭrŭ nŭxŭ: —Ngëxguma choma chanaxwèxegu rŭ chana-maxëë ñuxmatáta wena núma chaxŭ. ¿Rŭ tŭxcŭxŭ i nagu curŭxŭnŭxŭ i ngema? Rŭ cuma jrŭ chowe rŭxŭ! —ñanagŭrŭ. ²³ Rŭ yexguma yema chomŭcŭgŭ nŭxŭ ñnŭëgu ga yema chauchiga, rŭ nagu narŭxŭnŭe na taxŭtáma chayuxŭ. Natŭrŭ Ngechuchu rŭ tama nŭxŭ nixu ga tãxŭtáma na chayuxŭ. Natŭrŭ ñanagŭrŭmare:

“Ngëxguma choma chanaxwèxegu rŭ chanamaxëë ñuxmatáta wena núma chaxŭ. ¿Rŭ tŭxcŭxŭ i nagu curŭxŭnŭxŭ i ngëma?”, ñanagŭrŭmare. ²⁴ Rŭ chomatama nixŭ ga nŭxŭ chadauxŭ i guxŭma i ñaã pemaã nŭxŭ chixuxŭ, rŭ chomatama nixŭ i pexcèx chanaxŭmatŭxŭ i ñaã ore. Rŭ guxãma i toma rŭ nŭxŭ tacuèx na aixcŭma na yŭxŭ i ñaã pemaã nŭxŭ chixuxŭ. ²⁵ Rŭ nayexma ga to ga muxŭchixŭma ga tacŭ ga Ngechuchu ŭxŭ. Rŭ ngëxguma chi naxŭmatŭgu i guxŭma ga yema naxŭxŭchiga, rŭ nagu charŭxŭnŭgu rŭ tãŭ chima ñoma i naãnegu name i ngëma poperagŭ i nachiga ŭmatŭxŭ.

NGECHUCHUARÜ NGÚEXÜGÜ GA YAMUGÜXÜÄRÜ PURACÜCHIGA

Tupana inaxuneta rü tá ínangu i Naãe i Üünexü

¹⁻² Pa Mecü Pa Teóquirux, nüxíra chaxümatüxü ga poperawa cumaã nüxü chixu ga guxüma ga Ngechuchu üxü rü duüxügüxü namaã nangúexëxü ga noxritama inaxügüãgu ga norü puracü ñuxmata yema ngunexü ga Tupana daxüguxü ga naãnewa nagaxgu. Rü yexguma tauta daxüguxü ga naãnewa naxüxgu ga Ngechuchu rü nayadexechi ga norü ngúexügü ga yamugüchaüxü na Tupanaärü puracü naxügüxcèx. Rü Tupanaãe i Üünexüärü poramaã nanangúexëe ga yema duüxügü, rü namaã nüxü nixu ga tacü tá na naxüexü. ³ Rü yexguma marü yuwa ínadèxguwena ga nüma ga Ngechuchu rü 40 ga ngunexügu rü nügü nangoxëxü naxcèx ga norü ngúexügü rü muxüma ga togü ga nüxü yaxögüxü na yemaãcü nüxü nacuèxgüxcèx na aixcüma wena namaxüxü. Rü namaã nüxü nixuchiga na ñuxácü na yixixü i Tupana ãëxgacü íyixüwa. ⁴ Rü yexguma yema ngúexügü ga yamugüxütanüwa nayexmagu ga Ngechuchu, rü namaã nüxü nixu ga tama nüxna na ngextá naxüxcèx ga Yerucharéü. Rü ñanagürü nüxü: —¡Ípenanguxëe i ngëma Tupanaãe i Üünexü ga Chaunatü pemaã ixunetaxü ga pemaã nüxü chixuchigaxü! ⁵ Aixcüma nixí ga Cuáü rü dexáwa duüxügüxü ínabaiüxëxü, natürü i pema rü tãütáma muxü i ngunexü nangupetü na Tupanaãe i Üünexü tá pexna nguxü —ñanagürü.

Daxüguxü ga naãnewa naxü ga Ngechuchu

⁶ Rü yexguma nangutaquëxegüga ga yema norü duüxügü, rü Ngechuchuna nacagü, rü ñanagürügü: —Pa Corix, ¿éxna ñoma tá nixí i ngunexü i marü ícunawoxü i nuã Yudiügüchiüãnewa i torü uwanügüarü churaragü na wenaxârü tomatama namaã itacuáxcèx i ñaã tochiüãne? —ñanagürügü. ⁷ Rü Ngechuchu nanangãxü, rü ñanagürü: —Pema rü taxucèxma nüxü pecuáxchaü i ñuxgu tá nixí i ngëma ngunexü, erü Chaunatüxicatama nüxü nangëxma i pora na nüxü naxunetaxü i ngëma ngunexü i choxna naxcèx peçaxü. ⁸ Natürü ngëxguma pexna nanguxgu i Tupanaãe i Üünexü, rü tá pexü naporaexëe. Rü tá ípechoxü na nüxü peyarüxugüexüxcèx i chauchiga i Yerucharéüwa, rü guxüma i Yudéaanewa, rü Chamáriaanewa, rü ñuxmatáta guxü i naãnewa nangu —ñanagürü. ⁹ Rü yexguma yema ñaxguwena rü nüxü ínadaunüyane ga norü ngúexügü, rü Tupana rü daxüguxü ga naãnewa Ngechuchuxü naga. Rü wüxi ga caixanexügu nayaxücu, rü yemaãcü tama wenaxârü nüxü nadaugü. ¹⁰ Rü yexguma Ngechuchuxü ínadaunüyane ga daxüwa na naxüxü, rü ngürüãchi natanüwa nangox ga taxre ga yatü ga ícómüchiruxü. ¹¹ Rü ñanagürügü nüxü: —Pa Yatügü i Gariréaanecüãx, ¿tüxcüü daxügu íperüdaunü? Erü daatama Ngechuchu ga petanüwa yexmacü rü ñuxma Tupana daxüwa nagacü, rü ngëma ñuxma nüxü na pedauxü na ñuxácü daxüwa naxüxü, rü ngëmaãcü tátama nixí i wena núma naxüxü —ñanagürügü.

Yudachicüü nanayauxgü ga Matía

¹² Rü yema ngúexügü ga Ngechuchu imugüxü na Tupanaärü puracü naxügüxcèx, rü nüxna ínixí ga guma mëxpüne ga Oríbunecügu äegane. Rü Yerucharéüxcèx nawoegu. Rü guma íanearü yaxü nüxna ga guma mëxpüne rü wüxi ga kilómetru nixí. ¹³ Rü yexguma Yerucharéüärü ñãnewa nangugügu, rü nagu nachocu ga guma í ga nagu napegüne. Rü dauxna naxígü naxcèx ga

yema ucapu ga taxü ga nagu napegüxü. Rü nümagü nixi ga Pedru, rü Cuáü, rü Chaütiágu, rü Aüdré, rü Piripi, rü Tumachi, rü Baturumé, rü Mateu, rü Chaütiágu ga Arupéu nane, rü Chimáü ga Iporaãécüücü, rü Yuda ga Chaütiágu naëneë. ¹⁴ Rü guxüma ga nümagü rü guxüguma nangutaquëxegüxü na wüxigu nayumüxëgüxüçèx namaã ga Ngechuchueneëgü, rü ngïmaã ga María ga Ngechuchu naë, rü ñuxre ga togü ga ngexügü. ¹⁵ Rü guxüma ga yema ngunexügügu rü nangutaquëxegüxü ga yema yaxögüxü. Rü 120 nixi. Rü wüxi ga ngunexügu ga Pedru rü inachi ga norü ngãxütanüwa, rü ñanagürü: ¹⁶ — Pa Chomücügüx, marü ningu ga yema Tupanaãë i Üünexü nuxcüma Dabíxü muxü na naxümatüãxüçèx nachiga ga Yuda ga namaãrü cuëxruü ixixü naxcèx ga yema duüxügü ga Ngechuchuxü iyauxgüxü. ¹⁷ —Rü tatanüxüchirëx nixi ga Yuda, rü nüma rü ta taxrüü ñaã Tupanaãrü puracüwa napuracü ga noxrix. ¹⁸ —Natürü nüma ga Yuda rü bexma Ngechuchuxü ínaxuaxü. Rü yemacèx ga äëxgacügü rü nüxü nanaxütanü. Natürü yixcama ga Yuda rü naxcèx ínicuèx ga yema chixexü ga naxüxü, rü yemacèx nanataeguxëë ga yema díëru. Rü yemawena rü nügü nawëxnaxã rü naïtanüwa nügü narütáe. Rü yexguma duüxügü nadaexügügu rü inanago, rü niwãixpütüwe rü ínayixü ga naünüta. Rü yema díëru ga nataeguxëëxümaã ga äëxgacügü rü naxcèx nataxe ga wüxi ga naãne. ¹⁹ —Rü nüxü nacuáchigagü ga guxüma ga Yerucharéüçüãx, rü yemacèx Achédamagu nanaxüéga ga yema naãne. Rü ngëma nixi i “Nagüchitaü” ñaxüchiga. ²⁰ —Rü Wiyaegüarü poperawa yemachiga nanaxümatü ga Dabí, rü ñanagürü:

“Yixrüma rü ngëma natá ya napata, rü taxúema nagu pe”,

ñanagürü. Rü toxnamana i ngëma poperawa rü ñanagürü ta:

“Rü name nixi na togue naxüxü i ngëma norü puracü”,

ñanagürü. ²¹⁻²² —Rü nuã tatanüwa nangëxmagü i ñuxre i yatügü ga guxüguma tüxü ümücügüxü ga yexguma tatanüwa nanuxmagu ga Cori ga Ngechuchu. Rü nümagü rü tawe narüxí ga noxritama Cuáü Ngechuchuxü íbaixëëgu rü ñuxmata yema ngunexü ga daxügüxü ga naãnewa naxüxgu. Rü name nixi i ngëmatanüwa na nayaxuxü i wüxi i Yudachicüüxü na tamücü yíxüçèx rü tarüü nüxü yaxuxüçèx i ñuxácü wena na namaxüxü ya Ngechuchu. ²³ Rü yemawena rü nüxü naxunetagü ga taxre ga yatügü. Rü wüxi nixi ga Yúche ga Yuchugu äëgaxü ga Bachabámaã naxugüxü. Rü Matía nixi ga to. ²⁴⁻²⁵ Rü ñaãcü nayumüxëgü: —Pa Corix, cuma nüxü cucuèx i guxüma i duüxügüarü maxü. ¡Rü ñuxma rü toxü nawëx i ngëxürüüxü i cuxcèx mexü i ñaã taxrewa na cunamuxüçèx rü nüma na naxüãxüçèx i ñaã puracü ga Yuda ítáxü ga yexguma norü poxcuwa naxüxgu! —ñanagürügü. ²⁶ Rü wüxi ga díëru ga cuëxruü ngixü nañanagügü na yemawa nüxü nacuëxgüxüçèx ga ngëxürüüxü ga yema taxre tá na ixücuxü. Rü Matíagu nangu na yangucuchixüçèx. Rü yexgumatama rü yema 11 ga duüxügü ga Ngechuchu imugüxütanügu naxã ga Matía.

2

Ínangu ga Tupanaãë i Üünexü

¹ Rü nawa nangu ga yema Yudiügüarü peta ga Pëtecóstegu äëgaxü. Rü yema ngunexügu rü guxüma ga yema yaxögüxü rü wüxi ga nachicawa nangutaquëxegü. ² Rü ngürüãchi daxüwa ne naxü ga wüxi ga naga ñoma wüxi ya buanecü ya taxüchicü icuxcugurüü, rü guxüne ga guma í ga nawa nayexmagünegu nayaxüga. ³ Rü naxcèx nangox ga üxüema ga ñoma naconügüraüxü. Rü yema üxüema rü nügüna nixigü, rü wüxichigü ga yema yaxögüxüna ninguchigü. ⁴ Rü guxüma ga yema yexmagüxü rü Tupanaãxë ga Üünexü

nüxna nangu. Rü yema Naãe i Üünexü yadexagüxëxüãcüma inanaxügüe ga to ga nagawachigü na yadexagüxü. ⁵ Rü yema ngunexügügu rü yema petacëx Yerucharéüwa nayexmagü ga muxüma ga toxnamana ne İxü ga Yudüügü ga Tupanaga İnüexü ga guxü ga togü ga nachiüãnewa ne İxü. ⁶ Rü yexguma nüxü naxİnüëgu ga ñuxácü na yadexagüxü ga yema yaxögüxü, rü nangutaquëxegü ga muxüma ga yema duüxügü ga toxnamana ne İxü. Rü nabaixãchiãëgü yerü yema yaxögüxü rü wüxichigü ga yema togü ga duüxügügawachigü nidexagü. ⁷ Rü yema na poraãcü nabaixãchiãëgüxüçèx, rü nügümaã rü ñanagürügü: —¿Tama ëxna Garirëaanecüãx yixigüxü i guxü i ñaã duüxügü i tagawa idexagüxü? ⁸ —¿Rü ñuxácü ëxna i nüxü ixİnüexü i wüxichigü i yixema i taga i nawa iyaexüwa na yadexagüxü? ⁹⁻¹¹ —Yixema tixigü i Pártiaanecüãx, rü Médiaanecüãx, rü Eraüãnecüãx, rü Mechopotámiãanecüãx, rü Yudëaanecüãx, rü Capadochiaanecüãx, rü Pötuanecüãx, rü Áchiaarü naãnecüãx, rü Piríquiaanecüãx, rü Paüpíríiaanecüãx, rü Equituarü naãnecüãx, rü Díbiaarü naãnecüãx i Chirenecüãx. Rü tatanüwa nangëxma ta i duüxügü i Crétaanewa rü Arábíaarü naãnewa ne İxü. Rü ñuxre i yixema rü Dumacüãx i Yudüügü tixigü. Rü nuã tatanüwa nangëxma ta i Dumacüãx i tama Yudüügü ixigüxü natürü tacümagu İxü. Rü guxãma rü nüxü taxİnüë na wüxichigü i tagawachigü na yadexagüxü i ñaã ngüexügü. Rü tagawa tamaã nüxü nixugüe i ñuxácü na namexëchixü ya Tupana —ñanagürügü. ¹² Rü guxüma poraãcü nabaixãchiãëgü, rü tama nüxü nacuëxgü ga ñuxácü na yixü ga yema. Rü nügüna nacagüe, rü ñanagürügü: —¿Tacüchiga nixi i guxüma i ñaã? —ñanagürügü. ¹³ Natürü ga togü rü nüxü nacugüecüraxü, rü ñanagürügü: —Nangãxëmare rü ngëmacëx nixi i ngëmaãcü yadexagüxü —ñanagürügü.

Pedruarü dexa

¹⁴ Rü yexguma inachi ga Pedru namaã ga yema 11 ga namücügü, rü tagaãcüma ñanagürü: —Pa Yudüügü i nuxma Yerucharéügu naxiãnexü rü Pa Nuãcüãxgüx, ¡rü dücax, meã iperüxİnüë i ñaã tá pemaã nüxü chixuxü! ¹⁵ —Rü ñaã chomücügü rü tama nangãxë i pema nagu perüxİnüëxürüü, erü pëxmamatama nixi rü ngexwacëx 9 arü orawa nangu. ¹⁶ —Natürü ñaã ñuxma nüxü pedauxü nixi ga yema Tupanaarü orearü uruü ga Yoé marü nüxü ixuchigaxü ga yexguma ñaxgux:

¹⁷ “Rü ñanagürü ya Tupana: ‘Ngëma nawa iyacuáxü i ngunexügügu rü guxü i duüxügütanüwa tá chanamu i Chauãe i Üünexü, rü penegü rü pexacügü rü tá chauchigagu nidexagü. Rü choma rü tá chayangoxetüxëe i perü ngextüxüxügü rü tá nüxü nadaugü i ngëma tá nüxü chawéxü. Rü perü yaguãxgümaã tá chidexa i nanegüwa. ¹⁸ Rü chorü duüxügütanüwa tá chanamu i Chauãe i Üünexü i ngëma ngunexügügu, rü tá chauchigagu nidexagü. ¹⁹ Rü naãnetüwewa tá ichanawëx i mexügü i taguma nüxü idauxü. Rü ñoma i naãnewa tá ichanawëx i cuëxruügü i nagü, rü üxüema, rü taemaxü. ²⁰ Rü üëxcü rü tá nixoema rü tauemacü rü tá nagürüü naduema naxüpa na wenaxãrü núma naxüxü ya Cori. Rü ngëma ngunexü i nagu núma naxüxü, rü wüxi i ngunexü i mexëchixü tá nixi. ²¹ Rü guxãma ya yixema Corina çaxe na tüxü nangüxëxüçèx, rü tá tamaxë’ ”,

ñanagürü ga yema orewa. ²² Rü ñanagürü ga Pedru: —Pa Duüxügü Pa Yudüügüx, ¡iperüxİnüë i ñaã ore! Rü pema rü meãma nüxü pecuëx rü Ngechuchu ga Nacharëtucüãx rü guma nixi ga wüxi ga yatü ga Tupana pepëxewa nüxü yaxucü na Nanexüchi yixü. Rü yemacëx ga Tupana rü norü poramaã nüxü nanaxüxëe ga muxüma ga mexügü rü cuëxruügü ga noxri taguma nüxü idauxü. ²³ —Rü Tupana pexna nanamu ga guma

Ngechuchu na pecaducèx nayuxücèx yerü yemaãcü nanaxüxchaŭ ga Tupana, rü yemaãcü nagu narüxĩnü ga noxri tauta naxüxgux ga naãne. Rü pema penamu ga yatügü ga tama yaxõgüxü na yayauxgüãxücèx rü curuchawa na yapotagüãxücèx. Rü yemaãcü penayuxëë. ²⁴—Rü woo nayuchirëx natürü tama yexma nayacuèx, yerü Tupana wena nanamaxëë rü ínanadaxëë. Rü yemaãcü ga yema yu rü taxuacüma marü nüxü narüporamaëëcha. ²⁵—Yerü ga ãëxgacü ga Dabí rü Ngechuchuchigagu nidexa, rü ñanagürü:

“Guxüguma nachauxütagu ya Cori ya Tupana rü choxü narüngüxëë na taxucèxma chaxoegaãëxücèx. ²⁶ Rü yemacèx marü chataãë rü taãëxü ga oremaã chidexa. Rü choma nüxü chacuèx na mexü tá choxü üpetüxü i ngëxguma chayuxgux. ²⁷ Erü cuma täütáma yuexüchicawa choxü cutèx, rü täütáma cunaxwèxe na yayixixü i chaxune i choma ya Cune ya Üünecü na chiixü. ²⁸ Marü choxü nüxü cucuèxëë i ñuxãcü tá chanayaxu i maxü i taguma gúxü, rü tá poraãcü choxü cutaãëxëë, erü chomaã tá icurüxãüx”,

ñanagürü ga Dabí. ²⁹ Rü ñanagürü ga Pedru: —Pa Chaueneëgüx, rü aixcüma pemaã nüxü chixu na nayuxü ga nuxcümaücü ga tórü ãëxgacü ga Dabí, rü marü inatèx, rü ñuxma rü ta tatanüwa nangëxma i naxmaxü. ³⁰—Natürü nüma ga Dabí rü wüxi ga Tupanaärü orearü uruü nixĩ. Rü yemacèx nüxü nacuèx rü wüxi ga nataa tá nixĩ i ãëxgacü ya Cristuxü ingucuchicü, yerü ga Tupana rü yemaãcü namaã inaxuneta. ³¹—Rü yemacèx nuxcümaxüchima ga Dabí rü ñoma marü nüxü nadauxuchixürüü nüxü nixu rü Cristu rü tá yuwa ínarüda rü täütáma naxmaxüwa nangëxmaëcha rü täütáma niyixi i naxüne. ³²—Rü ñuxma ya Tupana rü marü wena nanamaxëë ga guma Ngechuchu, rü guxãma ga toma rü nüxü tadaugü na wena namaxüxü, rü ngëmacèx pemaã nüxü tixuchiga. ³³—Rü Tupana rü daxüguxü ga naãnewa nanaga na norü tügü necüwawa yanatoxücèx. Rü Tanatü ya Tupana rü marü nüxna nanamu ga Naãë i Üünexü ga nuxcüma nüxü yaxuxü rü tá nuã na namuãxü. Rü ñuxma ya yima Ngechuchu rü núma totanüwa nanamu i ngëma Naãë i Üünexü. Rü ngëma Naãë nuã üxü nixĩ i ñuxma nüxü pedauxü rü nüxü pexĩnüëxü. ³⁴⁻³⁵—Rü taguma daxüwa naxü ga Dabí, natürü nümatama rü ñanagürü:

“Tupana rü chorü Cori ya Cristumaã nüxü nixu rü ñanagürü: ‘¡Rü chorü tügü necüwawa rüto ñuxmatáta cuxmëxwa chanangëxmagüxëë i curü uwanügü!’ ”

ñanagürü. ³⁶ Rü ñanagürü ga Pedru: —Name nixĩ i guxãma i pema i Yudíugü na nüxü pecuëxgüxü rü guma Ngechuchu ga curuchawa peyapotacü, rü Tupana rü marü perü Cori ya Cristuxü nayaxixëë —ñanagürü ga Pedru. ³⁷ Rü yexguma yemaxü naxĩnüëgu ga yema duüxügü ga yéma yexmagüxü, rü poraãcü nanaxixãchiãëgü. Rü Pedruna nacagüe, rü yema togü ga Pedrumücügüna rü ta nacagüe, rü ñanagürügü: —¡Rü tacü tá taxüexü i ñuxmax, Pa Toeneëgüx? —ñanagürügü. ³⁸ Rü Pedru nanangãxü, rü ñanagürü: —¡Nüxü perüxoe i pecüma i chixexü rü Tupanacèx pedaugüe rü Ngechuchuégagu ípebaiü na pexü nüxü nangechaüxücèx i perü pecadugü ya Tupana! Rü Tupana tá pexna nanamu i Naãë i Üünexü. ³⁹—Rü ñaã Tupanaärü uneta, rü pexcèx nixĩ, rü pexacügücèx, rü guxü i duüxügü i yaxüwa ngëxmagüxücèx nixĩ. Erü guxü i duüxügü i tórü Cori ya Tupana nügüxütawa naxcèx çaxücèx nixĩ i ngëma uneta —ñanagürü ga Pedru. ⁴⁰ Rü yema oremaã rü muxüma ga to ga oremaã nayaxucüxëgü ga Pedru, rü ñanagürü: —¡Nüxna pixígachi i ngëma duüxügü i chixexü ügüxü na pema rü ta tama chixexü pexügüxücèx! —ñanagürü. ⁴¹ Rü yema duüxügü ga naga ñnüëxü ga yema ore ga Pedru namaã nüxü ixuxü, rü ínabaiü. Rü yema ngunexügu rü poraãcü nayexera ga na

yamuxü ga yema yaxögüxü. Rü 3,000 ga duüxügü nixi ga Ngechuchuaxü yaxögüxü ga yexguma. ⁴² Rü yema yexwacèx yaxögüxü rü guxüguma inarüxñüë ga yema ngüexügü ga Ngechuchu imugüxüârü nguxëëtae. Rü meã nügümaã nangaugü ga norü yemaxügü. Rü guxüguma nayumüxëgüxü rü chibücèx nangutaquëxegüxü.

Yema yaxögüxü rü aixcüma nügü nangechaxügü

⁴³ Rü yema ngüexügü ga Ngechuchu imugüxü rü nanaxügü ga muxüma ga mexügü ga Tupanaârü poramaã naxügüxü. Rü yexguma yemaxü nadaugüga ga togü ga duüxügü, rü poraãcü nabaixächiaëgü ga guxüma. ⁴⁴ Rü guxüma ga yema yaxögüxü, rü wüxigu narüxñüë. Rü meã nügümaã nangaugü ga norü yemaxügü. ⁴⁵ Rü namaã nataxegüxü ga norü naãnegü rü guxüma ga togü ga norü yemaxügü. Rü nügümaã ngixü nitoyegüxü ga yema dïeru yexgumarü na ñuxre natümawèxexü ga norü õnatanü ga wüxichigü. ⁴⁶ Rü guxü ga ngunexügu tupauca ga taxünewa nangutaquëxegüxü, rü chibücèx nangutaquëxegüxü ga napatagüwa, rü taãëacüma nügümaã nachibüexü. ⁴⁷ Rü guxüguma Tupanaxü nicuèxüügüxü. Rü guxüma ga yema iãnecüãx rü nüxü nangechaügü ga yema yaxögüxü. Rü wüxichigü ga ngunexügu rü nimuëtanü ga duüxügü ga yaxögüxü, yerü nüma ga Cori ga Ngechuchu rü nüxü narüngüxëë na nayauxgüãxücèx ga norü maxü i taguma gúxü.

3

Naxcèx nitaane ga wüxi ga yatü ga chixeparacü

¹ Rü wüxi ga ngunexügu ga Pedru rü Cuáü rü tomaëxpüxarü oragu ga yáuanecü rü tupauca ga taxünewa naxi, yerü yema nixi ga yumüxëârü ora. ² Rü yéma guma tupauca ga taxünewa nayexma ga wüxi ga yatü ga norü bucümatama chixeparacü. Rü guxü ga ngunexügu rü natanüxügü rü guma tupauca ga taxüneârü iãx ga Mexëchixügu äegaxügu nayamugüxü, na dïerucèx ínacaüüxücèx nüxna ga duüxügü ga guma tupauca ga taxünegu chocuxüxü. ³ Rü yexguma Pedru rü Cuáüxü nadeüxgux ga tupauca ga taxünegu na nachocuxü, rü guma chixeparacü rü nüxü nawémëx rü dïerucèx nüxna naca. ⁴ Rü Pedru rü Cuáü meãma nüxü narüdaunü, rü Pedru rü ñanagürü nüxü: —¡Toxü nadawenü! —ñanagürü. ⁵ Rü nüma ga yatü rü nüxü nadawenü, yerü nüma nüxü nacuèxgu rü chi tacü nüxna naxägü. ⁶ Natürü ga Pedru rü ñanagürü nüxü: —Choxü nataxuma i dïeru. Natürü ngëma choxü ngëxmaxü tá cuxna chaxã. Rü naegagu ya Ngechuchu ya Cristu ya Nacharëtucüãx cuxü chamu, rü jinachi rü ixü! —ñanagürü. ⁷ Rü yema ñaxguwena ga Pedru, rü norü tügünemëxëgu nayayauxãchi, rü inanachixëë, rü yexgumatama natora ga namëxtüxügüwa rü nacutügüwa. ⁸ Rü nayuxnagü rü inachi, rü inanaxügü na iyaxüxü. Rü nümatama iyaxüacüma Pedru rü Cuáüwe tupauca ga taxünegu naxücu. Rü nanayuxnagüane rü Tupanaxü nicuèxü. ⁹ Rü guxüma ga duüxügü nüxü nadaugü ga na íyaxüxü, rü Tupanaxü na yacuèxüüxü. ¹⁰ Rü poraãcü nabaixächiaëgü ga duüxügü naxcèx ga yema nüxü ngupetüxü ga guma yatü. Yerü nüxü nacuèxgü ga na guma yixü ga tupauca ga taxüneârü iãx ga Mexëchixügu äegaxüwa rütooxüchirécü rü yéma dïerucèx ícacü.

Tupaucacüwawa yexmaxü ga chopetüchica ga Charomóüarü Üpetüchicagu äégaxüwa nidexa ga Pedru

¹¹ Rü guma chixeparachirécü ga marü naxcèx yataanecü, rü tama Pedru rü Cuáüna nixügachichaü. Rü guma tupauca ga taxüncüwawa nayexma ga wüxi ga chopetüchica ga “Charomóüârü Üpetüchicagu” äégaxü. Rü yema chopetüchicawa rü Pedru rü Cuáücèx naxítaquëxe ga guxüma ga duüxügü

yerü poraäcü nabaixãchiãëgü. ¹² Rû yexguma Pedru nüxü dèuxgu ga yema duüxügü ga yéma naxcèx itaquëxegüxü, rû ñanagürü nüxü: —Pa Chau-tanüxügü i Yudíugüx, ¿Tüxcüü pebaixãchie namaã i ngëma ñaã yatümaã ngu-petüxü? ¿Rû tüxcüü toxü perüdaunü ñoma torü poramaã rû torü mexümaã tanamexëëxürüü? ¹³ —Nuxcümaügücü ga tórü oxigü ga Abráü rû Ichaá rû Acobu rû togü ga tórü oxigü rû nüxü nayaxögü ga Tupana. Rû yimatama Tupana nixí ya ñuxma Ngechuchuxü taxëëcü, na guxüärü yexera yiixüçèx. Rû gumatama Ngechuchu ya Tupanaärü ngüxëëruü ixícü nixí ga pema äëxgacü ga Piratuxütawa penagagücü. Rû yexguma nüxü yangéxchaügu ga Piratu, rû pema rû tama penaxwëxegü ga na yangéãxü. ¹⁴ —Pema rû tama penaxwëxe ga na ínguxuchixü ga guma üüncü ga aixcüma mecü ga Ngechuchu, natürü naxcèx ípeca na pexcèx ínguxuchixëëãxüçèx ga wüxi ga máëtaxü. ¹⁵ —Rû yemaäcü pematama peyamëxgü ga guma Ngechuchu ya tüxü maxëëëcü. Natürü ga Tupana rû wena nanamaxëë. Rû toma nixí ga nüxü tadaugüxü ga wena na namaxüxü. ¹⁶ —Rû ñaã yatü ga chixeparachiréxü i pema nüxü pedauxü rû nüxü pecuáxü rû marü naxcèx nitaane erü Ngechuchuaxü nayaxö. Rû ngëma Ngechuchuaxü na yaxöxüçèx nixí i naxcèx yataanexü ngëma ñuxma guxãma i pema nüxü pedauxürüü. ¹⁷ —Rû dücax i ñuxma Pa Chaueneëgüx, rû yexguma pema rû wüxigu perü äëxgacügümaã peyamëxgügu ga Ngechuchu, rû tama nüxü pecuëxgü ga tacü na pexüexü. ¹⁸ —Natürü ga Tupana rû yemaäcü nayanguxëë ga yema uneta ga nuxcüma nümatama nüxü yaxuxü nawa ga guxüma ga norü orearü uruügü. Yerü yema norü ore ga ümatüxüwa rû ñanagürü:

“Cristu rû tá ngüxü ninge”,

ñanagürü. ¹⁹⁻²⁰ —Rû ngëmacèx, Pa Chaueneëgüx, rû name nixí i nüxü perüxoe i pecüma i chixexü, rû Tupanacèx pedaugü, rû nüxü peyaxögü na nüma pexü ínapíãxüçèx i perü pepadugü. Rû ngëxguma i nüma rû tá pexü nataãëgüxëë, rû tá núma nanamu ya Ngechuchu ga noxritama naãne ixügügu pexcèx nüxü naxunetacü na perü äëxgacü ya Cristu na yiixüçèx. ²¹ —Natürü i ñuxma rû Tupana nanaxwëxe i daxügüxü i naãnegu na naxãüxü ya Ngechuchu ñuxmatáta nüma ya Tupana wena namexëëãgu i guxüma i ñoma i naãnewa ngëxmaxü. Yerü yemaäcü nixí ga nüxü yaxuxü ga Tupana nawa ga nuxcümaügüxü ga norü orearü uruügü ga ixüünexü. ²² —Rû Moïché rû tórü oxigümaã nüxü nixu rû ñanagürü:

“Rû perü Cori ya Tupana rû petanüwa tá nüxü naxuneta i wüxi i norü orearü urü i chauxrü ixíxü. Rû name nixí na naga pexínüëxü i guxüma i ngëma pemaã nüxü yaxuxü. ²³ Rû texé ya tatanüwa tama naga ínúxë i ngëma orearü urü, rû tá tüxü ínatëxüchi i tatanüwa”,

ñanagürü ga Moïché. ²⁴ —Rû Chamue rû guxüma ga togü ga Tupanaärü orearü uruügü ga naweama ügüxü rû ta nüxü nixugüe ga tacü tá na üpetüxü i ñomaücüü. ²⁵ —Rû nuxcümaxüchima ga Tupana rû tórü oxi ga Abráümaã nüxü nixu rû ñanagürü:

“Rû wüxi i cutaa tá nixí i nüxü rüngüxëëxü i guxüma i duüxügü i ñoma i naãnecüãx”,

ñanagürü. Rû yemaäcü ta Tupana inaxuneta nawa ga nuxcümaügüxü ga norü orearü uruügü. Rû pemaã nüxü chixu i ñuxma, rû pexcèx nixí ga yema unetagü ga nuxcümaügüxü ga orearü uruügüwa tórü oxigümaã nüxü yaxuxü ga Tupana. ²⁶ —Rû pemaã nüxü chixu Pa Chautanüxügü i Yudíugüx, rû yexguma Tupana wena namaxëëgu ga Nane ga Ngechuchu rû petanüwaxira nanamu na pexü nangüxëëxüçèx, erü nanaxwëxe i wüxichigü i pema na nüxü perüxoexü i pecümagü i chixexü —ñanagürü ga Pedru.

4

Āëxgacügü pëxewa nayexmagü ga Pedru rü Cuáü

¹ Rū yexguma duūxūgūmaā iyadexagūgu ga Pedru rü Cuáü, rü yexgumayane yéma nangugü ga guma tupauca ga taxūneārü purichíaarü āëxgacü, rü paigü, rü Chaduchéugü. ² Rū Pedru rü Cuáümaā nanuē ga paigü yerü duūxūgūxū nangúexēē ga na marü wena namaxūxū ga Ngechuchu, rü naxrūü tá ta wena namaxēxū i guxūma i duūxūgü i marü yuexū. ³ Rū ínanayauxū, rü poxcupataūgu nanawocu ñuxmata moxūācū, yerü marü nayáuane. ⁴ Natürü muxūma ga yema duūxūgü ga nüxū ñnüēxū ga yema Tupanaārü ore rü nayaxōgü. Rū 5000 wa nangu ga yatūxūxica ixugügu. ⁵ Rū moxūācū Yerucharéüwa nangutaquēxegü ga Yudíugüarü āëxgacügü namaā ga naerugü, rü ngúexēēruūgü ga ore ga mugüwa nguxēētaegūxū. ⁶ Rū yéma nayexma ta ga Aná ga paigüeru ixícü, rü Caipá, rü Cuáü, rü Areyáüdrü, rü guxūma ga yema togü ga paigü ga paigüerutanūxū ixīgūxū. ⁷ Rū nanamu na naxūtawa nagagūāxūcèx ga Pedru rü Cuáü. Rū yexma norü ngāxūtanügu nanachigūxēē rü nüxna nacagü, rü ñanagürügü: —¿Texé pexū tamu, rü texé pexna tanaxā i pora na penamexēēxūcèx i ñaā yatü? —ñanagürügü. ⁸⁻⁹ Rū Pedruwa nayexma ga Tupanaāē ga Üünexū rü nanaporaxēē. Rū yemacèx ga Pedru rü nanangāxū, rü ñanagürü: —Pa Īāneārü Āëxgacügüx, rü Pa Yudíugüarü Āëxgacügüerugüx, rü ñuxma toxna naxcèx peca naxcèx ga norü mexēē i ñaā chixeparachiréxū erü nüxū pecuáxchaü ga ñuxācü na namexū. ¹⁰ —Rū ñuxma tá pemaā nüxū tixu na nüxū pecuáxūcèx i guxāma i pema rü nüxū nacuèxgūxūcèx i guxūma i tatanūxūgü i Yudíugu. Rū ñaā yatü i ñuxma pepëxewa ngëxmaxū rü Ngechuchu ya Cristu ya Nacharétucūāx nixī ga namexēēcü. Rū guma nixī ga pema curuchawa peyapotacü rü peyuxēēcü. Natürü ga Tupana rü wena nanamaxēē. ¹¹ —Rū gumatama Ngechuchu nixī ga pema nüxū pexoecü. Natürü ga Tupana rü nayamucuchi na guxūarü āëgacü yixīxūcèx. ¹² —Rū yima Ngechuchuxicatama nixī ya tórü maxēēēruū, erü yixicatama nixī ga Tupana nüxū unetacü i ñoma i naanewa na tūxū namaxēēēxūcèx —ñanagürü ga Pedru. ¹³ Rū yexguma yema āëxgacügü nüxū daugügu ga ñuxācü tama muñēācūma na yadexagūxū ga Pedru rü Cuáü, rü nabaixāchiāëgü, yerü nüxū nicuèxāchitanü ga tama meā poperaxū na yacuáxū rü puracūtanūxūmare yixīgūxū. Rū aixcūma nüxū nicuèxāchitanü ga Ngechuchuarü ngúexūgü na yixīgūxū. ¹⁴ Rū ñuxūchi nüxū nadaugü ta ga guma yatü ga rümecü ga Pedru rü Cuáüxūtagu na nachixū. Rū yemacèx ga yema āëxgacügü rü taxuacūma ñuxū ñanagürügüega nachiga ga yema ngupetūxū. ¹⁵ Rū yexguma ga yema āëxgacügü rü ínanamuxū ga yema ínangutaquēxegūxūwa, rü nüxīcatama nügūmaā nidexagü. ¹⁶ Rū ñanagürügü: —¿Tacü tá namaā ixüexū i ñaā yatügü? Erü guxūma i Yerucharéücūāx i duūxūgü rü nüxū nacuèxgü i ngëma mexū i taxū i naxūgūxū, rü taxuacūma itayacux. ¹⁷ —Natürü ngëma na tama yexeraācü duūxūgütanüwa nanguchigaxūcèx i ngëma ngupetūxū, ¡rü ngīxā tanamuñēēē na ñuxmawena rü taxúemaāma ngëma Ngechuchuchigagu yadexagūxūcèx! —ñanagürügü. ¹⁸ Rū wenaxārü Pedru rü Cuáücèx nacagü, rü nüxna naxāga na tama Ngechuchuchigamaā yadexagūxūcèx, rü bai i texéxū na nangúexēēxūcèx i nachiga. ¹⁹ Natürü ga Pedru rü Cuáü rü nanangāxūgü, rü ñanagürügü: —¡Nagu perüxīnūē i pematama! ¿Rü namexū i Tupanapëxewa na pega taxīnūēxū rü éxna Tupanaga taxīnūēxū? ²⁰ —Erü toma rü taxuacūma nüxū tarüxoe na nüxū tixuxū ga yema nüxū tadaugūxū rü nüxū taxīnūēxū —ñanagürügü. ²¹ Rū yexguma ga yema āëxgacügü rü nayaxāxūnegü rü yemaācü ínayamugü, yerü

nataxuma ga tacücèx na napoxcueãxũ rü duũxũgũxũ namuũẽ, yerü guxũma ga duũxũgũ rü Tupanaxũ nicuèxũgũ naxcèx ga yema nüxũ ngupetũxũ ga guma yatü ga chixeparawa rümecü. ²² Rü guma yatü ga yemaãcü Tupanaãrũ poramaã naxcèx itaanecü, rü 40 arü yexera nixĩ ga norü taunecü.

Yema yaxõgũxũ rü Tupanaarũ ngũxẽcèx ínacagũ

²³ Rü yexguma marü ínamuxũãxgu, rü Pedru rü Cuáũ rü namücügü íyexmagũxũwa naxĩ. Rü namaã nüxũ nixugüe ga guxũma ga yema ore ga Yudíugũarũ ãëxgacügü rü paigũarũ ãëxgacügü namaã nüxũ ixuxũ. ²⁴ Rü yexguma Pedru rü Cuáũxũ naxĩnũëgu ga namücügü, rü guxũma wũxigu nayumũxëgü rü Tupanamaã nidexagü rü ñanagürügü: —Pa Corix, cuma cunaxü ga daxũguxũ ga naãne rü ñoma ga naãne, rü taxũ i taxtũ, rü guxũma i tacü i nawa ngẽxmaxũ. ²⁵ —Rü cumatama nixĩ ga nuxcũma Cuãẽ i Üünexũxũ cumuxũ na curü ngũxẽëruũ ga Dabíwa yanadexaxũcèx rü ñaxũcèx:

“¿Tũxcüũ ínipuræ i ñoma i naãnecũãx i duũxũgũ i tama yaxõgũxũ? ¿Rü tũxcüũ ngẽma natücèxmamare ixĩgũxũgu narũxĩnũë i guxũ i nachiũãnecũãx?

²⁶ —Nũmagü i nachiũãnegũarũ ãëxgacügü rü Tupanamaã nanuë, rü nũgũmaã nangutaquëxegü na wũxigu nũgũmaã nagu naxĩnũëxũcèx na ñuxãcü tá nüxũ na nayexeragũxũcèx ya Cori ya Tupana rü Nane ya nüxũ naxunetacü ya Cristu”,

ñanagürü. ²⁷ —Rü aixcũma nixĩ ga ñoma ga ñãnewa ga ãëxgacügü ga Erode rü Piratu ga nangutaquëxegũxũ namaã ga to ga nachiũãnegũcũãx rü totanũxũ ga Yudíugü, na chixexũ naxũgũxũcèx namaã ya curü ngũxẽëruũ ya üünecü ya Ngechuchu ya Cristuxũ nüxũ cuxunetacü. ²⁸ —Rü yemaãcü ga nũmagü rü nayanguxẽë ga guxũma ga yema cuma nuxcũmama nagu curũxĩnũxũ rü nüxũ cuxunetaxũ rü tá na yanguxũ. ²⁹ —¡Rü dücax, Pa Corix, cuma nüxũ cucuèx na ñuxãcü toxũ naxãxũnegũxũ! Toma nixĩ i curü ngũxẽëruũgü rü tanaxwèxe na toxũ cuporaexẽëxũ na tama tamuũëãcũma nüxũ tixuxũcèx i curü ore. ³⁰ —¡Rü curü poramaã nameëxẽë i duũxũgũ i idaaweexũ! ¡Rü duũxũgũxũ nawëx i cuëxruũgü i curü poramaã cuxũxũ i naegagu ya curü ngũxẽëruũ ya üünecü ya Ngechuchu! —ñanagürügü. ³¹ Rü yexguma yumũxëwa nüxũ nachauegu, rü guma ípata ga nawa nangutaquëxegũne rü naxĩãxãchi. Rü Tupanaãẽ i Üünexũ rü nüxna nangu ga guxũma. Rü tama namuũëãcũma nüxũ nixugüe ga Tupanaãrũ ore.

Yema yaxõgũxũãrũ yemaxũgü rü guxũãrũ nixĩ

³² Rü namu ga yema yaxõgũxũ. Rü guxũma rü wũxigu narũxĩnũë. Rü taxuũma nagu narũxĩnũ ga noxrũxicatama na yĩxũ ga norü yemaxũgü, natürü guxũma ga namücügũmaã nangau. ³³ Rü yema ngüexũgü ga Ngechuchu imugũxũ na Tupa-naãrũ puracü naxũgũxũcèx, rü Tupanaãrũ poramaã nüxũ nixugüe ga ñuxãcü wena na namaxũxũ ga Cori ga Ngechuchu. Rü Tupana rü poraãcü nüxũ narũngũxẽë ga guxũma ga yema yaxõgũxũ. ³⁴⁻³⁵ Rü natanũwa rü nataxuma ga wũxi ga nüxũ nataxuxũ, yerü guxũma ga yema nüxũ yexmaxũ ga naãnegü rü ëxna ípatagü, rü namaã nataxegü. Rü yema díëru ga ngĩxũ nayauxgücü rü yema ngĩxũ nangegü, rü yema ngüexũgü ga Ngechuchu imugũxũna ngĩxũ nayaxãgü. Rü ñuxũchi nũgü ngĩxũ ninuũxũ ga ñuxrechigü nüxũ nataxuxũ ga wũxichigü. ³⁶ Rü nayexma ga wũxi ga yatü ga Lebítanũxũ ga Chiprecũãx ga Yúchegu ãëgacü. Rü yema ngüexũgü ga Ngechuchu imugũxũ na Tupanaãrũ puracü naxũgũxũcèx rü Bernabémaã nanaxugü. Rü ngẽma naega, rü: “Taãëxẽëruũ”, ñaxũchiga nixĩ. ³⁷ Rü nũma ga Bernabé rü nüxũ nayexma ga wũxi ga naãne, rü namaã nataxe. Rü yema ngüexũgü ga Ngechuchu imugũxũxũtawa ngĩxũ nana ga yema díëru.

5

Ananiã rü Chacuíraarü pecaduchiga

¹ Rü nayexma ga wüxi ga yatü ga Ananiãgu ãegaxü rü Chacuíra ga namèx. Rü nümagü rü namaã nataxegü ga wüxi ga norü naãne. ² Natürü nüma ga Ananiã rü namèxmaã wüxigu nagu narüxĩnüe na nügüxü ngĩxne nayauxgüxü ga ñuxre ga yema naãnetanü. Rü ñuxüchi yema ngúexüğü ga Ngechuchu imugüxüxütawa ngĩxü nangegü ga yema nüxü íyaxücü. ³ Rü yexguma ga Pedru rü ñanagürü nüxü: —Pa Ananiãx, ¿tüxcüü ngoxo i Chatanága cuxĩnü rü Tupanaãe i Üünexümaã quidora, rü cugüxü ngĩxne cuyaxu i ñuxre i ngẽma curü naãnetanü? ⁴ —¿Éxna yexguma tauta namaã cutaxegu, rü tama éxna cuxrü yĩxü ga yema naãne? ¿Rü yexguma namaã cutaxegu, tama éxna cuxrü yĩxü ga yema díeru na ngĩxü cuguxẽxüçex i ngẽma cuma cunaxwèxexüãcüma? ¿Tüxcüü i cunaxüxü i ñaã? Tama yatügümaãxĩca quidora, natürü Tupanamaã rü ta nixĩ i quidoraxü —ñanagürü ga Pedru. ⁵ Rü yexguma yema orexü naxĩnügu ga Ananiã, rü yuxüma inayangu. Rü poraãcüxüchima namuüe ga guxüma ga yema duüxüğü ga yexguma yemaxü nacuáchigagügu. ⁶ Rü ñuxre ga yema yexmagüxü ga ngextüxüxüğü rü nanayauxgü ga naxüne, rü nananuquegü, rü inayatèxgü. ⁷ Rü tomaëxpüx ga ora ngupetüxgu rü íngu ga namèx. Rü yexma ixücu natürü tama nüxü icuèx ga tacü na ngupetüxü. ⁸ Rü Pedru ngĩxna naca, rü ñanagürü: —¿Yema natanü ga ipexunetaxügu yĩxü ga namaã petaxegüxü ga perü naãne? —ñanagürü. Rü ngĩma rü: —Ngü, ngẽxgumaëxpüxgu nixĩ —ngĩgürüğü. ⁹ Rü Pedru rü ñanagürü ngĩxü: —¿Tüxcüü pegümaã ngẽmaãcü wüxigu perüxĩnüe na namaã pidoraexüçex i Tupanaãe i Üünexü? ¡Düçex, ngẽma cutexü iyatèxgüxü rü marü ínangugü, rü ñuxma rü cuxü rü tá ta ngema nangegü! —ñanagürü. ¹⁰ Rü yexgumatama yuxcüma Pedrupèxegu iyangü. Rü yexguma nachocüxgu ga yema ngextüxüxüğü, rü yuxcüma ngĩxü inayangaugü. Rü ngĩxü nayauxgü, rü ngĩtexüttagutama ngĩxü nayatèxgü. ¹¹ Rü yexguma nüxü nacuèxgügu ga yema ngupetüxü, rü guxüma ga yema yaxögüxü rü yema togü ga duüxüğü rü ta poraãcüxüchima namuüe.

Tupanaãrü poramaã nanaxüğü ga muxüma ga mexüğü

¹² Rü yema ngúexüğü ga Ngechuchu imugüxü, rü duüxüğüpèxewa nanaxüğü ga muxüma ga mexüğü ga Tupanaãrü poramaã naxüğüxü. Rü inanawèxgü ga muxüma ga cuèxruüğü. Rü guxüma ga yema yaxögüxü rü guxüguma naxĩtaquèxegüxü nagu ga yema tupauca ga taxünewa yexmaxü ga chopetüchica ga Charomóüãrü Üpetüchicagu ãegaxü. ¹³ Rü yema togü ga duüxüğü ga tama yaxögüxü rü namuüe na yema yaxögüxütanügu naxägüxü, natürü poraãcü yema yaxögüxüxü nangechaüğü. ¹⁴ Rü nimuëtanüãma ga yema yaxögüxü yerü muxüma ga duüxüğü ga yatüxüğü rü ngexüğü rü Coriaxü nayaxögüetanü. ¹⁵ Rü nüma ga duüxüğü rü itamüğügu nayamugüxü ga idaaweexü naxchápenuümaã rü norü caruüğümaã na yexguma Pedru yema üpetüxgu, rü naxchipetamare nüxü na nachixüçex. ¹⁶ Rü yexgumarüü ta rü yema naxĩtaquèxegüxü ga muxüma ga duüxüğü ga Yerucharéüãrü ngaicamana imugüne ga ñãnewa ne íxü. Rü yema naxçex nanagagüxü ga yema idaaweexü rü yema ngoxoãxgüxü. Rü guxüma naxçex nitaanegü.

Pedru rü Cuáüwe ningèxütanü ga paigü

¹⁷ Rü yexguma ga guma paigüeru rü guxüma ga yema natanüxüğü ga Chaduchéugü rü poraãcü nixãüxächigü naxçex ga yema mexüğü ga naxüğüxü ga yema ngúexüğü ga Ngechuchu imugüxü. ¹⁸ Rü yemacèx norü

purichíagüxŭ namu na ínayauxŭãxŭcèx ga yema ngúexŭgü. Rŭ íãneãrŭ poxcupataŭgu nanapoxcue. ¹⁹ Natŭrŭ Coriarŭ orearŭ ngeruŭ ga daxŭcŭãx naxcèx nayawãxna ga yema poxcupataŭãrŭ íãxgŭ ga chŭtacŭ. Rŭ ínanamuxŭ, rŭ ñanagŭrŭ nŭxŭ: ²⁰ —¡Ngẽma tupauca ya taxŭnewa pexŭ, rŭ guxŭ i duŭxŭgŭmaã nŭxŭ pixu na ñuxãcŭ Tupana inaxãxŭ i ngexwacaxŭxŭ i maxŭ! —ñanagŭrŭ. ²¹ Rŭ yexguma ga yema ngúexŭgü ga Ngechuchu imugŭxŭ rŭ naga naxŭnŭẽ ga yema ore. Rŭ moxŭãcŭ ga pèxmamaxŭchi rŭ tupauca ga taxŭnewa naxŭ, rŭ duŭxŭgŭxŭ nangúexẽ. Rŭ yoxni ga guma paigŭeru rŭ natanŭxŭgŭ, rŭ nanangutaquẽxexẽ ga guxŭma ga yema togŭ ga ãẽxgacŭgŭ ga ãẽxgacŭgŭtŭcumŭwa ŭgŭxŭ. Rŭ poxcupataŭwa nanamugŭ ga purichíagŭ na yagagŭãxŭcèx ga yema ngúexŭgü ga Ngechuchu imugŭxŭ. ²²⁻²³ Rŭ yexguma poxcupataŭwa nangugŭga ga yema purichíagŭ, rŭ taxuxŭxŭma inayangaugŭ. Rŭ nayawoegu, rŭ nŭxŭ nayarŭxugŭe, rŭ ñanagŭrŭgŭ: —Yima poxcupataŭ rŭ narŭwãxta, rŭ meãma nataichirẽx, rŭ purichíagŭ nŭxna nadaugŭ i naãxwa. Natŭrŭ ngẽxguma tayawãxnagu, rŭ taxuxŭxŭma itayan-gaugŭ i aixepewa —ñanagŭrŭgŭ. ²⁴ Rŭ yexguma yema orexŭ naxŭnŭẽgu ga yema paigŭeru rŭ yema togŭ ga paigŭ ga ãẽxgacŭgŭ ixŭgŭxŭ rŭ yema tupauca ga taxŭneãrŭ purichíagŭarŭ ãẽxgacŭ rŭ guxŭma nabaixãchiãẽgŭ yerŭ tama nŭxŭ nacuèxgŭ ga ngextá tá na nanguxŭ ga guxŭma ga yema rŭ ñuxãcŭ tá na iyanaxoxẽẽgŭãxŭ. ²⁵ Rŭ yexguma yemagu ínaxŭnŭeyane rŭ yema nangu ga wŭxi ga yatŭ, rŭ namaã nŭxŭ nixu, rŭ ñanagŭrŭ: —Ngẽma yatŭgŭ i pepoxcuechirẽxŭ, rŭ tupauca ya taxŭnewa nangẽxmagŭ, rŭ ínanangúexẽ i duŭxŭgŭ —ñanagŭrŭ. ²⁶ Rŭ yema naxŭ ga tupauca ga taxŭneãrŭ purichíagŭarŭ ãẽxgacŭ wŭxigu namaã ga norŭ purichíagŭ na yagagŭãxŭcèx. Natŭrŭ namuŭẽ na duŭxŭgŭ nutamaã yamuxŭtanŭxŭ, rŭ yemacèx meãmare yema ngúexŭgŭxŭ nigagŭ. ²⁷ Rŭ yexguma namaã ínangugŭga, rŭ yema ãẽxgacŭgŭpẽxewa nanagagŭ. Rŭ yema paigŭeru rŭ namaã nidexa rŭ ñanagŭrŭ nŭxŭ: ²⁸ —Marŭ poraãcŭ pexna tanachuxu na tama ngẽma Ngechuchuégamaã penangúexẽẽxŭcèx. Natŭrŭ i pema rŭ guxŭne ya Yerucharéŭwa penangúexẽ i duŭxŭgŭ, rŭ ñuxŭchi toxna penax-uxchaŭ ga na togagu nayuxŭ ga yema Ngechuchu —ñanagŭrŭ. ²⁹ Rŭ Pedru rŭ namŭcŭgŭmaã nanangãxŭgŭ, rŭ ñanagŭrŭgŭ: —Narŭmemaẽ nixŭ na Tu-panaga taxŭnŭẽxŭ rŭ tama i yatŭgŭga. ³⁰ —Guma Tupana ga nuxcŭmaŭgŭxŭ ga tŭrŭ oxigŭ nŭxŭ yaxŭgŭcŭ, rŭ guma nixŭ ga wena namaxẽẽcŭ ga Ngechuchu ga pema peyamácŭ ga yexguma curuchawa peyapotagŭga. ³¹ —Natŭrŭ Tupana rŭ nanataxẽẽãma, rŭ nŭgŭarŭ tŭgŭnecŭwawa nanatoxẽẽ. Rŭ tŭrŭ cuèxruŭ rŭ maxẽẽeruŭ nayangucuchixẽẽ na tatanŭxŭgŭ i Yudŭgŭxŭ nangŭxẽẽxŭcèx na nŭxŭ naxoexŭcèx i norŭ chixexŭgŭ, rŭ Tupana nŭxŭ nŭxŭ nangechaŭxŭcèx i norŭ pecadugŭ. ³² —Rŭ toma nŭxŭ tacuèx na aixcŭma yŭxŭ i guxŭma i ngẽma pemaã nŭxŭ tixuxŭ erŭ tomatama nŭxŭ tadaugŭ. Rŭ ngẽxgumarŭŭ ta i Tupanaãe i Ŭnẽxŭ i Tupana tŭxna ãxŭ ya yŭxema naga ñnŭẽxẽ, rŭ nŭxŭ nacuèx na aixcŭma yŭxŭ —ñanagŭrŭgŭ. ³³ Rŭ yexguma yemaxŭ naxŭnŭẽgu ga yema ãẽxgacŭgŭ, rŭ poraãcŭxŭchima nanuẽ, rŭ nanadaixchaŭ. ³⁴ Natŭrŭ yema ãẽxgacŭgŭtanŭwa nayexma ga wŭxi ga Parichéu ga Gamarié ga naega. Rŭ nŭma rŭ meãma nanangúexẽẽ ga Tu-panaãrŭ mugŭ. Rŭ guxŭma ga duŭxŭgŭ rŭ nŭxŭ nangechaŭgŭ. Rŭ nŭma ga Gamarié inachi rŭ nanamu na paxaãchi ínamuxŭãxŭcèx ga yema ngúexŭgŭ ga Ngechuchu imugŭxŭ. ³⁵ Rŭ ñuxŭchi namŭcŭgŭ ga ãẽxgacŭgŭmaã nŭxŭ nixu rŭ ñanagŭrŭ: —Pa Chautanŭxŭx, ¡pexuãẽgŭ na tacŭ tá namaã pexuẽxŭ i ñaã yatŭgŭ! ³⁶ —Rŭ nŭxna pecuèxãchie ga ŭpa ga ñuxãcŭ ãẽxgacŭxŭ nŭgŭ ningucuchixẽẽchaŭ ga Teudá. Rŭ nŭgŭtama nixu na wŭxi ga tacŭ na yŭxŭ. Rŭ

maneca 400 naguxü ga yatügu nawe narüxi. Natürü churaragü nayamèxgü, rü nayu. Rü guxüma ga yema nawe rüxixü rü nangĩachi, rü yexma nayarüxo ga guxüma. ³⁷—Rü yixcúra ínangu ga to ga yexguma tachiũãneärü ãëxgacü duũxügüxü ixugügu, rü yema nixĩ ga Yuda ga Gariréaanecũãx ga ãëxgacüxü nügu ingucuchixëechaũxü. Rü nayaxucuxëgu ga duũxügu rü nawe narüxi ga ñuxre. Natürü yemaxü rü ta nimèxgü rü nayu. Rü guxüma ga yema nawe rüxixü rü nangĩachi. ³⁸—Rü ngëmacèx i ñuxma rü pexü chaxucuxë na peyangëxgüxü i ñaã yatügu, rü tama penapoxcuexü. Erü ngëxguma nagagutama yixigu i ngëma numa naxügüxü, rü tá inayarüxo. ³⁹—Natürü ngëxguma Tupanaärü yixigu i ñaã naxügüxü, rü taxuacüma ipeyanaxoxëë. ¡Rü pexuãëgu na tama ngürüachi Tupanamaã yixü i penuëxü! —ñanagürü. Rü guxüma ga yema ãëxgacügu rü naga naxĩnüë ga yema norü ucuxë. ⁴⁰ Rü ñuxüchi nanachocuxëë ga yema ngüexügu ga Ngechuchu imugüxü. Rü nayacuaixgü. Rü nüxna naxãga na tama Ngechuchuchiga yadexagüxüçèx. Rü yemawena rü nayangëxgü. ⁴¹ Rü yema ãëxgacügüna ínixĩ ga yema ngüexügu. Rü nataãëgu yerü woetama Tupana nanaxwëxe ga yemaãcü Ngechuchucèx ngüxü na yangegüxü. ⁴² Rü guxü ga ngunexügu tupauca ga taxünewa rü ìpatagüwa, rü nanangüexëãma, rü nüxü nixugüetanü ga ore ga mexü ga Ngechuchu ya Cristuchiga.

6

Yema ngüexügu ga Ngechuchu imugüxü rü nüxü naxuneta ga 7 ga yatügu na nüxü nangüxëëgüxüçèx ga Tupanaärü puracüwa

¹ Rü yexgumaãcü rü yexeraãcü nimuchigü ga yema duũxügu ga yaxögüxü. Rü natanüwa nayexmagü ga Yudíugüchirëx ga Griéguanewa ne ìxü rü Griégugawa idexagüxü. Rü nayexma ta ga yaxögüxü ga Yudíugü ga Yerucharéüçüãx ga woetama nagawa idexagüxü. Rü yema yaxögüxü ga Griégugawa idexagüxü rü nidexagüecha nachigagu ga yema yaxögüxü ga Yerucharéüçüãxgü ixígüxü, rü ñanagürügu: —Totanüwa yutegüxe rü tama meã õna tuxna naxägüxü i ngëxguma õna inaxägüüxgu i wüxichigü i ngunexügu —ñanagürügu. ² Rü yexguma ga yema 12 ga ngüexügu ga Ngechuchu imugüxü rü guxüma ga yema yaxögüxüxü nangutaquëxexëëgu, rü ñanagürügu nüxü: —Tama name na ítanangéxü i Tupanaärü orearü uchiga i tomax na õnamaã itacuáxüçèx. ³—Rü ngëmacèx, Pa Tomücügüx, rü ¡Naxcèx pedëux i petanüwa ya 7 ya yatügu ya guxãma nüxü ngechaücü, rü meã naãëxü cuácü, rü aixcüma Tupanaãë i Üünexü nawa ngëxmacü! Rü toma tá nüxna tanaxã i ngëma puracü na nümagü õnamaã inacuëxgüxüçèx. ⁴—Rü ngëxguma i toma rü yumüxëwa rü Tupanaärü orearü uchigawaxicatama tá tapuracüë —ñanagürügu. ⁵ Rü yexguma ga guxüma ga yema duũxügu rü: —Ngü —ñanagürügu naxcèx ga yema ore. Rü nüxü naxunetagu ga Etébaü ga meã yaxöcü rü aixcüma Tupanaãë i Üünexü nawa yexmacü, rü Piripi, rü Pócoro, rü Nicanúru, rü Timú rü Paruménu, rü Nicuráchi ga Aütioquíacüãx ga tauta Ngechuchuaxü yaxöõgu Yudíugücüma yaxucü. ⁶ Rü yema ngüexügu ga Ngechuchu imugüxüxütawa nanagagü. Rü nümagü naxmëxmaã nüxü yangögüãcüma naxcèx nayumüxëgu. ⁷ Rü yema Tupanaärü ore rü yexeraãcü nixüchigü. Rü poraãcü nimuëtanü ga yema yaxögüxü ga Yerucharéüwa. Rü woo muxüchixüma ga Yudíugüarü paigü rü ta Ngechuchuaxü nayaxögü.

Etébaüxü niyauxgü

⁸ Rü Etébaü nixĩ ga wüxi ga yatü ga Tupana poraãcü nüxü rüngüxëëcü rü naporaxëëcü na duũxügütanüwa naxüãxüçèx ga mexügu ga taxügu

rü cuèxruŭgü ga Tupanaärü poramaã naxüxü. ⁹ Rü nayexma ga wüxi ga ngutaquëxepataŭ ga Yudíugüarü ga Ínguxüxüärü Ngutaquëxepataŭgu äegane. Rü gumawa nangutaquëxegü ga duüxügü ga ũpaacü corigümëxëwa yexmagüxü. Rü ñuxre ga guma ngutaquëxepataüçüãx rü wüxigu namaã ga ñuxre ga Chireneãnecüãx, rü Aleyãdríaanecüãx, rü Chiríchiaanecüãx, rü Áchiaarü naãnecüãx, rü inanaxügüe ga Etébaŭmaã na iyaporagatanüçüxü. ¹⁰ Natürü taxuacüma Etébaŭxü narüyexeragü, yerü nüma ga Etébaŭ rü nidexa namaã ga yema cuèx ga Tupanaãe i Üünexü nüxna äxü. ¹¹ Rü yexguma ga yema duüxügü rü togüaxü nanaxütanügü na Etébaŭchiga doraxü yaxugüxüçèx. Rü ñanagürügü ga yema idoraegüxü: —Toma nüxü taxĩnüëgu, rü Moïchéchiga rü Tupanachigamaã chixexü ga ore nixugü ga Etébaŭ —ñanagürügü. ¹² Rü yemaäcü nananuëxëe ga duüxügü rü Yudíugüarü äëxgacügüerugü rü ngüexëeruügu ga ore ga mugüwa ngüxëetaegüxü. Rü yemacèx Etébaŭcèx nibuxmü, rü nayayauxgü, rü äëxgacügüerugü íngutaquëxegüxüwa nanagagü. ¹³ Rü naxcèx nadaugü ta ga yatügü ga doraxü ixugüemarexü rü yema rü ñanagürügü: —Ñaa yatü rü guxügüma chixexümaã nidexa i nachigagu ya daa tupauca ya taxüne, rü nachigagu i Tupanaärü mugü. ¹⁴—Rü toma rü nüxü taxĩnüë rü:

“Yima Ngechuchu ya Nacharétucüãx rü tá nanangutaüxëe ya daa tupauca, rü tá inayanaxoxëe i nacümagü ga Moïché tüxü ngüexëexü”, —ñanagürügü. ¹⁵ Rü yexguma Etébaŭxü nadaunügu ga guxüma ga yema äëxgacügü ga yéma rütogüxü, rü nüxü nadaugü ga nachametü rü wüxi ga daxü-cüãx ga orearü ngeruüchametürü na yïxü.

7

Etébaŭärü ore

¹ Rü nüma ga paigüeru, rü Etébaŭna naca rü ñanagürü: —¿Aixcüma yïxü i ñaa ore i nüxü yaxugüexü? —ñanagürü. ² Rü Etébaŭ nanangãxü, rü ñanagürü: —Pa Chautanüxü Pa Äëxgacügüx, ¡Choxü iperüxĩnüë! Guma Tupana ya mexëchicü, rü nuxcümaüçü ga tórü oxi ga Abráüçèx nangox ga yexguma Mechopotámiãärü naãnegu naxãchiügu ga yexguma tauta Aráüärü naãnewa naxüxgu na yexma yaxãchiüxüçèx. ³—Rü Tupana rü ñanagürü nüxü:

“¡Nüxna ixü i cuchüãne rü cutanüxü, rü ngëma choma tá cuxü nüxü chadauxëexü i naãnewa naxü!”

ñanagürü. ⁴—Rü yexguma ínaxüxü ga Abráü nawa ga yema Cadéucüãxärü naãne ga ngextá noxri ínaxãchiüxüwa, rü Aráüärü naãnegu nayaxãchiü. Rü yexguma nanatü yuxguwena, rü ñoma ga naãne i ñuxma nagu pexãchiüxüwa naxü, yerü yemaäcü Tupana núma nanaga. ⁵—Natürü yexguma rü ta taxuüma ga noxrüxüchi ga naãne nüxna naxã ga Tupana i ñoma i naãnewa, rü bai ga íraxü ga noxrüxüchi ga naãne. Natürü Abráümaã inaxuneta ga yixcama tá nüxna na naxããxü ga ñoma i naãne na noxrüxüchi yïxüçèx, rü yixcama marü nayuxguwena rü nanegüarü na yïxüçèx. Rü yemaäcü Abráümaã inaxuneta ga woo na nangexacüxü ga yexguma. ⁶—Rü ñanagürü Abráüxü ga Tupana:

“Rü yixcama i cutaagü rü tá to i nachüãne i tama noxrü ixüxüwa nangëxmagü. Rü ngëma nachüãnecüãx i duüxügü rü norü duüxügüxü tá nayaxígüxëe. Rü 400 ya taunecü rü ngëma duüxügü rü tá chixri namaã nachopetü i cutaagü. ⁷ Natürü choma tá chanapoxcue i ngëma nachüãnecüãx i norü duüxügüxü yaxígüxëexü. Rü ngëmawena i cutaagü rü tá ínachoxü nawa i ngëma naãne, rü nuã ñaa i naãnewa tá choxü nicuèxüügu”,

ñanagürü ga Tupana. ⁸ —Rü yexguma Tupana rü Abráũ rü nügümaã nanamexêê, rü ñanagürü ga Tupana:

“Choma rü tá cuxũ charüngũxêê ega cuma rü guxũma i cutanũxũgũ ípewiũchêxmüpêxechiraũgu. Rü ngêma tá nixĩ i cuèxruũ i yigümaã imexêêxũ”,

ñanagürü ga Tupana. Rü nabu ga wũxi ga nane ga Abráũ, rü Ichaágu nanaxüéga. Rü yexguma ⁸ ga norü ngunexũwa nanguxgu ga Ichaá, rü nūmatama ga Abráũ rü ínanawiechêxmüpêxechiraũ. Rü yexguma marü nayêxgu ga Ichaá rü nabu ga nane ga Acobu, rü nūmatama ga Ichaá rü ínanawiechêxmüpêxechiraũ. Rü yixcama marü nayêxgu ga Acobu rü nüxũ nayexma ga ¹² ga nanegü. Rü nūmatama ga Acobu rü ínanawiechêxmüpêxechiraũ ga guxũma ga yema ¹² ga nanegü. Rü yema ¹² ga nanegü nixĩ ga yema ¹² ga nuxcūmaũgũxũ ga tórü oxigü. ⁹⁻¹⁰ —Rü yema ¹² ga Acobu nanegü ga tórü oxigü ixĩgũxũtanüwa rü wũxi rü Yúche nixĩ ga naega. Natürü naêneêgü ga guma Yúche rü nixãũxãchie, rü yemacèx Equituarü naãnewa íxũ ga taxetanũxũxũ Yúchemaã nataxegü na Equituarü naãnewa nagagüãxücèx. Natürü Tupana rü Yúchemaã nayexma, rü nüxũ narüngũxêê na tama pecadu naxüxücèx ga yexguma guxchaxũwa nayexmagu. Rü nüxna nanaxã ga cuèx, rü Yúchexũ narüngũxêê ga meã na nayauxãxücèx ga Equituaneärü ãêxgacü ga Faraũ. Rü yemacèx ga Faraũ rü ãêxgacüxũ nayangucuchixêê. Rü nūma ga Yúche nixĩ ga ãêxgacü ga Faraũpatawa rü guxũma ga yema naxiũãnewa. Rü Faraũxĩcatama nixĩ ga Yúhearü yexera na ãêxgacü yĩxũ ga yema naãnewa. ¹¹ —Rü yexgumaũcüü nayexma ga taiya ga guxũ ga Equituarü naãnewa rü Canaãärü naãnewa. Rü poraãcü taiya nüxũ nangux ga duũxũgü. Rü yemacèx ga yema nuxcūmaũgũxũ ga tórü oxigü rü düxwa taxuacūma nüxũ inayangaugü ga nabü ga Canaãärü naãnewa. ¹² —Natürü yexguma nüxũ nacuáchigaxgu ga Acobu ga na nayexmaxũ ga nabü ga Equituanewa, rü yéma nanamugü ga nanegü ga guma tórü oxigü ixĩgücü. Rü yema nixĩ ga nawa inaxügũxũ ga noxrima nabücèx Equituanewa na naxĩxũ. ¹³ —Rü yixcama marü naguxgu ga yema nabü rü wenaxärü Equituanewa naxĩ nawa ga nabü. Rü yexguma wenaxärü yéma naxĩxgu ga naêneêgü, rü nügü nixu ga Yúche namaã. Rü yexguma nüxũ nacuèx ga Faraũ ga ngextácũãx na yĩxũ ga Yúche. ¹⁴ —Rü yixcamaxũra ga Yúche rü tümacèx nangema ga nanatü rü guxũma ga natanüxũ. Rü maneca ⁷⁵wa nangu ga yema duũxũgü ga Yúchetanüxũ. ¹⁵ —Rü yemaãcü Equituanewa naxü ga Acobu na yexma yaxãchiũxücèx. Rü yexma nayu ga nūmax. Rü yexma nayue ta ga nanegü ga tórü oxigü. ¹⁶ —Rü yexguma nayuxgu ga Acobu, rü Chiquéũwa nanangegü ga naxũne na yexma yatêxgüãxücèx nagu ga yema naxmaxũ ga Abráũ dīêrumaã naxcèx taxexũ ga Amú nanegüxũtawa ga Chiquéũwa. ¹⁷ —Rü düxwa nawa nangu na Equituanewa ínanguxũxücèx ga tatanüxũ ga yexgumarüũ ga Tupana Abráũmaã ixu-netaxũ. Rü yexguma rü marü poraãcü nimu ga tatanüxũ ga Equituanewa. ¹⁸ —Rü yexguma ningucuchi ga to ga Equituaneärü ãêxgacü ga tama Yúchechigaxũ cuáxũ. ¹⁹ —Rü yema ãêxgacü rü tatanüxũxũ nawomüxêê rü chixri tümamaã naxüpetü ga guxema nuxcūmaũgũxe ga tórü oxigü. Rü tüxũ namu na yexwaca buexe ga tümaxãcügũxũ ítawogũxũ na tayuexücèx. ²⁰ —Rü yexgumaũcüü nabu ga Moĩché, rü Tupanaãxũ nangúchaũ. Rü tomaêxpũx ga tauemacü nüxna tadaugü ga tümapatawa ga naê rü nanatü. ²¹ —Rü yexguma düxwa ítanatêxgügu, rü Faraũxãcü inayaxu, rü ngĩnexũ inayaxêê. ²² —Rü yemaãcü Moĩchéxũ nanguxêêgü ga guxũma ga Equituanecũãxärü cuèx. Rü nūma ga Moĩché rü wũxi ga ãêxgacü ga poracü nixĩ, rü norü dexawa rü ta napora. ²³ —

Rü yexguma 40 ga norü taunecüwa nanguxgu ga Moïché rü nagu narüxĩnü ga natanüxügü ga Yudíugütanügu na naxũãneãxũ. ²⁴—Rü nüxũ nadau ga wüxi ga Equituanecũãx ga wüxi ga Yudíuxũ na naçuaxixũ. Rü yemacèx ga Moïché rü yema Yudíuétüwa ínayuxu, rü yema Equituanecũãxũ nimèx rü nanayuxẽẽ. ²⁵—Rü nüma ga Moïché nagu rüxĩnügu rü chi natanüxügü ga Yudíugü rü chi nüxũ nacuèxgü na Tupana yéma namuxũ na ínguxũxẽẽãxücèx. Natürü tama nüxũ nacuèxgüéga ga yema natanüxügü. ²⁶—Rü moxũãcü ga Moïché rü nüxũ nadau ga to ga taxre ga Yudíugü ga nügu yexma dèixũ, rü nüxna nachogüchaũ. Rü ñanagürü nüxũ:

“Pema rü pegütanüxügü pixígü. ¿Rü tüxcüũ pegü pedai i pemax?” ñanagürü. ²⁷—Rü yexguma ga yema namücüxũ íçuaxixũ rü Moïchéxũ natèxnetá, rü ñanagürü nüxũ:

“¿Texé cuxũ tamu na toeru quiĩxücèx rü tomaã icucuáxücèx? ²⁸—¿Éxna choxũ quimáxchaũ ta, ga ñne quimáxũ ga Equituanecũãxrüũ?” ñanagürü. ²⁹—Rü yexguma yemaxũ naxĩnügu ga Moïché, rü niña ga yema naãnewa. Rü Madiáũãnewa naxũ. Rü yema nachiũãne ga tama noxrü ixĩxügu nayaxãchiũ. Rü yexma naxãmèx rü nabu ga taxre ga nanegü. ³⁰—Rü 40 ga taunecüguwena ga dauxchitawa ga Chinaĩ ga mèxpüneãrü ngaicamana, rü wüxi ga naĩxètáxacü ga yéma iyauraxüwa Moïchécèx nangox ga wüxi ga Tupanaãrü orearü ngeruũ ga daxücũãx. ³¹—Rü nabaixãchiãe ga Moïché ga yexguma nüxũ nadèuxgu. Rü naxcèx nixũ rü nüxna nangaicama na meã nüxũ nadauxücèx. Rü yexguma Moïchémaã nidexa ga Cori ga Tupana, rü ñanagürü nüxũ:

³²“Choma nixĩ i curü oxigüarü Tupana chiĩxũ rü Abráũ rü Ichaá rü Acobuarü Tupana chiĩxũ”, ñanagürü. Rü yexguma ga Moïché rü inanaxügü ga norü muũmaã na yaduruxũ. Rü namuũ ga yexma na nadawenüxũ. ³³—Rü yexguma ga Cori ga Tupana rü ñanagürü nüxũ:

“¡Ínacuaixũ i curü chapatu erü ñaã naãne i nagu cuchixũ rü naxüüne, erü chanuxma! ³⁴ Choma rü ngóxüwama nüxũ chadau i ñuxãcü poraãcü ngúxũ na yangegüxũ i chorü duũxügü i Equituanewa. Rü nüxũ chaxĩnü i na naxauxexũ. Rü ngèmacèx núma chaxũ na íchananguxũxẽẽxücèx. ¡Nuã naxũ na Equituanewa cuxũ chamuxücèx!”, ñanagürü. ³⁵—Rü woo ga noxri ga nümagü ga natanüxügü rü guma Moïchéxũ naxoe ga yexguma ñagügu:

“¿Rü texé cuxũ tamu na toeru quiĩxücèx rü tomaã icucuáxücèx?” ñagügu, natürü ga Tupana rü yéma nanamuãma na yema duũxügüxũ ínguxũxẽẽxücèx rü norü ãèxgacü na yĩxücèx. Rü yemaãcü Moïchéxũ namu ga Tupana ga yexguma naxütawa namuãxgu ga yema norü orearü ngeruũ ga yema naĩxètáxacü ga iyauraxüwa naxcèx ngóxũ. ³⁶—Rü Moïché nixĩ ga Equituarü naãnewa íngaxüxũ ga nuxcümaũgüxũ ga tórü oxigü. Rü Equituanewa, rü Dauchiüxũ ga Taxtüwa, rü dauxchitawa ga ngextá taxúema íxãpataxüwa inanawèx ga cuèxruügü, rü nanaxü ga mexũ ga taxügü ga Tupanaãrü poramaã naxüxũ. Rü yemaãcü 40 ga taunecü nüxũ na rü-ngüxẽẽ ga yema duũxügü. ³⁷—Rü nümatama ga Moïché nixĩ ga tatanüxügü ga Yudíugümaã ñaxũ:

“Tupana rü yixcüra tá pexcèx nüxũ naxuneta i petanüwa i wüxi i norü orearü uruũ ga yexgumarüũ ga choxũ na naxunetaxürüũ”, ñanagürü. ³⁸—Rü nümatama ga Moïché nixĩ ga nuxcümaũgüxũ ga tórü oxigümaã nangutaquèxexũ ga yema naãne ga ngextá taxúema íxãpataxüwa. Rü tórü oxigümaã nayexma ga Chinaĩ ga mèxpünewa ga yexguma namaã

yadeaxgu ga Tupanaārū orearū ngeruū ga daxūcūāx. Rū nūmatama ga Moīché nixī ga nayauxāxū ga Tupanaārū ore i maxēxēēruū na nūxī tūxna naxāāxūcèx. ³⁹—Natürū ga tórū oxigū rū tama naga naxīnūēchaū ga guma Moīché. Rū ínanatèxūchigūama, rū Equituaneguama narūxīnūāēgū. ⁴⁰—Rū tórū oxigū rū Moīchéeneē ga Arāūxū ñanagürügū: “¡Rū toxçèx naxū i tupanachicūnèxāgū na nawe tarūxīxūcèx! Erū tama nūxū tacuèxgū i tacū nūxū na üpetūxū i ngēma Moīché ga Equituanewa tūxū yagagūxū”, ñanagürügū. ⁴¹—Rū yexguma nanaxūgū ga wūxi ga wocaxacūchicūnèxā norū tupanaxū. Rū ñuxūchi naxçèx nanadai ga ñuxre ga carnerugū na yemamaā nūxū yacuèxūūgūxūcèx. Rū wūxi ga peta naxçèx naxūgū ga yema wocaxacūchicūnèxā ga nūmatama naxūgūxū. ⁴²—Rū yemacèx ga Tupana rū nūxna nixūgachi ga yema duūxūgū. Rū ínanawogū na woramacuri rū üèxcū rū tauemacūmaā natupanaāxēēāxūcèx. Yerū yemaācū Tupanaārū orearū uruūgūarū poperagu naxūmatū, rū ñanagürū:

“Pema, Pa Yudíugūx, ¿Chauxçèx yīxū ga penadèixū ga carnerugū ga yexguma 40 ga taunecū dauxchitawa ga ngextá taxúema íxāpataxūwa peyexmagūgu? ⁴³ Tama aixcūma chauxçèx nixī yerū ga pema rū ngextá ípexīxūwa rū ípenangeexū ga napata ga perū tupananeta ga Moro rū ípenangeexū ga perū tupananeta ga Refāārū woramacurichicūnèxā. Rū yemaācū pegūmaā ípenangeexū ga yema tupananetachicūnèxāgū ga pematama pexūgūxū na nūxū picuèxūūgūxūcèx. Rū ngēmacèx i ñuxma rū perū naānewa tá pexū íchawoxū rū yaxūwa i Babiró-niāārū yexerawa tá pexū chamugū”,

ñanagürū ga Tupana ga yema orewa. ⁴⁴—Rū yema naāne ga ngextá taxúema íxāpataxūwa rū tórū oxigū nūxū nayexma ga wūxi ga ípata ga naxchirunaxçèx ga nagu namaā nanguxūgūne ga Tupanaārū mugū ga nutagu ūmatūxū. Rū guma ípata ga naxchirunaxçèx nixī ga nūxū nawéācūma Tupana Moīchéxū naxūxēxene. ⁴⁵—Rū yexguma nayuxguwena ga Moīché, rū Yochué ningucuchi ga āēxgacū na yīxū. Rū tórū oxigū rū nuā tórū naānewa nanangegū ga guma ípata ga naxchirunaxçèx ga yexguma Yochuémaā napugūāgu ga ñāñ naāne nūxna ga yema duūxūgū ga Tupana íwoxūxū napēxewa ga tórū oxigū. Rū nūma nayexma ga guma ípata rū ñuxmata Dabí ingucuchigu ga āēxgacū na yīxū. ⁴⁶—Rū guma āēxgacū ga Dabí rū Tupana rū poraācū namaā nataāē, rū nūxū narūngūxēē. Rū nūma ga Dabí rū Tupanana naxçèx naca na naxūāxūcèx ga wūxi ga tupauca ga taxūne ga nawa Tupanaxū na yacuèxūūgūxūcèx ga tatanūxūgū ga Acobutaagū. ⁴⁷—Natürū Dabí nane ga Charumōū nixī ga naxūcū ga guma tupauca ga Tupanacèx ixīxūne. ⁴⁸—Natürū ya Tupana ya tacūxūchima rū tama duūxūgū ūxūne ya tupaucagūmaā naxāpata. Rū yemacèx ga Tupana rū nuxcūmaūcū ga norū orearū uruūwa rū ñanagürū:

⁴⁹⁻⁵⁰ “Choma nixī ya āēxgacū ya tacūxūchima, rū daxūgūxū i naāne nixī i chorū toxmaxwèxeruū ixīxū rū ñoma i naāne nixī i chorū chicutūruū ixīxū. ¿Rū ñuxūcūruwa i nagu perūxīnūēxū tá na penaxūxū ya wūxi ya tupauca ya chaugu mexūne?”

ñanagürū ga Cori ya Tupana. Rū ñanagürū ta ga Tupana:

“¿Tama ēxna choma yīxū ichanaxūxū ga guxūma i tacū i ngēxmaxū? ¿Rū ñuxācū chi penaxūxū i wūxi i nachica i nagu charūngūxū?”

ñanagürū ga norū orewa. ⁵¹ Rū ñanagürū ga Etébaū: —Dūcèx Pa Āēxgacūgūx, pema rū guxūguma nūxū pexoe i Tupanaārū ore, rū tama íperūxīnūēchaū. Rū peāēwa rū tama peyaxōgūchaū. Rū pema rū guxūguma Tupanaāē i Ūnèxūmaā penuēēcha. Yema nuxcūmaūgūxū ga perū oxigürūūtama pixīgū i pemax. ⁵²—Rū perū oxigū rū chixeācūma namaā nachopetū ga guxūma ga

Tupanaārū orearū uruūgū. Rū nanadai ga yema orearū uruūgū ga nūxū ixuchigagūxū ga na nūma naxūxū tá ga guma mecū ya Ngechuchu. Rū yexguma ínanguxgu ga guma Ngechuchu rú pema Piratuna penamu rú penayuxēē. ⁵³— Rū woo pema rú Tupanaārū orearū ngeruūgū ga daxūcūāxūtawa penayaxu ga Tupanaārū ore, natūrū tama naga pexīnūē —ñanagūrū ga Etébaū.

Nayu ga Etébaū

⁵⁴ Rū yexguma nūxū naxīnūēgu ga yema ore, rú nanuēxūchiama ga yema duūxūgū. Rū norū numaā Etébaūcèx nixūxchapūtagū. ⁵⁵ Natūrū ga Etébaū rú aixcūma Tupanaāē i Ūñexū nawa nayexma. Rū daxū nadawenū, rú nūxū nadau na ñuxācū namexēchixū ga Tupana. Rū nūxū nadau ga Ngechuchu ga Tupanaārū tūgūneguama chicū. ⁵⁶ Rū yexguma rú ñanagūrū: —Nūxū chadau i na yangoxnaāchixū i naānetūwe, rú nūxū chadau ya Cristu ya Tupana Nane ya duūxūxū ixīcū ya Tupanaārū tūgūneguama chicū —ñanagūrū ga Etébaū. ⁵⁷ Natūrū nūmagū rú nūgū narūtūtamachixēgū, rú tagaācū aixta naxūēācūma nūxna nayuxgū. ⁵⁸ Rū ínanagaxūchigū ga ñānewa, rú nutagūmaā ínanamuxūchigū. Rū yéma nayexma ga wūxi ga ngextūxūxū ga Chaurugu āegaxū. Rū yemaxū nanawotanū ga norū gāuxūchirugū ga ínacūxuchigūxū ga yema duūxūgū ga Etébaūxū imèxgūxū. ⁵⁹ Rū yexguma nutamaā ínamuxūchigūāguyane, rú nayumūxē ga Etébaū rú ñanagūrū: —Pa Cori Pa Ngechuchux, ¡Nayaxu i chauāē! —ñanagūrū. ⁶⁰ Rū yemawena rú ínacaxāpūxū, rú tagaācū aixta naxū, rú ñanagūrū: —Pa Cori Pa Tupanax, ¡Tāxū i ñāā pecaducèx cunapoxcuexū i ñāā duūxūgū! —ñanagūrū. Rū yexguma yema ñaxguwena rú nayu.

8

Chauru rú guxema yaxōgūxewe ñingēchigū na tūxū napoxcuexūcèx

¹ Rū Chauru rú norū me nixī ga Etébaūxū na yamèxgūxū. Rū yematama ngunexūgu rú norū uwanūgū rú ínanaxūgūe ga na poraācū nawe yangēxūtanūxū ga yema yaxōgūxū ga Yerucharéūwa yexmagūxū. Rū dūxwa ga guxūma rú Yudéaanegu rú Chamáriaanegu nūgū nawoone. Rū yema ngúexūgū ga Ngechuchu imugūxūxicatama ínayaxūgū ga Yerucharéūwa. ² Rū ñuxre ga yatūgū ga meāma Tupanaāxū yaxōgūxū rú nanayauxgū ga Etébaūxūne, rú ínanatèxgū rú poraācū naxcèx naxauxe. ³ R yexguma ga Chauru rú chixri tūmamaā naxūpetū ga guxema yaxōgūxe. Rū tūmapatagu nixūcuchigū na tūxū ínayauxūxūcèx. Rū yéma tūxū ínatūxū ga yatūgū rú ngexegū, rú ñuxūchi poxcupataūgu tūxū nawocu.

Chamáriawa nūxū nixuchiga ga Tupanaārū ore i mexū

⁴ Rū yema yaxōgūxū ga Chauruchaxwa ibuxmūxū ga Yerucharéūwa, rú guxūwama ga ngextā ínaxīxūwa rú nūxū nixuchigagū ga ñuxācū Ngechuchu tūxū na maxēxēēxū. ⁵ Rū Piripi nixī ga wūxi ga yema orexū ixuchigacū. Rū nūma rú ñāne ga Chamáriawa naxū, rú yéma ínanaxūgū ga Cristuchigaxū na yaxuxū. ⁶ Rū yema duūxūgū ga Chamáriacūāx, rú Piripicèx nangutaquēxegū. Rū guxūma meāma inarūxīnūē ga yema ore ga namaā nūxū yaxuxū, yerū nūxū nadaugū ga yema mexūgū ga taxūgū ga Tupanaārū poramaā naxūxū ga Piripi. ⁷ Rū muxēma ga duūxēgū ga ngoxogū tūmawa yexmaxē rú tūmacèx nitaanegū. Rū yema ngoxogū rú tagaācū aita naxūēācūma tūmawa ínachoxū. Rū yexgumarūū ta rú muxēma ga nawāixāchigūxe rú chixeparagūxe rú tūmacèx nitaanegū. ⁸ Rū yemacèx poraācū nataāēgū ga guxūma ga duūxūgū ga guma ñāne ga Chamáriawa. ⁹ Natūrū guma ñānewa nayexma ga wūxi ga yatū ga Chimāūgu āegaxū ga ñuxre ga taunecū norū yuūmaā duūxūgūxū

womüxêêxü ga guma ñanewa. Rü nügü nixu ga na wüxi ga tacüxü cuáxü na yïxü. ¹⁰ Rü guxüma meäma nüxü inarüxñnüë woo ga buxügü rü yaxügü. Rü ñanagürügü: —Ñaa yatü rü aixcüma nüxü nangëxma i Tupanaärü pora i taxü —ñanagürügü. ¹¹ Rü naga naxñnüë ga duüxügü, yerü mucüma ga tauncü rü norü yuümaã nanawomüxêë. ¹² Rü Piripi rü yema duüxügümaã nüxü nixu ga ore ga mexü ga Ngechuchu ya Cristuchiga, rü ñuxäcü na äëxgacü yïxü ya Tupana. Rü yexguma yema ore yaxögügu ga duüxügü, rü Piripi ñanabaiüxêë ga yatüxü rü ngexügü. ¹³ Rü nümatama ga Chimáü rü ta nayaxö, rü ñnabaie. Rü inanaxügü ga Piripixü na naxümücüxü. Rü yexguma nüxü nadëuxgu ga yema cuëxruügü rü mexügü ga taxü ga Tupanaärü poramaã naxüxü ga Piripi, rü poraäcü nabaixächiaë ga Chimáü. ¹⁴ Rü yema Ngechuchuarü ngüexügü ga Yerucharéüwa yexmagüxü rü nüxü naxñnüëchiga ga meã na nayauxgüãxü ga Tupanaärü ore ga Chamáriawa. Rü yemacëx yéma nanamugü ga Pedru rü Cuáü. ¹⁵ Rü yexguma Chamáriawa nangugügu ga Pedru rü Cuáü, rü naxcëx nayumüxëgü ga yema yexwaca yaxögüxü ga duüxügü, na nayauxgüãxücëx ga Tupanaãë i Üünexü. ¹⁶ Yerü yexguma noxri yaxögüãgu ga yema duüxügü rü Piripi marü ñanabaiüxêëmare naegagu ga Cori ga Ngechuchu, natürü taxuxñnata nangu ga Tupanaãë i Üünexü. ¹⁷ Rü yemacëx ga Pedru rü Cuáü naxmëxmaã nüxü ningögügü ga yema yaxögüxü, rü yexguma nanayauxgü ga Tupanaãë i Üünexü. ¹⁸⁻¹⁹ Rü nüxü nadau ga Chimáü ga na duüxügüna nanguxü ga Tupanaãë i Üünexü ga yexguma Pedru rü Cuáü naxmëxmaã yema duüxügüxü yangögügügu. Rü yemacëx dïëru Pedru rü Cuáüna ngïxü naxäxchaü ga Chimáü rü ñanagürü nüxü: —¡Choxna rü ta penaxã i ngëma pora, na yixema tüxü chingögüxe rü ta tüxna nanguxücëx i Tupanaãë i Üünexü! —ñanagürü. ²⁰ Rü yexguma ga Pedru rü ñanagürü nüxü: —¡Cuxrüütama iyanataxux i curü dïëru, erü ngïmaã naxcëx cutaxechaü i Naãë i Üünexü i Tupana tüxna mumarexü! ²¹ Cuma rü taxucürüwama cunayaxu i ngëma pora, erü curü maxü rü tama name i Tupanapëxewa. ²² ¡Nüxü rüxo i ngëma curü chixexü, rü Tupanana naxcëx naca na cuxü nüxü nangechaüxücëx! Rü bexmana tá cuxü nüxü nangechaü i ngëma chixexü i cuãëwa nagu curüxñnüxü. ²³ Erü nüxü chacuëx rü poraäcü cunuãëwëxe, rü ngëma curü chixexü rü cumaã inacuëx rü ñoma cupoxcuxürüü cuxü nixixêë —ñanagürü. ²⁴ Rü Chimáü nanangãxü, rü ñanagürü: —¡Pema Tupanana chauxcëx peça na tama choxü nangupetüxücëx i ngëma nüxü pixuxü! —ñanagürü. ²⁵ Rü Pedru rü Cuáü rü yema Chamárianecüãx ga duüxügümaã nüxü nixugüe ga Cori ga Ngechuchuchiga, rü namaã nüxü nixugüe ga Tupanaärü ore. Rü yemawena rü Yerucharéücëx nawoegu. Rü namawa rü muxüne ga Chamárianewa yexmane ga ñanexäcügüwa rü nüxü nixuetanü ga Tupanaärü ore i mexü.

Piripi rü namagu nüxü nangau ga wüxi ga äëxgacü ga Etiópiianecüãx

²⁶ Rü yemawena, rü Tupanaärü orearü ngeruü ga daxücüãx rü Piripimaã nüxü nixu, rü ñanagürü: —¡Rü paxa inaxüãchi rü ñane ya Gachawaama naxü nawa i ngëma nama i Yerucharéüwa ne daxü rü Gachawa iyarügoxü! —ñanagürü. Rü ngëma nixi i nama i dauxchitawa i ngextá taxüema íxãpataxüwa dapetüxü. ²⁷ Rü inaxüãchi ga Piripi rü yema namawa naxü. Rü yexma nügü nangau namaã ga wüxi ga yatü ga Etiópiianenanguxü ga guxcüma ga yema äëxgacüarü dïëru. Rü ñeäcü Yerucharéüwa naxü na Tupanaxü yanacuëxüxücëx. ²⁸ Rü nachiüñnecëx nataegu, rü norü autu ga cowaru itúchigünewa narüto. Rü nawa ningúchigü ga yema ore ga Tupanaärü orearü uruü ga Ichaxía ümatüxü. ²⁹ Rü Tupanaãë i Üünexü rü Piripixü ñanagürü: —¡Paxa naxcëx ixü i ngëma autu! —ñanagürü. ³⁰ Rü paxa yema autucëx

niña ga Piripi. Rü yexguma naxütawa nanguxgu rü nüxü naxĩnü ga na Tupanaärü orearü uruü ga Ichaxía ümatüxü ga orewa nangúxü ga yema äëxgacü. Rü yexguma ga Piripi rü nüxna naca rü ñanagürü nüxü: —¿Nüxü cucuáxü i tacüchiga na yĩxü i ngēma nawa cungúxü? —ñanagürü. ³¹ Rü nüma ga äëxgacü ga Etiópiānecüãx rü nanangāxü, rü ñanagürü: —¿Ñuxücürüwa i nüxü chacuáxü ega taxúema chomaã inanguxüxëëgux? —ñanagürü. Rü Piripicèx naca na naxĩnagüxcèx, rü naxütawa na natoxücèx. ³² Rü yema nawa yangüchigüxü ga Tupanaärü ore ga ümatüxü, rü ñanagürü:

“Rü ñoma wüxi i carneru i norü mēxwa nagagüxürüüäcü nayagagü. Rü wüxi i carneruxacü i ngēma yayoxtēxagüxpēxewa tama aita üxürüü nachianemare, rü taxu ñanagürü. ³³ Rü yexguma duüxügü poraäcü chixri namaã chopetügu rü taxúema naētüwa tachogü. ¿Rü texé tá meã nachiga tidexa ga yema duüxügü ga yemaäcü poraäcüxüchima chixexü ügüxü? Yerü nayamēxgü na nataxuxücèx i norü maxü i ñoma i nañewa”,

ñanagürü ga yema ore ga nawa nangúxü. ³⁴ Rü Piripina naca ga yema äëxgacü ga Etiópiānecüãx, rü ñanagürü: —¿Chomaã nüxü ixu! ¿Rü texéchigagu nixi ga yadexaxü ga yema Tupanaärü orearü uruü? ¿Nügüchigagutama rü éxna toguechigagu? —ñanagürü. ³⁵ Rü yexguma nanangāxü ga Piripi. Rü yematama ore ga ümatüxümaã inanaxügü na namaã nüxü yaxuxü ga ore i mexü ga Ngechuchuchiga. ³⁶ Rü yixcamaxüra ga yexguma inaxiyane, rü dexá íyexmaxüwa nangugü. Rü ñanagürü ga yema äëxgacü: —Nuã nangēxma i dexá. ¿Rü tama éxna inamexü na nuã choxü ícubaixëëxü? —ñanagürü. ³⁷ Rü ñanagürü ga Piripi: —Ngëxguma aixcüma meãma cuyaxōxgux, rü marü name i na cuxü íchabaixëëxü —ñanagürü. Rü nanangāxü ga yema äëxgacü, rü ñanagürü: —Ngēmáäcü chayaxō na Ngechuchu ya Cristu yĩxü ya Tupana Nane —ñanagürü. ³⁸ Rü yexguma ínayachaxächixëë ga norü autu, rü wüxigu dexächüwa nachoü. Rü Piripi ínanabaixëë ga yema äëxgacü. ³⁹ Rü yexguma dexáwa ínachoōchigu, rü Tupanaäë i Ünexü rü Piripixü niga. Rü yema äëxgacü rü marü tama wena Piripixü nadau. Natürü taäëäcü namagu nixü. ⁴⁰ Natürü Achetowa nayangox ga Piripi. Rü yema ñānewa inaxüächi, rü nüxü nixuchigü ga ore i mexü ga guxüma ga ñānewa ñuxmata Checharéaarü nañewa nangu.

9

Ngechuchuaxü nayaxō ga Chauru

¹⁻² Rü yoxni ga Chauru rü daimaã nayaxāxünechigüama ga yema duüxügü ga Cori ga Ngechuchuaxü yaxōgüxü. Rü yemacèx paigüeruxütawa naxü, rü naxcèx nüxna naca ga popera ga nüxna āgaxü na Yudíugüarü ngutaquēxepataügü ga Damacuwa yexmagünegu yaxücuchigüxcèx rü yexma tümacèx nadauxücèx ga guxema yaxōgüxe ga yatüxe rü ngexegü na Yerucharéüwa tüxü nagagüxcèx rü yexma tüxü yapoxcuexücèx. ³ Natürü yexguma marü Damacuxü yangaicagu, rü ngürüächi meãma nüxü nabáxi ga wüxi ga omü ga poraxü ga daxüwa íbáxixü. ⁴ Rü ñaxtúanegu nayangu ga Chauru, rü nüxü naxĩnü ga wüxi ga naga ga nüxna çagüxü ga ñaxü: —Pa Chauru Pa Chaurux, ¿tüxcüü i chowe quingëchigüxü? —ñaxü. ⁵ Rü Chauru nanangāxü, rü ñanagürü: —¿Rü texé quixi, Pa Corix? —ñanagürü. Rü nüma ga Cori rü nanangāxü rü ñanagürü: —Choma nixi i Ngechuchu, rü chorü duüxügü nixi i ngēma nawe quingëchigüxü. ⁶ ¿Rü inachi, rü ngema Damacuarü ñānewa naxü! Rü ngema rü wüxi ya yatü tá cumaã nüxü nixu na tacü tá cuxüxü —ñanagürü. ⁷ Rü yema yatügü ga Chauruxü íxümücügüxü,

rü inayanguãëgü, yerü nüxü naxĩnüë ga yema ore natürü taxúexüma nadaugü. ⁸ Rü ñuxüchi inachi ga Chauru ga ñaxtüanewa ga íyanguxüwa, rü nidauchixetü, natürü taxuüma nadau yerü nixoxetü. Rü yemacèx ga namücügü, rü nachacüügu nayayauxãchi, rü yemaãcü Damacuwa nanagagü. ⁹ Rü tomaëxpüx ga ngunexügu, rü nangexetü, rü tama nachibü, rü tama naxaxe. ¹⁰ Rü Damacuwa nayexma ga wüxi ga yatü ga Ngechuchuaxü yaxõxü ga Ananíã ga naega. Rü Cori ya Ngechuchu naxcèx nangox, rü ñanagürü nüxü: —Pa Ananíãx —ñanagürü. Rü nüma ga Ananíã nanangãxü, rü ñanagürü: —¿Tacü? Pa Corix —ñanagürü. ¹¹⁻¹² Rü nüma ga Cori nanangãxü, rü ñanagürü: —¿Dücèx, ngëma ítamü i Meã i Wéxügu äegaxüwa naxü! ¿Rü ngema Yudapatawa naxcèx ínaca i wüxi i yatü i Tarsucüãx i Chaurugu äegaxü! Rü nüma rü ngema ínayumüxë rü nangoxetü rü marü cuxü nadau, Pa Ananíãx, na ngëxma cuxücuxü rü naxëtügu quingögüxü na wena yadauchixüçèx —ñanagürü ga Cori ga Tupana. ¹³ Rü yexguma yemaxü naxĩnügu ga Ananíã, rü ñanagürü: —Pa Corix, muxüma i duüxügu chomaã nüxü nixu i ngëma yatüchiga na ñuxre i chixexü naxüxü namaã i curü duüxügu i Yerucharéüwa. ¹⁴ Rü ñuxma rü paigüarü äëxgacügüarü mumaã núma naxü na ínayauxüãxüçèx i guxüma i duüxügu i cuégagu yumüxëgüxü —ñanagürü. ¹⁵ Natürü nüma ga Cori rü ñanagürü nüxü: —¿Ngëma naxü! Erü choma chanayaxu i ngëma yatü na choxü yaxuchigaxüçèx namaã i togü i nachiüñanecüãxgü i duüxügu rü norü äëxgacügü, rü ngema Iraécüãxgü. ¹⁶ Rü choma tá nüxü nüxü chadauxëë i ñuxre i ngüxü i tá yangexü i chauxcèx —ñanagürü ga Cori. ¹⁷ Rü guma ñpata ga Chauru nawa yexmanewa naxü ga Ananíã. Rü nagu naxücu, rü nüxü ningögü, rü ñanagürü nüxü: —Pa Chaueneë Pa Chaurux, nüma ya Cori ya Ngechuchu ga guma namawa cuxcèx ngócü ga yexguma núma cuxüxgu, rü núma choxü namu na wenaxãrü quidauchixüçèx, rü cuxna nanguxüçèx i Naãë i Üünexü —ñanagürü. ¹⁸ Rü yexgumatama rü ñoma tacüchicutëxerüü naxëtüwa ínayi, rü yexguma wenaxãrü meã nidauchixetü. Rü yexguma inachi ga Chauru, rü Ananíã ínanabaixëë. ¹⁹ Rü yemawena nachibü, rü wenaxãrü napora. Rü ñuxre ga ngunexügu yexma Damacugu narüxãüx namaã ga yema yaxögüxü ga yexma ächiügüxü.

Chauru rü Damacuwa nüxü nixu ga Ngechuchuchiga

²⁰ Rü yexguma inanaxügü ga Chauru ga ngutaquëxepataügüwa nüxü na yaxuchigaxü na Ngechuchu yüxü ya Tupana Nane. ²¹ Rü guxüma ga yema nüxü ñnüëxü rü poraãcü nabaixãchiãëgü, rü ñanagürügü: —¿Tama ëxna ñãã yatü yüxü ga Yerucharéüwa íyayauxügüxü ga guxüma ga duüxügu ga Ngechuchuaxü yaxögüxü? ¿Rü tama ëxna ñããtama yüxü ga yema núma üxü na ínayauxüãxüçèx rü ñuxüchi paigüarü äëxgacüxütawa nagagüãxüçèx i duüxügu i yaxögüxü? —ñanagürügü. ²² Natürü ga Chauru rü guxü ga ngunexügu yexeraãcü tama namuüãcüma nüxü nixuchigaama ga ore ga Ngechuchuchiga. Rü inayanangeëxgüxëë ga Yudügu ga Damacuwa yexmagüxü, yerü meãma nanangoxëë na Cristu yüxü ga Ngechuchu.

Chauru rü Yudügu- chaxwa niña

²³ Rü marü muxüma ga ngunexügu ngupetüguwena rü yema Yudügu rü wüxigu nügümaã nagu narüxĩnüë na Chauruxü yamëxgüxüçèx. ²⁴ Natürü nüma ga Chauru rü nüxü nacuáchiga ga na yamëxgüchaüãxü. Rü yema Yudügu rü ngunecü rü chütacü rü guma ñãneärü poxeguxüärü ñãxgügu Chauruxü nanëixgüxü na yamëxgüãxüçèx. ²⁵ Natürü ga Chauruarü ngüexügu rü chütacü rü wüxi ga pexchi ga tacügu guma ñãneärü poxeguxütapüxëtüwa ínanachüxüetaügüama, rü yemaãcü niña ga Chauru.

Yerucharéüwa nayexma ga Chauru

²⁶ Rü yexguma Yerucharéüwa nanguxgu ga Chauru, rü yema yaxögüxümaã nangutaquëxechaü. Natürü yema yaxögüxü rü nüxü namuüë, yerü nüma nüxü nacuëxgügu rü tama aixcüma Ngechuchuaxü nayaxö. ²⁷ Natürü Bernabé rü yema ngúexügü ga Ngechuchu imugüxütanüwa nanagaama. Rü yema ngúexügümaã nüxü nixu ga ñuxäcü Cori ya Ngechuchuxü na nadauxü ga Chauru ga namawa, rü ñuxäcü Cori namaã na idexaxü. Rü nüxü nixu ta ga ñuxäcü Damacuwa rü tama namuüäcüma nüxü na yaxuxü ga Ngechuchuchiga. ²⁸ Rü yemaäcü ga Chauru rü Yerucharéügu narüxäüx. Rü yema ngúexügü ga Tupana imugüxütanügu naxä. Rü tama namuüäcüma Cori ya Ngechuchuchigaxü nixuchigü. ²⁹ Rü yema Yudíugü ga Griégugawa idexagüxümaã nidexaxü ga Chauru, rü Ngechuchuchigagu nügümaã nayaporagaexü. Natürü ga nümagü rü naxcèx nadaugüama ga ñuxäcü tá na yamëxgüäxü. ³⁰ Rü yexguma nüxü yacuëxächitanügu ga yema togü ga yaxögüxü, rü Checharéawa Chauruxü nagagü. Rü yexguma yéma nangugügu rü wüxi ga wapurugu nayamuëgü rü Tarsuwa naxü. ³¹ Rü yexguma rü meãma nüxü naxüpetü ga yema yaxögüxü ga guxüma ga Yudéaanewa, rü Gariréaanewa rü Chamáriaanewa. Rü yexeraäcü meã nayaxögüetanü rü aixcüma Tupana naxwëxexüäcüma meã namaxë. Rü Tupanaã i Üünexüärü ngüxëëmaã nimuëtanüãma ga yema yaxögüxü.

Eneã rü narüme

³² Rü yexguma Pedru yema yaxögüxütanügu ixüägüchigüxgu, rü yema Didágu ächiügüxü ga yaxögüxütanüwa rü ta nangu. ³³ Rü yexma nüxü nayan-gau ga wüxi ga yatü ga Eneã ga naega ga 8 ga taunecü norü pechicagu cacü, yerü nanawäixächi. ³⁴ Rü Pedru ñanagürü nüxü: —Pa Eneãx, Ngechuchu ya Cristu cuxü narümeëë. ¡Inachi rü namexëë i cuxchapenüxü! —ñanagürü. Rü yexgumatama inachi. ³⁵ Rü guxüma ga yema Didáçüäxgü rü Charunacüäxgü rü nüxü nadaugü ga na inachixü ga guma yatü, rü nüxü narüxoe ga nacümagü ga chixexü, rü Cori ya Ngechuchuwe narüxü.

Wena imaxü ga Dorca

³⁶ Rü yexgumaücüü ga ñäne ga Yopewa rü iyexma ga wüxi ga Tupanaãxü yaxöxcü ga ngecü ga Tabita ga ngíega. Rü ngëma naega i Griégugawa rü Dorca ñaxüchiga nixü. Rü ngíma rü wüxi ga mecü iyixü ga ngírü üwa, rü guxügüma nüxü irüngüxëë ga yema duüxügü ga tacü nüxü taxuxü. ³⁷ Rü yexgumaücüü iyadaawe ga Dorca, rü iyu, rü ngímücügü nanamexëë ga ngíxíne. Rü ípataarü daxüchiüwa yexmaxü ga ucapugu nanaxügü ga ngíxíne. ³⁸ Rü Yopearü ngaicamana nayexma ga guma ñäne ga Didá ga Pedru nawa yexmane. Rü yema yaxögüxü ga Yopecüäx rü nüxü nacuëxgü ga Didáwa na nayexmaxü ga Pedru. Rü naxcèx yéma nanamugü ga taxre ga yatü ñaxümaã: —¡Rü paxa toxcèx nuã naxü! —ñaxümaã. ³⁹ Rü yexguma ga Pedru rü nawa narüxü. Rü yexguma ínanguxgu, rü yema ucapu ga yema yueta nawa yexmaxüwa nanagagü. Rü guxüma ga yutegüxü rü Pedruxü ínachomaëguächi, rü naxauxe, rü nüxü nayawégü ga yema naxchirugü ga Tabita nüxü íxüxüxü ga yexguma namaüxgu. ⁴⁰ Rü Pedru rü düxëtüwa nanamugü ga guxüma. Rü inacaxäpüxü, rü nayumüxë. Rü ñuxüchi ngíxcèx nadauegu ga yema yuxcü, rü ñanagürü: —Pa Tabitax, ¡Írüda! —ñanagürü. Rü yexguma rü iyadauchixetü, rü Pedruxü idau, rü írüto. ⁴¹ Rü yexguma ngíxmëxgu nayayauxächi, rü ngíxü inachixëë. Rü ñuxüchi naxcèx naca ga yema yaxögüxü rü yema yutegüxü, rü maxüxcü nüxü ngíxü nawëx. ⁴² Rü guxüma ga yema duüxügü ga Yopewa yexmagüxü rü nüxü nacuächigagü ga yema. Rü Cori ga Ngechuchuaxü

nayaxōgü ga muxūma. ⁴³ Rū muxūma ga ngunexū Yopegu narūxāūx ga Pedru napatagu ga Chimáū ga naxchèxmüârū paxēewa puracūxū.

10

Pedru rü Cornériuchiga

¹ Rū iāne ga Checharéawa nayexma ga wūxi ga yatü ga Cornériugu āegacü. Rū 100 ga Itáriaanecūāx ga churaragüarü capitáū nixī. ² Rū nüma nixī ga wūxi ga yatü ga meāma Tupanaāxū yaxōcū. Rū wūxigu namèxmaā rü naxācügümaā Tupanaxū nangechaügü. Rū mucüma ga norü dīerumaā nüxū narüngūxēē ga duūxügü ga Yudíugü ga tacü nüxū taxuxū. Rū guxügüma nayumüxē rü Tupanamaā nidexa. ³ Rū wūxi ga ngunexū ga yexguma tomaēxpüxarü orawa nanguxchaūgu ga yáuanecü, rü nangoxetü. Rū meāma nüxū nadau ga wūxi ga Tupanaārü orearü ngeruū ga daxūcūāx ga yema ucapu ga nawa nayexmaxūgu ücuxū. Rū ñanagürü nüxū: —Pa Cornériux —ñanagürü. ⁴ Natürü nüma ga Cornériu rü meāma nüxū nadawenü, rü poraācü namuūācūma nüxna naca, rü ñanagürü: —¿Tacü cunaxwèxe, Pa Corix? —ñanagürü. Rū nanangāxū ga yema orearü ngeruū ga daxūcūāx, rü ñanagürü: —Curü yumüxēgü rü Tupana marü cuxū nüxū naxīnū, rü cumaā nataāē na ñuxācü nüxū curüngūxēēxū i duūxügü i tacü nüxū taxuxū. ⁵ —¡Rü chanaxwèxe i Yopewa cunamugü i ñuxre i yatügü na naxcèx yacagüxūcèx i wūxi i yatü i Chimáū i Pedrugu āegaxū! ⁶ —Rü to i Chimáū i naxchèxmüârü paxēewa puracūxūpatawa nangēxma rü ngēxma nape. Rū yima napata rü taxtū i taxūcutüwa nangēxma —ñanagürü. ⁷ Rū yexguma nüxna iyanatauxgu ga yema orearü ngeruū ga namaā yéma idexaxū, rü Cornériu rü naxcèx naca ga taxre ga norü puracütanūxū rü wūxi ga churara ga meā naga īnūxū ga meā Tupanaāxū yaxōxū. ⁸ Rū namaā nüxū nixu ga guxūma ga yema nüxū nadauxū, rü ñuxūchi Yopewa nanamugü. ⁹ Rū moxūācü ga yexguma namagu naxīyane rü marü Yopexū yangaicagügu ga yema duūxügü ga Cornériu yéma mugüxū, rü Pedru rü daxū naxī ga īpataétüwa na yéma nayumüxēxūcèx. Rū tocuchiarü oragu nixī ga yexguma. ¹⁰ Rū nataiya, rü nüxū nachixéga ga na nachibüxū. Rū yexguma norü ōna ínaxügüyane, rü nangoxetü ga Pedru. ¹¹ Rū nüxū nadau ga na yangoxnaxū ga naānetüwe, rü yéma ínarūxī ga wūxi ga naxchiru ga ñoma wūxi ga taxū ga naxchāpenüürü īxīxū. Rū norü āgümücüpēxewa naxātūxū rü yemaācü ínarūchūxūe ñuxmata ñaxtūanewa nangu. ¹² Rū yemagu ínarūchūxūewetaxū ga nagūxūraūxū ga naēxūgü, rü āxtapegü, rü werigü. Rū yema naxchāpenüüwa nayexma ta ga tacü ga tama nangōxgūxū ga Yudíugü. ¹³ Rū Pedru nüxū naxīnū ga Tupanaga ga nüxū ñaxū: —Pa Pedrux ¡Inachi, rü ta imèx, rü nangōx! —ñaxū. ¹⁴ Rū Pedru nanangāxū rü ñanagürü: —Taxucürüwa nixī, Pa Corix, erü taguma chanangōx i tacü i toxcèx āūāchixū —ñanagürü. ¹⁵ Rū yexguma ga yema Tupanaga, rü wenaxārü ñanagürü: —Ngēma choma chamexēēxū rü tama name i āūāchi nüxū cuwogü —ñanagürü. ¹⁶ Rū tomaēxpüxcüna yemaācü nangupetü. Rū yexguma wenaxārü daxū nachūxnagü ga yema naxchāpenüū namaā ga guxūma ga nawa yexmagüxū. ¹⁷ Rū poraācü nagu narūxīnū ga Pedru ga tacūchiga na yīxū ga yema nüxū nadauxū ga yexguma nangoxetügu. Rū yemagu ínaxīnūyane, rü guma īpataēxwa nangugü ga yema yatügü ga Cornériu yéma mugüxū ga naxcèx ícaetanūxū ga Chimáūpata. ¹⁸ Rū yéma naxcèx ínacagü rü aixcūma yexma nape ga wūxi ga yatü ga Chimáū ga Pedrugu āegaxū. ¹⁹ Rū Pedru nagu írūxīnūyane ga yema nüxū nadauxū ga yexguma nangoxetügu, rü Tupanaāē i Üünexū rü ñanagürü nüxū: —Ngēāgü nixī i tomaēxpüx i yatügü i cuxcèx daugüxū. ²⁰ —¡Inachi, rü írūxī, rü tama cux- oegaāēācūma nawe ruxū! Erü choma nixī i núma chanamugüxū —ñanagürü.

21 Rū yexguma naxcèx ínarüxĩ ga Pedru, rü ñanagürü nüxũ ga yema yatügü: —Choma nixĩ i chauxcèx pedaugüxũ. ¿Rü ñacüwa nuã pexĩ? —ñanagürü.
 22 Rū nümagü nanangãxügü, rü ñanagürügü: —Capitáũ ya Cornériuxütawa ne taxĩ rü nüma nixĩ i nuã toxũ namugüxũ. Rū wüxi ya yatü ya mecü nixĩ, rü Tupanaxũ nangechaũ. Rū guxũma i Yudíugü nüxũ nangechaũ i nümax. Rū wüxi ga Tupanaãrü orearü ngeruũ ga daxũcũãx nanamu na cuxcèx toxũ yacaxẽxücèx ga Cornériu rü napatawa cuxũxücèx rü nüxũ na naxĩnũxücèx i curü ore —ñanagürügü. 23 Rū yexguma nanachocuxẽ ga Pedru, rü yexma nanapegüxẽ ga yema chütaxügu. Rū moxũãcü inaxĩãchi rü nawe narüxũ ga Pedru. Rū ínayaxümücügü ga ñuxre ga Yopecũãx ga yaxögüxũ. 24 Rū moxũãcü Checharéawa nangugü ga ngextá Cornériu ínanguxẽxũwa namaã ga guxũma ga natanüxügü rü namücügü ga nüxũ nangechaũgüxũ ga nüxna naxuxũ. 25 Rū yexguma Cornériupatawa nanguxgu ga Pedru, rü ñãxtüwa naxcèx naxũ ga Cornériu, rü Pedrupéxegu nayacaxãpüxü, rü nüxũ nicuèxüũ.
 26 Natürü ga Pedru rü inanachixẽ rü ñanagürü: —¡Inachi! Rū choma rü ta cuxrüũ duũxũmare chixĩ rü tama Tupana chixĩ —ñanagürü. 27 Rū nügümaã yadexagüãcüma wüxigu nichocu. Rū Pedru yéma namaã inayarüxũ ga muxũma ga duũxügü ga yexma ngutaquéxegüxũ. 28 Rū yexguma ga Pedru rü ñanagürü nüxũ ga yema duũxügü ga yexma ngutaquéxegüxũ: —Pema nüxũ pecuèx i toma i Yudíugücèx rü nangèxma i torü mugü i toxna nachuxuxũ na pemaã tangutaquéxegüxũ, rü pepatagu na tachocuxũ. Natürü Tupana choxũ nangoxetüxẽ rü choxũ nüxũ nadauxẽ na tama namexũ na ngẽmaãcü nagu na charüxĩnũxũ pemaã. 29 Rū ngẽmacèx tama chaxoõcüma núma chaxũ i ngẽxguma chauxcèx pengemagu. Rū ñuxma rü chanaxwèxe i chomaã nüxũ pixu na ñacücèx chauxcèx pengemaxũ —ñanagürü. 30 Rū Cornériu nanangãxũ, rü ñanagürü: —Marü ãgümücü i ngunexũ nangupetü ga ñúxgumaãcü ga tomaẽxpüxarü oragu ga yáuanecü, rü nuã chopatawa chayumüxẽ erü guxüguma ngẽmaãcü chanaxü. Rū yexguma chayumüxẽgu rü changoxetü, rü chauxcèx nangox ga wüxi ga yatü ga iyaurachirucüxũ.
 31 —Rü ñanagürü choxũ:

“Pa Cornériux, Tupana marü nüxũ naxĩnü i curü yumüxẽ rü cumaã nataã na ñuxãcü nüxũ curüngüxẽxũ i duũxügü i ñacü nüxũ taxuxũ. 32 —¡Rü Yopewa namugü i ñuxre i yatügü na naxcèx yacagüxücèx i Chimáũ i Pedrugu ãgaxũ! Rū to i Chimáũ i naxchèxmüãrü paxẽewa puracüxũpatagu pexũ. Rū yima napata rü taxtũ i taxücutüwa nangèxma”, ñanagürü choxũ. 33 Rū yemacèx rü yexgumatama paxa cuxcèx yéma chanamugü, rü cuma rü mexũ toxcèx cuxũ erü núma cuxũ. Rū ñuxma i guxãma i toma rü Tupanapéxewa tangèxmagü. Rū nüxũ taxĩnũchaũ i gux-ũma i ngẽma ore i Cori namaã núma cuxũ muxũ na tomaã nüxũ quixuxücèx —ñanagürü ga Cornériu.

Pedru rü Cornériupatawa nüxũ nixu ga Ngechuchuchiga

34 Rū yexguma inanaxügü ga Pedru ga na yadexaxũ, rü ñanagürü: —Ñuxma waxi nixĩ i nüxũ chacuáxũ na Tupanacèx nawüxiguxũ i guxũma i duũxügü erü nüma rü aixcüma guxãxũma nangechaũ. 35 —Rü nüma rü wüxichigü i nachiũñanewa nanade i ngẽma duũxügü i nüxũ ngechaũgüxũ rü mexũ ügüxũ. 36 —Rü nüma ga Tupana rü Yudíugütanüwaxĩra nanamu ga norü ore rü marü nüxũ nixu na tüxũ nüxũ nangechaũxũ i tórü pecadugü i ngẽxguma Cristu ya guxããrü Cori ixĩcüaxũ yaxögügu. 37 —Pema rü meãma nüxũ pecuèx na ñacü ngupetüxũ ga guxũwama ga Yudíugüarü naãnewa. Rū noxri ga Cuáũ rü nüxũ nixu na Tupana naxwèxexũ na ínabaiũxũ ga duũxügü. Rū yemawena ga Ngechuchu rü Gariréaanewa inanaxügü ga duũxügümaã

nūxŭ na yaxuxŭ ga ore i mexŭ. ³⁸—Rŭ pema nūxŭ pecuèx ga ñuxăcŭ Tupana na naporaxêxŭ ga Ngechuchu ya Nacharétucŭâx yerŭ nūxna nanaxă ga Naăe i Ūünexŭ. Rŭ nŭma ga Ngechuchu rŭ mexŭ naxŭ ga yema íyaxŭgŭxŭwa, rŭ nanameêxêe ga guxŭma ga yema duŭxŭgŭ ga ngoxoâxgŭxŭ. Rŭ yemaăcŭ nanaxŭ yerŭ Tupana nūxŭ narŭngŭxêe. ³⁹—Rŭ toma nixŭ ga nūxŭ tadaugŭxŭ rŭ nūxŭ tixuchigaxŭ i guxŭma ga naxŭxŭ ga Ngechuchu ga Yudéaanewa rŭ Yerucharéŭârŭ îănewa. Rŭ yemawena rŭ nayamèxgŭ rŭ curuchawa nayapotagŭ. ⁴⁰—Natŭrŭ ga Tupana rŭ tomaêxpŭx ga ngunexŭ ngupetŭgu rŭ wena nanamaxêe rŭ toxçèx nanangoxêe. ⁴¹—Natŭrŭ tama guxŭ ga duŭxŭgŭcèx nangox. Rŭ toxçèxicatama nangox ga toma ga ũpamama Tupana toxŭ dexe na nūxŭ tixuxŭcèx i Ngechuchuchiga. Rŭ yexguma marŭ yuwa ínadaxguwena rŭ namaă tachibŭe rŭ namaă taxaxegŭ. ⁴²—Rŭ nŭmatama ga Ngechuchu toxŭ nimugŭ na duŭxŭgŭmaă nūxŭ tixuxŭcèx na Tupana marŭ âêxgacŭxŭ yangucuchixêe xŭ na guxŭ i duŭxŭgŭarŭ ngugŭruŭ na yŭxŭcèx. Rŭ nŭma ya Ngechuchu nixŭ i tŭrŭ maxŭxŭ nangugŭxŭ, rŭ nŭma tá nixŭ i guxŭ i duŭxŭgŭ i maxêxŭ rŭ yuexŭxŭ yacagŭxŭ naxçèx i norŭ maxŭchiga. ⁴³—Rŭ ũpamamatama guxŭma ga Tupanaârŭ orearŭ uruŭgŭ rŭ Ngechuchuchiga nidexagŭ, rŭ ñanagŭrŭgŭ:

“Rŭ nŭma tá nūxŭ nūxŭ nangechaŭ i norŭ pecadugŭ i guxŭma i duŭxŭgŭ i nūxŭ yaxŭgŭxŭ”,
ñanagŭrŭgŭ.

Tupanaăe i Ūünexŭ rŭ yema duŭxŭgŭ ga tama Yudŭgŭ íxŭgŭxŭtanŭwa nangu

⁴⁴ Rŭ yexguma íyadexayane ga Pedru, rŭ Tupanaăe i Ūünexŭ nūxna nangu ga guxŭma ga yema yéma irŭxŭnŭêxŭ ga yema ore. ⁴⁵ Rŭ yema yaxŭgŭxŭ ga Yudŭgŭ ga Pedrumaă yéma îxŭ, rŭ poraăcŭ nabaixăchiăégŭ yerŭ Tupanaăe i Ūünexŭ rŭ nūxna rŭ ta nangu ga yema duŭxŭgŭ ga tama Yudŭgŭ íxŭgŭxŭ. ⁴⁶ Rŭ nūxŭ naxŭnŭe ga to ga nagawachigŭ na yadexagŭxŭ, rŭ Tupanaxŭ na yacuèxŭgŭxŭ. ⁴⁷ Rŭ yexguma ga Pedru rŭ ñanagŭrŭ: —¿Éxna nangêxmaxŭ i texé na nūxna nachuxuxŭ i na ínabaiŭxŭ i ñaă duŭxŭgŭ i marŭ taxrŭŭ Tupanaăe i Ūünexŭ nūxna nguxŭ? —ñanagŭrŭ. ⁴⁸ Rŭ nanamu na Ngechuchu ya Cristuégagu na ínabaiŭxŭ ga yema duŭxŭgŭ ga yexwaca yaxŭgŭxŭ. Rŭ yexguma Pedruxŭ nacèèxŭgŭ na yexma naxăxŭcèx ga ñuxre ga ngunexŭ.

11

Pedru rŭ Yerucharéŭwa yexmagŭxŭ ga yaxŭgŭxŭmaă nūxŭ nixu ga tacŭ na ngupetŭxŭ ga Checharéawa

¹ Rŭ yema ngŭexŭgŭ ga Ngechuchu imugŭxŭ rŭ yema yaxŭgŭxŭ ga Yudéagugŭxŭ, rŭ nūxŭ nacuáchigagŭ na yema tama Yudŭgŭ íxŭgŭxŭ rŭ ta nayauxgŭăxŭ ga Tupanaârŭ ore. ² Natŭrŭ yexguma Yerucharéŭwa nanguxgu ga Pedru, rŭ ñuxre ga Yudŭgŭ ga yaxŭgŭxŭ rŭ Pedruxŭ nixugŭe. ³ Rŭ ñanagŭrŭgŭ: —¿Rŭ tŭxcŭŭ natanŭwa cuxŭ i ngêma tama Yudŭgŭ íxŭgŭxŭ, rŭ namaă cuchibŭ? —ñanagŭrŭgŭ. ⁴ Rŭ Pedru meăma namaă nūxŭ nixu ga guxŭma ga tacŭ na ngupetŭxŭ, rŭ ñanagŭrŭ nūxŭ: ⁵ —Choma rŭ Yopearŭ îănewa chayexma, rŭ yexguma íchayumŭxêyane, rŭ changoxetŭ. Rŭ nūxŭ chadau ga wŭxi ga naxçápenŭŭrŭŭ íxŭxŭ ga norŭ âgŭmŭcŭpêxewa âtŭxŭxŭ ga írŭçhŭxŭxŭ ñuxmata chauxŭtawa nguxŭ. ⁶—Rŭ meăma nūxŭ chadawenŭ na nūxŭ chadauxŭcèx na tacŭ yexmaxŭ ga aixepewa. Rŭ nūxŭ chadau ga naxŭnagŭ ga íxăgŭmŭcŭparaxŭ rŭ naêxŭgŭ ga idŭraexŭ, rŭ âxtapegŭ rŭ werigŭ. Rŭ yema naxçápenŭŭwa nayexma ta ga tacŭ ga tama

ingõxũ, erũ taxcèx i yixema i Yudiugũ rũ naxãũãchi. ⁷—Rũ nüxũ chaxĩnũ ta ga Tupanaga ga choxũ ñaxũ:

“¡Inachi! Pa Pedrux. ¡Rũ ta imèx, rũ nangõx!” ñaxũ. ⁸—Natürũ choma chanangãxũ, rũ ñacharügũ:

“Taxucürüwa nixĩ, Pa Corix, erũ taguma chanangõx i tacũ i toxcèx ãũãchixũ”, ñacharügũ. ⁹—Rũ yexguma wenaxãrũ ñanagürũ choxũ ga yema Tupanaga ga daxũwa inaxũxũ:

“Ngẽma choma i Tupana chamexẽẽxũ, rũ tama name i ãũãchi nüxũ cuwogũ”, ñanagürũ. ¹⁰—Rũ tomaẽxpüxcüna yemaãcũ nangupetũ, rũ yexguma wenaxãrũ daxũ nachüxnagũ ga yema naxchápenũũ namaã ga guxũma ga nawa yexmagũxũ. ¹¹—Rũ yexgumatama guma ñ ga nawa chayexmanewa nangugũ ga tomaẽxpüx ga yatügũ ga Checharéawa ne mugũxũ ga chauxcèx daugũxũ. ¹²—Rũ Tupanaãe i Üünexũ choxũ namu na nawe charũxũxücèx woo tama Yudiugũ na yixĩgũxũ ga yema duũxügũ. Rũ chomaã ta yéma naxĩ ga ñaã 6 ga yaxõgũxũ. Rũ napatawa tangugũ ga guma yatũ ga Cornériu, rũ yexma tachocu. ¹³—Rũ tomaã nüxũ nixu ga ñuxãcü na napatawa nüxũ nadauxũ ga Tupanaãrũ orearũ ngeruũ ga daxũcũãx ga yexma chixũ ga ñaxũ nüxũ:

“¡Yopewa namugũ i yatügũ na naxcèx yacagũxücèx i Chimáũ i Pedrugu ãegaxũ! ¹⁴—Rũ nüma tá cumaã nüxũ nixu na ñuxãcü tá cuma rũ guxũ i cupatagugũxũmaã penayaxuxũ i perũ maxũ i taguma gúxũ”, ñanagürũ nüxũ. ¹⁵—Rũ yexguma ichanaxügũgu ga na chidexaxũ, rũ nüxna nangu ga Tupanaãe i Üünexũ, yexgumarũũ ga noxri tüxna nanguxgurũũ. ¹⁶—Rũ yexguma ga choma rũ nüxna chacuèxãchi ga Cori ya Ngechucharũ ore ga yexguma ñaxgu:

“Rũ aixcüma nixĩ ga Cuáũ ga dexáwamare ínabaiũxẽẽãxũ, natürũ i pema rũ Tupanaãe i Üünexũ tá pexna nangu”, ñaxgu. ¹⁷—Rũ pema nüxũ pecuèx na ñuxãcü Tupana tüxna nanguxẽẽxũ ga Naãe i Üünexũ i yixema na Cori ya Ngechuchu ya Cristuaxũ yaxõgũxũ. Rũ ñuxma na taxrũũ Tupana yema duũxügũna nanguxẽẽxũ ga Naãe i Üünexũ, ¿rũ ñuxücürüwa i choma i nüxũ chaxoxũ na naga chaxĩnũxũ ya Tupana? —ñanagürũ ga Pedru. ¹⁸ Rũ yexguma yema orexũ naxĩnũẽgu ga yema yaxõgũxũ ga Yerucharéucũãx, rũ nachianegũmare. Rũ Tupanaxũ nicuèxüũgũ. Rũ ñanagürügũ: —Rũ ngẽmawa nüxũ tacuèx na Tupana tüxũ dexũ ya yixema woo tama Yudiugũ ixĩgũxe. Rũ ngẽxguma nüxũ tarüxoegu i tümaãrũ chixexũ rũ Tupanacèx tadaugũgu, rũ nüma tüxna nanaxã i maxũ i taguma gúxũ —ñanagürügũ.

Yaxõgũxũ ga Aũtioquíawa yexmagũxũchiga

¹⁹ Rũ yexguma Etébaũxũ yamèxgũguwena, rũ norũ uwanügũ poraãcü nawe ningẽxũtanũ ga yema yaxõgũxũ. Rũ yemacèx nügũ nawoone. Rũ Peníchiawa, rũ Chiprewa rũ Aũtioquíawa nabuxmũ. Rũ yéma nüxũ nixugũe ga ore ga mexũ ga Ngechuchuchiga. Natürũ Yudiugũmaãxĩcatama nüxũ nixugũe ga yema ore rũ tama ga togũmaã. ²⁰ Natürũ yéma Aũtioquíawa nangugũ ta ga ñuxre ga togũ ga yaxõgũxũ ga Chíperecũãx, rũ Chirenecũãx. Rũ nümagũ rũ yema tama Yudiugũ ixĩgũxũmaã rũ ta nüxũ nixugũe ga ore i mexũ i Cori ya Ngechuchuchiga. ²¹ Rũ Tupana nüxũ narüngũxẽẽ, rũ nanaporaexẽẽ. Rũ yemacèx muxũma ga yema duũxügũ rũ nüxũ narüxoe ga nuxcümaũxũ ga nacümagũ, rũ Cori ya Ngechuchuaxũ nayaxõgũ. ²² Rũ yexguma yemaxũ nacuáchigagũgu ga yema yaxõgũxũ ga Yerucharéũwa yexmagũxũ, rũ Aũtioquíawa nanamugũ ga Bernabé. ²³ Rũ yexguma yéma nanguxgu ga Bernabé, rũ nüxũ nadau ga ñuxãcü Tupana nüxũ na rüngũxẽẽxũ

ga yema yaxōgūxŭ ga Aŭtioquíacŭāx, rŭ poraācŭ namaā nataāē. Rŭ nayaxucuxēgŭ ga guxŭma na meāma Cori ya Ngechuchuwe naxīāmaxŭcèx, rŭ taguma nŭxŭ naxoexŭcèx. ²⁴ Yerŭ nŭma ga Bernabé rŭ wŭxi ga yatŭ ga mecŭ nixī. Rŭ aixcŭma Tupanaāē i Ūñexŭ rŭ nawa nayexma, rŭ naporā ga norŭ ōwa. Rŭ yemacèx muxŭchixŭma ga duŭxŭgŭ rŭ Cori ya Ngechuchucèx naxī rŭ nŭxŭ nayaxōgŭ. ²⁵ Rŭ yemawena ga Bernabé rŭ Tarsuwa naxŭ na Chaurucèx yadauxŭcèx. ²⁶ Rŭ yexguma nŭxŭ iyangauxgu, rŭ Aŭtioquíawa nanaga. Rŭ wŭxi ga tauncŭ wŭxiwa yéma nayexmagŭ namaā ga yema yaxōgūxŭ. Rŭ nanangŭexēē ga muxŭchixŭma ga duŭxŭgŭ. Rŭ Aŭtioquíawa nixī ga inaxŭgŭxŭ ga duŭxŭgŭ na Cristutanŭxŭmaā na naxugŭāxŭ ga yema yaxōgūxŭ. ²⁷ Rŭ yexgumaŭcŭŭ Yerucharéŭwa ne naxī ga ñuxre ga Tupanaārŭ orearŭ uruŭgŭ rŭ Aŭtioquíawa naxī. ²⁸ Rŭ natanŭwa nayexma ga wŭxi ga orearŭ uruŭ ga Agabu ga naega. Rŭ nanangutaquēxexēē ga yema yaxōgūxŭ ga Aŭtioquíawa yexmagŭxŭ. Rŭ yema ngutaquēxewa rŭ inachi ga Agabu rŭ Tupanaāē i Ūñexŭ nanamu ga na yadexaxŭ, rŭ ñanagŭrŭ: —Wŭxi i taiya i taxŭ tá ínangu i guxŭ i ñā nachiŭñānewa —ñanagŭrŭ. Rŭ aixcŭma ínangu ga yema taiya ga yexguma Cádiu āēxgacŭ ixīxgu. ²⁹ Rŭ yexguma ga yema yaxōgūxŭ ga Aŭtioquíawa yexmagŭxŭ, rŭ marŭ wŭxigu nagu narŭxŭnŭē na yéma ngŭxŭ namugŭxŭcèx ga dŭēru na nŭxŭ nangŭxēēgŭxŭcèx ga yema yaxōgūxŭ ga Yudéaanegu āchiŭgŭxŭ. Rŭ wŭxichigŭ ngŭxŭ inaxā ga dŭēru yexgumarŭŭ ga ñuxre ga nŭxŭ yexmacŭ. ³⁰ Rŭ yemaācŭ nanaxŭgŭ, rŭ Bernabé rŭ Chaurumaā yéma ngŭxŭ namugŭ ga yema dŭēru naxcèx ga yema yaxōgūxŭārŭ āēxgacŭgŭ ga Yudéaanewa yexmagŭxŭ.

12

Āēxgacŭ ga Erode rŭ Chaŭtiáguxŭ nimèx rŭ Pedruxŭ napoxcu

¹ Rŭ yexgumaŭcŭŭ inanaxŭgŭ ga āēxgacŭ ga Erode ga na ínayauxŭāxŭ ga ñuxre ga yaxōgūxŭ ga Yerucharéŭcŭāx na napoxcuxŭcèx. ² Rŭ norŭ churaragŭxŭ namu na taramaā Chaŭtiágu ga Cuáŭēnēxŭ yamèxgŭxŭcèx. ³ Rŭ yexguma nŭxŭ nadèuxgu ga Erode ga norŭ me na yīxŭ ga Yudíugŭ ga yema na naxŭxŭ, rŭ norŭ churaragŭxŭ namu na Pedruxŭ rŭ ta yayauxgŭxŭcèx. Rŭ yema nangupetŭ ga Yudíugŭarŭ peta ga Ūpetŭchigagu ga yexguma pāŭ ga ngearŭ puxēēruŭāxŭ nangōxgŭgu. ⁴ Rŭ yexguma Pedruxŭ yayauxgŭgu, rŭ poxcupataŭgu nayatèxcuchi. Rŭ ñuxŭchi ga Erode rŭ nanamu ga āgŭmŭcŭtŭcumŭ ga norŭ churaragŭ na nŭxna nadaugŭxŭcèx. Rŭ wŭxitŭcumŭwachigŭ rŭ nayexma ga āgŭmŭcŭ ga churaragŭ. Rŭ yemaācŭ nanaxŭ ga Erode, yerŭ nagu narŭxŭnŭ ga yema petawena guxŭ ga duŭxŭgŭpēxewa na nagaāxŭcèx na yamèxgŭāxŭcèx. ⁵ Rŭ yemaācŭ ga Pedru rŭ poxcupataŭwa nayexma rŭ churaragŭ rŭ meāma nŭxna nadaugŭ. Natŭrŭ ga yema yaxōgūxŭ ga Yerucharéŭcŭāx rŭ poraācŭ nayumŭxēgŭ, rŭ Tupanana naxcèx nacagŭ.

Tupana rŭ Pedruxŭ ínanguxuchixēē ga poxcupataŭwa

⁶ Rŭ yematama ga chŭtaxŭgu naxŭpa ga yema ngunexŭ ga Erode duŭxŭgŭpēxewa nagaxchaŭxŭ, rŭ taxre ga churaragŭarŭ ngāxŭwa nape ga Pedru. Rŭ taxre ga cadenamaā ninèixgŭchacŭŭ. Rŭ togŭ ga churaragŭ ga dauxŭtaexŭ nŭxna nadaugŭ ga poxcupataŭārŭ īāx. ⁷ Rŭ ngŭrŭāchi yema poxcupataŭwa nangōx ga wŭxi ga orearŭ ngeruŭ ga daxŭcŭāx ga Coriarŭ. Rŭ poraācŭ nangóone ga guma poxcupataŭwa. Rŭ yema orearŭ ngeruŭ Pedruxŭ nacuxagŭ, rŭ nanabaixāchixēē. Rŭ ñanagŭrŭ: —¡Paxama írŭda! —ñanagŭrŭ. Rŭ yexgumatama íniewēgŭ ga guma cadena ga Pedru namaā

inèixgüchacüücü. ⁸ Rū Pedruxū ñanagürü ga yema orearü ngeruū: —¡Rū icuxcuchichiru rü nacuaixcu i curü chapatu! —ñanagürü. Rū yemaäcü nanaxü ga Pedru. Rū ñanagürü ta: —¡Rū icuxcuchi i curü gáuxüchiru, rü chowe rüxū! —ñanagürü. ⁹ Rū nawe narüxū ga Pedru. Rū tama nüxū nacuèx ga aixcüma na yīxū ga yema orearü ngeruū namaã üxū. Rū naxcèx rü nangoxetümare. ¹⁰ Rū nüxū nachopetü ga nüxīraüxū ga dauxūtaexū, rü ñuxūchi ga yema to ga dauxūtaexū. Rū yexguma nawa nangugügu ga yema ñax ga áchumenèxānaxcèx ga ítamūwaama üxū, rü nüèchama niwāxna. Rū ínachoxū. Rū yexguma marü wüxi ga ítamū inaxīxgu, rü nüxna inayarütaxu ga yema orearü ngeruū. ¹¹ Rū yexguma nüxū nicuèxāchi ga Pedru, rü nügümaã ñanagürü: —Ñuxma waxi i nüxū chacuáxū na aixcüma Cori ya Tupana núma namuxū i norü orearü ngeruū na Erodemèxēwa choxū napuxū, rü nawa choxū ínanguxuchixēèxū i guxūma i ngēma chomaã naxügüchaüxū i ngēma Yudíugü i tama yaxōgüxū —ñanagürü. ¹² Rū yexguma yemaxū yacuèxāchigu ga Pedru, rü ngīpatawa naxū ga wüxi ga ngecü ga Mariagu āegacü. Rū ngīma iyixī ga Cuáū Marcu naē. Rū yema nangutaquēxegü ga muxūma ga duüxügü ga yema yumüxēgüxū. ¹³ Rū ñaxtūarü poxeguxūārü ñaxwa, rü: —Tu tu tu —ñanagürü ga Pedru. Rū wüxi ga pacü ga Rode ga ngīega íiyadau. ¹⁴ Rū yexguma nagawa nüxū nacuèxgu ga na Pedru yīxū, rü ngīrū taāēmaã rü íiyañamare na nüxū yanaxuxū ga na Pedru yīxū ga ñaxtūarü ñaxgu chicü. Rū tama iyawāxna ga ñax. ¹⁵ Rū yema yexmagüxū rü: —Cungēāēmare —ñanagürügü ngīxū. Natürü ngīma rü: —Aixcüma nixī —ngīgürügü. Rū yexguma ñanagürügü: —Maneca tama nüma nixī. Rū norü dauruū i daxūcūāxmare nixī —ñanagürügü. ¹⁶ Natürü ga Pedru rü yoxni ñaxwa: —Tu tu tu —ñanagürüama. Rū yexguma naxcè x yawāxnaāgu rü nüxū nadaugügu ga Pedru na yīxū, rü nabaixāchiāēgü. ¹⁷ Natürü nüma naxunagümèxē, rü naxmèxmaã nayanachianexēēgü. Rū namaã nüxū nixu na ñuxācü Cori ínanguxuchixēèxū ga poxcupataūwa. Rū ñanagürü ta: —¡Chaūtiágumaã rü ngēma togü i yaxōgüxūmaã nüxū pixu i ngēma ore! —ñanagürü. Rū yexguma inaxūāchi, rü toxnamana naxū. ¹⁸ Rū yexguma yangunegu, rü yema churaragü ga poxcupataūwa dauxūtaegüxū rü poraäcü nanaxixāchiāēgü yerü tama nüxū nacuèxgü ga tacü na ngupetüxū namaã ga Pedru. ¹⁹ Rū yemacèx ga Erode rü yema churaragüxū namu na Pedrucèx yadaugüxüçèx. Rū yexguma taxuxūūma iyangaugügu, rü Erode rü yema churaragügutama nananguxēē na nayuexüçèx. Rū yemawena ga Erode rü ínaxūxū ga Yudéaanewa, rü Checharéagu nayaxāchiū.

Nayu ga Erode

²⁰ Rū Erode rü namaã nanu ga Tirucūāxgü rü Chi-dāūcūāxgü. Natürü ga yema Tirucūāxgü rü Chidāūcūāxgü rü naxcèx nadaugü na ñuxācü Erodexū nangüxmüxēēgüxū, yerü Erodechīūānewa nixī ga nayauxgüāxū ga nabü. Rū yemacèx wüxi ga Erodearü duüxū ga āēxgacü ga Batumaã naxāmücügü na nüxū nangüxēèxüçèx na Erodemaã yadexagüxüçèx. ²¹ Rū Erode rü namaã inaxuneta ga wüxi ga ngunexū na namaã yadexaxüçèx. Rū yexguma yema ngunexū ga nagu inaxunetaxūwa nanguxgu, rü yema Tirucūāx rü Chidāūcūāx rü Erodexütawa nangugü. Rū nicuxcuchi ga Erode ga norü āēxgacüchiru, rü norü tochicaxūwa narüto, rü duüxügümaã nüxū nixu ga norü ore. ²² Rū yexguma ga guxūma ga yema duüxügü rü tagaäcü ñanagürügü: —Ñaa āēxgacü rü tama duüxūārü dexarüū nixī i norü dexa, natürü ñoma Tupanaārü dexarüū nixī —ñanagürügü. ²³ Rū Erode rü yema duüxügüarü oremaã nataāē, rü tama Tupanaxū nicuèxüūchaū ga ñuxācü

Tupana nūxŭ narüngŭxēēxŭ. Rŭ yemacèx wŭxi ga Tupanaârŭ orearŭ ngeruŭ ga daxŭcŭãx rŭ yexgumatama Erodexŭ niðaawexēē. Rŭ õxmigŭ nanangõx, rŭ yemamaã nayu. ²⁴ Natürŭ yema yaxõgŭxŭ rŭ yexeraãcŭ guxŭwama nŭxŭ nixugŭe ga Cori ga Tupanaârŭ ore. Rŭ muxŭchixŭ ga duŭxŭgŭ nŭxŭ nayaxõgŭ. ²⁵ Rŭ yexguma marŭ yanguxēēãgu ga norŭ puracŭ ga Chauru rŭ Bernabé, rŭ ínachoxŭ ga Yerucharéŭwa, rŭ wenaxârŭ Aŭtioquíacèx nawoegu. Rŭ nayagagŭ ga Cuáŭ Marcu.

13

Bernabé rŭ Chauru rŭ inanaxŭgŭe ga to ga nachiŭãnewa na nangegŭãxŭ ga Tupanaârŭ ore

¹ Rŭ yema yaxõgŭxŭ ga Aŭtioquíawa yexmagŭxŭtanŭwa rŭ nayexma ga ñuxre ga yatŭgŭ ga Tupanaârŭ orearŭ uruŭgŭ, rŭ ñuxre ga yatŭgŭ ga Tupanaârŭ orewa nguxēētaegŭxŭ. Rŭ yematanŭwa nayexma ga Bernabé, rŭ Chimáŭ ga Waxwegu ãegaxŭ, rŭ Dúchiu ga Chirenecŭãx, rŭ Manaë ga wŭxigu ãëxgacŭ ga Erodemaã yaexŭ, rŭ Chauru. ² Rŭ wŭxi ga ngunexŭ ga yexguma Coricèx ínangutaquëxegŭgu rŭ tama nachibŭeãcŭma ínayumŭxëgŭguyane, rŭ Tupanaãe i Üñexŭ rŭ ñanagŭrŭ nŭxŭ: —¡Choxna penamugŭ i Chauru rŭ Bernabé na naxŭgŭãxŭcèx i ngëma puracŭ i choma nawa chanamugŭchaŭxŭ! —ñanagŭrŭ. ³ Rŭ yexguma nŭxŭ nachauegu ga tama nachibŭeãcŭma na nayumŭxëgŭxŭ, rŭ Chauru rŭ Bernabéëtŭgu naxŭmëxgŭ ga yema yaxõgŭxŭ, rŭ ñuxŭchi inanamuãchitanŭ na naxŭgŭãxŭcèx ga Tupanaârŭ puracŭ.

Chiprewa naxŭ ga Bernabé rŭ Chauru

⁴⁻⁵ Rŭ Tupanaãe i Üñexŭ rŭ inanamuãchitanŭ ga Bernabé rŭ Chauru. Rŭ ñãne ga Cheúchiawa naxŭ, rŭ gumaârŭ türewa ínaxŭãchi, rŭ capaxŭ ga Chiprewa naxŭ. Rŭ Cuáŭ Marcu nawe narŭxŭ na nŭxŭ nangŭxēēxŭcèx. Rŭ yexguma Charamína ga ñãneârŭ türewa nangugŭgu, rŭ inanaxŭgŭe ga nŭxŭ na yaxugŭxŭ ga Tupanaârŭ ore ga Yudíugŭarŭ ngutaquëxepataŭgŭwa. ⁶ Rŭ guxŭgu nixŭãgŭtanŭ ga yema capaxŭwa ñuxmata Papu ga ñãnewa nangugŭ. Rŭ yema namaã inayarŭxŭ ga wŭxi ga Yudíu ga yuŭxŭ ga Barechúgu ãegaxŭ. Rŭ nŭma rŭ wŭxi ga idoratèxáxŭ nixŭ yerŭ nŭgŭ yaxuxgu rŭ aixcŭma Tupanaârŭ orearŭ uruŭ nixŭ. ⁷ Rŭ nayexma ga yema capaxŭârŭ ãëxgacŭ ga Chérqui Paurugu ãegaxŭ. Rŭ nŭma nixŭ ga wŭxi ga yatŭ ga meã naãexŭ cuácŭ. Rŭ yema yuŭxŭ rŭ guma ãëxgacŭarŭ ngŭxēēruŭ nixŭ. Rŭ nŭma ga ãëxgacŭ rŭ norŭ duŭxŭgŭxŭ namu na Chauru rŭ Bernabécèx yacagŭxŭcèx, yerŭ nŭxŭ naxŭnŭchaŭ ga Tupanaârŭ ore. ⁸ Natürŭ yema yuŭxŭ ga Griégugawa Erimínugu ãegaxŭ, rŭ Chauru rŭ Bernabéna nayanuxŭ na Tupanaârŭ orexŭ yaxugŭxŭ. Yerŭ tama nanaxwèxe na yaxõõxŭ ga guma ãëxgacŭ. ⁹⁻¹⁰ Natürŭ ga Chauru ga Paurugu ta ãegaxŭ, rŭ aixcŭma Tupanaãe i Üñexŭ nawa nayexma. Rŭ nŭma ga Pauru rŭ meãma nŭxŭ nadawenŭ ga yema yuŭxŭ, rŭ ñanagŭrŭ nŭxŭ: —Pa Idoratèxáxŭ Pa ngoxo Nanex, cuma rŭ chixexŭxicatama cuxŭxchaŭ, rŭ naxchi cuxai i guxŭma i mexŭ. ¿Ñuxgura tá ta i nŭxŭ curŭxoxŭ na ícuyatóxēēxŭ i Cori ya Tupanaârŭ ore i aixcŭma ixŭxŭ? ¹¹ —Ñuxmatátama cuxŭ napoxcu ya Cori ya Tupana. Rŭ tá cungexetŭ, rŭ ñuxre i ngunexŭgu rŭ táŭtáma nŭxŭ cudau ya üèxcŭ —ñanagŭrŭ. Rŭ yexgumatama naxcèx naxëãnexŭchi ga yema yuŭxŭ, rŭ naxmëxmaã nadaugŭ na texé naxmëxgu yayauxãchixŭcèx rŭ namaã ítixŭxŭcèx. ¹² Rŭ yexguma yemaxŭ nadèuxgu ga yema capaxŭârŭ ãëxgacŭ rŭ nayaxõ ga Tupanaârŭ ore, yerŭ namaã nabaixãchiãe ga yema Pauru rŭ Bernabé nŭxŭ nguxēēxŭ ga Cori ya Tupanachiga.

Pauru rŭ Bernabé rŭ Pichídiaanewa yexmane ga ñãne ga Aŭtioquíawa nangugŭ

13 Rū Papuwa inaxĩãchi ga Pauru namüçügümaã rü nixãũ ga taxtũ ga taxũwa. Rū Pérupe ga ãñewa nangugũ ga Paũpíriaanewa. Natürü yéma nüxna naxo ga Cuáũ Marcu, rü Yerucharéüçèx nataegu. 14 Rū Pérupewa inaxĩãchi ga Pauru rü Bernabé rü ãñe ga Aũtioquíawa nangugũ ga Pichídiaanewa. Rü yéma rü ngüxchigaarü ngunexũgu rü Yudíugüarü ngutaquëxepataũgu nachocu, rü yéma narütogü natanüwa ga yema íngutaquëxegüxũ. 15 Rü yema ngutaquëxewa rü nüxũ nadaumatügü ga Tupanaãrü mugü ga Moĩché ümatüxũ rü yema ore ga Tupanaãrü orearü uruügu ümatüxũ. Rü yemawena, rü guma ngutaquëxepataũãrü ãëxgacügü, rü Bernabé rü Pauruna nacagü, rü ñanagürü: —Pa Toeneëgüx, ngëxguma pexũ nangëxmagu i perü ore i taãëxëëruũ i toxçèx rü marü name i ñüxma tomaã nüxũ pixu —ñanagürü. 16 Rü yexguma inachi ga Pauru, rü naxunagümëxë na iyanachianexüçèx ga duüxügü. Rü yexguma duüxügümaã nidexa, rü ñanagürü: —Pa Duüxügü Pa Chautanüxügüx rü Guxãma i Pema i To i Nachiüãñecüãx Ixígüxex ya Tupanaxü Ngechaüğüxe, rü jiperüxĩnüë! 17 —Yima tórü Tupana i yixema i Yudíugü, rü tüxũ nade ga nuxçümaüğüxe ga tórü oxigü na tüxũ nangüxëëxüçèx. Rü poraãcü tüxũ nimuxëë ga yexguma woo to ga nachiüãñe ga Equituanewa tayexmagügu. Rü yemaãcü wüxi ga taxü ga nachiüãñe tüxũ nixígüxëë. Rü ñüxüchi yemawena, rü norü poramaã tüxũ ínagaxü ga yema naãñewa. 18 —Rü dauxchitawa ga ngextá taxüema íxãpataxüwa tüxũ nagagü. Rü yéma 40 ga taunecü Tupana yaxna tümamaã naxĩnü ga guxema tórü oxigü. 19 —Rü Tupana nanadai ga yema 7 ga ãëxgacügü ga Canaãñecüãxgü guxüma ga norü duüxügümaãchigü. Rü yemaãcü nanaxü na tórü oxigüna naxãñxüçèx ga yema naãñe na tümãrügüxüchi yíxüçèx. 20 —Rü 450 ga taunecü rü yemaãcü tüxũ narüngüxëë. Rü yemawena rü tüxna nanamu ga togü ga ãëxgacügü ga dauruügu ñüxmata Tupanaãrü orearü uruü ga Chamue ingucuchix. 21 —Rü yexguma ga duüxügü rü Tupanana naxçèx nacagü ga wüxi ga ãëxgacü ga rei na namaã inacuéxüçèx. Rü Tupana rü nüxna nanamu ga Chaú ga Chiche nane ga Beyamítaa ixícü. Rü nüma nüxna nadau ga duüxügü ga 40 ga taunecügu. 22 Rü yemawena ga Tupana rü ínanatëxüchi ga Chaú, rü Dabíxü naxuneta na guma norü ãëxgacü yíxüçèx. Rü Dabíxü nixuchiga ga Tupana, rü ñanagürü:

“Nüxũ chadau rü Dabí ya Ichaí nane rü wüxi ya yatü ya poraãcü choxü ngüchaüçü nixĩ. Rü nüma tá nanaxü i guxüma i ngëma choma chanaxwëxexü”,

ñanagürü ga Tupana. 23 Rü nuxçüma ga Tupana rü marü inaxuneta rü wüxi i Dabítaa tá nixĩ i Cristu ixíxü, rü tá nanamaxëë i Yudíugü. Rü Ngechuchu nixĩ ga guma maxëxëëruü ga tórü oxigümaã nüxũ yaxucü ga Tupana. 24 Natürü naxüpa ga Ngechuchu na ínguxü, rü Cuáũ ga baiüxëëruü rü guxüma ga Yudíugümaã nüxũ nixuchiga ga ore i mexü rü ñanagürü:

“Rü name nixĩ i nüxũ perüxoe i pecüma i chixexü, rü Tupanacèx pedaugü, rü ípebaiü”, ñanagürü. 25 Rü yexguma marü yangaicaxgu ga tá na nayuxü ga Cuáũ, rü ñanagürü:

“Rü tama choma nixĩ i ngëma pema nagu perüxĩnüëxü i Cristu chiixü. Natürü choweamana ne naxü i nüma ya aixçüma Cristu ixícü. Rü choma rü napëxewa taxuwama chame, rü bai i norü chapatucunüãrü wëgüwaxüra chame erü nüma rü wüxi i ãëxgacü i tacüxüchima nixĩ”, ñanagürü ga Cuáũ. 26 Rü ñanagürü ga Pauru, —Pa Chautanüxügü i Abráũtaagüx, rü Guxãma i Pema i To i Nachiüãñecüãx i Tupanaxü Ngechaüğüxex, rü pexçèx nixĩ i ñãã ore i tüxũ maxëxëëxü. 27 —Rü aixçüma yema Yerucharéüçüãxgü ga duüxügü rü yema norü ãëxgacügü rü tama nüxũ nacüëxgü ga Tupana Nane

na yīxū ga Ngechuchu. Rū tama meã nüxū nacuèxgü ga tacüchiga na yīxū ga yema ore ga nuxcūmaūgūxū ga Tupanaārū orearū uruūgü ümatūxū i ñuxma perü ngutaquëxepataūwa nüxū pedamatügūxū i wüxichigü i ngüxchigaarü ngunexūgu. Rū yemaãcü nümagütama ga yema duūxūgü ga Ngechuchuxū imèxgūxū rü yexguma yamèxgüāgu rü nayanguxēē ga yema ore ga nuxcūma ümatūxū. ²⁸ —Rū woo taxuūma ga tacü ga chixexū nawa inayangaugü na nayuxēēãxücèx, natürü Piratuna naxcèx nacagü na yamáãxücèx. ²⁹ —Rū ningu ga guxūma ga yema ore ga Tupanaārū orearū uruūgü ümatūxū ga Ngechuchuchiga ga ñuxäcü tá na nayuxū. Rū yemawena rü nanayauxgü ga naxūne ga curuchawa, rü wüxi ga naxmaxūgu nayanaxücuchigü. ³⁰ —Natürü ga Tupana rü wena nanamaxēē ga woo marü na nayuxū. ³¹ —Rū nüma ga Ngechuchu rü muxūma ga ngunexū naxcèx nangox ga yema duūxūgü ga nawe rüxīxū ga yexguma Gariréaanewa ne naxūxgu rü Yerucharéūwa naxūxgu. Rū ngēma duūxūgü nixī i ñuxma i guxū i duūxūgūmaã nüxū ixugūxū i nachiga. ³²⁻³³ Rū ngēmaãcü i toma rü núma tangugü na pemaã nüxū tixuxücèx i ngēma ore i aixcūma mexū. Rū dücax, rü yema uneta ga nuxcūmaūgūxū ga tórü oxigūmaã nüxū yaxuxū ga Tupana, rü taxcèx nayan-guxēē ga yexguma Ngechuchuxū wena namaxēēgu. Rū wiyægüpanewa i norü taxre i capíturuwa rü ngēmachiga nüxū nixu i ngèxguma:

“Cuma nixī i Chaune, rü choma nixī i Cunatü chīixū”, ñaxgu. ³⁴ —Rü Tupana rü nuxcūma rü marü nüxū nixu ga wena tá na namaxēēãxū ga Ngechuchu na tama yayixixücèx ga naxūne. Rü norü orewa rü ñanagürü:

“Rü choma tá pexcèx chayanguxēē ga yema unetagü i üünegūxū i aixcūma ixīgūxū ga nuxcūma Dabímaã nüxū chixuxū”, ñanagürü. ³⁵ —Rü ngēmacèx toxnamana i Tupanaārū orewa rü ñanagürü ta:

“Tama cunaxwèxe na yayixixū i naxūne ya Cune ya üünecü,”

ñanagürü. ³⁶ —Rü yexguma namaūxgu ga Dabí, rü nüxū narüngūxēē ga norü duūxūgü, yexgumarüū ga ñuxäcü Tupana namuxū. Natürü ñuxūchi nayu, rü nanatü rü naëxūtagu natèx ga naxūne, rü niyixi. ³⁷ —Natürü guma Tupana wena namaxēēcü ga Ngechuchu rü tama niyixi ga naxūne. ³⁸ —Rü ñuxmax, Pa Chaueneëgūx, rü chanaxwèxe i nüxū pecuèx rü yimatama Ngechuchugagu Tupana tüxū nüxū nangechaū i tórü pecadugü ngèxgumarüū i pemaã nüxū tixuxürü. ³⁹ —Rü ñuxma ya guxāma ya yíxema nüxū yaxōgūxe, rü Ngechuchugagu Tupana tüxū nüxū nangechaū i guxūma ga yema pecadugü ga noxri taxucürüwa tüxū nüxū nangechaūxū ga yexguma nagu taxīxgu ga yema mugü ga Moíché ümatūxū. ⁴⁰ —Rü pexuāëgü na tama pegu nanguxücèx i ngēma poxcu i Tupanaārū orearū uruūgü nüxū ixuchigaxū ga yexguma ñagügu:

⁴¹ “Rü dücax, Pa Duūxūgü i Tupanaārū Orexū Cugüexūx, rü tá pebaixāchie rü tá peyue erü pema pemaxēyane rü tá chanaxü i tacü i taxū. Rü pema rü täütáma peyaxōgü i woo texé pemaã nüxū ixuxgu”,

ñanagürü. Rü yexma nayacuèxēē ga Pauru ga norü ore. ⁴² Rü yexguma guma ngutaquëxepataūwa ínachoxūgu ga Pauru rü namücügü, rü yema duūxūgü ga tama Yudíugü ixīgūxū rü nüxū nacèxūgü na to ga ngüxchigaarü ngunexūgu rü wenaxārü yematama orexū namaã yaxuxücèx. ⁴³ Rü yexguma marü nüxū nachauegu ga na nangutaquëxegūxū, rü Pauru rü Bernabéwe narüxī ga muxūma ga Yudíugü rü müxūma ga togü ga duūxūgü ga tama Yudíugü ixīgūxū natürü Yudíugürüū yaxōgūxū. Rü Pauru rü Bernabé rü namaã nidexagü rü nayaxucuxēgü na guxūguma nagu naxīnūēechaxücèx ga ñuxäcü Tupana nüxū ngechaūäcūma na nadexū. ⁴⁴ Rü yema to ga ngüxchigaarü ngunexūgu, rü wixgutaèx guxūma ga yema iānecūāx

nangutaquēxegū na inaxīnūēxūcèx ga Tupanaārū ore. ⁴⁵ Natürü nayexma ga ñuxre ga Yudíugū ga tama ngutaquēxegu chocuxū. Rū yexguma nūxū nadaugūgu ga na namuxūchixū ga duūxūgū ga Paurucèx ngutaquēxegūxū rü poraācū nixāūxāchie. Rū inanaxūgūe ga na Pauruxū nachoxūgagūxū rü namaā naguxchigagūxū. ⁴⁶ Natürü ga Pauru rü Bernabé rü tama namuēēacūma yema Yudíugūxū nangāxūgū, rü ñanagürügū: —Tupana nanaxwèxe na pemaāxīra nūxū tixuxū i norū ore. Natürü ñuxma na nūxū pexoexū i ngēma ore rü tama na penayauxgūchaūxū i maxū i taguma gúxū, rü ngēmacèx i ñuxmax i toma rü tá ngēma tama Yudíugū ixīgūxūtanūwa taxī. ⁴⁷ —Yerü yemaācū toxū namu ga Cori, rü ñanagürü:

“Duūxūgū i tama Yudíugū ixīgūxūārū ngóonexēēruū marū cuxū chixīxēē, na guxūwama i ñoma i naānewa cunangexūcèx i chorū ore i maxēxēēruū”, ñanagürü. ⁴⁸ Rū yexguma yema orexū naxīnūēgu ga yema duūxūgū ga tama Yudíugū ixīgūxū, rü nataāēgū rü ñanagürügū: —Rū namexēchi nixī i ñaā Cori ya Tupanaārū ore —ñanagürügū. Rū nayaxōgū ga guxūma ga yema duūxūgū ga Tupana marū nūxū unetaxū na nayauxgūāxūcèx i maxū i taguma gúxū. ⁴⁹ Rū yemaācū guxūwama ga yema naānewa nanguchigū ga Cori ya Tupanaārū ore. ⁵⁰ Natürü yema Yudíugū ga tama Ngechuchuaxū yaxōgūchaūxū, rü chixexūmaā nayaxucxūxēgū ga ñuxre ga ngexūgū ga mexūgū ga Tupanaxū ngechaūgūxū rü guma iāneārū āēxgacūgū na Pauru rü Bernabéxū ínawoxūxūcèx. Rū yemacèx ínanawoxū ga yema naānewa. ⁵¹ Rū yexguma ga Pauru rü Bernabé rü inapagūcutū ga norū ūxaxūcutū na yemawa nūxū yacuēxāchitanūxūcèx ga norū chixexū ga yema iānecūāxgū ga duūxūgū. Rū ñuxūchi ga Pauru rü Bernabé rü iāne ga Icúniūwa naxī. ⁵² Natürü yema yaxōgūxū ga guma iāne ga nawa ínachoxūnewa yexmagūxū rü poraācū Tupanamaā nataāēgū, rü Naāē i Ūnēxū rü aixcūma nawa nayexma.

14

Pauru rü Bernabé rü iāne ga Icúniūwa nayexmagū

¹ Rū Icúniūwa rü wūxigu Yudíugūarū ngutaquēxepataūgu nachocu ga Pauru rü Bernabé. Rū meāma nūxū nixuchiga ga Tupanaārū ore rü yemaācū nayaxōgū ga muxūma ga duūxūgū ga Yudíugū rü yema tama Yudíugū ixīgūxū rü ta. ² Natürü yema Yudíugū ga tama Ngechuchuaxū yaxōgūxū, rü chixexūmaā nayaxucxūxēgū ga yema tama Yudíugū ixīgūxū na yema yaxōgūxūchi naxaīxūcèx. ³ Rū yemacèx muxūma ga ngunexū yexma narūcho ga Pauru rü Bernabé, rü tama namuēēacūma nūxū nixuchiga ga Cori ya Tupanaārū ore. Rū yema duūxūgūmaā nūxū nixu na ñuxācū Tupana poraācū tūxū nangechaūxū. Rū nūma ga Cori rü yema duūxūgūxū nūxū nadauxēē na namaā nataāēxū ga yema ore. Rū yemacèx Pauru rü Bernabéxū narūngūxēē na inawēxgūāxūcèx ga cuēxruūgū rü na naxūgūāxūcèx ga mexūgū ga Tupanaārū poramaā naxūgūxū. ⁴ Natürü ga guma iānecūāx ga duūxūgū rü nitoye. Rū nūmaxū rü yema Yudíugūwaama naxūgū rü togū rü Pauru rü Bernabéwaama naxūgū. ⁵ Rū yexguma ga yema Yudíugū, rü yema duūxūgū ga tama Yudíugū ixīgūxū, rü guma iāneārū āēxgacūgūmaā wūxigu nagu narūxīnūē na Pauruxū rü Bernabéxū yayauxgūxū na nutamaā ínamuxūchigūāxūcèx. ⁶⁻⁷ Natürü yexguma nūxū nacuáchigagūgu ga Pauru rü Bernabé, rü nibuxmü. Rū Dicóniūānewa yexmane ga iānegū ga Listra rü Derbewa naxī. Rū guma iānegūwa rü guxūma ga yema naānewa ipeagūxū ga duūxūgūmaā rü ta nūxū nixuchigagū ga ore i mexū.

Nutagūmaā Pauruxū ínamuxūchigū ga Listrawa

8-9 Rū yéma Listrawa nayexma ga wūxi ga yatū ga ínapogücutüxŭ norū bucūmatama. Rū yéma narūto rū inarūxīnū ga yema Pauru nūxŭ ixuxŭ ga ore. Rū Pauru rū meāma nūxŭ nadawenū, rū nūxŭ nadau ga na nūxŭ nayexmaxŭ ga norū ō na naxcèx yataanexüçèx. 10 Rū yexguma ga Pauru rū tagaācū ñanagürū nūxŭ: —¡Inachi, rū meāma ínangacutū! —ñanagürū. Rū yexguma inayuxnagü ga guma yatū, rū inanaxügu ga na iyaxūxŭ. 11 Rū yexguma yema muxŭma ga duŭxügu nūxŭ daugügu ga yema na naxūxŭ ga Pauru, rū tagaācū yema Dicóniŭgawa nidexagü, rū ñanagürügü: —Tupanagü i naduŭxügüraŭxŭ ínarūxīgü, rū tatanūwa nangugü —ñanagürügü. 12 Rū Bernabé rū tupana ga Chéumañ nanaxüégagü. Rū Pauru rū Érememañ nanaxüégagü yerü nūma nixŭ ga yadexaxŭ. 13 Rū guma ñāne íxücuxŭwa nayexma ga tupana ga Chéuarū tupauca ga taxŭne. Rū guma tupaucaarū pai rū yéma nanagagü ga wocagü ga iyatüxŭ ga putüramañ ngèxāēgüxŭ. Rū nūma ga pai rū ga duŭxügu rū nanadaixchaŭ ga yema wocagü naxcèx ga Pauru rū Bernabé na yemamañ nūxŭ yacuèxüŭgüxŭçèx. 14 Natürü yexguma nūxŭ yacuèxāchitanügu ga Bernabé rū Pauru, rū norū gāuxŭchirugu nagāugŭe na yema duŭxügu nūxŭ cuèxgüxŭçèx na tama namexŭ ga yema naxcèx naxüechaŭxŭ. Rū yema muxŭma ga duŭxügütanūwa nabuxmü, rū ñaxŭmañ aita naxŭe: 15 —Pa Yatügüx, çtüxcüŭ toxçèx penaxü i ngēma? Toma rū pexrŭŭ duŭxügümare tixīgü. Rū nuā taxŭ na pemañ nūxŭ tayarūxuxŭçèx na nūxŭ perūxoexŭçèx i ngēma chixexügu i taxuwama mexŭ rū naxcèx pedaugüxŭçèx ya Tupana ya maxŭcŭ ga naxŭcŭ ga daxŭguxŭ i naāne, rū ñoma i naāne, rū taxtŭ i taxŭ, rū guxŭma i nawa ngèxmaxŭ. 16 —Rū nuxcümayerü nixŭ ga Tupana ga yaxna namañ naxīnūxŭ ga duŭxügu ga woo nūmagü nanaxwèxegüxŭ naxŭgügu. 17 —Natürü nūma ga Tupana rū taguma nūxŭ narūchau na duŭxügüxŭ nangŭxēxŭ. Rū yemaācŭ tüxŭ nūxŭ nacuèxēē na Tupana yīxŭ i nūmax. Rū nūmatama nixŭ i nūma namuāxŭ ya pucŭ rū meñ pexŭ nayaexēxēxŭ i penetügü. Rū nūma nixŭ i pexna naxāāxŭ i pewemü na ngēmaācŭ petaāēgüxŭçèx —ñanagürügü ga Pauru rū Bernabé. 18 Natürü woo yema orexŭ namañ na yaxugüxŭ rū poraācŭ nūxŭ naguxcha ga Pauru rū Bernabé ga nūxna na nachogüxŭ ga duŭxügu ga tama naxcèx na nadaiāxŭçèx ga yema wocagü na yemamañ nūxŭ yacuèxüŭgüxŭçèx. Rū dŭxwa yemacèx tama naxcèx nanadai. 19 Natürü yexgumayane rū ínangugü ga ñuxre ga Yudíugü ga Aŭtioquíawa rū Icúniŭwa ne íxŭ. Rū chixexŭmañ nayaxucuxēgü ga yema muxŭma ga duŭxügu na tama Pauru rū Bernabéga naxīnūxŭçèx, rū namañ nanuèxŭçèx. Rū yemacèx ga yema duŭxügu rū nutamañ Pauruxŭ ínamuxŭchigü, rū ñāneārū íxpemawa nanatúchigügü, yerü nūma nūxŭ nacuèxgügu rū marü nayu. 20 Natürü yexguma yema yaxōgüxŭ naxŭtawa ngutaquēxegu, rū inachi ga Pauru, rū wenaxārū nagu naxŭcu ga guma ñāne. Rū moxŭācŭ inaxŭāchi ga yéma, rū Bernabémañ Derbewa naxŭ. 21 Rū guma ñānewa nūxŭ nixugŭe ga ore ga mexŭ. Rū nanangúexēē ga duŭxügu, rū muxŭma Tupanaāxŭ nayaxōgü. Rū yemawena rū wenaxārū naxcèx nawoegu ga Listra, rū Icúniŭ, rū Aŭtioquía. 22 Rū guma ñānegüwa rū yema yaxōgüxŭxŭ nixucuxēgü, rū nūxŭ nanangúchaŭxēēgü na guxŭguma meñ na yaxōgüāxŭçèx. Rū namañ nūxŭ nixugŭe, rū ñanagürügü: —Ngēma Tupana āēxgacŭ íxŭŭwa na ixücuxŭçèx, rū tanaxwèxe na muēxpŭxcŭna guxchaxŭgümañ yaxna ixīnūxŭ i ñoma i naānewa —ñanagürügü. 23 Rū Pauru rū Bernabé rū wūxichigü ga ñānewa rū nūxŭ nixunetatanü ga ñuxre ga yatügü na yaxōgüxŭārū āēxgacügü yixīgüxŭçèx. Rū tama nachibüēācŭma naxcèx nayumüxēgü. Rū yemawena rū yima Cori ya Tupana ga nūxŭ yaxōgüācŭna nanaxuaxŭgü na guxŭguma namañ inaxŭāxŭçèx rū meñ nūxna nadauxŭçèx

ga yema yaxōgūxūārū āēxgacūgū.

Pauru rü Bernabé rü naxcèx nawoegu ga Aūtioquía ga Chíriaanewa yexmane

²⁴ Rü Pichídiaanewa nichopetü, rü Paŭpíríiaanewa nangugü. ²⁵ Rü Pérupe ga ñānēwa nūxū nixugüē ga Tupanaārū ore, rü ñuxūchi Atária ga ñānēwa naxī. ²⁶ Rü yēma rü wūxi ga wapurugu nichoŭ na Aūtioquíacèx nawoeguxūcèx. Rü guma ñāne ga Aūtioquíawa nixī ga noxri duūxūgü Tupanana namugūxū ga Pauru rü Bernabé na naxūgūāxūcèx ga yema puracü ga ñuxma marü yanguxēēgūxū. ²⁷ Rü yexguma ínangugügu ga Pauru rü Bernabé, rü nanangutaquēxexēē ga guxūma ga yema duūxūgü ga yaxōgūxū. Rü namaā nūxū nixugūgü ga guxūma ga ñuxācū Tupana poraācū nūxū na rüngūxēēxū. Rü yexgumarūŭ ta rü namaā nūxū nixugūgü ga ñuxācū na yaxōgūāxū ga yema duūxūgü ga tama Yudíugü ixīgūxū, yerü Tupana nūxū nanatauxchaxēē na yaxōgūāxūcèx. ²⁸ Rü muxūma ga ngunexūgu yema yaxōgūxūtanūwa nayexmagü ga Pauru rü Bernabé.

15

Yerucharéŭwa nangutaquēxegü

¹ Rü yexgumaūcūü rü nayexma ga ñuxre ga duūxūgü ga Yudéaanewa ne īxū ga Aūtioquíawa ngugūxū. Rü nūmagü inanaxūgüē ga tūxū na nangúexēēxū ga guxema yaxōgūxe ga Aūtioquíacūāx, rü ñanagürügü: —Ngēxguma tama pegü ípewiŭchēmŭpēxechiraŭgu yema Moíché tūxū muxūrūŭ rü taxuacūma pexū nangēxma i maxū i taguma gúxū —ñanagürügü. ² Natürü ga Pauru rü Bernabé rü tama norü me nixī ga yema, rü yemacèx poraācū nūgü namaā nachoxūgagü ga yema duūxūgü ga Yudéaanewa ne īxū. Rü düxwa Pauru rü Bernabé rü ñuxre ga togü ga Aūtioquíacūāx ga yaxōgūxūxū naxunetagü na Yerucharéŭwa naxīxūcèx na yema ngúexūgü ga Ngechuchu imugūxū rü yema yaxōgūxūārū āēxgacūgūmaā yamexēēgūāxūcèx ga yemachiga. ³ Rü yemaācū ga yema yaxōgūxū ga Aūtioquíacūāx rü Yerucharéŭwa nanamugü ga yema yatügü na naxcèx íyacagūxūcèx rü yamexēēgūāxūcèx ga yema ore. Rü Peníchíiaanewa rü Chamáriaanewa nachopetü ga Pauru rü Bernabé. Rü yēma rü duūxūgūmaā nūxū nixugüē ga ñuxācū yema tama Yudíugü ixīgūxū rü nūxū na naxoexū ga nuxcūmaūxū ga nacūmagü na Tupanawe naxīxūcèx. Rü yema oremaā poraācū nanataāēxēēgü ga guxūma ga yema yaxōgūxū. ⁴ Rü Yerucharéŭwa nangugü ga Pauru rü Bernabé. Rü guxūma ga yema yaxōgūxū rü yema ngúexūgü ga Ngechuchu imugūxū rü yema yaxōgūxūārū āēxgacūgü rü meāma nanayauxgü. Rü Pauru rü Bernabé namaā nūxū nixugūgü ga guxūma ga ñuxācū Tupana poraācū nūxū na rüngūxēēxū na duūxūgūmaā nūxū yaxugūxūcèx ga ore i mexū. ⁵ Natürü ñuxre ga Parichéugü ga Ngechuchuaxū yaxōgūxū, rü inachigü, rü ñanagürügü: —Name nixī na nūgü ínawiŭchēmŭpēxechiraŭgūxū i ngēma tama Yudíugü ixīgūxū i ngexwaca yaxōgūxū. Rü name nixī na naga naxīnūēxū i ngēma mugü ga Moíché ūmatūxū —ñanagürügü. ⁶ Rü yexguma nangutaquēxegü ga yema ngúexūgü ga Ngechuchu imugūxū rü yema yaxōgūxūārū āēxgacūgü na namexēēgūāxūcèx ga yema ore. ⁷ Rü yixcama marü ñuxgumama nūgūmaā yēma yaporagatanūcūgu, rü inachi ga Pedru, rü ñanagürü nūxū: —Pa Chaueneēgūx, pema nūxū pecuèx ga na ũpamama Tupana choxū yaxuxū ga petanūwa na yema duūxūgü i tama Yudíugü ixīgūxūmaā nūxū chixuxūcèx i norü ore i mexū i maxēxēēruŭ, na nūmagü rü ta Ngechuchuaxū yaxōgūāxūcèx. ⁸ —Rü yima Tupana ya guxāāēxū cuācū rü tūxū nūxū nadauxēē na nadeāxū i ngēma duūxūgü i tama Yudíugü ixīgūxū, yerü nūxna nanamu ga Naāē i Ūnēxū yema tūxna namūāxūrūŭ. ⁹ —Rü Tupanapēxewa rü yixema i Yudíugü

rū namaã tawüxigu i ngēma duüxügü i tama Yudíugü ixīgüxü. Yerü nümagü rü ta Tupana nüxü nüxü nangechaü ga norü pecadugü ga yexguma nüxü yaxögüãgu. ¹⁰ —¿Rü tüxcüü tama namaã petaãe i ñuxma i ngēma Tupana üxü? ¿Rü tüxcüü ngēma ngexwacèx yaxögüxüxü penaxüxēēchaü i ngēma Moïchéarü mugü i guxchaxü ga tórü oxigü rü taxuacüma naga taxĩnüxü rü woo yixemagü rü ta taxuacüma inguxēēxü? ¹¹ —Rü tama ngēma mugü nixĩ i tüxü maxēxēxü. Natürü yixema rü tayaxögü na tórü Cori ya Ngechuchu tamaã mecümaxügagu yĩxü na tüxna naxãmareãxü i maxü i taguma gúxü. Rü ngēxgumarüü ta nixĩ i naxcèx i nümagü i tama Yudíugü ixīgüxü —ñanagürü ga Pedru. ¹² Rü inanaxügü ga Bernabé rü Pauru na yadexagüxü. Rü guxüma ga yema duüxügü rü inarüchianegü rü inarüxĩnüēmare. Rü Bernabé rü Pauru rü namaã nüxü nixugüe ga ñuxãcü Tupana na nüxü rüngüxēēgüxü na naxügüãxücèx ga mexü ga taxügü ga Tupanaärü poramaã naxügüxü natanüwa ga yema duüxügü ga tama Yudíugü ixīgüxü. ¹³ Rü yexguma Bernabé rü Pauru igúegagügu, rü nüxĩärü nidexa ga Chaütiágu, rü ñanagürü: —Pa Chaueneēgüx, ¡choxü iperüxĩnüē! ¹⁴ —Pedru i Chimáü rü tamaã nüxü nixu na ñuxãcü Tupana inaxügüxü ga nüxü na nangüxēēxü ga yema duüxügü i tama Yudíugü ixīgüxü. Rü tamaã nüxü nixu ta na ñuxãcü Tupana yema duüxügütanüwa nadeãxü ga ñuxre ga duüxügü na noxrü yixīgüxücèx. ¹⁵ —Rü ngēma Pedru nüxü ixuxü rü nawüxigu namaã ga yema ore ga nuxcümaügüxü ga orearü uruügü ümatüxü ga ñaxü:

¹⁶ “Rü ngēmawena rü tá chataegu, rü tá nüxü charüngüxēē i Dabítaagü i Yudíugü. Rü woo nawoonemare i ñuxmax, natürü wena táxarü wüxiwa chanaxĩxēē, rü tá íchanadagüxēē na noxrirüü naporaexücèx. ¹⁷ Rü ngēmaãcü tá nüxü charüngüxēē na ngēma duüxügü i tama Yudíugü ixīgüxü rü chauxcèx nadaugüxücèx, wüxigu namaã i guxüma i chorü duüxügü i Yudíugü i choma chadexü. ¹⁸ Rü yemaãcü nüxü nixu ga nüma ga Cori ya Tupana ga nuxcümama tüxü nüxü cuèxēēcü ga yema”, ñanagürü ga yema ore ga nuxcüma ümatüxü. ¹⁹ Rü ñanagürü ga Chaütiágu: —Rü ngēmacèx, Pa Chaueneēgüx, rü chauxcèx rü tama name na guxü i Moïché ümatüxü i mugümaã nüxü ichixewexü i ngēma duüxügü i tama Yudíugü ixīgüxü i nüxü rüxoexü i nuxcümaüxü i nacümagü na Tupanawe naxĩxücèx. ²⁰ —Rü narümemaē nixĩ i naxcèx tanaxümatü i popera, rü ngēmawa namaã nüxü tixu:

- (1) Rü tama name na nangõxgüãxü i ngēma naxümagümach i togü norü tupanenetachicünèxãgücèx dèixü.
- (2) Rü tama name na naĩ i ngemaã rü èxna naĩ ya yatümaã inapexü.
- (3) Rü tama name na nangõxgüãxü i namachi i ngēma naëxü rü èxna naxüna i wèxnaãxü rü èxna natügu nguxü.
- (4) Rü tama name na nangõxgüãxü ya nagü.

Rü ngēxĩcatama nixĩ i inaxwèxexü na naxcèx naxümatüxü. ²¹ —Erü guxüne ya ñãnewa nangëxma ya Yudíugüarü ngutaquëxepataü i ngextá nuxcümama guxü i ngüxchigaarü ngunexügu nawa ínangüe rü nüxü nixuchigagü i guxüma i ngēma mugü ga Moïché ümatüxü —ñanagürü ga Chaütiágu.

Popera ga yema duüxügü ga tama Yudíugü ixīgüxücèx ümatüxü

²² Rü yema ore rü norü me nixĩ ga yema ngüexügü ga Ngechuchu imügüxü, rü yema yaxögüxüärü ãëxgacügü, rü guxüma ga yema yaxögüxü. Rü nügümaã ñanagürügü: —¡Ngĩxã tatanüwa tanade ya taxre ya yatügü na Aütioquíawa namügüxücèx namaã ya Pauru rü Bernabé! —ñanagürügü. Rü nüxü naxunetagu ga Yuda ga Barsabágu ãëgaxü rü Chira. Rü nümagü ga Yuda rü Chira rü ãëxgacügü nixĩ ga natanüwa ga yema yaxögüxü ga Yerucharéüwa

yexmagüxü. ²³ Rū namaã yéma nanamugü ga popera, rü ñãã nixĩ ga yema ore ga nagu naxümatügüxü:

“Pa Toeneëgü i Tama Yudiügu Ixigüxe i Aütioquíagu rü Chíriaanegu rü Chiríchiaanegu Áchiügüxe, rü toma i peeneëgü i Ngechuchu toxü imugüxe rü toma i yaxögüxüãrü ãëxgacügü ixigüxex, rü pexü tarümoxëgü. ²⁴ Rü nüxü tacuáchigagü rü ñuxre ga duüxügü ga núma ne İxü rü woo tama toma yéma tanamugü natürü nümagü rü yéma naxĩ rü Moíchéarü mugümaã pexü nachixewegü rü yemaãcü pexü ínatüexëë. ²⁵ Rü yemacëx guxãma ga toma rü wüxigu nagu tarüxĩnüë na totanüwa nüxü taxunetaxü ga taxre ga taeneëgü na pexcëx ngema tanamugüxücëx namaã i taeneëgü i nüxü ingechaügüxü i Bernabé rü Pauru. ²⁶ Rü nümagü i Bernabé rü Pauru nixĩ ga poraãcü äücümaxüwa nayexmagüxü naxcëx ga tórü Cori ya Ngechuchu ya Cristu. ²⁷ Rü ñuxma rü pexcëx ngema tanamugü i Yuda rü Chira na nümagüxüchi pemaã nüxü yaxugüxücëx rü pemaã nangoxëëgüãxücëx i guxüma i torü ore. ²⁸⁻²⁹ Erü Tupanaãë i Üünexücëx name, rü toxcëx rü ta name na tama muxüma i mugü pexna taxägüxü. Rü ñãã ägümücü i mugüxicatama nixĩ i pexü tamuxü:

(1) Rü tama name na penangöxü i naxünagümachi i togü norü tupanetachicünëxägücëx dëixü.

(2) Rü tama name na penangöxü i namachi i ngëma naxünagü i wëxnaãxü.

(3) Rü tama name na penangöxü ya nagü.

(4) Rü tama name na naĩ i ngemaã rü ëxna naĩ ya yatümaã ipepexü.

Rü mexü tá pexügü ega penaxauregu i ngëma mugü. Rü nuãma pexna”, ñanagürü ga yema ore ga naxümatügüxü. ³⁰ Rü natanüxüxü namoxëgüguwena, rü inaxĩãchi ga yema yéma mugüxü, rü Aütioquíawa naxĩ. Rü yexguma yéma nangugügu rü nanangutaquëxexëë ga guxüma ga yema yaxögüxü ga duüxügü, rü nüxna nanaxägü ga yema popera. ³¹ Rü yexguma nüxü nadaumatügügu, rü poraãcü nataãëgü namaã ga yema ucüxëgü ga nüxna naxägüxü. ³² Rü Yuda rü Chira ga Tupanaãrü orearü uruügü na yixigüxü, rü muxüma ga oremaã nayaxucüxëgü ga yema yaxögüxü, rü nüxü narüngüxëë na yexeraãcü yaxögüãxücëx. ³³ Rü marü ñuxre ga ngunexü yéma nayexmagüguwena, rü ínixĩ. Rü yema yaxögüxü ga Aütioquíacüãx, rü taãëãcüma Yuda rü Chiraxü narümoxëgü rü meãma ínayamugü na naxcëx nawoeguxücëx ga yema Yerucharéücüãx ga noxri natanüwa namugüxü. ³⁴ Natürü ga Chira rü nagu narüxĩnü na yexma Aütioquíagu naxãüxü, rü yemacëx Yudaxicatama Yerucharéücüx nataegu. ³⁵ Rü Pauru rü Bernabé rü ta yexma narücho. Rü wüxigu namaã ga muxüma ga togü, rü nanangüxëë ga duüxügü, rü namaã nüxü nixugügü ga Cori ya Tupanaãrü ore i mexü.

Pauru rü wenaxãrü inaxüãchi ga to ga nachüãnegüwa na nangeaxü ga Tupanaãrü ore

³⁶ Rü yexguma marü ñuxre ga ngunexü ngupetügu, rü ñanagürü ga Pauru Bernabëxü: —¡Ngixã wenaxãrü natanügu tanaxĩãne i ngëma yaxögüxü i guxüne ya ñãne ga ngextá nüxü íxuchigaxüwa ga Cori ya Tupanaãrü ore na nüxü idauxücëx na ñuxãcü nüxü ínangupetügüxü! —ñanagürü. ³⁷ Rü Bernabé rü nayagaxchaü ta ga Cuãü Marcu. ³⁸ Natürü ga Pauru rü tama nanaxwëxe ga na yagaãxü, yerü Paüpíriawa nüxna naxo ga noxri, rü tama ínayaxümücü ga yema puracüwa. ³⁹ Rü poraãcü nügümaã niporagatanücüü naxcëx ga yema, rü düxwa nügüna nixigü. Rü Bernabé nayaga ga Marcu, rü Chiprearü capaxüwa naxü. ⁴⁰ Rü yoxni ga Pauru rü Chiraxü niga. Rü yema Aütioquíacüãx ga yaxögüxü rü naxcëx nayumüxëgü na Tupana nüxü

rüngŭxēgŭxŭcèx. Rŭ yexguma inaxĩachi. ⁴¹ Rŭ Chíríiaanewa rŭ Chiríchíiaanewa nachopetŭ, rŭ yéma Tupanaârŭ oremaã nanataãxēgŭ ga yema yaxōgŭxŭ.

16

Pauru rŭ Chirawe narŭxŭ ga Timutéu

¹ Rŭ Derbewa rŭ Listrawa nangugŭ ga Pauru rŭ Chira. Rŭ yéma nayexma ga wŭxi ga yaxōcŭ ga Timutéugu aëgacŭ. Rŭ naē rŭ wŭxi ga Yudíu ga yaxōxcŭ iyixĩ. Rŭ nanatŭ rŭ wŭxi ga Griégu tixĩ. ² Rŭ guxŭma ga yema yaxōgŭxŭ ga Listracŭãxgŭ rŭ Icóniŭcŭãxgŭ rŭ nŭxŭ nixugŭe na mea maxŭcŭ yixixŭ ga nŭma ga Timutéu. ³ Rŭ Pauru rŭ nanaxwèxe na Timutéu íyaxŭmŭcŭxŭ. Natŭrŭ naxŭpa ga na yagaãxŭ rŭ Ínanawiechèxmŭpèxechiraŭ, yerŭ yemaãcŭ nanaxwèxegŭ ga yema Yudíugŭ ga yema naãnewa yexmagŭxŭ. Yerŭ guxŭma nŭxŭ nacuèxgŭ ga na Griégu tiixŭ ga nanatŭ. ⁴ Rŭ guxŭnema ga guma ãnegŭ ga nawa nachopetŭnewa, rŭ duŭxŭgŭmaã nŭxŭ nixugŭetanŭ ga yema ucŭxē ga yema Yerucharéŭcŭãx ga ngŭexŭgŭ ga Ngechuchu imugŭxŭ rŭ yema yaxōgŭxŭârŭ aëxgacŭgŭ nŭxŭ ixugŭxŭ. ⁵ Rŭ yemaãcŭ yexeraãcŭ meã nayaxōgŭ ga guxŭma ga yema yaxōgŭxŭ, rŭ guxŭ ga ngunexŭ rŭ yexeraãcŭ nimuētanŭ ga yema yexwacèx yaxōgŭxŭ.

Pauru nangoxetŭ rŭ wŭxi ga yatŭ ga Machedóniãcŭãxŭ nadau

⁶ Rŭ Áchiaanewa naxĩchaŭ na yéma nŭxŭ yaxugŭxŭcèx ga ore i mexŭ. Natŭrŭ Tupanaãē i Üünexŭ rŭ nŭxna nanachŭxu ga yema. Rŭ yemacèx Piríquiaanewa rŭ Gárataanewaama nachopetŭ. ⁷ Rŭ Míchíaarŭ naãnewa nangugŭ, rŭ yéma nagu narŭxĩnŭē ga na Bitíníãârŭ naãnewa naxĩxŭ. Natŭrŭ yéma rŭ ta Tupanaãē i Üünexŭ nŭxna nanachŭxu ga na yéma naxĩxŭ. ⁸ Rŭ yemacèx Míchíiaanewa nachopetŭmare rŭ ãne ga Tróawa nangugŭ. ⁹ Rŭ yema chŭtaxŭgu rŭ Pauru nangoxetŭ rŭ nŭxŭ nadau ga wŭxi ga yatŭ ga Machedóniãcŭãx ga napèxegu chicŭ. Rŭ nŭxŭ naceèxŭ, ñaxŭmaã: —¡Machedóniãwa naxŭ, rŭ toxŭ rŭngŭxēē! —ñaxŭmaã. ¹⁰ Rŭ yexguma yemaxŭ nadèuxgu ga Pauru, rŭ yexgumatama togŭ tamexēgŭ na Machedóniãwa taxĩxŭcèx. Yerŭ nŭxŭ tacuèxgŭ rŭ aixcŭmaxŭchi nixĩ ga Tupana toxcèx çaxŭ na yema duŭxŭgŭmaã nŭxŭ tixuxŭcèx ga ore i mexŭ.

Piripuwa nayexmagŭ ga Pauru ru Chira

¹¹ Rŭ Tróaarŭ türewa itaxĩachi, rŭ capaxŭ ga Chamotáchiucèx wèxgu taxĩ. Rŭ moxŭãcŭ Neãporiwa tangugŭ. ¹² Rŭ yéma rŭ dauxchitagu taxĩ rŭ Piripuwa tangugŭ. Rŭ guma nixĩ ya Dumacŭãxgŭarŭ ãne ga Machedóniããnegu naxŭgŭne. Rŭ guma nixĩ ya guxŭne ya ãneârŭ tamaēne ga yéma. Rŭ yéma tayexmagŭ ga ñuxre ga ngunexŭgŭ. ¹³ Rŭ ngŭxchigaarŭ ngunexŭgu, rŭ guma ãne iyacuáxŭwa taxĩ ga natŭpechinŭwa, yerŭ nagu tarŭxĩnŭēgu rŭ yéma nayexma ga Yudíugŭarŭ yumŭxēchica. Rŭ yéma tarŭtogŭ, rŭ namaã tidexagŭ ga ñuxre ga ngexŭgŭ ga yéma ngutaquèxegŭxŭ, rŭ namaã nŭxŭ tixugŭ ga Tupanaârŭ ore. ¹⁴ Rŭ yéma iyexma ga wŭxi ga ngecŭ ga Díria ga ngŭega ga Tupanaxŭ icuèxŭxŭcŭ. Rŭ Tiatíra ga ãnecŭãx iyixĩ. Rŭ dauxracharaxŭ ga naxchirumaã itaxe yerŭ yema nixĩ ga ngŭrŭ puracŭ. Rŭ ngŭma rŭ meãma yéma irŭxĩnŭ, yerŭ nŭma ga Cori ya Tupana rŭ ngŭxŭ nanangŭchaŭxēē na meã inaxĩnŭxŭcèx ga yema ore ga Pauru nŭxŭ ixuxŭ. ¹⁵ Rŭ yemawena rŭ ñuxŭchi líbaie wŭxigu namaã ga guxŭma ga ngŭtanŭxŭgŭ. Rŭ yixcama rŭ toxŭ icèèxŭ ñaxŭmaã: —Ngèxguma pema choxŭ pedèuxgu na aixcŭma nŭxŭ chayaxōxŭ ya Cori ya Tupana, rŭ marŭ name ega chopatagu peyapegŭgu —ngŭgŭrŭgŭ. Rŭ yéma toxŭ ixixēē. ¹⁶ Rŭ wŭxi ga ngunexŭgu ga yexguma yumŭxēwa taxĩxgu ga tomax, rŭ yexma ngŭxŭ tayangau ga

wūxi ga pacū ga corigūxtaxū ixīcū ga ngoxoāxcū. Rū yema pacū rū wūxi ga tacūxū cuèxcū iyixī, rū duūxūgūmaā nūxū iyaxu ga tacū tá yixcūra na ngupetūxū. Rū yemacèx ga duūxūgū rū dīerumaā ngīxū nanaxūtanū na nūxū yaxuxūcèx na tacū tá na ngupetūxū. Rū yemaācū poraācū dīeruxū itú naxcèx ga ngīrū corigū. ¹⁷ Rū ngīma towe ingē ga toma rū Pauru, rū tagaācū ngīgūrūgū: —Ñāā yatūgū rū Tupana ya tacūxūchimaārū duūxūgū nixī, rū pemaā nūxū nixu na ñuxācū tá penayaxuxū i maxū i taguma gūxū —ngīgūrūgū. ¹⁸ Rū yemaācū iyixī ga muxūma ga ngunexūgu. Rū dūxwa nūxū nawextūmūxū ga Pauru, rū ngīxcèx nadauegu, rū ñanagūrū nūxū ga yema ngoxo ga ngīwa yexmaxū: —Ngechuchu ya Cristuégagu cuxū chamu, na ngīwa ícuxūxūcèx —ñanagūrū. Rū yexgumatama ngīwa ínaxūxū ga yema ngoxo. ¹⁹ Rū yexguma nūxū nadaugūgu ga ngīrū corigū ga marū tama ngīgagu dīeru ngīxū na nayauxgūxū, rū Pauru rū Chiraxū ínayauxū, rū āēxgacūgūarū ngutaquēchicawa nanagagū. ²⁰ Rū āēxgacūgūna nanaxuaxū ga yema ngīrū corigū, rū ñanagūrūgū: —Ñāā Yudīugū rū tórū íānewa nanachixeāēxēēgū i duūxūgū. ²¹ —Rū tūxū nangúexēē na naxaurexūcèx i nacūmagū i tūxna chuxuxū i yixema i Dumacūāxgū —ñanagūrūgū. ²² Rū yexguma ga guxūma ga yema íānecūāx, rū Pauru rū Chirana nayuxgū. Rū yema āēxgacūgū nanamu na ínacūxūāxūcèx rū ngexchiruxūma naīxmenèxāmaā yaçuaixgūāxūcèx. ²³ Rū yexguma marū poraācū yaçuaixgūāguwena, rū poxcupataūgu nanawocu. Rū nūxna naxāga ga yema poxcupataūārū dauruū na meāma nūxna nadauxūcèx. ²⁴ Rū yexguma yemaxū naxīnūgu ga yema dauruū, rū poxcupataūārū aix-epexūchixū ga ucapugu nanawocu, rū meāma nayachotaparagū. ²⁵ Natūrū ngāxūcūūgu rū nayumūxēgū ga Pauru rū Chira, rū nawiyaegū, rū Tupanaxū nicuèxūūgū. Rū yema togū ga poxcuexū rū nūxū naxīnūē. ²⁶ Rū ngūrūāchi poraācū naxīāxāchiane, rū ínayangogūtanūāchi ga guma poxcupataūārū caxtagū. Rū yexgumatama niwāxnagū ga guxūma ga íāxgū ga guma poxcupataū. Rū guxūma ga yema poxcuexūārū cadenaparagū rū niwēgū. ²⁷ Rū pewa nabaixāchi ga yema poxcupataūārū dauruū. Rū yexguma nūxū nadēuxgu ga na yawāxnagūxū ga íāxgū ga guma poxcupataū rū nanayaxu ga norū tara na nūgū yamáxūcèx, yerū nūma nūxū nacuèxgu rū marū nibuxmū ga yema poxcuexū. ²⁸ Natūrū tagaācū aixta naxū ga Pauru, rū ñanagūrū nūxū: —¡Tāxū i cugū quimáxū! Rū guxāma i toma rū tanuxmagū —ñanagūrū. ²⁹ Rū yexguma ga yema poxcupataūārū dauruū rū naxcèx ínaca ga wūxi ga omū, rū inañaāchiācūma yema duūxūgū ípoxcuexūgu nayangaxi, rū yadurūxācūma Pauru rū Chirapēxegu nayacaxāpūxū. ³⁰ Rū yexguma íāxtūwa Pauru rū Chiraxū nagagū, rū ñanagūrū nūxū: —Pa Corigūx, ¡Tacū tá chaxūxū i choma na choxū nangēxmaxūcèx i maxū i taguma gūxū? —ñanagūrū. ³¹ Rū nūmagū rū nanangāxūgū rū ñanagūrūgū nūxū: —¡Nūxū yaxō ya Cori ya Ngechuchu, rū tá cuxū nangēxma i maxū i taguma gūxū i cuma rū guxū i cupatacūāx! —ñanagūrūgū. ³² Rū namaā rū guxūma ga yema napatacūāxgūmaā rū ta nūxū nixugūe ga Cori ya Tupanaārū ore. ³³ Rū yematama oragu ga chūtacū, rū nūma ga yema poxcupataūārū dauruū nayayauxgū ga norū oxrigū ga Pauru rū Chira. Rū yemawena rū ñuxūchi ínabaie ga nūma wūxigu tūmamaā ga naxmèx rū naxacūgū. ³⁴ Rū ñuxūchi ga nūma ga poxcupataūārū dauruū rū napatawa Pauruxū rū Chiraxū nagagū. Rū ōna nūxna naxā rū nataāē ga nūma rū guxūma ga napatacūāxgū ta, yerū Tupanaāxū nayaxōgū. ³⁵ Rū moxūācū pēxmama rū yema íāneārū āēxgacūgū rū yema poxcupataūārū dauruūxtawa nanamugū ga purichíagū na namaā nūxū yanaxugūxūcèx na Pauru rū Chiraxū ínamuxūxū. ³⁶ Rū yexguma ga yema poxcupataūārū dauruū rū ñanagūrū Pauruxū: —Rū ngēma āēxgacūgū rū nuā nanamugū i ore

na pexŭ íchamuxŭxŭcèx. ¡Rŭ ěcŭ ípechoxŭ, rŭ meã ípixĩ! —ñanagŭrŭ. ³⁷ Natŭrŭ ga Pauru rŭ ñanagŭrŭ nŭxŭ ga yema purichíagŭ: —Marŭ chixri tomaã nachopetŭ i toma i Dumacŭăxŭchigŭ na tixĩgŭxŭ, rŭ tama toxna nacaxiraãcŭma toxŭ niçuaixgŭ ga napĕxewa ga guxŭma ga duŭxŭgŭ, rŭ ñuxŭchi poxcupataŭgu toxŭ nawocu. Rŭ ñuxma rŭ cúacŭma toxŭ ínamuxŭchaŭ. Rŭ tãutãma ngĕmaãcŭ nixĩ. ¡Rŭ ěcŭ nŭmatama núma naxĩ i ãĕxgacŭgŭ na nŭmatama toxŭ íyamuxŭxŭcèx! —ñanagŭrŭ ga Pauru. ³⁸ Rŭ yexguma ga yema purichíagŭ rŭ ãĕxgacŭgŭmaã nŭxŭ nayarŭxugŭe ga yema ore. Rŭ poraãcŭ nabaixãchiãĕgŭ ga yema ãĕxgacŭgŭ ga yexguma nŭxŭ naxĩnŭĕgu ga na Dumacŭăxŭchi yixĩgŭxŭ. ³⁹ Rŭ yema naxĩ, rŭ Pauru rŭ Chirana nayacagŭ na nŭxŭ nŭxŭ nangechaŭgŭxŭcèx naxcèx ga yema namaã naxŭgŭxŭ. Rŭ ínanamuxŭ, rŭ nŭxŭ nacèxŭgŭ na nawa ínachoxŭxŭcèx ga guma íãne. ⁴⁰ Rŭ yexguma poxcupataŭwa ínachoxŭgu ga Pauru rŭ Chira, rŭ Díriapatawa naxĩ. Rŭ yema yaxŭgŭxŭmaã nangutaquĕxegŭ, rŭ nayaxucuxĕgŭ, rŭ Tupanaãrŭ oremaã nanataãĕxĕĕgŭ. Rŭ ñuxŭchi yemawena rŭ inaxĩãchi.

17

Pauru rŭ Chiramaã nanuĕ ga duŭxŭgŭ ga Techarónicawa

¹ Rŭ íãnegŭ ga Aŭfípori rŭ Aporóniãwa nachopetŭ ga Pauru rŭ Chira, rŭ íãne ga Techarónicawa nangugŭ. Rŭ yema nayexma ga wŭxi ga ngutaquĕxepataŭ ga Yudíugŭarŭ. ² Rŭ guma ngutaquĕxepataŭwa naxŭxŭ ga Pauru, yerŭ woetama yema nixĩ ga nacŭma. Rŭ tomaĕxpŭx ga ngŭxchigaarŭ ngunexŭgu rŭ Tupanaãrŭ ore ga ũmatŭxŭchiga yema Yudíugŭmaã yema nidexa. ³ Rŭ meãma naxcèx nanangoxĕĕ ga yema ore, rŭ namaã nŭxŭ nixu ga ŭacŭcèx na nayuxŭ ga Cristu rŭ tŭxcŭŭ wena na namaxŭxŭ. Rŭ ñanagŭrŭ: —Rŭ yima Cristu rŭ Ngechuchu nixĩ, rŭ nachiga nixĩ i pemaã nŭxŭ chixuxŭ —ñanagŭrŭ ga Pauru. ⁴ Rŭ ñuxre ga yema yexmagŭxŭ ga Yudíugŭ rŭ nayaxŭgŭ, rŭ Pauru rŭ Chiratanŭgu naxãgŭ. Rŭ yexgumarŭŭ ta Ngechuchuaxŭ nayaxŭgŭ ga muxŭma ga Griĕgugŭ ga noxri Yudíugŭrŭŭ yaxŭgŭxŭ. Rŭ muxŭma ga ngexŭgŭ ga dĕruăxgŭxŭ rŭ ta nayaxŭgŭ. ⁵ Rŭ yemacèx ga yema Yudíugŭ ga tama yaxŭgŭxŭ, rŭ nanuĕ rŭ nixãŭxãchigŭ yerŭ muxŭma ga duŭxŭgŭ nŭxŭ nayaxŭgŭ ga Pauru rŭ Chiraarŭ ore. Rŭ norŭ numaã nanaxĩtaquĕxexĕĕ ga ñuxre ga yatŭgŭ ga chixexŭgŭ ga taxuwama mexŭ. Rŭ yemaxŭ namugŭ na nanuĕxĕĕãxŭ ga yema íãnecŭăx ga duŭxŭgŭ. Rŭ Yachãŭpatawa nabuxmŭ ga yema chixexŭ ga duŭxŭgŭ na Pauru rŭ Chiracèx nadaugŭxŭcèx, yerŭ yema muxŭma ga duŭxŭgŭpĕxewa nanagagŭchaŭ. ⁶ Natŭrŭ yexguma tama yexma nŭxŭ yangaugŭgu, rŭ Yachãŭxŭ niyauxgŭ, rŭ ñuxre ga yaxŭgŭxŭxŭ rŭ ta ínayauxŭ. Rŭ nayagauxŭtanŭ, rŭ guma íãneãrŭ ãĕxgacŭgŭpĕxewa nanagagŭ. Rŭ tagaãcŭ ñanagŭrŭgŭ: —Ngĕma Pauru rŭ Chira i guxŭ i naãnewa duŭxŭgŭxŭ chixexĕĕgŭxŭ, rŭ núma rŭ ta nangugŭ. ⁷ —Rŭ Yachãŭ nixĩ ga nayaxuxŭ ga napatawa. Rŭ guxŭma i nŭmagŭ i ngĕma yatŭgŭ rŭ tama naga naxĩnŭĕchaŭ i tŭrŭ ãĕxgacŭ ya Dumacŭăxãrŭ mugŭ, erŭ nŭxŭ nixugŭe rŭ nangĕxma i to i ãĕxgacŭ i Ngechuchu —ñanagŭrŭgŭ ga yema chixexŭ ga duŭxŭgŭ. ⁸ Rŭ yexguma nŭxŭ naxĩnŭĕgu ga yema oregŭ, rŭ poraãcŭ nanuĕ ga yema muxŭma ga duŭxŭgŭ rŭ yema íãneãrŭ ãĕxgacŭgŭ ta. ⁹ Natŭrŭ ga Yachãŭ rŭ namŭcŭgŭ rŭ dĕrumaã nŭgŭ naxŭtanŭgŭ, rŭ yemacèx nayangĕxgŭ.

Pauru rŭ Chira rŭ Beréawa nayexmagŭ

¹⁰ Rŭ yematama ga chŭtaxŭgu rŭ yema yaxŭgŭxŭ ga Techarónicacŭăx rŭ íãne ga Beréawa nanamugŭ ga Pauru rŭ Chira. Rŭ yexguma yema nangugŭgu, rŭ Yudíugŭarŭ ngutaquĕxepataŭwa naxĩ. ¹¹ Rŭ yema Yudíugŭ ga Beréacŭăx, rŭ yema togŭ ga Yudíugŭ ga Techarónicawa yexmagŭxŭãrŭ yexera

narümemaëgü. Rū norü ngúchaŭmaã meãma nanayauxgü ga yema ore. Rū guxŭ ga ngunexŭgu rü Tupanaärü ore ga ümatŭxŭwa nangúe na meã nüxŭ nacuëxgŭxŭcèx ngoxi aixcŭma yŭxŭ ga yema ore ga Pauru rü Chira namaã nüxŭ ixuxŭ. ¹² Rū muxŭma ga yema Beréacŭãx ga Yudíugü rü Ngechuchuaxŭ nayaxögü. Rū yexgumarü ta ga muxŭma ga Griégügü ga Yatŭxŭgü rü ngexŭgü ga äëxgacügü namèx ixŭgŭxŭ, rü nayaxögü. ¹³ Natürü yexguma yema Yudíugü ga Techarónicacŭãx nüxŭ cuáchigagügu ga na Beréawa rü ta nüxŭ na yaxuxŭ ga Tupanaärü ore ga Pauru, rü yéma naxŭ, rü nananuëxëë ga yema Iãnecŭãx ga duŭxŭgü na Paurumaã chixri nachopetŭxŭcèx. ¹⁴ Natürü yexguma yemaxŭ nacuáchigagügu ga yema yaxögŭxŭ, rü paxama Pauruxŭ ínaxŭxŭëëgü ga guma Iãnewa. Rū ñuxre ga yema yaxögŭxŭ rü Pauruxŭ ínixŭmücügü. Rū dauxchitagu naxŭ rü ñuxmata taxtŭpechinüwa nangugü. Natürü ga Chira rü Timutéu rü Beréagu narüchooma. ¹⁵ Rū yema duŭxŭgü ga Pauruxŭ íxŭmücügŭxŭ, rü wapurugu ínayaxŭmücügü ñuxmata Iãne ga Atenawa nangugü, rü ñuxŭchi Beréacèx nawoegu. Rū Pauru rü yema duŭxŭgŭxŭ yéma namuga na paxa naxŭtawa naxŭxŭcèx ga Chira rü Timutéu.

Atenawa nayexma ga Pauru

¹⁶ Rū yexguma Pauru rü Atenawa Chira rü Timutéuxŭ nanguxëëgu, rü tama nataäecŭraxŭ yerü nüxŭ nadau ga guma Iãnewa ga na poraäcŭ naxchicŭnèxãmaãmare na natupanaãxgŭxŭ. ¹⁷ Rū yemacèx ga Pauru rü Yudíugüarü ngutaquëxepataŭwa Cristuchigaxŭ nixu namaã ga yema Yudíugü rü yema togü ga tama Yudíugü ixŭgŭxŭ ga Tupanaxŭ icuëxŭügŭxŭ. Rū guxŭ ga ngunexŭgu ga Iãneärü plaza ga taxŭwa rü ta Cristuchigaxŭ nixu namaã ga yema duŭxŭgü ga yéma ämücüwa íxŭ. ¹⁸ Rū nayexmagü ta ga ñuxre ga yatŭgü ga Epicúriugüarü nguxëëtaewa ngúexŭ, rü togü ga Etóicugüarü nguxëëtaewa ngúexŭ. Rū nümagü rü inanaxügüe ga Paurumaã na yaporagatanücüxŭ. Rū ñuxre ga nümagü rü ñanagürügü: —¿Rü tacü nixŭ i nüxŭ yaxuxŭ i ñaã yatü i idexaechamarexŭ? —ñanagürügü. Rū togü nanangãxŭgü, rü ñanagürügü: —Maneca wüxi i to i nachiŭãnecŭãxãrü tupanagüarü orearü uruŭ nixŭ —ñanagürügü. Rū yemaäcü nidexagü ga yema duŭxŭgü, yerü Pauru rü nüxŭ nixu ga ore ga mexŭ ga Ngechuchuchiga ga nuxäcü wena na namaxŭxŭ. ¹⁹ Rū düxwa norü äëxgacügüarü ngutaquëxechica ga Areópagu äegaxŭwa nanagagü. Rū yéma nüxna nacagü, rü ñanagürügü nüxŭ: —Toma nüxŭ tacuáxchaŭ na tacü rü nguxëëtae i ngexwacaxŭxŭ yŭxŭ i ngëma namaã cunguxëëtaexŭ. ²⁰ Erü toxcèx rü wüxi i taguma nüxŭ taxŭnŭëxŭ nixŭ i ngëma ore, rü nüxŭ tacuáxchaŭ na tacüchiga yŭxŭ i ngëma nüxŭ quixuxŭ —ñanagürügü. ²¹ Rū yemaäcü nidexagü, yerü guxŭma ga Atenacŭãxgü rü yema to ga nachiŭãnecŭãxgü ga yexma ächiŭgŭxŭ, rü woetama yexicagu narŭxŭnŭë ga na nüxŭ yaxuxŭcèx rü nüxŭ naxŭnŭëxŭcèx ga yexwacaxŭxŭ ga oregü. ²² Rū yemacèx ga Pauru rü inachi norü ngãxŭtanüwa ga yema duŭxŭgü ga yema Areópaguwa ngutaquëxegŭxŭ, rü ñanagürü: —Pa Atenacŭãxgŭx, nüxŭ chadau na poraäcü perü tupanagügu perŭxŭnŭëxŭ. ²³ —Erü ngëxguma perü ngutaquëxechicagüwa chixŭpetŭchigügu, rü nüxŭ chadau i naxchicŭnèxägü i nüxŭ picuëxŭügŭxŭ. Rū wüxi i nachicawa namaã chayarŭxŭ i wüxi i yumŭxëchica, rü ngëxma naxümatü i naega i ñaxŭ: “Tupana ya tama nüxŭ icuácü”, ñaxŭ. Rū yima Tupana ya tama nüxŭ pecuáäcŭma nüxŭ picuëxŭügŭcü nixŭ ya choma pemaã nüxŭ chixuchigacü. ²⁴ —Rü guma Tupana ga naxücü ga guxŭma ga naãnegü rü guxŭma i nawa ngëxmaxŭ, rü nüma nixŭ i norü yora yŭxŭ i daxŭgŭxŭ i naãne rü ñoma i naãne. Rū ngëmacèx nüma rü tama duŭxŭgü üxŭne ya tupaucagügu naxŭchiŭ. ²⁵ —Rü nümatama ya Tupana rü taxucèxma nanaxwèxe i duŭxŭgüarü ngŭxëë na namaxŭxŭcèx

i nūmax, erū taxuūma nūxŭ nataxu. Rū nūmatama guxāna nanaxā i maxŭ, rū tūxna nanaxā ya buanecū ya namaā ingŭātanūcūcū. Rū nūmatama tūxna nanaxā i guxūma. ²⁶—Nūma rū wūxi ga duūxŭwatama nanaxū ga guxūma ga duūxŭgū na guxū i naānewa nangēxmagūxŭcēx. Rū nūma inaxuneta i űuxgu tá na nabuxŭ i duūxŭgū rū ngexta tá naxāchiŭxŭ i wūxichigū. ²⁷⁻²⁸—Rū yemaācū nanaxū na naxcēx nadaugūxŭcēx ga duūxŭgū rū űoma ēānexŭwa űacūcēx idaugūxŭrūū nūxŭ iyangaugūxŭcēx. Natŭrū nūma ya Tupana rū woetama guxūguma tūxna nangaicamachirēx, erū nagagu nixī i imaxēxŭ rū ixīāxtanūcūxŭ rū ingēxmaxŭ, ngēxgumarūū i űuxre i perū poperaarū űumatūxŭgū naxūmatūxŭrūū, rū űanagŭrūgū:

“Rū Tupanaxācū tixīgū”, űanagŭrūgū. ²⁹—Rū űuxma na Tupanaxācūgū ixīgūxŭ, rū tama name i nagu tarūxŭnŭē rū Tupana rū wūxi i naxchicūnēxā i uirumūwa rū ēxna dŭērūmūwa rū ēxna nutawa ixūxŭrūū nixī. Erū guxūma i ngēma naxchicūnēxāgū rū nūmatama i duūxŭgū nagu naxŭnŭēxŭācūma nanaxūgū. ³⁰—Rū nuxcūma ga duūxŭgū rū naēchitamare ínatŭe, natŭrū nūma ga Tupana rū namaā yaxna naxŭnŭ. Natŭrū i űuxma ya Tupana rū nanamu i duūxŭgū i guxŭwama na naxcēx nadaugūxŭ rū nūxŭ naxoexŭ i nacūma i chixexŭgū. ³¹ Yerū nūma ga Tupana rū marū nūxŭ naxuneta i wūxi i ngunexŭ i nagu tá aixcūma guxŭ i űoma i naānecŭāx i duūxŭgūna naçaxŭ i norū maxŭchiga. Rū marū nūxŭ naxuneta ya wūxi ya yatŭ ya Ngechuchu, rū yima tá nixī ya duūxŭgūna çacū. Rū Tupana rū guxāxŭma nūxŭ nacūēxēē ga yema ga yexguma Ngechuchuxŭ wena namaxēēgu —űanagŭrū ga Pauru. ³² Rū yexguma yema wena na namaxēxŭchigaxŭ naxŭnŭēgu ga duūxŭgū, rū űuxre ga nūmagū rū Pauruxŭ nacugūe. Natŭrū ga togū rū űanagŭrūgū: —Rū wenagu táxarū cuxŭ itarūxŭnŭē i ngēmachiga —űanagŭrūgū. ³³ Rū yexguma ga Pauru rū ínaxŭxŭ ga natanūwa. ³⁴ Natŭrū űuxre ga duūxŭgū rū Pauruwe narūxī, rū Ngechuchuaxŭ nayaxōgū. Rū natanūwa nayexma ga Diuníchiu ga wūxi ga Areópaganūxŭ, rū wūxi ga ngecū ga Dámari ga ngēga. Rū űuxre ga togū rū ta nayaxōgū.

18

Corŭtiwa nayexma ga Pauru

¹ Rū yemawena rū inaxŭāchi ga Pauru ga Atenawa, rū íāne ga Corŭtiwa naxŭ. ² Rū yēma namaā inayarūxŭ ga wūxi ga yatŭ ga Aquiru ga Pōtuanecŭāx ga yexwacēx Dumawa ga Itáriaanewa ne ŭxŭ namēx ga Prisilamaāx. Rū yēma Corŭtiwa nayexma yerū Dumacŭāxgūarū āēxgacū ga Cáudiu nanamu ga na ínachoŭxŭcēx ga guxūma ga Yudíugū ga Dumawa. Rū Pauru rū naxŭtagu nanaxŭāne. ³ Rū yexma nape rū naxchirunaxcēx ga dūxenŭārū ŭwa nŭgūmaā napuracūe yerū woetama yema nixī ga norū puracū ga Pauru rū Aquiru rū Prisila. ⁴ Rū guxŭ ga ngŭxchigaarū ngunexŭgu rū Yudíugūarū ngutaquēxepataŭwa naxŭŭxŭ ga Pauru, rū duūxŭgūmaā nidexaxŭ, rū nayaxucŭxēgŭxŭ. Rū yexgumarūū ta nayaxucŭxēgŭxŭ ga yema duūxŭgū ga tama Yudíugū ixīgŭxŭ. ⁵ Rū yixcamaxŭra ínangugū ga Chira rū Timutéu ga Machedóniāwa ne íxŭ. Rū yexguma inanaxŭgū ga Pauru ga aixcūma poraācū nūxŭ na yaxuxŭ ga Tupanaārū ore. Rū meāma Yudíugŭxŭ nangúexēē na Ngechuchu rū Tupana Nane ya Cristu na yīxŭ. ⁶ Natŭrū nūmagū ga yema Yudíugū rū inanaxŭgūe ga Paurumaā na nanuēxŭ, rū namaā naguxchigagŭxŭ. Rū yexguma inapamŭchiru ga Pauru, yerū yema nixī ga wūxi ga cuēxruŭ naxcēx ga yema duūxŭgū na yemawa nūxŭ yacuēxāchitanūxŭcēx ga norū chixexŭ. Rū űanagŭrū nūxŭ: —Pegagu tátama nixī i na ipeyarŭtauxexŭ, rū marū tama chaugagu tá nixī. Rū űomaŭcūū

i choma rü tá ngēma tama Yudíugü ixīgüxütanüwa chaxü —ñanagürü ga Pauru. ⁷ Rü inaxüxü ga guma ngutaquēxepataüwa. Rü yéma nayexma ga wüxi ga yatü ga Tichiu ga Yuchugu āegaxü. Rü nüma rü Tupanaxü nangechaü rü yexma ngutaquēxepataücwagu naxāpata. Rü yemaxütawa naxü ga Pauru, rü yexma nape. ⁸ Rü Cripu ga ngutaquēxepataüärü āēxgacü rü namēx rü guxüma ga naxācügü rü Cori ya Ngechuchuaxü nayaxögü. Rü yexgumarüü ta rü muxüma ga Corñtiucüāxgü rü nayaxögü ga yexguma nüxü naxñüēgu ga yema ore, rü ñuxüchi Pauru inanabaiüxēē. ⁹ Rü wüxi ga chütaxü rü nangoxetü ga Pauru. Rü Cori ya Tupana namaā nidexa, rü ñanagürü: —¡Rü tãxü i cumuüxü! ¡Rü nüxü i xuama i chorü ore! ¡Rü tãxü i curüchianexü! ¹⁰ —Erü choma rü chacuxütagu, rü taxüetáma chixexü cumaā taxü. Erü daa ñānewa rü choxü nangēxma i muxüma i chorü duüxügü —ñanagürü ga Tupana. ¹¹ Rü wüxi ga taunecüarü ngāxü Corñtiuwa nayexma ga Pauru. Rü yéma yema duüxügütanüwa namaā nangüexēētae ga Tupanaärü ore. ¹² Natürü yexguma Acayaaneärü āēxgacü yixīgu ga Gariöü, rü yema Yudíugü rü wüxigu Pauruxü niyaxgü, rü āēxgacüpēxewa nanagagü. ¹³ Rü ñanagürügü nüxü ga guma āēxgacü: —Ñāñ yatü rü duüxügüxü naxucuxē na Tupanaxü yacuēxüügüxüçèx rü tama naga na naxñüēxüçèx i tachiüāneärü mugü —ñanagürügü. ¹⁴ Rü Pauru marü nachonagüchaü, natürü nüma ga āēxgacü ga Gariöü rü yema Yudíugüxü nangāxü, rü ñanagürü: —Rü ngēxguma chi wüxi i taxü i chixexü naxüxgu, rü ēxna namaētagu, rü ngēxguma chi nixī i choma i pexü ichaxñüxü, Pa Yudíugüx. ¹⁵ —Natürü ngēma pecümachiga rü perü mugüchiga rü perü ngüxēētaechiga na yīxü, rü choma rü tama nüxü chacuáxchaü i ngēma. ¡Rü pematama penamexēēx! Rü choma rü tama ngēmachigaarü āēxgacü chixixchaü —ñanagürü. ¹⁶ Rü yexguma inanawoxü ga yéma. ¹⁷ Rü yexguma guxüma ga yema duüxügü rü Yudíugüarü ngutaquēxepataüärü āēxgacü ga Chótenegu āegaxüxü yexma niyaxgü. Rü yexmatama āēxgacü ga Gariöüpēxegu nanacuaixgü. Natürü nüma ga Gariöü rü taxu ñanagürüama.

Pauru rü Aütioquíacèx nataegu, rü ñuxüchi wenaxärü inaxüächi na norü tomaēxpüxcüna to ga nachiuāneüwa nangeaxü ga Tupanaärü ore

¹⁸ Rü yemawena rü muxüma ga ngunexü yéma Corñtiuwa nayexma ga Pauru. Rü yixcama nüxü narümoxē ga yema yaxögüxü rü nüxna inaxüächi. Rü ñāne ga Chēcreawa naxü namaā ga Prisila rü Aquiru. Rü Chēcreawa nügü nidüpüxüeru ga Pauru yerü marü nayangüxēē ga wüxi ga uneta ga Tupanamaā nüxü yaxuxü. [Rü woetama yema nixī ga nacümagü ga Yudíugü ga yexguma yangüxēēgüāxgu ga wüxi ga uneta ga Tupanamaā nüxü yaxuxü.] Rü ñuxüchi Chēcreaarü türewa rü wüxi ga wapurugu nichoü na Chíríaanewa naxixüçèx. ¹⁹ Rü yexguma Epéchiuwa nangügügu, rü Pauru nüxna nixügachi ga Prisila rü Aquiru, rü Yudíugüarü ngutaquēxepataüwa naxü. Rü yéma namaā nidexa ga yema Yudíugü ga guma ngutaquēxepataüwa ngutaquēxegüxüxü. ²⁰ Rü yema Yudíugü, rü muxüma ga ngunexügü nüxü nacèxügü ga yexma na naxñüxüçèx, natürü ga nüma rü tama nanaxwèxe. ²¹ Rü yemacèx nüxü narümoxēāma, rü ñanagürü nüxü: —Rü ngēxguma Tupana naxwèxegu, rü wena táxarü pexcèx chataegu —ñanagürü. Rü yemawena rü Epéchiuarü türewa nayarüxüe, rü inaxüächi. ²² Rü Checharéaarü türewa nangu, rü yéma inaxüe. Rü ñuxüchi Yerucharéüwa naxü na nüxü yanamoxēxüçèx ga guxüma ga yema yaxögüxü. Rü ñuxüchi Aütioquíawa naxü. ²³ Rü yexguma marü ñuxre ga ngunexü yéma Aütioquíawa nayexmagu, rü wenaxärü inaxüächi ga Pauru na wüxichigü ga ñāne ga Gárataanewa rü Fríyíaanewa yexmagünewa

Íyadauxŭcèx rü yataãëxëëgüãxŭcèx ga guxŭma ga yema yaxôgŭxŭ ga guma ïãnegüwa yexmagŭxŭ.

Aporu rü Epéchiuwa nüxŭ nixu ga Tupanaãrŭ ore

²⁴ Rü yexgumaŭcŭü rü Epéchiuwa nangu ga wŭxi ga Yudíu ga Aporugu ãegaxŭ. Rü nüma rü ïãne ga Aleyãdríacŭãx nixŭ, rü nüxŭ natauxcha ga duŭxŭgŭpëxewa na yadexaxŭ. Rü meãma nüxŭ nacuèx ga Tupanaãrŭ ore i ũmatŭxŭ. ²⁵ Rü nüma meã nüxŭ nacuèx ga Cuáŭ ga baiŭxëëruŭãrŭ nguxëëtae ga Cori ga Ngechuchuchiga, rü nüxŭ nacuèx na ñuxãcŭ Cuáŭ duŭxŭgŭxŭ íbaiŭxëëxŭ. Natürŭ yexicaxŭtama nacuèx ga Ngechuchuchiga. Natürŭ poraãcŭ nataãëãcŭma nidexa rü aixcŭma nanangŭexëë ga duŭxŭgŭ. ²⁶ Rü nüma ga Aporu rü tama namuŭãcŭma inanaxŭgŭ ga na yadexaxŭ ga Yudíugŭarŭ ngutaquëxepataŭwa. Natürŭ yexguma Aporuxŭ naxŭnŭëgu ga Prisila rü Aquiru, rü napatawa nanagagŭ na yexeraãcŭ namaã inanguxŭxëëãxŭcèx ga Ngechuchuchiga. ²⁷ Rü yexguma Acayaanewa naxŭxchaŭgu ga Aporu, rü yema yaxôgŭxŭ ga Epéchiucŭãx nüxŭ narŭngŭxëëgŭ. Rü popera yéma namugŭ naxcèx ga yema yaxôgŭxŭ ga Acayacŭãx na meã Aporuxŭ nayauxgŭxŭcèx. Rü yexguma Acayawa nanguxgu ga Aporu rü poraãcŭ nüxŭ narŭngŭxëë ga yema duŭxŭgŭ ga Tupanaãrŭ ngechaŭgagu Ngechuchuaxŭ yaxôgŭxŭ. ²⁸ Rü guxŭ ga duŭxŭgŭpëxewa nüxŭ nüxŭ nacuèxëë ga poraãcŭ na ínatŭexŭ ga yema Yudíugŭ ga tama Ngechuchuxŭ cuáxchaŭgŭxŭ. Rü nümagŭ ga Yudíugŭ rü taxucŭrŭwama ñuxŭ ñanagŭrŭgŭ, yerŭ ga Aporu rü Tupanaãrŭ ore ga ũmatŭxŭwa meãma nüxŭ nanawëx ga na Ngechuchu rü aixcŭma Tupana Nane ya Cristu na yŭxŭ.

19

Epéchiuwa nayexma ga Pauru

¹ Rü yexguma Corítuwa nayexmayane ga Aporu, rü Pauru rü naxpŭxanegu idaxŭ ga namawa nixŭpetŭ, rü Epéchiuwa nangu. Rü yexma nüxŭ nayangau ga ñuxre ga yaxôgŭxŭ. ² Rü nüxna naca, rü ñanagŭrŭ nüxŭ: —¿Marŭ penayaxuxŭ i Tupanaãë i Üünexŭ ga yexguma peyaxôgŭgu? —ñanagŭrŭ. Rü nümagŭ nanangãxŭ, rü ñanagŭrŭgŭ: —Tama. Taguma nüxŭ taxŭnŭëchiga na tacŭ yŭxŭ i Tupanaãë i Üünexŭ —ñanagŭrŭgŭ. ³ Rü yexguma ga Pauru rü nüxna naca rü ñanagŭrŭ nüxŭ: —¿Texéaxŭ peyaxôgŭxŭ ga yexguma ípebaiŭgu? —ñanagŭrŭ. Rü nümagŭ nanangãxŭ, rü ñanagŭrŭgŭ: —Toma nüxŭ tayaxô ga yema Cuáŭ ga baiŭxëëruŭãrŭ nguxëëtae —ñanagŭrŭgŭ. ⁴ Rü yexguma ga Pauru rü ñanagŭrŭ nüxŭ: —Cuáŭ ínanabaiŭxëë ga yema duŭxŭgŭ ga nüxŭ rŭxoexŭ ga nacŭma ga chixexŭ rü Tupanacèx daugŭxŭ. Natürŭ yema duŭxŭgŭmaã nüxŭ nixu ta na nüxŭ yaxôgŭãxŭcèx ga Ngechuchu ga naweama ãcŭ —ñanagŭrŭ ga Pauru. ⁵ Rü yexguma yemaxŭ naxŭnŭëgu ga yema duŭxŭgŭ rü ínabaiŭ naegagu ga Cori ya Ngechuchu. ⁶ Rü yexguma Pauru rü yema yaxôgŭxŭetŭgu naxŭmëxgu, rü nüxna nangu ga Tupanaãë i Üünexŭ, rü to ga nagawachigŭ nidexagŭ, rü nüxŭ nixugŭe ga Tupanaãrŭ ore. ⁷ Rü maneca 12 ga yatŭ nixŭgŭ ga yema duŭxŭgŭ. ⁸ Rü tomaëxpŭx ga tauemacŭ yéma nayexma ga Pauru. Rü Yudíugŭarŭ ngutaquëxepataŭwa naxŭŭxŭ rü tama namuŭãcŭma nüxŭ nixuuxŭ ga Tupanaãrŭ ore. Rü nanangŭexëë na ñuxãcŭ ãëxgacŭ na yŭxŭ ya Tupana, rü nüxŭ nanangŭchaŭxëë na Ngechuchuaxŭ yaxôgŭãxŭcèx. ⁹ Natürŭ nayexma ga ñuxre ga duŭxŭgŭ ga tama nüxŭ cuëxgŭchaŭxŭ rü tama yaxôgŭchaŭxŭ. Rü nümagŭ inanaxŭgŭe ga na yema muxŭma ga duŭxŭgŭpëxewa chixexŭ yaxugŭexŭ nachigagu ga Cori ga Ngechuchu.

Rü yemacèx nüxna nixûgachi ga Pauru, rü toxnamana nanagagü ga yema yaxôgûxû. Rü guxû ga ngunexûgu namaã nüxû nixuchiga ga ore nawa ga wüxi ga ngutaquêxepataû ga Tiranuârü ngúepataû ga naega. ¹⁰ Rü yemaãcü nanaxü ga taxre ga taunecü, rü yemaãcü guxûma ga Áchiacûãxgü ga Yudíugü rü Griégugü rü nüxû naxînúê ga Cori ya Tupanaârü ore. ¹¹ Rü Tupana Pauruxû narüngûxêê ga na naxüãxû ga taxûgü ga mexûgü ga Tupanaârü poramaã naxûxû. ¹² Rü èjxrûxû ga norü dechugü ga Pauru rü naxchirugü rü duûxûgü rü yema idaaweexûxütawa nanangegü. Rü yexguma yema idaaweexû nüxû ingôgügüga ga yema naxchiru rü êxna dechu, rü naxcèx nitaanegü. Rü yema duûxûgü ga ngoxoãxgûxû rü ta naxcèx nitaanegü. ¹³ Natürü nayexma ga ñuxre ga Yudíugü ga ñânegüwachigü ixîetanûxû rü ngoxogüarü woxûwa puracüexû. Rü nüxû naxûgü na Cori ya Ngechuchuégagu na ínawoxûãxû ga ngoxogü nawa ga yema duûxûgü ga ngoxoãxgûxû. Rü ñanagürügü: —Ngechuchu ya Pauru nüxû ixuchigacüégagu pexû tamu na ípechoxûxücèx —ñanagürügü ga yema Yudíugü. ¹⁴ Rü yema 7 ga yema ügûxû, rü wüxi ga Yudíugüarü paigüarü ãêxgacü ga Echebaga ãegaxû nanegü nixîgü. ¹⁵ Natürü wüxi ga ngunexûgu ga yexguma wüxi ga ngoxoxû ínatèxüchigüchaûgu, rü yema ngoxo nanangãxû, rü ñanagürü: —Nüxû chacuèx ya Ngechuchu, rü nüxû chacuèx ya Pauru na texé yîixû. ¿Natürü i pema rü texégü pixîgü? —ñanagürü. ¹⁶ Rü yexguma ga yema yatü ga ngoxoãxû rü yema duûxûgü ga ínatèxüchigüchaûxûna nayuxu, rü nüxû narüporamaê ga guxûma, rü ínanagáuûxûne. Rü yemaãcü ngexchiruxûma rü napíexûma nibuxmü ga guma íwa. ¹⁷ Rü guxûma ga Yudíugü rü Griégugü ga Epéchiuwa yexmagûxû rü nüxû nacuáchiga ga yema. Rü poraãcü namuîê ga guxûma. Rü yemaãcü yexeraãcü natachiga ga Cori ga Ngechuchu ga yéma. ¹⁸ Rü muxûma ga yema yaxôgûxû rü yéma ningugüetanü, rü guxû ga duûxûgüpêxewa nüxû nixugüechigü ga nüma rü ta na nayuüechiréxû, natürü tá nüxû na naxoexû ga yema. ¹⁹ Rü muxûma ga yema iyuüechiréxû, rü yéma nanana ga norü poperagü ga yuüpane ga nawa nangúexû, rü guxâpêxewa ínanagu. Rü yexguma nangugügüãgu ga natanü ga yema poperagü, rü maneca 50,000 tachinü ga dîeru ga tatanûxûwa nangu. ²⁰ Rü yemaãcü ga Cori ya Tupanaârü ore, rü yexeraãcü nixüchigü, rü yexeraãcü duûxûgü nüxû nadau na ñuxãcü naporaxû ga yema ore. ²¹ Rü yemawena ga Pauru, rü nagu narüxînú ga Machedóniãñewa rü Acayaanewaxíra na naxûxû, rü yéma ñuxûchi Yerucharéüwa na naxûxû. Yerü yema ñanagürü: —Rü ngema Yerucharéüwa tá chaxû, rü yixcama rü Dumawa rü tá ta chaxû —ñanagürü. ²² Rü yemacèx nügüpêxegu Machedóniãñewa nanamugü ga taxre ga norü ngûxêëruû ga Timutéu rü Eratu. Natürü nüma ga Pauru rü ñuxre ga ngunexû Áchiagu narüxãûx.

Nanuê ga duûxûgü ga Epéchiuwa

²³ Rü yexgumaãcüü rü Epéchiuwa rü nanaxixãchitanüãê ga duûxûgü, rü poraãcü nanuê nachigagu ga Cori ya Tupanaârü ore. ²⁴ Rü yemaãcü naxüpetü nagagu ga wüxi ga yatü ga dîerumüwa puracûxû ga Demétriugu ãegaxû. Rü nüma rü ínanaxûxû ga norü tupana ga Atemíchaarü tupaucachicünêxãgü ga dîerumünaxcèx. Rü nayexma ga muxûma ga norü puracütanûxû ga yemawa puracüexû. Rü guxûma poraãcü meã nüxû naxâtanü ga yema puracü. ²⁵ Rü nüma ga Demétriü rü nanangutaquêxexêê ga guxûma ga puracütanûxû ga yemawa puracüexû, rü ñanagürü nüxû: —Pa Chomücügûx, meã nüxû pecuèxgü na ñaã tórü dîerumüârü puracügu na ngîxû iyaxuxû i tórü dîeru.

26 Rū marū nūxū pedaugū i ngēma Pauru rū nūxū pexīnūē na ñuxācū yaxucuxēgūāxū i duūxūgū, rū ñuxācū namaā nūxū yaxuxū na tama aixcūma tupanagū yīxū i ngēma tupanagū i yixema ixūgūxū. Rū ngēmaācū muxūma i duūxūgūxū nūxū narūxoexēē na tama tōrū tupanagūaxū yaxōgūāxūcēx. Rū tama nūma Epéchiuwaxicatama ngēxū nawagū natūrū wixguxūchi taēx guxū i Áchiaanewa ngēmaācū chixri nayaxucuxēgū i duūxūgū. 27 Rū pema nūxū pecuēx rū tōrū puracūcēx rū naxāūcūma i ngēma. Rū wūxi i chixexū ta nixī i naxcēx i tōrū tupana i Atemíchaarū tupauca ya taxūne. Rū ñuxma rū muxūma i duūxūgū rū ngīxū nangechaū i Atemícha i guxū i Áchiaanewa rū guxū i naānewa. Natūrū ngēma Pauruarū ucuxēgagu rū dūxwa taxuxūtáma ngīxū nangechaū i duūxūgū, rū ngēmaācū dūxwa inaārūxo tá ta i tōrū puracū —ñanagūrū ga Demétriu. 28 Rū yexguma yemaxū naxīnūēgu, rū poraācū nanuē, rū tagaācū ñanagūrūgū: —¡Namaxū i Epéchiucūāxgūarū tupana i Atemícha! —ñanagūrūgū. 29 Rū guxūma ga yema īānecūāxgū rū poraācū yexma ínatūēē. Rū ínanayauxū ga Gayu rū Aritárcu ga Machedóniānecūāxgū ga Paurumūcūgū, rū guma ī ga īāneārū ngutaquēxepataūwa nanagauxūtānū. 30 Rū Pauru rū ta yexma naxūcuchaū na yema duūxūgūmaā yadexaxūcēx, natūrū yema yaxōgūxū nūxna nanachūxu ga yexma na naxūcuxū. 31 Rū yema Áchiaaneārū āēxgacūgūtanūwa rū nayexma ga ñuxre ga Paurumūcūgū ixīgūxū. Rū nūmagū rū ta Pauruxūtāwa namugagū na tama yema ngutaquēxechicagu naxūcuxūcēx. 32 Rū yoxni ga duūxūgū ga yema ínangutaquēxegūxūwa, rū nūmaxū rū wūxi ga oremaā aita naxūe, rū togū ga to ga oremaā aita naxūe. Yerū poraācū nanaxīxāchiāēgū ga guxūma ga yema duūxūgū ga yēma ngutaquēxegūxū. Rū muxūma rū tama nūxū nacuēxgū ga ſacūcēx na nangutaquēxegūxū. 33 Natūrū yēma nayexma ga wūxi ga Yudíu ga Areyáūdrugu āegaxū. Rū yema togū ga Yudíugū rū namaā nūxū nixu ga ſacūcēx na nangutaquēxexū. Rū duūxūgūpēxewa nanamugū na yadexaxūcēx rū naētūwa nachogūxūcēx ga yema Yudíugū ga yēma yexmagūxū. Rū nūma ga Areyáūdru rū naxunagūmēxē na iyanachianegūxūcēx ga duūxūgū, na namaā yadexaxūcēx. 34 Natūrū yexguma nūxū yacuēxāchitanūgu ga Aré rū Yudíu na yīxū, rū guxūma ga yema duūxūgū rū wūxigu tagaācū aita naxūe. Rū taxre ga ora ninge ga na tagaācū ñagūxū: —¡Namaxū i Epéchiucūāxgūarū tupana i Atemícha! —ñagūxū. 35 Rū dūxwa yema īāneārū āēxgacū nanachiāchixēē ga yema muxūma ga duūxūgū, rū ñanagūrū nūxū: —Pa Epéchiucūāxgūx, guxūma i duūxūgū nūxū nacuēx na Atemíchaarū tupauca ya taxūneārū dauruū na ixīgūxū. Rū guxūma nūxū nacuēx na nūma tūxū nangēxmaxū i Atemíchachicūnēxā i daxūwa rūnguxū. 36 —Rū ñuxma na guxūma nūxū na cuáxū na aixcūma yīxū i ngēma, rū name nixī na pechiāchixū, rū taxuūma i chixexū pexūexū. 37 —Erū ñāā yatūgū i nuā pegagūxū, rū taxuūma i chixexū ngīmaā naxūgū i tōrū tupana, rū tama chixexū nixugūe ngīchigagu. 38 —Rū ngēxguma chi Demétriu rū ngēma namūcūgū i namaā napuracūexū rū nūxū nangēxmagu i ſacū i tama norū me ixīxū, rū nangēxma i ngutaquēxechicagū i ngextá āēxgacūgū duūxūgūxū ícagūxūwa. Rū name nixī na ngēma āēxgacūgūpēxewa namexēēāxū i ſacū i tama norū me ixīxū. 39 —Rū ngēxguma nangēxmagu i ſacū i to i perū guxchaxūgū, rū name nixī i īāneārū āēxgacūgūarū ngutaquēxewa penamexēē i ngēma. 40 —Erū ñuxma rū taxāūcūmaxūgugū rū ngūrūāchi āēxgacū ya tacū ya Dumawa ngēxmacū rū tūxna tá naxcēx naca i ngēma ñuxma ngupetūxū. Erū aixcūma taxumaāma tanangāxūega i āēxgacū, ega tūxna nacaxgu naxcēx i ñāā ngutaquēxe i nawa pexāūgatanūxū —ñanagūrū. 41 Rū yexguma marū yema ñaxguwena, rū ínayamugū ga yema duūxūgū.

20

Machedóniãñewa rü Griégugüchiũñewa naxũ ga Pauru

¹ Rŭ yexguma marũ nangupetũgu ga yema na íyacucuxũ ga duũxũgũ, rŭ Pauru naxcèx nangema ga yema yaxõgũxũ na yaxucuxẽgũãxũcèx. Rŭ yexguma marũ namaã nüxũ nachaugu, rŭ nüxũ narũmoxẽ, rŭ inaxũãchi ga Machedóniãñewa na naxũxũ. ² Rŭ yexguma yema naãñewa yaxüpetũgu, rŭ taãẽxũ ga oremaã nayaxucuxẽgũ ga yema yaxõgũxũ ga wũxichigũ ga ãñewa yexmagũxũ. Rŭ yemaãcü Griégugüchiũñewa nangu. ³ Rŭ yéma nayexma ga tomaẽxpũx ga tauemacü. Rŭ yexguma marũ inaxũãchichaũgu ga Chíríaanewa na naxũxũ, rŭ tama wapurugu nixũ yerũ nüxũ nacuáchiga ga na ñuxre ga Yudíugũ yamèxgũchaũxũ. Rŭ yemacèx nagu narũxĩnũ ga dauxchitagu na nataeguxũ, rŭ wenaxãrũ Machedóniãñewa na naxüpetũxũ. ⁴ Rŭ ínayaxũmücũgũ ga Chópate ga Beréacũãx ga Píru nane, rŭ Aritárcu rŭ Segũdu ga Techarónicacũãxgũ, rŭ Gayu ga Derbecũãx, rŭ Timutéu, rŭ Tíquicu, rŭ Turuquínu ga Áchiaanecũãxgũ. ⁵ Rŭ yema yatũgũ rŭ nüxĩra topèxegu naxãgũ, rŭ Tróawa toxũ nayarũnguxẽẽgũ. ⁶ Rŭ nawena ga yema Yudíugũarũ peta ga üpetũchiga ga pãũ ga ngearũ puxẽẽruũãxũ nagu nangõxgũxũ, rŭ wapurugu Piripuwa itaxĩãchi. Rŭ wũximẽẽxpũx ga ngunexũ ngupetũgu, rŭ Tróagu nüxũ tayangaugũ ga yema topèxegu ãgũxũ. Rŭ yexma tarũcho ga 7 ga ngunexũ.

Tróagu nanaxũãne ga Pauru

⁷ Rŭ yema yũxũarũ ngunexũgu rŭ tangutaquẽxegũ namaã ga yema yaxõgũxũ na tanangõxũcèx ga pãũ ga bũcuxũ yema Ngechuchu toxũ ngúexẽẽxũrũ. Rŭ yema yaxõgũxũmaã nidexa ga Pauru. Rŭ nanamèxẽẽ ga norũ dexa ñuxmata ngãxũcüwa nangu, yerũ moxũãcü inaxũãchichaũ. ⁸⁻⁹ Rŭ daxũwa ga guma ãpataarũ tomaẽxpũxchiũwa yexmaxũ ga ucapuwa tangutaquẽxegũ. Rŭ namu ga omũ ga yéma naĩgũxũ. Rŭ nayexma ga wũxi ga ngextũxũcü ga Eutícugu ãegacü. Rŭ yéma wũxi ga yema ucaputapũxarũ ããxwa narũto. Natũrũ ga Pauruarũ dexa, rŭ poraãcü namèx. Rŭ yemacèx ga guma ngextũxũcü rŭ poraãcü nayaxta, rŭ dũxwa nipeãchi rŭ yema ããxwa narũngu, rŭ ñaxtũanegu nangu. Rŭ yéma yucũma nanayauxgũ. ¹⁰ Rŭ ínarũxĩ ga Pauru, rŭ nayanawũxũchi ga guma ngextũxũcü, rŭ duũxũgũxũ ñanagũrũ: —ĩTãxũ i pebaixãchiexũ, erũ namaxũ nixĩ! —ñanagũrũ. ¹¹ Rŭ yexguma wenaxãrũ daxũ naxĩ, rŭ inanabũcu ga yema pãũ, rŭ nanangõx. Rŭ wenaxãrũ nidexa ñuxmata yangune, rŭ yexguma inaxũãchi. ¹² Rŭ guma ngextũxũcü rŭ maxũcü napatawa nanagagũ. Rŭ yemacèx poraãcü nataãẽgũ ga guxũma ga nũmagũ.

Tróawa inaxũãchi ga Pauru rŭ Miretuwa naxũ

¹³ Rŭ yexguma ga Pauru rŭ ñanagũrũ: —Dauxchitagu tá chixũ ñuxmatáta ããne ya Achuwa changu na ngema pexũ chixũexũcèx —ñanagũrũ. Rŭ yemacèx ga toma rŭ wapurugu tichoũ rŭ yoxni napèxegu taxĩ ñuxmata Achuwa tangugũ. ¹⁴ Rŭ yexguma Achugu Paurumaã togũ tayangauxgu, rŭ yéma toxũ nixũe. Rŭ tachopetũ ga yéma ñuxmata Miterénewa tangugũ. ¹⁵ Rŭ yéma itaxĩãchi rŭ moxũãcü Quiuarũ toxmèxtawa tachopetũ. Rŭ yemaãrũ moxũãcü Chamowa tangugũ. Rŭ yemaãrũ moxũãcüama Miretuwa tangugũ. ¹⁶ Rŭ yemaãcü ítixĩ yerũ ga Pauru rŭ tama Áchiaanegu nanuxcũchaũ. Yerũ nanaxwèxe ga paxa Yerucharũwa na nanguxũ naxcèx ga Pètecóstearũ ngunexũ. Rŭ yemacèx nagu narũxĩnũ na tama Epéchiugu íyadauxũ.

Yaxõgũxũãrũ ãẽxgacũgũ ga Epéchiucũãxmaã nidexa ga Pauru

17 Natürü yexguma Miretuwa tangugügu rü Epéchiuwa naxcèx namuga ga Pauru na naxütawa naxĩxücèx ga yema yaxögüxüârü âëxgacügü ga Epéchiucüâx. 18 Rü yexguma Pauruxütawa nangugügu, rü ñanagürü nüxü: — Pema meã nüxü pecuèxgü ga ñuxácü pepèxewa na chamaxüxü ga guxügu ga yexguma noxritama nuã Áchiaanewa chaxüxgu. 19 Rü guxüguma ga yexguma petanüwa chayexmagu, rü meãma chanaxü ga Cori ya Tupanaârü puracü, taguma chaugü chicuèxüüâcüma. Rü woo muëxpüxcüna poraâcü changechaügu, nagagu ga yema chixexü ga chomaã naxügüchaüxü ga Yudíugü, natürü naëtüwa chanaxüama ga yema puracü. 20 Rü taguma íchayachaxâchi ga pemaã nüxü na chixuxü ga guxüma ga yema ore ga perü mexücèx ixixü. Rü guxü ga duüxügüpèxewa, rü pepatagüwa rü ta pexü changúexëë ga yema ore. 21 Rü Yudíugümaã rü yema tama Yudíugü ixígüxümaã nüxü chixu na namexü ga na nüxü naxoexücèx ga norü chixexügü rü Tupanaga naxĩnüèxücèx, rü nüxü na yaxögüâxücèx ga tórü Cori ya Ngechuchu. 22 Rü ñuxma rü Yerucharéüwa chaxü erü Tupanaãë i Üünexü rü ngema choxü namu. Natürü tama nüxü chacuèx na tacü tá choxü üpetüxü i ngema. 23 Rü ngema nüxü chacuáxü nixí i duüxügü tá choxü napoxcu rü guxchaxügü tá choxü naxüpetü i Yerucharéüwa. Rü ngëxícatama nixí i chomaã nüxü yaxuxü i Tupanaãë i Üünexü i guxüne ya ñãne i ngextá íchixügüxüwa. 24 Natürü tama ngema äücümaxügu charüxĩnü erü nüetama nixí ega woo chayuxgu. Natürü ngema chanaxwèxexü nixí na taëëacüma chapuracüamaxü na meã chayanguxëèxücèx i ngema puracü ga tórü Cori ya Ngechuchu choxna äxü rü nüxü chixuxücèx i norü ore i mexü na ñuxácü Tupana tüxü ngechaüxü. 25 Rü ñuxma rü marü nüxü chacuèx rü tagutáma wena choxü pedaugü i pema ga marü pemaã nüxü chixuxe na ñuxácü äëxgacü na yíxü ya Tupana. 26 Rü ngëmacèx i ñoma i ngunexügu rü pemaã nüxü chixu rü marü tama chaugagu nixí ega texé petanüwa iyarütauxgu. 27 Erü marü meãma pemaã nüxü chixu i guxüma i ngema Tupana pexü naxwèxexü, rü taxuüma ichicux. 28 Rü ngëmacèx i ñuxma rü penaxwèxe na pexuãëgüxü rü meã nüxna pedaugüxü i guxüma i yaxögüxü i petanüwa ngëxmagüxü. Erü ngema nixí i Tupanaãxë i Üünexü nagu pexü mugüxü na nüxna pedaugüxücèx i ngema Tupanaârü duüxügü i yaxögüxü i Ngechuchu nagümaâtama naxcèx taxexü. 29 Choma nüxü chacuèx rü ngëxguma íchixüxgu, rü chowena tá pexcèx nuã naxí i togü i duüxügü. Rü tá nanachixexëëchaü i ngema yaxögüxü ñoma airugü i idüraexü i carnerugüxü ngíachixëëxüüü. 30 Rü woo petanüwatátama nangëxmagü i nümaxü i tá doramaremaã nangúexëëxü i ngema yaxögüxü na nügüwe naxíxëëâxücèx. 31 ¡Pegüna pedaugü, rü nüxna pecuèxãchie na ñuxácü tomaëxpüx ga taunecügu rü ngunecü rü chütacü rü taguma íchayachaxâchixü ga pexcèx chaxauxácüma na pexü chixucuxëgüxü ga wüxichigü! 32 Rü ñuxmax, Pa Chaueneëgüx, rü Tupanana pexü chamugü. Rü chanaxwèxe i naga pexĩnüë i norü ore i tüxü nüxü cuèxëëxü na ñuxácü poraâcü tüxü nangechaüxü. Erü ngema norü ore tá pexü naporaexëë na tórü Coricèx pemaxëxücèx rü pexü nangëxmaxücèx i pechica namaã i guxüma i duüxügü i Tupana dexü. 33 Choma rü taxuguma chaugücèx chanaxwèxe ga texéarü díeru rü texéchiru. 34 Rü pematama rü meã nüxü pecuèx ga ñuxácü daa choxmëxmaã na chapuracüxü naxcèx ga yema choxü rü chomücügüaxü taxuxü. 35 Rü guxüguma meã pexü changúexëë na ngemaãcü pepuracüexü na nüxü perüngüxëëxücèx i ngema duüxügü i nüxü nataxuxü. Rü name nixí na nüxna pecuèxãchiexü i Cori ya Ngechuchuarü ore ga nümatama ñaxü:

“Rü narümemaë nixí i pema na toguena penaxãxü rü tama i tüma pexna

tanaxāxŭ”, ñaxŭ. ³⁶ Rŭ yexguma yema ñaxguwena ga Pauru, rŭ inacaxāpŭxŭ namaã ga guxŭma, rŭ nayumŭxē. ³⁷ Rŭ guxŭma poraãcŭ naxauxe, rŭ Pauruna nanēixāchigŭ, rŭ nŭxŭ nachŭxgŭ. ³⁸ Yerŭ poraãcŭ nangechaŭē naxcèx ga yema ore ga namaã nŭxŭ yaxuxŭ ga:

“Marŭ tagutáma wena choxŭ pedaugŭ” ñaxŭ. Rŭ nŭmagŭ ínayaxŭmŭcŭgŭ ñŭxmata wapuruwa nangu.

21

Yerucharéŭwa naxŭ ga Pauru

¹ Rŭ yexguma nŭxna itaxŭiachi ga yema yaxŭgŭxŭ, rŭ wapurugu tichoŭ. Rŭ capaxŭ ga Coscèx noxtacŭma tixaŭ. Rŭ moxŭãcŭ rŭ Rodawa taxŭ. Rŭ yéma itaxŭiachi, rŭ Pátarawa tangugŭ. ² Rŭ yexma nŭxŭ tayangau ga wŭxi ga wapuru ga Peníchiawa ŭxŭne. Rŭ nagu tichoŭ, rŭ itaxŭiachi. ³ Rŭ yixcamaxŭra nŭxŭ tadaugŭ ga Chipre. Rŭ torŭ toxwecŭwawaama naxŭ, rŭ nŭxŭ tachopetŭ. Rŭ itiñaxwetaxŭ ñŭxmata Chíríaanewa tangugŭ. Rŭ Tiruwa ítachoŭ, yerŭ yéma nixŭ ga ínanuŭãcuxŭ ga guma wapuru. ⁴ Rŭ yexma nŭxŭ tayangau ga yémacŭãx ga yaxŭgŭxŭ, rŭ 7 ga ngunexŭ yéma natanŭwa tayexmagŭ. Rŭ Tupanaãē i Ūñexŭ nayadexagŭxēē ga yema yaxŭgŭxŭ, rŭ Pauruxŭ ñanagŭrŭgŭ: —¡Tãxŭ i Yerucharéŭwa cuxŭxŭ! —ñanagŭrŭgŭ. ⁵ Natŭrŭ yexguma nangupetŭgu ga yema 7 ga ngunexŭgŭ, rŭ itaxŭiachi. Rŭ yema yaxŭgŭxŭ rŭ towe narŭxŭ. Rŭ naxmèxmaãchigŭ rŭ naxãcŭgŭmaãchigŭ toxŭ ínixŭmŭcŭgŭ ga guxŭma ñŭxmata guma ñãnechipenŭwa tangugŭ. Rŭ yexma naxnŭcŭgu tacaxgŭãpŭxŭ, rŭ tayumŭxēgŭ. ⁶ Rŭ yexguma ga toma rŭ nŭxŭ tarŭmoxēgŭ, rŭ tichoŭ ga wapuruwa. Rŭ nŭmagŭ rŭ napatacèx nawoegu. ⁷ Rŭ toma rŭ Tiruwa itaxŭiachi rŭ Turemáídawa tangugŭ. Rŭ yéma ítachoŭ, yerŭ yexma nayacuèx ga wapurugu na taxŭxŭ. Rŭ nŭxŭ tarŭmoxēgŭ ga yema yaxŭgŭxŭ ga yéma yexmagŭxŭ, rŭ wŭxi ga ngunexŭ natanŭgu tarŭcho. ⁸ Rŭ moxŭãcŭ itaxŭiachi ga yéma, rŭ Checharéawa tangugŭ. Rŭ Piripi ga Tupanaãrŭ orearŭ uruŭpatawa taxŭ. Rŭ nŭma rŭ yema 7 ga ngŭxēēruŭgŭ ga tupaucana daugŭxŭtanŭxŭ nixŭ. Rŭ yexma naxŭtagu tapegŭ. ⁹ Rŭ nŭma nŭxŭ iyexma ga āgŭmŭcŭ ga naxãcŭgŭ ga taguma ixãtecŭ ga Tupanaãrŭ orexŭ ixugŭecŭ. ¹⁰ Rŭ yexguma marŭ ñuxre ga ngunexŭ yéma tayexmagŭgu, rŭ Yudéaanewa ne naxŭ ga wŭxi ga Tupanaãrŭ orearŭ uruŭ ga Agabugu āegaxŭ. ¹¹ Rŭ yexguma toxŭtawa nanguxgu ga Agabu, rŭ nanayaxu ga Pauruarŭ goyexŭ. Rŭ namaã nŭgŭ ninèixgŭcutŭ, rŭ nŭgŭ nináímēx, rŭ ñanagŭrŭ: —Tupanaãē i Ūñexŭ marŭ chomaã nidexa rŭ ñanagŭrŭ:

“Rŭ ñaãcŭ tá nayanèixgŭ i Yudíugŭ i Yerucharéŭwa i ñaã goyexŭãrŭ yora. Rŭ ngēma duŭxŭgŭ i tama Yudíugŭ ixŭgŭxŭna tá nanamugŭ”, ñanagŭrŭ. ¹² Rŭ yexguma yema orexŭ taxŭnŭēgu, rŭ toma rŭ yema Checharéacŭãxgŭmaã Pauruxŭ tacèxŭgŭ ga tama Yerucharéŭwa na naxŭxŭcèx. ¹³ Natŭrŭ nŭma ga Pauru rŭ toxŭ nangãxŭ rŭ ñanagŭrŭ: —¿Tŭxcŭŭ pexauxe rŭ choxŭ pengechaŭxēē? Choma rŭ íchamemare na chináixŭ. Rŭ ngēxgumarŭŭ ta rŭ marŭ íchame na Yerucharéŭgu chayuxŭ naxcèx ya Cori ya Ngechuchu —ñanagŭrŭ. ¹⁴ Rŭ yexguma marŭ taxuacŭma tanachŭxugu, rŭ tachianemare, rŭ ñatarŭgŭ: —¡Ēcŭ yangu i Cori ya Tupanaãrŭ ngŭchaŭ! —ñatarŭgŭgŭ. ¹⁵ Rŭ yemawena rŭ togŭ tamexēēgŭ, rŭ Yerucharéŭwa taxŭ. ¹⁶ Rŭ towe narŭxŭ ga ñuxre ga yaxŭgŭxŭ ga Checharéacŭãxgŭ, rŭ Machŭŭpatawa toxŭ nagagŭ. Rŭ nŭma nixŭ ga wŭxi ga Chíperecŭãx ga ŭpamama woetama yaxŭxŭ. Rŭ naxŭtagu tapegŭxŭ.

Chaŭtiáguxŭtagu nanaxŭãne ga Pauru

17 Rū yexguma Yerucharéŭwa tangugūgu, rū yema yaxōgūxŭ rū taāēācūma toxŭ nayauxgū. 18 Rū moxŭācū ga Pauru rū tomaā Chaŭtiáguxŭtagu nanaxŭāne. Rū yéma nangutaquēxegū ga guxŭma ga yaxōgūxŭārū āēxgacūgū. 19 Rū nūxŭ narūmoxē ga Pauru, rū űuxŭchi meāma namaā nūxŭ nixu ga guxŭma ga yema Tupana ŭxŭ ga yexguma yema tama Yudíugū ixīgūxŭmaā nūxŭ yaxuxgu ga Tupanaārū ore. 20 Rū yexguma Pauruarū orexŭ naxīnūēgu ga nūmagū, rū Tupanaxŭ nicuēxūŭgū. Rū űanagūrūgū Pauruxŭ: —Dūcèx, Pa Toeneēx, cuma nūxŭ cucuèx rū nangēxma i muxŭchixŭ i Yudíugū i yaxōgūxŭ. Rū guxŭma i nūmagū rū nanaxwēxegū na nagu naxīxŭ i ngēma mugū ga Moīché ūmatūxŭ. 21 Natūrū ga togū ga tama yaxōgūxŭ rū marū namaā nūxŭ nixugūgū na cuma rū cunangúexēēxŭ i guxŭma i Yudíugū i togū i nachīŭānewa ngēxmagūxŭ, na tama naga naxīnūēxŭcèx i ngēma mugū ga Moīché ūmatūxŭ. Rū marū namaā nūxŭ nixugūgū na cunangúexēēxŭ na tama tūxŭ ínawiŭchèxmŭpēxechiraŭxŭcèx ya nanegū, rū na tama naga naxīnūēxŭcèx i tacūmagū ga Moīché tūxŭ muxŭ. 22 ¿Tacū tá ixūexŭ i űuxmax? Erū ngēma Yudíugū i yaxōgūxŭ rū aixcūma tá nūxŭ nacuēxgū na marū nuā cunguxŭ. 23 ¡Rū ngēmacèx name nixī na cunaxūxŭ i ngēma tá cumaā nūxŭ tixuxŭ! Nuā totanūwa nangēxma i āgūmūcū i yatūgū i yanguxēēchaŭxŭ i wūxi i uneta i Tupanamaā nūxŭ yaxuxŭ. 24 ¡Ngēma tupauca ya taxŭnewa nagagū, rū wūxigu namaā yanguxēē i ngēma tacūma ga Moīché tūxna āxŭ, rū Tupanapēxewa pegū peyamexēēgū! ¡Rū nūxŭ naxŭtanū i űuxregu nūxŭ naxātanū na yadŭpŭxŭerugūxŭcèx i ngēma yatūgū na ngēmaācū yanguxēēgūāxŭcèx i norū unetagū! Rū ngēmawa rū guxŭma i ngēma Yudíugū rū tá nūxŭ nacuēxgū na aixcūma cuma rū ta naga cuxīnūxŭxŭ i ngēma mugū ga Moīché ūmatūxŭ rū tama aixcūma na yīxŭ ga yema ore ga cuchiga ga nūxŭ yaxugūexŭ. 25 Rū űuxŭchi ngēma yaxōgūxŭ i tama Yudíugū ixīgūxŭ, rū marū naxcèx tanaxūmatū ga torū ore na tama nangōxgūāxŭcèx i tacū i namachi i marū togū norū tupanenetachicūnèxāgūxŭ namaā icuēxūŭgūxŭ, rū tama na nangōxgūāxŭcèx ya nagū, rū tama nangōxgūāxŭcèx i naēxŭgū rū ēxna naxŭnagū i wēxnaāxŭ, rū tama naī i ngemaā rū ēxna naī ya yatūmaā inapexŭcèx —űanagūrūgū.

Tupauca ga taxŭnegu Pauruxŭ niyauxgū

26 Rū yexguma ga Pauru rū yéma tupauca ga taxŭnewa nanagagū ga yema āgūmūcū ga yatūgū. Rū moxŭācū rū Tupanapēxewa nūgū namexēē ga Pauru wūxigu namaā ga yema yatūgū. Rū űuxŭchi guma tupauca ga taxŭnegu namaā naxūcu na paimaā nūxŭ yaxuxŭcèx na 7 ga ngunexŭgu tá yīxŭ na yanguxēēgūāxŭ ga yema norū uneta ga Tupanamaā nūxŭ yaxugūxŭ, rū yemawena rū tá na inaxāmaregūāxŭ ga norū āmaregū ga Tupanaxŭ namaā yacuēxūŭgūxŭ ga wūxichigū. 27 Rū yexguma marū nagŭxchaŭgu ga yema 7 ga ngunexŭ, rū űuxre ga Yudíugū ga Áchiaanecŭāxgū rū Pauruxŭ nadaugū ga tupauca ga taxŭnewa. Rū yema Yudíugū rū duŭxŭgūxŭ nanuēxēē na Pauruxŭ yayauxgūxŭcèx. Rū yemacèx Pauruna nayuxgū. 28 Rū tagaācū aita naxŭe űaxŭmaā: —Pa Tomūcūgū Pa Yudíugūx, ¡Paxa toxŭ perūngŭxēēx! űaā nixī i ngēma yatū i guxŭwama yangúexēēchigūxŭ i duŭxŭgū na taxchi naxaīexŭcèx i yixema i Yudíugū, rū naxchi na naxaīexŭcèx i ngēma mugū ga Moīché ūmatūxŭ rū daa tupauca ya taxŭne. Rū naētūwa i űuxmax rū nuxa daa tupauca ya taxŭnegu nanamucu i űuxre i duŭxŭgū i tama tacūmagu ŭxŭ, rū ngēmaācū nanaxŭxaxēē i űaā nachica i ūūnèxŭ —űanagūrūgū. 29 Rū yema űanagūrūgū yerū ŭpaacū Yerucharéŭwa Paurumaā nūxŭ nadaugū ga Turuquínu ga wūxi ga Epéchiucŭāx ga tama Yudíu ixīxŭ. Rū nūxŭ nacuēxgūgu

rü Pauru marü yexma nanaxücuxëë ga tupauca ga taxünegu. ³⁰ Rü guxüma ga yema ñānecüāxgü rü poraācü nanuē. Rü tupauca ga taxü necèx nibuxmü, rü Pauruxü niyauxgü, rü tupaucaarü ñāxtüwa nanatúchigü. Rü yexguma paxa nanawāxtagü ga guma tupauca ga taxü neärü ñāxgü. ³¹ Rü yexguma Pauruxü yamëxgüchaügu ga duüxü, rü Dumacüāx ga churaragüarü āëxgacüxütawa nanguchiga ga ore na guxüwama ga Yerucharéüwa rü na nanuëxü ga duüxü. ³² Rü yexgumatama ga guma churaragüarü āëxgacü rü nanangutaquëxexëë ga yema norü capitáügu namaā ga norü churaragü, rü paxa yema duüxügu íyexmagüxüwa naxī. Rü yexguma guma āëxgacüxü rü yema churaragüxü nadaugügu ga duüxü, rü ínayachaxāchigü ga na Pauruxü yamëxgüxü. ³³ Rü yexguma ga guma āëxgacü rü Paurucèx nixü rü nayayaxu. Rü nanamu na taxre ga cadenamaā na yanëixgüāxüçèx. Rü nüxna naca na texé yīxü, rü tacü naxüxü. ³⁴ Natürü yema muxüma ga duüxü rü toxica ga oremaā aita naxüe ga wüxichigü. Rü yexguma taxuacüma meā nüxü nacuëxgu ga tacüçèx na nanuëxü, rü guma āëxgacü rü nanamu na churaragüpatawa Pauruxü nagagüxü. ³⁵⁻³⁶ Rü yexguma churaragüpataarü toxōnewa nanguxgu ga Pauru, rü churaragü nayangetaügu naxchaxwa ga yema muxüma ga duüxü, yerü nanuëxüchi rü nawe nicaetanü rü ñānagürü: —¡Yamëxüchi! —ñānagürü.

Pauru rü duüxügüpëxewa nügüétüwa nidexa

³⁷ Rü yexguma marü churaragüpatagu yamucuchigüchaüāgu rü Pauru rü Griégugawa guma āëxgacüna naca rü ñānagürü: —¿Cuxü namexü na cumaā nüxü chixuxü i wüxi i ore? —ñānagürü. Rü nüma ga āëxgacü nanangāxü rü ñānagürü: —Ëxna nüxü cucuèx na Griégugawa quidexaxü. ³⁸ ¿Tama éxna cuma yīxü i Equitucüāx ga üpaxüra rü duüxüxü cunuëxëxü na āëxgacümaā nügü nadëixüçèx rü dauxchitawa ga taxüema íxāpataxüwa cunagagüxü ga 4000 ga yatügu ga máëtaxügu? —ñānagürü. ³⁹ Rü yexguma ga Pauru rü nanangāxü, rü ñānagürü: —Choma rü Yudíu chixī, rü Tarsucüāx chixī. Rü Chiríchiaanewa rü yima nixī ya wüxi ya ñāne ya taxüchine. Rü ngëxguma curü me yixü, rü cuxna chaca na duüxügümaā chidexaxüçèx —ñānagürü. ⁴⁰ Rü yexguma ga guma āëxgacü rü: —Ngü —ñānagürü. Rü nüma ga Pauru, rü churaragüpataarü toxōnegu nachinagü, rü naxunagümëxë na nachiāchixüçèx ga duüxü. Rü yexguma nachiāchiegu, rü Yudíugawa nidexa, rü ñānagürü nüxü:

22

1—Pa Chautanüxügu, ¡rü choxü iperüxñüë i ngëma ñuxma tá pemaā nüxü chixuxü na chaugüétüwa chidexaxüçèx! —ñānagürü. ² Rü yexguma nüxü naxñüëgu ga na Yudíugawa namaā yadexaxü, rü yexeraācü inayarüchianegü. Rü yexguma namaā yadexagu ga Pauru, rü ñānagürü: ³ —Choma rü Yudíu chixī, rü Chiríchiaaneärü ñāne ga Tarsugu chabu. Natürü doma ñāne ya Yerucharéüwa chaya, rü Gamaniéu nixī ga chorü nguxëëruü. Rü meāma nawa changux ga guxüma ga mugü ga nuxcümaüxü ga tórü oxigü nagu íxü. Rü guxüguma naxçèx chadau na guxüma i chorü ngüchaümaā Tupanaāxü chapuracüxü, ngëxgumarü i guxāma i pema i ñuxmax. ⁴ —Rü choma ga üpa rü poraācü nawe chingëchigü ga yema Ngechuchuaxü yaxögüxü na chanadëixüçèx. Rü íchanayauxü, rü chanapoxcue ga muxüma ga yema yaxögüxü ga yatüxü rü ngexü. ⁵ —Rü nüma ya paigüeru rü guxüma i tupauca ya taxü neärü āëxgacügüerugü rü nüxü nacuëxgü na aixcüma yīxü i ñāā chorü ore. Yerü nümagü rü choxna nanaxāgü ga popera na choxü nangüxëëgüxüçèx ga tatanüxügu ga Yudíugü ga Damacuwa yexmagüxü. Rü

yéma Damacuwa chaxū na naxcèx chayadauxū-cèx ga yema Ngechuchuaxū yaxōgūxū, rü nuã Yerucharéūwa na chanagagūxūcèx rü nuxã chayapox-cuexūcèx.

Pauru nüxū nixu na ñuxãcü Ngechuchuaxū yaxōōxū

⁶ —Natürü yexguma namagu chixūyane rü marü chingaicaxgu ga Damacuwa na changuxū, rü meãma tocuchigu nixī ga yexguma. Rū ngürüãchi wūxi ga omü ga poraxū ga daxūwa ne baxixū rü choxū nabaxi.

⁷—Rü ñaxtūanegu chayangu, rü nüxū chaxīnū ga wūxi ga naga ga ñaxū choxū:

“Pa Chaurux, ¿tüxcüü i chowe quingēchigūxū?” ñaxū. ⁸—Rü yexguma ga choma rü chanangāxū, rü ñacharügü:

“¿Rü texé quixī Pa Corix?” ñacharügü. Rü nüma ga yema naga rü choxū nangāxū, rü ñanagürü:

“Choma nixī i Ngechuchu ya Nacharétucūãx, rü chorü duūxūgü nixī i ngēma nawe quingēchigūxū”, ñanagürü choxū. ⁹—Rü yema chomücügü rü nüxū nadaugü ga yema omü, rü nabaixāchiãēgü, natürü tama nüxū naxīnūē ga yema naga ga chomaã idexaxū. ¹⁰—Rü nüxna chaca, rü ñacharügü ga chomax:

“¿Rü tacü tá chaxūxū, Pa Corix?” ñacharügü. Rü yexguma ñanagürü choxū ga Cori:

“¡Írūda, rü inachi, rü Damacuwa naxū, rü ngēma tá cumaã nüxū nixu ya wūxi ya yatü na tacü tá cuxūxū!” ñanagürü ga nüma ga Cori. ¹¹—Rü yexguma ga choma rü chixoxetü yema omüēmamaã, rü yemacèx ga yema chomücügü rü choxmēxgu yangīgüãcüma choxū nigagü, rü yemaãcü Damacuwa changu.

¹²—Rü yéma nayexma ga wūxi ga yatü ga Ananíãgu ãegacü. Rü nüma nixī ga wūxi ga yatü ga aixcüma Tupanaga ínücü, rü nüma rü meãma nayanguxēē ga yema mugü ga Moïché umatūxū. Rü guxūma ga Yudíugü ga Damacuwa yexmagūxū, rü meã nachiga nidexagü. ¹³—Rü nüma ga Ananíã rü choxū ínayadau. Rü yexguma chauxūtawa nanguxgu rü ñanagürü choxū:

“Pa Chaueneē Pa Chaurux, ¡wenaxārü ingoxnaxētü!” ñanagürü. Rü yexgumatama wenaxārü chingoxnaxētü rü meãma nüxū chadau. ¹⁴—Rü yexguma ñanagürü ta:

“Yima Tupana ya nuxcümaūgūxū ga tórü oxigüarü Tupana cuxū naxuneta na nüxū cucuáxūcèx i norü ngúchañ, rü na nüxū cudaduxūcèx ya yima Cristu ya mecü, rü nañxwatama nüxū cuxīnūxūcèx i naga. ¹⁵—Erü cuma tá nixī i guxū i duūxūgümaã nüxū quixuchigaxū ga ñuxãcü na Tupanaxū cudaduxū rü cumaã yadexaxū. ¹⁶—¡Rü ñuxma rü marü taxuūma ícunanguxēē! ¡Rü írūda rü ínabaie! ¡Rü Cori ya Ngechuchuégagu naxcèx ínaca na cuxū nüxū nangechaūxūcèx i curü pecadugü!” ñanagürü choxū.

Pauru nüxū nixu na ñuxãcü Tupana namuxū na yema tama Yudíugü ixīgüxūttanüwa naxūxūcèx

¹⁷⁻¹⁸—Rü yexguma Yerucharéūcèx chataeguxgu, rü tupauca ga taxūnewa chaxū na yéma chayumūxūcèx. Rü changoxetü, rü nüxū chadau ga Cori ya Tupana. Rü ñanagürü choxū:

“¡Napaxaãē, rü inaxūãchi i nuã Yerucharéūwa, erü duūxūgü rü tãūtáma naga naxīnūē i ngēma ore i chauchiga nüxū quixuxū!” ñanagürü. ¹⁹—Rü choma chanangāxū, rü ñacharügü:

“Pa Corix, nüma i duūxūgü rü nüxū nacuèxgü ga choma na yīxū ga guxūne ga ngutaquēxepataūgüwa chaxūxū rü íchanayauxūxū rü chanapoxcuexū rü chayaçuaixgūxū ga yema cuxū yaxōgūxū. ²⁰—Rü yexguma yamèxgüãgu ga guma curü duūcü ga Etébañ ga curü orearü uruū, rü chomatama yéma chayexma, rü chorü me nixī ga na yamèxgüãxū. Rü choma nixī ga nüxna

chadauxü ga naxchiru ga yema yamèxgüxü”, ñacharügü nüxü. ²¹ —Natürü nüma ga Cori rü ñanagürü choxü:

“¡Rü paxa cugü namexëe rü inaxüãchi! Erü yaxüguxü i nachiüãnegüwa i ngëma duüxügü i tama Yudíugü ixíngüxütanüwa tá cuxü chamu” —ñanagürü.

Churaragüarü ãëxgacümëxëwa nayexma ga Pauru

²² Rü yexguma Pauru yema ñaxgu rü yexma nayacuèxëëgü ga na meã nüxü inaxínüëxü ga yema duüxügü. Rü yexguma aita naxüëacüma ñanagürügü: —¡Noxtacüma peyamá! Rü name nixí i na nayuxü rü ngëxma na yanaxoxü —ñanagürügü. ²³ Rü yexguma aita naxüëgu, rü norü gáuxüchirumaã nibu-atanücüü, rü átëxëanexü daxü niwogütanücüü. ²⁴ Rü yexguma yemaxü nadëuxgu ga churaragüarü ãëxgacü, rü nanamu ga churaragüpatagu na yamucuchigüãxüçëx ga Pauru. Rü nanamu na poraãcü naçuaixgüãxüçëx na yadexaxüçëx na nüxü nacuáxüçëx ga tüxcüü yíixü na yemaãcü nachigamaã aita naxüëxü ga duüxügü. ²⁵ Rü yexguma marü yanëixgüãgu na naçuaixgüãxüçëx, rü Pauru nüxna naca ga yema capitáü ga yéma yexmaxü, rü ñanagürü: —¿Éxna pexmëxwa nangëxma na penaçuaixixü i wüxi i Dumacüãx ega tama nüxna pecaxiragu? —ñanagürü. ²⁶ Rü yexguma yemaxü naxínügu ga capitáü, rü guma churaragüarü ãëxgacüxütawa naxü, rü namaã nüxü nixu, rü ñanagürü: —¿Tacü tá cuxü? Erü ñaã yatü rü Dumacüãx nixí —ñanagürü. ²⁷ Rü yexguma ga guma churaragüarü ãëxgacü, rü Paurucëx nixü, rü nüxna naca rü ñanagürü nüxü: —¿Aixcüma yíixü na Dumacüãx quiixü i cumax? —ñanagürü. Rü nüma ga Pauru nanangãxü, rü: —Ngü —ñanagürü. ²⁸ Rü yexguma ga guma churaragüarü ãëxgacü rü nanangãxü, rü ñanagürü: —Choma rü poraãcü choxü naxátanü na Dumacüãx chaugü chixíxëëxü —ñanagürü. Rü yexguma nachonagü ga Pauru, rü ñanagürü: —Naturü i choma rü woetama chorü bucüma Dumacüãx chixí —ñanagürü. ²⁹ Rü yexgumatama nüxna nixígachi ga yema Pauruxü çuaixgüchaüxü. Rü nümatama ga yema churaragüarü ãëxgacü rü ta namuü ga yexguma nüxü nacuèxgu ga Dumacüãx na yíixü ga Pauru, yerü marü cadenamaã nayanéixchirëx.

Yudíugüarü ãëxgacügütücumüpëxëwa nayexma ga Pauru

³⁰ Rü yema churaragüarü ãëxgacü meãma nüxü nacuáxchaü ga tüxcüü na ínaxuaxügüãxü ga yema Yudíugü. Rü yemacëx ga moxüãcü rü nanamu na nangutaquëxëgüxüçëx ga paigüarü ãëxgacügü rü guxüma ga yema ãëxgacügütücumü ga Yudíugüarü. Rü nayawëgü ga Pauruarü cadena rü yéma ãëxgacügüpëxëwa nanagagü.

23

¹ Rü Pauru meãma nüxü nadawenü ga yema ãëxgacügü, rü ñanagürü nüxü: —Pa Chautanüxügüx, chomatama nüxü chacuèx rü guxüguma meã chamaxü ga Tupanapëxëwa ñuxmata ñoma i ngunexüwa nangu —ñanagürü. ² Rü yexguma ga yema paigüeru ga Ananíã rü nanamu ga yema Pauruarü ngaicamana yexmagüxü na naãxwa tayamëxgüxüçëx. ³ Rü yexguma ga Pauru rü ñanagürü nüxü: —Tupana tá cuxü napéax, Pa ãëxgacüx. Cuma rü düxëtüwaxica cume natürü aixepena rü nachixe i curü maxü. Rü ñuxma rü ngëma curüto na Moíché ümatüxü i mugü nüxü ixuxüãcüma choxna cuçaxüçëx. Naturü wüxi i chixexü cuxü erü cumatama rü tama naga cuxínü i ngëma Tupana tüxü muxü erü cunamu na choxü napéaxüçëx —ñanagürü ga Pauru. ⁴ Rü yexguma ga yema yexmagüxü rü ñanagürügü: —¿Tüxcüü i ngëmaãcü tacü namaã quixugüxü i paigüeru ya Tupana nüxü unetacü? —ñanagürügü. ⁵ Rü Pauru nanangãxü, rü ñanagürü: —Tama nüxü chacuèx, Pa

Chautanūxūgūx, na paigüeru yīxū. Erü Tupanaärü ore i ümatūxūwa nūxū tadau rü ñanagürü:

“¡Tama curü âëxgacūmaã chixexū quixugü!”

ñanagürü. ⁶ Rü yexguma nūxū nacuèxgu ga Pauru ga na Chaduchéugü yīxū ga togü, rü na Parichéugü yīxū ga togü, rü yema âëxgacügüpëxewa tagaãcūma ñanagürü: —Pa Chautanūxūgūx, choma rü Parichéu chixī, rü Parichéu nane chixī. Rü ngēmacèx choxna pecagü i ñuxmax, erü chayaxō i wena tá na namaxèxū i yuexū —ñanagürü. ⁷ Rü yexguma yema ñaxgu ga Pauru, rü yema Parichéugü rü Chaduchéugü rü inanaxügüe ga nügümaã na iyaporagaexū, rü yexma nügü nitoye ga yema ngutaquëxewa. ⁸ Erü ngēma Chaduchéugü nagu rüxīnūëgu rü tama wena namaxē i ngēma yuexū, rü nataxuma i orearü ngeruügü i daxūcūãx, rü nataxuma i naãëgü —ñanagürügü. Natürü ngēma Parichéugü rü nayaxōgü na nangëxmaxū i guxūma i ngēma. ⁹ Rü yemacèx guxūma aita naxüe. Rü ñuxūchi ñuxre ga ngüxëëruügü ga Moïchéarü mugüwa nguxëëtaegūxū ga Parichéugütücümüwa ügūxū rü inachigü, rü ñanagürügü: —Toxcèx rü taxuūma i chixexū naxü i ñaã yatü. Bexmana wüxi i tacü rü naãë namaã nidexa rü ëxna wüxi i orearü ngeruū i daxūcūãx —ñanagürügü. ¹⁰ Rü yexeraãcü norü numaã nanaxixächiãëgü ga yema duūxūgü. Rü yemacèx naxoegaãë ga guma churaragüarü âëxgacü ga na Paurugu nagaugügüchaūxū. Rü norü churaragūxū namu na yéma duūxügütanüwa Pauruxū napugūxücèx rü wena churaragüpatawa na nagagüãxücèx. ¹¹ Rü moxūãcüarü chütaxūgu Paurucèx nangox ga Cori ga Tupana, rü ñanagürü nūxū: —¡Rü nataãë! Rü ngëxgumarüü i núma Yerucharéüwa choxū na quixuchigaxū, rü ngëxgumarüü tá ta nixī i Dumawa na choxū quixuchigaxū —ñanagürü ga Tupana.

Yudíugü naxcèx nadaugü na ñuxãcü Pauruxü yamèxgüchaūxü

¹² Rü moxūãcü, rü ñuxre ga Yudíugü rü nügümaã inaxunetagü ga tãütáma na nachibüexū rü naxaxegūxū ñuxmatáta Pauruxü yamèxgü. Rü ñanagürügü: —Tachixexügügü tá ega tacü ingōxgügu naxūpa na yamáxū i Pauru —ñanagürügü. ¹³ Rü 40 arü yexera ga yatügü nixī ga yema nügümaã ixunetagūxū. ¹⁴ Rü paigüarü âëxgacügütanüwa rü Yudíugüarü âëxgacügügütanüwa naxī, rü ñanagürügü nūxū: —Marü togümaã itaxuneta rü tachixexügügü tá ega tacü tangōxgügu naxūpa na tayamáxū i Pauru. ¹⁵ Rü name nixī i pema rü ngēma togü i pexrūü âëxgacügütücümüwa ügūxū, rü churaragüarü âëxgacüna naxcèx peyacagü i ñuxma na moxū wena pepëxewa nagagüãxücèx i Pauru. ¡Rü namaã nūxū pixu na penaxwëxegünetaxū na meã nūxū pecuáxchaūxū i nachiga! Rü toma rü tá marü ítamemare na namagu tayamáxücèx naxūpa na ínanguxū —ñanagürügü. ¹⁶ Natürü ngīne ga Paurueyèx rü nūxū nacuáchiga ga Pauruxü na yamèxgüchaūxū, rü yemacèx churaragüpatawa naxū na Paurumaã nūxū yanaxuxücèx. ¹⁷ Rü Pauru naxcèx naca ga wüxi ga capitáü, rü ñanagürü nūxū: —¡Curü âëxgacüxütawa naga i ñaã ngextüxūxū, erü nūxū nangëxma i ore i namaã nūxū yaxuxchaūxū! —ñanagürü. ¹⁸ Rü yema capitáü rü âëxgacüxütawa nanaga ga yema ngextüxūxū. Rü ñanagürü nūxū: —Ngēma poxcuxū i Pauru rü chauxcèx naca, rü choxna naca na nuã cuxütawa chanagaxücèx i ñaã ngextüxūxū, erü nūxū nangëxma i ore i cumaã nūxū yaxuxchaūxū —ñanagürü. ¹⁹ Rü naxmëxgu yayauxächiãcūma toxnamana nanaga ga âëxgacü, rü yéma nūxna naca rü ñanagürü: —¡Tacü yīxū i ngēma chomaã nūxū quixuxchaūxū? —ñanagürü. ²⁰ Rü núma ga ngextüxūxū nanangāxū, rü ñanagürü: —Ngēma Yudíugü, rü nügümaã inaxunetagü na cuxna naxcèx nacagūxücèx na moxū Yudíugüarü âëxgacügütücümüpëxewa na cunagaxücèx i Pauru. Rü tá cumaã nūxū nixugü na meã nūxū

nacuèxgüchaũxũ i nachiga. ²¹ —¡Natürü täütáma nüxũ cuyaxõ! Erü 40 arü yexera i yatügü rü marü nügümaã inaxunetagu, rü ñanagürügü:

“Tachixexügugü tá ega tacü ingõxgügu rü ěxna ixaxegügu naxũpa na yamáxũ i Pauru”, ñanagürügü. Rũ ñuxma rü marü ínamemare, rü namagu nananèixgü, rü curü orexicatama nixĩ i ñuxma ínanguxèègüxũ —ñanagürü. ²² Rũ yexguma ga ãèxgacü rü ínayamu ga yema ngextüxüxũ, rü nüxna naxãga na taxúemaã nüxũ yaxuxücèx ga na namaã nüxũ yaxuxũ ga yemachiga.

Ãèxgacü ga Perixütawa Pauruxũ namu

²³ Rũ yexguma ga guma ãèxgacü rü taxre ga norü capitáüçèx naca, rü ñanagürü nüxũ: —¡Penamexèè i 200 i churaragü i nacutümaãmare ixĩxũ, rü 70 i churaragü i cowarutagu íxũ, rü 200 i churaragü i wocaxemaã íxãxnexũ na 9 arü oragu i chütacü Checharéawa naxĩxücèx! ²⁴ —¡Rũ ngèxgumarüũ ta penamexèè i ñuxre i cowarugü i Paurucèx na tórü ãèxgacü i Perixütawa naxũxücèx rü na taxuũma nüxũ üpetüxücèx i namawa! —ñanagürü. ²⁵ Rũ yema capitáügümaã yéma nanamu ga wüxi ga popera ga ñaxũ:

²⁶ “Choma i Cláudiu Díchiu, rü cuxũ charümoxè Pa ãèxgacü ya Mecüxüchi Pa Perix. ²⁷ Rũ yima yatü ya cuxcèx ngema chanamucü, rü Yudíugü nayayauxgü rü wixguxüchi taèx nayamèxgü. Natürü yexguma nüxũ chacuáchigagu na Dumacũãx na yĩxũ, rü yéma chaxũ chorü churaragümaã, rü nüxna chanapu. ²⁸ Rũ nüxũ chacuáxchaũ ga tacü ga chixexümaã na ínaxuaxüğüãxũ, rü yemacèx Yudíugüarü ãèxgacügütücümüpèxewa chanaga. ²⁹ Rũ yexguma nüxũ chacuèx ga na Yudíugüarü muchigacèxmare na ínaxuaxüğüãxũ. Natürü taxuũma ga chixexũ naxü na tüxcüũ yamáxücèx rü napoxcuxücèx. ³⁰ Natürü yexguma nüxũ chacuáchigagu ga na nügümaã inaxunetaxũ ga Yudíugü ga na yamèxgüãxücèx, rü yexgumatama nagu charüxĩnü na cuxütawa chanamuxũ. Rũ yema ínaxuaxüğüxũ, rü namaã tá nüxũ chixu na cuxütawa naxĩxũ rü cumaã nüxũ na yanaxugüxücèx na tacücèx ínaxuaxüğüãxũ”,

ñanagürü. ³¹ Rũ yema chütaxügu inaxĩãchi ga yema churaragü, yexgumarüũ ga norü ãèxgacü na namuxürüũ. Rũ Pauruxũ nigagü ñuxmata Aütípatiwa nangugü. ³² Rũ moxüãcü rü nawoegu ga yema churaragü ga nacutümaãmare ixĩxũ rü naxpataũwa naxĩ. Rũ yema churaragü ga cowarutagu íxũ, rü Paurumaã inaxĩãma. ³³ Rũ yexguma Checharéawa nangugügu, rü ãèxgacü ga Perina nanaxã ga yema popera, rü Pauruxũ rü ta ínamugü. ³⁴ Rũ yexguma nüxũ nadaumatügu ga popera ga ãèxgacü ga Peri, rü Pauruna naca ga ngextácüãx na yĩxũ. Rũ yexguma nüxũ nacuèxgu ga na Chiríchiaanecüãx yĩxũ, rü ñanagürü nüxũ: ³⁵ —Cuxũ tá icharüxĩnü i ngèxguma ínangugügu i ngèma cuxũ íxuaxüğüxũ —ñanagürü. Rũ yexguma nanamu ga churaragü na wüxi ga ucapu ga ãèxgacü ga Erodepatawa yexmaxüwa nüxna na nadaugüxücèx.

24

Pauru rü ãèxgacü ga Peripèxewa nügüétüwa nidexa

¹ Rũ wüximèèxpüx ga ngunexũ ngupetügu, rü Yerucharéüwa ne naxü ga paigüeru ga Ananíã, namaã ga ñuxre ga Yudíugüarü ãèxgacügüerugü rü wüxi ga yatü ga meãma dexaxũ cuáxũ ga Téturu ga naega. Rũ nümagü rü ãèxgacü ga Perixütawa naxĩ na namaã nüxũ yanaxugüxücèx ga tüxcüũ Pauruxũ na ínaxuaxüğüxũ. ² Rũ yexguma Pauruxũ yéma nagagügu, rü ínanaxügü ga Téturu ga nüxũ na yaxuxũ, rü ñanagürü:

—Moxēxūchima i cuma Pa Āēxgacū Pa Perix, erū cugagu nixī i meāma toxū naxūpetūxū i nuā. Rū cugagu nixī i nuā i ñoma i nachiuñānēwa na toxū nangēxmaxū i muxūma i mexūgū. ³ Rū moxē cuxna taxā erū guxūwama rū guxūguma cuxūtawa tanayauxgū i guxūma i ngēma mexūgū Pa Āēxgacūxūchima, Pa Perix. ⁴ Natūrū tama yexeraācū cuxū chachixewechaū. Rū ngēmacèx cuxna chaca na paxaāchi meā toxū icurūxīnūxū. ⁵ Rū ñuxma rū wūxi i orexū cumaā chixuxchaū. Rū marū nūxū tadau i ñāā yatū rū wūxi i daaweanerū na yīxū, erū chixexūmaā nayaxucuxēgū i Yudíugū i guxū i naānēwa na nūgū yatoyexūcèx. Rū nūma nixī i norū āēxgacū i ngēma duūxūgū i nūxū yaxōgūxū i Ngechuchu i Nacharētucūāx. ⁶ Rū toma tayayauxgū i ñāā yatū ga yexguma tupauca ga taxūne naxūxaxēēchaūgu. Rū torū mugū tomaā nūxū ixuxūācūma nūxna tacagūchaū. ⁷ Natūrū ínangu ga churaragūarū āēxgacū ga Díchiu, rū muxūma ga norū churaragūmaā toxna nanapu. Rū toma i ínaxuaxūgūxe, rū toxū namu na cuxūtawa taxīxūcèx. ⁸ Rū ñuxma rū marū name i cumatama nūxna cuca i ngēma Pauru na nūxū cucuáxūcèx na aixcūma yīxū i guxūma i ngēma naxcèx ítanaxuaxūgūxū i tomāx —ñanagūrū. ⁹ Rū yema togū ga Yudíugū rū ta, rū ñanagūrūgū: —Rū aixcūma nixī i ngēma ore —ñanagūrūgū. ¹⁰ Rū yexguma ga guma āēxgacū ga Peri rū naxmēxmaā Pauruxū naxuneta na yadexaxūcèx. Rū yexguma ga Pauru, rū ñanagūrū: —Chorū taāēmaā cupēxewa chaugūcèx chidexa, erū nūxū chacuēx na mucūma ga taunecū ñoma i nachiuñānēarū āēxgacū quiīxū. ¹¹ Marū name i cumatama naxcèx ícuca, erū 12 i ngunexūīcatama nangupetū ga na Yerucharéūwa changuxū na Tupanaxū chayarūcuēxūūxūcèx. ¹² Rū bai ga tupauca ga taxūnēwa, rū bai ga ngutaquēxepataūgūwa, rū bai ga ngūrūanewamare ga íānēwa choxū nadaugū ga Yudíugū ga na texēmaā íchiporagacūūxū, rū na chananuēxēēxū ga duūxūgū. ¹³ Rū ñuxma i ñāā duūxūgū i choxū íxuaxūgūxū, rū bai i wūxiwaxūra cuxcèx nanangoxēēgū na aixcūma yīxū i ngēma naxcèx choxū ínaxuaxūgūxū. ¹⁴ Natūrū cumaā nūxū chixu, rū nuxcūmaūgūxū ga chorū oxigūarū Tupanaāxū nixī i chapuracūxū ngēxgumarū i choxū na nanaxwēxexū ya Ngechuchu ya Cristu ya nūxū chayaxōcū. Rū ngēma nixī i nūmagū i Yudíugū naxugūāgu rū na:

“Tomare i ore”, ñagūxū. Rū aixcūma nūxū chayaxō i guxūma i Tupanaārū mugū ga Moíché ūmatūxū rū guxūma i Tupanaārū ore ga nuxcūmaūgūxū ga norū orearū uruūgū ūmatūgūxū. ¹⁵ Rū choma rū ta yema nuxcūmaūgūxūrū Tupanaāxū chayaxō. Rū naxrū chayaxō rū tá wena na namaxēxū i ngēma yuexū i mexūgū rū chixexūgū. ¹⁶ Rū ngēmacèx nixī i guxūguma meā chaugūna chadauxū na chauāēwatama nūxū chacuáxūcèx na chamexū i Tupanapēxewa rū duūxūgūpēxewa. ¹⁷ Rū dūcax, Pa Āēxgacūx, rū ñuxre ga taunecū togū ga nachiuñānēgu chixūgū, rū dūxwaxarū chauchiūñānecèx wena chataegu na nuā chanangexūcèx ga dīeru ga namaā nūxū charūngūxēēchaūxū i chautanūxūgū i Yudíugū i nūxū nataxuxū, rū nuā Tupanana chanaxāxūcèx i chorū āmaregū. ¹⁸⁻¹⁹ Rū yema ngunexūgu rū tupauca ya taxūnēwa Tupanana íchanaxā ga chorū āmaregū, nawena na chaugū chamexēēxū ga Tupanapēxewa. Rū tama muxū ga duūxūgūmaā chayexma, rū tama chananuēxēē ga duūxūgū ga yexguma ñuxre ga Yudíugū ga Áchianecūāx choxū daugūgu ga yēma tupauca ya taxūnēwa. Rū ngēmagū chí nixī i ñuxma nuā íxū na choxū ínaxuaxūgūxūcèx ega řacū nūxū ngēxmagu i chauchiga. ²⁰ Rū ngēxguma tama řacū nūxū ngēxmagu ga yema tupauca ya taxūnēwa choxū daugūxū, řrū ēcū ñāā ñuxma nuxmagūxū cumaā nūxū ixugū na řacū ga chixexūxū chowa nadaugūxū ga yexguma Yudíugūarū āēxgacūgūtūcumūpēxewa chayexmagu! ²¹ Rū ñaxūīcatama nixī ga chorū

ore ga tagaãcü namaã chachonagüxü ga yexguma yema ãëxgacügüpëxewa chayexmagu:

“Rü ñuxma rü choxna pecagü erü choma chayaxõ i wena tá na namaxëxü i yuexü”, ñacharügü ga yexguma —ñanagürü ga Pauru. ²² Natürü ga Peri rü meã nüxü nacuëx ga yema Cristuaxü yaxõchiga. Rü yemacëx ga yexguma Pauruaru orexü naxĩnügü, rü ínayachaxãchi ga na nüxna naçaxü, rü ñanagürü Yudíugüxü: —Ngëxguma churaragüarü ãëxgacü ya Díchiu núma üxgu, rü tá meãma nüxü chacuëx i ngëma naxcëx ipenaxuaxüxü —ñanagürü. ²³ Rü yexguma ga Peri rü norü capitáüxü namu ga na Pauruna nadauxüçëx. Natürü tama nanapoxcuxüchi, rü tama nanachuxu ga na naxütagu naxĩãneãxü ga namücügü, rü nüxü na nangüxëëgüxü. ²⁴ Rü ñuxre ga ngunexü marü ngupetügu rü wena yéma naxü ga Peri ngĩmaã ga naxmëx ga Drusíla ga Yudíu ixĩcü. Rü Paurucëx nayacaxëë, rü nüxü naxĩnügü ga yema ore ga Pauru namaã nüxü ixuxü ga Cristuaxü na yaxõxüchiga. ²⁵ Natürü yexguma Pauru meãma namaã nüxü ixuxgu na ñuxãcü Tupana naxwëxexü na meã imaxüxü rü ñuxãcü nanaxwëxexü na tórü maxümaã meã icuáxü rü ñuxãcü tá tüxna naçaxü i tórü maxüchiga, rü poraãcü nabaixãchiãë ga Peri. Rü düxwa ñanagürü nüxü: —jËcü íixü i ñuxmax! Rü ngëxguma ñuxguacü icharüxãüxmaregu, rü wena táxarü cuxcëx changema —ñanagürü. ²⁶ Yerü Peri ínananguxëë na Pauru chi díëru nüxna ixãxü na yangëãxüçëx, rü yemacëx muëxpüxcüna naxcëx nangemaxü, rü namaã nidexaxü. ²⁷ Rü taxre ga taunecü yemaãcü nixígü. Rü ínanguxuchi ga Peri ga na ãëxgacü yíixü, rü nachicüü ningucuchi ga Pórchiu ga Festu. Natürü núma ga Peri, rü Yudíugümaã nügü namecümãxëëchaü, rü yemacëx tama ínananguxuchixëë ga Pauru.

25

Ãëxgacü ga Festupëxewa nayexma ga Pauru

¹ Rü Checharéawa nangu ga Festu na yéma ãëxgacüxü yaxücuxüçëx. Rü marü tomaëxpüx ga ngunexü yéma nayexmagu, rü wenaxãrü inaxüãchi, rü Yerucharéüwa naxü. ² Rü yéma Yerucharéüwa rü yema paigüarü ãëxgacügü rü Yudíugüarü ãëxgacügü rü Pauruxü ínaxuaxügü Festupëxewa. ³ Rü naxcëx ínacagü ga Yerucharéüwa Pauruxü na namuxüçëx. Yerü nümagü rü nagu narüxĩnügü na namagu yacuxéügüãxü na yexma yamëxgüãxüçëx. ⁴ Natürü ga Festu rü nanangãxü, rü ñanagürü: —Checharéagu napoxcu i Pauru, rü choma rü tá paxa ngëma Checharéawa chaxü. ⁵ Rü ngëmacëx name nixĩ i perü ãëxgacügü rü chowe narüxĩ i Checharéawa, rü ngëxguma tacü rü chixexü naxüxgu i ngëma yatü, rü ngëma tá nixĩ i chomaã nüxü pixugüxü —ñanagürü. ⁶ Rü maneca 8 rü ëxna 10 ga ngunexü Yerucharéüwa nayexma ga Festu, rü ñuxüchi Checharécëx nataegu. Rü yexguma ínanguxguarü moxüãcü rü yema nachica ga ngextá duüxügüna ínaçaxüwa naxü, rü yéma nayarüto norü tochicaxüwa. Rü Paurucëx nangema na yéma napëxewa nagagüãxüçëx. ⁷ Rü yexguma yexma yaxücuxgu ga Pauru, rü yema Yudíugü ga Yerucharéüwa ne íxü, rü naxcëx naxĩ. Rü muxüma ga chixexügümaã ínanaxuaxügü. Natürü taxuwama nüxü nüxü nadauxëë na aixcüma yíixü ga yema naxcëx ínaxuaxügüãxü. ⁸ Rü yexguma ga Pauru rü nanangãxü, rü ñanagürü: —Pa ãëxgacüx, taxuüma ga chixexü namaã chixugü ga yema mugü ga Moíché ümatüxü, rü bai ga tupauca ya taxünemaã, rü bai ga ãëxgacü ya Chëcharumaã —ñanagürü. ⁹ Natürü núma ga Festu rü Yudíugümaã nügü namecümãxëëchaü, rü yemacëx Pauruna naca, rü ñanagürü nüxü: —¿Cunaxwëxexü na Yerucharéüwa cuxüxü na ngëma cuxna chaçaxüçëx naxcëx

i guxūma i ngēma naxcèx cuxū ínaxuaxūgūxū? —ñanagürü. ¹⁰ Rū yexguma ga Pauru rü nanangāxū, rü ñanagürü: —Choma rü cupēxewa changēxma na choxna cuçaxūcèx, erü cuma nixī i cuxū naxunetaxū i ãēxgacü ya tacü ya Chécharu na ãēxgacü quiixū i núma. Rū ngēmacèx chanaxwèxe i nuã choxna cuca. Erü taxuūma i chixexū chaxū i Yudíugūmaã, ngēxgumarūū i cuma meãma nüxū cucuèx. ¹¹ Ngēxguma chi tacü i chixexū chaxūxgu rü marü name na naxcèx choxū yamèxgūxū, rü marü name i na chayuxū. Natürü ngēxguma nataxuxguma i tacü i aixcūma ixixū i ngēma naxcèx choxū ínaxuaxūgūxū, rü taxuacūma texé Yudíugūna choxū tamu. Rū naxcèx íchaca na nümatama ya ãēxgacü ya tacü ya Chécharu choxna naçaxūcèx —ñanagürü ga Pauru. ¹² Rū yexguma ga Festu rü norü ucuxēruūgū ga ãēxgacügūmaã nidexa, rü ñuxūchi ñanagürü Pauruxū: —Marü naxcèx ícuca na ãēxgacü ya tacü ya Chécharu cuxna çaxūcèx. Ēcü, ñuxma rü naxūtawa tá cuxū chamu —ñanagürü.

Ãēxgacü ga Agripapēxewa nayexma ga Pauru

¹³ Rū ñuxre ga ngunexū ngupetügu, rü Checharéawa nangugü ga Yudíugüarü ãēxgacü ga Agripa rü naēyèx ga Bereniche, na Festuxū yanamoxēgūxūcèx. ¹⁴ Rū marü ñuxre ga ngunexū yéma nayexmagügu, rü Agripamaã nüxū nixu ga Festu ga Pauruchiga, rü ñanagürü: —Nuã nangēxma i wüxi i yatü i poxcuxū ga Peri tama ínguxuchixēxū. ¹⁵ —Rū yexguma choma Yerucharéüwa chayexmagu, rü paigüarü ãēxgacügü rü Yudíugüarü ãēxgacügüerugü rü ínanaxuaxūgü, rü naxcèx ínacagü na namaã chanaxueguxūcèx rü na yamèxgūãxūcèx. ¹⁶ —Rū choma chanangāxū, rü tama tocūma nixī i toma i Dumacuãxgü i na tayamáxū i wüxi i duuxū ega tama nügüétüwa yadexaxíragu napēxewa i ngēma ínaxuaxūgūxū. ¹⁷ —Rū yemacèx ga yexguma núma nangugügu ga yema Yudíugü, rü yexgumaärü moxūãcü rü chorü tochicaxūwa chitocuchi na nüxna chaçaxūcèx nachiga ga yema, rü yéma naxcèx changema ga yema yatü. ¹⁸ —Natürü ga yema Yudíugü ga ínaxuaxūgūxū, rü taxuūma ga tacü ga chixexū ga choma íchananguxēxūxū nixugü. ¹⁹ —Natürü norü Tupanachiga rü wüxi ga yatü ga Ngechuchuchiga nixī ga yema nagu yadexagūxū. Rū nüma ga Yudíugü nüxū nixugü ga na nayuxū ga yema Ngechuchu, natürü Pauru nüxū ixuxgu rü marü wena namaxū. ²⁰ —Rū yexguma ga choma ga tama na nüxū chacuáxū ga ñuxácü tá chanamexēxū ga yema guxchaxū, rü yemacèx nüxna chaca ga Pauru ngoxi nanaxwèxe ga Yerucharéüwa na naxūxū, na yéma nüxna chaçaxūcèx. ²¹ —Natürü nüma ga Pauru naxcèx ínaca ga na ãēxgacü ya tacü ya Chécharupēxewa naxūxū na nümatama ya Chécharu nüxna çaxūcèx. Rū yemacèx chanamu na meã nüxna nadaugūxūcèx ñuxmata choma ãēxgacü ya Chécharuxūtawa chanamux —ñanagürü. ²² Rū yexguma ga Agripa rü ñanagürü Festuxū: —Choma rü ta nüxū chaxīnūchaū i norü ore i ngēma yatü —ñanagürü. Rū Festu nanangāxū rü ñanagürü: —Moxū tátama nüxū cuxīnü —ñanagürü. ²³ Rū moxūãcü yema ucapu ga ãēxgacügü íngutaquēxegūxūwa nangugü ga Agripa rü Bereniche rü poraãcü nangēxãēgü. Rū namaã ínangugü ta ga churaragüarü ãēxgacügü rü yema íānecūãxgü ga corigūxūchi ixīgūxū. Rū ñuxūchi Paurucèx nangema ga Festu na yema ãēxgacügüpēxewa nagagūãxūcèx. ²⁴ Rū ñanagürü ga Festu: —Pa ãēxgacü Pa Agripax, rü Pa Guxāma i Pema ya Nuxmagüxe, ñaã nixī i ngēma yatü i nachigamaã yadexagūxū i guxūma i Yudíugü. Rū chopēxewa ínanaxuaxūgü ga Yerucharéüwa rü núma rü ta. Rū guxūguma tagaãcüma choxna naxcèx nacagü na nayuxū. ²⁵ —Natürü i choma rü taxuūma i tacü i chixexū i naxūxū nawa chadau na naxcèx yamáxū. Natürü nüma ga Pauru rü naxcèx ínaca na ãēxgacü ya tacü ya Chécharu nüxna çaxū, rü

ngēmacèx nagu charūxīnū na ngema chanamuxū. ²⁶—Natürü taxuūma i ore i aixcūma ixīxū i nachiga choxū nangēxma na chorū āēxgacū ya Chécharucèx chanaxūmatūxūcèx. Rū ngēmacèx chanamu na nuã pepēxewa nagagūãxūcèx, rū cuxcèx türü nixī, Pa Āēxgacū Pa Agripax, na nūxna cuçaxūcèx, na nūxū chacuáxūcèx i tacū tá na chaxūmatūxū naxcèx ya āēxgacū ya Chécharu. ²⁷—Erü chauxcèx rū tama name na ngextá namuxū i wūxi i poxcuxū ega tama naxūmatūxíragu nachiga na tacūcèx ínaxuaxūgūãxū.

26

Pauru rū āēxgacū ga Agripapēxewa nūgüétüwa nidexa

¹ Rū yexguma ga Agripa rū ñanagürü Pauruxū: —Marü name i ñuxma i cugüétüwa quidexa —ñanagürü. Rū yexguma naxunagüméxē ga Pauru, rū inanaxügü ga nūgüétüwa na yadexaxū, rū ñanagürü: ²—Chataãē, Pa Āēxgacū Pa Agripax, erü cupēxewa chidexa i ñuxma na chaugüétüwa chachogūxūcèx i guxūma i ngēma choxū na ínaxuaxūgūxū i ngēma chautanūxū i Yudíugü. ³—Rū yexeraãcū chataãē erü cuma nūxū cucuèx i guxūma i tocūma i toma i Yudíugü, rū guxūma i Moiché ümatūxū i mugü i naxcèx yadexagūxū i chautanūxūgü. Rū ngēmacèx cuxna chaca na meã choxū icurūxīnūxūcèx.

Pauruarü maxū naxūpa ga Ngechuchuaxū na yaxōōxū

⁴ —Rū guxūma i ngēma chautanūxūgü i Yudíugü rū nūxū nacuèxgü ga ñuxãcū na chamaxūxū ga natanüwa ga chauchiñānewa rū Yerucharéüwa ga yexguma changextūxūüragu. ⁵—Rū ngēxguma chauchigaxū yaxugüechaügu, rū nūma nūxū nacuèxgü ga choma rū woetama Parichéu na chiixū. Rū toma i Yudíugü i Parichéugü na tixīgūxū, rū toma nixī i guxūma i totanūxū i Yudíugüarü yexera na poraãcū tanaxaurexū i ngēma tocūma. ⁶—Rū ñuxma i ngēma chautanūxūgü i Yudíugü rū nuã pepēxewa choxū nagagü erü chayaxō na Cristugagu nangēxmaxū i maxū i taguma gúxū, yema Tupana nuxcūmaügūxū ga torü oxigūmaã inaxunetaxūrū. ⁷—Rū guxūma i totanūxūgü i Yudíugü rū ínangūxūēgü na nūxū nadaugūxū rū tá na yanguxū i ngēma uneta. Rū ngēmacèx Tupanaxū nicuèxūügü rū guxūguma i ngunecū rū chütacū rū Tupanaãxū napuracüe. Rū choma rū ta íchanangūxēē na nūxū chadauxū rū tá na yanguxū i ngēma uneta, rū ngēmacèx nixī, Pa Āēxgacūx, i ñuxma i choxū ínaxuaxūgūxū i ngēma chautanūxūgü i Yudíugü. ⁸—¿Rū tüxcūü tama peyaxōgü na Tupana wena namaxēxēxū i ngēma yuexū?

Pauru rū nūxū nixu ga ñuxãcū yema yaxōgūxūtwe na yangēchigūxū

⁹ —Rū choma nagu charūxīnūgu ga noxri rū name ga muxūma ga chixexū namaã na chaxūxū ga yema Ngechuchu ya Nacharétucūãxāxū yaxōgūxū. ¹⁰—Rū yemacèx nawe chingēchigü ga Yerucharéüwa. Rū paigüarü āēxgacūgūxūtawā naxcèx íchaca ga popera na chanapoxcuexūcèx ga yema yaxōgūxū. Rū yexma chanapoxcue ga muxūma. Rū yexguma chautanūxū ga Yudíugü nadaixgu ga yema yaxōgūxū, rū choma rū chorü me nixī. ¹¹—Rū muēxpūxcūna rū chanapoxcuexū na nūxū naxoexūcèx ga yema na yaxōgūãxū. Rū yemaãcū chanaxū ga guxūnema ga ngutaquēxepataügüwa. Rū poraãcū naxchi chaxaxichi ga yema yaxōgūxū, rū yemacèx nawe chingēchigü ñuxmata to ga nachiñānegune ga iānegüwa.

Pauru rū wenaxārü nūxū nixu ga ñuxãcū na yaxōōxū ga noxrix

¹² Rū ñanagürü ga Pauru: —Rū yema yaxōgūxūxū na chapoxcuexūcèx nixī ga Damacuwa chaxūxū. Rū yemacèx ga paigüarü āēxgacūgü rū choxū namugü rū choxna nanaxāgü ga popera ga nawa choxna naxāgagūxū na

chanapoxcuexŭcèx ga yema yaxōgŭxŭ. ¹³—Rü yexguma namagu taxŭyane, Pa Æxgacŭx, rŭ yexguma meãma tocuchiwa nanguxgu, rŭ nüxŭ chadau ga wŭxi ga omŭ ga daxŭwa ne ŭxŭ ga ũèxcŭarŭ yexera ixŭxŭ ga choxŭ baxixŭ rŭ yema chomŭcŭgŭxŭ rŭ ta baxixŭ. ¹⁴—Rü guxãma ga toma rŭ ñaxtŭanegu tayayi. Rŭ choma rŭ nüxŭ chaxŭnŭ ga wŭxi ga naga ga Yudŭgawa choxŭ ñaxŭ:

“Pa Chauru Pa Chaurux, ŭtŭxcŭŭ i chowe quingèchigŭxŭ? Poraãcŭ cugŭtama cuchixexèè ñoma wŭxi i ŭacŭ i ãmaguxŭgu cucuxgŭxŭrŭrŭ”, ñanagŭrŭ choxŭ. ¹⁵—Rü choma chanangãxŭ, rŭ ñacharŭgŭ:

“¿Texé quixŭ, Pa Corix?” ñacharŭgŭ. Rŭ nüma ga Cori rŭ ñanagŭrŭ choxŭ:

“Choma nixŭ i Ngechuchu rŭ chorŭ duŭxŭgŭ nixŭ i ngèma nawe quingèchigŭxŭ. ¹⁶—¡Natŭrŭ írŭda rŭ inachi! Rŭ marŭ cuxcèx changox i ñŭxmax, erŭ cuxŭ chamuxchaŭ na choxŭ cupuracŭxŭcèx rŭ nüxŭ quixuchigaxŭcèx i ngèma ñŭxma na choxŭ cudauxŭ rŭ ngèma yixcŭra tá chauxŭtawa nüxŭ cudauxŭ. ¹⁷—Rü cuxna tá chadau i natanŭwa i cutanŭxŭgŭ i Yudŭgŭ rŭ ngèma tama Yudŭgŭ ixŭgŭxŭ i ñŭxma tá natanŭwa cuxŭ chamuxŭ. ¹⁸—Rü ngema cuxŭ chamu na ngèma duŭxŭgŭxŭ choxŭ cucuèxèèxŭcèx rŭ nüxŭ naxoexŭcèx i nacŭma i chixexŭgŭ rŭ chauga naxŭnèxŭcèx. Rŭ ngema tá cuxŭ na Chatanámèxèwa ícunanguxŭxèèxŭcèx i ngèma duŭxŭgŭ na chowe naxŭxŭcèx rŭ choxŭ yaxōgŭãxŭcèx na choma rŭ nüxŭ nüxŭ changechaŭxŭcèx i norŭ pecadugŭ, rŭ nüxŭ nangèxmaxŭcèx i nachica namaã i guxŭma i chorŭ duŭxŭgŭ i ũnègŭxŭ”, ñanagŭrŭ choxŭ ga Cori.

Pauru rŭ naga naxŭnŭ ga yema Ngechuchu namaã nüxŭ ixuxŭ

¹⁹—Rü yemacèx ga chomax, Pa Æxgacŭ Pa Agripax, rŭ naga chaxŭnŭ ga yema ore ga Ngechuchu chomaã nüxŭ ixuxŭ ga yexguma choxŭ nabaxixgu ga yema omŭ ga daxŭwa ne ŭxŭ. ²⁰—Natŭrŭ noxri rŭ Damacucŭãxgŭmaã nüxŭ chixuchiga ga Tupanaãrŭ ore. Rŭ yixcama ga Yerucharéŭcŭãxgŭmaã, rŭ yemawena rŭ guxŭ ga Yudéaanewa, rŭ ñŭxŭchi yema tama Yudŭgŭ ixŭgŭxŭmaã nüxŭ chixu. Rŭ ñacharŭgŭ:

“¡Nüxŭ perŭxoe i pecŭma i chixexŭgŭ, rŭ Tupanacèx pedaugŭ, rŭ meã pemaxè na duŭxŭgŭ nüxŭ daugŭxŭcèx na aixcŭma peyaxōgŭxŭ!” ñacharŭgŭ.

²¹—Rü yemacèxtama nixŭ ga tupauca ya taxŭnegu choxŭ yayauxgŭxŭ rŭ choxŭ yamèxgŭchaŭxŭ ga chautanŭxŭgŭ i Yudŭgŭ. ²²⁻²³—Natŭrŭ Tupana choxŭ narŭngŭxèè rŭ ngèmacèx taguma íchayachaxãchi na guxŭma i duŭxŭgŭmaã nüxŭ chixuxŭ rŭ woo buxŭ rŭ yaxŭ. Rŭ namaã nüxŭ chixu ga yema ore ga nuxcŭmaŭgŭxŭ ga Tupanaãrŭ orearŭ uruŭgŭ rŭ Moïché nüxŭ ixugŭxŭ na ñŭxãcŭ tá nüxŭ nangupetŭxŭ ga Cristu rŭ ñŭxãcŭ tá na nayuxŭ, natŭrŭ yemawena rŭ nüma tá yŭxŭ ga nüxŭra yuwa ínadxŭ. Rŭ namaã nüxŭ chixu ta ga yema nuxcŭmaŭgŭxŭãrŭ ore ga ñaxŭ:

“Rü Cristu rŭ tatanŭxŭ i Yudŭgŭmaã rŭ ngèma to i duŭxŭgŭ i tama Yudŭgŭ ixŭgŭxŭmaã tá naxunagŭãxŭ i ore i tŭxŭ maxèxèèxŭ”, ñaxŭ. Rŭ yemachigaxŭxŭcatama nixŭ ga namaã chixuxŭ —ñanagŭrŭ ga Pauru.

Pauru rŭ Agripaaxŭ nanangŭchaŭxŭèè na yaxōdŭxŭcèx

²⁴ Rŭ yexguma yemaãcŭ nügŭétŭwa yadeaxgu ga Pauru, rŭ ñanagŭrŭ ga Festu tagaãcŭma: —Cungèãèmare Pa Paurux. Rŭ ngèma na yeŭcŭrŭ cungŭèchaŭ, rŭ dŭxwa nawa cungèãè —ñanagŭrŭ. ²⁵ Natŭrŭ ga Pauru rŭ nanangãxŭ, rŭ ñanagŭrŭ: —Tama changèãè Pa Æxgacŭxŭchi, Pa Festux. Erŭ ñaã ore i nüxŭ chixuxŭ, rŭ aixcŭmaxŭchima nixŭ. ²⁶—Rü daa ãèxgacŭ ya Agripa rŭ meãma nüxŭ nacuèx i guxŭma i ngèma pemaã nüxŭ chixuxŭ. Rŭ ngèmacèx tama chamuŭãcŭma chorŭ taãèmaã napèxewa nüxŭ chixu, erŭ

nūxŭ chacuèx na nūma rŭ ta nūxŭ nacuáxŭ i tacŭchiga na yīxŭ i guxŭma i ñaã ore. Erŭ tama ngextámare cúãcŭ naxŭpetŭ i ngēma. ²⁷ —¿Cuyaxŏxŭ, Pa Agripax, i ngēma Tupanaãrŭ orearŭ uruŭgŭ nūxŭ ixuxŭ? Choma nūxŭ chacuèx rŭ cuyaxŏ —ñanagŭrŭ ga Pauru. ²⁸ Rŭ Pauruxŭ nangãxŭ ga Agripa, rŭ ñanagŭrŭ: —¿Éxna cuma nagu curŭxŭnŭgu rŭ ngēmaãcŭ noxre i curŭ oremaã na choxŭ cuyaxŏxŭ? —ñanagŭrŭ. ²⁹ Rŭ ñanagŭrŭ ga Pauru: —Woo noxre i oremaã rŭ woo muxŭ i oremaã rŭ Tupana nanaxwèxe na cuyaxŏxŭ. Rŭ tama i cuxicatama, natŭrŭ guxŭma i ñaã nuã choxŭ ñnŭèxŭ rŭ ta, rŭ Tupana nanaxwèxe na chauxrŭŭ yixŭgŭxŭ, natŭrŭ tama chauxrŭŭ daa cadenagŭmaã na yanèxgŭxŭ —ñanagŭrŭ ga Pauru. ³⁰ Rŭ yexguma inachigŭ ga Agripa, rŭ Festu, rŭ Bereníche, rŭ guxŭma ga yema namaã yéma rŭtogŭxŭ. ³¹ Rŭ yexguma ga nŭmagŭ rŭ noxrŭwama naxŭ na yéma nŭgŭmaã Pauruchiga yadexagŭxŭcèx. Rŭ ñanagŭrŭgŭ: —Rŭ ngēma yatŭ, rŭ taxuŭma i chixexŭ naxŭ na naxcèx yamáxŭ rŭ éxna naxcèx napoxcuxŭ —ñanagŭrŭgŭ. ³² Rŭ Festuxŭ ñanagŭrŭ ga Agripa: —Ngèxguma chi tama nŭmatama naxcèx ínacaxgu na Chécharu nŭxna çaxŭcèx, rŭ chi ítananguxuchixèè —ñanagŭrŭ.

27

Pauruxŭ Dumawa namugŭ

¹ Rŭ yema ãèxgacŭgŭ rŭ dŭxwa nagu narŭxŭnŭè na norŭ ãèxgacŭ ga Chécharu ga Itáriaanewa yexmacŭxŭtawa na toxŭ namugŭxŭ. Rŭ norŭ churragŭarŭ capitáŭna nanamu ga Pauru namaã ga ñuxre ga togŭ ga poxcuexŭ na Chécharuxŭtawa nagagŭãxŭcèx. Rŭ guma capitáŭ rŭ Yúriu nixŭ ga naega, rŭ norŭ churragŭtŭcumŭ rŭ Chécharuarŭ Dauruŭgŭ nixŭ ga naega. ² Rŭ nagu tichoŭ ga wŭxi ga wapuru ga buanecŭmaã ixŭxŭne ga Adamíchiuwa ne ŭxŭne ga Áchiaarŭ ñanegŭwa ŭxchaxŭne. Rŭ towe ta nixŭe ga Aritárcu ga Machedóniãanecŭŭãx ga Techarónicawa ne ŭxŭ. ³ Rŭ moxŭãcŭ rŭ Chidãŭãrŭ tŭrewa tangugŭ. Rŭ Paurumaã namecŭma ga capitáŭ ga Yúriu. Rŭ ínanaxŭexèè na yémacŭŭãx ga namŭcŭgŭxŭtagu naxŭãneãxŭcèx ga Pauru, na nŭmagŭ nūxŭ nangŭxèègŭxŭcèx. ⁴ Rŭ yéma itaxŭãchi. Rŭ Chiprearŭ capaxŭãrŭ tocŭwaguama taxŭ, naxchaxwa ga buanecŭ, yerŭ towaama nabu. ⁵ Rŭ yéma Chiprewa tixãŭ ga taxtŭ rŭ Chiríchiaanecutŭwa tarŭyicu. Rŭ yemacutŭgu taxŭ, rŭ Paŭpíriaanewa tachopetŭ rŭ ñuxmata Díchiaanewa yexmane ga ñane ga Mirawa tangugŭ. ⁶ Rŭ yema capitáŭ yexma nūxŭ nayangau ga wŭxi ga wapuru ga Aleyãdríawa ne ŭxŭne ga Itáriaanewa ŭxŭne. Rŭ gumagu toxŭ nichoŭxèè, rŭ tomaã inaxŭãchi. ⁷ Natŭrŭ írarŭwatama itiñaxwetaxŭ ga muxŭma ga ngunexŭgu, rŭ guxchaãcŭma Guíduarŭ toxmèxtawa tangugŭ. Natŭrŭ towaama nabuema ga buanecŭ, rŭ yemacèx capaxŭ ga Chamonaãrŭ toxmèxtawa tachopetŭ rŭ capaxŭ ga Crétaxŭ ítachoegŭãchi. ⁸ Rŭ guxchaãcŭma nacutŭgu taxŭ ga yema capaxŭ, rŭ wŭxi ga nachica ga Mexŭ ga Tŭregu ãegaxŭwa tangugŭ. Rŭ ñane ga Dácheaarŭ ngaicamana nayexma. ⁹ Natŭrŭ marŭ poraãcŭ namagu tanuxcŭ ga na itaxŭxŭ, rŭ marŭ naxŭãcŭma ga na itaxŭãmaxŭ yerŭ marŭ nawa nangu ga guma tauemacŭgŭ ga nagu nagáuanecŭ. Rŭ yemacèx ga Pauru rŭ nayaxucŭxè ga duŭxŭgŭ, rŭ ñanagŭrŭ: ¹⁰ —Pa Chomŭcŭgŭx, nūxŭ chacuèx i ngèxguma chi ixŭãmagu, rŭ tá naxŭãcŭma. Rŭ daa wapuru rŭ tá inayarŭtaxu namaã i guxŭma i naãcu. Rŭ ngŭrŭãchi i yixema rŭ tá ta tayue —ñanagŭrŭ. ¹¹ Natŭrŭ yema churragŭarŭ capitáŭ rŭ yexeraãcŭ guma wapuruarŭ yoragaama naxŭnŭ, rŭ marinerugŭarŭ capitáŭgaama naxŭnŭ, rŭ tama aixcŭma Pauruga naxŭnŭ. ¹² Natŭrŭ yema tŭre rŭ tama name ga yéma na tanangupetŭxèèxŭ ga gáuanexŭ. Rŭ yemacèx wixguxŭchi guxŭma

ga duŭxŭgŭ nagu narŭxŭnŭē rŭ narŭmemaē nixŭ ga na itaxŭāchixŭ ga yēma. Rŭ nanaxwēxegŭ ga chi Cuenŭchewa na tangugŭxŭ na yēma tanangupetŭxēxŭ ga gáuanexŭ, yerŭ yema nixŭ ga wŭxi ga Crétaarŭ türe ga mexŭ ga tama poraācŭ buanecŭ ga taxŭ nawa ngxŭ.

Taxtŭarŭ ngāxŭtŭgu nŭxŭ naxŭ ga buanecŭ ga tacŭ

¹³ Rŭ inanaxŭgŭ ga na meāma topēxewaama nabuxŭ ga buanecŭ, rŭ yemacēx ga nŭmagŭ ga marinerugŭ rŭ nŭxŭ nacuēxgŭgu rŭ chi meā ítangugŭ ga yema ítaxŭxŭwa. Rŭ yemacēx itaxŭāchi, rŭ nacutŭarŭ ngaicamagu taxŭ ga yema Crétaarŭ capaxŭ. ¹⁴⁻¹⁵ Rŭ natŭrŭ ngŭrŭāchi yixcamaxŭra rŭ wŭxi ga buanecŭ ga taxŭchicŭ ga capaxŭārŭ tocŭwawa ne ŭxcŭ ngāxŭtŭwaama nanacue ga guma wapuru. Rŭ taxuacŭma itixŭtaŭ nawaama ga buanecŭ. Rŭ yemacēx dŭxwa ítayachaxāchi ga na tanatochinŭxŭ, rŭ toxŭ ínicuetaŭ. ¹⁶ Rŭ wŭxi ga capaxŭxācŭ ga Caudagu āegaxŭārŭ tocŭwawaama tachopetŭ ga ngextá tama poraācŭ íyabuaxŭwa. Rŭ yēma poraācŭ tapuracŭe na guma wapurugu tanatŭnagŭxŭ ga norŭ ngue ga yatŭchigŭne. ¹⁷ Rŭ yexguma marŭ natŭnagŭgŭāgu ga guma ngue, rŭ napanaxāgŭ ga tanŭtaxŭmā nayanēŭxgŭtŭwe ga guma wapuru. Rŭ űxŭchi nayawēgŭ ga yema naxchirutachinŭgŭ ga namaā yacuetaŭxŭ ga noxrix, yerŭ namuē ga na Chŭrutearŭ naxnŭcŭwa yanangaixtaŭgŭxŭ. Rŭ yema buanecŭ toxŭ nicuetaŭmare. ¹⁸ Rŭ moxŭācŭ ga buanecŭ rŭ tama nangupetŭéga, rŭ yemacēx inanaxŭgŭ ga na ínawoŭācuāxŭ. ¹⁹ Rŭ norŭ tomaēxpŭx ga ngunexŭgu, rŭ naxmēxmaātama ínanawoŭ ga yema natŭxŭgŭ ga guma wapuru, rŭ guxŭma ga to ga norŭ yemaxŭgŭ. ²⁰ Rŭ muxŭma ga ngunexŭgu, rŭ tama nangox ga ŭēxcŭ rŭ ēxtagŭ, rŭ tama nangupetŭéga ga guma buanecŭ ga taxŭchicŭ. Rŭ dŭxwa nagu tarŭxŭnŭē ga marŭ tātāma na tamaxēxŭ. ²¹ Rŭ yexguma marŭ muxŭma ga ngunexŭ tingegŭgu ga tama na tachibŭexŭ, rŭ yexguma guxŭma ga yema duŭxŭgŭtanŭwa inachi ga Pauru, rŭ űanagŭrŭ: —Narŭmemaē chi nixŭ, Pa Chomŭcŭgŭx, ga chauga na pexŭnŭēxŭ, rŭ tāŭ chima na ixŭāchixŭ ga Crétawa, rŭ tāŭ chima űxmarŭŭ tŭxŭ naxŭpetŭ i űaā āŭcŭmaxŭ rŭ taxuxŭ chima i chixexŭ tŭxŭ nangupetŭ. ²² —Natŭrŭ ŭpetaāēgŭ! erŭ wapuruxica tá inayarŭtaxu, natŭrŭ i yixema rŭ taxŭetāma tayue. ²³ —Erŭ ngewēxarŭ chŭtaxŭgu ya Tupana ya nŭxŭ chapuracŭcŭ ya chorŭ cori ixŭcŭ rŭ nŭma nanamu i wŭxi i norŭ orearŭ uruŭ i daxŭcŭāx i chauxcēx ngóxŭ. ²⁴ —Rŭ űanagŭrŭ choxŭ:

“ŭTāxŭ i cumuŭxŭ, Pa Paurux! Erŭ āēxgacŭ ya Chécharupēxewa tá cingu, rŭ cugagu tá Tupana nanamaxēxē i guxŭma i ngēma cumŭcŭgŭ i cumaā ngēxma wapurugu íxŭ”, űanagŭrŭ choxŭ. ²⁵ —Rŭ ngēmacēx, Pa Chomŭcŭgŭx, ŭrŭ petaāēgŭ! erŭ choma rŭ aixcŭma Tupanaāxŭ chayaxō, rŭ aixcŭma tá nixŭ i ngēmaācŭ tá nangupetŭxŭ ngēxgumarŭŭ i ngēma chomaā nŭxŭ yaxuxŭ. ²⁶ —Natŭrŭ wŭxi i capaxŭwa tá tayarŭcŭxcuchitaŭgŭ —űanagŭrŭ ga Pauru. ²⁷ Rŭ yexguma taxre ga yŭxŭ tingexgu ga na itaxŭxŭ, rŭ taxŭ ga taxtŭ ga Ariáticuwa tayexmagŭ, yerŭ ga buanecŭ rŭ nŭxŭca toxŭ nacuetaŭ. Rŭ ngāxŭcŭŭgu nŭxŭ nicuēxāchitanŭ ga yema marinerugŭ ga na dauxchitacutŭwa tangugŭchaŭxŭ. ²⁸ Rŭ ínanataegŭ ga norŭ ngugŭtamaxŭ rŭ 36 ga metru nixŭ ga norŭ mátama. Rŭ yexguma marŭ írarŭwa yaxŭguxŭra itaxŭxgu rŭ wēnaxarŭ nanangugŭtamagŭ, rŭ 27 ga metru nixŭ ga norŭ mátama ga yexgumax. ²⁹ Rŭ namuē ga na nutamaā yanañataŭgŭxŭ ga naxānacŭwa, rŭ yemacēx guma wapuruchinŭwa ínanawoŭ ga āgŭmŭcŭ ga aŭclagŭ ga achugŭnaxcēx ga napanaxāmaā ixātŭxŭxŭ na yemaācŭ íyachaxāchigŭxēēāxŭcēx ga guma wapuru. Rŭ nayumŭxēgŭ ga paxa na yangunexŭcēx. ³⁰ Natŭrŭ ga yema marinerugŭ rŭ nibuxmŭchaŭ ga guma wapuruwa, rŭ yemacēx nanawāixēgŭ

ga guma wapuruarü ngue, rü ñanagürügü: —Ngëma wapurupëxearü aüclagü tá ítawoü na nataixüçèx ya wapuru —ñanagürügüneta. ³¹ Natürü ga Pauru rü churaragüarü capitáümaã rü norü churaragümaã nüxü nixu rü ñanagürü: —Ngëxguma ñaã marinerugü rü täütáma nuxã wapurugu nachoxgu, rü guxãma i pema rü tá peyue —ñanagürü. ³² Rü yexguma ga yema churaragü rü nayadaecunügü ga guma ngue, rü inananguxëëgü. ³³ Rü yexguma marü yangunechaügu, rü Pauru nayaxucuxëgü ga guxüma na nachibüexüçèx, rü ñanagürü: —Taxre i yüxü nixi i ñuxma na taguma aixrügumarüü pechibüexü, rü bai i tacü na pengõxü yerü poraãcü pexoegaãëgü. ³⁴ Rü ñuxma rü pemaã nüxü chixu na pechibüexü na peporaexüçèx, rü taxuüma pexü üpetüxüçèx. Erü taxüetáma itayarütaxu rü bai i wüxi i peyaexüra inayarütaxu —ñanagürü. ³⁵ Rü yexguma marü yema ñaxgu, rü nanayaxu ga wüxi ga pãü, rü Tupanana moxë naxã napëxewa ga guxüma. Rü inanabücu ga yema pãü, rü inanaxügü ga na nangõõxü. ³⁶ Rü yexguma nataãëgü ga guxüma, rü nümagü rü ta nachibüe. ³⁷ Rü 276 tixigü ga guxãma ga toma ga guma wapurugu íxë. ³⁸ Rü yexguma marü nangãxëgu, rü ínanawoü ga yema trigu ga wapuru namaã äacuxü na nangünagüächixüraxüçèx ga guma wapuru.

Inangu ga guma wapuru

³⁹ Rü yexguma yangunegu, rü yema marinerugü tama nüxü nacuéane ga yéma. Natürü nüxü nadaugü ga wüxi ga axcuchixü ga naxnücüpechinüãxü, rü nagu narüxĩnüë ga yéma na yanangaixëëgüãxü ga wapuru. ⁴⁰ Rü yexguma nanadaü ga norü ngaxüxü ga aüclagü, rü yéma nanawogü. Rü nayawëgü ga norü toxchinüxüârü nëixruügü, rü inananga ga yema napëxewa üxü ga naxchirutachinü ga namaã iticuetaüxü. Rü itanaxügü ga nüxü na tingaicaxü ga yema naxnücüpechinü. ⁴¹ Natürü wüxi ga naxnücüarü nuxtamaxüwa tayarüngaixtaü. Rü yéma naxnücüwa nayarüwápëxe ga guma wapuru rü marü tama yéma itaxiãchi. Rü yoxni ga nachinüwa, rü yuape nayapuxëë. ⁴² Rü yema churaragü rü nagu narüxĩnüë ga na nadaiãxü ga yema poxcuexü na taxuüma iñaxüçèx ga yexguma naxãnacüwa nangugügu. ⁴³⁻⁴⁴ Natürü yema norü capitáü ga churaragü, rü Pauruxü namaxëëchaü, rü yemacèx tama nanaxwëxe ga na nadaiãxü ga yema poxcuexü. Natürü nanamu na yema ixãnüxü rü nüxira ínayuxgüxü na naxãnacüwa nawëxgüxüçèx, rü yema togü rü mürapewagügu rü éxna yema wapurutüchigügu meã na ínachoüxüçèx. Rü yemaãcü guxãma meãma naxãnacüwa tangugü.

28

Capaxü ga Mártawa nayexma ga Pauru

¹ Rü yexguma meãma naxãnacüwa tangugügu ga guxãma rü yexguma nüxü tacuèxgü na Márta na yiixü ga naega ga yema capaxü. ² Rü yema yemacüãxgü ga duüxügü rü meãma toxü nayauxgü ga guxãma. Rü nanangixtagü ga wüxi ga üxü ga taxüne. Rü toxçèx nacagü ga guxãma na yéma togü tanaixügüxüçèx, yerü napu rü nagáuane. ³ Rü Pauru nanadetaquëxe ga ñuxre ga naíchacüügü, rü üxüxetüwa nayawocu. Natürü yexguma yéma yawocuãgu, rü üxüarü naïëmaxüchaxwa inayago ga wüxi ga äxtape. Rü Paurumëxëwa nayuxu, rü yéma nayarütuãchi. ⁴ Rü yexguma yema yemacüãxgü nüxü daugügu ga yema äxtape ga Paurumëxëwa na natuxü, rü nügümaã ñanagürügü: —Ñaa yatü rü maneca wüxi i máëtaxü nixi. Rü woo taxtüwa yuwa na yañaxü, natürü Tupana tama nanamaxëëchaü —ñanagürügü. ⁵ Natürü guma üxüxetügu nanamaxü ga yema äxtape, rü taxuüma nüxü naxüpetü ga Pauru. ⁶ Natürü guxüma ga yema duüxügü rü ínananguxëëgü rü ngoxi tá nachamé rü éxna nayux.

Rü marü nuxcūxūrama ga yema nüxū na nadaunūxū rü taxuūma nüxū na üpetūxū, rü düxwa togu narūxīnūē rü inanaxūgūe ga na ñagūxū: —Maneca wūxi ya tupana nixī —ñagūxū. ⁷ Rü yema nachicaarū ngaicamana nayexma ga norū naāne ga yema capaxūārū āēxgacū ga Púbiru ga naega. Rü nüma meāma toxū nayaxu, rü yexma toxū napegūxēē ga tomaēxpūx ga ngunexū. Rü tomaā namecūmaxūchi. ⁸ Rü guxema Púbiru nanatū rü ngürücarewa tayexma, yerü tixaxūne rü taduū. Rü yéma tümaxūtawa nangu ga Pauru, rü tümamaā nayumūxē, rü tümāetūgu naxūxmēx, rü tüxū narūmexēē. ⁹ Rü yexguma yemaxū nadaugūgu, rü Paurucēx yéma naxī ta ga guxūma ga togū ga idaaweexū ga yema capaxūcūāx, rü narūmeē. ¹⁰ Rü nümagū rü muxūma toxna naxāmaregū. Rü yexguma itaxīāchigu, rü toxna nananagū ga guxūma ga tanaxwēxexū ga torū namawaū ga ōna.

Dumawa nangu ga Pauru

¹¹ Rü tomaēxpūx ga tauemacū yéma capaxūwa tayexmagū. Rü ñuxūchi nagu tichoū ga wūxi ga wapuru ga yema capaxūwa gáuanexū ngupetūxēxene. Rü Aleyādríacūāx nixī ga guma wapuru. Rü napēxeraūwa nayexmagū ga taxre ga norū tupanachicūnēxāgū ga Catu rü Porugu āegagūxū. ¹² Rü Chiracúchaarū türewa tangugū, rü tomaēxpūx ga ngunexū yéma tayexmagū. ¹³ Rü yéma itaxīāchi, rü nacutūarū ngaicamagu taxī ñuxmata Dequíuwa tangugū. Rü moxūācū ínangu ga wūxi ga buanecū ga ítaxīxūwaama bucū rü toxū inicuetaū. Rü yemaārū moxūācūama rü Puteriwa tangugū. ¹⁴⁻¹⁵ Rü yexma nüxū tayangau ga ñuxre ga duūxūgū ga yaxōgūxū. Rü toxna naxu na wūxi ga yūxū yexma naxūtagu tarūchoxūcēx. Rü marü wūxi ga yūxū ngupetūgu rü itaxīāchi na namagu Dumawa taxīxūcēx. Rü marü toxū nacuāchigagū ga yema yaxōgūxū ga Dumagugūxū. Rü yema nama ga Ápiugu āegaxūgu naxī na yexma toxū yangaugūxūcēx. Rü ñuxre rü yema nachica ga Tomaēxpūx ga Taxepataūgu āegaxūwa toxū nayarūnguxēēgū Rü togū rü nachopetū ñuxmata yema nachica ga Ápiuarū Ngūēchicagu āegaxūwa nangugū. Rü yexguma Pauru nüxū dēuxgu ga yema yaxōgūxū, rü Tupanana moxē naxā rü poraācū nataāē. Rü yemaācū Dumawa tangugū. ¹⁶ Rü yexguma Dumawa tangugūgu rü wūxi ga ípatawa nananguxēēgū ga Pauru nüxīca namaā ga wūxi ga churara ga nüxna dauxū.

Dumawa nayexma ga Pauru

¹⁷ Rü tomaēxpūx ga ngunexū marü yéma nayexmagu, rü Pauru naxcēx nangema ga yema Yudíugūarū āēxgacūgū ga Dumawa yexmagūxū. Rü yexguma nangutaquēxegūgu, rü ñanagürü ga Pauru nüxū: —Choma, Pa Chaueneēgūx, rü taxuūma i chixexū chaxū namaā i tatanūxūgū, rü bai i nuxcūmaūgūxū i tórü oxigūcūmagūmaā. Natürü Yerucharéūgu choxū niyauxgū ga tatanūxūgū, rü Dumacūāx ga churaragūna choxū namugū. ¹⁸ Rü yexguma marü choxna nacagūegu ga Dumacūāxgū, rü choxū ningēxgūchaū, yerü taxuūma ga tacū ga chixexū chowa nadaugū na choxū yamēxgūxūcēx. ¹⁹ Natürü yema tatanūxūgū ga Yudíugū rü nayamuētanū na tama choxū yangēxgūxūcēx, rü yemacēx düxwa naxcēx íchaca na nümatama ya āēxgacū ya Chécharu choxna çaxūcēx. Natürü tama tatanūxūgūxū na íchaxuaxūxūcēx nixī ga yemacēx íchaçaxū. ²⁰ Rü ngēmacēx nixī i pexcēx nuā changemaxū na pexū chadauxūcēx rü pemaā chidexaxūcēx. Pema nüxū pecuēx rü yixema i Yudíugū rü ítananguxēē i na ínanguxū ya Cristu. Rü yima Cristucēx nixī i choma i ñuxma i daa cadenamaā chináixū —ñanagürü. ²¹ Rü nümagū nanangāxūgū, rü ñanagürügū: —Toma rü taxuūma i popera i Yudéawa ne muxū i cuchigagu umatūxū tayauxgū. Rü ngēma taeneēgū i ngema ne íxū rü

núma ngugüxü rü bai i wüxi i nüxü ixuxü i tacü rü ore i chixexü i cuchiga. ²² Rü cuxütawa nüxü taxĩnüëchaü rü ¿ñuxü ñacuxü i cumax? Erü nüxü tacuèxgü rü guxüwama i Yudíugü rü chixri nachiga nidexagü i ngëma ore i ngexwacaxüxü i Ngechuchuchiga —ñanagürügü. ²³ Rü yexguma Paurumaã inaxunetägü ga wüxi ga ngunexü, rü napatawa naxĩ ga muxüma ga duüxügü. Rü Pauru namaã nüxü nixu ga Tupanaärü ore ga ñuxâcü äëxgacü na yĩxü ya Tupana. Rü pèxmama inanaxügü, rü ñuxmata nachütaxü rü nüxü nanangüchaüxëë ga yema duüxügü na Ngechuchuaxü yaxögüäxüçèx. Rü yemacèx Moïché ümatüxü ga mugüwa rü nuxcümaügüxü ga Tupanaärü orearü uruügü ümatüxü ga orewa namaã nüxü nixu ga Ngechuchuchiga. ²⁴ Rü nümaxü rü nayaxögü ga yema Pauru namaã nüxü ixuxü natürü ga togü rü tama nayaxögü. ²⁵ Rü yexguma tama wüxigu naxĩnüëgu ga yema duüxügü, rü inanaxügü ga na íyaxĩxü. Rü yemacèx ga Pauru rü ñanagürü nüxü: — Meã perü oxigümaã nidexa ga Tupanaãë i Üünexü ga yexguma Ichaxíaxü yadexaxëëgu rü ñaxgu:

²⁶ “¡Rü ngema naxü, rü ngëma duüxügümaã nüxü yarüxu rü ñacurügü tá nüxü: ‘Rü woo nüxü pexĩnüëgu rü täütáma aixcüma nüxü pecuèxgü. Rü woo nüxü perüdaunügu rü täütáma aixcüma peyaxögü. ²⁷ Rü ngëmaäcü pixígü i ñuxmax, erü tama choxü pecuáxchaü i pemax. Rü tama nüxü pexĩnüë i chorü ore erü tama nüxü pexĩnüëchaü. Rü tama nüxü peyaxögü i ngëma choma pexü nüxü chadauxëëxü erü tama nüxü peyaxögüchaü. Rü tama peãëwa chaugu perüxĩnüë erü tama nüxü perüxoechaü i pecüma i chixexügü rü tama chauxcèx pedaugüchaü na choma pexü chamaxëxëxüçèx!’ ”

ñanagürü ga Tupanaãë i Üünexü. ²⁸ Rü ñanagürü ta ga Pauru: —Rü name nixĩ i pema rü ta nüxü pecuèx rü ñuxma rü marü inaxügü na ngëma tama Yudíugü ixígüxütanüwa naxunagüxü i ñaã Tupanaärü ore i tüxü maxëxëëxü. Rü nümagü tá nixĩ i aixcüma inaxĩnüëxü —ñanagürü. ²⁹ Rü yexguma Pauru yema ñaxgu, rü ínixĩ ga yema Yudíugü, rü poraäcü nügümaã iniporagatanüçüü. ³⁰ Rü taxre ga taunecü ga mecü yéma nayexma ga Pauru nawa ga guma í ga naxütanüne ga nagu na napexüçèx. Rü yéma meãma nanayaxuxü ga guxüma ga duüxügü ga naxütawa íyadaugüxüxü. ³¹ Rü nüxü nixuchiga ga ñuxâcü äëxgacü na yĩxü ga Tupana. Rü taxúema nüxna tanachuxu na nangüexëëãxü ga Cori ya Ngechuchu ya Cristuchiga. Rü taxúema naxcèx tanachixewe.

POPERA GA DUMAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Dumaārŭ ĩānewa yexmagŭxŭ

¹ Pa Chaueneēgŭx, choma i Pauru nixŭ i pexcèx chanaxŭmatŭxŭ i ñāñ popera. Rü choma nixŭ i Ngechuchu ya Cristuarŭ duŭxŭ chiŭxŭ. Rü choma nixŭ ga Tupana choxŭ yaxuxŭ na choxŭ yamuxŭcèx na duŭxŭgŭmaā nüxŭ chixuxŭcèx i norŭ ore i mexŭ i tüxŭ maxēxēxŭ. ² Rü nuxcŭmaxŭchima Tupana nanamu ga norŭ orearŭ uruŭgŭ na naxŭmatŭgŭāxŭcèx ga norŭ ore i mexŭ. Rü yemaācŭ tüxŭ nüxŭ nacuèxēē ga ñāñ ore i mexŭ. ³ Rü ñāñ ore i mexŭ rü tórŭ Cori ya Ngechuchu ya Cristuchiga nixŭ. Rü nüma rü woo Tupana Nane na yŭxŭ, natŭrŭ duŭxŭgŭrŭŭ nabu ga yexguma ñoma ga naānewa nanguxgu. Rü nuxcŭmaŭcŭ ga āēxgacŭ ga Dabŭtaa nixŭ. ⁴ Natŭrŭ nümatama ya Ngechuchu rü ũnecŭ nixŭ. Rü yexguma yuwa ĩnadaxgu rü Tupana tüxŭ nüxŭ nadauxēē na aixcŭma Nanexŭchi na yŭxŭ. Rü nüxna nanaxā ga guxŭma ga pora. ⁵ Rü Ngechuchu ga Cristugagu nixŭ ga chomaā namecŭmaxŭ rü choxŭ naxunetaxŭ ga Tupana na norŭ puracŭ chaxŭxŭcèx. Rü yemacèx Ngechuchuégagu choxŭ namu na guxŭ i nachŭŭānewa nüxŭ chixuxŭcèx i norŭ ore na yaxōgŭāxŭcèx i duŭxŭgŭ rü Tupanaga naxŭnŭxŭcèx. ⁶⁻⁷ Rü pema rü ta, Pa Dumacŭāxgŭx, rü ngēma duŭxŭgŭtanŭwa pengēxmagŭ yerŭ Tupanaāxŭ peyaxōgŭ rü naga pexŭnŭē. Rü nüma rü pexŭ nangechaŭ rü marŭ pexŭ naxuneta na Ngechuchu ya Cristuarŭ duŭxŭgŭ pixŭgŭxŭcèx rü ngēma norŭ duŭxŭgŭtanŭxŭ na pexŭgŭxŭcèx. Rü ñuxmax, Pa Chaueneēgŭ i Dumacŭāxgŭx, rü chanaxwèxe i nüma ya Tanatŭ ya Tupana rü tórŭ Cori ya Ngechuchu ya Cristu pemaā namecŭmagŭ rü pexŭ narŭngŭxēēgŭ na meā pexŭ naxŭpetŭxŭcèx rü aixcŭma petaāēgŭxŭcèx.

Pauru rü nüxŭ nangúchaŭ na ĩyadauāxŭ ga yema yaxōgŭxŭ ga Dumawa yexmagŭxŭ

⁸ Rü ñuxma rü Ngechuchu ya Cristuégagu Tupanana moxē chaxā pexcèx, erŭ guxŭwama i guxŭ i naānewa rü duŭxŭgŭ nüxŭ nixugŭgŭ na aixcŭma Cristuaxŭ peyaxōgŭxŭ rü Tupanacèx pemaxēxŭ. ⁹ Rü nüma ya Tupana choxŭ nadau rü nüxŭ nacuèx na aixcŭma guxŭguma pexcèx chayumŭxēxŭ. Rü yimaāxŭ nixŭ i guxŭma i chorŭ ngúchaŭmaā chapuracŭxŭ rü nüxŭ chixuxŭ i norŭ ore i mexŭ i Nanechiga. ¹⁰ Rü guxŭguma nüxna chaca na choxŭ ngēma namuxŭcèx rü ngēmaācŭ düxwa pexŭ ĩchayadauxŭcèx ega norŭ ngúchaŭ yixŭgu. ¹¹ Erŭ aixcŭma choxŭ nangúchaŭ na pexŭ chadauxŭ na pemaā nüxŭ chixuxŭcèx i Tupanaārŭ ore na aixcŭma meā peyaxōgŭxŭcèx rü yexeraācŭ peporaexŭcèx. ¹² Rü ngēxguma ngēmaācŭ wŭxiwa ĩngēxmagŭgu, rü tá wŭxichigŭ yigŭ tataāēgŭxēē rü yigŭaxŭ tanangúchaŭxēē. Erŭ choma rü tá nüxŭ chadau na ñuxācŭ tórŭ Coriaxŭ peyaxōgŭxŭ rü pema rü tá ta nüxŭ pedau na ñuxācŭ chayaxōxŭ. ¹³ Pa Chaueneēgŭx, chanaxwèxe i nüxŭ pecuèx na muēxpŭxcŭna pexŭ ĩchayadauxchaŭxŭ, natŭrŭ ñuxmarŭta rü choxŭ naguxcha. Natŭrŭ ngēma petanŭwa chaxŭxchaŭ, erŭ chanaxwèxe na pemaā nüxŭ chixuxŭ i Tupanaārŭ ore yema toxnamana yexmagŭxŭ ga duŭxŭgŭmaā nüxŭ chixuxŭrŭŭ. Erŭ chanaxwèxe i ngēma duŭxŭgŭrŭŭ meā peyaxōgŭ na ngēmaācŭ Cristuwe naxŭxŭcèx i ngēma petanŭxŭgŭ i ñuxma tama yaxōgŭxŭ. ¹⁴ Rü aixcŭma ngēma changuxchaŭ erŭ nümatama ya Tupana choxŭ namu na guxŭ i duŭxŭgŭmaā nüxŭ na chixuxŭcèx i norŭ ore. Rü nanaxwèxe i duŭxŭgŭ

i meã poperaxũ icuáxũmaã nüxũ na chixuxũ rü duũxũgü i tama poperaxũ icuáxũmaã ta nüxũ chixuxũ i ngẽma norü ore. Rü ngẽxgumarũ ta nanaxwexe na ngẽma duũxũgü i cuèx nüxũ ngẽxmaxũmaã nüxũ na chixuxũ rü ngẽma duũxũgü i taxuguma rüxĩnũexũmaã nüxũ na chixuxũ. ¹⁵ Rü ngẽmacèx, Pa Chaueneëgü i Dumagu Āchiũgũxũ, rü choma rü marü íchamemare na petanüwa na chaxũxũ, na pemaã rü ta nüxũ chixuxũcèx i Tupanaãrü ore i mexũ.

Tupanaãrü ore rü napora

¹⁶ Rü taxucèxma naxcèx chaxãne i ngẽma ore i mexũ. Erü ngẽma ore rü napora, rü ngẽmamaã nixĩ i napuracũxũ ya Tupana na guxãma ya yixema Cristuaxũ yaxõgũxe rü tüxũ nangẽxmaxũcèx i maxũ i taguma gúxũ. Rü ngẽma maxũ, rü Yudíugüçèxirachirẽx nixĩ, natürü i ñuxma rü guxũma i ngẽma tama Yudíugü ixĩgũxũcèx rü ta nixĩ. ¹⁷ Rü ngẽma norü orewa nixĩ i tamaã nüxũ yaxuxũ ya Tupana na tórü õgaguxicatama yĩxũ na napẽxewa imexũ. Erü norü ore i ümatũxũwa rü ñanagürü:

“Rü yixema tümaãrü õgagu Tupanapẽxewa mexẽ, rü tá tüxũ nangẽxma i maxũ i taguma gúxũ”,
ñanagürü.

Nagagutama nixĩ i duũxũgü inapoxcuexũ

¹⁸ Rü nüxũ tadaugü na Tupana daxũgũxũ i naãnewa ne namuxũ i norü poxcu i ãucũmaxũ naxcèx i guxũma i ngẽma duũxũgü i tama naga ñnũexũ rü chixexũ ügũxũ rü ngẽma norü chixexũmaã togũaxũ naguxchaxẽëgũxũ na tama nüxũ nacuèxgũxũcèx i ngẽma ore i aixcũma ixĩxũ. ¹⁹ Rü ngẽma duũxũgü i chixexũ ügũxũ rü meã nüxũ nacuèxgũchirẽx na ñuxãcü yĩxũ ya Tupana yerü nümatama ga Tupana rü marü nüxũ nüxũ nadauxẽë ga yema. ²⁰ Rü woo tama nüxũ idaugügu ya Tupana, natürü guxũma i tacü i naxũxũwa nixĩ i nüxũ idaugũxũ. Rü yexguma noxri naãne naxũxgumama nixĩ ga meãma duũxũgũxũ nüxũ nadauxẽëxũ na aixcũma Tupana na yĩxũ rü guxũguma na naporaxũ. Rü ngẽmacèx i ngẽma duũxũgü i chixexũ ügũxũ, rü taxucürüwama tacũmaã nügü inapoxũgü i Tupanapẽxewa. ²¹ Yerü woo nüxũ nacuèxgũchirẽx na ñuxãcü yĩxũ ga Tupana, natürü tama nanayauxgũchaũ na norü Tupana yĩxũcèx, rü bai na moxẽ nüxna naxãgũxũ. Natürü yema ore ga taxuwama mexũguama narũxĩnũe, rü yemaãcü naëchitamare namaxé rü yexeraãcü chixexũgu narũxĩnũe. ²²⁻²³ Rü nügü yaxugüegu rü duũxũgü i nüxũ icuáxũ nixĩgü natürü taxuguma narũxĩnũe. Yerü nüxna nixĩgachitanü ga Tanatü ya Tupana ya mexẽchicü ya taguma yucü, na nawe naxĩxũcèx ga norü naxchicünèxãgũmare ga duũxũgü i yuxwèxexũchicünèxãmare ixĩgũxũ rü werigüchicünèxãmare ixĩgũxũ rü naèxũgüchicünèxãmare ixĩgũxũ rü ãxtapegüchicünèxãmare ixĩgũxũ. ²⁴ Rü yemacèx ga Tupana rü düxwa yemawa nanawogü ga yema duũxũgü na naxügüãxũcèx ga guxũma ga yema chixexũ ga nüxũ ngúchaũgũxũ rü nügũmaã na naxügüãxũcèx ga naxũneãrü ngúchaũgü i ãne tüxna ãxũ. ²⁵ Rü yemaãcü nüxna nixĩgachi ga guma aixcũmaxũchi Tupana ixĩcü na nawe naxĩxũcèx ga norü tupanagü ga tama aixcũma ixĩgũxũ. Rü yema Tupana üxũpẽxewa nayumüxëgü rü yemaxũ nicuèxũgü, natürü tama nüxũ nicuèxũgü ga Tanatü ya Tupana ga naxücü rü inaxwèxecü na guxũguma nüxũ icuèxũgũxũ. Rü ngẽmaãcü yixĩ. ²⁶ Rü yemacèx ga Tupana rü düxwa yemawa nanawogü ga yema duũxũgü na naxügüãxũcèx ga naxũneãrü ngúchaũ i ãne tüxna ãxũ. Rü èxrüũ ga ngexũgü rü naxrüũ ngexũgũmaãtama nangẽãëgü rü tama yatügũmaã. ²⁷ Rü yexgumarũ ta ga yatügü rü naxrüũ

yatūxūmaātama nangēāēgū, rü tama ngexūgūmaā. Rü yema naxūneārū ngúchaū ga chixexūgū rü nüxū napora na naxrūū yatūxūmaā namaxēxū. Rü yemaācū ga yema yatūgū rü nūgūmaā nanaxūgū ga yema naxūneārū ngúchaū i āne tūxna āxū, rü düxwa yemagagu nīdaawee rü naturaxūnegū. ²⁸ Rü yema na tama Tupanaxū nacūèxgūchaūxū, rü yemacèx ga nūma ga Tupana rü düxwa yemawa nanawogū ga yema duūxūgū na norū chixexūga na naxīnūēechaxūcèx rü na naxūgūāxūcèx ga yema chixexū. ²⁹ Rü düxwa ga yema duūxūgū rü guxūraūxū ga chixexū naxūgū ga Tupanapēxewa. Rü tama aixcūma meā naxmèxmaā rü natemaā namaxē. Rü naxaū rü nūgūnaxīcatama nananugūchaū i guxūma i tacū. Rü toguāxū nachixexēēgūchaū. Rü nixāūxāchiwèxegū, rü namáētagū, rü nanuēwèxe, rü nawomūxēēwèxegū, rü naxūneārū ngúchaū nüxū napora, rü naxoregütèèxgū. ³⁰ Rü chixexūmaā toguāxū nixugūe, rü Tupanachi naxaie, rü toguāxmaā naguxchigagū. Rü nūgūga naxīnūēgu rü togūarū yexera nixīgū, rü nūgū nicuèxūūgū. Rü naxcèx nadaugū na yexera chixexū naxūgūxū. Rü tama nanatūga rü naēga naxīnūēchaū. ³¹ Rü tama inarūxīnūēchaū. Rü tama aixcūma nayanguxēē i ngēma nüxū yaxugūxū. Rü taxūxūma nangechaūgū. Rü tama togūaxū nüxū nangechaū i tacū rü guxchaxū. Rü tama toguāx nüxū tangechaūtümūgū. ³² Rü nūmagū i ngēma duūxūgū rü meāma nüxū nacūèxgūchirēx rü Tupana rü marū namaā nanaxuegu na noxtacūma nayuxē i ngēma duūx-ūgū i ngēmaācū maxēxū. Natürü woo meāma nüxū nacūèxgūchirēx i guxūma i ngēma, natürü nanaxūgūama i ngēma chixexū, rü nataāēgū ega togū naxūxgu.

2

Ngēxguma Tupana duūxūgūxū poxcugu, rü tama chixexū naxū, erū ngēma duūxūgū rü norū chixexūgagutama nanapoxcue

¹ Rü ngēmacèx, Pa Duūxūx, rü woo texé quixīgu rü taxuacūma Tupanapēxewa cugütūwa cuchogū, ega togūxū quixuechagu. Erū ngēxguma togūxū quixuechagu na nachixexū rü cugūtama cupoxcu, erū cuma na cumūcūxū quixuechaxū rü cuma rü ta cunaxū i ngēma chixexū i cumūcūxū naxcèx quixuechaxū. ² Rü nüxū tacuèx rü Tupana tá nanapoxcue i ngēma duūxūgū i namūcūgūxū ixugūechaxū. Rü ngēxguma napoxcueāgu, rü tama chixexū naxū ya Tupana, erū ngēma duūxūgū rü norū chixexūgagutama nixī i napoxcueāxū. ³ Rü dücax, Pa Duūxūx, rü ngēxguma togūxū quixuechagu, natürü cuma rü ta cunaxūxgu i ngēmatama chixexū i nūma naxūxū, ¿rū ñuxūcūrūwa tá i nagu curūxīnūxū na Tupanachaxwa iquicūxū na tama cuxū napoxcuxūcèx? ⁴ ¿Rü tūxcūū tama nagu curūxīnū i ngēma mexū i Tupana cuxcèx üxū? Nūma rü porācūxūchi cumaā namecūma rü yaxna cumaā naxīnū rü tama paxa curū chixexūcèx cuxū napoxcuchaū. ¿Rü ñuxma rü tūxcūū nüxū cuxo? ¿Tama ēxna nüxū cucuèx na Tupana ngēmaācū cumaā mecūmaxū na nüxū curūxoxūcèx i curū chixexū rü naxcèx na cumaxūxūcèx ya Tupana? ⁵ Natürü cuma rü tama Tupanaxū cucuāxchaū rü tama nüxū curūxoxchaū i curū chixexū. Rü ngēmaācū cugūcèxtama cunayexeraxēē i curū poxcu i tá cuyaxuxū i ngēma ngunexū i nagu Tupana napoxcuexū i ngēma chixexū ügūxū. Rü ngēma ngunexūgu rü Tupana tá aixcūma ngēma duūxūgūmaā nanaxuegu na ñuxācū tá na napoxcueāxū. ⁶ Rü ngēxguma tá nixī i Tupana nüxū yaxūgūtanūxū i wūxichigū i duūxū naxcèx i ngēma naxūgūxū. ⁷ Rü maxū i taguma gūxūmaā Tupana tá tūxū nanaxūtanū ya yīxema guxūguma mexū taxūgūācūma naxcèx daugūxe na Tupana tūmamaā taāēxū rü naxcèx daugūxe na aixcūma Tupanaxūtawa tangugūxū. ⁸ Natürü

Tupana tá tūmamaã nanu rü tá tūxū napoxcu ya yíxema tūgūguxicatama rüxīnūēxē rü tama naga ĩnūēchaūxē i ore i aixcūma ixīxū rü naxcèx daugūxe na ngēma chixexū taxūgūxū. ⁹ Rū guxūma i ngēma duūxūgū i chixexū ūgūxū rü tá ngūxū ningegū rü poraãcū tá chixexū nūxū naxūpetū. Rū ngēma Yudíugū i chixexū ūgūxūira tá nixī i Tupana inapoxcuexū. Rū ngēmawena rü tá nanapoxcue i guxūma i ngēma togū i duūxūgū i chixexū ūgūxū. ¹⁰ Natürü ngēma duūxūgū i mexū ūgūxū, rü Tupana tá namaã nataãē, rü tá nanatachigaxēē, rü tá nanataãēxēē. Rū ngēma Yudíugū i mexū ūgūxūcèxira tá nixī i ngēma. Rū ngēxgumarū i guxūma i togū i duūxūgū i mexū ūgūxūcèx rü tá ta nixī. ¹¹ Erü Tupanapēxewa rü nawūxigu i ngēma duūxūgū i Yudíugū ixīgūxū rü ngēma togū i duūxūgū i tama Yudíugū ixīgūxū. Rū guxāma ya texé ya chixexū ūgūxe rü tá tanayaxu i tūmaārū poxcu, natürü guxāma ya texé ya mexū ūgūxe rü tá Tupana tūmamaã nataãē. ¹² Rū guxūma i duūxūgū i pecadu ūgūxū i tama nūxū cuèxgūxū i ngēma mugū ga Moïché ūmatūxū, rü tá inayarūtauxe. Rū ngēxgumarū ta i guxūma i ngēma pecaduāxgūxū i nūxū cuèxgūxū i ngēma mugū ga Moïché ūmatūxū, rü ngēma mugū nūxū ixuxūācūma Tupana tá nanapoxcue. ¹³ Erü Tupanapēxewa rü taxuwama name i ngēma duūxūgū i nūxū ĩnūēmarexū natürü tama nagu maxēxū i norü mugū. Natürü ngēma duūxūgū i Tupanaārū mugūga ĩnūēxū nixī i aixcūma Tupanapēxewa imexū. ¹⁴ Dúcèx, i ngēma duūxūgū i tama Yudíugū ixīgūxū. Nūmagū rü tama nūxū nacuèxgū i Tupanaārū mugū. Natürü ngēxguma nūēchamatama naxūgūmareāgu i ngēma Tupana tūxū muxū, rü tūxū nūxū nadauxēē na nūxū nacuèxgūxū i tacū na yīxū i mexū rü tacū na yīxū i chixexū, woo tama nūxū na nacuèxgūchiréxū i Tupanaārū mugū. ¹⁵ Erü nacūmagūwatama nixī i tūxū nūxū nadauxēēxū na nūxū nacuèxgūxū na tacū yīxū i mexū rü tacū na yīxū i chixexū. Rū ngēma duūxūgū rü ngēxguma chixexū naxūgūgu, rü naāēwatama nixī i nūxū nacuèxgūxū na nachixexū i ngēma naxūgūxū. Rū ngēxgumarū ta i ngēxguma mexū naxūgūgu, rü naāēwatama nixī i nūxū nacuèxgūxū na namexū i ngēma naxūgūxū. ¹⁶ Rū ngēma ngunexū i nagu Tupana Cristuxū namuxū na guxū i duūxūgūxū yacagūxūcèx i norü maxūchiga, rü ngēma duūxūgū i tama Tupanaārū mugūxū cuèxgūxū rü naāēwa tátama nixī i nūxū nacuèxgūxū na chixexū naxūgūxū rü ēxna mexū naxūgūxū. Rū ngēxguma tá nixī i nangóxū i guxūma i ngēma chixexū i cúācūma naxūgūxū i duūxūgū, rü ngēma chixexū i nūxūcatama nagu naxīnūēxū. Rū Tupanaārū ore i pemaã nūxū chixuxū nixī i tūxū nūxū cuèēēxū i ngēma.

Yudíugūchiga rü mugū ga Moïché ūmatūxūchiga

¹⁷ Natürü pema Pa Chaueneēgū i Yudíugūx, rü ñaperūgūgū:

“Toma rü Yudíugū tixīgū rü meāma nūxū tacuèx i Tupanaārū mugū ga Moïché ūmatūxū”, ñaperūgūgū. Rū ngēmaãcū nagu perūxīnūē na Tupanapēxewa pimexū erü meāma nūxū pecuèx i ngēma Tupanaārū mugū ga Moïché ūmatūxū. Rū ngēmaãcū Tupanamaã pegū picuèxūgū erü nagu perūxīnūē na Tupana pexū nangechaūxū erü Yudíugū pixīgū. ¹⁸ Rū nūxū pixu na meāma nūxū pecuáxū i tacū nixī i Tupanaārū ngúchaū rü tacū nixī i mexū rü tacū nixī i chixexū. Rū Tupanaārū mugūwa naxcèx pengúe na naxcèx pedauxū i ngēma aixcūma mexū ixīxū. ¹⁹ Rū pema rü ñaperūgūgū:

“Toma rü meāma nūxū tacuèx na tanaxucuxēxū i ngēma togū i duūxūgū i tama Tupanaxū cuèxgūxū. Rū meāma nūxū tacuèx na itayanawēxāchixēēxū i ngēma togū i chixexūwa ngēxmagūxū”, ñaperūgūgū. ²⁰ Rū pema nagu perūxīnūēgu rü nūxū pecuèx na ñuxācū penaxucuxēxū i ngēma togū i duūxūgū i tama Tupanaxū cuèxgūxū rü ñuxācū penangúexēēxū i ngēma duūxūgū i ngexwacèx yaxōgūxū. Rū ngēmaãcū nagu perūxīnūē na togūarū

ucuxēruūgū pixīgūxū, erū Tupanaārū mugūwa pengúe rü ngēmacèx meāma nūxū pecuèx i tacū nixī i mexū rü tacū nixī i ore i aixcūma ixīxū. ²¹ Rū dūcax, Pa Chaueneēgū i Yudíugūx, pema na togūxū pengúexēxū, ¿rū tūxcūū tama pegūtama pengúexēē? Pema nūxū pixu na tama namexū na ingīxū, ¿rū tūxcūū i pema ipengīxū? ²² Rū pema nūxū pixu na tama namexū na naī i ngemaā ipexū, ¿rū tūxcūū i pema i ngēmaācū pemaxēxū? Rū pema na naxchi pexaiexū i togūarū tupanagūnetachicūnèxāgū, ¿rū tūxcūū i naxcèx pengīxū i norū tupaucagūarū ngēmaxūgū? ²³ Pema nūxū pixu na namexū i Tupanaārū mugū i ūmatūxū, rü petaāē erū meā nūxū pecuèxgū i ngēma mugū. Natürū Tupanamaā chixexū pexūe, erū tama naga pexīnūē i ngēma pexū namuxū i norū mugūwa. ²⁴ Rū ngēmacèx i Tupanaārū ore i ūmatūxūwa rü ñanagürü:

“Rū pegagu nixī na chixri Tupanachiga yadexagūxū i ngēma duūxūgū i tama Yudíugū ixīgūxū”,

ñanagürü. ²⁵ Pema rü pegū ípewiechèxmüpēxechiraūgū na Tupanaārū duūxūgū pixīgūxūcèx. Rū name nixī na penaxūxū i ngēma, ega aixcūma naga pexīnūēgu i Tupanaārū mugū. Natürū ngēxguma chi tama naga pexīnūēgu i Tupanaārū mugū, rü woo Yudíugū pixīgūgu, natürū Tupanapēxewa rü taxuwama pexū name i ngēma na pegū ípewiechèxmüpēxechiraūgūxū. ²⁶ Rū ngēma togū i duūxūgū i tama nūgū íwiechèxmüpēxechiraūgūxū, rü woo tama ngēma naxūgūgu, natürū Tupanaārū duūxūgū tá nixīgū ega naga naxīnūēgu i norū mugū. ²⁷ Rū dūcax, Pa Chaueneēgū i Yudíugūx, rü ngēma duūxūgū i tama íwiechèxmüpēxechiraūgūxū natürū naga ñnūxū i Tupanaārū mugū, rü ngēma duūxū rü tá Tupana-pēxewa pexū nixu na ñuxācū pechixexū. Rū ngēmaācū tá pexū naxūpetū erū tama naga pexīnūē i Tupanaārū mugū i woochirēx na nūxū pecuāxū i ngēma mugū, rü woochirēx na ípewiechèxmüpēxechiraūgūxū. ²⁸ Rū dūcax, rü tama ngēma na Yudíuxacūgū pixīgūxūcèx nixī na aixcūma Tupanaxācūgū pixīgūxū. Rū tama ngēma na ípewiechèxmüpēxechiraūgūxūcèx nixī na Tupanaārū duūxūgū pixīgūxū. ²⁹ Erū yíxema aixcūma tūmaārū maxūnewa Tupanaga ñnūxē tixī ya aixcūma Tupanaxācū ixīxē. Rū ngēxguma aixcūma taāēwa yaxōxgu nixī i aixcūma Tupanaārū ixīxū. Rū Tupanaāē i Üünexū nixī i tūxū rüngūxēēxū na yaxōxūcèx, rü tama ngēma mugū ga Moīché ūmatūxūgagu nixī. Rū yíxema aixcūma Tupanaārū ixīxē, rü Tupana rü tūmamaā nataāē woo duūxūgū tama tūmamaā taāēgūgu.

3

¹ ¿Rū ñuxma rü tacūwa tūxū namexū na Yudíugū ixīgūxū? ¿Rū tacūwa namexū na íwiechèxmüpēxechiraūgūxū? ² Rū poraācūxūchima tūxū name na Yudíugū ixīgūxū. Yerū nūma ga Tupana rü tūxnaxūchi nixī ga naxāāxū ga norū mugū i ūmatūxū. ³ ¿Rū tacū tá ngupetūxū i ñuxma ega ñuxre i tatanūxū i Yudíugū rü tama meā yanguxēēgūāgu i ngēma Tupana tūxū muxū? ¿Rū pexcèx rü ngēmacèx tāūtāma yanguxēēāxū ya Tupana i ngēma tamaā inaxunetaxū? ⁴ Rū tama ngēmaācū nixī. Erū woo guxū i duūxūgū rü yadoratèxgūgu, natürū Tupana rü taguma nidora rü guxūguma nayanguxēē i ngēma nūma tamaā inaxunetaxū. Rū yemacèx norū ore ga Dabí ūmatūxūwa rü ñanagürü:

“Cumax, Pa Tupanax, rü aixcūma nixī i curū ore i nūxū quixuxū. Rū ngēxguma cuxū tangugūgūgu rü nūxū tadaugū na aixcūma cumexū”,

ñanagürü. ⁵ Natürū duūxūgū rü ínatūe erū ñanagürūgū:

“Rū nūetama nixī na chixexū ixūgūxū erū ngēmaācū yexeraācū nangox na namecūmaxū ya Tupana”, ñanagürūgū. Rū ñanagürūgū ta:

“Rü ngēxguma chi tórü chixexūgagu yexeraācü nangoxgu na aixcüma namecümaxū ya Tupana, rü maneca tama name ega tórü chixexūcèx tūxū napoxcuegu”, ñanagürügü. ⁶ Natürü ngēma ñaxūgu na naxīnūēxū i duūxūgü rü poraācü ínatüe, erü tama ngēmaācü nixī. Erü ngēxguma chi tama namexgu ya Tupana, ¿rü ñuxācü chi i meā duūxūgūxū yacagūxū i naāneārü guxgu? ⁷ Natürü i duūxūgü rü ñanagürügü:

“Rü ngēxguma chi chorü chixexūgagu yexeraācü nangoxgu na ñuxācü aixcüma namexū ya Tupana, ¿rü tūxcūū yīxū i choxna naçaxū naxcèx i chorü chixexū rü choxū napoxcuxū naxcèx i ngēma?” ñanagürügü. ⁸ Natürü ngēma ñaxūgu na naxīnūēxū i duūxūgü rü poraācü ínatüe. Erü ngēxguma chi aixcüma yixūgu i ngēma nagu naxīnūēxū i duūxūgü, rü chi narümemaē nixī na yexeraācü chixexū naxūgūxū na yexeraācü mexū na ínguxuchixūcèx. Rü dücax, Pa Chaueneēgūx, nangēxma i chixexū i duūxūgü i choxū ügagūmarexū i nüxū ixugūexū na ngēma yīxū i chorü nguxēētae i duūxūgūxū namaā changúexēēxū. Natürü ngēma duūxūgü i ngēma ñagūxū rü nagagu tátama napoxcue.

Guxāma i yixema rü taxüetūxūgü

⁹ ¿Rü ñuxācü nixī i ñuxmax? ¿Pexcèx rü yixema i Yudíugü rü togü i duūxūgüarü yexera Tupanapēxewa imexū? Pemaā nüxū chixu rü tama ngēmaācü nixī. Erü guxūma i duūxūgü i Yudíugü ixīgūxū rü guxūma i duūxūgü i tama Yudíugü ixīgūxū, rü naxüetūxūgü. ¹⁰ Erü Tupanaārü ore i ümatūxūwa rü ñanagürü:

“Rü tataxuma ya texé ya aixcüma Tupanapēxewa mexē, rü bai ya wūxie.

¹¹ Rü tataxuma ya texé ya aixcüma nüxū cuáxe i Tupanaārü ore na ñuxācü nanaxwēxexū na naxcèx imaxēxū. Rü tataxuma ya texé ya aixcüma Tupanacèx dauxe. ¹² Rü guxāma ítatüe, rü guxāma itayarütaxe rü chixexū taxūgü i Tupanapēxewa. Rü tataxuma ya texé ya aixcüma mexū üechaxe, rü bai ya wūxie. ¹³ Rü tūmaāx rü wūxi i yuetamaxū i ingenaxūrūū nixī erü ngēma ítanaxūxūxēē i nagúxūraūxū i dexa i chixexū. Rü tūmaārü conūmaā rü poraācü tidorae. Rü ngēma tūmaārü dexa rü ñoma āxtapeguchatarūū nixī erü togūxū nachixexēē. ¹⁴ Rü chixexū i ore i duūxūgūāēwa ngúxūmaāxīcatama tidexagü. ¹⁵ Rü ítamemare na duūxēxū timáxū. ¹⁶ Rü ngextá ítaxīxūwa rü togūxū tachixexēē rü tanangechaūxēē rü chixexūgu tanayixēē. ¹⁷ Rü tama nüxū tacuèx na ñuxācü togü i duūxūgūxū tangechaūgūxū rü meā natanūwa tamaxēxū.

¹⁸ Rü tama nüxū tacuáxchaū na Tupanaxū tamuūēxū”, ñanagürü i ngēma ore i ümatūxūwa. ¹⁹ Rü nüxū tacuèx rü ngema poxcu i Tupanaarü mugūwa nüxū yaxuxū rü naxcèx nixī i ngema Yudíugü ga natanūwa nanguxū ga yema mugü. Rü woo ngema tama Yudíugü ixīgūxū i duūxūgūcèx rü ta nixī i ngema poxcu. Erü taxúema aixcüma naga taxīnū i ngēma mugü. Rü ngēmacèx taxucürüwa texé Tupanapewa tūgü ítapoxū i ngēxguma Tupana tūxū icagūgu i tūmaārü pecaduchiga. ²⁰ Rü ñuxma na taxúema aixcüma naga ínūēxū i ngēma mugü, rü ngēmacèx taxucürüwama texé tūgü tixu na ngēma mugü taxaurexūgagu Tupanapēxewa tamexū. Erü ngēma mugü tūxū nüxū cuèxēēxū nixī na poraācü ipecaduāxgūxū.

Tórü ōgagu nixī i Tupana tūxna naxāxū i maxū

²¹⁻²² Rü ñuxma na taxucürüwama Tupanapēxewa tūxū yamexēēxū i ngēma mugü, rü ngēmacèx ya Tupana rü tūxū nüxū nacuèxēē na ñuxācü yīxū i tūxū yamexēēxū na napēxewa imexūcèx. Rü pemaā nüxū chixu rü Ngechuchu ya Cristuaxū na yaxōgūxūgagu nixī i tūxū yamexēēxū ya Tupana na aixcüma

napēxewa imexūcèx. Rū yema mugū ga Moīché ūmatūxū rū yema ore ga nuxcūmaūgūxū ga orearū uruūgū ūmatūxū rū tūxū nūxū nacuēxēē i ngēma. Rū yema mexū ga Tupana taxcèx ūxū ga yexguma nūma namuāgu ga Nane na tórū pecadu naxūtanūxūcèx, rū guxū i duūxūgū i yaxōgūxūcèx nixī, erū Tupanapēxewa rū nawūxigu i guxūma i ngēma duūxūgū. ²³ Rū guxāma tipecaduāxgū rū nūxna tayaxūgugū ya Tupana ya tūxū maxēxēēcū. ²⁴ Natūrū ga Tupana rū poraācū tamaā namecūma rū yemacèx tūxū nangetanūācūma tūxū nimexēēgū na napēxewa imexūcèx. Rū ñuxma rū tūxū nangēxma i maxū i taguma gūxū, yerū Ngechuchu ya Cristu rū marū tūxū nanaxūtanū ga tórū pecadugū. ²⁵⁻²⁶ Rū Tupana rū aixcūma nūma nanamu ga Cristu na nayuxūcèx rū yemaācū tórū pecadu naxūtanūxūcèx na Tupana tūxū nūxū rūngūmaxūcèx i ngēxguma aixcūma Cristuaxū yaxōgūgu. Rū yemaācū nanaxū ga Tupana na tūxū nūxū nadauxēēxūcèx na ñuxācū nūma nūgūcèx tūxū yamexēēxū na aixcūma napēxewa imexūcèx. Rū nuxcūma ga Tupana rū yaxna namaā naxīnū ga duūxūgū ga yexguma chixexū naxūegu, rū tama paxa nanapoxcue. Rū ñuxma rū ta tūxū nanawēx na ñuxācū aixcūma namexū i ngēma nūma naxūxū erū tūxū ínanapi i tórū pecadugū. Rū ngēmaācū tūxū nūxū nadauxēē na ñuxma rū ta aixcūmacū yīxū i ngēxguma tūxū yaxuxgu na napēxewa marū timexū ya guxāma ya yīxema Ngechuchuaxū yaxōgūxe. ²⁷ Rū ngēmacèx i ñuxma rū taxucūrūwama yīgū ticuēxūūgū rū nūxū tixu na yixematama yīgū imexēēgūxū i napēxewa. Erū taxucūrūwama texé tūgū tamexēē i Tupanapēxewa. Rū tama ngēma na naxaurexūcèx i ngēma mugū nixī i imexū, rū tama ngēma na mexū ixūgūxūcèx nixī i imexū. Natūrū Tupanapēxewa time i ñuxma, erū Cristuaxū tayaxōgū. ²⁸ Rū yixema nūxū tacuèx rū ngēxguma Cristuaxū yaxōgūgu nixī i Tupanapēxewa imexū, rū tama ngēma mugū na ixauregūxūcèx nixī i napēxewa imexū. ²⁹ ¿Éxna pexcèx rū Tupana rū Yudíugūarū Tupanaxīcatama yīxū? ¿Rū tama ēxna i ngēma togū i duūxūgūarū Tupana rū ta yīxū? Ngēmaācūx, ngēma togū i duūxūgū i tama Yudíugū ixīgūxūārū Tupana ta nixī. ³⁰ Rū nūxū tacuèxgū na nangēxmaxū ya wūxitama ya Tanatū ya Tupana. Rū guxūma i duūxūgū i Cristuaxū yaxōgūxū, rū nūma ya Tupana rū nayamexēē na napēxewa yamexūcèx. Rū ngēmaācū i nūma ya Tupana rū Yudíugūxū nimexēē i ngēxguma yaxōgūāgu. Rū ngēxgumarūū ta nayamexēē i guxūma i togū i duūxūgū i ngēxguma Cristuaxū yaxōgūāgu. ³¹ Rū ñuxma na Cristuaxū yaxōgūxū, rū bexmana nagu perūxīnūē na ngēmaācū iyanaxoxēēxū i ngēma mugū. Natūrū tama ngēmaācū nixī. Erū ñuxma na Cristuaxū yaxōgūxū rū aixcūma tayanguxēē i ngēma Tupana tūxū muxū.

4

Abráū rū Tupanaāxū nayaxō rū yemacèx Tupana nūxū nixu na namexū

¹ ¿Rū ñuxma rū ñuxū ñagūxū tá i nachiga ga nuxcūmaūcū ga tórū oxi ga Abráū? ¿Rū ñuxācū nixī ga nūxū naxūpetūxū ga Tupanapēxewa? ¿Rū tūxcūū yīxū ga Tupana nūxū ixuxū ga Abráū rū mecū na yīxū? ²⁻³ Rū dūcax, yexguma chi wūxi ga norū puracū ga mexūcèx Tupanapēxewa namexgu ga Abráū, rū yexguma chi waxi nixī ga nūxū nayexmaxū ga tacūcèx nūgū na yacuēxūūxū. Natūrū taxucèxma Tupanapēxewa nūgū nicuēxūū ga Abráū, erū Tupanaārū ore i ūmatūxūwa rū ñanagūrū:

“Abráū rū Tupanaāxū nayaxō, rū yemacèx Tupana nanayaxu rū nūxū nixu na namexū”,
ñanagūrū i ngēma ore. ⁴ Rū ngēxguma texé wūxi i puracū ūxgu rū tūxū naxūtanūgu rū woetama tūmaārū natanū nixī rū tama āmare nixī i ngēma.

⁵ Natürü tama ngēmaācū nixī i ngēxguma Tupanaāxū yaxōxgu. Erü ngēxguma yaxōxgu, rü tama tacū rü puracū i mexūcēx nixī i Tupanapēxewa imexū, natürü Tupanapēxewa time erü tayaxō. Rü ngēmaācū Tupana tūxū nayaxu ya yíxema yaxōxē woo taxuūma i tacū rü puracū i mexū taxūxgu na ngēmacēx Tupana tūxū rüngūxēxū. ⁶ Rü nuxcūmaūcū ga āēxgacū ga Dabí rü ta tūmachiga nidexa ga guxema duūxē ga yaxōxē. Rü nüxū nixu ga na tataāēxū ga guxema duūxē yerü Tupanapēxewa tame, woo tama tacū rü mexū taxūxgu na yemaācū Tupanapēxewa tamexūcēx. ⁷ Rü nüma ga Dabí rü ñanagürü:

“Rü tataāēgü ya yíxema duūxēgü ya Tupana tūmaārü chixexūgūxū ngechaūxē rü tūmaārü pecadugūxū iyanangūmaxē. ⁸ Rü tataāē ya yíxema duūxē ya Tupana tama tūxū nagu naxīnūxē i tūmaārü pecadu”,

ñanagürü ga Dabí. ⁹ Rü dücax, ¿pexcēx rü ngēma taāē rü ngēma duūxūgü i Yudíugü ixīgūxūcēxicatama yīxū, rü ēxna ngēma togü i duūxūgūcēx ta yīxū? Dücēx, rü marü pemaā nüxū tixu rü Tupanapēxewa name ga Abráū yerü nayaxō. Rü yemacēx Tupana nanayaxu. ¹⁰ ¿Natürü ñuxgu nixī ga nayauxāxū? ¿Éxna marü ínawiechēxmüpēxechiraūguwena, rü ēxna naxūpa ga na ínawiechēxmüpēxechiraūxū? Rü pemaā nüxū chixu rü naxūpa nixī ga na Tupana nayaxuxū ga Abráū. ¹¹ Rü Tupana nayaxuxguwena nixī ga ínawiechēxmüpēxechiraūxū ga Abráū. Rü yema nixī ga norü cuèxruū ga nawa nüxū nacuáxū na aixcūma Tupana marü nayaxuxū rü nüxū nadauxū na namexū yerü nüxū nayaxō. Rü ngēmacēx i ñuxma ya Abráū rü tūmanatü yīxū ya guxāma ya yíxema yaxōgūxe woo tama ítawiechēxmüpēxechiraūgūgu. Rü ngēmaācū ya Tupana rü tūxū nayaxu ya guxāma ya yíxema yaxōgūxe, rü tūxū nadau na tímexū erü tayaxōgü. ¹² Rü ngēxgumarü ta ya Abráū rü tūmanatü nixī ya guxāma ya yíxema íwiechēxmüpēxechiraūgūxe rü Abráūrü yaxōgūxe. Natürü tama ngēma na tūgü ítawiechēxmüpēxechiraūgūxūcēx nixī i tūmanatü yīxū. Natürü tūmanatü nixī erü tayaxōgü yexgumarü ga na yaxōōxū ga nüma ga tanatü ga Abráū naxūpa ga na ínawiechēxmüpēxechiraūxū.

Abráū rü Tupanaāxū nayaxō rü yemacēx Tupana nayanguxēē ga norü uneta ga Abráūmaā nüxū yaxuxū

¹³ Rü Tupana rü Abráūmaā inaxuneta na nüma ya Abráū rü guxūma i naxrū yaxōgūxū rü tá na nayauxgūāxū i ñoma i naāne na noxrü yīxūcēx. Natürü tama yema na mugü naxaurexūcēx nixī ga Tupana yemaācū Abráūmaā ixunetaxū. Natürü yemaācū namaā inaxuneta yerü Abráū nayaxō, rü yemacēx Tupanapēxewa name. ¹⁴ Natürü ngēxguma chi ngēma duūxūgü i mugü aurgūxūcēxicatama yixīgu i ngēma Tupanaārü uneta, rü natūcēxmamare chi nixī i ngēma na yaxōgūxū, rü chi ngēma Tupanaārü uneta rü taxuwama name. ¹⁵ Nüxū tacuēx rü ngēma mugü ga Moíché ümatūxū rü poxcuwa tūxū naga erü taxūema aixcūma meā tayanguxēē. Natürü yexguma chi natauxguma ga yema mugü rü tataxu chima na texé chixri yanguxēēxū. ¹⁶ Rü yexguma Tupana Abráūmaā ixunetagu na nüxū tá nangūxēēxū, rü Abráūrü ōgagu nixī ga namaā inaxunetaxū. Rü ngēmacēx i guxāma i yixema na Abráūrü yaxōgūxū rü taxcēx ta nixī ga yema Tupanaārü uneta ga Abráūmaā nüxū yaxuxū. Rü ngēmawa nüxū tacuēx rü tama yíxema mugü aurgūxecēxicatama nixī i ngēma Tupanaārü uneta, natürü guxāma ya yíxema Abráūrü Tupanaāxū yaxōgūxecēx ta nixī. Rü ñuxma rü guxāma i yixema na Abráūrü meā yaxōgūxū rü Abráūxācūgü tixīgü rü nüma rü tanatü nixī i Tupanapēxewa yerü nüxīra nayaxō. ¹⁷ Rü Tupanaārü ore i ümatūxūwa rü Abráūchigaxū nixu rü ñanagürü:

“Rü muxūma i duūxūgūnatū tá cuxū chixīxēē”,
ñanagürü. Rü Abráū rü Tupanaāxū nayaxō, rü yemacèx Tupana nayanguxēē
ga norū uneta ga namaā nūxū yaxuxū. Rü yima Tupana nixī ya wena
namaxēxēēcū i yuexū. Rü yimatama nixī ya naxücū i ngēma woo ñuxma
taxuxū. ¹⁸ Rü nūma ga Abráū rü aixcūma nayaxō ga yexguma Tupana nūxū
ñaxgu:

“Rü tá namuxūchi i cutaagü”,
ñaxgu. Rü woo ga Abráū ga marü yaguāxūchichirēx na yīxū rü na nangex-
acūxū, natürü nayaxōōma ga yema Tupanaārü uneta rü meā ínananguxēē
na wūxi ga nane tá nūxū yexmaxū. Rü yemaācū ningu na muxūma i
duūxūgūnatū yīxū, yema Tupana namaā nūxū ixuxūrū. ¹⁹ Rü Abráū
rü wixguxuchi 100 ga taunecū nūxū nayexma ga yexguma. Natürü tama
inayarūmaāchi ga na yaxōōxū woo nūxū na nacuáxū ga paxa tá na nayuexū
ga nūma rü namèx ga Chara rü marü poraācū nangupetūarū taunecūāxgūxū
ga na naxācūgūxūcèx. ²⁰ Rü yemaācū ga Abráū rü nayaxōōma na nūxū
tá nayexmaxū ga wūxi ga nane yema Tupana namaā ixunetaxūrū. Rü
tama nagu narūxīnū na Tupana ngürūāchi nawomūxēēxū. Natürü yexeraācū
Tupanaāxū nayaxōōma, rü nūxū nicuèxū. ²¹ Rü aixcūmaxūchi nayaxō na
naporaxū ya Tupana na yanguxēēāxūcèx i guxūma i ngēma norū uneta.
²² Rü yemacèx ga Tupana rü nūxū nixu na napēxewa namexū ga Abráū.
Yerü Tupana nūxū nadau ga ñuxācū aixcūma nūxū na yaxōōxū. ²³ Rü tama
Abráūchigaxicatama nixī ga naxūmatūxū ga Tupanaārü ore ga ñaxū:

“Rü Tupana rü nūxū nixu na napēxewa namexū ga Abráū, yerü nūxū nadau
ga ñuxācū aixcūma nūxū na yaxōōxū”,
ñaxū. ²⁴ Natürü guxāma i yixema na yaxōgūxūchiga ta nixī i ngēma ore.
Erü Tupana rü tórü ōgagu tūxū nade na napēxewa imexū i yixema i nūxū
na yaxōgūxū ya yima yuwa tórü Cori ya Ngechuchuxū írūdaxēēcū. ²⁵ Rü
Ngechuchuxū nixī ga namuxū ga Tupana na tórü pecaducèx nayuxūcèx. Rü
ñuxūchi nūma ga Tupana rü wenaxārü Ngechuchuxū ínarūdaxēē na nagagu
imexūcèx i Tupanapēxewa.

5

Ñuxma rü Tupanapēxewa tame erü Cristuaxū tayaxōgü

¹ Rü ñuxma rü Tupanapēxewa time erü tayaxōgü. Rü ngēmacèx marü
tama Tupanamaā taxuwanūāxgü i ñuxmax, erü tórü Cori ya Ngechuchu ya
Cristu rü marü tamaā nanangūxmūxēē ya Tupana. ² Rü Cristugagu nixī na
tamaā namecūmaxū ya Tupana i ñuxmax erü tayaxōgü. Rü nūxū tacuèx
rü guxūgutāma tamaā namecūma. Rü tataāēgü erü nūxū tacuèx na tūxū tá
nangēxmaxū i tachica i mexū i Tupanaxūtawa. ³ Rü ngēxgumarūū ta tataāēgü
i woo ngúxū ingegügu. Erü nūxū tacuèx rü ngēma ngúxū rü tūxū narüngūxēē
na yexeraācū iporaexū rü yaxna namaā ixīnūēxūcèx. ⁴ Rü ngēxguma yaxna
namaā ixīnūēgu rü Tupana rü tamaā nataāē. Rü ngēma na tamaā nataāēxū
rü ngēmacèx meā ítananguxēē na tūxū tá nangēxmaxū i tachica i mexū i
Tupanaxūtawa. ⁵ Rü ñuxma na ínananguxēēxū na tūxū tá nangēxmaxū i tachica
i Tupanaxūtawa, rü ngēmacèx taxucèxma tangechaūgü. Erü Tupana rü
poraācū tūxū nangechaū. Rü ngēma Naāē i Üünexū i tūxna namuxū nixī i tūxū
nūxū cuèxēēxū i ngēma. ⁶ Rü yexguma taxucürüwama yigütama imaxēxēēgu,
rü nawa nangu na Tupana yanguxēēxū ga yema norū uneta. Rü yexguma
nixī ga ñoma ga naānewa namuāxū ga Cristu na pecaduāxgūxūcèx nayuxūcèx.
⁷ Rü tama natauxcha na wūxie rü to i duūxūcèx tayuxū, woo wūxi i duūxū i
mexūcèx yixīgu. Rü woo tangēxmagu ya texé ya naxcèx yuchaūchiréxe i wūxi

i duūxū i aixcūma mexēchixū, natürü tama tüxū natauxcha i ngēma. ⁸ Natürü Tupana tüxū nüxū nadauxēē na ñuxācū tüxū nangechaūxū yerü yexguma ipecaduāxgūgu nixī ga taxcèx nayuxū ga Cristu. ⁹ Rü ñuxma rü Tupanapewa time yerü taxcèx nayu ga Cristu. Rü ngēmacèx meāma nüxū tacuèx rü nüma rü aixcūma tá tüxū ínanguxūxēē na tama tüxū napoxcuexūcèx ya Tupana. ¹⁰ Rü yexguma norü uwanügü ixīgūgu, rü nūmatama ga Tupana rü nügūmaā tüxū narüngüxmüēxēē ga yexguma nayuxgu ga Nane. Rü ñuxma na marü namaā irüngüxmüēxū, rü yexeraācū nüxū tacuèx na tüxū nangēxmaxū i maxū i taguma gūxū nagagu na namaxūxū i nūmax. ¹¹ Rü tama ngēxīcatama nixī. Natürü i ñuxma rü tórü Cori ya Ngechuchu ya Cristugagu rü Tupanamaā tataāēgü, yerü Cristugagu nixī ga Tupana ga tamaā nangüxmüxū.

Adáūchiga rü Cristuchiga

¹² Rü nüxiraxūcū ga yatü ga Adáūgagu nixī ga guxūma ga duūxūgūwa nanguxū ga pecadu. Rü pecadugagu ínangu i yu. Rü yemaācū guxūma ga duūxūgūwa naxūe na nayuexū, yerü guxūma nipecaduāx. ¹³ Rü naxūpa na Tupana Moīchéna naxāxū ga yema mugü ga naxūmatūxū, rü duūxūgü rü chixexū naxügüecha, rü yemacèx nayue. Natürü yema mugü rü tauta nayexma ga yexguma, rü yemacèx taxucürüwa texé nüxū tixu ga yema duūxūgü ga na chixri naga naxīnūēxū ga yema mugü. ¹⁴ Rü yema duūxūgü ga Adáūwena buexū rü tama Adáūrūū nanangōx ga yema orix ga Tupana nüxna chuxuxū. Natürü chixexū naxügü, rü yemacèx nayue. Rü yemaācū nixī ñuxmata Tupana Moīchéna naxā ga yema mugü ga naxūmatūxū. Rü Adáūwa inaxügü na nayuexū ga duūxūgü, natürü Cristuwa inaxügü na nayaxuxū i maxū i taguma gūxū. ¹⁵ Natürü yema chixexū ga Adáū üxū rü taxuacū nagu tanangu i ngēma āmare ga Tupana tüxna āxū, erü tama namaā nawūxigu. Rü aixcūma nixī ga wūxi ga yatüarü chixexūgagu na nayuexū i guxūma i duūxūgü. Natürü tama yemaācū tamaā nanaxū ga Tupana. Yerü nüma rü tüxū nangetanūācūma nüma nanamu ga Nane ya Ngechuchu ya Cristu na tórü pecaducèx nayuxūcèx. Rü yemaācū guma Cristugagu Tupana nanamaxēxēē i muxūma i duūxūgü. ¹⁶ Rü yema pecadu ga Adáū üxū rü taxuacūma nagu tanangu ga yema āmare ga Tupana tüxna āxū. Yerü wūxitama ga Adáūārü pecadugagu, rü Tupana nüxū nixu rü tá nayu naxcèx ga yema. Natürü Ngechuchu ya Cristugagu rü Tupana nüxū nixu na napēxewa imexū rü nüxna ínguxūxū i guxūma i tórü pecadugü. ¹⁷ Rü guxūma i duūxūgü nayue yerü wūxitama ga yatü ga Adáū rü pecadu naxū. Natürü tama yemaācū tamaā nanaxū ga Tupana, yerü ga nüma rü poraācū tamaā namecūma rü tüxū nangetanūācūma tüxū narüngüxēē. Rü ngēmacèx i ñuxma rü guxūma i ngēma duūxūgü i Tupana nüxū ixuxū na napēxewa yamexū, rü nūmatama ya Tupana rü Nane ya Ngechuchu ya Cristugagu nanamaxēxēē na namaā wūxigu āēxgacügü yixīgüxūcèx. ¹⁸ Rü yema Adáūārü chixexū rü poxcuwa nanagagü ga guxūma ga duūxūgü. Natürü yema mexū ga Ngechuchu ya Cristu üxū rü pecaduwa ínananguxūxēē i guxūma i duūxūgü i yaxōgüxū, rü nüxna nanaxā i maxū i taguma gūxū. ¹⁹ Rü guma nüxīraūcū ga yatü ga Adáū rü tama Tupanaga naxīnū. Rü yemaācū wūxitama ga yatūgagu rü muxūma ga duūxūgü rü nipecaduāx. Natürü ínangu ga guma yatü ga Ngechuchu, rü meā Tupanaga naxīnū. Rü gumagagu rü muxūma i duūxūgü rü tá nime i Tupanapēxewa. ²⁰ Rü Tupana rü Moīchéna nanaxā ga norü mugü na duūxūgüxū nüxū nacuèxēēxūcèx na ñuxācū poraācū pecadu naxügüxū. Natürü yexguma yexeraācū pecadu naxügügu ga duūxūgü, rü yexeraācū Tupanaāxū nangechaūtümüūgü. ²¹ Rü ñuxma woo pecadugagu na iyexū, natürü Tupanaāxū tangechaūtümüūgü i guxūguma. Rü ngēmaācū pecaduwa

tūxū ínanguxūxēē na napēxewa imexūcèx rü tórü Cori ya Ngechuchu ya Cristugagu tūxū nangēxmaxūcèx i maxū i taguma gúxū.

6

Ñuxma rü tama pecadu ixügüxūcèx nixī i imaxēxū, natürü Cristucèx nixī i imaxēxū

¹ Rū ñuxma na Tupanaāxū ingechaütümüügüxū, ¿rū ñuxācü tá imaxēxū i ñuxmax? ¿Rü pexcèx rü namexū na pecadu ixügüechaxū na yexeraācü Tupanaāxū ingechaütümüügüxūcèx? ² Rū dücax, tama ngēmaācü nixī. Erü ñuxma pecaduchaxwa rü ñoma iyuexürüü tixīgü, erü marü tama naga taxīnūē. Rū ngēmacèx tama name i yeücürü pecadu taxügüecha. ³ ¿Tama ēxna nüxū pecuèx na tacücèx yīxū na íbaiūxū? Rū ítabaiū na ngēmaācü duūxügüxū nawéxūcèx na aixcüma Ngechuchu ya Cristuarü duūxügü na ixīgüxū. Rū yexguma íbaiūgu, rü nüma nayuxürüü yexma nayu ga tacüma ga nuxcümaūxū. ⁴ Rū yexguma íbaiūgu, rü Cristu yuxürüü yexma nayu ga tacüma ga nuxcümaūxū, rü Cristu itáxürüü inatèx ga yema tacüma ga nuxcümaūxū. Rū yemaācü naxüpetü na wena imaxēxūcèx rü tūxū nangēxmaxūcèx i maxū i ngexwacaxūxū, yexgumarüü ga Ngechuchu na yuwa írüdaxū rü wena namaxūxū ga yexguma Nanatü ga Tupana norü poramaā ínadaxēēgu. ⁵ Rū ñuxma na Cristumaā wüxigu nayuxū ga tacüma ga nuxcümaūxū, rü nüxū tacuèx na aixcüma Cristumaā tūxū nangēxmaxū i maxū i ngexwacaxūxū. ⁶ Rū nüxū tacuèx rü yema tórü maxū ga nuxcümaūxū rü Cristumaā wüxigu curuchagu nayu na yexma yanaxoxūcèx ga yema tacüma ga chixexū. Rū ñuxma rü tama pecadutüüwa tangēxmagü, rü ngēmacèx marü tama naga taxīnūē. ⁷ Erü yíxema yúxe rü marü tama pecadutüüwa tangēxma na yeücürü pecadu taxüechaxūcèx. ⁸ Rū ñuxma na Cristumaā nayuxū ga tórü maxū ga nuxcümaūxū, rü nüxū tacuèx na Cristurüü tūxū nangēxmaxū i maxū i ngexwacaxūxū. ⁹ Rū nüxū tacuèx rü ñuxma na yuwa ínadaxū ya Cristu, rü tagutáma wena nayu. Yerü nüma rü marü yuxū narüyexera. ¹⁰ Rū yexguma nayuxgu ga Cristu rü pecaducèx nixī ga nayuxū, rü noxtacüma yexma wüxicana ningutanü ga guxüma ga duūxügüarü pecadugü. Natürü ñuxma na namaxūxū, rü Tupanacèx nixī i namaxūxū na Tupanaärü ngúchaū naxūxūcèx. ¹¹ Rū ngēxgumarüü ta i pema rü name nixī i pegügu perüxīnūē na marü peyuexū pecaduchaxwa rü Tupanacèx pemaxēxū, erü Ngechuchu ya Cristuarü duūxügü pixīgü. ¹² Rū ngēmacèx rü tama name i pecadutüüwa pegü pengēxmagüxēē na pemaā inacuáxūcèx. Rü tama name i penaxüchica i pecadu na pexeneärü ngúchaügü i chixexū pexū naxüxēēxūcèx. ¹³ Rü tama name i pecaduna penaxägü i pexene na ngēmamaā chixexū pexügüxūcèx. Rü name nixī i Tupanana pegü pexägü, erü ñoma duūxügü i yuexū rü wena maxēxürüü pixīgü. Rü ngēmacèx name nixī i Tupanana penaxägü i pexene na ngēmamaā mexū pexügüxūcèx. ¹⁴ Rū ñuxma rü tãütáma pecadutüüwa pengēxmagü na pemaā inacuáxūcèx. Rü yexguma yema mugü ga Moíché ümatüxūwe perüxīxgu, rü pemaā inacuèx ga pecadu. Natürü i ñuxma rü Cristugagu Tupana pemaā namecüma, rü nüma nixī i pemaā inacuáxū i ñuxmax.

Ngēxguma wüxi i corimēxēwa yigü ingēxmagüxēēgu, rü ngēmaga nixī i ixīnūēxū

¹⁵ Rū ñuxma na tama yema Moíché ümatüxū ga mugütüüwa ingēxmagüxū, rü ñuxma na Tupana rü Cristugagu tamaā mecümaxū, ¿rü ñuxācü tá imaxēxū? ¿Rü pexcèx namexū na yeücürü pecadu ixügüechaxū? Rü dücax, tama name na ngēmaācü imaxēxū. ¹⁶ Rü pema nüxū pecuèx rü ngēxguma wüxi i corimēxēwa pegü pengēxmagüxēēgu na naga pexīnūēxūcèx rü ngēma

tá nixī i perū cori ixīxū, rü pema rü norü duūxūgü tá pixīgü i ngēma cori i naga pexīnūēxū. Rü ñuxma rü pema tá nüxū pedaugü ngoxi ngēxūrūūxū perū me yixī na ngēmaga pexīnūēxūcèx. Rü ngēxguma pecadu i yuwa tüxū gagūxū perū me yixīgu, rü ngēma tá nixī i pemaā icuāxū. Rü ngēxguma perū me yixīgu na Tupanaga na pexīnūēxū, rü yimaga tá pexīnūē na napēxewa pimexūcèx. ¹⁷ Natürü Tupanana moxē chaxā, yerü woo pecaduga na pexīnūēchiréxū, natürü i ñuxma rü aixcūma naga pexīnūē i ngēma nguxēētae i marü peyaxuxū i Cristuchiga. ¹⁸ Rü ñuxma rü Tupanaärü duūxūgü pixīgü erü nüma rü chixexūna pexū ínguxūxēē na tama pecadu pexūgüechaxūcèx. Rü ngēmaācū pexū narūngūxēē na napēxewa pimexūcèx rü meā naxcèx pemaxēxūcèx. ¹⁹ Rü ñoma i naānecūāx i duūxūgūmaā chidexarūū nixī i tauxchaxū i oremaā pemaā chidexaxū i ñuxmax, erü pema rü woetama taguma nüxū pexīnūē i ñāā ore, rü ngürūāchi tāūtáma nüxū pecuèx i tacūchiga na yīxū i ngēma pemaā nüxū chixuxū. Rü dücax, rü nuxcūma rü ipenaxā ga pexene na namaā penaxūgūxūcèx ga nagúxūraūxū ga chixexū. Natürü i ñuxma rü name nixī i Tupanana pegü pexā na aixcūma napēxewa pexūūnegūxūcèx rü naxcèxicatama pemaxēxūcèx. ²⁰ Rü yexguma pecadutūūwa peyexmagūgu, rü taxucürwama Tupanapēxewa mexū pexūgü ga yexguma. ²¹ ¿Natürü tacūwa pexū namexū ga yema chixexū i ñuxma rü wūxi i āne pexna āxū? Yerü yema chixexū rü yuwamare pexū nagagü, rü tama i maxūwa. ²² Natürü marü tama pecadutūūwa pengēxmagü i ñuxmax, erü marü nüxna ípenguū rü marü Tupanaärü duūxūgü pixīgü. Rü ngēma waxi nixī i poraācū pexū mexū erü ngēmagagu penayaxu i maxū i Tupanapēxewa ünexū rü ngēmawena tá penayaxu i maxū i taguma gúxū. ²³ Rü ngēma natanü na pecadu ixūxū, rü yu nixī. Natürü yíxema tórü Cori ya Ngechuchuaxū yaxōgūxe, rü Tupana tüxna nanaxāmare i maxū i taguma gúxū.

7

Wūxi i ngecü rü ngēxguma nayutegu rü marü tama ngītemēxēwa ingēxma. Rü ñuxma na taxcèx nayuxū ya Cristu, rü marü tama yema Moiché ūmatūxū ga mugütūūwa tangēxmagü

¹ Pa Chaueneēgūx, rü pema na nagu pexīxū i ngēma mugü, rü nüxū pecuèx rü ngēxguma tamaūxguxicatama nixī na ngēma mugütūūwa tangēxmaxū ya wūxichigü ya duūxē. ² Rü dücax, rü wūxi i ngecü i ātecü rü ngītemēxēwa ingēxma ega namaxyane ya ngīte, erü ngēma ñanagürü i ore i mugü. Natürü ngēxguma nayuxgu ya ngīte, rü marü tama ngītemēxēwa ingēxma. Rü yema mugü ga ngītemēxēwa ngīxū yexmaxēēxū ga noxri rü marü tama ngīmaā inacuèx. ³ Rü ngēmaācū i ngēxguma namaxyane ya ngīte rü to i yatūmaā inapexgu, rü pecadu ixü. Natürü ngēxguma marü nayuxgu ya ngīte, rü marü nüxna ínguxuchi i ngēma mugü ga ngītemēxēwa ngīxū yexmaxēēxū ga noxrix. Rü ngēxguma wenaxärü naxātegu rü taxuūma i chixexū ixü. ⁴ Rü ngēxgumarūū ta i pemax, Pa Chaueneēgūx, rü marü tama yema Moiché ūmatūxū ga mugütūūwa pengēxmagü yerü nüma ga Cristu rü pexcèx nayu. Rü ngēmacèx i ñuxma rü Cristu ga yuwa írüdacūarü pixīgü. Rü ngēmaācū nanaxü ya Tupana na naxcèx imaxēxūcèx, rü norü ngúchaū ixūgūxūcèx. ⁵ Rü yexguma nuxcūmaūxū ga tacūmawe rüxīxgu rü poraācū tanaxü ga taxūneärü ngúchaūgü woo yema mugü tüxna na nachuxuxū ga yema. Natürü yexguma nüxū icuèxgu na nachuxuxū ga yema pecadu ga ixūxū, rü yexeraācū tanaxūxchaū. Rü yemaācū ga yema tórü pecadugü rü yuwa tüxū nagagü. ⁶ Natürü i ñuxma rü marü tama ngēma mugütūūwa tangēxmagü, erü Tupana rü marü nüxna tüxū ínguxūxēē. Rü ngēmacèx i ñuxma rü ñoma

duūxūgū i iyuexūrūū tixīgū i napēxewa i ngēma mugū, erū marū tama tamaā inacuèx. Rū ngēmacèx tama nagu taxī i ngēma nuxcūma ūmatūxū ga mugū, erū marū nūxna ítanguxū na Tupanaārū ngúchaū ixūgūxūcèx rū naxcèx na imaxēxūcèx namaā i tórū maxū i ngexwacaxūxū i Naāē i Üünexū tūxna āxū.

Ngēma pecadu i chowa ngēxmaxū rū chomaā inacuèx

⁷ ¿Rū ñuxū ñagūxū tá i ñuxmax? ¿Rū pexcèx rū yema mugū yīxū ga tūxū pecaduāxēēxū? ¿Rū dūcax, tama name i ngēmaācū nagu tarūxīnūē! Natūrū yexguma chi yema mugū rū tama choxū nūxū nacuèxēēgu, rū tāū chima nūxū chacuèx na pecadutūūwa chayexmaxū. Rū dūcax, rū yexguma chi yema mugū rū tāū chima choxū nūxū cuèxēēgu na wūxi i pecadu yīxū na toguāxārū ngēmaxūcèx chixauxāchixū, rū tāū chima nūxū chacuèx na pecadu yīxū i ngēma. ⁸ Natūrū yexguma yema mugū choxū nguxēēgu na nachixexū na toguāxārū ngēmaxū choxū ngúchaūxū, rū yexguma ga pecadu rū nayoxniē na yexeraācū choxū na nangúchaūxēēāxū. Rū ngēmaācū nūxū tadau rū ngēxguma chi natauxgu i ngēma mugū, rū tāū chima nūxū tacuèxgū na ñuxācū wūxi i chixexūchixū na yīxū i ngēma pecadu. ⁹⁻¹⁰ Rū noxri tauta yema mugūxū chacuèxgu, rū choma nagu charūxīnūgu rū chame. Natūrū yexguma yema mugūxū chacuèxgu, rū nūxū chicuèxāchi na chixexū chaxūxū rū ngēma chixexūcèx rū tá na chayuxū. Rū yemaācū ga yema mugū ga Tupana Moīchéna āxū na duūxūgūxū namaxēxēēxūcèx, rū choxū nayuxēēāma. ¹¹ Rū nūma ga pecadu rū nayoxniē namaā ga yema mugū. Yerū yexguma yema mugū choxū nguxēēgu na ñuxācū nachixexū ga yema pecadu, rū yexeraācū choxū nangúchaū ga yema pecadu. Rū yemaācū ga yema pecadu rū choxū nawomūxēē rū nayoxniē namaā ga yema mugū rū yuwa choxū naga. ¹² Natūrū yema mugū rū aixcūma naxūūne i Tupanapēxewa. Rū guxūma i ngēma Tupana tamaā nūxū ixuxū rū naxūūne rū aixcūma name rū tūxū narūngūxēē. ¹³ ¿Natūrū ñuxācū nixī i ngēma i ñuxmax? ¿Éxna pexcèx rū yema mugū yīxū ga yuwa choxū gaxū? Rū dūcax, rū tama ngēmaācū nixī. Erū ngēma pecadu nixī i Tupanaārū mugūmaā yoxniēxū na yuwa choxū nagaxūcèx. Rū ngēmaācū nūxū tacuèx na ñuxācū poraācū nachixexū i pecadu. Rū yexguma yema mugū choxū nguxēēgu na ñuxācū poraācū nachixexū ga yema pecadu, rū yexeraācū choxū nangúchaū ga yema chixexū rū yexeraācū chanaxūama ga pecadu. ¹⁴ Nūxū tacuèx i ngēma mugū rū Tupanaāē i Üünexūwa ne naxū. Natūrū choma rū duūxūmare chixī, rū ngēmacèx nixī i chomaā inacuáxū i ngēma pecadu i chaxūxū. ¹⁵ Rū tama nūxū chacuèx na tacū choxū ūpetūxū erū tama chanaxū i ngēma mexū i chanaxwèxexū na chaxūxū, natūrū ngēma chixexū i tama chanaxwèxexū na chaxūxū rū ngēmaāma nixī i chaxūxū. ¹⁶ Natūrū i ñuxma na chanaxūxū i ngēma tama chanaxwèxechiréxū na chaxūxū, rū ngēmawa nūxū chicuèxāchi na namexū i ngēma mugū. ¹⁷ Rū ngēmacèx i ñuxma rū tama chauechama nixī i chanaxūxū i ngēma chixexū. Natūrū ngēma pecadu i chowa ngēxmaxū nixī i chomaā icuáxū, rū ngēma nixī i chixexū choxū ūxēēxū. ¹⁸ Rū choma nūxū chacuèx rū wūxi i pecaduāxū i duūxūmare chixī, rū ngēmacèx chowa rū nataxuma i tacū i mexū. Erū woo chanaxwèxe na mexū chaxūxū, natūrū tama chomaā nanguxū na chanaxūxū. ¹⁹ Erū ngēma mexū i chanaxwèxexū na chaxūxū, rū tama chanaxū. Natūrū chanaxūama i ngēma chixexū i tama chanaxwèxexū na chanaxūxū. ²⁰ Rū ngēxguma chi chanaxūamagu i ngēma chixexū i tama chanaxwèxexū na chaxūxū, rū meāma nangox na tama chauechama chanaxūxū. Natūrū ngēma pecadu i chowa ngēxmaxū nixī i chomaā icuáxū rū chixexū choxū ūxēēxū. ²¹ Rū ngēmaācū nūxū chadau i

ñuxăcŭ na chiixŭ. Rŭ ngēxguma mexŭ chaxŭchaŭgu rŭ choxŭ natauxcha na chixexŭăma chaxŭxŭ. ²² Choma rŭ chauăewa rŭ chorŭ me nixŭ i Tupanaărŭ mugŭ, rŭ naga chaxŭnŭchaŭ. ²³ Natŭrŭ ñăă chaxune i ñoma i naănecŭăx ixŭxŭwa, rŭ nangēxma i ŭacŭ i tama naxŭxchaŭxŭ i ngēma chauăe naxwēxexŭ. Rŭ ngēma pecadu i chowa ngēxmaxŭ nixŭ i chomaă icuăxŭ rŭ chixexŭ choxŭ ŭxēēxŭ. ²⁴⁻²⁵ Rŭ ngēmaăcŭ i choma rŭ chauăewa chayanguxēēchaŭ i Tupanaărŭ mugŭ, natŭrŭ ñoma i naănecŭăx i chaxune rŭ nanaxŭxchaŭ i ngēma nanaxwēxexŭ i pecadu. Rŭ taxucēxma chataăe i chomax. ¿Rŭ texé tá nŭxna choxŭ itanguxuchixēē i ñăă pecadu i chowa ngēxmaxŭ rŭ yuwa choxŭ gaxchaŭxŭ? Rŭ Tupanana moxē chaxă erŭ tŕrŭ Cori ya Ngechuchu ya Cristu rŭ tá choxŭ nŭxna ínanguxuchixēē.

8

Tupanaăe i Ŭnexŭ naxwēxexŭăcŭma tamaxē

¹ Rŭ ñuxma ya Tupana rŭ marŭ taxucēxma nanapoxcue i ngēma duŭxŭgŭ i Ngechuchu ya Cristuarŭ duŭxŭgŭ ixŭgŭxŭ. ² Erŭ Tupanaăe i Ŭnexŭ i Ngechuchu ya Cristugagu tŭxŭ maxēxēēxŭ, rŭ nŭxna tŭxŭ ínanguxŭxēē i pecadu na tama yuwa tŭxŭ nagagŭxŭcēx. ³ Rŭ yema taxŭneărŭ ngŭchaŭgŭ rŭ marŭ nŭxŭ narŭyexera ga yema mugŭ ga Moŭché ŭmatŭxŭ. Rŭ yemacēx ga yema mugŭ rŭ taxucŭrŭwa mexŭ tŭxŭ naxŭxēē. Natŭrŭ nŭma ga Tupana rŭ marŭ nanaxŭ ga yema taxucŭrŭwa naxŭxŭ ga yema mugŭ. Yerŭ ga Tupana rŭ ñoma ga naănewa nanamu ga Nanexŭchi. Rŭ woo taxŭne i pecaduăxŭrŭŭ nixŭ ga naxŭne, natŭrŭ nŭma ga Nane rŭ taguma napecaduăx. Rŭ nŭma ga Nane rŭ tŕrŭ pecaducēx nayu, rŭ yemaăcŭ inayanaxoxēē ga norŭ pora ga yema pecadu ga taxŭnewa yexmaxŭ. ⁴ Rŭ yemaăcŭ nanaxŭ ga Tupana na tŭxŭ na natauxchaxŭcēx na yanguxēēxŭ i ngēma tŭxŭ namuxŭ i ngēma mugŭ. Erŭ ñuxma rŭ tama ñoma i taxŭne naxwēxexŭăcŭma tamaxē, natŭrŭ Tupanaăe i Ŭnexŭ naxwēxexŭăcŭma nixŭ i imaxēxŭ. ⁵ Rŭ yŭxema tŭmaxŭne naxwēxexŭăcŭma maxēxē, rŭ naxcēx tadaugŭ i ngēma ñoma i naănecŭăx naxwēxexŭ. Natŭrŭ yŭxema Tupanaăe i Ŭnexŭ naxwēxexŭăcŭma maxēxē, rŭ ngēma Tupanaăe i Ŭnexŭ naxwēxexŭ nixŭ i naxcēx tadaugŭxŭ. ⁶ Rŭ yŭxema Tupanaăe i Ŭnexŭ naxwēxexŭcēx daugŭxe rŭ tataăēgŭ, rŭ tá tŭxŭ nangēxma i tŭmaărŭ maxŭ i taguma gŭxŭ. Natŭrŭ yŭxema tŭmaxŭne naxwēxexŭcēx daugŭxe rŭ ngēma rŭ tá yuwa tŭxŭ nagagŭ. ⁷ Rŭ yŭxema tŭmaxŭne naxwēxexŭcēx daugŭxe rŭ Tupanamaă tarŭxuwănŭgŭ. Rŭ tama Tupanaga taxŭnŭēchaŭ erŭ taxucŭrŭwama naga taxŭnŭē. ⁸ Rŭ ngēmacēx ya yŭxema tŭmaxŭneărŭ ngŭchaŭwe rŭxŭxē, rŭ taxucŭrŭwa Tupanaărŭ ngŭchaŭ taxŭgŭ. ⁹ Natŭrŭ ngēxguma aixcŭma pewa nangēxmagu i Tupanaăe i Ŭnexŭ rŭ tama pexeneărŭ ngŭchaŭ pexŭ, natŭrŭ Naăe i Ŭnexŭărŭ ngŭchaŭ nixŭ i pexŭxŭ. Rŭ yŭxema tama tŭxŭ nangēxmaxē i Tupanaăe i Ŭnexŭ i Cristu tŭxnaăxŭ, rŭ tama Cristuarŭ duŭxŭ tixŭ. ¹⁰ Natŭrŭ ngēxguma pewa namaxŭxgu ya Cristu, rŭ peăxē rŭ namaxŭ erŭ Cristugagu Tupana pexŭ nŭxŭ inayarŭngŭma i perŭ pecadugu. Rŭ woo i pexene rŭ pecadugagu tá nayuama, natŭrŭ peăxē rŭ Cristugagu tá namaxŭ, erŭ Tupana pexŭ nadau na pimexŭ. ¹¹ Rŭ ngēxguma pewa namaŭxgu i Naăe ya yima Tupana ga Ngechuchu ya Cristuxŭ írŭdaxēēcŭ, rŭ nŭmatátama ya yima Cristuxŭ írŭdaxēēcŭ tá wena nanamaxēē i pexene i yuxwēxexŭ, rŭ Naăe i Ŭnexŭ i pewa maxŭxŭ tá nixŭ i naxŭxŭ i ngēma. ¹² Rŭ ngēmacēx, Pa Chaueneēgŭx, rŭ tanaxwēxe i Tupanaărŭ ngŭchaŭ taxŭ, rŭ tama tanaxwēxe i taxŭne i pecaduăxŭărŭ ngŭchaŭ taxŭ. ¹³ Erŭ ngēxguma chi pexeneărŭ ngŭchaŭ pexŭxgu rŭ tá ipeyarŭtauxe. Natŭrŭ

ngēxguma Tupanaãe i Üünexũârü ngũxēēmaã ipeyanaxoxēēgu i ngēma pexene üxchaũxũ, rü aixcũma tá pexũ nangēxma i maxũ i taguma gúxũ. ¹⁴ Erü guxãma ya yíxema Tupanaãe i Üünexũ tümamaã icuáxe, rü aixcũma Tupanaxácũgü tixĩgü. ¹⁵ Yerü tama penayauxgü ga wüxi ga naãxē ga pecaduwa pexũ gagũxũ rü ngemagagu wenaxarü Tupanaarü poxcucèx pemuũē. Natürü yema Naãxē ga peyauxgũxũ rü Tupanaãxē i Üünexũ i naxacũgü pexũ ixĩgũxēēxũ nixĩ. Rü ngēmatama Naãe i Üünexũ nixĩ i tüxũ rüngũxēēxũ na tama imuũēxũcèx na Tupanana ingaicamagũxũ rü:

“Pa Chaunatũx”, ñagũxũ nüxũ. ¹⁶ Rü ngēmatama Naãe i Üünexũ nixĩ i aixcũma tüxũ nüxũ cuèxēēxũ na Tupanaxácũgü na ixĩgũxũ. ¹⁷ Rü ñuxma na Tupanaxácũgü ixĩgũxũ i yixema, rü nüxũ tacuèx rü daxũguxũ i naãnewa tá tanayaxu i ngēma mexũgü i Tupana tüxna ãxchaũxũ. Rü ngēmaãcũ Cristumaã tá tüxũ nangēxma i tachica i mexũ i Tupanaxũtawa, erü Cristurũ ngúxũ tingegü na yixcũra wüxigu namaã mexũwa ingēxmagũxũcèx.

Ngēma mexũ i yixcũra tá nüxũ idauxũchiga

¹⁸ Rü dücax, choma nagu charũxĩnũ rü ngēma ngúxũ i ñuxma ñoma i naãnewa ingegũxũ, rü taxuũma nixĩ i ngēxguma nagu nanguxgu i ngēma mexũ i yixcũra tá nüxũ idauxũ i ngēxguma Cristumaã ingēxmagũgu i daxũguxũ i naãnewa. ¹⁹ Rü ñuxma rü guxũma i tacü i Tupana üxũ rü taxũ i norü ngúchaũmaã ínananguxēēgü i ngēma ngunexũ i nagu tá nataeguxũ ya Cristu na Tupana guxũpēxewa naxácũgũxũ iwéxũ. ²⁰ Rü nüxũ tacuèxgü rü yexguma pecadu naxũxgu ga guma nüxĩraũcũ ga yatü rü yexguma nixĩ ga nachixexũ ga guxũma ga yema Tupana üxũ. Rü tama yema Tupana üxũârü ngúchaũ nixĩ ga yema, natürü yemaãcũ nüxũ naxüpetü yerü ga Tupana rü yemaãcũ inaxuneta ga yexguma pecadu naxũxgu ga guma yatü. Natürü i ñuxma rü guxũma ga yema Tupana üxũ rü ínananguxēē na ngēma chixexũwa ínanguxũxũcèx. ²¹ Erü ngēma ngunexũ i Tupana tá nagu nadexũ i naxácũgü na naxũtawa nangēxmagũxũcèx, rü ngēxguma tá ta nixĩ i chixexũwa ínanguxũxēēãxũ i guxũma ga yema nümatama naxũxũ. Rü ngēmaãcũ wenaxãrũ noxrirũ tá name i guxũma. ²² Rü nüxũ tacuèx rü ñaa naane rü guxũma i nawa ngexmaxũ rü ñoma wüxi i nge i ixraxacũchaxũcürũxũ poraãcũ ngúxũ ninge ñuxmatáta nawa nangu i ngema ngunexũ i nagu Tupana wena nangexwacaxũxēēxũ i guxũma. ²³ Rü tama ñaa naanexĩcatama nixĩ i ngúxũ ingexũ i ñuxma, natürü yixema i tüxũ ngexmaxũ i Tupanaãxē i Üünexũ rü ta ngúxũ tingegü ñuxmatáta nawa nangu na Tanatü tüxũ dexũ rü ngexwacaũxũ i taxũnegü tüxna ãxũ. Rü woo tüxũ nangexma i Naãxē i Üünexũ ya Tupana tüxna muxũ na norü ügü yixĩxũcèx i ngema mexũgü i Tupana tá tüxna naxãxũ i dauxũguxü i naanewa, natürü tanaxwèxe na ngemaxũchi ingugũxũ. ²⁴ Cristu tüxna nanaxã i maxũ i taguma gúxũ, natürü ítananguxēēgũmare na naxũ-tawa ingugũxũ na nayauxgũxũcèx i ngēma maxũ. Natürü nüxũ tacuèx rü ngēxguma chi marü nüxũ idaugügu i ngēma írünguxēēgũxũ, rü taxucèxma tüxcũũ ítananguxēēgü. Erü ngēma marü nüxũ idauxũ, rü taxucèxma ítananguxēē. ²⁵ Natürü ngēxguma tauta nüxũ idaugügu i ngēma írünguxēēgũxũ, rü tanaxwèxe i meã ítananguxēēgüecha ñuxmatáta nüxũ idaugü. Rü ngēmaãcũ nixĩ i Cristuxũ írünguxēēgũxũ. ²⁶ Rü Tupanaãe rü tüxũ narüngũxēē ta na iporaexũcèx i ngēxguma ituraegu i tórü õwa. Rü yixema rü tama nüxũ tacuèx na ñuxãcũ Tupanamaã idexagũxũ rü tacücèx iyumüxēgũxũ. Natürü Naãe i Üünexũ rü naxauxãcũma ore i tama nüxũ icuáxũmaã Tupanamaã nidexa rü taxcèx nayumüxē. ²⁷ Rü Tupana ya meã tüxũ cuácü rü nüxũ nacuèx na ñuxũ ñaxũchiga yĩxũ i ngēma Naãe i

Ūünexŭ nüxŭ ixuxŭ. Erŭ ngēma Naãē i Ūünexŭ rŭ Tupana naxwèxexŭãcŭma Tupanaxŭ nacèèxŭ tŭmacèx ya yíxema Tupanaãrŭ duŭxŭgŭ ixígŭxe.

Cristu rŭ tŭxŭ naporaexēãma na taxuŭma i guxchaxŭgŭ tŭxŭ narŭ- yexeraxŭcèx

²⁸ Rŭ nüxŭ tacuèx rŭ tŭmaãrŭ mexŭcèx nixŭ i Tupana ínanguxēèxŭ i guxŭma i ngēma tŭxŭ ũpetŭxŭ ya yíxema nüxŭ ngechaŭgŭxe ga nŭma nanaxwèxexŭãcŭma tŭxŭ nadexe. ²⁹ Rŭ woetama nuxcŭmama ga Tupana rŭ marŭ tŭxŭ nacuèx na texégŭ tá tixígŭxŭ ya yíxema noxrŭ ixígŭxe. Rŭ noxritama naãne ixŭgŭgumama tŭxŭ nade na Nanerŭŭ timexŭ i napèxewa, rŭ yima Nane rŭ tŭmamaã nayaxŭcèx rŭ tŭmamaã inacuáxŭcèx ya guxãma ya yíxema naēneégŭ ixígŭxe. ³⁰ Rŭ guxema noxri naãne ixŭgŭgumama Tupana tŭxŭ dexe, rŭ tŭmacèx naca na noxrŭ tixígŭxŭcèx. Rŭ guxema tŭmacèx naçaxe, rŭ nŭgŭcèx tŭxŭ nimexēégŭ. Rŭ guxema nŭgŭcèx tŭxŭ yamexēégŭxe, rŭ daxŭwa tá tŭxŭ nagagŭ na guxŭgutãma naxŭtawa tangèxmagŭxŭcèx. ³¹ ¿Rŭ ñuxŭ ñagŭxŭ tá i ñuxma i ngēmachiga? Rŭ ngēxguma Tupana taétŭwa chogŭgu, ¿rŭ texé tá tŭxŭ rŭyexeraxŭ? ³² Yerŭ nŭma ga Tupana rŭ tama tŭxna nayanuxŭ ga Nanexŭchi. Natŭrŭ taxcèx inanamu ga Nane na taxcèx nayuxŭcèx i guxãma i yixema. Rŭ ñuxma na yemaãcŭ taxcèx inamuãxŭ ga Nane, ¿rŭ taux éxna tŭxna naxããxŭ i guxŭma i ñacŭ i inaxwèxexŭ na naxcèx imaxèxŭcèx? ³³ Rŭ Tupana tŭxŭ nade rŭ tŭxŭ nixu na napèxewa imexŭ. Rŭ ngēmacèx ¿rŭ texé tá napèxewa tŭxŭ tixugŭ na ichixexŭ? Erŭ Tupanatama nixŭ ya tŭxŭ ixucŭ na tŭxŭ nataxuŭma i chixexŭ. ³⁴ ¿Rŭ texé tá poxcuwa tŭxŭ tamugŭ i ñuxmax? ¿Pexcèx rŭ Cristu tá yŭxŭ? Dŭcèx, taxucŭrŭwama ngēmaãcŭ nixŭ yerŭ Cristu nixŭ ga taxcèx yucŭ na tŭxŭ namaxèxèxŭcèx. Rŭ tama ngēxŭcatama taxcèx naxŭ, natŭrŭ wenaxãrŭ ínarŭda. Rŭ ñuxma rŭ Tupanaxŭtawa nangèxma rŭ ngema ãèxgacŭ nixŭ. Rŭ ngema taétŭwa nachogŭ rŭ Tupanaxŭ taxcèx nacèèxŭ. ³⁵ ¿Rŭ ñuxma rŭ ñacŭ tá Cristuna tŭxŭ ixígachixèèxŭ na tama tŭxŭ nangechaŭxŭcèx? Rŭ woo ngŭxŭ ingegŭgu, rŭ éxna guxchaxŭgŭ tŭxŭ ngèxmagu, rŭ éxna duŭxŭgŭ Cristugagu taxchi aiegu, rŭ éxna itaiyaegu, rŭ éxna ingexchirugŭgu, rŭ éxna ãŭcŭmaxŭwa ingèxmagŭgu, rŭ éxna duŭxŭgŭ tŭxŭ daixchaŭgu, natŭrŭ woo guxŭma i ngēma tŭxŭ ũpetŭgu, natŭrŭ ya Cristu rŭ tãŭtãma nüxŭ narŭchau na tŭxŭ nangechaŭxŭ. ³⁶ Natŭrŭ guxŭguma ãŭcŭmaxŭwa tangèxmagŭ, ngēma Tupanaãrŭ ore i ũmatŭxŭ nüxŭ ixuxŭrŭŭ. Erŭ ngēma ore rŭ ñanagŭrŭ:

“Rŭ cugagu duŭxŭgŭ toxŭ nadaixchaŭ rŭ duŭxŭgŭpèxewa rŭ ñoma carnerugŭ i daiwa íxŭrŭŭ tixígŭ”,

ñanagŭrŭ i ngēma ore. ³⁷ Natŭrŭ woo guxŭma i ngēma tŭxŭ na ngupetŭxŭ, rŭ Ngechuchu ya Cristu ya tŭxŭ ngechaŭcŭ, rŭ tŭxŭ naporaexèèãma na taxuŭma i guxchaxŭgŭ tŭxŭ narŭyexeraxŭcèx, rŭ bai i ñacŭ. ³⁸⁻³⁹ Rŭ ngēmacèx aixcŭma chayaxŭ na taxucŭrŭwama ñacŭ Tupanana tŭxŭ ixígachixèèxŭ na ngēmaãcŭ tama tŭxŭ nangechaŭxŭcèx. Rŭ woo iyuxgu rŭ woo imaxègu, natŭrŭ Tupana tá tŭxŭ nangechaŭècha. Rŭ taxucŭrŭwama Tupanana tŭxŭ nixígachixèè i ñacŭ i norŭ orearŭ ngeruŭgŭ, rŭ éxna ñacŭ rŭ ngoxogŭ rŭ éxna ñacŭ i to i poraxŭ. Rŭ bai i ñacŭ i ñuxma tŭxŭ ũpetŭxŭ, rŭ bai i ñacŭ i yixcŭra tá ngèxmaxŭ, rŭ bai i ñacŭ i daxŭwa ngèxmaxŭ, rŭ bai i ñacŭ i naãnetŭŭwa ngèxmaxŭ, rŭ bai i ñacŭ i to i Tupana ũxŭ, rŭ taxucŭrŭwama Tupanana tŭxŭ nixígachixèè na tama tŭxŭ nangechaŭxŭcèx. Rŭ ngēmaãcŭ nixŭ i tŭxŭ nangechaŭxŭ ya Tupana nagagu ya tŭrŭ Cori ya Ngechuchu ya Cristu.

9

Tupana rü nanade i Yudíugü na norü duüxügü na yixígüxücèx

¹ Dücèx, Pa Chaueneëgüx, rü pemaã tá nüxü chixu i wüxi i ore. Rü ngëma ore i pemaã tá nüxü chixuxü rü aixcüma nixí erü Cristuarü duüxü chixí. Rü tama chidora. Rü chauãëwatama nüxü chacuèx na aixcüma na yíixü i ngëma ore erü Tupanaãë i Üünexü nixí i chauãëmaã icuáxü. ² Rü poraãcü changechaü, rü choxü nangúecha i chauãëwa, erü tama nayaxögü i chautanüxügü i Yudíugü. ³ Rü aixcüma pemaã nüxü chixu rü guxüguma ngëma chautanüxügu charüxñü, rü poraãcü chanaxwèxe na Cristuaxü yaxögüáxü. Rü choma rü aixcüma íchamemare na poxcuwa choxü namuxü ya Tupana rü Cristuna choxü yaxügachixëëxü ega ngëmaãcü chi nüxü chayaxögüxëëgu rü chanamaxëxëëgu i ngëma chautanüxügü i Yudíugü. ⁴ Rü nümagü rü chauxrüü Yudíugü nixígü. Rü Tupana rü nuxcümaxüchima namaã inaxuneta na naxácügü yixígüxücèx. Rü norü oxigü rü nüxü nadaugü na ñuxácü namexëchixü ga Tupana ga yexguma naxcèx nangoxgux. Rü Tupana rü norü oxigümaã inaxuneta rü ñanagürü nüxü:

“Rü ngëxguma chauga pexñüëgu rü tá pexü charüngüxëë”,
ñanagürü nüxü. Rü Tupana rü nüxna nanaxã ga yema mugü ga Moíché ümatüxü. Rü nanangúexëë na ñuxácü nüxü yacuèxüügüxücèx. Rü meãma namaã inaxuneta na Cristu rü naxcèx núma tá namuãxü na namaxëxëãxücèx rü nüxna na naxããxücèx i maxü i taguma gúxü. ⁵ Rü yema nuxcümaügüxü ga tórü oxigütaa nixígü i ngëma Yudíugü, rü ngëmacèx naxcèx ta nixí ga yema uneta ga tórü oxigümaã nüxü yaxuxü ga Tupana. Rü ngëma Yudíugütanüxüwatama nixí ga nabuxü ga Cristu ya Tupanaxüchi ixícü ya guxüetüwa ngëxmacü. Rü tanaxwèxe i guxüguma nüxü ticuèxüügü. Rü ngëmaãcü yíi. ⁶ Rü ñuxma rü woo tama guxü i Yudíugü na yaxögüxü, natürü taxucürüwama texé nüxü tixu na Tupana rü tama yanguxëëãxü i ngëma norü uneta. Erü ngëma Yudíugü rü tama aixcüma guxüma Tupanaãrü duüxügü nixígü. ⁷ Rü tama guxüma i duüxügü i Abráütaagü ixígüxü, rü aixcüma Abráütanüxü nixígü i Tupanapëxewa. Yerü ga Tupana rü Abráümaã nüxü nixu, rü ñanagürü:

“Rü cune ya Ichaátanüxügü tá nixí i aixcüma cutanüxügü ixígüxü i chopëxewa”,

ñanagürü. Rü yemaãcü namaã inaxuneta woo na nayexmaxü ga togü ga Abráüxácügü. ⁸ Rü ngëmawa meãma nüxü tacuèx rü tama ngëma na Abráütaa tixígüxücèx nixí i Tupanaxácügü tixígüxü. Natürü yíxema aixcüma Tupanaãrü uneta nüxü ixuxürüüãcüma yaxögüxe waxi tixí ya aixcüma Abráütaa ixígüxe i Tupanapëxewa. ⁹ Yerü naxüpa ga na nabuxü ga Abráü nane, rü yema Tupanaãrü uneta ga Abráümaã nüxü yaxuxü, rü ñanagürü:

“Rü naí ya taunecüarü ñúxgumaãcü tá wena nuã chaxü, rü cuxmèx i Chara rü tá ixããcü i ngëxguma”,

ñanagürü. ¹⁰ Natürü tama Abráümaãxícatama nixí ga yemaãcü yadexaxü ga Tupana. Yerü tórü oxi ga Ichaá namèx ga Rebecamaã rü ta nidexa ga Tupana. Rü ngíma rü ngíteaxü ixããcü rü nataxreëxpüx ga ngíne. ¹¹⁻¹³ Natürü yexguma tauta nabuegu rü taxuüma ga mexü rü éxna chixexü naxüegu ga yema ngínegü, rü Rebecamaã nidexa ga Tupana, rü ñanagürü:

“Rü ngëma nüxíra buxü i cune, rü ngëma wixweama buxüãrü duüxü tá nixí”,
ñanagürü ngíxü. Rü yema dexe rü namaã nawüxigu i Tupanaãrü ore i ümatüxü i ñaxü:

“Marü chanayaxu ya Acobu, natürü nüxü chaxo ya Echaú”,

ñaxŭ. Rŭ yemaãcŭ ga Tupana rŭ ngĩmaã nanangoxẽẽ na namẽxwa nangẽxmaxŭ na tũxŭ nayaxuxŭ ya yĩxema woetama nũxŭ ngúchaŭxẽ na tũmacèx naçaxŭ tama nagu naxĩnũãcũma i ÷acũ rŭ mexŭ rŭ ěxna ÷acũ rŭ chixexŭ na taxũxŭ. ¹⁴ ¿Rŭ ñuxŭ ñagũxŭ i ñuxmax? ¿Pexcèx rŭ Tupana rŭ chixexŭ naxũxŭ ga yexguma tama Acobuxŭ nangechaŭxŭrũ nũxŭ na nangechaŭgu ga Echaú? Rŭ dũcax, tama chixexŭ naxũ. ¹⁵ Yerũ norũ orewa rŭ Tupana rŭ Moĩchẽxŭ ñanagŭrũ:

“Rŭ ngẽxguma chi texemaã chamecũmachaŭgu, rŭ tũmamaã tá chamecũma. Rŭ choxŭ tá tangechaŭtũmũŭ ya yĩxema choxŭ ngechaŭtũmũŭchaŭxẽ”, ñanagŭrũ. ¹⁶ Rŭ ngẽmaãcũ tama ngẽma tũmatama tanaxwèxexũgagu rŭ ěxna ngẽma taxũxũgagu nixĩ i Tupana tũxŭ yaxuxŭ ya texé. Natŭrũ tũxŭ nayaxu erũ nũxŭ tangechaŭtũmũŭ. ¹⁷ Rŭ yexgumarũŭ ta ga Tupana rŭ norũ ore i ũmatũxũwa rŭ ñanagŭrũ nũxŭ ga Equituaneãrũ ãẽxgacũ:

“Rŭ ãẽxgacũxŭ cuxŭ chingucuchixẽẽ na cuwa duũxũgũxŭ nũxŭ chadauxẽẽxũcèx i ñuxãcũ na chaporaxŭ. Rŭ ngẽmaãcũ chanaxŭ na guxŭ i duũxũgũ i guxŭ i naãnewa ngẽxmagũxŭ, nũxŭ na cuáxũcèx i chauchiga”,

ñanagŭrũ. ¹⁸ Rŭ ngẽmaãcũ ya Tupana rŭ nũxŭ tangechaŭtũmũŭ ya yĩxema nũxŭ ngechaŭtũmũŭchaŭxẽ. Rŭ ngẽxguma tũxŭ nataiãchiarũ maxũãxẽẽchaŭgu rŭ tũxŭ nanataiãchiarũ maxũãxẽẽ ya yĩxema tama nũxŭ cuáxchaŭxẽ. ¹⁹ Natŭrũ bexmana tá ñacurũgũ choxŭ:

“Rŭ ngẽxguma chi ngẽmaãcũ yixĩgu ya Tupana, ¿rŭ tũxcũŭ nũxŭ nixu na tagagu yĩxŭ na chixexŭ ixũgũxŭ rŭ tama naga ixĩnũẽxŭ? ¿Rŭ texé tabora na itayanaxoxẽẽxũcèx i Tupanaãrũ ngúchaŭ?” ñacurũgũ tá. ²⁰ Natŭrũ Pa Duũxũx, ¿texé quixĩ i cuma rŭ ngẽmacèx ngẽmaãcũ Tupanaxŭ cuyaxũgaxŭ? ¿Cuxcèx rŭ ěxna wũxi i tũxŭ i waixũmũwa ũxŭ rŭ namexŭ i ngẽma norũ ũruũmaã na ñaxŭ?

“¿Rŭ tũxcũŭ ngẽmaãcũ choxŭ cuxũ na ngẽmaãcũ chixĩxũcèx i ñuxmax?” ñaxŭ. ²¹ Rŭ ngẽma tũxũãrũ ũruŭ rŭ waixũmũwa nanaxũ i ÷acũ i nũma naxũxchaŭxŭ. Rŭ ngẽxguma nanaxwèxegu, rŭ ngẽma waixũmũwa nanaxũ i wũxi i tũxŭ na norũ merũŭ yĩxũcèx. Rŭ ngẽxguma nanaxwèxegu, rŭ ngẽmatama waixũmũwa nanaxũ i wũxi i tũxŭ na norũ guxchirechixŭ yĩxũcèx. ²² Rŭ ngẽxgumarũŭtama nixĩ i naxũãxŭ ya Tupana. Erũ tũxŭ nanawéxchaŭ na ñuxãcũ naporaxŭ i nũma rŭ ñuxãcũ napoxcueãxŭ i ngẽma duũxũgũ i chixexŭ ũgũxŭ, natŭrũ poraãcũ yaxna namaã naxĩnũ i ngẽma duũxũgũ, rŭ tama paxa nanapoxcue i ngẽma ímemaregũxŭ na napoxcuxŭ. ²³ Natŭrũ ga Tupana rŭ inanawéxchaŭ na ñuxãcũ poraãcũ tamaã namecũmaxŭ i yixema na yaxõgũxŭ. Rŭ ngẽmacèx nixĩ i nũxŭ ingechaŭtũmũŭgũxŭ, rŭ nuxcũmamatama tũxŭ nadexŭ na naxũtawa ingẽxmagũxũcèx i daxũguxŭ i naãnewa i ngextá ínamexẽchixũwa. ²⁴ Rŭ ngẽmaãcũ i yixema na Yudĩugũ ixĩgũxŭ, rŭ tatanũwa Tupana tũxŭ nidexechi ya ñuxre na norũ duũxũgũ tixĩgũxũcèx. Rŭ ngẽxgumarũŭ ta i ngẽma tama Yudĩugũ ixĩgũxũtanũwa rŭ nayadexechi i togũ. ²⁵ Rŭ ngẽmacèx rŭ Tupanaãrũ ore ga Ochéa ũmatũxũwa rŭ ñanagŭrũ:

“Rŭ ngẽma duũxũgũ i tama chorũ duũxũgũchirẽx ixĩgũxŭ, rŭ: ‘Pema rŭ chorũ duũxũgũ pixĩgũ i ñuxmax’, ñacharũgũ tá nũxŭ. Rŭ ngẽma duũxũgũ i tama Yudĩugũrũŭ nũxŭ changechaŭchirẽxŭ, rŭ: ‘Pexũ changechaŭ i ñuxmax’, ñacharũgũ tá nũxŭ. ²⁶ Rŭ noxri ga Tupana rŭ yema duũxũgũ ga tama Yudĩugũ ixĩgũxũmaã nũxŭ nixu, rŭ ñanagŭrũ nũxŭ: ‘Pema rŭ tama chorũ duũxũgũ pixĩgũ’, ñanagŭrũ nũxŭ. Natŭrũ yematama nachica ga ngextá nũxŭ íyemañaxũwa, rŭ wenaxãrũ yema duũxũgũ

ga tama Yudíugü ixíngüxümaã nidexa ga Tupana ya Maxëxëëruŭ, rü ñanagürü nüxü: ‘Pema rü chauxacügü tá pixíngü’, ñanagürü nüxü”.

Rü yema nixí ga Tupanaãrü ore ga Ochéa ümatüxü. ²⁷⁻²⁸ Rü Yudíugüchiga rü ta nidexa i Tupanaãrü ore, yerü nuxcümaŭcü ga norü orearü uruŭ ga Ichaxía rü ñanagürü:

“Rü woo namuxüchichirëx i Yudíugü yima naxnücü ya taxtüpechinüwa yimacürüŭ, natürü noxre tátama nixí i aixcüma nayauxgüxü i maxü i taguma gúxü. Rü paxa tá ínangu ya tórü Cori na napoxcueãxüçèx i guxüma i ngëma tama noxrü ixíngüxü”,

ñanagürü ga Ichaxía. ²⁹ Rü nümatama ga Ichaxía, rü ñanagürü ga ũpa:

“Rü ngëxguma chi nüma ya tórü Cori ya guxü i naãneãrü yora rü tãü chima íyaxügüxëëãgu i ñuxre i tatanüxügü i Yudíugü, rü chi itayarüxoxochi, yexgumarüŭ ga na iyanaxogüxü ga guma ñãnegü ga Chodoma rü Gomora namaã ga guxüma ga yema duüxügü ga yéma yexmagüxü”,

ñanagürü ga Ichaxía.

Yudíugü rü tama nayaxögüchaŭ i ore i mexü i Cristuchiga

³⁰ ¿Rü ñuxü ñagüxü i ñuxmax? Rü pemaã nüxü chixu rü ngëma duüxügü i tama Yudíugü ixíngüxü ga tama Tupanacèx daugüxü ga noxrix, rü ngëmatama duüxügü nixí i ñuxma Tupanapëxewa imexü yerü nayaxögü. ³¹ Natürü yema Yudíugü ga nagu íxchaŭxü ga yema Moíchéarü mugü na Tupanapëxewa yamexüçèx, rü ínatüe. ³² ¿Rü ñuxãcü ínatüe? Düçèx, ínatüe yerü yema mugüguama naxí na Tupanapëxewa yamexüçèx, rü tama Ngechuchuaxü nayaxögüchaŭ. Rü yemaãcü ga Ngechuchu rü yema duüxügüçèx rü wüxi ga guxchaxü nixí. ³³ Rü ngëmachiga nixí i Tupanaãrü ore i ümatüxü i ñaxü:

“Choma rü Yudíugütanüwa chanamu ya Cristu. Rü nüma rü ngëma Yudíugüçèx rü wüxi i guxchaxü tá nixí erü ngëxguma tama nüxü yaxögüãgu rü tá inayarütauxe. Natürü ngëma duüxügü i nüxü yaxögüxü, rü aixcüma tá namaxë”,

ñanagürü.

10

¹ Pa Chaueneëgüx, rü ngëma poraãcü chanaxwëxexü rü chorü yumüxëwa Tupanana naxcèx chaçaxü, rü ngëma nixí na guxüma i chautanüxügü i Yudíugü na yaxögüxü rü ngëmaãcü aixcüma Tupanaãrü na yixíngüxüçèx.

² Rü aixcüma pemaã nüxü chixu, rü nümagü i Yudíugü rü aixcüma poraãcü Tupanagu narüxínüë rü nanaxügüchaŭ i Tupanaãrü ngüchaŭ. Natürü ínatüe erü tama Cristuaxü nayaxögüchaŭ na ngëmaãcü Tupanapëxewa yamexüçèx.

³ Rü woo Tupana ñoma ga naãnewa nanamu ga Cristu na gumagagu Tupanapëxewa yamexüçèx i duüxügü, natürü nümagü i Yudíugü rü tama nüxü nacüëxgüchaŭ i ngëma. Rü nügütama nimexëëgüchaŭ, rü ngëmacèx nagu naxíãma i ngëma mugü ga Moíché ümatüxü rü tama Cristuaxü nayaxögüchaŭ na nagagu Tupanapëxewa yamexüçèx. ⁴ Natürü nüma ga Cristu rü nayan-guxëë ga yema mugü rü yemaãcü inayanaxoxëë na tama tamaã inacuáxüçèx i ngëma mugü. Rü yemaãcü nanaxü ga Cristu na guxüma i duüxügü i nüxü yaxögüxü rü aixcüma Tupanapëxewa yamexüçèx. ⁵ Rü Moíché nanaxümatü nachiga na ñuxãcü Tupanapëxewa tamexü ya wüxie ega naga taxínügu i ngëma mugü, rü ñanagürü:

“Tupana pexü namu na guxügütama meã peyanguxëëxü i guxüma i ngëma mugü erü ngëxguma naga pexínüëgu i guxüma i ngëma mugü rü tá pemaxë. Natürü ngëxguma tama naga pexínüëgu i wüxitama i ngëma mugü, rü tãütama pemaxë”,

ñanagürü. ⁶ Natürü ñuxma rü Tupanapëxewa time ega Cristuaxŭ yaxögügu. Rü ngëmacèx taxucèxma i cuãëwa rü ñacurügü:

“¿Texé tá daxŭguxŭ i naãnewa taxŭ na Cristucèx tayaçaxŭ na nuã naxŭxŭcèx rü tŭxŭ yanangŭxëxŭcèx na imexŭcèx i Tupanapëxewa?” ñacurügü. ⁷ Rü taxucèxma cuãëwa ñacurügü:

“¿Rü texé tá yuexŭtanüwa taxŭ na ngëxma Cristucèx tayadauxŭcèx na nuã tanagaxŭcèx?” ñacurügü. ⁸ Erü tama ngëmaãcü nixŭ i Cristucèx idauxŭ, yerü yema ore ga Moïché ümatŭxŭ rü ñanagürü:

“Rü marü cuxŭtawana nangëxma i Tupanaärü ore. Rü cuèxwa nangëxma na nüxŭ quixuxŭcèx. Rü cuãëwa nangëxma na nagu curŭxŭnŭxŭcèx”, ñanagürü. Rü ñuxma Pa Chaueneëgŭx, rü pemaã nüxŭ chixu rü ngëmatama ore nixŭ i guxŭwama duŭxŭgümaã nüxŭ tixuxŭ. Rü ngëma ore nixŭ i pexŭ nüxŭ cuèxëxŭ na ñuxãcü pexŭ nangëxmaxŭ i maxŭ ega aixcŭma peyaxögügu. ⁹ Erü ngëxguma cuèxmaã nüxŭ quixuxgu na curü Cori yŭxŭ ya Ngechuchu, rü ngëxguma cuãëwa cuyaxöxgu na yuwa Tupana ínadaxëxŭ, rü tá cuxŭ nangëxma i maxŭ i taguma gúxŭ. ¹⁰ Erü taãëwa tayaxögü na ngëmaãcü Tupanapëxewa imexŭ. Rü taèxmaã nüxŭ tixu na Ngechuchu rü tórü Cori yŭxŭ, rü ngëmaãcü tanayaxu i maxŭ i taguma gúxŭ. ¹¹ Rü Tupanaärü ore i ümatŭxŭwa rü ñanagürü:

“Rü guxãma ya yŭxema ya Ngechuchuaxŭ yaxöxë, rü nüma ya Ngechuchu rü taxútãma tŭxŭ narümaãchiixëë erü tá nayanguxëë i guxŭma i ngema tümamaã inaxunetaxŭ”,

ñanagürü. ¹² Rü Tupanapëxewa rü guxŭma i duŭxŭgü rü nawüxigu. Rü woo Yudíugü yixŭgu rü éxna woo tama Yudíugü yixŭgu, natürü Tupanapëxewa rü nawüxigu i guxŭma i duŭxŭgü. Erü nüma ya tórü Cori, rü guxãärü Cori nixŭ. Rü nüma rü aixcŭma tŭxŭ namaxëxëë ya guxãma ya texé ya nüxna çaxe na tŭxŭ namaxëxëxŭcèx. ¹³ Erü Tupanaärü ore i ümatŭxŭwa rü ñanagürü:

“Rü guxãma ya texé ya tórü Corina çaxe na tŭxna naxãaxŭcèx i maxŭ, rü tá tanayaxu i tümãärü maxŭ i taguma gúxŭ”,

ñanagürü. ¹⁴ ¿Natürü ñuxãcü tá tórü Corina naxcèx tacagü, ega tama nüxŭ tayaxögügu? ¿Rü ñuxãcü tá nüxŭ tayaxögü, ega taguma nüxŭ taxŭnŭëgu i nachiga? ¿Rü ñuxãcü tá nüxŭ taxŭnŭë i norü ore, ega taguma texé tümamaã nüxŭ ixuxgu? ¹⁵ ¿Rü ñuxãcü tá texé nüxŭ tixu i Cristuchiga ega taxúema tŭxŭ nüxŭ yarŭxuxëëgu? Rü ngëmacèx nixŭ i Tupanaärü ore i ümatŭxŭ i ñaxŭ:

“Rü wüxi i taãë nixŭ na ínangugŭxŭ i Tupanaärü orearü uruŭgü na duŭxŭgümaã nüxŭ yaxugŭxŭcèx i Tanatŭarü ore i mexŭ i Cristuchiga”, ñaxŭ. ¹⁶ Natürü tama guxŭma i duŭxŭgü naga naxŭnŭë i ngëma ore i mexŭ. Rü Ichaxía nüxŭ ixuxŭrŭü nixŭ. Yerü ga nüma rü ñanagürü:

“Pa Corix, noxretama nixŭ i ngëma duŭxŭgü i toxŭ yaxögŭxŭ i ngëma ore i nüxŭ tixuxŭ”,

ñanagürü. ¹⁷ Rü dücax, rü ngëma na Cristuchigaxŭ naxŭnŭëxŭwa nixŭ i ne naxŭxŭ na yaxögüãxŭ i duŭxŭgü. Rü ngëma nüxŭ naxŭnŭëxŭ, rü ore i mexŭ i Cristuchiga nixŭ. ¹⁸ Natürü i ñuxma rü pexna chaca, ¿éxna pexcèx rü ngëma Yudíugü rü taguma nüxŭ naxŭnŭë i ngëma ore i mexŭ i Cristuchiga? Dücèx, ngëmaãcü marü nüxŭ naxŭnŭë. Erü Tupanaärü ore i ümatŭxŭwa rü ñanagürü:

“Rü ngëma Tupanaärü orearü uruŭgü, rü guxŭwama i ñoma i naãnewa rü nüxŭ nixugüe i norü ore. Rü ngextá ínangëxmagŭxŭwa i Yudíugü, rü ngema rü ta nüxŭ nixugügu”,

ñanagürü i ngëma ore. ¹⁹ Natürü wena pexna chaca, ¿rü ngëma Yudíugü rü tama éxna nüxŭ nicuèxãchitanü na Cristugagu yŭxŭ na Tupana nadexŭ i

duŭxŭgü i ñuxmax? Rŭ ngēmaācŭ nŭxŭ nacuèxgü. Yerü Tupanaärü ore ga Moïché ũmatŭxŭwa rŭ ñanagŭrŭ:

“Dŭcèx, Pa Yudíugŭx, choma rŭ tá chanamaxēē i ngēma duŭxŭgü i tama Yudíugü ixíguŭxŭ, rŭ ngēmacèx i pema rŭ tá pixāŭxāchigü. Rŭ ngēxguma chanamaxēēgu i ngēma togü i duŭxŭgü i tama choxŭ cuèxgüchiréxŭ, rŭ pema i Yudíugü rŭ tá penuē erü nŭxŭ charŭngŭxēē i ngēma togü”, ñanagŭrŭ. ²⁰ Rŭ yemawena ga Ichaxía, rŭ tama namuŭ ga yema Yudíugümaā nŭxŭ na yaxuxŭ ga yema Tupanaärü ore ga ñaxŭ:

“Rŭ ngēma duŭxŭgü i tama Yudíugü ixíguŭxŭ i tama chauxcèx daugŭxŭ, rŭ choxŭ tá inayangaugü. Rŭ choma rŭ tá chaugü changoxēē naxcèx i ngēma duŭxŭgü i tama chauxcèx ícagüchiréxŭ”,

ñaxŭ. ²¹ Rŭ Tupana rŭ Ichaxíawa Yudíugüchiga nidexa rŭ ñanagŭrŭ:

“Rŭ guxŭ i ngunexŭgu rŭ nŭxna chaxuecha i ngēma duŭxŭgü i tama chauga ñnŭēchaŭxŭ rŭ chomaā nuèxŭ. Natŭrŭ tama choxŭ inarŭxñnŭēchaŭ”, ñanagŭrŭ.

11

Nangēxma i ñuxre i Yudíugü i Tupana dexŭ na aixcŭma noxrŭ yixíguŭxŭcèx

¹ Ñuxma pexna chaca rŭ, ¿pexcèx ēxna ya Tupana rŭ marü nŭxŭ naxo i norü duŭxŭgü i Yudíugü? Tama nixí i nŭxŭ naxoxŭ. Erü choma i Pauru rŭ Yudíu chixí. Rŭ Abráŭtanŭxŭ chixí, rŭ Abráŭtaa ya Beyamitanŭxŭ chixí. ² Rŭ nuxcŭmamata Tupana Yudíugümaā inaxuneta na norü duŭxŭgü yixíguŭxŭcèx, rŭ ñuxma rŭ tama Yudíugŭxŭ naxo. ¿Tama ēxna nŭxŭ pecuèx na ñuxŭ ñaxŭ ga Tupanaärü orearü uruŭ ga Ería? Rŭ Tupanaärü orewa nŭxŭ tadaugü rŭ Ería rŭ Tupanapēxewa poraācŭ yema Yudíugŭxŭ nixugü. ³ Rŭ ñanagŭrŭ ga Ería:

“Pa Corix, ngēma Yudíugü rŭ marü nanadai i curü orearü uruŭgü. Rŭ nagu napogŭe i ngēma nachicagü i ngextá duŭxŭgü cuxŭ ícuèxŭŭgŭxŭwa. Rŭ chaxicatama íchayaxŭāchi. Rŭ choxŭ rŭ ta nimèxgŭchaŭ”,

ñanagŭrŭ ga Ería. ⁴ Natŭrŭ Tupana nanangāxŭ, rŭ ñanagŭrŭ:

“Dŭcèx, choma rŭ marü choxŭ nangēxma i 7000 i yatŭgü i chaugŭxŭ chidexechixŭ. Rŭ nŭmagü rŭ taguma nŭxŭ nicuèxŭŭgü i ngēma tupanane-tachicŭnèxā i Baá”,

ñanagŭrŭ. ⁵ Rŭ ngēxgumarŭŭ ta nixí i ñuxmax. Rŭ woo muxŭma i Yudíugü tama nayaxōgü, natŭrŭ nangēxma i ñuxre i Tupana namaā mecŭmaxŭgagu dexŭ. ⁶ Rŭ ñuxma na Tupana tŭxŭ ngechaŭxŭgagu tŭxŭ nadexŭ, rŭ taxucŭrŭwama texé nŭxŭ tixu na ŭacŭ rŭ mexŭ na ixŭgŭxŭgagu na yixíxŭ. Erü ngēxguma chi ŭacŭ rŭ mexŭ ixŭgŭxŭgagu yixgu na tŭxŭ nadexŭ, rŭ natŭcèxmamare chi nixí na nŭxŭ ingechaŭtŭmŭxŭgŭxŭ. ⁷ ¿Rŭ ñuxācŭ yíixŭ i ñuxmax? Rŭ ngēma rŭmumaēxŭ i Yudíugü rŭ tama nŭxŭ inayangaugü i ngēma maxŭ i naxcèx nadaugŭxŭ. Natŭrŭ ngēma noxretama i Yudíugü i Tupana dexŭ, rŭ ngemagü nixí i nŭxŭ iyangaugŭxŭ. Rŭ guxŭma ga yema togü ga Yudíugü rŭ Tupana ínanawogü yerü tama naga naxñnŭe. ⁸ Rŭ ngēmachiga nixí i Tupanaärü ore i ũmatŭxŭ i ñaxŭ:

“Tupanatama ngēma duŭxŭgŭaxŭ nanaguxchaxēē. Rŭ ngēmacèx woo nŭxŭ nadaugŭgu i ngēma ore i aixcŭma ixíxŭ, rŭ tama nŭxŭ nacuèxgŭéga. Rŭ woo nŭxŭ naxñnŭe i ngēma ore, rŭ tama nayaxōgü. Rŭ ñuxma rŭ ta ngēmaācŭ nixí”,

ñanagŭrŭ. ⁹ Rŭ Dabí rŭ ta rŭ ñanagŭrŭ:

“Rŭ ngēma duŭxŭgü rŭ norü petacèx naxŭgŭxŭ i ōnagŭgagu rŭ norü muxŭma i ngēmmaxŭgŭgagu rŭ chixexŭgu tá nayi rŭ ngēmacèx tá napoxcue. ¹⁰ Rŭ

naãēwa rü tãütáma nüxŭ nacuèxgü, rü guxchaxügü tá nüxŭ nangëxma. Rŭ ñoma wüxi i duŭxŭ i tacü i yaxŭ ípaxixŭrŭü tá nixŭgü namaã i norü guxchaxügü”, ñanagŭrŭ.

Tupana nanamaxëxë i ngëma tama Yudíugü ixŭgüxŭ

¹¹ Rŭ pexna chaca, rü ñuxma na Cristuxŭ naxoexŭ i ngëma Yudíugü, ¿rŭ pexcèx ëxna rü ngëmacèx ya Tupana rü tá nüxŭ naxoxochixŭ? Tama nüxŭ naxo. Natürŭ ñuxma na tama Cristuaxŭ yaxögüãxŭ i ngëma Yudíugü, rü ngëmacèx ya Tupana rü nüxŭ narüngŭxëë rü nanamaxëxëë i ngëma tama Yudíugü ixŭgüxŭ. Rŭ ngëmaãcŭ nanaxŭ ya Tupana na yaxãuxãchiexŭcèx i ngëma Yudíugü, rü Cristuaxŭ na yaxögüãxŭcèx. ¹² Rŭ yema na ínatüexŭ ga yema Yudíugü, rü yemagagu muxŭma ga togü ga duŭxŭgü nanayauxgü ga Tupanaãrŭ ngŭxëë i taxŭ. Rŭ yema na noxretama ga Yudíugü nayaxögüxŭ, rü yemagagu Tupana nanamaxëxëë ga yema tama Yudíugü ixŭgüxŭ. Natürŭ ngëxguma tá Tupanacèx nawoeguxgu i guxŭma i Yudíugü, rü Tupana rü tá yexeraãcŭ nüxŭ narüngŭxëë i guxŭma i ngëma duŭxŭgü i tama Yudíugü ixŭgüxŭ. ¹³⁻¹⁴ Rŭ ñuxma Pa Duŭxŭgü i Tama Yudíugü Ixŭgüxŭx, rü choxŭ nangëxma i wüxi i ore i pemaã nüxŭ chixuxchaŭxŭ. Rŭ dücax, petanüwa nixŭ i choxŭ namuxŭ ya Tupana na pemaã nüxŭ chixuxcèx i norü ore. Rŭ ñuxma rü aixcŭma meã chayanguxëë i ngëma puracŭ, erŭ chanaxwëxe na pexŭ nadaugŭxŭ i ngëma chautanüxŭ i Yudíugü na ñuxãcŭ Tupana pexŭ na rüngŭxëëxŭ. Rŭ ngëmaãcŭ tá nixãuxãchie i ñuxre i nümagŭ, rü tá Cristuaxŭ nayaxögü, rü ngëmaãcŭ tá nanayauxgü i maxŭ i taguma gúxŭ. ¹⁵ Nüxŭ tacuèx rü ngëma Yudíugü rü tama Cristuaxŭ nayaxögüchaŭ i ñuxmax. Rŭ ngëmacèx ya Tupana rü nanade i ngëma togü i duŭxŭgü i tama Yudíugü ixŭgüxŭ. Natürŭ ñuxma na ngëmaãcŭ yŭxŭ, ¿rŭ ñuxãcŭ tá nixŭ i ngëxguma Cristuaxŭ yaxögüãgu i ngëma Yudíugü, rü wena Tupana nadexgu? Rŭ wüxi i mexëchixŭ tá nixŭ naxcèx i ngëma Yudíugü. Erŭ ñoma wüxi i duŭxŭ i yuxŭ rü wenaxãrŭ maxŭxŭrŭü tá nixŭgü. ¹⁶ Rŭ Tupana rü wena tá nanade i ngëma Yudíugü i ngëxguma yaxögüãgu. Rŭ ngë-maãcŭ tá nixŭ, yerŭ nuxcŭmaŭcŭ ga nanatŭ ga Abrãŭ rü Tupanaãrŭ duŭxŭ nixŭ. Rŭ ngëmacèx i nataagŭ i Yudíugü rü Tupanaãrŭ duŭxŭgü ta nixŭgü. Rŭ ñoma wüxi i pãŭ i Tupanana ixãxŭrŭü tá nixŭ. Erŭ ngëxguma ngëma pãŭwa íraxŭ Tupanaãrŭ yixŭgu, rü ngëmawa nüxŭ tacuèx na guxŭma i ngëma pãŭ rü noxrŭ na yŭxŭ. Rŭ ngëma wüxi i nanetŭ i Tupanana ixãxŭrŭü tá nixŭ. Rŭ ngëxguma ngëma nanetŭchumëxã rü Tupanaãrŭ yixŭgu, rü ngëmawa nüxŭ tacuèx na guxŭma i ngëma nanetŭ rü noxrŭ na yŭxŭ. Rŭ ngëmaãcŭ tá nixŭ i ngëma Yudíugümaã nangupetŭxŭ, erŭ wüxi i ngunexŭgu rü guxŭma i nümagŭ rü Tupanacèx tá nawoegu. ¹⁷ Tupana nüxŭ naxo ga yema Yudíugü ga tama yaxögüchaŭxŭ. Rŭ ñoma wüxi i orixchacŭü i idaexŭrŭü nixŭ ga yema Yudíugüxŭ naxoxŭ. Natürŭ nachicŭü Tupana pexŭ nade woo tama Yudíugü na pixŭgüxŭ. Rŭ wüxi i naŭxnecŭcŭãx i orixchacŭü rü orix i toxŭwa yarŭñaxcuchixŭrŭü pixŭgü. Rŭ ñuxma i pema rü ta pexŭ nangëxma i pechica i natanüwa i ngëma duŭxŭgü i Tupanaãrŭ ixŭgüxŭ. Rŭ Tupana rü pexŭ narüngŭxëë rü pexŭ rü ta namaxëxëë. ¹⁸ Natürŭ pema i tama Yudíugü na pixŭgüxŭ, rü tama name i pegŭ picuèxŭŭ rü nüxŭ pixu na ngëma Yudíugüarŭ yexera pixŭgüxŭ. Rŭ ngëxguma chi ngëmaãcŭ pegŭ picuèxŭŭgüchaŭgu, rü name nixŭ i nüxna pecuèxãchie na tama petanüwa ne naxŭxŭ ga Cristu ya pexŭ maxëxëëcŭ, natürŭ Yudíugütanüwa nixŭ ga ne naxŭxŭ. Rŭ ngëma Yudíugügagu nixŭ i Tupana pexŭ dexŭ rü pexŭ namaxëxëëxŭ i ñuxmax. ¹⁹ Natürŭ bexmana tá ñaperügügü:

“Tupana rü marü nüxü naxo ga yema Yudíugü rü yemacèx nachicüü tüxü nade”, ñaperügü tã. ²⁰ Ngēmaãcü aixcüma nixĩ ga Tupana nüxü oxü ga yema Yudíugü yerü tama nayaxögü. Rü ngēma na peyaxögüxüçèxicatama nixĩ i nachicüü Tupana pexü dexü i ñuxmax. Rü ngēmacèx tama name i pegü picuèxüügü. ¡Natürü pexuãégü na tama yema Yudíugüxü üpetüxürüü pexü üpetüxüçèx! ²¹ Yerü yema Yudíugü ga noxri Tupanaãrü ixígüxü, rü Tupana nüxü naxo yerü tama nayaxögü. Rü yexguma yemaãcü Tupana nüxü oxgu ga yema duüxügü rü pexü rü tá ta naxo ega tãütãma peyaxögüechagu. ²² Dücèx, na ñuxãcü namecümaxü ya Tupana. Natürü tüxü napoxcu ta ega tama aixcüma yaxögügu. Rü nanapoxcue ga yema duüxügü ga chixexügu yixü, natürü pemaã rü namecüma. Natürü penaxwèxe i guxüguma nüma nanaxwèxexüãcüma pemaxê rü peyaxögü na guxüguma pemaã namecümaêchaxüçèx. Erü ngëxguma tama nüma nanaxwèxexüãcüma pemaxêgu rü tama peyaxögüechagu, rü tãütãma pemaã namecüma. Rü pexü rü tá ta naxo, rü tá pexü ínawogü. ²³ Natürü ngëxguma yaxögüãgu i ngēma Yudíugü i ñuxma maxêxü, rü woo Tupana na nüxü oxü ga noxrix, natürü wena táxarü nanade erü nüxü nangëxma i pora na wenaxãrü nadeãxüçèx ega aixcüma yaxögüãgu. ²⁴ Rü pema na tama Yudíugü na pixígüxü, rü tama Tupanaãrü duüxügü pixígü ga noxrix. Natürü Tupana pexü nade na noxrü pixígüxüçèx. Rü ñuxma na yemaãcü Tupana pexü dexü, rü ngëxguma yaxögüãgu i ngēma Yudíugü, rü Tupana rü pexü nadexüãrü yexera tá nüxü natauxcha na nadeãxü i ngēma Yudíugü, yerü woetama norü duüxügüchirëx nixígü ga noxrix.

Wüxi i ngunexü rü guxüma i Yudíugü tá nanayauxgü i maxü i taguma gúxü

²⁵ Pa Chaueneégü i Yaxögüxüx, nangëxma i wüxi i ore ga noxri tama duüxügüxü nüxü nacuèxëxü ga Tupana. Natürü chanaxwèxe i nüxü pecuèx i ngēma ore na tama nagu perüxĩnëxüçèx na duüxügü i nüxü cuèxüchixü pixígüxü, rü pexicatama Tupana pexü dexü. Rü dücax, noxretama nixĩ i ngēma Yudíugü i aixcüma yaxögüxü. Rü ngēmaãcü tá nixĩ ñuxmatáta yaxögüã i guxüma i ngēma togü i duüxügü i Tupana dexü. ²⁶ Natürü ngēmawena rü guxütãma i Yudíugü rü tá ta nayaxögü, rü tá nanayauxgü i maxü i taguma gúxü. Erü Tupanaãrü ore i ümatüxüwa rü ñanagürü:

“Yima Cristu ya ínanguxüxëëcü, rü Yudíugütanüwatama ne naxü. Rü nüma rü tá Yudíugüxü chixexüwa ínanguxüxëë. ²⁷ Rü aixcüma norü pecaduwa tá íchananguxüxëë i ngēma Yudíugü. Rü ngëxguma tá nixĩ na aixcüma chayanguxëëxü i ngēma chorü uneta ga üpaxüchima Abrãümaã nüxü chixuxü”,

ñanagürü ga Tupana. ²⁸ Natürü i ñuxma ya Tupana rü Yudíugüxü nadau na norü uwanügü yíxü erü tama nayaxögü i ngēma ore i mexü. Natürü ngēmaãcü naxüpetü na pexü natauxchaxüçèx na peyaxögüxü i pema i tama Yudíugü na pixígüxü. Natürü nüma ya Tupana rü ñuxma rü ta ngēma Yudíugüxü nangechaü yerü nuxcümaügüxü ga norü oxigümaã inaxuneta na nüxü tá nangüxëëxü. ²⁹ Rü ngëxguma Tupana rü tacü i mexümaã inaxunetagu, rü aixcüma nayanguxëë i ngēma, rü taguma nüxü inayarüngüma. Rü ngëxgumarüü ta i ngëxguma texécèx nacaxgu, rü taguma nüxü inayarüngüma i ngēma. ³⁰ Rü pema na tama Yudíugü pixígüxü, rü üpa rü tama Tupanaga pexĩnüë. Natürü ñuxma na tama naga naxĩnüëxü i Yudíugü, rü ngēmacèx Tupanaãxü pengechaütümüügü erü peyaxögü i pemax. ³¹ Rü ngēma pexü ngupetüxürüü nixĩ i ngēma Yudíugüxü nangu-petüxü. Nümagü rü tama Tupanaga naxĩnüë i ñuxmax, natürü ngēmaãcü nüxü nangupetü na Tupanaãxü pengechaütümüügüxüçèx, rü nümagü rü ta

Tupanaāxŭ nangechaŭtŭmŭŭgŭxŭcèx i ñuxmax. ³² Yerŭ nŭma ga Tupana rŭ guxŭma ga duŭxŭgŭmaā nanaxuegu na chixexŭwa nangēxmagŭxŭ nagagu ga norŭ pecadugŭ. Natŭrŭ yemaācŭ namaā nanaxuegu ga Tupana na nŭxŭ nangechaŭtŭmŭŭgŭxŭcèx i guxŭma i duŭxŭgŭ. ³³ Rŭ namexēchi ya tŭrŭ Tupana, rŭ poraācŭxŭchima tŭxŭ narŭngŭxēē. Rŭ nŭma rŭ nŭxŭ nacuèxŭchi erŭ guxŭxŭma nacuèx. Rŭ yixema rŭ taxucŭrŭwama nŭxŭ tacuèx i tŭxcŭŭ yŭxŭ i tŭxŭ nadexŭ, rŭ taxucŭrŭwama nŭxŭ tacuèx i guxŭma i ngēma naxŭxŭ i nŭmax. ³⁴ ¿Erŭ texé i tatanŭwa nŭxŭ tacuèx i guxŭma i ngēma tŭrŭ Cori nagu rŭxŭnŭxŭ? ¿Rŭ texé nŭxŭ tacuèx na tŭrŭ Corixŭ taxucŭxŭxŭ? ³⁵ ¿Rŭ texé tŭxira tacŭ rŭ āmare tŭrŭ Corina taxā, na yixcama nŭxŭ tacŭmaā tŭxŭ nataeguxēēāxŭcèx? ³⁶ Erŭ guxŭma i tacŭ ingēxmaxŭ rŭ Tupanaxŭtawa ne naxŭ. Rŭ nŭma nixŭ ga naxŭāxŭ ga guxŭma na noxrŭ yŭxŭcèx. Rŭ name nixŭ i guxŭguma nŭxŭ ticuèxŭŭgŭ rŭ tanataxēē. Rŭ ngēmaācŭ yŭ.

12

Pexŭ chacèèxŭ na pegŭtama Tupanana pexāgŭxŭ na wŭxi i āmare i maxŭxŭ na pixŭgŭxŭcèx

¹ Rŭ dŭcax, Pa Chaueneēgŭx, ñuxācŭ Tupana poraācŭxŭchima tamaā namecŭma. Rŭ ngēmacèx pexŭ chacèèxŭ na pegŭtama Tupanana pexāgŭxŭ na wŭxi i āmare i maxŭxŭ na pixŭgŭxŭcèx. Rŭ ngēma āmare nixŭ i aixcŭma napēxewa ŭnŭxŭ rŭ namaā nataāēxŭ. Rŭ ngēmaācŭ nixŭ ya Tupana i nanaxwèxexŭ na nŭxŭ picuèxŭŭgŭxŭ. ² Rŭ tama name i ñoma i naānecŭāx i duŭxŭgŭcŭmagu pexŭ. Natŭrŭ name nixŭ i Tupanana pegŭ pexāgŭ na nŭma pexŭ naxŭchicŭŭxŭcèx rŭ ngexwacaxŭxŭ i peāē pexŭ ngēxmaxŭcèx rŭ ngēmaācŭ naxcèxicatama pemaxēxŭcèx. Rŭ ngēmaācŭ tá nŭxŭ pecuèx i tacŭ nixŭ i Tupana pexŭ naxwèxexŭ na penaxŭxŭ, rŭ tacŭ nixŭ i aixcŭma mexŭ i napēxewa, rŭ tacŭ nixŭ i namaā nataāēxŭ. ³ Rŭ Tupana ya chomaā mecŭmacŭ, rŭ choxŭ namu na pemaā nŭxŭ chixuxŭcèx i guxāma i pema na tama namexŭ na texé i petanŭwa tŭgŭ írŭtaxŭ rŭ tŭgŭgu tarŭxŭnŭxŭ na togŭarŭ yexera tŭxŭ. Natŭrŭ name nixŭ na wŭxichigŭ meā tŭgŭ ngugŭarŭ maxŭāxŭ rŭ tŭgŭgu rŭxŭnŭxŭ na ñuxācŭ Tupana tŭxna naxāxŭ i tŭmaārŭ cuèx wŭxigu namaā i tŭmaārŭ ō. ⁴ Rŭ dŭcax, rŭ taxŭnewa nangēxma i taeru rŭ tachacŭŭgŭ rŭ taparagŭ rŭ muxŭma i to i taxŭneārŭ ngēmaxŭgŭ. Rŭ wŭxichigŭ i ngēma taxŭneārŭ ngēmaxŭgŭ rŭ nŭxŭ nangēxma i noxrŭtama puracŭ. ⁵ Rŭ ngēxgumarŭŭ ta i yixema na yaxŭgŭxŭ, rŭ woo na imuxŭ natŭrŭ wŭxitama i duŭxŭgŭ tixŭgŭ, erŭ Cristuarŭ duŭxŭgŭ tixŭgŭ. Rŭ ngēmacèx i guxāma i yixema rŭ yigŭmŭcŭgŭ tixŭgŭ, erŭ woetama wŭxitama i duŭxŭgŭ tixŭgŭ. ⁶ Rŭ wŭxichigŭ i yixema, rŭ Tupana tŭxna nanaxā i tŭrŭ cuèx i nŭma nanaxwèxexŭ na tŭxŭ nangēxmaxŭ. Rŭ tanaxwèxe i meāma nagu taxŭ i ngēma cuèx i Tupana tŭxna āxŭ. Rŭ ngēxguma tŭxna naxāāgu i tŭrŭ cuèx na norŭ orearŭ uruŭ ixŭgŭxŭcèx, rŭ name nixŭ i ngēma ō i tŭxŭ ngēxmaxŭmaā tanaxŭ i ngēma puracŭ. ⁷ Rŭ ngēxguma tŭxna naxāāgu i tŭrŭ cuèx na togŭxŭ rŭngŭxēēgŭxŭcèx, rŭ name nixŭ i meāma tanaxŭ i ngēma. Rŭ ngēxguma texēna naxāāgu i tŭmaārŭ cuèx na togŭxŭ tangŭxēēxŭcèx, rŭ name nixŭ i meāma tanaxŭ i ngēma. ⁸ Rŭ yixema nŭxŭ cuāxe na Tupanaārŭ oremaā togŭxŭ tataāēxēēxŭ, rŭ name nixŭ i meāma tanaxŭ i ngēma. Rŭ yixema nŭxŭ cuāxe na togŭmaā tangauxŭ i tŭmaārŭ ngēmaxŭ, rŭ name nixŭ i tŭmaārŭ ngŭchaŭmaā tanaxŭ i ngēma. Rŭ yixema āēxgacŭ ixŭxē rŭ name nixŭ i meāma tayanguxēē i ngēma puracŭ. Rŭ yixema nŭxŭ cuāxe na togŭ tŭxŭ ngechaŭtŭmŭŭgŭxŭ, rŭ name nixŭ i taāēācŭma tanaxŭ i ngēma.

Ñuxăcŭ nanaxwêxe na namaxêxŭ i duŭxŭgŭ i Cristuaxŭ yaxôgŭxŭ

⁹ Rŭ name nixŭ i aixcŭma meăma pegŭ pengechaŭgŭ i wŭxichigŭ. ;Rŭ nŭxŭ pexo i guxŭma i ƭacŭ i chixexŭ ixŭxŭ! ;Rŭ nagu pexŭ i ngêma aixcŭma mexŭ ixŭxŭ! ¹⁰ Rŭ name nixŭ i wŭxichigŭ pegŭ pengechaŭgŭ, ñoma pegŭeneêxŭchixŭ pengechaŭxŭrŭ. Rŭ name nixŭ i naxcêx pedaugŭ na ñuxăcŭ peeneêgŭxŭ petaxêxŭ rŭ ñuxăcŭ pegŭ perŭngŭxêxŭ. ¹¹ Rŭ tama name i cuxo ega ƭacŭ rŭ puracŭ cuxŭ namŭxgu ya tórŭ Cori. Natŭrŭ name nixŭ i curŭ ngŭchaŭmaă cunaxŭ i norŭ puracŭ. ¹² Rŭ name nixŭ i petaăegŭ erŭ ípenanguxêê na Tupanaxŭtawa pengugŭxŭ. Rŭ ngêxguma ƭacŭ rŭ ngŭxŭ pexŭ ngupetŭgu, rŭ name nixŭ i yaxna namaă pexŭnŭê. ;Rŭ tama name i nŭxŭ perŭchaue na peyumŭxêgŭxŭ! ¹³ Rŭ ngêxguma nŭxŭ pedêxgu na ƭacŭ nŭxŭ taxuxŭ i ngêma togŭ i yaxôgŭxŭ, rŭ name nixŭ i nŭxŭ perŭngŭxêê. ;Rŭ meă penayaxu i ngêma duŭxŭgŭ i pexŭtagu naxŭănexŭ! ¹⁴ Rŭ ngêxguma chi texé chixri pemaă ŭpetŭgu, rŭ name nixŭ i tŭmacêx peyumŭxêgŭ na meă tŭxŭ naxŭpetŭxŭcêx. Rŭ ngêmaăcŭ name nixŭ i Tupanana tŭmacêx peca na tŭxŭ nangŭxêxŭcêx rŭ tama tŭxŭ napoxcuxŭcêx. ¹⁵ ;Rŭ wŭxigu tŭmamaă petaăegŭ ya yŭxema taăegŭxe! ;Rŭ wŭxigu tŭmamaă pexauxe ya yŭxema ngechaŭgŭxe rŭ auxexe! ¹⁶ ;Rŭ meă pegŭ pengechaŭgŭ i wŭxichigŭ! ;Rŭ tama pegŭ picuêxŭŭgŭ! ;Rŭ namaă pegŭ pewŭxiguxêê i ngema tama nŭgŭ icuêxŭŭgŭxŭ! ;Rŭ tama pegŭgu perŭxŭnŭê na togŭarŭ yexera nŭxŭ cuêxŭchigŭxŭ na pixŭgŭxŭ! ¹⁷ Rŭ ngêxguma texé chixexŭ pemaă ŭxgux, ;rŭ tăŭtăma chixexŭmaă pexŭtanŭ! Natŭrŭ name nixŭ i naxcêx pedau na mexŭ pexŭxŭ i guxŭ i duŭxŭgŭpêxewa. ¹⁸ ;Rŭ naxcêx pedau na guxŭma i duŭxŭgŭmaă meă pemaxêxŭ rŭ namaă na iperŭngŭxmŭxŭcêx i guxŭguma! ¹⁹ Pa Chaueneêgŭ ya Pexŭ Changechaŭgŭxe, tama name i pegŭtama pexŭtanŭ ega texé ƭacŭ rŭ chixexŭ pemaă ŭxgu. Natŭrŭ name nixŭ i Tupanamêxêgu penaxŭ i ngêma na nŭma napoxcuăxŭcêx. Erŭ Tupanaărŭ ore i ŭmatŭxŭwa rŭ ñanagŭrŭ:

“Rŭ choxmêxwa nangêxma na duŭxŭgŭxŭ chapoxcuxŭ i norŭ chixexŭcêx. Rŭ choma tá nŭxŭ chanaxŭtanŭ i ngêma duŭxŭ i chixexŭ ŭxŭ”, ñanagŭrŭ ya tórŭ Cori. ²⁰ Rŭ ngêxguma ƭacŭ rŭ chixexŭ cumaă naxŭxgu i togŭ, rŭ tama name i chixexŭmaă cunataeguxêê. Natŭrŭ name nixŭ i nagu quixŭ i Tupanaărŭ ore i ñaxŭ,

“Rŭ ngêxguma curŭ uwanŭ taiyêxgu, ;rŭ nachibŭxêê! Rŭ ngêxguma yaŭawaxgu, ;rŭ naxaxexêê! Erŭ ngêxguma ngêmaăcŭ cunaxŭxgu, rŭ poraăcŭ tá cunaxănexêê”, ñaxŭ. ²¹ Rŭ ngêxguma togŭ chixexŭ cumaă ŭxgux, rŭ name nixŭ i cuxuăê na tama chixexŭgu cunguxŭcêx. Rŭ name nixŭ na mexŭ cuxŭxŭ namaă i ngêma duŭxŭ. Rŭ ngêmaăcŭ tá icuyanaxoxêê i ngêma chixexŭ i cumaă naxŭxchaŭxŭ.

13

¹ Rŭ name nixŭ i guxŭma i duŭxŭgŭ rŭ meă nórŭ âêxgacŭga naxŭnŭê. Erŭ Tupana nixŭ ya nŭxŭ unetacŭ i guxŭma i âêxgacŭgŭ. Erŭ nataxuma i âêxgacŭ i tama Tupana ingucuchixêxŭ. ² Rŭ ngêmacêx, texé ya tama tŭmaărŭ âêxgacŭga ñnŭchaŭxê, rŭ Tupanaga nixŭ i tama taxŭnŭxŭ. Rŭ yŭxema tama naga ñnŭêchaŭxê, rŭ tá tapoxcue. ³ Erŭ ngêma âêxgacŭgŭ rŭ tama ngêma mexŭ ŭgŭxŭărŭ poxcuruŭ nixŭ, natŭrŭ ngêma chixexŭ ŭgŭxŭărŭ poxcuruŭ nixŭ. Rŭ ngêxguma cunaxwêxegu na tama nŭxŭ cumuŭxŭ i wŭxi i âêxgacŭ, rŭ name nixŭ i meă cumaxŭ. Rŭ nŭma i âêxgacŭ rŭ tá cumaă nataăê. ⁴ Erŭ nŭma i âêxgacŭ rŭ Tupanaărŭ ngŭxêêruŭ nixŭ rŭ ngêmacêx nanamu na cuxŭ nangŭxêxŭcêx. Natŭrŭ ngêxguma chixri cumaŭxgu, rŭ ngêxguma tá waxi nixŭ i nŭxŭ cumuŭxŭ. Erŭ nŭma i âêxgacŭ rŭ tama natŭcêxma nixŭ

na nüxŭ nangēxmaxŭ i pora na cuxŭ napoxcuxŭ. Erü woetama Tupana nanamu na napoxcuāxŭcèx i ngēma duŭxŭ i chixri maxŭxŭ. ⁵ Rŭ ngēmacèx name nixŭ i naga cuxŭnŭ i curŭ āēxgacŭgŭ. Rŭ tama ngēma poxcuxŭ na cumuŭxŭcèxicatama nixŭ i namexŭ na naga cuxŭnŭxŭ, natŭrŭ name nixŭ i naga cuxŭnŭ erü marŭ nüxŭ cucuèx na namexŭ i ngēma. ⁶ Rŭ ngēmacèx name nixŭ i meā nüxŭ penaxŭtanŭ i ngēma dŭeru i perŭ āēxgacŭgŭcèx ixŭxŭ i ngēma nŭmagŭ nagu naxunetaxŭēxpŭx na nüxŭ penaxŭtanŭxŭcèx. Erü ngēma āēxgacŭgŭ rŭ Tupanaāxŭ nixŭ i napuracŭexŭ i ngēxguma naxŭāgu i ngēma puracŭ na pemaā inacuáxŭ. ⁷ Rŭ wŭxichigŭ i ngēma āēxgacŭgŭ, rŭ name nixŭ i nüxna penaxā i ngēma nüxna ŭxŭ. ;Rŭ nüxŭ penaxŭtanŭ i ngēma dŭeru i perŭ āēxgacŭgŭ nagu unetaxŭēxpŭx na nüxŭ penaxŭtanŭxŭ! ;Rŭ penaxŭx i ngēma ĩāneārŭ puracŭ i perŭ āēxgacŭgŭ pexŭ muxŭ na penaxŭxŭcèx! ;Rŭ nüxŭ pengechaŭgŭ rŭ naga pexŭnŭē i ngēma perŭ āēxgacŭgŭ! Erü ngēmaācŭ nixŭ i namexŭ na penaxŭxŭ. ⁸ Rŭ tama name i texéaxŭ tacŭ pengetanŭ. Natŭrŭ nangēxma i wŭxitama i ngetanŭ i taguma tŭxŭ ingutanŭxŭ. Rŭ ngēma nixŭ na yigŭ ingechaŭgŭxŭ. Rŭ ngēmacèx ya yŭxema aixcŭma tŭmamŭcŭxŭ ngechaŭxē rŭ marŭ tayanguxēē i guxŭma i ngēma Tupana tŭxŭ muxŭ. ⁹ Rŭ ñanagŭrŭ i Tupanaārŭ mugŭ:

“;Rŭ tãŭtãma naŭ i ngemaã icupe! ;Rŭ tãŭtãma cumãéta! ;Rŭ tãŭtãma cungŭx!
;Rŭ tãŭtãma toguāxārŭ ngēmaxŭ cuxŭ nangŭchaŭ!”

ñanagŭrŭ. Natŭrŭ ngēma mugŭ rŭ guxŭma i togŭ i Tupanaārŭ mugŭmaã rŭ wŭxigu nanu nagu i norŭ ore i ñaxŭ:

“;Rŭ nüxŭ nangechaŭ i cumŭcŭ na cugŭtama cungechaŭxŭrŭrŭ!”

ñaxŭ. ¹⁰ Rŭ yŭxema tŭmamŭcŭxŭ ngechaŭxē, rŭ taxuŭma i chixexŭ namaã taxŭ. Rŭ ngēmacèx i ngēxguma tamŭcŭxŭ ingechaŭgu, rŭ aixcŭma tayanguxēē i Tupanaārŭ mugŭ. ¹¹ Rŭ name nixŭ i tanaxŭ i guxŭma i ngēma, erü ñomaŭcŭŭ rŭ nangēxma i muxŭma i guxchaxŭgŭ. Rŭ name nixŭ i pegŭ ĩpemexēē rŭ paxa penaxŭ i tŭrŭ Coriarŭ puracŭ. Erü ñŭxma rŭ noxri yaxŭgŭguarŭ yexera ningaicamachigŭ i ngēma ngunexŭ i nagu tá taxcèx nataeguxŭ ya tŭrŭ Cori. ¹² Rŭ woo na naporaxŭ i Chataná i ñoma i naānewa i ñŭxmax, natŭrŭ paxa tá nagux i ngēma, rŭ paxa tá ĩnangu ya Cristu na nügŭxŭtawata tŭxŭ nagagŭxŭcèx. Rŭ ngēmacèx name nixŭ i nüxŭ tarŭxoe i guxŭma i chixexŭ ixŭgŭxŭ. Rŭ ñŭxma na nüxŭ icuáxŭ i Tupanaārŭ ore, ;rŭ ngŭxã yigŭna tadaugŭ na tama nagu iyixŭcèx i tacŭ rŭ chixexŭgŭ! ;Rŭ ngŭxã meā tamaxē na ngēmaācŭ nüxŭ rŭyexeragŭxŭcèx i guxŭma i chixexŭ! ¹³ ;Rŭ ngŭxã mexŭ taxŭgŭ rŭ meā tamaxē! Erü aixcŭma Cristuarŭ duŭxŭgŭ tixŭgŭ, rŭ tanaxwèxe i nüma nanaxwèxexŭācŭma tamaxē. Rŭ tama name na ingāxèxŭ rŭ na naxŭgŭxŭ i petagŭ i chixexŭ i duŭxŭgŭ nawa āŭgatanŭxŭ. Rŭ tama name i tingēāēmare rŭ ēxna to i chixexŭ taxŭgŭ, rŭ bai na yigŭ ichoxŭgagŭxŭ, rŭ bai i togŭchi ixaiexŭ naxcèx i norŭ ngēmaxŭgŭ. ¹⁴ Natŭrŭ name nixŭ i nacŭmagu pexŭ ya tŭrŭ Cori ya Ngechuchu ya Cristu, rŭ nüxna naxcèx peca na pexŭ nangŭxŭēxŭcèx na meā naxcèx pemaxèxŭcèx. Rŭ tama name i naxcèx pedaugŭ na ñuxācŭ pexeneārŭ ngŭchaŭ na pexŭgŭxŭ.

14

Tama name i nüxŭ quixu i cueneē i yaxŭxŭ

¹ Rŭ ngēxguma petanŭgu naxāxchaŭgu i wŭxi i peeneē i tama perŭŭ meā Tupanaārŭ orexŭ cuáxŭ, rŭ name nixŭ i meā penayaxu. Natŭrŭ tama name i namaã pegŭ pechoxŭga naxcèx i nacŭmagŭ i nagu yaxŭxŭ i Tupanapēxewa.

² Rŭ dŭcax, nangēxma i ñuxre i taeneēgŭ i nagu rŭxŭnŭēxŭ na namexŭ na guxŭraŭxŭ i ōna nangŭxgŭxŭ. Natŭrŭ nangēxma i togŭ i taeneēgŭ i tama

aixcūma meā Tupanaārū orexū cuèxgūxū i tama namachi ngōxgūchaūxū. Rū nūmagū nūxū nacuèxgūgu rū Tupanapēxewa nachuxu na tacū rū namachi nangōxgūxū, rū ngēmacèx nixī i nabū rū orixgūxicatama nangōxgūxū. ³ Rū ngēxguma tangēxmagu ya texé ya namachi ngōxē, rū tama name i nūxū taxoox i ngēma togū i duūxūgū i tama namachi ngōxgūxū. Rū ngēxgumarū ta ya yixema tama namachi ngōxē, rū tama name na nūxū tixuxū i ngēma duūxūgū i namachi ngōxgūxū, erū nūmagū rū ta Tupanaārū duūxūgū nixīgū. ⁴ Rū texé quixī i cuma rū ngēmacèx nūxū quixu i to i coriarū duūxūgū? Rū dūcax, pemaā nūxū chixu rū ngēma norū cori tá nixī i nangugūxū rū ngoxi mexū naxūx i ngēma norū duūxū, rū ēxna tama. Rū ngēma duūxū rū Tupanapēxewa rū tá name, erū nūma ya tórū Cori ya Cristu rū nūxū nangēxma i pora na nūgūcèx namexēāxū i ngēma duūxū. ⁵ Rū dūcax, nangēxma i ñuxre i duūxūgū i nagu rūxīnūēxū na ngūxchigaarū ngunexū rū togū i ngunexūārū yexera namexū na nagu Tupanaxū yacuèxūgūxū. Rū nangēxma i togū i duūxūgū i nagu rūxīnūēxū na guxūma i ngunexūgū rū nawūxīgūxū i Tupanapēxewa. Natūrū wūxichigū i yixema rū tanaxwēxe i meā taāēwa nūxū tacuèx na aixcūma Tupanapēxewa namexū i ngēma taxūxū rū tixōxū. ⁶ Rū yixema duūxē ya tacū rū ngunexū Tupanacèx íxūxūchixe, rū ngēmaācū tanaxū na ngēma ngunexūgu tórū Corixū ticuèxūūxūcèx. Rū yixema namachi ngōxē, rū ngēmaācū tanangōx na tórū Corixū ticuèxūūxūcèx, rū Tupanana moxē taxā naxcèx i ngēma tangōxū. Rū yixema tama namachi ngōxē, rū ngēmaācū tanaxū na tórū Corixū ticuèxūūxūcèx, rū tūma rū ta Tupanana moxē taxā naxcèx i ngēma nabū i tangōxū. ⁷ Rū ñuxma na ñoma i naānewa imaxēxū, rū taxūema tūgūcèxtama tamaxū rū ēxna tūgūcèxtama tayu. ⁸ Erū ñuxma na imaxēxū, rū tórū Coriarū ngūchaū na ixūgūxūcèx nixī i imaxēxū. Rū ngēxguma iyuegu, rū ngēma rū ta tórū Corimēxēwa nangēxma. Rū ngēmaācū nūxū tadau rū woo imaxēgu rū ēxna woo iyuegu, rū tórū Coriarū duūxūgū tixīgū, rū namēxwa tangēxmagū. ⁹ Rū yemacèx nixī ga nayuxū ga Cristu rū wenaxārū namaxūxū na tūmaārū Cori yīxūcèx ga guxāma ga guxema yaxōgūxe ga marū yuexe rū guxāma ya yixema yaxōgūxe ya ñuxma rū ta maxēxē. ¹⁰ Rū ngēmacèx Pa Chaueneēx, ¿rū tūxcūū i nūxū quixuxū i cueneē i yaxōxū? Rū cumax, Pa To i Chaueneēx, ¿rū tūxcūū i nūxū cuxoxū i cueneē? Erū guxātāma i yixema rū Tupanapēxewa tá tangugū na nūma tūxū nangugūxūcèx rū ngoxi ime rū ēxna tama. ¹¹ Erū Tupanaārū ore i ūmatūxūwa rū ñanagūrū ya tórū Cori:

“Ngēma aixcūma na chamaxūxūrū tá ta nixī i aixcūma guxūtāma i duūxūgū chopēxegu caxāpūxūgūxū, rū guxūtāma choxū icuèxūūgūxū”, ñanagūrū. ¹² Rū ngēmaācū nūxū tacuèx na wūxichigū i yixema rū aixcūma tá Tupanapēxewa na ingugūxū na namaā nūxū ixuxūcèx na ñuxācū imaxēxū rū tacū na íxūxū.

Tama name i chixexūgu cunanguxēē i cueneē i yaxōxū

¹³ Rū ngēmacèx nixī, Pa Chaueneēgūx, i tama namexū na tamūcūgūxū ixuechaū. Natūrū narūmemaē nixī i nūxū perūxoe i guxūma i tacū i peeneēgūxū pecadugu yixēēxū rū ēxna norū ōxū chixexēēxū. ¹⁴ Choma nūxū chacuèx rū nataxuma i ōna i Tupanapēxewa chixexū. Rū aixcūmaxūchi nūxū chacuèx i ngēma erū tórū Cori ya Ngechuchu ya Cristuarū duūxū chixī, rū nūma choxū nūxū nacuèxēē i ngēma. Natūrū ngēxguma chi texé nagu rūxīnūgu na tama Tupanapēxewa namexū i tacū rū ōna na tangōxū, rū name nixī i noxtacūma tama na tanangōxū ega nagu tarūxīnūgu na tama namexū i ngēma. ¹⁵ Rū ngēxguma ngēma cungōxūcèx tūmaāēwa cunanguxēēgu ya cueneē, rū cumaā nūxū chixu rū tama aixcūma tūxū cungechaū. Rū tama name i ngēma cungōxūgagu chixexūgu tūxū cunguxēē rū tūxū icuyarūtauxēē ya yixema

cueneē ya Cristu tūmacèx yuxe. ¹⁶ Rū ngēmacèx, woo cuxcèx namexgu i ngēma cuxūxū, natürü tama name na cunaxüamaxū ega ngēmacèx togū tá cuxū ixuxgu na pecadu yīxū i ngēma cuxūxū. ¹⁷ Rū ngēma Tupanapēxewa na imexūcèx rü tama tacü rü òna na ingōxū rü ēxna tacü rü axexū na ixaxūūgagu nixī. Natürü napēxewa na imexūcèx rü tanaxwèxe i Naāē i Üünexūārü ngūxēēmaā meā tayanguxēē i ngēma Tupana naxwèxexū rü yigūmaā itarüngüxmūē rü aixcūma tataāēgū napēxewa ya Tupana. ¹⁸ Rū yīxema ngēmaācū Cristucèx maxūxē, rü Tupana rü tūmamaā nataāē, rü guxūma i duūxūgū rü ta tūmamaā nataāēgū. ¹⁹ Rū ngēmacèx, jngīxā naxcèx tadaugū i guxūma i nacūma i mexū i yigūmaā tūxū rüngüxmūēxēxū! ;Rū ngīxā yigū tarüngūxēē na yexeraācū iyaexūcèx i tórü òwa rü Tupanaārü orewa! ²⁰ Rū tama name i tacü rü òna na cungōxūgagu icuyanax-oxēē i Tupanaārü puracü i cueneēārü maxūwa. Rū aixcūma nixī i guxūma i ònagū i namexū i Tupanapēxewa. Natürü wūxi i chixexū nixī ega ngēma òna i ingōxūgagu chixexūgu nayixēēgu i taeneēgū. ²¹ Rū ngēmacèx tama name i cunangōx i namachi, rü ēxna cuyaxaxū ya binu, rü ēxna cunaxū i tacü i to, ega ngēmagagu chixexūgu cunanguxēēgu i cueneē i yaxōxū. ²² Rū ngēxguma cuma nagu curūxīnūgu na namexū na cunangōxū i ngēxūrūxūmare i òna, rü Tupanapēxewa rü name nixī i cuxicatama nūxū cucuèx i ngēma. Rū tataāē ya yīxema tūmaāēwa nūxū cuáxe na Tupanapēxewa namexū i ngēma taxūxū. ²³ Natürü ngēxguma wūxie nagu rūxīnūgu na tama namexū i Tupanapēxewa na tacü rü òna na tangōxū, rü pemaā nūxū chixu rü chixexū taxū ega tanangōxomagu, erü tūmaāēwa nagu tarūxīnū na tama aixcūma namexū i ngēma taxūxū. Rū guxūma i ngēma tūmaāēwa nagu tarūxīnūxū na nachixexū rü aixcūma pecadu taxū ega tanaxūamagu.

15

Name nixī i cumūcūxū cutaāxēxēē

¹ Rū yīxema na iporaexū i tórü òwa, rü name nixī i nūxū tarüngūxēē i ngēma tamūcūgū i turaexū i norü òwa. Rū tama name i yigūguxicatama tarūxīnūē rü tóxrūcèxicatama tadaugū. ² Natürü wūxichigū i yīxema rü name nixī i taeneēāxū tanangūchaūxēē na ngēmaācū nūxū rüngūxēēxūcèx na yexeraācū yaxōōxūcèx. ³ Yerü woo ga Cristu rü tama noxrütama ngūchaū naxū. Natürü nayanguxēē ga yema Tupanaārü ore ga ñaxū:

“Pa Chaunatūx, rü ngēma duūxūgū i cumaā guxchigagūxū, rü chomaā nixī i naguxchigagūxū”,

ñaxū. ⁴ Rū guxūma ga yema nuxcūma ümatūxū ga Tupanaārü orewa, rü naxūmatü na tūxū nanguxēēxūcèx na taguma nūxū rüxoexū ega woo tacü rü guxchaxū tūxū üpetūgu. Rū yema Tupanaārü ore rü naxūmatü na tūxū nataāēxēēxūcèx rü tūxū nūxū nacuèxēēxūcèx na aixcūma Tupanaārü ixīgūxū. ⁵ Rū Tupana nixī ya tūxū rüngūxēēcū na yaxna namaā ixīnūēxūcèx i guxūma i guxchaxūgū. Rū nūma nixī i tūxū nataāēxēēxū. Rū chanaxwæe i nūma ya Tupana pexū narüngūxēē na aixcūma ngēma Cristu pexū naxwæexūācūma pemaxēxū. ⁶ Rū chanaxwèxe na ngēmaācū pemaxēxū na guxāma i pema rü wūxigu nūxū picuèxūūgūxūcèx ya Tupana ya Nanatü ya tórü Cori ya Ngechuchu ya Cristu.

Duūxūgū i tama Yudūgū ixīgūxūmaā nūxū nixu i ore i mexū

⁷ Rū ngēmacèx, yema Cristu pexū na dexūrūū rü name nixī i wūxichigū meā pegū peyaxu na ngēmaācū Tupanaxū yacuèxūūgūxūcèx i duūxūgū. ⁸ Rū pemaā nūxū chixu rü Cristu nūma naxū na Yudūgūxū yanangūxēēxūcèx, na yemaācū yanguxēēāxūcèx ga yema uneta ga nuxcūmaūgūxū ga tórü

oxigümaã nüxŭ yaxuxŭ ga Tupana. Rŭ yemaãcü ga Cristu rŭ tüxŭ nüxŭ nadauxëë na aixcŭmacü na yïxŭ ya Tupana rŭ aixcŭma yanguxëëãxŭ i ngëma norŭ uneta. ⁹ Rŭ yexgumarŭŭ ta ga Cristu rŭ núma naxŭ naxcèx i ngëma duŭxŭgŭ i tama Yudíugŭ ixíngŭxŭ na nŭmagŭ rŭ ta Tupanaxŭ yacuèxŭŭgŭxŭcèx naxcèx na poraãcü Tupanaãxŭ nangechaŭtŭmŭŭgŭxŭ. Rŭ yemachiga nixí ga yema Tupanaãrŭ ore ga Dabí ũmatŭxŭ ga ñaxŭ:

“Rŭ ngëmacèx guxŭ i nachiŭãnecŭãx i duŭxŭgŭpèxewa tá cuxŭ chicuèxŭŭ. Rŭ tá chorŭ wiyaewa cuxŭ chataxëë”,

ñaxŭ. ¹⁰ Rŭ toxnamana i Tupanaãrŭ ore i ũmatŭxŭwa rŭ ñanagŭrŭ:

“Pa Duŭxŭgŭ i Tama Yudíugŭ Ixíngŭxŭ, rŭ name nixí i pema rŭ wŭxigu chorŭ duŭxŭgŭ i Yudíugŭmaã petaãgŭ”,

ñanagŭrŭ. ¹¹ Rŭ toxnamana, rŭ ñanagŭrŭ ta:

“Pa Duŭxŭgŭ i Tama Yudíugŭ Ixíngŭxŭ, rŭ name nixí i nüxŭ picuèxŭŭgŭ ya tŕrŭ Cori. Rŭ Pa Guxŭma i Nachiŭãnecŭãx i Duŭxŭgŭx, rŭ name nixí i penataxëë”,

ñanagŭrŭ. ¹² Rŭ Ichaxía rŭ ta nanaxŭmatŭ rŭ ñanagŭrŭ:

“Rŭ Dabí nanatŭ ya Ichaiwa tá ne naxŭ i wŭxi i nataa i tá Cristu ixíxŭ. Rŭ nŭma tá nixí i norŭ ãëxgacŭ yïxŭ i guxŭma i ngëma duŭxŭgŭ i tama Yudíugŭ ixíngŭxŭ. Rŭ ngëma duŭxŭgŭ rŭ tá aixcŭma nüxŭ nayaxŭgŭ rŭ tá ínananguxëëgŭ na yimagagu Tupana nüxŭ rŭngŭxëëgŭxŭ”,

ñanagŭrŭ. ¹³ Rŭ ñuxma i pema na nüxŭ peyaxŭgŭxŭ rŭ chanaxwèxe i poraãcü pexŭ nataãëxëë ya yima Tupana ya pexŭ rŭngŭxëëcü na meã Cristuxŭ ípenanguxëëgŭxŭcèx. Rŭ ngëmaãcü i Tupanaãë i Ũnèxŭ rŭ tá pexŭ naporaexëë na yexeraãcü Cristuxŭ ípenanguxëëgŭxŭcèx. ¹⁴ Pa Chaueneëgŭx, meãma nüxŭ chacuèx na guxŭ i duŭxŭgŭmaã pemecŭmaxŭ, rŭ aixcŭma Tupanaxŭ na pecuáxŭ, rŭ aixcŭma meãma pegŭ pixucuxëgŭxŭ. ¹⁵ Natŭrŭ ñaã poperawa rŭ meãma pexcèx chanaxŭmatŭ i ñuxre i Tupanaãrŭ ucuxëgŭ, erŭ tama chanaxwèxe i nüxŭ ipeyarŭngŭmaë. Rŭ tama chamuŭ na pexcèx chanaxŭmatŭxŭ i ngëmachiga yerŭ Tupana nixí ga choxŭ mucŭ na pemaã nüxŭ chixuxŭcèx. ¹⁶ Rŭ nŭma nixí ga choxŭ namuxŭ na Ngechuchu ya Cristuarŭ puracŭ chaxŭxŭcèx i natanŭwa i ngëma duŭxŭgŭ i tama Yudíugŭ ixíngŭxŭ. Rŭ ngëma puracŭ ga nawa choxŭ namuxŭ nixí na ngëma duŭxŭgŭmaã nüxŭ chixuxŭ i ore i mexŭ na Tupanaxŭtawa chanagagŭxŭcèx, na wŭxi i ãmare i Tupana namaã taãëxŭ i ngëma duŭxŭgŭ i Naãë i Ũnèxŭ imexëëgŭxŭ.

¹⁷ Rŭ ñuxma na Ngechuchu ya Cristuarŭ duŭxŭ na chíxŭ, rŭ ngëmacèx chataãë namaã i ngëma puracŭ i Tupanaãxŭ chaxŭxŭ. ¹⁸⁻¹⁹ Rŭ ñuxma rŭ yema Cristu chorŭ maxŭwa ũxŭchigaxŭxŭcatama nixí i chixuxŭ. Rŭ nŭma nixí ga choxŭ nangŭxëëxŭ na Tupanaxŭtawa chanagagŭxŭcèx ga yema duŭxŭgŭ i tama Yudíugŭ ixíngŭxŭ, na nŭmagŭ rŭ ta Tupanaga naxíñüëxŭcèx. Rŭ yemaãcü chorŭ oremaã, rŭ chorŭ puracŭmaã, rŭ cuèxruŭgŭ ga taxŭ ga Tupana ũxŭmaã, rŭ Naãë i Ũnèxŭãrŭ poramaã Tupanaxŭtawa chanagagŭ ga yema duŭxŭgŭ. Rŭ yemaãcü Yerucharéŭwa rŭ guxŭwama ñuxmata Ílírícuarŭ naãnewa meãma chayanguxëë na nüxŭ chixuxŭ ga yema ore i tüxŭ maxëëëxŭ i Cristuchiga. ²⁰ Rŭ yemaãcü chapuracŭ na nüxŭ chixuxŭcèx ga Tupanaãrŭ ore i mexŭ ga ngextá taguma ñuxgu Cristuchigaxŭ ínaxíñüëxŭwa ga duŭxŭgŭ. Yerŭ tama chanaxwèxe ga marŭ togŭ nüxŭ íxuxŭwa rŭ duŭxŭgŭ marŭ nüxŭ ícuáxŭwa nüxŭ na chixuxŭ ga yema ore. ²¹ Rŭ yemachiga nixí ga Tupanaãrŭ ore ga Ichaxía ũmatŭxŭ ga ñaxŭ:

“Rŭ yíxema taguma Cristuchigaxŭ cuèxgŭxe, rŭ taguma nachigaxŭ ñnüëxë, rŭ tá nüxŭ tacuèxgŭ i nachiga”,

ñaxŭ.

Pauru rü Dumawa naxūxchaŭ

²² Rü yema toxnamana na chapuracūxūcèx nixī ga taxucürüwa petanüwa chaxūxŭ woo muēxpūxcünachirēx yéma chaxūxchaŭ. ²³ Natürü ñuxma na marü chanaguxēēxŭ i ngēma puracü i toxnamana, rü nagu charūxīnū na petanüwa chaxūxŭ. Yerü ñuxgumamatama nixī ga nagu charūxīnūēchaxŭ na petanüwa chaxūxchaŭxŭ. ²⁴ Rü ngēxguma Españawa chaxūxgu, rü nagu charūxīnū na woe pexūtagu íchidauxŭ. Rü nagu charūxīnū na ñuxre i ngunexŭ ngēxma petanügu charūxāŭxŭ. Rü wūxi i chorü taēē tá nixī i ngēma. Rü ngēmawena rü chanaxwèxe i choxŭ perüngŭxēē na Españawa chaxūxūcèx. ²⁵ Natürü i ñuxma rü Yerucharéŭwa tá chaxŭ, na ngēma chanangexūcèx i ñuxre i dīeru naxcèx i taeneēgü i ngēma ngēxmagūxŭ. ²⁶ Erü ngēma taeneēgü i yaxōgūxŭ i Machedóniāānewa rü Acayaanewa ngēxmagūxŭ, rü norü ngúchaŭmaā nagu narūxīnūē na ngīxŭ nanutaquēxegūxŭ i ñuxre i dīeru na ngēmaācū nūxŭ nangūxēēgūxūcèx i taeneēgü i nūxŭ nataxuxŭ i Yerucharéŭwa ngēxmagūxŭ. ²⁷ Rü ngēma taeneēgü i Machedóniācŭāx rü Acayacŭāx rü norü me nixī na ngēmaācū naxūgūāxŭ. Rü ngēma duŭxūgü rü aixcūma nūxŭ nangēxma i norü ngetanü i taeneēgü i Yudíugütanüwa. Erü ngēma taeneēgü i Yudíugūgagu nixī i ngēma togü i duŭxūgütanüwa nanguxŭ i Tupanaārü ore. Rü ñuxma rü name nixī i ngēma togü i duŭxūgü rü norü ngēmaxūmaā taeneēgü i Yudíugü i yaxōgūxŭxŭ narüngŭxēēgü. ²⁸ Rü ngēxguma chanaguxēēgu i ngēma puracü, rü ngēxguma taeneēgü i Yudíugūna marü ngīxŭ chaxāxgu i ngēma dīeru, rü Españawa tá chaxŭ. Rü ngēxguma ngēma chaxūxgu, rü tá woe pexūtagu íchidau. ²⁹ Rü nūxŭ chacuèx rü ngēxguma petanüwa changuxgu, rü wūxigu tá tataāēgü, erü nūma ya Cristu tá tūxŭ nataāēxēē i ngēxguma ngēmaācū wūxiwa ingēxmagūgu. ³⁰ Pa Chaueneēgūx, tórü Cori ya Ngechuchu ya Cristuégagu, rü ngēma na Naāēārü ngūxēēmaā choxŭ pengechaŭxūgagu pexŭ chacèxŭ na Tupanana chauxcèx peçaxŭ i perü yumūxēwa. Rü ngēmaācū tá choxŭ perüngŭxēē nawa i ñāā puracü i Tupana choxna āxŭ. ³¹ ;Rü Tupanana peça na choxŭ ínapoxŭxūcèx nūxna i ngēma Yudíugü i Yudéaanewa ngēxmagūxŭ i tama yaxōgūxŭ! ;Rü nūxna peça naxcèx i ngēma taeneēgü i yaxōgūxŭ i Yerucharéŭwa ngēxmagūxŭ, na taāēācūma nayauxgūāxūcèx i ngēma dīeru i ngēma naxcèx changexŭ! ³² Rü ngēmaācū ngēxguma Tupana naxwèxegu, rü taāēācūma petanüwa tá changu, na wūxigu pemaā chataāēxūcèx. ³³ Rü chanaxwèxe na pemaā inaxāŭxŭ ya Tupana ya tūxŭ taāēxēēcū. Rü ngēmaācū yī.

16*Pauru rü nūxŭ narūmoxē ga yema duŭxūgü ga yaxōgūxŭ ga Dumawa yexmagūxŭ*

¹ Rü ñuxma na petanüwa naxūxchaŭxŭ i taeyèx i Febe, rü pemaā ngīxŭ chixu rü wūxi i taeyèx i mecü iyixī. Erü ngīma rü nūxŭ irüngŭxēē i ngēma yaxōgūxŭ i Chēcréaarü íānewa ngēxmagūxŭ. ² Rü chanaxwèxe i meā ngīxŭ peyaxu, naegagu ya tórü Cori ya Ngechuchu, erü ngēma nixī i mexŭ na penaxūxŭ namaā i guxūma i yaxōgūxŭ. Rü chanaxwèxe i guxūma i tacü i ngīxŭ taxuxŭwa rü ngīxŭ perüngŭxēē, erü ngīma rü poraācū togūxŭ irüngŭxēē, rü choxŭ rü ta irüngŭxēē. ³ ;Rü nūxŭ perūmoxēgü i Prisila rü Aquiru! Rü nūmagü rü chomūcūgü nixīgü i Ngechuchu ya Cristuarü puracūwa. ⁴ Rü nūmagü rü āūcūmaxŭwa nichocu na chauétüwa nachogūexūcèx, na tama chayuxūcèx ga chomax. Rü ngēmacèx moxē nūxna chaxā. Rü tama chaxicatama moxē naxcèx nūxna chaxā, natürü moxē nūxna naxāgü ta i guxūma i taeneēgü i yaxōgūxŭ i tama Yudíugü ixīgūxŭ. ⁵ ;Rü nūxŭ perūmoxēgü ta i guxūma

i taeneēgū i Aquirupatawa ngutaquēxegūxū! ;Rū ngēxgumarūū ta nūxū perūmoxēgū ya chomūcū ya nūxū changechaūcū ya Epenētu! Rū nūma nixī ga nūxīra Cristuaxū yaxōōxū ga Áchiaanewa. ⁶ ;Rū ngīxū perūmoxēgū i María ga poraācū petanūwa Tupanaāxū puracūcū! ⁷ ;Rū nūxū perūmoxēgū i chautanūxūgū i Aūdrūnicu rū Yūniā ga wūxigu chomaā poxcuexū! Rū nūmagū nixī i yatūgū i aixcūma Tupana imugūxū i guxūma i yaxōgūxū nūxū ngechaūgūxū. Rū nūmagū rū nūxīra chauxūpa Cristuaxū nayaxōgū. ⁸ ;Rū nūxū perūmoxēgū ya Aūpriātu ya chomūcū ya nūxū changechaūcū ya chauxrūū tórū Coriaxū yaxōcū! ⁹ ;Rū nūxū perūmoxēgū ya Urubānu ya tomūcū ixīcū i Cristuarū puracūwa! ;Rū ngēxgumarūū ta nūxū perūmoxēgū ya Estaqui ya nūxū changechaūcū! ¹⁰ ;Rū nūxū perūmoxēgū ya Apere ya aixcūma tūxū nūxū dauxēēcū na ñuxācū Cristuaxū yaxōōxū! ;Rū ngēxgumarūū ta nūxū perūmoxēgū i Aritúburutanūxūgū! ¹¹ ;Rū nūxū perūmoxēgū i chautanūxū i Erudiū! ;Rū ngēxgumarūū ta nūxū perūmoxēgū i Narsíchutanūxū i tórū Coriaxū yaxōgūxū! ¹² ;Rū ngīxū perūmoxēgū i Trifena rū Trifocha! Rū ngīmagū rū tórū Coriaxū ipuracū. ;Rū ngēxgumarūū ta ngīxū perūmoxēgū i taeyèx i Péchida i ngīxū ingechaūgūcū! Rū ngīma rū marū poraācū tórū Coriaxū ipuracū. ¹³ ;Rū nūxū perūmoxēgū ya Rufu ya aixcūma meā tórū Coriaxū yaxōcū! ;Rū ngēxgumarūū ta ngīxū perūmoxēgū i naē ga chauerūū chomaā ixīcū! ¹⁴ ;Rū nūxū perūmoxēgū i Achícritu, rū Peregúte, rū Erme, rū Patroba, rū Erma, rū guxūma i togū i taeneēgū i natanūwa ngēxmagūxū! ¹⁵ ;Rū nūxū perūmoxēgū ta i Firórugu, rū Yúria, rū Neréu, rū naēyèx, rū Oripa, rū guxūma i togū i taeneēgū i yaxōgūxū i natanūwa ngēxmagūxū! ¹⁶ Rū chanaxwèxe i pegū pengechaūgūācūma pegū perūmoxēgū i wūxichigū. Rū guxūma i ngēma yaxōgūxū i toxnamana ngēxmagūxū, rū pexū narūmoxēgū. ¹⁷ Pa Chaueneēgūx, pexū chacèxū na pegūna pedaugūxūcèx nūxna i ngēma duūxūgū i pexū itoyechaūxū rū chixexūgu pexū yixēēgūchaūxū. Erū ngēma duūxūgūarū nguxēētae rū tama namaā nawūxigu i ngēma nguxēētae ga noxri peyaxgūxū ga yexguma noxri peyaxōgūgu. Rū name nixī i noxtacūma nūxna pixīgachi i ngēma duūxūgū rū tama natanūgu pexāgū. ¹⁸ Erū ngēma duūxūgū rū tama tórū Cori ya Ngechuchu ya Cristuarū ngúchaū naxūgū, natūrū noxrūtama ngúchaū nixī i naxūgūxū. Rū ore i tauxchaxūgūmaā nayaxucuxēgū i duūxūgū, rū ngēmaācū nanawomūxēēgū i ngēma duūxūgū i tama meā nūxū cuèxgūxū. ¹⁹ Rū guxūma i duūxūgū nūxū nacuèxgū na aixcūma meā Tupanaga pexīnūēxū i pemax. Rū ngēmacèx pemaā chataāe i chomax. Rū chanaxwèxe na meā nūxū pecuáxū i tacū nixī i mexū i Tupanapēxewa na penaxūxūcèx i ngēma. Natūrū ngēma Tupanapēxewa chixexū, rū ;nūxna pixīgachi na tama nagu peyixūcèx! ²⁰ Rū ngēxguma ngēmaācū meā pemaxēgu rū nūma ya Tanatū ya Tupana ya tūxū taāxēēcū rū tá pexū naporaxēē na aixcūma nūxū perūyexeraxūcèx i Chataná. Rū chanaxwèxe i tórū Cori ya Ngechuchu ya Cristu pemaā inarūxāūx rū pexū narūngūxēē. ²¹ Rū pexū narūmoxē ya Timutéu ya chomūcū ixīcū i Tupanaārū puracūwa. Rū ngēxgumarūū ta pexū narūmoxēgū i chautanūxūgū i Dúchiu, rū Yachóū rū Sochípatru. ²² Rū choma i Téchiu na chanaxūmatūxū i ñaā popera, rū choma rū ta pexū charūmoxē naegagu ya tórū Cori. ²³ Rū pexū narūmoxē ta ya Gayu ya napatawa changēxmacū. Rū nūma rū inanaxā ya daa napata na nawa nangutaquēxegūxūcèx i guxūma i yaxōgūxū. Rū ngēxgumarūū ta pexū narūmoxēgū i Eratu i daa ñāneārū dīēruarū dauruū ixīxū, rū taeneē i Cuarto. ²⁴ Rū chanaxwèxe i tórū Cori ya Ngechuchu ya Cristu pexū narūngūxēē i guxūma i pemax. Rū ngēmaācū yī.

Pauru rü Tupanaxü yacuèxüüãcüma nanaguxêê i norü popera

²⁵⁻²⁶ ¡Rü ñuxmax, rü ngĩxã nüxü ticuèxüüğü ya Tanatü ya Tupana! Rü nüma nüxü nangẽxma i pora na pexü naporaexêêxücèx na meã peyaxõgüamaxücèx i ngẽma norü ore i tüxü maxẽxêêxü tamaã nüxü ixuxürüü. Rü ngẽma nixĩ i ore i guxüwama nüxü chixuxü rü namaã changúexêêtaexü i Ngechuchu ya Cristuchiga. Rü ngẽmatama ore i Cristuchiga rü taxchaxwa naxêxügu ga noxrix, natürü i ñuxma ya Tupana rü marü tüxü nüxü nacuèxêê i ngẽma. Rü nuxcüma tauta naãne üxgu rü Tupanaxĩcatama nüxü nacuèx ga yema, natürü i ñuxma rü norü orearü uruüğü ümatüxü ga orewa taxcèx nanangoxêê. Rü ngẽma ore rü namaã nawüxigu ga yema ore ga nuxcüma nüxü yaxuxü ga Tupana ya guxüguma maxêchacü. Rü ñuxma ya Tupana rü guxüwama nana-mugü i norü orearü uruüğü na guxü i duüxügümaã nüxü na yaxugüexücèx i ngẽma ore i Cristuchiga na nüxü yaxõgüãxücèx rü naga na naxĩnüèxücèx.

²⁷ Rü nüma ya Tupana rü nüxĩcatama nixĩ i Tupana yĩxü, rü nüxĩcatama nixĩ i guxüxü nacuáxü. ¡Rü ñuxmax, rü ngĩxã guxüguma nüxü ticuèxüüğü, erü Nane ya Ngechuchu ya Cristu rü poraãcü tüxü narüngüxêê! Rü ngẽmaãcü yĩ.

Rü nuãma pexna,
Pauru

NÜXĪRAÜXÜ GA POPERA GA CORÍTIUCŪĀX GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Corītiuarü iānewa yexmagüxü

¹⁻² Pa Chaueneēgü i Corītiucūāxgüx, choma i Pauru nixī i Tupana yaxuxü norü ngüchaxümaā na Ngechuchu ya Cristu norü puracüwa choxü namuxücèx. Rü choma rü namaā i taeneē i Chótene nixī i pexü tarümōxēgüxü rü pexcèx tanaxümatüxü i ñaā popera. Pa Chaueneēgü ya Tupanaārü Ixīgüxex, pema rü marü Tupanapēxewa pixüüne yerü Ngechuchu ya Cristu marü pexü nixüünexēē. Rü Tupana rü marü pexü nade na norü duüxügü pixīgüxücèx wüxigu namaā i guxüma i ngēma duüxügü i guxüwama tórü Cori ya Ngechuchu ya Cristuxü icuèxüügüxü. Rü nüma ya Ngechuchu ya tórü Cori ixīcü, rü ngēma duüxügüarü Cori ta nixī. ³ Rü chanaxwēxe ya Tanatü ya Tupana rü tórü Cori ya Ngechuchu ya Cristu norü ngechaxügagu poraäcü pexü narüngüxēē rü pexü nataāēxēē.

Tupana tüxü narüngüxēē erü Cristuarü duüxügü tixīgü

⁴ Rü taguma nüxü charüchau na Tupanana moxē pexcèx chaxāxü. Rü moxē nüxna chaxā naxcèx i ngema ngüxēē i Ngechuchu ya Cristugagu Tupana pexna āmarexü. ⁵ Yerü Cristugagu Tupana pexna nanamu ga Naāxē i Üünexü na pemaxā inaxāüxücèx. Rü pexna nanaxā ga norü ore, rü naétü pexü nanatauxchaxēē na nüxü pecuáxücèx na ñuxü ñaxüchiga yixīxü. ⁶ Rü yemaäcü yexguma nüxü pexīnūēgu ga yema ore ga Cristuchiga rü aixcüma peyaxōgü. ⁷ Rü ngēmacèx i ñuxma na ípenanguxēēxü na wena táxarü núma naxüxü ya tórü Cori ya Ngechuchu ya Cristu, rü Tupana pexna nanaxā i taxü i cuèx na taxuüma pexü taxuxücèx na naxcèx pemaxēxü. ⁸ Rü ngēmaäcü tá pexna nadau ya Tupana ñuxmatáta nagú i naāne, rü guxügutáma pexü naporaexēē na aixcüma peyaxōgüamaxücèx rü naxcèx pemaxēxücèx, na taxúema chixexümaā pexü ixugüxücèx i ngēxguma wenaxārü núma naxüxgu ya tórü Cori ya Ngechuchu ya Cristu. ⁹ Rü Tupana rü guxüguma nayanguxēē i norü uneta. Rü nüma nixī ga pexü nadexü na aixcüma Nane ya tórü Cori ya Ngechuchu ya Cristumücügü pixīgüxücèx.

Nügü nitoye ga yema yaxōgüxü

¹⁰ Pa Chaueneēgüx, tórü Cori ya Ngechuchu ya Cristuégagu pexü chacèèxü na wüxigu pegümaā perüxīnūēxü rü tama pegü pitoyexücèx. Rü name nixī i aixcüma pegü pengechaügü rü aixcüma wüxigutama perüxīnūē i peāēwa. ¹¹ Pa Chaueneēgüx, pemaā nüxü chixu i ngēma ore, yerü Croétanüxütanüwa nüxü chacuáchiga ga pegümaā na penuēxü, rü tama aixcüma wüxigu na perüxīnūēxü. ¹² Rü pemaā nüxü chixu i ngēma erü ñuxre i pema rü ñaperügügü:

“Choma rü Pauruwe charüxü”, ñaperügügü. Rü togue rü:

“Choma rü Aporuwe charüxü”, ñaperügügü. Rü togue rü:

“Choma rü Pedruwe charüxü”, ñaperügügü. Rü togue rü:

“Choma rü Cristuwe charüxü”, ñaperügügü. ¹³ ¿Rü ñuxäcü nixī i ngēma?

¿Pexcèx rü Cristu rü marü niyauxye? ¿Éxna pema nüxü pecuèxgu rü choma i Pauru chiixü ga curuchawa pexcèx chipotaxü rü chayuxü? ¿Rü éxna pema nüxü pecuèxgu rü chauégagu yixü ga ípebaiüxü? ¹⁴ Rü Tupanana moxē chaxā, yerü taxúema pexü íchabaiüxēē ga pemax. Rü Crispu rü Gayuxicatama nixī

ga íchabaiũxēẽxũ. ¹⁵ Rũ ngēmacèx taxucürüwa texé tũgũ tixu na chauégagu ítabaiexũ. ¹⁶ Rũ yemáãcü aixcüma íchanabaiũxēẽ ga Estéfanatanũxũgũ ta, natürü chauxcèx rũ taxúema ga togue tũxũ íchabaiũxēẽ. ¹⁷ Yerü nüma ga Cristu rũ tama choxũ namu ga duũxũgũxũ na íchabaiũxēẽxũcèx, natürü choxũ namu na duũxũgũmaã nüxũ chixuxũcèx i norü ore i mexũ i tũxũ maxèxēẽxũ. Rũ nanaxwèxe i tauxchaxũ i oremaã nüxũ chixu i ngēma ore. Erü ngēxguma chi ñoma nüxũ cuèxũchixürüũ nüxũ chixuxgu i ngēma ore, rũ ngürüãchi i duũxũgũ rũ tá chauguama narũxĩnũẽ rũ tá nüxũ inayarũngũmaẽ na Cristu yĩxũ ga tũxũ maxèxēẽcü ga yexguma curuchagu nayuxgux.

Cristuwa nixĩ ga Tupana inawéxũ ga norü pora rũ norü cuèx

¹⁸ Rũ ngēma ore na ñuxãcü tórü pecaducèx curuchagu nayuxũ ga Cristu, rũ wüxi i natücèxmamare nixĩ naxcèx i ngēma duũxũgũ i poxcuwa íxũ. Natürü yixema na Tupana tũxũ maxèxēẽxũ, rũ nüxũ tacuèx na ngēma ore rũ Tupanaãrũ pora yĩxũ. ¹⁹ Erü norü ore i úmatũxũwa rũ ñanagürü ga Tupana: “Rũ tá ichayanaxoxēẽ i guxũma i norü cuèx i ngēma duũxũgũ i nüxũ cuèxũchigũxũ. Rũ tá nüxũ chaxo i ngēma duũxũgũarü cuèx”, ñanagürü. ²⁰ Rũ ñuxmax, Pa Chaueneẽgũx, ¿Tupanapèxewa rũ tacüwa namexũ i ngēma duũxũgũ i poraãcü nüxũ cuèxũchixũ? ¿Rũ tacüwa namexũ i ngēma duũxũgũ i Moíché úmatũxũ i mugüwa nguxēẽtaegũxũ? ¿Rũ tacüwa namexũ i ngēma duũxũgũ i meã nüxũ cuèxgũxũ i ñoma i naãneãrũ cuáchigagu na yadexagũxũ? Erü guxũma i ngēma cuèx i duũxũgũ nagu rũxĩnũẽxũ rũ Tupanacèx rũ taxuwama name. ²¹ Natürü nüma ya Tupana ya guxũxũma cuácü, rũ tama nanaxwèxe na ñoma i naãnecüãx i duũxũgũarü cuágagu na yĩxũ i naxũtawa nangugũxũ i nümagü. Natürü nanaxwèxe na ngēma norü ore i mexũgagu na yĩxũ i namaxèxēẽãxũ i ngēma duũxũgũ i yaxõgũxũ woo togücèx rũ natücèxmamare yixĩgu i ngēma ore. ²² Ngēma Yudíugũ rũ nüxũ nadaugũchaũ i cuèxruũgũ i Tupanaãrũ poramaã üxũ. Rũ ngēma Griégugũ rũ naxcèx nadaugũ i ñoma i naãneãrũ cuèx. ²³ Natürü ngēma ore i toma nüxũ tixuxũ, rũ Cristu ga curuchawa ipotacũchiga nixĩ. Rũ ngēma ore rũ naãẽwa nangux i ngēma Yudíugũ. Rũ ngēma duũxũgũ i tama Yudíugũ ixĩgũxũcèx rũ wüxi i natücèxmamare nixĩ. ²⁴ Natürü ngēma duũxũgũ i Tupana dexũ i Yudíugũ rũ éxna tama Yudíugũ ixĩgũxũ rũ ngēma duũxũgũcèx Tupana inanawéx i norü pora rũ norü cuèx ga yexguma pecaducèx nayuxgu ga Cristu. ²⁵ Rũ yema Tupana üxũ ga yexguma nayuxgu ga Cristu rũ muxũma i duũxũgũcèx rũ wüxi i ngēãemare nixĩ. Natürü ngēma Tupana nagu rũxĩnũxũ rũ guxũma i ñoma i naãnecüãx i duũxũgũarü cuèxarü yexera nixĩ. Rũ yexguma curuchagu nayuxgu ga Cristu rũ muxũma ga duũxũgũcèx rũ natura ga Tupana ga yexguma. Natürü yexguma nixĩ ga inawéãxũ ga ñuxãcü guxũ i duũxũgũarü yexera na naporaxũchixũ. ²⁶ Pa Chaueneẽgũx, name nixĩ i nagu perũxĩnũẽ na ñuxãcü Tupana pexũ dexũ na norü duũxũgũ pixĩgũxũcèx. Rũ noxretama pixĩgũ na nüxũ pecuèxũchixũ ega duũxũgũ pexũ ngugũgu, rũ noxretama pixĩgũ na ãẽxgacũgũ pixĩgũxũ, rũ noxretama pixĩgũ i ngēma itaarü dñeruãxũtanũxũ pixĩgũxũ. Natürü woo ngēma na pixĩgũgu rũ Tupana rũ pexũ nade na norü duũxũgũ pixĩgũxũcèx. ²⁷ Rũ Tupana nanade ga yema duũxũgũ ga togü ga duũxũgũ nüxũ ixuxgu rũ taxuũma icuáxũ. Rũ yemaãcü nanaxũ ga Tupana na naxãneẽxēẽãxũcèx i ngēma duũxũgũ i nüxũ icuèxũchixũ. Rũ Tupana nanade ga yema duũxũgũ ga togü nüxũ ixuxgu rũ turaexũ. Rũ yemaãcü nanaxũ ga Tupana na naxãneẽxēẽãxũcèx i ngēma duũxũgũ i poraexũ. ²⁸ Rũ Tupana nanade ga yema duũxũgũ ga togü nüxũ oexũ, rũ ñoma i naãnewa taxuũma ixĩgũxũ. Rũ yemaãcü Tupana nanaxãneexēẽ i ngēma duũxũgũ i ñoma i naanewa norü ngemaxũgũmaã nügũ icuèxũũgũxũ. ²⁹ Rũ

ngēmacèx taxucürüwama texé tügü ticuèxüü i Tupanapēxewa. ³⁰ Rū nūmatama ga Tupana nixī ga Ngechuchu ya Cristuarü duūxūgūxū pexū yaxīgūxēēxū. Rū tatanüwa nanamu ga Cristu na nūma tūxna naxāāxūcèx i cuèx i aixcūma ixīxū, rū pecaduwa tūxū ínanguxūxēēxūcèx. Rū nūma ya Cristu nixī i tūxū namaxēxēēxū rū tūxū yamexēēgūxū na aixcūma ixūūnexūcèx napēxewa ya Tupana. ³¹ Rū ngēmacèx i Tupanaārū ore i ūmatūxūwa rū ñanagürü: “Rū ngēxguma texé tügü icuèxūūchaūgu rū name nixī i tórü Corixū ticuèxūū”, ñanagürü.

2

Cristu ga curuchawa ipotacūchiga

¹ Pa Chaueneēgūx, yexguma noxri petanüwa chaxūxgu na pemaā nūxū chixuxūcèx ga Tupanaārū ore i aixcūma ixīxū i Cristuchiga, rū tama ñoma nūxū cuèxūchixürüūācūma pemaā chidexa, rū tama ore ga guxchaxūmaā nixī ga pemaā nūxū chixuxū. ² Yerü yexguma petanüwa chayexmagu, rū Cristuchigaxūīcatama nixī ga pemaā chixuxū. Rū taxuūma ga tacū ga togu charūxīnū. Rū yemaācū Ngechuchu ya Cristu ga curuchawa ipotacūguxicatama nixī ga charūxīnūxū. ³ Rū yexguma petanüwa changuxgu rū nūxū chadau ga taxū ga guxchaxūgū ga petanüwa, rū yemacèx poraācū chaxoegaāē rū Tupanapewa chorü muūmaā chidurux. ⁴ Rū yexguma pemaā chideaxgu rū pemaā nūxū chixuxgu ga Tupanaārū ore, rū tama ñoma nūxū cuèxūchixürüūācūma pemaā nūxū chixu na yemaācū pexū chanangūchaūxēēxū na peyaxōgūxūcèx. Natürü Tupanaāē i Üūnexūārū ngūxēēmaā rū Tupanaārū poramaā nixī ga pexū chanangūchaūxēēxū. ⁵ Rū yemaācū Tupanaārū poramaā pemaā nūxū chixu ga yema ore na Tupanagagu yīxū na nūxū peyaxōgūxū, rū tama ñoma i naānecūāx i duūxūgūarü cuāgagu na yīxū.

Tupana rū Naāē i Üūnexūwa nūgū tūxū nacuèxēē

⁶ Natürü pemaā nūxū chixu, rū ngēxguma natanüwa changēxmagu i ngēma duūxūgū i marü meāma yaxōgūxū, rū ngēxguma nixī i chanangūxēēxū i ngēma aixcūma Tupanaarü cuèx i üūnexū. Natürü ngēma cuèx rū tama ñoma i naānewa ne naxū, rū bai i ñoma i naāneārü āēxgacūgū i paxa tá iyarūxoxūwa ne naxū. ⁷ Natürü ngēma cuèx rū Tupanawa nixī i ne naxūxū. Rū ngēma cuèx nixī ga noxri tauta naāne ūxgu Tupanaxīcatama nūxū cuáxū ga na ñuxācū tá tūxna naxāāxū i maxū i taguma gūxū. ⁸ Natürü yema Tupana nagu rūxīnūxū, rū taxuūma ga ñoma ga naānecūāx ga āēxgacū nūxū nacuèx. Yerü yexguma chi aixcūma nūxū nacuèxgūgu ga yema Tupana nagu rūxīnūxū rū tāū chima curuchawa nayapotagū ga guma mecū ya tórü Cori. ⁹ Rū ngemachiga nixī i Tupanaārū ore i ūmatūxūwa i ñaxū:

“Rū ngēma duūxūgū i Tupanaxū ngechaūgūxūcèx, rū nūma nanamexēē i tacū i taxúema nūxū dauxū, rū taguma texé nūxū ínūxū, rū bai i texé nagu rūxīnūxū”,

ñaxū. ¹⁰ Rū ngēma Tupana mexēēxū naxcèx i ngēma duūxūgū i nūxū ngechaūgūxū, rū ñuxma rū tūxū nūxū nacuèxēē i ngēma, yerü nūma nanamu ga Naāē i Üūnexū na taxcèx nangoxēēāxūcèx. Rū ngēma Naāē i Üūnexū rū guxūxūma nacuèx, rū èixrūxū i ngēma Tupanaxīcatama nūxū cuáxū rū ta nūxū nacuèx. ¹¹ Rū duūxūgūtanüwa rū tēxé nūxū tacuèx na tacūgu naxīnūxū i wūxi ya yatü? Rū naāēxīcatama nixī i nūxū cuáxū i ngēma nagu naxīnūxū i ngēma yatü. Rū ngēxgumarūū ta Tupanaāē i Üūnexūxīcatama nixī i nūxū cuáxū na tacūgu naxīnūxū ya Tupana. ¹² Rū yixema rū tama ñoma i naānecūāx i naāē

nixī ga iyauxgūxū. Natürü tanayauxgü i ngema Naãe i Üünexū ga Tupana taxcèx núma muxū na aixcūma nūxū icuáxūcèx i guxūma i ngēma mexūgü ga Tupana norü ngechaūmaã tüxna ãmarexū. ¹³ Rū ñuxma na pemaã nūxū tixuxū i ngēmachiga, rü Tupanaãe i Üünexū toxna āxū i oremaã nixī i pemaã nūxū tixuxū. Rū tama ore i torü cuèxwa tayaxuxūmaã nixī i pemaã nūxū tixuxū. Rū ngēmaãcü nūxū tixu i Tupanaãe i Üünexūārü ore namaã i ngēma duūxūgü i aixcūma Tupanaãe nawa ngēxmagūxū. ¹⁴ Rū texé ya tama Tupanaãe i Üünexū tümawa ngēxmaxē, rü taxucürüwa tanayaxu i ngēma Tupanaãe i Üünexū tüxū nguxēēxū, erü tümacèx ya yíxema duūxē rü natüçèxmamare nixī. Rū tama nūxū tacuèxéga erü yíxema Tupanaãe i Üünexū tümawa ngēxmaxēĩcatama tixī ya nūxū cuáxe na tanangugūxū na ñuxū ñaxūchiga yīxū i ngēma Tupanaãe i Üünexū tüxū nguxēēxū. ¹⁵ Rū yíxema duūxē ya Tupanaãe i Üünexū tümawa ngēxmaxē, rü meã tanangugü i guxūma. Natürü ngēma togü i duūxūgü i tama Tupanaxū cuèxgūxū, rü taxucürüwama tümäärü maxūxū nangugü ya yíxema duūxē ya aixcūma Tupanaãe tümawa ngēxmaxē. ¹⁶ Erü Tupanaärü ore i ümatüxūwa rü ñanagürü:

“¿Texé nūxū tacuèx na tacügu naxīnūxū ya tórü Cori? ¿Rü texé nūxū tacuèx na Tupanaxū taxucuxēxū?”

ñanagürü. Natürü yixema nixī i aixcūma nūxū icuáxū i ngēma Cristu nagu rüxīnūxū.

3

Pauru rü Aporu rü wüxigu Tupanaãxū napuracüe

¹ Pa Chaueneēgūx, yexguma noxri petanüwa changuxgu, rü taxucürüwa ngēma duūxūgü i Tupanaãe nawa ngēxmaxūmaã chidexaxürüüacü pemaã chidexa. Natürü ñoma i naãnecūāx i tama Tupanaxū cuèxgūxūmaã chideaxgurüü nixī ga pemaã chidexaxū. Yerü pema rü yexwacèx, peyaxōgü ga yexguma, rü yemacèx yexwacèx yaxōgūxūmaã chideaxürüüacü pemaã nūxū chixu ga Cristuchiga. ²⁻³ Rū taxchaxū ga oremaã pexū changúxēē, ngēxgumarüü i wüxi i õxchana ega noxri nabuxgu rü naēgünenixū ya tauxchaãcü yaxaxüne nūxna taxā. Rū yemaãcü tauxchaxū ga oremaã pemaã nūxū chixu ga Tupanaärü ore ga noxrix, yerü taxucürüwa nūxū pecuèxéga ga Tupanaärü ore ga guxchaxū. Rū ñuxma rü ta tama nūxū pecuèxéga i Tupanaärü ore i guxchaxū, erü ñoma tama yaxōgūxū i duūxūgürüütama pemaxē. Rū dücax, ngēxguma ñuxma rü ta pixāūxāchiwèxegu rü pegümaã penuēgu, rü ngēmawa nangox na ngēma tama yaxōgūxürüüacütama nagu perüxīnūēxū rü ñoma i naãnecūāxürüüacütama na pemaxēxū. ⁴ Rū ngēxguma petanüwa wüxie ñágügu rü:

“Choma rü Pauruwe charūxū”, ñágügu, rü togue rü:

“Choma rü Aporuwe charūxū”, ñágügu, rü ngēmawa nūxū tacuèx na ngēma duūxūgü i tama yaxōgūxürüüacüma na pemaxēxū. ⁵ Rū ngēxguma meã nagu rüxīnūēgu, ¿rü tacü chixī i choma i Paurux? rü ¿tacü nixī i nüma i Aporux? Toma rü Tupanaärü duūxūgūmare tixīgü, rü togagu nixī ga nūxū peyaxōgūxū ga tórü Cori ya Ngechuchu. Rū wüxichigü ga toma rü tanaxü ga yema puracü ga tórü Cori toxna āxū. ⁶ Rū chauxütawa nixī ga nūxū pexīnūēxū rü peyaxōgūxū ga Tupanaärü ore ga noxrix. Rü Aporu nixī ga pexū rüngūxēēcü na yexeraãcü meã peyaxōgūxū ga yema ore. Natürü Tupana nixī ga pexū maxēxēēcü. ⁷ Rū ngēmacèx woo yíxema tüxira duūxūgūmaã nūxū ixuxe i Tupanaärü ore rü woo yíxema wixwena yexeraãcü duūxūgūxū ngúxēēxē, rü taxuūma tixīgü. Natürü Tupana nixī ya guxūma ücü, erü nüma nixī i duūxūgūxū namaxēēxū. ⁸ Rū ngēmaãcü ya yíxema tüxira duūxūgūmaã nūxū

ixuxe i Tupanaārū ore, rü yíxema wixwena yexeraācū duūxūgūxū ngúexēxē rü tawūxigumare i ngēma puracūwa. Natürü Tupana rü tá tūxū nanaxütanü i tümaārū puracū ya wūxichigü ngēxgumarūū na ñuxācū tanaxūxū i ngema puracū.. ⁹ Rü ngēmaācū i toma rü wūxigu Tupanaāxū tapuracūe. Rü ngēmaācū nixī i perū maxūwa napuracūxū ya Tupana na nūma nanaxwēxexūācūma pixīgūxūcèx. ¹⁰ Rü choma nixī ga Tupana choxū muxū na chaxira pemaā nūxū chixuxūcèx ga Cristuchiga. Rü togū nixī ga chowena yexeraācū pexū ngúexēxū. Natürü guxāma ya texé ya naxúxe i ñaā puracū rü name nixī i taxuāē na meā tanaxūxūcèx. ¹¹ Rü ñaā puracū rü Ngechuchu ya Cristuwa nixī ga inaxūgūxū, rü ngēmacèx taxucürūwama texé tayangucuchixēē i to i tūxū maxēxēxū. ¹² Rü ñuxma na norū puracū ixūxū i wūxichigü i yixema, rü tanaxwēxe i taxuāē na aixcūma meā naxūxū i ngēma. Erü yíxema aixcūma meā naxúxe i norū puracū, rü ñoma wūxi i ĩpataarū ũruū i uirumü rü dīerumü rü nuta i mexēchixūmaā ũpataxūrūū tixī. Natürü yíxema tama aixcūma meā naxúxe i ngēma Cristuarū puracū rü ñoma ĩpataarū ũruū i chixexū i naī rü naīxātū rü dexnemenēxāmaremaā ũpataxūrūū tixī. ¹³ Natürü ngēxguma naguxgu i naāne, rü tá nangox na ñuxācū naxūāxū i Tupanaārū puracū i wūxichigü i duūxū. Erü ngēma ngunexūgu rü tá nangēxma ya ũxū ya taxūchine. Rü ñoma tacū ũxūwa iguxūrūū tá nixī i Tupana nūxū na ũxū i wūxichigü i duūxūārū puracū na nūxū nacuāxūcèx ngoxi aixcūma name rü ēxna tama. ¹⁴ Rü yíxema aixcūma meā naxúxe i Cristuarū puracū, rü yima ĩpata ya taixūne ya tama ũxūmaā ixaxūnerūū tá nixī i ngēma tümaārū puracū. Rü tá Tupanaxūtawa tanayaxu i tümaārū natanū naxcèx i ngēma taxūxū. ¹⁵ Natürü yíxema tama aixcūma meā naxúxe i ngēma puracū, rü yima ĩpata ya tama taixūne ya ũxūmaā ixaxūnerūū tá nixī i ngēma tümaārū puracū. Rü tá ngēxma inayarūxomare i guxūma i ngēma taxūxū. Rü tūxicatama tāūtāma tixa ñoma wūxi i duūxū i ũxūemawa iyagoxūrūū. ¹⁶ ¿Tama ēxna nūxū pecuèx i pema rü Tupanapata na pixīgūxū, rü ngema Naāē ya Tupana rü pewa na namaxūxū? ¹⁷ Rü ngēxguma texé pexū chixetanūxēēgu, rü Tupana tá tūxū napoxcu, erü Tupanapata ya nawa namaxūne rü naxūūne. Rü pematama nixī ya yima Tupanapata na pixīgūxū. ¹⁸ Tama name i texé tūgūtama tawomūxēē. Rü ngēxguma petanūwa texé tūgūgu rūxīnūgu na wūxi i duūxū i nūxū cuāxe na tiixū i ñoma i naānewa, rü name nixī i ñoma taxuūma tacuāxūrūū tūgū tixīxēē. Rü ngēxguma tá nixī i wūxi i duūxū i aixcūma nūxū cuāxe tá tiixū. ¹⁹ Erü ñoma i naāneārū cuèx rü wūxi i ngēāēmare nixī i Tupanacèx. Erü Tupanaārū ore i ũmatūxūwa rü ñanagürü:

“Rü ngēma duūxūgü i nūgūgu rūxīnūēxū na nūxū cuèxūchigūxū yīixū, rü norū cuèxgutama ĩnanatūexēē ya Tupana”,

ñanagürü. ²⁰ Rü toxnamana i Tupanaarū orewa rü ñanagürü ta:

“Tórü Cori ya Tupana rü nūxū nacuèx na taxuwama namexū i ngēma norū ĩnū i ngēma duūxūgü i ñoma i naanewa cuèxwa ngugūxū”,

ñanagürü. ²¹ Rü ngēmacèx tama name i texé tūgū ticuèxūxū ega duūxūgüarū cuèxwamare tarūxūxgu.. Erü Tupana rü marū pexna nanaxā i guxūma na pexrū yīixūcèx. ²² Rü ngēmacèx i choma i Pauru, rü taeneē ya Aporu, rü taeneē ya Pedru, rü ñoma i naāne, rü torū maxū, rü torū yu, rü ñomatama i ngunexū, rü moxūārū ngunexū, rü guxūma i ngēma rü pexrū nixī. ²³ Rü pematama rü Cristuarū pixīgü. Rü Cristu rü Tupanaārū nixī.

4

Yema ngúexūgü ga Ngechuchu imugūxūārū puracūchiga

1 Rū ngēmacèx tanaxwèxe i tomaã nagu perüxĩnũē na Cristuarü puracütanüxũmare na tixĩgũxũ. Rū nũma nixĩ i toxũ namuxũ na pexũ tangúexēēxũcèx ga yema ore ga noxri Tupanaxĩcatama nüxũ cuáxũ. 2 Rū ngēxguma texé tacü rü puracü tũxna ãxgu, rü name nixĩ i aixcũma tayanguxēē i ngēma puracü i tũxna taxãxũ na ngēmaãcü itanawéxũcèx na aixcũma wüxi i duũxũ i mexũ tixĩxũ. 3 Rū ngēmacèx i ñuxma na meã chayanguxēēchaũxũ i ngēma puracü i Tupana choxna ãxũ, rü taxucèxma chaugücèx chaxoegaãē ega woo choxna pecagu rü ēxna tacü rü ãēxgacügü choxna caxgu naxcèx i ngēma puracü i chaxũxũ. Rū woo i chomatama rü taxuxũcèxma íchicuèx na ngextá chixri chanaxũxũ i ngēma puracü. 4 Natürü ñuxma na chomatama nagu charüxĩnũxũ na nataxuũma i chorü chixexũ i Tupanapēxewa, rü tama ngēmacèx Tupana choxũ nadau na changearü pecaduãxũ. Erü nũmatama ya tórü Cori ya Tupana nixĩ i aixcũma choxũ nacuáarü maxũãxũ. 5 Rū ngēmacèx tama name na toxũ pengugüarü maxũãxũ naxũpa na núma naxũxũ ya tórü Cori. Natürü name nixĩ i nüxũ ípenanguxēē, erü nũma tá nixĩ i nangoxēēãxũ i guxũma i ngēma ñuxma icúxũ rü guxũma i ngēma duũxũgü naãēwa nagu rüxĩnũēxũ. Rū ngēxguma tá nixĩ ya Tupana i tümamaã nataãēxũ ya wüxichigü ya yíxema aixcũma mexũ ügüxe. 6 Pa Chaueneëgüx, perü mexũcèx nixĩ i pemaã nüxũ tixuxũ i ngēma ore na ngēma Tupana naxwèxexũãcũma pemaxēxũ. Rū choma rü Aporu nixĩ i perü cuèxruũgü tixĩgũxũ na towa pengüexũ na Tupanaãrü ore pemaã nüxũ ixuxürüũãcü penaxũxũ. Rū ngēmacèx tama name na wüxi i perü nguxēētaexũmaã petaãēgüxũ rü to rü nüxũ pexoexũ. 7 Rū ñuxma rü pexna chaca, ¿rü texé tixĩ ya yíxema pemaã nüxũ ixuxe na togüarü yexera pexũ ixixēēxē? ¿Erü guxũma i ngēma cuèx i pexũ ngēxmaxũ rü Tupana pexna nanaxã? Rū ñuxma na nũma pexna naxããxũ i ngēma cuèx ¿rü tũxcüũ pegü picuèxüũgü ñoma pematama perü poramaã penayaxuxürüũ? 8 Rū pegügu perüxĩnũēgu rü aixcũma marü meãma Tupanaxũ picuèxüchi rü marü pexũ nangēxma i guxũma i tacü i penaxwèxexũ na naxütawa pengugüxũcèx. Rū pegügu perüxĩnũēgu rü ñoma ãēxgacügü i taxürüũ pixĩgü rü taxuũma toxütawa penaxwèxe i ñuxmax. ¿Chierü aixcũma Tupanapēxewa ãēxgacügü pixĩgügu na toma rü ta wüxigu pemaã ãēxgacügü na tixĩgüxũcèx! 9 Rū toma na Ngechuchu toxũ imugüxũ, rü chauxcèx rü wixwe toxũ nawogü ya Tupana. Rū ñoma poxcuexũ i yuewa íxürüũ tixĩgü. Rū ñoma wüxi i tacü i nüxũ nacugüexürüũ tixĩgü i napēxewa i Tupanaãrü orearü ngeruũgü i daxüçüãx, rü napēxewa i ñoma i naãnecüãx i duũxũgü, rü napēxewa i guxũma i tacü i Tupana üxũ. 10 Rū ñuxma na Cristuwe tarüxĩxũ, rü ngēmacèx taxuũma icuáxũ toxũ nawogü i duũxũgü, natürü i pema rü pegügu perüxĩnũēgu rü guxũxũma pecuèx i Cristuchiga. Toma nüxũ tacuèx na duũxũgüpēxewa taturaexũ, natürü i pema rü pegügu perüxĩnũē na aixcũma peporaexũ. Rü duũxũgü toxũ naxo, natürü pexũ nangechaũgü. 11 Rū ñuxma rü ta tama inayacuèx na ngúxũ tingegüxũ, erü ñuxma rü ta taiya toxũ nangux, rü titawae, rü tangexchiru. Rü duũxũgü rü chixri tomaã nachopetü, rü tangepata. 12 Rü tipae na yeüçürü toxmēxmaã tapuracüeechaxũ. Rü duũxũgü rü tacü tomaã nixugüē, natürü i toma rü mexũ i oremaã tanangãxũgü. Rü towe ningēxũtanü, natürü yaxna namaã taxĩnũē. 13 Rü chixri tochiga nidexagü, natürü i toma rü meã nachiga tidexagü. Rü ñoma guxchirexũ nadaugüxürüũ tomaã nixĩgü, rü ñoma duũxũgü i taxuwama mexũãcü toxũ nixĩxēē. Rü ñuxma rü ta ngemagutama tomaã naarüxĩnũē. 14 Tama pexcèx chanaxümatü i ñaã popera na pexũ chaxãneēxēēxũcèx. Natürü pexcèx chanaxümatü na pexũ chixucuxēgüxũcèx chauxacügüxüchirüũ, erü pexũ changechaũ. 15 Erü woo nangēxmagu i muxũma i perü nguxēēruũgü i Cristuchiga pexũ ngüexēēxũ,

natürü chaxicatama nixī i penatü chiixū ga Cristuxū na peyaxuxūwa. Yerü chauxūtawa nixī ga noxri ga penayaxuxū ga Ngechuchu ya Cristuarü ore i tūxū maxēxēxū. Rū ngēmacèx chaxicatama nixī i penatü chiixū i perü òwa. ¹⁶ Rū ngēmacèx pexū chacèxū na chauxrūxū meā pemaxēxū. ¹⁷ Rū ngēmacèx pexūtawa chanamu ya Timutéu ya poraācū nūxū changechaūcū ya chaune ixīcū i tórü Coriarü orewa. Rū nūma rü aixcūma meā nayanguxēē i guxūma i ngēma nagu chanamuxū. Rū nūma tá pexna nūxū nacuèxāchixēē na ñuxācū Ngechuchu ya Cristu naxwèxexūācūma meā chamaxūxū rü chanangūxēēxū ga yema yaxōgūxū ga natanūgu chixūgūxū. ¹⁸ Rū ñuxre i pemagū rü pegū picuèxūūgū, erü nagu perūxīnūē na tagutáma pexūtawa íchayadauxū. ¹⁹ Natürü ngēxguma nanaxwèxegu ya tórü Cori, rü paxa tá ngēma chaxū na pexū íchayadauxūcèx. Rū ngēxguma rü tá chomaxūchi nūxū chadau ngoxi ngēma duūxūgū i nūgū icuèxūūgūxū nūxū nangēxma i Tupanaārü pora rü ēxna yadoragūmare. ²⁰ Erü Tupanaarü pora rü tama nūxū tixumare, natürü nagu ítamaxē i ngēma pora. ²¹ ¿Rü ñuxma rü tacū ēxna nixī i penaxwèxexū i pema? ¿Penaxwèxe na pexū chingagūxū i ngēxguma ngēma changuxgu, rü ēxna penaxwèxe na pexū changechaūācūma rü pemaā chamecūmaācūma pexū na íchayadauxū?

5

Duūxūgū i chixri maxēxūchiga

¹ Rū duūxūgū nūxū nixugūgū rü wūxi i yatü i petanūwa rü naērücūmaātama naxāmèx. Rū ngēma nixī i pecadu i poraācū chixexūchixū, erü woo ngēma duūxūgū i tama yaxōgūxūtanūwa rü tama ngēmaācū naxūpetü. ² ¿Rü ñuxācū i pema i ngēxguma i pegū picuèxūūgūamaxū? Rū narūmemaē chi nixī na poraācū pengechaūgūxū. Rū ngēma yatü i ngēma chixexū ūxū rü name nixī na ípenamuxūchixū i petanūwa. ³ Rū woo tama petanūwa changēxmagu i chomax, natürü guxūguma pegu charūxīnū. Rū ñoma pexūtawa changēxmaxūrū rü tórü Cori ya Ngechuchu ya Cristuégagu pemaā nūxū chixu na tacū tá namaā pexūxū i ngēma duūxū. ⁴ Rū name nixī i tórü Cori ya Ngechuchu ya Cristuégagu pengutaquēxegū. Rū nūma ya tórü Cori ya Ngechuchu rü tá napetanūgu na pexū naporaexēēxūcèx. Rū choma rü tá pexna chacuèxāchi i chorü yumūxēwa. ⁵ Rū ngēma norü poxcu i tá nūxna pexāxū i ngēma yatü, rü ngēma tá nixī na ípenamuxūchixū i petanūwa na Chataná ngúxū nūxū ingexēēxūcèx. Rū ngēmaācū tá inayarūxo i naxūneārü ngúchaū i chixexū, natürü naē rü tá namaxū i ngēxguma wena nūma naxūxgu ya tórü Cori ya Ngechuchu. ⁶ ¿Rü tama name i pema rü pegū picuèxūū naxcèx i ngēma pexūxū! ¿Tama ēxna nūxū pecuèx i ngēma ore i ñaxū:

“Wūxi i íraxū i pāūārü puxēēruū rü taxūma i pāūchara nipuxēē”, ñaxū? ⁷ Rū ngēmacèx name nixī i nūxū perūxoe i guxūma i nuxcūmaūxū i pecūma i pexū chixexēēxū. Rū ngēxguma ngēmaācū penaxūxgu, rü ñoma ngexwacaxūxū i pāū i ngearü puxēēruūāxū i Üpetūchigaarü petawa ingōxūrū tā pime. Rū ñuxma i pema rü aixcūma ngexwacaxūxū i duūxūgū pixīgū, yerü Cristu rü ñoma wūxi i carnerurū marü tachicū tórü pecaducèx nayu. ⁸ Rū ngēmacèx name nixī i nūxū tarūxoe i nuxcūmaūxū i tacūma i chixexūgū rü aixcūma Tupanagu tarūxīnūē rü meā naxcèx tamaxē, erü ngexwacaxūxū i norü duūxūgū tixīgū. ⁹ Nūxīraūxū ga chorü poperawa rü pemaā nūxū chixu na tama natanūgu pexāgūxū i ngēma duūxūgū i naī i ngēmaā naxūneārü ngúchaū ūgūxū. ¹⁰ Natürü yexguma yema ñachagu pexū, rü tama pemaā nūxū chixu na nūxna pixīgachitanūxūchixū i ngēma duūxūgū i tama yaxōgūxū i naī i ngēmaā maxēmarexū, rü ēxna ngēma duūxūgū i guxūma i tacū nūgūna nugūchaūgūxū,

rū ēxna ngīteēxgūxū, rū ēxna ngēma duūxūgū i tupananetachicūnēxāxū icuēxūūgūxū. Erū ngēxguma chi naxchaxwa ípechoūxgu i ngēma duūxūgū, rū chi taxucūruwa i ñoma i naānewa pengēxmagū. ¹¹ Natūrū yexguma pemaā nūxū chixuxgu na tama natanūgu pexāgūxū i ngēma duūxūgū i chixri maxēxū, rū nachiga chidexa i ngēma duūxūgū i nūgū ixugūxū na peeneēgū i yaxōgūxū na yixīgūxū natūrū naī i ngemaā maxēxū, rū ēxna aūexū, rū ēxna tupananetachicūnēxāxū icuēxūūgūxū, rū ēxna oregūtēēxgūxū, rū ēxna ngāxēwēxegūxū, rū ēxna ngīteēxgūxū. Rū ngēma duūxūgū nixī i pemaā nūxū chixuxū na tama namexū na natanūgu pexāgūxū rū bai i namaā na pechibūexū. ¹²⁻¹³ Erū tama choxmēxwa nangēxma na nūxna chaçaxū i ngēma duūxūgū i tama Tupanaāxū yaxōgūxū. Rū Tupana tá nixī ya nūxna çacū i ngēma duūxūgū. Natūrū i pema rū pemēxwa nangēxma na nūxna peçaxū i ngēma peeneēgū i yaxōgūxū i tama meā maxēxū. Rū name nixī i petanūwa ípenamuxūchi i ngēma duūxū i chixri maxūxū.

6

Ngēxguma tacū rū guxchaxū tūxū ngēxmagu taeneēmaā, rū tama name i āēxgacūgū i tama yaxōgūxūpēxewa tayamexēē i ngēma

¹ Rū ngēxguma wūxie i pema pexū nangēxmagu i tacū rū guxchaxū i wūxi i peeneē i yaxōxūmaā, ¿rū tūxcūū wūxi i āēxgacū i tama yaxōxūārū ngūxēēcēx ípeyaca na nūma pexū namexēēāxūcēx i ngēma perū guxchaxūgū? ¿Rū tama ēxna inamexū i ngēma peeneēgū i yaxōgūxū na namexēēgūxū i ngēma perū guxchaxūgū? ² ¿Tama ēxna nūxū pecuēx na yixema na yaxōgūxū tá yīxū i naāneārū guxgu nūxna icagūxū i guxūma i ñoma i naānecūāx i duūxūgū? Rū ñuxma na pema tá yīxū i ñoma i naānecūāx i duūxūgūxū picagūxū, ¿rū tūxcūū taxucūruwa i pematama penamexēē i ngēma perū guxchaxūgū i írachirēxū? ³ ¿Tama ēxna nūxū pecuēx rū woo ngēma daxūcūāx i Tupanaārū orearū ngeruūgū, rū yixema tá yīxū i nūxū icagūxū? Rū ngēmacēx nixī i yexeraācū pemēxwa nangēxmaxū na ñuxācū penamexēēxū i ngēma guxchaxūgū i ñoma i naānewa pexū ngēxmagūxū. ⁴ Rū ngēmacēx, ngēxguma tacū rū guxchaxū pexū ngēxmagu i ñoma i naānewa, ¿rū tūxcūū i ngēma āēxgacūgū i tama yaxōgūxūxūtawa pegū ípeyaxuaxūgūxū na pexū namexēēgūāxūcēx i ngēma? ⁵ Rū pemaā nūxū chixu i ngēma ore na pexāneēxūcēx. ¿Éxna tataxuma i petanūwa ya wūxie ya nūxū cuáxe na tanamexēēxū i ngēma guxchaxūgū i petanūwa ngēxmaxū? ⁶ Rū tama pegūmaā penuēxīcatama, natūrū naētū rū āēxgacūgū i tama yaxōgūxūxūtawa pexī na penamexēēxūcēx i ngēma perū guxchaxūgū. ⁷ Rū ngēma na pegūmaā penuēxū, rū ngēma rū poraācū chixexū nixī. ¿Rū tūxcūū tama yaxna namaā pexīnūē i ngēma guxchaxūgū i peeneē pemaā ūxū? ¿Rū tūxcūū tama namaā peporae ega texé perū tacūcēx ngīxgux? ⁸ Natūrū i pema rū poraācū chixexū pexūe, erū woo peeneēgū i yaxōgūxūāxū rū ta pengix. ⁹⁻¹⁰ ¿Tama ēxna nūxū pecuēx na ngēma duūxūgū i chixexū ūgūxū rū nataxuxūtáma i nachica i ngextá Tupana āēxgacū íyīxūwa? ¿Rū tama name i pegūtama pewomūxēēgū! Erū ngextá Tupana āēxgacū íyīxūwa rū nataxūtáma i nachica i ngēma duūxūgū i naī i ngemaā ipexū, rū ngēma duūxūgū i tupananetachicūnēxāxū icuēxūūgūxū, rū ngēma duūxūgū i naxmēxēchita rū ēxna natechita ngēāēxū, rū ngēma yatūgū i naxrūū yatūxūmaā ngēāēxū, rū ngēma ngīteēxgūxū, rū ngēma duūxūgū i nūgūnaxica nanuxūchixū i norū ngēmaxūgū, rū ngēma duūxūgū i ngāxēwēxegūxū, rū ngēma duūxūgū i oregūtēēxgūxū, rū ngēma duūxūgū i womūxēēwēxegūxū. Rū guxūma i ngēmagū rū nataxūtáma i nachica i ngextá Tupana āēxgacū íyīxūwa. ¹¹ Rū yexgumarūūtama pixīgū ga ñuxre ga pema

ga ūpax. Natürü i ñuxma ya Tupana rü marü pexũ ínanapi i perü chixexũ na noxrüxicatama pixĩgũxücèx. Rü ñuxma rü aixcũma napèxewa pime yerü Naãe i Üünexũ rü tórü Cori ya Ngechuchu ya Cristuégagu marü perü pecaduna pexũ ínanguxũxêe.

Ñuxãcü naxüüne i taxüne

¹² Rü ñuxre i pema rü ñaperügügü:

“Rü marü name na chanaxũxũ i ngẽma chanaxwèxexũ”, ñaperügügü. Rü aixcũma nixĩ i ngẽma, natürü tama guxũ i ngẽma ixügũxũ rü tüxũ name. Rü aixcũma nixĩ i Tupana choxũ ínguxuchixèexũ na chanaxũxücèx i ngẽma chanaxwèxexũ, natürü tama name na tacü rü chixexũgu chaugü changuxèexũ na chomaã inacuáxücèx. ¹³ Rü ngèxgumarũũ ta rü ñuxre i duũxũgü rü ñanagürügü:

“Rü õna rü taxü necèx nixĩ, rü taxüne rü õnacèx nixĩ”, ñanagürügü. Rü aixcũma ngẽmaãcü nixĩ, natürü ya Tupana rü tá inayanaxoxèe i guxũma i ngẽma. Rü taxüne rü tama naĩ i ngemaã namaã na ingèãẽmarexücèx nixĩ. Erü taxünemaã nixĩ i naxũxũ i tórü Coriarü ngúchaũ. Rü tórü Cori nixĩ ya taxünexũ maxèecü. ¹⁴ Rü yema Tupana wena namaxèexũrũũ ga tórü Cori ya Ngechuchu, rü ngèxgumarũũ tá ta norü poramaã wena tüxũ namaxèxèe. ¹⁵ ¿Rü tama èxna nüxũ pecuèx na ngẽma pexene rü Cristuarü na yĩxũ? ¿Rü ñuxãcü i ngẽma chaxune i Cristuarü ixĩxũ rü ngexũ i ngèãexũmaã inapexũ? Taxucürüwama ngẽmaãcü nixĩ. ¹⁶ ¿Rü èxna tama nüxũ pecuèx ega wüxi i ngexũ i ngèãexũmaã inapexgu ya wüxi ya yatü rü ngẽma taxre i naxüne rü wüxitama i naxüne yĩxũ? Erü Tupanaãrũ ore i ümatũxũwa rü ñanagürü:

“Ngẽma taxre i naxüne rü wüxitama i naxüne tá nixĩ”, ñanagürü. ¹⁷ Natürü ngèxguma wüxi i duũxũ rü tórü Cori ya Cristuaxũ yaxõõxgu, rü ngẽma naãe i ngẽma duũxũ rü Cristuãẽmaã wüxigutama narüxĩnũe. ¹⁸ Rü ngẽmacèx name nixĩ na nüxũ perüxoexũ i pexeneãrũ ngúchaũ na pexũxũ. Rü guxũma i togü i pecadu i wüxi i duũxũ üxũ rü tama naxünexũ nachixexèe. Natürü ngẽma na naĩ i ngemaã nangèãexũ rü ngẽma waxi nixĩ i naxünexũ chixexèexũ. ¹⁹ ¿Tama èxna nüxũ pecuèx i pexene rü Tupanaãe i Üünexũpata na yĩxũ? Rü pegu nixĩ i naxãchiũxũ i ngẽma Naãe i Üünexũ i Tupana pexna muxũ. Rü ngẽmacèx i pema rü tama pegüarü yoratama pixĩgü. ²⁰ Erü Tupana rü marü pexcèx nataxe rü poraãcü nüxũ petatanü. Rü ngẽmacèx penaxwèxe i ngẽma pexenemaã meã Tupanacèx pemaxè na ngẽmaãcü namaã penataxèexũ ya Tupana.

7

Ucuxègü i ãmèxchiga

¹ Rü ñuxma rü tá pexũ changãxũ ga yema ãmèxchiga ga choxna naxcèx pecaxũ ga perü poperawa. Rü narümemaẽ chi nixĩ i noxtacũma tama naxãmax ya yatü. ² Natürü ngẽma na naxüneãrũ ngúchaũ na naxügümarexũ i duũxũgü, rü narümemaẽ nixĩ i wüxichigü ya yatü rü na naxãmaxũ, rü wüxichigü i nge rü na naxãtexũ. ³ Rü yima yatü ya ãmacü rü taxucürüwama naxmèxna nügü ninuxũ. Rü ngẽma nge i ãtecü rü taxucürüwama ngĩtena ngĩgü iyanuxũ. ⁴ Erü ngẽma nge i ãtecü rü tama ngĩgũxũneãrũ yoratama iyixĩ, erü ngĩte nixĩ ya ngĩxĩneãrũ yora ixĩcü. Rü ngèxgumarũũ ya ngĩte rü tama nügũxũneãrũ yora nixĩ, erü naxmèx iyixĩ i naxüneãrũ yora ixĩcü. ⁵ Rü tama name i wüxi ya yatü rü namèxna nügü ninuxũ, rü èxna wüxi i ngecü rü ngĩtena ngĩgü iyanuxũ, ega tama nügümaã namexèẽãgu na ñuxre i ngunexũ tama nügümaã namaxèxũ naxcèx na nayumüxègũxũ. Rü ngẽmawena rü name nixĩ

na wenaxārū noxrirūū nūgūmaā namaxēxū na tama Chataná nūxna ĩnūxūcèx na chixexūgu nayixēēxūcèx. ⁶ Rū guxūma i ñaā ore i pemaā nūxū chixuxū i āmèxchiga rū ātechiga rū tama wūxi i mu nixī i ngēma. Natürū pemaā nūxū chixumare na nūxū pecuáxūcèx na namexū i ngēmaācū na penaxūxū. ⁷ Rū chomatama nagu charūxīnū rū chierū name nixī ega choma chamaxūxūrūū namaxēgu i guxūma i duūxūgū. Natürū Tupana rū wūxichigū i duūxūna nanaxā i nacūma na ñuxācū namaxēxūcèx rū ñuxācū nagu naxīnūxūcèx. Rū ngēmacèx tama guxāma tawūxigu. ⁸ Rū ngēma ngemèxgūxū rū ngetegūxū rū yutegūxū rū namaā nūxū chixu rū narūmemaē nixī i chauxrūū tama naxāmèx rū tama naxāte. ⁹ Natürū ngēxguma wūxi i duūxū taxucūrūwa naxūneārū ngúchaūmaā naporagu, rū name nixī na naxāmaxū rū ēxna naxātexū. Erū narūmemaē nixī i noxtacūma naxāmèx rū ēxna naxāte na tama ngema norū ngúchaūgagu dūxwa chixexūgu nanguxūcèx. ¹⁰ Natürū yixema marū āmaxē rū ātexe, rū tūmamaā nūxū chixu na tama namexū na tūmatexū na ítatáxū. Rū ngēma mu rū tórū Coriarū mu nixī, rū tama choxrū nixī. ¹¹ Natürū ngēxguma chi ngürūāchi wūxi i ngexū natexū ítéxgu, rū name nixī i noxtacūma nangete rū ēxna wena natecèx nataegu. Rū ngēxgumarūū ta ya yatū rū tama name i namèxū ínatèx. ¹² Rū ñuxma rū choxū nangēxma i wūxi i ore i tūmacèx ya yixema āmaxē ngīmaā i wūxi i nge i tama yaxōxcū. Rū ngēma ore rū choxrūtama nixī rū tama tórū Coriarū nixī. Rū ngēxguma wūxi ya yatū ya ōcū ngīmaā āmaxgu i wūxi i nge i tama yaxōxcū, rū tama name i ngīxū ínatèx, ega ngīma rū aixcūma namaā naxātechaūgu. ¹³ Rū ngēxguma wūxi i nge i yaxōxcū ātegu namaā ya wūxi ya yatū ya tama yaxōcū, rū tama name i ínatèx ya yima ngīte ega nūma ya yima yatū rū aixcūma ngīmaā naxāmèxchaūgu. ¹⁴ Rū yima yatū ya tama yaxōcū, rū namèx i yaxōxcūgagu Tupana nūxū nacuèx. Rū ngēma ngecū i tama yaxōxcū, rū ngīte ya yaxōcūgagu Tupana ngīxū nacuèx. Erū ngēxguma chi tama ngēmaācū yixīgu, rū chi ngēma naxācūgū rū duūxūgū i tama yaxōgūxūācūgūrūū tá nixīgū. Natürū i ñuxma ya naxācūgū rū marū Tupana tūxū nacuèx. ¹⁵ Natürū ngēxguma yima yatū ya tama yaxōcū rū namèxū ínatáxchaūgu rū ꝑnoxtacūma ngīxū ínatá! Rū ngēxgumarūū ega ngēma ngecū i tama yaxōcū rū ngītexū ínatáxchaūgu, rū ꝑnoxtacūma ngītexū ínatá! Rū ngēxguma ya yima yatū ya yaxōcū rū marū name ega wena naxāmèxgu. Rū ngēma ngecū i yaxōcū rū marū name ega wena naxātegu. Erū Tupana pexū nade na pegū pengechaūgūxūcèx. ¹⁶ Rū ngēmacèx, Pa Ngecū i Tupanaāxū Yaxōxcūx, rū ngēxguma cute i tama yaxōxū cuxū ítáxchaūgu, namē nixī i tama cunachūxu, erū tama nūxū cucuèx ngoxi tá nūxū cuyaxōxēē i ngēma cute rū ēxna tama. Rū cumax, Pa Yatū ya Yaxōxcūx, rū ngēxguma cuxmèx i tama yaxōxū cuxū ítáxchaūgu, rū name nixī i tama cunachūxu, erū tama nūxū cucuèx ngoxi tá ngīxū cuyaxōxēē i ngēma cuxmèx rū ēxna tama. ¹⁷ Rū ñuxma rū pemaā nūxū chixu rū nūma ga Tupana rū wūxichigū ga duūxēna nanaxā ga tūmaārū cuèx na tūmaārū maxūmaā itacuáxūcèx rū meā tanaxūxūcèx i ngēma puracū ga noxri tūxū yexmaxū ga tauta Tupana tūmacèx caxgu. Rū ngēma nguxēētae nixī i namaā chanangūexēēxū i guxūma i yaxōgūxū i wūxichigū ya tupaucawa ngēxmagūxū. ¹⁸ Rū ngēxguma Tupana naxcèx caxgu i wūxi i duūxū i marū Yudíugūrūū íwiechèxmüpēxechiraūxū, rū nūetama nixī ega ngēmaācūtama yixīgu. Rū ngēxguma Tupana nayauxgu i wūxi i duūxū i tama íwiechèxmüpēxechiraūxū, rū nūetama nixī ega ngēmaācūtama yixīgu. ¹⁹ Erū Tupanapēxewa rū nūetama nixī ega wūxi i duūxū rū ínawiechèxmüpēxechiraūgu rū ēxna tama. Erū ngēma Tupana aixcūma naxwèxexū nixī na naga naxīnūxū i wūxichigū i duūxū. ²⁰ Rū wūxichigū i duūxū rū name nixī i nawatama napuracū ga yema puracū ga nūxū yexmaxū

ga yexguma Tupana noxri naxcèx caxgu. ²¹ Rū yexguma wūxi ga coriarū duūxū quixīyane Tupana cuxcèx caxgu, rū tama name i ngēmacèx cuxoegaãē. Natürü ngēxguma cuxū natauxchagu na nūxna ícunguxuchixū i ngēma cori, rū marū name na ícunguxuchixū. ²² Rū cuma ga na cucoriāxyane cuxcèx naçaxū ga Tupana, rū name nixī i nūxna cucuèxāchi na Cori ya Cristu pecaduwa cuxū ínguxuchixēēxū. Rū cuma ga na cungearū coriāxyane cuxcèx naçaxū ga Tupana, rū name nixī i nūxna cucuèxāchi na tórü Cori ya Cristuarū duūxū quīxū i ñuxma na nūxū cupuracūxūcèx. ²³ Tupana rū marū pexcèx nataxe rū poraācū nūxū petatanū. ¡Rū ngēmacèx i ñuxma rū tāūtāma naga pexīnūē i ngēma duūxūgū i wenaxārū ñoma i naāneārū chixexūwa pexū gagūchaūxū! ²⁴ Rū name nixī, Pa Chaueneēgūx, i wūxichigū i pema rū meā Tupanapēxewa penaxūama ga yema puracū ga noxri pexū yexmaxū ga yexguma Tupana pexcèx caxgu. ²⁵ Rū ñuxma rū tá pemaã nūxū chixu i nachiga i ngēma duūxūgū i ngemèxgūxū rū ngetegūxū. Rū tórü Cori ya Ngechuchu rū taxuūma i mu choxna naxā i ngēmachiga. Natürü tá pemaã nūxū chixu i ñuxācū nagu charūxīnū i ngēmachiga. Rū ngēma chorū ore rū aixcūma nixī erū choma nixī i wūxi i duūxū ga nūxū changechaūtümūūācūma choxū nayaxuxū ga tórü Cori. ²⁶ Natürü ngema ñuxma nūxū idauxū i guxchaxūgūgagu rū chauxcèx rū chi name i tama nixāmèx i ngēma yatūgū i ngemèxgūxū. ²⁷ Rū ngēxguma marū cuxāmèxgu rū tama name i ngīxū ícutèx. Natürü ngēxguma cungemèxgu rū name i tama cuxāmèx. ²⁸ Natürü ngēxguma cuxāmèxgu rū tama pecadu nixī i ngēma. Rū ngēxguma wūxi i paxū ātegu rū tama pecadu nixī i ngēma. Natürü ngēma ixāmèxgūxū rū ixātegūxū rū tá nayexera i norū guxchaxūgū i ñoma i naānewa, rū ngēma nixī i tama chanaxwèxexū na nūxū nangupetūxū. ²⁹ Pa Chaueneēgūx, pemaã nūxū chixu rū tama muxū i ngunexū tūxū nangēxma na naxūxūcèx i Tupanaārū puracū. Rū ngēmacèx ya yīxema ixāmèxgūxe rū name nixī i meā tanaxūgū i Tupanaārū puracū ñoma tangemèxgūxūrū. ³⁰ Rū yīxema ngexwaca yutanūgūxe rū yixema peta ūgūxe rū yīxema itaxegūxe, rū tama name i ngēmacèx Tupanaārū puracū na ítangēxgūxū. ³¹ Rū yīxema tūxū nangēxmaxē i tūmaārū ngēmāxūgū i ñoma i naānewa, rū tama name i ngēmacèx Tupanaārū puracū na ítangēxgūxū. Erū ñoma i naāne i ñuxma nūxū idauxū rū paxa tá nagux. ³² Rū tama chanaxwèxe na tacūcèx pexoegaãēgūxū. Rū ngēxguma wūxi i yatū ngemèxgu, rū Tupanaārū puracūgu narūxīnū rū nagu narūxīnū na ñuxācū Tupanaārū ngūchaū naxūxū. ³³⁻³⁴ Natürü ngēxguma naxāmèxgu ya wūxi ya yatū, rū ñoma i naāneārū ngēmāxūgu narūxīnū rū nagu narūxīnū na ñuxācū namèxū nataāēxēēxū. Rū ngēmaācū muxūgu narūxīnū. Rū ngēxgumarūū ta nixī i ngexūgū. Rū ngēma ngexū i ngetexū rū Tupanaārū puracūgu narūxīnū, erū marū Tupanana nūgū naxā rū guxū i naxūnemaã rū naāēmaã naxcèx namaxū. Natürü ngēma ngexū i ātexū rū ñoma i naāneārū ngēmāxūgu narūxīnū, rū nagu narūxīnū na ñuxācū natexū nataāēxēēxū. ³⁵ Rū perū mexūcèx nixī i pemaã nūxū chixuxū i ngēma, rū tama pexna na chanachuxuxūcèx nixī. Natürü ngēma ñacharūgū na meā pemaxēxūcèx rū aixcūma penaxūxūcèx i tórü Coriarū puracū. ³⁶ Rū ngēxguma texé nagu rūxīnūgu na tūmaxācū rū marū na napaxū, rū tūmacèx namexgu na naxātexū, rū marū name i ngīxū taxūte ega aixcūma tūmacèx namexgu. Rū ngēma na naxātexū i tūmaxācū rū tama pecadu nixī. ³⁷ Natürü ngēxguma wūxi i yatū nūxū nangēxmagu i norū pacū rū tama nanaxwèxegu na ngīxū naxūtexū, rū ngēma rū ta marū name. Erū naxmēxwa ingēxma rū taxucèxma texé tanachixewe na ngīxū naxūtexūcèx. ³⁸ Rū ngēmawa nūxū tadau rū ngēma yatū i naxācū ngīxū ūtexū rū mexū naxū. Rū ngēma yatū i tama naxācū ngīxū ūtexū rū yexeraxū i mexū naxū. ³⁹ Rū

wūxi i nge i ātecū rü ngītemēxēwa ingēxma i ngēxguma namaūxgu ya ngīte. Natürü ngēxguma nayuxgu ya ngīte, rü marü name ega to i yatü i ngīma ngīxū ngúchaūxūmaã naxātegu. Natürü inaxwēxe na wūxi ya yatü ya yaxōcūmaã naxātexū. ⁴⁰ Natürü chauxcèx rü yexeraācü chi itaãe i ngēxguma chi tãū chima wena naxātegu. Rü ngēma ore rü choxrütama nixī, natürü nagu charūxīnū rü Tupanaãe i Ūünexūārū ĩnū ta nixī.

8

Tupananetachicünèxāgūna naxuaxūgūxū ga ònachiga

¹ Ñuxma rü tá pemaã nūxū chixu i nachiga i ngēma ònagü i ngēma duūxūgü i tama Ngechuchuaxū yaxōgūxū norü tupananetachicünèxāgūna uaxūgūxū. Rü aixcūma nixī i wūxichigü i yixema i meãma nūxū icuáxū i ngēmachiga. Natürü ngēma nūxū na icuáxūgagu rü ñuxguacü rü yigü namaã ticuèxūxū. Natürü ngēma na yigü ingechaūxū rü tūxū narüngūxēe na yexeraācü meã yaxōgūchigūxū. ² Rü ngēxguma chi texé nagu rüxīnūgu na tacūxū tacuáxū, rü name nixī i nūxna tacuèxāchi na ngēxguma rü ta tama aixcūma nūxū tacuáxū i guxūma i ngēma cuèx i aixcūma ixīxū. ³ Natürü ngēxguma texé aixcūma Tupanaxū ngechaūgu, rü Tupana rü tūxū nacuèx ya yixema. ⁴ Rü ngēma na nangōxū i ngēma ònagü i tupananetachicünèxāgūna naxuaxūgūxū i duūxūgü, rü meãma nūxū tacuèx na taxuwama namexū i ngēma tupananetachicünèxāgü erü tama aixcūma Tupanaxūchi nixīgü. Erü wūxixicatama nixī ya aixcūma Tupana ixīcü, rü nataxuma ya naī. ⁵ Rü woo duūxūgü nagu narūxīnūe rü nangexma i muxūma i tupanagü i ñoma i naanewa rü dauxūguxū i naanewa, natürü taxcèx rü tama ngemaācü nixī. ⁶ Erü yixema nūxū tacuèx na wūxitama yixīxū ya Tupana ya Tanatü ixīcü. Rü nūma ya Tanatü nixī i naxūāxū i guxūma i tacü i ngēxmaxū, rü naxcèx nixī i imaxēxū i yixemax. Rü ngēxgumarūū ta nangēxma i wūxitama ya tórü Cori ya Ngechuchu ya Cristu. Rü yimagagu nixī na nangēxmaxū i guxūma, rü yimagagu nixī i tūxū nangēxmaxū i maxū. ⁷ Natürü tama guxūma i yaxōgūxū nūxū nacuèx na nangēxmaxū ya wūxitama ya Tupana rü wūxitama ya tórü Cori. Rü ñuxre i nūmagü ga ũpa rü nūxū nayapue na nūxū yaxōgūāxū i ngēma tupananetachicünèxāgü, rü ñuxma rü ta tama aixcūma nūxū nacuèxgü i ngēma mexū i Tupana nūxū naxwèxexū. Rü ngēmacèx nixī i ñuxma i nagu naxīnūèxū na chixexū naxūgūxū i ngēxguma nangōxgūāgu i ngēma naxūnamachi i togü i duūxūgü norü tupananetachicünèxāgūna uaxūgūxū na nūxū namaã yacuèxūūgūxūcèx. ⁸ Rü yixema nūxū tacuèx na tama tacü rü namachi na ingōxūgagu yīxū na Tupana tūxū dexū. Rü tãūtáma yexera time i napēxewa ega nangōxgūgu i ngēma namachi. Rü tãūtáma yexera tichixe i napēxewa ega tama nangōxgūgu. ⁹ Natürü i pema i nūxū na pecuáxū na tama pecadu yīxū na nangōxū i ngēma namachi, rü pexuãégü erü ngürüāchi ngēma na pengōxūgagu chixexūgu tá penayixēe i ngēma peeneégü i tauta aixcūma meã nūxū cuèxgūxū na tacü yīxū i Tupana nūxū naxwèxexū! ¹⁰ Erü cuma na meã Tupanaxū cucuáxū, rü ngēxguma chi cunangōxgu i ngēma namachi i ngextá tupananetachicünèxāgūxū íyacuèxūūgūxūwa, rü ngürüāchi wūxi i cueneē i tauta meã Tupanaxū cuáxū tá cuxū nadau. Rü ngürüāchi nūma rü tá ta nanangōx i ngēma namachi woo naãēwa nagu naxīnūgu na wūxi i chixexū yīxū na nangōxū i ngēma namachi. ¹¹ Rü ngēmaācü i cuma na meã Tupanaxū cucuáxū, rü tá icuyanatauxēe i ngēma cueneē i Cristu naxcèx yuxū i tauta meã Tupanaxū cuáxū. ¹² Rü ngēmacèx i ngēxguma chixexūgu cunanguxēēxgu i ngēma cueneē i tauta meã Tupanaxū cuáxū, rü Cristumaã rü ta chixexū cuxū. ¹³ Rü ngēmacèx i ngēxguma ngēma namachi i

changōxūgagu chixexūgu chananguxēēxgu i chaueneē, rü narümemaē nixī i noxtacūma taguma namachi changōx na tama pepadugu chananguxēēxūcèx i ngēma chaueneē.

9

Yixema Cristu tūxū muxē na nūxū tapuracūxūcèx, rü tūxna naxū i tūmaārū natanū

¹ Rū pemaā nūxū chixu rü tórū Coritama nixī ya choxū yaxucū rü choxū mucū na norū puracū chaxūxūcèx, rü ngēmacèx taxuūma i duūxūgūmēxēwa changēxma i ñuxmax. Rū chomatama chauxetūmaā tórū Cori ya Ngechuchuxū chadau, rü ngēma puracū i nūxū chaxūxūgagu nixī i peyaxōgūxū i pemax. ² Rū woo togū i duūxūgū tama choxū cuèxgūchaūgu na tórū Cori choxū muxū, natürü i pema rü meāma nūxū pecuèx na nūma yīxū ga choxū namuxū. Yerü chauxūtawa nixī ga tórū Coriaxū peyaxōgūxū, rü ngēmawa nūxū pecuèx na aixcūma yīxū na nūma choxū namuxū. ³⁻⁴ Rū ñaā nixī i chorü dexa i namaā chanangāxūxū i ngēma duūxūgū i chauchiga idexagūxū:

“¿Éxna tama name na duūxūgū choxna naxāxū i chorü òna rü chorü axexū naxcèx i chorü puracū? ⁵ ¿Éxna tama inamexū ta na wūxi i ngexū i yaxōxūmaā na chaxāmaxū na chayagaxūcèx ngēxgumarūū na naxāmaxū i Pedru, rü naēneēgū ya tórū Cori, rü ngēma togū i yatūgū i Tupana imugūxū? ⁶ ¿Rü éxna pema nagu perūxīnūēgu rü choma rü Bernabéxicatama i tama namexū na toxū perūngūxēēgūxū ngēma togū i orearū uruūgūxū na perūngūxēēgūxūrūū? ⁷ ¿Tacū rü duūxū i churarawa ūxū i nūgūxūtama naxūtanūxū i norū òna? ¿Rü tacū rü duūxū i orix itoxū i tama namūxū i norū o? ¿Rü tacū rü duūxū i carnerugūna dauxū i tama nagūnenixū ne ixaxūxū?” Ngēma ñacharūgū nūxū i ngēma duūxūgū i chauchiga idexagūxū. ⁸ ¿Rü ñuxma rü tāūtāma nagu perūxīnūē na chorü orexicatama yīxū i ñaā nūxū chixuxū! Erü Tupanaārū ore ga Moīché ūmatūxūwa rü ta ngēma ñanagürü. ⁹ Erü ngēma ore rü ñanagürü:

“¿Rü ngēma woca i aruchuarū putēxewa puracūxū, rü tāūtāma cunawēxnagu na tama yima aruchuwa nachibūxūcèx!”

ñanagürü i ngēma ore. Rū nūxū tacuèx na tama wocagūgu naxīnūxū ga Tupana ga yexguma yema ñaxgu. ¹⁰ Natürü pemaā nūxū chixu rü tagu nixī ga naxīnūxū ga yexguma yema ñaxgu ga Tupana. Rü tachiga nixī ga naxūmatūxū ga yema ore. Erü yixema aruchunecū ūxe rü yixema norū oarū puxwa puracūxe, rü ngēxguma tapuracūeyane rü tanaxwēxegū na ítananguxēēgūxū i ngēma norū o i tūxna ūxū. ¹¹ Rū toma rü wūxi ya nanetūchire ya itatoxūnerūū tixīgū ga yexguma pemaā nūxū tixuxgu ga Tupanaārū ore. ¿Rü ñuxma rü tama éxna i pexcèx namexū na toxna penaxāxū i tacū i toxū taxuxū? ¹² Rū ngēxguma ngēma togū i orearū uruūgū petanūwa nayauxgūgu i ngēma nūxū taxuxū, rü maneca toma rü yexera name nixī i petanūwa tanayaxu i ngēma toxū taxuxū. Natürü i toma rü tama ngēmaācū tanaxū. Erü toma rü guxū i guxchaxūmaā taporae na tama pexū tanaguxchaxēēxūcèx na Cristuaxū peyaxōgūxū. ¹³ Pema nūxū pecuèx rü guxūma i duūxūgū i tupauca ya taxūnēwa puracūexū, rü ngēma òna ya yima tupaucawa ngēxmaxūtama nangōxgū. Rū ngēma duūxūgū i tupaucagu Tupanacèx naxūnagū dēixū, rü nanade i ñuxre i ngēma namachi norū ngōxruū. ¹⁴ Rū ngēxgumarūū ta ya yixema nūxū ixugūxe i ore i tūxū maxēxēxū, rü tórū Cori nūxū nixu rü name nixī i tanayauxtanū i ngēma tūmaarū puracū. ¹⁵ Natürü i choma rü taguma ngēmaācū chanaxū. Rū ñuxma na pexcèx chanaxūmatūxū i ñaā popera,

rū tama tacū choxna pexāxūcèx nixī. Erū ngēma na taguma texéxūtawa tacūcèx íchaçaxū, rū wūxi i chorū taãe nixī. Rū narümemaẽ chierū nixī na chayuxū naxūpa na texé choxna nayaxuxū i ñaã taãe i choxū ngēxmaxū. ¹⁶ Rū ñuxma na nūxū chixuxū i ngēma ore i tūxū maxēxēxū, rū taguma ngēmacèx chaugū chicuèxū. Erū woetama ngēma nixī i chorū puracū ga Tupana choxna āxū, rū ngēmacèx taxucūruwama chanangexrū. Erū poraãcū chi chachixexūgu i ngēxguma tãū chima nūxū chixuxgu. ¹⁷ Rū ngēxguma chi chaugu chitama chanaxūxgu i ngēma puracū, rū nagu chi charūxīnū na choxū naxātanūxū. Natürū ngēxguma Tupana choxū muxūãcūma chanaxūxgu, rū chanaxūama erū woetama ngēma nixī i chorū puracū ga Tupana choxna āxū. ¹⁸ ¿Rū ñuxma rū tacū tá nixī i chorū natanū naxcèx i ngēma puracū i chaxūxū? Rū dūcax, rū chorū natanū nixī i ngēma taãe i chayaxuxū i ngēxguma ngetanūãcūma nūxū chixuxgu i ngēma ore i tūxū maxēxēxū. Rū ngēmaãcū woo Tupanapēxewa name na petanūwa chanayaxuxū i chorū natanū na ngēmamaã chamaxūxūcèx, natürū taguma texena naxcèx chaca. ¹⁹ Rū woo taxūxemēxēwa changēxma i chomax, natürū guxāmēxēwa chaugū changēxmaxēe, na ngēmaãcū yexeraãcū muxūma i duūxūg ūxū charūngūxēxūcèx na Cristuaxū yaxōgūãxūcèx. ²⁰ Rū ngēxguma chautanūxū i Yudíugūtanūwa changēxmagu, rū namaã chaugū chawūxiguēe na ngēmaãcū nūxū charūngūxēxūcèx na Cristuaxū yaxōgūãxūcèx. Rū woo tama yema Moíché ūmatūxū ga mugütūūwa changēxmagu, natürū chayanguxēēama i ngēma mugū na ngēmaãcū Cristuxūtawa chanagagūxū i ngēma duūxūgū i ñuxma rū ta nagu íxū i ngēma mugū ga Moíché ūmatūxū. ²¹ Rū ngēxguma natanūwa changēxmagu i ngēma duūxūgū i tama Yudíugū ixīgūxū, rū ngēma duūxūgūmaã chaugū chawūxiguxēe na ngēmaãcū nūxū charūngūxēxūcèx na Cristuaxū yaxōgūãxūcèx. Natürū taguma íchanangēx i Tupanaãrū mugū erū guxūguma Cristuarū mugütūūwa changēxma. ²² Rū ngēxguma natanūwa changēxmagu i ngēma duūxūgū i tama poraãcū Cristuchigaxū cuèxgūxū, rū choma rū ta ngēma duūxūgūmaã chaugū chawūxiguxēe, na ngēmaãcū nūxū charūngūxēxūcèx na Cristuaxū yaxōgūãxūcèx. Rū ngēmaãcū guxūma i duūxūgūrūū chaugū chixīxēe, rū nagūxūraūãcūma naxcèx chadau na ngēmaãcū dūxwa Tupanaxūtawa chanagagūxūcèx i ñuxre i nūmagū. ²³ Rū ngēmaãcū nixī i chapuracūxū na guxūwama nanguxūcèx i ngēma ore i tūxū maxēxēxū. Erū chanaxwèxe na choma rū ta choxū nangēxmaxū i ngēma maxū i taguma gúxū, naxrūū i guxūma i ngēma duūxūgū i nūxū yaxōgūxū. ²⁴ Pema rū meãma nūxū pecuèx i wūxi i inūca i nawa iñaãchixū rū muxūma inaxūãchi, natürū wūxixicatama nixī i ngēma nūxīra ínguxū rū nayaxuxū i norū ãmare. Rū name nixī i pegūna pedau na Tupana pexna naxāxūcèx i ngēma perū ãmare. ²⁵ Guxūma i ngēma duūxūgū i nūgū ngúexēxū naxcèx i wūxi i inūca na toguegūxū naporamaexūcèx, rū meã nūgūna nadaugū na ngēmaãcū nayauxgūãxūcèx i norū ãmare i paxaãchiruū ixīxū. Natürū yixema na yaxōgūxū rū yigūna tadaugū na meã naxūgūxūcèx rū meã imaxēxūcèx na nayauxgūxūcèx i tórū ãmare i taguma gúxū. ²⁶ Rū ngēmacèx i choma rū tama ñoma chauechitamare chiñaxūrūū chixī, rū tama ñoma tacū i nūgū dèixū i ngürüanegumare idagūxūrūū chixī. ²⁷ Rū ngēmacèx meã chaugūmaã ichacuèx na taxuūma i chaxuneãrū ngúchaū chaxūxūcèx. Erū tama chanaxwèxe i mexūmaã togūxū changuxēēchirēxãcūma chixexū chaxū rū ngemagagu tama chanayaxu i chorū ãmare.

10

Nayaxucuxēgū na tama nūxū yacuèxūūgūxūcèx i tupananetachicünèxãgū

1 Pa Chaueneēgūx, chanaxwèxe i nūxna pecuèxāchie ga tacū nūxū na ngu-petūxū ga yema nuxcūmaūgūxū ga tórū oxigū ga Moīchéwe ruxīxū. Rū pema nūxū pecuèx rū yexguma nawe naxīxgu rū wūxi ga caixanexū napēxegu nixū rū nayadūxū. Rū guxūma ga yema duūxūgū rū wūxigu Moīchémaā natūūgu nixīxūtanū. Rū yexgumarūū ta Moīchémaā nawa nichoū ga yema Taxtū ga Dauchiūxū. 2 Rū guxūma ga yema duūxūgū rū yexguma wūxigu Moīchémaā yema caixanexūpechitatūūgu yaxīxūtanūgu rū yema Taxtū ga Dauchiūxūwa yachoūgu, rū yemaācū nūgū nangoxēēgū na Moīchéweama naxīxū. 3 Rū yexgumarūū ta ga guxūma ga yema duūxūgū nanangōxgū ga yema pāū ga daxūwa ruyixū. 4 Rū guxūma ga yema duūxūgū nayaxaxgū ga yema dexá ga Cristu nūxna āxū. Yerū Cristu rū yema duūxūgūxū ínixūmūcū ga yema ínaxīxūwa, rū nūxna nanaxā ga yema dexá ga yaxaxgūxū. 5 Natūrū narūmumaē ga yema duūxūgū ga tama Tupanaārū ngúchaū ūgūxū. Rū yemacèx ga yema duūxūgū rū yexma nayue rū yēma nawogū ga naxūnegū ga dauxchitawa ga taxúema íxāpataxūwa. 6 Rū guxūma ga yema nangupetū na tórū cuèxruū yīxūcè rū tama tórū oxigūrūxū chixexūcèxama idaugūxūcèx. 7 Rū ngēmacèx tama name i nūxū picuèxūūgū i tacū rū tupananchicūnèxāgū, yexgumarūū ga ñuxre ga nūmagū naxūgūxūrūū. Erū Tupanaārū ore i ūmatūxūwa rū tórū oxigūchigaxū nixu rū ñanagūrū:

“Rū duūxūgū ínarūtogū na nachibūexūcèx rū na naxaxegūxūcèx, rū ngēmawena rū inachigū na íyayūxexūcèx”,

ñanagūrū i ngēma ore. 8 Rū tama name i yixema rū naī i ngemaā itape yexgumarūū ga ñuxre ga nūmagū naxūgūxūrūū. Rū yemacèx wūxitama ga ngunexūgu rū nayue ga 23,000. 9 Rū tama name i nūxū taxū ya tórū Cori na ñuxācū yaxna tamaā naxīnūxū yexgumarūū ga ñuxre ga nūmagū naxūgūxūrūū. Rū yemacèx nixī ga yema duūxūgūxū nangōxcuxū ga āxtapegū rū nayuexū. 10 Rū tama name i chixexū Tupanamaā pixugū yema ñuxre ga nuxcūmaūgūxū ga tórū oxigūrūū. Rū yemacèx ga Tupanaārū orearū ngerū ga daxūcūāx rū nanadai. 11 Rū guxūma ga yema nuxcūmaxūgūxū ga duūxūgūxū ngupetūxū, rū ñomaxūcūū rū tórū cuèxruū nixī. Rū naxūmatū na ngēmawa nūxū icuáxūcèx na ñuxācū Tupana naxwèxexū na imaxēxū i yixema i ñomaūcūū. 12 Rū ngēmacèx ya yīxema tūgūgu ruxīnūxē na taporaxū i Tupanapēxewa, rū name nixī na meā tūgūna tadauxū na tama chixexūgu tangūxūcèx. 13 Rū ñuxma rū ta taguma pexcèx ínangu i ngúchaxū i chixexū i taxucūrūwama namaā yaxna pexīnūxū. Rū name nixī i Tupanana perūyoū erū nūma rū aixcūma nayangūxēē i ngema tamaā inaxunetaxū rū taxūtāma nawa pexū nawogū i ngúchaxūgū i taxucūrūwama yaxna namaā pexīnūxū. Natūrū ngexguma tá ngúchaxūgū i chixexū pexcèx íngūxgu rū nūma rū tá pexū ínapoxū na tama nagu peyixūcèx. 14 Rū ngēmacèx, Pa Chaueneēgū ya Pexū Changechaūgūxex, jrū nūxū perūxoe i ngema nacūmagū i tupananchicūnèxāgūcèx naxūgūxū i ngema duūxūgū i tama yaxōgūxū! 15 Pemaā nūxū chixu i ngēma ore, erū chauxcèx rū duūxūgū i nūxū cuáxū pixīgū. Rū pema tátama nagu perūxīnūē i ngēma pemaā nūxū chixuxū. 16 Rū ngēxguma ōna i ūūnexūcèx ingutaquēxegūgu, rū yaxaxgūgu ya yima binu ya ūūnecū rū moxē naxcèx íxāgūgu, rū ngēmaācū yigū tangoxēē na Cristu ya taxcèx nagū ibacūwe ruxīxū. Rū ngēxguma nangōxgūgu i ngēma pāū i ibūcuxū, rū ngēmaācū yigū tangoxēē na Cristu ya taxcèx naxūne íxācūwe ruxīxū. 17 Rū woo na imuxū i yixema, natūrū wūxitama i pāū tangōxgū. Rū ngēmaācū nixī i wūxitama íxīgūxū erū wūxiwetama tarūxī. 18 Rū dūcax i ngēma Yudíugū i nangōxgūxū i ngēma naxūnamachi i Tupanacèx nadèixū! Rū ngēxguma wūxigu nūgūmaā nangōxgūāgu, rū guxūma i ngēma nangōxgūxū

rū ngēmaācū nūgū nangoxēē na wūxigu Tupanawe naxīxū. ¹⁹ Rū ñuxma na ngēma ñachaxū, rū tama chanaxwēxe i nagu perūxīnūē na naxūūnexū i ngēma namachi i ngēma duūxūgū i tama yaxōgūxū norū tupananetachicūnēxācēx dēixū. Rū tama chanaxwēxe i nagu perūxīnūē na tacūwa namexū i ngēma norū tupananetachicūnēxāgū, erū nangearū maxūāx. ²⁰ Natūrū pemaā nūxū chixu rū ngēxguma ngēma duūxūgū i tama Tupanaxū cuēxgūxū, norū tupananetachicūnēxācēx nadaiāgu i tacū rū naxūna, rū tama Tupanacēx nixī i nadaiāxū, natūrū ngoxogūcēx nixī i nadaiāxū. Rū tama chanaxwēxe i ngoxogūtanūxūxū pegū pixīgūxēē. ²¹ Rū pema na peyaxaxgūxū ya yima binu ya tōrū Corixū namaā picuēxūūgūcū rū taxucūrūwama namaā pexāmūcū i ngēma duūxūgū i Chatanáwe rūxīxū. Rū pema na tōrū Coriarū mechawa penangōxū i ngēma ōna i nūxū namaā picuēxūūgūxū rū taxucūrūwama ngēma duūxūgū i Chatanáwe rūxīxūārū mechawa peyachibūe. ²² ¿Rū ñuxū ñapegūxū i ñuxmax? ¿Éxna penanuxēēchaū ya tōrū Cori? ¿Éxna pexcēx rū nūxū tarūporamaēgū i yixemax?

Name nixī i taeneēarū mexūc ēx tadaugū rū tama i tóxrūtama

²³ Pema rū ñaperūgūgū:

“Marū name na tanaxūxū i tacū i tanaxwēxegūxū”, ñaperūgūgū. Rū aixcūma nixī i ngēma, natūrū tama tūxū name i guxūma i ngēma ixūxchaūxū. Rū ngēmaācū Cristu tūxū ínanguxūxēē na naxūūcēx i ngēma inaxwēxexū, natūrū tama guxūma i ngēma ixūxū tūxū narūngūxēē na yexeraācū meā yaxōgūamachigūxūcēx. ²⁴ Rū tama name nixī i tóxrūtama mexūcēx tadaugū, natūrū name nixī i togūarū mexūcēx tadaugū. ²⁵ Rū marū name i penangōx i nagūxūraūxū i namachi i namaā nataxegūxū, natūrū taxucēxma tūxcūū naxcēx ípeca ngoxi marū tupananetagūxū namaā yacuēxūūgūxū i namachi yixī. ²⁶ Erū ñoma i naāne rū guxūma i nawa ngēxmaxū, rū tōrū Cori ya Tupanaarū nixī. ²⁷ Rū ngēxguma chi wūxi i duūxū i tama yaxōxū pexna uxgu na naxūtawa peyachibūexūcēx, rū chi ngēma pexīxgu, rū marū name i penangōx i guxūma i ōna i pepēxegu yaxūxūchixū. Rū taxucēxma tūxcūū naxcēx pexoegaāē rū nūxna peca na ngextá ne naxūxū i ngēma namachi i pemaā nangōxū. ²⁸ Natūrū ngūrūāchi wūxie tá pemaā nūxū tixu rū ñatarūgū:

“Ñāā namachi rū tupananetachicūnēxācēx yamēxgūxū i naxūnawa ne ūxū nixī”, ñatarūgū. Rū ngēxguma i pema rū tama name na penangōxū i ngēma namachi na tama chixexūgu tūxū penguxēēxūcēx ya yixema pemaā nūxū ixuxe, rū tama ngēmacēx taxoegaāēxūcēx i tūmax. ²⁹ Rū tama pechiga nixī i chidexaxū i ngēxguma:

“Na tama taxoegaāēxūcēx”, ñachagu. Natūrū yixema pemaā nūxū ixuxechiga nixī i chidexaxū. Natūrū bexmana ngūrūāchi wūxi i yaxōxū tá cuxna naca rū ñanagūrū tá cuxū:

“¿Tūxcūū i togū naxcēx oegaāēxūgagu choxna cunachuxu na tama chanaxūxū i tacū i chanaxwēxexū? ³⁰ Rū ngēxguma chi Tupanana moxē chaxāxgu naxcēx i ngēma ōna i changōxū, ¿rū tūxcūū i ngēma ōnacēx choxū quixu?” ñanagūrū. ³¹ Dūcēx, pemaā nūxū chixu rū name nixī i guxūma i ngēma pexūxūmaā Tupanaxū picuēxūxūgū. Rū ngēxguma tacū pengoxgūgu rū exna tacū pixaxgūgu rū ēxna tacū i to pexūgūgu, rū name nixī i ngēmamaā Tupanaxū picuēxūxūgū. ³² Rū tama name i penaxū i tacū i togūxū chixexūgu yixēēxū, rū woo Yudíugū yixīgūgu rū ēxna tama Yudíugū yixīgūgu, rū ēxna yaxōgūxū yixīgūgu. ³³ Rū choma rū guxūwama guxūxūma chataāēxēēchaxū. Rū ngēmacēx tama chanaxū i ngēma chomatama namaā chataāēxēēchaxū, natūrū

chanaxū i ngema togū namaã taãxēxū na ngemaãcū nūmagū rü ta nuxū nangúchaxū na yaxōgūãxū rü nayauxgūãxū i maxū i taguma gúxū.

11

¹ Rū name nixī i nagu pexī i chaucūma ngēxgumarūū i choma na Cristucūmagu chixūūrūū.

Name nixī i ngexūgū rü mexū i nacūmagu naxī

² Pa Chaueneēgūx, pemaã chataãē erū guxūguma chaugu perūxīnūē rü nagu pexī ga yema nguxēētae ga pexū changúexēēxū. ³ Natürü chanaxwèxe i nūxū pecuèx na Cristu rü wūxichigū i yatūeru na yīixū. Rū yatūxūgū rü naxmèxēru nixīgū ngēxgumarūū ya Tupana rü Cristueru na yīixū. ⁴ Rū ngēmacèx i ngēxguma wūxi ya yatū ngutaquèxewa yumūxēgu rü ēxna Tupanaärü orexū yaxuxgu, rü tama íngèxūchipatèxegu, rü ngēma rü wūxi i chixexū nixī i Cristupèxewa naxūxū. ⁵ Natürü ngēxguma chi wūxi i ngecū ngutaquèxewa yumūxēgu rü ēxna Tupanaärü orexū yaxuxgu, rü chi tama ngīgū natūerugu, rü ngēma rü wūxi i chixexū nixī i ngītepèxewa naxūxū. Rū ñoma ngīgū yadūeruxūūrūū iyixī. ⁶ Erū ngēxguma chi tama ngīgū natūeruchaūgu, rü narūmemaē nixī i noxtacūma ngīgū ibèixeru. Natürü ngēxguma chi wūxi i ngīrū āne yixīgu i ngēma na ngīgū nabèixeruxū rü ēxna ngīgū yadūeruxū, rü narūmemaē nixī i ngīgū itūeru. ⁷ Natürü yatūgū rü tama name na nūgū natūerugūxū. Yerū ga Tupana rü nūgūraūācū nanaxū ga yatū rü Tupanachipeta nixī. Rū yima yatūwa nixī i nangóxū na ñuxācū namexēchixū ya Tupana. Rū ngēma ngecūwa nixī i nangóxū na ñuxācū namexū ya yatū. ⁸ Yerū yexguma noxri Tupana naxūxgu ga yatū, rü tama ngecūwa nixī ga naxūāxū. Rū ngīma waxi nixī ga yatūwa ngīxū naxūxū. ⁹ Rū yatūcèx nixī ga Tupana ngīxū ūxū ga ngecū, rü tama ngecūcèx nixī ga Tupana naxūxū ga yatū. ¹⁰ Rū ngēmacèx name nixī i ngīgū itūeru na duūxūgūpèxewa rü Tupanaärü oreatū ngeruūgū i daxūcūāxgūpèxewa nangóxūcèx na ngītemèxēwa nangēxmaxū. ¹¹ Natürü Tupanapèxewa rü taxuūma nixī ya yatū ega natauxgu i ngecū. Rū ngēxgumarūū ta i ngecū rü taxuūma iyixī ega natauxguma ya yatū. ¹² Yerū yexguma noxri Tupana ngīxū ūxgu ga ngecū, rü yatūwa nixī ga ngīxū naxūxū. Rū ngēxgumarūū ta ya yatū rü ngecūwa nixī i nabuxū. Natürü Tupana nixī ya naxūcū i guxūma i duūxūgū. ¹³ Rū pematama tá penangugū rü ngoxi name na wūxi i ngecū rü tama ngīgū natūeruācūma nayumūxèxū. ¹⁴ Rū woetama tórü bucūma nixī i nūxū na icuáxū na wūxi i āne yīixū na nūgū namèxyaexēēxū i wūxi i yatūxū. ¹⁵ Natürü ngecūcèx rü wūxi i mexēchixū nixī na namèxyaexū. Erū Tupana rü ngīxna nanaxā i ngīyae na ngēmamaã ngīgū natūeruxūcèx. ¹⁶ Natürü ngēxguma chi texé ngēmachiga tūgū choxūgagūgu, rü name nixī i nūxū tacuèx na ngēmatama yīixū i tacūma rü nacūma i guxūma i yaxōgūxū i guxūnema ya tupaucagūwa.

Duūxūgū rü chixri namaã inacuèxgū ga Coriarū òna i üünexū

¹⁷ Rū ñuxma i ñaã popera i pexcèx chaxūmatūxūwa rü pemaã nūxū chixu rü nangēxma i wūxi i pecūma i chixexū i tama namaã chataãēxū. Erū chauxcèx i ngēma perū ngutaquèxegū rü pexū nachixexēē, rü tama aixcūma perū meruūgū nixī. ¹⁸ Erū duūxūgū chomaã nūxū nixugūgū rü ngēxguma tórü Coricèx pengutaquèxegūūxgu rü pegū pitoye. Rū ngāxūgu chayaxō na aixcūma yīixū i ngēma nūxū yaxugūgūxū. ¹⁹ Choma rü nūxū chacuèx na aixcūma woe tátama yīixū i pegū pitoyexū na ngēmawa nūxū icuáxūcèx na texégū tīixū ya yíxema aixcūma Cristuarū duūxūgū ixīgūxe. ²⁰ Rū ngēma pegū na pitoyexūgagu nixī na tama aixcūma tórü Corixū picuèxūūgūācūma yīixū

i penangõxũ i tórũ Coriarũ õna i Üünexũ i ngẽxguma pengutaquẽxegũũxgu. ²¹ Erũ ngẽxguma penangõxgu i ngẽma õna i Üünexũ rü wüxichigũ rü peñuxãẽgũ na pexira na penayaxuxũcèx i ngẽma õna. Rü yoxni i ngẽma togũ rü ngẽxma nataiyae, rü togũ rü nayaxaxgũ ya binu ñuxmata nangãxẽ. ²² ¿Éxna pengechiũgũ ecèx tama ngẽma pechibüexũ rü pexaxegũxũ? ¿Tũxcũũ nüxũ pexoe i ngẽma togũ i yaxõgũxũ rü penaxãneẽxẽe i ngẽma yaxõgũxũ i ngearũ ngẽmaxũãxgũxũ? ¿Rü tacũxũ tá pemaã chixu i ñuxmax? ¿Pexcèx rü tá pemaã chataãẽxũ? Dücèx, pemaã nüxũ chixu rü tama pemaã chataãẽ naxcèx i ngẽma pexũgũxũ.

Tórũ Coriarũ õna i üünexũchiga

²³ Rü ngema nguxẽẽtae i pemaã nüxũ chixuxũ rü tórũ Corixütawatama chanayaxu. Rü yexguma tórũ Cori ga Ngechuchuxũ ínaxuaxũgu, rü yematama chütaxũgu rü nüma rü nanayaxu ga wüxi ga pãũ. ²⁴ Rü Tupanana moxẽ naxã, rü yemawena rü inanabücu, rü ñanagürü:

“Ñãã nixĩ i chaxune i pexcèx ichaxãxũchiga. ¡Rü penangõ i ñãã pãũ na ngẽmaãcü peãẽwa choxna pecuẽxãchiexũcèx!” ñanagürü. ²⁵ Rü yexgumarũũ ta ga chibüwena rü Ngechuchu nanayaxu ga wüxi ga pochuyu ga binuchiümaããacũxũ, rü ñanagürü:

“Rü daa binu rü wüxi i cuèxruũ nixĩ na ngexwacèx Tupana duũxũgũmaã ixunetaxũ i maxũ i taguma gũxũchiga. Rü chaugũ ya pexcèx ibacũmaã nixĩ i Tupana pexũ nüxũ cuèxẽẽxũ i ngẽmachiga. Rü ngẽxguma ñuxguacũ daa binu pixaxgũgu rü ñuxma choma na chanaxũxũrũũ tá penaxũ na peãẽwa choxna pecuẽxãchiexũcèx”, ñanagürü ga Ngechuchu. ²⁶ Rü guxũguma i ngẽxguma penangõxgu i ñãã pãũ rü peyaxaxgũgu ya daa binu rü ngẽmawa tá duũxũgũxũ nüxũ picuẽxẽẽ na ñuxãcü tórũ pecaducèx nayuxũ ga tórũ Cori. Rü ngẽmaãcü tá penaxũ ñuxmatáta wena nataegu i nümax.

Texegüçèx nixĩ i tórũ Coriarũ õna i üünexũ

²⁷ Natürü ngẽxguma chi texe tama tũgũ tamexẽẽarũ maxũxãcüma nangõxgu i Coriarũ pãũ i üünexũ rü tayaxaxũxgu ya yima binu ya üünecũ, rü pecadu taxũ napewa ya tórũ Cori ya taxcèx yucũ rü nagũ ibacũ. ²⁸ Rü ngẽmacèx naxũpa na tanangõxũ i ngẽma pãũ rü na tayaxaxũxũ ya yima binu, rü name nixĩ i wüxichigũ meã tũmaarũ maxũgu tarũxĩnũ ngoxi nataxuma i tacũ rü chixexũ i tũmaarũ maxũwa. ²⁹ Erũ ngẽxguma tama tũgũ tamaxẽẽarũ maxũãcüma tanangõxgu rü tayaxaxũxgu, rü tũgũtama poxcuwa taga. Erũ tama aixcüma tayaxõ na tórũ Corichiga yixĩxũ i ngema pãũ rü yima binu.. ³⁰ Rü ngẽmacèx nixĩ i muxũchixe i petanüwa rü pidaaweexũ rü peturaexũ, rü ñuxre i togũ rü marũ nayuexũ. ³¹ Natürü ngẽxguma chi tórũtama maxũgu rüxĩnũegu naxũpa na nangõxũ i ngẽma Coriarũ õna, rü nüma rü taxucèx tũxũ napoxcue. ³² Natürü ngẽxguma tórũ Cori ñoma i tórũ maxũwa tũxũ poxcugu, rü ngẽmaãcü tũxũ inayarüwẽxãchixẽẽ na tama yixcüra naãneãrũ guxgu tũxũ napoxcuxũcèx wüxigu namaã i ngẽma duũxũgũ i tama yaxõgũxũ. ³³ Rü ngẽmacèx, Pa Chaueneẽgũx, ngẽxguma pengutaquẽxegũgu na penangõxũcèx i ngẽma õna i üünexũ, name nixĩ i pegũ ípenanguxẽẽ na guxãma wüxigu meã penangõxũcèx. ³⁴ Rü ngẽxguma chi texé taiyèxgu, rü name nixĩ i tũmapatawatama tachibü na tama Tupana pexũ poxcuexũcèx naxcèx na chixexũ pexüexũ i perũ ngutaquẽxegüwa. Rü ngẽma to i guxchaxũgũ i pexũ ngẽxmaxũ, rü choma tá chanamexẽẽ i ngẽxguma petanüwa chaxũxgu.

12

Ngẽma cuèx i Tupanaãẽ i Üünexũ tũxna ãxũchiga

¹ Pa Chaueneēgūx, chanaxwèxe i nūxū pecuèx na ñuxācū yīxū i ngēma cuèx rü ñuxacū na yixīxū i ngema tauxcha i Tupanaāē i Üünexū tūxna āxū. Rū ngēmachiga nixī i pemaā nūxū chixuxchaūxū i ñuxmax. ² Rū pema meāma nūxū pecuèx ga yexguma tauta Cristuaxū peyaxōgūgu, rü pegū nūxna pexāgū ga tupananetachicūnèxāgū ga tama idexaxū. ³ Rū ngēmacèx i ñuxma rü chanaxwèxe i meā nūxū pecuèx rü taxucürüwama texe ya Tupanaāē i Üünexū tūmawa ngexmaxe rü chixri Ngechuchuchuga tidexa. Rū ngexgumarūxū ta rü taxucürüwama texe ngürümare tüechama rü:

“Ngechuchu rü tórü Cori nixī”, ñatarügü ega tama Tupanaāē i Üünexū tūxū muxgu na ngēmaācū tidexaxūcèx. ⁴ Rū nūma ya Tupana rü duūxūgūna nanaxā i naguxūraū i tauchagū. Natürü ngema Naāxē i Üünexū i nawa ne naxīxū i ngema tauchagū rü wūxitama nixī. ⁵ Nangēxma i nagúxūraūxū i Tupanaarū puracū, natürü yima tórü Cori ya tūxna naxācū i ngema puracūgū rü wūxitama nixī. ⁶ Rū Tupanaarū pora rü nagúxūraūācū nangox. Natürü wūxitama nixī ya yima Tanatū ya tawa gúxūraūācū nangoxēēcū i ngema norü puracū. ⁷ Rū ngema Naāē i Üünexū wūxixewachigū nanangoxēē i Tupanaarū pora i norü duūxūgūtanūwa na ngemaācū guxāarū ngūxēēruū yixīxūcèx. ⁸ Rū Naāē i Üünexū rü tūmāxena rü nanaxā i tauxcha na ucuēxū tacuāxūcèx. Rū ngēmatama Naāē i Üünexū rü togueāxū rü nanatauxchaxēē na nūxū tacuāxū na mea tangúexēētaexū i Tupanaarū ore. ⁹ Rū togue rü ngēmatama Naāē i Üünexū tūxū nanatauxchaxēē na Tupanana tarüyoexūcèx. Rū togue rü tūxna nanaxā i pora na ngēmamaā naxcèx tayataanegūxēēxūcèx i ngēma idaaweexū. ¹⁰ Rū togue rü tūxna nanaxā i pora na tanaxūxūcèx i mexūgū i Tupanaarū poramaā ūxū. Rū togue rü tūxū nanatauxchaēē na nūxū tixuxūcèx i Tupanaarū ore. Rū togue rü tūxna nanaxā i cuèx na nūxū tacuāxūcèx i tacū yīxū i ngoxogūarū ixīxū rü tacū yīxū i Tupanaāē i Üünexūārū ixīxū. Rū togue rü tūxna nanaxā i tauxcha na ngēma tama nūxū tacuāxū i nagawa tidexaxūcèx. Rū togue rü tūxna nanaxā i cuèx na tanangoxēēxūcèx na tacūchiga yīxū na tidexaxū ya yixema to i nagawa idexáxe. ¹¹ Rū guxūma i ngēma rü Tupanaāē i Üünexūtama nixī i naxūxū. Rū nūma nixī i wūxichigū i duūxūna naxāāxū i ngēma cuèx i nūma nanaxwèxexū na nūxna naxāāxū.

Guxāma i yaxōgūxū rü wūxitama i naxūnewa naxūgū

¹² Rū duūxūxūne rü woo muxūgu nixūye, natürü wūxitama i naxūne nixī. Rū ngexgumarūxū ta i ngema Cristuāxū yaxōgūxū rü woo namu, natürü wūxitama i naxūnewa naxūgū. ¹³ Rū yexguma íbaiūgu rü Tupanaāē i Üünexū rü wūxitama i naxūne tūxū nixīgūxēē. Rū woo Yudíugū na ixīgūxū, rü ēxna tama Yudíugū na ixīgūxū, rü woo togūmēxēwa ingexmagūxū rü ēxna taxúxemēxēwa ingēxmagūxū, natürü wūxitama i naxūne tūxū nixīgūxēē i nūma i Naāē i Üünexū i nūxicatama ixīxū. Rū guxāma i yixema rü marū tūxna nangu i ngēma Naāē i Üünexū. ¹⁴ Wūxi i naxūne rü tama naxāmenāxamare, natürü muxūgu nixūye. ¹⁵ Rū ngēxguma chi yima nacutū ñaxgu:

“Rü ñuxma na tama naxmēx chiīxū, rü ngēmacèx tama ngēma naxūnewa changēxma”, ñaxgu, rü tama ngēmacèx nūxū narūxo na ngema naxūnewa nangexmaxū. ¹⁶ Rū ngēxguma chi yima naxpaxchinū ñaxgu:

“Rü ñuxma na tama naxētū chiīxū, rü ngēmacèx tama naxūnewa changēxma”, ñaxgu, rü tama ngēmacèx nūxū narūxo na ngema naxūnewa nangexmaxū. ¹⁷ Rū ngēxguma chi guxūma i naxūne rü naxētū yixīgu, ¿rū tacūmaā chi i nūxū naxīnūxū i ngema naxūne? Rū ngēxguma chi

guxūma i naxūne rü naxmachixē yixīgu, ɷrū ɷacūmaã chi i nüxū nawāxīxū?
 18 Natürü Tupana ga naxúcü ga taxūne, rü ngexta nüma ínanaxwèxexūwa nanangexmaxēē i taeru rü tachacüügü rü taparagü. 19 Rū ngēxguma chi nataxuxgu i norü üyechigü i taxūne rü chi naxāmenèxāmare. 20 Rū ngema naxūne rü woo muxūgu nixūye, natürü wüxitama i naxūne nixī. 21 Rū taxetü rü taxucürüwa taxmēxū ñanagürü:

“Choma rü tama chacuxwèxe”, ñanagürü. Rū ngēxgumarüü ta i taeru rü taxucürüwa tacutügüxū ñanagürü:

“Choma rü tama chapexwèxe”, ñanagürü. 22 Natürü ngēma yexeraācü āücūmaxū i taxūnewa, rü ngēma nixī i yexera nanaxwèxexū i taxūne. 23 Rū ngēma taxūnewa yexeraācü naxcèx ixānexū, rü ngēma nixī i yexera meã ixūxchiruxū. Rū ngēma taxūnewa ngēxmaxū i tama inaxwèxexū na nangóxū, rü ngēma nixī i yexera meã idūxūxū. 24 Natürü tama ngēmaācü tanaxū namaã i ngēma taxūnewa ngēxmaxū i guxāxūma iwéxū. Rū ngēmaācü Tupana nanaxū i taxūne, na yexeraācü nüxna idauxúcèx i ngēma yexera naxcèx ixānexū. 25 Rū ngēmaācü Tupana nanaxū i taxūne na wüxichigü i norü üye nügügu naxīnüexúcèx rü nügü nangūxēēgüxúcèx. 26 Rū ngēxguma chi wüxi i ngēma taxūnearü üye nüxū nguxgux, rü guxūma i ngēma togü i natanūxūgü rü ta nüxū nangux. Rū ngēxguma chi wüxi i ngēma taxūnearü üye taāēxgu, rü guxūma i ngēma togü i natanūxūgü rü ta nataāēgü. 27 Rū ñuxma i wüxichigü i pema rü Cristuxūnearü üye pixīgü, rü ngema naxūnewa pexügü. 28 Rū ngēmacèx ya Tupana rü nanaxwæe na ñaacü nügü inanuxū i norü duūxūgü: Rū yíxema tüxira tüxū naxunetagusē tixī ya norü puracüwa tüxū namugūxe. Rū tüxū naxuneta ya togegü na nüxū tixugūxúcèx i norü ore. Rū tüxū naxuneta ya togegü na duūxūgüxū tangúexēēxúcèx i norü ore, rü togegü na tanaxūgūxúcèx i mexūgü i Tupanaārü poramaã taxūgūxū. Rū togegü rü tüxū nanatauxchaxēē na tanameexēēxúcèx i idaaweexū, rü togegü na nüxū tarüngūxēēgüxúcèx i ngema ɷacü nüxū taxuxū, rü togegü yaxōgūxūārü āēxgacügü na tixīgüxúcèx. Rū tüxū nanatauchaxēē ya togegü na ngēma naga i tama nüxū tacuáxūwa tidexagūxúcèx. 29 Rū tama guxāma Tupana tüxū imugūxe tixīgü, rü tama guxāma Tupanaārü orearü uruū tixīgü. Rū tama guxāma norü orewa nguxēētaegūxe tixīgü, rü tama guxāma nüxū tacuèx na tanaxūxū i mexūgü i taxūgü i Tupanaārü poramaã üxū. 30 Rū tama guxāma nüxū tacuèx na tanameēxēēxū i duūxūgü i idaaweexū. Rū tama guxāma nüxū tacuèx na nawa tidexagūxū i wüxi i naga i tama nüxū tacuáxū. Rū tama guxāma nüxū tacuèx na tanangoxēēxū na ɷacūchiga yadexaxū i ngēma duūxūgü i tama nüxū nacuáxū i nagawa idexaxū. 31 Rū name nixī inaxcèx pedèux na Tupana pexna naxāxúcèx i ngēma cuèx rü tauxchagü i rümemaegūxū.

Yigü na ingechaūgūxūchiga

Natürü i ñuxma rü tá pexū changúexēē i ɷacü nixī i guxūma i ngēma pemaã nüxū chixuxūārü yexera rümemaēxū.

13

1 Rū woo togü i nagawa chideaxgu, rü woo Tupanaārü orearü ngeruūgü i daxūcūāxgawa chideaxgu, natürü ñoma wüxi i ɷacü i āgaxürüūmare chixī ega tama guxāxū changechaūgu. 2 Rū woo nüxū chacuèxgu na meã duūxūgūmaã nüxū chixuxū i Tupanaārü ore, rü woo nüxū chacuèxgu i guxūma i ɷacü i ēxūgūxū i Tupanachiga, rü woo choxū natauxchagu na chorü ōmaã chayaxīgachixēēxū ya mēxpūnegü, natürü taxuwama chame ega tama guxāxū changechaūgu. 3 Rū woo ngēma duūxūgü i ngearü dīeruāxgūxūxū

chayanuxgu i guxūma i tacū i choxū ngēxmaxū, rü woo Tupanaärü ore cèx chaugū ichaxāxgu na üxūwa choxū yagugūxcèx, rü taxuwama choxū name i ngēma ega tama guxāxū changechaūgu. ⁴ Rü yíxema guxāxū ngechaūxē, rü yaxna namaā taxīnū, rü namaā tamedūma. Rü tama tixāūxāchiwèxe, rü tama togūxū tūgū tarüyexera rü tama tūgū ticuèxū. ⁵ Rü yíxema aixcūma guxāxū ngechaūxē, rü tama taguxchigawèxe, rü tama tūgūguxicatama tarūxīnū, rü tama tanuxwèxe, rü tama nagu tarūxīnūēcha ega texé chixexū tūmamaā üxgu. ⁶ Rü tama namaā tataāē i chixexūgū, natürü namaā tataāē i ngēma ore i aixcūma ixīxū. ⁷ Rü yíxema aixcūma guxāxū ngechaūxē, rü yaxna namaā taxīnū, rü guxūguma nūxū tayaxō, rü guxūguma mexūgu namaā tarūxīnū, rü taguma naxchi taxai woo tacū tūmamaā naxūxgu i togū. ⁸ Rü ngēma yigū na ingechaūxū rü tagutāma inayacuèx. Natürü ngēma na nūxū ixuxū i Tupanaärü ore rü wūxi i ngunexūgu tá inayacuèx. Rü ngēma tama nūxū icuáxū i nagawa na idexaxū, rü tá ta inayacuèx. Rü ngēma ñuxma nūxū icuáxū rü wūxi i ngunexūgu rü marū taxuwatāma tūxū name. ⁹ Erü ngēma tórü cuèx i ñuxma tūxū ngēxmaxū, rü Tupanapēxewa rü naxíra. Rü ngēxgumarū ta i ngēma norü orexū na ixuxū, rü wūxi i íramarexūtama nixī. ¹⁰ Rü guxūma i ngēma rü tá inayarūxo i ngēxguma Tupanapēxewa ingugūgu rü nūma tá guxūxūma tūxū nacuèxēēgu. ¹¹ Yexguma chabuxgu ga chomax, rü wūxi ga buxūrū chidexa, rü buxū nagu rüxīnūxūgu charūxīnū, rü tama meā chauāēxū chacuèx. Natürü yexguma marū chayèxgu, rü nūxū charūxo ga guxūma ga yema chorü bucūma. ¹² Rü ngēma ñuxma nūxū idauxū i Tupanachiga, rü ñoma wūxi i worua ya üxachametūxewa yigū idauxūrū nixī na taxcèx naxēxū. Natürü yixcūra rü tá aixcūma meā nūxūxūchi tadau ya Tupana. Rü ñuxma rü írarūwatama nūxū chacuèx i Tupanachiga. Natürü wūxi i ngunexūgu rü tá meā nūxū chacuèx i guxūma i nachiga, ngēma na Tupana meāma choxū cuáxūrū. ¹³ Rü ñuxma rü nangēxma i tomaēxpūx i nacūmagū i guxūgutāma ngexmaxū. Rü ñaāgū nixī:

1 Rü Tupanaāxū tayaxōgū

2 Rü nūxū ítananguxēē na nataeguxū ya Cristu

3 Rü nūxū tacuèx na tamücūxū ingechaūxū.

Natürü ngēma tomaēxpūxtanūwa rü ngēma rümemaexū nixī na guxāxū ingechaūxū.

14

Ngēma tama nūxū icuáxū i nagawa na idexaxūchiga

¹ |Rü naxcèx pedèux na guxāxū pengechaūxū! Rü ngēxgumarū ta name nixī i naxcèx pedau i ngema tauxchagū rü ngema cuèx i Naāē i Üünexūwa ne īxū. Rü ngēma cuèx i yexeraācū penaxwaexū nixī na pexū natauxchaxū na nūxū pixuxū i Tupanaarü ore. ² Yíxema duūxē ya tama nūxū tacuáxū i nagawa idexaxe, rü Tupanamaā nixī i tidexaxū rü tama i duūxūgūmaā, erü taxúema nūxū tacuèx na ñuxū ñaxūchiga yīxū. Rü Tupanaāē i Üünexū nixī i tūxū idexaxēēxū, natürü ngēma ore i nūxū tixuxū rü ēxūguxū nixī. ³ Naturü yíxema nūxū ixuxe i Tupanaarü ore rü ngema yaxōgūxūarü ngūxēēxū tixī, erü yexeraācū cuèxwa tanangugūxēē rü nūxū tanangúchaxūxēē i ngema ore rü tanataāēxēē i ngema yaxōgūxū i ngexguma guxchaxū nūxū üpetūgu. ⁴ Rü yíxema duūxē ya tama nūxū tacuáxū i nagawa idexaxe, rü tūmacèxtama nixī i ngema na yexeraācū mea Tupanaāxū tayaxōxūcèx. Natürü yíxema nūxū ixuxe i Tupanaarü ore rü nūxū tixu na yexeraācū Tupanaāxū yaxōgūāxūcèx i guxūma i yaxōgūxū. ⁵ Choma chierü chanaxwèxe na guxāma i pema rü ngēma tama nūxū pecuáxū i nagawa na pidexagūxū. Natürü yexeraācū chanaxwèxe

na duūxūgūmaā nūxū pixuxū i Tupanaārū ore. Erū ngēma to i nagawa na pidexagūxūārū yexera narūmemaē na togūmaā nūxū pixuxū i Tupanaārū ore. Natūrū ngēma to i nagawa na idexaxū, rū name ega ngēma yaxōgūxūmaā nūxū ixuxgu na ſacūchiga yīxū i ngēma dexta, na nūmagū rū ta yexeraācū meā Tupanaāxū yaxōgūāxūcēx. ⁶ Rū ngēmacēx, Pa Chaueneēgūx, rū ngēxguma chi pexūtawa chaxūxgu, rū chi to i nagawa chideaxgu, ſrū ſacūwa chi pexū namexū i ngēma? Natūrū ngēxguma chi pemaā nūxū chixuxgu i ngēma Tupana tūxū nūxū cuèxēēxū, rū ēxna ngēma chomatama nūxū chacuāxū na aixcūma yīxū, rū ēxna ngēma ēxūguxū i űuxma Tupana tūxū nūxū cuèxēēxū, rū ēxna ſacū rū to i nguxēētae i Tupanachiga, rū ngēma waxi nixī i pexū mexū. ⁷ ſRū dūcax ngēma paxetarū i quena rū ēxna arpa! Rū ngēxguma tāū chima texé meā napaūxgu, rū tāū chima nūxū tacuèx na ſacūgu tanapaxūxū. ⁸ Rū ngēma churaragū, rū ngēxguma norū uwanūgūmaā nūgū nadaixchaūgu, ſrū űuxācū tá nūgū namexēē na nūgū nadēixūcēx ega tama meā nangógagu ya yima corneta ya dēixcēx naxcēx çaxūne? ⁹ Rū ngēxgumarūū ta pexū nangupetū. Rū ngēxguma chi perū conūmaā nūxū pixuxgu i dexta i taxúema nūxū cuāxū, ſrū űuxācū tá nūxū tacuèx na űuxū űaxūchiga yīxū i ngēma nūxū pixuxū? Rū űoma ngūrūanewa pidexagūxūrūū tá pixīgū. ¹⁰ Rū aixcūma nixī i namuxū i nagagū i űoma i naānewa. Rū guxūma i ngēma nagagū rū name naxcēx i ngēma duūxūgū i nawa idexagūxū. ¹¹ Natūrū ngēxguma chi tama nūxū chacuēxgu i ngēma naga i to i duūxū chomaā nawa idexaxū, rū ngēma duūxūcēx rū űoma to i nachiuānecūāxrūū chixī, rū chauxcēx rū űoma to i nachiuānecūāx i duūxūrūū nixī i nūmax. ¹² Choma nūxū chacuèx rū pema rū pexū nangūchaū na pexū nangēxmaxū i ngēma nacūmagū i Tupanaāē i Ūūnexū tūxna āxū. Natūrū name nixī i naxcēx pedau na guxūārū yexera pexna naxāāxū i ngēma nacūmagū i namaā nūxū perūngūxēēxū i guxūma i yaxōgūxū na yexeraācū meā Tupanaāxū yaxōgūāxūcēx. ¹³ Rū ngēmacēx yīxema duūxē ya taxúema nūxū cuāxū i nagawa idexaxe, rū name nixī i Tupanana naxcēx taca na tūxna naxāāxūcēx i cuèx na togūmaā nūxū tixuxūcēx na űuxū űaxūchiga yīxū i ngēma nūxū tixuxū. ¹⁴ Rū ngēxguma chi taxúema nūxū cuāxū i nagawa chayumūxēgu, rū chauāē nixī i ngēma yumūxēxū. Natūrū chomatama rū taxuūma chacuèx na ſacūchiga yīxū i ngēma. ¹⁵ ſRū űuxācū tá chayumūxēxū i űuxmax? Rū marū name nixī ega taxúema nūxū cuāxū i nagawa chayumūxēgu, natūrū chanaxwēxe i guxāma nūxū cuāxū i nagawa rū ta chayumūxē. Rū marū name nixī ega taxúema nūxū cuāxū i nagawa chawiyae, natūrū chanaxwēxe i guxāma nūxū cuāxū i nagawa rū ta chawiyae. ¹⁶ Erū ngēxguma chi taxúema nūxū cuāxū i nagawa Tupanaxū quicuèxūūgu, rū yīxema duūxēgū ya ngēma irūxīnūēxē, rū taxucūrūwa cumaā wūxigu Tupanaxū ticuèxūūgū, erū tama nūxū tacuèx na űuxū űaxūchiga yīxū i ngēma nūxū quixuxū. ¹⁷ Rū woo ngēma curū yumūxē rū namexēchixgu, natūrū yīxema duūxēgū ya ngēma irūxīnūēxē rū taxuūma i mexū nawa tayaxu ega to i nagawa quideaxgu. ¹⁸ Tupanana moxē chaxā, erū perū yexera taxúema nūxū cuāxū i nagawa chidexa. ¹⁹ Natūrū woo muxūma i ore i taxúema nūxū cuāxū i nagawa na chidexaxū, natūrū ngēma yaxōgūxūārū ngutaquēxegūwa rū chauxcēx rū narūmemaē chi nixī ega woo noxre i ore i meāma nūxū icuāxūwa namaā nūxū chixuxgu i Tupanaārū ore na ngēmaācū ngēmamaā meā chanangūxēēxūcēx. ²⁰ Pa Chaueneēgūx, tama name i űoma buxūgūrūū chixri nagu perūxīnūe i ngēma ore i pemaā nūxū chixuxū. Rū narūmemaē nixī i űoma buxūgūrūxū pegū pixīgūxēē naxchēxwa i ngēma chixexū, natūrū ngēma peru īnūwa rū penaxwēxe i duūxūgū i marū yaxūrūū mea nagu perūxīnūe rū nagu pexī i ngēma ore i pemaā nūxū

chixuxū. ²¹ Tupanaārū ore ga nuxcūmaūxū ga norū orearū uruū ūmatūxū rū ñanagūrū:

“Rū nuā tá chanamugū i to i nachiuñecūāx i duūxūgū na to i nagawa yadexagūxūcèx namaā i ñaā Yudiūgū i tama yaxōgūxū. Natūrū woo ngēmaācū chanaxūxgu, rū tāūtāma chauga naxīnūē i ngēma Yudiūgū i tama irūxīnūēchaūxū”,

ñanagūrū ga Tupana. ²² Rū ngēmacèx ngēma na taxúema nūxū cuáxū i nagawa idexaxū, rū wūxi i cuèxruū nixī naxcèx i ngēma duūxūgū i tama irūxīnūēchaūxū. Rū tama duūxūgū i marū yaxōgūxūcèx nixī i ngēma. Natūrū ngēma Tupanaārū orexū na ixuxū, rū duūxūgū i marū yaxōgūxūcèx nixī na yexeraācū meā Tupanaāxū yaxōgūāxūcèx. Rū tama duūxūgū i tama irūxīnūēchaūxūcèx nixī i ngēma. ²³ Rū ngēxguma chi pema i yaxōgūxe pengutaquēxegūgu, rū guxā chima to i nagawa pidexagūgu, ¿rū ñuxū ñaxū tá ega petanūgu naxūcuxgu i wūxi i duūxū i ngēma iyarūxīnūxū rū ēxna wūxi i duūxū i tauta yaxōxū? ¿Taux ēxna i nagu tá naxīnūxū na pexāūāēgūxū i pemax? ²⁴ Natūrū ngēxguma chi guxāma i pema nūxū pixuxgu i Tupanaārū ore, rū chi petanūgu naxūcuxgu i wūxi i duūxū i tama yaxōxū rū ēxna wūxi i duūxū i ngēma iyarūxīnūxū, rū tá nūxū naxīnū i ngēma Tupanaārū ore i nūxū pixuxū. Rū ngēmaācū tá nūxū nacuèx na nūma rū wūxi i pecaduāxū na yīxū. Rū nūgūgu tátama ínarūxīnū i ngēxguma nūxū naxīnūgu i ngēma nūxū pixugūexū. ²⁵ Rū ngēma chixexū i nūxīcatama nūxū nacuáxū rū tá naxcèx ínicuèx. Rū nūma rū ngēxma tá nacaxāpūxū, rū tá Tupanaxū nicuèxū. Rū tá nūxū nixu na aixcūma Tupana petanūwa nangēxmaxū.

Tama name i penaxīxāchiāxēgū i perū ngutaquēwa, rū name i meamare penaxū

²⁶ Dūcèx, Pa Chaueneēgūx, ñuxma tá pemaā nūxū chixu na ñuxācū tá penaxūxū ega ngēxguma pengutaquēxegūgu. Rū ñuxre i pema rū marū name na Tupanaārū wiyaegu pewiyaegūxū, rū togue rū tanguxēētaegūxū, rū togue rū nūxū tixuxū i ngēma ore i Tupana tūxū nūxū cuèxēēxū, rū togue rū nawa tidexagūxū i naga i tama nūxū tacuèxgūxū, rū togue rū tanangoxēēgūxū i ngēma dexa i to i nagawa nūxū yaxugūxū. Natūrū guxūma i ngēma rū tanaxwēxe i yaxōgūxūārū ngūxēēcèx na yīxū, na yexeraācū yaxōgūāxūcèx rū meā Tupanacèx namaxēxūcèx. ²⁷ Rū ngēxguma to i naga i pema tama nūxū pecuáxūwa pidexagūgu, rū name nixī i taxre rū ēxna tomaēxpūxicatama tidexagū. Rū tanaxwēxe i wūxiexira tidexa i noxri rū yixcama ya togue. Rū ngēxguma chi texé to i nagawa ideaxgu, rū name nixī na tangēxmaxū ya wūxie ya nūxū ixuchigūxe na tacūchiga yīxū i ngēma ore i to i nagawa nūxū yaxuxū. ²⁸ Natūrū ngēxguma chi tatauxgu na texé nūxū ixuchigūxū na tacūchiga yīxū i ngēma ore i to i nagawa nūxū yaxuxū, rū narūmemaē nixī na noxtacūma tama to i nagawa pidexagū i perū ngutaquēxewa. Rū narūmemaē i wūxichigū tūxica Tupanamaāxīcatama bexma tidexa. ²⁹ Rū ngēxgumarūū ta ngēxguma pengutaquēxegūgu, rū name nixī i taxre rū ēxna tomaēxpūxicatama nūxū tixu i Tupanaārū ore. Rū ngēma togū i ngutaquēxetanūxū rū name nixī na meā nangugūgūāxū i ngēma ore. ³⁰ Natūrū ngēxguma chi íyadexayane i wūxi i duūxū, rū Tupana tūmamaā ideaxgu ya togue ya ngēma rūtōxe, rū name nixī na iyanachianexū i ngēma nūxīra idexaxū na tidexaxūcèx ya yixema duūxē ya Tupana tūmamaā idexaxe. ³¹ Rū ngēmaācū guxāma i pema na Tupana pemaā idexaxū, rū name nixī i wūxichigū ípenanguxēē na pewa nanguxū na pidexagūxū i Tupanaārū ore. Rū ngēmaācū i ngēma togū i ngutaquēxetanūxūgū rū tá Tupanachiga meā nangúe rū tá nataāēgū. ³² Rū ngēmaācū tanaxwēxe i meāma tūmaāēmaā itacuèx ya wūxichigū ya yixema Tupanaārū orexū ixuxe.

33-34 Erü perü ngutaquëxegüwa rü Tupana nanaxwëxe na meã penaxüxü i guxüma, rü tama nanaxwëxe na ngema pexãũgatanüxü rü pegü ípetüexëxü. Rü guxüma i togü i yaxõgüxüãrü ngutaquëxegüwa rü marü nüxü nayapue na tama yadexagüxü i ngexügü. Rü name nixĩ i pema rü ta ngëmaãcü penaxü, erü nachuxu na yadexagüxü i ngexügü i ngutaquëxegüwa. Rü name nixĩ na yatügüga naxĩnüexü i ngexügü, ngëma Tupanaãrü ore tüxü muxürü. 35 Rü ngëxguma chi tacüxü nacuáxchaũgu i wüxi i ngexü, rü name nixĩ i nachiwatama natena naca i nachiga i ngëma. Erü wüxi i ãne nixĩ ega ngutaquëxewa yadeaxgu i wüxi i ngexü. 36 Pa Corĩtiucüãxgüx, name nixĩ na nüxna pecuëxãchiexü na tama pewaxira ne naxüxü i Tupanaãrü ore. Rü tama pexicatama nixĩ i penayauxgüxü i ngëma. 37 Rü ngëxguma chi texé tügügu rüxĩnügü na Tupanaãrü orearü uruü tĩxü rü ëxna tügügu tarüxĩnügü na Tupanaãe i Üünexü tüxna naxãxü i tacü rü cuëx, rü name nixĩ i nüxna tacuëxãchi na tórü Coriarü ore yĩxü i ñãã ore i pexcëx chaxümatüxü. 38 Natürü ngëxguma chi texé tama nüxü cuáxchaũgu i ngëma pemaã nüxü chixuxü, rü name nixĩ i tama tüxü pecuáxchaũ. 39 ¡Rü ngëmacëx, Pa Chaueneëgüx, rü Tupanana naxcëx peca i cuëx na meãma nüxü pixuxücëx i norü ore! ¡Rü tama penachuxu na to i nagawa yadexagüxü i duüxügü! 40 Rü perü ngutaquëxegüwa, rü name nixĩ na meã penaxüxü i guxüma. Rü tama name i ngema pexãũgatanü rü pegü ípetüexëë.

15

Cristu na yuwa írudaxüchiga

1 Rü ñuxmax, Pa Chaueneëgüx, rü chanaxwëxe i nüxna pecuëxãchie i ngëma Tupanaãrü ore i tüxü maxëxëxü ga pemaã nüxü chixuxü. Rü yematama ore nixĩ ga pema peyauxgüxü. Rü ñuxma rü ngëmatama oregagu nixĩ i meã peyaxõgüxü. 2 Rü ngëma oregagu nixĩ i pexü nangëxmaxü i maxü i taguma gúxü, ega aixcüma guxüguma peyaxõgüamagu. Natürü ngëxguma tama guxüguma peyaxõgügu, rü natüçëxmamare nixĩ i ngëma perü õ. 3 Rü yexguma noxri petanüwa changuxgu, rü yema nüxira pexü changüxëxü nixĩ ga yema chaxira togü choxü nguxëxü na Cristu rü tórü pecaducëx nayuxü, ngëma Tupanaãrü ore i ümatüxüwa nüxü yaxuxürü. 4 Rü yexgumarü ta pexü changüxëë na ñuxãcü inatëxgüãxü, rü ñuxãcü norü tomaëxpüx ga ngunexügu rü wena na namaxüxü, ngëma Tupanaãrü ore i ümatüxüwa nüxü yaxuxürü. 5 Rü yexgumarü ta pexü changüxëë ga ñuxãcü Pedrucëx na nangóxü ga Cristu, rü ñuxãcü yixcüra rü norü ngüxügü ga yamugüxücëx na nangóxü. 6 Rü yemawena ga Cristu rü noxtacüma 500 arü yexera ga yaxõgüxücëx nangõx. Rü muxüma i ngëma duüxügü rü ñuxma rü ta namaxë, natürü nümaxü rü marü nayue. 7 Rü yemawena rü Chaũtiágucëx nangõx, rü yixcama guxüma ga yema togü ga ngüxügücëx nangõx. 8 Rü düxwa chowa inayacuëx ga chauxcëx rü ta na nangóxü, woo ngürüãchimare nixĩ ga yema, ngëxgumarü i wüxi i buxü i tautama norü ngunexüwa nanguyane buxürü. 9 Rü choma rü guxüma i ngëma togü i Tupana imugüxütüüwa chaxü. Rü ngemacëx tama name i Tupana imuxümaã choxü naxugüxü i duüxügü, yerü nawe chingëchigü ga Tupanaãrü duüxügü rü poraãcü chixexü chaxü. 10 Natürü ga Tupana rü chomaã namecüma, rü ngëmacëx i ñuxma rü choxü pedau na tacü chiixü rü ñuxãcü na chiixü. Rü yema chomaã na namecümaxü rü tama natüçëxma nixĩ. Yerü choma rü guxü ga togü ga yamugüxüãrü yexera chanaxü ga Tupanaãrü puracü. Natürü tama chauechama chanaxü ga yema puracü, natürü Tupana ga chomaã mecümacü rü chomaã puracücü nixĩ ga naxücü ga yema puracü na nüxü chixuxücëx ga norü ore. 11 Natürü i ñuxma

rū nūetama nixī ega woo choma chixīgu rū ēxna togū yixīgu ga pemaã nūxū ixuxū ga yema ore. Yerū yema ore ga pemaã nūxū tixuxū, rū Tupanaārū ore i tūxū maxēēxū nixī, rū yema nixī ga pixōgūxū.

Ñuxācū wena tá namaxē i duūxūgū i yuexū

¹² Marū pemaã nūxū tixu na Cristu rū yuwa ínadxū. ¿Rū tūxcūū ñuxre i pema rū ñaperūgūgū:

“Yuexū rū tagutáma wena namaxē”, ñaperūgūgū? ¹³ Rū ngēxguma chi ngēma yuexū rū tagu chima wena namaxēgu rū yima Cristu rū tāu chima wena namaxū. ¹⁴ Rū yexguma chi Cristu tama wena maūxgu, rū ngēma ore i nūxū tixuxū i nachiga rū taxuwa chima name, rū natūcēxmamare chi nixī i perū ō. ¹⁵ Rū ngēxguma chi ngēmaācū yixīgu, rū toma i Tupanaārū orearū uruūgū rū doratēēxgūxū tixīgū. Erū nūxū tixu na Tupana Cristuxū wena maxēēxū. Rū ngēxguma chi tama aixcūma yixīgu na wena namaxēxū i yuexū, rū chi wūxi i doramare nixī na Tupana Cristuxū wena maxēēxū. ¹⁶ Rū ngēxguma chi ngēma yuexū rū tagu chima wena namaxēgu, rū ga Cristu rū chi ta tāu chima wena namaxū. ¹⁷ Rū yexguma chi Cristu tama wena maūxgu, rū natūcēxmamare chi nixī i peyaxōgūxū, rū ñuxma rū chi ta perū pecadugagu ipeyarūtauxe. ¹⁸ Rū chi ngēmaācū yixīgu rū ngēma duūxūgū i Cristuaxū yaxōgūxū i marū yuexū, rū chi ta tāu chima nūxū nangēxma i maxū i taguma gūxū. ¹⁹ Rū ngēxguma chi ñoma i maxūcēxicatama yixīgu na Cristuaxū yaxōgūxū, rū chi guxū i togū i duūxūgūarū yexera tangechaūtūmūgū. ²⁰ Natūrū aixcūmaxūchi nixī ga Cristu ga yuwa na ínadxū. Natanūwa i guxūma i ngēma yuexū i yixcūra tá írūdagūxū, rū Cristu nixī ga namaã inaxūgūcū na ínadxū, yerū nūma nixī ga nūxīra wena namaxūxū. ²¹ Rū yexgumarūū wūxi ga yatūgagu na nayuexū ga duūxūgū, rū ngēxgumarūū tá ta nixī na wūxi i yatūgagu wena namaxēxū i ngēma marū yuexū. ²² Rū ngema na Adáūgagu guxāma na yuexū, rū ngēxgumarūū ta Cristugagu tá namaxēxū i guxūma i duūxūgū i nūxū yaxōgūxū. ²³ Natūrū wūxichigū tá tūmawa nangu na wena tamaxūxū. Rū Cristu nixī ga nūxīra maxūcū. Rū ngēxguma wena nūma naxūxgu i nūmax, rū ngēxguma tá nixī i wena namaxēxū i ngēma duūxūgū i noxrū ixīgūxū. ²⁴ Rū ngēmawena tá nixī i nagúxū i naāne. Rū ngēxguma tá nixī ya Cristu i nūxū naporamaēxū i guxūma i norū uwanūgū. Rū ngēxguma tá nixī i Nanatū ya Tupanana naxāāxū i guxūma na nūma namaã inacuáxūcēx. ²⁵ Erū nūma ya Cristu rū āēxgacū tá nixī ñuxmatáta nūxū naporamaē i guxūma i norū uwanūgū. ²⁶ Rū ngēma nawa iyacuáxū i norū uwanū i tá nūxū naporamaēxū, rū yu nixī. ²⁷ Yerū Tupana rū marū Cristumēxēwa nanayexmagūxēē ga guxūma. Natūrū woo Tupanaārū ore nūxū ixuxgu na Cristumēxēwa nangēxmagūxū i guxūma, natūrū nūmatama ya Tupana rū tama Cristumēxēwa nangēxma. Yerū nūma ga Tupana nixī ga Cristumēxēwa nayexmagūxēēāxū ga guxūma. ²⁸ Rū ngēxguma guxūma Cristumēxēwa ngēxmagūgu, rū ñuxūchi nūmatama ya Cristu ya Tupana Nane rū tá Nanatūmēxēwa nūgū nangēxmaxēē. Yerū nūma ga Tupana nixī ga Cristumēxēwa nayexmagūxēēāxū ga guxūma. Rū ngēmaācū ya Tupana rū guxūmaā tá inacuēx. ²⁹ Rū nangēxma i ñuxre i duūxūgū i petanūwa i Tupanaegagu yuexūchicūū íbaiūxū. ¿Rū tūxcūū ngēma naxūgū? Rū ngēxguma chi tama wena namaxēgu i duūxūgū i yuexū, ¿rū tūxcūū ngēma yuexūchicūū ínabaiū? ³⁰ ¿Rū tūxcūū i toma rū guxūguma āūcūmaxūwa tangēxmagū? ³¹ Pemaã nūxū chixu, Pa Chaueneēgūx, rū guxū i ngunexūgu rū āūcūmaxūwa changēxma, rū tama nūxū chacuēx i tacū rū ngunexūgu Tupanaārū oregagu tá na chayuxū. Rū ngēma rū aixcūmaxūchi nixī, ngēxgumarūū na aixcūma yīixū na choxū nangēxmaxū i wūxi i taāē i taxū

i ñuxma na tórü Cori ya Ngechuchu ya Cristuaxü peyaxögüxü. ³² Choma rü nuã Epéchiuwa rü Tupanaãrü orechigagu chorü uwanümaã poraãcü togü tachoxügagü. Rü ñoma naëxü i idüraexümaã togü tadèixürüü tixígu. ¿Natürü tacüwa choxü namexü ga yema ega chorü maxü i ñoma i nañewa choxü ngëxmaxüçèxicatama yixígu? Rü ngëxguma chi aixcüma yixígu na tama wena namaxëxü i yuexü, rü marü name i ñatarügügü:

“¡Ngíxã tachibüe rü taxaxegü, erü paxa tá tayue!” ñatarügügü. ³³ ¡Natürü tãütáma nawe perüxí i ngëma duüxügü i ngëmaãcü chixri idexagüxü! Erü aixcüma nixí i ngëma ore i ñaxü:

“Rü texé ya chixexü i duüxümaã amücüxe, rü tüxü inayanaxoxëë i tümacümagü i mexü”, ñaxü. ³⁴ Rü name nixí i meã pegüãëgu perüxínüë rü nüxü perüxoe i ngëma perü chixexügü. Rü wüxi i perü ãne nixí na pemaã nüxü chixuxü rü ñuxre i pema rü tama aixcüma Cristuarü duüxügü pixíguxü rü tama aixcüma Tupanaxü pecuëxgüxü.

Ñuxãcü wena namaxë i yuexügü

³⁵ Natürü ngürüãchi tá texe pexna taca rü ñatarügü pexü:

“¿Ñuxãcü tá wena namaxëxü i yuexü? ¿Rü nañuxraüxü i naxünemaã tá ínadagüxü?” ñatarügü tá pexü. ³⁶ Pa Duüxü i Ngëãëmarexüxürü dücax! Rü ngëxguma wüxi ya nanetüchire itoxgu, rü nüma ya yima naxchire rü nayu na ngemaãcü naxüçèx i ngëma nanetü. ³⁷ Rü ngëma waixümügu itoxü, rü tama marü nanetü ixíxü nixí, natürü naxchire nixí ya yima itoxüne woo triguchire rü éxna ngexürüxümare i to i nanetüchire yixígu. ³⁸ Rü ngëxguma marü inatoxguwena, rü Tupana nixí i yanaxüxëcü ya yima nachire na nüma nanaxwëxëxüãcüma yíxüçèx i ngëma nanetü. ³⁹ Rü tama guxü i naxünegü nawüxigu. Rü duüxëxüne rü nanatoraxü, rü naëxügüxüne rü to nixí, rü werigüxüne rü to nixí, rü choxnigüxüne rü to nixí. ⁴⁰ Rü ngëxgumarüü ta nangëxma i naxünegü i daxügüxü i nañecüãx, rü nangëxma i naxünegü i ñoma i nañecüãx. Rü ngëma daxügüxü i nañecüãx i naxünegü rü nüxü nangëxma i noxrütama mexü, rü ngëma ñoma i nañecüãx i naxünegü rü ta nüxü nangëxma i noxrütama mexü. Natürü tama nawüxigu i ngëma norü mewa. ⁴¹ Rü üëxcüarü yauracüü rü tama namaã nawüxigu i tauemacüarü yauracüü. Rü woramacurigüarü yauracüü rü to nixí. Rü nügütanüwa ya woramacurigü, rü tama nawüxigu i norü yauracüüwa. ⁴² Rü ngëxgumarüü tá ta naxüpetü namaã i naxünegü i ngëma duüxügü i yuexü. Erü ngëma naxüne i noxri nüxü ngëxmaxü rü iyarüxoxwëxëxü nixí. Natürü ngëma naxüne i tá nüxü ngëxmaxü i ngëxguma wena namaxëgu, rü ngëma rü tagutáma inayarüxo. ⁴³ Rü ngëma naxüne i yuxü rü taxuwama name i ngëxguma inatëxgux. Natürü ngëxguma wena namaüxgu rü tá namexëchi. Rü ngëma naxüne i ñuxma turaxü rü ngëxguma wena namaüxgu rü tá napora. ⁴⁴ Rü itanatëx i ngëma naxüne i ñoma i nañecüãx ixíxü. Natürü ngëxguma ínadxgu, rü daxüçüãx i naxüne tá nixí. Rü ñuxma na nangëxmaxü i naxüne i ñoma i nañecüãx rü ngëmawa nüxü tacuëx na nangëxmaxü ta i naxüne i daxüçüãx. ⁴⁵ Tupanaãrü ore i umatüxüwa rü ñanagürü:

“Guma nüxíraücü ga yatü ga Adáü rü nüxü nayexma ga ñoma ga nañecüãx ga naxüne ga paxaãchi maxüxü”, ñanagürü. Natürü ya Cristu rü daxüçüãx nixí. Rü nüma nixí i tüxna naxããxü i maxü i taguma gúxü. ⁴⁶ Noxri rü tüxü nangëxma i ñoma i nañecüãx i taxüne. Natürü yixcama rü Tupana tá tüxna nanaxã i to i taxüne i daxüçüãx ixíxü. ⁴⁷ Guma nüxíraücü ga yatü ga waixümüwa ücü, rü ñoma ga nañecüãx nixí. Natürü tórü Cori ya Cristu rü daxügüxü i nañecüãx nixí. ⁴⁸ Rü ngëma

taxūnegü i ñoma i nañewa tüxü ngēxmaxü, rü guma Adáüxüne ga waixümüwa ücürüü nixīgü. Natürü ngēma naxūnegü i daxüwa nüxü ngēxmaxü i duüxügü, rü Cristuxūnerüü nixīgü. ⁴⁹ Rü ñgexgumarüü na Adáü ga waixümüwa ücürüü na yīixü i taxüne, rü ngēxgumarüü tá ta Cristu ya daxüwa ngēxmacürüü nixī i taxüne i yixcūra. ⁵⁰ Rü dücax, Pa Chaueneēgüx, pemaã nüxü chixu rü ñaã taxüne i namachinaxcèx rü naxchinèxānaxcèx, rü taxucürüwa Tupana ãēxgacü íyīixüwa nangu. Erü ngēma iyarüxoxü, rü taxucürüwama Tupanaxütawa i ngextá taxuüma íyarüxoxüwa nixücu. ⁵¹ Natürü chanaxwèxe na nüxü pecuáxü i wüxi i ore i èxügüxü ga noxri Tupanaxīcatama nüxü cuáxü. Rü dücax, tãütáma guxã tayue, natürü guxãxüne rü tá naxüchicüü. ⁵² Rü ngürüächimare wüxi i peãxëtügu tá nixī i ngēma na naxüchicüüxü i taxüne i ngēxguma naãneãrü guxgux naxãgagu ya corneta. Rü tá naxãga ya yima corneta, rü ngēxguma i ngēma duüxügü i yuexü rü tá ínarüdagü na tagutáma wena nayuexüçèx. Rü yixema na imaxèxü rü tá naxüchicüü i taxūnegü. ⁵³ Erü ngēma taxüne i yuxwèxexü rü woetama tama taixü rü tá naxüchicüü. Rü wüxi i ngexwacaxüxü i naxüne i aixcüma taixü rü tagutáma yuxü tá nixī. ⁵⁴ Rü ngēxguma ngēmaãcü naxüchicüügu i taxüne i yuxwèxexü, rü tüxü nangēxmagu i taxüne i ngexwacaxüxü i taguma yuxü, rü ngēxguma tá nixī i yanguxü i Tupanaãrü ore i ümatüxü i ñaxü:

“Marü inayarüxo na nayuexü i duüxügü. Rü Tupana rü marü yuxü narüyexera. ⁵⁵ Rü dücax, Pa Yux, ¿ngēxü i curü pora i namaã toxü curüyexeraxü? ¿Rü ngēxü i ngēma cuxne i namaã toxü cudèixü?”

ñanagürü i ngēma Tupanaãrü ore. ⁵⁶ Rü ngēma naxne i yu, rü pecadu nixī. Erü ngēma pecadu nixī i naporaxèèxü i ngēma yu na tüxü nadèixüçèx. Rü ngēma mugü ga Moiché ümatüxü nixī i naporaxèèxü i pecadu, erü woo namexgu i ngēma mugü, natürü taxucürüwama texé aixcüma tayanguxèè. ⁵⁷ Natürü name nixī i Tupanana moxè taxã yerü núma nanamu ga tórü Cori ya Ngechuchu ya Cristu na ngēma yuxü tüxü naporamaèxèèxüçèx. ⁵⁸ Rü ngēmacèx, Pa Chaueneēgü ya Pexü Changechaügüxex, rü name nixī i meã peyaxögüama rü taguma ípenatèx i Tupanaãrü ore. Rü name nixī i guxüguma meã penaxü i tórü Coriarü puracü, erü pema nüxü pecuèx rü ngēma puracü i nüxü pexüxü, rü tama natüçèxma nixī.

16

Togü i yaxögüxüçèx inanutaque ga dīeru

¹ Rü ñuxma tá pemaã nüxü chixu i nachiga i ngēma dīeru i penutaquèxexü na namaã nüxü perüngüxèègüxüçèx i taeneēgü i yaxögüxü i Yudéaanewa ngēxmagüxü. Rü ngēma yaxögüxü i Gárataanewa ngēxmagüxü rü marü namaã nüxü chixu na ngīxü nanutaquèxegüxü i ngēma dīeru. Rü chanaxwèxe i pema rü ta ngēxgumarüü penaxü. ² Rü ngēma dīeru i perü puracüwa ngixü peyaxucüwa rü guxcü i yüxüarü ngunexügu rü tá ngixü pexã i ngēma dīeru i Tupanaarü ixïcü. Rü ngīmaã tá penguxü na tama ngēxguma ngēma changuxguama ngīxü na pedexüçèx. ³ Rü ngēxguma petanüwa changuxgu, rü tá chanaxümatü i ñuxre i poperagü naxcèx i taeneēgü i Yerucharéüwa ngēxmagüxü. Rü ñuxüchi ngēma poperamaã tá Yerucharéüwa chanamugü i ngēma duüxügü i pema nüxü pexunetaxü na ngēma ngīxü nangegüxüçèx i ngēma dīeru i taeneēgüçèx ngīxü penutaquèxecü. ⁴ Rü ngēxguma chi choxü natauxchagu na ngēma Yerucharéüwa chaxüxü, rü nümagü rü tá wüxigu chomaã ngēma naxī.

Pauru nagu narüxñü na Corītiuwa naxüxü

⁵ Choma rü Machedóniãñewa tá chaxüpetü na íchayadauxüçèx i taeneëgü i ngema ngëxmagüxü. Rü ngëma wena rü tá petanüwa changu na pexü íchayadauxüçèx. ⁶ Rü ngürüãchi tá ñuxre i ngunexügü ngëxma petanügu charüxãüx, rü bexmana ngürüãchi ngema petanüwa tá chanangupetüxëe ya mucü. Rü ngëxguma rü tá pexü natauxcha na choxü perüngüxëegüxü na ngëma íchaxüxchaüxüwa chaxüxüçèx. ⁷ Erü tama chanaxwèxe i paxaãchimare pexü chadau. Natürü petanügu charüxãüxchaü i ñuxre i ngunexü ega chi norü ngúchaxü yixüxgu ya tórü Cori. ⁸ Natürü nuã Epéchiuarü ñãñewa tá changëxma ñuxmatáta Pëtecóstearü ngunexüwa nangu. ⁹ Erü nuã rü tórü Cori poraãcü choxü nanatauxchaxëe na nüxü chapuracüxüçèx rü nüxü yaxögüãxüçèx i muxüma i duüxügü woo namu i ngëma tama naxwëxegüxü na nuã chapuracüxü. ¹⁰ Rü ngëxguma chi Timutéu petanüwa nguxgu, rü chanaxwèxe i meãma penayaxu na petanüwa nataãexüçèx. Erü nüma rü ta chauxrüü tórü Coriarü puracüwa napuracü. ¹¹ Rü ngëmacèx tama chanaxwèxe i texé petanüwa nüxü taxoe. Natürü chanaxwèxe i nüxü perüngüxëe na taãeãcüma nuã naxüxü na choxü íyadauxüçèx. Erü poraãcü íchananguxëe na nuã nanguxüçèx namaã i ngëma togü i taeneëgü. ¹² Rü ngëma taeneë i Aporu rü poraãcü nüxü chacèxü na petanüwa íyadauxüçèx namaã i ngëma togü i taeneëgü. Natürü tama ngëma naxüxchaü i ñuxmax. Natürü ngëxguma naxãchicagu rü tá ngëma naxü.

Pauru nüxü narümoxë ga yema yaxögüxü

¹³ ¡Rü pexuãegü na taxuüma i chixexügu peyixüçèx! ¡Rü meãma peyaxögüama woo tacü pexü üpetügu! Rü name nixü i peporaema rü taxucèxma pemuë. ¹⁴ Rü guxüma i ngëma pexüxü, rü name nixü i pegü pengechaügüãcüma penaxü. ¹⁵ Rü dücax, Pa Chaueneëgüx, pema nüxü pecuèx na Estéfanatanüxügü yixü ga nüxüra yaxögüxü ga Acayaanewa. Rü meãma nüxü pecuëxgü na ñuxãcü poraãcü taeneëgü i yaxögüxüxü na nangüxëegüxü. ¹⁶ Rü chanaxwèxe i naga pexüñüë i ngëma duüxügü i Estéfanatanüxügürüü ixügüxü. Rü ngëxgumarüü ta chanaxwèxe i naga pexüñüë i guxüma i ngëma duüxügü i ñaã Tanatüarü puracüwa puracüexü rü ngüxëetaegüxü. ¹⁷⁻¹⁸ Rü ñuxma na taxucürüwama chauxütawa pengëxmagüxü, rü wüxi ga chorü taãe nixü na núma naxüxü ga taeneëgü ga Estéfana rü Fortunátu rü Acáicu. Rü yema taeneëgü ga núma íxü rü pexü nixuchigagü rü yemaãcü choxü nataãexëegü ga yema pexü na nataãexëegüxü. Rü tanaxwèxe i naga pexüñüë rü nüxü pengechaü i ngëma duüxügü i ngëmagürüü ixügüxü. ¹⁹ Rü guxüma i taeneëgü i yaxögüxü i Áchiaaneärü ñãnegüwa ngëxmagüxü, rü moxë pexcèx ngëma namugü. Rü Aquiru rü Prisila rü guxüma i ngëma yaxögüxü i Aquirupatawa ngutaquëxegüxü, rü moxë pexcèx ngëma namugü naegagu ya tórü Cori. ²⁰ Rü guxüma i taeneëgü i núma ngëxmagüxü rü moxë pexcèx ngëma namu. Rü chanaxwèxe i wüxichigü i pema rü pegü pengechaügüãcüma pegü perümoxëgü. ²¹ Choma i Pauru rü choxmëxmaãtama pexcèx chanaxümatü i ñaã chorü moxë. ²² Rü ngëxguma chi texé tama tórü Cori ya Ngechuchu ya Cristüxü ngechaügu, rü Tupana tá tüxü napoxcu. Rü paxa tá ínangu ya tórü Cori. ²³ Rü chanaxwèxe i tórü Cori ya Ngechuchu ya Cristu poraãcü pexü narüngüxëe. ²⁴ Rü guxüma i pema, rü poraãcü pexü changechaüãcüma pexü charümoxë naegagu ya tórü Cori ya Ngechuchu ya Cristu.

Rü nuãma pexna,
Pauru

NORŪ TAXRE GA POPERA GA CORÍTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corŭtiuwa yexmagŭxŭ

¹ Pa Chaueneēgŭ i Corŭtiucŭāxgŭ i Tupanaāxŭ yaxōgŭxŭ, rü Pa Chaueneēgŭ i Guxŭma i Acayaanewa Ngēxmagŭxŭ, choma i Pauru nixŭ i pexcēx chanaxŭmatŭxŭ i űaā popera wŭxigu namaā i taeneē i Timutéu. Rü choma nixŭ i Tupana choxŭ yaxuxŭ na Ngechuchu ya Cristu choxŭ muxŭ na nüxŭ chixuxŭcēx i norŭ ore. ² Rü tanaxwēxe na Tanatŭ ya Tupana rü tŕrŭ Cori ya Ngechuchu ya Cristu pexna nanaxā i norŭ ngechaxŭ rü norŭ taāxŭ.

Pauru rü ngŭxŭ ninge

³ Rü toma rü nüxŭ ticuēxŭgŭ ya Tupana ya Nanatŭ ya tŕrŭ Cori ya Ngechuchu ya Cristu. Erŭ nüma nixŭ ya Tanatŭ ya nüxŭ ingechaŭtŭmŭgŭcŭ rü tŕrŭ Tupana ya guxŭguma tŭxŭ taāxēēcŭ. ⁴ Rü nüma ya Tupana rü toxŭ nataāxēē i ngēxguma ngŭxŭ tingexgu, na toma rü ta tanataāxēēgŭxŭcēx i ngēma togŭ i duŭxŭgŭ i ngŭxŭ ingegŭxŭ. Rü ngēmaācŭ ngēma Tupana toxŭ na taāxēēxŭrŭŭ toma rü ta tanataāxēēgŭ i ngēma togŭ i duŭxŭgŭ. ⁵ Rü űuxma na Cristurŭŭ poraācŭ ngŭxŭ tingegŭxŭ, rü ngēxgumarŭŭ nümatama poraācŭ toxŭ nataāxēē. ⁶ Rü ngēmacēx, ngēxguma toma ngŭxŭ tingegŭgu, rü ngēmaācŭ toxŭ nangupetŭ na pema rü pexŭ nangēxmaxŭcēx i perŭ taāē rü perŭ maxŭ i taguma gŭxŭ. Rü ngēxguma Tupana toxŭ taāxēēgu, rü ngēmaācŭ tomaā nanaxŭ na pema rü ta pexŭ nangēxmaxŭcēx i perŭ taāē rü yaxna namaā pexŭnŭēxŭcēx i ngēxguma ngēmatama ngŭxŭ i toma tingegŭxŭ pexŭ ngēxmagu. ⁷ Toma rü aixcŭma tayaxōgŭ na pema rü tagutāma ipenatāxŭ i Tupanaārŭ ore. Erŭ nüxŭ tacuēx rü ngēma na toxrŭŭ ngŭxŭ pingegŭxŭ, rü ngēxgumarŭŭ tá ta toxrŭŭ pexŭ nangēxma i ngēma taāē i Tupanawa ne ŭxŭ. ⁸ Pa Chaueneēgŭx, tanaxwēxe i nüxŭ pecuēx na űuxre ga guxchaxŭgŭ toxŭ ngupetŭxŭ ga Achiaanewa. Rü yema na poraācŭ toxŭ naguxchaxŭ, rü dŭxwa marŭ tama namaā taporae, rü nagu tarŭxŭnŭē na marŭ tāŭtāma tamaxēxŭ. ⁹ Rü nagu tarŭxŭnŭē rü űoma yuwa taxŭxŭrŭŭ tixŭgŭ. Natŭrŭ yemaācŭ toxŭ naxŭpetŭ, erŭ Tupana ya yuexŭxŭ írŭdagŭxēēcŭ toxŭ nangŭexēēchaŭ na nüxŭcatama nüxŭ nangēxmaxŭ i pora na yuwa toxŭ ínanguxŭxēēxŭcēx, rü taxucŭrŭwama togŭtama na ítanguxŭxēēxŭ. ¹⁰ Rü Tupana rü toxŭ ínanguxŭxēē nawa ga yema guxchaxŭ ga yuwa toxŭ gagŭchaŭxŭ. Rü ngēxgumarŭŭ tá ta toxŭ ínanguxŭxēē nawa i űaā taxŭ i guxchaxŭ i űuxma toxŭ ngēxmaxŭ. Rü aixcŭma tayaxōgŭ na nüma rü guxŭgutāma ngēmaācŭ toxŭ nangŭxēēxŭ. ¹¹ Natŭrŭ tanaxwēxe i pema rü perŭ yumŭxēmaā toxŭ perŭngŭxēē. Rü ngēxguma chi ngēmaācŭ penaxŭxgux, rü muxŭma i duŭxŭgŭ rü tá Tupanana moxē naxŭgŭ naxcēx i ngēma na űuxācŭ toxŭ nangŭxēēxŭ.

Tŭxcŭŭ tama Corŭtiuwa naxŭ ga Pauru

¹² Nangēxma i ŭacŭ i toxŭ taāxēēxŭ. Rü ngēma nixŭ na toōēwa nüxŭ tacuāxŭ na űoma i naānewa rü aixcŭma Tupana naxwēxexŭācŭma meā tamaxēxŭ. Rü pepēxewa nixŭ ga guxŭārŭ yexera yemaācŭ tamaxēxŭ. Natŭrŭ tama togagu nixŭ ga yema, yerŭ Tupana ya tomaā mecŭmacŭ nixŭ ga toxŭ rŭngŭxēēcŭ na yemaācŭ pepēxewa tamaxēxŭcēx. ¹³⁻¹⁴ Rü yema poperagu ga pexcēx taxŭmatŭxŭwa, rü nataxuma ga ŭacŭ ga icŭxŭ. Natŭrŭ yema toma tamaxēxŭācŭma nixŭ ga pexcēx tanaxŭmatŭxŭ na yemawa meā nüxŭ

pecuáxúcèx na ñuxâcû tixîgûxû. Rû woo i ñuxma rû tama aixcûma meã toxû na pecuáxû, natürü chanaxwèxe i wüxi i ngunexûgu rû aixcûma meã toxû pecuèx. Rû ngëxguma meã toxû pecuèxgu rû pema rû tá tomaã petaãëgü i ngëxguma íngaxgu ya tórü Cori ya Ngechuchu, rû ngëxgumarüü i toma rû tá ta pemaã tataãëgü. ¹⁵⁻¹⁶ Rû yemagu charüxîñüxúcèx nixî ga noxri ga pexûtawa na chaxûxchaûxû na pexû íchayadauxúcèx rû yemaãcû pexû na charüngüxëëxúcèx. Rû nagu charüxîñü ga Machedóniãñewa chaxûxgu na pexûtagu íchidauxû, rû yexguma Machedóniãñewa ne chaxûxgu rû wenaxârü pexûtagu íchidauxû. Rû yemaãcû chanaxûxchaû, yerü nagu charüxîñü na yemawena choxû perüngüxëëxû na Yudéañewa chaxûxúcèx. ¹⁷ Bexmana pema nagu perüxîñüëgu rû tama aixcûma chayanguxëëgaãcûma nagu charüxîñü ga yema pexûtawa na chaxûëgaxû. ¿Éxna pema nagu perüxîñüëgu rû ñoma wüxi i duûxû i tama Tupanaãxû yaxõxürüüãcûma chamaxû, rû “Ngü” ñacharügüchirëx woo tama chayanguxëëgagu i ngëma nüxû chixuxû? ¹⁸ Natürü Tupana toxû nacuèx na aixcûma yîixû i ngëma torü ore ega pemaã itaxunetagu. ¹⁹ Erü yima Ngechuchu ya Cristu ya Tupana Nane ga guma Chiribánu rû Timutéu rû choma pemaã nüxû tixuchigacû, rû ore i aixcûma ixîxûxúicatama nixu. Rû nüma rû aixcûma nayanguxëë i ngëma nüxû yaxuxû. ²⁰ Rû Cristu nixî ya yima yanguxëëcû ga guxûma ga yema unetagu ga Tupana nuxcûmaxûchi nüxû ixuxû. Rû ngëmacèx ngëxguma Ngechuchuëgagu Tupanaxû icuèxüügügu, rû ñatarügügu:

“Rû aixcûma nixî i ngëma”, ñatarügügu. ²¹ Rû ñuxma na Cristuarü duûxügü ixîgûxû, rû Tupana nixî ya toxû poraexëëcû rû pexû poraexëëcû na taguma Cristuna ixîgachixúcèx. Rû nümatama nixî ga tüxû nadexû na noxrü ixîgûxúcèx. ²² Rû nüma ya Tupana rû naëga tagu naxû erü tórü yora nixî. Rû nüma rû tüxna nanamu i Naãë i Ünexû na wüxi i tórü cuèxruü yîixúcèx, rû ngëmawa nüxû icuáxúcèx na yixcûra tá tüxna naxããxû i muxûma i to i mexügü. ²³ Pema nüxû pecuèx ga noxri rû Corítuwa chaxûxchaû, natürü tama yéma petanüwa chaxû yerü tama chanaxwèxe na pexû changechaûgüxëëxû. Rû yemacèx tama pexûtawa íchayadau, yerü tama pexû chingagüchaû. Rû Tupana nüxû nacuèx na aixcûma na yîixû ga yema. ²⁴ Rû tama tanaxwèxe na pexû tamuxû na ñuxâcû tá Tupanaãxû peyaxõgûxû. Erü pema rû marü aixcûma meãma peyaxõgü. Natürü ngëma tanaxwèxexû nixî na pexû tarüngüxëëgûxû na yexeraãcû petaãëgüxúcèx.

2

¹ Rû yemacèx nixî ga tama wena pexûtawa chaxûxû, yerü tama chanaxwèxe ga pexû na changechaûxëëxû. ² Erü ngëxguma chi pexû changechaûxëëgu, ¿rû texé tá choxû tataãëxëë? ¿Rû ñuxâcû tá choxû petaãëxëë, ega pexû changechaûxëëgu? ³ Rû yemacèx nixî ga yemaãcû pexcèx popera chaxümatüxû na penamexëëgüxúcèx i perü guxchaxügü naxûpa na pexûtawa chaxûxû. Yerü tama chanaxwèxe ga yexguma chi yéma chaxûxgu na choxû pengechaûxëëxû. Erü pema nixî i chanaxwèxexû na choxû petaãëxëëgüxû. Rû aixcûma nagu charüxîñü rû ngëxguma choma chataãëxgu rû pema rû tá ta petaãëgü. ⁴ Rû yexguma pexcèx chanaxümatügu ga yema popera, rû poraãcû chanaxixãchiãë, rû düxwa yema chorü ngechaümaã chaxaxu. Natürü tama pexcèx chanaxümatü na pexû changechaûxëëxúcèx, natürü pexcèx chanaxümatü na nüxû pecuáxúcèx na ñuxâcû poraãcû pexû changechaûxû.

Pauru rû nüxû nüxû nangechaû ga yema duûxû ga chixexü namaã üxü

⁵ Rū yema yatü ga choxü ngechaüxëxü, rü tama choxüxīcatama nixī ga nangechaüxëxü, natürü pexü rü ta nangechaüxë. Natürü tama chanangu-petüxëchaxü na pexna chacaxü i ngemachiga.. ⁶ Rū yema poxcu ga nüxna pexāxü ga yema duüxü ga yexguma pengutaquëxegügu, rü chauxcëx rü marü name na ngëxīcatama na yīxü. ⁷ Rū ngëmacëx i ñuxma rü chanaxwëxe i nüxü nüxü pengechaü i norü chixexü rü nüxü perüngüxë na tama yexeraxü i chixexüwa nagaāxüçëx i ngëma norü ngechaü. ⁸ Rū ngëmacëx chanaxwëxe i wenaxärü noxrirü nüxü nüxü pedauxë na aixcūma nüxü pengechaüxü. ⁹ Rū yemacëx nixī ga yemachiga marü pexcëx chanaxūmatüxü, yerü pexü chaxüxchaü, rü nüxü chacuāxchaü ngoxi marü aixcūma chauga pexīnū. ¹⁰ Rū ñuxma pemaā nüxü chixu rü yīxema pema tüxü nüxü pengechaüxë i tümaärü chixexü, rü choma rü tá ta tüxü nüxü changechaü. Rū ngëxguma chi tacü rü chixexüxü tüxü changechaügu, rü pegagu nixī i Cristupëxewa tüxü nüxü changechaüxü i ngëma. ¹¹ Rū ngëmaäcü chanaxü na tama nayoxniëxüçëx i Chataná na chixexügu tüxü nayixëxüçëx. Erü yixema rü meāma nüxü tacuëx i nacūma i Chataná na ñuxācü chixexügu tüxü nayixëëchaüxü.

Tróaarü ñānewa rü nanaxixāchiā ga Pauru

¹² Rū yexguma Tróaarü ñānewa changuxgu na nüxü chixuxüçëx ga Cristuarü ore, rü poraäcü choxü natauxcha na yéma tórü Coriaxü chapuracüxü. ¹³ Natürü tama aixcūma chataā ga yéma, yerü tama yexma nüxü chayangau ga taeneë ga Titu. Rū yemacëx nüxü charümoxë ga yemacüāx ga duüxügü, rü ichaxüāchi, rü Machedóniānewa chaxü.

Cristu rü Paurumaā napora

¹⁴ Rū Tupanana moxë taxägü erü norü duüxügüxü toxü nixīgüxë. Rū ñuxma na Cristuarü duüxügü tixīgüxü, rü nüma ya Tupana rü guxüguma tomaā nanaxüpëxe. Rū nüma nixī i toxü namuxü na duüxügüxü nüxü tacuëxëxüçëx i norü ore. Rū ngëma norü ore rü guxüwama nangu rü guxüguma nipuema ñoma wüxi i pumara i yixichixürü. ¹⁵ Rū ñuxma i toma i Cristugagu Tupanapëxewa na timexü, rü guxüwama tanguchigagü natanüwa i ngema yaxögüxü rü ngema tama yaxögüxü.. ¹⁶ Rū ngëma duüxügü i tama yaxögüxü rü nüxü nawëxtümüxü i tochiga, erü ngema ore i nüxü tixuxü rü norü poxcuchigaxü namaā nixu. Natürü ngëma yaxögüxü rü namaā nataxëgü i tochiga erü ngema ore i nüxü tixuxü rü ore i namaxëxëxü nixī. Rū ngëmacëx ¿texëāxü natauxcha i ñā puracü na nüxü tixuxü i ngëma ore? ¹⁷ Rū yīxema toxrüü ixīgüxëxīcatama tixī ya tüxü natauxchaxe. Rū toma rü tama Tupanaärü oregu dīeru ngīxü tayaxu ngëma togü naxügüxürü. Natürü Tupanapëxewa rü aixcūma meā nüxü tixu i ngëma norü ore, erü nüma toxü nimügü rü Cristuarü tixīgü.

3

Tupanaärü uneta i ngexwacaxüxüchiga

¹ Rū ñuxma na pemaā nüxü tixuxü na aixcūma Tupana yīxü ga toxü mucü, rü bexmana tá nagu perüxīnū na wenaxärü togüétüwa tidexagüxü. ¿Éxna penaxwëxe na wüxi i carta i cuëxruü pexü tawéxü na nawa nüxü pecuáxüçëx na aixcūma Tupanaärü orearü uruügü tixīgüxü, rü éxna penaxwëxe na pexütawa naxcëx itaçaxü i cartagü na ngëmawa duüxügü toxü cuáxüçëx naxrüxü i ngema togü? ² Rū pemaā nüxü tixu rü tama tanaxwëxe i tacü rü carta na duüxügü toxü cuáxüçëx, erü pematama nixī i ngëma cartarüü pixīgüxü, rü pewa nixī i nangóxü na aixcūma Tupana yīxü ga toxü mucü. Rū meāma toðëwa nüxü tacuëx i ngëma. Rū yema na naxüchicüxü ga perü

maxū, rü ngēmawa guxūma i duūxūgū nūxū nadau na aixcūma wūxi ga mexū ga puracū taxūxū ga petanūwa. ³ Rū ñuxma rü meāma nangox na pema rü ñoma wūxi i carta i Cristutama ūmatūxūrūū na pixīgūxū. Rū torū puracūgagu nixī i ngēma. Natürū tama wūxi i carta i tacū rü ūmatūxūmaā ūmatūxū pixīgū, natürū pema nixī i carta i Tupana ya Maxūcūāē i Ūūnexū ūmatūxū. Rū ngēma carta rü tama popera rü ēxna nutawa iwūcuchixū nixī, natürū perū maxūwa nixī i nangóxū i ngēma. ⁴ Rū ngēmacèx tama tamuūē na ngēmaācū togūcèxtama tidexagūxū, erū tayaxōgū na Cristugagu Tupana toxū dauxū na timexū. ⁵ Rū tama toxrūtama cuèxmaā nixī i tanaxūxū i tacū rü mexū. Natürū guxūma i ngēma taxūxū rü Tupanaārū ngūxēēmaā nixī i tanaxūxū. ⁶ Rū Tupana rü toxū narūngūxēē na duūxūgūmaā nūxū tixuxū i ngēma ngexwacaxūxū i norū uneta na ñuxācū Cristugagu tá tūxna naxāāxū i maxū i taguma gūxū. Rū ngēma maxū rü tama yema mugū ga Moīché ūmatūxūgagu tanayaxu, natürū tanayaxu erū Tupanaāē i Ūūnexū tūxna nanaxā. Rū yema mugū ga Moīché ūmatūxū rü yuwa tūxū nagagū, natürū Tupanaāē i Ūūnexū rü tūxna nanaxā i maxū i taguma gūxū. ⁷ Rū yema mugū ga Moīchéna naxāxū ga Tupana, rü nutagu nixī ga naxūmatūxū. Rū yexguma Moīché nayauxgu ga yema mugū, rü poraācū niyaurachiwecūxū. Rū yemacèx ga duūxūgū rü taxucūrūwama Moīchéchiwegu narūdaunū. Natürū yema norū yaurachiwecūū rü nixochigū. Natürū ga yema mugū ga Moīché tūxna āxū i yuwa tūxū gagūxū, rü taxū ga yauracūūxūmaā ínangu. Rū yemaācū namexēchi ga yexguma ínanguxgu. ⁸ Natürū yexeraācū namexēchi nixī i ngēma uneta i ngexwacaxūxū i Tupanaāē i Ūūnexū taxcèx ngoxēēxū. ⁹ Rū yemaācū woo namexēchi ga yema mugū ga yuwa tūxū gagūxū, natürū yexeraācū namexēchi i ngēma uneta i ngexwacaxūxū i Tupanapēxewa tūxū mexēēxū. ¹⁰ Rū yema mugū ga noxri mexēchixū, rü ñuxma rü taxuwama name, ega namaā nūgū nangugūgu i ngēma Tupanaārū uneta i ngexwacaxūxū i yexeraācū mexēchixū. ¹¹ Rū yemaācū woo namexēchi ga yema mugū ga paxaāchi ixīxū, natürū yexeraācū namexēchi i ngēma uneta i ngexwacaxūxū i guxūgutáma ixīxū. ¹² Rū toma aixcūma nūxū tacuèx na guxūgutáma yīixū i ngēma Tupanaārū uneta i ngexwacaxūxū i mexēchixū, rü ngēmacèx tama cúācūma duūxūgūmaā nūxū tixu. ¹³ Rū ngēmacèx tama duūxūgūchaxwa iticūxgū yema Moīché ūxūrūū. Yerū ga Moīché rü nūgū nidūxchiwe na tama nūxū nadaugūxūcèx ga yema Yudíugū ga ñuxācū na yaxochigūxū ga norū yaurachiwecūū. ¹⁴ Natürū ga yema duūxūgū ga Moīchéxū íxūmūcūgūxū rü ñoma yadūxgūchiwexūrūū nixīgū yerū tama nūxū nacuèxgūéga ga tacūchiga na yīixū ga yema mugū. Rū ñuxma rü ta i ngēma Yudíugū rü tama nūxū nacuèxgūéga i ngēxguma nawa nangúegu i ngēma mugū. Erū nangēxma i tacū i ñoma yadūxgūchiwexūrūū nūxū naguxchaxēēxū na tama nūxū nacuèxgūxūcèx. Rū ñuxma rü ta tama nūxna ínanguéga i ngēma nacūma erū Cristuxicatama nixī ya yima nūxna ínanguxēēcū. ¹⁵ Rū ñuxma rü ta i ngēma Yudíugū, rü ngēxguma nawa nangúegu i ngēma ore ga Moīché tūxna āxū, rü nangēxma i tacū i ñoma yadūxgūchiwexūrūū nūxū naguxchaxēēxū na tama nūxū nacuèxgūégaxūcèx na tacūchiga yīixū i ngēma ore. ¹⁶ Natürū ngēxguma wūxi i duūxū nūxū rūxoxgu i nacūma i chixexū, rü tórū Coriaxū yaxōōgu, rü ngēxguma nixī i nūxna ínanguxū i ngēma nūxū naguxchaxēēxū. ¹⁷ Erū nūma ya tórū Cori rü Naāē i Ūūnexū rü wūxitama nixī rü ngextá ínangēxmaxūwa i tórū Coriāē i Ūūnexū, rü tūxū nanatauxchaxēē na Tupanana ingaicamagūxū. ¹⁸ Rū ngēmacèx guxāma i yixema na Cristuaxū yaxōgūxū rü ñoma wūxi i woruarūū tawa nangóchipeta na ñuxācū namexēchixū ya tórū Cori erū nataxuma i tacū i tūxū idūxūxū

naxchaxwa. Rū nūma ya tórū Cori i Naãē i Üünexū ixīcū, rū guxūguma yexeraācū tūxū nimexēēchigū na naxrūū aixcūma imexūcèx.

4

¹ Rū ngēmacèx taguma nūxū tarūchau i ñaã puracū, erū Tupana ya nūxū tangechaūtümūcū nixī ga toxū mucū na tanaxūxūcèx i ñaã puracū na duūxūgūmaā nūxū tixuxūcèx i norū ore. ² Rū yemacèx nūxū tarūxoe ga guxūma ga tacū ga chixexū i ãne tūxna āxū i cúacū ūxū. Rū tama tanawomūxēēācūma nixī i namaā nūxū tixuxū i ore rū tama tanaxūchicūū i ngēma ore. Natürū ngēma ore i aixcūma ixīxūxīcatama nixī i nūxū tixuxū. Rū ngēmaācū Tupanapēxewa tamaxē rū duūxūgūpēxewa togū itawēx na nūxū nacuèxgūxūcèx na ñuxācū tixīgūxū i tomāx. ³ Rū ngēxguma chi texécèx naguxchagu i ngēma ore i mexū i nūxū tixuxū, rū ngēma duūxūgū i iyarūtauxexūcèxicatama nixī i naguxchaxū. ⁴ Erū nūmagū rū tama nayaxōgū. Rū ngēmacèx i ñoma i naãneārū āēxgacū i Chataná rū nūxū nanaguxchaxēē na tama nūxū nacuèxgūxūcèx na ñuxācū namexēchixū i norū ore ya Cristu ya Üünecū. Rū Cristuwa nixī i nangóxū na ñuxācū na yīxū ya Tupana. ⁵ Rū ngēxguma duūxūgūmaā nūxū tixuxgu i ngēma ore, rū tama tochigaxūtama tixugū. Natürū nūxū tixu na Ngechuchu ya Cristu rū tórū Cori yīxū, rū nūma tūxū na nangechaūxūgagu perū ngūxēēruūgū na tixīgūxū. ⁶ Erū nūmatama ya Tupana ga noxri naãne naxūxgux rū ēānexūwa nangoxēēcū ga ngóonexū, rū nūmatama nixī i ñuxma i tūxū yangoxnaāēxēēgūxū na ngēmawa nūxū icuáxūcèx na ñuxācū namexēchixū i nūmax. Rū ngēma norū mexū rū Ngechuchu ya Cristuchiwewa nixī i nūxū idauxū.

Tayaxōgūama ega woo ngúxū ingegūgu

⁷ Rū ngēma nūxū na icuáxū na ñuxācū namexēchixū ya Tupana, rū ngēma cuèx rū wūxi i mexēchixū nixī. Natürū ngēma cuèx i mexēchixū rū taxūne i maīraxūnaxcèxwa nangēxma, na nangóxūcèx na Tupanawa ne naxūxū i guxūma i pora rū tama i tawatama. ⁸ Rū guxūwama toxū nangēxma i guxchaxūgū, natürū taguma nūxū tarūchau i ñaã puracū. Rū woo poraācū taxoegaāēgūgu, natürū taguma ítanangēx. ⁹ Rū woo togū towe ingēxūtanūgu, natürū ya Tupana rū taguma toxū ínawogū. Rū woo duūxūgū toxū napíexēēgu, natürū tama ngēxma tayacuèxēē i ñaã puracū. ¹⁰ Rū guxūwama i ngextá ítaxīxūwa rū āūcūmaxūwa tangēxmagū, yexgumarūū ga Ngechuchu na āūcūmaxūwa nayexmaxūrūū. Natürū ngēmaācū toxū naxūpetū na duūxūgū nūxū daugūxūcèx na ñuxācū towa namaxūxū ya Ngechuchu. ¹¹ Rū ñuxma na tamaxēxū, rū guxū i ngunexūgu rū Ngechuchugagu āūcūmaxūwa tangēxmagū. Natürū ngēmaācū toxū naxūpetū na Ngechuchu inawéxūcèx i norū pora nawa i ñaã toxone i yuxwèxexū. ¹² Rū ngēmaācū Tupanaārū orecèx āūcūmaxūwa tangēxmagū, natürū ngēmaācū toxū naxūpetū na pema rū pexū nangēxmaxūcèx i maxū i taguma gúxū. ¹³ Tupanaārū ore i ūmatūxūwa rū ñanagūrū:

“Nūxū chayaxō rū yemacèx Tupanachiga chidexa”,

ñanagūrū. Rū ngēxgumarūūtama tixīgū i toma na tayaxōgūxū rū Tupanachiga tidexagūxū. ¹⁴ Erū nūxū tacuèxgū rū Tupana ga yuwa ínadxēēcū ga Ngechuchu ya tórū Cori, rū yimatama Tupana tá nixī ya toxū írūdagūxēēcū, erū Ngechuchuarū duūxūgū tixīgū. Rū ngēmaācū wūxigu pemaā nūgūxūtawa tá toxū nagagū. ¹⁵ Rū guxūma ga yema toxū ngupetūxū rū perū mexūcèx nixī na yexeraācū yamuētanūxūcèx i ngēma duūxūgū i Tupana nūxū rüngūxēēgūxū. Rū ngēmaācū tá dūxwa namuxūchi i ngēma duūxūgū i moxē Tupanana āgūxū rū nūxū icuèxūgūxū. ¹⁶ Rū ngēmacèx taguma nūxū tarūxoe

na nūxū tixuxū i ngēma ore. Rū woo yayachigūgu rū yaturachigūgu i toxone, natürü tođēwa rū guxū i ngunexūgu rū yexeraācū tiporaetanū. ¹⁷ Erū ngēma ngúxū i toxū ūpetūxū i ñaã torū maxūwa, rū ngēma rū wūxi i paxaāchimare nixī rū paxa tá nangupetū. Natürü ngēmaācū tá tanayaxu i wūxi i maxū i mexēchixū i tagutáma gúxū i ñoma i naānecūāx i maxūārū yexeraxūchi ixīxū. ¹⁸ Rū tama ngēma ñuxma nūxū idauxūgu nixī itarūxīnūēxū, natürü nagu tarūxīnūē i ngēma ñuxma tama nūxū idauxū. Erū ngēma ñuxma nūxū idauxū rū tama natai, natürü ngēma ñuxma tama nūxū idauxū, rū guxūgutáma nangēxmaēcha.

5

¹ Rū nūxū tacuēxgū ega ngēxguma iyanaxoxgu i ñaã toxone i paxaāchi ñuxma toxū ngēxmaxū, rū daxūguxū i naānewa tá tanayaxu i wūxi i toxone i tagutáma iyarūxoxū i Tupanatama toxcèx mexēēxū rū tama i duūxūgū. ² Rū ngēmacèx i ñuxma i ñaã toxonewa tamaxēyane, rū tama aixcūma tataāēgū. Erū tanaxwèxe na paxa toxū nangēxmaxū i ngēma toxone i daxūguxū i naānewa ngēxmaxū. ³ Rū ngēma toxone i daxūguxū i naānewa tá toxū ngēxmaxū rū ñoma wūxi i naxchirurū tá toxū nidūxū, na ngēmaācū naxāxūnēxūcèx i tođē. ⁴ Rū ñaã toxone i ñuxma toxū ngēxmaxūwa tamaxēyane, rū tanaxixāchiāēgū rū tama aixcūma tataāēgū. Rū tama aixcūma ítanatáxchaū i toxone i ñoma i naānewa toxū ngēxmaxū, natürü tanaxwèxegū na tanayaxuxū i toxone i ngexwacaxūxū na ngēmaācū ngēma maxū i ngexwacaxūxū iyanaxoxēēxūcèx i toxone i ñuxma toxū ngēxmaxū. ⁵ Rū Tupana nixī ya toxū imexēēcū naxcèx i ngēma ngexwacaxūxū i maxū rū ngēma ngexwacaxūxū i toxone. Rū toxna nanamu ga Naãē i Üünexū na ngēmawa nūxū tacuáxūcèx na aixcūma tá tanayaxuxū i ngēma. ⁶ Rū ngēmacèx taxucèxma taxoegaāēgū. Erū nūxū tacuēx rū ñuxma ñaã toxonewa tamaxēyane, rū taxucürūwama tórū Corixūtawa tangēxmagū i daxūguxū i naānewa. ⁷ Rū woo tama nūxū tadaugūgu ya yima tórū Cori i ñuxmax, natürü tayaxōgū na wūxi i ngunexū rū tá nūxū tadaugūxū. Rū ngēma nixī i toxū poraxēēxū i ñaã torū maxūwa. ⁸ Rū ngēmacèx taxucèxma taxoegaāēgū ega tayuegu. Erū toxcèx rū narūmemaē nixī na nūxna ítachoxūxū i ñaã toxone, na tórū Corixūtawa tayangēxmagūxūcèx. ⁹ Rū ngēmacèx, woo ñoma i toxonewa tangēxmagūgu rū ēxna tama nawa tangēxmagūgu, rū tanaxwèxe na guxūguma tórū Coriarū ngúchaū na taxūxū. Rū ngēmacèx naxcèx tadaugū na tanaxūxū i ngēma nanaxwèxexū i nūmax. ¹⁰ Erū guxātama i yixema rū Cristupēxewa tá tangugū na wūxichigū nayaxuxūcèx i ngēma tūxna ūxū. Rū nūma tá wūxichigūxū nangugūarū maxūāx. Rū ngēxgumarūū na ñuxācū meā imaxēxū rū ēxna chixri imaxēxū ga yexguma ñoma ga taxūnewa iyexmagūgu, rū ngēmaācū tá tūxna nanaxā ya wūxichigū.

Cristu rū taxcèx Tupanaxū narūngūxmūxēē

¹¹ Rū ngēmacèx Tupanaārū orearū uwa tapuracūe rū tayaxucuxēgū i duūxūgū na yaxōgūāxūcèx. Erū toma rū aixcūma torū Corixū tamuūē. Rū Tupana toxū nacuēx na ñuxācū yīxū i tórū maxū, rū chierūna pema rū chi ta toxū pecuēxgux. ¹² Rū tama tanaxwèxe i wenaxārū togūētūwa tidexagū, natürü pexū tarūngūxēēchaū na pexū nangēxmaxūcèx na tacūcèx tomaā petaāēgūxū na nūxū pecuáxūcèx na ñuxācū penangāxūxū i ngēma duūxūgū i pepēxewa nūgū írūmegūnetaxū natürü norū maxūwa rū tama ixaixcūmagūxū. ¹³ Rū woo duūxūgū toxū daugūgu na Tupanagu taxāūāēgūxū, rū nūētama nixī i ngēma erū nūmatama ya Tupana rū meāma toxū nacuēx. Natürü i pema rū meāma toxū pecuēx na meāma tođēxū tacuāācūma pema nūxū tixuxū ga norū ore. ¹⁴ Rū Cristu ya poraācū toxū ngechaūcū

nixī ya ñuxma tomaã icuácü, erü tayaxõ na nüma rü guxãärü pecaducèx nayuxü na yexma yanaxoxücèx ga guxãärü chixexügü. ¹⁵ Rü yemaãcü guxüma ga duüxügücèx nayu ga Cristu, na ngēma duüxügü i ñuxma maxëxü, rü tama nümatama nagu naxīnūëxügu namaxëxücèx, natürü naxcèx na namaxëxücèx ya yima naxcèx yucü rü wena írüdacü. ¹⁶ Rü ngēmacèx i toma rü tama ñoma i naānecüāx i duüxügü nagu rüxīnūëxürüü texéxü tangugüarü maxüāx. Rü woo ga ũpa rü ñoma ga naānecüāx ga duüxügü nagu rüxīnūëxürüü Cristuxü tangugü, natürü i ñuxma rü tama ngēmaãcü namaã nagu tarüxīnūë. ¹⁷ Rü ngēxguma texé Cristuaxü yaxõxgu, rü ngexwacaxüxü i duüxü tixī. Rü nuxcūmaüxü ga tūmacūma rü marü tūxna inayarüxo, rü ngexwacaxüxü i maxü tūxü nangëxma. ¹⁸ Rü guxüma i ngēma rü Tupana nixī ya naxücü. Rü nüma nixī ga Cristugagu tamaã inangüxmüxü. Rü ñuxma rü toxü namu na duüxügümaã nüxü tixuxü na namaã inangüxmüëxücèx. ¹⁹ Yerü Tupana rü Cristugagu duüxügümaã nügü narüngüxmüxëë. Rü tama duüxügüarü pecadugu naxīnūëcūma nanaxü ga yema. Rü ñuxma rü toxü namu na ngēmachigaxü duüxügümaã tixuxü. ²⁰ Rü ngēmaãcü Cristuarü orearü ngeruügü tixīgü, rü towa nixī i Tupana pexü cèèxüxü na namaã iperüngüxmüëxücèx. Rü ngēmacèx Cristuégagu pexü tacèèxügü na Tupana-maã iperüngüxmüëxücèx. ²¹ Cristu rü taguma pecadu naxü. Natürü tagagu nixī ga Tupana ga ñoma pecaduāxürüüācūma namaã naxüāxü na yemaãcü nagagu tūxü inanguxüxëëxücèx nawa i torü chixexü na aixcūma napëxewa imexücèx.

6

¹ Rü ñuxma na Tupanaärü ngüxëëruü tixīgüxü, rü pexü tacèèxü na tama nüxü pexoexücèx ga yema pemaã na namecūmaxü ga yexguma nayuxgu ga Nane. ² Erü Tupana rü norü ore i ümatüxüwa, rü ñanagürü: “Rü yema ngunexü ga nagu namexügu na choxü peyaxuxü, rü yexguma nixī ga pexü chaxīnūxü. Rü yexguma pexna chanaxuāxügu ga maxü i taguma gúxü, rü yexguma nixī ga pexü charüngüxëëxü”, ñanagürü. Rü ñuxma nixī i ngēma ngunexü i nagu namexü na Tupanaxü peyaxuxü, rü ñuxma nixī i ngēma ngunexü i pexna naxuaxüāxü i maxü i taguma gúxü. ³ Rü toma rü guxüguma naxcèx tadau na guxāpëxewa meã tamaxëxü na taxucèxma texé chixri torü puracüchiga idexaxücèx. ⁴⁻⁵ Rü guxüwama duüxügüxü nüxü tadauxëëchaü na aixcūma Tupanaärü duüxügü tixīgüxü. Rü ngēmacèx yaxna namaã taxīnūë i ngēxguma woo ngúxü toxü ngupetügu, rü éxna tacü toxü tauxgu, rü éxna tacü rü guxchaxü toxü ngëxmagu, rü éxna toxü yaçuaixgügu, rü éxna toxü napoxcuegu, rü éxna naxixāchiāëtanügu rü tomaã nanuëgu. Rü poraäcüxüchima tapuracüe, rü ñuxguacü rü tama tapee, rü ñuxguacü rü taiya toxü nangux. Natürü yaxna namaã taxīnūë i guxüma i ngēma. ⁶ Rü ngexgumarüxü ta duüxügüxü nüxü tadauxëë na aixcūma namexü i torü maxü, erü aixcūma Tupanapëxewa meã tamaxë, rü meã Tupanaxü tacuèx, rü yaxna duüxügümaã taxīnūë, rü namaã tamecūma. Rü nüxü nüxü tadauxëë na towa nangëxmaxü i Tupanaãë i Üünexü rü aixcūma guxü i duüxügüxü tangechaüxü. ⁷ Rü duüxügüxü nüxü tadauxëë na aixcūma namexü i torü maxü, erü namaã nüxü tixu i ngēma ore i aixcūma ixīxü, rü itanawëx i Tupanaärü pora i towa ngëxmaxü. Rü ngēma toxne ixīxü rü ngēma nixī i torü maxü i aixcūma mexü i Tupanapëxewa. Rü ngēmamaã nixī i togü itapoxüxü i torü uwanügüpëxewa. ⁸ Rü ñuxguacü i duüxügü rü toxü nicuèxüügü, rü ñuxguacü rü tacü tomaã nixugüe. Rü ñuxguacü rü meã tochiga nidexagü, rü ñuxguacü rü chixri tochiga nidexagü. Rü woo aixcūmachirëx yixīgu i ngēma ore i nüxü tixuxü, natürü doratèèx

toxŭ nawogŭe. ⁹ Rŭ woo meã toxŭ nacuèxgŭchirèxgu, natŭrŭ ñoma tama toxŭ nacuáxŭrŭŭ tomaã nixŭgŭ i duŭxŭgŭ. Rŭ ñuxguacŭ rŭ wixgutaèx tayue, natŭrŭ naetŭwa tamaxèãma. Rŭ toxŭ napoxcue, natŭrŭ tama toxŭ nadaixichi. ¹⁰ Rŭ woo tangechaŭgŭgu, natŭrŭ guxŭguma tataãègŭama. Rŭ woo ñoma i naãnewa tama tamuãrŭ ngèmaxŭãxgŭgu, natŭrŭ muxŭma i duŭxŭna tanaxã i taxŭ i mexŭ erŭ togagu nanayaxu i maxŭ i taguma gúxŭ. Rŭ woo taxuŭma toxŭ ngèxmèxgu i ñoma i naãnewa, natŭrŭ daxŭ-guxŭ i naãnewa rŭ toxŭ nangèxma i guxŭma. ¹¹ Pa Chaueneègŭ i CorŭtiucŭĀx, dŭcax aixcŭma pemaã nŭxŭ tixu rŭ guxŭ i torŭ maxŭnemaã pexŭ tangechaŭgŭxŭchi. ¹² Rŭ toma rŭ tama pexŭ taxoe, natŭrŭ pema waxi nixŭ i tama petoxwèxexŭ. ¹³ Rŭ dŭcax, Pa Chaueneègŭx, rŭ ñoma wŭxi i papá naxãcŭgŭxŭ cèèxŭxŭrŭŭ pexŭ chacèèxŭ na choxŭ pengechaŭgŭxŭcèx ngèma choma pexŭ changechaŭxŭrŭŭ.

Tupana ya maxŭcŭpata tixŭgŭ

¹⁴ ¿Rŭ tãutãma namaã pexãmŭcŭ i ngèma duŭxŭgŭ i tama yaxŭgŭxŭ! Erŭ ngèxguma chi ngèmaãcŭ penaxŭxgu rŭ tãutãma guxã wŭxigu perŭxŭnŭe. ¿Rŭ ñuxãcŭ nawŭxiguxŭ i ngèma mexŭ namaã i ngèma chixexŭ? ¿Rŭ ñuxãcŭ nawŭxigu i ngóonexŭ namaã i èãnexŭ? ¹⁵ ¿Rŭ ñuxãcŭ nawŭxiguxŭ ya Cristu namaã i Chataná? ¿Rŭ ñuxãcŭ nawŭxiguxŭ i wŭxi i duŭxŭ i yaxŭxŭ namaã i wŭxi i duŭxŭ i tama yaxŭxŭ? ¹⁶ ¿Rŭ ñuxãcŭ Tupanapatawa nangèxmaxŭ i tupanetachicŭnèxãgŭ? Erŭ yixema rŭ Tupana ya maxŭcŭpata tixŭgŭ, rŭ tawa namaxŭ i nŭmax. Rŭ Tupana rŭ pechiga nidexa ga yexguma ñaxgu:

“Rŭ ngèma duŭxŭgŭwa tá chamaxŭ, rŭ natanŭgu tá chayarŭxŭxŭ. Rŭ norŭ Tupana tá chixŭ, rŭ nŭmagŭ rŭ tá chorŭ duŭxŭgŭ nixŭgŭ”, ñaxgu. ¹⁷ Rŭ yemacèx ñanagŭrŭ ta ga tórŭ Cori:

“¿Rŭ ípechoxŭ i natanŭwa i ngèma duŭxŭgŭ i tama chorŭ duŭxŭgŭ ixŭgŭxŭ! ¿Rŭ tãxŭ i nŭxŭ pingŭgŭxŭ i ngèma chopèxewa chixexŭ! Rŭ choma rŭ tá pexŭ chayaxu. ¹⁸ Rŭ choma rŭ Penatŭ tá chixŭ, rŭ pemagŭ rŭ tá chaunegŭ rŭ chauxacŭgŭ pixŭgŭ”, ñanagŭrŭ ya tórŭ Cori ya Tupana ya guxŭãrŭ yexera poraxŭchicŭ.

7

¹ Rŭ dŭcax, Pa Chaueneègŭ ya Pexŭ Changechaŭgŭxex, rŭ ngèma Tupanaãrŭ unetagŭ i pemaã nŭxŭ chixuxŭ, rŭ taxcèx nixŭgŭ. Rŭ ngèmacèx tanaxwèxe na yigŭna idaugŭxŭ na tama taxŭnemaã rŭ èxna taãèmaã naxŭxŭcèx i ngèma Tupanapèxewa tama mexŭ. Rŭ tanaxwèxe i aixcŭma Tupanaxŭ imuŭèãcŭma nŭxna yigŭ taxãgŭ rŭ naxcèxicatama tamaxè.

Pauru rŭ ngema CorŭtiucŭĀxgŭmaã nataãxè

² Rŭ tanaxwèxe i toxŭ pengechaŭgŭ. Rŭ dŭcax ga toma rŭ taxŭxemaãma chixexŭ taxŭgŭ. Rŭ taxŭxexŭma chixexŭgu tanguxèè. Rŭ taxŭxexŭma tawomŭxèègŭ. ³ Rŭ tama pexŭ chixuxŭcèx nixŭ i pemaã nŭxŭ chixuxŭ i ngèma. Yerŭ marŭ pemaã nŭxŭ chixu na ñuxãcŭ guxŭ ga chorŭ maxŭmaã pexŭ changechaŭxŭ. Rŭ ngema pexŭ na changechaŭxŭgagu rŭ íchamemare na petanŭwa chamaxŭxŭ rŭ èxna wŭxigu pemaã chayuxŭ. ⁴ Rŭ ñuxma rŭ taxucèxma pexŭ chaxãneãcŭma pemaã chidexa erŭ poraãcŭ pemaã chataãè. Rŭ woo ngŭxŭ na tingegŭxŭ, natŭrŭ aixcŭma choxŭ penangŭchaŭxŭxèè rŭ choxŭ petaãèxèè. ⁵ Rŭ yexguma Machedóniããnewa tangugŭgucŭrŭwa rŭ taguma itarŭngŭgŭ. Yerŭ guxŭwama ga ngexta itaxŭxŭwa rŭ nŭxŭ itayangau ga guxchaxŭgŭ. Rŭ duŭxŭgŭ rŭ toxŭ nanaguxchaxèè na tanaxŭxŭ i Tupanaarŭ puracŭ rŭ yemacèx poraãcŭ taxoegaãxègŭ. ⁶ Natŭrŭ ya Tupana ya tŭxŭ taãèxèècŭ ya yixema ngechaŭgŭxe, rŭ toxŭ rŭ ta nataãèxèè ga yexguma toxŭtawa nanguxgu ga taeneè ga Titu. ⁷ Rŭ tama yema toxŭtawa na

nanguxĕcèicatama tataãëgü, natürü tataãëgü ta yerü ga pema rü poraãcü nüxŭ penangúchaŭxëë rü penataãëxëë ga guma taeneë ga Titu. Rü nüma ga Titu rü tomaã nüxŭ nixu na ñuxãcü poraãcü penaxwèxexŭ na toxŭ pedauxŭ. Rü tomaã nüxŭ nixu na ñuxãcü naxcèx pengechaŭgüxŭ ga yema chomaã pexüxŭ, rü na ñuxãcü chauxcèx pexoegaãëgüxŭ. Rü guxŭma ga yema oremaã rü yexeraãcü chataãë. ⁸ Choma nüxŭ chacuèx rü yema popera ga pexcèx chaxümatüxŭ rü pexŭ nangechaŭgüxëë, natürü ñuxma rü marü tama naxcèx changechaŭ na chanaxümatüxŭ ga yema popera. Rü noxri rü yemaãcü naxcèx changechaŭ ga yexguma nüxŭ chacuèxgu ga na pexŭ nangechaŭgüxëëxŭ ga yema popera ga yexguma penayauxgu. ⁹ Natürü i ñuxma rü chataãë na pexcèx chanaxümatüxŭ ga yema popera. Rü tama yema na pengechaŭgüxŭcèx chataãë, natürü chataãë yerü yema perü ngechaŭgagu Tupanana pecuèxãchie rü penaxüchicüü ga perü maxŭ. Rü pema rü aixcüma Tupanana pecuèxãchieãcüma namaã peporae ga yema ngechaŭ, rü yemaãcü taxuŭma ga chixexŭ pemaã taxü ga yexguma pexcèx tanaxümatügu ga yema popera. ¹⁰ Rü ngëma ngechaŭ i Tupana naxwèxexŭãcüma namaã iporaexŭ, rü name nixŭ, erü ngëma ngechaŭgagu naxüchicüü i tórü maxŭ rü ngëmagagu tanayaxu i maxŭ i taguma gúxŭ. Rü ngëmacèx taxucèxma naxcèx pixãŭxãchie i ngëma ngechaŭ. Natürü ngëma ngechaŭ i ñoma i naãnecŭĀx i duŭxŭgü nüxŭ ngëxmaxŭ rü taxuwama name erü yuwa nanaga. ¹¹ Rü yexguma yema poperamaã pexŭ changechaŭxëëgu, rü Tupana naxwèxexŭãcüma nixŭ ga namaã peporaexŭ ga yema ngechaŭ. ¡Rü dücax i ñuxma i tacü Tupana pemaã üxŭ i ngëma perü ngechaŭgagu! Yerü yema perü ngechaŭgagu rü aixcüma nagu perüxŭnŭë ga yema chixexŭ ga petanüwa üpetüxŭ, rü meãma chomaã nüxŭ pixu ga yema. Rü yema perü ngechaŭgagu rü peãëwa nangux ga yema chixexŭ, rü poraãcü Tupanaxŭ pemuŭë. Rü yemacèx penaxwèxe na yéma chaxŭxŭ na pexŭ chayarüngüxëëxŭcèx yerü penamexëëgüchaŭ ga yema chixexŭ. Rü yema perü ngechaŭgagu rü aixcüma penaxucuxë ga yema duŭxŭ ga chixexŭ üxŭ. Rü guxŭ ga yemawa rü ipenawèx na tama pegagu yŭxŭ ga yema chixexŭ ga ngupetüxŭ. ¹² Rü yemacèx, yexguma pexcèx chanaxümatügu ga yema popera, rü tama yema duŭxŭ ga chixexŭ üxŭgu charüxŭnŭãcüma chanaxümatü, rü tama yema duŭxŭ ga namaã chixexŭ naxüxŭgu charüxŭnŭãcüma chanaxümatü. Natürü chanaxümatü ga yema popera na yemawa Tupanapëxewa nüxna pecuèxãchiexŭcèx na ñuxãcü aixcüma toxŭ pengechaŭgüxŭ. ¹³ Rü yema na toxŭ pengechaŭgüxŭ, rü wüxi ga taãë nixŭ ga toxcèx. Natürü yema taãëärü yexera nixŭ ga yema taãë ga toxŭ yexmaxŭ ga yexguma nüxŭ tadèuxgu ga Titu ga ñuxãcü taxŭ ga taãë petanüwa na nayaxuxŭ. Rü aixcüma guxãma ga pema nixŭ ga wenaxãrü poraãcü nüxŭ penangúchaŭxëëxŭ. ¹⁴ Rü noxri tauta yéma naxŭxgu ga Titu, rü namaã nüxŭ chixu na mexŭ i duŭxŭgü na pixŭgüxŭ. Rü ñuxma rü taxucèxma chaxãne, erü guxŭma ga yema Titumaã nüxŭ chixuxŭ ga pechiga rü aixcüma ngëmaãcü nixŭ, yexgumarüü na aixcüma yŭxŭ ga guxŭma ga yema Tupanaãrü ore ga pemaã nüxŭ tixuxŭ. ¹⁵ Rü ñuxma i Titu rü yexeraãcü pexŭ nangechaŭ i ngëxguma nüxna nacuèxãchigu na ñuxãcü meã naga pexŭnŭëxŭ rü ñuxãcü nüxŭ pengechaŭãcüma meã penayaxuxŭ. ¹⁶ Rü choma rü ta poraãcü pemaã chataãëxŭchi, erü nüxŭ chacuèx na aixcüma peyanguxëëxŭ ga guxŭma ga yema pemaã nüxŭ chixuxŭ.

8

Yema yaxôgüxŭ rü woo tama na namuãrü dŭëruãxgüxŭ, natürü yema nüxŭ yexmacü ga dŭërumaã meã togüxŭ narüngüxëëgü

¹ Rū ñuxmax, Pa Chaueneēgūx, rū pemaã nüxũ tixuxchaũ na ñuxãcü Tupana namaã mecūmaxũ i ngēma yaxōgūxũ i Machedóniããneãrũ ñãnegūwa ngēxmagūxũ. ² Rū woo taxũ ga guxchaxũgũ nüxũ na ūpetūgūxũ, natürũ nataãēgūama. Rū woo tama na namuãrũ dīeruãxgūxũ, natürũ yema nüxũ yexmacũ ga dīerumaã meã togūxũ narūngūxēēgũ. ³ Rū choma nüxũ chadau rū pemaã nüxũ chixu rū nūmagũ rū taãēãcūma ngīxũ inaxãgũ ga guxcūma ga dīeru ga nüxũ tauxchacũ na ngīxũ inaxãgūxũ. Rū ngīetũ yemaãrũ yexera taãēãcūma ngīxũ inaxãgũ. ⁴ Rū poraãcü toxũ nacèèxũgũ na tama nüxna tanachuxuxũcèx na yemaãcü yema togũ ga taeneēgūxũ nangūxēēgūxũcèx. ⁵ Rū yema nagu tarūxĩnūēxũãrũ yexera ngīxũ inaxãgũ ga yema yaxōgūxũ ga Machedóniããnecũãx. Yerũ Tupananaxĩra nūgũ naxãgũ rū yemawena toxna nūgũ naxuaxũgũ na toga naxĩnūēxũcèx, yema Tupana naxwèxexũrũ. ⁶ Rū yemacèx Tituxũ tacèèxũ na wena petanūwa naxũxũcèx na ngīxũ pinguxēēxũcèx ga yema dīeru ga marũ pemaã ngīxũ inaxũgũcü na ngīxũ penutaquēxexũ naxcèx i ngēma togũ i taeneēgũ i nüxũ nataxuxũ. ⁷ Pema rū guxũwama meã ipexĩ erũ meã peyaxōgũ, rū pexũ natauxcha na meã nüxũ pixuxũ i Tupanaãrũ ore erũ meã nüxũ pecuèx na ñacũchiga yĩxũ. Rū aixcūma togūxũ perūngūxēēchaũ, rū yema pexũ tangúexēēxũãcūma pegũ pengechaũgũ. Rū ñuxma rū ngēxgumarũ ta penaxwèxe na aixcūma meã ipexĩxũ nawa i ngēma mexũ i nacūma na dīeru ngīxũ ipexãxũ naxcèx i ngēma taeneēgũ i nüxũ nataxuxũ. ⁸ Tama wūxi i mu nixĩ i ngēma pemaã nüxũ chixuxũ. Natürũ chanaxwèxemare na nüxũ pecuáxũ na ñuxãcü taãēãcūma ngīxũ inaxãgūxũ ga togũ ga yaxōgūxũ. Rū pemaã nüxũ chixu i ngēma na pema rū ta ngīxũ ipexãgūxũcèx i ngēma dīeru i togũ i taeneēgũarũ ngūxēēcèx ixĩcü, na ngēmaãcü ipenawéxũcèx na aixcūma nüxũ pengechaũgūxũ. ⁹ Erũ pema rū marũ nüxũ pecuèx na ñuxãcü tamaã namecūmaxũ ga tórũ Cori ya Ngechuchu ya Cristu. Rū woo nüxũ nayexma ga guxũma, natürũ ñoma wūxi ga ngearũ yemaxũãxũrũ pexcèx nūgũ nixĩxēē na ngēmaãcü pexũ nangēxmaxũcèx i muxũma i mexũgũ. ¹⁰ Rū ñuxma rū perũ mexũcèx nixĩ i pemaã nüxũ chixuxũ i ngēma dīeruarũ nutaquēxechiga. Rū tauncũ ga ngupetũcũgutama nixĩ ga ipenaxũgūxũ ga ngīxũ na penutaquēxexũ. Rū yema rū aixcūma perũ ngúchaũmaã nixĩ ga penaxũxũ. ¹¹ Rū ñuxma rū yema noxri na meã ipenaxũgūxũrũ, rū name nixĩ i taãēãcūma rū perũ ngúchaũmaã peyanguxēē rū ngēma dīeru i pexũ ngēxmacūwa ngīxũ ipexã naxcèx i ngēma peeneēgũ i nüxũ nataxuxũ. ¹² Erũ ngēxguma aixcūma wūxi ya duũxē tūmaãrũ ngúchaũmaã ngēma dīeru i tũxũ ngēxmèxcūwa tūmaēneēcèx ngīxũ itaxãxgu, rū Tupana rū taãēãcūma ngīxũ nayaxu. Erũ nūma ya Tupana rū taguma tũxna ngīxcèx naca i ngēma tũxũ taxũcü. ¹³ Rū ngēmacèx tama chanaxwèxe i ngēma togūxũ na perūngūxēēxũgagu pexũ nataxu i pemax. ¹⁴ Natürũ chanaxwèxe i guxãma tũxũ nangēxma i ñacũ i tanaxwèxexũ, erũ tama name na texéaxũ nataxuxũ i ñacũ. Rū ñuxma na pexũ nangēxmaxũ i perũ dīeru, rū name nixĩ i nüxũ perūngūxēēgũ i ngēma taeneēgũ i nüxũ nataxuxũ. Rū ngürũãchi to i ngunexũgu i pema pexũ natauxgu, rū nūmagũ rū tá nüxĩ nüxũ nangēxma na pexũ nangūxēēgūxũcèx. Rū ngēmaãcü tá guxãtama tawũxigu. ¹⁵ Rū Tupanaãrũ ore i ūmatũxũwa rū ñanagürũ: “Guxema muxũma tũxũ yexmaxē rū taxũma tũxũ ínayaxũ. Rū guxema noxretama tũxũ yexmaxē rū tama tũxũ inayataxu”, ñanagürũ.

Titu rū namũcũgũchiga

¹⁶ Natürũ Tupanana moxē chaxã, erũ nūma rū Tituxũ nagu narūxĩnūxēē na aixcūma pexũ nangūxēēxũcèx, ngēma choma pegu charũxĩnūxũrũ. ¹⁷ Rū

nūma ga Titu rü: “Ngü” ñanagürü na wena petanüwa chanamuxü. Yerü nūma rü woetama poraäcü pegu narüxĩnū. Rü ngēmacèx i ñuxma rü wena petanüwa naxü, erü nüxü nangúchaü. ¹⁸ Rü Titumaã ngēma tanamu i wüxi i taeneē i guxüma i yaxōgüxü nüxü ngechaügüxü erü nūma rü aixcüma meã nüxü nixu i Tupanaärü ore i tüxü maxēxēxü. ¹⁹ Rü tama ngēmacèxicatama nixĩ. Erü guxüma i ngēma yaxōgüxü rü ngēma taeneēxü naxunetagu na toxü íyaxümücüxcèx rü toxü nangüxēxüxcèx i ngēxguma Yerucharéüwa ngixü tangexgu i ngēma dīeru, na ngēmaäcü nüxü ticuèxüügüxcèx ya tórü Cori, rü na guxāma nüxü dauxcèx na ñuxäcü taäēäcüma yigü rüngüxēgüxü. ²⁰ Rü ítayaga i ngēma taeneē, erü tama tanaxwèxe i texé toxü tixu i yixcama ngixcèx i ngēma tacü i dīeru i taeneēgüxcèx ngixü inutaquēxegücü. ²¹ Erü tama Tupanapēxewaxicatama tanaxwèxe na meã tanaxüxü, natürü guxü i duüxügüpēxewa rü ta tanaxwèxe na meã tanaxüxü. ²² Rü Titumaã rü ngēma to i taeneēmaã petanüwa tanamu i wüxi i to i taeneē i toxü nüxü dauxēxü na aixcüma nüxü nangúchaü na naxüäxü i Tupanaärü puracü. Rü ñuxma rü yexeraäcü petanüwa naxüxchaü i nūmax, erü nüxü nacuèx na ñuxäcü pema rü taäēäcüma togüxü na perüngüxēgüchaüxü. ²³ Rü ngēxguma texé pexna caxgu na texe yīxü ya Titu, jrü tümamaã nüxü pixu na nūma rü chomücü ya wüxiwa chomaã pexcèx puracücü na yīxü! Rü ngēma taxre i togü i namücügü, rü ngēma nixĩ i yatügü i guxüma i yaxōgüxü nüxü unetagüxü na Cristuarü puracü naxügüxcèx. Rü nūmagü rü aixcüma norü maxümaã Cristuxü nicuèxüügü. ²⁴ Rü ngēmacèx chanaxwèxe i ngēma taeneēgüxü nüxü pedauxēē na aixcüma nüxü pengechaügüxü, na guxüma i yaxōgüxü nüxü cuèxgüxcèx i ngēmachiga. Rü ngēmaäcü guxüma i ngēma yaxōgüxü tá nüxü nacuèxgü na aixcüma yīxü i ngēma mexü i ore i pechiga namaã nüxü tixuxü.

9

Yema dīeru ga yema togü ga yaxōgüxcèx ngixü inutaquēxecüchiga

¹ Rü taxucèxma tüxcüü pexcèx chanaxümatü ngīchiga i ngēma dīeru i ngixü penutaquēxegücü naxcèx i ngēma taeneēgü i yaxōgüxü i Yudéaanewa ngēxmagüxü. ² Erü marü nüxü chacuèx rü perü ngúchaümaã ipenaxā i ngēma dīeru. Rü guxüguma taäēäcüma ngēma yaxōgüxü i Machedóniãānewa ngēxmagüxümaã nüxü chixu na ñuxäcü i pema i Acayaanewa ngēxmagüxe rü naĩ ya taunecügutama marü ípememarexü na ngixü ipexāgüxü i ngēma dīeru. Rü yema rümumaēxü ga yaxōgüxü ga Machedóniãānecüāx, rü yexguma nüxü naxĩnüēgu na ñuxäcü taäēäcüma togüxcèx ngixü na ipexāgüxü i perü dīeru, rü nūmagü rü ta inanaxügü na ngixü inaxāgüxü. ³ Natürü i ñuxma rü ngēma petanüwa chanamugü i ngēma taeneēgü na nüxü nadaugüxcèx, na aixcüma yīxü i ngēma nüxü chixuxü i pechiga. Rü chanaxwèxe na aixcüma ípememarexü na ngixü ipexāxü i ngēma dīeru, ngēma taeneēgümaã nüxü chixuxürü. ⁴ Erü ngēxguma chi ñuxre i taeneēgü i Machedóniãānecüāx rü ngürüachi chomaã petanüwa naxīxgu, rü tama chanaxwèxe na pexü na iyangauxü na tama aixcüma ípememarexü na ngixü ipexāxü i ngēma dīeru. Rü toxü rü chi wüxi i ānexüchi nixĩ, erü marüchirēx namaã nüxü tixu na ñuxäcü aixcüma ípememarexü na ngixü ipexāxü i ngēma dīeru. Rü maneca pexü rü chi ta wüxi i ānexüchi nixĩ. ⁵ Rü ngēmacèx nixĩ i chauxcèx namexü na naxcèx íchaçaxü i ngēma taeneēgü na nüxīra petanüwa naxīxüxcèx rü nūmatama pexü yanangüxēgüxcèx na ngixü penutaquēxegüxcèx i ngēma dīeru ga ūpamama ngixü pixucü. Rü ngēmaäcü aixcüma tá ímemare i ngēma dīeru i ngēxguma ngēma changuxgu. Rü togü tá nüxü nadaugü na aixcüma perü

ngúchaŭmaã yīxū na ngīxū ipexāgūxū rü tama aüäcūma na yīxū. ⁶ Rü nüxna pecuèxāchie i ngema dexe i ñaxū:

“Rü yīxema noxretama i nanetüchire itoxe, rü noxretama i norü o tayaxu.

Natürü yīxema muxū i nanetüchire itoxe, rü muxūma i norü o tayaxu”, ñaxū! ⁷ Rü wüxichigü tanaxwèxe na ngīxū itaxāxū i ngēma ngīgu tarūxīnücū na ñuxre ngīxū itaxāxchaūxū. Rü tama name i aüäcūma ngīxū itaxā rü ēxna texé tūxū muäcūma ngīxū itaxā. Erü Tupana rü nüxū nangechaū i ngēma duūxū i taēēäcūma ngīxū ixāxū. ⁸ Rü Tupanamēxēwa nangēxma na poraäcū pexna naxāāxūcèx i guxūma i mexū i pexū taxuxū, na guxūguma pexū nangēxmaxūcèx i ngēma penaxwèxexū rü naetü na pexū íyaxūxūcèx na togūxū namaã perüngūxēēgūxūcèx. ⁹ Tupanaärü ore i ümatūxūwa rü ñanagürü:

“Yima yatü ya mecü rü norü ngúchaŭmaã meã inanaxā nüxna i ngēma duūxūgü i taxuūma nüxū ngēxmaxū. Rü Tupana rü tá guxūgu nüxna nacuèxāchi na ñuxäcū namecūmaxū i nümax”,

ñanagürü. ¹⁰ Tupana nixī ya tūxna naxäcū ya nanetüchire na inatoxūcèx, rü tūxna naxäcū i õna na nangõxūcèx. Rü nüma tá nixī i pexna naxāāxū ya guxūnema ya nanetüchire ya penaxwèxene na ipenatoxūcèx. Rü nüma tá nanaxūxēē rü nanayaxēē ya yima nanetüchire. Rü tá nanamuxēē i norü o, na muxūchixū nawa peyaxuxūcèx na ngēmamaã togūxū perüngūxēēgūxūcèx.

¹¹ Rü ngēmaäcū i pema rü tá pexū nangēxma i guxūma i mexū na tauxchaäcūma nüxū perüngūxēēgūxūcèx i togū. Rü ngēxguma ngēma togū i taeneēgūxūtawa ngīxū tangegūgu i ngēma dīeru i naxcèx ngīxū ipexäcū, rü nümagü rü tá poraäcū Tupanana moxē naxāgü ngixcèx. ¹² Erü ngēxguma nüxna ngīxū taxāxgu i ngēma dīeru i nüxū ngīmaã perüngūxēēgücū i ngēma taeneēgü, rü tama ñacū i nüxū taxuxūcèxicatama ta nixī, natürü naetü i nümagü i taeneēgü rü perü ämaregagu tá poraäcū Tupanana moxē naxāgü.

¹³ Rü nümagü i ngēma taeneēgü rü tá Tupanaxū nicuèxūügü, erü ngēma perü ämaremaã tá nüxū nüxū pedauxēē na aixcūma naga pexīnüēxū i Cristuarü ore i mexū. Rü nümagü rü tá Tupanana moxē naxāgü naxcèx i ngēma perü ämare i perü ngúchaŭmaã nüxna rü guxūma i yaxõgūxūna pexāgūxū. ¹⁴ Rü ngēxgumarüü i ngēma taeneēgü rü tá poraäcū pexcèx nayumūxēgü, erü pexū nangechaūgü. Rü tá Tupanana moxē naxāgü naxcèx na ñuxäcū nüma ya Tupana poraäcū pexū nangūxēēxū na yemaäcū pexū natauxchaxūcèx na nüxū perüngūxēēgūxū. ¹⁵ Rü ngēmacèx i ñuxma rü Tupanana moxē taxā, yerü tūxna nanamu ga Nane na tórü ämare yīxūcèx. Rü nataxuma i ore i nagu mexū na nüxū ixuxūcèx na ñuxäcū namaã itaēēgūxūchixū i ngēma ämare.

10

Pauruarü ore rü aixcūma nixī yerü Tupana nixī ga nüxna āgacü

¹ Rü ñuxma rü yema Cristu yaxna tamaã naxīnüxürüü rü tamaã namecūmaxürüü, rü choma rü ta pemaã yaxna chaxīnüäcūma rü pemaã chamecūmaäcūma pexū chacèxū na chauga pexīnüēxūcèx. Erü nümaxū i duūxūgü rü nüxū nixugü na pexū chamuūxū ega pexūtawa changēxmagu natürü ngēxguma pexna chayaxūgu rü tama pexū chamuū. ² Natürü ngēxguma ngēma petanūwa chaxūxgu, rü chierü natauxguma na ñacūcèx namaã chaporagaxū rü na chanaxucuxēxū i ngēma duūxūgü i petanūwa toxū ixuxū na ñoma tama yaxõgūxürüü na tamaxēxū. Erü choma rü íchamemare na namaāxūchi na chidexaxū. ³ Rü aixcūma woo duūxūgü tixīgü natürü tama ñoma i naanecūāxrxūxū togū tadai i ngexguma ítanapoxūgu i Tupanaärü ore. ⁴⁻⁵ Erü ngēma toxne i namaã ítanapoxūxū i Tupanaärü ore rü tama ñoma i naānecūāx namaã āxnexū nixī. Erü toma rü toxū nangēxma i Tupanaärü

pora na ngēmamaã itayanaxoxēēxūcèx i Chatanáãrū pora. Rū ngēmaãcü itayanaxoxēē i guxūma i chixexū i ore i Tupanaxū namaã yaxugūgūxū i duūxūgū. Rū ngēmaãcü itayanaxoxēē i guxūma i Tupanaãrū uwanūgūarū ore i nūgū namaã yacuèxūūgūãcūma duūxūgūmaã nūxū yaxugūgūxū na tama Tupanaãxū yaxōgūãxūcèx. Rū guxūma i tacū i nagu naxīnūēxū i ngēma duūxūgū i chixexū, rū Cristuna tanaxuaxū na nūma namaã inacuáxūcèx. ⁶ Rū wūxicana marū meã Cristuga pexīnūēgu, rū toma rū ítamemare na tūxū tapoxcuexū ya guxāma ya texé ya tama naga īnūēxē i Cristuarū ore. ⁷ Pema rū norū dūxétūxūnewaxicatama nixī i penangugūxū i wūxi i duūxū. Natūrū ngēxguma texé tūgū cuèxgu na Cristuarū duūxū tiīxū, rū name nixī i nūxū tacuèx na toma rū ta tūmarūū Cristuarū duūxūgū tixīgūxū. ⁸ Rū woo írarūwa chanangupetūxēē na chaugū chicuèxūūxū namaã i ngēma na Tupana toxū muxū, natūrū taxucèxma naxcèx chaxāne. Erū aixcūma Cori nixī ya toxū mucū na pexū tarūngūxēēgūxūcèx na yexeraãcü meã peyaxōgūxūcèx. Rū tama tacū rū chixexūgu pexū na tayixēēxūcèx nixī i toxū namuxū. ⁹ Rū tama chanaxwèxe i nagu perūxīnūē na pexū íchabaixgūchaūxū namaã i ngēma poperagū i pexcèx chaxūmatūxū. ¹⁰ Erū nūmaxū i duūxūgū rū nūxū nixugū na chorū poperawaxicatama pexū íchabaixgūxū, natūrū chomaxūchi pexūtawa changexmagu rū tama aixcūma nūxū chacuèx na ñuãcü mea chidexaxū na ngemaãcü chauga pexū chaxīnūexēēxūcèx, ñaxūmaã choxū nixugūe. ¹¹ Natūrū texe ya ngemaãcü idexáxe rū tanaxwèxe i nagu tarūxīnū rū ngēma pexna tayaxūgūãcūma torū poperawa pemaã nūxū tixuxūrūū tátama tixīgū i ngēxguma petanūwa tangēxmagūgu. ¹² Toma rū tama tanaxwèxe i namaã togū tawūxiguxēē rū ēxna nagu togū tangugū i ngēma duūxūgū i nūgūtama icuèxūūgūxū. Nūmagū rū nūgūtama nawomūxēēgū, erū nūgūmaã nūgū nawūxiguxēē rū nūgūgutama nūgū nangugū. ¹³ Natūrū toma rū tama togū namaã ticuèxūūgū i ngēma yaxōgūxū i tama Tupana toxmēxwa ngēxmagūxēēxū. Yerū Tupana nixī ga tomaã nūxū ixucū na ngextá nanaxwèxexū na tapuracūexū. Rū nūma nixī ga noxri Corītiuwa ga petanūwa toxū nangugūxēēxū na pemaã nūxū tixuxūcèx ga norū ore. ¹⁴ Rū yemaãcü toxira nixī ga noxri petanūwa tangugūxū na pemaã nūxū tixuxūcèx ga yema Cristuarū ore. Rū ngēmacèx i ñuxma na petanūwa taxīxū, rū tama tanangupetūxēē ga yema Tupana tomaã nūxū ixuxū, yerū nūma nixī ga toxū namuxū na pexū tarūngūxēēgūxūcèx. ¹⁵ Rū ngēmacèx tama togūarū puracūmaãmare nixī i togū ticuèxūūgūxū. Rū tama nūxū tachopetūchaū i ngēma Tupana tomaã nūxū ixuxū na pexū tangúexēēxū. Natūrū ngema pexū tanaxwəaxū nixī na yexeraãcü nūxū pecuáxū i Tupanaarū ore na ngemaãcü yexera peyaxōgūxūcèx. ¹⁶ Rū ngēxguma marū petanūwa tangugūguwena rū tanaxwèxe i ngēma duūxūgū i perū yéamaxūra ngēxmagūxū i ngextá taguma texé nūxū íxuxūwa taxī na ngēmamaã rū ta nūxū tixuxūcèx i ore i mexū. Erū tama tanaxwèxe i togūarū puracūmaã togū ticuèxūūgū. ¹⁷ Erū Tupanaãrū ore i ūmatūxūwa rū ñanagūrū:

“Rū ngēxguma texé tūgū icuèxūūchaūgu, rū name nixī i tórū Corixū ticuèxūū, erū nūma nixī i tūxū nangūxēēxū”,
ñanagūrū i ngēma ore. ¹⁸ Erū ngēma yatū i aixcūma Tupanapēxewa mexū rū tama nūgūtama nicuèxūū. Natūrū ngēma yatū i tórū Cori nūxū icuèxūūxū nixī i aixcūma Tupanapēxewa mexū.

11

Pauru rū nūxū nixuchiga ga yema orearū uruūgūneta ga tama Tupana imugūxū

1 Rū ñuxma i ngēma tá pemaã nüxũ chixuxũ, rü bexmana pexcèx rü wüxi i ngēãmare nixĩ, natürü chanaxwèxe i choxũ iperüxĩnüẽmare rü yaxna chomaã pexĩnüẽ. 2 Erü Tupana pexũ inuxũürüü pexũ chinuxũ. Erü chaugagu nixĩ i Cristuaxũ peyaxõgũxũ, rü marü Cristuna pexũ chaxuaxũ na noxrüxicatama pixĩgũxũcèx. Rü ngēmacèx chanaxwèxe i ngearü chixexũãe Cristuxũ pexũ chawèx ñoma wüxi i pacü i taguma yatũxũ cuèxcürüü. 3 Natürü chaxoe-gaãe rü yema äxtape norü doramaã Ebaxũ na womüxẽxürüü, ngürüãchi tá ta texé pexũ tawomüxẽe, na nüxũ perüxoexũcèx na Cristugu perüxĩnüẽxũ rü naxcèxicatama na pemaxèxũ. 4 Erü pema rü tauxchaãcü nixĩ na pexũ nawomüxẽegũxũ. Rü ngëxguma ínangugügu i duũxügü i pemaã nüxũ ixuxũ i to i Ngechuchuchiga ya tama yima toma nüxũ tixuchigacü, rü pema rü nüxũ peyaxõgü i ngēma duũxügü. Rü pema rü taãeãcüma penayaxu i to i naãe i tama Tupanaãe i Üünexũ ga marü peyaxuxũ ixĩxũ. Rü peyaxõgü i to i ore i tama Tupanaãrü ore i mexũ ga noxri peyaxuxũ ixĩxũ. 5 Dücèx, rü woo nawe perüxĩxgu i ngēma togü i orearü uruũgüneta, natürü chauxcèx rü taxuwama choxũ narüyexeragü. 6 Rü woo tama choxũ nangëxmagu i tauxcha na duũxügüpèxewa chidexaxũ, natürü aixcüma meã nüxũ chacuèx i ngēma nachiga chidexaxũ. Rü ngēma rü guxüma i torü puracüwa marü pexũ nüxũ tadauxẽe i guxüguma. 7 ¿Pexcèx rü chixexũ pemaã chaxü ga yexguma chaugü ícharüxíragu na pexũ chataxẽxũcèx rü choxmèxmaã chapuracügu na ngetanüãcüma pemaã nüxũ chixuxũ ga Tupanaãrü ore i tüxũ maxèxẽxũ? 8 Rü aixcüma yema togü ga yaxõgũxũ choxna ngĩxũ ägücü ga dïëru ngĩxũ chayaxu na yemamaã petanüwa chapuracüxũcèx rü pexũ charüngũxẽxũcèx. 9 Rü yexguma petanüwa chayexmagu rü aixcüma choxũ itaxu ga dïëru, natürü taguma texéna ngĩxcèx chaca. Rü taeneegü ga Machedóniããnewa ne íxũ rü choxna ngĩxũ naxãgü ga yema choxũ tauxcü. Rü yemaãcü tama pexütawa ngĩxcèx íchaca ga yexguma. Rü ñuxma rü ta tagutáma tacücèx pexna chaca. 10 Rü Cristu ya chowa ngexmacüégagu pemaã nüxũ chixu i ngema na aixcüma ngetanüãcüma petanüwa chapuracüxũ. Rü ngema rü chorü taãxè nixĩ. Rü taxucürüwa texe i guxũ i Acáyaanewa choxna tanayaxu i ngema taãxè. 11 ¿Rü tacücèx yĩxũ i ngēmaãcü chidexaxũ? ¿Éxna pexcèx rü tama pexũ changechaũxũcèx yĩxũ i ngēmaãcü chidexaxũ? Dücèx, pemaã nüxũ chixu rü Tupana nüxũ nacuèx na ñuxãcü aixcüma pexũ changechaũxũ. 12 Natürü ngēma na ngetanüãcüma pemaã nüxũ chixuxũ i ngēma ore, rü ngēmaãcü tá chanaxüecha na taxucürüwa chixri chauchiga yadexagũxũcèx i ngēma togü i orearü uruũgüneta i nügü ixuxũ na toxrüü naxügüãxũ i Tupanaãrü puracü. 13 Nümagü rü aixcüma orearü uruũgüneta nixígü, rü duũxügũxũ nawomüxẽegü. Rü nümagü rü togu nügü nicuxgü, rü nügü nixugü na Cristu yamugũxũ. 14 Rü ngēma rü taxucèxma namaã pebaixãchiãegü. Erü woo i Chataná rü ta rü Tupanaãrü orearü ngeruũgü i daxũcüãx i yauracüxürüüãcü nügü nangoxèe. 15 Rü ngēmacèx woetama ngēmaãcü nixígü i ngēma duũxügü i Chatanáãxũ puracüexũ. Rü nümagü rü duũxügü i mexũ ügüxügu nügü nicuxgü. Natürü ngēma ngēmaãcü ixígũxũ, rü Tupana tá nanapoxcue naxcèx i ngēma chixexũ i naxügũxũ.

Pauru rü yema puracü ga Ngechuchu nawa namuxũwa ngüxũ ninge

16 Rü wena pemaã nüxũ chixu rü tama chanaxwèxe i nagu perüxĩnüẽ na wüxi i ãũãxũ chiĩxũ. Natürü ngëxguma chi ngēmaãcü chomaã nagu perüxĩnüẽgu, rü tama chanaxwèxe i choxna penachuxu na ñoma wüxi i ãũãxürüü chaugüétüwa chidexaxũ, na ngēmaãcü choma rü ta írarüwa chaugütama chicuèxüxũcèx. 17 Rü ñuxma na chaugüétüwa chidexaxũ rü

ngēma rü tama tórü Coriarü mu nixĩ. Natürü ñoma wüxi i ãũãëxũ nügü icuèxüüxürüü nixĩ i chidexaxũ. ¹⁸ Rü ñuxma na nangëxmaxũ i muxũchixũ i duüxügü i ñoma i nañewa nügü icuèxüügüxũ, rü choma rü tá ta írarüwa chaugü chicuèxüü. ¹⁹ Pema rü nagu perüxĩnüë rü nüxũ cuèxüchigüxũ pixĩgü. Natürü taãëãcüma yaxna namaã pexĩnüë i ngēma duüxügü i tama naãëxũ icuáxũ. ²⁰ Rü yaxna namaã pexĩnüë i ngēma duüxügü i nügüxũ pexũ puracüexëëxũ, rü ngēma ngetanüãcüma pexũ puracüexëëmarexũ, rü ngēma pexũ womüxëëgüxũ, rü ngēma chixri pexũ yaxugüxũ, rü ngēma pemaã guxchigagüxũ. ²¹ Rü woo wüxi i ãnexũchi nixĩ na pemaã nüxũ chixuxũ, natürü chauxcèx rü tama aixcüma pexũ nüxũ tadauxëë ga torü pora ga yexguma petanüwa tayexmagügu. Natürü ñuxma na tama namuüëxũ na nügü yacuèxüügüxũ i ngēma togü i duüxügü, rü choma rü ta taxucèxma chamuũ na chaugüëtüwa chidexaxũ woo pexcèx rü taxuwama namexgu i ngēma nüxũ chixuxũ. ²² Nümagü rü nügü yaxugügu rü Yudíugü nixĩgü. Natürü choma rü ta Yudíu chixĩ. Rü nümagü nügü yaxugügu rü Iraétanüxügü nixĩgü. Natürü choma rü ta rü Iraétanüxũ chixĩ. Rü nümagü rü nügü yaxugügu rü Abráütanüxũ nixĩgü. Natürü choma rü ta Abráütanüxũ chixĩ. ²³ Nümagü rü nügü yaxugügu rü Cristuaxũ napuracüe. Natürü choma rü norü yexera Cristuaxũ chapuracü. Rü ngēma ñachagürü pexũ woo pema nagu perüxĩnüëgu na ñoma wüxi i ãũãëxürüü chidexaxũ. Rü ngēma duüxügüarü yexera poraãcü Tupanaãxũ chapuracü. Rü norü yexera chapoxcu, rü norü yexera choxũ naçuaixgü ga duüxügü. Rü muëxpüxcüna rü ãücümaxũchixüwa chayexma rü wixguxüchi taèx choxũ nimèxgü. ²⁴ Rü 5 ëxpüxcüna nixĩ ga 39 ga çuaximaã choxũ napoxcu-güxũ ga chautanüxügü ga Yudíugü. ²⁵ Rü tomaëxpüxcüna nixĩ ga nañmaã choxũ naçuaixgüxũ, rü wüxicana ga nutamaã choxũ inamuxũchigüxũ. Rü tomaëxpüxcüna nixĩ ga guma wapuru ga nagu chixüxüne rü chomaã inanguxũ. Rü wüxicana ga yexguma chomaã inanguxgu ga wapuru rü wüxi ga chütaxũ rü wüxi ga ngunexũ chinge na taxũ ga taxtúarü ngäxütügu mürapewaétügu chatunagüãcüma chiwëxëxũ. ²⁶ Rü poraãcü nu ne chanaxũ, rü poraãcü ãücümaxüwa chayexma yerü natügü ga ãücümaxügu chixügü, rü ngítèèxgüxũ rü chixexũ chomaã naxügüchaũ. Rü woo chautanüxügü ga Yudíugütanüwa, rü woo yema duüxügü ga tama Yudíugü ixígüxütanüwa, rü woo ñanegüwa, rü woo namagüwa, rü woo taxtũ i taxüwa rü ãücümaxüwa chayexma. Rü yema duüxügü ga chomüçügünetaxügüxütanüwa rü ta ãücümaxüwa chayexma. ²⁷ Rü poraãcü chataarü puracüãx, rü muxũchixũ ga guxchaxügü choxũ nangupetü. Rü muëxpüxcüna rü tama chape, rü chataiya, rü chitawa. Rü muëxpüxcüna rü tama chachibü, rü choxũ nanadeyu, rü choxũ nataxu ga chauxchiru. ²⁸ Rü naetüwa i guxüma i ngēma, rü guxũ i ngunexügu rü chaxoegaãë naxcèx i guxüma i ngēma yaxögüxũ i guxũ i ñanewa ngëxmagüxũ. ²⁹ Rü ngëxguma chi texé tama poragu, rü choxũ rü ta nangux. Rü ngëxguma chi wüxie texéxũ pepadugu nguxëëgu, rü chauãëwa nangux i ngēma. ³⁰ Natürü ngëxguma chi chaugü chicuèxüüchaũgu, rü tá chaugü chicuèxüü naxcèx na duüxügü choxũ dauxũ na taxuwama chamexũ. ³¹ Rü Tupana ya tórü Cori ya Ngechuchu ya Cristunatü ya mecü na guxüguma nüxũ icuèxüügüxũ, rü nüxũ nacuèx na aixcüma yĩxũ i ngēma nüxũ chixuxũ. ³² Rü yexguma Damacuwa chayexmagu, rü guma ñaneärü ãëxgacü ga Aretaarü ngüxëëruũ, rü norü churaragüxũ namu na nüxna nadaugüxüçèx ga guma ñaneärü poxeguxüärü ñaxgü na choxũ yayauxgüxüçèx ga yexguma chi yema íchaxüüxgu. ³³ Natürü yema ñaneärü poxeguxüärü ñaxácüwa rü wüxi ga pexchigu choxũ ínarüçhüxüetaũgü ga chomüçügü. Rü yemaãcü chiña naxchaxwa ga yema ãëxgacü.

12

Tórü Cori rü Pauruxŭ nangoxetüxêê rü nüxŭ nüxŭ nacuèxêê ga tacü ga êxŭguxŭ

¹ Taxuwama name na texé tŭgŭ icuèxüxŭ. Natürü tá pemaã nüxŭ chixuama na ñuxãcü tórü Cori choxŭ nangoxetüxêêxŭ rü ñuxãcü choxŭ nüxŭ na nacuèxêêxŭ ga tacü ga êxŭguxŭ. ² Rü 14 ga taunecü marü nangupetü ga na Tupana daxŭguxŭ ga naãnewa ga nüma ínayexmaxŭwa choxŭ nagaxŭ. Natürü tama nüxŭ chacuèx rü chauãêwaxicatama nixŭ ga yéma choxŭ nagaxŭ, rü êxna guxŭ ga chaxunemaã yŭxŭ ga yéma choxŭ nagaxŭ. Rü Tupanaxŭcatama nüxŭ nacuèx i ngêma. ³⁻⁴ Rü aixcüma meãma nüxŭ chacuèx na daxŭguxŭ ga naãnewa choxŭ nagaxŭ ga Tupana, natürü tama nüxŭ chacuèx rü guxŭ ga chaxunemaã yéma choxŭ naga rü êxna tama. Rü Tupanaxŭcatama nixŭ ya nüxŭ cuácü i ngêma. Rü yéma nüxŭ chaxŭnŭ ga ore ga êxŭguxŭ i guxŭma i duŭxŭgüna chuxuxŭ na nüxŭ yaxugŭxŭ. ⁵ Rü choma rü chi name na chaugŭ naxcèx chicuèxüxŭ i ngêma, natürü tãütáma ngêmaãcü chanaxü. Erü ngêma ngúxŭ na chingexŭmaãxŭcatama tá nixŭ i chaugŭ chicuèxüxŭ. ⁶ Natürü ngêxguma chi chaugŭ chicuèxüxŭchaŭgu, rü tãu chima wüxi i ngêãmare nixŭ i ngêma, erü aixcüma nixŭ i ngêma ore i nüxŭ chixuxŭ i chauchiga. Natürü tama chaugŭ chicuèxüxŭ na taxúema nagu rüxŭnŭxŭcèx na ngêma chowa nüxŭ naxŭnŭxŭ rü nüxŭ nadaugŭxŭârü yexera chiŭxŭ. ⁷ Natürü tórü Cori rü tama nanaxwèxe i poraãcüxŭchima chaugŭ namaã chicuèxüxŭ ga yema êxŭguxŭ ga mexêchixŭ ga choxŭ nüxŭ nacuèxêêxŭ. Rü yemacèx chaxunewa nananguxêê ga wüxi ga choxŭ ngúxŭ ñoma wüxi ya tuxu chaxunewa ingaxixŭrŭü. Rü yema rü ñoma wüxi ga Chatanáârü orearü ngeruŭrŭü chauxŭtawa nangu na choxŭ nachixewexŭcèx na tama chaugŭ chicuèxüxŭcèx. ⁸ Rü tomaêxpŭxcüna tórü Corina chaca na choxŭ iyanaxoxêêãxŭcèx ga yema choxŭ ngúxŭ. ⁹ Natürü nüma ya tórü Cori rü ñanagŭrŭ choxŭ:

“Rü cuma nüxŭ cucuèx na guxŭguma cuxŭ changechaŭ, rü ngêxŭcatama nixŭ i cunaxwèxexŭ. Rü ngêma duŭxŭgŭ i tama poraexŭwa nixŭ i aixcüma chanangoxêêxŭ i ñuxãcü na chaporaxŭ”, ñanagŭrŭ choxŭ. Rü ngêmacèx chataãê ega tama chaporagu. Erü ngêxguma tama chaporagu rü ngêxguma nixŭ i chowa inawéãxŭ i norü pora ya Cristu. ¹⁰ Rü ngêma na Cristuxŭ na changechaŭxŭgagu nixŭ i yaxna namaã chaxŭnŭxŭ ega woo chaturagu rü woo tacü chomaã yaxugŭegu i duŭxŭgŭ. Rü woo choxŭ natauxgu i chorü ngêmaxŭgŭ, rü woo duŭxŭgŭ rü chowe yangêxŭtanŭgu, rü woo guxchaxŭgŭ choxŭ ngêxmagu rü Cristucèx rü yaxna namaã chaxŭnŭ i guxŭma i ngêma. Erü ngêxguma chaturagu, rü ngêxguma nixŭ i yexeraãcü Cristu choxŭ poraxêêxŭ.

Pauru rü naxcèx naxoegaãê ga yema yaxôgŭxŭ ga Corŭtiuwa yexmagŭxŭ

¹¹ Maneca ñoma wüxi i ãüãêxŭrŭü chidexa, erü ngêmaãcü chaugŭ chicuèxüxŭ. Natürü pegagutama nixŭ i düxwa ngêmaãcü chaugŭétüwa chidexaxŭ, yerü pema chi nixŭ ga choxŭ picuèxüxŭgŭxŭ, rü tama i chomax. Rü woo taxuwama chame i chomax, natürü taxuwama choxŭ narüyexeragŭ i ngêma orearü uruŭgŭneta i nawe perŭxŭxŭ. ¹² Rü yexguma petanüwa chayexmagu, rü yaxna pemaã chaxŭnŭãcüma pexŭ nüxŭ chadauxêê na aixcüma Cristu choxŭ muxŭ na nüxŭ chixuxŭcèx ga norü ore. Rü cuèxruŭgŭmaã pexŭ nüxŭ chacuèxêê ga yema. Rü pexŭ nüxŭ chadauxêê ga taxŭ ga mexŭgŭ ga Tupanaârü poramaã üxŭ. ¹³ Rü yexguma petanüwa chayexmagu rü pemaã chamecüma yema guxŭma ga togŭ ga yaxôgŭxŭmaã na chamecümaxŭrŭütama. Natürü wüxiwaxicatama nixŭ ga íchatŭxŭ yerü ga petanüwa rü tama ngŭxŭ chayaxu ga dŭêru yema togŭ ga yaxôgŭxŭtanüwa ngŭxŭ chayaxuxŭrŭü. Rü chanaxwèxe i choxŭ nüxŭ pengechaŭ i ngêma.

14 Rū ñuxma rū marū íchamemare na norū tomaēxpūxcūna pexū íchayadauxū. Rū tāūtáma tacúcèx pexna chayaca. Erū tama perū ngēmāxūgūcèx petanūwa chaxū, natūrū pexcèxūchi nixī i ngēma chaxūxū. Pema rū chauxacūgū pixīgū i Tupanaārū orewa. Rū ngēma papá rū mamáārū puracū nixī na naxācūgūna naxāāxū i ngēma nūxū taxuxū. Rū tama naxācūgūarū puracū nixī na nanatūna rū naēna naxāgūāxū. 15 Rū choma rū íchamemare na chorū ngúchaūmaā pexcèx ichanaxāxū i guxūma i tacū i choxū ngēxmaxū rū woo chaugūtama rū ta na ichaxāxū na aixcūma meā peyaxōgūxūcèx. Natūrū chauxcèx rū ngēxguma yexeraācū pexū changechaūgu, rū pema rū yexeraācū nūxū perūxoetanū na choxū pengechaūxū. 16 Rū nūmaxū i duūxūgū i petanūwa, rū woo nūxū nacuēxgū na taguma tacúcèx pexūtawa íchaçaxū, natūrū nūmagū rū nūxū nixugūama na pexū chawomūxēēācūma perū dīeru ngīxū chayaxuxū. 17 ¿Éxna pema nagu perūxīnūēgu rū yema duūxūgū ga petanūwa chamugūxūwa pexū chawomūxēē? 18 Rū Titumaā nūxū chixu na petanūwa íyadauxūcèx. Rū namaā yéma chanamu ga yema to ga taeneē. ¿Éxna pema nagu perūxīnūēgu ga Titu rū pexū yéma nayawomūxēē? ¿Tama éxna aixcūma yīxū na chauxrūū meā na namaxūxū rū chauxrūū mexūgu naxīnūxū ga Titux? 19 Bexmana pema tá nagu perūxīnūē rū ngēmaācū tidexagū, erū togūētūwatama tachogūchaū. Natūrū, Pa Chaueneēgū ya Pexū Tangechaūgūex, rū Tupanapēxewa rū Cristuégagu nixī i tidexagūxū na yexeraācū meā Tupanaāxū peyaxōgūxūcèx rū yexeraācū meā na pemaxēxūcèx. 20 Erū chaxoegaāē rū ngēxguma wena pexū íchayadēuxgu, rū ngūrūāchi tama choma chanaxwèxexūācūma ípemaxē, rū ngēmacèx i pema rū tāūtáma chomaā petaāēgū. Rū chaxoegaāē erū ngūrūāchi tá pexū ichayangau na pegūchi ípexaīexū, rū pegūarū ngēmāxūcèx pixāūxāchigūxū, rū pegūmaā penuēxū, rū pegūguxicatama íperūxīnūēxū, rū pexoregūtēēxgūxū, rū toguāxū pixuxū, rū pegū picuēxūgūxū, rū chixexū ípexūexū rū ngēmaācū chixri ípemaxēxū. 21 Rū chaxoegaāē rū ngēxguma wena petanūwa chaxūxgu, rū ngūrūāchi Tupana rū pegagu tá choxū naxānexēē. Rū ngūrūāchi ngechaū tá choxna pexā, erū muxēma i petanūwa rū marū ñuxgumama pecadu taxūgūecha, rū tama nūxū tarūxoechaū na Tupanapēxewa chixexū taxūgūxū rū naī i ngēmaāmare na tamaxēxū rū guxūma i togū i chixexū na taxūgūxū.

13

Pauru nayaxucūxē ga yema yaxōgūxū ga Corītiucūāx rū ñuxūchi nūxū narūmoxē

1 Ñuxma rū norū tomaēxpūxcūna tá nixī na petanūwa chaxūxū. Rū Tupanaārū ore rū tamaā nūxū nixu rū ngēxguma texé chixexū ūxgu rū taxre rū éxna tomaēxpūx i duūxūgū nūxū daugūgu rū nūxū yaxugūgu na aixcūma yīxū, rū aixcūma tá poxcu tūmamaā taxuegu ya yíxema chixexū ūxe. 2 Rū ngēmacèx i pema i ūpamamatama pecadu ūgūechaxe rū guxāma i pema ya chixri maxēxē, rū ñuxma na woo pexna chayaxūgūxū rū wēnaxārū pexna nūxū chacuēxāchixēē rū ngēxguma tá ngēma chaxūxgu rū aixcūma tá chanamexēē i guxūma i ngēma chixexū i petanūwa ngēxmaxū, rū tāūtáma chanangupetūxēēmare i ngēma. 3 Rū pema na naxcèx iperūdaunūxū na Cristu chowa idexaxū, rū ngēxguma ngēma chaxūxgu, rū ngēxguma tá nixī i nūxū pedauxū na aixcūma chowa na yadexaxū ya Cristu. Rū nūma ya Cristu rū chowa tá pexū nūxū nadauxēē na tama naturaxū natūrū aixcūma yanguxēēāxū i norū ore rū tūxū napoxcuexū ya yíxema chixexū ūgūxe. 4 Rū aixcūma nixī ga Cristu ga ñoma wūxi ga duūxū i turaxūrūū nūgū yaxīxēēxū ga yexguma curuchawa yapotagu. Natūrū i ñuxma rū

Tupanaārū poragagu namaxū. Rū ngēxgumarū i toma na norū duūxūgū tixīgūxū, rū taturae i toxonewa. Natūrū ngēma na norū duūxūgū tixīgūxū, rū Tupanaārū poragagu tá tamaxē na pexū tarūngūxēēgūxūcēx. ⁵ Rū name nixī i pegūtama pengugū na nūxū pecuáxūcēx ngoxi aixcūma meā peyaxōgū. Rū name nixī i pegū pengugūarū maxūāx rū ngoxi Tupanapēxewa pime. ¿Tama ēxna nūxna pecuēxāchie na Ngechuchu ya Cristu rū pewa nangēxmaxū ega aixcūma peyaxōgūgu? ⁶ Rū chierūna nūxū pecuēxgu na toma rū tama orearū uruūgūnetamare na tixīgūxū. ⁷ Rū Tupanana naxcēx taca na taxuūma i chixexū na pexūgūxūcēx. Rū tama duūxūgūpēxewa togū ítarūtagūxūcēx nixī na ngēmaācū tayumūxēgūxū. Natūrū Tupanana naxcēx taca i ngēma na aixcūma meā naxcēx pemaxēxūcēx woo duūxūgū nagu rūxīnūēgu na toma rū ítatüemarexū. ⁸ Toma rū taxucūrūwama chixri nachiga tidexagū i Tupanaārū ore i aixcūma ixīxū, erū toma rū naētūwa tachogū i ngēma ore. ⁹ Rū tá tataāēgū ega aixcūma peporaegu i perū maxūwa rū ngēmacēx natauxgu i tacūcēx pemaā na taporagaexū. Rū Tupanana tá naxcēx tacaama na pexū naporaexēēxūcēx i perū maxūwa na dūxwa aixcūma mexū i norū duūxūgū na pixīgūxūcēx. ¹⁰ Rū naxūpa na pexū na íchayadauxū nixī i pexcēx chanaxūmatūxū i ñaā popera, na ngēxguma ngema changuxgu rū nataxuxūcēx i tacūcēx pemaā na chaporagaxū. Erū tórū Cori choxū namu na pexū charūngūxēēxūcēx na yexeraācū meā peyaxōgūxūcēx, rū tama chixexū pemaā na chaxūxūcēx nixī i choxū namuxū. ¹¹ Rū ñuxma na ichayacuēxēēxū i ñaā popera, Pa Chaueneēgūx, rū chanaxwēxe i meā pexū naxūpetū rū naxcēx pedau na ñuxācū aixcūma meā Tupanacēx pemaxēxū. Rū name nixī i pegū petaāēxēēgū rū wūxigu perūxīnūē rū meā yaxna pegūmaā pexīnūē rū aixcūma pegū pengechaūgū. Rū nūma ya Tupana ya tūxū ngechaūcū rū tūxū rūngūxmūēēcū, rū guxūgutáma pemaā inarūxāūx. ¹² Rū chanaxwēxe i wūxichigū i pema rū pegū pengechaūgūācūma pegū perūmoxēgū. ¹³ Rū guxūma i togū i taeneēgū i yaxōgūxū rū pexū narūmoxēgū. ¹⁴ Rū ñuxma rū chanaxwēxe i tórū Cori ya Ngechuchu ya Cristu pexū narūngūxēē, rū Tanatū ya Tupana rū pexū nangechaū, rū Naāē i Üünexū rū guxūguma pemaā inarūxāūx.

Rū nuāma pexna,
Pauru

POPERA GA GÁRATAANEWA YEXMAGÜXŪ GA YAXŌGÜXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgüxŭ ga Gárataaneärü ĩānegüwa yexmagüxŭ

¹⁻² Pa Toeneēgü i Yaxōgüxŭ i Gárataaneärü ĩānegüwa Ngēxmagüxŭ, choma i Pauru rü namaā i guxŭma i taeneēgü i nuā chauxŭtawa ngēxmagüxŭ nixŭ i pexcèx tanaxümatüxŭ i ñāā popera. Rü choxŭ nixŭ ga namugüxŭ ga Ngechuchu ya Cristu rü Tanatü ya Tupana. Rü aixcüma tama duŭxŭgü nixŭ ga choxŭ unetagüxŭ na chanaxüxŭcèx i ñāā Tupanaärü puracü. Natürü Tanatü ya Tupana ga Ngechuchuxŭ írüdaxēcŭ rü nümatam ya Ngechuchu ya Cristu nixŭ ga choxŭ naxunetagüxŭ. ³ Rü chanaxwèxe i Tanatü ya Tupana rü tórü Cori ya Ngechuchu ya Cristu poraäcŭ pexŭ narüngüxēē rü pexŭ nataāxēē. ⁴ Rü nüma ga tórü Cori ya Ngechuchu rü nügü inaxā na tórü pepaducèx nayuxŭcèx na nüxna tüxŭ ĩnguxŭxēēxŭcèx i guxŭma i ñoma i naāneärü chixexŭ. Rü yemaäcŭ nanaxü, yerü yema nixŭ ga Tanatü ya Tupanaärü ngüchaŭ. ⁵ ¡Namexēchi ya Tupana i guxŭguma! Rü ngēmaäcŭ yŭ.

Nataxuma i to i ore i tüxŭ maxēxēxŭ

⁶ Rü yema na Cristuaxŭ pengechaŭtümüügüxŭcèx nixŭ ga pexna naxuxŭ ya Tupana na penayaxuxŭcèx i maxŭ i taguma gúxŭ. Rü ñuxma rü poraäcŭ chaŭaixāchiāē, erü paxaxüchi ipenaxügü na Tupanana pixŭgachixŭ, na nawe perüxŭcèx i to i nguxēētae i nagu perüxŭñüēgu rü pexŭ maxēxēxŭ. ⁷ Natürü tama aixcüma nangēxma i to i nguxēētae i nawa nayaxuxŭ i maxŭ i taguma gúxŭ. Natürü nangēxma i ñuxre i duŭxŭgü i pexŭ naguxchaxēēchaŭxŭ, rü nanaxüchicüügüchaŭ i ngēma nguxēētae i mexŭ ga pemaā nüxŭ chixuxŭ ga Cristuchiga. ⁸ Rü toma rü marü pexna tanaxā ga yema nguxēētae i aixcüma ixŭxŭ i Ngechuchuchiga. Rü ngēxguma chi texé pexŭ ngüexēēgu i to i nguxēētae, rü name nixŭ i noxtacüma Tupana tüxŭ napoxcu. Rü woo choma chixŭgu, rü ēxna ŭacü rü Tupanaärü orearü ngeruŭ i daxŭcŭāx yixŭgu i pexŭ nguxēēxŭ i to i nguxēētae, rü name nixŭ i noxtacüma Tupana tüxŭ napoxcu. ⁹ Rü ñuxma rü wena pemaā nüxŭ chixu ga yema noxri pemaā nüxŭ chixuxŭ. Rü ngēxguma chi texé pexŭ ngüexēēgu i wüxi i to i nguxēētae i tama yema noxri peyaxuxŭrüü ixŭxŭ, rü name nixŭ i noxtacüma Tupana tüxŭ napoxcu. ¹⁰ Rü tama chomaā na petaāgüxŭcèx nixŭ i ngēma ñachaxŭ. Erü tama naxcèx chadau na duŭxŭgü chomaā taāgüxŭ, natürü Tupana chomaā taāxŭcèx nixŭ i chadauxŭ. Erü ngēxguma chi duŭxŭgüxŭxŭcatama chataāxēēchaŭgu, rü tãu chima Cristuarü puracütanüxŭ chixŭ.

Ñuxäcŭ Pauruxŭ nayaxu ga Tupana na norü puracüwa namuäxŭcèx

¹¹ Natürü, Pa Chaueneēgüx, chanaxwèxe i nüxŭ pecuèx na ñāā ore i mexŭ i nüxŭ chixuxŭ, rü tama duŭxŭgüāēwa yŭxŭ na ne naxŭxŭ. ¹² Yerü tama wüxi ga duŭxŭxŭtawa naxcèx changux. Natürü Ngechuchu ya Cristutama nixŭ ga choxŭ nüxŭ cuèxēcŭ. ¹³ Pema rü marü nüxŭ pexŭñüēchiga na ñuxäcŭ chamaxŭxŭ ga ŭpa ga yexguma Yudüügümagu chixŭxgu. Rü nüxŭ pexŭñüēchiga na ñuxäcŭ poraäcŭ nawe chingēchigüxŭ ga guxŭma ga Tupanaärü duŭxŭgü ga yaxōgüxŭ rü ñuxäcŭ chixri namaā na chaxüpetüxŭ na yemaäcŭ nüxŭ nüxŭ charüxoxēēxŭcèx ga yema na Ngechuchuxŭ yaxōgüāxŭ. ¹⁴ Rü muxŭma ga chautanüxŭgü ga Yudüügü ga chorü nayaāxgüraŭxŭärü yexera nagu chixŭ ga yema Yudüügüma. Yerü

norü yexera meãma chayanguxêê ga nacümagü ga nuxcümaügxü ga chorü oxigü nagu iñü. ¹⁵⁻¹⁶ Natürü yexguma tautama chabuxgu, rü woetama Tupana choxü naxuneta na choxü namuxücèx na chanaxüxcèx i norü puracü. Rü nüma rü chauxcèx naca na noxrü chixixücèx yerü poraãcü choxü nangechaü. Rü yexguma Tupana naxwèxegu, rü choxü nüxü nacuèxêê ga Nane ya Cristu. Rü yemaãcü nanaxü na ngêma duüxügü i tama Yudíugü ixígxümaã nüxü chixuxücèx na ñuxãcü Ngechuchugagu tüxü nangëxmaxü i maxü i taguma gúxü. Rü yexguma yemaãcü Tupana choxü nüxü cuèxêêgu ga Nane, rü taxúenama chayaca. ¹⁷ Rü bai ga Yerucharéüwa na chaxüxü na nüxna chayaçaxücèx ga yema togü ga ngúexügü ga nüxíra Tupana imugüxü. Natürü ga choma rü yexgumatama Arábíaanewa chaxü. Rü yemawena, rü Damacuarü ñanecèx chataegu. ¹⁸ Rü tomaëxpüx ga taunecüguwena rü düxwa Yerucharéüwa chaxü na Pedruxü chacuáxcèx. Rü ¹⁵ ga ngunexütama naxütawa chayexma. ¹⁹ Rü yéma nüxü chadau ta ga Chaütiágu ga tórü Cori naëneê. Natürü taxuüma ga togü ga ngúexügü ga tórü Cori imugüxüxü chadau. ²⁰ Rü Tupana choxü nadau na aixcüma yíixü i ngêma ore i ñuxma pexcèx chaxümatüxü. ²¹ Rü yemawena, rü Chíríiaanewa rü Chiríchíiaanewa chaxü. ²² Natürü yema taeneëgü ga Cristuaxü yaxögüxü ga Yudéaanewa yexmagüxü, rü taguma choxüxüchi nadaugü. ²³ Rü yema nüxü naxñüëxü ga chauchiga rü ñaãxícatama nixí:

“Rü ngêma Pauru ga üpa tawe ingèchigüxü, rü ñuxma rü duüxügümaã nüxü nixu i Tupanaãrü ore i mexü, rü namaã nayaxucuxê na Cristuaxü yaxögüãxcèx. Rü ngêmaãcü nanaxü i ñuxma rü woo ga noxri rü inayanax-oxêëchaü ga yema ore”, ñaxü. Rü yexícatama nixí ga chauchiga ga nüxü naxñüëxü. ²⁴ Rü yexguma ga yema duüxügü rü Tupanaxü nicuëxüügü nagagu ga yema Tupana chomaã üxü.

2

Yema togü ga ngúexügü ga Tupana imugüxü rü meã Pauruxü nayauxgü

¹ Rü ¹⁴ ga taunecüwena rü wenaxãrü Yerucharéüwa chaxü namaã ga Bernabé. Rü Titu rü ta íchayaga. ² Rü yéma chaxü yerü Tupana choxü nüxü nacuèxêê ga na nanaxwèxexü na yéma chaxüxü. Rü yéma Yerucharéüwa, rü yema yaxögüxüãrü ãëxgacügümaãxícatama changutaquêxe. Rü meãma namaã nüxü chixu ga nachiga ga yema Tupanaãrü ore i mexü ga nüxna chaxãxü ga yema duüxügü i tama Yudíugü ixígxü. Rü yemaãcü meãma namaã nüxü chixu na ñuxãcü na yíixü ga chorü nguxêëtae, yerü tama chanaxwèxe na yixcüra rü choxü nüxü naxoexü rü ngêmaãcü natücèxmamare na yíixü i ngêma puracü i chaxüxü. ³ Rü yema yaxögüxü, rü nümagü rü ta norü me nixí ga yema chorü nguxêëtae. Rü yemacèx rü woo tama Yudíu na yíixü ga Titu rü taguma na ínawiechèxmüpèxechiraüxü, natürü yema ãëxgacügü rü tama nanamu na ínawiechèxmüpèxechiraüxücèx. ⁴ Natürü aixcüma nixí ga ñuxre ga taeneëgünetaxü ixígxü ga bexmamare tatanügu nachocuxü. Rü yemagü nixí ga naxwèxegüxü na inawiüchèxmüpèxechiraüxü i ngêma yaxögüxü i tama Yudíugü ixígxü. Rü ñuxma na Ngechuchu ya Cristuarü duüxügü ixígxü, rü yema taeneëgünetaxü rü bexma tatanügu nachocu na tüxü nangügüxücèx na ñuxãcü Cristu nüxna tüxü ínguxüxêëxü ga yema mugü ga Moíché ümatüxü. Yerü nümagü nanaxwèxegü na wenaxãrü nagu ixíxü ga yema mugü ga guxchaxü ga Moíché ümatüxü. ⁵ Natürü bai ga írarüwa naga na taxñüëxü ga yema duüxügü. Yerü tama tanaxwèxegü na texé pexü naxüchicüxü i ngêma ore i mexü i aixcüma ixíxü i tamaã nüxü ixuxü i ñuxãcü tüxü na nangëxmaxü i maxü i taguma gúxü ega Cristuaxü yaxögügu.

6 Natürü yexguma yema yaxōgūxūārū āēxgacūgū ga Yerucharēūwa yexmagūxū nūxū ĩnūēgu ga ñuxācū na yīxū ga chorū nguxēētae, rü namaā nataāēgū rü taxuūma ga tacū ga togū ga mugū choxna naxāgū na namaā changúexēētaexūcēx. Natürü tama yema na āēxgacūgū yixīgūxūgu charūxīnū, erū nūxū chacuēx na Tupanapēxewa rü guxāma na wūxiguxū. 7 Natürü nūmagū ga yema āēxgacūgū, rü nūxū nicuēxāchigū na choxū yīxū ga namuxū ga Tupana na yema duūxūgū ga tama Yudíugū ixīgūxūmaā nūxū chixuxūcēx ga norū ore i mexū, yexgumarū ga Pedruxū na namuxūrū ga Tupana na Yudíugūmaā nūxū yaxuxūcēx ga yema ore. 8 Rū gumatama Tupana ga Pedruxū mucū na Yudíugūmaā nūxū na yaxuxū ga ore i mexū, rü gumatama Tupana nixī ga choxū mucū na yema duūxūgū ga tama Yudíugū ixīgūxūmaā nūxū chixuxūcēx ga yema ore. 9 Rū yemacēx ga Chaūtiágu rü Pedru rü Cuáú ga yaxōgūxūārū āēxgacūgū, rü nūxū nicuēxāchigū na choxū naxunetaxū ga Tupana na chanaxūxūcēx i ngēma puracū. Rū yemacēx ga yema āēxgacūgū, rü tomēx niyauxāchigū ga choma rü Bernabé na toxū nūxū nadauxēēgūxūcēx na aixcūma namūcūgū tixīgūxū i ngēma puracūwa. Rū nūmagū rü ta norū me nixī na ngēma duūxūgū i tama Yudíugū ixīgūxūtanūwa na tanaxūxū i Tupanaārū puracū rü nūmagū i Yudíugūtanūwa. 10 Rū toxna naxcēx naca na nūxū tarūngūxēēgūxūcēx ga yema yaxōgūxū ga ngearū dīeruāxgūxū. Rū yexicatama nixī ga toxna nūxū nacuēxāchixēēxū. Rū choma rü ta ngēmatama nixī i guxūguma woetama meāma chaxūxū.

Pauru rü Aūtioquíawa Pedruxū naxucūxē

11 Natürü yixcūra ga yexguma Aūtioquíawa naxūxgu ga Pedru, rü noxtacūma nūxū nūxū chaxīnūxēē, yerū tama aixcūma name ga yema naxūxū namaā ga yema yaxōgūxū ga tama Yudíugū ixīgūxū. 12 Yerū noxri rü yema duūxūgū ga tama Yudíugū ixīgūxūmaā nachibū ga Pedru. Natürü yexguma yēma nangugūgu ga ñuxre ga Yudíugū ga yaxōgūxū ga Chaūtiágu yēma mugūxū, rü Pedru rü marū tama yema duūxūgū ga tama Yudíugū ga yēma ngugūxū ga nagu ĩxū ga yema nacūma na Tupanacēx ĩnawiechēmūpēxechiraūgūxū. 13 Rū yema togū ga Yudíugū ga yaxōgūxū, rü yexguma nūxū nadaugūgu ga yema Pedru ūxū, rü nūmagū rü ta nanaxūgū ga yema chixexū rü naxcēx nawoeguchaū ga yema nuxcūmaūgūxū ga nacūmagū. Rū dūxwa ga Bernabé rü ta natanūgu naxā ga yema chixexū ūgūxū. 14 Natürü yexguma nūxū chadēuxgu na tama Tupanaārū ore i mexū tūxū nguxēēxūācūma na namaxēxū ga yema yatūgū, rü guxū ga yaxōgūxūpēxewa Pedruxū nūxū chaxīnūxēē. Rū ñacharūgū nūxū:

“Rū dūcax i cuma na Yudíuchirēx quiīxū, cuma rü tama aixcūma Yudíugūcūmagu quixū. ¿Rū ñuxācū i ñuxma i cunamuxū na Yudíugūcūmagu naxīxū i ngēma duūxūgū i tama Yudíugū ixīgūxū?” ñacharūgū nūxū.

Yudíugū rü woo ngēma duūxūgū i tama Yudíugū ixīgūxū rü norū ōgagu nixī i nayauxgūāxū i maxū i taguma gūxū

15 Rū pemaā nūxū chixu rü toma rü aixcūma torū bucūmatama Yudíugū tixīgū rü Tupanaxū tacuēxgū. Rū ngēmaācū tama duūxūgū i tama Tupanaxū cuēxgūxū tixīgū. 16 Rū nūxū tacuēxgū rü yema nuxcūmaūgūxū ga mugū ga Moīché ūmatūxū rü tama tūxū nimexēē i Tupanapēxewa, erū taxucūrūwama texé aixcūma naga taxīnūē i ngēma mugū. Natürü i ñuxma rü Tupana tūxū nadau na imexū ega Ngechuchu ya Cristuaxū yaxōgūgu. Rū yemacēx ga toma rü ta Ngechuchu ya Cristuaxū tayaxōgū na torū ōgagu Tupana toxū nadauxū na timexū. Erū nūxū tacuēxgū rü tama ngēma mugūgagu nixī na Tupanapēxewa tamexū ya wūxie, erū taxucūrūwama texé aixcūma

naga taxĩnũ i ngẽma mugũ na ngẽmaãcũ Tupanapẽxewa tamexũcèx. ¹⁷ Rũ ñuxma i yixema rũ Cristuaxũ tayaxõgũ, rũ ngẽmacèx nixĩ i Tupanapẽxewa imexũ. Natürũ ngẽxguma chi wũxi i ngunexũgu rũ yixema nagu ruxĩnũẽgu rũ mugũgu na ixĩxũgagu yixĩgu na Tupanapẽxewa imexũ, rũ maneca tá nagu tarũxĩnũẽ na Cristu tũxũ pecaduãxẽxũ. Natürũ dücax, rũ tama ngẽmaãcũ nixĩ erũ Cristu rũ tagutáma texéxũ napecaduãxẽẽ. ¹⁸ Choma rũ marũ nüxũ charũxo na nagu charũxĩnũxũ na mugũgu chixũxũgagu Tupanapẽxewa chamexũ. Natürũ ngẽxguma chi wenaxãrũ naxcèx chataegugu i ngẽma nuxcũmaũgũxũ i mugũ rũ chi nüxũ charũxoxgu na Cristuaxũ chayaxõxũ, rũ chi aixcũma wũxi i pecaduãxũ chixĩ. ¹⁹ Yerũ yexguma yema mugũwa changuxgu, rũ düxwa nüxũ chicuèxãchi na tama yanguxũ ga yema mugũ na choxũ namexẽxũ Tupanapẽxewa. Yerũ taxucürũwama aixcũma naga chaxĩnũ ga guxũma ga yema mugũ. Rũ ngẽmacèx i ñuxma rũ Cristuaxũ chayaxõ na Tupanapẽxewa chamexũcèx rũ naxcèxicatama chamaxũxũcèx. Rũ Cristu rũ curuchagu nayu na iyanaxoxũcèx ga nuxcũmaũxũ ga chorũ maxũ ga choxũ yexmaxũ ga yexguma yema mugũgu chixũxgu. ²⁰ Rũ ñuxma rũ marũ tama chaugũmaãtama ichacuèx, natürũ Cristu nixĩ ya chomaã icuácũ erũ chowa namaxũ. Rũ ñuxma rũ Tupana Nane ya Cristuaxũ chayaxõcũma nixĩ i chamaxũxũ i ñoma i nañewa. Rũ nüma nixĩ ga choxũ nangechaũxũ, rũ nũgũ inaxãxũ na chauxcèx nayuxũcèx. ²¹ Rũ tama nüxũ chaxoxchaũ i ngẽma mexũ ga Tupana taxcèx üxũ ga yexguma nayuxgu ga Cristu. Yerũ yexguma chi yema mugũgu ixĩxũgagu Tupanapẽxewa imexgu, rũ natücèxmamare chi nixĩ ga na nayuxũ ga Cristu.

3

Ñuxma rũ tama ngẽma mugũgu taxĩ erũ marũ Cristuaxũ tayaxõgũ

¹ Pa Chaueneẽgũ i GárataanecũĀx, pema rũ pengẽãẽgũmare. Rũ yexguma petanũwa tayexmagũgu rũ meãma guxãpẽxewa pemaã nüxũ tixu rũ pexcèx tanangoxẽẽ na ñuxãcũ curuchagu taxcèx nayuxũ ga Ngechuchu ya Cristu. ¿Rũ texé pexũ tawomũxẽẽ i ñuxma na tama naga pexĩnũẽxũcèx i ngẽma ore i aixcũma ixĩxũ ga pemaã nüxũ tixuxũ? ² Rũ wũxi i orecèx pexna chaca, rũ ¿ñuxãcũ yĩxũ ga penayaxuxũ ga Tupanaãẽ i Üünexũ? ¿Éxna pexcèx rũ yema mugũ na pinguxẽẽgũxũgagu yĩxũ ga penayaxuxũ, rũ éxna ngẽma ore i mexũ ga nüxũ pexĩnũẽxũ rũ pixõgũxũgagu yĩxũ? ³ Pema rũ pengẽãẽgũmare rũ poraãcũ ípetũe. Noxri rũ Cristuaxũ peyaxõgũ yerũ Tupanaãẽ i Üünexũ pewa napuracũ. ¿Rũ ñuxãcũ i ñuxma i nagu perũxĩnũẽxũ na wenaxarũ naxcèx pewoeguxũ i ngema nuxcũmaxũxũ i mugũ i taguma maxũ pexna ãxũ? ⁴ Pema rũ poraãcũ Tupana pexũ narũngũxẽẽ. Rũ chierũ tama natücèxmamare yixĩgu ga yema, erũ taxucürũwa natücèxmamare nixĩ. ⁵ Rũ yexguma Tupana pexna namuxgu ga Naãẽ i Üünexũ rũ petanũwa naxũãgu ga taxũ ga mexũgũ ga norũ poramaã naxũxũ, rũ ¿tacũgagu nixĩ ga naxũãxũ ga yema? ¿Pexcèx rũ mugũ na pinguxẽẽxũgagu yĩxũ ga Tupana naxũxũ ga yema? Tama yemagagu nixĩ. Tupana rũ petanũwa nanaxũ ga yema taxũ ga mexũgũ yerũ nüxũ peyaxogũ ga norũ ore ga nüxũ pexĩnũẽxũ. ⁶ Rũ dücax, pemaã nüxũ chixu rũ name nixĩ i nuxcũmaũcũ ga torũ oxĩ ga Abráũrũũ pixĩgũ. Yerũ Abráũ rũ Tupanaãxũ nayaxõ, rũ yemacèx Tupana nüxũ nadau ga na namexũ. ⁷ Rũ ngẽmawa nüxũ pedau rũ ngẽma duũxũgũ i Tupanaãxũ yaxõgũxũ nixĩ i aixcũma Abráũtanũxũ ixĩgũxũ i Tupanapẽxewa. ⁸ Rũ Tupanaãrũ ore i ümatũxũwa rũ nüxũ nixu na ñuxãcũ Tupanapẽxewa tá na yamexũ i ngẽma duũxũgũ i yaxõgũxũ i woo tama

Yudíugü ixíngüxü. Rü yemaãcü nüxü nixu naxüpa ga na nangupetüxü. Yerü Tupana rü nuxcümamatama Abráümaã nüxü nixu ga ñaã ore i mexü i ñaxü: “Rü cugagu tá nüxü charüngüxëe i guxüma i nachiuñanecüāx i duüxügü”, ñaxü. Rü yemaãcü nüxü tacuèx rü Cristu rü Abráütaa na yíixü. ⁹ Rü ngëmacèx i ñuxma rü Tupana nanayaxu i guxüma i duüxügü i yaxögüxü, yexgumarüü ga Abráü ga yaxöcüxü na nayaxuxürü. ¹⁰ Natürü chixexüwa nangëxmagü i guxüma i ngëma duüxügü i nagu rüxñüëxü na mugü yanguxëëgüxügagu Tupanapëxewa yamexü. Erü Tupanaärü ore i ümatüxüwa rü ñanagürü: “Rü guxüma i duüxügü i tama aixcüma yanguxëëgüxü i guxüma i ngëma mugü i ümatüxü, rü chixexüwa nangëxmagü”, ñanagürü. Erü nüxü tacuèxgü na taxucürüwama aixcüma texé yanguxëëxü i guxüma i ngëma mugü. ¹¹ Rü ngëmaãcü meãma nangox na tama ngëma mugü tinguxëëxüçèx yíixü na texé Tupanapëxewa mexü. Erü Tupanaärü ore i ümatüxüwa rü ñanagürü: “Rü yíxema tümaärü ögagu Tupanapëxewa mexë, rü yíxema tá tixí ya aixcüma tüxü nangëxmaxë i maxü i taguma gúxü”, ñanagürü. ¹² Natürü ngëxguma nagu rüxñüëgu na mugü inguxëëxüçèx yíixü na Tupanapëxewa imexü, rü taxucèx chima tüxcüü tayaxögü. Erü Tupanaärü orewa rü ngëmachiga naxümatü, rü ñanagürü: “Rü yíxema aixcüma meãma yanguxëëxë i guxüma i mugü, rü ngëmagagu tá tüxü nangëxma i tümaärü maxü”, ñanagürü. Natürü ngëma mugü rü düxwa chixexüwa tüxü naga erü taxucürüwama texé aixcüma meã tayanguxëë. ¹³ Natürü ga Cristu rü nawa tüxü ínanguxüxëe ga yema mugü ga chixexüwa tüxü yexmagüxëëxü. Rü taxcèx nixí ga chixexüwa nayexmaxü ga yexguma curuchagu nayuxgu. Erü Tupanaärü ore i ümatüxüwa, rü ñanagürü: “Rü guxäma ya yíxema wüxi i naíwa tüxü natuxëëgüãcüma yúxe, rü chixexüwa tangëxma”, ñanagürü. ¹⁴ Rü yemaãcü curuchagu nayu ga Ngechuchu ya Cristu na nüxü nangüxëëxüçèx i guxüma i ngëma duüxügü i tama Yudíugü ixíngüxü, yema Tupana Abráümaã ixunetaxürü. Rü taxcèx rü ta nayu ga Cristu na yíxema rü ta nüxü yaxögüxüçèx rü nayauxgüxüçèx i Tupanaãe i Üünexü i tamaã inaxunetaxü.

Tupanaärü uneta rü ngëma mugülarü yexera name

¹⁵ Pa Chaueneëgüx, ñuxma rü tá pemaã nüxü chixu i wüxi i cuèxruü na ñuxãcü duüxügü tacü nügümaã mexëëxü. Rü dücax, ngëxguma chi wüxi ya yatü rü texémaã tacüçèx inaxunetagu rü chi wüxi i poperagu meã naxümatüãgu i ngëma, rü taxucürüwa texé itayanaxoxëe rü éxna tanaxüchicüü i ngëma norü uneta. ¹⁶ Rü dücax, rü yexgumarüütama nixí ga nangupetüxü ga yexguma Tupana rü Abráümaã rü Abráütaamaã inaxunetagu. Rü Tupanaärü ore i ümatüxüwa rü tama “Abráütaagü” ñanagürü, yerü tama muxüma ga duüxügüchiga nidexa. Natürü yema ore rü “Abráütaa” ñanagürümare, yerü wüxitama ga duüxüchiga nixí ga yadexaxü. Rü yema rü Cristuchiga nixí. ¹⁷ Rü ngëmaãcü pemaã chanangoxëe na Tupana rü Abráümaã namexëëãxü rü namaã inaxunetaxü na Cristugagu tá yíixü i duüxügüxü nangüxëëxü. Rü ngëmacèx i ñuxma rü yema Moíché ümatüxü ga mugü ga 430 ga taunecü yema unetawena ínguxü, rü taxucürüwama inayanaxoxëe ga yema Tupanaärü uneta ga nüxíra Abráümaã nüxü yaxuxü. Rü ngëmacèx i ñuxma rü ta napora i ngëma uneta. ¹⁸ Rü ngëxguma chi mugü inguxëëgüxügagu yixígu na Tupana tüxü rüngüxëëxü, rü natüçèxmamare chi nixí ga yema Tupanaärü uneta ga nüxíra Abráümaã nüxü yaxuxü.

Natürü aixcūma nixī na ngetanüācūma Abráũxũ nangũxēẽxũ ga Tupana, yerü yemaācū marü namaã inaxuneta. ¹⁹ Rũ ñuxma rü ¿tacüwa namexũ ga yema mugü ga Moĩché ümatũxũ? Rũ dücax, Tupana rü marü Abráũmaã inaxunetaguwena nixī ga duũxũgũna naxããxũ ga yema mugü, na yemaācū duũxũgũxũ nüxũ nadauxēẽxũcèx na ñuxācū poraācū pecadu naxüexũ. Rũ yemaācū nixī ñuxmata ínangu ga guma Abráũtaa ya Cristu. Rũ gumachiga nixī ga Abráũmaã inaxunetaxũ ga Tupana ga noxrix. Rũ yexguma ínanguxgu ga yema mugü, rü Tupana rü daxũcũãx ga norü orearü ngeruũgũmaãxĩra nüxũ nixu. Rũ yemagü nixī ga nüxĩ Moĩchémaã nüxũ ixugũxũ, rü nüma ga Moĩché rü duũxũgũmaã nüxũ nixu. ²⁰ Natürü yexguma Tupana Abráũmaã ixunetagu, rü nümaxũchima ga Tupana nixī ga Abráũmaã nüxũ yaxuxũ ga yema norü uneta. Rũ tama togũmaãxĩra nüxũ nixu na yemagü nüxĩ Abráũmaã nüxũ ixugüexũcèx.

Tacücèx duũxũgũna nanaxã ga Tupana ga yema mugü

²¹ ¿Rũ ñuxũ ñapexũxũ i ñuxmax? ¿Pexcèx éxna rü yema Moĩché ümatũxũ ga mugü rü inayanaxoxēẽ i Tupanaärü unetagu? Rũ dücax, tama ngēmaācū nixī. Yerü yexguma chi naporagu ga yema mugü na tüxna naxããxũ i maxũ i taguma gũxũ, rü chi Tupanapèxewa time i ngèxguma meãma yanguxēẽgu. ²² Natürü tama ngēmaācū nixī. Erü Tupanaärü ore i ümatũxũwa nüxũ tadau na guxũma i duũxũgü rü pecadutũũwa nangèxmagũxũ. Rũ ngēmacèx i ñuxma rü yixema Ngechuchu ya Cristuaxũ yaxõgũxexicatama tixĩ ya nayauxgũxe i ngēma maxũ i aixcūma mexũ i Tupana tamaã ixunetaxũ. ²³ Rũ yexguma tauta ínanguxgu ga Cristu na nüxũ yaxõgũxũcèx, rü mugütũũwa tayexmagü rü tamaã inacuèx. Rũ yemaācū tixĩgü rü ñuxmata Tupana taxcèx nangoxēẽ ga Ngechuchu ya Cristu na nüxũ yaxõgũxũcèx. ²⁴ Rũ yemaācū ga yema mugü rü tamaã inacuèx ñuxmata Cristuxũtawa tüxũ nagagü na nüxũ yaxõgũxũcèx rü ngēmaācū Tupanapèxewa imexũcèx. ²⁵ Natürü i ñuxma na marü nüma nanguxũ ya Cristu na nüxũ yaxõgũxũcèx, rü marü tama ngēma mugütũũwa tangèxmagü. Rũ ñuxma rü marü taxucèxma tüxcüũ tamaã inacuèx i ngēma mugü. ²⁶ Rũ ñuxma na Ngechuchu ya Cristuaxũ peyaxõgũxũ, rü Tupanaxācügü pixĩgü i guxāma i pemax. ²⁷ Rũ ñuxma na Cristuégagu ípebaiũxũ, rü Cristuarü pixĩgü rü nüma rü pemaã inacuèx na naxrũũ pixĩgũxũcèx. ²⁸ Rũ ñuxma rü Tupanapèxewa rü nüetama nixī ega woo Yudíugü pixĩgügu rü éxna tama. Rũ nüetama ega woo wüxi i coriarü duũxũgü pixĩgügu rü éxna taxúxearü duũxũgü pixĩgügu. Rũ nüetama ega woo piyatügu rü éxna pingexgu. Erü ñuxma na Ngechuchu ya Cristuarü duũxũgü na pixĩgũxũ, rü wüxitama i duũxũ pixĩgü i guxāma i pemax. ²⁹ Rũ ñuxma na Cristuarü pixĩgũxũ, rü ngēmacèx waxi nixī na aixcūma Abráũtaagü pixĩgũxũ. Rũ ngēmacèx i pema rü tá ta penayaxu i guxũma ga yema Abráũmaã inaxunetaxũ ga Tupana.

4

¹ Rũ dücax, ngèxguma wüxi i buxũ yunatügu, rü ngēma buxũ rü tama ngèxgumatama nanayaxu i nanatüarü ngēmaxũgü. Rũ woo guxũma i nanatüarü ngēmaxũärü yora yixĩgu, natürü ngèxũrüxũ i nanatüarü puracütanüxũrümare nixī ñuxmata nayèx. ² Rũ ngēmacèx nangèxma i ngēma buxũärü dauruũ i namaã icuáxũ rü nüxũ nüxna dauxũ i ngēma nanatüarü ngēmaxũgü ñuxmata nawa nangu ya yima taunecü ya noxri nanatü nagu unetacü na ngēma buxũ rü nügũmaã inacuáxũcèx. ³ Rũ yexgumarüũ nixī ga tamaã nangupetũxũ ga noxrix. Yerü yexguma tauta Cristuxũ icuèxgu, rü natüũwa tayexmagü ga yema naãègü i chixexũgü i ñoma i naãnemaã

icuèxgüxü. ⁴ Natürü yexguma nawa nanguxgu ga yema ngunexü ga inaxunetaxü ga Tupana, rü núma nanamu ga Nane. Rü duüxügürüü wüxi ga ngewa nabu ga guma Nane. Rü yema Moiché umatüxü ga mugütüüwa nayexma ga yexguma nabuxgu. ⁵ Rü yemaäcü núma nangu ga Tupana Nane na tüxü ínanguxüxëëxüçèx i guxâma i yixema ga noxri mugütüüwa na iyexmagüxü. Rü yemaäcü tüxü narüngüxëë ga nüma ga Tupana Nane na Nanatü ya Tupanamaã tüxü yaxuxüçèx na aixcüma naxäcügüxüchi ixîgüxü. ⁶ Rü Tupana pexna nanamu ga Naãe i Üünexü na pexü nüxü nadauxëëxüçèx na aixcüma naxäcügüxüchi pixîgüxü. Rü ngëmacèx i ñuxma rü marü name i “Pa Chaunatüx”, ñaperügü nüxü ya Tupana. ⁷ Rü ngëmacèx i ñuxma rü Tupanaxäcüxüchi quixî, rü tama wüxi i norü duüxümare quixî. Rü ñuxma na naxäcüxüchi quiüxü, rü norü ngüchaü nixî na cuxna naxäãxü i guxüma i tacü i noxrü ixîxü.

Pauru rü yema yaxögüxüçèx naxoegaãe

⁸ Rü üpa ga yexguma tauta Tupanaxü pecuèxgu, rü perü tupanane-tagütüüwa peyexmagü rü nüxü picuèxüügü ga yema tama aixcüma Tupana ixîgüxü. ⁹ Natürü i ñuxma na Tupanaxü pecuáxü rü nüma rü na pexü nacuáxü, rü çtüxcüü wena naxçèx pewoeguchaü i ngëma naãëgü i chixexügü i ñoma i naãnemaã icuèxgüxü? ¿Rü tüxcüü penaxwèxe na wena natüüwa pegü pengëxmagüxëëxü i ngëma naãëgü i tama aixcüma poraexü i natüçèxmamare ixîgüxü? ¹⁰ Rü düçax i pemax, rü ñuxma rü ta ngëma nuxcümaügüxü i Yudíugücümüagu pexîãma woo Cristuaxü na peyaxögüxü. Erü penaxaure i ñuxre i ngunexügü rü ñuxre ya tauemacügü rü ñuxre ya taunecügü rü ñuxre i petagü, erü nagu perüxînüë na ngëmaäcü Tupanapëxewa tá pimexü. ¹¹ Rü ngëmacèx poraäcü chaxoegaãe, erü ngürüãchi natüçèxmamare tá nixî ga yema puracü ga petanüwa chaxüxü. ¹² Pa Chaueneëgüx, pexü chacèèxü na chauxrüü nüxü perüxoexü na nagu pexîxü i ngëma Yudíugüarü mugü. Erü ñuxma na Cristuwe charüxüxü rü marü nüxü charüxo na nagu chixüxü ga yema mugü ga üpa tama nagu pexîxü. Rü düçax, yexguma noxri petanüwa chayexmagu rü tama choxü pexo, rü ngëmacèx chanaxwèxe i ñuxma rü ta chauga pexînüë. ¹³ Rü pema rü marü nüxü pecuèx rü yexguma noxri pemaã nüxü chixuxgu ga Tupanaärü ore i mexü, rü yema na chidaawexügü nixî ga petanügu charüxäüxü rü pemaã nüxü chixuxü ga Tupanaärü ore. ¹⁴ Rü yema daawe ga choxü yexmaxü, rü woo pexçèx rü wüxi ga wèxtümüü nixî, natürü tama choxü pexo rü tama choxü ípetèxüchi. Natürü meãma choxü peyaxgü ñoma wüxi ga Tupanaärü orearü ngeruü i daxüçüãx chiüxürüü. Rü ñoma Ngechuchu ya Cristu chiüxürüü, meãma choxü peyaxgü. ¹⁵ ¿Natürü tacü éxna nangupetü namaã ga yema perü taãe ga noxri pexü yexmaxü? Erü pemaã nüxü chixu rü noxri petanüwa chayexmagu rü poraäcü chomaã petaãëgü. Rü yexguma chi pexü natauxchagu, rü pemaã nanguxügu, rü chi pexetü peyaxu na choxna penaxäxüçèx, yerü yemaäcü poraäcü chomaã petaãëgü ga yexguma. ¹⁶ ¿Natürü tacü pexü naxüpetü i ñuxmax? ¿Pexçèx rü éxna perü uwanü chixî yerü pemaã nüxü chixu ga Tupanaärü ore i aixcüma ixîxü? ¹⁷ Rü ngëma duüxügü i pexü ngüxëëxü na Yudíugücümüagu na pexîxüçèx, rü pegu narüxînüënetä, tama aixcüma tacü rü mexüçèx nadaugü. Erü nümagü rü toxna pexü nixîgachixëëchaü na ngëmaäcü naga pexînüëxüçèx. ¹⁸ Rü ngëma togü rü marü name na pegu naxînüëxü, natürü nanaxwèxe na perü mexüçèx nadaugüxü i guxüguma. Rü tama name na petanüwa changëxmaguxicatama perü mexüçèx na nadaugüxü i ngëma togü. ¹⁹ Pa Chauxacügüx, wenaxärü ñoma wüxi i mama ngîxäcümaã nguxnecacürüü poraäcü pexçèx ngüxü chinge na aixcüma meã Cristuaxü peyaxögüxüçèx

rü aixcüma naxcèx na pemaxëxücèx. Rü ngëmaãcü tá chixĩ ñuxmatáta Cristu naxwèxexürüü pixĩgü i perü maxüwa. ²⁰ Rü chierü ñuxmatama pexütawa changëxmagu na pemaã chidexaxüchixücèx, rü tama ñuxmarüü pexcèx chanaxümatümarexücèx. Erü ñuxma rü tama nüxü chacuèx na tacügu pemaã charüxĩnuxü.

Ore i cuèxruü i Abráüxütaxü ga Agáchiga rü namèxüchi ga Charachiga

²¹ Rü pema na ngëma Moïché ümatüxü i mugütüüwa pegü pengëxmagüxëëchaüxü, rü chanaxwèxe i chomaã nüxü pixu ngoxi aixcüma nüxü pecuá na ñuxü ñaxü i ngëma mugü. ²² Erü ngëma mugüwa nüxü tadau rü Abráü rü nüxü nayexma ga taxre ga nane. Rü wüxi ga nane rü naxütaxü ga Agáwa nüxü nayexma, rü naĩ ga nane rü namèxüchi ga Charawa nüxü nayexma. ²³ Rü guma nane ga naxütaxüwa nüxü yexmacü, rü nabu yerü yema nixĩ ga norü ngúchaü ga Abráü. Natürü guma nane ga namèxüchiwa nüxü yexmacü, rü nabu yerü yemaãcü inaxuneta ga Tupana. ²⁴⁻²⁵ Rü pemaã nüxü chixu i ngëma ore erü ngëmawa nangëxma i tacü i aixcüma ixĩxü i pexcèx changoxëëchaüxü. Rü yema taxre ga ngexügü rü taxre i cuèxruügü nixĩgü na ngëmawa nüxü icuáxücèx na ñuxãcü Tupana duüxügüxü rüngüxëëxü na naxütawa nangugüxücèx. Rü yema nüxĩraüxü ga norü ngüxëë nixĩ ga yexguma Chinaĩrü mëxpúnewa Moïchéna naxããgu ga norü mugü na naga naxĩnëxücèx ga duüxügü. Rü yema mugü ga Moïchéna naxãxü ga Chinaĩwa rü Agá iyixĩ ga norü cuèxruü. Rü yema nge ga Agá rü naxütaxü iyixĩ ga Abráü rü yemacèx ga ngĩxãcügü rü ngĩxrüütama togütüüwa nayexmagü rü tama ínanguxü. Rü yemaãcü ga yema nge rü wüxi i cuèxruü iyixĩ nachiga i ngëma Yudiügü i ñuxma maxëxü rü ngëma mugüwe rüxixü. Erü nümagü rü ñuxma rü ta natüüwa nangëxmagü i ngëma mugü ga Moïché yaxuxü ga mëxpüne ga Chinaĩ ya Arábiaanewa ngëxmanewa. Rü ñuxma rü ta ngëma mugügu naxĩ rü tama nüxü narüxoe. ²⁶⁻²⁸ Natürü yema nge ga Abráü namèxüchi rü tama Agárüü iyixĩ. Rü ngĩne ga Ichaá rü nabu yerü Tupanaãxü nayaxõ ga Abráü ga yexguma Tupana namaã nüxü ixuxgu rü tá na nüxü nayexmaxü ga wüxi ga nane. Rü ñuxma Pa Chaueneëgüx, yixema rü ta tayaxõ i ngëma Tupana tamaã ixunetaxü. Rü ngëmacèx i ñuxma rü tama ngëma nuxcümaügüxü i mugütüüwa tangëxmagü. Rü ngëmaãcü Abráü namèxüchixacügürüü tixĩgü. Rü ngëmaãcü nüxü tadau na aixcüma Tupana yanguxëëxü i norü ore ga Abráü namèxüchichiga ümatüxü i ñaxü:

“¡Nataãë, Pa Ngecü i Ngexacücü! ¡Rü curü taãëmaã rüxáixnaxü woo tagu-machirëx na cuxãxãcüxü! Erü tá cuxãxãcü, rü ngëma ngexü i cuxütaxü i cuteaxü äxãcüxüärü yexera tá cuxü nangëxma i cuxacügü”,

ñaxü. ²⁹ Natürü guma Abráü nane ga naxütaxüwa nüxü yexmacü, rü chixri namaxü namaã ga guma Abráü nane ga Tupanaärü unetagagu bucü. Rü ngëxgumarüü ta i ñuxma rü yixema i Tupanaãë i Üünexügagu tüxü na nangëxmaxü i maxü, rü chixri tamaã nachopetü i ngëma Yudiügü i naxwèxegüxü na nagu ixĩxü i ngëma mugü ga Moïché ümatüxü. ³⁰ ¿Natürü ñuxü ñaxü i Tupanaärü ore i ümatüxüwa? Rü dücax, ngëmawa Abráümaã nüxü nixu ga na ngĩxü ínatáxücèx ga naxütaxü ngĩnemaã, yerü taxucürüwama yema ngĩnemaã nayayauxye ga norü yemaxü ga namèxwaxüchixücü ga naneärü tá ixĩxü. ³¹ Rü ngëmaãcü, Pa Chaueneëgüx, rü nüxü tadau rü tama Abráü naxütaxüxãcügürüü tixĩgü, erü tama ngëma mugütüüwa tangëxmagü. Natürü Abráü namèxüchixacügürüü tixĩgü, erü Tupanaärü unetagagu tüxü nangëxma i tórü maxü.

5

Meã pegüna pedaugü na tama wena ngẽma mugütüüwa pengẽxmagüxüçèx

¹ Rû ñuxma ya Cristu rû marü tüxü ínanguxüxëë na tama ngẽma mugütüüwa ingẽxmagüxüçèx. Rû ngẽmacèx name nixĩ i pegüna pedaugü na tama wena natüüwa pegü pengẽxmagüxüçèx i ngẽma mugü. ² ¡Rû choxü iperüxĩnüë! Rû choma i Pauru rû pemaã nüxü chixu, rû ngẽxguma chi nagu pexĩxgu na pegü ípewiechẽxmüpẽxechiraüxü na ngẽmaãcü penayaxuxüçèx i perü maxü, rû ngẽxguma ya Cristu rû chi taxuwama pexü name. ³ Rû wena pemaã nüxü chixu rû ngẽxürüü i yatü i nügü íwiechẽxmüpẽxechiraüchaüxü na ngẽmaãcü Tupanapẽxewa namexüçèx, rû name nixĩ i nüxna nacuèxãchi na taxucürüwa ngẽmaãcü na nayauxãxü i norü maxü ega tama aixcüma naga naxĩnügu i guxüma i togü i mugü. ⁴ Rû guxãma i pema i nagu rüxĩnüëxë na Tupanapẽxewa pimexü ega nagu pexĩxgu i ngẽma mugü, rû pemaã nüxü chixu rû marü Cristuna pixĩgachi i ngẽxgumax. Rû ngẽxgumarüü ta pegü nüxna peyaxüxëë i ngẽma ngechaü ga noxri Tupana namaã pexü ngechaüxü. ⁵ Natürü Tupanaãë i Üünexü nixĩ i tüxü rüngüxëëxü na yaxögüxüçèx. Rû ngẽmacèx nixĩ i ínanguxëëxü na Cristugagu Tupanapẽxewa imexü. ⁶ Rû ngẽmacèx i ñuxma na Ngechuchu ya Cristuarü duüxügü ixĩgüxü, rû nüetama nixĩ ega woo íwiechẽxmüpẽxechiraügu rû ëxna tama, erü tama ngẽma nixĩ i Tupanapẽxewa tüxü mexëëxü. Rû ngẽma Tupana naxwëxexü i ñuxma nixĩ na aixcüma yaxögüxü rû ngẽmaãcü yigü na ingechaügüxü. ⁷ Pema rû meãma ipenaxügü na Cristuwe perüixü. ¿Rû texé ëxna pexü nüxü taxoox na tama naga pexĩnüëxüçèx i norü ore i aixcüma ixĩxü? ⁸ Rû pemaã nüxü chixu, rû tama Tupana ga noxri pexcèx çacü nixĩ ya yima pexü nüxü oócü. ⁹ Rû name nixĩ i nüxna pecuèxãchie rû wüxitama i duüxü i chixexü üxü, rû nanachixexëë i guxüma i togü i natanüxügü, ñoma wüxi i íraxü i pãũärü puxëëruü rû wüxi i taxü i pãũchara ipuxëëxürüü nixĩ. ¹⁰ Choma rû chayaxõ na tórü Cori tá pexü rüngüxëëxü na choma nagu charüxĩnüxürüü nagu perüxĩnüëxüçèx. Natürü Tupana tá nanapoxcu i ngẽma duüxü i pexü chixeãëxëëxü, rû nüetama nixĩ ega woo texé tixĩgu. ¹¹ Rû nümaxü i duüxügü rû chauchiga nidexagü, rû nüxü nixugüe na choma rû duüxügüxü changüexëëxü na nügü ínawüchẽxmüpẽxechiraüxüçèx rû mugü na yanguxëëgüxüçèx na ngẽmaãcü nüxü nangẽxmaxüçèx i maxü i taguma güxü. Natürü, Pa Chaueneëgüx, rû ngẽxguma chi ngẽmaãcü duüxügüxü changüexëëgu, rû tãü chima chowe ningëxütanü i Yudíugü, erü tãü chima naãëwa nangux i ngẽma ore i nüxü chixuxü nachiga ya Cristu ga curuchagu taxcèx yucü. ¹² Natürü ngẽma duüxügü i pexü chixeãëgüxü rû pexü ucuxëgüxü na pegü ípewüchẽxmüpẽxechiraüxüçèx, rû ¿tüxcüü ëxna i nümagü i tãü noxtacüma nügü yacaugüpüxücharexegüxü ta? ¹³ Natürü pemax, Pa Chaueneëgüx, rû Tupana pexcèx naca na ngẽma mugüna ípenguxüxüçèx. Natürü ñuxma na nüxna ípenguxüxü, rû tama name i ngẽmacèx pexeneärü ngüchaü pexügü. Natürü name nixĩ na pegü pengechaügüxü rû ngẽmaãcü pegü perüngüxëëgüxü i wüxichigü. ¹⁴ Erü guxüma i Tupanaärü mugü rû wüxi i muwatama nangox rû ñanagürü: “¡Rû nüxü nangechaü i cumücü na cugütama cungechaüxürüü!” ñanagürü. ¹⁵ Natürü name nixĩ i pexuãëgü erü ngẽxguma chi pegümaã penuëgu rû pegüchi pexaiegu, rû ngürüãchi tá pegü pewoone rû tá ipeyanaxoxëë i Tupanaärü ore i pewa ngẽxmaxü.

Ngẽma taxüneärü ngüchaü rû tama Tupanaãë i Üünexüärü ngüchaümaã nawüxigu

16 Pemaã nüxũ chixu, rü name nixĩ i Tupanaãe i Üünexũ naxwèxexũãcũma pemaxẽ. Rü ngëxguma ngẽmaãcü pemaxëgu, rü tãütãma pexeneãrũ ngúchaũ pexügü. 17 Erü ngẽma taxüneãrũ ngúchaũ rü tama Tupanaãe i Üünexũãrũ ngúchaũmaã nawüxigu. Rü ngẽma Tupanaãxẽ i Üünexũãrũ ngúchaũ rü tama taxüneãrũ ngúchaũmaã nawüxigu. Erü ngẽma taxre i ngúchaũgü, rü nügüchi naxaie erü wüxichigü i ngẽma rü tamaã inacuáxchaũ. Rü ngẽmacèx i pema rü taxucürüwa penaxü i ngẽma pematama penaxwèxexũ. 18 Natürü ngëxguma Tupanaãe i Üünexũ pemaã icuèxgux, rü marü tama ngẽma nuxcũmaũgüxũ i mugütüüwa pengëxmagü. 19 Rü meãma nangox na ñuxãcü namaxëxũ i ngẽma duüxügü i naxüneãrũ ngúchaũ ügüxũ, rü naĩ i ngemaã maxëxũ, rü airugürüümare ixügüxũ. Rü tama naxãneẽ na ñacü rü chixexũ naxügüxũ. 20 Rü tupananetachicünèxãgüxũ nicuèxüügü, rü nayuue rü nangõxwèxegü, rü aigu narüxĩnüe, rü nachoxügwèxegü, rü togüchi naxaie norü ngẽmaxügücèx, rü nanuxwèxegü, rü duüxügüxũ naxucuxëgü na to i nguxëëtaegu naxĩxücèx, rü ngẽmaãcü nayatoye i duüxügü na tama wüxigu naxĩnüexücèx. 21 Rü togüarü ngẽmaxügücèx nixãüxãchigü, rü nangãxewèxegü, rü peta naxügüecha, rü nanaxügü i muxüma i togü i chixexügü i ngëxgumarüü ixixũ. Rü ngẽmacèx, wena pemaã nüxũ chixu rü guxüma i ngẽma duüxügü i ngẽmaãcü maxëxũ, rü nataxütãma i nachica i ngextã Tupana ãëxgacü íyĩxüwa. 22 Natürü ngëxguma Tupanaãe i Üünexũ tamaã icuèxgu, rü nüma nixĩ i tüxũ nangüxëxũ na yigü ingechaũgüxücèx, rü itaãëgüxücèx, rü meã yigümaã imaxëxücèx, rü yaxna namaã ixĩnüexücèx i togü, rü togümaã imecümagüxücèx, rü togüxũ rüngüxëëgüxücèx, rü aixcũma yanguxëëxücèx i ngẽma nüxũ ixuxũ. 23 Rü ngëxgumarüü ta Naãe i Üünexũ tüxũ narüngüxëe na tama chixexümaã nataeguxëëxücèx ega togü chixexũ tamaã üxgux. Rü tüxũ narüngüxëe na meãma yigünatama idauxücèx na tama chixexügu iyixücèx. Rü nataxuma i mugü i nachuxuxũ na naxüxũ i ngẽma mexügü. 24 Rü ngẽma duüxügü i aixcũma Ngechuchu ya Cristuarü duüxügü ixügüxũ, rü marü nüxũ narüxoe ga yema nuxcũmaũxũ ga norü maxü ga chixexũ, rü yema naxüneãrũ ngúchaũgü ga chixexũ, rü guxüma ga ñacü ga to ga ngúchaũ ga tama mexũ. 25 Rü ñuxma na Tupanaãe i Üünexũ tüxna naxãxũ i tórü maxü, rü name nixĩ i nüma tórü maxümaã na inacuáxũ. 26 Rü tama name i yigü ítarüta rü togümaã tanuãe, rü bai na ñacücèx ixãüxãchixũ.

6

Name nixĩ i guxãma i pema rü pegü perüngüxëëgü i wüxichigü

1 Pa Chaueneëgüx, ngëxguma chi texëxũ pedëuxgu na ñacü rü chixexügu tanguxũ, rü pema na Tupanaãe i Üünexũ naxwèxexũãcũma na pemaxëxũ, rü name nixĩ i tüxũ pengechaũãcũma tüxũ perüngüxëe na itayarüwëxãchixücèx. ¡Natürü pexuãëgü i wüxichigü, na tama pema rü ta nagu peyixücèx i ngẽma chixexũ! 2 ¡Rü pegü perüngüxëëgü i ngëxguma texé petanüwa guxchaxügü tüxũ ngëxmagu! Erü ngëxguma ngẽmaãcü pegü perüngüxëëgu, rü ngẽmaãcü tá peyanguxëe i ngẽma Cristu pexü muxü. 3 Rü ngëxguma texé nagu rüxĩnügu na wüxi i ñacü tixixũ, rü tügütama tawomüxëe, erü Tupanapëxewa rü taxuümachirëx tixĩ. 4 Rü ngẽmacèx i wüxichigü, rü name nixĩ i tügüarü maxütama tangugü. Rü ngëxguma namexgu i tümaãrũ maxü, rü tügümaã tátama tataãe, rü taxucèxma tüxcüü togüarü maxüwa tügü tangugüarü maxüãx. 5 Erü tanaxwèxe ya wüxichigü na tümaãrũ maxünatama tadauxũ i Tupanapëxewa. 6 Rü yíxema nayaxuxe i nguxëëtae i Tupanaãrũ orewa rü name nixĩ na tümaãrũ nguxëëruümaã tangauxũ i gúxũ i tümaãrũ ngẽmaxügü.

⁷ ;Rü pexuãëgü na tama ípetüexüçèx i perü maxüwa! Erü taxucürüwa texé Tupanaxü tawomüxëë. Rü yíxema chixexü úxe, rü chixexü tá tayaxu. Rü yíxema mexü úxe, rü mexü tá nixí i tayaxuxü. ⁸ Rü yíxema tümaxüneârü ngúchaü úxe, rü ngëma tümaxüneârü ngúchaü rü tá yuwa tüxü naga. Natürü yíxema Tupanaãë i Üünexüârü ngúchaü úxe, rü ngëma Tupanaãë i Üünexüwa tá tanayaxu i maxü i taguma gúxü. ⁹ Rü ngëmacèx tama name na nüxü rüchauexü na mexü ixüexü. Erü ngëxguma chi tama nüxü rüchauegu, rü düxwa mexü tá tayaxu i Tupanaxütawa. ¹⁰ Rü ngëmacèx ngëxguma tüxü nangëxmagu na tacümaã togüxü rüngüxëëxü, rü name nixí i guxãxüma tarüngüxëë. Natürü yexera tanaxwèxegü na nüxü rüngüxëëgüxü i ngëma taeneëgü rü taeyèxgü i yaxögüxü.

Pauru rü nüxü narümoxë ga yema yaxögüxü, rü nayaxucüxëgü

¹¹ Rü nuã tá ichanaxügü na chomaxüchima choxmëxmaã pexcèx chanaxümatüxü i ñaã popera. ;Rü dücax, nüxü pedèux i ngëma choma chaxümatüxü na ñuxãcü natamatüxü! ¹² Rü ngëma Yudíugü i pexü ngüxëëxü na pegü ípewiechëxmüpëxechiraügüxüçèx, rü ngëmaãcü pexü namu erü nanataãëxëëgüchaü i ngëma togü i Yudíugü na tama naxchi naxaixüçèx nagagu na Ngechuchu ya Cristu ga curuchagu yucüaxü na yaxögüãxü. ¹³ Erü woo i nümagü na ínawiüchëxmüpëxechiraüxü, rü tama nayanguxëë i guxüma i mugü. Natürü nümagü rü nanaxwèxegü na pegü ípewiüchëxmüpëxechiraüxü, na yixcama nügü yacuèxüügüxüçèx rü togü i Yudíugümaã nüxü na yaxuxüçèx na pema rü ta naxrüü nagu pexíxü i ngëma nuxcümaügüxü i mugü. ¹⁴ Natürü i choma rü chaugü chicuèxüü erü nüxü chayaxõ ya tórü Cori ya Ngechuchu ya Cristu ga curuchagu yucü. Rü ngëmacèxicatama nixí i chaugü chicuèxüüxü. Rü ñuxma na Cristu ga curuchagu yucüaxü chayaxõxü, rü marü tama nagu charüxínü i ñoma i naãne rü norü ngëmaxügü. Rü ngëxgumarüü ta i ñoma i naãne rü marü tama choxü nacuáxchaü. ¹⁵ Erü ngëxguma Ngechuchu ya Cristuarü duüxügü ixígügu, rü Tupanapëxewa rü taxuüma nixí i ngëma na íwiechëxmüpëxechiraüxü rü ëxna tama. Natürü ngëma aixcüma napëxewa mexü nixí na naxüchicüüxü i tórü maxü na ngexwacaxüxü i duüxügü ixígüxüçèx. ¹⁶ Rü Tupanana naxcèx chaca na pexü nataãëxëëgüxüçèx rü nüxü pengechaütümüügüxüçèx i guxãma i pema i aixcüma yanguxëëgüxe i ngëma pemaã nüxü chixuxü, rü guxãma ya yíxema aixcüma Tupanaârü duüxügü ixígüxe. ¹⁷ Rü ñuxmawena rü tama chanaxwèxe na texé tacü rü guxchaxügü choxna äxü. Erü choma rü aixcüma tórü Cori ya Ngechuchuarü duüxü chixí. Rü ngëma chorü oxrigüchica i chowa ngëxmagüxüwa nüxü pecuèx na aixcüma yíxü i ngëma. ¹⁸ Pa Chaueneëgüx, chanaxwèxe i tórü Cori ya Ngechuchu ya Cristu pexü narüngüxëë i guxãma i pemax. Rü ngëmaãcü yíi.

Rü nuãma pexna,
Pauru

POPERA GA EPÉCHIUWA YEXMAGÜXŪ GA YAXŌGÜXŪTANÜWA NAMUXŪ GA PAURU

Pauru rü nüxŭ narümoxē ga yema yaxōgüxŭ ga Epéchiuarü ĩānewa yexmagüxŭ

¹ Pa Chaueneēgŭ ya Epéchiuwa Ngēxmagüxe, choma i Pauru nixŭ i pexcèx chanaxümatüxŭ i ñāñ popera. Rü choma i Pauru chixŭ i Tupana choxŭ yaxuxŭ na Ngechuchu ya Cristu choxŭ muxüçèx na duŭxŭgümaã nüxŭ chixuxüçèx i norü ore. Rü pexcèx chanaxümatü i guxāma i pema ya Epéchiuarü ĩānewa ngēxmagüxe rü Tupanaärü duŭxŭgŭ ixŭgüxe rü Ngechuchu ya Cristuaxŭ yaxōgüxe. ² Rü chanaxwèxe i pexŭ narüngŭxēē rü pexŭ nataāēxēē ya Tanatü ya Tupana rü tórü Cori ya Ngechuchu ya Cristu.

Tupana rü poraäcü tüxŭ narüngŭxēē erü Cristuarü duŭxŭgŭ tixŭgŭ

³ Rü name nixŭ i nüxŭ ticuèxüŭgŭ ya Tanatü ya Tupana ya tórü Cori ya Ngechuchu ya Cristunatü ixŭcŭ. Erü nüma ya Tupana rü Cristugagu tüxna nanaxā i naguxŭraŭxŭ i ngŭxēēgŭ i üünexŭ i dauxŭguxŭ i naanewa taxcèx ne namugüxŭ. ⁴⁻⁵ Rü tautama naāne üxgu, rü Cristugagu Tupana tüxŭ nade na napēxewa ixüünegüxüçèx rü na nataxuxüçèx i tórü chixexŭ i napēxewa. Rü Tupana rü poraäcü tüxŭ nangechaŭ. Rü yemacèx nuxcümamatama tüxŭ naxuneta na naxäcŭgŭxŭ tüxŭ nadexüçèx Ngechuchugagu. Rü yemaäcü nanaxü yerü yema nixŭ ga norü ngúchaŭ. ⁶ Rü ngēmacèx name nixŭ i guxŭguma nüxŭ ticuèxüŭgŭ ya Tupana. Erü nüma rü poraäcüxŭchima tamaã namecüma rü poraäcü tüxŭ narüngŭxēē ga yexguma taxcèx núma namuāxgu ga Nane ya nüxŭ nangechaŭxŭchicü. ⁷ Rü Tupana rü poraäcü tüxŭ nangechaŭ, rü yemacèx nanamu ga Nane na taxcèx nayuxŭ rü nagü inabaxŭ na yemaäcü tüxŭ ínguxŭxēēüçèx rü tüxŭ nüxŭ nangechaŭxŭçèx ga tórü pecadugŭ. ⁸ Rü Tupana tüxŭ nüxŭ nadauxēē na ñuxäcü poraäcü tüxŭ nangechaŭxŭ ga yexguma tüxna naxāāxgu ga guxŭma ga tórü cuèx na taāēxŭ icuáxüçèx rü tüxŭ natauxchaxüçèx i norü ore. ⁹ Rü tüxŭ nüxŭ nacuèxēē ga norü ngúchaŭ ga noxri nüxŭcatama nüxŭ nacuáxŭ. Rü yema norü ngúchaŭ ga nuxcümamaxŭchima Cristumaã nagu naxŭnŭxŭ ga Tupana, rü yema nixŭ ga ñoma ga naānewa na namuāxŭ na tüxŭ yamaxēxēxüçèx. ¹⁰ Rü yema nagu naxŭnŭxŭ nixŭ na Cristumēxēwa nangēxmaxēēāxŭ i guxŭma i daxŭguxŭ i naānewa ngēxmaxŭ rü guxŭma i ñoma i naānewa ngēxmaxŭ. Rü ngēmaäcü tá nanaxü ya Tupana i ngēxguma nawa nanguxgu na yanguxēēāxŭ. ¹¹ Yerü naxŭpa ga ñoma ga naane naxŭxŭ ga Tupana, rü woetama tomaã nanaxuegu na Cristugagu tanayauxgüxüçèx i ngēma maxŭ i taguma gúxŭ i nüma toxna naxŭxchaŭxŭ na aixcüma naxcèx tamaxēxüçèx. Rü aixcüma yemaäcü nanaxü yerü yema nixŭ ga norü ngúchaŭ ga Tupana ya guxŭma ücü, ngēma nüma nagu naxŭnŭxŭācüma. ¹² Rü yemaäcü Tupana tomaã nanaxuegu na toma i toxira Cristuaxŭ yaxōgüxe naxcèx tamaxēxüçèx rü nüxŭ ticuèxüŭgŭxüçèx naxcèx i norü pora i üünexŭ. ¹³ Rü yexgumarü ta ga pema i Epéchiucŭāxgŭ, rü yexguma nüxŭ pexŭnŭēgu ga yema ore i aixcüma ixŭxŭ i tüxŭ maxēxēēxŭ, rü yexguma Cristuaxŭ peyaxōgŭgu, rü namüçgŭ pixŭgŭ. Rü Tupana ga tamaã ixunetacü na tüxna namuāxüçèx i Naāē i Üünexŭ, rü marü pexna nanamu i ngēma Naāē na nüxŭ pecuáxüçèx na aixcüma norü duŭxŭgŭ pixŭgŭxŭ. ¹⁴ Rü ngema Naāē i Üünexŭ ga Tupana tüxna muxŭ, rü ngemaawa nixŭ i nüxŭ icuáxŭ na aixcüma Tupana tá tüxna naxŭxŭ i guxŭma i ngema tamaã inaxunetaxŭ. Rü ngēxguma wena núma naxŭxgu ya Cristu na nügŭxŭtawa

tūxū nagagūxūcèx rü aïxcüma tá tanayaxu i guxūma i ngema Tupana tomaã nüxū ixuxū. Rü ngēmacèx name nixī na nüxū icuèxūūgūxū ya Tanatū ya Tupana ya üxūnecü.

Pauru rü yaxōgūxūcèx nayumixē.

¹⁵⁻¹⁶ Rü ngēmacèx, ñuxma na nüxū chacuáxū na aïxcüma tórü Cori ya Ngechuchuaxū peyaxōgūxū rü na aïxcüma nüxū pengechaūgūxū i guxūma i ngēma togū i Tupanaārū ixīgūxū, rü ngēmacèx taguma nüxū charūchau na pexcèx moxē nüxna chaxāxū rü pexna chacuèxāchixū i chorū yumūxēwa. ¹⁷ Rü ngēxguma namaã chideaxgu ya Tanatū ya Tupana ya mexēchicü ya Nanatū ya tórü Cori ya Ngechuchu ya Cristu, rü naxcèx nüxna chaca na pexna naxāxūcèx i ngēma cuèx i Naãē i Üünexūwa ne ūxū. Rü ngēma Naãē i Üünexū tá nixī i pexcèx nangoxēxū i Tupanaārū ore i mexū na yexeraācü nüxū pecuáxūcèx ya Tupana. ¹⁸ Rü Tupanana naxcèx chaca na nūmatama pexū yangoxnaãxēxūcèx, na nüxū pecuáxūcèx na tacü yīxū i ngēma ípenanguxēxū i naxcèx pexū nadexū. Rü nüxna naxcèx chaca na pexū nüxū nacuèxēxūcèx na ñuxācü namexēchixū i ngēma maxū i taguma gūxū i nūma norū duūxūgūcèx namexēxū i daxūguxū i naānewa. ¹⁹⁻²⁰ Rü ngēxgumarūū ta rü nüxna naxcèx chaca na pexū nüxū nacuèxēxūcèx na ñuxācü nataxūchixū i norū pora i tawa ngēxmaxū rü namaã tūxū nangūxēxū i yixema na yaxōgūxū. Rü ngēmatama pora i taxūmaã nixī ga napuracūxū ga Tupana ga yexguma yuwa Cristuxū ínadxēēgu rü daxūguxū ga naānewa nagaāxgu rü nūgūarū tūgūnecūwawa yanatoxēēāgu na guxāārū āēxgacü yīxūcèx. ²¹ Rü yemaācü guxūetūwa nanayexmaxēē. Rü ngēmacèx i ñuxma rü Cristumēxēwa nangēxmagü i guxūma i daxūguxū i naānecūāx i āēxgacügü rü guxūma i ñoma i naānecūāx i āēxgacügü. Rü ngēmaācü naxmēxwa nangēxmagü i guxūma i pora i ñuxma ngēxmagūxū rü guxūma i pora i tá ngēxmagūxū. Rü ngēmaācü i nūma rü guxū i āēxgacügūarū āēxgacü tá nixī i guxūguma. ²² Rü yemaācü ga Tupana rü marū Cristumēxēwa nanayexmagūxēē ga guxūma. Rü yexgumarūū ta Cristuxū ningucuchixēē na guxūma i yaxōgūxūēru na yīxūcèx. ²³ Rü ñuxma rü guxūma i yaxōgūxū rü wūxigu Cristuarū nixīgü. Rü nūma nixī i tawa nangēxmaxū i guxāma i yixema i nüxū na yaxōgūxū. Rü ngēxgumarūū ta nūma nixī i nangēxmaxēēāxū i guxūma i tacü i ngēxmaxū i guxūwama.

2

Tamaxē erü Tupana tūxū nangechaū

¹ Rü ūpa ga pema rü perü pecadugagu rü perü chixexūgagu ñoma peyuxūrūū pixīgü. ² Yerü ga pema rü nagu pexī ga yema chixexū i ñoma i naānecūāx i duūxūgü nagu íxū. Rü pema rü naga pexīnūē ga Chataná i ngoxogūarū āēxgacü ixīxū. Rü nūma nixī i nüxū nangúchaūxēēāxū na chixexū naxūgūxūcèx i guxūma i ngēma duūxūgü i tama Tupanaga ínūēxū. ³ Rü guxāma ga yixema rü yemaācü chixri tamaxē ga ūpa. Rü tanaxū ga tóxrütama ngúchaū, rü nagu taxī ga yema taxūne naxwèxexū rü yema taãē naxwèxexū. Rü yemagagu yema togū ga duūxūgü ga chixexū ügūxūrūū nawa taxūgü i ngēma poxcu i āücūmaxūchixū i Tupana mexēēxū. ⁴ Natürü ga Tupana rü poraācü nüxū tangechaūtümūgü rü poraācü tūxū nangechaū. ⁵ Rü yemacèx, woo tórü pecadugagu ñoma iyuxūrūū tixīgü, natürü ga Tupana rü tūxna nanaxā ga maxū ga yexguma Cristuxū ínadxēēgu. Rü ñuxma rü pexū nangēxma i maxū i taguma gūxū, erü Tupana pemaã namecūma. ⁶ Rü yema na Ngechuchu ya Cristuxū wena namaxēēxūrūū rü tūxū rü ta

namaxēxēē ga Tupana. Rū yemaācū nanaxū na yixema rū ta Cristumūcūgū ixīgūxūcèx, rū namaā āēxgacūgū ixīgūxūcèx i daxūguxū i naānewa. ⁷ Rū yemaācū nanaxū ga Tupana na guxūgutāma duūxūgūxū nawéaxūcèx na ñuxācū Cristugagu poraācū tūxū nangechaūxū rū tamaā namecūmaxū. ⁸ Rū yemaācū pemaā namecūma ga Tupana. Rū yemacèx penayaxu ga maxū i taguma gūxū yerū peyaxōgū. Rū ngēma maxū rū taxucūrwama pegūnatama penaxā, natürū Tupana nixī ga pexna naxāmarecū ga yema. ⁹ Rū tama tacū i mexū i pexūxūgagu nixī i pexū nangēxmaxū i ngēma maxū, natürū Tupana nixī ya pexna naxāmarecū na ngēmaācū taxúema tūgū icuèxūxūcèx. ¹⁰ Rū Tupana nixī ga tūxū maxēxēēcū. Rū ñuxma rū tūxū nangēxma i ngēma maxū yerū Ngechuchu ya Cristu tórū pecaducèx nayu. Rū Tupana tūxna nanaxā i ngēma maxū na meā imaxēxūcèx rū mexū ixūgūxūcèx. Rū yemaācū tūxū narūngūxēē ga Tupana yerū woetama nuxcūmaxūchima marū yemagu narūxīnū.

Cristu nixī ya yigūmaā tūxū rūngūxmūēxēēcū

¹¹⁻¹² Rū ngēmacèx i pema na tama Yudíugū pixīgūxū, rū name nixī i nūxna pecuèxāchie na tama toxrūū na pixīgūxū ga noxri rū tama Tupanaxū na pecuèxgūxū. Rū yema na tama toxrūū pixīgūxū rū yemacèx ga toma ga Yudíugū i togū na ítawiechèxmūpēxechiraūgūxū, rū nūxū tixugūe na pema rū tama Tupanapēxewa na pimexū yerū tama toxrūū pegū ípewiechèxmūpēxechiraūgū. Rū yexguma ga pema rū tama Cristuxū pecuèxgū, yerū tama Tupanaārū duūxūgū i Yudíugūtanūxū pixīgū. Rū tama nūxū pecuèxgū ga Tupana núma na namuxū ga Nane na duūxūgūarū pecaducèx nayuxūcèx na nūxna naxāāxūcèx i maxū i taguma gūxū. Rū woo ga yema mexūgū ga Yudíugūmaā inaxunetaxū ga Tupana, rū taxucūrwama penayaxu. Yerū ñoma ga naānewa rū pemaxēmare, rū tama nūxū pecuèx ga tacū chi pexū na ūpetūxū ga yexguma chi peyuegu yerū tama Tupanaxū pecuèx. ¹³ Natürū woo ga noxri rū tama Tupanaxū na pecuáxū, natürū i ñuxma rū nūgūxūtawa pexū nagagū. Rū Ngechuchu ya Cristuarū duūxūgū pixīgū yerū pexcèx nayu rū nagū inanaba. ¹⁴⁻¹⁵ Rū ñuxma rū Cristu nixī ya tūxū rūngūxmūēxēēcū. Rū noxri ga toma ga Yudíugū rū pexchi taxaie yerū tama toxrūū Yudíugū pixīgū. Natürū i ñuxma rū Cristu marū yigūmaā tūxū narūngūxmūēxēē. Rū yemaācū wūxitama i duūxūgūxū tūxū nixīgūxēē rū inayanaxoxēē na yigūarū uwanū ixīgūxū. Rū yexguma nayuxgu ga Cristu rū tūxū ínangūxūxēē na tama natūūwa iyexmagūxūcèx ga yema nuxcūmaūgūxū ga mugū ga toma ga Yudíugū nagu taxīxū. Rū wūxitama i duūxūgū i ngexwacaxūxū tūxū nixīgūxēē i toma i Yudíugū na tixīgūxū rū pema i tama Yudíugū na pixīgūxū. Rū yemaācū nanaxū na guxāma i yixema rū norū duūxūgū na ixīgūxūcèx. Rū yemaācū yigūmaā tūxū inarūngūxmūēxēē. ¹⁶ Rū yexguma curuchagu nayuxgu ga Cristu, rū inayanaxoxēē ga yigūchi na ixaie xū. Rū yemaācū ga Cristu rū Tupanamaā tūxū inarūngūx-mūēxēē, rū wūxitama i duūxūgūxū tūxū nixīgūxēē. ¹⁷ Rū yexguma Cristu núma ūxgu, rū taxcèx núma nanange ga ore ga mexū ga marū yigūmaā rū Tupanamaā na rūngūxmūēxū. Rū yema ore rū toxcèx nixī i toma i Yudíugū ga toxira Tupanaxū na tacuáxū. Rū yema ore rū pexcèx rū ta nixī ga woo tama Tupanaxū na pecuèxgūxū ga noxrix. ¹⁸ Rū ñuxma rū guxāma i yixema rū Cristugagu tūxū natauxcha na Tanatū ya Tupanana ingaicamagūxū. Rū ngēmatama Naāē i Ūnēxū nixī i tūxū rūngūxēēxū na nūxna ingaicamagūxūcèx ya Tanatū ya Tupana. ¹⁹ Rū ngēmacèx i pema rū woo tama Tupanaxū pecuèxgū ga noxrix, rū woo tama norū duūxūgū pixīgū ga yexguma, natürū tama ngēmaācū pixīgū i ñuxmax. Erū ñuxma rū natanūxū pixīgū i guxūma i ngēma duūxūgū i Tupanaārū

ixīgüxü. Rü aixcüma Tupanaxäcügüxüchi pixīgü i ñuxmax. ²⁰⁻²² Guxāma i pema rü wüxi ya ĩpata ya mexüne ya Tupana nawa maxüne pixīgü. Rü ngēma cementu i ladriyu naetügu nugüxü, rü ngēma rü Tupanaärü ngüexüğü ga imugüxü rü norü orearü uruüğü nixī. Rü yima ladriyu ya nüxirama cementuétüwa ixücuchicü rü Cristu nixī. Rü ngēma inanaxüğü na naxüāxü ya guxünema ya yima ĩ. Rü düxwa ningu na wüxi ya tupauca ya taxüne ya Cristugagu üünene na yīxü. Rü ngēmaäcü i pema na Cristuarü pixīgüxü rü wüxigu tomaā peyanguxēē ya wüxi ya tupauca ya taxüne i ngextá Tupanaäē i Üünexü ĩmaxüxüwa.

3

Tupana rü Pauruxü namu na ore i mexüxü yaxuxü namaā ga yema duüxüğü ga tama Yudiüğü ixīgüxü

¹ Rü ñuxma na yemaäcü Tupana pexü rüngüxēēxü, rü choma i Pauru rü pexcèx chayumüxē. Rü pemaā nüxü chixu rü núma poxcupataüwa changēxma erü Ngechuchu ya Cristuarü duüxü chixī. Rü nuxma chapoxcu erü guxüwama nüxü chixuchiga na pema rü ta pexü nangēxmaxü i pechica i Tupanaxütawa woo na tama Yudiüğü pixīgüxü. ² Rü maneca marü nüxü pecuáchiga na ñuxäcü Tupana choxü nangechaüäcüma choxü muxü na pexü charüngüxēēxücèx rü pemaā nüxü chixuxücèx i norü ore i mexü. ³ Rü Tupana chomaā nanangoxēē rü choxü nüxü nacuèxēē ga yema ore ga pechiga ga noxri nüxīcatama nüxü nacuáxü. Rü yemachiga nixī ga írarüwa marü pexcèx chanaxümatüxü ga noxrix. ⁴ Rü yexguma pexcèx chanaxümatügu rü pemaā nüxü chixu ga yema noxri ēxügüxü ga ore i ñuxäcü Tupana rü Cristugagu duüxüğüxü namaxēxēēxü. Rü ngēxguma meā nawa pengüegu i ngēma popera rü tá nüxü pecuèx na aixcüma yīxü ga yema ore ga noxri ēxügüxü ga nachiga pexcèx chaxümatüxü. ⁵ Rü yema nixī ga ore ga ēxügüxü ga Tupana taxüexüma meā nüxü nacuèxēēxü ga noxrix. Natürü i ñuxma rü ngēma Naāē i Üünexü rü marü nanangoxēē i ngēma ore naxcèx i Tupanaärü duüxüğü i üünexü i yamugüxü rü norü orearü uruüğü. ⁶ Rü ñuxma rü tá pemaā nüxü chixu i ñuxäcü na yīxü i ngēma ore ga noxri ēxügüxü. Rü dücax, woo tama Yudiüğü pixīgü natürü i ñuxma rü pexcèx rü ta nixī i ngēma maxü i taguma gúxü ga noxri Tupana tomaā ixunetaxü. Rü ñuxma i pema rü ta norü duüxüğü pixīgü. Rü pexcèx nixī i guxüma i ngēma Tupanaärü unetagü ga noxri tomaā nüxü yaxuxü. Rü ngēmaäcü i ñuxma rü Ngechuchu ya Cristugagu pexü nangēxma i guxüma i ngēma mexüğü erü peyaxögü i norü ore i tüxü maxēxēēxü. ⁷ Rü woo taxuwama chame na chanaxüxücèx i norü puracü, natürü ya Tupana rü choxü namuāma rü choxü naporaxēē na nüxü chixuxücèx i ngēma norü ore i mexü. ⁸ Rü chaugücèx i Tupanapēxewa rü choma nixī i guxü i norü duüxüğüarü ñaxtüwaama chaxüxü. Rü woo ngēmaäcü chixī, natürü Tupana choxü nangechaü rü choxna nanaxā i ngēma puracü i mexü na ngēma tama Yudiüğü ixīgüxümaā nüxü na chixuxücèx i norü ore i mexü na ñuxäcü namexēchixü rü taguma iyagüxü ga yema taxcèx naxüxü ga Cristu. ⁹ Rü nüma ga Tupana ya guxüärü üruü ixīcü, rü choxü namu na guxü i duüxüğüxü nüxü chacuèxēēxücèx na ñuxäcü yīxü i ngēma norü ngüchaü ga nuxcüma ēxügüxü ga noxri nüxīcatama nüxü nacuáxü. Rü ngēma norü ngüchaü nixī i Cristugagu tüxü na namaxēxēēxü. ¹⁰ Rü yemaäcü choxü namu ga Tupana na ngēma duüxüğü i tama Yudiüğü ixīgüxümaā nüxü chixuxücèx i ore i mexü na yaxögüāxücèx. Rü nüma ya Tupana nanaxwèxe na yaxögüāxü na ngēmaäcü guxüma i äēxgacüğü i daxücüāx nüxü nadaugüxücèx na ñuxäcü nüxü nacuèxüchixü ga Tupana ga

yexguma duūxūgūaxū natauxchaxēēāgu na naxūtawa nangugūxūcèx. ¹¹ Rū yemaācū nūxū nanatauxchaxēē ga Tupana yerū woetama nuxcūmaxūchima guxūguma nagu narūxīnū na tórū Cori ya Ngechuchu ya Cristugagu tá na namaxēxēēāxū i duūxūgū. Rū yemaācū nayanguxēē. ¹² Rū ñuxma na Cristuarū duūxūgū ixīgūxū rū nūxū na yaxōgūxū, rū tūxū natauxcha na Tupanana ingaicamagūxū rū taxucèxma nūxū na imuūēxū. ¹³ Rū ngēmacèx i ñuxma na pexcèx ngúxū chingexū rū pexū chacèèxū na tama chauxcèx pexoegaāēgūxūcèx. Erū ngēma ngúxū na chingexū i ñuxma rū perū meruū nixī i ngēma.

Cristu rū poraācū tūxū nangechaū

¹⁴ Rū ngēmacèx, ngēxguma nagu charūxīnūgu na ñuxācū Tanatū ya Tupana taxcèx namexēēxū na naxācūgū ixīgūxūcèx, rū napēxegu chacaxāpūxū na nūxū chicuèxūūxūcèx. ¹⁵ Rū nūma nixī i Nanatū yīxū i guxūma i norū duūxūgū i ñoma i naānewa rū daxūguxū i naānewa ngēxmagūxū. ¹⁶ Rū Tanatū ya guxūguma poraācū tamaā mecūmacūna chaca na Naāē i Ūūnexūārū ngūxēēmaā pexū naporaexēēxūcèx na aixcūma peporaexūcèx i perū maxūwa. ¹⁷⁻¹⁸ Rū ngēxgumarūū ta nūxna naxcèx chaca na perū ōgagu pewa namaxūxūcèx ya Cristu. Rū ngēxguma ngēmaācū perū maxūwa peporaegu rū pexū nangēxmagu i ngēma ngechaū i aixcūma ixīxū, rū tá wūxigu guxūma i yaxōgūxūmaā nūxū pecuèx na ñuxācū nataxūchixū i norū ngechaū i namaā tūxū nangechaūxū ya Cristu. ¹⁹ Rū woo tama yanguxgu i tórū cuèx na nūxū icuāxūcèx na nañuxraūxū i ngēma ngechaū i namaā Cristu tūxū ngechaūxū, natūrū Tupanana naxcèx chaca na pexcèx nangoxēēāxūcèx na ñuxācū na yīxū i ngēma ngechaū na aixcūma pewa nangēxmaxū i guxūma i Tupanacūmagū. ²⁰ Rū ñuxma rū name nixī i guxāma i yixema rū nūxū ticuèxūūgū ya Tupana. Erū nūma rū nūxū nangēxma i pora na naxūāxū i guxūma i ngēma naxcèx íçaxū rū ēxna nagu rūxīnūēxūārū yexeraxūchi. Rū ngēma norū pora i tawa ngēxmaxūmaā nixī i naxūāxū i guxūma i ngēma. ²¹ Rū ñuxma rū name nixī i guxūma i norū duūxūgū i yaxōgūxū rū guxūgutāma Tupanaxū nicuèxūūgū naxcèx i ngēma Ngechuchu ya Cristu ūxū. Rū ngēmaācū yī.

4

Tupanaāē i Ūūnexū rū wūxigutama tūxū narūxīnūēxēē

¹ Rū ñuxma na ngēmaācū Tupana tūxū rūngūxēēxū, rū choma i Cristugagu na chapoxcuxū, rū pexū chacèèxū na Tupana naxwèxexūācūma meā pemaxēxū. Rū name nixī i ngēmaācū pemaxē erū pexū nixī ga nadexū ga Tupana, rū norū duūxūgū pixīgū i ñuxmax. ² Rū tama name i pegū picuèxūxūgū. Rū name nixī i guxūguma pemecūmagū rū yaxna namaā pexīnūē i togū rū nūxū pengechaūgū. ³ Rū chanaxwae i wūxigu perūxīnūē rū ñoma wūxitama i duūxūrūū pixīgū erū pewa nangēxma i Tupanaāē i Ūūnexū. Rū name nixī i naxcèx pedau na guxūguma pegū pengechaūgūxū rū ngēmaācū taguma țacūcèx pegū pitoyexū. ⁴ Erū yixema na Cristuarū duūxūgū ixīgūxū, rū ñoma wūxitama i duūxūrūū tixīgū. Rū ngēxgumarūū ta wūxitama nixī i Naāē i Ūūnexū i guxāwama maxūxū. Rū ngēxgumarūū ta Tupana pexū nade na guxāma ípenanguxēēgūxūcèx i wūxitama i maxū i taguma gúxū. ⁵ Rū wūxitama nixī ya tórū Cori, rū wūxiaxūtama nixī i yaxōgūxū rū wūxicèxicatama nixī ga íbaiūxū ga guxāma. ⁶ Rū wūxitama nixī ya Tupana ya guxānatū ixīcū. Rū nūma rū guxāētūwama nangēxma rū guxāwama namaxū. Rū nūma rū guxāxū narūngūxēē na tanaxūxūcèx i norū puracū. ⁷ Natūrū wūxichigū i yixema

rü tanayaxu i ngēma nacūma rü ngēma cuèx i Cristu tūxna āmarechaūxū na naxūgūxūcèx i norū puracū. ⁸ Rü ngēmacèx i Tupanaārū ore i ūmatūxūwa rü ñanagürü:

“Rü yexguma daxūguxū ga nañewa naxūxgu, rü yéma tūxū nagagū ga guxema marū tūxū ínanguxūxēē nawa ga tūmaarū chixexū. Rü norū duūxūgūna nanaxā ga cuèx na ngemamaā Tupanaarū puracū naxūgūxūcèx”, ñanagürü i ngēma ore. ⁹ Rü ñuxma Pa Chaueneēgūx, rü pexna chaca, rü ꞗtacūchiga nixī i ngēma ore i ñaxū, “Daxūwa naxū”, ñaxū? Rü dücax, ngēmawa nūxū tacuèx ga noxri rü ñoma ga nañegu na ínaxīxū ga nūmax. ¹⁰ Rü gumatama Cristu ga ñoma ga nañegu írūxīcū, rü gumatama nixī ga daxūguxū i naāne i Tupana íngēxmaxūwa ūxcū na guxāetūwa nangēxmaxūcèx rü guxūwama nangēxmaxūcèx. ¹¹ Rü nūmatama nixī ga guxema norū duūxēgūna naxāāxū ga tūmaārū cuèx rü tūmaārū puracū. Rü tūxū naxuneta ga ñuxre na toxnamana norū orexū tayarūxugūxūcèx. Rü toguegū rü tūxna nanaxā ga cuèx na duūxūgūmaā nūxū tixuxūcèx i ngema norū ore i tūxū nūxū nacuèxēēxū. Rü toguegū rü tūxna nanaxā ga cuèx na duūxūgūaxū tanangūchaūxēēxū i Tupanaarū ore na yaxōgūāxūcèx. Rü toguegū rü tūxna nanaxā ga cuèx na ngema yaxōgūxūarū dauruxūgū tixīgūxūcèx. Rü toguegū rü tūxna nanaxā ga cuèx na norū oremaā tangūxēētaegūxūcèx. ¹² Rü yemaācū norū duūxēgūna nanaxā ga tūmaārū puracū rü tūmamaā inanan-guxūxēē na ngēma yaxōgūxūxū tarūngūxēēgūxūcèx na ngēmaācū guxūma i ngēma yaxōgūxū rü yexeraācū nūxū yacuáetanūxūcèx i norū ore. ¹³ Rü Cristu nanaxwèxe na ngēma norū orewa iyaetanūxū i guxāma i yixema ñuxmatáta wūxigu aixcūma meā yaxōgū rü meā nūxū icuèxgū ya Tupana Nane. Rü ngēmaācū tá düxwa nawa tangugū na aixcūma Tupana naxwèxexūācūma ixīgūxū, rü tá tiyaetanū i norū orewa ñuxmatáta ñoma Cristu ya aixcūma mexēchicürüū ixīgū. ¹⁴ Rü tāūtáma ñoma buxūgürüū tixīgū i tórū maxūwa. Erū ngēma buxūgū rü tauxchaācū toguama narūxīnūē. Rü ngēxguma ꞗacū rü to i nguxēētaexū naxīnūēgu rü ngēmawe narūxī ñuxmata naga naxīnūē i ngēma duūxūgū i chixexū i norū doramaā nawomūxēēgūxū rü nachix-exēēgūchaūxū. Natürü i yixema rü tama name na ngēxgumarūū ixīgūxū. ¹⁵ Rü name nixī i yigū ingechaūgūācūma nagu taxī i ngēma ore i aixcūma ixīxū, na ngēmaācū yexeraācū naxrūū ixīgūxūcèx ya Cristu ya guxūma i yaxōgūxūārū āēxgacū ixīcū. ¹⁶ Rü taeru ya Cristuwa nixī i ne naxūxū i tórū pora na naxcèx imaxēxūcèx. Rü guxāma i yixema rü wūxigu naxmēxwa tangēxmagū. Rü ngēxguma Cristugagu meā wūxigu ipuracūegu rü yigū rūngūxēēgu rü guxūma meāma inixū. Rü ngēmaācū yigū ingechaūgūācūma norū orewa tiyaetanū na düxwa nūma nanaxwèxexūācūma ixīgūxūcèx.

Maxū i ngexwacaxūxū i Cristugagu tūxū ngēxmaxū

¹⁷ Rü ñuxma rü Cristuégagu pexū chaxucuxē na tama nagu pexīxū i ngēma chixexū ga noxri nagu pexīxū ga yexguma tauta Cristuaxū peyaxōgūgu. Rü tama name i nagu pexī i nacūmagū i ngēma duūxūgū i tama Tupanaxū cuèxgūxū i naēchitamare maxēxū. ¹⁸ Erū Chataná rü nanatoōēgū i ngēma duūxūgū, rü ngēmacèx chixexūguxicatama narūxīnūē. Rü nagagugūtama nūxū nataxuma i maxū i taguma gūxū i Tupanawa ne ūxū, erū tama nūxū nacuèxgūchaū. ¹⁹ Rü tama naxāneē na ꞗacū rü chixexū na naxūgūxū, rü ngēmacèx nagu naxī rü nūxū namepua i guxūraūxū i chixexūgū na naxūgūxū. ²⁰ Natürü i pema rü tama ngēmaācū na pemaxēxūcèx nixī i Cristuaxū peyaxōgūxū. ²¹ Yerū pema rü marū meā nūxū pexīnūē ga Cristuchiga. Rü toxūtawa naxcèx pengúe, rü nūxū pecuèx i norū ore i aixcūma ixīxū na ñuxācū Ngechuchu naxwèxexūācūma na pemaxēxū. ²² Rü ngēmacèx name

nixī i nūxŭ perŭxoe i ngēma nuxcūmaŭxŭ i pecūmagŭ ga ūpa nagu pexīxŭ. Yerŭ yema nuxcūmaŭxŭ ga perŭ maxŭ rŭ nachixexŭchi. Rŭ pexŭ napora rŭ pexŭ nawomŭxēēgŭ na nagu pexīxŭcèx ga yema pexeneârŭ ngúchaŭgŭ i tama mexŭ. Natŭrŭ i ñuxma rŭ name nixī i nūxŭ perŭxoe i guxŭma i ngēma. ²³ Rŭ ngēmacèx i ñuxma na Cristuarŭ duŭxŭgŭ pixīgŭxŭ rŭ name nixī na Tupanaguxicatama perŭxīnŭxŭ. Rŭ name nixī i Tupanana pegŭ pexāgŭ na Naãe i Ūñexŭ pewa puracŭxŭcèx rŭ na nangexwacaxŭxēãxŭcèx i peãe. ²⁴ Rŭ name nixī i penayaxu i ngexwacaxŭxŭ i pecūma i Tupana norŭ ngúchaŭmaã pexcèx mexēxŭ. Rŭ ngēma nacūma i ngexwacaxŭxŭ rŭ perŭ maxŭ i mexŭwa tá nangox i ngēxguma nagu pexīxgu i ngēma ore i aixcūma ixīxŭ rŭ tama nawe perŭxīxgu i pexeneârŭ ngúchaŭ. ²⁵ Rŭ ngēmacèx i ñuxma na Cristuarŭ pixīgŭxŭ rŭ tama name na pidoratèèxgŭxŭ. Natŭrŭ name nixī i wŭxichigŭ rŭ tŭmamŭcūmaã aixcūmaxŭ tixu. Erŭ guxāma i yixema rŭ yigŭtanŭxŭ i yaxōgŭxŭ tixīgŭ. ²⁶ Rŭ ngēxguma texé tacŭ peãewa ngŭxēēgu rŭ ꞑpegŭna pedaugŭ na tama pecadu pexŭxŭcèx! Rŭ tama name i nagu perŭxīnŭxŭ natŭrŭ name nixī i paxa ngēmatama i ngunexŭgu nŭxŭ ipeyarŭngŭma i ngēma naxŭpa na yanaxŭcuxŭ ya ũxŭcŭ. ²⁷ Rŭ pegŭna pedaugŭ na tama penaxŭchicaxŭcèx i Chataná na ngēmaãcŭ nayoxniēxŭcèx rŭ pemaã inacuáxŭcèx. ²⁸ Rŭ ngēxguma texé petanŭwa ngŭtèèxgu ga ūpa, rŭ name nixī i nŭxŭ tarŭxo i ngēma. Rŭ name nixī i tŭmamēxēmaã meã tapuracŭ na ngēmaãcŭ tŭxŭ nangēxmaxŭcèx i tŭmaârŭ ngēmaxŭ na toguāx ya tŭxŭ nataxŭemaã tangauxŭcèx. ²⁹ Rŭ tama name i chixexŭ i oremaã pidexagŭ. Rŭ name nixī i ore i mexŭmaã pidexagŭ na ngēmaãcŭ ngēma duŭxŭgŭ i pexŭ ñnŭxŭxŭ perŭngŭxēēgŭxŭcèx na yexeraãcŭ Tupanaga naxīnŭxŭcèx rŭ nataãegŭxŭcèx. ³⁰ ꞑRŭ pexuãegŭ na tama penangechaŭxŭxēxŭcèx i Tupanaãe i Ūñexŭ! Erŭ ngēma Naãe i Ūñexŭ nixī i Tupana pexna muxŭ na nŭxŭ pecuáxŭcèx na aixcūma norŭ duŭxŭgŭ pixīgŭxŭ ñuxmatáta ngēma ngunexŭ i nagu pexcèx núma naxŭxŭ ya Cristu. ³¹ ꞑRŭ nŭxŭ perŭxoe na nagu perŭxīnŭxŭcèx ega texé tacŭ rŭ chixexŭ pemaã ũxgux! Rŭ ngēxgumarŭ ta name nixī na nŭxŭ perŭxoexŭ na aigu perŭxīnŭxŭ, rŭ ēxna penuēxŭ, rŭ ēxna pegŭ na pengaexŭ, rŭ ēxna peguxchigawèxegŭxŭ. Rŭ ngēmaãcŭ name nixī na nŭxŭ perŭxoexŭ i guxŭma i ngēma chixexŭ i dexagŭ. ³² Rŭ name nixī i pegŭ perŭngŭxēēgŭ rŭ pegŭmaã pemecūmagŭ, rŭ pegŭxŭ pengechaŭtŭmŭtŭgŭ i wŭxichigŭ. Rŭ ngēxguma petanŭwa texé tacŭ rŭ chixexŭ pemaã ũxgux, rŭ name nixī i pegŭxŭ nŭxŭ pengechaŭgŭ i wŭxichigŭ yema na Cristugagu Tupana pexŭ nŭxŭ nangechaŭxŭrŭ.

5

Name nixī i meã namaxē i Tupanaxãcŭgŭ

¹ Rŭ ñuxma rŭ Tupanaxãcŭgŭ ya pexŭ nangechaŭgŭxe pixīgŭ. Rŭ ngēmacèx name nixī i naxcèx pedau na naxrŭtŭ meã pemaxēxŭ rŭ naxrŭtŭ pimexŭ. ² Rŭ name nixī i pegŭ pengechaŭgŭ yema Cristu tŭxŭ na ngechaŭxŭrŭtŭ. Rŭ nŭma rŭ taxcèx nŭgŭ inaxã rŭ taxcèx nayu. Rŭ yemaãcŭ Tupanaxŭ nataãēxēe yerŭ yemaãcŭ tŭxŭ namaxēxēe. ³ Rŭ ñuxma rŭ Tupanaârŭ duŭxŭgŭ pixīgŭ. Rŭ ngēmacèx tama name i naī i ngemaã rŭ ēxna naī ya yatŭmaã na ipepexŭ. Rŭ tama name na pexeneârŭ ngúchaŭwe perŭxīxŭ rŭ ēxna pegŭna penanugŭchaŭxŭ i tacŭ i ngēmaxŭgŭ. Rŭ ngēmacèx name nixī i nŭxŭ perŭxoe i guxŭma i ngēma chixexŭgŭ, rŭ bai i nachiga na pidexagŭmarexŭ. ⁴ Rŭ tama name i tacŭ rŭ ore i ãñchixŭxŭ pixu, rŭ bai i tacŭ rŭ ngeãxŭmare pixu, rŭ bai i texéxŭ pecugŭcŭraxŭ. Erŭ ngēma ore i chixexŭgŭ rŭ taxuwama name. Rŭ narŭmemaē nixī i Tupanana moxē pexāgŭ. ⁵ Rŭ aixcūma pemaã

nūxū chixu rü ngēxguma texé naī i ngemaā rü ēxna naī ya yatūmaā ipexgu, rü ēxna tūmaxūneārū ngúchaū taxūxgu, rü taxucürüwama taxāchica i ngextá tórü Cori ya Cristu rü Tanatü ya Tupana āēxgacü íxīxūwa. Rū ngēxgumarūū ta taxucürüwama texé ngēma taxāchica ega tūgūna tananugūchaūxgu i tacü rü ngēmaxūgü. Erü yíxema ngēma nacūma tūxū ngēxmaxē rü düxwa namaā tatupanaāx i ngēma nacūma i chixexū. ⁶ ;Rü tama naga pexīnūē ega texé tacü rü ore i ngēāēmarexūmaā pexū womūxēēchaūgu na penaxūxúcèx i ngēma chixexūgü! Erü ngēma chixexūgūgagu nixī i Tupana tá poraācū napoxcuexū i ngēma duūxūgü i tama naga ĩnūexū. ⁷ Rū ngēmacèx tama name i ngēma duūxūgūmaā pexāmücügü na pema rü ta tama penaxūxúcèx i ngēma chixexūgü. ⁸ Rū ūpa ga pema rü ēānexūwa peyexmagü, yerü tama Tupanaxū pecuèx rü chixri pemaxē. Natürü i ñuxma na Tupanaxū pecuáxū rü tórü Coriarü duūxūgü na pixīgūxū, rü ngóonexūwa pengēxmagü. Rū ngēmacèx name nixī i duūxūgü i ngóonexūwa ngēxmagūxürüū meā na pemaxēxū. ⁹ Erü ngēxguma ngóonexūwa ingēxmagu, rü mexū taxūgü, rü nagu taxī i ore i aixcūma ixīxū, rü meā tamaxē. ¹⁰ Rū ngēmacèx name nixī i naxcèx pedau na nagu pexīxū i ngēma maxū i tórü Cori namaā taāēxū. ¹¹ Rū tama name i pema rü ta penaxū i ngēma chixexūgü i taxuwama mexū i ngēma togü i duūxūgü i ēānexūwa ngēxmagūxū ūgūxū. Natürü narümemaē nixī i penangoxēē na nachixexū i ngēma naxūgūxū. ¹² Erü ngēma chixexū i cúācūma naxūgūxū i ngēma yatūgü rü ngexūgü, rü woo nachiga idexagūmaregu rü wūxi i ānexūchi nixī. ¹³ Natürü ngēxguma ngóonexū nagu baxigu i tacü rü chixexūgü rü meā tá nangox na ñuxācū nachixexū. ¹⁴ Erü guxūma i tacü i ngēxmaxū, rü ngēxguma ngóonexūwa nangēxmagu, rü meāma nangox na ñuxācū yīxū. Rū ngēmacèx i Tupanaārü orewa rü ñanagürü:

“;Nabaixāchi i cuma na cupexū! ;Rü írüda i cuma na icuyarütaxuxū! ;Rü nagu rüxīnū na ñuxācū nachixexū i ngēma curü pecadugü! Rū Cristu tá cuxcèx nanangóonexēē rü tá cuxū narüngūxēē na Tupanaxū cucuáxúcèx”,

ñanagürü i ngēma ore. ¹⁵ Rū ngēmacèx name nixī i pexuāēgü rü meā pemaxē. Rū tama name i ngēma duūxūgü i tama Tupanaārü orexū cuēxgūxürüūācūma na pemaxēxū, natürü name na duūxūgü i meā Tupanaga ĩnūexürüū meā na pemaxēxū. ¹⁶ Rū ñuxma na Tupana pexū yatauxchaāchixēēxū rü ;pepaxaāēgü na nūxū pepuracūexū rü penaxūxū i ngēma nūma nanaxwèxexū! Erü ñomaūcūü i duūxūgü rü poraācū chixexū naxūgü. ¹⁷ Rū ñuxma na ngēmaācū namaxēxū i togü i duūxūgü, rü tama name na naxrūū pixīgūxū. Rū tama name i duūxūgü i ngēāēmarexürüū pixīgü. Natürü name nixī i Tupanaārü orewa pengúe na nūxū pecuáxúcèx i tacü na yīxū i tórü Cori pexū naxwèxexū na penaxūxū. ¹⁸ Rū tama name i tacü rü axexū i ngúchixáxūmaā pengāxē, erü ngēma rü chixexū tūxū naxūxēē i ngēxguma ngēmaācū imaxēgu. Natürü name nixī i Tupanaāē i Üünexūna pegü pexāgü na pewa nangēxmaxúcèx rü pemaā inacuáxúcèx. ¹⁹ Rū name nixī i Tupanaārü orchigagu rü norü wiyaegügu pegūmaā pidexagü rü pegūmaā nūxū pixu. Rū name nixī i nagúxūraūxū i norü wiyaegügu pewiyaegü, na ngēmaācū guxūne ya perü maxūnemaā tórü Corixū picuèxūūgūxúcèx. ²⁰ Rū name nixī i guxūguma tórü Cori ya Ngechuchu ya Cristuégagu moxē nūxna pexāgü ya Tanatü ya Tupana naxcèx i guxūma.

Ñuxācū meā nūgūmaā namaxē i wūxi ya ĩpatacūāx i Cristuaxū yaxōgūxū

²¹ Rū ñuxma na Cristumēxēwa pengēxmagūxū, rü name nixī i pegüga pexīnūē i wūxichigü, erü Cristuxū pengechaūgü rü naga pexīnūē. ²² Rū pe-

max, Pa Ngexŭgŭx, rŭ ngēma tŏrŭ Cori naxwèxexŭrŭŭ rŭ name nixĭ na petega pexĭnŭxŭ. ²³ Erŭ nŭma ya yatŭ rŭ namèxēru nixĭ, ngēxgumarŭŭ ya Cristu na guxŭma i yaxŏgŭxŭēru na yĭxŭ. Rŭ nŭmagŭ i yaxŏgŭxŭ rŭ Cristuxŭne nixĭgŭ rŭ nŭma ya Cristu nixĭ i norŭ maxèxēruŭ yĭxŭ. ²⁴ Rŭ ngēxgumarŭŭ na Cristuga naxĭnŭxŭ i ngēma yaxŏgŭxŭ, rŭ ngēxgumarŭŭ ta i ngexŭgŭ rŭ name nixĭ na guxŭguma natega naxĭnŭxŭ. ²⁵ Rŭ name nixĭ i namèxŭ nangechaŭ ya yatŭ, yema Cristu guxāma ga yaxŏgŭxexŭ na nangechaŭxŭrŭŭ. Rŭ yema na tŭxŭ nangechaŭxŭcèx nixĭ ga nayuxŭ ga Cristu. ²⁶ Rŭ yemaācŭ nanaxŭ ga Cristu na nŭgŭxŭ tŭxŭ nadexŭcèx rŭ tŭxŭ yaxŭŭnexèxŭcèx i guxāma i yixema na yaxŏgŭxŭ. Rŭ norŭ oremaā rŭ ngēma dexá i nawa íbaiŭxŭmaā tŭxŭ nimexèē na aixcŭma napèxewa imexŭcèx. ²⁷ Rŭ yemaācŭ tŭxŭ nimexèē na nŭgŭtama tŭxŭ nawéxŭcèx na aixcŭma guxŭwama imexŭ rŭ na nataxuxŭma i tacŭ i tŏrŭ chixexŭ rŭ bai i írarŭwa i ngēxguma napèxewa ingugŭgu. Erŭ tŭxŭ nade na ixŭŭnegŭxŭcèx rŭ guxŭwama imexŭcèx i napèxewa. ²⁸ Rŭ yema Cristu tŭxŭ na ngechaŭxŭrŭŭ, rŭ wŭxichigŭ ya yatŭ rŭ nanaxwèxe na namèxŭ nangechaŭxŭ ñoma nŭgŭxŭnexŭ na nangechaŭxŭrŭŭtama. Rŭ yixema tŭmamèxŭ ngechaŭxŭ rŭ tŭgŭtama nixĭ i tangechaŭxŭ. ²⁹ Erŭ tataxuma ya texé ya tŭmaxŭnechitama aixe, natŭrŭ tanaxŭwemŭ rŭ meāma nŭxna tadau ngēma Cristu guxŭma i yaxŏgŭxŭna dauxŭrŭŭ. ³⁰ Rŭ guxāma i yixema na yaxŏgŭxŭ rŭ Cristutanŭxŭ tixĭgŭ rŭ ngēmaācŭ wŭxigu namŭcŭgŭ tixĭgŭ. Rŭ nŭma nixĭ i tŭxna nadauxŭ. ³¹ Rŭ ngēmacèx i Tupanaārŭ ore i ŭmatŭxŭwa rŭ ñanagŭrŭ:

“Rŭ wŭxichigŭ ya yatŭ rŭ nanatŭna rŭ naēna tá nixŭgachi na namèxmaā inaxŭxŭcèx. Rŭ ngēma taxre rŭ wŭxi tátama nixĭgŭ”,
ñanagŭrŭ i ngēma ore. ³² Rŭ ngēma ore i yatŭchiga rŭ namèxchiga rŭ wŭxi i ore i aixcŭma mexŭ nixĭ. Natŭrŭ ñuxma na pemaā nŭxŭ chixuxŭ i ngēma rŭ Cristuchiga rŭ yaxŏgŭxŭchiga nixĭ i chidexaxŭ. ³³ Natŭrŭ ngēma ore rŭ pechiga ta nixĭ. Rŭ ngēmacèx i wŭxichigŭ i pema i yatŭgŭ rŭ name nixĭ i pemèxŭ na pengechaŭxŭ ngēma pegŭtama na pengechaŭxŭrŭŭ. Rŭ ngēxgumarŭŭ ta i pema i ngexŭgŭ rŭ penaxwèxe i petega pexĭnŭē.

6

¹ Pa Buxŭgŭx, ñuxma na Cristuarŭ pixĭgŭxŭ, rŭ name nixĭ i penatŭga rŭ peega pexĭnŭē, erŭ ngēma nixĭ i aixcŭma mexŭ. ²⁻³ Yerŭ yema mugŭ ga Tupana Moĭchéna āxŭtanŭwa rŭ yema mu ga nŭxĭra wŭxi ga unetamaā Tupana nŭxŭ ixuxŭ, rŭ ñanagŭrŭ:

“¡Rŭ tŭxŭ nangechaŭ rŭ tŭxŭ rŭngŭxŭēē ya cunatŭ rŭ cue na aixcŭma cutaāxŭcèx rŭ namáxŭcèx i curŭ maxŭ i ñoma i naānewa!”
ñanagŭrŭ. ⁴ Rŭ pemax, Pa Papágŭ rŭ Pa Mamágŭx, rŭ tama name i penangamare rŭ penanuèxēē i pexacŭgŭ. Rŭ name nixĭ i meā penayaexēē, rŭ peyaxucŭxègŭ rŭ penangŭexèē na meā tŏrŭ Coriaxŭ yaxŏgŭāxŭcèx. ⁵ Rŭ pemagŭ, Pa Duŭxŭgŭ ya Ixāārŭ Coriāxgŭe, rŭ name nixĭ i meā naga pexĭnŭē i perŭ corigŭ i ñoma i naānewa. Rŭ penaxwèxe i nŭxŭ pengechaŭgŭācŭma rŭ nŭxŭ pemuŭēācŭma meā naga pexĭnŭē ñoma Cristuaxŭ pepuracŭexŭrŭŭ. ⁶ Rŭ tama name ega perŭ corigŭ pexŭ dawanŭguxicatama meā nŭxŭ pepuracŭe na ngēmaācŭ pemaā nataāxŭcèx. Natŭrŭ ñuxma na Cristuarŭ duŭxŭgŭ pixĭgŭxŭ, rŭ name nixĭ i guxŭma i perŭ ngŭchaŭmaā penaxŭ i ngēma Tupana pexŭ naxwèxexŭ. ⁷ Rŭ ngēma puracŭ i perŭ cori pexna āxŭ, rŭ name nixĭ i petaāēācŭma penaxŭ, ñoma tŏrŭ Cori ya Ngechuchuaxŭ pepuracŭexŭrŭŭ. Erŭ aixcŭma nŭxŭ nixĭ i pepuracŭexŭ rŭ tama i duŭxŭgŭaxŭ. ⁸ Rŭ name nixĭ i ngēmaācŭ meā pepuracŭe, erŭ nŭxŭ pecuèx rŭ wŭxichigŭ i duŭxŭ rŭ woo wŭxi i coriarŭ duŭxŭ yixĭgu rŭ ēxna taxŭxearŭ yixĭgu, natŭrŭ tŏrŭ Cori

ya Ngechuchu tá nüxŭ nanaxŭtanŭ naxcèx i ngēma mexŭ i naxŭxŭ. ⁹ Rŭ pemax, Pa Corigŭx, rŭ name nixŭ i ngēxgumarŭŭ ta meã namaã pemaxē i perŭ duŭxŭgŭ. Rŭ tama name i tacŭ rŭ chixexŭmaã penaxãŭxŭne. Rŭ nüxna pecuèxãchie na pema rŭ ta perŭ duŭxŭgŭrŭŭ tŭrŭ Cori ya daxŭgucŭmèxèwa na pengèxmagŭxŭ. Rŭ aixcŭma guxãma i yixema rŭ tawŭxigu i napèxewa ya tŭrŭ Cori ya Cristu.

Cristuarŭ duŭxŭgŭlarŭ poxŭruŭ i Tupana nüxna ãxŭ na nügŭ namaã inapoxŭgŭxŭcèx naxchaxwa i Chataná

¹⁰ Rŭ ñuxma na tŭrŭ Corimŭcŭgŭ pixŭgŭxŭ, Pa Chaueneègŭx, rŭ name nixŭ i pegŭ peporaexèe na penayaxuxŭcèx i ngema pora i nawa ne ŭxŭ. Erŭ nŭma rŭ naporaxŭchi. ¹¹ Rŭ pegŭ panaxŭ i guxŭma i ngema poxŭruŭgŭ i Tupana pexna ãxŭ na ngēmamaã pegŭ ípepoxŭxŭcèx i ngēxguma Chataná pexŭ womŭxèèchaŭgu! ¹² Erŭ tama duŭxŭgŭ i taxrŭŭ ãmachixŭ rŭ ãxchinaxãxŭmaã nixŭ i yigŭ idaixŭ. Natŭrŭ ngēma namaã yigŭ idaixŭ nixŭ i Chatanáãrŭ duŭxŭgŭ i ngoxogŭ i chixexŭgŭ i poraexŭ. Rŭ nŭmagŭ rŭ namuxŭchi rŭ tŭxŭ narŭporamaègŭchaŭ. Rŭ tama nüxŭ tadaugŭ erŭ naãègŭ nixŭ, natŭrŭ guxŭwama nangèxmagŭ i ñoma i naãnewa. Rŭ namaã inacuèx i ñoma i naãne i chixexŭ. ¹³ Rŭ ngēmacèx name nixŭ i penayauxgŭ i guxŭma i ngēma poxŭruŭgŭ i Tupana pexna ãxŭ, na ngēmaãcŭ pegŭ ípepoxŭxŭcèx i ngēxguma ngēma naãègŭ pexŭ nachixexeèchaŭgu. Rŭ ngēmaãcŭ tãŭtãma nüxŭ penguxŭ i ngēma naãègŭ i chixexŭ rŭ tá nüxŭ perŭporamaegŭ. ¹⁴ Rŭ ngemacèx name nixŭ i mea pegŭna pedaugŭ na tama perŭ uwanŭmèxègu peyixŭcèx. Rŭ penaxwae na pixaixcŭmagŭxŭ na taxuwama nachixexŭcèx i perŭ maxŭ. ¹⁵ Rŭ name nixŭ i guxŭguma ípememaregŭ na nüxŭ peyarŭxugŭexŭcèx i ngema ore i ngŭxmŭxèeruxŭ. ¹⁶ Rŭ ngema guxŭarŭ yexera ixŭxŭ nixŭ na aixcŭma Cristuaxŭ peyaxŭgŭxŭ na ngēmaãcŭ pegŭ ípepoxŭxŭcèx nüxna i Chatanáne i ãŭcŭmaxŭ i namaã tŭxŭ nachixexeèchaŭxŭ. ¹⁷ Rŭ name nixŭ i penayaxu i ngema maxŭ i taguma gŭxŭ na ngemamaã pegŭ ípepoxŭxŭcèx ñoma wŭxi i churara i napatèxemaã nügŭ ípoxŭxŭrŭxŭ. Rŭ ngema Tupanaarŭ Ore i Naãe i Üünexŭ pexna ãxŭ, rŭ ngema nixŭ i pexne ixŭxŭ. ¹⁸ Rŭ tama name i nüxŭ perŭchaue na peyumŭxègŭxŭ. Natŭrŭ name nixŭ i guxŭguma Tupanaãe i Üünexŭãrŭ ngŭxèèmaã Tupanaxŭ pecèèxŭ. Rŭ penaxwae i pexuãe na taguma nüxŭ perŭxoexŭcèx. Rŭ ngemaãcŭ name nixŭ i naxcèx peyumŭxègŭ i guxŭma i Tupanaarŭ duŭxŭgŭ. ¹⁹ Rŭ ngēxgumarŭŭ ta chanaxwèxe i chauxcèx peyumŭxègŭ na Tupana choxŭ rŭngŭxèèxŭcèx rŭ choxna naxããxŭcèx i ngēma ore i nŭma nanaxwèxexŭ na nüxŭ chixuxŭ. Rŭ chanaxwèxe i Tupanana naxcèx peca na choxŭ naporaxèèxŭcèx na tama chamuŭãcŭma nüxŭ chixuxŭcèx rŭ mea chanangoxèèxŭcèx i ngema norŭ ore i Cristuchiga ga noxri exŭguxŭ i ñuxma maxŭ tŭxna ãxŭ. ²⁰ Rŭ ngēma orexŭ na chixuxŭcèx nixŭ ga Tupana nügŭchicŭŭ choxŭ inamuxŭ. Rŭ ngēmagagu nixŭ i chapoxcuxŭ i ñuxmax. Rŭ chanaxwèxe i chauxcèx peyumŭxègŭ na tama chamuŭãcŭma meãma nŭma nanaxwèxexŭãcŭma nüxŭ chixuxŭcèx i ngēma norŭ ore.

Pauru nanaguxèe ga norŭ popera rŭ wenaxãrŭ yema duŭxŭgŭxŭ narŭmoxè

²¹ Rŭ taeneè ya nüxŭ ingechaŭcŭ ya Tíquicu, rŭ chauxrŭŭ aixcŭma meãma napuracŭ i tŭrŭ Coriarŭ puracŭwa. Rŭ nŭma tá pemaã nüxŭ nixu i guxŭma i chauchiga na ñuxãcŭ choxŭ naxŭpetŭxŭ i nuã. ²² Rŭ ngēmacèx nixŭ i pexŭtawa chanamuxŭ, na pemaã nüxŭ yaxuxŭcèx na ñuxãcŭ toxŭ naxŭpetŭxŭ, na ngēmaãcŭ pexŭ nataèxèèxŭcèx. ²³ Pa Toeneègŭ i Yaxŭgŭxŭx, chanaxwèxe i Tanatŭ ya Tupana rŭ tŭrŭ Cori ya Ngechuchu ya Cristu pexŭ narŭ-ngŭxèègŭ i guxãma i pema na meã pegŭmaã pemaxèxŭcèx, rŭ aixcŭma petaãègŭxŭcèx, rŭ

pegü pengechaŭgüxŭcèx rü meã peyaxõgüxŭcèx. ²⁴ Rü chanaxwèxe i Tanatü ya Tupana nüxŭ narüngŭxēē i guxŭma i ngēma duŭxŭgü i aixcūmaxŭchi tórü Cori ya Ngechuchu ya Cristuxŭ ngechaŭgüxŭ. Rü ngēmaãcü yĩ.

Rü nuãma pexna,
Pauru

POPERA GA PIRIPUWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Piripuwa yexmagŭxŭ

¹ Pa Toeneēgŭ ya Piripuwa Ngēxmagŭxex, choma i Pauru rü namaã i taeneē i Timutéu nixŭ i pexcèx tanaxümatŭxŭ i ñaã popera. Rü toma rü Ngechuchu ya Cristuarü puracütanŭxŭ tixŭgŭ. Rü pexcèx tanaxümatŭ i pema i yaxōgŭxŭârŭ ãēxgacŭgŭ na pixŭgŭxŭ, rü pema i tupaucawa ngŭxēētaeruŭgŭ na pixŭgŭxŭ, rü guxāma i pema i Ngechuchu ya Cristuaxŭ yaxōgŭxe. ² Rü chanaxwèxe i Tanatŭ ya Tupana rü tórŭ Cori ya Ngechuchu ya Cristu poraãcŭ pexŭ narüngŭxēē rü pexŭ nataãēxēē.

Pauru rü yema yaxōgŭxŭcèx nayumŭxē

³ Rü guxŭguma i ngēxguma pexna chacuèxāchigu rü Tupanana moxē chaxã i pexcèx. ⁴ Rü ngēxguma chayumŭxēgux, rü guxŭguma chataãēãcŭma pexcèx chayumŭxē i guxāma i pemax. ⁵ Erŭ pema rü noxritama Tupanaârŭ orexŭ pexŭnŭēgumama rü poraãcŭ choxŭ perüngŭxēē na nüxŭ chixuxŭcèx i norŭ ore i mexŭ. Rü ñuxma rü ta choxŭ perüngŭxēēgüecha. ⁶ Rü Tupana rü marŭ inanaxŭgŭ i wŭxi i mexŭ i puracŭ i perŭ maxŭwa. Rü nüxŭ chacuèx rü nüma rü guxŭgutāma nanaxŭecha i ngēma puracŭ ñuxmatāta yanguxēēã i ngēxguma ínanguxgu ya Ngechuchu ya Cristu. ⁷ Rü aixcŭma name na ngēmaãcŭ pemaã nagu charŭxŭnŭxŭ, erŭ poraãcŭ pexŭ changechaŭ rü aixcŭma Tupana wŭxigu tŭxŭ narüngŭxēē i guxāma i yixema. Rü woo ñuxma na chapoxcuxŭ rü éxna ega ãēxgacŭgŭpéxewa choxŭ nagagŭgu, rü Tupana choxŭ narüngŭxēē i ngēxguma norŭ ore i mexŭetŭwa chideaxgu rü namaã nüxŭ chixuxgu i ãēxgacŭgŭ na aixcŭma yŭxŭ i ngēma orewa nüxŭ iyarüngauxŭ i tórŭ maxŭ i taguma gŭxŭ. Rü nüxŭ chacuèx rü ngēma choxŭ nangŭxēēxŭãcŭma, rü pexŭ rü ta narüngŭxēē. ⁸ Rü Tupana nüxŭ nacuèx na ñuxãcŭ poraãcŭ pexŭ chadauxchaŭxŭ rü pexŭ na changechaŭxŭ i guxāma i pemax, ngēma Ngechuchu ya Cristu pexŭ na ngechaŭxŭrŭ. ⁹ Rü chorŭ yumŭxēwa naxcèx íchaca na yexeraãcŭ pegŭ pengechaŭgŭxŭcèx rü Tupanaxŭ pengechaŭgŭxŭcèx. Rü naxcèx íchaca na yexeraãcŭ nüxŭ pecuáxŭcèx i guxŭma i Tupanachiga rü yexeraãcŭ nüxŭ pecuáxŭcèx na ñuxãcŭ nanaxwèxexŭ na naxcèx pemaxēxŭ. ¹⁰ Rü ngēmaãcŭ pexcèx chayumŭxē erŭ chanaxwèxe na meã penangugŭxŭ i tacŭ nixŭ i aixcŭma mexŭ i Tupanapéxewa na penaxŭxŭcèx i ngēma. Rü chanaxwèxe na aixcŭma namexŭ i perŭ maxŭ na taxucèxma tacŭcèx Tupana pexna çaxŭcèx i ngēxguma ínanguxgu ya Cristu. ¹¹ Rü naxcèx íchaca na Ngechuchu ya Cristu pexŭ narüngŭxēēxŭ na aixcŭma namexŭcèx i perŭ maxŭ rü aixcŭma penaxŭxŭcèx i ngēma Tupanapéxewa mexŭ na ngēmaãcŭ meã pemaxēãcŭma Tupanaxŭ picuèxŭgŭxŭcèx.

Chauxcèx rü Cristuarü ngŭchaŭ na chaxŭxŭcèx nixŭ i chamaxŭxŭ

¹² Pa Chaueneēgŭx, rü chanaxwèxe i nüxŭ pecuèx rü guxŭma i ngēma choxŭ üpetŭxŭ, rü aixcŭma ngēmaãcŭ choxŭ naxüpetŭ na yexeraãcŭ nat-achigaxŭcèx i Tupanaârŭ ore i mexŭ. ¹³ Rü ñuxma i núma rü guxŭma i churaragŭ i ãēxgacŭpataarŭ dauruŭgŭ rü guxŭma i togŭ rü ta nüxŭ nacuèxgŭ na chapoxcuxŭ naxcèx na Cristuarŭ duŭxŭ chiŭxŭ. ¹⁴ Rü ñuxma na chapoxcuxŭ rü muxŭma i taeneēgŭ i yaxōgŭxŭ rü tama namuēēãcŭma

nüxŭ nangúchaŭ na nüxŭ yaxugüexŭ i Tupanaârü ore i mexŭ. Rü yexeraâcü tórü Coriaxŭ nayaxögü. ¹⁵ Rü aixcüma nixŭ i ñuxre i duŭxügü rü togüxŭ na yaxãũãchixẽẽxŭcèxm̄are nüxŭ nixugüexŭ i Cristuchiga, erü togüxŭ narüyexerachaŭ. Natürü nangẽxma i togü i duŭxügü i aixcüma mexügu naxĩnũeâcüma meã nüxŭ ixugüexŭ i ngẽma ore. ¹⁶ Rü ñuxre i duŭxügü rü Cristuchigaxŭ nixugüe erü choxŭ nangechaügü rü nüxŭ nacuèxgü na Tupana nuxma choxŭ muxŭ na íchanapoxŭxŭcèx i norü ore i mexŭ. ¹⁷ Natürü nangẽxma i togü i noxrütama ngúchaŭcèx daugüxŭ rü ngẽmacèx nüxŭ ixugüexŭ i ngẽma ore. Rü nümagü rü tama mexügu narüxĩnũe, natürü naxcèx nadaugü na yexeraâcü choxŭ naguxchaxẽẽgüãxŭ i ñuxma na chapoxcuxŭ. ¹⁸⁻¹⁹ Natürü nüetama nixŭ ega woo ngẽmaâcü yixĩgu. Erü woo mexŭ i norü ngúchaŭmaã yixĩgu rü êxna tama, natürü Cristuchigaxŭ nixugüe. Rü ngẽma rü wüxi i taãe nixŭ i chauxcèx. Rü guxŭgutáma chataãẽẽcha erü nüxŭ chacuèx rü guxŭma i ngẽma rü chorü mexŭcèx tá nixŭ erü chauxcèx peyumüxëgü rü choxŭ narüngŭxẽẽ i Tupanaãe i Üünexŭ i Ngechuchu ya Cristuxŭ rüngŭxẽẽxŭ. ²⁰ Rü ngẽma poraâcü chanaxwèxexŭ nixŭ na taguma tacü rü chixexŭ chaxŭxŭ na taxucèxma chaugücèx chaxãnexŭcèx. Rü chanaxwèxe i guxŭguma íchamemare na guxãpẽxewa tama chamuŭãcüma Cristuchigaxŭ chixuxŭ. Rü ñuxma na chamaxŭxŭ rü woo chayuxgu rü chanaxwæe i guxŭguma aixrügumarüütama chaugagu Cristuxŭ nicuèxüŭgü i duŭxügü. ²¹ Erü chauxcèx rü Cristuarü ngúchaŭ na chaxŭxŭcèx nixŭ i na chamaxŭxŭ. Natürü ngẽxguma chayuxgux rü ngẽma rü ta name, erü Cristuxŭtawa tá changẽxma i ngẽxguma. ²² Natürü tama nüxŭ chacuèx i tacü nixŭ i rümemaẽxŭ i chauxcèx, ngẽma na chayuxŭ rü êxna na chamaxŭxŭ. Erü ñuxma na chamaxŭxŭ rü choxŭ natauxcha na chanaxŭxŭ i tórü Coriarü puracü. ²³ Rü ngẽmacèx tama nüxŭ chacuèx na tacü yĩxŭ i chauxcèx rümemaẽxŭ i ngẽma taxrewa. Erü ñuxguacü rü chanaxwèxe na chayuxŭ na Cristuxŭtawa changẽxmaxŭcèx. Rü ngẽma nixŭ i aixcüma yexera rümemaẽxŭ i chauxcèx. ²⁴ Natürü i pexcèx rü nagu charŭxĩnũ rü narümemaẽ nixŭ na ñoma i chaxunemaãtama na chamaxŭxŭ na ngẽmaâcü pexŭ charüngŭxẽẽxŭcèx. ²⁵ Rü ñuxma na aixcüma meã nüxŭ chacuáxŭ na pechoxwèxexŭ, rü ngẽmawa nüxŭ chacuèx na tãütáma paxa chayuxŭ. Rü ngẽmaâcü tá chamaxãma na pexŭ charüngŭxẽẽxŭcèx na yexeraâcü Cristucèx pemaxẽxŭcèx rü yexeraâcü taãẽãcüma nüxŭ peyaxögüxŭcèx. ²⁶ Rü ngẽmaâcü wena táxarü petanüwa changẽxma. Rü ngẽxguma wena choxŭ pedaugügu rü aixcüma tá petaãëgü erü tá pexŭ nangẽxma na tacücèx Ngechuchu ya Cristuxŭ picuèxüŭgüxŭ. ²⁷ Rü ngẽma guxŭârü yexera rümemaẽxŭ nixŭ na naxcèx pedauxŭ na meã pemaxẽxŭ, ngẽma Cristuarü ore pemaã nüxŭ ixuxŭrũ. Rü ngẽxguma petanüwa chaxŭxgu rü êxna woo tama ngẽma chaxŭxgu, natürü nüxŭ chaxĩnüchaŭ na guxãma wüxigu pegü peporaexẽẽxŭ na taguma nüxŭ perüchauxŭcèx na aixcüma peyaxögüxŭ, rü ngẽmaâcü Tupanaãxŭ pepuracüexŭ na yexeraâcü yaxŭchigüxŭcèx i norü ore i mexŭ. ²⁸ Rü ngẽmacèx penaxwèxe i tama texéxŭ pemuŭẽãcüma nüxŭ pixugüama i ngẽma ore. Rü ngẽma na tama nüxŭ pemuŭẽxŭ rü ngẽma rü wüxi i cuèxruŭ tá nixŭ nüxŭ i perü uwanügü. Rü ngẽmawa tá nüxŭ nacuèxgü na poxcuwa tá naxŭxŭ i nümagü natürü pema rü tá maxŭwa na pexŭxŭ. Rü Tupana tá nixŭ ya pexŭ rüngŭxẽẽcü na tama nüxŭ pemuŭẽxŭcèx i ngẽma perü uwanügü. ²⁹ Rü Tupanaga nixŭ na Cristuaxŭ peyaxögüxŭ. Rü ngẽxgumarüŭ ta naga nixŭ na Cristucèx ngúxŭ pingegüxŭ. Rü ngẽma rü wüxi i ngŭxẽẽ nixŭ i pexna naxãxŭ ya Tupana. ³⁰ Pema rü choma rü wüxigu Tupanaârü puracüwa tangẽxmagü, rü tanaxüama i ngẽma puracü ega woo texé tuxŭ naguxchaxẽẽgux. Rü ũpa rü marü choxŭ pedau na ñuxãcü

meã chanaxüxü i ngẽma puracü, rü ñuxma rü ta nüxü picuáchiga na ñuxãcü chanaxüamaxü woo namu i chorü guxchaxügü.

2

Cristu rü ñoma taxuüma yiixürüü nügü nixixẽ rü yemacèx ga Tupana rü guxüãrü ãëxgacüxü nayaxixẽ

¹ Rü dücax, Pa Chaueneëgüx, rü ñuxma na Cristuarü duüxügü pixigüxü, ¿rü aixcüma yiixü i nüma pexü nataãëxëxü? ¿Rü aixcüma yiixü i petaãëgüxü erü nüma pexü nangechaü? ¿Rü aixcüma yiixü i Tupanaãe i Üünexü pexütawa ngëxmaxü? ¿Rü aixcüma yiixü i pegü pengechaügüxü rü pegüxü pengechaütümüügüxü? ² Rü ngëxguma chi ngẽmaãcü yixigu, rü chanaxwèxe i guxãma wüxigu perüxñüë, rü aixcüma guxãma pegü pengechaügü, rü aixcüma guxãma ñoma wüxitama piixürüü na yiixü i peãe, rü guxãma wüxitama i ngúchaüçèx pedau. Rü ngëxguma ngẽmaãcü pemaxëgu rü wüxi i chorü taãe tá nixi. ³ Rü tama name na togüarü yexera pegü pixigüxëxü rü pegü picuèxüügüxü. Natürü narümemae nixi i nagu perüxñüëxü na ngema togü rü perü yexera nüxü nacuègüxü. ⁴ ¿Rü tama pegüguxicatama perüxñüë, natürü pegü peporaexëe na togüxü perüngüxëëgüxüçèx! ⁵ Rü name nixi ga yema Ngechuchu ya Cristu nagu rüxñüxügu na perüxñüëxü i pemax. ⁶ Yerü nüma rü woo ga Tupanaxüchi na yiixü, natürü tama nügü nicuèxüxü na Tupana yixixü. ⁷⁻⁸ Rü yemacèx yéma nanatèx ga norü mexügu ga daxüguxü ga naãnewa. Rü wüxi i duüxü i togüaxü puracüxürüü nügü nixixëe. Rü ñoma wüxi i duüxürüü ñoma ga naãnegu nabu. Rü yexguma marü duüxü yixigu ga nümax, rü ñoma taxuüma yiixürüü nügü nixixëe. Rü Tupanaga naxñü, rü yemaãcü curuchagu nayu woo wüxi ga añexüchi na yiixü ga yema. ⁹ Rü yemacèx ga Tupana rü guxüétüwa nanangexmaxëe rü nayangucuchixëe na guxüma i ãëxgacügüétüwa nangëxmaxüçèx. ¹⁰ Rü yemaãcü nanaxü ga Tupana na Ngechuchupëxegu tacaxápüxügüxüçèx rü nüxü ticuèxüügüxüçèx ya guxãma ya texé ya daxüguxü i naãnewa ngëxmagüxe, rü guxãma i ñoma i naãnewa ngëxmagüxe, rü guxãma ya texé ya marü yuexe. ¹¹ Rü yemaãcü Tupana ãëxgacüxü nayaxixëe na guxãma nüxü ixuxüçèx na tórü Cori yiixü ya Ngechuchu ya Cristu rü ngẽmaãcü nüxü icuèxüügüxüçèx ya Tanatü ya Tupana.

Cristuarü duüxügü rü ñoma omügürüü nixigü i natanüwa i ngẽma duüxügü i tama yaxögüxü

¹² Rü ñuxma na nüxü pecuáxü na ñuxãcü Nanatüga naxñüxü ga Cristu, rü chanaxwèxe i chauga pexñüë, Pa Chaueneëgü ya Pexü Changechaügüxe. Rü yéma petanüwa chayexmagu chauga na pexñüëxüãrü yexera chanaxwèxe i chauga pexñüë i ñuxma na tama petanüwa changëxmaxü. Rü chanaxwèxe i Tupanaxü pemuñëãcüma naxcèx pedaugüama i perü maxü i taguma gúxü. ¹³ Erü Tupana nixi ya perü maxüwa puracücü na mexügu perüxñüëxüçèx. Rü nüma nixi i pexü nangüxëëxü na naga pexñüëxüçèx rü peyanguxëëxüçèx i ngema norü ngúchaxü. ¹⁴ ¿Rü guxüma i ngema Tupanacèx pexüxüwa rü tama name i oöcü penaxü rü pegü naxcèx pechoxügagü! ¹⁵⁻¹⁶ Rü name i ngẽmaãcü meã pemaxë na taxüema tacü rü chixexüxü pewa iyangauxüçèx. Rü penaxwèxe i mexü i Tupanaxãcügü pixigü i natanüwa i ngẽma duüxügü i chixexü rü chixëãëgümarexü. Rü ngëxguma ngẽma duüxügümaã nüxü pixügüyane i ngẽma ore i mexü i tüxü maxëxëëxü, rü yoxni natanüwa rü ñoma woramacurigü ya ëñexüwa ibáixgücürüü tá pixigü. Rü ngẽmaãcü i ngëxguma wena núma naxüxgu ya Cristu rü poraãcü tá pemaã chataãe erü tá nüxü chadau na tama natüçèxmamare yiixü ga yema puracü ga petanüwa

chaxüxü. ¹⁷ Rü ngēma ñuxma na meã peyaxōgüxü, rü ngēma nixĩ i perü ãmare i Tupanana pexãxü. Rü ngēma na meã yanguxüçèx i ngēma perü ãmare i Tupanapēxewa, rü choma rü íchamemare na Tupanacèx ichanaxãxü i chorü maxü rü chayuxü. Rü ngēmacèx woo chayuxgu rü wüxi i taãe tá nixĩ i chauxcèx. Rü chanaxwèxe i pemagü rü ta ngēmacèx wüxigu chomaã petaãëgü. ¹⁸ Rü ngēmacèx ega ngēma ore i mexüçèx chayuxgux, rü tama name na pengechaügüxü natürü chanaxwèxe na wüxigu chomaã petaãëgüxü.

Timutéu rü Epaporu- dítuchiga

¹⁹ Rü ngëxguma tórü Cori ya Ngechuchu naxwèxegu rü paxa petanüwa chanamuëga ya taeneë ya Timutéu na pexü na íyadauxüçèx rü chataãëxüçèx i ngëxguma núma nangeãgu i pechiga. ²⁰ Rü aixcüma nataxuma i to i chorü ngüxëëruü i choma nagu charüxĩnüxügu rüxĩnüxü, rü Timutéuxicatama nixĩ. Rü nataxuma i to i naxrüü aixcüma pegu rüxĩnüxü rü pexü rüngüxëëchaüxü. ²¹ Erü guxüma i togü rü naxcèx nadaugü i noxrütama ngúchaügü, rü tama aixcüma nagu narüxĩnüë i ngēma Ngechuchu ya Cristuarü ngúchaü. ²² Natürü i pema rü marü nüxü pecuèx na ñuxãcü meã namaxüxü i Timutéu, rü ñuxãcü choxü nangüxëëxü i Tupanaãrü orearü uchigawa, ñoma wüxi i buxü i nanatüxü rüngüxëëxürüü. ²³ Rü ngēmacèx i ngëxguma nüxü chacuèxgu na ñuxãcü tá choxü na naxüpetüxü i núma, rü ñuxüchi ngema petanüwa chanamuxchaü i Timutéu na pexü íyadauxüçèx. ²⁴ Rü ngëxgumarüü ta nagu charüxĩnü rü tórü Cori rü aixcüma tá choxü narüngüxëë na chomatama ngema petanüwa íchayadauxüçèx. ²⁵ Rü ngëxgumarüü ta chauxcèx name nixĩ i ngema petanüwa chanamuxü i taeneë i Epaporudítu. Rü nüma nixĩ ga pematama chauxcèx núma penamuxü na choxü nangüxëëxüçèx. Rü nüma rü chomücü nixĩ i Tupanaãrü puracüwa, rü poraãcü choxü narüngüxëë i Tupanaãrü orearü uwa. ²⁶ Rü poraãcü nüxü nangúchaü na pexü íyadauxü i guxãma i pemax. Rü poraãcü naxoegaãe, yerü pema rü nüxü pecuáchiga ga na yaðaawexü ga númax. ²⁷ Rü aixcüma nixĩ ga na yaðaawexü, rü wixguxüchi taèx nayu. Natürü Tupanaãxü nangechaütümüü rü choma rü ta nüxü changechaütümüü, rü yemacèx naxcèx nayataanexëë na tama yexeraãcü changechaüxüçèx. ²⁸ Rü ngēmacèx rü yexeraãcü chanaxwèxe na paxa petanüwa chanamuxü i Epaporudítu, na pema rü petaãëgüxüçèx i ngëxguma wena nüxü pedaugügu. Rü ngëxguma i choma rü tá ta chataãe i ngëxguma nüxü chacuèxgu na petanüwa nangëxmaxü na pexü nangüxëëxüçèx. ²⁹ Rü chanaxwèxe i tórü Coriégagu petaãëgüãcüma meã penayaxu erü peeneë nixĩ. Rü name nixĩ i nüxü pengechaügü i guxüma i ngēma duüxügü i Epaporudíturüü ixügüxü. ³⁰ Yerü nüma ga Epaporudítu rü yema na poraãcü nawa napuracüxü ga Cristuarü puracü, rü yemacèx wixguxüchi taèx nayu. Rü äücümaxüwa nügü nayexmaxëë na pechicüü choxü nangüxëëxüçèx.

3

Ngēma na Cristuxü icuáxü rü ngēma nixĩ i guxüãrü yexera rümemaëxü

¹ Rü ñuxma Pa Chaueneëgüx, rü chanaxwèxe i petaãëgü erü tórü Coriarü duüxügü pixīgü. Rü yema ore ga noxri pexcèx chaxümatüxü rü tama choxü nawèxtümüü na wena pexcèx chanaxümatüxü erü aixcüma pexü name i ngēma ore. ² ¡Rü pegüna pedèux nüxna i ngēma duüxügü i chixri maxëxü rü chixexümaã pexü ixucuxëgüxü! Rü nümagü nixĩ i nüxü yaxugüexü rü ngëxguma tama yigü íwiechëxmüpëxechiraügu, rü taxucürüwama Tupanapēxewa time. ³ Natürü yíxema aixcüma Tupanapēxewa imexë, rü yixema tixīgü. Rü Tupanaxü ticuèxüügü i Naãe i Üünexüãrü

ngũxēēmaã. Rũ tataãēgũ erũ Ngechuchu ya Cristuarũ duũxũgũ tixĩgũ. Rũ tama tayaxõgũ na ngẽma yigũ íwiewchẽxmũpẽxechiraũxũcèx Tupanapẽxewa imexũ. ⁴ Rũ choma chi waxi nixĩ i guxũ i togũarũ yexera chayaxõxũ i ngẽma wiechẽxmũpẽxechiraũchiga. Rũ tataxu chima ya togue ya texé chauxrũũ yaxõxē i ngẽmachiga. ⁵ Yerũ yexguma 8 ga ngunexũ chauétũ yixĩgu ga na chabuxũ, rũ choxũ ínawiewchẽxmũpẽxechiraũgũ, erũ Yudíu chixĩ. Rũ Beyamítanũxũ chixĩ. Rũ chaunatũ rũ chaué rũ Yudíugũ tixĩgũ, rũ ngẽmacèx i choma rũ Yudíuxũchi chixĩ. Rũ choma rũ Parichéuchirẽx chixĩ, rũ pema nũxũ pecuèx rũ ngẽma Parichéugũ rũ meãma nanaxaure i Tupanaãrũ mugũ ga Moĩché ũmatũxũ. ⁶ Rũ yema na meã chayanguxẽẽchaũxũcèx ga yema mugũ ga Moĩché ũmatũxũ, rũ yemacèx nawe chingẽchigũ ga yema duũxũgũ ga Ngechuchuaxũ yaxõgũxũ. Rũ yema na aixcũma meã chanaxaurexũcèx ga yema mugũ ga Moĩché ũmatũxũ, rũ yemacèx taxucũrũwama texé chauchigaxũ tixu ga tama na chaxaurexũ. ⁷ Natũrũ guxũma ga yema ũpa chauxcèx mexũ, rũ ñuxma rũ taxuwama choxũ name erũ marũ íchanatèx na Cristuaxũĩcatama chayaxõxũcèx. ⁸ Rũ ñuxma na Ngechuchu ya Cristu ya chorũ Corixũ na chacuáxũ, rũ chauxcèx rũ guxũma ga yema ũpa nagu chixũxũ rũ taxuwama name, erũ ngẽma na Cristuxũ na chacuáxũ rũ guxũãrũ yexera narũmemaẽ. Rũ guxũma ga yema mugũ ga noxri nagu chixũxũ rũ marũ nũxũ charũxo na Cristuwe charũxũxũcèx. Rũ chauxcèx rũ ñoma guxchirerũũ nixĩ ga yema ũpa nagu chixũxũ ega Cristumaã nũgũ chananguxgu. ⁹ Rũ yemaãcũ nũxũ charũxo ga guxũma nagagu ga yema na Cristuarũ duũxũ na chiĩxũcèx. Rũ ñuxma rũ Tupanapẽxewa chame erũ Cristuaxũ chayaxõ. Rũ tama ngẽma na chamecũmaxũcèx rũ ěxna mugũ chaxaurexũcèx nixĩ na chamexũ i napẽxewa. Natũrũ ngẽma na Cristuaxũ chayaxõxũcèx nixĩ i nũgũcèx choxũ namexẽẽxũ ya Tupana. ¹⁰⁻¹¹ Rũ ngẽma ñuxma chanaxwèxexũ nixĩ na aixcũma Cristuxũ chacuáxũ rũ chowa na nangẽxmaxũ i ngẽma pora ga wena Cristuxũ írũdaxẽẽxũ i ñuxma nũxũ ngẽxmaxũ. Rũ yema ngũxũ na yangexũ ga nũma rũ na nayuxũ rũ ngẽxgumarũũtama chanaxwèxe i íchamemare na naxcèx ngũxũ chingexũ rũ naxcèx chayuxũ na yixcama choma rũ ta yuwa ícharũdaxũcèx.

Pauru naxcèx nadau na Cristucèx namaxũxũ ñuxmatáta Tupanax- ũtawa nangu

¹² Rũ ñuxma na ngẽma ñachaxũ pemaã rũ tama chanaxwèxe i nagu perũxĩnũe na guxũxũ chacuáxũ i Cristuchiga, rũ ěxna guxũwama na chamexũ. Natũrũ guxũ i ngunexũgu rũ naxcèx chadauama na Ngechuchu ya Cristuarũ ngũchaũ na chaxũxũcèx, yerũ yemacèx nixĩ ga nũma ga chauxcèx nadauxũ ga noxrix. ¹³ Pa Chaueneẽgũx, pemaã nũxũ chixu rũ chomatama meãma nũxũ chacuèx rũ ñuxma rũ ta tautama nawa changu i ngẽma naxcèx chadauxũ. Natũrũ i ñuxma rũ marũ nũxũ icharũngũma i guxũma ga yema noxri nagu chixũxũ. Rũ ñuxma rũ chaugũ chaporaxẽẽ na aixcũma Cristucèx na chamaxũxũ na nawa changuxũcèx i ngẽma maxũ i chopẽxewaama ngẽxmaxũ. ¹⁴ Rũ ngẽmacèx i ñuxma rũ naxcèx chadau na aixcũma Cristucèx chamaxũxũ ñuxmatáta Tupanaxũtawa changu. Erũ chanayauxchaũ i ngẽma ãmare i nũma daxũguxũ i naãnewa naxcèx taxcèx nangemaxũ i yixema na Ngechuchu ya Cristuarũ duũxũgũ ixĩgũxũ. ¹⁵ Rũ guxãma i yixema na aixcũma Cristuaxũ yaxõgũxũ, rũ name nixĩ i ngẽmaãcũ nagu tarũxĩnũe. Natũrũ ngẽxguma chi texé i petanũwa toguama tarũxĩnũgu, rũ Tupana tá tũxũ nũxũ nacuèxẽẽ i ngẽma nũma nanaxwèxexũ na nũxũ tacuáxũ. ¹⁶ Rũ ngẽma inaxwèxexũ nixĩ na aixcũma naga ixĩnũeẽchaxũ rũ meãma nagu ixĩxũ i ngẽma ore i marũ nũxũ icuáxũ. ¹⁷ Pa Chaueneẽgũx, chanaxwèxe i chauxrũũ nagu pexĩ i ngẽma pexũ nũxũ chadauxẽẽxũ na namexũ. ;Rũ penangugũ na ñuxãcũ

meã namaxẽxũ i ngẽma togũ i duũxũgũ i toma tamaxẽxũãcũma maxẽxũ! ¹⁸ Rũ marũ muẽxpũxcũna pemaã nüxũ chixu, rũ ñuxma rũ changechaũãcũma rũ chaxauxãcũma wena pemaã nüxũ chixu rũ nangẽxma i muxũma i duũxũgũ i Cristuarũ uwanürũãcũma maxẽxũ. Rũ nümagũ rũ tama nüxũ nacuèxgũchaũ na Cristu curuchagu naxcèx yuxũ. ¹⁹ Natürũ ngẽma duũxũgũ rũ tá düxwa Tupana nanapoxcue. Rũ ngẽma naxũneãrũ ngúchaũ nixĩ i namaã natupanaãxũ. Rũ woo nüxũ nacuèxchirẽx na wũxi i ãne na yĩxũ i ngẽma chixexũ natürũ namaã nataãẽgũama. Rũ ñoma i naãneãrũ ngẽmaxũguxicatama narũxĩnũ. ²⁰ Natürũ i yixema rũ daxũguxũ i naãnewa tüxũ nangẽxma i tachica. Rũ ítananguxẽẽ na daxũguxũ i naãnewa taxcèx ne naxũxũ ya tórũ Cori ya Ngechuchu ya Cristu ya tórũ Maxẽxẽeruũ. ²¹ Rũ ñãã taxũne i yuxwèxexũ rũ nüma ya Cristu tá nanaxũchicũũ na naxũne i mexèchixürũũ yĩxũcèx. Rũ ngẽma norũ pora i namaã guxũetüwa nangẽxmaxũ, rũ ngẽmamaãtama tá nanaxũchicũũ i taxũne na noxrürũũ yĩxũcèx.

4

Ñuxma na tórũ Coriarũ ixĩgũxũ rũ name nixĩ na guxũguma namaã itaãẽgũxũ

¹ Pa Chaueneẽgũx, rũ pexũ changechaxũ rũ poraãcü pexũ íchayadauxchaxũ. Rũ ngẽma pemaã nüxũ chixuxürũũ chanaxwèxe i meã tórũ Coricèx pemaxẽ erũ pema nixĩ i chorũ taãẽ rũ chorũ ãmare i Tupana choxna ãxũ pixĩgũxũ. ² Rũ nüxũ chacèxũ i taeyèxgũ i Ebódia rũ Chitique na nügũmaã nangũxmũèxũcèx, erũ nümagũ rũ tórũ Corixacũgũ nixĩgũ. ³ Rũ cumax, Pa Chomücũ ya Mecũ i Wüxigu Tupanaãrũ Puracũwa Chomaã Puracücũx, rũ cuxna naxcèx chaca na nüxũ curüngũxẽèxũcèx i ngẽma taxre i taeyèxgũ, erũ nümagũ rũ wüxigu chomaã rũ Cremetemaã rũ ngẽma togũ i chomücũgũ i Tupanaãrũ poperawa marũ ngoxégagũxũmaã napuracüe i Tupanaãrũ orearũ uwa. ⁴ Rũ ñuxma na tórũ Coriarũ pixĩgũxũ, Pa Chaueneẽgũx, rũ name nixĩ i guxũguma namaã petaãẽgũ. Rũ wena pemaã nüxũ chixu, rũ ¡petaãẽgũ! ⁵ Rũ chanaxwèxe i meã pemaxẽ na guxũma i duũxũgũ pexũ nacuèxgũxũcèx na aixcũma mexũ i duũxũgũ na pixĩgũxũ. ¡Rũ nüxna pecuèxãchie na tórũ Cori rũ paxa tá nataeguxũ na núma naxũxũ! ⁶ ¡Rũ taxucèxma penaxixãchiãẽgũ! ¡Rũ Tupana-maã nüxũ pixu i perũ yumüxèwa i guxũma i tacũ i pexũ ngupetüxũ! ¡Rũ naxcèx ípeca rũ moxè nüxna pexã! ⁷ Rũ ngẽmaãcü i nüma ya Tupana rũ tá pexũ nataãèxẽẽ namaã i wũxi i taãẽ i mexèchixũ i guxũma i taãẽ i nüxũ icuáxũãrũ yexera mexèchixũ. Rũ ñuxma na Ngechuchu ya Cristuarũ duũxũgũ pixĩgũxũ, rũ ngẽma taãẽ i Tupana pexna ãxũ rũ tá nüxna pexũ ínapoxũ i ngẽma chixexũ i nagu perũxĩnũèchaxũ.

Name nixĩ i nagu tarũxĩnũẽ i guxũma i tacũ i aixcũma mexũ ixĩxũ

⁸ Rũ ñuxma Pa Chaueneẽgũx, rũ name nixĩ i nagu perũxĩnũẽ i guxũma i ngẽma ore i aixcũma ixĩxũ, rũ guxũma i ngẽma nacũma i taxucürũwama texè chixri nachiga idexaxũ. Rũ name nixĩ i nagu perũxĩnũẽ i guxũma i ngẽma ore i aixcũma meã iwéxũ rũ guxũma i ngẽma Tupanapèxewa mexũ, rũ guxũma i ngẽma mexũ i duũxũgũ namaã taãèxũ, rũ guxũma i ngẽma mexũ i Tupanaxũ naxcèx icuèxũxũgũxũ. Rũ name nixĩ i ngẽmagu perũxĩnũẽ. ⁹ Rũ chanaxwèxe i aixcũma penaxũ i ngẽma pexũ changúexèèxũ, rũ ngẽma pexũ namaã chixucuxègũxũ, rũ ngẽma chauxütawa nüxũ pexĩnũèxũ, rũ ngẽma chauxütawa nüxũ pedauxũ na chanaxũxũ. Rũ ngẽxguma ngẽmaãcü pemaxègu rũ pemaã tá inarũxãũx ya Tupana ya tamaã irüngũxmücũ rũ tüxũ taãèxèècü.

Yema PiripucũĀx ga yaxõgũxũ rũ dĩerumaã Pauruxũ narüngũxèègũ

10 Rū ñuxma na chorü Coriarü chiixũ, rü poraãcü chataãẽ erü wenaxãrũ choxna pecuèxãchie rü choxũ perüngũxẽẽ. Rũ choma nũxũ chacuèx rü pema rü guxũguma choxũ perüngũxẽẽchaũ, natürü taguma pexũ natauxcha ga na penaxũxũ ga yema. 11 Rũ tama ngẽma na tacü choxũ taxuxũcèx nixĩ i pemaã nũxũ chixuxũ i ngẽmachiga. Erü choma rü marü chomaã nixü na namaã chataãẽxũ i ngẽma choxũ ngẽxmaxũ. 12 Rũ nũxũ chacuèx na ñuxãcü na yĩxũ ega guxũ choxũ tauygux, rü nũxũ chacuèx na ñuxãcü na yĩxũ ega choxũ namuxũchixgu. Rũ marü chomaã nixü na namaã chataãẽxũ i ngẽma choxũ ngẽxmaxũ woo changaxpütüwegu, rü êxna woo chataiyaxgu, rü êxna woo choxũ namuxũchixgu rü êxna woo choxũ natauyguma. 13 Rũ Cristu nixĩ ya choxũ poraxẽcũ, rü ngẽmacèx chomaã nanguxũ na chanaxũxũ i guxũma i ngẽma Tupana naxwèxexũ na chanaxũxũ. 14 Natürü ga pema rü wüxi ga mexũ choxũ pexügü ga yexguma guxchaxũwa chayexmagu rü choxũ perüngũxẽẽ. 15 Rũ pema, Pa Yaxögũxũ i PiripucũĀx, rü meãma nũxũ pecuèx rü yexguma noxri Machedóniããnewa nũxũ chixuxgu ga Tupanaãrũ ore, rü yexguma yéma íchaxũxũgu, rü pexicatama nixĩ ga ãmare choxna pexãxũ naxcèx ga yema ngũxẽẽ ga chauxütawa peyaxuxũ. 16 Rũ yexguma Techarónicaarü iãnewa chayexmayane, rü pema rü yéma chauxcèx penamugü ga perü ãmare na choxũ perüngũxẽẽgũxũcèx. Rũ tama nixĩ ga yexgumarĩca choxũ perüngũxẽẽxũ. 17 Rũ woo perü ãmaremaã chataãẽ, natürü yexeraãcü chataãẽ erü ngẽma choxũ na perüngũxẽẽgũxũcèx rü Tupana tá ãmare pexna naxã. 18 Rũ ñuxma rü marü choxũ nangẽxma i guxũma i tacü i chanaxwèxexũ, rü aixcũma ngẽmaãrũ yexera choxũ nangẽxma. Rũ ñuxma na Epaporudítu núma nangexũ i perü ãmare, rü taxuũma choxũ nataxu. Rũ ngẽma perü ãmare i chauxcèx núma pemuxũ, rü Tupanapẽxewa rü ñoma wüxi i pumara i yixixũrũxũ nixĩ, rü núma rü poraãcü namaã nataãẽ. 19 Rũ ngẽmacèx ya chorü Tupana rü norü ngẽmaxũgü i mexèchixũwa tá pexna nanaxã i guxũma i tacü i pexũ taxuxũ. Rũ ngẽmaãcü tá nanaxü erü Ngechuchu ya Cristuarü duũxũgü pixĩgü. 20 Rũ name nixĩ i guxũguma nũxũ ticuèxũgü ya Tanatü ya Tupana. Rũ ngẽmaãcü yĩ.

Pauru nanaguxẽẽ ga norü popera rü wenaxãrũ yema duũxũgũxũ narümoxẽ

21 Rũ chanaxwèxe i chauégagu nũxũ perümoxègü i guxũma i taeneègü i Ngechuchu ya Cristuaxũ yaxögũxũ. Rũ ngẽxgumarũũ ta pexũ narümoxègü i ngẽma taeneègü i chauxütawa ngẽxmagũxũ. 22 Rũ ngẽxgumarũũ ta pexũ narümoxègü i guxũma i taeneègü i núma Dumawa ngẽxmagũxũ. Rũ ngẽma yexera pexũ rümoxègũxũ rü ngẽma nixĩ i taeneègü i Dumaãrũ ãẽxgacü ya tacũxũ-tawa puracũxũ. 23 Rũ chanaxwèxe i tórü Cori ya Ngechuchu ya Cristu pexũ narüngũxẽẽ i guxãma i pemax. Rũ ngẽmaãcü yĩ.

Rü nuãma pexna,
Pauru

POPERA GA COROCHAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corochawa yexmagŭxŭ

1-2 Pa Chaueneēgŭ ya Corochaarŭ Īānewa Ngēxmagŭxex, choma i Pauru rü wŭxigu namaā i taeneē i Timutéu nixŭ i pexcèx tanaxŭmatŭxŭ i ñaā popera. Rü choxŭ nixŭ ga Tupana ga inamuāchixŭ na guxŭwama nüxŭ chixuchigŭxŭcèx i Ngechuchu ya Cristuarŭ ore. Rü pexcèx chanaxŭmatŭ i guxāma i pema ya chaueneēgŭ ya aixcŭma Tupanaārŭ duŭxŭgŭ ixŭgŭxe ya Cristuaxŭ yaxōgŭxe. Rü chanaxwèxe i Tanatŭ ya Tupana pexŭ narŭngŭxē na meā pegŭmaā pemaxèxŭcèx rü petaāegŭxŭcèx.

Pauru rü yema yaxōgŭxŭcèx nayumŭxē

3 Rü guxŭguma i ngēxguma pexcèx tayumŭxēgŭgu, rü moxē nüxna taxā ya Tupana ya Nanatŭ ya tŕrŭ Cori ya Ngechuchu ya Cristu. 4 Rü ngēmaācŭ tanaxŭ erŭ marŭ nüxŭ tacuāchiga na ñuxācŭ aixcŭma meā Ngechuchu ya Cristuaxŭ peyaxōgŭxŭ, rü aixcŭma nüxŭ pengechaŭgŭxŭ i guxŭma i ngēma duŭxŭgŭ i Tupanaārŭ ixŭgŭxŭ. 5 Rü nüxŭ tacuèxgŭ na ngēmaācŭ meā Tupanapēxewa pemaxèxŭ erŭ penayauxgŭchaŭ i ngēma mexŭgŭ i Tupana pexŭ namaā nguxŭxŭ i daxŭguxŭ i naānewa. Rü ñuxma rü meā ĩpenanguxē na penayauxgŭxŭcèx i ngēma mexŭgŭ yerŭ marŭ nüxŭ pexŭnŭe ga Tupanaārŭ ore i mexŭ i aixcŭma ixŭxŭ. 6 Rü ngēmatama ore i mexŭ ga pexŭtawa nguxŭ, rü guxŭwama nangu i ñuxmax. Rü guxŭwama ningŭchigŭ rü duŭxŭgŭarŭ maxŭxŭ naxŭchicŭŭ, yema perŭ maxŭxŭ na naxŭchicŭŭxŭrŭŭ ga yexguma nüxŭ pexŭnŭēgu rü nüxŭ pecuèxgŭgu na ñuxācŭ Tupana aixcŭma pexŭ na ngechaŭxŭ rü pexŭ rŭngŭxēchaŭxŭ. 7 Rü ngēma ore i mexŭ nixŭ ga pexŭ nangŭexēxŭ ga Epáparu ya tomŭcŭ ya nüxŭ tangechaŭgŭcŭ ya wŭxigu tomaā Tupanaārŭ orewa puracŭcŭ. Nŭma rü Cristuarŭ puracŭtanŭxŭ ya mecŭ nixŭ, rü nŭma nixŭ i tochicŭŭ pexŭ nangŭxēxŭ. 8 Rü nŭma ya Epáparu nixŭ i tomaā nüxŭ yaxuxŭ i pechiga na ñuxācŭ Tupanaāe i Ūnŭxŭārŭ ngŭxēmaā choxŭ pengechaŭgŭxŭ. 9 Rü ngēmacèx i toma ga noxritama pexŭ tacuāchigagu, rü taguma nüxŭ itayarŭngŭmaē na pexcèx tayumŭxēgŭxŭ. Rü guxŭguma Tupanana naxcèx tacagŭ na meā pexŭ nüxŭ nacuèxēxŭcèx i ngēma nŭma nanaxwèxexŭ na penaxŭxŭ. Rü nüxna naxcèx tacagŭ na pexna naxāxŭcèx i nagŭxŭraŭxŭ i cuèx i Naāe i Ūnŭxŭwa ne ŭxŭ. 10 Rü nüxna naxcèx tacagŭ na meā tŕrŭ Cori naxwèxexŭācŭma na pemaxèxŭcèx rü guxŭguma penaxŭxŭcèx i ngēma nŭma nanaxwèxexŭ. Rü nüxna naxcèx tacagŭ na pexŭ natauxchaxēēxŭcèx na togŭxŭ perŭngŭxēegŭxŭcèx rü guxŭ i ngunexŭgu yexeraācŭ Tupanaxŭ pecuāxŭcèx. 11 Rü nüxna naxcèx tacagŭ na norŭ pora i mexēchixŭmaā pexŭ naporaexēxŭcèx, na namaā peporaexŭcèx i guxŭma i guxchaxŭgŭ rü yaxna namaā pexŭnŭexŭcèx. 12 Rü ñuxŭchi tanaxwèxe i taāēācŭma Tanatŭ ya Tupanana moxē pexā, erŭ nŭma pexŭ nimexēegŭ na pema rü ta penayauxgŭxŭcèx i ngēma mexŭgŭ i naxŭtawa ngēxmagŭxŭ i nŭma tá nüxna naxāxŭ i ngēma duŭxŭgŭ i noxrŭ ixŭgŭxŭ. 13 Yerŭ nŭma ga Tupana rü marŭ Chatanámēxēwa tŭxŭ ĩnanguxŭxē rü Nane ya nüxŭ nangechaŭcŭmēxēwa tŭxŭ nangēxmagŭxē. 14 Rü guma Nanegagu nixŭ ga tŭxŭ namaxēxēxŭ rü tŭxŭ nüxŭ nangechaŭxŭ ga tŕrŭ pepadugŭ.

Rü yexguma pecaducèx nayuxgu ga Cristu rü Tupana nügümaã nanangüxmüëxëë ga duïxügü

¹⁵ Taguma texé Tupanaxü tadau, natürü nüma rü núma nanamu ga Nane na duïxügü nüxü daugüxücèx rü nüxü nacuèxgüxücèx na ñuxácü na yïxü i nüma ya Tupana. Rü naxüpa ga guxüma ga tacü i ñuxma ngëxmaxü, rü nüxïra marü nayexma ga Tupana Nane. ¹⁶ Rü Nanexü nixï ga namuxü ga Tupana na naxüãxücèx ga guxüma i tacü i ñuxma ngëxmaxü i daxüguxü i naãnewa rü ñoma i naãnewa, rü guxüma i ngëma nüxü idauxü rü ngëma tama nüxü idauxü. Rü yemaácü nanaxü ga guxüma ga norü orearü ngeruügü i daxüçüãxârü ãëxgacügü rü guxüma ga ngoxogüarü ãëxgacügü. Rü yemaácü nanaxü ga guxüma na nüxü yacuèxüügüxücèx. ¹⁷ Rü naxüpa i guxüma i tacü i ñuxma ngëxmaxü, rü Cristu rü marü nüxïra nayexma. Rü nagagu nixï i meã inanuxü i guxüma erü nüma nixï i namaã inacuéxü. ¹⁸ Rü nüma ya Cristu rü naëru nixï i guxüma i ngëma yaxögüxü. Rü nüma nixï ga naxüãxü rü nüxna naxããxü ga maxü. Rü nüma nixï ga nüxïra yuwa ínadauxü na guxüarü ãëxgacü yïxücèx. ¹⁹ Rü Cristu rü Tupanaxüchi nixï, yerü yemaácü nanaxwèxe ga Tupana. ²⁰ Rü Tupana rü ñoma ga naãnewa nanamu ga Cristu na curuchagu pecaducèx nayuxücèx. Rü yemaácü nixï ga Tupana nügümaã nangüxmüëxëëxü ga guxüma i ñoma i naãnewa ngëxmaxü rü guxüma i daxüguxü i naãnewa ngëxmaxü. Rü yemaácü nanaxü ga Tupana yerü yemaácü nanaxwèxe. ²¹ Rü pema ga üpa rü tama Tupanamüçügü pixïgü yerü naxchi pexaie nagagu ga perü chixexü ga naga perüxïnüexü rü pexüxü. ²² Natürü i ñuxma ya Tupana rü nügümaã pexü narüngüxmüëxëë na namüçügü i mexü pixïgüxücèx. Rü yemaácü nanaxü ga Tupana ga yexguma Cristu duïxüxü ixïxgu rü curuchawa ngúxü yangexgu rü yexma nayuxgu. Rü yemaácü naya ga Cristu na nügüxütawa pexü nagagüxücèx rü napëxewa pimexücèx rü nataxuxücèx i perü chixexü. ²³ Natürü ngëma na pengugüxücèx, rü penaxwèxe na guxüguma mea peyaxögüxü rü meã naga pexïnüexü rü taguma nüxü perüxoexü i ngëma norü ore i mexü ga marü nüxü pexïnüexü. Rü ngematama ore nixï i ñuxma nüxü yaxugüexü i gúxü i naanewa.

Tupana rü Pauruxü namu na guxüma ga yaxögüxüxü nangüxëëxücèx

²⁴ Rü ñuxma na woo pexcèx ngúxü chingexü rü chataãë erü nüxü chacuèx rü ñaã chaxunemaã choma rü ta chayanguxëë ga yema ngúxü ga Cristu ingexü naxcèx i norü duïxügü i yaxögüxü. ²⁵ Rü ñuxma ya Tupana rü choxü namu na nüxü charüngüxëëxücèx i guxüma i ngëma norü duïxügü i yaxögüxü. Rü perü mexücèx nixï i choxü namuxü na guxüwama meã nüxü chixuxücèx i norü ore. ²⁶⁻²⁷ Rü ngëma Tupanaarü ore rü ñanagürü: “Rü Cristu rü pewa nangëxma i ñuxmax, rü nagaguxicatama nixï i pexü nangëxmaxü i pechica i daxüguxü i naãnewa i ngextá ínamexëchixüwa”, ñanagürü. Rü yema nuxcümaügüxü ga duïxügü rü tama nüxü nacuèxgü ga yemachiga, natürü ñuxma ya Tupana rü norü duïxügüxü nüxü nacuèxëë. Erü nüma ya Tupana rü norü duïxügüxü nüxü nadauxëëchaü na ñuxácü poraácü pexü nangechaüxü rü pexü nangüxëëxü i guxäma i pema i tama Yudíugü ixïgüxe. Rü ñuxma i pema na woo tama Yudíugü pixïgüxü, natürü pema rü ta pexü nangëxma i pechica i daxüguxü i naãnewa erü Cristuaxü peyaxögü. ²⁸ Rü ñuxma i toma rü Cristuchigaxü nixï i tixuxü. Rü ngëma ore i Tupanaarü cuèx nawa ngëxmaxümaã nixï i guxüma i duïxügüxü tixucuxëgüxü rü tanangüxëëxü na ngëmaácü ngearü chixexüãxü Cristuxütawa tagagüxü. ²⁹ Rü ngëmatama puracü nixï i nawa poraãcüxüchima chapuracüamaxü woo tacü rü guxchaxü chauxcèx ínguxgu. Rü

guxŭma i ngēma pora i Cristu choxna āxŭ i chowa ngēxmaxŭ nixī i choxŭ poraxēēxŭ na chanaxŭamaxŭcèx i ngēma puracŭ.

2

¹ Pa Chaueneēgŭx, chanaxwèxe i nŭxŭ pecuèx na ñuxācŭ poraācŭ pexcèx chapuracŭxŭ. Rŭ ngēxgumarŭŭ ta chanaxwèxe i nŭxŭ pecuèx na ñuxācŭ poraācŭ chapuracŭxŭ naxcèx i ngēma taeneēgŭ i Laodichéaarŭ ĩānewa ngēxmagŭxŭ rŭ guxŭma i petanŭxŭgŭ i taguma choxŭ daugŭxŭ. ² Rŭ ngēmaācŭ poraācŭxŭchima chapuracŭ na nŭxŭ rŭ ta chanangŭchaŭxēēxŭcèx. Erŭ chanaxwèxe i guxŭma aixcŭma nŭgŭ nangechaŭgŭ rŭ nŭxŭ nangēxma i ngēma mexŭ i cuèx i aixcŭma ixŭxŭ. Rŭ ngēmaācŭ tá meāma nŭxŭ nacuèxgŭ ga yema noxri Tupanaxīcatama nŭxŭ cuáxŭ. Rŭ yima rŭ Cristutama nixī. ³ Rŭ nŭma nixī i nŭxŭ nangēxmaxŭ i guxŭma i cuèx i aixcŭma mexŭ. Rŭ nŭma nixī i taxcèx nangoxēēāxŭ i Tupanachiga. ⁴ Rŭ pemaā nŭxŭ chixu i ngēma ore erŭ tama chanaxwèxe na texé pexŭ womŭxēēgŭxŭ namaā i ŭacŭ rŭ ore i chixexŭwa pexŭ gagŭxŭ. ⁵ Rŭ woo na tama ngēma petanŭwa changēxmaxŭ, natŭrŭ chauāēwa rŭ poraācŭ pegu charŭxŭnŭ. Rŭ wŭxi i chorŭ taāē nixī na nŭxŭ chacuáxŭ na ñuxācŭ meā pegŭ ipinuxŭ na meā pegŭmaā ipecuáxŭcèx rŭ ñuxācŭ tama nŭxŭ perŭxoexŭ na Cristuaxŭ peyaxŭgŭxŭ.

Ñuxma na Cristuarŭ ixŭgŭxŭ rŭ ngexwacaxŭxŭ i maxŭ tŭxŭ nangēxma

⁶ Rŭ pema ga noxri rŭ meāma tŭrŭ Cori ya Ngechuchu ya Cristuxŭ peyaxŭgŭ. Rŭ ñuxma rŭ yema noxri meāma na penayauxgŭxŭrŭrŭ rŭ name nixī i guxŭguma nŭxna penaxā i perŭ maxŭ na nŭma pexŭ namaā inacuáxŭcèx. ⁷ Rŭ wŭxi i nanetŭ nanaxwèxe i ñaxchŭmèxā na nataixŭcèx rŭ na namaxŭxŭcèx. Rŭ ngēxgumarŭŭ ta i pema rŭ penaxwèxe na meā Cristuna peyaxŭxŭgŭxŭ na meā nawa piyaetanŭxŭcèx rŭ meā naxcèx pemaxēxŭcèx rŭ meā nŭxŭ peyaxŭgŭamaxŭcèx yema noxri Epáparu pexŭ ngúexēēgurŭŭ. Rŭ name nixī i guxŭguma Tupanana moxē pexā. ⁸⁻⁹ Rŭ naxcèx pexuāēgŭ i ngēma duŭxŭgŭ i pexŭ womŭxēēgŭchaŭxŭ! Rŭ tama name i nŭxŭ iperŭxŭnŭē i ngēma norŭ ore i tama aixcŭma ixŭxŭ rŭ taxuwama mexŭ. Erŭ ngēma duŭxŭgŭ rŭ pexŭ nangúexēēchaŭ na nagu pexŭxŭcèx i ngēma nacŭmagŭ ga nuxcŭmaŭgŭxŭ ga duŭxŭgŭ nagu ĩxŭ. Rŭ ñoma i naāneārŭ nguxēētaegŭ nixī i inaxŭnŭēxŭ. Rŭ tama aixcŭma Cristuchiga nixī i ngēma pexŭ nangúexēēxŭ. Rŭ name nixī i nŭxna pixŭgachi i guxŭma i ngēma nguxēētaerŭgŭ i chixexŭgŭ rŭ Cristuwe perŭxŭ. Erŭ Cristu rŭ Tupanaxŭchi nixī rŭ guxŭma i Tupanaārŭ pora rŭ Cristuwa nangēxma. ¹⁰ Rŭ ñuxmax, rŭ Tupanaārŭ maxŭ rŭ norŭ pora rŭ aixcŭma pewa nangēxma erŭ namēxwa pengēxmagŭ ya Cristu ya namaā icuáacŭ i guxŭma i daxŭcŭāxārŭ āēxgacŭgŭ rŭ guxŭma i ngoxogŭarŭ āēxgacŭgŭ. ¹¹ Rŭ ngēma Yudŭgŭ rŭ nŭgŭ ĩnawiechèxmŭpēxechiraŭgŭ na Tupanapēxewa yamexŭcèx. Natŭrŭ ngēxguma Cristuaxŭ yaxŭgŭgŭ rŭ tama ngēmaācŭ tamaā nanaxŭ ya Cristu na imexŭcèx. Erŭ nŭma ya Cristu rŭ tŭrŭ maxŭwa napuracŭ rŭ tŭxŭ ĩnanguxŭxēē nawa i taxŭneārŭ ngúchaŭgŭ. Rŭ ngēmaācŭ nixī i tŭxŭ yamexēēxŭ na Tupanapēxewa imexŭcèx. ¹² Rŭ yexguma ípebaiŭgŭ, rŭ Cristu na itáxŭrŭŭ yexma natèx ga yema nuxcŭmaŭxŭ ga perŭ maxŭ. Rŭ yema Cristu na írŭdaxŭrŭŭ rŭ pema rŭ ta penayaxu i maxŭ i ngexwacaxŭxŭ, yerŭ peyaxŭgŭ na Tupana norŭ poramaā Cristuxŭ írŭdaxēēxŭ. ¹³ Rŭ ŭpa ga pema rŭ tama aixcŭma pexŭ nayexma ga maxŭ i taguma gŭxŭ yerŭ pepecaduāxgŭ rŭ pexeneārŭ ngúchaŭ pexŭgŭ. Natŭrŭ i ñuxma rŭ Cristuxŭ namaxēēxŭrŭŭ pexŭ namaxēēē ya Tupana erŭ Cristuarŭ duŭxŭgŭ pixŭgŭ. Rŭ Tupana rŭ marŭ Cristugagu tŭxŭ nŭxŭ nangechaŭ ga guxŭma ga tŭrŭ pepadugŭ. ¹⁴ Rŭ noxri rŭ tachixe yerŭ tama aixcŭma

naga taxīnūē ga yema mugū ga Moīché tūxna āxū, rü tórü pecadugū rü yuwa tūxū nagagū. Natürü ga Cristu rü curuchagu tórü pecaducèx nayu, rü yemaãcū Tupana tūxū nayangutanūxēē ga yema tórü pecadugū. ¹⁵ Rü yexguma curuchagu nayuxgu ga Cristu, rü yexguma nixī ga Chatanáxū naporamaēxū ga Tupana. Rü yexguma nixī ga guxū ga duūxūgūpēxewa Chatanáxū naxānexēēxū ñoma wūxi i churaragüarü āēxgacū i norü uwanü i nüxū naporamaēxūxū naxānexēēxürüü.

Name nixī i naxcèx tadaugū i ngēma mexūgū i daxūguxū i nañewa ngēxmagūxū

¹⁶ Rü ñuxma rü taxucèxma tūxcūü pexū nixu i ngēma Yudíugū ega woo tama naxrūü penaxūxgux. Nūmagū rü ñuxre i ònagūxicatama nangōxgū, rü ñuxre i axeūxīcatama nixaxgū, rü ñuxre i petaarü ngunexūgū naxauregū na ngēmaãcū Tupanaxū yacuèxūügūxūcèx. Rü nangēxma i norü peta i gucū ya taunecūgu Tupanacèx naxauregūxū rü togū i petagū i gucū ya tauemacūgu naxauregūxū. Rü nüxū nangēxma i nacūmagū na ñuxācū ngūxchigaarü ngunexūgū naxauregūxū. ¹⁷ Rü aixcūma yema nuxcūmaūgūxū ga Yudíugū rü nanaxauregū ga yema nacūmagū yerü ga Cristu rü tauta ínangu ga yexguma. Natürü i ñuxma rü marü ínangu ya Cristu rü tórü pecaducèx nayu. Rü ñuxma rü name nixī na naga ixīnūēxū rü tama nagu ixīxū i ngēma nuxcūmaūgūxū i nacūmagū. ¹⁸ ;Rü tāūtáma naga pexīnūē i ngēma duūxūgū i nüxū ixugūxū na ipeyarütauxexū ega tama daxūcūāx i orearü ngeruūgūxū picuèxūügūgu! Nūmagū rü tama nūgū nicuèxūügūneta rü nūgū nixugū na yangoxetūgūxū. Rü noxrütama cuèxmaāmare nūgū nicuèxūügū. ¹⁹ Natürü i nūmagū rü tama aixcūma naga naxīnūē ya yima taeru ixīcū ya Cristu ya tūxū poraexēēcū rü tūxū iyaetanūxēēcū i tórü òwa i guxāma i yixema i norü duūxūgū ixīgūxe. Rü nūma ya Cristu nixī i wūxigu tūxū naxīnūēxēēxū i wūxichigū i yixema ngēma Tupana naxwèxexürüü. ²⁰ Rü yexguma nayuxgu ga Cristu rü yexma nayu ga nuxcūmaūxū ga perü maxū, rü yexma nayarūxo ga guxūma ga nuxcūmaūgūxū ga pecūmagū i ñoma i nañecūāx i duūxūgū nagu rüxīnūēxū. Rü ngēmacèx i ñuxmax ;rü tūxcūü nixī i ñoma i nañecūāx maxēxürüü nagu pemaxēxū i pemax, rü tūxcūü nixī i ngēma Yudíugūcūmagu pexīxū? ²¹ Rü nūmagū i Yudíugū rü nüxū nixugūe rü ñanagürügū:

“Tama name i nüxū quingōgū i ngēã, rü tama name i cunangōx i yea, rü tama name i cunayaxu i ngēma”, ñanagürügū. ²² Natürü guxūma i ngēma nacūmagū rü paxa tá inayarūxo erü duūxūgūarü nixīgū. Rü ngēma pexū namuxū rü duūxūgūarü mugūmare nixī. Rü ngēma pexū nangúexēēxū rü duūxūgūarü nguxēētaemare nixī. ²³ Rü guxūma i ngēma pexū namuxū rü pexcèx namexcüraxū erü pexū naxucuxēgū na tacū pexauregūxūcèx, rü tama pegū picuèxūügūxūcèx, rü meã pexenemaã ipecuèxgūxūcèx. Natürü guxūma i ngēma mugū rü tama aixcūma pexū narūngūxēē na nüxū perūxoexūcèx i pexeneärü ngúchaūgū.

3

¹ Rü ñuxma i pemax, rü Cristu wena maxūxürüü rü pexū nangēxma i maxū i ngexwacaxūxū. Rü ngēmacèx name nixī i naxcèx pedau i ngēma mexūgū i daxūguxū i nañewa ngēxmaxū i ngextá Cristu rü Tupanaärü tūgūnecūwawa írütōxūwa rü namaã āēxgacū íyīxūwa. ² Rü name nixī i guxūguma nagu perūxīnūē i ngēma daxūguxū i nañewa ngēxmaxū i ngemaxūgū rü tama i ngēma ñoma i nañewa ngēxmaxū. ³ Yerü yexguma nayuxgu ga Cristu rü yexma nayu ta ga nuxcūmaūxū ga perü maxū. Rü ñuxma rü pexū nangēxma i perü maxū i ngexwacaxūxū erü Cristutanūxū pixīgū rü Tupanamēxēwa

pengēxmagü. ⁴ Rū nūmatama ya Cristu nixī i pexū namaxēxēēxū. Rū ngēxguma wena nūma nangoxgu, rū namaã tá pengóe, rū naxrūū tá pimexēchi.

Marü nüxū tarüxo i nuxcūmaïxū i tacüma i chixexüğü rü tanayaxu i ngexwacaxüxü i tórü maxü

⁵ Rū ñuxma rü name nixī i nüxū perüxoe i guxūma i ñoma i naãneärü chixexü i pewa ngēxmaxü. Rū tama name i pemēxna naī i ngemaã pemaxē, rū tama name i petena naī ya yatūmaã pemaxē. Rū tama name i penaxü i pexeneärü ngúchaü rü bai i nagu perüxīnūēmare. Rū tama name i pexū nangúchaü i tacü rü to i chixexüğü. Rū tama name i pegünaxīcatama penanuxuchigüchaü i guxūma i ngēmaxüğü, erü yixema ngēma nacüma tuxü ngēxmaxē rü düxwa namaã tatupanaãx. ⁶ Rū guxūma i ngēma chixexüğücèx tá nixī i Tupana napoxcuexü i ngēma duüxüğü i ngēmaãcü maxēxü rü tama naga ñnüēchaüxü. ⁷ Rū pema ga üpa rü penaxü ga yema chixexüğü, rü yemaãcü pemaxē. ⁸ Natürü i ñuxma rü name nixī i nüxū perüxoe i guxūma i ngēma na pegüchi pexaïexü, rü pegümaã penuēxü, rü chixri pemaxēxü, rü pegümaã peguxchigagüxü, rü guxūma i ngēma chixexü i dexa i nüxü pixuxü. ⁹ Rū tama name i pegümaã pidorae, erü marü ipenatèx ga nuxcūmaïxü ga pecüma rü guxūma ga yema chixexüğü ga üpa pexüğüxü. ¹⁰ Rū ñuxma rü marü penayaxu i ngexwacaxüxü i perü maxü rü ngexwacaxüxü i duüxüğü pixüğü. Rū guxü i ngunexügu rü Tupana pexü ningexwacaxüxēēchigü na yexeraãcü pimexüçèx naxrūū rü yexeraãcü nüxü na pecuèxgüxüçèx ya Tanatü ya Tupana ya maxü tuxna ãcü. ¹¹ Rū ñuxma rü Tupanacèx rü nüetama nixī ega Yudü quixügu rü ēxna tama. Rū nüetama nixī ega ícuwiechèx-müpèxechiraügu rü ēxna tama. Rū nüetama nixī ega tacü rü nachüñanecüãx i duüxü quixügu, rü ēxna tacü rü duüxü quixügu. Rū nüetama nixī ega wüxi i coriarü duüxü quixügu, rü ēxna taxúxearüma duüxü quixügu. Erü ñuxma rü ngēma guxüärü yexera aixcüma tuxü mexü nixī na Cristu rü guxüärü ãëxgacü yïxü rü guxāwama nangēxmaxü. ¹² Rū ñuxma ya Tupana rü pexü nangechaü i pema rü pexü nadei na noxrü pixüğüxüçèx. Rū ngēmacèx name nixī i guxüguma pexü nangechaütümüüğü i togü, rü namaã pemecümagü, rü tauxchaãcüma nüxna penaxã, rü taguma napèxewa pegü picuèxüxüğü. Rū ngēxguma woo tacü pemaã naxüxgux rü name nixī i yaxna namaã pexīnūē. ¹³ Rū name nixī i wüxichigü i pema na pegümaã yaxna pexīnūēxü. Rū ngēxguma chi texé tacü pemaã üxgux, rü name nixī i pegüxü nüxü pengechaüğü i ngēma. Rū yexgumarüü ga tórü Cori na pexü nüxü ngechaüxürrüü, rü name nixī i togüaxü nüxü pengechaüğü. ¹⁴ Rū guxüärü yexera mexü nixī na pegü pengechaüğüxü. Erü ngēxguma aixcüma pegü pengechaüğügu rü aixcüma wüxigu tá perüxīnūē, rü meã pegümaã tá pemaxē. ¹⁵ Rū name nixī na pemaã inacuáxü i ngēma taãe i Cristu pexna äxü na ngēmaãcü aixcüma pegü pengechaüğüxüçèx. Yerü yemacèx nixī ga Tupana pexü dexü na wüxitama i duüxüğü pixüğüxüçèx rü meã wüxigu perüxīnūēxüçèx. Rū name nixī i moxē nüxna pexägü ya Tupana. ¹⁶ Rū name nixī i guxüguma peãewa nangēxma i Cristuarü ore rü taãeãcüma naga pexīnūē. Rū name nixī i meã peãexü pecuáãcüma namaã pegü pengüxèē rü pegü pixucüxègü na ngēmaãcü pegüaxü penangúchaüxèēxüçèx. Rū name nixī i aixcüma Tupanana moxē pexägüãcüma nagu pewiyaegü i nagüxüraüxü i norü wiyaegü. ¹⁷ Rū guxūma i ngēma pexüxü rü nüxü pixuxü rü name nixī i tórü Cori ya Ngechuchuégagu penaxü. Rū name nixī i ngēmaãcü Ngechuchuégagu Tanatü ya Tupanana moxē pexägü.

Tupana nanaxwèxe na meã namaxēxü i duüxüğü i Cristuaxü yaxögüxü

18 Pa Ngexūgū i Ātegūxūx, rü name nixī i petega pexīnūē. Erü woetama ngēma nixī i mexū na penaxūxū erü tórü Cori ya Cristuarü duūxūgū pixīgū. 19 Pa Yatūgū i Āmaxgūxūx, rü name nixī i ngīxū pengechaūgū i pemèxgū. Rü tama name na ngīmaā pechixecūmagūxū. 20 Pa Buxūgūx, rü name nixī i guxūwama penatū rü peega pexīnūē, erü ngēma nixī i namaā nataāēxū ya tórü Cori. 21 Pa Papágūx, rü tama name i penanuēxēē i pexacūgū. Erü ngēxguma ngēmaācū penaxūxgux rü ngürūāchi tá nüxū nawèxtümū i ngēma namaā nüxū pixuxū. 22 Pa Duūxūgūx i Ixāārü Coriāxgūxūx, rü name nixī i guxūwama naga pexīnūē i perü corigū i ñoma i naānewa pemaā icuèxgūxū. Rü tama name i pexū nadaugūguxicatama meā pepuracūe na ngēmaācū penataāēxēxūcèx. Natürü name nixī i mexū i perü ngúchaūmaā guxūguma meā pepuracūe erü tórü Corixū pemuūē. 23 Rü guxūma i ngēma perü puracū i pexūxūwa rü name nixī i perü ngúchaūmaā penaxū ñoma tórü Cori ya Cristuaxū pepuracūexürü rü tama i duūxūgūaxū. 24 Rü marü nüxū pecuèx rü daxūguxū i naānewa rü tórü Cori ya Cristu tá pexna nanaxā i perü āmare i maxū i taguma gūxū. Erü yima Cristu ya aixcūma perü Cori ixīcūaxū nixī i pepuracūexū. 25 Natürü yīxema chixexū üxe rü tá ta tanayaxu i tümaārü natanü naxcèx i ngēma chixexū i taxūxū, rü aixcūma Tupana tá tüxū napoxcu. Erü Tupanapēxewa rü guxūma i duūxūgū rü nawūxigu, rü taxucūruwama texé Tupanachèxwa tiña ega chixexū taxūxgux.

4

1 Rü pemax, Pa Corigūx, rü name nixī i perü duūxūgūmaā pemecūmagūxū, rü tama penawomūxēēxū. ¡Rü nüxna pecuèxāchie na pema rü ta pexū nangēxmaxū ya perü Cori ya daxūgucū! 2 ¡Rü guxūguma peyumūxēgū, rü pexuāēgū na tama chixexūgu peyixūcèx! ¡Rü Tupanana moxē pexāgū! 3 ¡Rü toxçèx rü ta peyumūxēgū na Tupana toxū natauxchaxēēxūcèx na nüxū tixuxūcèx i norü ore i mexū, rü meāma duūxūgūmaā nüxū tixuxūcèx i ngēma ore ga noxri tama nüxū nacuèxgūxū i Cristuchiga! Rü ngēma orecèx nixī i ñuxma ichapoxcuxū. 4 Rü chanaxwèxe i chauxcèx peyumūxēgū na meā duūxūgūcèx chanangoxēēxū i ngēma ore, erü ngēma nixī i mexū na chanaxūxū. 5 ¡Rü meā pemaxē napēxewa i ngēma duūxūgū i tama yaxōgūxū! ¡Rü ñuxma na pexū natauxchaxū, rü yoxni paxa penaxūx i Tupanaārü puracū! ¡Rü taxū i perüchomarexū! 6 Rü ngexguma togū i duūxūgūmaā pidexagūgu, rü name nixī i penataāēxēē namaā i ngema dexe i namaā nüxū pixuxū. ¡Rü ngemaācū mea penangaxū i ngema pexna cèxū nachiga i perü ò!.

Pauru nanaguxēē ga norü popera rü wenaxārü yema duūxūgūxū narūmoxē

7 Rü nüma ya taeneē ya Tíquicu ya nüxū ingechaūgūcū rü aixcūma choxū narūngūxēē rü wūxigu chomaā Cori ya Tupanacèx napuracū. Rü nüma tá pemaā nüxū nixu i chauchiga. 8 Rü ñuxma rü petanūwa chanamu na pexū nataāēxēēxūcèx rü pemaā nüxū yaxuxūcèx na ñuxācū toxū nangupetūxū i tomax. 9 Rü Tíquicumaā petanūwa chanamu i Onéchimu ya taeneē ya nüxū ingechaūgūcū ya aixcūma meā Tupanaārü puracū ücū. Rü nüma rü petanūxū nixī. Rü nümagū tá nixī i pemaā nüxū yaxugūxū na tacū ngupetūxū i núma. 10 Rü pexū narūmoxē i Aritácu i wūxigu chomaā poxcuxū. Rü ngēxgumarūū ta pexū narūmoxē i Marcu i Bernabéeneē ixīxū. Rü marü pemaā nüxū chixu i Marcuchiga na meā penayauxgūxūcèx i ngēxguma petanūwa nanguxgu. 11 Rü ngēxgumarūū ta pexū narūmoxē ya taeneē ya Ngechuchu ya Ixaixcūmacūgu āegacū. Rü ngēma tomaēxpūx i yatūgū rü ngēxīcatama nixī i Yudíugū i yaxōgūxū i wūxigu chomaā puracūexū i Tupanaārü puracūwa. Rü nümagū rü poraacū choxū nataāēxēēgū. 12 Rü ngēxgumarūū ta pexū narūmoxē i Epáparu.

Rü nüma rü petanüxŭ nixĩ, rü aixcŭma nanaxü i Cristuarü puracü. Rü nüma rü norü yumüxēwa rü guxŭguma Tupanaxŭ nacèxŭ pexcèx na aixcŭma meã pemaxèxŭcèx rü peyaxŭgŭamaxŭcèx rü aixcŭma penaxŭxŭcèx i ngēma Tupana naxwèxexŭ. ¹³ Rü choma rü marü nüxŭ chadau rü pemaã nüxŭ chixu i ñuxãcŭ Epáparu poraãcŭ pexcèx napuracü rü naxcèx napuracü i ngēma taeneëgŭ i Laodichéaarü ñãnewa rü Iráporiarü ñãnewa ngëxmagŭxŭ. ¹⁴ Rü Luca ya duturu ixĩcŭ ya nüxŭ ingechaŭgŭcŭ, rü pexŭ narümoxē. Rü ngëxgumarüŭ ta pexŭ narümoxē i Dema. ¹⁵ ¡Rü chauégagu nüxŭ perümoxëgŭ i taeneëgŭ i Laodichéawa ngëxmagŭxŭ! ¡Rü ngëxgumarüŭ ta nüxŭ perümoxëgŭ i Nifa rü guxŭma i taeneëgŭ i yaxŭgŭxŭ i napatawa ngutaquëxegŭxŭ! ¹⁶ Rü ngëxguma marü nüxŭ pedaumatŭguwena i ñãã popera, rü chanaxwèxe i Laodichéawa penamu na ngemacŭĀx i taeneëgŭ rü ta nüxŭ nadaumatŭgŭxŭcèx. Rü ngëxgumarüŭ ta i ngēma popera i Laodichéawa chamuxŭ, rü ngëxguma pexŭtawana nanguxgu rü chanaxwèxe i nüxŭ pedaumatŭgŭ. ¹⁷ Rü chanaxwèxe i Ariqueípumaã nüxŭ pixu, rü ñapegŭgŭ nüxŭ:

“¡Rü meã napuracü rü yanguxēē i ngēma puracü i tórü Cori cuxna ãxŭ!” ñapegŭgŭ nüxŭ. ¹⁸ Choma i Pauru rü choxmëxmaãtama pexcèx chanaxŭmatŭ i ñãã chorü moxē. ¡Rü nüxna pecuèxãchie na chapoxcuxŭ! Rü chanaxwèxe i Tupana pexŭ narüngŭxēē.

Rü nuãma pexna,
Pauru

NÜXĪRAÜXÜ GA POPERA GA TECHARÓNICAWA YEXMAGÜXÜ GA YAXŌGÜXÜTANÜWA NAMUXÜ GA PAURU

Pauru rü nüxü narümoxē ga yema yaxōgüxü ga Techarónicawa yexmagüxü

¹ Pa Toeneēgü i Techarónicawa Ngēxmagüxü i Tanatü ya Tupana rü Tórü Cori ya Ngechuchu ya Cristuarü Duüxügü Ixīgüxü, choma i Pauru rü namaã i taeneē i Chiribánu rü Timutéu nixī i pexcèx tanaxümatüxü i ñaã popera. Rü tanaxwēxe i Tanatü ya Tupana rü tórü Cori ya Ngechuchu ya Cristu pexü narüngüxēē rü pexü nataãēxēē.

Meãma nayaxōgü ga yema Techarónicawa yexmagüxü rü yemaãcü wüxi ga cuèxruü ga mexü nixīgü

² Rü torü yumüxēwa rü guxüguma pexna tacuèxāchigü, rü pexcèx Tupanana moxē taxā. ³ Rü guxüguma i ngēxguma Tanatü ya Tupanamaã tidexagügu, rü taguma nüxü itayarüngümaē na ñuxācü meã peyaxōgüācüma penaxüxü i Tupanaärü puracü, rü ñuxācü nüxü pengechaügüācüma togüxü perüngüxēēxü. Rü taguma nüxü itayarüngümaē na ñuxācü aixcüma meã ípenangüxēēxü ya tórü Cori ya Ngechuchu ya Cristu rü ngēmacèx yaxna namaã pexīnüē i ngēma ngüxü i ñuxma pingexü. ⁴ Pa Chaueneēgüx, Tupana pexü nangechaü, rü nüxü tacuèx rü nümatama nixī ga pexü nadexü. ⁵ Rü yexguma pemaã nüxü tixuxgu ga Tupanaärü ore i tüxü maxēxēēxü, rü tama toechama tidexagümare, yerü Tupanaãē i Üünexü toxü narüngüxēē na norü poramaã pemaã nüxü tixuxü. Rü meã nüxü tacuáäcüma pemaã nüxü tixu ga yema ore yerü toðewatama nüxü tacuèx na aixcüma yiixü. Rü pematama nüxü pecuèx ga ñuxācü meã pepēxewa na tamaxēxü ga yexguma na yemaãcü pexü tarüngüxēēgüxüçèx. ⁶ Rü pema rü meãma penaxügü ga yema pexü tangüxēēxü rü yema tüxü nangüxēēxü ga tórü Cori ya Ngechuchu. Rü Tupanaãē i Üünexü pexü taãēxēēäcüma penayauxgü ga yema ore ga woo yemacèx poraäcü ngüxü na pingegüxü. ⁷ Rü yemaãcü ga pema rü wüxi ga cuèxruü ga mexü pixīgü naxcèx ga guxüma ga yema yaxōgüxü ga Machedóniãñewa rü Acayaanewa yexmagüxü. ⁸ Rü yema na peyaxōgüxügagu rü tórü Cori ya Ngechuchuarü ore rü guxüwama ninguchigü. Rü ngēmacèx i ñuxma rü Machedóniãñewa rü Acayaanewa rü guxüwama nüxü nacuèxgü na ñuxācü meã Tupanaãxü peyaxōgüxü. Rü ngēmacèx marü taxucèxma tüxcüü i toma rü namaã nüxü tixu i ngēma ore i mexü i pechiga. ⁹ Erü nümagütama i ngēma duüxügü rü marü nüxü nixugügü ga ñuxācü ga pema rü meã toxü na peyauxgüxü ga yexguma petanüwa taxīxgu. Rü nüxü nixugügü ta ga ñuxācü nüxü na perüxoexü ga perü tupananetachicünèxägü na Tupanaxüchi ya maxücü rü ixaixcümacüwe perüixüçèx rü nüxü pepuracüexüçèx. ¹⁰ Rü nüxü nixugügü ta na ñuxācü aixcüma ípenangüxēēxü na wenaxärü daxüwa ne naxüxü ya Ngechuchu ya Tupana Nane ga yuwa ínadaxēēäcü. Rü yima Ngechuchu nixī ya tüxü íngüxüxēēcü nüxna i ngēma poxcu i äücümaxü tá íngüxü.

2

Pauruarü puracü ga Techarónicawa

¹ Pa Chaueneēgūx, rü pematama nüxū pecuèx rü tama natüçèxmamare nixī na pexūtawa taxīxū. ² Rü pema nüxū pecuèx rü naxūpa ga pexūtawa na tangugūxū rü chixri tomaã nachopetü ga Pirípucūāxgū rü tomaã naguxchigagū. Natürü Tupana toxū narüngūxēē na pemaã nüxū tixuxūcèx ga norü ore i tüxū maxēxēēxū. Rü yemacèx tama tamuñēācūma pemaã nüxū tixu ga yema ore woo ga torü uwanügü rü poraācū toxū na naguxchaxēēgūāxū. ³ Rü yexguma pemaã nüxū tixuxgu ga yema ore, rü tama ítatüēācūma pemaã nüxū tixu. Rü tama chixexū pemaã taxügüchañācūma rü tama pexū tawomüxēēgüchañācūma pemaã nüxū tixu ga yema ore. ⁴ Yerü Tupana nixī ga toxū unetacü rü toxū mucü na pemaã nüxū tixuxūcèx ga norü ore i mexū i tüxū maxēxēēxū. Rü yemacèx Tupana naxwèxexñācūma pemaã nüxū tixu ga yema ore. Rü tama duñxügüxūmare na tataāxēēgüxūcèx pemaã nüxū tixu, natürü nüxū tixu na Tupanaxū tataāxēēgüxūcèx. Rü nūma ya Tupana nixī i tüxū nacuáxū rü tüxū nadauxū rü nangugūāxū i ngēma nagu rüxñüēxū. ⁵ Rü pema nüxū pecuèx rü taguma pepēxewa pexū tixuēxūñgü na toga pexñüēxūcèx, rü taguma pexū tawomüxēēgü na ngīxū tayauxgüxūcèx ga perü dīeru. Rü Tupana nixī ya toxū daucü na taguma yemaācū na tanaxūxū. ⁶ Rü taguma naxcèx tadaugü na duñxügü toxū icuèxūñgüxūcèx, rü woo i pema rü bai i togü i duñxügü. ⁷ Rü woo Cristutama toxū namu na yaxōgüxūñarü āēxgacügü na tixīgüxū natürü tama ñoma wüxi ga āēxgacürüñ pepewa tixīgü. Natürü meāmāre pemaã itacuèx, ñoma wüxi i mamá i ngīxācügüna meā dèuxcürüñ pemaã tixīgü. ⁸ Rü poraācū pexū tangechañ, rü yemacèx pemaã nüxū tixu ga Tupanaärü ore. Rü tama yemaxicatama pexna taxāxchañ ga yexguma. Natürü marü ítamemare ta ga pexcèx na tayuexū, yerü poraācū pexū tangechañgü. ⁹ Pa Chaueneēgūx, pema nüxū pecuèx ga ñuxācū poraācū na tapuracüexū na torü ñnacèx tataxegüxūcèx. Rü nguncü rü woo chütacü tapuracüe na taxúeaxūma wüxi ga guxchaxū tixīgüxūcèx ga yexguma petanūwa tayexmagügu rü pemaã nüxū tixuxgu ga Tupanaärü ore. ¹⁰ Pa Duñxügü i Tupanaāxū Yaxōgüxū, pema nixī ga toxū pedaugüxū rü Tupana rü ta toxū nadau ga ñuxācū meā na tamaxēxū ga petanūwa, rü ñuxācū taxuñma ga chixexū na taxūxū ga yexguma. ¹¹ Rü pema nüxū pecuèx ta ga ñuxācū pexū na tanangüchañxēēxū. Rü yexguma pengechañgügu, rü pexū tataāxēēgü ñoma wüxi i papá i naxācügüxū taāxēēgüxūñrūñ. ¹² Rü ñuxma na Tupanaärü pixīgüxū, rü pexū taxucuxēgü na meā naxcèx pemaxēxū. Rü nūma nixī i pexcèx nangemaxū na ngextá āēxgacü íyīññwa pengugüxūcèx na ngēma mexūwa pengēxmagüxūcèx. ¹³ Rü ngēmacèx guxüguma pexcèx Tupanana moxē taxā, yerü yexguma noxri nüxū pexñüēgu ga yema norü ore ga pemaã nüxū tixuxū, rü meā penayauxgü, yerü nüxū pecuèxgü rü aixcūma Tupanaärü ore nixī rü tama duñxügüarü oremare nixī. Rü yema ore nixī ga naxüchicüñxū ga perü maxū ga yexguma peyaxōgügu. ¹⁴ Pa Chaueneēgūx, nüxū tacuèx na ñuxācū ngüxū pingegüxū yerü petanüxügütama pexchi naxaie rü chixri pemaã nachopetü. Natürü yemaācütama nüxū nangupetü ga Tupanaärü duñxügü ga Ngechuchu ya Cristuaxū yaxōgüxū ga Yudéanewa yexmagüxū. Yerü natanüxügütama ga Yudíugü rü chixri namaã nachopetü. ¹⁵ Rü yema Yudíugü nixī ga tórü Cori ga Ngechuchuxū imèxgüxū, yexgumarüñ ga norü oxigü rü nuxcūmañgüxū ga Tupanaärü orearü uruñgüxū na nadèixñrūñ. Rü yema Yudíugü nixī ga towe ingèxñtanüxū. Rü Tupanamaã rü guxū i duñxügümaã narüxuanügü. ¹⁶ Rü ngēxguma ngēma duñxügü i tama Yudíugü ixīgüxūmaã nüxū tixuxchañgu i Tupanaärü ore na nūmagü rü ta nüxū nangēxmagüxūcèx i maxū, rü ngēma Yudíugü rü toxna nanachuxu. Rü ngēmaācū i ngēma Yudíugü rü poraācūñchima chixexū naxügü. Rü

ngēmacèx i ñuxma rü düxwa marü nüxna nangu i ngēma Tupanaärü poxcu i äücümäxüchixü.

Pauru rü nüxü nangüchaü na wenaxärü natanüwa naxüxü ga yema yaxögüxü ga Techarónicawa

yexmagüxü

¹⁷ Pa Chaueneëgüx, yexguma pexna ítixīxguwena, rü woo tama pexütawa na tayexmagüechaxü, natürü guxüguma pegu tarüxīnüë, rü poraäcü toxü nangüchaü na pexütawa taxixü na wenaxärü pexü ítayadaugüxcèx. ¹⁸ Rü aixcüma ngēma taxīxchaü. Rü chomatama i muëxpüxcüna rü chanaxwèxe na ngēma pexütawa taèx chaxüüxüegaxü natürü ngoxo i Chataná rü guxüguma toxü nanaguxchaxëë na tama ngēma taxixüxcèx. ¹⁹ Natürü pexü ítayadaugüchaüäma erü ngëxguma wenaxärü núma naxüxgu ya tórü Cori ya Ngechuchu ya Cristu rü ¿tècücèx tá nixī i Tupanapëxewa tataäëgüxü i tomäx? Rü aixcüma pewa tá nixī i ítananguxëëxü na tomaä nataäëxü ya Tupana. Rü pema tá nixī i torü taäë pixīgüxü. Rü pegagu tá nixī i aixcüma togümaätama tataäëgüxü i napëxewa. ²⁰ Rü ngēmaäcü pegagu nixī i togümaätama tataäëgüxü, rü pema nixī i torü taäë pixīgüxü.

3

¹ Rü yema na taxuacüma ñuxäcü wenaxärü petanüwa na chaxüxü, rü düxwa nagu charüxīnü na Atenagutama na charüxäxü. ²⁻³ Rü pexütawa chanamu ga taeneë ga Timutéu na pexü íyadauxüxcèx. Erü nüma nixī i Tupanaärü puracütanüxü i wüxigu namaä tapuracüexü na tanaxunagüxüxcèx i ngēma ore i mexü i Cristuchiga. Rü ngēma petanüwa chanamu na pexü nangüxëëxüxcèx na yexeraäcü peyaxögüxüxcèx rü aixcüma petaäëgüxüxcèx rü ngēmaäcü taguma texé i petanüwa nüxü rüxoxüxcèx ega tacü rü guxchaxü pexü ngëxmagu. Erü pematama marü nüxü pecuèx na guxäma i yixema na yaxögüxü rü ngüxü tá tingegü. ⁴ Rü yexguma petanüwa tayexmagügu rü marü pemaä nüxü tixu na ngüxü tá pexü üpetüxü. Rü pema marü nüxü pecuèx na aixcüma yemaäcü pexü nangupetüxü. ⁵ Rü yemacèx ga yexguma marü tama namaä chaporagu ga yema tama paxa pechigaxü na chacuáxü, rü yemacèx düxwa Timutéuxü yéma petanüwa chamu na pexna yaxaxüxcèx ngoxi meä ípeyaxögüama i Tupanaärü ore. Yerü chaxoegaäë rü bexmana ngoxo i Chataná rü chixexügu pexü nayixëë, rü chi ngēmaäcü yixīgu, rü natüxcëmmamare chi nixī ga pemaä nüxü tixuxü ga Tupanaärü ore. ⁶ Natürü ñuxma na ínanguxü i Timutéu na petanüwa ne naxüxü, rü mexü i ore i pechiga ngēma ne nange. Rü tomaä nüxü nixu na ñuxäcü meä peyaxögüxü, rü ñuxäcü guxäma meä pegü pengechaügüxü. Rü tomaä nüxü nixu ta na ñuxäcü guxüguma toxü pengechaügüäcüma togu perüxīnüëxü, rü ñuxäcü poraäcü wena toxü pedaugüchaüxü rü ngëxgumarüxü ta i toma rü toxü nangüchaü na wena pexü tadaugüchaüxü. ⁷ Rü ngēmacèx, Pa Chaueneëgüx, rü woo guxchaxü toxü na ngëxmaxü rü ngüxü na tingegüxü, rü poraäcü toxü nataäëxëë i ngēma pexü na tacuáchigaxü na meä ípemaxëxü rü meä peyaxögüamaxü. ⁸ Rü ñuxma na nüxü tacuáchigaxü na aixcüma meä tórü Coriaxü peyaxögüamaxü, rü poraäcü tataäëgü. ⁹ ¿Rü ñuxäcü tá Tupanana moxë taxä naxcèx i ngēma taäë i taxü i toxna pexäxü? Erü aixcüma pegagu nixī i toxü nangëxmaxü i wüxi i taäë i taxü i napëxewa. ¹⁰ Rü ngunecü rü chütacü rü tayumüxëgü, rü Tupanana naxcèx tacagü na petanüwa toxü nawoeguxëëxüxcèx na wena pexü tadaugüxüxcèx rü pexü tarüngüxëëgüxüxcèx na yexeraäcü nüxü peyaxögüxüxcèx. ¹¹ Rü poraäcü tanaxwèxegü na Tanatü ya Tupana rü tórü Cori ya Ngechuchu ya Cristu toxü natauxchaxëëxü

na wena petanüwa itayadaugüxcèx. ¹² Rü tanaxwèxegü na tórü Cori ya Ngechuchu pexü rüngüxêxü na yexeraãcü pegü pengechaügxüxcèx rü guxü i duüxügxü na pengechaügxüxcèx, ngëxgumarüü i toma rü poraãcü pexü na tangechaügxüürüü. ¹³ Rü tanaxwèxegü na tórü Cori ya Ngechuchu pexü rüngüxêxü na peãewa rü aixcüma meã peyaxögüxcèx rü norü duüxügü i aixcüma mexügü na pixügxüxcèx rü na nataxuxüxcèx i perü pecadugü i napëxewa ya Tanatü ya Tupana i ngëxguma wena núma naxüxgu ya tórü Cori ya Ngechuchu ya Cristu namaã i guxüma i norü duüxügü. Rü tanaxwèxe na ngëmaãcü yüüxü.

4

Maxü i Tupanaxü taãxêxüchiga

¹ Rü ñuxma Pa Chaueneëgüx, rü tórü Cori ya Ngechuchuégagu pexü tacèxü rü pexü tamu na guxüguma Tupanacèx meã pemaxëxü yema pexü tangüxêxüürüü rü ñuxma marü penaxüxüürüü. ² Pema rü marü nüxü pecuèx ga yema torü ucuxëgü ga tórü Cori ya Ngechuchu toxü muxü na pexü tangüxêxüxcèx. ³ Rü Tupana nanaxwèxe na aixcüma namexü i perü maxü rü naxcèxicatama na pemaxëxü. Rü tama name i chixri pemaxë i napëxewa rü to i ngexügümaã pengëãëgümare. ⁴ Rü wüxichigü tanaxwèxe na aixcüma tümamèxü tangechaüxü, rü ngïmaãxïcatama na tamaxüxü. ⁵ Rü tama name i ngïxü na pecuáxchaümarexüxcèx ngïmaã pexãmèx i wüxi i nge erü ngëmaãcü namaxë i ngëma duüxügü i tama Tupanaãxü yaxögüxü. ⁶ Rü tama name i texé ngïmaã tamaxü i naxmèx ya tümaëneë. Erü yexgumarüü ga marü pemaã nüxü tixuxüürüü, rü Tupana tá poraãcü tüxü napoxcu ya guxãma ya yixema ngëmaãcü maxëxë. ⁷ Erü Tupana tüxü nade na meã imaxëxüxcèx rü tama chixexü ixügxüxcèx. ⁸ Rü ngëmacèx ega texé tama naga ñnügu i ñña nguxêëtaegü, rü pemaã nüxü chixu rü tama wüxi i duüxüga nixï i ngëma nüxü taxoxü, natürü Tupanagatama nixï i nüxü taxoxü. Rü guma nixï ga pexna namucü ga Naã i Üünexü. ⁹ Rü ngëma na pegü pengechaügxüchiga, rü taxucèxma pexcèx chanaxümatü i poperawa. Yerü Tupanatama marü pexü nangüxêë i ngëma na ñuxãcü aixcüma pegü pengechaügxü. ¹⁰ Rü aixcüma nixï i guxüguma meã nüxü pengechaügxü i guxüma i taeneëgü i Machedóniãñewa ngëxmagüxü. Natürü, Pa Toeneëgüx, pexü tacèxügü na yexeraãcü meã nüxü pengechaügxüxcèx. ¹¹ ¡Rü meã pegü pengechaügü, rü pexrütama maxügu perüxïnüë, rü tama i togüarü maxügu! ¡Rü pematama naxcèx pepuracüe i perü ngëmaxügü yema marü pemaã nüxü tixuxüürüü! ¹² Rü ngëxguma ngëmaãcü pemaxëgu, rü ngëma duüxügü i tama yaxögüxü rü tá pexü nangechaügü, rü taxuütáma pexü nataxu.

Ñuxãcü tá nixï i ngëxguma nataegugu ya tórü Cori

¹³ Pa Chaueneëgüx, rü ñuxma rü tá pexü nüxü chacuèxêë i ngexta tá naxüxü i ngema yaxögüxü i yuexü na ngemaãcü tama pengechaügxüxcèx naxrüxü i ngema tama nüxü cuèxgüxü na wena tá namaxëxü i ngema yuexü. ¹⁴ Erü yixema na yaxögüxü na nayuxü rü wena namaxüxü ga Ngechuchu, rü ngëxgumarüü ta tayaxögü na Tupana tá ñnadagüxêxü i guxüma i ngëma Ngechuchuaxü yaxögüãcüma yuexü. ¹⁵ Rü ngëmacèx pemaã nüxü tixu i ngëma ore ga tórü Cori ya Ngechuchu namaã nguxêëtaexü. Rü ngëxguma wena núma naxüxgu ya tórü Cori ya Ngechuchu rü yixema na imaxëxü i ñoma i nañnewa rü täütáma yixira napëxe taxï i ngëma yuexü. ¹⁶ Erü nümatama ya Cori ya Ngechuchu rü daxüwa tá ñnarüxï, rü tá nangëxma i wüxi i naga i taxü i daxüwa inaxüxü i tüxü muxü, rü tá nüxü taxïnüë i Tupanaärü

orearü ngeruügüarü ãëxgacü i tagaãcü daxüwa icagüxü, rü tá yacuegüxü ya Tupanaärü corneta. Rü ngëxguma i ngëma yuexü i Cristuaxü yaxögüxü rü tá ínarüdagü. ¹⁷ Rü ngëmawena i yixema na imaxëxü rü Tupana tá wüxigu caixanexügu tüxü nigagü namaã i ngëma duüxügü i yuwa írüdagüxü. Rü ngëmaãcü tá daxügu tórü Cori ya Ngechuchuxü tayangaugü na guxügutáma naxütawa ingëxmagüxücèx. ¹⁸ Rü ngëmacèx chanaxwèxe i ñãã oremaã pegü petaãëxëëgü.

5

¹ Natürü, Pa Chaueneëgüx, rü ngëma norü ngunexü rü taunecü i tá nagu nangupetüxü i ngëma pemaã nüxü chixuxü, rü taxucèxma pexcèx chanaxümatü i ngëmachiga. ² Erü pematama meã nüxü pecuèx rü ngëma ngunexü i taxúema nagu ínanguxëëxügu tá nixí i ínanguxü ya tórü Cori ya Ngechuchu. Rü ñoma wüxi i ngítèxáxü i ngürüãchi chütacü ínguxürüü tá nixí. ³ Rü ngëxguma duüxügü nagu íruxínüëgu na guxüma na mexü rü taxuüma na nüxü úpetüxü, rü ngëma ngunexügu rü tá ngürüãchi nagux i guxüma. Rü ñoma wüxi i ngecü i áxácücü rü ngürüãchi ngíxácümaã nguxnecacürüü tá nixí na taxúema naxchaxwa íñaxü i ngëma. ⁴ Natürü pemax, Pa Chaueneëgüx, rü marü meãma nüxü pecuèx i Cristuarü nguchiga. Rü ngëmacèx taxucèxma ngürüãchi pexü ínayabaixgü ya Cori ya Ngechuchu ñoma wüxi i ngítèxáxü tüxü íbaixgüxürüü. ⁵ Erü guxáma i pema rü Tupanaärü duüxügü pixígü, rü ngëmacèx ngóonexüwa pengëxmagü rü meãma nüxü pecuèx na ñuxácü meã pemaxëxü. Rü yixema rü tama Chatanáärü duüxügü tixígü, rü ngëmacèx tama ëänexüwa tangëxmagü rü tama tanaxü i ngëma chixexü i ëänexüwa üxü. ⁶ Rü ngëmacèx tama name i taechita tamaxëmare naxrüü i ngëma duüxügü i tama yaxögüxü. Rü name nixí i taxuãëgü, rü meã taãëgu tarüxínüë. ⁷ Erü ngëma duüxügü i naëchitamare maxëxü rü ñoma duüxügü i chütacü peexürüü nixígü. Rü ngëma duüxügü i axegüxü rü chütacü nixí i nügü nangãxëëëxü. ⁸ Natürü i yixema rü ngóonexüwa tangëxmagü, rü ngëmacèx tanaxwèxe i guxüguma taxuãëgü. Rü name nixí i aixcüma meã Tupanaãxü tayaxögü, rü yigü tangechaügü, rü meã ítananguxëë na Tupana tüxna naxãxücèx i ngëma maxü i taguma gúxü. Rü ngëxguma ngëmaãcü imaxëgu, rü ngëmaãcü tá yigü ítapoxü i ngëxguma Chataná chixexügu tüxü yixëëchaügu. ⁹ Erü Tupana rü tama tüxü nade na tüxü napoxcuexücèx, natürü tüxü nade na tórü Cori ya Ngechuchu ya Cristugagu nayauxgüxücèx i maxü i taguma gúxü. ¹⁰ Rü Ngechuchu ya Cristu rü taxcèx nayu na wüxigu namaã imaxëxücèx i daxügüxü i nañewa. Rü nüëtama ega woo marü iyuyane ínanguxgu rü éxna imaxëyane ínanguxgu, erü daxügüxü i nañewa rü wüxiwa tá namaã tamaxë. ¹¹ Rü ngëmacèx, Pa Chaueneëgüx, rü name nixí i wüxichigü pegü petaãëxëëgü rü pegü peporaexëë i perü õwa ngëxgumarüü i ñuxma na marü ípenaxügüxü.

Pauru rü nayaxucuxëgü ga yema yaxögüxü

¹² Pa Chaueneëgüx, pexü tacèxügü na nüxü pengechaügüxücèx i ngëma taeneëgü i petanüwa puracüexü rü pemaã icuèxgüxü rü pexü ngúexëëxü i Cori ya Ngechucharü ore. ¹³ Rü name nixí i namaã petaãëgü rü aixcüma meã nüxü pengechaügü i ngëma taeneëgü, erü nümagü nixí i pexü nangüxëëgüxü. Rü name nixí i pegü pengechaügüãcüma pemaxë. ¹⁴ Rü pemaã nüxü tixu ta na penaxucuxëgüxü i ngëma duüxügü i oexü i tama pura-cüechaüxü. ¡Rü nüxü penangüchaüxëëgü i ngëma duüxügü i marü nüxü rüxoechaüxü na yaxögüãxü! ¡Rü nüxü perüngüxëëgü i ngëma duüxügü i turaexü i norü õwa! ¡Rü name nixí i yaxna namaã pexínüë i guxüma i ngëma taeneëgü! ¹⁵ Rü ngëxguma texé chixexü pemaã üxgu, rü tama name i chixexümaã

penataeguxēē. ¡Natürü name nixĩ i naxcèx pedau na guxũguma mexũ pexũgũxũ i pegũtanũwa rü ngema togũtanũwa rü ta! ¹⁶ Rũ name nixĩ i guxũguma petaãēgũ. ¹⁷ ¡Rũ guxũguma peyumũxēgũ! ¹⁸ ¡Rũ woo tacũ pexũ ngupetũgu, rü Tupanana moxē pexãgũ! Erũ ngēmaãcũ nanaxwèxe ya Tupana na pemaxēxũ i pema i Ngechuchu ya Cristuarũ duũxũgũ na pixĩgũxũ. ¹⁹ Rũ tama name i nüxũ pexoe i Tupanaãē i Üünexũ. ²⁰ Rũ tama name i nüxũ pexoe i Tupanaãrũ ore ega texéwa pemaã yadeaxgu ya Tupana. ²¹ Natürü name nixĩ i meãma penangugũ i guxũma i oregũ na nüxũ pecuáxũcèx rü ngoxi aixcũma yĩxũ i ngēma ore rü ěxna tama. ¡Rũ ngēma ore i aixcũma mexũxĩcatama pixõgũ! ²² ¡Rũ nüxna pixĩgachi i nagũxũraũxũ i chixexũgũ! ²³ Rũ chanaxwèxe i nümatama ya Tupana ya tüxũ taãēxēēcũ pexũ imexēē na aixcũma napēxewa pimexũcèx. Rũ chanaxwèxe i guxũwama pexna nadau i peãēwa rü pexenewa na nataxuxũcèx i tacũ i perũ chixexũ i ngēxguma wenaxãrũ núma naxũxgu ya tórũ Cori ya Ngechuchu ya Cristu. ²⁴ Rũ nüma ya Tupana ya pexũ decũ rü nixaixcũma na yanguxēēãxũ i guxũma i ngēma tamaã inaxunetaxũ.

Pauru rü wenaxãrũ yema duũxũgũxũ narümoxē rü naxcèx ínaca na Cori ya Ngechuchu ya Cristu meã nüxũ rüngũxēēxũ ga

yema yaxõgũxũ

²⁵ Pa Chaueneēgũx, ¡Toxcèx peyumũxēgũ! ²⁶ Rũ chanaxwèxe i chauégagu nüxũ perümoxēgũ i guxũma i taeneēgũ. ²⁷ Rũ Cori ya Ngechuchuégagu pexũ chamu na guxũ i taeneēgũpēxewa na nüxũ pedaumatũxũ i ñaã popera i pexcèx ngema chamuxũ. ²⁸ Rũ chanaxwèxe i tórũ Cori ya Ngechuchu ya Cristu pexũ narüngũxēē i guxãma i pemax.

Rũ nuãma pexna,
Pauru

NORŪ TAXRE GA POPERA GA TECHARÓNICAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Techarónicawa yexmagŭxŭ

¹ Pa Techarónicawa Ngēxmagŭxŭ i Toeneēgŭ i Yaxōgŭxŭ i Tanatŭ ya Tupana rü tórŭ Cori ya Ngechuchu ya Cristuarŭ Duŭxŭgŭ Ixīgŭxŭx, choma i Pauru rü taeneē i Chiribánu rü Timutéu nixī i pexcèx tanaxŭmatŭxŭ i ñāa popera. ² Rü tanaxwèxe i Tanatŭ ya Tupana rü tórŭ Cori ya Ngechuchu ya Cristu pexŭ narŭngŭxēē rü pexŭ nataāēxēē.

Ngēma chixexŭ ŭgŭxŭ rü Tupana tá nanapoxcue i ngēxguma wenaxārŭ nŭma naxŭxgu ya Cristu

³ Pa Toeneēgŭx, rü guxŭguma pexcèx Tupanana moxē taxā, erŭ name nixī na ngēmaācŭ tanaxŭxŭ. Erŭ guxŭguma yexeraācŭ peyaxōgŭetanŭ rü yexeraācŭ pegŭ pingechaŭgŭetanŭ. ⁴ Rü ngēmacèx tomatama taāēācŭma pechigaxŭ tixu natanŭwachigŭ i ngēma duŭxŭgŭ i Tupanaāxŭ yaxōgŭxŭ. Rü namaā nüxŭ tixu na ñuxācŭ meā peyaxōgŭxŭ, rü ñuxācŭ namaā peporaexŭ i guxŭma i ngēma guxchaxŭgŭ rü ngŭxŭgŭ i pexŭ ngupetŭxŭ. ⁵ Rü ngēma guxchaxŭgŭ i pexŭ ngupetŭxŭwa nüxŭ tacuèx na aixcŭmacŭ yīxŭ ya Tupana, erŭ pexŭ nangugŭ na aixcŭma pimexŭ na pichocuxŭcèx i ngextá nŭma āēxgacŭ íyīxŭwa. Rü ngēma na pichocuxŭcèx nixī i ngŭxŭ pingegŭxŭ i ñuxmax. ⁶ Rü aixcŭma name nixī na Tupana napoxcuexŭ i ngēma duŭxŭgŭ i ngŭxŭ pexŭ ingegŭxēēxŭ. ⁷ Natŭrŭ i pema i ñuxma ngŭxŭ ingegŭxe rü name nixī i wŭxigu tomaā pexŭ inarŭngŭēxēē ya Tupana. Rü ngēma rü tá nanaxŭ ya Tupana i ngēxguma ŭxŭemagu daxŭwa ne naxŭxgu ya tórŭ Cori ya Ngechuchu ya Cristu wŭxigu namaā i norŭ orearŭ ngeruŭgŭ i poraexŭ. ⁸ Rü aixcŭma nŭma tá naxŭ i nŭma ya tórŭ Cori ya Ngechuchu na napoxcueāxŭcèx i ngēma duŭxŭgŭ i tama Tupanaxŭ cuāxchaŭgŭxŭ rü tama naga ĩnŭēxŭ i ngēma ore i mexŭ i tórŭ Cori ya Ngechuchu ya Cristuchiga. ⁹ Rü ngēma duŭxŭgŭ rü wŭxi i poxcu i taguma gŭxŭgu tá napoxcue erŭ tórŭ Cori ya Ngechuchuarŭ yaxŭwa tá nawogŭ. Rü ngēma rü tagutáma nüxŭ nadaugŭ na ñuxācŭ namexēchixŭ rü naporaxŭ ya tórŭ Cori ya Ngechuchu. ¹⁰ Rü ngēmaācŭ tá ngēma duŭxŭgŭmaā nangupetŭ i ngēxguma tórŭ Cori ya Ngechuchu nŭma ŭxgu. Rü nŭma tá nangu na nórŭ duŭxŭgŭ nüxŭ icuèxŭgŭxŭcèx, rü tá nabaixāchiāēgŭ rü nataāēgŭ erŭ tá nüxŭ nadaugŭ na ñuxācŭ namexēchixŭ i nŭmax. Rü pema rü tá ta wŭxigu namaā pengēxmagŭ, yerŭ peyaxōgŭ ga yema Tupanaārŭ ore ga pemaā nüxŭ tixuxŭ. ¹¹ Rü ngēmacèx guxŭguma pexcèx tayumŭxēgŭ. Rü Tupanana taca na nŭma pexŭ nadauxŭ na aixcŭma mexŭ i norŭ duŭxŭgŭ pixīgŭxŭ i ñuxma na pexŭ nadexŭ. Rü ngēxgumarŭŭ ta nüxna taca na nŭmatama norŭ poramaā yanguxēēāxŭcèx i guxŭma i ngēma mexŭ i peāēwa nagu perŭĭnŭēxŭ rü guxŭma i ngēma puracŭgŭ i mexŭ i perŭ ōgagu pexŭxŭ. ¹² Rü ngēxguma Tupana ngēmaācŭ pexŭ rŭngŭxēēgu, rü perŭ maxŭ i mexŭgagu rü guxŭma i duŭxŭgŭ tá nüxŭ nicuèxŭgŭ ya tórŭ Cori ya Ngechuchu ya Cristu. Rü nŭmatama ya tórŭ Cori rü tá pemaā nataāē erŭ nŭma rü wŭxigu Tanatŭ ya Tupanamaā pexŭ nangechaŭgŭ.

2

Pauru rü nanangoxēē i ñuxācü tá na yīixü i ngēxguma ínanguxgu ya Cori ya Ngechuchu

¹⁻² Rū ñuxma Pa Chaueneēgüx, rü pemaã nüxü chixuxchaü i nachiga na ñuxācü tá na yīixü i ngēxguma tórü Cori ya Ngechuchu ya Cristu wena núma üxgu rü tüxü nangutaquēxexēēgügu na wüxiwa namaã ingēxmagüxüçèx. Rū pemaã nüxü tixu na tama ngürüāchi togumare perüxñüēxü rü paxa peyaxōgüxü i tacü rü ore i tama toma pemaã nüxü tixuxü. Erü tama tanaxwēxe na pebaixāchiāēgüxü ega texé pemaã idoraegu rü pemaã nüxü ixuxgu na marü ínanguxü ya tórü Cori ya Ngechuchu. Rū ngēxguma texé pemaã nüxü ixuxgu na nagu taxānegüxü na Cristu rü marü ínanguxü, rü tama name i tümaga pexñüē. Rū woo pemaã nüxü tixugügügu na tanayauxgüxü i wüxi i torü popera i nüxü ixuxü na marü ínanguxü ya tórü Cori ya Ngechuchu, ¡rü täütáma tüxü peyaxōgü! ³ ¡Rü täütáma naga pexñüē i ngēma duüxügü i ngēmaācü pexü womüxēēgüchaüxü! Erü naxüpa na Ngechuchu núma üxü rü tá ínangu i ngēma yatü i Tupanaärü uwanü ixixü, rü tá nananuēxēē i muxüma i duüxügü i yaxōgüchiréxü. Natürü ngēma yatü rü Tupana marü namaã nanaxuegu rü tá napoxcu. ⁴ Rū ngēma Tupanaärü uwanü rü tá Tupanamaã rü guxüma i ngēma Tupanaärü ixixümaã narüxuanü. Rü tá naxchi naxai i guxüma i tacü i mexü i duüxügü Tupanaxü namaã icuèxüügüxü. Rü Tupanaärü tupauca ya taxünewa tá nayarüto ñoma Tupana yīixürüü. Rü tá nügü nixu na Tupana yīixü. ⁵ ¿Tama ēxna nüxna pecuēxāchie ga yexguma petanüwa chayexmagu rü marü meãma pemaã nüxü chixu nachiga ga yema? ⁶ Rū pema marü nüxü pecuēx na tüxcüü yīixü i tauta núma naxüxü i ngēma Tupanaärü uwanü. Tauta núma naxü, erü tauta nawa nangu i ngema ngunexü i nagu nua naxüxü. ⁷ Rū ngēma chixexü i Tupanaärü uwanü üxü, rü marü cúācü inaxügü. Natürü nümatama i Tupanaärü uwanü rü täütáma nangox ñuxmatáta ngēma norü chogüruü nüxü ingé. ⁸ Rū ngēxguma tá nixi i ínanguxü i ngēma Tupanaärü uwanü. Natürü nüma ya tórü Cori ya Ngechuchu rü wüxi i “cue” ñaxümaã tá nayamèx. Rū ngēxguma ínanguxgu ya tórü Cori ya Ngechuchu rü ngēma norü yaxracüüxümaã tá inayanaxoxēē i ngēma norü uwanü. ⁹ Rū ngēma Tupanamaã rüxuanüāxü, rü ngēxguma ínanguxgu rü tá nüxü nangēxma i Chatanáärü pora rü ngēmacèx tá naporaxüchi. Rü tá nanaxü i nagüxüraüxü i cuèxruügü i Chatanáärü poramaã naxüxü i namaã duüxügüxü nawomüxēēxü. ¹⁰ Rū nagüxüraüxü i chixexü tá naxü na nawomüxēēāxüçèx i ngēma duüxügü i Tupana tá poxcuexü. Rū ngēmaācü tá nüxü naxüpetü i ngēma duüxügü, yerü tama nanayauxgüchaü rü tama nüxü nangechaü i ngēma Tupanaärü ore i aixcüma ixixü i tüxü maxēxēēxü. ¹¹ Rū ngēmacèx ya Tupana rü nanangexrü i ngēma duüxügü na poraäcü ínatüexüçèx rü yaxōgüāxüçèx i ngēma ore i doramare ixixü. ¹² Rū ngēmacèx düxwa Tupana tá namaã nanaxuegu na napoxcuexü i guxüma i ngema duüxügü i tama yaxōgüchaüxü i norü ore rü namaã taāēgüxü i ngēma chixexü na naxügüxü.

Tupana tüxü nade na tüxü nangēxmaxüçèx i maxü i taguma gúxü

¹³ Natürü, Pa Chaueneēgüx i Tórü Cori ya Ngechuchu Pexü Ngechaügüxex, rü guxüguma Tupanana moxē pexcèx taxā yerü nüma ga Tupana rü noxri-tama naãne ixügügumama pexü nade na pexira penayauxgüxüçèx i maxü i taguma gúxü ga yexguma pexü nangüxēēgu ga Naãē i pexü üünexēēxü rü peyaxōgügu ga yema ore i aixcüma ixixü. ¹⁴ Rū yemacèx Tupana pexcèx naca ga yexguma pemaã nüxü tixuxgu ga norü ore i mexü i tüxü maxēxēēxü. Erü

nüma nanaxwèxe na pexũ nangẽxmaxũcèx i pechica i tórü Cori ya Ngechuchu ya Cristuxõtawa i ngextá ínamexẽchixũwa. ¹⁵ Rü ngẽmacèx, Pa Chaueneẽgũx, rü chanaxwèxe i meã peyaxõgũama rü tama nüxũ ipeyarüngũmaẽ ga yema ore ga tomatama pexũ tangúexẽxũ rü yema ore ga poperagu pexcèx taxümatũxũ. ¹⁶⁻¹⁷ Rü chanaxwèxe i tórü Cori ya Ngechuchu ya Cristu rü Tanatü ya Tupana pexũ nataãẽxẽgũ rü pexũ narüngũxẽẽ na guxũguma mexũ i oremaã pidexagũxũcèx rü mexũ pexũgũxũcèx. Rü yima Tanatü ya Tupana nixĩ ya tamaã namecũmaãcũma tũxũ ngechaũcũ rü guxũguma tũxũ taãẽxẽcũ rü tamaã ixunetacũ na wũxi i ngunexũ tá naxõtawa ingẽxmagũxũ.

3

Pauru naxcèx ínaca na naxcèx nayumũxẽgũxũ

¹ Rü ñuxma Pa Chaueneẽgũx, rü chanaxwèxe na toxcèx peyumũxẽgũxũ na paxa guxũwama nangũxũcèx i tórü Cori ya Ngechuchuarü ore i mexũ, rü duũxũgũ norü ngúchaũmaã na nayauxgũxũcèx ga yema pema na penayauxgũxũrũ. ² ;Rü toxcèx peyumũxẽgũ ta na tama ñacũ rü chixexũ tomaã naxũgũxũcèx i ngẽma duũxũgũ i chixexũgũ! Erü tama guxũma i duũxũgũ nayaxõgũ. ³ Natürü tórü Cori ya Ngechuchu rü aixcũma nayanguxẽẽ i ngẽma tamaã inaxunetaxũ. Rü nüma tá pexũ naporaexẽẽ rü pexna nadau na tama chixexũgu peyixũcèx. ⁴ Rü tórü Cori ya Ngechuchu toxũ nüxũ nacuxẽẽ na aixcũma penaxũxũ i ngẽma pexũ tamuxũ rü tagutáma nüxũ perũxoexũ na ngẽmaãcũ penaxũxũ. ⁵ Rü tanaxwèxe i tórü Cori ya Ngechuchu pexũ narüngũxẽẽ na aixcũma pegũ pengechaũgũxũcèx, ngẽma Tupana tũxũ ngechaũxũrũ. Rü naxcèx ítaca na pexũ naporaexẽẽxũcèx na Cristurũ namaã peporaexũcèx i ngẽma ngũxũgũ i ngẽxguma pexcèx ínanguxgu.

Name nixĩ na ipuracũxũ i wũxichigũ

⁶ Pa Chaueneẽgũx, tórü Cori ya Ngechuchu ya Cristuégagu pexũ tamu na tama namaã pixãmücũgũxũcèx i ñacũ i taeneẽ i tama puracũchaũxũ rü tama ngẽma pexũ tangúexẽẽãcũma maxũxũ. ⁷ Erü pema rü marü nüxũ pecuèx na ñuxãcũ tá pemaxẽxũ na toxrũ penaxũxũcèx. Yerü toma ga yexguma petanũwa tayexmagũgu rü torü õnacèx tapuracũe, rü tama yexma tarũchomare. ⁸ Rü toma rü taguma texéarü õna ngetanũãcũma tangõx. Natürü ngunecũ rü chũtacũ rü torü õnacèx tapuracũe na tama wũxi ga guxchaxũ pexũ tixĩgũxũcèx. ⁹ Rü wochirẽx Tupanapẽxewa rü name nixĩ ga perü ngũxẽcèx na ítaçaxũ, natürü tama yemaãcũ tanaxũ. Rü torü õnacèx tapuracũe yerü pexũ nüxũ tadauxẽẽchaũ na ñuxãcũ meã imaxũxũ. ¹⁰ Yerü yexguma petanũwa tayexmagũgu, rü pemaã nüxũ tixu rü yixema tama puracũchaũxẽ, rü noxtacũma ngexrũma nixĩ na tachibũxũ. ¹¹ Rü pexcèx tanaxümatü i ngẽmachiga, erü marü nüxũ taxĩnüẽ na petanũwa nangẽxmaxũ i ñuxre i duũxũgũ i oexũ rü tama puracũechaũxũ rü toguechigagumare rüxĩnüẽxũ. ¹² Rü tórü Cori ya Ngechuchu ya Cristuégagu tanamu na meãmare ínapuracũxũcèx i ngẽma duũxũgũ na nümatama norü õnacèx nataxegũxũcèx. ¹³ Pa Chaueneẽgũx, ;tama nüxũ perũchau na mexũ pexũexũ! ¹⁴ Rü ngẽxguma texé tama naga ñnügu i ññaã ore i poperawa pemaã nüxũ tixuxũ ;rü marü tũxũ pecuèx na texé tíxũ! Rü tama name i tümamaã pexãmücũ na taxãnexũcèx i tümãx. ¹⁵ ;Natürü tãütáma namaã perũxuwãnu! Rü name nixĩ i ñoma peeneẽxũ pexucũxẽxũãcũma meã tũxũ pexucũxẽmare.

Pauru rü naxcèx ínaca na Cori ya Ngechuchu nüxũ rüngũxẽẽxũ ga yema yaxõgũxũ

¹⁶Rü chanaxwèxe i nūmatama ya tórü Cori ya taãearü yora pexũ narüngũxêê na guxũguma i guxũwama petaãẽgũxũcèx. Rü chanaxwèxe na nūma rü petanüwa na nangẽxmaxũ i guxãama i pemax. ¹⁷Choma i Pauru rü choxmẽxmaãtama pexcèx chanaxūmatü i ñaã chorü moxê. Rü ngẽmaãcü nixĩ i chaugü nagu chawüégaxũ i guxũma i chorü popera. Rü ngẽmaãcü nixĩ i chanaxūmatũxũ. ¹⁸¡Rü nūma ya tórü Cori ya Ngechuchu ya Cristu rü pexna naxãã i ngema norü ngechaxũ i guxãama i pemax!

Rü nuãma pexna,
Pauru

NÜXĨRAÜXÜ GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxē ga Pauru

¹⁻² Pa Timutéux, choma i Pauru nixĩ i cuxcèx chanaxümatüxü i ñãã popera. Rü choxü nixĩ ga yamuxü ga Ngechuchu ya Cristu na norü puracü chaxüxcèx, yerü yemaâcü nanaxwèxe ga Tupana ya tüxü maxēxēcü rü tórü Cori ya Ngechuchu ya Cristu ya ínanguxēēgücü. Rü cuma Pa Timutéux, rü chaune quixĩ i Tupanaârü orewa yerü chauxütawa nixĩ ga cunayaxuxü ga Tupanaârü ore ga noxrix. Rü chanaxwèxe ya Tanatü ya Tupana rü tórü Cori ya Ngechuchu ya Cristu rü cuxna nanaxã i norü ngechaxü rü norü mecüma rü norü taãē.

Timutéuxü naxucuxē ga Pauru nachiga ga yema nguxēētaegü ga tama aixcüma ixüü

³ Yexguma cuxna ichaxüächigu na Machedóniããnewa na chaxüxcèx rü cumaã nüxü chixu na Epéchiuarü ñãnegu na curüxãüxü na ícuyachaxächigüxēxüxcèx i ngema duüxügü i doramaãmare ngēma nguxēētaegüxü. ⁴ Rü chanaxwèxe i ngēma duüxügümaã nüxü quixu na nüxü naxoexüxcèx na namaã nangúexēēãxü i ngēma nacümagü ga nuxcümaügüxü ga duüxügü nagu íxü. Erü guxüma i ngēma oregü rü doramare nixĩ, rü ngēmagagu düxwa nügümaã nanuē i duüxügü. Rü ngēma oregü rü tama aixcüma nüxü narüngüxēē i duüxügü na meã Tupanaãxü yaxögüãxüxcèx. ⁵ Natürü Tupana nanaxwèxe i tórü maxünewa na ingearü pecaduãxgüxü, rü na mexügu rüxñüëxü, rü aixcüma meã na yaxögüxü. Rü nüma tüxü namu na ngēmaâcü imaxēãcüma yigü na ingechaügüxü. ⁶ Natürü ñuxre i duüxügü rü marü nüxna nixĩgachi i Tupanaârü ore na nawe naxĩxüxcèx i ngēma ore i taxuwama mexü i nuēwa nagagümarexü. ⁷ Erü nümagü tüxü nangúexēēchaü i ngēma mugü ga Moíché tüxna äxü, natürü tama nüxü nacüxgü i tacüchiga na yĩxü i ngēma tamaã nüxü yaxugüexü rü tüxü nangúexēēxü woo nüma nagu naxñüëgu rü meãma nüxü nacüxgü. ⁸ Rü nüxü tacüx rü ngēma mugü ga Moíché tüxna äxü rü tüxü name ega Tupana naxwèxexüãcüma naga ixñüëgu. ⁹⁻¹⁰ Natürü nüxü tacüxgü rü guxüma i ngema mugü rü duüxügü i chixexü ügüxcèx nixĩ. Rü ngēma nixĩ i ngēma duüxügü i tama irüxñüëchaüxü, rü ngēma tama norü äëxgacüga ñnüëxü, rü ngēma chixexü ügüxü, rü ngēma pecaduãxgüxü, rü ngēma tama Tupanaga ñnüëxü, rü ngēma nanatüxü rü naëxü imèxgüxü, rü guxüma i ngēma máëtagüxü, rü ngēma naxüneârü ngüchaüwe rüxixü, rü ngēma yatügü rü ngexügü i naxrüü yatüxü rü ngexümaã ngēãëgüxü, rü ngēma duüxügümaã taxegüxü, rü ngēma idoratèëxgüxü, rü ngēma äëxgacügümaã idoragüxü, rü guxüma i ngēma naxügüxü i tacü rü chixexü i yatoxyepexü i ngema nguxēētae i mexü. ¹¹ Rü ngēma nguxēētae i mexü rü Tupanaârü orewa nangexma, rü ngemagu nixĩ i nüxü iyarüngauxü i ngema maxü i taguma gúxü. Rü ngemaarü uruxü nixĩ ya Tupana ya mecümaxüchicü i choxü namuxü.

Pauru rü Tupanana moxē naxã yerü nüxü nüxü nangechaü ga norü chixexügü

¹² Rü moxē nüxna chaxã ya Ngechuchu ya Cristu ya tórü Cori erü nüma choxü naporaxēē rü choxü nangugü na wüxi i mexü i norü duüxü chixixü. Rü ngēmacèx choxü naxuneta na nüxü chapuracüxü. ¹³ Üpa ga choma rü

chixri nachiga chidexa ga Cristu, rü naxchi chaxai ga yema duüxügü ga nüxü yaxögüxü. Rü nawe chingechigü rü namaã chixexü chixugü. Natürü woo yemaãcü na chamaxüxü, rü Tupanaãxü changechaütümüxü yerü tama aixcüma nüxü chacuèx ga tacü na chaxüxü, yerü tauta Cristuaxü chayaxõ. ¹⁴ Rü yemaãcü ga tórü Cori ya Ngechuchu rü poraãcüxüchima chomaã namecüma yerü choxü narüngüxëe na nüxü chayaxõxüçèx rü nagagu nüxü changechaüxüçèx i guxüma i duüxügü. ¹⁵ Rü pemaã nüxü chixuxchaü i wüxi i ore i aixcümaxüchi ixixü i inaxwèxegüxü na guxãma nüxü cuáxü. Rü Ngechuchu ya Cristu rü ñoma ga naãnewa nangu na namaxëxëãxüçèx i pecaduãxgüxü. Rü natanüwa rü choma nixi ga guxüärü yexera na chixexü chaxüxü. ¹⁶ Natürü Tupana choxü nüxü nangechaü ga yema chorü chixexü na chowa duüxügüxü nüxü nadauxëxüçèx ga ñuxãcü nüma ga Ngechuchu ya Cristu yaxna chomaã na naxinüxü ga woo guxü ga pecaduãxgüxüärü yexera chixecü na chiixü. Rü ngëmaãcü wüxi i cuèxruü chixi naxcèx i guxüma i duüxügü na nümagü rü ta nüxü nangëxmaxüçèx i maxü i taguma gúxü. ¹⁷ Rü ñuxma tanaxwèxe i guxügutáma nüxü ticuèxüügü rü tanataxëëgü ya yima nüxicatama Tupana ixicü. Rü woo tama nüxü tadaugü i ñuxma natürü guxüguma tórü ãëxgacü nixi rü tagutáma nayu. Rü ngëmaãcü yi. ¹⁸⁻¹⁹ Pa Chaune, Pa Timutéux, ñaã nixi i chorü ore i cumaã nüxü chixuxü. Rü üpa ga yexguma Tupana yadexaxëëgu ga ñuxre ga taeneëgü, rü nüxü nixugügü na cuma rü tá mexü i Tupanaärü orearü uruü quiixü. Rü ñuxma chanaxwèxe i yemagü nüxü ixuxürüü meã cuyangüxëe i ngëma puracü i mexü i Tupana nawa cuxü muxü. Rü chanaxwèxe na aixcüma cuyaxõxü rü cuãëwa cumatama nüxü cucuáxü na aixcüma namexü i ngëma puracü i ícuxüxü. Ñuxre i duüxügü rü nüxü nacuèxgüchirëx i tacü nixi i mexü na naxügüãxü, natürü chixexüãma naxügü. Rü ngëmacèx düxwa nüxü narüxoe na Cristuaxü yaxögüãxü. ²⁰ Rü yemaãcü nüxü naxüpetü ga Imenéü rü Areyáüdrü. Rü düxwa choma Chatanána chanawogü ga yema taxre na Chataná ngüxü nüxü ingexëëgüxüçèx na ngëmawa nüxü nacuèxgüxüçèx na tama namexü na chixri Tupanachiga yadexagüxü.

2

Name nixi i guxüma i duüxügüçèx tayumüxëgü

¹ Rü ñuxma rü tá pemaã nüxü chixu na ñuxãcü namexü na peyumüxëgüxü. Rü pexü chamu na guxüma i duüxügüçèxira peyumüxëgüxü. ¡Rü Tupanana naxcèx peca na nüxü nangüxëxüçèx rü nüxü nüxü nangechaüxüçèx i norü pecadugü! ¡Rü moxë nüxna pexã ya Tupana naxcèx i guxüma i norü ngüxëe i guxü i duüxügüna naxãxü! ² Rü ngëxgumarüü ta name nixi i naxcèx peyumüxë i guxüma i nachiüãnegüarü ãëxgacügü i tacügü rü guxüma i ngëmatüüwa ngëxmagüxü i ãëxgacügü na ngëmaãcü itaãëgüxüçèx rü tüxü nangëxmaxüçèx i wüxi i maxü i mexü i Tupanapëxewa rü guxü i duüxügüpëxewa. ³ Rü ngëma nixi i namaã nataãëxü ya yima Tupana ya tüxü maxëxëecü. ⁴ Erü nüma nanaxwèxe na guxãma tüxü nangëxmaxü i maxü i taguma gúxü rü guxãma nüxü cuáxü i ngëma ore i aixcüma ixixü. ⁵ Rü nüma ya Tupana rü wüxitama nixi. Rü ngëxgumarüü ta wüxitama nixi i taétüwa chogüxü na Tupanaxütawa tüxü nangugüxüçèx. Rü nüma nixi ya Ngechuchu ya Cristu ya Tupana Nane ga duüxüxü ixicü. ⁶ Rü nüma ga Ngechuchu rü nügü inaxã rü nayu na guxü i duüxügüaxü naxütanüãxüçèx na Tupanaxütawa nangugüxüçèx. Rü yexguma Ngechuchu yuxgu nixi ga Tupana yangüxëëxü ga yema üpaacü duüxügümaã nüxü yaxuxü na ñuxãcü tá namaxëxëãxü. ⁷ Rü Tupana choxü naxuneta na

norü orearü ngeruü chiixücèx. Rü choxü namu na chanangüexëexücèx i ngëma duuxügü i tama Yudügü ixigüxü na nümagü rü ta yaxögüaxücèx rü nüxü nacuèxgüxücèx i ngëma ore i aixcüma ixixü. Rü ngëma pemaã nüxü chixuxü, rü aixcüma nixi, rü tama chidora. ⁸ Rü ñuxma chanaxwèxe i guxüwama nayumüxëgü i yatügü. Rü chanaxwèxe i ngearü pecaduãxácüma naxugümëxë rü ngëmaacü tama texëmaã nanuëacüma rü tama tacüchiga nügü nachoxügagüacüma nayumüxëgü. ⁹ Rü chanaxwèxe i ngexügü rü meamare üxü i naxchirugu nicuxgü, rü meamare nügü namexëëyaegü, rü tama poraacü nügü nangëxãëgü uirumaã rü meruxügümaã rü naxchiru i tatanüxümaã. ¹⁰ Natürü narümemaë nixi i meãmare Tupanacèx namaxë, rü mexü i puracü naxügü, erü ngëmaacü nanaxwèxegü na namaxëxü i ngëma ngexügü i aixcüma Tupanaaxü yaxögüxü. ¹¹ Rü chanaxwèxe i ngexügü rü meã inaxñüë i ucuxëgü. Rü tama name na nachoxügawèxegüxü. ¹² Erü ngexügüna rü chanachuxu na yatügüxü nangüexëexü, rü yatüarü ãëxgacü na yixü. Rü name nixi i inarüxñüëmare i perü ngutaquëxegüwa. ¹³ Yerü Tupana rü Adáüxüxira naxü rü yixcama ga Ebaxü. ¹⁴ Rü Chataná rü tama Adáüxü nawomüxëë, natürü yema ngecüxü nixi ga nawomüxëexü. Rü yemaacü pecadugu ingu ga yema ngecü. ¹⁵ Rü yemacèx Tupana nüxü nixu rü tá poraacü nüxü nangux i ngëma ngexügü i ngëxguma naxíraxacügügu. Natürü ngïma i ngecü rü tá inayaxu i maxü i taguma gúxü ega meã ngixácügümaã inacuèxgu, rü mexügu naxñüacüma yaxõõgu, rü guxügüma duuxügüxü nangechaügu rü meã Tupanapëxewa namaxëgu.

3

Yaxögüxüãrü ãëxgacügüchiga

¹ Rü pemaã nüxü chixuxchaü i wüxi i ore i aixcüma ixixü. Rü ngëxguma chi texé naxwèxegu na yaxögüxüãrü ãëxgacü tiixü, rü mexü i puracü nixi i naxcèx tadauxü. ² Rü yixema yaxögüxüãrü ãëxgacü rü tanaxwèxe na aixcüma mecü tiixü na taxúema tümachiga chixri idexaxücèx. Rü tanaxwèxe i wüxixicatama tixi ya tümamëx, rü aixcüma meã tamaxü rü mexüguxicatama tarüxñü na guxü i duuxügü tüxü ngechaügüxücèx. Rü tanaxwèxe i guxügüma meã duuxügüxü tayaxu i tümapatawa, rü mexü i ngüexëëruü tixi. ³ Rü tama name i wüxi i ngãxwèxexü rü nuwèxexü tiixü, rü tama name i tümããrü dïeruguama rüxñüxë tiixü. Natürü name nixi i guxü i duuxügümaã yaxna taxñü rü namaã tamecüma. ⁴ Rü tanaxwèxe i meãma tümachiümaã itacuèx, rü tümãacügü rü meã tümaga naxñüë, rü tüxü nangechaügü. ⁵ Erü ngëxguma chi tama tümachiümaã meã itacuèxgu rü ¿ñuxácü i guxüma i Tupanaãxü yaxögüxümaã meã itacuáxü? ⁶ Rü yixema ngema yaxögüxümaã icuáixë rü tama name na ngexwacèx yaxõxë tiixü, erü ngürüãchi tá tügü ticuèxüü. Rü ngëmagagu düxwa nagu tangu i ngëma poxcu i Chatanáxü namaã napoxcuxü ya Tupana. ⁷ Rü tanaxwèxe i woo i ngëma duuxügü i tama yaxögüxü rü tüxü nangechaügü na taxúema chixri tümachiga idexagüxücèx rü tama Chataná chixexügu tüxü na nguxëexücèx.

Yatügü i diácunugü i tupaucawa ngüxëëtaegüxüchiga

⁸ Rü ngëxgumarü ta i ngëma yatügü i tupaucawa ngüxëëtaegüxü ixigüxü rü nanaxwèxe i mexüguxicatama rüxñüëxü nixigü. Rü nanaxwèxe i aixcüma nayanguxëëgü i ngëma nüxü yaxugüexü. Rü tama nanaxwèxe i ngãxëëchagüxü nixigü rü ëxna norü dïeruguama rüxñüëxü nixigü. ⁹ Rü name nixi i meãma nüxü nacuèxgü i guxüma i Tupanaãrü ore, na nüxü nacuèxgüxücèx na tacücèx na yaxögüaxü. Rü nanaxwèxe i nügüãëwatama nüxü nacuèxgü na norü maxü rü aixcüma yamexü i Tupanapëxewa. ¹⁰ Rü

tanaxwèxe i to i puracüwa nüxü taxügüxira i noxrix. Rü ngëxguma marü taguma chixexü naxügügu, rü marü name i tupaucawaarü ngüxëëruü tayaxigüxëë. ¹¹ Rü ngëma yatügu i tupaucawa ngüxëëtaegüxü ixigüxü rü tanaxwèxe i naxmëxgü rü ta mexügüxicatama narüxñüë. Rü tama name i oregütèëxgüxü nixigü, natürü tanaxwèxe i meã namaxë rü aixcüma nayangüxëëgü i ngëma nüxü yaxugüxü. ¹² Rü ngëma yatügu i tupaucawa ngüxëëtaegüxü ixigüxü rü tanaxwèxe i wüxixicatama tixi ya naxmëx. Rü tanaxwèxe i meãma napatacüãxgümaã inacuèx, rü naxãcügü rü meã naga naxñüë. ¹³ Rü ngëma yatügu i tupaucawa ngüxëëtaegüxü, rü ngëxguma meãma naxügüãgu i norü puracü i tupaucawa rü guxüma i duüxügü tá nüxü nangechaügü. Rü ñuxüchi i nümagütama i ngëma yatügu rü tá yexeraãcü nüxü natauxcha na nüxü yaxugüexü i ñuxãcü Tupana nanaxwëxexü i Ngechuchu ya Cristuaxü na yaxögüãxü i duüxügü.

Aixcüma nixi i ngëma ore i Tupana tüxü nüxü cuëxëëxü i Cristuchiga

¹⁴⁻¹⁵ Rü choma chanaxwèxe i paxa ngëma chaxü na cuxü íchayadauxüçèx. Natürü ngürüãchi tama paxa ngëma chaxü, rü ngëmacèx cuxcèx chanaxümatü i ñaã popera na nüxü cucuáxüçèx i ñuxãcü tá cügümaã icucuáxü napewa i ngëma duüxgü i Tupanaxü yaxögüxü. Erü nümagü nixi i Tupana ya maxücüarü duüxügü yixigüxü rü nüxü yaxugüxü rü ínapoxügüaxü i norü ore i aixcüma ixixü. ¹⁶ Rü yixema nüxü tacuèx rü aixcüma namexëchi i ngëma ore ga noxri ëxügüxü i ñuxma Tupana tüxü nüxü cuëxëëxü i Cristuchiga. Rü nüma ga Cristu rü duüxügüxü nügü nawëx ga yexguma ñoma ga naãnewa nayexmagu. Rü Naã i Üünexü nüxü nixu na mecü yixü. Rü Tupanaärü orearü ngeruügü i daxücüãx nüxü nadaugü. Rü guxü i nachiüãnegüwa rü duüxügü nüxü nixugüe i nachiga, rü guxüwama duüxügü nüxü nayaxögü. Rü Nanatü rü wenaxärü daxügüxü i naãnewa nanaga i ngextá ínamexëchixüwa.

4

Duüxügü i nüxü rüxoexü na yaxögüãxüchiga

¹ Tupanaãe i Üünexü rü nüxü nixu rü ngëxguma yangaicagu na nagüxchaüxü i naãne rü nümaxü i duüxügü rü tá nüxü narüxoe na yaxögüãxü i Tupanaärü ore i mexü. Rü tá nawe narüxi i duüxügü i doramare i orexü ixügüxü i Chatanáärü ngüxëëtae nangüxëëxü. ² Rü ngëma yaxögüxü rü tá nüxü inarüxñüë i ngëma duüxügü i meã maxënetaxü rü idoratèëxgüxü. Rü ngëma duüxügü rü yeüçürü nanaxügü i ngëma chixexü rü düxwa namaã nixü na chixexügüxicatama naxñüëxü. ³ Rü ngëma duüxügü rü nanachuxu na iyangigüxü i duüxügü. Rü nanachuxu na duüxügü nangögüxü i ñuxre i õnagü rü wochirëx Tupana nanaxü i guxüma i õnagü na moxë naxcèx inaxägüãcüma nangögüãxüçèx i norü duüxügü i yaxögüxü rü nüxü cuëxgüxü i norü ore i aixcüma ixixü. ⁴⁻⁵ Natürü guxüma i Tupana üxü rü name. Rü taxuacüma nüxü taxo ega Tupanana moxë naxcèx íxãxiraãcüma nayauxgu. Erü Tupanaärü ore rü ngëma yumüxë rü nanaxüünexëë i ngëma õna i Tupanapëxewa, rü ngëmacèx name nixi na nangögü.

Wüxi i mexü i Ngechuchu ya Cristuarü ngüxëëruü rü mexümaã nangüxëëtae

⁶ Rü ngëxguma ngëma cumaã nüxü chixuxü i oremaã cunangüxëëgu i taeneë i yaxögüxü, rü ngëxguma nawa cungüechagu i ngëma ore i marü quixögüxü, rü ngëxguma nagu quixüëchagu i ngëma mexü i ngüxëëtae i marü nagu quixüxü, rü ngëxguma tá nixi i wüxi i mexü i Ngechuchu ya Cristuarü ngüxëëruü quiixü. ⁷ Rü tama name na naga cuxñüxü i ñoma i naãnecüãxärü

dexagümare i tama aixcüma ixixü. Natürü name nixi i guxüguma cugü cuporaxëe na yexeraäcü Tupanaxü cungechaüxücèx rü nawe curüxüxücèx rü naxcèx cumaxüxücèx. ⁸ Rü wüxi i mexü nixi na naporaxëexü rü yaxiäxcüxëexü i taxüne na aixcüma naporaxücèx. Natürü ngëmaärü yexera narümemaë nixi na yigü iporaxëexü na Tupanaxü ingechaüxücèx erü ngëma rü guxüwama tüxü name i ñoma i naänewa rü daxüguxü i naänewa rü ta. ⁹ Rü aixcüma nixi i ngëma ore i cumaä nüxü chixuxü, rü name nixi i guxäma tayaxögü. ¹⁰ Rü ngëmacèx nixi i ipuracüexü rü yigü iporaexëexü na nüxü ixuxücèx i ngëma ore i mexü, erü nüxü tayaxögü ya tórü Tupana ya maxücü ya guxäärü maxëxëeruü ixicü. Erü nüma nixi i namaxëxëäxü i ngëma duüxügü i nüxü yaxögüxü. ¹¹ Rü chanaxwëxe i cunangüexëe i ngëma ore rü duüxügüxü cumu na naga naxinüexücèx. ¹² ¡Meä cügüna nadau na taxüema cuxü naxoxücèx naxcèx i ngëma na cunangüxüxü! Rü name nixi i wüxi i mexü i cuèxruü quixi naxcèx i guxüma i ngëma yaxögüxü. Rü ngëmacèx cunaxwëxe i mexü i oremaä quidexa, rü meä duüxügüpëxewa cumaxü, rü aixcüma nüxü cungechaü i guxüma i duüxügü, rü meä Tupanaäxü cuyaxö, rü napëxewa meä cumaxü. ¹³ Rü chanaxwëxe i ngutaquëxewa rü guxü i duüxügüpëxewa nüxü cudadamatü i Tupanaärü ore, rü duüxügümaä nüxü quixu na ñuxü ñaxüchiga yixü. Rü chanaxwëxe i ngëmaäcü cunangüexëe rü nüxü cunangüchaüxëe i ngëma taeneëgü ñuxmatáta ngëma changu i chomax. ¹⁴ Rü ngëmacèx name nixi i aixcüma namaä cupuracü i ngëma cuèx ga Tupana cuxna äxü ga yexguma norü puracücèx cuxü naxunetagu rü yema yaxögüxüärü äëxgacügü cuxü yangögüäcüma cumaä nüxü yaxuxgu na cuxna naxäxü ga yema cuèx. ¹⁵ ¡Meä naxü i guxüma i ngëma cumaä nüxü chixuxü, na ngëmaäcü guxü i duüxügü nüxü daugüxücèx na ñuxäcü guxü i ngunexügu yexeraäcü meä Tupanacèx na cumaxüxü! ¹⁶ ¡Inaxuäe na ñuxäcü meä cügüna cudadaxü rü ñuxäcü meä cunangüexëexü i ngëma togü! Erü ngëxguma meä cunaxüxgu i guxüma, rü tá cunayaxu i maxü i taguma gúxü rü ngëma togü i cuxü irüxünüexü rü tá ta nüxü curüngüxëe na nümagü rü ta nayauxgüäxücèx i ngëma maxü.

5

Ñuxäcü nixi i namexü na nüxü ingechaüxü i ngëma yaxögüxü

¹ Taguma name i cunanga i wüxi i yatü i cuxü rüyamaëxü. Rü narümemaë nixi i meäma cunaxucuxë ñoma cunatürü. Rü ngëma ngextüxücügü rü name nixi i meäma namaä quidexa ñoma cueneëgüxüchirü. ² Rü yixema yaguäxgü ya ngexegü rü name nixi i meäma tümamaä quidexa cuexüchirü. Rü ngëxgumarü ta i paxügü rü name nixi i meäma namaä quidexamare wüxi i cueyëxüchirü, rü tama name i chixexügu namaä curüxinü. ³ ¡Tüxü rüngüxëe ya yixema yutegüxe ega aixcüma tacü tüxü taxügu! ⁴ Natürü ngëxguma chi wüxi i yutecü ngixü nangëxmagu i ngixäcügü rü ëxna ngitaagü, rü name nixi i nümagü ngixü narüngüxëegü rü ngixna nanaxä i tacü i ngixü taxuxü. Erü Tupana nanaxwëxe na ngitanüxüira ngixna daugüxü na ngëmaäcü yangutanüxëegüäxücèx ga yema naë na nayaexëexü. ⁵ Natürü yixema yutexe ya tüxica irüxäxüxë rü tüxü nataxüxe i tümatanüxü, rü Tupanaxütawaxicatama itanangüxëe i tümäärü ngüxëe rü guxüguma woo chütacü rü ngunecü rü tayumüxë na tüxü nangüxëexücèx ya Tupana. ⁶ Natürü yixema yutexe ya tümäärü ngüchaüguxicatama rüxünüxë, rü Tupanapëxewa rü ñoma tayuxürü tixi. ⁷ Rü ngëma nixi i ore i tá cunangüexëexü i ngëma yaxögüxü na nügüna nadaugüxücèx na taxüma i chixexü naxügüxücèx rü taxüema nachiga chixri idexagüxücèx. ⁸ Erü ngëxguma chi wüxie rü tama meä nüxna

tadèuxgu i tümapatacũãxgü rü tümaẽ rü tümanatü, rü maneca tama aixcüma meã Tupanaãxũ tayaxõ. Rü wüxi i tama yaxõxũãrũ yexera chixecü tixĩ. ⁹ Rü ngëxguma chi wüxi i ngexũ i yutexũ naxcèx ícaxgu na ngẽma yaxõgũxũ ngĩxũ rüngũxẽẽgũxũcèx rü tanaxwèxe i 60 ya taunecüarũ yexera ngĩxũ nangëxma rü wüxitama nixĩ ga ngĩte ga ngĩxũ yexmacü ga noxrix. ¹⁰ Rü tanaxwèxe i guxũma i duũxũgü ngĩxũ nacuèxgü na wüxi i mexũ üxcü na yĩxũ. Rü name i meã ngĩxãcũxũ yaexẽecü iyixĩ, rü meã ngĩpatawa duũxũgũxũ yaxucü iyixĩ, rü yaxõgũxũãrũ ngũxẽẽruũ iyixĩ, rü daaweexũãrũ ngũxẽẽruũ iyixĩ. Rü ngẽmaãcü tanaxwèxe i guxũraũxũ i mexũ na naxũxũ. ¹¹ Natürü tama tanaxwèxe i yaxõgũxũãrũ puracü nixĩ i ngĩxna na nadaugũxũ i wüxi i yutecü ega tama 60 wa nanguxgu ya ngĩrũ taunecü. Erü wüxi i yutecü i pacü, rü ngëxguma ngĩrũ ngúchaũ Cristuna ngĩxũ ixũgachixẽẽgu, rü tá inaxwèxe na wena naxãtexũ. ¹² Rü duũxũgü tá chixri ngĩchiga nidexagü, erü tama aixcüma iyanguxẽẽ ga yema Cristumaã inaxunetaxũ ga noxrix. ¹³ Rü ngĩma rü düxwa ngextá iyaxáuchigümare, rü náí ya í rü nagu iyarũxãũx, rü düxwa tama ipuracüchaũ. Rü tama ngẽmaxĩcatama ixü, natürü düxwa ixoregütèex, rü iyangëxmachigü nawa i ngẽma dexa i tama mexũ i togüchiga, rü guxũwama nüxũ iyaxu i ngẽma ore i tama mexũ. ¹⁴ Rü ngẽmacèx chanaxwèxe i ngẽma yutegũxũ i paxũgü na wenaxãrũ naxãtegũxũ, rü naxãxãcügũxũ, rü mexũ i napataarũ dauruũgü na yixĩgũxũ. Rü ngẽmaãcü i ngẽma duũxũgü i ngĩxchi aixũ, rü taxucürüwa chixri ngĩchiga nidexagü. ¹⁵ Cumaã nüxũ chixu i ñaã ore, erü ñuxre i yutecü rü marü nüxũ irüxoe i ore i mexũ rü Chatanáwe irüxĩ. ¹⁶ Rü ngëxguma chi wüxi i ngecü i yaxõxcü rü ngĩxũ nangëxmagu i ngĩtanũxũ i yutecü, rü name nixĩ i ngĩxũ irüngũxẽẽ. Rü ngẽmaãcü täütáma togü i yaxõgũxũãrũ puracü tá nixĩ na ngĩxna na nadaugũxũ. Rü ngëxguma tá nüxũ natauxcha i ngẽma togü i yaxõgũxũ na ngĩxũ nangũxẽẽgũxũ i ngẽma yutecü i aixcüma ngĩxũ natauxcüma i ngĩtanũxũgü i ngĩxũ rüngũxẽẽgũxũ. ¹⁷ Rü ngẽma yaxõgũxũãrũ ãẽxgacügü i aixcüma meãma ngema yaxõgũxũmaã icuáxũ, rü name nixĩ i ngẽma yaxõgũxũ aixcüma nüxũ nangechaũgü rü namaã nataãẽgü. Rü guxũãrũ yexera tanaxwèxe i nüxũ nangechaũgü rü nüxũ narüngũxẽẽgü i ngema Tupanaarũ orexũ ixugũxũ rü nangüxẽẽxũ. ¹⁸ Erü Tupanaãrũ orewa rü ñanagürü:

“Tama name i nüxna taxaü i ngẽma taxũna i puracũxũ”,
ñanagürü. Rü ñanagürü ta:

“Wüxi i puracütanũxũ rü tanaxwèxe i nüxũ na naxütanũxũ i norü puracü”,
ñanagürü i ngẽma Tupanaãrũ orewa. ¹⁹ Rü ngëxguma chi texé nüxũ ixuxgu na chixexũ naxũxũ i wüxi i yaxõgũxũãrũ ãẽxgacü, rü täütáma tũxũ icuxĩnü ega natauxguma i taxre rü ãxna tomaẽxpũx i togü i duũxũgü i nüxũ daugũxũ na aixcüma chixexũ naxũxũ. ²⁰ Natürü ngẽma yaxõgũxũãrũ ãẽxgacügü i aixcüma pecadugu maxẽxũ, rü name nixĩ i guxũ i yaxõgũxũpẽxewa cunaxucuxẽ, na guxũma i ngẽma togü i yaxõgũxũãrũ ãẽxgacügü rü ta namuũẽxũcèx na naxũgüãxũ i tacü rü chixexũ. ²¹ Rü ñuxma Tupanapẽxewa rü tórü Cori ya Ngechuchu ya Cristupẽxewa rü ngẽma daxũcũãx i orearü ngeruũgü i Tupana nüxũ ngechaũgũxũpẽxewa, rü cuxũ chamu na naga cuxĩnüxũ i ñaã ore i cumaã nüxũ chixuxũ. Rü chanaxwèxe i ngẽma cumaã nüxũ chixuxürüü meã cunaxucuxẽ i guxũma i ngẽma yaxõgũxũ rü nüetama ega woo texé tixĩgu. ²² Rü ngëxguma texexũ quingucuchixẽẽchaũgu na ngema yaxõgũxũãrũ ãẽxgacü tixĩxũcèx, ;rü taxũ i cuñuxãẽxũ na namaã cuyumũẽxũ i wüxi i duũxũ i tama nüxũ cucuáxũ i norü maxũ! Natürü name nixĩ i noxri rü meã nagu curũxĩnü i ngẽma erü ngürüãchi tá wüxi i duũxũ i pecadu üechaxũ quingucuchixẽẽ, rü cugagu tá nixĩ erü tama icuxuãẽ. ;Rü meã cugüna nadau

na tama pecadugu cunguxúcèx! ²³ Rù ngēma na cunguxnecauxū i ñuxguacū, rù name nixī i írarūwa binune cuyaxaxū, rù tama i dexáxicatama. ²⁴ Rù nangēxma i duūxūgüarū pecadugü i noxtacüma ngóxū naxūpa na Tupana nūxna çaxū. Natürü nangēxma i to i pecadugü i duūxūgüarū rù tãütáma nangox ñuxmatáta naãneärü guxwa nanguxgu rù Tupana tūxna icagügu. ²⁵ Rù ngēxgumarüü ta nangēxma i duūxūgüarū puracügü i mexū i Tupanacèx naxügüxū i ñuxma marü nūxū idauxū. Rù nangēxma ta i puracügü i mexū i ñuxma tama nūxū idauxū natürü yixcūra tá nūxū idaugüamaxū.

6

¹ Guxāma ya yíxema yaxōgüxe rù ixāärü coriāxē, rù tanaxwèxe i tūmaärü corixū tangechaū na ngēmaäcü taxucürüwa texé Tupanachiga rù tórü nguxēētaechiga chixri idexaxúcèx. ² Rù ngēxguma chi wüxi ya duūxē ya Tupanaāxū yaxōxē rù wüxi i cori i tūmarüü yaxōxūmaã tacoriāxgu, rù tama tanaxwèxe i ngēma na tūmaēneē yīxúcèx nūxū tarüxo na nūxū tangechauxū i tūmaärü cori. Natürü tanaxwèxe i yexeraäcü meã nūxū tapuracü erü tūmaärü cori i nūxū tarüngüxēxū i tūmarüü yaxōxū nixī rù tūmaēneē i Tupana nūxū ngechauxū nixī. Pa Timutéux, chanaxwèxe i meãma cunangüxēē i ngēma ore i cumaã nūxū chixuxū, rù guxūma i yaxōgüxūpēxewa nūxū quixu.

Tupanaärü ore rù aixcüma tūxū name

³ Rù cumaã nūxū chixu rù nangēxma i duūxügü i namaã nguxēētaegüxū i ngēma nguxēētae i tama namaã wüxiguxū i tórü nguxēētae, rù tama namaã wüxiguxū i tórü Cori ya Ngechuchu ya Cristuarü nguxēētae i mexū, rù tama namaã wüxiguxū i ngēma nguxēētae i Tupanaärü orewa ngóxū. ⁴ Rù cumaã nūxū chixu rù yíxema ngēmaäcü nguxēētaexe rù tügü ticuèxüü rù taxuūma tacuèx. Rù ngēmacèx ngēxürüüxūmare i dexa rù naxcèx tachoxūgawèxe, rù tama texéga taxīnūchaū, rù düxwa ñoma tiðaawexürüü tixī namaã i ngēma tūmacüma. Rù ngēmagagu rù taxāxūachiwèxe, rù tanuxwèxe, rù togümaã taguxchiga, rù taxúxeaxūma tayaxō. ⁵ Rù ngēmaäcü i ngēma duūxügü i chixēāégüxū, rù nügümaã nanuēēcha, rù tama nūxū nacuèxgü i ngēma ore i aixcüma ixīxū, rù nagu narüxīnūē rù Tupanaärü orewa nixī i dīeru ngīxū nayauxgüxū. ⁶ Rù aixcüma nixī i Tupanaärü orewa nūxū iyarüngauxū i taxūma i mexū, natürü ngēma mexū rù tūmacèxicatama nixī ya yíxema namaã taãégüxe i ngēma marü tūxū ngēxmaxū. ⁷ Rù yixema rù yexguma noxri ixíraegu, rù ngearü yemaxūāxēmaã tabue i ñoma i nañewa. Rù ngēxguma iyuxgu rù taxucürüwa tayange i tórü ngēmaxügü. ⁸ Natürü ngēxguma tūxū nangēxmagu i taxchiru rù tórü òna rù name nixī i ngēmamaātama tataãégü. ⁹ Natürü ngēma duūxügü i dīeruāxgüchauxū, rù tama yaxna namaã naxīnūē i ngēxguma ngēma dīeruarü ngúchaū nūxū poragu. Rù ngēmacèx nagu nayi i muxūma i ngúchaūgü i taxuwama mexū i chixexūwa nagagüxū, rù ngēmacèx düxwa i ngēma duūxügü rù poraäcü nachixe rù norü guxūmaãma inayarütauxe. ¹⁰ Erü ngēma na dīeruguama rüxīnūxū rù ngēma nixī i guxūma i chixexūgüarü ügü. Rù nangēxma i ñuxre i duūxügü i dīeruguama rüxīnūēxū rù ngēmacèx Tupanana nixīgachi. Rù ngēmaäcü nügünatama guxchaxū naxāgü rù nügüxūmata ngechaū nanguxēégü.

Tupanaāxū yaxōgüamaxūchiga

¹¹ Natürü cumax, Pa Timutéux, rù wüxi ya yatü ya Tupanaxū yaxōcü quixī. ¡Rù ngēmacèx nūxna ixūgachi i guxūma i ngēma chixexū! ¡Rù meã Tupanapēxewa namaxū, rù norü ngúchaū naxü, rù meã nūxū yaxō, rù nūxū nangechaū i duūxügü, rù yaxna namaã naxīnū! Rù tama name

i cugü quicuèxüxü. ¹² ¡Cugü naporaxêê na meã cuyaxõõmaxüçèx rü cunaxüamaxüçèx i Tupanaârü puracü ega woo tacü rü guxchaxü cuxü üpetügux! ¡Rü cugüna nadau na ngemaãcü taguma cuxna iyanaxoxüçèx i ngema maxü i taguma gúxü! Yerü yema maxüçèx nixi ga noxri Tupana cuxü yaxuxü ga yexguma muxüma ga duüxügüpêxewa nüxü quixuxgu na ñuxâcü Ngechuchu ya Cristuaxü na cuyaxõxü. ¹³⁻¹⁴ Rü ñuxma Pa Timutéux, rü napêxewa ya Tupana ya guxâxüma maxêxêêcü, rü napêxewa ya Ngechuchu ya Cristu ga âêxgacü ga Piratumaã nüxü ixücü ga ñuxâcü Nanatü ya Tupanaãxü na yaxõõxü, rü cuxü chamu na naga cuxinüxü i ngêma ore i cumaã nüxü chixuxü. Rü tama chanaxwêxe i cunaxüchicüü i ngêma ore, na taxüema texé tacüçèx cuxü oregüxüçèx rü chixri cuchiga idexaxüçèx. Rü chanaxwêxe i ngêmaãcü meã cunaxü ñuxmatáta ínangu ya tórü Cori ya Ngechuchu ya Cristu. ¹⁵ Erü ngêma ngunexü i Tupana nagu naxwêxexügu rü tá Cristuxü nangoxêê. Erü nüxicatama Tupana nixi, rü nüma nixi i aixcüma mecü yiixü rü guxüetüwama nangêxmaxü. Rü guxü i âêxgacügüarü Æêxgacü yiixü, rü guxü i corigüarü Cori yiixü. ¹⁶ Rü nüxicatama nixi na taguma nayuxü. Rü nüma rü poraãcü íngáonexüwa namaxü, rü taxucürüwa texé ngêma ngóonexüna tangaicama. Taguma wüxi i duüxü nüxü nadau, rü taxuacüma texé nüxü tadau. Nüma rü guxüguma naporaxüchi rü taguma inayarüxo na Æêxgacü yiixü. Rü ngêmacèx tanaxwêxe i guxâma nüxü ticuèxüügüecha. Rü ngêmaãcü yi. ¹⁷ Rü yixema muarü dîeruáxe i ñoma i naãnewa, ¡rü tümamaã nüxü pixu na tama ngêmamaã tügü ticuèxüügüxüçèx rü tama nagu tarüxünüèxüçèx na ngêma tümäärü dîeruwa nüxü itayangaugüxü i tümäärü maxü! Erü ngêma dîeru rü paxa tá nagux. Natürü narümemaê nixi i Tupanaga taxinü, erü yimawa nixi i nüxü itayangaugüxü i tümäärü maxü. Rü nüma nixi i poraãcü tüxna naxããxü i guxüma i tacü i inaxwêxexü na itaãégüxüçèx. ¹⁸ ¡Rü namaã nüxü ixu i ngêma muarü dîeruãxgüxü, rü name na ngêmamaã mexü naxügüxü rü togü i duüxügüxü nangüxêêgüxü! Rü ngêmaãcü tá namu i ngema mexügü i naxügüxü i Tupanapêxewa. Rü tanaxwêxe i nümagü i muarü dîeruãxgüxü rü na ínamemaregüxü na togüna naxããxü rü namaã nangauxü i ngêma norü ngêmaxügü. ¹⁹ Rü ngêmaãcü tá nüxü nangêxma i norü mexügü i daxüguxü i naãnewa, rü tá nanayauxgü i ngêma maxü i aixcüma ixixü.

Pauru rü Timutéuxü namu, rü yemaãcü inayacuèxêê ga norü popera

²⁰ Pa Timutéux, ¡meã namaã nangüexêêtae i guxüma i ngêma ore i cuxü chamuxü! Rü tama name na icurüxünüxü i ñoma i naãnecüãxârü dexagümare i taxuwama mexü rü ngêma ore i doramare ixixü i duüxügü nüxü ixügügünetaxü na ore i nawa nüxü icuáxü yiixü. ²¹ Erü ñuxre i nümagü i ngêma noxrütama cuèxgu íxü, rü düxwa ngêmagagu Tupanana nixigachi. Rü chanaxwêxe i Tupana meã pexü narüngüxêê.

Rü nuãma pexna,
Pauru

NORÜ TAXRE GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxe ga Pauru

¹ Pa Timutéux, choma i Pauru nixi i cuxcex chanaxümatüxü i ñaã popera. Rü choxü nixi ga namuxü ga Ngechuchu ya Cristu, yerü yemaäcü nanaxwexe ga Tupana. Rü nüma choxü namu na nüxü chixuxüçex na ñuxäcü tüxü nangëxmaxü i maxü i taguma gúxü, ega aixcüma Ngechuchu ya Cristuaxü yaxögügu. ² Cuxü changechaü, Pa Chaune, Pa Timutéux. Rü chanaxwexe ya Tanatü ya Tupana rü Ngechuchu ya Cristu ya törü Cori na cuxü nangüxëëgüxü rü nüxü cungechaütümüügüxü rü cuxü nataäexëëgüxü.

Tama name i taxãne na Cristuchigaxü ixuxü

³ Guxüguma i chütacü rü ngunecü rü cuxna chacuëxächixü i chorü yumüxëwa, rü poraäcü cuxcex moxë Tupanana chaxã. Rü nüxü nixi i chapuracüxü i mexü i chauãemaã, yexgumarüü ga nuxcümaügüxü ga chorü oxigü naxügüxürüü. ⁴ Choma rü nüxna chacuëxächi na ñuxäcü poraäcü chauxcex cungechaüxü rü chauxcex cuxaxuxü ga yexguma cuxna íchixüxgu. Rü wenaxärü cuxü chadauxchaü na aixcüma chataäexüçex. ⁵ Erü nüxna chacuëxächi na ñuxäcü aixcüma Tupanaãxü cuyaxõxü. Rü curü noxë ga Loída rü cue ga Euníchia rü tüma rü woetama tüxira Tupanaãxü tayaxögü rü nüxü chacuëx i ñuxma rü cuma rü ta aixcüma cuyaxõxü. ⁶ Rü ngëmacèx cumaã nüxü chixu na cugü cuporaxëëxü na yexeraäcü cunaxüamaxüçex i ngëma Tupanaärü puracü ga naxcèx cuxna naxããxü ga cuëx ga yexguma noxri cuxü chingögüäcüma cumaã chayumüxëgu. ⁷ Yerü Tupana rü tama tüxna nanamu ga naãe i tüxü muñëëxü. Natürü tüxna nanamu ga Naãe i Üünexü na tüxü naporaxëëxüçex na aixcüma duüxügüxü ingechaügüxüçex rü meã yigümaã icuáxüçex. ⁸ Rü tama chanaxwexe na cuxänexü na nüxü quixuxü i nachiga ya törü Cori. Rü ngëxgumarüü ta tama chanaxwexe i chauxcex cuxãne i ngëma na chapoxcuxü naxcèx i Tupanaärü ore. Rü name nixi i yaxna namaã cuxinü i ngëma ngúxü i cuxcex ínguxü nagagu i ngëma ore i mexü i nüxü quixuxü. Rü Tupana tá cuxü naporaxëë. ⁹⁻¹⁰ Rü Tupana tüxü namaxëxëë rü tüxü nade na naxcëxicatama imaxëxüçex. Natürü tama tacü rü mexü na ixüxügagu nixi ga yemaäcü tamaã namecümaxü ga Tupana. Natürü yemaäcü tüxü narüngüxëë yerü woetama yema nixi ga nanaxwëxexü yerü Ngechuchu ya Cristugagu tüxü nangechaü. Rü nüma ya Tupana ga tautama naãne üxgumama tüxü ngechaüçü, rü yexguma ínanguxgu ga törü maxëëëruü ga Ngechuchu ya Cristu, rü yexguma nixi ga Tupana tüxü nüxü dauxëëxü na ñuxäcü poraäcü tüxü nangechaüxü. Rü nüma ga Cristu nixi ga iyanaxoxëëãxü na iyuxuchixü yerü nüma rü yuwa ínarüda rü wena namaxü. Rü norü orewa tüxü nüxü nacuëxëë na yixema rü ta tüxü nangëxmaxü i ngëma maxü i taguma gúxü ega nüxü yaxõxgu. ¹¹ Rü Tupana choxü ningucuchixëë na nüxü chixuxüçex i ngëma norü ore i mexü. Rü choxü namu na ngëma oremaã chanangüexëëxüçex i duüxügü i guxüwama. ¹² Rü ngëmacèx nixi i poraäcü ngúxü chingexü rü chapoxcuxü i ñuxmax. Natürü tama naxcèx chaxãne i ngëma, erü choma nüxü chacuëx na texéaxü chayaxõxü. Rü nüxü chacuëx na naporaxü i nüma na nüxna nadauxüçex i ngëma puracü i choxna naxãxü rü namaã inacuáxüçex i chauãe i guxügutáma ñuxmatáta ngëma ngunexü i nagu wena núma naxüxü. ¹³ Rü chanaxwexe i meãma nagu quixü

i ngēma nguxēētae i mexū ga chauxūtawa naxcèx cungúxū. Rū name nixī i meā nūxū cuyaxōōma ya Ngechuchu ya Cristu rü meā nūxū cungechaū i guxūma i duūxūgü, erü Cristuarü duūxū quixī. ¹⁴ Rū name nixī i Tupanaāē i Ūünexū i tawa maxūxūārü ngūxēēmaā ícunapoxū i ngēma nguxēētae i mexū i Tupana cuxna āxū. ¹⁵ Cuma marü nūxū cucuèx rü guxūma ga yema yaxōgūxū ga Áchiaarü naānewa ne íxū rü marü choxna naxīgü. Rū yematanüwa nayexma ga Figueru rü Ermóquene. ¹⁶ Onesíferu rü muēxpūxcüna choxū nataāēxēē, rü tama chauxcèx naxāne i ngēma na chapoxcuxū. Rū ngēmacèx chanaxwèxe i tórü Coriaxū nangechaūtümüügü i guxūma i natanūxūgü. ¹⁷ Rū yexguma noxritama Dumawa nanguxgu ga nūmax, rü chauxcèx nadauecha rü ñuxmata choxū iyangau. ¹⁸ Cuma meāma nūxū cucuèx ga ñuxācü tüxū na nangūxēēxū ga Onesíferu ga Epéchiuarü íānewa. Rū ngēmacèx chorü yumūxēwa naxcèx íchaca na Tupanaāxū nangechaūtümüūxūcèx i ngēxguma wena ñoma i naānewa naxūxgu ya tórü Cori ya Ngechuchu.

2

Ngechuchu ya Cristuarü puraciütanūxū i mexūchiga

¹ Rū ñuxma, Pa Chaune, Pa Timutéux, ¡rü cugü naporaxēē namaā i ngēma pora i Ngechuchu ya Cristu cuxna āxū! ² Yema ore ga chauxūtawa nūxū cuxīnūxū ga yexguma muxūma ga duūxūgüpēxewa nūxū chixuxgu, rü chanaxwèxe i ñuxma cuxi ngēma oremaā cunangúexēē i togü i yatügü i meā naāēxū cuèxgūxū na nūxī togūxū nangúexēēxūcèx namaā i ngēma ore. ³ Rū tama name i naxcèx cumuū na Ngechuchu ya Cristuarü ore-gagu ngúxū quingexū. Natürü name i namaā cupora ñoma wūxi i mexū i norü churararū. ⁴ Rū wūxi i duūxū i churarawa ngēxmaxū, rü taxucürüwama to i puracü i tama churaraarü ixīxūgu narūxīnū. Natürü ngēma norü āēxgacü nagu namuxū i puracügu nixī i naxīnūxū na ngēmaācü norü āēxgacūxū nataāēxēēxūcèx. ⁵ Rū ngēxgumarū ta wūxi i duūxū i wūxi i ínūcawa nügü ingucuchixēēxū, rü taxuacüma nanayaxu i norü āmare ega chixri naxīnūcèxwèxegu rü tama ngēma ínūcaarü āēxgacüga naxīnūgu. ⁶ Rū texé ya naānewa puracüxe rü name nixī i tüxira tanayaxu i tümanetüarü o. ⁷ ¡Rü guxūguma nagu rüxīnū i ñāā ore i cumaā nūxū chixuxū! Rū nūma ya Cori ya Ngechuchu tá cumaā inananguxūxēē i guxūma na nūma nanaxwèxexūācüma cunaxūxūcèx i ngēma puracü. ⁸ ¡Rü nūxna nacuèxāchi ya Ngechuchu ya Cristu ya Dabítanūxū ga guma yuwa írüdacü! Rū yimachiga nixī i ngēma ore i mexū i duūxūgūmaā nūxū chixuxū. ⁹ Rū ngēma oregagu nixī i ngúxū na chingexū rü ñoma wūxi i máētaxūrū nūma poxcupataüwa cadenamaā chichotaxū. Natürü Tupanaarü ore i mexū, rü guxūwama nanguama rü taxucürüwama texé tayachota. ¹⁰ Rū ngēmacèx yaxna namaā chaxīnū i ngēma ngúxū i chingexū naxcèx i ngēma duūxūgü i Tupana dexū. Erü chanaxwèxe i nūmagü rü ta Ngechuchu ya Cristuaxū nayaxōgü, rü ngēmaācü na nayauxgūāxūcèx i maxū i mexū i taguma gúxū. ¹¹ Rū pemaā nūxū chixuxchaū i wūxi i ore i aixcüma ixīxū. Rū ngēxguma Cristu yuxūrū norü orecèx iyuegu, rü naxrū tá ta wena tamaxē na nūma ínangēxmaxūwa ingēxmagūxūcèx. ¹² Rū ngēxguma ñoma i naānewa yaxna namaā ixīnūēgu ega ngúxū ingexgu, rü daxūguxū i naānewa rü wūxigu namaā āēxgacü tá tixīgü. Rū ngēxguma tama Cristuxū icuáxchaūgu i ñoma i naānewa, rü nūma rü tātütama tüxū nacuáxchaū i daxūguxū i naānewa. ¹³ Natürü woo ñuxguacü i yixema rü tama aixcüma naxūxgu i ngēma Tupanamaā ixunetaxū, natürü nūma ya Tupana rü guxūguma nayanguxēē i ngēma tamaā inaxunetaxū, erü taxuacüma nügütama nawomūxēē.

Wüxi i mexü i puracütanüxü i Tupana namaã taãxüchiga

¹⁴ Rü ngēma yaxōgüxü i cuxütawa ngēxmagüxü, rü name nixī i Tupanaegagu nüxna nüxü cucuèxāchixēē na tama nuxcūmaügüxü i ore i taxuwama mexüçex nügūmaã na yaporagatanüçüxüçex. Erü ngēma rü wüxi i chixexü nixī, rü nanachixēãxēē i ngēma duüxügü i nüxü ñnüëxü. ¹⁵ ;Rü cugü naporaxēē na meã cunaxüxü i Tupanaärü puracü na cumaã nataãxüçex i ngēxguma napēxewa cunguxgux rü ngemaãcü taxucèxma cuxānexüçex i ngēxguma nüma cuxna nacaxgu naxcèx i curü puracüchiga! ;Rü ngēmacèx name i aixcūma meã namaã cungüexēētae i ngēma ore i mexü i aixcūma ixīxü! ¹⁶ ;Rü nüxü rüxo i ñoma i nañnecüãxärü dexagümare i taxuwama mexü! Erü ngēma duüxügü i ngēma dexagümaregu ñxü, rü guxüguma yexeraãcü chixexügu naya. ¹⁷ Rü ngēma norü nguxēētae i ngēma duüxügü, rü ñoma wüxi i ñaaweane i tüxü íyimachixēēxürü nixī. Rü yema nixī ga nüxü ngupetüxü ga Imenéu rü Firetu. ¹⁸ Yerü nidoragümare ga nüxü na yaxugüexü rü marü na nangupetüxü i yuetaarü dachiga. Rü yemaãcü nanawomüxēēgü ga ñuxre ga duüxügü na tama noxrirü yaxōgüãxüçex i Tupanaärü ore. ¹⁹ Natürü Tupanaärü ore rü taguma inayarüxo rü taguma naxüchicüü. Rü ngēma norü orewa rü ñanagürü:

“Törü Cori ya Tupana nüxü nacuèx i texé tixī ya norü duüxügü ixīgüxe. Rü guxāma ya yixema nüxü ixuxe na Ngechuchu ya Cristu rü tümaärü Cori yīxü, rü name nixī i nüxna tixīgachi i guxūma i chixexü”, ñanagürü i ngēma norü orewa. ²⁰ Wüxi i duüxü i dñeruãxüchixü rü napatawa nangēxma i poratu i uirunaxcèx rü dñerumünaxcèx. Rü nangēxma ta i poratu i nañnaxcèx rü waixümünaxcèx. Rü ngēma poratu i uirunaxcèx rü dñerumünaxcèx rü mexü i norü ñnacèx nixī. Natürü ngēma poratu i nañnaxcèx rü waixümünaxcèx rü guxchirechixü nixī. ²¹ Rü ngēxguma wüxi i yaxōxü naxwèxegu na aixcūma mexü i Tupanaärü puracütanüxü na yīxü, rü name nixī i nüxna nixügachi i guxūma i chixexü. Rü ngēxguma tá nixī i Tupanapēxewa aixcūma naxüünexü na naxüãxüçex i nagúxüraüxü i puracü i Tupana namaã nüxü ixuxü. ²² ;Nüxü rüxo i guxūma i ngēma chixexü i ngextüxüçügü nagu rüxñnüëxü! ;Rü meã Tupanapēxewa namaxü rü aixcūma nüxü yaxō! ;Rü nüxü nangechaü i guxūma i duüxügü, rü tãxü i namaã cunuxü! ;Rü ngēmaãcü namaxü wüxigu namaã i guxūma i ngēma duüxügü i aixcūma Tupanacèx maxēxü rü ngemaãcü yumüxēgüxü! ²³ Rü tama name i naxcèx icurüxñnü i ngēma dexagü i taxuwama mexü. Erü ngēma dexagügagu rü düxwa nügüchi naxaie i duüxügü. ²⁴ Rü wüxi i Tupanaärü puracütanüxü rü tama name na texemaã núcèx nadauxü. Rü narümemaie nixī na guxāma namecūmaxü.. Rü nanaxwèxe i yaxna namaã naxñnüãcüma meã duüxügüxü nangüexēē i Tupanaärü ore. ²⁵⁻²⁶ Rü wüxi i Tupanaärü puracütanüxü rü name na yaxna namaã naxñnüãcüma meã nayaxucuxēgüãxü i ngēma duüxügü i tama irüxñnüëchaüxü. Rü name i ngēmaãcü ínananguxēē na Tupana nüxü rüngüxēëxü i ngēma duüxügü na nüxü naxoexüçex i norü chixexü rü nüxü nacuèxgüxüçex i ngēma ore i aixcūma ixīxü. Erü Tupana nanaxwèxe na naxuãgüxü i ngēma duüxügü rü nawa ínanguxüxü i ngēma chixexü i ngoxo i Chataná nagu nayixēëxü na noxrütama ngüchaü namaã naxüxüçex.

3

Nuxācü tá nixī i duüxügüçüma i ngēxguma nagúxchaügu i nañne

¹ Rü chanaxwèxe i nüxü cucuèx rü ngēxguma nagúxchaügu i nañne rü tá nangēxma i ñcūmaxügü rü guxchaxügü naxcèx i duüxügü. ² Rü duüxügü rü tá nügügüxicatama narüxñnüë, rü norü dñerugama tá narüxñnüë. Rü

tá nügü nicuèxüxügü, rü ngēmaäcü tãütáma nüxü nacuèxgüchaü i togü i duüxügü i tama naxrüü taarü dïeruãxgüxü. Rü chixri Tupanachiga tá nidexagü, rü tãütáma nanatüga rü naēga naxĩnüēchaü. Rü tãütáma moxē inaxã i ngēxguma Tupana nüxü rüngüxēēgu, rü ngēmaäcü tãütáma nüxü nacuèxgüchaü i Tupanaärü ore. ³ Rü tãütáma nagu narüxĩnüē i togü i duüxügüxü na nangechaüxü, rü tãütáma nüxü nangechaütümügü. Rü tá naxoregütèèxgü, rü tãütáma nügü naporaexēē na yaxna namaã naxĩnüēxüçèx i naxüneärü ngüchaüxü. Rü tá nichixecüma, rü tá naxchi naxaie i guxüma i ngema mexü. ⁴ Rü duüxügüechitawèxegüxü tá nixĩgü, rü nuēwèxexü tá nixĩgü, rü nügü icuèxüüxüxü tá nixĩgü. Rü tá norü ngüchaüçèxama nadaugü, rü tãütáma Tupanaxü nacuèxgüchaü. ⁵ Rü tá nügü nayaxögüxüchinetaxēē natürü ngēma norü chixexü i naxügüxüwa tá nangoxoma na tama aixcüma yaxögüãxü i ngēma ore i mexü. Rü ngēma duüxügü i ngēmaäcü maxēxü, rü tama name na namaã cuxãmücüxü rü natanügu cuxãxü. ⁶⁻⁷ Erü ngēma duüxügütanüwa nangēxmagü i nümaxü i İpatagu ichocuetanüxü. Rü norü ngüxēētaemaã nayawomüxēēgü i ngēma ngexügü i ngema ngēxmagüxü i tama naãxü icuáxü rü chixri maxēxü. Rü ngēma ngexügü, rü norü ngüchaügütama chixexüwa nanagagü, rü ngēmacèx woo guxüguma nangúe natürü taguma aixcüma nüxü nacuèxgü i ngēma ore i aixcüma ixĩxü. ⁸ Rü ngēma duüxügü i chixexümaã ngüxēētaegüxü, rü chixexügüxicatama narüxĩnüē, rü tama aixcüma nayaxögü i Tupanaärü ore. Rü naxchi naxaie i ngēma ore i aixcüma ixĩxü, naxrüü ga yema yuüxügü ga Yane rü Yáübre ga tama Moïchéga İnüēchaüxü. ⁹ Natürü tãütáma muxü i duüxügü nüxü nayaxögü. Erü guxüwama i duüxügü rü tá nüxü nicuèxãchitanü na wüxi i duüxügü i chixexügu rüxĩnüexü rü ngeãēmarexü yixĩgüxü naxrüxü ga yema taxre ga tama Moïchéga İnüēchaüxü.

Ucuxēmaã inyacuèxēē ga Pauru na Timutéumaã yadexaxü

¹⁰⁻¹¹ Natürü cumax, Pa Timutéux, marü nüxü cucuèx ga ñuxãcü meã na chanangüxēēxü ga duüxügü, rü ñuxãcü meã chamaxüxü, rü ñuxãcü nagu charüxĩnüxü rü meã chayaxõxü, rü ñuxãcü yaxna namaã chaxĩnüxü ga duüxügü rü nüxü changechaüxü. Rü cuma nüxü cucuèx ga ñuxãcü na chaugü chaporaxēēxü na yaxna namaã chaxĩnüxü i guxchaxügü. Yerü ga duüxügü rü chowe ningexütanü na choxü yamèxgüxüçèx. Rü cuma rü nüxü cucuèx ga tacü choxü na üpetüxü ga Aütioquáwa rü Icúniüwa rü Listrawa, rü ñuxãcü chowe na yangexütanüxü rü poraäcü ngüxü chingexü. Natürü tórü Cori ya Tupana choxü İnapoxü na tama choxü yamèxgüxüçèx. ¹² Rü aixcüma cumaã nüxü chixu rü guxãma ya yixema naxwèxegüe na Ngechuchu ya Cristucèx tamaxēxü, rü togü tá tümachi naxaie rü chixri tá tümamaã nachopetü. ¹³ Natürü ngēma duüxügü i chixecümagüxü rü ngēma duüxügü i idoratèèxgüxü rü yexeraxü i chixexügu tá nayi. Erü Chataná marü nayawomüxēēgü, rü ngēmacèx nüxü togüxü nawomüxēēgü. ¹⁴ Natürü i cuma rü name nixĩ i guxüguma meã nagu quixü i guxüma i ngēma ore i marü cungüxü. Erü cumatama rü nüxü cucuèx na aixcüma yĩxü i ngēma ore, rü nüxü cucuèx na texégü tixĩgüxü ga guxema namaã cuxü ngüxēēgüxe. ¹⁵ Rü cuma nüxü cucuèx rü cubuxgumamatama nawa cungüx i ngēma Tupanaärü ore i üünexü. Rü ngēmawa cunayaxu i cuèx na nüxü cucuáxüçèx i ñuxãcü tüxü na nangēxmaxü i maxü i taguma gúxü ega Ngechuchu ya Cristuaxü yaxögügu. ¹⁶ Rü guxüma i Tupanaärü ore i ümatüxü rü nügüãēwatama nanayaxu ga Tupana. Rü ngēma ore rü name na duüxügüxü namaã ingüxēēxü, rü namaã yaxucuxēgüxü rü namaã iyanawèxãchixēēgüxü, rü namaã nangüxēēxü na meã Tupanapèxewa namaxēxüçèx. ¹⁷ Rü ngēmaäcü i ngēma ore rü tüxü

narüngüxëẽ ya yíxema Tupanaãrũ ixĩxë, na meã nüxũ tacuáxüçèx i ngëma Tupana naxwèxexũ rü ítamemarexũ na tanaxüxũ i nagúxüraüxũ i puracü i Tupana tümamaã nüxũ ixuxũ.

4

1-2 Rũ nüma ya Ngechuchu ya Cristu ya núma tá ücü na nüxũ yacagüxüçèx i ngëma duüxüğü i maxëxũ rü ngëma marü yuechiréxũ, rü yimapéxewa rü Tupanapéxewa cuxũ chamu na nüxũ quixuxüçèx i ngëma ore i mexũ. Rũ ngëxguma cuxũ yatauxchaãchigu rü woo cuxũ naguxchagu, rü chanaxwèxe i nüxũ quixuama i ngëma ore. Rũ ngëmaãcü chanaxwèxe na icuyanawëxãchixëẽgüxũ rü meã cuyaxucüxëgüxũ rü nüxũ cunangüchaüxëẽxũ i duüxüğü. Rũ name nixĩ i yaxna namaã cuxĩnüãcüma meã cunangüxëẽ. ³ Erü yixcüra i duüxüğü rü tãütáma nüxũ naxĩnüëchaũ i ngëma ngüxëẽtae i mexũ. Erü ngëma duüxüğü rü nichixecüma. Rũ ngëmacèx naxcèx nadaugü i norü ngüxëẽruüğü i nüma nanaxwèxegüxũãcüma nangüxëẽxũ. ⁴ Rũ tãütáma nüxũ naxĩnüëchaũ i Tupanaãrũ ore i aixcüma ixĩxũ. Erü ngëma ore i doramare ixĩxüguama tá narüxĩnüë. ⁵ ¡Natürü cuma rü meã cügüna nadau, rü ínaxuãẽ, rü namaã naporá ega ngúxũ cuxũ üpetügu! ¡Rü nüxũ ixuama i ore i mexũ i tüxũ maxëxëẽxũ, rü meã yangüxëẽ i ngëma puracü i Tupana cuxna äxũ! ⁶ Tãütáma muxũ i ngunexũ ñoma i naãnewa changëxma erü marü choxũ ningaica na Tupanaãrũ puracü chaxüxügagu chayuxũ rü choxũ na yamëxgüxũ i duüxüğü. ⁷ Rũ choma rü marü chayangüxëẽ i ngema puracü i Tupana choxna äxũ. Rũ ñuxma na nagúxũ i ngema puracü rü taguma nüxũ charüxo na chayaxõxũ. ⁸ Rũ ñuxma rü marü Tupana choxũ namaã nangüxũ i ngëma ãmare i mexëchixũ ya tórü Cori ya Ngechuchu ya ãëxgacü ya mecü tá choxna äxũ i ngëxguma wenaxãrũ ñoma i naãnewa naxüxgu. Rũ tãütáma chaxica choxna nanaxã i ngëma ãmare, natürü tá tüxna nanaxã ya guxãma ya yíxema tümããrũ ngüchaümaã ínangüxëẽgüxe na wenaxãrũ núma naxüxũ.

Timutéuxũ naxucüxë ga Pauru

⁹ Cumaã nüxũ chixu rü chanaxwèxe i paxa nuã cuxũ, rü choxũ ícuyadau. ¹⁰ Dema rü ñoma i naãneãrũ ngëmaxügu naxĩnüxügagu choxna nixũ rü ñãne ga Techarónicawa naxũ. Rũ Crechéüte rü Gárataanewa naxũ, rü Titu i Darumáchiaanewa. ¹¹ Rũ Lucaxicatama nixĩ i ñuxma chauxütawa ngëxmaxũ. Rũ chanaxwèxe i naxcèx cudau i Marcu na nuã cunagaxüçèx. Erü nüma rü chauxcèx name na choxũ na nangüxëẽxũ i ñãã puracüwa. ¹² Rũ Tíquicu rü ñãne ya Epéchiuwa chanamu. ¹³ ¡Ngëxguma nuã cuxüxgu rü nuã nange i chorü gáuxüchiru ga ñãne i Tróawa ngëxmaxũ ga Carpupatawa chatáxũ! Rũ chanaxwèxe i nuã cunana i chorü poperagü. Rũ guxüãrũ yexera chanaxwèxe na nua cunanaxũ i chorü poperagü i idixgüpütaxũ. ¹⁴ Areyáüdrü i cobrenaxcèx i buetarearü üwa puracüxũ rü porãcü chixri chomaã naxüpetü. Natürü Tupana nüxũ nacüex i ñuxãcü tá na napoxcuãxũ naxcèx ga yema chixexũ ga chomaã naxüxũ. ¹⁵ ¡Meã cügüna nadau na tama chixexũ cumaã naxüxüçèx! Erü porãcüxüchima naxchi naxai i Tupanaãrũ ore i mexũ. ¹⁶ Yexguma noxrixüchima ãëxgacügüpëxewa chaugüétüwa chideaxgu rü taxúema choxũ tarüngüxëẽ. Guxüma choxna nibuxmü. Natürü tama chanaxwèxe ya Tupana rü nagu narüxĩnü i ngëma. ¹⁷ Natürü tórü Cori choxũ naporaxëẽ rü choxũ narüngüxëẽ na choxũ natauxchaxüçèx na nüxũ chixuxüçèx ga norü ore i mexũ i tüxũ maxëxëẽxũ. Rũ yemaãcü guxüma ga yema duüxüğü ga tama yaxõgüxũ ga yéma yexmagüxũ rü nüxũ naxĩnüë ga yema ore. Rũ yemaãcü tórü Cori ya Ngechuchu choxũ ínangüxuchixëẽ ga

yexguma taxũ ga ãũcũmaxũwa chayexmagu. ¹⁸ Rũ nũma ya tórũ Cori tá choxũ íngaxuchixẽẽ nawa i guxũma i chixexũgũ. Rũ tá choxna nadau na ngextá ãẽxgacũ íyĩxũwa choxũ nagaxũcèx. Rũ name i guxũguma nũxũ ticuèxũgũ. Rũ ngẽmaãcü yĩ.

Pauru rũ wenaxãrũ Timutéuxũ narũmoxẽ rũ naxcèx ínaca na Cori ya Ngechuchu ya Cristu nũxũ rüngũxẽẽxũ

¹⁹ Chanaxwèxe i chauégagu nũxũ curũmoxẽ i Prisila, rũ Aquiru, rũ Onechéperutanũxũgũ. ²⁰ Eratu rũ ããne i Corĩtiugu narũxãũx. Rũ Turuquínu rũ idaawexũma ããne i Miretuwa chandatèx. ²¹ Rũ naxũpa i gáuanexũ rũ chanaxwèxe i nuã cuxũ. Rũ cuxũ narũmoxẽgũ i Eubúru, rũ Prudẽte, rũ Linu, rũ Cáudia, rũ guxũma i taeneẽgũ i yaxõgũxũ. ²² Rũ chanaxwèxe i tórũ Cori ya Ngechuchu ya Cristu cumaã nangẽxma, rũ Tupana pexũ narũngũxẽẽ ya guxãma i pemax.

Rũ nuãma pexna,
Pauru

POPERA GA TITUCAX NAXÜMATÜXÜ GA PAÜRÜ

Tituxü narümoxë ga Pauru

¹⁻² Pa Titux, choma i Pauru i Tupanaärü puracütanüxü nixi i cuxcèx chanaxümatüxü i ñaã popera. Rü Ngechuchu ya Cristu nixi ga choxü mucü na ngëma duüxügü i Tupana dexümaã nüxü chixuxüçèx i norü ore na Tupanaãxü yaxögüãxüçèx rü nüxü nacüèxgüxüçèx i ngëma norü ore i aixcüma ixixü i tüxü rüngüxëëxü na naxcèx imaxëxüçèx. Rü ngëmaãcü Tupanaãxü tayaxögü rü naxcèx tamaxëchaü erü tanayauxgüchaü i ngëma maxü i taguma gúxü. Rü ngëma maxü i taguma gúxü nixi ga nuxcümaxüchima ga yexguma tauta naãne üxgu Tupana ya taguma idoracü nüxü ixuxü. ³ Rü ñuxma rü marü nawa nangu na Tupana tüxü nüxü cuèxëëxü i ngëma norü ore i mexü i tüxü maxëxëëxü. Rü ngëmacèx nümatama ya Tupana ya törü maxëxëëruü choxü namu na nüxü chixuxüçèx i ngëma norü ore. ⁴ Pa Titux, cuma rü chaune quixi i Tupanaärü orewa yerü chauxütawa cunayaxu ga Tupanaärü ore ga noxri rü ñuxma rü chauxrü cuyaxõ. Rü chanaxwëxe i cuxü narüngüxëëgü rü cuxü nataãëxëëgü ya Tanatü ya Tupana rü Ngechuchu ya Cristu ya törü maxëxëëruü.

Tituarü puracü ga yexguma Crétawa nayexmagu

⁵ Rü yexguma Crétaarü capaxügu cuxü chamuxgux, rü cumaã nüxü chixu na yema yaxögüxütanüwa cunaxüxü ga yema puracü ga tama chinguxëëxü ga yexguma cuxna yéma chataegugu. Rü yemacèx cumaã nüxü chixu na wüxichigü ya ñãnewa rü nüxü cuxunetaxü i tupaucaarü ãëxgacügü na ngema yaxögüxümaã inacuèxgüxüçèx, yema cuxü chamuxürüü. ⁶ Rü wüxi i ãëxgacü i yaxögüxüärü, rü name i meã namaxü na taxúema chixri nachiga idex-agüxüçèx. Rü name i wüxitama tixi ya namèx. Rü naxácügü rü name na yaxögüãxü rü meã namaxëxü na taxúema nüxü ixuxüçèx na chixri namaxëxü rü tama nanatüga naxinüëxü. ⁷ Erü yíxema yaxögüxüärü ãëxgacü ixixë, rü Tupanaärü puracü nixi i taxüxü. Rü ngëmacèx tanaxwëxe i aixcüma meã tamaxü. Rü tama name i wüxi i yatü i chixecümaxü tixi rü chixexügu rüxñüxü tixi. Rü tama name na tangãxüxü, rü nucèx tadauxü, rü togü i duüxügüxü tawomüxëëxü norü dñerucèx. ⁸ Natürü narümemae na guxüguma meã duüxügüxü tayaxuxü i tümapatawa, rü aixcüma nüxü tangechaü i ngëma duüxügü i meã maxëxü. Rü tanaxwëxe i wüxi i yatü i aixcüma tümãëxü cuáxe tixi, rü guxüguma duüxügümaã mecümaxë tixi, rü aixcüma Tupanacèx maxüxë tixi, rü guxüguma meã tügümaã icuáxe tixi. ⁹ Rü yíxema yaxögüxüärü ãëxgacü ixixë rü name i nagu tixü i ngëma ore i aixcüma ixixü ga tümamaã nüxü ixuxü na tümã rü ta togüxü tangüexëëxüçèx i ngëma ore i mexü, na ngëmaãcü nüxü tanangüchaüxëëxüçèx rü nüxü tayaxögüxëëxüçèx i ngëma duüxügü i noxri tama yaxögüchaüxü. ¹⁰ Erü nangëxma i muxüma i yaxögüchiréxü i tama aixcüma irüxñüëchaüxü. Rü ngëma guxüärü yexera tama irüxñüëchaüxü nixi i ngëma Yudiügü i yaxögüchiréxü i ñuxma naxwëxegüxü na nuxcümaügüxü i nacümawe naxixü i ngëma yaxögüxü. Rü nümagü rü ore i taxuwama mexüxü nixugügü, rü ngëmaãcü duüxügüxü nawomüxëëgü. ¹¹ Natürü ngëma duüxügü i ngëmaãcü chixri nguxëëtaegüxü, rü chanaxwëxe i noxtacüma icuyanangeëxgüxëë. Erü muxüma i duüxügüxü nachixexëëgü rü ñuxmata ñuxre ya ñpatawachigü rü nanachixexëë i guxüma

i duñxügü na tama aixcüma Tupanaãxü yaxögüãxüçèx. Rù ngëma ore i taxuwama mexümaã duñxügüxü nangúexëë na ngëmaãcü tüxü nawomüxëëgüãcüma ngixü nayauxgüxüçèx i diëru. ¹² Rù wüxi ga yematama capaxüçüãx ga norü tupanaãrü orearü uruü nixi ga natanüxügüxütama ixuxü rü ñaxü:

“Rü ñaã Cretacüãx i duñxügü rü guxüguma doratèëxgüxü nixigü, rü ñoma naëxügürüü nidürae, rü nitaanü, rü nioxochi”, ñaxü. ¹³⁻¹⁴ Rù aixcüma nixi ga yema ore ga nüxü yaxuxü ga yema yatü. Rù ngëmacèx chanaxwëxe i poraãcü cuyaxucüxëgü i ngëma yaxögüxü na aixcüma meã yaxögüãxüçèx, rü tama nagu naxixüçèx i ngëma Yudíugücüma. Rù chanaxwëxe i namaã nüxü quixu na tama naga naxinüëxüçèx ega tacü namuãxgu i ngëma duñxügü i tama nüxü cuëxgüchaüxü i ore i aixcüma ixixü. ¹⁵ Rù yixema aixcüma Tupanapëxewa mexë rü guxüwama tame. Natürü yixema tama aixcüma Tupanapëxewa mexë, rü taxucürüwa tacü rü nacüma i nagu tixüxümaã tügü tamexëë. Rù woo tümaãëwa nagu tarüxñüxüwa rü tachixe erü ngëma nacüma i nagu tixüxümaã Tupanapëxewa tügü tamexëëchaü. ¹⁶ Rù ngëma duñxügü i ngëmagu rüxñüëxü rü nügü yaxugügügu rü Tupanaxü nacüex, natürü ngëma nümagü naxügüxüwa nüxü tacüex na tama aixcüma yixü na Tupanaxü nacüëxgüxü. Rù nümagü rü Tupanapëxewa nichixe, rü tama naga naxinüë, rü taxuwama nime na tacü rü mexü naxügüxü.

2

Nguxëëtae i aixcüma mexü

¹ Natürü i cuma, Pa Titux, rü name i guxügutáma ngëma mexü i nguxëëtaemaã cunangúexëë rü taguma nüxna quixügachi. ² ¡Rü meã yaxucüxëgü i ngëma yatügü i yaguãxgü na aixcüma meã naãëxü nacuaãcüma namaxëxüçèx, rü taguma nadauxcüraxüwëxegüxüçèx, rü guxüguma meã nagu na naxinüëxüçèx! ¡Rü nangúexëë na aixcüma meã Tupanaãxü yaxögüãxüçèx, rü guxü i duñxügüxü nangechaügüxüçèx, rü yaxna namaã naxinüëxüçèx ega woo tacü rü guxchaxü nüxü üpetügux! ³ Rù ngëxgumarüü ta chanaxwëxe i meã cuyaxucüxëgü i ngëma ngexügü i yaguãxgü na meã Tupanapëxewa namaxëxüçèx. Rù tama name na yaxoregütèëxgüxü, rü nangãxëwëxegüxü. Rù name nixi i guxü i duñxügüpëxewa rü meã namaxë. ⁴⁻⁵ Rù ngëma ngexügü i yaguãxgü rü name nixi i meã na nangúexëëãxü i ngëma ngexügü i paxügü na aixcüma natexü rü naxãcügüxü nangechaügüxüçèx, rü meã naãëxü nacüëxgüxüçèx, rü mexügucicatama na naxinüëxüçèx, rü meã napatana nadaugüxüçèx, rü guxü i duñxügümaã namecümagüxüçèx, rü aixcüma natega naxinüëxüçèx na taxúema chixri Tupanaãrü orchiga idexagüxüçèx. ⁶ ¡Rü ngëxgumarüü ta meãma yaxucüxëgü i ngëma ngextüxücügü na aixcüma meã naãëxü nacuaãcüma namaxëxüçèx rü tama nadauxcüraxüwëxegüxüçèx! ⁷ ¡Rü cumatama rü name nixi i meã napëxewa cumaxü i guxüwama na ngëmaãcü wüxi i norü cuëxruü i mexü quiixüçèx! Rù ngëxguma cunangúexëëgu, rü cunaxwëxe i mexügu curüxñüãcüma cunangúexëë rü tama ñncaãcüma namaã nüxü quixu i ngëma ore. ⁸ Rù ngëxguma ngëmaãcü meã cunangúexëëgu i ngëma ore i mexü, rü taxúetáma texé chixri nachiga tidexa. Rù ngëmaãcü ya yixema chixri tachiga idexagüchaüxë rü tá taxãneë erü taxucürüwa tacü rü chixexüxü tixugü i tachiga. ⁹ ¡Rü meãma yaxucüxëgü i ngëma duñxügü i coriãxgüxü! ¡Rü namaã nüxü ixu na guxüguma meã norü coriga naxinüëxüçèx, rü norü corimaã namecümagüxüçèx, rü taguma norü corixü nachoxügagüxüçèx! ¹⁰ Rù tama name i norü coriaxü nangixgü, natürü nanaxwëxe i aixcüma meãma norü corimaã namaxë rü taguma nanawomüxëëgü. Rù ngëxguma

ngēmaācū namaxēgu, rü guxūma i togü i duūxūgü tá nüxū nadaugü na ñuxācū aixcūma namexēchixū i ngēma ore i duūxūgūxū namaā ingúexēēxū nachiga ya Tupana ya tórü maxēēēruū. ¹¹ Tupana rü poraācūxūchima tamaā namecūma, rü yemacèx núma nanamu ga Nane na guxūma i duūxūgūaxū nangēxmaxūcèx i maxū i taguma gúxū ega nüxū yaxōgūāgu. ¹² Rü ngēma na Tupana tamaā mecūmaxūwa nüxū tacuèx na namexū na nüxū rüxoexū i ñoma i naānecūāxārü ngúchaūgü rü guxūma i to i chixexūgü i napēxewa ixūxū. Rü ngēma Tupana taxcèx üxū tüxū nanguxēē na meā yigūmaā icuèxgūācūma togü i duūxūgūpēxewa rü Tupanapēxewa meā imaxēxū i ñoma i naānewa. ¹³ Rü tüxū nanguxēē ta na guxūguma meā ínanguxēēgūxūcèx na nataeguxū ya Ngechuchu ya Cristu ya tórü maxēēēruū ya tórü Tupana ya tacü ixīcū. Erü Tanatü ya Tupana rü tamaā inaxuneta na wena tá nataeguxū ya Ngechuchu, rü wüxi i taāē tá nixī i ngēxguma ínanguxgu. ¹⁴ Rü nüma ga Ngechuchu rü taxcèx nayu na tüxū ínanguxūxēēxūcèx nawa i guxūma i chixexū, rü tüxū yamexēēgūxūcèx na aixcūma norü duūxūgü i mexū ixīgūxūcèx rü aixcūma naxcèx idaugūxūcèx na guxūguma mexū ixīgūxūcèx. ¹⁵ Rü ngēma ore tá nixī i duūxūgūxū namaā cungúexēēxū rü nüxū cunangúchaūxēēxū na Tupanacèx namaxēxūcèx. Rü ngēma oremaā tá aixcūma cuyaxucuxēgü i duūxūgü erü Tupanatama nixī ya cuxū mucü na ngēmaācū cunaxūxū. Rü tama name na texé cuxū oxū.

3

Ñuxācū name na namaxēxū i ngēma yaxōgūxū

¹ Rü ngēma yaxōgūxū i duūxūgü, ¡rü namaā nüxū ixu na nachixūānearü āēxgacügüga naxīnūēxū rü guxūma i ngema togü i āēxgacügüga naxīnūēxūcèx! ¡Rü yaxucuxēgü na ínamemaregūxūcèx na naxūgūāxūcèx i guxūma i mexū i puracügü i āēxgacügü unagūxū! ² Rü tama name i texéchiga chixri nidexagü rü texēmaā nanuē. Natürü name nixī i guxū i duūxūgūmaā namecūmagü rü aixcūma guxū i duūxūgūxū nangechaūgü rü tama nügü nicuèxūxūgü. ³ Rü name nixī i yaxna namaā taxīnūē i ngēma tama yaxōgūxū, yerü yixema rü ta ga ũpa rü chixri tamaxē, rü tama Tupanaga taxīnūē. Rü itayarütaxe rü tórü ngúchaū tüxū napora. Rü chixexūgu rüxīnūēācūma tamaxē rü taxāūxāchiwèxegü. Rü naxchi taxaie ga togü, rü nüma rü ta taxchi naxaie. ⁴ Natürü yexguma Tupana ya tórü maxēēēruū tüxū nüxū dauxēēgu i norü ngechaxū naxcèx i guxūma i duūxūgü, rü nüma rü tüxū namaxēxēē. ⁵ Rü yema na tüxū namaxēxēēxū rü tama tacü rü mexū na ixīgūxūgagu nixī, natürü tüxū namaxēxēē yerü nüxū tangechaütümūgü. Rü Naāē i Üünexū i tüxū ngexwacaxūxēēxūārü poramaā Tupana tüxū inayanaxoxēē ga tórü pecadu na ngexwacaxūxū i duūxūgü ixīgūxūcèx. ⁶ Rü Ngechuchu ya Cristu ya tórü Maxēēēruūgagu nixī ga Tupana ga guxūma ga norü ngúchaūmaā tüxna namuāxū ga Naāē i Üünexū. ⁷ Rü yemaācū tamaā namecūma rü tüxū narüngūxēē ga Tupana na aixcūma imexūcèx i napēxewa, rü na nayauxgūxūcèx i ngēma írünguxēēgūxū i maxū i taguma gúxū. ⁸ Rü guxūma i ngēma marü cumaā nüxū chixuxū rü aixcūma nixī. Rü ngēmacèx chanaxwèxe i guxūguma nüxū quixu i ngēma ore na aixcūma mexū naxūgūxūcèx i ngēma duūxūgü i Tupanaāxū yaxōgūxū. Erü ngēma ore rü guxūwama name i guxācèx. ⁹ ¡Natürü nüxna ixūgachi i ngēma dexagü i taxuwama mexū i duūxūgü nawa nügü choxūgagūxū rü ngēma oregü i nuxcūmaūgūxū i duūxūgūchigamare ixīgūxū! ¡Rü nüxna ixūgachi i ngēma nügü ngaexū! ¡Rü tama name na natanūgu cuxāxū i ngēma duūxūgü i nügūmaā nüxū rünuētanūcūxū nachiga i ngēma mugü ga Moīché

umatüxü! Erü guxüma i ngēma na nüxü rünuētanücüxü rü taxuwama name, rü natüçèxmamare nixĩ. ¹⁰ Rü ngēxguma chi wüxie i petanüwa rü chixexü i ngüxēētaemaã ngēma yaxōgüxüxü titoyegu, rü name nixĩ i tümamaã nüxü quixu na tama ngexü tawagüxüçèx. Rü ngēxguma tanaxüamagu, rü name nixĩ na wena tümamaã nüxü quixuxü. Rü ngēxguma tama cuga taxĩnüchaügu rü tanaxüamagu i ngēma chixexü rü name nixĩ i noxtacüma tüxü ícumuxüchi natanüwa i ngēma yaxōgüxü. ¹¹ Erü ngēma chixri na tamaxüxüwa rü tá nangox na tachixeãxü ya yixema duüxē rü tümäärü pecadugagu tá nixĩ na tapoxcuxü.

Tituxü naxucüxē ga Pauru

¹² Rü ngēxguma cuxütawa chanamuxgu i Artema rü ēxna Tíquicu, rü chanaxwèxe i paxa Nicaporíchiuwa cuxü na choxü ícuyadauxüçèx. Erü ngēma tá nixĩ i chanangupetüxēxü ya yima tauemacügü ya nagu nagáuanecü. ¹³ Rü guxüma i cuxü tauxchaxümaã chanaxwèxe i nüxü curüngüxēē i āēxgacü i Chena i Dumacüāxgüarü mugüxü cuáxü rü Aporu na paxa núma naxĩxüçèx. Rü chanaxwèxe i nüxna cunaxã i ngēma nanaxwèxexü i norü namawaü na taxuüma nüxü taxuxüçèx. ¹⁴ Rü ngēma taeneēgü i yaxōgüxü, rü name nixĩ i naxçèx nangúe na mexü naxügüxü rü togüxü nangüxēēgüxü ega tacü nüxü tauxgux. Rü ngēmaãcü i ngēma togü rü tá nayaxōgü.

Pauru rü wenaxãrü Tituxü narümoxē rü naxçèx ínaca na Tupana nüxü rüngüxēxüçèx

¹⁵ Rü guxüma i taeneēgü i nuã chauxütawa ngēxmagüxü rü cuxü narümoxēgü. Rü ngēxgumarüü ta i choma rü chanaxwèxe i nüxü curümoxē i taeneēgü i yaxōgüxü i cuxütawa ngēxmagüxü. Rü chanaxwèxe i Tupana pexü narüngüxēē i guxãma i pemax.

Rü nuãma cuxna,
Pauru

POPERA GA FILEMÚÛCAX NAXÛMATÛXÛ GA PAURÛ

Pauru rü nüxü narümoxë ga FilemúÛ

¹ Pa Toeneë i FilemúÛ i Toxrüxü Tupanaarü Puracüwa Puracüxex, choma i Pauru rü taeneë i Timutéumaã cuxcèx tanaxümatü i ñaã popera. Rü choma rü nuxa chapoxcu nagagu na nüxü chixuxü i Ngechuchu ya Cristuarü ore. ² Rü ñaã popera i cuxcèx taxümatüxü, rü naxcèx ta nixi i ngëma taeneëgü i cupatawa ngutaquëxegüxü rü ngixcèx ta nixi i taeyèx i Ápia rü naxcèx ta nixi i taeneë i Ariquípu i taxrüxü Tupanaarü puracüwa puracüxü. ³ Rü chanaxwèxe i Tanatü ya Tupana rü tórü Cori ya Ngechuchu ya Cristu pexü narüngüxëë rü pexü nataãëxëë.

FilemúÛ rü aixcüma Ngechuchuaxü nayaxõ rü yema yaxõgüxüxü nangechaü

⁴ Rü guxüguma i ngëxguma cuxna chacuëxächigu i chorü yumüxëwa, rü Tupanana moxë chaxã cuxcèx. ⁵ Erü nüxü chacuáchiga na ñuxácü nüxü cuyaxõxü ya tórü Cori ya Ngechuchu rü ñuxácü nüxü na cungechaüxü i guxüma i duüxügü i Tupanaarü ixügüxü. ⁶ Rü Tupanana naxcèx chaca na cuxü nangüxëëxücèx na duüxügümaã nüxü quixuxücèx na ñuxácü Cristuaxü yaxõgüxü i yixemax, erü chanaxwèxe na meã nüxü cucuáxü na ñuxácü Ngechuchu ya Cristugagu poraãcü tüxü nangüxëëxü ya Tupana. ⁷ Rü choma rü poraãcü chataãëxüchi na ñuxácü nüxü cungechaüxü i ngëma yaxõgüxü. Erü cugagu nixi, Pa Chaueneëx, na nataãëgüxü i ngëma togü i yaxõgüxü.

Pauru rü FilemúÛna naca na mea Onéchimüxü nayaxuxücèx

⁸⁻⁹ Rü ngëmacèx nangëxma i wüxi i ngüxëë i cuxütawa naxcèx íchacaxchaüxü. Rü dücax, Cristu nixi ya choxü mucü rü ngëmacèx choxü nangëxma i pora na cuxü chamuxü na cunaxüxücèx i ngëma ngüxëë i mexü i tá cumaã nüxü chixuxü. Natürü tama ngëmaãcü cuxü chamuxchaü erü cuxü changechaü, rü ngëmacèx chauxcèx narümemã nixi na cuxü chacèëxümarexü naxcèx i ngëma. Rü choma i Pauru rü marü chaya rü ñuxma rü chapoxcu Ngechuchu ya Cristucèx. ¹⁰ Rü ngëmacèx cuxna naxcèx chacaxchaü i wüxi i ngüxëë naxcèx i Onéchimü i nuã poxcupataüwa chauxütawa Cristuxü yaxuxü. Rü ngëmacèx i ñuxma rü Tupanaarü orewa rü chaune nixi. ¹¹ Rü üpa ga Onéchimü rü wüxi ga curü duüxü ga taxuwama cuxü mexü nixi. Natürü i ñuxma rü cuxü rü choxü rü ta name. ¹² Rü ñuxma rü cuxcèx chanataegüxëë i nüma i Onéchimü. Rü chanaxwèxe i meã cunayaxu, ñoma choxü cuyaxuxürüü. ¹³ Chierü chanaxwèxe na nuxma chauxütagu naxãüxü, rü na cuchicüü choxü nangüxëëxücèx i ñuxma na chapoxcuxü naxcèx i Tupanaarü ore i mexü. ¹⁴ Natürü tama chanaxüxchaü i tacü i tauta “Ngü” ñacuxü choxü. Erü ngëma ngüxëë i cuxna naxcèx chaçaxü, rü chanaxwèxe na curü ngüchaütama yüxü i ngëma rü tama i chorü mugagu na yüxü. ¹⁵ Rü bexmana Tupana nanaxwèxe na paxaãchi cuxna yaxüxü ga Onéchimü na yixcama rü wenaxärü cuxcèx nataegüxücèx rü ngëmaãcü guxügutáma cuxütawa nangëxmaxücèx. ¹⁶ Natürü i ñuxma rü tama ngëxürüüxümare i curü duüxürüü nixi, erü wüxi i curü duüxüärü yexera nixi i ñuxmax, erü taeneë i nüxü ingechaüxü nixi. Rü aixcüma poraãcü nüxü changechaü i chomax, natürü chanawae i cuma rü yexeraãcü nüxü cungechaü. Erü ñuxma rü tama wüxi i curü düxümare nixi, natürü wüxi i cueneë i tórü Coriaxü yaxõxü nixi i ñuxmax. ¹⁷ Rü ngëmacèx, rü ngëxguma choxü cudèuxgu na

aixcūma cueneē chiixũ, rü chanaxwèxe i meã cunayaxu i Onéchimū, ñoma choxũ cuyaxuxũrũ. ¹⁸ Rũ ngēxguma tacũ rü chixexũ cumaã naxũxgu rü ěxna tacũ cuxũ nangetanũgu, rü chanaxwèxe i chomaã nüxũ quixu na ñuxre yĩxũ, na cuxũ chanaxũtanũxũcèx. ¹⁹ Rũ chomatama i Pauru rü choxmēxmaãxũchi chanaxũmatũ i ñaã popera. Rũ aixcūma chomatama tá cuxũ chanaxũtanũ. Rũ tãũtáma cuxna nüxũ chacuèxãchixēē na ñuxãcũ choxũ cunangetanũxũ i curũ maxũ i taguma gũxũ i chaugagu Tupanaxũtawa cuyaxuxũ. ²⁰ Rũ ngēmaãcũ, Pa Chaueneēx, rü chanaxwèxe i tórũ Corigagu chaucèx cunaxũ i ngēma ngũxēē. Rũ chanaxwèxe i choxũ cutaãxēē, erũ chaueneē i Cristuaxũ yaxõxũ quixĩ. ²¹ Rũ cuxcèx chanaxũmatũ i ñaã popera erũ nüxũ chacuèx na aixcūma chauga cuxĩnüxũ rü tá cunaxũxũ i ngēma cuxna naxcèx chaçaxũãrũ yexera. ²² Rũ ngēxgumarũũ ta chanaxwèxe na chaucèx cunamexēēxũ i wũxi i nachica i ngextá tá nawa changuxũ. Erũ íchananguxēē na Tupana tá nangãxũxũ i perũ yumũxēgũ, rü tá choxũ nangũxēēxũ na pexũ íchayadauxũcèx.

Pauru rü wenaxãrũ Filemúũxũ narũmoxē rü naxcèx ínaca na Cori ya Ngechuchu ya Cristu nüxũ rüngũxēēxũ

²³ Rũ moxē cuxcèx ngēma namu i Epáparu. Rũ nüma rü wũxigu chomaã napoxcu naxcèx ya Ngechuchu ya Cristu. ²⁴ Rũ ngēxgumarũũ ta moxē cuxcèx ngēma namugũ i Marcu, rü Aritárcu, rü Dema rü Luca. Rũ nümagũ rü chomücũgũ nixĩgũ i Tupanaãrũ puracũwa. ²⁵ Rũ chanaxwèxe i tórũ Cori ya Ngechuchu ya Cristu pexũ narũngũxēē i guxãma i pemax.

Rü nuãma cuxna,
Pauru

POPERA GA YUDÍUGÜ GA YAXÕGÜXÜCA_X ÜMATÜXÜ

Tupana rü Nanewa tamaã nidexa

¹ Nuxcüma ga Tupana rü muëxpüxcüna rü nagúxüraüxüãcüma norü orearü uruügüwa tórü oxigümaã nidexa, rü namaã nüxü nixu ga tacü nüxü na nanaxwëxexü. ² Natürü i ñomaücüü ya Tupana rü Nanewatama nixi i tamaã yadexaxü rü tüxü nüxü nacuëxëëxü na ñuxácü tüxü nangüxëëchaüxü. Rü gumaxü nixi ga namuxü na naxüãxüçèx ga ñoma ga naãne rü daxüguxü ga naãne rü üèxcü rü tauemacü rü woramacurigü rü ëxtagü. Rü ñuxüchi guma Nanena nanana ga guxüma ga yema na noxrü yixüçèx. ³ Rü Nanewa nixi i nüxü idauxü na ñuxácü namexëchixü i nüma ya Tupana. Rü nüma ya Nane rü Nanatü ya Tupanarüütama nixi. Rü ñuxma na guxüärü äëxgacü yixü ya Nane, rü guxümaãma inacüèx rü norü ore i poraxümaã nanamu i guxüma na nüma nanaxwëxexüãcüma na yixüçèx. Rü nüma ya Nane nixi ga taxcèx nayuxü na nüxü rüxoexüçèx ga tórü pecadugü. Rü yemawena rü Nanatüxütawa naxü i daxüguxü i naãnewa. Rü yéma Nanatüärü tügüncüwawa nayarüto erü guxüärü äëxgacü nixi i ñuxmax.

Tupana Nane rü guxüma i orearü ngeruügü i daxü- cüãxétüwa nangëxma

⁴ Rü ñuxma i nüma ya Nane rü guxüma i Tupanaärü orearü ngeruügü i daxüçüãxärü yexera nixi rü naëtüwa nangëxma yerü yemaãcü nanaxuegu ga Nanatü. ⁵ Rü ngëmaãcü nixi i ñuxma yerü ga Tupana rü taguma wüxi ga norü orearü ngeruüxü ñanagürü:

“Cuma nixi i Chaune. Rü ñuxma chanangoxëë na aixcüma Chaune quiixü”, ñanagürü. Rü taguma wüxi ga norü orearü ngeruüchiga ñanagürü:

“Choma nixi i Nanatü chiixü rü nüma rü Chaune nixi”,

ñanagürü. ⁶ Natürü yexguma ñoma ga naãnewa namuãgu ga Nane ya guxüëtüwa ngëxmacü, rü ñanagürü ga Tupana:

“Chanaxwëxe i guxüma i chorü orearü ngeruügü i daxüçüãx rü nüxü nicuëxüügü ya Chaune”,

ñanagürü. ⁷ Rü yexguma norü orearü ngeruügü ga daxüçüãxchiga yadeaxgu ga Tupana, rü ñanagürü:

“Choma chanaxwëxexüãcüma chanamu i ngëma chorü orearü ngeruügü i chorü ngüxëëruügü ixigüxü. Rü ngëxguma chanaxwëxegu rü ñoma buanecü rü ñoma üxüemarüü chayaxigüxëë, rü chanaporaexëë na naxügüãxüçèx i chorü ngüchaü”,

ñanagürü. ⁸ Natürü yexguma Nanechiga yadeaxgu ga Tupana rü ñanagürü:

“Cuma rü chauxrüü Tupana quixi. Rü guxügutáma äëxgacü quixi. Rü aixcüma meã guxümaã icucuèx erü aixcümacü quixi. ⁹ Rü nüxü cungechaü i guxüma i ngëma nacüma i mexü natürü naxchi cuxai i guxüma i ngëma nacüma i chixexü. Rü ngëmacèx i choma na Cunatü ya Tupana chiixü rü guxüëtüwa cuxü changëxmaxëë rü guxüärü yexera cuxü chataãëxëë”,

ñanagürü. ¹⁰ Rü yexgumarüü ta Nanexü ñanagürü ga Tupana:

“Cuma rü guxüärü Cori quixi. Rü noxriarü ügügumama ga yexguma natauxgutama ga ñoma ga naãne, rü cuma nixi ga cunaxüxü. Rü cumatama nixi ga cunaxüxü ga üèxcü rü tauemacü rü guxüma ga ëxtagü. ¹¹ Rü guxüma i ngëma rü tá nagux, natürü i cuma

rü guxūgutáma cungēxmaēcha. Rü guxūma i ngēma rü ñoma naxchirurūū tá nangaue. ¹² Rü ñoma wūxi i naxchiru i ngauxū i ngema itēxmarexūrūū tá ícunawogū i ñoma i naāne rü guxūma i daxūwa nüxū idauxū. Rü to i ngexwacaxūxūmaā tá cunaxūchicūū, ñoma wūxi i naxchiru i ngauxū i ngexwacaxūxūmaā ixūchicūūxūrūū. Natürü i cuma rü tá cunaxēixrūgumaraxūēcha rü tagutáma cuyu”, ñanagürü ga Tupana. ¹³ Rü Tupana rü ñanagürü nüxū: “¡Nuā chauxūtawa rüto ñuxmatáta nüxū cuxū charüporamaēxēē i guxūma i curü uwanügü!” ñanagürü. Natürü ga Tupana rü taguma yema ñanagürü nüxū ga ngēxūrūūxū ga norü orearü ngeruūgü ga daxūcūāx. ¹⁴ Rü guxūma i Tupanaārü orearü ngeruūgü i daxūcūāx rü naāēgü i Tupanaāxū puracūexū nixīgü. Rü nüma ya Tupana rü núma nanamugü na nüxū yanangūxēēgūxūcèx i guxūma i ngēma duūxūgü i Tupana naxwèxexū na nayauxgūāxū i maxū i taguma gúxū.

2

Tama name i nüxū taxoe i ngēma maxū i Tupana tüxna uaxūxū

¹ Rü ñuxma na nüxū icuáxū na guxūma i Tupanaārü orearü ngeruūgü i daxūcūāxārü yexera yīxū ya Nane, rü ngēmacèx name na yexeraācū meā naga ixīnūēxū i ngēma ore i nachiga ixīxū. Erü tama tanaxwèxe na nüxū rüxoexū na yaxōgūxū. ² Rü yexguma tauta Nane ya Cristuxū núma namuxgu ga Tupana, rü norü orearü ngeruūgü ga daxūcūāxgūwa duūxūgūmaā nüxū nixu ga norü mugü na naga naxīnūēxūcèx. Rü yema mugü rü aixcūma natora yerü guxūma ga yema duūxūgü ga tama naga īnūēxū, rü yema mugü nüxū ixuxūācūma Tupana nanapoxcue. ³ Rü yexguma yemaācū napoxcueāgu ga yema duūxūgü ga tama naga īnūēxū, ¿rū ñuxūcūrūwa i yixema i naxchaxwa ibuxmūxū na tama tüxū napoxcuexūcèx ega nüxū ixoegu i ngēma maxū i mexēchixū i ñuxma Cristugagu tüxna naxuaxūxū? Rü dūcax, nūmatama ya tórü Cori nixī ga nüxīra naxunagūāxū ga yema maxū, rü ñuxūchi yixcama nixī ga yema nüxū īnūēxū ga nüxī meā tüxū nüxū nacūēxēēxū na aixcūma yīxū i tüxū nangēxmaxū i ngēma maxū ega nüxū yaxōgūgu ya Cristu. ⁴ Rü nūmatama ga Tupana rü ta taxcèx nanangōxēē na aixcūma yīxū i Cristugagu tüxū nangēxmaxū i ngēma maxū. Yerü nüma ga Tupana rü Naāē i Üünexūwa tüxū nanawēx ga naguxūraxūxū ga taxū ga mexūgü rü cuèxruūgü ga norü poramaā naxūxū yema nüma nanaxwèxexūācūma. Rü yemaācū nixī ga wenaxārü tüxū nüxū nadauxēēxū na aixcūma yīxū na Cristugagu tüxū nangēxmaxū i ngēma maxū.

Tupana rü ñoma ga naānewa nanamu ga Ngechuchu ya Cristu na taxrūū duūxūxū yīxūcèx

⁵ Rü ñuxma rü guxūma i ngēma mexūgü i Cristugagu tüxū ngēxmaxū i pemaā nüxū tixuchigaxū, rü Tupana rü taguma daxūcūāx ga norü orearü ngeruūgūna naxāga na namaā inacuèxgūxūcèx. Natürü duūxūgūxū nixī ga namuxū na namaā inacuèxgūxūcèx ga guxūma ga yema mexūgü. ⁶ Erü Tupanaārü ore i ümatūxūwa rü ñanagürü:

“Pa Tupanax, ¿rū tacū nixī i duūxūgü rü ngēmacèx nagu curūxīnūxū? ¿Rū tacūwa name rü ngēmacèx nüxū cungechaūxū? ⁷ Rü paxaāchi curü orearü ngeruū ga daxūcūāxgūtūūwa cunayexmagūxēē ga duūxūgü, natürü i ñuxma rü aixcūma namaā cutaāē rü nüxū quicuèxūxū. ⁸ Rü naxmēxwa cunangēxmaxūēē i guxūma ga yema cuxūxū”, ñanagürü i ngēma orewa. Rü yemaācū nixī ga Tupana ga duūxūgūmēxēwa nayexmagūxēēāxū i guxūma i ñoma i naānewa ngēxmaxū. Rü nataxuma

i tacü i ñoma i nañewa i tama naxmëxwa nangëxmaxëëxü. Natürü woo na ngëmaäcü yiixü, rü ñuxma rü ta tauta nüxü tadau na duixügümëxëwa nangëxmaxü i guxüma i ñoma i nañewa ngëxmaxü. ⁹ Natürü nüxü tadau ya Ngechuchu ya aixcüma guxümaäma icuäcü. Rü yexguma Tupana ñoma ga nañewa namuxgu rü paxaächi norü orearü ngeruü ga daxücüäxgüarü ñaxtüwaama nanaxüxëë. Natürü i ñuxma ya Tupana rü poraäcü Ngechuchuxü nataxëë rü äëxgacü ya tacü nayaxixëë yerü ngúxü ninge rü guxüma ga duixügücëx nayu yerü yemaäcü nanaxwëxe ga Tupana yerü tüxü nangechaü rü tüxü narüngüxëëchaü. ¹⁰ Yerü ga Tupana rü nanaxwëxe na guxüma i naxäcügü nüxü nangëxmaxüçëx i nachica i mexü i naxütawa. Rü yemacëx ñoma ga nañewa nanamu ga Ngechuchu ya Cristu na ngúxü yangexüçëx rü taxcëx nayuxüçëx na aixcümaxüchi tüxü nangëxmaxüçëx i maxü i taguma gúxü. Rü name nixi na yemaäcü naxüäxü ga Tupana yerü nümatama nixi ga naxüäxü ga guxüma rü namëxwa nangëxma na nüma nanaxwëxexüäcüma namaä inacuäxüçëx. ¹¹ Rü Ngechuchu nixi ya tüxü imexëëgücü na Tupanapëxewa ixüünegüxüçëx. Rü ñuxma i nüma ya Ngechuchu ya tüxü imexëëgücü rü guxäma i yixema na tüxü yaxüünexëëgüxü rü wüxitama nixi ya Tanatü. Rü ngëmacëx nixi i nüma ya Ngechuchu ya Tupana Nane, rü tama taxcëx naxänexü na naëneëgümaä tüxü naxuxü. ¹² Erü Tupanaärü ore i ümatüxüwa rü ñanagürü ga Nane:

“Rü chaueneëgüxü tá nüxü chacuëxëë i cuchiga, Pa Chaunatüx. Rü norü ngutaquëxegüwa rü tá cuxcëx chawiyae na ngëmaäcü cuxü chicuëxüxüçëx”,

ñanagürü. ¹³ Rü toxnamana i Tupanaärü ore i ümatüxüwa rü ñanagürü ta ga Nane:

“Cuxü chayaxō, Pa Chaunatüx, erü nüxü chacuëx rü tá choxü curüngüxëë”,

ñanagürü. Rü ñanagürü ta:

“Rü daxe chixi, Pa Chaunatüx, namaä i cuxacügü i chaueneëgü i choxna cumugüxü”,

ñanagürü. ¹⁴ Rü nüma ga Ngechuchu rü woo Tupana na yixixü natürü duixürüxüäcü ñoma ga naanewa naxü na taxrüxü naxämachixüçëx rü naxägüxüçëx na tachicüü nayuxüçëx rü yemaäcü yanaxoxëëäxüçëx ga Chatanáarü pora ga namaä tüxü iyanatauxëëxchaüxü. ¹⁵ Rü yemaäcü nanaxü ga Ngechuchu na Chatanámejëwa tüxü íanguxüxëëxüçëx ya guxäma ya yixema noxri naxcëx muñëxë ga na tayuexü. ¹⁶ Rü yemacëx ñoma ga nañewa nangu ga Ngechuchu na taxcëx nayuxüçëx i guxäma i yixema na Abráürüü yaxögüxü. Rü tama daxücüäx i orearü ngeruügücëx nayu, natürü taxcëx nixi ga numa naxüxü rü nayuxü. ¹⁷ Rü nüma ga Ngechuchu rü nanaxwëxe na yixema i naëneëgü ixigüxürüütama nügü na yaxixëëxü na yemaäcü aixcüma mecümacü ya nüxü ingechaütümüügücü ya tórü chogürüü yiixüçëx i Tupanapëxewa. Rü yemacëx nixi ga nügü inaxäxü rü nayuxü na yemaäcü Tupana duixügüaxü nüxü ngechaüxüçëx i norü pecadugü. ¹⁸ Rü yema nümatama ngúxü na yangexü ga yexguma Chataná nüxna ñnugu, rü ngëmacëx i ñuxma rü nüxü natauxcha na tüxü nangüxëëxü ya yixema Chataná tüxna ñnuxë.

3

Ngechuchu rü Moïchéxü narüyexera

¹ Rü ñuxma Pa Chaueneëgü ya Tupanapëxewa Üünegüxe, rü pexü nixi ya Tupana inadexü na norü duixügü pixigüxüçëx. Rü ngëmacëx name nixi i aixcüma meä nagu perüxñnüë ya Ngechuchu ya Cristu ya Tupana núma namucü. Rü nüma ya Ngechuchu nixi i tórü chogürüü i Tupanapëxewa

tüxü ixüünexëécü. Rü yimaãxü nixi i yaxögüxü. ² Rü Tupana rü marü Ngechuchuxü naxuneta na naxüãxüçèx ga yema puracü ga Tupana nüxna äxü. Rü nüma ga Ngechuchu rü aixcüma Nanatüga naxinü rü nayanguxëë ga yema puracü yexgumarüü ga Moïché meãma na naxüxü ga yema puracü ga Tupana nüxna äxü na nüxna nadauxüçèx ga Tupanaärü duüxügü ga Yudíugü. ³ Rü woo ga noxri rü Moïchéxü nitaégacüüxëë ga Tupana, natürü i ñuxma rü Moïchéarü yexera Ngechuchuxü nixi i yataégacüüxëëxü. Rü wüxi ya ĩpata ya ngexwacèx ixüxünerüü nixi, erü woo ngëma ĩpatamaã tataãë, natürü ngëma yexeraäcü nüxü icuèxüüxü nixi i ngëma ĩpataarü üruü. ⁴ Rü guxünema ya ĩ rü nüxü nangëxma i norü üruü. Natürü guxüma i tacü i ngëxmaxü, rü Tupana nixi ya naxücü. ⁵ Rü Moïché rü wüxi ga Tupanaärü duüxü ga aixcüma mexü nixi yerü meã nüxna nadau ga Tupanaärü duüxügü ga Yudíugü, yema Tupana namaã nüxü ixuxürüü. Rü nüma ga Moïché nixi ga yema duüxügümaã nüxü yaxuxü ga ñuxäcü Tupana tá yixcüra nüxü na rüngüxëëxü. ⁶ Natürü nüma ya Ngechuchu rü Moïchéarü yexera nixi erü Tupana Nanexüchi nixi. Rü nüma nixi i nüxna nadauxü i guxüma i ngëma Tupanaärü duüxügü ixígüxü. Rü yixema rü ta Tupanaärü duüxügü tixígü ega aixcüma Ngechuchuaxü yaxögügu rü taguma nüxü rüxoegu. Rü Tupana nanaxwèxe na guxügüma Ngechuchumaã itaãëgüxü erü nüxü tacuèx na wüxi i ngunexü rü tá taxcèx nataeguxü na wüxiwa namaã ingëxmagüxüçèx.

Tupanaärü duüxügü rü tá inarüngüë

⁷⁻⁸ Rü ngëmacèx i Tupanaärü ore i ümatüxüwa rü ñanagürü i Naãë i Üünexü: “Rü ñuxma na nüxü pexinüëxü i ngëma Tupana pemaã nüxü ixuxü, rü tama name na nüxü pexoexü, yexgumarüü ga na naxügüãxü ga yema duüxügü ga Tupanaxü ügüxü rü tama naga ĩnüëxü ga yexguma Moïchéwe naxixgu ga yema naãne ga ngextá taxüema íxãpataxüwa”.

⁹ Rü yemacèx ga Tupana rü ñanagürü:

“Rü yéma nixi ga chixexü naxügüxü ga nuxcümaügüxü ga perü oxigü yerü choxü naxügü yerü tama choxü nayaxögüchaü. Rü yemaäcü nanaxügü woo 40 ga taunecügu nüxü na nadaugüxü ga yema mexügü ga üünexü ga napëxewa chaxüxü. ¹⁰ Rü yemacèx namaã chanu ga yema duüxügü, rü ñacharügü nüxü: ‘Pema rü guxügüma chixexüguxicatama perüĩnüëëcha, rü taguma penaxüchaü i ngëma chanaxwèxexü na penaxüxü’, ñacharügü nüxü. ¹¹ Rü yemacèx nixi ga namaã chanuxü ga yema duüxügü, rü aixcümaxüchi namaã nüxü chixu na tãütáma yema naãne ga noxri namaã ichaxunetaxüwa nangugüxü na ngëxma nangüëxüçèx”,

ñanagürü ga Tupana. ¹² Rü ñuxma Pa Chaueneëgüx, rü name nixi i pegüna pedaugü na tama ngürüächi pechixearü maxüãxüçèx, rü ngëmagagu na nüxü perüxoexü na Tupana ya maxücüaxü na peyaxögüxü. ¹³ Natürü ñuxma pexü natauxchagu, rü name nixi na wüxichigü pegüaxü penangüchaüxëëxü i guxü i ngunexügu na taxüema i petanüwa Tupanaxü taxoxüçèx nagagu i ngëma pecadu i pexü womüxëëchaüxü. ¹⁴ Rü ngema na Cristuxütawa nayauxgüxüçèx i maxü i taguma güxü, rü tanaxwæe na guxügüma aixcüma yaxögüechaxü. Rü ngëxguma noxrirüütama guxügüma meã nüxü yaxögüechagu rü tama nüxü rüxoegu, rü tá namaã tüxü nangëxma i tachica i daxügüxü i naãnewa. ¹⁵ Natürü ñuxma nixi i namexü na meãma yaxögüxü. Rü ngëmacèx i Tupanaärü ore i ümatüxüwa rü ñanagürü:

“Rü ñuxma na nüxü pexinüëxü i ngëma Tupana pemaã nüxü ixuxü, rü tama name na nüxü pexoexü, yexgumarüü ga yema duüxügü ga tama

Tupanaga ñnũxũ ga yexguma Moĩchéwe naxĩxgu ga yema naãne ga ngextá taxúema íxãpataxũwa”, ñanagürü. ¹⁶ ¿Rü texégü tixĩ ga guxema nüxũ ñnũxũ ga yema Tupana tümamaã nüxũ ixuxũ, rü ñuxũchi tama Tupanaga ñnũxũ? Rü pemaã nüxũ chixu rü yemagü nixĩ ga yema duũxũgü ga Moĩché Equituanewa ínguxũxẽxũ. ¹⁷ ¿Rü texémaã nixĩ ga nanuxũ ga Tupana ga 40 ga taunecügu? Rü pemaã nüxũ chixu rü namaã nanu ga yema duũxũgü ga chixexũ ügũxũ. Rü yemacèx yema nachica ga ngextá taxúema íxãpataxũgu nayue. ¹⁸ ¿Rü texégümaã nixĩ ga aixcũmaxũchi inaxunetaxũ ga Tupana na tãütáma yema naãnewa nangugũxũ na yexma nangũxũcèx? Rü pemaã nüxũ chixu, rü yemagü nixĩ ga yema duũxũgü ga tama naga ñnũxũ. ¹⁹ Rü ngẽmawa nüxũ tacuèx na taxucürüwama yema naãne ga noxri Tupana namaã ixunetaxũwa nangugũxũ ga yema duũxũgü, yerü tama nüxũ nayaxõgü.

4

¹ Rü ngẽmacèx i ñuxma na Tupana tamaã ixunetaxũ na nügũxũtawa tá tũxũ yachocuxẽxũ na ngẽxma rüngũxũcèx, rü tanaxwèxe i taxuãégü, na tama ngürüãchi wüxie i tatanüwa tama ngẽxma taxücuxũ. ² Erü ñuxma i yixema rü marü nüxũ taxĩnũe i Tupanaãrü ore i mexũ, yexgumarüü ga yema nuxcũmaũgũxũ ga duũxũgü nüxũ na naxĩnũxũ. Natürü nümagü ga yema duũxũgü rü taxuwama nüxũ name ga nüxũ na naxĩnũxũ ga yema ore yerü tama yema naga ñnũxũrürü aixcũma nüxũ nayaxõgü. ³⁻⁴ Natürü i yixema na yaxõgũxũ, rü tá aixcũma Tupanaxũtawa tichocu na ngẽxma rüngũxũcèx. Rü wüxiwa i Tupanaãrü ore i ümatũxũwa rü ngũxchigaarü ngunexũchigaxũ nixu, rü ñanagürü:

“Rü 6 ga ngunexũgu nixĩ ga naguxẽẽãxũ ga norü puracü ga Tupana. Rü yexguma norü 7 ga ngunexũwa nanguxgu rü guxũma ga norü puracüna narüngü”,

ñanagürü. Rü nuxcũma ga Tupana rü nanaxwèxe na nangũxũ ta ga yema nuxcũmaũgũxũ ga tórü oxigü ga Moĩchéwe rüxĩxũ. Natürü ga nümagü rü tama nüxũ nayaxõgüchaũ rü tama naga naxĩnũe. Rü yemacèx ga Tupana rü norü ore i ümatũxũwa rü ñanagürü:

“Yema duũxũgü rü tama choxũ nayaxõgü rü yemacèx namaã chanu rü aixcũmaxũchi namaã nüxũ chixu na tãütáma yema naãne ga namaã ichaxunetaxũwa nangugũxũ na ngẽxma nangũxũcèx”,

ñanagürü. ⁵⁻⁶ Rü yemaãcü ga yema duũxũgü ga nüxĩra nüxũ ñnũxũ ga Tupanaãrü ore i mexũ, rü tama nawa nichocu ga yema nachica ga Tupana namaã nüxũ ixuxũ, yerü tama naga naxĩnũe. Rü ngẽmacèx nixĩ i Tupanaãrü ore i ümatũxũwa i ñaxũ:

“Ngẽma duũxũgü i tama chauga ñnũxũ rü tãütáma ngẽma nachica i namaã ichaxunetaxũwa nichocu na ngẽxma nangũxũcèx”,

ñaxũ. Natürü ñuxma rü ta nangẽxma i nachica i tümacèx ya yixema ngẽxma Tupanaxũtagu chocuchaũxẽ na ngẽxma tarüngũxũcèx. ⁷⁻⁸ Rü ngẽma nachica i ngextá nagu nangũxũ i duũxũgü rü tama yema naãne ga nuxcũmaũgũxũ ga tórü oxigüxacügü tümããrü ãëxgacü ga Yochuémaã tayauxgũxũ nixĩ. Yerü yexguma chi yema naãne yixĩgu, rü Tupana rü tãü chima wenaxãrü nüxũ naxuneta ga to ga ngunexũ na nagu naxũtawa yachocuxũcèx na ngẽxma nangũxũcèx i duũxũgü. Rü yemacèx ga Tupana rü wenaxãrü nüxũ naxuneta i wüxi i to i ngunexũ na naxũtawa yachocuxũcèx i duũxũgü na ngẽxma nangũxũcèx. Rü ngẽma ngunexũ rü ñuxma nixĩ. Rü yemacèx ga Tupana rü mucũma ga taunecü ga Moĩchéwena rü Dabímaã nüxũ nixu ga yema norü ore ga ümatũxũ i ñaxũ:

“Rü ñuxma na nüxũ pexĩnüexũ i ngẽma Tupana pemaã nüxũ ixuxũ, rü tama name na nüxũ pexoexũ”, ñaxũ. Rü yematama nixĩ ga ore ga marüchirẽx pemaã nüxũ chixuxũ. ⁹ Rü ngẽmacèx i ñuxma rü ta nangẽxma i wüxi i nachica i üünexũ i nagu tá aixcüma nangüẽxũ i ngẽma Tupanaãrũ duũxũgũ ixĩgũxũ. ¹⁰ Rü yixema Tupanaxütawa ichocuxe na ngẽxma tarüngüẽxücèx, rü nüxna tarüngüẽ i guxũma i tümaãrũ puracügũ yexgumarũ ga Tupana rü nüxna na nangũxũ ga norũ puracügũ ga yexguma naãne naxũxguwena. ¹¹ Rü ngẽmacèx name na meã yaxõgũxũ rü naga ixĩnüexũ na ichocuxücèx i ngextá Tupana tüxũ írüngüẽxẽxũwa. Erü tama tanaxwèxe na texé ngürüachi yema nuxcümaũgũxũ ga duũxũgũ ga tama Tupanaga ñnüexürũ norũ orexũ na taxoxũ. ¹² Erü Tupanaãrũ ore rü namaxũ rü naporaxüchi. Rü wüxi i tara i guxücüwawa meã waixmaguxũãrũ yexera nixĩ na natéxũ. Erü ngẽma ore rü tawa nixücu ñuxmata taãewa nangu, rü ñuxmata nawa nangu i ngẽma wüxichigü nagu rüxĩnüxũ. Rü ngẽmaãcü meãma nanangoxẽãma i guxũma i ngẽma yixicatama nagu rüxĩnüxũ rü tüxũ ngúchaũxũ. ¹³ Rü nataxütáma i tacü i Tupana üxũ i tá naxchaxwa nügũ icúxũ erü napèxewa rü guxũma meã nangox. Rü guxũxũ nadau rü guxũxũ nacuèx ga yima tá tüxna çacü na namaã nüxũ ixuxücèx i tórü maxüchiga.

Ngechuchu rü mecüxüchi ya tórü ngüxẽeruũ nixĩ i Tupanapèxewa

¹⁴ Ngechuchu ya Tupana Nane rü mecüxüchi ya tórü ngüxẽeruũ nixĩ i Nanatüpèxewa. Rü ñuxma rü daxüguxũ i naãnewa i Nanatüxütawa nangẽxma na ngẽma taétüwa nachogüxücèx. Rü ngẽmacèx tanaxwèxe i guxüguma nüxũ tayaxõgüecha rü taguma nüxũ tarüxoe. ¹⁵ Rü nüma ya Ngechuchu rü aixcüma nüxũ nacuèx na tüxũ nangüxẽexũ erü nüxũ nacuèx na ñuxãcü tüxũ naguxchaxũ i ngẽxguma Chataná tüxna ñnügu rü pecadugu tüxũ nanguxẽchaũgu, yerü nüxna rü ta naxĩnü ga Chataná, ngẽma tüxna na naxĩnüxürũ. Natürü nüma ga Ngechuchu rü taguma chixexũ naxü. ¹⁶ Rü ñuxma na tüxũ nangẽxmaxũ ya tórü ngüxẽeruũ ya Ngechuchu, rü name nixĩ i tama imuẽãcüma nüxna tangaicamagü ya tórü ãëxgacü ya Tupana ya tüxũ ngechaũcü. Rü tanaxwèxe na ngẽmaãcü nüxna ingaicamagüxũ na nüxũ ingechaütümügüxücèx rü tüxũ nangechaũãcüma tüxũ nangüxẽexücèx i ngẽxguma guxchaxũgü tüxna ngaicamagu.

5

¹ Nuxcüma ga Tupana rü Moichémaã nüxũ nixu na Arãũ yĩxücèx ga Yudíugüaru paigüeru ixĩcü na guma duũxũgüétüwa chogüxücèx ga Tupanapèxewa. Rü guxũma ga yema Arãüwena ügüxũ ga paigüeru rü duũxũgütanüwa nüxũ naxunetagu na yema duũxũgüaru ngüxẽeruũ yĩxücèx ga Tupanapèxewa rü Tupanana naxããxücèx ga ãmaregü rü Tupanacèx nadaiãxücèx ga naxünagü na yemaãcü nüxũ nüxũ nangechaũxücèx ga norũ pecadugü. ² Natürü ngẽma paigüeru rü guxũma i duũxũgürüütama nixĩ na pecadugu nanguxũ. Rü ngẽmacèx nüxũ nacuèx na ñuxãcü yaxna namaã naxĩnüxũ i duũxũgü i ngẽxguma naëchitamare pecadu naxüegu rü tama aixcüma Tupanawe naxĩxgu. ³ Rü ngẽma paigüeru rü tama ngẽma duũxũgüaru pecaducèxicatama nixĩ i nadaiãxũ i naxünagü, natürü nanaxwèxe i noxrütama pecaducèx rü ta na nadaiãxũ i naxünagü na ngẽmaãcü Tupana nüxũ nüxũ nangechaũxücèx i ngẽma pecadugü. ⁴ Rü taxúema tügütama tingucuchixẽ na paigüeru tiixücèx. Natürü Tupana nixĩ ya tüxũ unetacü rü tüxna naxãcü i ngẽma puracü na paigüaru ãëxgacü tiixücèx, yexgumarũ ga Tupana rü Arãũxũ na yangucuchixẽxürũ na paigüeru yĩxücèx. ⁵ Rü yexgumarũ ga Ngechuchu rü tama nügütama ningucuchixẽ na Tupanapèxewa tórü

ngüxëëruü i paigüeru yïxüçèx. Natürü Tupana nixĩ ga yangucuchixëëcü. Yerü Tupanatama nixĩ ga nüxü ñacü:

“Cuma nixĩ i Chaune. Rü ñuxma chanangoxëë na Chaune quiixü”,

ñacü. ⁶ Rü toxnamana i Tupanaärü ore i ümatüxüwa rü ñanagürü ta:

“Cuma nixĩ i guxügutáma duüxügüarü ngüxëëruü i paigüeru quiixü, guma pai ga Melquisederüü”,

ñanagürü. ⁷ Rü yexguma Cristu ñoma ga nañewa maüxgu, rü poraãcü nayumüxë rü tagaãcü rü naxauxãcü Tupanana naca na nüxü nangüxëëxüçèx na naga naxĩnüxüçèx. Rü yemaãcü nanaxü ga Cristu, yerü Tupana rü naporá na nüxü nangüxëëxüçèx na tama yuxü namüxüçèx. Rü Tupana rü Cristuxü naxĩnü yerü nüma ga Cristu rü aixcüma Tupanaga naxĩnü. ⁸ Rü nüma ga Cristu rü woo Tupana Nane na yïxü, natürü ngüxü ninge naxçèx na Tupanaga naxĩnüxü. ⁹ Rü yemaãcü nügü inaxã rü curuchagu nayu na tumaärü maxëëëruü yïxüçèx ya guxãma ya yixema naga ñnüëxë. ¹⁰ Rü Nanexü nixĩ ga naxunetaxü ga Tupana na guxügutáma nügüpëxewa tórü ngüxëëruü i paigüeru yïxüçèx yexgumarüü ga pai ga Melquisedé ga norü yumüxëwa nuxcümaücü ga tórü oxí ga Abráüçèx Tupanana çacü na guma Abráüxü nangüxëëxüçèx ga Tupana.

Wüxi i äücümaxüchixü nixĩ na nüxü rüxoexü na yaxögüxü

¹¹ Rü ñuxma rü toxü nangëxma i muxüchixüma i ore i Cristuchiga ixixü i pemaã nüxü tixuxchaüxü. Natürü naguxchaxüchi na meãma pemaã tanangoxëëxü i ngëma, erü pema rü tama pexü natauxcha na nüxü pecuáxü.

¹² Rü marü ñuxgumama nüxü na pecuáxü i Tupanaärü orchiga, rü pema rü chi marü namaã pengüexëëtae. Natürü i pema rü ñuxma rü ta penaxwëxe na wena pemaã tanangoxëëxü i ngëma Tupanaärü ore i tauxchaxü i nawa inaxügüxü na Tupanachigaxü icuáxü. Rü ngëmaãcü i pema, rü ñoma õxchana i naëgünenixüwa maixürüütama pixigü.. Erü tama nüxü pecuëxgüéga i guxüma i ngëma Tupanaärü ore i yexeraãcü tamaã nüxü ixuxü i Cristuchiga na ñuxãcü Tupana naxwëxexü na naga pexĩnüëxü. ¹³ Rü yixema yaxõxë ya tama nüxü cuëxégaxe na ñuxãcü Tupanacèx tamaxüxü, rü wüxi i õxchana i maixürüü tixĩ. Rü ngëmaãcü pixigü i pemax. ¹⁴ Natürü yixema yaxõxë ya tümamaã yaxüxe na tanangugüxü na tacü yïxü i nguxëëtae i mexü rü éxna chixexü, rü aixcüma nüxü tacuèx na ñuxãcü Tupanacèx tamaxüxü. Rü yixema rü ñoma wüxi i duüxü i yaxü i namachimaã äwemüxürüü tixĩ. Natürü i pema rü tama ngëmaãcü pixigü.

6

¹ Rü ngëmacèx name nixĩ i yexeraãcü tingüéetanü na aixcüma meã nüxü icuáxüçèx i Cristuchiga. Rü tanaxwëxe na nüxü ichopetüxü ga yema ore ga nawa inaxügüxü na Cristuchigaxü icuáxü. Rü täütáma yeüçürü yema ore ga nawa inaxügüxüchiga tidexagüecha. Rü taxucèxma tüxcüü wena pemaã nüxü tixu na nüxü perüxoexüçèx na nagu pexixü i ngëma mugü ga Moïché ümatüxü i tama tüxü maxëëëxü. Rü ngëxgumarüü ta taxucèxma tüxcüü wena pemaã nüxü tixu i nachiga na ñuxãcü Tupanaãxü yaxögüxü.

² Rü ngëxgumarüü ta taxucèxma tüxcüü wena pexü tangüexëë na ñuxãcü Tupanacèx íbaiüxü rü ñuxãcü duüxügüxü ingögüãcüma namaã iyumüxexü. Rü ngëxgumarüü ta taxucèxma tüxcüü wena pexü tangüexëë na ñuxãcü tá wena namaxëxü i duüxügü i yuexü rü ñuxãcü naãneärü guxgu rü Tupana tá wüxichigü i duüxügüna çaxü na ñuxãcü namaxëxü i ñoma i nañewa. ³ Rü ngëmacèx i ñuxma rü ngëxguma Tupana tama tüxna nachuxgu rü tanaxwëxe i yexeraãcü tingüéetanü na aixcüma guxüma i Cristuchigaxü icuáxüçèx rü

nüxü na icuáxüçèx na aixcüma ngëma nüma nanaxwèxexüãcüma meã naxcèx na imaxèxü. ⁴⁻⁵ Natürü ngëxguma chi wüxie Cristuxü yaxu, rü chi meãma Tupanaxü tacuèxgu, rü chi Naãe i Ünexüxü tayaxu, rü chi nüxü tacuèxgu na ñuxäcü namexü i Tupanaärü ore rü ñuxäcü na namexü i daxüguxü i naãne, rü name nixi i taxuãe. ⁶ Erü ngëxguma chi ngëmaãcü meã tayaxõxgu i noxrix rü ñuxüchi Cristuxü itatèxüchixgu, rü marü taxucürüwama texé wenaxärü Tupanacèx tüxü tataeguxëe. Erü ngëxguma ngëmaãcü itanatèxüchixgu ya Tupana Nane, rü ñoma wena curuchawa tayapotaxürüü tayaxixëe, erü guxü i duüxügüpèxewa ãne nüxü tingexëe. ⁷ Rü dücax, wüxi i naãne i pucü nagu nguxü rü meãma nanetü nawa nayae tümacèx ya yixema nagu üanexë, rü Tupanaärü ngüxëegagu nixi i ngema. ⁸ Natürü ngëxguma ngëma naãne rü tuxu rü natüanegü i chixexü nawa yaegu, rü Tupana rü tá chixexü namaã naxuegu rü üxüwa tá nigu i guxüma i nawa yaexü. Rü ngëxgumarüü tá tixi ya yixema Cristuxü itaxe.

Ítananguxëe na nayauxgüxü i maxü i taguma gúxü rü ngëmacèx tama nüxü tarüxoe na yaxõgüxü

⁹ Natürü, Pa Chaueneëgü ya Pexü Tangechaügüxe, rü woo ngëmaãcü pemaã tidexagügu, natürü aixcüma nüxü tacuèx na tama ngëma duüxügü i nüxü rüxoexürüü pixigüxü. Erü pema rü pexü nangëxma i maxü i taguma gúxü, rü Tupana rü tá aixcüma poraãcü pexü narüngüxëe na naxcèx pemaxèxüçèx. ¹⁰ Erü nüma ya Tupana rü aixcümacü nixi. Rü nüma rü tãütáma nüxü inayarüngüma ga yema mexü ga pexüxü rü ñuxäcü taeneëgü i yaxõgüxüxü na pengechaügüxü ga yexguma nüxü perüngüxëegügu, ngëma ñuxma ípenaxüxürütama. ¹¹ Rü ñuxma rü tanaxwèxe i wüxichigü i pema rü ngëmaãcü noxrirüü mexü i perü ngüchaümaã nüxü perüngüxëegüecha i taeneëgü ñuxmatáta wena núma naxü ya Cristu. Rü tanaxwèxe na ngëmaãcü pemaxèxü na düxwa aixcüma Cristuxütawa pengugüxü ngëma ípenanguxëexürüü. ¹² Rü tama tanaxwèxe na nüxü perüxoetanücüxü na Cristuwe perüxixü. Natürü tanaxwèxe i naxrüü pixigü i ngëma duüxügü i guxüguma meã yaxõgüãcüma Cristuwe rüxiamaxü rü nayauxgüxü i guxüma i ngëma mexügü ga Tupana namaã ixunetaxü. ¹³ Rü dücax, yexguma tórü oxü ga Abráümaã inaxunetagu ga Tupana rü nügüégagutama inaxuneta, yerü tataxuma ga texé ga norü yexera ixixë na tümægagu inaxunetaxüçèx. ¹⁴ Rü yemacèx ga Tupana rü Abráüxü ñanagürü:

“Rü aixcümaxüchi tá poraãcü cuxü charüngüxëe. Rü tá cuxü nangëxma i muxüchixütama i cutaagü”,

ñanagürü. ¹⁵ Rü Abráü rü meãma ínananguxëe ga guma nane ga Tupana namaã ixunetacü. Rü yemacèx nabu ga guma nane ga Ichaá ga Tupana namaã nüxü ixücü. ¹⁶ Rü ngëxguma duüxügü tacüçèx ixunetagügu, rü to i norü yexera ixixüegagu inaxunetagü. Rü wüxicana tacüçèx ngëmaãcü inaxunetagügu, rü nüxü tacuèx rü aixcüma tá nanaxügü i ngëma naxcèx inaxunetagüxü, rü marü taxucürüwama yeücürü nachiga nidexagüecha. ¹⁷ Rü yemacèx ga Tupana rü yexguma inaxunetagu namaã ga yema duüxügü ga nayauxgüxü tá ga yema ngüxëe ga Tupana nüxna äxchaüxü, rü nügüégagutama inaxuneta, yerü nanaxwèxe na meãma nüxü nacuèxgüxü na aixcüma tá yanguxëeãxü rü tagutáma naxüchicüüãxü ga yema namaã inaxunetaxü. ¹⁸ Rü nüxü tacuèx rü ngëxguma tacüçèx nügüégagu inaxunetagu ya Tupana, rü taxucürüwama tüxü nawomüxëe rü nanaxüchicüü i ngëma. Rü ñuxma i guxäma i yixema na Tupanacèx ibuxmüxü na tüxü nangüxëexüçèx rü tüxü namaxëxëxüçèx, rü nüma ya Tupana rü nügüégagu tamaã inaxuneta na ngëmaãcü tá tüxü nangüxëexü. Rü ngëmaãcü tüxü nanangüchaüxëe rü tüxü narüngüxëe na

nüxü icuáxücèx na aixcüma tá nayauxgüxü i ngēma maxü i taguma gúxü i tamaã inaxunetaxü. ¹⁹ Rü ñuxma na ínguxēēxü na aixcüma tá nayaxuxü i ngēma maxü i taguma gúxü, rü taxucèxma taxoegaãēgü, erü nüxü tacuèx na aixcüma daxüguxü i nañewa i Tupana íngēxmaxüwa tá ingugüxü. ²⁰ Rü ngēma nangēxma ya Ngechuchu i ñuxma yerü nüxüra yexma naxücu na Tupanapēxewa taétüwa nachogüxücèx. Rü ngēmaäcü guxüguma tórü ngüxēēruü i paigüeru nixi, guma Melquisedé ga Tupanapēxewa Abráüetüwa chogücürüü.

7

Ngechuchu rü guma nuxcümaücü ga pai ga Melquisederüütama nixi

¹ Rü guma Melquisedé rü ñane ga Charéüarü äëxgacü nixi ga yexguma namaüxgu ga Abráü. Rü nüma ga Melquisedé, rü duüxügüarü pai nixi ga Tupanapēxewa. Rü yexguma Abráü rü to ga nachiüñeärü äëxgacügümaã nügü nadaixgu rü nüxü nayexeragu, rü Melquisedé rü namawa Abráüpēxegu nayangu ga yexguma Abráü napatacèx taegugu. Rü nüma ga Melquisedé rü Tupanaégagu Abráümaã mexü naxuegu. ² Rü Abráü rü nüxü nayexma ga guxüma ga yemaxügü ga yema äëxgacügü ga namaã nügü nadèixüna napuxüxü. Rü yemawa ínanaxüxüchi ga yema Tupanana üxü, rü Melquisedéna nanaxã. Rü ngēma naega i Melquisedé rü Äëxgacü ya Ixaixcümacü ñaxüchiga nixi. Rü norü ñane ga Charéü rü Taäëxēēruü ñaxüchiga nixi. Rü ngēmacèx i naega i Melquisedé rü Äëxgacü ya Taäëxēēruü ñaxüchiga ta nixi. ³ Rü Tupanaärü ore ga nuxcüma ümatüxüwa rü tama nüxü nixu na texé tiixü ga nanatü rü naë rü norü oxigü ga Melquisedé. Rü ngëxgumarüü ta tama nüxü nixu i norü buxchiga rü norü yuxchiga. Rü ngēmacèx Tupana Nanerüü guxüguma duüxügüarü ngüxēēruü ya pai nixi i Tupanapēxewa. ⁴ Rü ñuxma rü name nixi i nagu perüxüñüë na ñuxäcü aixcüma äëxgacü ya tacü yiixü ga Melquisedé. Yerü nuxcümaücü ga tórü oxi ga Abráü rü Melquisedéna nanaxã ga yema Tupanana üxü ga natanüwa ga yema yemaxügü ga togü ga äëxgacügüna napuxüxü. Rü ngēmawa nüxü tacuèx na Tupanapēxewa tórü oxi ga Abráüarü yexeracü yiixü ga Melquisedé. ⁵ Rü ñuxma i Yudíugü, rü guxüma i norü ngēmaxüwa ínanaxüxüchigü i ngēma Tupanana üxü, rü ñuxüchi norü paigüna nanaxã yerü yemaäcü nixi ga namuãxü ga yema mugü ga Moíché ümatüxü. Natürü guxüma i ngēma paigü rü Lebítaagü nixígü. Rü nüma ga Lebí rü guxüma i Yudíugürüü Abráütaa nixi. Rü ngēmaäcü i ngēma Yudíugü rü norü paigüna nanaxã i ngēma Tupanana üxü, woo natanüxügü i Yudíugü na yiixü i ngēma paigü. ⁶ Natürü ga Melquisedé rü woo tama Lebítaa nixi, natürü Abráümēxēwa nanayaxu ga yema Tupanana üxü. Rü nüxü tacuèx na Abráü yiixü ga noxri nayaxucü ga Tupanaärü uneta. Rü Melquisedé rü Tupanana naca na Abráümaã mexü naxueguxücèx. ⁷ Rü guxüma meãma nüxü tacuèx rü ngëxguma texé toguècèx Tupanana caxgu na tüxü nangüxēēxücèx, rü Tupanapēxewa rü yixema nüxna çaxe rü ngēma togü i naxcèx itaçaxüärü yexera tixi. Rü ngēmaäcü nüxü tacuèx na Abráüarü yexera yiixü ga Melquisedé i Tupanapēxewa. ⁸ Rü ñuxma i nuã tatanüwa rü ngēma paigü i ngixü yauxgüxü i ngēma dñeru i Tupanana ücü, rü duüxügümare nixígü rü tá nayue. Natürü ngëxguma Melquisedéchiga yadexagu i Tupanaärü ore, rü ñoma namaxüxürüü nixi i nachiga yadexaxü. Rü ngēmawa nüxü tacuèx na Cristu ya guxüguma maxücürüü na yiixü ga Melquisedé. ⁹⁻¹⁰ Rü Abráütaa ga Lebí, rü guxüma i paigü i Lebítaagü ixígüxü i ñuxma ngixü yauxgüxü i ngēma dñeru i Tupanana ücü, rü nümagü rü ta Abráümaã Melquisedéna nanaxãgü ga yema Tupanana üxü. Yerü nüma ga Lebí rü guxüma ga nataagü

i ñuxma Yudiügüarü paigü ixīgüxü, rü woo ga na tauta nabuexü ga yexguma, natürü marü Abráüxünewa nayexmagü ga yexguma Melquisedé namawa Abráüpëxegu yanguxgu. Rü ngēmawa nüxü tacuèx na guxüma i ngēma paigüarü yexera yīxü ya Melquisedé. ¹¹ Rü nuxcümaügüxü ga tórü oxigü ga Yudiügü, rü Lebítaagü ga paigümëxëwa nixi ga nayauxgüâxü ga Tupanaârü mugü. Natürü pemaã nüxü chixu rü yexguma chi yema paigü aixcüma yema Yudiügüxü imexëëgügu ga Tupanapëxewa, rü taxucèx chima Tupana nüxü naxuneta ga naï ga pai ga Melquisederüü ixïcü ga tama Lebítaa ga Arãürüü ixïcü. Rü yemacèx ga Tupana rü nüxü naxuneta ga Nane ga Ngechuchu na tórü chogüruü ya pai yīxüçèx. ¹² Rü yemacèx ga Tupana rü yema Yudiügüarü paigüchicüüxü nayangucuchixëë ga Cristu. Rü nüma nixi i ñuxma i aixcüma Tupanapëxewa tüxü yamexëëgüxü. Rü guxüma ga Lebítaa rü paigü nixigü yerü yemaãcü nixi ga naxueguxü nawa ga yema mugü ga Moïché ümatüxü. Natürü nüma ga Cristu rü marü nanaxüchicüü ga guxüma ga yema. ¹³⁻¹⁴ Erü meãma nüxü tacuèx rü nüma ya tórü Cori ya Ngechuchu ya yima nachiga idexagücü rü tama Lebítaa nixi erü nüma rü Yudátaa nixi. Rü nüxü tacuèx rü taxuüma ga Yudátaa rü pai nixi, yerü ga Moïché rü yexguma yema paigüchiga yadeaxgu rü taxuüma ga Yudátaaxü naxuneta na pai yīxüçèx. ¹⁵ Rü ngēmaãcü meã nangox na Tupana iyanaxoxëëxü ga guxüma ga yema mugü ga Moïché ümatüxü ga paigüchiga. Yerü nüma ga Tupana rü nüxü naxuneta ga wüxi ga pai ga yexwacaxücü ga tama Lebítaa ixïcü. Rü nüma nixi i tórü Cori yīxü ya Melquisederüü ixïcü, erü guxüma i ngēma togü i paigüarü yexera nixi. ¹⁶ Rü guxüma ga yema togü ga paigü rü nangucu yerü Lebítaa nixigü. Natürü nüma ga Cristu rü paixü ningucuchi yerü poramaã yuwa ínarüda rü guxüguma namaxëcha na tüxü nangüxëëxüçèx. ¹⁷ Rü ngēmacèx i Tupanaârü ore i ümatüxüwa rü tórü Corichiga ñanagürü:

“Cuma rü guxügutáma duüxügüarü ngüxëëruü ya pai quixi Melquisederüü”, ñanagürü. ¹⁸⁻¹⁹ Rü yemacèx ga Tupana rü ñoma ga naãnewa nanamu ga Nane, yerü yema mugü ga paigüchiga naxümatüxü ga Moïché rü tama poraãcü tüxü narüngüxëë yerü tama aixcüma tüxü nimexëëgü ga Tupanapëxewa. Rü yemacèx Nanexü namu ga Tupana na tórü pecaducèx nayuxüçèx na ngēmaãcü tüxü nangëxmaxüçèx i maxü i taguma gúxü rü aixcüma Tupanamücügü ixīgüxüçèx. ²⁰⁻²¹ Rü yexguma Tupana yema togü ga paigüxü ngucuxëëgu, rü nanangucuxëëmare. Natürü yexguma Cristuxü yangucuchixëëgu na tórü ngüxëëruü ya pai yīxüçèx, rü nügüégagutama inaxuneta. Rü yemacèx ga yexguma Cristuxü yangucuchixëëgu rü ñanagürü:

“Choma i Cori ya Tupana rü marü cuxü chaxuneta na guxügutáma duüxügüarü ngüxëëruü ya pai quiixüçèx. Rü ngēma rü tagutáma chanaxüchicüü erü chaugüégagu ichaxuneta”,

ñanagürü. ²² Rü ñuxma na yemaãcü nügüégagutama inaxunetaxü ga Tupana, rü nüxü tacuèx na aixcümaxüchima yema paigüarü yexera na yīxü ya Cristu erü guxügutáma Tupanapëxewa tüxü narüngüxëë. ²³ Rü yema togü ga paigü rü namuxüchi, yerü niyuetanü. Rü yemacèx taxucürüwama guxüguma paigü nixigü. ²⁴ Natürü ñuxma na tórü ngüxëëruü ya paixü yangucuchixü ya Ngechuchu, rü ngēmacèx marü taxucèxma texé ya togue tingucuchi, erü nüma ya Ngechuchu rü tagutáma nayu. ²⁵ Rü ngēmacèx nixi i ñuxma i nüxü natauxchaxü na aixcüma tüxü namaxëxëëxü ya guxâma ya yixema norü ngüxëëmaã Tupanaxütawa ngugüxe. Erü nüma ya Ngechuchu rü guxüguma namaxëcha na tümaëtüwa nachogüxüçèx. ²⁶ Rü ngēmaãcü ya Ngechuchu, rü nüxicatama nixi i pai ya tórü ngüxëëruü yīxü i Tupanapëxewa. Erü nüma rü aixcüma naxüüne, rü nataxuma i chixexü i nawa, rü nangearü pecaduãx yerü

taguma taxrüü pecadu naxü. Rü ñuxma rü guxüetüwa nangëxma i daxüguxü i naãnewa i Tupana íngëxmaxüwa. ²⁷ Rü Ngechuchu rü tama ngëma togü i paigüerurüü nixí. Erü nümagü rü nanaxwëxe na guxü i ngunexügu Tupanacèx naxünagü nadèixü na ngëmaãcü Tupana nüxü nüxü ngechaüxücèx i noxrütama pecadugü rü guxü i duüxügüarü pecadugü ta. Natürü nüma ga Ngechuchu rü yexguma nügü inaxãxgu, rü wüxicanatama pecaducèx nayu. Rü ngëma rü guxügutama name i Tupanapëxewa. ²⁸ Rü yema mugü ga Moïché ümatüxü, rü duüxügümarexü naxuneta na paigüerugü yixüguxücèx. Natürü nümagü rü ta nipecaduãxgü. Natürü yemawena ga Tupana rü nügüégagu Nanexü naxuneta na tórü ngüxëëruü yixüçèx. Rü yima Nane rü guxüguma mecüxüchi ya tórü Maxëxëëruü nixí. Rü nüma rü guxüguma tüxü narüngüxëë i Tupanapëxewa.

8

Ngechuchu nixí ya tórü ngüxëëruü i Tupanapëxewa

¹ Rü ngëma pemaã nüxü tixuxchaüxü i ñuxma nixí na tüxü nangëxmaxü ya tórü ngüxëëruü ya mexëchicü i Tupanaxütawa. Rü nüma rü Tupana Nane ya Cristu nixí. Rü daxüguxü i naãnewa i Tupanaärü tügünecüwawa narüto erü guxüärü äëxgacü nixí. ² Rü ngëma daxüguxü i naãnewa i ngëma nachica i üünexü ga Tupana üxüwa nixí i taxcèx ínaçaxü. Rü tama ngëma Yudíugüarü paigürüü wüxi ya ípata ya duüxügü üxünewa Tupanana taxcèx ínaca. ³ Rü guxüma i ngëma Yudíugüarü paigüeru rü nangucu na Tupanana naxägüãxücèx i ämaregü rü naxcèx nadaíãxücèx i naxünagü na Tupana nüxü nüxü ngechaüxücèx i duüxügüarü pecadugü. Rü yemacèx ga Ngechuchu rü Tupanana nügü naxãmare na duüxügüarü pecaducèx nayuxücèx. ⁴ Rü ñuxma i nüma ya Ngechuchu rü daxüguxü i naãnewa nangëxma na ngëma tórü ngüxëëruü ya pai yixüçèx i Tupanapëxewa. Rü ngëmacèx tama ñoma i naãnewa nixí i pai yixü. Natürü ngëxguma chi ñoma i naãnewa nangëxmagu rü tãu chima pai nixí erü ñoma i naãnewa nangëxmagü i ngëma Yudíugüarü paigü i Tupanana ämare ägüxü yema Moïchéarü mugü nüxü ixuxürüü. ⁵ Natürü ngëma puracü i ñoma i naãnewa naxügüxü i ngëma Yudíugüarü paigü, rü naxcèx nadauxütaegümare i ngëma Ngechuchu daxüguxü i naãnewa üxü. Rü ngëma nachica i nawa Tupanacèx napuracüexü i ngëma paigü, rü nanaxüchicünèxägümare i ngëma nachica i Ngechuchu nawa ngëxmaxü. Rü meãma nüxü tacuèx i ngëma, yerü yexguma Moïché naxüxchaügu ga Tupanapata, rü Tupana rü ñanagürü nüxü:

“¡Dücèx, meã nangugü i ngëma cuèxruü ga cuxü chawéxü ga mèxpüne ga Chinaíwa! Rü chanaxwëxe i ngëmaãcü na cunaxüxü”,

ñanagürü. ⁶ Natürü nüma ya tórü ngüxëëruü ya Cristu rü daxüguxü i naãnewa nangëxma, rü ngëma aixcümaxüchi Tupanapëxewa taétüwa nachogü. Rü ngëma Yudíugüarü paigü rü nagu naxíãma ga yema nuxcümaüxü ga uneta ga Moïché ümatüxü. Natürü nüma ya Tupana rü marü tüxna nanaxã i wüxi i ngexwacaxüxü i uneta erü tamaã nüxü nixu na Cristu yixü ya aixcüma tórü ngüxëëruü ixícü. Rü nüma rü nayu na Tupanapëxewa tüxü yamexëëxücèx, rü ngëma Tupanaxütawa nangëxma i ñuxma na taétüwa nachogüxücèx. Rü ngëmaãcü nüxü tatau na Tupanaärü uneta i ngexwacaxüxü rü yema nuxcümaüxü ga unetaarü yexera yixü na namexü. ⁷ Yerü yexguma chi yema nüxíraüxü ga uneta ga Moïché ümatüxü rü aixcüma namexgu na duüxügüxü namaxëëxücèx, rü marü taxucèx chima tanaxwëxe i to i ngexwacaxüxü i Tupanaärü uneta. ⁸ Natürü nüma ga Tupana rü nüxü natau na tama aixcüma

napēxewa duūxūgūxū yamexēēxū ga yema nūxīraūxū ga uneta ga Moīchéna naxāxū. Rū yemacèx ga Tupana rü ñanagürü:

“Wūxi i ngunexū rü wena táxarū guxūma i chorū duūxūgūmaā ichaxuneta.

⁹ Natürü ngēma chorū uneta i ngexwacaxūxū, rü tāūtāma namaā nawūxigu ga yema nūxīraūxū ga chorū uneta ga nuxcūmaūgūxū ga perū oxigūmaā nūxū chixuxū ga yexguma nūxū charūngūxēēgu na ínachoxūxūcèx ga Equituarū naānewa. Yerū nūmagū ga yema duūxūgū rü tama chauga naxīnūē rü tama nayanguxēē ga yema nūxīraūxū ga chorū uneta, rü yemacèx íchanawogū. ¹⁰ Natürü ngēxguma nawa nanguxgu na wena namaā ichaxunetaxū, rü ñāācū tá nixī i guxūma i Yudíugūmaā ichaxunetaxū: ‘Rü tá meāma ngēma duūxūgūxū nūxū chacuèxēē i chorū mugū na aixcūma naāēwa nangēxmagūxūcèx. Rū choma rü tá norū Tupana chixī, rü nūmagū rü tá chorū duūxūgū nixīgū’. ¹¹ Rū guxūma i ngēma duūxūgū i choxū yaxōgūxū, rü aixcūma tá choxū nacuèxgū. Rū ngēmacèx taxucèxtāma tūxcūū nūgūmaā nūxū nixugūgū i chauchiga na ngēmaācū choxū nacuèxgūxūcèx. Erū guxūma i chorū duūxūgū rü aixcūma tá meā choxū nacuèxgū woo buxū rü ēxna yaxū. ¹² Rū tá nūxū nūxū changechaū i norū chixexūgū, rü tá nūxū ichayarūngūmaxūchi i norū pecadugū”,

ñanagürü ga Tupana. ¹³ Rū dücax, ñuxma na Tupana ngexwacaxūxū i unetachiga idexaxū, rü ngēmawa nūxū tacuèx na yema nūxīraūxū ga uneta rü marū nangupetūchaūxū. Rū nūxū tacuèx rü guxūma i ngēma marū ngupetūchaūxū, rü paxa tá inayarūxo. Rū ngēmaācū i ngēma Yudíugūarū paigū, rü marū inayarūxoxchaū na Tupanapēxewa duūxūgūxū nangūxēēxū. Erū nūma ya Tupana rü marū Cristuxū ningucuchixēē na tórū ngūxēēruū yīxūcèx i napēxewa.

9

Tupanapata ga duūxūgū üxūnechiga rü Tupanapata ya daxūguxū i naānewa ngēxmanechiga

¹ Rū yexguma nuxcūma Moīchémaā yadeaxgu rü nūxna naxāāgu ga yema nūxīraūxū ga uneta, rü Tupana namaā nūxū nixu na ñuxācū nanaxwèxexū na nūxū yacuèxūūgūxū. Rū yexgumarūū ta namaā nūxū nixu na ñuxācū nanaxwèxexū na naxcèx naxūāxū ga wūxi ga ĩpata ga naxchirunaxcèx na yēma nūxū yacuèxūūgūxūcèx ga paigū. ² Rū guma ĩpata ga naxchirunaxcèx rü nitüyemachīā. Rū yema naxmachīā ga nūxīra nawa ixūcuxū, rü “Nachica i Üünexū” nixī ga naēga. Rū yēma nayexma ga werachica rü mecha ga pāū ga üünexū nagu nuxū. ³ Rū yema to ga naxmachīā ga yema tūyemachīāxūcèxwena üxū rü “Nachica i Üünexūchixū” nixī ga naēga. ⁴ Rū yēma nayexma ga yema mecha ga uirunaxcèx ga ngextā nawa yagugūāxū ga pumara ga yixixū ga yexguma yaguxgu. Rū yēma nayexma ta ga yema baú ga Tupanaārū mugū nagu namaā nanguxūgūxū. Rū yema baú rü guxūwama uirumaā natūxūne. Rū yematama baúarū aixepewa nayexma ga wūxi ga tūxūācū ga uirunaxcèx ga yema pāū ga daxūwa rüyixūmaā āācuxū. Rū yexgumarūū ta yema baúarū aixepewa nayexma ga Arāūārū caxūruū ga ruxūxūne, rü guma nutagū ga Tupanaārū mugū nagu umatūgūcū. ⁵ Rū yema baúétūwa nayexmagū ga yema taxre ga daxūcūāxchicūnèxāgū ga ixāxpèxatūxū. Rū naxpèxatūgūmaā nayadūxétūgū ga yema baúātaū. Rū yema daxūcūāxchicūnèxāgūarū ngāxūwa nixī ga nūgū nangoxēēxūxū ga Tupana. Natürü taxucèxma tūxcūū yexeraācū nūxū tixu i ngēmachiga. ⁶ Rū wūxicana yemaācū na namexēēgūāxū ga guxūma ga yema, rü ñuxūchi ga

paigü rü guxüguma yema nüxĩraũxũ ga naxmachĩãgu nachocuxũ na yéma Tupana namaã nüxũ ixuxũãcũma nüxũ yacuèxũũgũxũcèx. ⁷ Natürü yema to ga naxmachĩãwa rü yema paigüarü ãëxgacüxicatama nixĩ ga yexma ücuxũ. Rü tama guxüguma yexma naxücu, natürü wüxicanatama yexma naxücu ga wüxichigü ga taunecügu. Rü yexguma yexma naxücu xgu rü yéma nanange ga naxünagü rü guma nagümaã yema baũxũ namaxcuétü. Rü yemaãcü ga yema paigüarü ãëxgacü rü inanaxã ga guma nagü na noxrütama pecadu rü guxũma ga duũxügüarü pecaduxũ iyanangümaxüçèx ga Tupana. ⁸ Natürü yema paigüarü ãëxgacüxicatama nixĩ ga yema Nachica ga Üünexüchixügu ücuxũ ga Tupana íyexmaxüwa. Rü ngẽmaãcü Tupanaãë i Üünexü tüxũ nüxũ nacuèxëë na taxucürüwama yexma Tupana íyexmaxügu nachocuxũ ga guxũma ga duũxügü yerü yexguma nagu naxĩxgu ga yema mugü ga Moĩché ümatüxũ rü nachuxu ga yema. ⁹ Rü guxũma i ngẽma pemaã nüxũ chixuchigaxũ, rü wüxi i cuèxruũ nixĩ i taxcèx i yixema na ñuxma imaxèxũ. Rü ngẽmawa nüxũ tadau rü yema ãmaregü ga Tupanana naxãgüxũ rü yema naxünagü ga Tupanacèx nadèixũ rü taxucürüwama yema duũxügüxũ nimexëë na aixcüma Tupanapëxewa yamexüçèx. ¹⁰ Rü yema nuxcümaügüxũ ga mugü ga õnagüchiga rü axeügüchiga rü nacümagüchiga ixĩxũ, rü yema duũxügüarü düxétüxüncèxicatama nixĩgü. Rü yemacèx tama yema duũxügüxũ nimexëë na aixcüma Tupanapëxewa yamexüçèx. Rü woo napora ga yema mugü ga noxrix, natürü yexguma ínanguxgu ga Cristu rü marü yexma nayacuèx na duũxügümaã naporaxũ. ¹¹ Natürü i ñuxma rü marü ínangu ya Cristu. Rü nüma nixĩ i aixcüma tórü ngüxëëruũ yĩxũ i Tupanapëxewa, rü nagagu nixĩ i nangëxmaxũ i maxũ i taguma gúxũ. Rü ngẽma nachica i ngextá taétüwa ínachogüxüwa rü aixcüma naxüüne erü tama guma ípata ga naxchirunaxcèx ga duũxügümare üxünerüü nixĩ erü daxügüxũ i naãnewa nangëxma. ¹² Rü Cristu rü marü daxügüxũ i naãnegu naxücu i ngextá Tupana íngëxmaxüwa. Rü taxucèxma tüxcüũ wüxichigü ya taunecügu ngëxma naxücu, erü marü guxüguma ngema nangëxmaëcha. Rü yexguma yexma naxücu xgu, rü tama yéma nanange ga chibugügü rü wocaxacügügü na Tupanana naxããxüçèx. Natürü nüma ga Cristu rü nagütama inaxã na yemaãcü naxütanüãxüçèx ga tórü pecadugü rü tüxũ nangëxmaxüçèx i maxũ i taguma gúxũ. ¹³ Rü yema mugü ga Moĩché ümatüxũ rü ñanagürü:

“Ngëxguma texé yuetaxũ ingögügu, rü taxucürüwama Tupanapata ya naxchirunaxcèxgu taxücu”,

ñanagürü. Rü yemacèx ga yema Yudíugü, rü yexguma wüxi ga yuetaxũ yangögügügu rü nanaxwèxegü ga na norü paixütawa nagaãxũ ga wüxi ga woca na yema pai Tupanacèx yamáxüçèx rü na yaguãxüçèx na yemaãcü ga guma tanimaca rü dexágu nagüãxüçèx na yema duũxügüxũ namaã namaxcuxüçèx na yemaãcü nüxna ínayixüçèx ga norü chixexũ. Natürü yema rü duũxügüarü düxétüxünewaxicatama nanamexëë rü tama norü maxüxũ namexëë. ¹⁴ Natürü nagü ya Cristu rü yema naxünagügüarü yexera name erü tórü maxũ namexëë na aixcüma Tupanapëxewa imexüçèx. Rü Cristu rü woo Tupana Nane na yĩxũ rü na nataxuxũ ga norü chixexũ, natürü Tupanana nügü naxã rü tórü pecaducèx nayu yerü Naãë i Üünexü nanaporaxëë. Rü yemaãcü curuchagu nanabaxëë ga nagü. Rü ñuxma ya yima nagü rü ningu na tüxũ namexëëxüçèx i Tupanapëxewa. Rü ngẽmacèx taxucèxma tanaxwèxe na nagu ixĩxũ ga yema mugü ga Moĩché ümatüxũ ga tama tüxna naxãxũ i maxũ i taguma gúxũ. Rü ñuxma na Cristugagu Tupanapëxewa imexũ, rü nüma ya Cristu rü tüxũ narüngüxëë na naxüxüçèx i ngẽma Tupana ya maxüçü tüxũ naxwèxexũ. ¹⁵ Rü ñuxma na tórü pecaducèx nayuxũ ga Ngechuchu ya Cristu,

rü nüma nixĩ i tórü ngüxēēruũ i Tupanapēxewa, ngēma Tupanaārü uneta i ngexwacaxüxü nüxü ixuxürüũ. Rü ñuxma i yixema na Tupana tüxü dexü, rü tüxü nangēxma i maxü i taguma gúxü ega yima Naneãxü yaxōgügu. Rü ngēxgumarüũ ta i guxüma i Tupanaārü duüxügü ga nuxcüma yaxōgüxü, rü nüxü nangēxma i maxü i taguma gúxü yerü Cristu nayu na norü pecaduna ínguxüxēēãxüçèx. ¹⁶ Rü ngēxguma nayuxchaügu i wüxi i duüxü, rü wüxi i poperagu nanaxümatü na texé tá nayaxuxü i norü ngēmaxügü. Natürü ngēxguma namaüxgu i ngēma duüxü, rü taxucürüwama texé tanayaxu i norü ngēmaxügü. ¹⁷ Rü ngēmacèx i ngēma popera rü tama natora i ngēxguma namaüxgu i ngēma duüxü. Rü ngēxguma nayuxguxicatama nixĩ i naporaxü. ¹⁸ Rü nüma ga Cristu rü norü yumaã nixĩ ga Tupanapēxewa tüxü yamexēēgüxü. Yerü ga Moïché rü nüxü nixu rü yexguma texé pecaduãxgu rü tanaxwèxe na tümaārü paixütawa tanagaxü ga wüxi ga naxüna na tümaegagu nayuxēēãxüçèx rü inabaãxüçèx ga nagü na Tupana tüxü nüxü ngechaüxüçèx ga tümaārü pecadu. ¹⁹ Rü Moïché rü guxüma ga duüxügüpēxewa nüxü nixu ga guxüma ga Tupanaārü mugü. Rü yemawena nanayaxu ga wocaxacügü rü chibuxacügü, rü dexámaã nanaxüéü. Rü ñuxüchi nanayaxu ga wüxi ga naïxchacüüxacü rü ñuxre ga tüèxmü ga dauxüne, rü yema naïxchacüügu nanabagümü. Rü yemamaã guma nagüwa nanacúe rü ñuxüchi nanamaxcúetü ga yema popera ga Tupanaārü mugü nawa yexmaxü. Rü yexgumarüũ ta nayamaxcutanü ga guxüma ga duüxügü. ²⁰ Rü ñuxüchi ga Moïché rü ñanagürü nüxü ga duüxügü:

“Tupana rü marü inaxuneta na pexü tá nangüxēēxü. Rü daa nagümaã pexü chimaxcutanü i ñuxma erü ngēmaãcü nixĩ i choxü namuxü na ngēmawa nüxü pecuáxüçèx na aixcüma tá pexü nangüxēēxü”, ñanagürü. ²¹ Rü ñuxüchi ga Moïché rü guma nagümaã nanamaxcúetü ga guma ípata ga naxchirunaxcèx ga nawa Tupanaxü yacuèxüügüne. Rü yexgumarüũ ta nayamaxcutanü ga guxüma ga yemaxügü ga namaã Tupanaxü yacuèxüügüxü ga guma ípataarü aixepewa yexmagüxü. ²² Rü nüxü tacuèx rü yema duüxügü ga yexguma pecadu naxügügu rü Tupanapēxewa nügü yamexēēgüchaügu, rü norü paigüxütawa nanaga ga wüxi ga naxüna na nüxü yamáãxüçèx rü inabagüxēēãxüçèx na Tupana tama napoxcuexüçèx. Natürü ñuxma ya Tupana rü tüxü nüxü nangechaü i tórü chixexü yerü tórü pecaducèx nayu ga Ngechuchu rü nagü inanaba. Rü yexguma chi tãü chima nayuxgu rü nagü inabaãgu, rü taxucürüwa chima Tupana tüxü nüxü nangechaü i tórü pecadugü.

Cristu rü nayu na iyanaxoxēēãxüçèx i pecadu

²³ Rü yemacèx ga Tupana rü nuxcümaxüchima Moïchémaã nüxü nixu na paigü duüxügüarü pecaducèx nadèixü ga naxünagü rü inabaãxü ga nagü na yemaãcü Tupana tama napoxcuexüçèx ga duüxügü. Natürü i ñuxma i yixema na Tupana tüxü dexü, rü tüxü nangēxma i tachica i daxügüxü i naãnewa yerü Nane ya Cristutama tórü pecaducèx nayu rü inanaba ga nagü. Rü yima nagü rü Tupanapēxewa rü poraãcü ngēma naxünagügüarü yexera narüporamaē. ²⁴ Rü ngēmacèx i ñuxma rü taxucèxma tüxcüü guma ípata ga naxchirunaxcèx ga duüxügü üxünegu naxücu ya Cristu na ngēma taétüwa nachogüxüçèx. Erü nüma ya Cristu rü marü Tupanaxütawaxüchi nangu i daxügüxü i naãnewa. Rü ngēma Nanatüpēxewa nangēxma i ñuxma na ngēma taétüwa nachogüxüçèx. ²⁵ Rü ngēmacèx i ñuxma rü taxucèxma tüxcüü guxüguma Nanatüna nügü naxãècha na ngēmaãcü taxcèx nayuu-xüçèx. Rü yema Yudíugüarü paigüarü ãëxgacügü rü gúcü ga taunecügügu guma ípata ga üünenegu nachocuxü na yéma Tupanana naxägüãxüçèx ga

guma naxūnagūgü. ²⁶ Natürü ya Cristu, rü taxucèxma tūxcüü gúcü ya taunecūgūgu Tupanana nügü naxāēcha, erü ngēxguma chi ngēmaācū yixīgu rü chi noxri naāne ixūgūgumama rü chi marü muēxpūxcūna taxcèx nayu. Natürü ñomaūcūü ga Cristu rü marü ñoma ga naānewa nangu na wūxicanatama nügü inaxāxūcèx rü pecaducèx nayuxūcèx. ²⁷⁻²⁸ Rü ngēma na wūxicanatama nayuxū i duūxūgū naxūpa na Tupanapēxewa nangugūxū, rü yexgumarūūtama ga Cristu rü wūxicanatama nügü inaxā rü nayu na iyanaxoxēēāxūcèx i muxūma i duūxūgūarü pecadugū. Natürü wena taxarü nūma naxū. Rü ngēxguma wena nūma naxūxgu rü tama pecaduarü oxēēwa tá nūma naxū. Natürü tá nūma naxū na namaxēxēēāxūcèx i guxūma i ngēma duūxūgū i aixcūma ínanguxēēgūxū.

10

¹ Rü yema mugü ga Moiché umatūxū rü írarūwatama yema duūxūgūcèx nanangoxēē ga tacü tá na naxūxū ga Cristu. Natürü ga yema mugü rü tama aixcūma Cristurūü napora, yerü taxucürūwama Tupanapēxewa nayamexēē ga yema duūxūgū woo gúcü ga taunecūgūgu Tupanacèx nanadaiixū ga naxūnagü na yemaācū Tupanana nangaicamagūxūcèx. Rü yemaācū ga yema mugü rü taxucürūwama Cristurūü nanamaxēxēē ga yema duūxūgū. ² Rü yexguma chi yema mugü aixcūma yema duūxūgūxū imexēēgu ga Tupanapēxewa, rü tãu chima nagu narūxñnūēēcha na yapecaduāxū, rü chi nūxū narūxoe na naxūnagü Tupanacèx nadèixū. ³ Natürü woo gúcü ga taunecūgūgu Tupanacèx naxūnagü nadèixū ga duūxūgū, rü tama norü pecadu inayarūxoxēē. Rü yema rü norü pecaduarü cuēāchixēēruūmare nixī. ⁴ Yerü guma nagü ga yema wocagü rü chibugü rü tama napora na iyanaxoxēēāxūcèx ga pecadugū. ⁵ Rü yemacèx ga Cristu ga yexguma ñoma ga naānewa naxūxchaūgu, rü Nanatūxū ñanagürü:

“Tama cunaxwèxe na naxūnagü cuxcèx nadèixū i duūxūgū na naxūtanügūāxūcèx i norü pecadugū. Natürü cunamexēē i ñaā chaxune na ngēmamaā chanaxūtanūxūcèx i pecadu. ⁶ Rü tama namaā cutaāē i ngēma naxūnagü i cuxna naxāmaregūxū rü cuxcèx nadèixū rü yagugūxū na naxūtanügūāxūcèx i norü pecadugū. ⁷ Rü yemacèx rü ñacharūgü: ‘Dücèx, Pa Chaunatūx, daxe chixī, rü nuā cupēxewa changēxma na chanaxūxūcèx i curü ngúchaū rü na chayuxūcèx, ngēma curü orewa chauchiga naxūmatūxūrūü’, ñacharūgü”.

⁸ Rü yemaācū ga Cristu rü nūxū nixu na Tupana rü tama aixcūma namaā nataāēxū ga yema na naxcèx nadaiāxū ga naxūnagü rü naxcèx yagugūāxū na naxūtanügūāxūcèx ga norü pecadugū woo yema mugü ga Moiché umatūxūwa rü duūxūgūxū namu na naxūgūāxū ga guxūma ga yema. ⁹ Rü yemawena ga Cristu, rü ñanagürü ta:

“Dücèx, Pa Chaunatūx, daxe chixī, rü nuā cupēxewa changēxma na chanaxūxūcèx i curü ngúchaū rü duūxūgūarü pecaducèx na chayuxūcèx”,

ñanagürü. Rü yemawa nūxū tacuèx na Tupana rü marü iyanaxoxēēāxū na naxūnagü naxcèx nadèixū, yerü Nanexū ningucuchixēē na pecaducèx nayuxū. ¹⁰ Rü ñuxma na Ngechuchu ya Cristu naxūxū ga yema Tupanaārü ngúchaū, rü ngēmacèx nixī i ñuxma i Tupanapēxewa ixūūnexū i yixema. Yerü nūma ga Cristu rü Tupanana nügü naxā na wūxicanatama guxāārü pecaducèx nayuxū. ¹¹ Rü guxūma i Yudíugūarü paigü rü wūxichigü i ngunexūgu rü tupaucawa nangēxmagūxū na Tupanana naxāgūāxūcèx i naxūnagü i naxcèx nadaiixū. Rü guxūguma yemaācū nanaxūgūxū natürü taguma aixcūma

inayarüxo ga norü pecadugü woo yemaãcü na naxügüxüãxü. ¹² Natürü nüma ga Ngechuchu ya Cristu rü wüxicanatama Tupanana nügü naxã na guxãärü pecaducèx nayuxücèx. Rü yemawena rü ñuxüchi daxüwa naxü rü Tupanaärü tügünecüwawa nayarüto, erü guxãärü ãëxgacü nixĩ i ñuxmax. ¹³ Rü ngema nixĩ i nangëxmaxü ñuxmatáta ya Tupana rü guxüma i norü uwanügüxü nüxü nayexeraxëë. ¹⁴ Rü nüma ga Ngechuchu ya Cristu rü wüxicanatama Tupanana nügü naxã rü nayu na guxüguma Tupanapëxewa timexücèx ya yíxema Tupanacèx tüxü yaxüünexëëgüxe. Rü ngëmacèx i ñuxma rü taxucèxma tüxcüü wena nügü inaxã rü nayu, yerü wüxicanatama guxüma ningutanüxëë. ¹⁵⁻¹⁶ Rü Tupanaãë i Üünexü rü tüxü nüxü nacuèxëë na aixcüma yíixü i ngëma, yerü nüma ga Tupana rü ñanagürü:

“Ngëxguma nawa nanguxgu na wena ngëma Yudíugümaã ichaxunetaxü, rü wüxi i ngexwacaxüxü i uneta tá nüxna chaxã. Rü tá meã ngëma duüxügüxü nüxü chacuèxëë i chorü mugü na aixcüma naãëwa nangëxmagüxücèx rü guxüguma naga naxĩnüëxücèx. ¹⁷ Rü tá nüxü ichayarüngümaxüchi i ngëma duüxügüarü pecadugü rü ngëma chixexü i naxügüxü. Rü tagutáma wena nüxna chacuèxãchi”, ñanagürü. ¹⁸ Rü ngëmaãcü nüxü tacuèx rü ngëxguma Tupana duüxügüaxü nüxü ngechaügu i norü pecadugü, rü marü taxucèxma tüxcüü nanaxwëxe na wena tacü i naxünagü nüxna naxãgüxü naxcèx i pecadu.

Name nixĩ i Tupanana tangaicamagü

¹⁹⁻²⁰ Rü ngëmacèx i ñuxma, Pa Chaueneëgü, rü taxucèxma tüxcüü tamuüë na Tupana íngëxmaxüwa ichocuxü na namaãxüchi idexagüxücèx. Rü nuxcümaxüchima rü paigüarü ãëxgacüxicatama yexma naxücu nagu ga guma ípata ga naxchirunaxcèx ga Tupana nawa yexmane. Rü taxucürüwama ngexerüxüxemare yexma taxücu. Natürü nüma ga Ngechuchu ya Cristu rü marü inayanaxoxëë ga guxüma ga yema ga yexguma curuchagu nayuxgu rü nagü inabaãgu na Tupana íngëxmaxüwa tüxü yachocuxëëxücèx rü namaãxüchi idexagüxücèx. Rü woo taxucürüwama Tupanana tangaicamagü ga noxrix, natürü nüma ga Cristu rü nayu na tüxü namaxëxëëxücèx. Rü nagagu nixĩ i ñuxma i Tupanaxütawa ingugüxü. ²¹ Rü nüma nixĩ i Tupanapëxewa tüxü nangüxëëxü i guxãma i yixema i Tupanaärü duüxügü ixígüxe. ²² Rü ñuxma na tüxü nangëxmaxü ya tórü ngüxëëruü i Tupanapëxewa, rü tanaxwëxe i ngearü chixexüãcüma Tupanana tangaicamagü na namaãxüchi idexagüxücèx. Rü tanaxwëxe i aixcüma tayaxögü na nüma rü tá meã tüxü nayaxuxü yerü Cristu rü taxcèx nayu na tüxü iyanaxoxëëãxücèx i tórü chixexü rü yemacèx marü naegagu ítabaiü. ²³ Rü tanaxwëxe i aixcüma meã Cristuaxü tayaxögüecha yerü nagümaã tüxü inayanaxoxëë ga tórü chixexü. Rü ngëmacèx ítananguxëë na wena taxarü núma naxüxü na Nanatüxütawa tüxü nagagüxü. Rü taguma tanaxwëxe na nüxü rüxoexü na yaxögüxü, rü bai i írarüwa. Erü Tupana ga tamaã ixunetacü na tüxü nangüxëëxü, rü aixcümaxüchi tá nayanguxëë i guxüma ga yema tamaã nüxü yaxuxü. ²⁴ Rü ñuxma na ngëmaãcü tüxü nangüxëëxü ya Tupana, rü name nixĩ i guxüguma naxcèx tadaugü na ñuxãcü wüxichigü yigü rüngüxëëgüxü na yexeraãcü yigü ingechaügüxücèx rü mexü ixügüxücèx. ²⁵ Rü name nixĩ i guxüguma tórü ngutaquëxegüwa na íngugüüxü. Erü nümaxü rü marü nüxü narüxoe na ngutaquëxewa naxixü, rü tama tanaxwëxe na ngëxgumarüü ixígüxü. Rü ngëmacèx name nixĩ i yigüaxü tanagüchaüxëë na ingutaquëxegüxü. Rü ñuxma na nüxü icuáxü na marü yangaicaxü ya tórü Cori, rü yexeraãcü tanaxwëxe na yigüaxü nangüchaüxëëxü. ²⁶ Natürü ngëxguma chi texé Cristuaxü yaxöchirëxgu ga noxrix rü ñuxüchi noxtacüma nüxü tarüxoxgu, rü marü nataxuma na ñuxãcü

namexëëxü i ngëma tümaârü pecadu i Tupanapëxewa. ²⁷ Erü ngëxguma chi ngëmaäcü noxtacüma Cristuxü tarüxoxgu, rü aïxcümaxüchi tá tanayaxu i ngëma poxcu i äüxcümaxü i Tupana tá tüxü namaã poxcuxü rü yima üxü ya iyaurane ya nawa tá ínaguxüne i ngëma Tupanamaã rüxuwänügüxü. Rü ngëxícatama nixí i tüxü ínaguxëëxü ya yíxema Cristuxü rüxoxe. ²⁸ Rü nüxü tacuèx rü yexguma texé tama Moïchéarü mugüga ínügü rü nayexmagu ga taxre rü éxna tomaëxpüx ga duüxügü ga tüxü daugüxü rü tüxü ixugüexü na aïxcüma tama naga taxínüxü, rü äëxgacügü rü noxtacüma tüxü nimèxgü rü tama nüxü tangechaütümügü. ²⁹ Natürü Tupana rü aïxcüma yexeraäcü tá nanapoxcue i ngëma duüxügü i tama Nanega ínüëxü rü yima nagü ya pecaduarü pirüxü oexü rü Naã i Üünexü i nüxü ngechaüxümaã guxchigagüxü.

³⁰ Rü meãma nüxü tacuèx rü Tupana rü tama natüçexma ñanagürü:

“Choma tá nixí i namaã nüxü chacuáxü na tacü tá namaã chaxüxü i guxüma i ngëma chixexü ügüxü. Rü aïxcüma tá chanapoxcu”,

ñanagürü. Rü yexgumarüü ta ñanagürü:

“Choma tátama nixí i nüxna chaçaxü i wüxichigü i chorü duüxügü i norü maxüchiga”,

ñanagürü. ³¹ Rü dücax, rü aïxcüma namaxü ya Tupana, rü ngëmacèx ega tama naga ixínüëgu rü wüxi i äüxcümaxüchixü nixí na namëxgu inguxü na tüxü napoxcuxüçex. ³² Rü dücax, name nixí i nüxna pecuëxächie ga ñuxäcü na yüxü ga yexguma noxri Cristuxü peyaxgu. Rü yexguma ga pema rü yema na peyaxögüxügagu rü poraäcü guxchaxügü pexü nangupetü, natürü tama Cristuxü perüxoe rü bai ga írarüwa. ³³ Rü ñuxre ga pema rü duüxügü pemaã naguxchigagü rü guxäpëxewa pexü niçuaixgü. Rü toguax ga pema rü pegü ipeyaxägu na yema pemücügürüü ngüxü pingegüxüçex. ³⁴ Rü pema rü pexü nangechaütümügü ga yema petanüxügü ga yaxögüxü ga poxcupataüwa yexmagüxü. Rü taäëäcüma yaxna namaã pexínüë ga yema tama yaxögüxü ga pexna napuxüxü ga perü yemaxügü. Rü tama naxcèx pexoegaãë, yerü meãma nüxü pecuèx rü daxügüxü i naãnewa pexü nangëxma i ngëma perü ngëmaxügüarü yexera ixíxü, erü tagutáma nagux. ³⁵ Rü ngëmacèx i ñuxmax, rü tama name na nüxü perüxoexü na Cristuaxü peyaxögüxü woo tacü pexü üpetügu. Erü marü nüxü pecuèx rü Tupana rü aïxcümaxüchi tá pexna nanaxä i perü ämare i maxü i taguma gúxü, erü Cristuaxü peyaxögü. ³⁶ Rü ngëma guxchaxügü i pexü ngupetüxü, rü name nixí i yaxna namaã pexínüë na penaxüxüçex i Tupanaârü ngüchaü rü penayaxuxüçex i ngëma ämare i pemaã inaxunetaxü. ³⁷ Erü Tupanaârü ore i ümatüxüwa rü ñanagürü:

“Paxaxüchi tá wenaxârü núma naxü ya Cristu. Rü aïxcüma täütáma nuxcü ínangu. ³⁸ Natürü yíxema tümaârü ögagu chopëxewa mexë, rü name nixí i guxüguma tayaxöçcüma chauxcèx tamaxü. Natürü ngëxguma nüxü tarüxoxgu na tayaxöxü, rü choma rü täütáma tümamaã chataãë”,

ñanagürü. ³⁹ Natürü i yixema rü tama ngëma duüxügü i nüxü rüxoexü i Tupana tá poxcuexürüü tixígü. Erü yixema rü ngëma yaxögüxütanüxü tixígü, rü ngëmacèx tüxü nangëxma i maxü i taguma gúxü.

11

Törü öchiga

¹ Rü ñuxma rü törü ögagu nixí i nüxü icuáxü na aïxcüma tá nayauxgüxü i guxüma i ngëma irünguxëëgüxü ga Tupana tamaã ixunetaxü. Rü ngëma törü ögagu nixí i nüxü icuáxü na aïxcüma Tupana tá yanguxëëxü i ngëma norü uneta i ñuxma tauta nüxü idauxü. ² Rü ñuxre ga nuxcümaügüxü ga törü oxigü rü Tupanaãxü nayaxögü, rü yemacèx ga Tupana rü namaã nataãë. ³ Rü

ngēma tórü õgagu nixī i nūxū icuáxū na aixcūma yīixū na Tupana rü norü oremaãmare nangoxēēãxū ga ñoma ga naãne rü üèxcü rü tauemacü rü woramacurigü rü ãxtagü. Rü yemaãcü ga Tupana, rü ngürüwa nanangoxēēmare ga guxūma i ngēma ñuxma nūxū idauxū. ⁴ Rü guma nuxcūmaücü ga Abé rü Tupanaãxū nayaxõ. Rü yemacèx Tupanaga naxīnū rü nūxna nanaxã ga wüxi ga naxūna ga Tupanacèx yamáxū. Natürü ga naēneē ga Caī rü tama Tupanaga naxīnū rü tama nūxna nanaxã ga yema ãmare ga Tupana nūxū naxwèxexū. Rü yemacèx ga Tupana rü woo tama Caīmaã nataãē, natürü Abémaã nataãē rü nūxū nixu na mecü yīixū yerü nayaxõ rü naga naxīnū. Rü ngēmacèx i ñuxmax na woo nayuxū ga Abé, natürü wüxi i tórü cuèxruū nixī. Erü nawa nixī i nūxū icuáxū na Tupana naxwèxexū na yaxõgüxū rü naga ixīnūèxū. ⁵ Rü Enó rü ta Tupanaãxū nayaxõ rü naga naxīnū. Rü yemacèx nixī ga namaxãcütama yagaãxū na tama nayuxücèx. Rü namücügü rü taguma nūxū inayangaugü, yerü Tupana nayaga. Rü Tupanaãrü ore i ümatüxūwa nūxū nixu rü yexguma tauta yagaãgu, ga Enó rü nanaxü ga yema Tupana naxwèxexū. ⁶ Natürü taxuacūma Tupana tamaã nataãē ega tama nūxū yaxõgügu. Rü yíxema namaã ãmücüchaüxē, rü tanaxwèxe na tayaxõxū na aixcūmaxüchi nangēxmaxū i nūma rü aixcūma tüxū nangüxēèxū ya yíxema naxcèx daugüxe rü naga ñnūèxē. ⁷ Rü yexguma Noemaã yadeaxgu ga Tupana, rü nūma ga Noe rü nayaxõ rü naga naxīnū. Rü Tupana rü namaã nūxū nixu rü tá na ínanguxēēãxū ga mucü ga taxüchicü ga taguma duüxügü nūxū daucü rü tá guxüwama inanguanexēècü. Rü namaã nūxū nixu ga na naxüãxücèx ga wüxi ga wapuru ga taxüne na tama nayuxücèx ga nūma rü namèx rü nanegü rü naneãxgü. Rü Tupanaga naxīnū ga Noe, rü nanaxü ga guma wapuru, rü yemaãcü tama nayue ga nūma rü napatacūãx. Rü yemaãcü Tupanaãxū nayaxõ. Natürü yema togü ga duüxügü rü tama nayaxõgü, rü yemacèx Tupana nanapoxcue. Natürü nūma ga Tupana rü Noexū nixu na napèxewa namexū, yerü nūxū nayaxõ. ⁸ Rü guma tórü oxi ga Abráü, rü Tupanaãxū nayaxõ. Rü yemacèx nixī ga naga naxīnūxū rü nūxna yaxūxū ga nanatüchiüãne na nawa naxüxücèx ga yema naãne ga Tupana tá nūxna ãxū na noxrüxüchi yīixücèx. Rü yemaãcü nanaxü ga yexguma Tupana namuxgu. Rü nanatüchiüãnewa inaxüãchi ga Abráü woo tama nūxū na nacuáxū ga ngextá tá na naxūxū. ⁹ Rü yexguma nawa nanguxgu ga yema naãne ga Tupana namaã ixunetaxū, rü ñoma yexma naxüãneãxürüümare ípata ga naxchirunaxcèxmaãmare naxãchiü. Rü yexgumarüütama nixīgü ga nane ga Ichaá rü nataa ga Acobu, yerü yexguma nayaegu rü Abráürüü ñoma yexma naxüãneãxürüümare nixīgü ga yema naãnewa. Rü yemaãcü nixīgü ga guxūma ga nūmagü ga na woo Tupana rü namaã inaxunetaxū ga na noxrüxüchi yīixücèx ga yema naãne. ¹⁰ Rü yemaãcü ga Abráü, rü woo ñoma yexma naxüãneãxürüümare yéma nayexma, natürü Tupanaãxū nayaxõchigüama, yerü nūxū nacuèx na Tupana tá daxüguxū i naãnewa na nagaxū nawa ya yima ñãne ya nūmatama naxüxüne ya tagutáma iyarüxoxüne. ¹¹ Rü yexgumarüütama iyixī ga Abráü namèx ga Chara. Rü woo ga na taguma naxããcüchiréxū yerü marü iyaxüchi, natürü ixããcü yerü iyaxõõma na Tupana rü aixcūma tá yanguxēēãxū ga yema norü uneta ga tá na naxããcüxū. ¹² Rü yemaãcü ga Abráü rü woo marü yaguãxüchi na yīixū, natürü düxwa nūxū nayexma ga wüxi ga nane, rü gumawa ne naxī ga muxūma ga nataagü. Rü ñuxma rü ñoma ãxtagürüü namuxüchi, rü ñoma naxnücü ya taxuacūma yaxugücürüü nixīgü, yerü yemaãcü Abráümaã inaxuneta ga Tupana. ¹³ Natürü nūmagü ga Abráü rü Ichaá rü Acobu rü nayue, rü yemacèx tama nūxū nadaugü ga guxūma ga nataagü i ñuxma ngēxmagüxū, rü tama namaã inacuèxgü ga yema naãne ga noxri Abráümaã

nüxü yaxuxü ga Tupana. Natürü Tupanaäxü nayaxögüama, rü yemacèx nüxü nacuèxgü rü Tupana rü tá aixcüma na yanguxëëäxü ga yema norü uneta ga namaã nüxü yaxuxü. Rü nataãëgü yerü nüxü nacuèxgü na täütáma guxügüma ñoma ga naãnewa na nayexmagüechaxü, rü yemacèx nüxü nixugüe na to i nachiuãnecüãxrüümare yixigüxü ga ñoma ga naãnewa. ¹⁴ Rü nümagü rü yema oremaã meãma tüxü nüxü nacuèxëe na tama ñoma ga naãneguxicatama naxĩnüëxü natürü ínguxëëgüãxü i to i nachica i daxügüxü i naãnewa ngëxmaxü. ¹⁵ Rü nümagü rü yexguma chi nanaxwèxegügu ga naxcèx na nawoeguxü ga yema naãne ga noxri nawa ne naxixü, rü täu chima nüxü naguxcha rü chi naxcèx nawoegu. ¹⁶ Natürü ga nümagü rü nüxü nangüchaügü i ngëma naãne i mexëchixü i daxüwa ngëxmaxü i Tupanaxütawa. Rü yemacèx nixi ga Tupana ga tama naxãnexü na nügü yaxuxü na norü Tupana yixü. Yerü nüma ga Tupana rü naxcèx nanamexëe ga wüxi ga ñãne ya daxügüxü i naãnewa ngëxmane. ¹⁷⁻¹⁸ Rü Tupana ga noxri rü Abráümaã nüxü nixu rü ñanagürü:

“Cune ya Ichaáwa tá cuxü nangëxma i muxüchixütama i cutaagü”, ñanagürü. Rü Abráü rü nayaxö na Tupana rü aixcümaxüchi tá na yanguxëëäxü ga yema namaã inaxunetaxü. Rü yemacèx ga yexguma Tupana nüxü üxgu rü Ichaácèx nüxna nacaxgu na naxcèx yamáãxücèx, rü nüma ga Abráü rü tama nanachuxu. Rü ínamemare na Tupanacèx yamáãxü ga guma nane ga nügümaã wüxicacü. ¹⁹ Yerü nüma ga Abráü rü nayaxö na Tupanaäxü natauxchaxü na wena namaxëëëäxü i yuexü. Rü yemacèx ga Abráü rü ínamemare na Tupanacèx nanexü yamáxü yerü nayaxö na Tupana rü wena tá namaxëëäxü. Rü aixcümaxüchi yemaãcü Abráücèx nanaxü ga Tupana, yerü woo ñoma marü nayuxürüü nixi ga nane, natürü ga Tupana rü maxücü nüxna nanamu. Rü yema rü wüxi ga tórü cuèxruü nixi na ñuxãcü aixcüma yaxöõxü ga Abráü. ²⁰ Rü guma Ichaá rü ta Tupanaäxü nayaxö. Rü yemacèx ga yexguma marü nayëxgu, rü nayumüxë rü Tupanana naca na nanegü ga Acobu rü Echaúxü nangüxëëxücèx. Rü yemaãcü nayumüxë yerü aixcüma nayaxö na Tupana tá yanguxëëxü ga yema nüxna naxcèx naçaxü. ²¹ Rü guma Acobu rü ta Tupanaäxü nayaxö. Rü yemacèx ga yexguma marü nayëxgu rü nayuxchaügu, rü norü caxüxümaã nügü inachixëe rü Tupanaxü nicuèxüü. Rü nayumüxë rü Tupanana naca na nataagü ga Yúche nanegüxü nangüxëëxücèx. Rü yemaãcü nayumüxë yerü aixcüma nayaxö na Tupana tá yanguxëëxü ga yema Abráümaã inaxunetaxü. ²² Rü guma Yúche rü ta Tupanaäxü nayaxö. Rü yemacèx ga yexguma nayuxchaügu, rü natanüxügümaã nüxü nixu rü ñanagürü:

“Tataagü rü yixcüra rü tá ínachoxü i nuã Equituanewa na nawa naxixücèx i ngëma naãne ga Tupana tórü oxí ga Abráümaã nüxü ixuxü. Rü ngëxguma ngëma naxixgu, rü chanaxwèxe ya chauxchinèxägü rü ta ngëma nanana na ngëxma yatëxgüãxücèx”,

ñanagürü. ²³ Rü yemawena rü mucüma ga taunecügü rü nimu ga yema duüxügü ga Equituanewa. Rü yema nachiuãneärü äëxgacü, rü tama nanaxwèxe na yexeraãcü yamuëtanüxü, rü yemacèx nanamu na tüxü nadëixücèx ga guxãma ga buxe ga iyatüxe ga yexwacèx ibuetanüxë. Natürü nanatü rü naë ga guma tórü oxí ga Moíché, rü aixcüma Tupanaäxü tayaxögü. Rü yemacèx ga yexguma noxri nabuxgu ga Moíché, rü tomaëxpüx ga tauemacügu itayacuxgü, yerü nüxü tadaugü na namexëchixü rü tama naxcèx tamuüë ga yema Equituaneärü äëxgacüarü ore ga woo na naxunagüãxü ga na buxe tüxü nadëixü. ²⁴⁻²⁵ Rü Moíché rü ta Tupanaäxü nayaxö. Rü yemacèx ga yexguma marü nayëxgu rü tama nanaxwèxe na nügü yaxuxü

na Equituaneärü äëxgacüxacü ngïne na yïxü, yerü naxcèx rü narümemaë na natanüxügü ga Yudíugümaã wüxigu ngúxü yangexü. Rü tama nanaxwèxe na tacü ga ñoma ga naãneärü chixexümaã nügü na nataãëxëxü, yerü nüxü nacuèx rü yema taãë rü paxaãchiruümare nixí. ²⁶ Rü yexgumarüü na daxüguxü ga naãnena na yaxüxü ga Cristu na ngúxü yangexüçèx, rü yexgumarüü ta nixí ga Moïché ga äëxgacüpatana na yaxüxü, yerü naxcèx rü narümemaë na natanüxügü ga Yudíugümaã wüxigu ngúxü yangexü. Natürü taxucèxma yema ngúxügu narüxñü, yerü nüxü nacuèx rü tá wüxi i ngunexügu Tupanaxütawa na nayauxãxü i norü natanü. ²⁷⁻²⁸ Rü yema na yaxõõxüçèx nixí ga Tupanaga naxñüxü ga Moïché. Rü yemacèx ga yexguma Tupana namuxgu ga na naxüãxü ga üpetüchiga, rü nayanguxëë ga yema Tupana namuxü. Rü nüma ga Moïché rü guxüma ga natanüxügü ga Yudíugüxü namu na wüxichigü ga Ìpatawa yamáãxüçèx ga wüxi ga carnerux-acü na yemagümaã namaxcuãxüçèx ga naãxpatagü. Rü ñanagürü nüxü:

“Ñoma i chütaxügu rü tá Tupana núma Equituanewa nanamu i wüxi i norü orearü ngerüü i daxüçüãx rü tá nanadai ya yima nüxira bucü ya Equituanecüãxgü nane i wüxichigü ya Ìpatawa. Natürü ngëxguma yima nagümaã penamaxcuxgu i perü Ìaxpata, rü täütáma pechiügu naxücu”, ñanagürü. Rü yemaãcü ga Moïché rü Tupanaga naxñü yerü nüxü nayaxõ. Rü yemacèx ga yema orearü ngerüü ga daxüçüãx rü taxuüma ga Yudíugünexü nimèx. Rü yema na yaxõõxüçèx nixí ga Ìnaxüxüxü ga Equituarü naãnena, rü tama naxcèx namuüxü na guma Equituaneärü äëxgacü tá namaã nanuxü. Rü taguma nüxü narüxo ga Tupanawe na naxüxü, yerü Tupana ya ëxügucüarü ngúchañ naxü. ²⁹ Rü yema duüxügü ga Moïchéwe rüxixü rü ta nayaxõgü. Rü yemacèx ga yexguma yema Taxtü ga Dauchiüxüwa nangugügu, rü yema dexá rü nügüna nixígachi, rü nipaaneãchi, rü yéma nichoñ. Natürü yexguma yema Equituanecüãx ga churaragü ga nawe ngëgüxü nawe ichoñgu, rü yexma nayiama, yerü wenaxärü nügüna naxí ga yema dexá. ³⁰ Rü yexguma guma Ìane ga Yericúwa nangugügu ga yema duüxügü, rü taxucürüwama nichocu, yerü guxüwama naxãxtapüx. Natürü Tupanaãxü nayaxõgü, rü yemacèx Tupanaga naxñüë rü 7 ga ngunexü nüxü Ìnichoeguãchitanücüü, yema Tupana namaã nüxü ixuxürüü. Natürü yexguma norü 7 ga ngunexüwa nanguxgu, rü nüëchama niwëxgütapüx, rü yemaãcü nichocu. ³¹ Natürü yema nge ga Yericúcüãx ga Raá, rü woo chixri imaxü ga noxrix, natürü yexguma yéma nangugügu ga yema taxre ga Yudíugü ga bexma ngugütaewa yéma Ìxü, rü ngíma iyixí ga nüxü nangüxëëxü. Rü yemacèx tama yema togü ga Yericúcüãx ga tama Tupanaga Ìnüëxürüü iyu, yerü Tupanaãxü iyaxõ. ³² ¿Rü ñuxma rü tacü i togü i duüxügüchigaxü tá pemaã chixuxü? Rü changechica na pemaã nüxü chixuxüçèx i nachiga ga yema nuxcümaügüxü ga äëxgacügü ga Yedeñ rü Bará rü Chañchóñ rü Yeté rü Dabí rü Chamue, rü guxüma ga nuxcümaügüxü ga Tupanaärü orearü uruügü. ³³ Rü yema na yaxõgüãxüçèx nixí ga Tupana nüxü rüngüxëëxü. Rü yemaãcü to ga nachiüãnegüarü äëxgacügüxü narüporamaëgü, rü meãma norü duüxügümaã inacüèxgü rü aixcüma nanayauxgü ga yema Tupana namaã ixunetaxü. Rü yemacèx ga yexguma woo aitanügu yatëxcuchigüãgu, rü taxuüma namaã naxü ga aigü yerü Tupana nüxna nadau. ³⁴ Rü yexguma norü uwanügü üxüxetüwa yawocuxgu, rü taxuüma nüxü naxüpetü rü tama nixae, yerü Tupanaãxü nayaxõgü rü nüma rü nüxna nadau. Rü yexguma togü taramaã nadaixchaügu, rü Tupana nüxü narüngüxëë na taxuüma nüxü üpetüxüçèx. Rü yexguma naturaegu rü norü uwanügü nadaixchaügu, rü Tupana nanaporaexëë. Rü yexguma to ga nachiüãneärü churaragümaã

nügü nadaixgu, rü yema togü ga churaragüxü narüyexeragü. ³⁵ Rü nayexma ga ngexüğü ga yuexacüxü, natürü yema naxácüğü rü wenaxârü ínarüdagü yerü Tupanaâxü nayaxögü. Natürü nayexma ga togü ga poraâcü ngúxü ingegüxü yerü norü uwanüğü yemaâcü namaâ nachopetü na Tupanaxü ínatëxgüxcèx. Natürü ga nümagü rü tama Tupanaxü ínatëxgü rü yemacèx nayue, yerü naxcèx rü narümemaë nixî na wena namaxëxü rü nayauxgüâxü i ngëma maxü i taguma gúxü. ³⁶ Rü nayexma ta ga ñuxre ga togü ga yaxögüxü ga duüxüğü nüxü cugüexü, rü yaçuaixgüxü, rü cadenamaâ yanëixgüxü, rü poxcupataüğü nawocuxü. ³⁷ Rü ñuxre ga nümagü rü nutamaâ ínanamuxüchigü rü yemaâcü nanadai. Rü togü rü nayawãixyegü rü nayue. Rü ñuxre ga togü rü ngúxü nüxü ningexëëgü na Tupanaxü ínatëxgüxcèx. Rü togü rü taramaâ nanadai. Rü ñuxre ga nümagü rü nu ne nanaxîmare rü carneruchëxmüü rü chibuchëxmüümaâmare nixâxchiru. Rü taxuüma nüxü nayexma, rü nanaxîxâchiâëgü yerü norü uwanüğü rü chixri namaâ nachopetü. ³⁸ Rü ñoma ga naânecüâx rü naxchi naxaie, natürü Tupana rü nüxü nangechaü. Rü ñoma ga naânewa rü norü uwanügüchaxwa nu ne nanaxîmare ga taxúema íxãpataxüwa. Rü ngürüanegu nipexütanümare yerü nangepatagü. ³⁹ Rü guxüma ga yema nuxcümaüğüxü ga duüxüğü woo norü ôgagu Tupana namaâ na taâëxü, natürü taxuüma ga yema duüxüğü rü nüxü nadau ga yema mexüğü ga Tupana namaâ nüxü ixuxü. ⁴⁰ Rü yemaâcü namaâ nangupetü ga yema duüxüğü, yerü ga Tupana rü tagu narüxînü rü tama nanaxwëxe na nüxîra nüxîca yamexëëgüâxü, natürü nanaxwëxe na tamaâ wüxigu yamexëëgüâxü. Rü ñuxma i yixema na yaxögüxü, rü yema nuxcümaüğüxü ga duüxügürüü Tupanaârü duüxüğü tixîgü, yerü Nane ya Ngechuchu rü guxácèxma nayu. Rü wüxi i ngunexü rü tá taxcèx núma naxü na nügüxütawa tüxü nagagüxcèx na ngëma ingëxmagüechaxüxcèx.

12

Name nixî i Ngechuchucümagu taxî

¹ Rü ñuxma na nüxü icuáxü na ñuxâcü aixcüma Tupanaâxü yaxögüâxü ga guxüma ga yema nuxcümaüğüxü ga duüxüğü, rü ngëma rü wüxi i tórü cuèxruü nixî na ñuxâcü Tupana naxwëxexü na naxcèx imaxëxü. Rü ngëmacèx i ñuxmax, rü ngîxã nüxü tarüxoe i guxüma i ngëma pecadu i tüxü ítüexëëxü rü tüxü naguxchaxëëxü na meã yaxögüxü! ;Rü ngîxã paxa naxcèx tadaugü na meã Tupanacèx imaxëxü rü guxüguma aixcüma naxüxü i ngëma tüxü nanaxwëxexü! ² Rü name nixî i tanangugü na ñuxâcü namaxüxü ga Ngechuchu rü nagu taxî i nacüma. Yerü núma nixî ga nuxcüma nagu naxînüxü na ñuxâcü tórü ôgagu tá tüxü namaxëxëëxü rü núma nixî i tüxü nangüxëëxü na aixcüma meã yaxögüechaxüxcèx na ngëmaâcü naxütawa ingugüxcèx. Rü núma rü tama nügü nachuxu na curuchawa ngúxü yangexü, rü tama nagu narüxînü ga yema âne na yangexü, natürü nataâëxüchi yerü nüxü nacuèx na yemawena rü tá muxüma i duüxüğü nayauxgüxü i maxü i taguma gúxü. Rü ñuxma rü Tupanaârü tügünecüwawa narüto na ngëma guxâârü âëxgacü yîxüxcèx. ³ Rü name nixî i penangugü rü nagu perüxînüë na ñuxâcü ga Ngechuchu rü yaxna namaâ naxînüxü ga yema ngúxü ga nüxü yangexëëgüxü ga yema duüxüğü ga pecaduâxgüxü. Rü núma ga Ngechuchu rü yemaâcü yema ngúxümaâ yaxna naxînü na pema rü tama nüxü perüçauxüxcèx rü tama nüxü perüxoexüxcèx na nüxü peyaxögüxü. ⁴ Rü ñuxma i pema na peyaxögüxü, rü ngúxü pingegü erü pecaduxü perüxoe. Natürü taxúema ga petanüwa rü yemacèx Cristurüü yuwa tangu. ⁵ Rü name nixî i nüxna

pecuèxâchie i norü ore ya Tupana i namaã pexũ yaxucuxëgũxũ i ñuxma na naxãcügü pixïgũxũ. Erü ngëma norü ore i ümatüxüwa rü ñanagürü:

“Pa Chaunex, ¡tãxũ i nüxũ cuxoxũ i ngëxguma cuxũ icharüwëxãchixëëgu! ¡Rü tãxũ i cuyarümaxãchixũ i ngëxguma cuxũ chaxucuxëgu! ⁶ Erü nüma ya Cori ya Tupana rü tüxũ inayarüwëxãchixëë ya yixema tüxũ nangechaũxë. Rü tüxna nanaçuaixca ya yixema naxãcũxũ tüxũ nayaxúxe, na ngëmaãcü tüxũ nanguxëëxüçèx na ñuxãcü nanaxwëxexũ na naxcèx tamaxũxũ”,

ñanagürü. ⁷ Rü ngëmacèx i pemax, rü name nixĩ na yaxna namaã pexĩnüëxũ i ngëxguma Tupana pexna naçuaixcagu. Erü ngëxguma ngëmaãcü pemaã yixïgu, rü pexũ nüxũ nacüxëë na aixcüma naxãcügü pixïgũxũ. Erü guxüma i papá rü inayanawëxãchixëë i ngëma aixcüma naxãcügü ixïgũxũ.

⁸ Natürü ngëxguma chí Tupana tama pexũ iyarüwëxãchixëëgu, naxãcügũxũ iyanawëxãchixëëxürü, rü ngëmawa tá nüxũ pecuèx na tama aixcüma naxãcügü pixïgũxũ, rü ngenatüxũ pixïgũxũ. ⁹ Rü wüxichigü i yixema ga yexguma ibuegu, rü tanatügü rü tüxũ taxucuxëgü, rü yixema rü tümaga taxĩnüë rü tüxũ tangechaũgü. Rü ngëmacèx i ñuxma rü yexeraãcü tanaxwëxe na naga ixĩnüëxũ ya Tanatü ya daxügucü na ngëmaãcü nayaxuxüçèx i maxũ i taguma gúxũ. ¹⁰ Rü tanatügü rü wüxi i paxaãchicèxmare tüxũ taxucuxëgü na tüma tanaxwëxegũxũãcüma imaxëxüçèx. Natürü ya Tupana rü aixcüma tórü mexüçèx nixĩ i tüxũ iyanawëxãchixëëxũ na naxrüü ixüünegüxüçèx. ¹¹ Rü aixcüma tama tataãëgü i ngëxguma Tupana tüxũ iyarüwëxãchixëëgu, erü tüxũ nangux. Natürü ngëmawena i ngëxguma naga ixĩnüëgu rü yanguxëëgu i ngëma tamaã nüxũ yaxuxũ, rü aixcüma tataãëgü.

Naxãcüma na tama Tupanaga ixĩnüëxũ

¹² Rü ngëmacèx i ñuxma na ngúxũ pingegũxũ rü pipaexũ na Tupanawe perüxixũ, rü name nixĩ i pegü peporaexëëãma na noxrürüütama meã peyaxögüxüçèx. ¹³ Rü name nixĩ i naxcèx pedaugü na Tupana pexũ naxwëxexũãcüma aixcüma meã pemaxëxũ, na yixema ñuxma tama meã yaxögüxe rü meã tayaxögüxüçèx. ¹⁴ ¡Rü naxcèx pedèux na guxũ i duüxügümaã pemecümaxũ! Rü ngëxgumarüü ta name nixĩ i naxcèx pedau na Tupanapëxewa naxüünexũ i perü maxũ. Erü yixema tama Tupanapëxewa üünexë rü tãütáma tórü Corixũ tadau. ¹⁵ ¡Rü pegüna pedaugü na taxúema nüxũ oxüçèx i ngëma ngüxëë i Tupana tüxũ nangechaũãcüma tüxna ãxũ! Erü tama tanaxwëxe na texé petanüwa Cristuchi aixũ rü ngëmaãcü togüxũ chixexümaã taxucuxëxũ na Cristuna tixügachixüçèx. ¹⁶ Rü tama name i texé i petanüwa rü naĩ i ngemaã na itapexũ. Rü tama name na texé tümaãrü ngëmaxüçèx Tupanaxũ na oxũ. Rü yemaãcü nanaxü ga guma nuxcümaücü ga Acobueneë ga Echaú. Yerü yexguma nataiyagu rü wüxi ga õnacèx nüxũ naxo ga guxüma ga yema nüxna üxũ ga nanatü chí nüxna ãxũ. ¹⁷ Rü pema nüxũ pecuèx rü yemawena ga yexguma nayauxchaũãgu ga yema noxri nüxna üxũ, rü marü taxucürüwama nanayaxu, yerü marü naëneë ga rübumaëcüna tanaxã ga nanatü. Rü nüma ga Echaú rü woo poraãcü naxaxu, natürü marü taxucürüwama ñuxãcü nanayaxu. Rü ngëmawa nüxũ tacuèx na ñuxãcü naxãcümaxũ na tórü ngëmaxüçèx Tupanaxũ ixoxũ. ¹⁸⁻²¹ Rü nuxcüma ga tórü oxigü ga Moïchéwe rüxixũ, rü nüxũ naxĩnüë ga Tupanaga ga yexguma nüxũ yangaicagügu ga guma mëxpüne ga Chinaïgu ãegane. Rü nüxũ nadaugü ga na yayauraxũ ga guma mëxpüne rü poraãcü naxëänexũ rü poraãcü buanecü ixüxũ rü yabèxbëxanexũ rü yaduruanexũ. Rü poraãcü namuüë ga yema duüxügü, yerü nüxũ naxĩnüë ga wüxi ga corneta ga tagane rü Tupana ga tagaãcü yéma ñacü:

“Ngëxguma chi wüxie i petanüwa daa mëxpúnewa üxgu jrü noxtacüma nutamaã tüxü ípemuxüchiäcüma tüxü pimá! Rü woo wüxi i pexüna yixígu jrü ngëxgumarüü ta ípenamuxüchiäcüma peyamá!”

ñanagürü. Rü yexguma yadeaxgu ga Tupana, rü poraäcü namuñe ga yema duüxügü. Rü norü muümaã Tupanaxü nacëexügü na íyachaxächixüçex ga namaã na yadexaxü. Rü yema na poraäcü naxäücümaxüchixü ga yema nüxü nadaugüxü, rü yemacèx nixí ga nümatama ga Moïché ga ñaxü:

“Chorü muümaã chidurux i ñuxmax”,

ñaxü. Rü yemaäcü nixí ga namaã nangupetüxü ga yema duüxügü ga Moïchémaã nayauxgüxü ga yema nüxíraüxü ga Tupanaärü mugü. Natürü i pemax, Pa Chaueneëgüx, rü tama yemaäcü pexü naxüpetü ga yexguma penayauxgügu ga Tupanaärü ore i ngexwacaxüxü i Cristuchiga ixíxü. ²² Rü ñuxma i pema rü taxucèxma pemuñe, yerü ga Cristu rü taxcèx nayu na Tupana ya guxüguma maxücüxütawa tüxü nagagüxüçex, na guxüguma norü ñane ya daxügune ya Yerucharéügu äeganewa ingëxmagüxüçex. Rü ngema tá tangutaquëxegü namaã i ngëma muxüchixüma i norü orearü ngeruügü i daxücüäx na wüxigu namaã Tupanaxü icuèxüügüxüçex. ²³ Rü ñuxma i pemax, rü marü natanüxügü pixígü i guxüma i ngëma togü i duüxügü i Tupanaärü poperawa ngoxégagüxü. Rü marü naxcèx pexí ya Tupana ya yima guxãnatáma cacü. Rü marü natanüwaama pexügü i guxüma ga yema duüxügü ga mecümagüxü ga yuexü ga Tupana imexëëgüxü. ²⁴ Rü marü naxcèx pexí ya Ngechuchu ga taxcèx yucü na tüxü namaxëxëxüçex, ngëma Tupanaärü uneta i ngexwacaxüxü tamaã nüxü ixuxürüü. Rü nagümaã pexü iyanaxoxëë ga perü chixexügü na aixcüma Tupanapëxewa pimexüçex. Rü yexguma nüxcümaxücü ga Abégü inabaxëë ga naeneë rü Tupana rü poxcu naxuegu. Natürü yexguma Cristugü ibaxgu rü Tupana rü duüxügümaã nanaxuegu i maxü i taguma gúxü. ²⁵ Rü ngëmacèx name nixí i pexuäëgü na tama nüxü pexoexüçex ya yima Tupana ya ñuxma tamaã idexacü. Rü dücax yema nuxcümaügüxü ga tórü oxigü ga Moïchéwe rüxíxü rü taxucürüwa Tupanachaxwa nibuxmü na tama napoxcueäxüçex ga yexguma Tupanaxü naxoegu rü tama naga naxínüëgu ga yexguma Moïchéwa Tupana yaxucuxëgügu. Rü yema na taxucürüwa Tupanachaxwa yabuxmüxü ga nümagü, rü yexeraäcü tüxü naguxcha i yixema na naxchaxwa ibuxmüxü ega tama naga ixínüëgu i ñuxma na Cristuwa tüxü yaxucuxëgüxü i nüma ya Tupana i daxügüxü i nañewa ngëxmacü. ²⁶ Rü yexguma Moïchéwe naxíxgu ga tórü oxigü, rü Tupana rü nagamaã nayaduruxanexëë. Natürü i ñuxma rü ñanagürü:

“Wena táxarü chayaduruxanexëë. Natürü ngëxguma ngëmaäcü chanaxüxgu rü täütáma ñoma i nañexíca chiduruxëë, natürü üèxcü rü woramacurigü rü èxtagü rü tá ta chayaduruxgüxëë”,

ñanagürü. ²⁷ Rü yema na:

“Wena táxarü chayaduruxanexëë”, ñaxü, rü ngëmawa nüxü tacuèx rü guxüma ga yema naxüxü i tama guxügüçex ixíxü, rü Tupana tá inayanaxoxëë na ngëma guxügüçex ixíxüicatama na íyaxügüxüçex. ²⁸ Rü ngëma na tórü äëxgacü na yíxü ya Tupana, rü guxügüçex nixí, rü tagutáma inayarüxo na noxrü ixígüxü. Rü ngëmacèx name nixí na Tupanana moxë ixägüxü, rü nüxü ingechaügüäcüma rü nüxü imuñëäcüma nüxü icuèxüügüxü, ngëma nüma nanaxwëxëxü. ²⁹ Erü tórü Tupana, rü ñoma wüxi ya üxürüü aixcüma inayanaxoxëë i guxüma i tórü chixexü.

Ñuxãcü Tupanaxü tataãêxê

¹ Rû ñuxma rû tama name na nüxü perüçhauexü na wüxichigü pegü pengechaügüxü ñoma peeneêxü pengechaüxürüü. ² Tama name na nüxü ipeyarüngümaêxü na meãma penayaxuxü i ngêma duüxügü i pepatawa ngugüxü. Erü nüxü tacuèx rû nümaxü ga yemaãcü naxügüxü rû ñuxguacü rû tama nüxü nacuáãcüma bexma Tupanaãrü orearü ngeruügü i daxüçüãxü meã nayauxgü. ³ Rû name nixi i nüxna pecuèxãchie i ngêma duüxügü i poxcuexü, ñoma pema rû ta naxrüü pepoxcuexürüü. Rû ngêxgumarüü ta name nixi nüxna pecuèxãchie i ngêma duüxügü i togü ngúxü nüxü ingexêégüxü, erü ngürüãchi tá ta ngêmaãcü pexü nangupetü. ⁴ Rû ngêma yatügü i ãmaxü rû name nixi i meã naxmèxmaã namaxê rû tüxü nangechaügü. Rû ngêxgumarüü ta i ngexügü, rû name nixi i meã natemaã namaxê rû nüxü nangechaügü. Erü Tupana rû aixcüma tá nüxna naca rû tá nanapoxcue i ngêma duüxügü i naï i ngemaã rû êxna naï ya yatümaã ipexü. Rû ngêxgumarüü tá ta tüxü napoxcue ya guxãma ya yixema ngemèxãcüma rû ngeteãcüma tügümaã maxêmarexe. ⁵ Rû tama name na dïeruguama perüxïnüêxü. Rû name nixi i namaã petaãégü i ngêma marü pexü ngêxmaxü. Yerü Tupana rû ñanagürü:

“Tagutáma cuxna chixü, rû tagutáma cuxü íchatèx”,

ñanagürü. ⁶ Rû ñuxma na nüxü icuáxü na ngêmaãcü tamaã inaxãüxü, rû ngêmacèx tama taxãne na ñagüxü:

“Nüma ya Cori nixi ya choxü rüngüxêécü. Rû ngêmacèx taxucèxma chamuü.

Erü taxucürüwama texé tacü rû chixexü chomaã taxü”, ñagüxü. ⁷ Rû name nixi i nüxna pecuèxãchie ga yema perü dauruügü ga noxri pemaã icuáxü rû pemaã nüxü ixugüxü ga Tupanaãrü ore. Rû name nixi i nagu perüxïnüê ga na ñuxãcü meã namaxêxü pepêxewa rû ñuxãcü meã yaxögüãcüma nayuexü. Rû name nixi ga nüma yaxögüãxürüü meã peyaxögü i pemax. ⁸ Rû nüma ya Ngechuchu ya Cristu rû guxüguma nayanguxêê i ngêma tamaã nüxü yaxuxü. Rû nuxcüma rû nayanguxêê ga norü ore, rû ñuxma rû ta nayanguxêê. Rû guxügutáma ngêmaãcü nixi. Rû ngêmacèx tanaxwèxe na aixcüma nüxü yaxögüxü. ⁹ Rû tama name i peyaxögü i ngêma nguxêêtaegü i tama toma pexü namaã tangüexêêxü i tama Tupanaãrü ixigüxü. Rû nuxcüma rû nagu taxï ga yema mugü ga Moïché ümatüxü ga tüxna nachuxuxü na tacü ixüxü rû tacü ingöxü. Natürü yema mugü rû taguma tüxü naporaexêê ga na Tupanacèx imaxêxü. Rû ngêmacèx tanaxwèxe na Tupana ya tüxü ngechaücüwa nayaxuxü i tórü pora na aixcüma naxcèx imaxêxücèx. ¹⁰ Rû ngêma duüxügü i Moïchéarü mugügu íxü, rû Tupanacèx naxüna nadai na tama napoxcueãxücèx naxcèx i norü pecadu. Natürü tama nüxü nayaxögü ya Cristu ga tórü pecaducèx yucü. Rû ngêmacèx taxucürüwama taxrüü nanayauxgü i ngêma ngüxêê i Cristu nüxna uaxüxü. ¹¹ Rû ngêma duüxügüarü paigüarü ãêxgacü, rû tupaucawa nanange ya nagü i naxümagü na Tupanana naxããxücèx na tama Tupana napoxcuexücèx i ngêma duüxügü. Natürü naxünegü i ngêma naxümagü, rû ñãneãrü ñxpemawa nayanagugü. ¹² Rû yexgumarüü ta ga Ngechuchu rû ñãneãrü ñxpemawa ngúxü ninge rû nayu na nagümaãtama Tupanacèx yaxüünegüxêêãxücèx i duüxügü. ¹³ Rû ngêmacèx i yixema, rû name nixi i nüxna tixigachi i ngêma mugü ga Moïché ümatüxü, rû name nixi i Ngechuchucèx taxï. Rû woo duüxügü tüxü cugüegu, yema Ngechuchuxü na nacugüexürüü, rû name nixi i naxrüü yaxna namaã taxïnüê. ¹⁴ Erü yixema na yaxögüxü, rû tãütáma ñoma i naãne i paxa tá gúxüwa tangêxmagüecha. Erü daxügüxü i naãnewa tüxü nangêxma i tachica. Rû ngema tá nixi i ingugüxü na guxügutáma Tupanamaã ingêxmagüechaxücèx. ¹⁵ Rû ngêmacèx tanaxwèxe i Ngechuchu ya

Cristuégagu guxüguma Tupanaxü ticuèxüügü. Rü ngēma na taèxmaã nüxü icuèxüügüxü, rü ngēma nixĩ i ãmare i mexü i nüxna ixãxü. ¹⁶ ;Rü tãxü i nüxü ipeyarüngümaëxü na togüxü perüngüxëëxü rü namaã pengauxü i perü ngēmaxügü! Erü ngēma nixĩ i ãmare i Tupanana pexãxü i aixcüma namaã nataãëxü. ¹⁷ ;Rü naga pexĩnüë i ngēma perü dauruügü i pemaã icuèxgüxü, rü penaxüx i ngēma pemaã nüxü yaxuxü! Erü nümagü rü Tupanapëxewa pexna nadaugü na meã pemaxëxüçèx erü nüxü nacuèxgü na Tupana tá nüxna çaxü i nachiga na ñuxãcü pexna nadaugüxü. Rü name nixĩ i meã namaã pemaxë i ngēma perü dauruügü na wüxi i taãë na yĩxüçèx i ngēma norü puracü rü tama wüxi i norü guxchaxü na yĩxüçèx. Erü ngëxguma chi wüxi i norü guxchaxü yixĩgu i ngēma norü puracü na pexna nadauxü, rü pema rü chi taxuüma i mexü nawa peyaxu i ngēma norü puracü. ¹⁸ Rü name i toxçèx peyumüxëgü. Erü toðëwa nüxü tacuèx na aixcüma meã tayanguxëëxü i ngēma puracü i Tupana toxna ãxü rü tanaxwèxe na guxüguma ngēmaãcü tanaxüxü. ¹⁹ Rü ngēma guxüärü yexera pexna naxçèx chaçaxü nixĩ na peyumüxëgüxü na Tupana paxa pexçèx choxü taeguxëëxüçèx.

Yema duüxügüxü narümoxë rü naxçèx ínaca na Tupana nüxü rüngüxëëxü

²⁰⁻²¹ Rü ñuxma chanaxwèxe i poraãcü pexü narüngüxëë ya Tupana ya tórü taãëxëëruü rü tórü ngüxmüëxëëruü ixĩcü. Rü nüma nixĩ ga yuwa ínadaxëëãxü ga tórü Cori ya Ngechuchu ya Cristu ya guxüma i yaxögüxüärü dauruü ya guxãärü yexera ixĩcü. Rü ñuxma na curuchagu taxçèx nabaãxü ga guma nagü ga tüxü nüxü cuèxëëcü na ñuxãcü guxüguma tüxü nangechaüxü ya Tupana, rü chanaxwèxe na nüma ya Tupana pexü yamexëëgüxü rü pexü nangüxëëxü na aixcüma guxüma i perü maxüwa pimexüçèx. Rü ngëxgumarüü ta chanaxwèxe na Ngechuchu ya Cristuwa tüxü nangüxëëxüçèx ya Tupana na nüma nanaxwèxexüãcüma ixĩgüxüçèx. Rü ñuxma tanaxwèxe i guxüguma yima Cristuxü ticuèxüügü. Rü ngēmaãcü yĩ. ²² Pa Chaueneëgüx, pexü chacèxü na yaxna namaã pexĩnüëxü i ñaã noxretama i ore i pexü namaã chataãëxëëxü rü pexü namaã chaxucuxëxü. ²³ Rü chanaxwèxe na nüxü pecuáxü rü taeneë ya Timutéu rü marü ínanguxuchi ga na napoxcuxü. Rü ngëxguma paxa nuã chauxütawa nanguxgu, rü tá ngēma petanüwa chanaga i ngëxguma pexü íchayadèuxgu. ²⁴ ;Rü nüxü perümoxëgü i guxüma i ngēma perü dauruügü i pemaã icuáxü! ;Rü ngëxgumarüü ta nüxü perümoxëgü i guxüma i togü i taeneëgü i yaxögüxü! Rü taeneëgü i Itáriaanewa ngëxmagüxü rü ta pexü narümoxëgü. ²⁵ ;Rü Tupana poraãcü pexü rüngüxëëx i guxãma i pemax! Rü ngēmaãcü yĩ.

Rü nuãma pexna.

TUPANAARŪ ORE GA CHAŪTIÁGU ÜMATÜXŪ

Chaŭtiágu nüxŭ narümoxë ga natanüxŭgü ga Yudŭgü ga yaxõgüxŭ

¹ Pa Chautanüxŭgü i Yudŭgü i Ngechuchuaxŭ Yaxõgüxŭ i Guxŭ i Naãnewa Ngëxmagüxŭ, choma i Chaŭtiágu pexŭ charümoxë. Rü choma nixŭ i Tanatü ya Tupana rü tórü Cori ya Ngechuchu ya Cristuaxŭ chapuracüxŭ.

Ngëma cuèx i aixcüma Tupanawa ne üxŭchiga

² Pa Chaueneëgü i Yaxõgüxŭ, name nixŭ na petaãëgüxŭ i ngëxguma nagüxŭraüxŭ i guxchaxŭgü pexcèx ínguxgu. ³ Erü pema nüxŭ pecuèx rü ngëxguma meã peyaxõgüamagu ega woo tacü rü guxchaxŭ pexŭ üpetügu rü wüxi i mexŭ nixŭ i ngëma. Erü ngëmaãcü nixŭ ya Tupana i pexŭ naporaexëëxŭ na yexeraãcü meã nüxŭ peyaxõgüxŭcèx. ⁴ Rü name nixŭ na peporaexŭ na aixcüma Tupanapëxewa pimexŭcèx, rü naxcèxicatama pemaxëxŭcèx, rü taxuwama nachixexŭcèx i perü maxŭ. ⁵ Ngëxguma chi wüxie i petanüwa tama meã nüxŭ cuèxgu na tacü tüxŭ nanaxwèxexŭ ya Tupana, rü name nixŭ i nüxna naxcèx taca i cuèx, rü nüma tá guxŭma i norü ngúchaŭmaã tüxna nanaxã. Erü Tupana meãma guxŭ i duŭxŭgüna nanaxã i cuèx, rü tama nayanuxŭ, rü taxúexŭma nanga. ⁶ Natürü ngëxguma naxcèx ítacaxgu rü tanaxwèxe na aixcüma tayaxõxŭ rü tá na tanayaxuxŭ i ngëma naxcèx ítaçaxŭ. Rü tama name na nagu tarüxŭnüxŭ rü täütáma tanayaxuxŭ. Erü yíxema tama meã yaxõxë, rü ñoma taxtŭarü yuape i buanecümaã guxŭwama cuexŭrüü tixŭ i tümaärü maxŭwa. ⁷⁻⁸ Rü yíxema duŭxë ya ñuxma meã yaxõxë rü moxŭ rü tama meã yaxõxë, rü taxucürüwama nagu tarüxŭnü na tacü Tupanaxŭtawa tayaxuxŭ. Erü yíxema duŭxë ya ngëmaãcü yaxõxë, rü tümaärü maxŭwa rü tama aixcüma wüxigutama tarüxŭnü. ⁹ Rü yíxema yaxõxë ya tama muärü dŭëruãxë, rü name nixŭ i tataãë erü Tupanaxãcü tixŭ rü tümamaã nataãë. ¹⁰ Rü yíxema yaxõxë ya muärü dŭëruãxë rü name nixŭ i tataãëãma ega woo wüxi i ngunexŭ tüxŭ natauxgu i tümaärü dŭëru. Erü ngëma dŭëruãxŭ i duŭxŭgü, rü ñoma putürachacurüü tama natai. ¹¹ Rü ngëxguma nangunagügu ya üexcü rü poraãcü nanguxetügu, rü narüñexë i ngëma putüra rü narüngu i nachacu, rü ngëxma nagux na namexŭ. Rü ngëxgumarüü tá ta nayu i ngëma dŭëruãxŭchixŭ rü ngëxma tá nayarüxo i norü guxŭma.

Tupana tüxŭ naxŭ, natürü tama chixexŭgu tüxŭ nanguxëëxŭcèx

¹² Rü nataãë ya yima yatü ya meãma yaxõõmacü i ngëxguma Tupana nüxŭ üxgu. Erü ngëxguma ngëmaãcü yaxna namaã naxŭnüãmagu, rü Tupana tá namaã nataãë rü tá nüxna nanaxã i norü ãmare i mexŭ i taguma gŭxŭ. Rü ngëma nixŭ i ãmare i Tupana tümamaã ixunetaxŭ ya yíxema nüxŭ ngechaŭgüxe. ¹³ Natürü ngëxguma texe ñnü i chixexŭ tümacèx ínguxgu na chixexŭ taxŭxŭcèx rü tama name i nagu narüxŭnü na Tupana tümaãëwa ínanguxëëxŭ i ngema ñnü i chixexŭ. Erü ya Tupana rü taguma naãëwa nangu na chixexŭ naxŭxŭ, rü ngëxgumarüxŭ ta taguma chixexŭ i ñnü texeãëwa nanguxëë na chixexŭ taxŭxŭcèx. ¹⁴ Natürü ngëma chixexŭ i tümatama nagu tarüxŭnüxŭ nixŭ i chixexŭgu tüxŭ nguxëëxŭ. ¹⁵ Rü ngëma chixexŭ i tümatama nagu tarüxŭnüxŭ nixŭ i tüxŭ pecaduãxëëxŭ. Rü ngëma pecadugagu tá nixŭ i düxwa itayarütaxuxŭ. ¹⁶ Pa Chaueneëgü ya Pexŭ Changechaŭgüxex, tama name i pegütama pewomüxëëgü. ¹⁷ Erü guxŭma i ngëma aixcüma mexŭ i tüxŭ ngëxmaxŭ, rü naxŭtawa ne naxŭ ya Tupana ya daxŭgücü ga naxŭcü ga üexcü rü tauemacü rü woramacurigü rü ëtagü. Rü nüma rü guxŭguma nanaxëixrügumaraxŭ rü

taguma naxüchicüü. ¹⁸ Rû nûma nixĩ ga tûxna naxããxũ ga norü ore i aixcüma ixĩxũ na ngẽmaãcü tûxũ nangẽxmaxüçèx i maxũ i taguma gúxũ. Rû yemaãcü nanaxü yerü nanaxwèxe na yixira nûxũ na yaxõgüxũ, rû yixcama i togü.

Ñuxãcü aixcüma Tupanaãxũ tayaxõ

¹⁹ Pa Chaueneëgü ya Pexũ Changechaüğüxex, rû ngẽxguma texé pemaã nûxũ ixuxgu i Tupanaãrû ore, rû name nixĩ i meã iperüxĩnûë. Rû tama name i tûxũ pechoxügagü. ²⁰ Erü ngẽxguma nanuxgu i wüxi i duüxũ, rû tama Tupanaãrû ngüchaũ naxü. ²¹ Rû ngẽmacèx name nixĩ i nûxũ perüxoe i guxüma i ngẽma chixexügü i guxüwama ngẽxmagüxũ. ¡Rû meã penayaxu i ngẽma ore i Tupana pexna ãxũ! Erü ngẽmawa pexũ nangẽxma i maxũ i taguma gúxũ. ²² Rû tama name i iperüxĩnûëmære i ngẽma ore, natürü name nixĩ i penaxü i ngẽma pemaã nûxũ yaxuxũ. Erü ngẽxguma iperüxĩnûëmære rû tama penaxüxgu, rû pegütama pewomüxëëgümare. ²³ Erü yixema irüxĩnûmarexe i Tupanaãrû ore natürü tama naxüxe i ngẽma nûxũ yaxuxũ, rû wüxi i yatü i daucüwa nügü dauchametüxürü tixĩ. ²⁴ Erü nügü nadauchametü, natürü ngẽxguma yaxügachigu rû marü nûxũ inayarüngüma na nañuxchametüraüxũ i noxrix. ²⁵ Natürü yixema guxüguma meã nûxũ daumatüxe rû naga ñnûxë i ngẽma ore i aixcüma ixĩxũ i pecaduwa tûxũ ñnguxuchixëëxũ, rû Tupana rû tá aixcüma guxüwama tûxũ narüngüxëë. Erü tama ngẽma orexü taxĩnûmare, natürü tanaxü i ngẽma tümamaã nûxũ yaxuxũ. ²⁶ Rû ngẽxguma chi wüxie nagu rüxĩnûgu na meãma Tupanaxũ tacuáxũ natürü tama nûxna tadèuxgu ya tümäärü conü i tümäärü orewa, rû tügütama tawomüxëë, rû tama aixcüma Tupanaãxũ tayaxõ. ²⁷ Natürü ngẽma nacüma i Tanatü ya Tupanapëxewa aixcüma ünexũ, rû ngẽma nixĩ na nûxũ tarüngüxëëxũ i tacutagü rû yutegüxũ rû tügüna tadauxũ na tama ñoma i naãneãrû chixexügu taxücuxũ.

2

Name nixĩ i guxũ i duüxüğüxũ tangechaũ

¹ Pa Chaueneëgüx, pema rû nûxũ peyaxõgü ya tórü Cori ya Ngechuchu ya Cristu ya mexëchicü. Rû ngẽmacèx tama name na chixriãcü penayaxuxũ i ñuxre i duüxüğü rû meã penayaxuxũ i togü. ² Rû ngẽxguma chi perü ngutaquëxegu naxücuxgu i wüxi i yatü i uirumaã aneraãxũ rû mexchiruxũ, rû ngẽxgumarüü chi ta ngẽxma naxücuxgu i wüxi i yatü i ngearü dïëruãxũ rû wëxachiruxũ, rû name nixĩ i guxüxüma wüxigu meã peyaxu. ³ Natürü tama name ega meã penayauxgu i ngẽma mexchiruxũ rû:

“¡Nuã mexũ i naxmèxwëxewa rüto!” ñapegüxũ nûxũ, natürü ngẽma wëxachiruxüxũ rû:

“¡Cuma rû ngẽxmatama nachi, rû ëxna yea ñatüanewa rüto!” ñapegüxũ nûxũ. ⁴ Rû ngẽxguma tama wüxigu meã penayauxgu i ngẽma taxre, rû pewatama nangox na tama aixcüma guxãxũ pengechaüğüxũ rû chixexũ i duüxüğü pixĩgüxũ ega ngẽmaãcü chixri penayauxgu i duüxüğü. ⁵ Pa Chaueneëgü ya Pexũ Changechaüğüxex, ¡iperüxĩnûë i ñaã ore! Tupana tûxũ nade ya yixema ngearü dïëruãxgüxe i ñoma i naãnewa na meã nûxũ tayaxõgüxüçèx. Erü nanaxwèxe i tanayauxgü i ngẽma maxũ i taguma gúxũ i tümamaã inaxunetaxũ ya yixema nûxũ ngechaüğüxe. ⁶ Natürü pema rû chixri penayaxu i ngẽma duüxüğü i ngearü dïëruãxgüxũ rû meã penayaxu i ngẽma duüxüğü i dïëruãxgüxũ. ¿Taux ëxna ngẽma dïëruãxgüxũ yĩxũ i ngẽma chixri pemaã maxëxũ rû ãëxgacügüxütawa pexũ íyaxuaxüğüxũ? ⁷ Rû ngẽma dïëruãxgüxũ nixĩ i chixexũ namaã ixugüexũ ya Cristu ya perü Cori

ya mexêchicü. ⁸ Tupanaârü orewa nangêxma i norü mu i guxü i mugüarü yexeraxü i ñaxü:

“¡Nüxü nangechaü i cumücü ngêma na cugütama cungechaüxürüü!”

ñaxü. Rü ngêxguma aixcüma naga pexînüêgu i ngêma mu, rü mexü nixî i pexüxü. ⁹ Natürü ngêxguma meã penayauxgu i wüxi i yatü i mexchiruxü rü chixri penayauxgu i ngêma wexachiruxü, rü pecadu pexü. Rü Tupanapêxewa pechixexügu erü tama naga pexînüê i ngêma pexü namuxü.

¹⁰ Erü ngêxguma chi texé naga ñnügu i guxüma i Tupanaârü mugü natürü chi wüxiwatama ítatüxgu na tama naga taxînüxü, rü chi ñoma guxüma i Tupanaârü mugüga tama taxînüxürüü tachixexügu. ¹¹ Erü nümatama ya Tupana ga ñacü:

“¡Tãütáma naí i nge i âtecümaã cungeãê!” ñacü, rü ñanagürü ta:

“¡Tãütáma cumáêta!”

ñanagürü. Rü ngêxguma chi tama naí i nge i âtecümaã cungeãêxgu, natürü cumáêtagu, rü tama aixcüma meã naga cuxînü i ngêma Tupana tûxü muxü.

¹² Rü ngêmacèx name nixî na meã pidexagüxü rü meã pemaxêxü. Erü Tupana tá pexna naca i perü maxüchiga ngoxi Cristu pexü muxüãcüma pemaxê rü êxna tama. Rü ngêma Cristu tûxü muxü nixî na yigü ingechaügüxü. ¹³ Erü

guxâma ya yíxema tama tümamücügü tûxü ngechaütümüügüxe, rü Tupana rü tãütáma nüxü tangechaütümüügüãcüma tûxna naca i tümãârü maxüchiga. Natürü yíxema tümamücügü tûxü ngechaütümüügüxe, rü tãütáma tamuê i ngêxguma Tupana tûxna caxgu, erü nüxü tangechaütümüügüãcüma tá tûxna naca.

Ega aixcüma yaxõgügu, rü tanaxwèxe i mexü taxügü rü nüxü tarüngüxêê i togü

¹⁴ Pa Chaueneêgüx, ¿Tacüwa namexü ega wüxie:

“Choma rü Tupanaãxü chayaxõ”, ñagügu, natürü tama mexü taxüxgu? ¿Pexcèx rü Tupana tá tûxü maxêêxü ega ngêmaãcü tayaxõxgux? ¹⁵⁻¹⁶ Rü ngêxguma chi wüxi i taeneê rü êxna taeyèx i yaxõxü rü nangexchirugu rü nangewemügu, rü chi wüxie i pema rü ñapegügu:

“¡Mexü cuxü üpetü, rü icuxcuchi na tama cuxü nadeyuxücèx, rü meã nachibü!” ñapegügu, rü ¿tacüwa name i ngêma ega tama nüxna penaxãxgu i ngêma nüxü taxuxü? ¹⁷ Rü ngêxguma yaxõmaregu natürü tama mexü ixüxgu, rü tama togüxü rüngüxêêgu, rü ¿tacüwa namexü i ngêmaãcü na yaxõxü? ¹⁸ Erü ngêxguma cuyaxõmaregu natürü tama mexü cuxüxgu, rü ngürüãchi tá wüxie ñatarügü cuxü:

“Cuma rü cuyaxõmare natürü taxuxüma i mexü cuxü Natürü choma rü chayxõ rü naétü mexü chaxü. ¿Rü ñuxãcü tá nüxü chacuáxü na cuyaxõxü ega tama mexü cuxüxgu? Natürü choma rü chorü ü i mexümaã tá cuxü chanawé na aixcüma chayaxõxü”, ñatarügü tá cuxü. ¹⁹ Cuma cuyaxõ na nangêxmaxü ya wüxitama ya Tupana. Marü name. Natürü ngoxogü rü ta ngêmaãcü nayaxõgü, rü porãcü niduxruxe erü Tupanaxü namuê. ²⁰ Pa Yatü ya tama Meã Nagu Rûxînücx, cuma rü tama nüxü cucuèx i ngêxguma cuyaxõmaregu rü tama mexü cuxüxgu, rü taxuwama name i ngêmaãcü na cuyaxõxü. ²¹ Tupana nüxü ixuxgu rü nuxcümaãcü ga tórü oxî ga Abráü rü wüxi ga yatü ga mecü nixî. Yerü mexü naxü rü Tupanaga naxînü ga yexguma namaã nüxü yaxuxgu na naxcèx yamáãxücèx ga nane ga Ichaá. ²² Rü ngêmawa nüxü tacuèx rü tama nayaxõmare ga Abráü, natürü mexü naxü ta. Rü yema naxüxüwa tûxü nüxü nacuèxêê na aixcüma Tupanaãxü yaxõxü. ²³ Rü yemaãcü ningu ga yema ore ga ümatüxü ga ñaxü:

“Abraú rü Tupanaãxũ nayaxõ rü yemacèx Tupana nüxũ nixu na mecü yĩxũ yerü nüxũ nayaxõ. Rü nüxũ nixu ta na namücü yĩxũ ga Abraú”.

²⁴ Rü ngēmawa nüxũ tatau na Tupana namaã taãxũ ya yima yatü ya mexũ ücü rü tama yaxõmarecü. ²⁵ Rü yemaãcü ta ngĩmaã nangupetü ga nuxcüma ga Raá. Rü Tupana ngĩmaã nataãe yerü mexũ ixü ga yexguma meã nayauxãgu ga ngĩpatawa ga yema orearü ngeruũgü ga Yudíugü. Rü ngĩgagu namaxẽ ga yema orearü ngeruũgü yerü to ga namagu iyamugü ga yexguma norü uwanügu nadaixchaũgu. Rü woo ga ngĩma rü chixri na namaxũxũ ga noxrix, natürü mexũ ixü yerü iyaxõ, rü yemacèx Tupana ngĩmaã nataãe. ²⁶ Rü wüxi i naxüne rü taxuwama name rü nayumare ega natauxguma i naãe. Rü ngëxgumarüü ta nixĩ na taxuwama namexũ na yaxõmarexũ ega taxuũma i mexũ ixüxgux.

3

Tórü conüchiga

¹ Pa Chaueneëgüx, tama name i muxẽma i pema rü nguxẽetaexũgü pegü pixĩgüxẽchaũ. Erü pema nüxũ pecuèx na yixema i nguxẽetaexũgü na ixĩgüxũ, rü guxũ i duũxũgüarü yexera tá tüxna naca ya Tupana tórü maxũchiga rü tórü puracüchiga. ² Guxãma i yixema rü muëxpüxcüna chixexũ taxüe. Yima yatü ya taguma chixexũxũ ixücü rü aixcüma mecü nixĩ, erü nüxũ nacuèx na ñuxãcü guxũwama nügüna nadauxũ na tama chixexũ naxüxücèx. ³ Rü ngẽma na taga naxĩnüxücèx i wüxi i cowaru, rü tanaxwèxe na naxütüxünáguxũ na ngẽmaãcü yixema inaxwèxexũãcüma meã iyaxüxücèx. ⁴ ¡Dücèx nagu perüxĩnüe ya wapurugü ya buanecüarü poramaã ixüxüne! Rü woo nitaxüchi rü buanecü ya taxüchicümaã inicuegü, natürü íracü ya quiyamaã nana-toxchinü i norü toxpëxeruũ, rü ngextá nüma ínanaxwèxexũwa nanaxüxẽe. ⁵⁻⁶ Rü ngëxgumarüü ta nixĩ ya tórü conü rü woo na naxírachiréxũ, natürü namuxüchi i norü ore. Rü wüxitama i üxüarü yauraxũ i íraxüwa inaxügu na yaxaxũ i taxüma i naãne. Rü tórü conü rü ñoma wüxi ya üxürüü nixĩ. Rü taxünewa rü wüxi i taxü i chixexũ nixĩ ya yima tórü conü erü nanachixexẽe i guxüma i tórü maxũ. Rü ngẽma Tupana ngoxogüxũ ípoxcuexũgune ya üxüemawa ne naxü i ngẽma chixexũ i namaã yadexaxũ ya tórü conü. Rü ngẽma chixexümaã nanachixexẽe i guxüma i tórü maxũ. ⁷ Duũxũgü rü nüxũ nacuèx na íyapuxẽẽaxũ rü nüxna nachogüxũ i nagüxüraũxũ i naëxũgü i idüraexũ, rü werigü, rü äxtapegü, rü choxnigü. ⁸ Natürü taxüema nüxũ tacuèx na nüxna tachogüxũ ya túmaãrü conü. Erü wüxi i chixexũ i taxü i taxucürüwama texé iyarüxoxẽẽxũ nixĩ. Rü ngẽma norü dexa rü üürüü tüxũ nayuxẽe. ⁹ Rü yima tórü conümaã nüxũ ticuèxüü ya Tanatü ya Tupana, rü yimamaãtama chixexũ namaã tixugüe ta i duũxũgü i Tupana nügüãcü üxũ. ¹⁰ Rü ngẽma taëxmaã, rü meã duũxũgüchiga tidexagü, natürü ngẽmatama taëxmaã rü namaã taguxchigagü ta. Pa Chaueneëgüx, tama name na ngẽmaãcü yĩxũ. ¹¹ Wüxi i dexáarü chuxchuxüwatama rü taxuacüma ínaxüxũ i dexá i mexũ rü dexá i chixexũ. ¹² Pa Chaueneëgüx, wüxi i iguera rü taxuacüma oríbuarü omaã naxo, rü wüxi i uba rü taxuacüma igueraarü omaã naxo. Rü ngëxgumarüü ta wüxi i dexáarü chuxchuxü i yucürachiüxüwa, rü taxuacüma ínaxüxũ i dexá i mexũ.

Ngẽma cuèx i aixcüma ixĩxũ

¹³ Ngëxguma chi petanüwa nangëxmagu i wüxi i duũxũ i nüxũ cuáxũ rü meã naãexũ cuáxũ, rü name nixĩ na meã namaxũxũ rü mexũ na naxüxũ rü tama nügü yacuèxüxũ na ngẽmaãcü pexũ nüxũ nadauxẽẽxücèx na aixcüma wüxi i duũxũ i nüxũ cuáxũ yĩxũ. ¹⁴ Natürü ngëxguma chi pixãũxãchiwèxegügu rü togüchi pexaiegu rü norü yexera pegü pixĩxẽẽchaũgu, rü taxuacüma pegügu perüxĩnüe na mexügu rü nüxũ cuèxgüxũ pixĩgüxũ. Rü wüxi i dora i taxü

nixĩ i ngẽma ega ngẽmaãcũ pixĩgũgũ. ¹⁵ Erũ ngẽma na ixãũxãchiwèxegũxũ rũ duũxũgũchi na ixaiexũ rũ norũ yexera yigũ na ixĩgũxẽẽchaũxũ, rũ tama Tupanawa ne naxũ, natürũ ñoma i naãnecũãxwa rũ ngoxo i Chatanáwa nixĩ i ne naxũxũ. ¹⁶ Erũ ngextá ãũxãchi ítaxũwa rũ duũxũgũ nũgũ írüyexeraxẽẽchaũxũwa, rũ ngema rũ taxuũma meã inixũ rũ nagũxũraũxũ i chixexũ nangẽxma. ¹⁷ Natürũ guxãma ya yixema aixcũma tũxũ nangẽxmaxẽ i ngẽma cuèx i Tupanawa ne ùxũ, rũ aixcũma meã tamaxẽ rũ guxãmaã tamecũmagũ, rũ meã duũxẽxũ tayauxgũ i tũmapatawa, rũ meã itarũxĩnũe i tũmamũcũarũ ucuxẽ, rũ guxũ i duũxũgũ tũxũ nangechaũtũmũũgũ, rũ guxãmaãma tũgũ tawũxigũxẽẽgũ, rũ tixaixcũmagũ, rũ mexũ taxũgũ. ¹⁸ Rũ yixema naxcèx daugũxe na duũxũgũ nũgũmaã irũngũxmũẽxũ, rũ wũxi i mexũ taxũgũ. Erũ ngẽmawa tá nũxũ tadaugũ na aixcũma meã Tupanacèx namaxẽxũ i ngẽma duũxũgũ.

4

Duũxũgũ i ñoma i naãneãrũ ngũchaũcèx daugũxũchiga

¹ ¿Tũxcũtũ pegũmaã penuẽ rũ pegũ pedai? Pegũmaã penuẽ erũ pexũ nangẽxma i ngẽma perũ ngũchaũgũ i chixexũgũ. ² Pema pexũ nangũchaũ i ngẽma pexũ taxuxũ natürũ taxuacũma pexũ nanguxũ, rũ ngẽmacèx peyamèx i togũ. Rũ norũ ngẽmaxũcèx pixãũxãchie natürũ taxuacũma pexũ nanguxũega, rũ ngẽmacèx pegũmaã penuẽ, rũ pegũ pedai. Rũ tama penayauxgũ i ngẽma penaxwèxexũ erũ tama Tupanana naxcèx peca. ³ Rũ ngẽxguma naxcèx ípecaxgu, rũ tama penayaxu, erũ naxcèx ípeca i ngẽma tama Tupana pexũ naxwèxexũ. Rũ ngẽma pematama penaxwèxexũ nixĩ i naxcèx ípeçaxũ na namaã pegũtama petaãẽxẽemarexũcèx. ⁴ Pa Duũxũgũ i Chixri Maxẽxũx, ¿Tama ãxna nũxũ pecuèx rũ ngẽxguma ñoma i naãnexũ pengechaũgu rũ Tupanamaã perũxuwãxũ? Erũ texé ya ñoma i naãnexũ ngechaũxẽ rũ Tupanamaã tarũxuwãxũ. ⁵ Rũ tama natũcèxma nixĩ i ngẽma Tupanaãrũ ore i ñaxũ:

“Ngẽma Naãe i Üünexũ i Tupana tũxna muxũ rũ tũxũ ninuxũ erũ noxrũ tixĩ rũ tũxũ nangechaũ”,

ñaxũ. ⁶ Natürũ Tupana rũ tũxũ narũngũxẽẽ na namaã iporaexũcèx i guxũma i ñoma i naãneãrũ ngũchaũ i chixexũ. Rũ ngẽmacèx norũ orewa rũ ñanagürũ:

“Tupana rũ tũmamaã nanu ya yixema tũgũ icuèxũxũgũxe, natürũ tũxũ narũngũxẽẽ ya yixema tama tũgũ icuèxũxũgũxe”,

ñanagürũ. ⁷ Pa Chaueneẽgũx, ¡Meã Tupanaga pexĩnũe! ¡Rũ nũxũ pexoó i ngoxo i Chataná! Rũ nũma rũ tá pexna niña. ⁸ ¡Tupanana pengaicamagũ! Rũ nũma rũ tá ta pexna nangaicama. Rũ pemax, Pa Pecaduãxgũxũx, ¡nũxũ perũxoe i pecũma i chixexũ! Rũ pemax, i Tupanawe rũxĩxchaũxẽ natürũ ñoma i naãnewe rũ ta rũxĩxchaũxẽ, ¡penamexẽẽx i perũ maxũ na Tupanacèxicatama pemaxẽxũcèx! ⁹ ¡Pegũmaã pengechaũgũ rũ pexauxe erũ pipecaduãx! Rũ texé ya ñoma i naãneãrũ taãẽwa cugũxe, rũ name nixĩ i tũgũmaã taxauxe. Rũ texé ya tũmacũma i chixexũmaã taãxexẽ, rũ name nixĩ i Tupanapẽxewa tũgũmaã tangechaũ. ¹⁰ Rũ name nixĩ i Cori ya Tupanapẽxegu pecaxãpũxũgũ rũ namaã nũxũ pixu na taxuwama pimexũ. Rũ ngẽxguma i nũma rũ tá pexũ nicuèxũtũ rũ pexũ nataxẽẽ.

Tama name i chixexũgu cueneẽmaã curũxĩnũ

¹¹ Pa Chaueneẽgũx, ¡Tãxũ i chixexũmaã pegũ pixugũxũ! Erũ yixema chixexũmaã tũmaẽneẽchigagu idexáxe rũ ãxna chixexũmaã nũxũ dawenũxẽ, rũ chixe nũxũ tawogũ ta i Tupanaãrũ ore. Rũ ngẽxguma chixexũgu Tupanaãrũ oremaã curũxĩnũgu, rũ Tupanaãrũ orearũ yexera cugũ quixĩxẽẽchaũ erũ

tama aixcūma naga cuxĩnũ. ¹² Tupanaxĩcatama nixĩ ya tũxna naxãcũ i norũ mugũ rũ ñuxũchi tá tũxna cacũ rũ ngoxi naga ixĩnũe i ngẽma norũ ore. Rũ nũmatama nixĩ i nũxũ nangẽxmaxũ i pora na tũxũ namaxẽxẽxũ rũ ẽxna tũxũ nayuexẽxũ. ¿Natũrũ texé quiĩxũ i cumax rũ ngẽmacèx cunangugũxũ na ñuxãcũ namaxũxũ i cumũcũ?

Taxúema nũxũ tacuèx na tacũ tá tũxũ ngupetũxũ i moxũãrũ ngunexũgu

¹³ ¡Choxũ iperũxĩnũe i pema na ñapegũgũxũ:

“Ñuxma rũ ẽxna moxũ tá nái ya ñãnewa taxĩ, rũ wũxi ya taunecũ tá ngẽxma tayayaxu, rũ tá ngẽma tataxegũ na mucũ i dũeru ngĩxũ iyaxuxũcèx”, ñaperũgũgũ! ¹⁴ Pema rũ tama nũxũ pecuèx na tacũ tá pexũ ũpetũxũ i moxũ. ¿Tacũ nixĩ i perũ maxũ? Perũ maxũ rũ ñoma wũxi i cherena i paxaãchi nũxũ idauxũ rũ ngẽxgumatama ngupetũxũrũ tá inayarũxo. ¹⁵ Rũ narũmemaẽ nixĩ na ñapegũxũ:

“Ngẽxguma chi nanaxwèxegu ya Cori ya Tupana na imaxẽxũ, rũ chi tanaxũ i ñãã puracũ i nagu rũxĩnũẽxũ”, ñapegũxũ. ¹⁶ Natũrũ i pema rũ pegũ picuèxũũgũchaũ. Rũ guxũma i ngẽma rũ tama name. ¹⁷ Yĩxema nũxũ cuáxe na ñuxãcũ Tupanapẽxewa meã tamaxũxũ, natũrũ tama naxũxe, rũ pecadu taxũ.

5

Ucuxẽ i dũeruãxgũxũcèx

¹ Pa Duũxũgũ i Dũeruãxgũxũx, ¡Iperũxĩnũe i ñãã ore! ¡Pexauxe rũ aita pexũe erũ chixexũ tá pexũ naxũpetũ! ² Perũ ngẽmaxũgũ rũ marũ nangaue, rũ ngẽma pexchiru i mexẽchixũ rũ nawe nanangõmũ. ³ Perũ uiru rũ perũ dũeru rũ ngẽxma naxãũtanũ rũ ngẽxma nangaue. Rũ ngẽma norũ ãũtanũ rũ wũxi i perũ cuèxruũ tá nixĩ na pema rũ tá ta ipeyarũtauxexũ ñoma tacũ ũxũwa ixaxũrũũ. Tupana ngĩxũ nadau i perũ dũeru i ngĩmaã penguũxcũ, rũ ngẽmacèx tá pexũ napoxcu i naãneãrũ guxgu. ⁴ Rũ yema perũ puracũtanũxũ ga tama meã nũxũ penaxũtanũxũ, rũ ñuxma rũ ngĩxcèx nidexagũ ga yema dũeru ga tama nũxna ngĩxũ pexãcũ. Rũ Tupana ya guxããrũ Cori rũ ngẽma duũxũgũxũ naxĩnũ na ngĩxcèx yadexagũxũ ga yema dũeru ga nũxũ ngĩxũ pengetanũcũ ga peanewa na napuracũexũcèx. ⁵ Rũ ñoma i naãnewa rũ pegũ pengẽxããgũ rũ pemepata rũ pemuãrũ ngẽmaxũãxgũ rũ petaããgũ rũ meã pechibũe. Natũrũ nawa tá nangu na ngẽmacèx Tupana tá pexũ poxcuexũ. ⁶ Rũ pema penapoxcue rũ penadai i ngẽma duũxũgũ i taxuũma i chixexũ pemaã ũchiréxũ. Rũ nũmagũ rũ pexũ narũturamaẽgũ, rũ taxuacũma nũgũ ¡napoxũgũ.

Tanaxwèxe i tayumũxẽ rũ meã ítananguxẽẽ ya Cori ya Tupana

⁷ Rũ ñuxma Pa Chaueneẽgũx, rũ name nixĩ i meã ípenanguxẽẽ ñuxmatata ínangu ya Cori ya Tupana. Rũ dũcax, yĩxema naãnewa puracũxe rũ meã ítananguxẽẽ ya pucũ na naxũgũxũcèx i tũmanetũ. Rũ ñuxũchi ñuxre ya tauemacũ ítananguxẽẽ na nayaxũ i tũmanetũarũ o, rũ ngẽxguma rũ tá tayabuxgũ. ⁸ Rũ pema rũ ta penaxwèxe na meã ípenanguxẽẽxũ na ínanguxũ ya Cori ya Tupana. ¡Rũ petaããgũ, rũ tãxũ i nũxũ perũchãuexũ na ípenanguxẽẽxũ! Erũ marũ ningaica na ínanguxũ ya tórũ Cori. ⁹ Pa Chaueneẽgũx, name nixĩ i nũxũ perũxoe na pegũchigaxũ pixuechaũ na tama ngẽmacèx pexna naçaxũcèx ya Tupana. Erũ marũ ningaica na ínanguxũ na duũxũgũxũ yacagũxũcèx i norũ maxũchiga. ¹⁰ Pa Chaueneẽgũx, name nixĩ i nũxna pecuèxãchie ga yema nuxcũmaũgũxũ ga Tupanaãrũ orearũ uruũgũ ga na ñuxãcũ yaxna namaã naxĩnũẽxũ ga yexguma ngũxũ yangegũgu. Rũ name nixĩ i pema rũ ta ngẽxgumarũũ yaxna namaã pexĩnũẽãma rũ Tupanacèx pemaxẽãma

ega ngúxŭ pingegügu. ¹¹ Rŭ yixema nüxŭ tacuèx na nataãëgüxŭ ga yema duŭxŭgü ga meã Tupanacèx maxëãmaxŭ ga yexguma ngúxŭ nüxŭ üpetügu. Rŭ pema nüxŭ pecuèx ga ñuxãcü meã namaxama ga guma Yox ga yexguma ngúxŭ nüxŭ üpetügu. Rŭ nüxŭ pecuèx ga yixcama ga na ñuxãcü tórü Cori ya Tupana poraãcü nüxŭ rüngŭxëèxŭ. Erü nüma ya tórü Cori ya Tupana rŭ namecŭmaxŭchi rŭ poraãcü nüxŭ tangechaŭtümüügü. ¹² Rŭ guxŭärü yexera, Pa Chaueneëgüx, rŭ ngëxguma tacüçèx ipexunetagu, rŭ tama name i Tupanaegagu ipexuneta, rŭ éxna ñoma i naãneegagu ipexuneta, rŭ éxna tacü i to i naegagu ipexuneta. Natürü ngëxguma aixcüma yixŭgu i wüxi i ore jrü noxtacüma: “Ngŭ” ñapegü! Rŭ ngëxguma tama aixcüma yixŭgu i wüxi i ore jrü noxtacüma: “Tama” ñapegü! Rŭ ngëxguma ya Tupana rŭ tãütáma pexŭ napoxcue naxcèx i ngëma perü uneta. ¹³ Rŭ ngëxguma wüxie i petanüwa naxixãchiãëgu, rŭ name nixŭ na tayumüxëxŭ. Rŭ ngëxguma wüxie taãëgu, rŭ name nixŭ na tawiyaexŭ rŭ Tupanaxŭ ticuèxüŭxŭ. ¹⁴ Rŭ ngëxguma wüxie i petanüwa idaawexgu, rŭ name nixŭ i naxcèx peyaca i yaxögŭxŭärü äëxgacügü na tümacèx nayumüxëgüxŭcèx rŭ Cori ya Tupanaegagu chixŭmaã tüxŭ yangögŭgüxŭcèx. ¹⁵ Rŭ ngëxguma aixcüma Tupanaãxŭ yaxögŭäcüma nayumüxëgügu, rŭ tá tümacèx nitaane, rŭ nüma ya Cori ya Tupana tá tüxŭ ínarüdaxëë nawa i tümäärü daawe. Rŭ ngëxguma chi tacü rŭ pecadu taxŭxgu, rŭ Tupana tá tüxŭ nüxŭ nangechaŭ. ¹⁶ Rŭ ngëmacèx name nixŭ i pegümaã nüxŭ pixu i perü pecadugü rŭ pegüçèx peyumüxëgü i wüxiechigü na pexcèx yataanegüxŭcèx. Rŭ yima mecü ya yatüarü yumüxë rŭ aixcüma napora erü Tupana nanangãxŭ. ¹⁷ Tupanaärü orearü uruŭ ga Ería nixŭ ga wüxi ga yatü ga taxrüŭ ixŭcü. Natürü yexguma nüma guxŭ ga norü ngúchaŭmaã nayumüxëgu na tama napuxŭcèx, rŭ tomaëxpŭx ga taunecüarü ngãxŭgu rŭ tama napu ga yema naãnewa. ¹⁸ Natürü yemawena rŭ wenaxärü nayumüxë ga Ería rŭ pucüçèx ínaca. Rŭ wenaxärü napu. Rŭ narüxŭ ga guxŭma ga nanetügü. ¹⁹ Pa Chaueneëgüx, ngëxguma chi texé petanüwa Tupanana ixŭgachigu, rŭ tangëxmagu ya wüxie ya tüxŭ taeguxëèxë na wenaxärü Tupanawe tarüxŭxŭcèx, rŭ mexŭ taxü. ²⁰ Erü ngëxguma texé Tupanacèx nataeguxëëgu i wüxi i duŭxŭ nüxna i norü chixexŭ, rŭ tümagagu Tupana tá nanamaxëë i ngëma duŭxŭ, rŭ tá nüxŭ nüxŭ nangechaŭ i norü pecadugü.

Rŭ nuãma pexna,
Chaŭtiágu

NÜXĨRAÜXÜ GA POPERA GA PEDRU ÜMATÜXÜ

Pedru nüxü narümoxë ga yema yaxögüxü ga to ga nachiuãnegu woonexü

¹ Pa Chaueneëgüx, choma i Pedru nixi i pexcèx chanaxümatüxü i ñaã popera. Rü choma nixi i Ngechuchu ya Cristu choxü muxü na duüxügümaã nüxü chixuxücèx i norü ore. Rü pexcèx chanaxümatü i pema na perü naãnena to i nachiuãnegügu penawoonexü i Pötuanewa rü Gárataanewa rü Capadochiaanewa rü Áchiaanewa rü Bitíniãanewa ngëxmagüxe. ² Rü pexü nixi ga nadexü ga Tanatü ya Tupana, yerü woetama yema nixi ga nuxcümaxüchima nagu naxĩnuxü. Rü nanamu ga Naãe i Üünexü na pexü yamexëëgüxücèx na aixcüma napëxewa pixüünegüxücèx rü Ngechuchu ya Cristuga na pexĩnëxücèx rü nagümaã na piyaxgüxücèx na nataxuxücèx i perü chixexügü. Rü chanaxwèxe i Tanatü ya Tupana poraãcü pexü narüngüxëë rü pexü nataãëxëë.

Ítananguxëë na wena tá imaxëxü

³ Rü ngixã nüxü ticuèxüügü ya Tupana ya tórü Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tuxna nanaxã ga maxü ga yexwacaxüxü, yerü poraãcü nüxü tangechaütümügü. Rü ngëmacèx i ñuxma i yixema rü ta ítananguxëë na wena tá imaxëxü. ⁴ Rü pema rü wüxi i ngunexügu rü aixcüma tá penayauxgü i guxüma i ngëma mexügü i Tupana tá pexna äxü i ñuxma daxüguxü i naãnegu pexü namaã nanguxüxü. Rü ngëma tá pexna naxãxü rü tagutáma inayarüxo, rü tagutáma naxãüächi, rü tagutáma nangau. ⁵ Rü ñuxma na Tupanaãxü peyaxögüxü rü nüma rü norü poramaã tá pexna nadau ñuxmatáta aixcüma penayauxgü i ngëma maxü i taguma gúxü i tá pexna naxãxü i ngëxguma naguxgu i naãne. ⁶ Rü ngëmacèx name nixi i poraãcü petaãëgü, rü nüetama nixi ega woo ñuxma ñaã perü maxüwa rü paxaxächi muxüma i guxchaxügü pexü üpetügu. ⁷ Erü ngëmaãcü nixi i pexü naxüxü ya Tupana na nüxü nacuáxücèx rü ngoxi aixcüma peyaxögü rü ëxna tama. Rü ngëxguma peyaxögüamagu ega woo guxchaxügü pexcèx ínguxgu, rü ngëma perü õ rü wüxi i uiruarü yexera nixi na namexü erü ngëma uiru rü woo namexëchi natürü düxwa nangau. Rü ngëma uiru rü üxümaã nüxü taxü na nüxü icuáxücèx rü ngoxi aixcüma uiruxüchi yüixü. Rü ngëxgumarü ta nixi i perü õ na guxchaxügümaã Tupana nüxü üxü na nüxü nacuáxücèx rü ngoxi aixcüma nüxü peyaxögü na yixcama pexü yacuèxüxücèx rü mexü i pechica pexna naxãxücèx rü pemaã nataãëxücèx i ngëxguma wena núma naxüxgu ya Ngechuchu ya Cristu. ⁸⁻⁹ Pema rü Ngechuchu ya Cristuxü pengechaügü woo taguma nüxü na pedaugüxü. Rü ñuxma rü ta woo tama nüxü pedaugü, natürü nüxü peyaxögü, rü poraãcü petaãëgü. Rü ngëma perü taãëmaã rü taxuacüma nüxü pixuéga na ñuxãcü petaãëgüxüchixü, erü marü penayauxgü i perü maxü i taguma gúxü. Rü ngëmacèx nixi i nüxü peyaxögüxü. ¹⁰ Rü nuxcümaxüchima ga Tupanaãrü orearü uruügü, rü nüxü nixugüe ga na ñuxãcü tá Tupana pexü narüngüxëëxü. Rü nümagü rü poraãcü nangüe rü naxcèx nadaugü i ngëma maxü i taguma gúxü. ¹¹ Rü nümagü ga yema orearü uruügü rü Tupanaãrü poperawa nangüe na nüxü nacuèxgüxücèx na ñuxãcü tá na yüixü rü ñuxguacü tá na nangóxü ga guma Maxëxëëruü ga Cristu. Rü Cristuãe i Üünexü ga yema orearü uruügüwa yexmaxü, rü nüxü nüxü nacuèxëë ga na Cristu rü tá ngüxü yangexü rü tá nayuxü rü yixcama rü wena tá na namaxüxü rü ñuxüchi daxüguxü i

nañnewa tá na naxũxũ na guxũârũ âëxgacũ yĩxũcèx. ¹² Natürü Tupana rü yema nuxcũmaũgũxũ ga orearü uruũgũxũ nüxũ nacuèxëë na tãütáma nũmagũ nüxũ nadaugũxũ ga guma Maxëxëëruũ ga naxcèx nadaugũcũ, natürü pema tá yĩxũ na nüxũ pedaugũxũ. Rü dücax, Pa Chaueneëgũx, gumatama Maxëxëëruũchiga nixĩ ga perü orearü uruũgũ pemaã nüxũ ixugũgũxũ ga yexguma Tupanaãë i Üünexũ ga daxũwa ne muxũ yadexagũxëëgu. Rü guxũma i ngẽma ore i yima Maxëxëëruũchiga, rü woo Tupanaãrũ orearü ngeruũgũ i daxũcũãx rü nüxũ nangũchaũgũ na yexeraãcũ nüxũ nacuèxgũxũ.

Tupana rü taxcèx naca na napëxewa naxüünexũcèx i tórü maxũ

¹³ Rü ñuxma na Cristuarü duũxũgũ pixĩgũxũ, rü penaxwèxe na pexuãëgũxũ rü ípenemarexũ na penaxũxũ i norü ngũchaũ. Rü name nixĩ i aixcũma meã ípenanguxëë i guxũma i ngẽma mexũgũ i Tupana tá pexna ãxũ i ngëxguma Ngechuchu ya Cristu núma ũxgu. ¹⁴ Rü ñuxma na Tupanaxãcũgũ pixĩgũxũ, rü penaxwèxe na aixcũma naga pexĩnũëxũ. Rü tama name i nagu pexĩ ga yema nuxcũmaũxũ ga perü ngũchaũ ga ũpa nagu pexĩxũ ga yexguma tauta Tupanaxũ pecuèxgu. ¹⁵ Natürü penaxwèxe i aixcũma meã pemaxë na Tupanapëxewa naxüünexũcèx i perü maxũ. Erü nüma ya Tupana ya pexũ decü, rü naxüüne. ¹⁶ Rü norü ore i ümatũxũwa rü ñanagürü:

“Chanaxwèxe i chauxrũũ pixüüne, erü choma rü chaxüüne”, ñanagürü. ¹⁷ Rü pema na “Pa Tonatũx” ñapegũxũ nüxũ ya Tupana, rü ñuxma na ñoma i nañnewa pemaxëxũ rü name nixĩ i guxũguma nüxũ pemuũë. Erü nüma rü aixcũmaxũchi nanangugũ i wũxichigũ i duũxũgũarũ maxũ na ñuxãcũ yĩxũ. Rü tũxũ napoxcu ya guxãma ya texé ya chixexũ ũgũxe, rü nüetama nixĩ ega woo texé tixĩgu, erü napëxewa rü nawũxigumare i guxũma i duũxũgũ. ¹⁸⁻¹⁹ Rü Tupana rü marü pexũ ínanguxũxëë nawa ga yema nuxcũmaũxũ ga perü maxũ ga taxuwama mexũ ga perü oxigũxũtawá peyaxuxũ. Rü yema na nawa pexũ ínanguxũxëëxũcèx rü pexna naxããxũcèx i maxũ i ngexwacaxũxũ, rü poraãcũ nüxũ naxãtanü. Yerü tama uiru rü ëxna dïëru i ngauxwèxexũmaã nanaxũtanü, natürü Cristugũ ya mexëchicũmaã nixĩ ga naxũtanüãxũ. Yerü nüma ga Cristu rü ñoma wũxi i carneru i taxuwama nañuxraũxũ i Tupanacèx imáxürũũ pexcèx nayu na pexũ naxũtanüxũcèx. ²⁰ Rü nüma ga Tupana rü woetama nuxcũmaxũchima tauta naãne ixũgũgu, rü marü Cristuxũ naxuneta na pexcèx nayuxũcèx. Natürü ñomaũcũü nixĩ ga nangóxũ ga guma Cristu na pexũ nangũxëëxũcèx. ²¹ Rü ñuxma rü Cristugagu nixĩ i nüxũ peyaxõgũxũ ya Tupana ga yuwa Cristuxũ írudaxëëcũ rü daxũwa nagacũ. Rü ngẽmacèx nixĩ i ñuxma i Tupanaãxũ peyaxõgũxũ rü ípenanguxëëgũxũ na daxũwa pexũ nagagũxũcèx. ²² Rü ñuxma na naga pexĩnũëxũ i Tupanaãrũ ore i aixcũma ixĩxũ rü pexũ natauxcha na pegü pengechaũgũxũ erü Tupana rü marü pexũ inayanaxoxëë i perü chixexũgũ. Rü ngẽmacèx penaxwèxe i aixcũma guxũ i perü ngũchaũmaã pegü pengechaũgũ. ²³ Rü ñuxma i pema rü marü penayauxgũ i ngexwacaxũxũ i perü maxũ. Rü ngẽmacèx ñoma ngexwacèx pebuexürũũ pixĩgũ. Natürü ngẽma maxũ rü tama penatü rü pee ya yuwèxéxewa nixĩ i penayaxuxũ. Natürü Tupanaãrũ ore i maxũxũ i taguma iyarũxoxũwa nixĩ i penayaxuxũ. ²⁴ Erü Tupanaãrũ ore i ümatũxũwa rü ñanagürü:

“Guxũma i duũxũgũ rü ñoma wũxi i natüanerüũmare nixĩ. Rü guxũma i norü mexũ, rü wũxi i nanetũchacurüũmare nixĩ. Rü ngẽma natüane rü nayu, rü nachacu rü narũngu. Rü ngëxgumarũũ ta nixĩ i duũxũgũ na tama nataixũ i norü maxũ i ñoma i nañnewa. ²⁵ Natürü tórü Coriarü ore rü taguma inayarũxo”,

ñanagürü i Tupanaärü orewa. Rü ngēma Tupanaärü ore i mexü nixi ga pemaã nüxü yaxugüxü.

2

¹ Rü ngēmacèx name nixi i nüxü perüxoe i guxüma i chixexügu, rü ngēma na pidoratèxgüxü, rü ngēma na togüpèxewa meã na pemaxēnetaxü rü ngēma na pixãüxãchiwèxegüxü, rü ngēma na pexoregütèèxgüxü. ²⁻³ Rü ngēxguma chi aixcüma nüxü picuèxãchitanügu na ñuxãcü namecümaxüchixü ya tórü Cori, rü ñoma wüxi i õxchana i ngexwacèx buxü i naëgünenixü nüxü ngúchaüxürüü penaxwèxe i poraãcü pexü nangúchaü i norü ore na ngēmawa peporaexüçèx rü meã peyaexüçèx i perü õwa na ngēmaãcü guxüwama namexüçèx i perü maxü i taguma gúxü.

Cristu nixi ya nuta ya maxücü

⁴ Rü ñuxma rü name nixi i tórü Corina pengaicamagü. Erü nüma ya tórü Cori nixi ya yima nuta ya maxücü ya Tupana nayaxücü na namaã inaxüguãxüçèx ya napata. Rü woo duüxügu nüxü oexü, natürü yima nixi ya Tupana nayaxücü erü naxcèx rü namexèchi. ⁵ Rü ngēxgumarüü ta i pemax, rü Tupana pexü nade na napataarü nutagü ya maxècü pixigüxüçèx. Rü pema nixi i Tupanaärü ngüxèëruügu i üünexü i Ngechuchu ya Cristuégagu Tupanana ãmare pexägüxü. Rü ngēma ãmare i nüxna pexägüxü i namaã nataãèxü rü ngēma nixi i perü maxü i mexü i napèxewa. ⁶ Rü Tupana rü norü ore i ümatüxüwa rü Cristuchigaxü nixu rü ñanagürü:

“Ñuxma na ichanaxüguxü ya chopata, rü yima nuta ya nüxira chayaxüchicü, rü yima nixi ya nuta ya mexèchicü ya chomatama chanayaxücü na chopata namaã ichaxüguxüçèx. Rü yima nuta rü chaunchiga nixi. Rü yixema nüxü yaxõxè, rü aixcüma tá tanayaxu i ngēma maxü i taguma gúxü i tümamaã ichaxunetaxü”,

ñanagürü. ⁷ Rü pema na nüxü peyaxõgüxü, rü Cristu rü pexcèx rü guxüwama name rü naporaxüchi. Natürü ngēma tama yaxõgüxüçèx, rü taxuwama name. Rü ngēmacèx ya Tupana rü norü ore i ümatüxüwa rü ñanagürü:

“Yima nuta ya ipataarü üruügu nüxü ocü, rü chauxcèx rü gucü ya nutaarü yexera namexèchi. Rü ngēmacèx yimaetüwa nixi ichanaxüguxü ya chopata”,

ñanagürü. ⁸ Rü Tupanaärü ore rü ñanagürü ta:

“Guxüma i ngēma tama yaxõgüxü rü tama irüxĩnüèchaüxü rü yima nutagu tá nayarüpucutügu”,

ñanagürü. Rü ngēmaãcü i guxüma i ngēma tama yaxõgüxü rü tá chixexügu nayi erü tama Tupanaga naxĩnüèchaü rü tama Cristuaxü nayaxõgüchaü. Rü ngēmacèx Tupana tá nanapoxcue yema nüma nüxü yaxuxürüü. ⁹ Natürü pema nixi i duüxügu i tórü ãëxgacü ya Tupana pexü dexü na norü ngüxèëruügu pixigüxüçèx. Rü pema nixi i duüxügu i napèxewa ixüünexü erü nümatama ya Tupana rü norü duüxüguxü pexü nixigüxèë na nüxü pixuxüçèx i norü ore i aixcüma mexèchixü. Rü nümatama ya Tupana nixi ga chixexüwa pexü inanguxüxèëxü na norü ngóonexü i mexèchixügu pechocuxüçèx. ¹⁰ Rü üpa ga pema rü tama Tupanaärü duüxügu pixigü, natürü i ñuxma rü aixcüma norü duüxügu pixigü. Rü üpa rü taxúeaxüma pengechaütümüügu, natürü i ñuxma rü Tupanaãxü pengechaütümüügu.

Ñuxma na Tupanaärü duüxügu pixigüxü, rü name nixi i meã naxcèx pemaxè

¹¹ Pa Chaueneëgu ya Pexü Changechaügüxex, rü ñuxma na Tupanaärü duüxügu pixigüxü, rü tama ñoma i nañecüãx pixigü. Rü ngēmacèx pexü

chacèexũ na nüxũ perüxoexüçèx i guxũma i ngẽma ngúchaũgũ i chixexũ i ñoma i naãnecũãx nagu ìxũ. Erü ngẽma ngúchaũgũ i chixexũ rü taãèxũ chixexũgu nanguxẽèchaũ. ¹² Rü name nixĩ i meã pemaxẽ napèxewa i ngẽma duũxũgũ i tama Tupanaxũ cuèxgũxũ. Rü ngẽxguma woo poraãcü chixri pechiga yadexagũgu i nümagũ, rü tá nüxũ nadaugũ na ñuxãcü mexũ pexũgũxũ, rü tá Tupanaxũ nicuèxũũgũ i ngẽxguma Cristu wena núma üxgu. ¹³ Rü name nixĩ na tórü Cori ya Ngechuchugagu tümaga pexĩnüèxũ ya guxãma ya yíxema perü ãèxgacũgũ ixĩgũxe. Rü ngẽmaãcü name nixĩ i meã naga pexĩnüè ya ãèxgacũ ya tacũ ya Dumawa ngẽxmacũ, erü nüma nixĩ i guxũ i togũ i ãèxgacũgũétüwa nangẽxmaxũ. ¹⁴ Rü ngẽxgumarũũ ta name nixĩ i naga pexĩnüè i ngẽma togũ i ãèxgacũgũ i petanüwa namugũxũ ya yima ãèxgacũ ya tacũ na napoxcueãxüçèx i ngẽma chixexũ ügũxũ rü namaã nataãègũxüçèx i ngẽma mexũ ügũxũ. ¹⁵ Erü Tupana nanaxwèxe na mexũ pexũgũxũ na ngẽmaãcü ipeyanangeèxgũxèèxüçèx i ngẽma duũxũgũ i tama Tupanaãrũ orexũ cuáxchaũgũxũ rü chixri ngẽma orchiga idexagũxũ. ¹⁶ Rü ñuxma na Cristu pexũ ínguxũxèèxũ, rü name nixĩ i duũxũgũ i aixcüma ínguxũxürũãcü meã pemaxẽ. Natürü ñuxma na ípenguxũxũ rü tama name na ngẽmamaã pegũ ípexoxũxũ na tacũ rü chixexũ pexũgũxüçèx. Erü ñuxma na Tupanaãrũ duũxũgũ pixĩgũxũ, rü name nixĩ i norü ngúchaũxĩcatama pexũgũ. ¹⁷ Rü name nixĩ i meã penayauxgũ i guxũma i duũxũgũ. ¡Rü nüxũ pengechaũ i taeneègũ i yaxõgũxũ! ¡Rü nüxũ pemuũè ya Tupana! ¡Rü naga pexĩnüè ya ãèxgacũ ya tacũ ya Dumacũãx!

Tanaxwèxe i Cristurũũ yaxna namaã taxĩnüè i ngẽxguma ngúxũ ingegũgu

¹⁸ Pa Duũxũgũ i Coriãxgũxũx, ¡rü nüxũ pengechaũgũ rü naga pexĩnüè i perü corigũ! Rü tama name i ngẽma perü corigũ i pemaã mecũmaxũxũxĩcatama pengechaũgũ, natürü name nixĩ i nüxũ pengechaũgũ ta i ngẽma perü corigũ i chixecũmaxũ. ¹⁹ Erü Tupana rü pemaã nataãè ega nüxũ na pengechaũgũxüçèx yaxna namaã pexĩnüègu i ngẽxguma texé natüçèxmamare chixexũ pemaã üxgu rü ngúxũ pexũ tingexèègu. ²⁰ Natürü çtacüwa pexũ namexũ ega yaxna namaã pexĩnüègu i ngẽxguma wüxi i perü chixexüçèx pepoxcuegu? Natürü ngẽxguma tacũ rü mexũ i pexũxũgagu ngúxũ pingegũgu rü yaxna namaã pexĩnüègu, rü ngẽma waxi nixĩ i Tupanapèxewa mexũ. ²¹ Rü ngẽma na mexũ pexũxũgagu ngúxũ pingegũxüçèx nixĩ i Tupana pexũ dexũ. Yerü ga Cristu rü ta pexçèx ngúxũ ninge. Rü yemaãcü pexũ nüxũ nadauxèè na ñuxãcü nüma nanaxwèxexũ na naxrũũ yaxna namaã pexĩnüèxũ i ngẽma ngúxũ. ²² Nüma ga Cristu rü taguma pecadu naxü, rü taguma texèxũ nawomüxèè. ²³ Rü yexguma duũxũgũ chixexũ namaã ixugüegu, rü nüma rü taxuũma ga chixexũmaã nanangãxũ. Rü yexguma ngúxũ nüxũ yangexèègũgu, rü nüma rü tama tacũ rü chixexũmaã nanaxãuxũne. Natürü Tupanamaã nüxũ nixu na nüma namaã namexèèãxüçèx ga yema duũxũgũ ga chixri namaã chopetũxũ. Yerü nüxũ nacüèx rü Tupana rü aixcüma meã nanangugũ i guxũma i duũxũgũarũ maxũ. ²⁴ Rü nümatama ga Cristu rü nügũxũnegu nayange ga tórü pecadugũ ga yexguma curuchagu nayuxgu. Rü yemaãcü nanaxü na nüxũ rüxoexüçèx i tórü chixexũ na naxçèxicatama imaxèxüçèx. Nüma rü pexçèx nanapix na yemaãcü pexũ nameèxèèxüçèx. ²⁵ Rü pema ga ũpa rü ñoma carnerugũ i nu ne naxĩmarexũrũũ pixĩgũ. Natürü i ñuxma rü marü Cristuçèx pewoegu. Rü nüma nixĩ i perü dauruũ yĩxũ, rü nüma nixĩ i pexna nadauxũ.

3

Ñuxãcü Tupana nanaxwèxe na namaxëxü i ngëma ixãmaxü rü ixãtexü

1-2 Rü pemax, Pa Ngexügüx, rü name nixi i petega pexinüë na ngëma pete i tama yaxõxü nüxü dauxücèx i perü maxü i mexü i Tupanapëxewa rü duüxügüpëxewa rü ngëmacèx na yaxõõxücèx woo taxuüma i Tupanaärü orexü namaã pixugu. ³ Rü ngëma na aixcüma pimexücèx, rü tama name i nagu perüxinüë na ñuxãcü pegü pemexëëyaexüchixü, rü ëxna uirunaxcèx i ngëxãëruümaã pengëxãëgüxü, rü ëxna tatanüxüchixü i naxchirugu na picuxgüxü. ⁴ Natürü name nixi i perü maxüwa pegü pimexëëgü rü guxüma i duüxügümaã pimecümagü rü taguma texémaã penuãëgü, erü ngëma nixi i perü mexü i taguma iyarüxoxü i aixcüma mexü i Tupanapëxewa. ⁵ Rü yemaãcü norü maxü i mexümaã nixi ga nügü yangëxãëgüxü ga yema nuxcümaügüxü ga ngexügü ga Tupanapëxewa ixüünexü. Rü nümagü rü Tupanaãxü nayaxõgü rü natega naxinüë. ⁶ Rü yemaãcü ta iyixi ga Chara ga ngïte ga Abrãüga na naxinüxü, rü ngïrü corimaã naxuaxü. Rü pemagü rü tá ta ngïrü pixigü ega mexü pexügügu. Rü ñuxüchi taxucèxtáma tüxcüü petecèx pemuë. ⁷ Rü ngëxgumarüü ta i pemax, Pa Yatügüx, rü name nixi i meã pemexü pengechaügü rü aixcüma yaxna ngïmaã pexinüë, erü ngïma rü irüturamaë. Rü name nixi i ngïmaã petaãëgü erü Tupana rü pexna naxããxürüü ngïxna nanaxã i ngëma maxü i taguma gúxü. Rü name nixi i ngëmaãcü meã ngïmaã pemaxë na Tupana nüxü ñnuxücèx i perü yumüxëgü.

Yixema mexü ügüxe ya ngúxü ingegüxechiga

⁸ Rü ngëmaãcü chanaxwèxe i guxãma i pema rü pegüxü pengechaütümüügü rü wüxigu perüxinüë, rü aixcüma nüxü pengechaügü i guxüma i taeneëgü i yaxõgüxü. Rü chanaxwèxe i aixcüma pemecümagü rü guxãmaã pegü pewüxiguxëë. ⁹ Rü ngëxguma texé chixexü pemaã üxgu, rü tama name i pema rü ta chixexü tümamaã pexü. Rü ngëxguma texé pemaã guxchigagu, rü tama name i pema rü ta tümamaã peguxchiga. Natürü narümemaë nixi i mexü i oremaã tüxü pengãxüga rü tüxü perüngüxëë, erü Tupana pexü nadei na pexü nangüxëëxücèx. ¹⁰ Erü Tupanaärü ore i ümatüxüwa rü ñanagürü:

“Ngëxguma texé taãëãcüma maxchaügu, rü name nixi i nüxna tadau ya tümäärü conü na tama chixexü i oremaã yadeaxücèx. Rü ngëxgumarüü ta name nixi i nüxna tadau i tümãx na tama doraxü yaxuxücèx. ¹¹ Rü name nixi i nüxna tayaxü i guxüma i chixexügü, rü mexü taxü. Rü ngëxgumarüü ta name nixi i guxüguma naxcèx tadau na togümaã tataãëxü. ¹² Erü tórü Cori rü tüxna nadau ya yixema aixcüma ímexë, rü nüxü naxinü i tümäärü yumüxë. Natürü tümamaã nanu ya yixema chixexü ügüxe”,

ñanagürü i ngëma Tupanaärü ore. ¹³ ;Rü texé tá chixexü pemaã üxü ega pema rü aixcüma guxüguma mexü pexügügu? ¹⁴ Natürü ngëxguma chi ngëma mexü na pexügüxücèx ngúxü pingegügu, rü name nixi i petaãëgü. ;Rü taxucèxma texëxü pemuë, rü taxucèxma tacücèx pexoegaãëgü! ¹⁵ Rü name nixi i perü Corixü peyaxixëë ya Cristu rü aixcüma naga pexinüë, rü guxüguma ípememare na meã penangãxüxücèx i guxüma i duüxügü i pexna çaxü na tüxcüü Cristu-axü peyaxõgüxü. ¹⁶ Natürü name nixi i nüxü pengechaüãcüma penangãxü rü tama pegügu perüxinüëãcüma na norü yexera pixigüxü. Rü name nixi i meã pemaxë na taxucèxma pexoegaãëxücèx. Rü ngëxguma ngëmaãcü pemaxëgu rü tá naxãneë i ngëma duüxügü i chixri pechiga idexagüxü na ñuxãcü Cristucèx pemaxëxü. ¹⁷ Yixema rü ngúxü tingegü ega chixexü ixügügu. Natürü

narümemaë nixĩ na mexũ ixügũxũcèx ngúxũ na ingegũxũ, ega ngẽmaãcü Tupana naxwèxegu. ¹⁸ Yerũ nũmatama ga Cristu rü ngúxũ ninge, rü wüxicanatama guxããrũ pecaducèx nayu. Rũ woo na mecü yĩxũ rü taxcèx nayu i yixema i chixexũ i duũxũgũ ixĩgũxũ. Rũ yemaãcü nanaxũ na Tupanaxũtawa tũxũ nagagũxũcèx. Rũ woo nayu ga naxũne, natürũ ga naãe rü tama nayu. ¹⁹ Rũ yexguma naxũne yuxgu rü naãe rü natanũwa naxũ ga yema naãegũ ga Tupana poxcuexũ, rü orexũ namaã nayarũxu. ²⁰ Rũ yema naãegũ ga yexma poxcuexũ, rü yema nixĩ ga naãegũ ga yema duũxũgũ ga Noe maxũgu tama ixĩnũchaũxũ woo Tupana yaxna namaã naxĩnũ ga yexguma Noe naxũyane ga guma wapuru. Rũ 8 ga duũxũgũxĩcatama nixĩ ga guma wapurugu ichoũxũ, rü yema nixĩ ga guma mucü ga taxüchicüarũ dexáétüwa maxèxũ. ²¹ Rũ yema dexá rü wüxi ga cuèxruũ nixĩ. Erũ ngëxguma dexáwa íbaiegu, rü duũxũgũxũ nüxũ tacuèxèẽ na Ngechuchu ya Cristu wena maxũxũgagu yĩxũ i tũxũ nangëxmaxũ i maxũ i taguma gúxũ. Rũ tama taxüneaãrũ düxétüwa na imexũcèx nixĩ i íbaieũ, natürũ ítabaie yerũ marũ Tupanana naxcèx taca na tũxũ iyanaxoxèẽãxũcèx ga tórũ pecadugũ na aixcũma napëxewa imexũcèx rü aixcũma mexũgu rüxĩnũèxũcèx. ²² Rũ nüma ga Ngechuchu ya Cristu, rü daxũguxũ i naãnewa naxũ, rü ñuxma rü Tupanaãrũ tũgüncèwawa nangëxma. Rũ ñuxma rü namëxwa nangëxmagũ i guxũma i Tupanaãrũ orearũ ngeruũgũ i daxũcũãx rü guxũma i ãëxgacũgũ i daxũcũãx.

4

Tanaxwèxe i ngẽma cuèx i Tupana tũxna ãxũmaã nüxũ tarüngũxèẽ i taeneëgũ

¹⁻² Rũ ngẽmacèx name nixĩ na ípememarexũ na ngúxũ pingegũxũ yexgumarũ ga Cristu na ngúxũ yangexũ. Erũ yixema ngúxũ ingexe rü marũ nüxũ tarũxo i tũmaãrũ pecadu na guxũguma meã Tupana naxwèxexũãcũma tamaxũxũcèx, rü tama i tũmaxũne naxwèxexũãcũma na tamaxũxũcèx. ³ Üpa ga pemax, rü mucũma ga taunecü penaxüecha i ngẽma chixexũ i ñuxma i ngẽma duũxũgũ i tama Tupanaxũ cuèxgũxũ ügũxũ. Rũ yexguma ga pema rü pecadu pexũgũãcũma pemaxè, rü penaxũ ga pexeneãrũ ngúchaũ, rü pengãxè, rü peta ga nawa pexãũgatanũxũ pexũgũ, rü tacü i nguchièxgũxũ poraãcü pixaxcugũ, rü tupananetachicünèxãgũxũ picuèxũgũ i woo Tupana na pexna nachuxuxũ i ngẽma. ⁴ Rũ yema duũxũgũ ga namaã pexãmücũgũxũ ga yexguma chixri pemaxègu, rü ñuxma rü poraãcü nagu narũxĩnũe na tacücèx tama natanũgu pexãgũxũ rü tama nawe perũxĩxũ i ngëxguma norũ chixexũ naxũgũgu. Rũ ngẽmacèx nixĩ i ñuxma i chixri pechiga yadexagũxũ. ⁵ Natürũ nümagũ rü tá ta Cristupëxewa nangugũ na namaã nüxũ yaxugũxũcèx na ñuxãcü namaxèxũ. Rũ nüma ya Cristu rü ínamemare na nüxna yacachigũxũcèx i guxũma i duũxũgũ i maxèxũ rü yuexũ. ⁶ Rũ ngẽmacèx ya Tupana rü naxũpa na nayuexũ i duũxũgũ rü marũ nüxna nanaxuaxũ i maxũ i taguma gúxũ. Erũ nanaxwèxe na naxrũũ guxũguma mexũwa namaxèèchaxũ ega woo ñoma i naãnewa nayuegu i naxũnegũ. ⁷ Rũ marũ ningaica na nagúxũ i ñoma i naãne rü guxũma i tacü i nawa ngëxmaxũ. Rũ ngẽmacèx name nixĩ na ípexuãèxũ rü meã peãe ta ipexũgũxũ rü guxũguma peyumüxègũxũ. ⁸ Rũ guxũãrũ yexera i ngẽma pexũ chanaxwèxexũ nixĩ na aixcũma pegü pengechaũgũxũ i wüxichigũ. Erũ ngëxguma aixcũma yigũ ingechaũgũgu rü ngẽmaãcü inayarũxo i muxũma i pecadugũ. ⁹ ¡Rũ meã pegü peyaxugũ i wüxichigũ i pechiũwa! Rũ tama name i tũmamaã penuãèãcũma tũxũ peyaxu. ¹⁰ Rũ wüxichigũ i pemax, rü Tupana pexna nanaxã i perü cuèx. Rũ ngẽma perü cuèxmaã rü name nixĩ i wüxichigũ pegü perüngũxèègũ, na aixcũma Tupanaãrũ ngũxèèruũ i mexũ na pixĩgũxũcèx rü meã namaã pepuracüexũcèx i guxũma i ngẽma cuèx i

Tupana pexna ãxũ. ¹¹ Rũ ngẽxguma texé nũxũ ixuxgu i ore, rũ name nixĩ i aixcũma Tupanaãrũ orexũ tixu. Rũ ngẽxguma texé togũxũ rüngũxẽẽgu, rũ name nixĩ i Tupana tũxna ãxũ i poramaã tanaxũ. Rũ guxũma i ngẽma pexũxũ rũ name nixĩ i meãma penaxũ na ngẽmaãcü Ngechuchu ya Cristugagu Tupanaxũ picuèxũũgũxũcèx. Erũ nũma ya Tupana rũ guxũguma namexèchi rũ naporaxũchi. Rũ ngẽmaãcü yĩĩ.

Ngẽxguma Cristuaxũ yaxõxgu rũ ngũxũ tinge

¹² Pa Chaueneẽgũ ya Pexũ Changechaũgũxex, ñũxma na taxũ i guxchaxũgũ i perũ ngũxẽẽruũ pexcèx ínguxũ, ¿rũ tãxũ i pebaixãchiãẽgũxũ, ñoma tacũ i taguma nũxũ pedauxũ ngupetũxũrũ! ¹³ Natürũ narümemaẽ nixĩ na petaãẽgũamaxũ, yerũ yema Cristu ngũxũ na ingexũrũ nixĩ i ngũxũ na pingegũxũ i ñũxmax na petaãẽgũxũcèx i ngẽxguma wena núma naxũxgu i nũmax. ¹⁴ Rũ ngẽxguma Cristuaxũ na peyaxõgũxũgagu texé pemaã guxchigagu, rũ wũxi i perũ taãẽ nixĩ i ngẽma. Erũ ngẽmaãcü nũxũ pecuèx na Tupanaãẽ i Üünexũ rũ pewa na nangẽxmaxũ. ¹⁵ Rũ ngẽxguma chi ngũxũ pingegũgu, rũ name nixĩ na wũxi i mexũ na pexũgũxũgagu na yĩĩxũ rũ tama wũxi i chixexũgagu na yĩĩxũ, ngẽxgumarũ i máeta rũ éxna ngítèèx rũ éxna togũarũ guxchaxũwa na pegũ pengẽxmagũxẽẽxũ. ¹⁶ Natürũ ngẽxguma texé Cristuaxũ tayaxõxũgagu ngũxũ tingexgu, rũ taxucèxma tũxcũũ ngẽmacèx taxãne. Rũ name i ngẽmacèx Tupanaxũ ticuèxũ. ¹⁷ Rũ ñũxma rũ marũ nawa nangu na Tupana ngũxũ tũxũ ingexẽẽxũ na ngẽmaãcü tũxũ iyanawẽxãchixẽẽxũcèx i yixema na naxãcũgũ ixĩgũxũ. Rũ ngẽxguma ngẽmaãcü tamaã inaxũgũãgu, rũ ¿ñũxãcü tá nũxũ naxũpetũ i ngẽma duũxũgũ i tama Tupanaãrũ ore i mexũga ñnũẽchaũxũ? ¹⁸ Erũ Tupanaãrũ ore i ùmatũxũwa rũ ñanagũrũ:

“Ngẽma duũxũgũ i mexũ ügũxũ rũ guxchaãcüma nanayauxgũ i maxũ i taguma gũxũ. Rũ ñũxma na ngẽmaãcü yĩĩxũ, ¿rũ ñũxãcü tá nũxũ nangupetũxũ i ngẽma duũxũgũ i chixexũ ügũxũ rũ pecaduãxgũxũ?” ñanagũrũ. ¹⁹ Rũ ngẽmacèx ya yixema Tupana naxwèxexũãcüma ngũxũ ingegũxe, rũ name nixĩ na mexũ taxũgũechaxũ rũ Tupana ya tũxũ ücũmẽxẽgu na tanaxũxũ i tũmaãẽ na nũxna tũxũ nadauxũcèx. Erũ nũma ya Tupana rũ mecũ nixĩ rũ taguma texéxũ nawomũxẽẽ.

5

Ucuxẽgũ naxcèx i ngẽma yaxõgũxũ

¹ Rũ ñũxmax, Pa Yaxõgũxũãrũ Æẽxgacũgũx, rũ pexna chanaxãxchaũ i wũxi i ucuxẽ i mexũ, erũ choma rũ ta pexrũũ yaxõgũxũãrũ ãẽxgacũ chixĩ. Rũ chomaxũchima nixĩ ga nũxũ chadauxũ ga ñũxãcü ngũxũ na yangexũ ga Cristu. Rũ choma rũ tá ta pexrũũ choxũ nangẽxma i chauchica i mexũ i ngẽxguma wena núma naxũxgu. ² Rũ chanaxwèxe i nũxna pedau rũ nũxũ perũngũxẽẽ i guxũma i Tupanaãrũ duũxũgũ i pemèxwa ngẽxmagũxũ. Rũ name i mexũ i perũ ngũchaũmaã Tupana naxwèxexũãcüma penaxũ i ngẽma puracũ, rũ tama texé pexũ muxguxica penaxũ rũ éxna díerucèx penaxũ. ³ Rũ tama name i namaã penuẽãcüma rũ penangaãcüma penamu i ngẽma duũxũgũ. Natürũ chanaxwèxe i mexũ i perũ maxũ nũxũ pewèx na ñũxãcü Tupana naxwèxexũ na namaxèxũ. ⁴ Rũ ngẽxguma wena núma naxũxgu ya tórũ Daurũxũchi ya Cristu, rũ pema rũ tá penayauxgũ i wũxi i perũ ãmare i ngèxcuerũ i mexèchixũ i taguma ngauxũ. ⁵ Rũ ngẽxgumarũ ta i pemax, Pa Ngextũxũcũgũx, rũ name nixĩ i naga pexĩnüẽ i ngẽma perũ ãẽxgacũgũ i Tupanaãrũ puracũwa puracũexũ. Rũ guxãma i pema i yaxõgũxũ, rũ name nixĩ

i wüxichigü pegü perüngüxëë rü taguma pegügu perüxĩnüë na pemücügüarü yexera pixĩgüxü. Erü Tupanaärü ore i ümatüxüwa rü ñanagürü:

“Tupana rü tama norü me nixĩ i ngëma duüxügü i nügü icuèxüxügüxü.

Natürü nüxü narüngüxëë rü namaã namecüma i ngëma duüxügü i tama nügü icuèxüxügüxü”,

ñanagürü i ngëma ore. ⁶ Rü ngëmacèx tama name i pegü picuèxüxü. Rü narümemaë i Tupanamëxë ya poranetüxüwa pegü pengëxmagüxëë na nüma pexü yacuèxüxügüxücèx i ngëxguma nawa nanguxgu na ngëmaãcü pemaã naxüãxü. ⁷ Rü name nixĩ i Tupanamëxëgu penaxü i guxüma i perü oegaãëgü, erü nüma ya Tupana rü guxüguma pegu narüxĩnü rü aixcüma pexna nadau. ⁸ Rü name nixĩ i guxüguma pegüna pedaugü rü ipexuãëgü, erü perü uwanü i Chataná rü doma wüxi ya ai ya idüraxüchicürüü nanañaãne rü tümacèx nadau na texéxü tá nachixexëëxü. ⁹ ¡Rü peporaëamèx rü peyaxögüamèx i ngëxguma tacü rü chixexü pemaã naxüxchaügu! Erü nüxü pecuèx rü guxüma i taeneëgü i guxüwama ngëxmagüxü rü pexrüü ngëmatama ngüxü ningegü. ¹⁰ Natürü ngëxguma paxaxãchi ñoma i naãnewa ngüxü pingegüguwena, rü Tupana rü tá pexü nimexëë na aixcüma napëxewa pimexücèx, rü tá pexü narüngüxëë na taguma nüxü perüxoexücèx, rü tá pexü naporaexëë na aixcüma perü maxüwa peporaexücèx. Rü daatama Tupana nixĩ ya tüxna naxãcü i guxüma i mexü i tüxü ngëxmaxü, rü tüxü deicü na naxütawa tüxü nangëxmaxücèx i tachica i mexü i taguma gúxü, erü Ngechuchu ya Cristuarü duüxügü tixĩgü. ¹¹ Rü name nixĩ i guxüguma nüxü ticuèxüügü ya Tupana, erü nüma nixĩ i guxüärü äëxgacü yĩxü i guxüguma. Rü ngëmaãcü yĩ.

Pedru rü yema yaxögüxüxü narümoxë

¹² Taeneë ya Chiribánu ya meã yaxöcümaã petanüwa chanamu i ñaã nuxmarexü i popera na pexü chixucüxëgüxücèx rü pemaã nüxü chixuxücèx na ngëma pexü nangechaüxügü yĩxü ya Tupana i aixcüma pexü nangüxëëxü. Rü ñuxma na ngëmaãcü pexü nangechaüxü, rü name nixĩ i guxüguma naxcèx pemaxë. ¹³ Rü pexü narümoxëgü i guxüma i taeneëgü i yaxögüxü i pexrüü Tupana dexü i núma Dumawa ngëxmagüxü. Rü ngëxgumarüü ta pexü narümoxë i chorü ngüxëëruü i Marcu ya chaunerüü ixĩcü. ¹⁴ Rü chanaxwëxe i wüxichigü i pema rü pegü pengechaügüãcüma pegü perümoxëgü. Rü ngëxgumarüü ta chanaxwëxe na aixcüma petaãëgüxü i guxãma i pema na Ngechuchu ya Cristuarü duüxügü pixĩgüxü. Rü ngëmaãcü yĩ.

Rü nuãma pexna,
Pedru

NORÜ TAXRE GA POPERA GA PEDRU ÜMATÜXÜ

Pedru nüxü narümoxë ga yema yaxögüxü

¹ Pa Chaueneëgüx, choma i Chimáü i Pedru nixi i pexcëx chanaxümatüxü i ñaã popera. Rü choma rü Ngechuchu ya Cristuarü ngüxëëruü chixi, rü nüma nixi ga choxü namuxü na nüxü chixuxüçëx i norü ore. Rü pexcëx chanaxümatü i pema na toxrüü aixcüma peyaxögüxü, erü törü Tupana rü törü Maxëxëëruü ya Ngechuchu ya Cristu rü aixcüma nimexëchi. ² Rü ñuxma na Tanatü ya Tupanaxü pecuáxü rü törü Cori ya Ngechuchuxü pecuáxü, rü chanaxwëxe i nümagü aixcüma pemaã namecüma rü aixcüma pexü nataãëxëë.

Yaxögüxüçümagüchiga

³ Rü Tupana rü noxrütama poramaã marü tüxna nanaxã ga guxüma i ngëma nacüma i mexü i inaxwëxexü na aixcüma meã naxcëx imaxëxüçëx. Rü yemaãcü nanaxü ga yexguma tüxü nüxü nacuëxëëgu ga guma törü Cori ya mexëchicü ga norü poramaã tüxü decü. ⁴ Rü yematama norü poramaã tüxna nanaxã ga guxüma ga norü ngüxëë i mexëchixü ga inaxunetaxü na naxrüü pimexüçëx rü nüxna pixigachixüçëx i guxüma i chixexügü i duüxügüarü ngúchaü i chixexügagu ñoma i naãnewa ngëxmaxü. ⁵ Rü ngëmacëx penaxwëxegü na pegü peporaexëëxü na yexeracü peyaxögüxü rü meã togüpëxewa pemaxëxü. Rü ñuxuchi name na meãma nüxü pecuáxü na tacü yixü i Tupana pexü naxwëxexü. ⁶ Rü ngëxgumarüü ta penaxwëxegü na meã pegümaã ipecuáxü na tama chixexügu peyixüçëx. Rü ñuxüchi name na yaxna pegümaã pexinüëxü. Rü ngëxgumarüü ta name na aixcüma Tupanaxü pengechaügüxü. ⁷ Rü ñuxüchi penaxwëxegü na pegü pengechaügüxü ya guxãma i pemax. Rü ngëxgumarüü ta name na guxüma i duüxügüxü pengechaügüxü. ⁸ Rü ngëxguma aixcüma ngëma pexü chaxucuxëxüãcüma pemaxëgu, rü täütáma natüçëxma nixi i perü maxü, rü täütáma natüçëxma nixi na nüxü pecuáxü ya törü Cori ya Ngechuchu ya Cristu. ⁹ Natürü yixema tama ngëma pexü chaxucuxëxüãcüma maxüxë, rü ñoma tangexetüxürüü tixi. Rü ñoma wüxi i duüxü i tama nagu rüxünüxü i ngëma yixcüra tá nüxü ngupetüxürüü tixi, erü nüxü itayarüngüma na ñuxãcü Tupana tüxü nüxü ngechaüxü ga tümaãrü pecadugü. ¹⁰ Rü ngëmacëx, Pa Chaueneëgüx, name nixi na yexeraãcü meã Tupanacëx pemaxëxü na ngëmaãcü ipenawëxüçëx na aixcüma Tupanaãrü duüxügü ya pexcëx naçaxe rü pexü dexe na pixigüxü. Rü ngëxguma ngëmaãcü pemaxëgu rü tagutáma chixexügu peyi rü tagutáma Tupanaxü ípetëx. ¹¹ Rü ngëmaãcü ya Tupana, rü tá meã pexcëx nayawãxna i iãx na tauxchaãcü pichocuxüçëx i ngextá guxügutáma ãëxgacü iyixüüwa ya törü Cori ya Ngechuchu ya Cristu ya törü Maxëxëëruü. ¹² Rü ngëmacëx woo marü nüxü na pecuáxü rü nagu na pexixü i ngëma ore i aixcüma ixixü, natürü guxügutáma pexna nüxü chacuëxãchixëëëcha ga yema pexü namaã chaxucuxëxü. ¹³ Erü ñuxma na chamaxüxü i chomax, rü nagu charüxünü na namexü na pexna nüxü chacuëxãchixëëxü i ngëma ore i namaã pexü chixucuxëgüxü, na ngëmaãcü pexü changúxchaüxëëxüçëx na meã Tupanacëx pemaxëxü. ¹⁴ Rü pemaã nüxü chixu i ngëma, erü törü Cori ya Ngechuchu ya Cristu choxü nüxü nacuëxëë na paxa tá chayuxü. ¹⁵ Rü ñoma rü ta na chamaxüxü, rü meã pexü chixucuxëgü na ngëxguma chayuxguwena rü guxüguma nüxna pecuëxãchiexüçëx i ngëma chorü ucuxëgü na ñuxãcü Tupana naxwëxexü na pemaxëxü.

Pedru rü namücügü rü aixcüma Cristuxü nadaugü ga na ñuxãcü namexëchixü

¹⁶ Rü yexguma pexü tangüexëëgu na ñuxãcü naporaxü ya tórü Cori ya Ngechuchu ya Cristu rü ñuxãcü tá wena na nataeguxü, rü tama tomatama togüãëwa tayaxuxü i ore nixí. Yerü tomatama toxetümaã nüxü tadau na ñuxãcü namexëchixü i nüma ya tórü Cori. ¹⁷ Rü nüxü tadau ga yexguma Tanatü ya Tupana nüxü icuèxüügu. Rü nüxü taxĩnüë ga yexguma gumatama Tanatü ya Tupana ya Mexëchicü ñaxgu:

“Daa nixí ya Chaune ya nüxü changechaüxüchicü. Rü choma rü poraãcü namaã chataãëxüchi”,

ñaxgu. ¹⁸ Rü aixcüma tomaxüchima nüxü taxĩnüë ga yema Tupanaga ga daxüguxü ga naãnewa inaxüxü, yerü tomatama rü tórü Corimaã tayexmagü nawa ga guma mëxpúne ga üünene ga yexguma yema ngupetügu. ¹⁹ Rü yemaãcü nüxü tadau na aixcüma yíixü ga yema ore ga nuxcümaügüxü ga Tupanaãrü orearü uruügu nüxü ixugügüxü. Yerü yema nüxü yaxugügüxüürütama nixí ga nüxü tadauxü. Rü name nixí i pema rü ta aixcüma meã nagu perüxĩnüë i ngëma ore, erü wüxi i omü i íraxetüxü i eãnexüwa ibaxixüürü nixí. Rü ngëma ore rü tá pexü nüxü nacuèxëë i Tupanachiga ñuxmatáta ínangu ya tórü Cori ya Ngechuchu ya Cristu ya yima woramacuri ya ngunetüxü ngócürüü ixícü. Rü ngëxguma ínanguxgu i nüma rü aixcüma tá meã pexü nüxü nacuèxëë i guxüma i nachiga. ²⁰ Natürü chanaxwëxe na guxüãrü yexera nüxü pecuáxü i ñaã ore i tá pemaã nüxü chixuxü. Rü dücax, taxüema tüechamatama nüxü tacuèx i tacüchiga na yíixü i Tupanaãrü ore i ümatüxü, ega Tupanaãë i Üünexü tama tüxü rüngüxëëgu. ²¹ Yerü taxuüma ga Tupanaãrü orearü uruü rü nüechamatama nügüãëwa nanayaxu ga yema ore ga nüxü yaxugügüxü. Natürü yexguma yema orexü yaxugügügu, rü Naãë i Üünexü nixí ga yadexagüxëëxü.

2

Doramaã duüxügüxü ngúexëëxüchiga

¹ Natürü nuxcüma rü nayexma ta ga Tupanaãrü orearü uruügüneta ixígüxü ga Yudiügütanüwa. Rü ngëxgumarüü tá ta petanüwa nangëxma i duüxügü i ngüxëëruügüneta ixígüxü. Rü nümagü rü tá doramaã nanaxüchicüü i Tupanaãrü ore, rü ngëmaãcü tá pexü nangüexëë i ore i dora ixíxü na pexü nawomüxëëgüxücèx. Rü nümagü rü tãütáma naga naxĩnüëchaü ya yima tórü Cori ya Ngechuchu ya Cristu ya norü Maxëxëëruüchirëx ixícü. Rü ngëmagagu ya Tupana rü ngürüãchi tá nanapoxcue i ngëma duüxügü i ngëmaãcü maxëxü, rü tá inayanaxoxëë. ² Rü nümagü rü tá nüxü nixugü na tama wüxi i chixexü yíixü ega woo taxüneãrü ngúchaü ixüxgu. Rü muxüma i togü i duüxügü rü tá nawe narüxí i ngëma chixexü i naxügüxüwa. Rü ngëma chixri pexü ngúexëëxügagu rü muxüma i togü i duüxügü rü tá chixri nachiga nidexagü i Tupanaãrü ore i mexü i aixcüma ixíxü. ³ Rü nümagü i ngëma duüxügü i chixexü rü tá nügüna nananugüchaü i guxüma. Rü ngëmacèx tá pemaã nüxü nixu i ore i chixexü ixíxü na ngëmaãcü pexü nawomüxëëgüxücèx rü pexü ngíxü nayauxgüxücèx i perü díëru. Natürü tá napoxcue i ngëma duüxügü, rü tãütáma nibuxmü. Erü Tupana rü woetama nuxcümama nanamexëë i ngëma poxcu. ⁴ Yerü ga Tupana rü tama nüxü nüxü nangechaü ga norü orearü ngeruügü ga daxüçüãx ga pecadu ügüxü. Rü yemacèx ínaxëãnexüwa i ngoxogüxü ínapoxcuexüwa nanawogü. Rü cadenamaã nayanëixgü na ngëma nangëxmagüxücèx ñuxmatáta nawa nangu i ngëma ngunexü i nagu Tupana nüxna çaxü i guxüma i duüxügü. ⁵ Rü yexgumarüü ta ga Tupana rü tama nüxü nüxü nangechaü ga yema nuxcümaügüxü ga duüxügü ga chixexü

ügüxü. Rü yemacèx mucü ga taxüchicü naxcèx yéma nanamu na gumamaã nadaiãxücèx ga yema duüxügü ga chixexü ügüxü. Natürü ga Tupana rü Noexü nadau ga na meãma duüxügüxü yaxucuxëgüxü na nüxü naxoexücèx ga norü chixexügü. Rü yemacèx ga Tupana rü Noexü namaxëë namaã ga 7 ga natanüxügü. Natürü nanadai ga guxüma ga yema togü ga duüxügü. ⁶ Rü Tupana rü yexgumarüü ta inayanaxoxëë ga guma ãnegü ga Chodoma rü Gomora ga poraãcü chixri duüxügü nawa maxëne. Rü ínanagu ga guma ãnegü ñuxmata norü tanimacaxicatama íyaxü. Rü yemaãcü nanaxü na guma ãnegü rü wüxi ga cuèxruü na yíxücèx nüxü ga yema duüxügü ga chixexü ga yemawena maxëxü. ⁷ Natürü ga Chodomawa rü Tupana nanamaxëë ga Lox ga wüxi ga yatü ga mecü íxcü ga poraãcü ngechaücü ga yexguma nüxü nadèuxgu ga ñuxãcü chixri na namaxëxü ga yema duüxügü ga natanüwa nayexmaxü. ⁸ Rü guxü ga ngunexügu rü nüma ga Lox ga meã maxücü rü poraãcü naãëwa nangux ga yexguma nüxü nadèuxgu rü nüxü naxínügu ga yema chixexügü ga naxügüxü ga yema duüxügü ga natanüwa nayexmaxü. ⁹ Rü yema Loxü na namaxëëxürüü ga Tupana, rü nüxü natauxcha na tüxü ínanguxüxëëxü i ngëxguma Chataná tüxna ínügu ya yíxema meã maxëxë. Rü ngëxgumarüü ta ya yíxema chixexü ügüxe, rü nüxü natauxcha na poxcuwa tüxü nangëxmagüxëëxü ñuxmatáta nawa nangu i ngëma ngunexü i nagu guxüma i duüxügüxü yacagüxü. ¹⁰⁻¹¹ Rü Tupana rü aixcüma tá nanapoxcue i ngëma duüxügü i naxüneärü ngúchaügu íxü i tama naga ínüechaüxü ya tórü Cori. Rü ngëma duüxügü rü taxúegama naxínüechaü, rü nadauxcüraxüwëxegü rü nügüguxicatama narüxínüë. Rü tama namuüë na namaã naguxchigagüxü i ngëma ãëxgacügü i daxüçüãx i Tupanatüüwa ngëxmagüxü. Rü ngëmaãcü namaxë i ngëma duüxügü. Natürü woo Tupanaärü orearü ngeruügü i daxüçüãx i ngëma duüxügüxü rüyexeraxüchichiréxü, rü namuüë na ngëmaãcü namaã naguxchigagüxü i ngëma ãëxgacügü i daxüçüãx i Tupanatüüwa ngëxmagüxü. ¹²⁻¹³ Rü ngëma nguxëëruügüneta, rü ñoma naëxügürüü nixígü, rü naëxügürüü taxuüma nacuèxgü. Rü ngëma naxünegü naxwëxexü nixí i naxügüxü. Rü nabue na ñoma naëxügü i yayauxgüxü rü nadèixürüü yixígüxücèx. Rü chixri nachiga nidexagü i ngëma tama nüxü nacuèxgüxü. Natürü ngëma chixexü i naxügüxügagu tá inayarütauxe, rü ngëmaãcü ngúxü tá ningegü nagagu i ngëma ngúxü i toguãxü yangexëëgüxü. Rü nümagü rü namaã nataãëgü i ngëma chixexü i ngunecütama naxügüxü. Rü ngëxguma pemaã nachibüegu, rü wüxi i chixexüchixü rü ãnexüchi nixígü erü ngema rü ta nanaxügü i norü chixexügü i namaã pexü nawomüxëëgüchaüxü. ¹⁴ Rü ngëma duüxügü rü taxuacüma wüxi ya ngeãxü nadaugümare, erü naãëwa rü nagu narüxínüë na nüxü tangüchaüxü. Rü tama nüxü ninguéga na pecadu naxügüechaxü. Rü naxcèx nadaugü na ñuxãcü chixexügu tüxü nayixëëxü ya yíxema duüxëgü ya turaearü maxüãxgüxe. Rü nüxü nicuèxüchi na ñuxãcü tacü nügüna nanugüexü. Natürü Tupana rü marü namaã nanaxuegu na napoxcueãxü. ¹⁵ Rü ngëma duüxügü rü tama nagu naxí i ngëma Tupana nüxü naxwëxexü, rü ngëmacèx inayarütauxe. Rü nagu naxí ga yema chixexü ga nagu yaxüxü ga nuxcümaüxü ga Tupanaärü orearü uruü ga Baráü ga Beú nane ga chixexü üxü na yemaãcü díëru ngíxü nayaxuxücèx. ¹⁶ Rü noxrütama buru ga woo taguma idexachiréxcü, rü wüxi ga duüxürüü namaã iyadexa rü inanga naxcèx ga yema chixexü ga naxüxchaüxü. Rü yemaãcü Baráxü íyachaxãchixëë na tama naxüãxücèx ga yema chixexü ga naxüxchaüxü. ¹⁷ Rü ngëma duüxügü rü taxuwama nime ñoma wüxi i puchu i ngearü dexáãxürüü. Rü ñoma wüxi i caixanexü i buanecü ícuexürüümare nixí na taxuwama yamexü. Natürü Tupana rü marü nanamexëë i wüxi i nachica i ëanexüchixü

i ngextá guxūgutáma ínapoxcueāxūwa i ngēma duūxūgū. ¹⁸ Rū ngēmaācū tá nanapoxcue i ngēma duūxūgū, erū nūgū yacuèxūūgūācūma chixri nidexagū i ore i taxuwama mexūmaā. Rū tūxū nixucuxēgū na tūmaxūneārū ngúchaūgu na taxīūcèx ya yíxema marū ngexwacèx ngēmaxū rūxochiréxe. ¹⁹ Rū tūmamaā nūxū nixu rū ngēxguma nawe tarūxīxgu rū tá tūxū ínganguxūxēē na taxuūmēxēwa tangēxmagūxūcèx rū tūma tanaxwèxexūācūma tamaxēxūcèx. Natürü ngēma duūxūgū i ngēmaācū chixri idexagūxū, rū nūmagūtama rū norü chixexūtūūwa nangēxmagū. Erū guxūma i duūxūgū, rū ngēma nūxū rüyexeramaēxūtūūwa nūgū nangēxmagūxū. ²⁰ Rū guxāma ya yíxema marū tórü Cori ya Ngechuchu ya Cristu ya tórü Maxēxēēruūxū cuèxgūxe, rū marū nawa ítanguxū i ñoma i naāneārū chixexūgū. Natürü ngēxguma chi wenaxārū naxcèx tawoegugu i ngēma chixexū i nawa ítanguxūchiréxū, rū tūmaārū me yixīgu na wena ngēma chixexūtūūwa tangēxmagūxū, rū aixcūma noxriarū yexera tichixe. ²¹ Erū ngēxguma chi nūxū tacuèxgūguwena nūxū tarūxoegu i ngēma ore i mexū ga noxri tayauxgūxū, rū narūmemaē chi nixī ga noxtacūma tāū chima nūxū na tacuèxgūxū i ngēma maxū i aixcūma mexū. ²² Tupanaārū ore i úmatūxūwa rū ñanagürü:

“Ngēma airu i nūgū oxgūxū, rū wenaxārū naxcèx nataegu i norü oxū na yaweaxūcèx. Rū ngēma cuchi i norü yora meāma aiyachiréxū, rū ngēxgumatama wenaxārū norü aiyanecèx nataegu”, ñanagürü i ngēma orewa. Rū ngēxgumarūū nixī i ngēma duūxūgū i marū Tupanaārū orexū cuèxgūchiréxū rū ñuxūchi wenaxārū naxcèx woeguxū i norü chixexūgū ga noxri nawa ínganguxūchiréxū.

3

Tórü Coriarü taeguchiga

¹ Pa Chaueneēgū ya Pexū Changechaūgūxex, ñaā nixī i ngēma norü taxre i popera i pexcèx chaxūmatūxū. Rū yema nūxīraūxū ga poperawa pemaā nūxū chixuxūrūū, rū wena pexū chixucuxēgū rū pexna nūxū chacuèxāchixēē na aixcūma meā Tupanaārū oregu perūxīnūēxūcèx. ² Rū chanaxwèxe i nūxna pecuèxāchie i ngēma ore ga nuxcūmaūgūxū ga Tupanaārū orearü uruūgū ga ixūūnexū nūxū ixugūgūxū. Rū ngēxgumarūū ta chanaxwèxe i nūxna pecuèxāchie i ngēma tórü Cori ya Ngechuchu ya tórü Maxēxēēruūārū mugū ga pexū nangúexēēxū ga norü orearü uruūgū ga nūma pexūtawa namugūxū. ³⁻⁴ Natürü chanaxwèxe i guxūārū yexera nagu perūxīnūē i ñaā ore i pemaā tá nūxū chixuxū. Rū dūcax, rū ngēxguma nagúxchaūgu i ñoma i naāne, rū tá íngangūgū i duūxūgū i chixexū i nagu íxū i naxūneārū ngúchaūgū. Rū nūmagū rū tá nacugūēācūma ñanagürügū:

“Dūcèx, Cristu inaxuneta na wena núma naxūegaxū. ¿Rū tacū namaā nangupetü i ñuxma na tama ínganguxū? Rū marū dūxwa nayue ga tórü oxigū ga yaxōgūxū, natürü noxri naāne ūxgumama rū nanangēxgumaraūēchatama i guxūma”, ñanagürügū tá. ⁵⁻⁶ Natürü ngēma duūxūgū i ngēmaācū idexagūxū rū tama nūxū nacuèxgūchaū ga yema ngupetūxū ga yexguma Tupana ñoma ga naānewa namuāgu ga guma mucū ga tacū ga iyanaxoxēēcū ga guxūma ga tacū ga ñoma ga naānewa yexmaxū. Rū nuxcūmaxūchima naxūpa ga guma mucū rū woetama nayexma ga ñoma ga naāne rū guxūma i daxūwa nūxū idauxū ga Tupana ngoxēēxū ga yexguma namuāgu na nangóxūcèx. Rū yemaācū dexáchiūwa nangox ga ñoma ga naāne rū dexáarū ngāxūtūchiūwa nayexma, yerü yemaācū nanamu ga Tupana. ⁷ Natürü ngēma ñuxma ngēxmaxū i daxūwa nūxū idauxū rū ñoma i naāne rū Tupana namaā nanguxū na yixcama ūxūwa yaxaxūcèx, yerü yemaācū namaā nanaxuegu. Rū ngēma ñoma i naāne

rü ngēma daxūwa nüxū idauxū, rü yima üxü ya Tupana nüxū ixuxūnewa tá nixī i aixcūma ínaguāxū i ngēma ngunexū i nagu naxunetaxūgu na napoxcueāxū rü chixexūwa nawogüāxū i ngēma duūxūgü i tama naga ñnüēchaūxū. ⁸ Rü ñuxmax, Pa Chaueneēgü ya Pexū Changechaūgüxex, tama chanaxwèxe i nüxū ipeyarüngümaē na wūxitama i ngunexū rü tórü Coricèx rü 1000 ya taunecürüü yīxū. Rü ngēxgumarüü ta, 1000 ya taunecü rü tórü Coricèx rü wūxitama i ngunexürüü yīxū. ⁹ Rü ñuxre i duūxūgü rü nagu narüxīnūē na tāūtáma paxa ínanguxū ya tórü Cori yema tamaā inaxunetaxürüü. Natürü nüma ya tórü Cori rü tama nanuxcüāē na yanguxēēāxū i ngēma norü uneta, natürü nüma rü tamaā yaxna naxīnūmare. Erü nüma rü tama nanaxwèxe na texé iyarütaxuxū, natürü nanaxwèxe na guxāma nüxū rüxoexū i tümacūma i chixexū. ¹⁰ Natürü ngēma ngunexū i tórü Cori nagu ínguxū, rü taxúema nagu ínanguxēēxūgu tá nixī. Erü ngürüāchimare tá ínangu ñoma wūxi i ngītèxáxū ínguxürüü. Rü ñuxūchi guxūma i tacü i daxūguxū i naānewa ngēxmagūxū rü tá tagaācü niwāixgü rü ngēmaācü tá inayarütauxe. Rü yima üèxcü rü tauemacü rü woramacurigü rü ētagü rü tá nixae rü ngēxma tá nayarüxogü. Rü ngēxgumarüü tá ta i ñoma i naāne rü tá nixa namaā i guxūma i tacü i nawa ngēxmagūxū. ¹¹ Rü ñuxma na ngēmaācü tá namaā nangupetūxū i guxūma i tacü i ngēxmaxū, rü yexeraācü penaxwèxe na aixcūma Tupanapēxewa pixūünexū rü nüma nanaxwèxexūācüma na pemaxēxū. ¹² Rü name nixī i meā ípenanguxēē i ngēma ngunexū i nagu tá ínanguxū ya tórü Cori ya Tupana. ¡Rü paxa guxūwama nüxū pixu i norü ore rü aixcūma naxcèx pemaxē na ngēmaācü ípenanguxēēxúcèx! Rü ngēma ngunexūgu rü guxūma i daxūwa nüxū idauxū rü tá nixa rü tá inachaxichigü. Rü ñoma i naāne rü üèxcü rü tauemacü rü ētagü rü yima üxūmaā tá inachaxichigü. ¹³ Natürü yixema na yaxōgūxū rü ítananguxēē i ngēma ngexwacaxūxū i daxūguxū i naāne rü ngexwacaxūxū i ñoma i naāne ga Tupana tamaā ixunetaxū. Rü ngēma rü guxūtáma name, rü yixema rü tá ta aixcūma time. ¹⁴ Rü ngēmacèx, Pa Chaueneēgü ya Pexū Changechaūgüxex, rü ñuxma na ípenanguxēēxū i ngēma, rü name nixī i aixcūma meā pemaxē rü aixcūma pegü pengechaūgü na taxuwama nachixexúcèx i perü maxū rü aixcūma petaāēgūxúcèx i ngēxguma wena núma naxūxgu. ¹⁵ Rü name nixī i nüxna pecuèxāchie na yaxna tamaā naxīnūxū ya tórü Cori, erü nanaxwèxe na tüxū nangēxmaxū i tórü maxū i taguma gúxū. Rü ngēmatama pexcèx chanaxūmatūxürüü ta nixī ga pexcèx naxūmatūāxū ga taeneē ya nüxū ingechaūgücü ya Pauru ga yexguma Tupana naporaxēēācüma pexcèx naxūmatūāgu. ¹⁶ Rü guxūma ga norü poperawa rü ñaā pexcèx chaxūmatūxūchiga nanaxūmatü ga Pauru. Natürü yema pexcèx naxūmatūxūwa rü nangēxma i ñuxre i ore i guxchaxū na nüxū icuáxū na tacüchiga yīxū. Rü ngēma duūxūgü i tama aixcūma Tupanaxū cuèxgūxū rü tama aixcūma yaxōgūxū, rü nanaxūchicüügü i ngēma ore ngēxgumarüü na guxūma i Tupanaārü ore i umatūxū naxūchicüügūxürüü. Natürü ngēma chixexū na naxūgūxūgagu rü nügü tátama inayarütauxexē. ¹⁷ Rü ngēmacèx, Pa Chaueneēgü ya Pexū Changechaūgüxex, rü ñuxma na nüxū pecuáxū i tacü tá na ngupetūxū, rü name nixī i pexuāēgü na tama pexū nawomüxēēgūxúcèx i ngēma chixexū i duūxūgü rü tama nüxū perüxoexúcèx na meā peyaxōgūxū. ¹⁸ Rü ngēmacèx, Pa Chaueneēgüx, penaxwèxe na pegü peporaexēēxū na wūxichigü i ngunexū yexeraācü tórü Cori ya Ngechuchu ya Cristu ya tórü Maxēēeruūxū pecuáxúcèx rü yexeraācü nüxū picuáetanūxúcèx na ñuxācü aixcūma pexū nangechaūxū. ¡Rü ngēmacèx rü guxūgutáma rü ngīxā nüxū ticuèxūügu! Rü ngēmaācü yī.

Rü nuāma pexna,

Pedru

NÜXĨRAÜXÜ GA POPERA GA CUÁÛ ÜMATÜXÜ

Ore i tüxü maxëëxüchiga

¹ Pexcèx tanaxümatü nachiga ya Tupana Nane ya Cristu ya yima woetama marü nüxıra yexmacü ga yexguma noxritama tauta naãne üxgu. Rü nüma rü Ore i Maxëëëruü nixĩ i naega erü nüma nixĩ i tamaã nüxü yaxuxü i Tupanachiga rü tüxü namaxëëëxü. Rü toma ga norü ngúexügü na tixüxü, rü nüxü taxĩnüë rü toxtëmaã nüxü tadaugü rü tomëxmaã nüxü tingögügü. ² Rü yima Maxëëëruü ya Cristu rü toxü nügü nawëx. Rü nüxü tadaugü rü duüxügümaã nüxü tixu na ñuxäcü yixü. Rü ñuxma rü pemaã rü ta nüxü tixuchiga ya yima Cristu ya tüxna naxäcü i maxü i taguma gúxü. Rü noxri rü Nanatüxütawa nayexma, natürü ñoma ga naãnewa nangu rü toxcèx nangox. ³ Rü yema toma nüxü tadaugüxü rü nüxü taxĩnüëxü rü pemaã nüxü tixu na tomücügü pixüxüxü, ngëxgumarüü i toma na Tanatü ya Tupana rü Nane ya Ngechuchu ya Cristumücügü tixüxü. ⁴ Rü ngëmacèx pexcèx tanaxümatü i ñaã ore na wüxigu aixcümäxüchi itaãëgüxüxü.

Ñoma ngóonexürüü name ya Tupana

⁵ Rü ñaã nixĩ ga ore ga tomaã nüxü yaxuxü ga Ngechuchu ya Cristu. Rü pemaã nüxü tixu na ñoma ngóonexürüü namexü ya Tupana, rü nawa rü nataxuma i chixexü i ñoma ëänexürüü ixixü, rü bai i íraxü. ⁶ Rü ngëxguma chi: “Tanatü ya Tupanamücügü tixügü”, ñagügu, natürü chixri imaxëgu, rü tidoraemare erü tama aixcüma meã tamaxë. ⁷ Rü ngëxguma chi Tupanarüü ngóonexüwa imaxëgu, rü yigümücügü tixügü i yixema, rü Tupana Nane ya Ngechuchu rü nagümaã tüxü inayanatauxëë i guxüma i tórü chixexü. ⁸ Ngëxguma chi nüxü ixuxgu rü: “Changearü pecaduãx”, ñagügu, rü yigütama tawomüxëë, rü tidoraemare. ⁹ Natürü ngëxguma chi Tupanamaã nüxü ixuxgu i tórü pecadugü, rü nüma tüxü nüxü nangechaü rü tüxü inayanatauxëë i guxüma i tórü chixexü, erü nüma rü mecü nixĩ rü taguma tüxü nawomüxëë. ¹⁰ Natürü ngëxguma chi: “Tangearü pecaduãxgü”, ñagügu, rü doratèx nüxü tawogü ya Tupana rü tama aixcüma tawa nangëxma i norü ore.

2

Cristu rü tórü chogürüü nixĩ

¹ Pa Chauxacügüx, pexcèx chanaxümatü i ñaã ore na tama chixexü pexügüxüxü. Natürü ngëxguma chi wüxie chixexü üxgu, rü nangëxma ya tümaëtüwa chogücü nüxna ya Tanatü ya Tupana na tama tüxü napoxcuxüxü. Rü yima nixĩ ya Ngechuchu ya Cristu ya aixcüma mecü ixücü. ² Rü guma Ngechuchu ya Cristu rü nügü inaxã rü nayu na naxütanüãxüxü ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³ Rü ngëxguma chi naga ixĩnüëgu i ngëma tüxü namuxü ya Tupana, rü nüxü tacuèx na aixcüma nüxü icuáxü. ⁴ Rü ngëxguma chi wüxie:

“Choma rü Tupanaxü chacuèx”, ñagügu, natürü tama naga taxĩnügu i ngëma tüxü namuxü ya Tupana, rü wüxi i doratëxáxü tixü. ⁵ Natürü yixema naga ñnüxë i ngëma tüxü namuxü ya Tupana, rü aixcümäxüchi Tupanaxü tangechaü. Rü ngëmawa nüxü tacuèxgü na aixcüma Tupanaärü duüxügü ixüxü. ⁶ Rü yixema:

“Tupanaârü duũxũ chixĩ”, ñagũxe, rü name nixĩ na meã tamaxũxũ yema Ngechuchu ya Cristu meã maxũxũrũ.

Tupanaârü mu i ngexwacaxũxũchiga

⁷ Pa Chaueneëgũx, tama wüxi i ngexwacaxũxũ i Tupanaârü mu nixĩ i pexcèx chaxümatũxũ. Natürü ñaãtama noxriarü ügügumama pexũ yexmaxũ ga mu nixĩ. Rü ñaãtama nixĩ i Tupanaârü mu ga nuxcũmaũxũ ga marü nüxũ pexĩnüëxũ. ⁸ Natürü ñaã Tupanaârü mu i pexcèx chaxümatũxũ rü guxüguma nangexwacaxũ. Rü ngëxguma naga pexĩnüëgu i ñaã Tupanaârü mu na pegü pengechaũgũxũ, rü tama ëãnexũwatama pemaxë, natürü Cristurũ ngëma ngóonexũ i aixcũma ixĩxũwa pengëxmagü. ⁹ Rü ngëxguma chi wüxie:

“Choma rü ngëma ngóonexũwa changëxma”, ñagũgu, natürü tũmaëneëchi taxaixgu, rü ëãnexũwatama tangëxma. ¹⁰ Yixema tũmaëneëxũ ngechaũxë rü ngóonexũwa tamaxũ, rü taxucèxma tũxcüũ pecadu taxü. ¹¹ Natürü yixema tũmaëneëchi aixe, rü ëãnexũwatama tamaxũ, rü ëãnexũgu tixü. Rü tama nüxũ tacuèx na ngextá taxũxũ, erü tũmacèx naxëãne. ¹² Pa Chauxacügũx, pexcèx chanaxümatü erü Cristugagu Tupana marü pexũ nüxũ nangechaũ i perü pecadugü. ¹³ Pa Papágũx, pexcèx chanaxümatü i ñaã ore erü nüxũ pecuëxgü ya Tanatü ya Tupana ga noxriarü ügügumama yexmacü. Pa Ngextüxcügũx, pexcèx chanaxümatü erü marü nüxũ perüyexera i ngëma ngoxo i Chataná i chixexũârü üruũ. ¹⁴ Pa Buxügũx, pexcèx chanaxümatü erü marü nüxũ pecuëxgü ya Tanatü ya Tupana. Pa Papágũx, pexcèx chanaxümatü erü marü nüxũ pecuëxgü ya Tanatü ya Tupana ga noxriarü ügügumama yexmacü. Pa Ngextüxcügũx, pexcèx chanaxümatü erü peporae, rü guxüguma peãëwa nangëxma i Tupanaârü ore, rü marü nüxũ perüyexera i ngëma ngoxo i Chataná i chixexũârü üruũ. ¹⁵ ¡Tãxũ i pexũ nangúchaũxũ i ñoma i naãne rü norü ngëmaxügü! Ngëxguma chi texéaxũ nangúchaũgu i ñoma i naãne rü tama Tanatü ya Tupanaxũ tangechaũ. ¹⁶ Erü guxũma i ngúchaũgü i ñoma i naãnewa ngëxmaxũ rü ñoma i naãneârütama nixĩ rü tama Tupanaârü nixĩ. Rü ngëma ngúchaũgü rü ngëma nixĩ i taxüneârü ngúchaũgü, rü taxetüarü ngúchaũgü, rü yigü na icuëxüügũxũ tórü ngëmaxügümaã. ¹⁷ Natürü ñoma i naãne rü guxũma i ngúchaũgü i nawa ngëxmaxũ rü tá nagux. Natürü yixema Tupanaga ñnüxë rü guxũgutáma tamaxũ.

Ore i aixcũma ixĩxũchiga rü ore i dora ixĩxũchiga

¹⁸ Pa Chauxacügũx, paxa tá nagux i ñoma i naãne. Pema rü marü nüxũ pexĩnüchiga rü tá ñangu i wüxi i Cristuarü uwanü, natürü marü ñangugü i muxũma. Rü ngëmawa nüxũ tacuèx na marü nagúxchaũxũ i ñoma i naãne. ¹⁹ Rü ngëma Cristuarü uwanügü rü tatanüwatama nangëxmagüchirëx, natürü tama aixcũma tatanüxũ nixĩgü, erü ngëxguma chi tatanüxũ yixĩgügu rü tatanügu chitama narücho. Natürü marü tatanüwa ñnachoũ na meãma nüxũ icuáxüçèx na tama aixcũma tatanüxũ yixĩgũxũ. ²⁰ Natürü pema rü Cristu marü pexna nanamu i Naãe i Üünexũ, rü ngëmacèx meãma nüxũ pecuèx i Tupanaârü ore. ²¹ Rü ñüxma rü tama nixĩ na tama nüxũ pecuáxüçèx na pexcèx chaxümatũxũ. Natürü pexcèx chanaxümatü erü marü meãma nüxũ pecuèx i ngëma ore i aixcũma ixĩxũ. Rü nüxũ pecuèx rü ngëma ore i aixcũma ixĩxũwa rü nataxuma i dora. ²² ¿Texé tiixũ ya yixema idoratëxáxe? Yixema:

“Ngechuchu rü tama aixcũma Cristu ya Tupana Nane nixĩ”, ñagũxe, tixĩ ya idoratëxáxe. Yixema tixĩ ya Cristuarü uwanü, erü tama nüxũ tacuáxchaũ ya Tanatü ya Tupana rü Nane ya Ngechuchu. ²³ Guxãma ya yixema tama nüxũ cuáxchaũxë ya Tupana Nane ya Ngechuchu, rü tama nüxũ tacuáxchaũ ta ya Tanatü ya Tupana. Natürü yixema Ngechuchuaxũ yaxõxë, rü Tanatü

ya Tupanaãxũ rü ta tayaxõ. ²⁴ Rü ngẽmacèx name nixĩ i peyaxõgüama i ngẽma ore ga noxri nüxũ pexĩnüëxũ. Rü ngẽxguma peyaxõgüamagu i ngẽma ore ga noxri nüxũ pexĩnüëxũ, rü aixcüma norü duũxũgü pixĩgü ya Tanatü ya Tupana rü Nane ya Ngechuchu. ²⁵ Rü nümatama ya Ngechuchu ya Cristu nixĩ i tamaã inaxunetaxũ na tüxna naxããxüçèx i maxũ i taguma gúxũ. ²⁶ Nangẽxma i duũxũgü i chixexüwa pexũ gagüchaũxũ. Rü ngẽmachiga nixĩ i pexcèx chanaxümatüxũ i ñãã ore. ²⁷ Natürü pema rü marü Cristu pexna nanamu i Naã i Üünexũ, rü guxũguma pewa nangẽxma. Rü ngẽmacèx tama penaxwèxe i to i perü ngúexẽëxũ erü nümatama i Naã i Üünexũ rü pexũ nangúexẽë i guxũma. Rü norü nguxẽëtae rü aixcüma nixĩ rü tama dora nixĩ. Rü ngẽmacèx name nixĩ na guxũguma Cristuaxũ peyaxõgüxũ, ngẽma Naã i Üünexũ pexũ ngúexẽëxũãcüma. ²⁸ Rü ñuxmax, Pa Chauxacügüx, rü name nixĩ na meãma Cristuaxũ peyaxõgüxũ na tama nüxũ imuũëxüçèx, rü tama ixãneëxüçèx napëxewa i ngẽxguma wena nuã naxũxgu. ²⁹ Pema nüxũ pecuèx na Cristu rü aixcüma mecü yĩxũ. Rü ngẽxgumarüü ta name nixĩ na nüxũ pecuáxũ na guxũma i duũxũgü i mexũ ügüxũ rü Tupanaxãcügü na yixĩgüxũ.

3

Tupanaxãcügüchiga

¹ ¡Dücèx, Pa Chaueneëgüx, ñuxãcü poraãcü tüxũ nangechaũ ya Tanatü ya Tupana! Rü ngẽmacèx nixĩ i naxãcügümaã tüxũ naxuxũ i nümax. Rü aixcüma naxãcügü tixĩgü. Rü ngẽmacèx ñoma i naãnecüãx i duũxũgü rü tama tüxũ nacuáxchaũ erü Tupanaxũ rü ta tama nacuáxchaũgü. ² Pa Chaueneëgü ya Pexũ Changechaũgüxe, ñuxma rü marü Tupanaxãcügü tixĩgü woo tama tüxũ nüxũ nacuèxëë na ñuxãcü tá ixĩgüxũ i yixcüra. Natürü nüxũ tacuèxgü na Ngechuchurüü tá ixĩgüxũ i ngẽxguma nangoxgu, erü tá nüxũ tadaugü na ñuxãcü yĩxũ i nümax. ³ Rü guxãma ya yíxema yaxõxè na Ngechuchurüü tá tiixũ, rü tügüna tadau na Ngechuchu ya Cristurüü aixcüma Tupanapëxewa tamexũ. ⁴ Natürü guxãma ya yíxema pecadu üxe, rü Tupanamaã chixexũ taxü. Erü ngẽxguma tama Tupanaga taxĩnügu, rü tapecaduãx. ⁵ Pema nüxũ pecuèx rü Ngechuchu ya Cristu rü ñoma ga naãnewa naxũ na iyanaxoxëëãxüçèx i tórü pecadugü. Rü nüma rü taguma pecadu naxü. ⁶ Rü ngẽmacèx guxãma ya yíxema aixcüma nüxũ yaxõgüxe, rü tama pecadu taxügüecha. Natürü guxãma ya yíxema pecadu üechaxe, rü ngẽmaãcü tamaxè erü taguma Cristuxũ tadau, rü taguma nüxũ tacuèx. ⁷ Pa Chauxacügüx, ¡täxũ i naga pexĩnüëxũ i ngẽma duũxũgü i pexũ iyarütauxexëëchaũxũ! Yíxema mexũ úxe rü aixcüma mecü tixĩ, ngẽxgumarüü ya Cristu na aixcüma mecü yĩxürüü. ⁸ Natürü yíxema pecadu üechaxe rü ngẽmawa tüxũ tacuèx na Chatanáãrü duũxũ tiixũ, erü nüma i Chataná rü noxriarü ügügumama pecadu naxüecha. Rü yemacèx ga Tupana Nane rü ñoma ga naãnewa naxũ na iyanaxoxëëãxüçèx ga yema Chataná üxũ. ⁹ Rü yíxema Tupanaxãcü ixĩxè rü tama pecadu taxüecha, erü naxãcüxüchi tixĩ. Rü taxuacüma pecadu taxüecha erü Tupana nixĩ ya tümanatü. ¹⁰ Yíxema chixexũ úxe rü tümaëneëchi aixè, rü tama Tupanaxãcü tixĩ. Rü ngẽmawa nüxũ tacuèx na texé tixĩgüxũ ya Tupanaxãcügü rü texé tixĩgüxũ ya Chatanáãcügü.

Name nixĩ na yigü ingechaũgüxũ

¹¹ Rü yexguma noxritama pexũ tangúexëëgu, rü pemaã nüxũ tixu na guxãma yigü ingechaxũgüxũ. ¹² Rü tama tanaxwèxe na Caĩrüü ngoxo i Chatanáãcü ixĩgüxũ. Yerü nüma rü naëneëxũ nimèx. ¿Rü tacüçèx nixĩ ga yamáãxũ? Nayamèx yerü yema nüma naxüxũ rü tama name, rü yema naëneë üxũ rü name. ¹³ Pa Chaueneëgüx, ¡täxũ i pebaixãchiãëgüxũ ega

pexchi naxaiegu i ñoma i naãnecũãx i duũxũgũ! ¹⁴ Yixema rü marü nüxna itanguxũ i ngẽma yu rü ñuxma rü marü maxũwaama tangẽxmagũ. Nũxũ tacuèxgũ i ngẽma erü nüxũ tangechaũgũ i taeneẽgũ. Yixema tama tũmaẽneẽxũ ngechaũxẽ rü yuwatama tangẽxma. ¹⁵ Rũ yixema tũmaẽneẽchi aixe rü wũxi i máẽtaxũrũ tixĩ. Rũ pema nüxũ pecuèxgũ i wũxi i máẽtaxũ rü nüxũ nataxuma i norü maxũ i taguma gũxũ. ¹⁶ Rũ Ngechuchu ya Cristu rü tórü pecaducèx nayu, rü yemaãcü tüxũ nüxũ nadauxẽ i ngẽma ngechaũ i aixcũma ixĩxũ. Rũ ngẽxgumarũ ta i yixema, rü tanaxwèxe na ímemarexũ na nüxũ rüngũxẽẽxũ i taeneẽgũ woo ngemagu iyuxgu. ¹⁷ Natürü ngẽxguma chi wũxi i yatũãxũ nangẽxmagu i muxũma i norü ngẽmaxũgũ, rü chi nüxũ nadèuxgu i namücü na nüxũ nataxuxũ, rü taxuacũma:

“Choma rü Tupanaxũ changechaũ”, ñanagürü, ega tama nüxũ nangũxẽẽgu i namücü. ¹⁸ Pa Chauxacũgũx, tama name i taèxmaã rü tórü oremaãxĩcatama nüxũ tangechaũ i taeneẽ. Natürü tanaxwèxe i tórü maxũmaã rü tórü ü i mexũmaã nüxũ tangechaũ.

Tama taxãneẽ na Tupanana ingaicamagũxũ

¹⁹⁻²⁰ Rũ ngẽxguma aixcũma yigũ ingechaũgũgu, rü nüxũ tacuèx na aixcũma naga ixĩnũxũ i ngẽma ore i aixcũma ixĩxũ, rü Tupanapẽxewa rü aixcũma naxãcũgũ ixĩgũxũ, woo ngẽxguma taãẽwa nagu rüxĩnũgu rü:

“Tama Tupanaxãcü chixĩ”, ñagũgu. Erü nüxũ tacuèx rü Tupana nixĩ i taãẽãrũ yexera, rü nüma nüxũ nacuèx i guxũma. ²¹ Pa Chaueneẽgũ ya Pexũ Changechaũgũxex, ngẽxguma taãẽwa nüxũ icuèxgu na Tupanaxãcüxũchi ixĩgũxũ, rü tama taxãneẽ na nüxna ingaicamagũxũ ya Tanatü ya Tupana. ²² Rũ nüma tá tüxna nanaxã i guxũma i tacü i naxcèx íçaxũ erü naga taxĩnũ i ngẽma tüxũ namuxũ rü tanaxü i ngẽma nüma namaã nataãẽxũ. ²³ Rũ nüma tüxũ namu na Nane ya Ngechuchu ya Cristuaxũ yaxõgũxũ rü yigũ ingechaũgũxũ, yema nüma tüxũ namuxũãcü. ²⁴ Rũ yixema naga ñnũxẽ i ngẽma Tupana tüxũ muxũ, rü aixcũma Tupanaãrũ duũxũgũ tixĩgũ rü nüma ya Tupana rü aixcũma tũmawa namaxũ. Rũ ñuxma rü nüxũ tacuèx na aixcũma Tupanaãrũ duũxũgũ ixĩgũxũ rü tawa namaxũxũ, erü Naãe i Üünexũ ga tüxna namuxũ tüxũ nüxũ nacuèxẽẽ.

4

Yixema tüxũ nangẽxmaxẽ i Tupanaãe i Üünexũ rü yixema tüxũ nangẽxmaxẽ i Cristuarü uwanüãe

¹ Pa Chaueneẽgũ ya Pexũ Changechaũgũxex, jTãxũ i nüxũ peyaxõgũxũ i guxũma i orearü uruũgũ i nügũ ixugũgũxũ na aixcũma Tupanaãrũ orearü uruũgũ yixĩgũxũ! Natürü name nixĩ i penangugũ i norü ore na nüxũ pecuáxũcèx ngoxita aixcũma Tupanaãe yĩxũ i nawa idexaxũ rü õxna tama. Erü ñoma i naãnewa rü guxũwama nangẽxma i muxũma i idorateèxgũxũ i nügũ ixugũxũ na Tupanaãrũ orearü uruũgũ yixĩgũxũ. ² Rũ tá pemaã nüxũ chixu na ñuxãcü tá nüxũ pecuáxũ na texé tĩxũ ya yixema aixcũma Tupanaãe tũmawa ngẽxmaxẽ. Rũ dúcax, guxũma i orearü uruũgũ i nüxũ ixugũxũ na Tupana duũxũxũ yaxĩxẽẽxũ ya Ngechuchu ya Cristu, rü ngẽma nixĩ i aixcũma Tupanaãe nawa idexaxũ. ³ Natürü guxũma i ngẽma orearü uruũgũ i tama nüxũ ixugũxũ na Tupana duũxũxũ yaxĩxẽẽxũ ga Ngechuchu, rü ngẽma rü tama nüxũ nangẽxma i Tupanaãe i Üünexũ. Natürü Cristuarü uwanüãe nixĩ i nawa ngẽxmaxũ. Marü nüxũ pexĩnũe na ínanguxchaũxũ i Cristuarü uwanü, natürü ñuxma rü marü ñoma i naãnewa nangẽxma. ⁴ Pa Chauxacũgũx, pema rü Tupanaxãcũgũ pixĩgũ. Rũ marü nüxũ perüyexera i ngẽma tama aixcũma Tupanaãrũ orearü uruũgũ ixĩgũxũ. Erü ngẽma Tupanaãe i Üünexũ

i peãewa ngẽxmaxũ rü nüxũ narüyexera i ngẽma Cristuarü uwanüãẽ i ñoma i naãnecũãxgüwa ngẽxmaxũ. ⁵ Rü nüma i Cristuarü uwanüãrũ duũxũgü rü ñoma i naãnecũãxgü nixĩ. Rü ngẽmacèx ñoma i naãnechigagu nidexagü. Rü ñoma i naãnecũãx i duũxũgü rü nüxũ inarüxĩnũ. ⁶ Natürü i yixema rü Tupanaxãcügü tixĩgü. Rü yixema Tupanaxũ cuáxe rü tüxũ itarüxĩnũ. Natürü yixema tama Tupanaxũ cuáxe rü tama tüxũ itarüxĩnũ. Rü ngẽmawa nüxũ tacuèxgü na texé tixĩgüxũ ya aixcüma Tupanaãrũ duũxũgü ixĩgüxe rü texé tixĩgüxũ ya Cristuarü uwanüãrũ duũxũgü ixĩgüxe.

Tupana tüxũ nangechaũ

⁷ Pa Chaueneëgü ya Pexũ Changechaũgüxex, name nixĩ na yigü ingechaũgüxũ, erü Tupana nixĩ ya tüxũ ngúexëcũ na yigü ingechaũgüxũ. Rü guxãma ya yixema tümaëneëxũ ngechaũxẽ rü Tupanaxãcũ tixĩgü rü Tupanaxũ tacuèx. ⁸ Yixema tama tümaëneëxũ ngechaũxẽ rü tama Tupanaxũ tacuèx, erü Tupana nixĩ ya tüxũ ngúexëcũ na yigü ingechaũgüxũ. ⁹ Tupana rü ñoma ga naãnewa nanamu ga Nane ya nügümaã wüxicacü na yimagagu tüxũ nangẽxmaxüçèx i maxũ i taguma gúxũ. Rü yemawa Tupana tüxũ nüxũ nadauxëẽ na ñuxãcũ tüxũ nangechaũxũ. ¹⁰ Rü woo Tupanaxũ tangechaũgü, natürü ngẽma ngechaũ i guxũãrũ yexera ixĩxũ nixĩ na nüma tüxũ nangechaũxũ rü ñoma ga naãnewa na namuãxũ ga Nane na taxcèx nayuxüçèx rü naxütanüãxüçèx ga tórü pecadugü. ¹¹ Pa Chaueneëgü ya Pexũ Changechaũgüxex, yexguma yemaãcũ tüxũ nangechaũgu ga Tupana, rü ngẽmacèx name nixĩ i yixema rü ta yigü tangechaũgü. ¹² Taguma texé Tupanaxũ tadau. Natürü ngẽxguma aixcüma yigü ingechaũgügu, rü Tupana rü tawa namaxũ rü norü ngechaũ rü aixcümaxũchi tórü maxũwa nangox. ¹³ Rü nüma rü marü tüxna nanamu ga Naãẽ i Üünexũ. Rü ngẽmawa nüxũ tacuèx na aixcüma norü duũxũgü ixĩgüxũ rü nüma rü tawa na namaxũxũ. ¹⁴ Rü tomatama nüxũ tadaugü rü nüxũ tixuchigagü na Tanatü ya Tupana núma namuxũ ga Nane na guxũma i duũxũgüxũ namaxëxëxüçèx. ¹⁵ Rü yixema yaxõxẽ rü nüxũ ixuchigaxe na Tupana Nane yĩxũ ya Ngechuchu, rü aixcüma Tupanaãrũ duũxũ tixĩ, rü Tupana rü tümawa namaxũ. ¹⁶ Rü yixema nüxũ tacuèxgü rü tayaxõgü na Tupana rü poraãcũ tüxũ nangechaũxũ, erü nüma nixĩ i aixcüma guxãxũ nangechaũxũ. Rü yixema aixcüma tümaëneëxũ ngechaũxẽ, rü Tupanaãrũ duũxũ tixĩ, rü nüma ya Tupana rü aixcüma tümawa namaxũ. ¹⁷ Rü ngẽxguma aixcüma Tupanaxũ ingechaũgügu, rü tórü maxũwa nangox i ngẽma, rü täütãma nüxũ tamuüẽ i ngẽma ngunexũ i nagu tüxũ yacagüxügu naxcèx i tórü maxũ. Erü woo ñoma i naãnewa tangẽxmagü, natürü napëxewa rü Cristurũ tixĩgü. ¹⁸ Rü ngẽxguma aixcüma Tupanaxũ ingechaũgügu, rü nüxũ tacuèx na täütãma tüxũ napoxcuexũ, rü ngẽmacèx taxucèxma nüxũ tamuüẽ. Natürü ngẽxguma chi nüxũ imuüëgu, rü nüxũ tacuèx na tama aixcüma nüxũ ingechaũgüxũ. ¹⁹ Rü yixema rü Tupanaxũ tangechaũgü, yerü nüxĩra tüxũ nangechaũ ga nümax. ²⁰ Ngẽxguma chí texé:

“Choma rü Tupanaxũ changechaũ”, ñagügu, natürü tümaëneëchi taxaixgu, rü tidora. Erü ngẽxguma tama nüxũ tangechaũgu i tümaëneë i nüxũ tadauxũ çrü ñuxücürüwa tá nüxũ tangechaũ ya Tupana ya tama nüxũ tadaucü? ²¹ Rü Ngechuchu ya Cristu tüxũ namu rü ñanagürü:

“Yixema Tupanaxũ ngechaũxẽ, rü name nixĩ na tümaëneëxũ rü ta tangechaũxũ”, ñanagürü.

5

Nüxü tarüyexera i ñoma i naãneãrü ngúchaũgü

¹ Ngechuchu rü Tupana Nane ya Cristu nixĩ. Rü guxãma ya yíxema nüxü yaxõxê, rü Tupanaxãcü tixĩgü. Rü yíxema Tanatü ya Tupanaxü ngechaũxê, rü nüxü tangechaũ ta i guxüma i naxãcügü. ² Rü ngëxguma Tupanaxü ingechaũgügu rü naxüxgu i ngëma nüma tüxü namuxü, rü nüxü tacuèx na aixcüma nüxü ingechaũgüxü i ngëma naxãcügü ixĩgüxü. ³ Rü ngëxguma aixcüma Tupanaxü ingechaũgügu rü naga taxĩnüê i ngëma tüxü namuxü. Rü ngëma tüxü namuxü rü tama naguxcha na naga ixĩnüêxü. ⁴ Erü guxãma ya aixcüma Tupanaxãcü ixixê, rü tama ñoma i naãneãrü ngúchaũ i chixexügu tarüxĩnü. Rü yíxema rü tayaxõgü, rü ngëmacèx tama name i ñoma i naãneãrü ngúchaũ i chixexügu tarüxĩnüê. ⁵ Rü yíxema yaxõxê na Tupana Nane yĩxü ya Ngechuchu, rü yíxema tixĩ ya tama ñoma i naãneãrü ngúchaũ i chixexügu rüxĩnüê.

Ore i Tupana Nanechiga

⁶ Rü nüxü tacuèx na aixcüma Tupana Nane yĩxü ya Ngechuchu. Yerü yexguma ñoma ga naãnewa nayexmagu rü dexáwa ínabaiegu, rü nümatama ga Tupana nüxü nixu na Nanexüchi yĩxü. Rü yexguma curuchagu nayüxgu rü nagü inabaãgu ga Ngechuchu, rü Tupana rü wenaxãrü inanawêx na aixcüma Nane na yĩxü. Rü ngëxgumarüü ta i ngëma Naãê i Üünexü i taguma idoraxü, rü tüxü nüxü nacuèxêê na aixcümaxüchi Tupana Nane na yĩxü. ⁷ Rü ngëmaãcü tüxü nangëxma i tomaëxpüx i cuèxruũgü i tüxü nüxü cuèxêêxü na aixcüma Tupana Nane yĩxü ya Ngechuchu. ⁸ Rü ngëma norü wüxi nixĩ i Naãê i Üünexü, rü ngëma norü taxre nixĩ ga yema Tupanaga ga yexguma Ngechuchu dexáwa íbaiegu, rü ngëma norü tomaëxpüx nixĩ ga yema Tupana üxü ga yexguma curuchagu nagü inabaãgu ga Ngechuchu. Rü guxüma i ngëma tomaëxpüx, rü wüxigu nüxü nixu na aixcüma Tupana Nane yĩxü ya Ngechuchu. ⁹ Nüxü tayaxõgü i duüxügu ega tacüxü tamaã yaxugügu. Natürü Tupanaãrü ore nixĩ i yexeraãcü aixcümaxüchi ixixü. Rü Tupana nixĩ ya tamaã nüxü ixucü na Ngechuchu rü Nane yĩxü. ¹⁰ Rü yíxema nüxü yaxõxê ya Tupana Nane rü nüxü tacuèx na aixcüma yĩxü i ngëma ore i Tupana nüxü ixuxü i Nanechiga. Natürü yíxema tama Tupanaãxü yaxõxê rü doratèèx nüxü tawogü ya Tupana erü tama tayaxõ i ngëma ore i Tupana nüxü ixuxü i Nanechiga. ¹¹ Rü ñaã nixĩ i norü ore ya Tupana i tamaã nüxü yaxuxü, rü ñanagürü:

“Chomatama marü pexna chanaxã i maxü i taguma gúxü. Rü ñaã maxü rü Chaunegagu pexü nangëxma”,
ñanagürü. ¹² Yíxema nüxü yaxõxê ya Tupana Nane rü tüxü nangëxma i ngëma maxü i taguma gúxü. Natürü yíxema tama nüxü yaxõxê ya yima Tupana Nane rü tama tüxü nangëxma i ngëma maxü.

Cuáũ rü ñuxre ga norü ucuxëmaã inayacuèxêê ga norü popera

¹³ Pa Chaueneëgüx ya Tupana Naneãxü Yaxõgüxex, pexcèx chanaxümatü i ñaã ore na nüxü pecuáxücèx na pexü nangëxmaxü i ngëma maxü i taguma gúxü. ¹⁴ Rü ngëmacèx tama taxãneê na nüxna ingaicamagüxü ya Tupana. Rü nüxü tacuèxgü ega tacüçèx nüxna icaxgu, rü nüma tüxü naxĩnü i ngëxguma norü ngúchaũ yixĩgu i ngëma naxcèx nüxna icaxü. ¹⁵ Rü ngëxguma nüxü icuèxgu na nüma tüxü naxĩnüxü i ngëxguma tacüçèx nüxna icaxgu, rü nüxü tacuèx ta na tüxna naxããxü i ngëma naxcèx nüxna icaxü. ¹⁶ Rü ngëxguma chi texé nüxü dèuxgu i tümaëneê na pecadu naxüxü, rü name nixĩ na naxcèx tayumüxexü ega tama pecadu i iyanatauxêêxü yixĩgu. Rü Tupana tá nana-maxêê i ngëma tümaëneê ega tama pecadu i iyanatauxêêxü yixĩgu. Nangëxma

i pecadu i tũxũ iyarũtauxẽẽxũ. Rũ ngẽxguma ngẽma pecaduwe naxũãmagu i wũxi i peeneẽ, rũ tama pemaã nũxũ chixu na naxcèx peyumũxẽgũxũ. ¹⁷ Guxũma i chixexũ i ixũxũ, rũ pecadu nixĩ. Natũrũ nangẽxma i pecadu i tama tũxũ iyarũtauxẽẽxũ. ¹⁸ Rũ nũxũ tacuèx, rũ yĩxema Tupanaxãcũ ixĩxẽ, rũ tama pecadu taxũecha, erũ nũma ya Tupana Nane rũ tũxna nadau. Rũ taxuacũma tũxna nangaicama i ngoxo i Chataná i tũxũ pecaduãxẽẽchaũxũ. ¹⁹ Nũxũ tacuèxgũ na Tupanaxãcũgũ ixĩgũxũ, natũrũ guxũma i ñoma i naãnecũãx rũ ngoxo i Chatanámeẽxẽwa nangẽxmagũ. ²⁰ Rũ nũxũ tacuèx ta na ñoma ga naãnewa nanguxũ ga Tupana Nane, rũ tũxna nanaxã ga cuèx na nũxũ icuèxgũxũcèx ya yima aixcũmaxũchi Tupana ixĩcũ. Rũ norũ duũxũgũ tixĩgũ ya yima aixcũmaxũchi Tupana ixĩcũ, erũ Nane ya Ngechuchu ya Cristuarũ duũxũgũ tixĩgũ. Rũ nũma ya Tupana Nane nixĩ i aixcũmaxũchi Tupana yĩxũ rũ tũxna naxããxũ i maxũ i taguma gũxũ. ²¹ Pa Chauxacũgũx, ¡Pegũna pedaugũ na tama nũxũ peyaxõgũxũcèx i tupanachicũgũ! Rũ ngẽxĩcatama nixĩ i chorũ ore i pemaã nũxũ chixuxũ.

Rũ nuãma pexna,
Cuáũ

NORÛ TAXRE GA POPERA GA CUÁÛ ÜMATÛXÛ

CuáÛãrũ moxẽ

¹ Pa Chaueneëgũ i Yaxõgũxe ya Tupana Pexũ Dexex, pexcèx chanaxümatũ i choma i CuáÛ i yaxõgũxũãrũ ãëxgacũ na chiĩxũ. Choma rü aixcũma pexũ changechaũ. Rü tama i chaxica, natürũ guxũma i ngẽma nüxũ cuèxgũxũ i Tupanaãrũ ore i aixcũma ixĩxũ, rü ngẽxgumarũ ta pexũ nangechaũgũ. ² Pexũ tangechaũ erũ toxrũ nüxũ pecuèxgũ i ngẽma ore i aixcũma ixĩxũ i guxũgutáma tawa ngẽxmaxũ. ³ Rü nüma ya Tanatũ ya Tupana rü Nane ya Ngechuchu ya Cristu rü poraãcũ tá pexũ narüngũxẽëgũ rü nüxũ pengechaũtümũgũ rü pexũ nataãëxẽëgũ, erũ nüxũ pecuèx i ngẽma ore i aixcũma ixĩxũ rü pegũ pengechaũgũ. ⁴ Rü poraãcũ chataãë ga yexguma nüxũ chadèuxgu na ñuxãcũ ñuxre i petanũxũgũ rü aixcũma meã naga na naxĩnũëxũ i ngẽma ore i aixcũma ixĩxũ, yema Tanatũ ya Tupana tũxũ muxürũ. ⁵ Rü ñuxmax, Pa Chaueneëgũ ya Pexũ Changechaũgũxex, rü pexna nüxũ chacuèxãchixẽë na namexũ na yigũ ingechaũgũxũ. Rü ngẽma rü tama wüxi i ngexwacaxũxũ i Tupanaãrũ mu nixĩ. Natürũ yematama nixĩ ga mu ga noxriarũ ügũgumama Tupana tũxna ãxũ. ⁶ Ngẽxguma Tupanaxũ ingechaũgũgu, rü tanaxũ i guxũma i ngẽma tũxũ namuxũ. Erũ nüma rü noxriarũ ügũgumama tamaã nüxũ nixu na yigũ ingechaũgũxũcèx i wüxichigũ.

Orearũ uruũgũ i womüxẽëruũchiga

⁷ Guxũwama i ñoma i naãnewa rü nanaxĩãne i muxũma i womüxẽëruũgũ ixĩgũxũ. Rü nüxũ nixuchigagũ na tama Tupana duũxũxũ yaxĩxẽëxũ ga Ngechuchu ya Cristu. Rü ngẽma ngẽmaãcũ idexaxũ, rü wüxi i womüxẽëruũ nixĩ, rü Cristuarũ uwanũ nixĩ. ⁸ ¡Ipxeuãëgũ na taxúema pexũ womüxẽëgũxũcèx rü na tama natücèxma yĩxũcèx i tórũ puracũ! ¡Natürũ meã peyaxõgũama na aixcũma penayaxuxũcèx i guxũma i ngẽma Tupana pexna ãxchaũxũ! ⁹ Rü yixema nangupetüxẽëxẽ ga yema Cristu tũxũ ngúexẽëxũ, rü tama aixcũma Tupanaxũ tacuèx. Natürũ yixema tama nüxna íchõxũxẽ ga yema Cristu tũxũ ngúexẽëxũ, rü aixcũma nüxũ tacuèx ya Tanatũ ya Tupana rü Nane ya Ngechuchu. ¹⁰ Rü ngẽxguma chi wüxi i duũxũ petanüwa nguxgu rü tama yema Cristu tũxũ ngúexẽëxũmaã pexũ nangúexẽëgu, rü ¡tãütáma penayaxu i pechiũwa rü bai i nüxũ perümoxëgũ! ¹¹ Erũ ngẽxguma wüxie tümachiũwa nayauxgu, rü tananaãëraxũ rü natanũxũ tũgũ tixĩxẽë nawa i ngẽma norũ chixexũ.

CuáÛãrũ ore ga nawa iyacuáxũ

¹² Choxũ nangëxma i muxũma i to i ore i pemaã nüxũ chixuxchaũxũ. Natürũ tama chanaxwèxe na ñaã poperawa pemaã nüxũ chixuxũ, erũ paxa tá petanüwa íchayadauxchaũ na chomatama pemaãxũchi nüxũ chixuxũcèx na ngẽmaãcũ wüxigu aixcũma itaãëgũxũcèx. ¹³ Rü ngẽma nuã natanüwa changëxmaxũ i yaxõgũxũ i peeneëgũ ixĩgũxũ i Tupana dexũ, rü pexũ narümoxëgũ. Rü ngẽxĩcatama nixĩ i chorũ ore i pemaã nüxũ chixuxũ.

Rü nuãma pexna,
CuáÛ

NORŮ TOMAĚXPŮX GA POPERA GA CUÁŮ ŮMATŮXŮ

CuáŮ rŮ Gayumaã nataã

¹ Pa Chaueneë, Pa Gayu i Aixcŭma CuxŮ ChangechaŮxëx, rŮ cuxcèx chanaxŭmatŭ i choma i CuáŮ i yaxŏgŭxŭãrŭ ãëxgacŭ na chiixŭ. ² Pa Chaueneëx, Tupanana chaca na meã cuxna nadauxŭcèx i curŭ maxŭwa rŮ cuxunewa, ngëma curŭ ōwa cuxna na nadauxŭrŭŭ. ³ RŮ poraãcŭ chataãe ga yexguma núma naxŭxgu ga ñuxre ga taeneëgŭ, rŮ chomaã nŭxŭ yaxugŭgu ga cuchiga na ñuxãcŭ meã cuyaxŏxŭ i Tupanaãrŭ ore i aixcŭma ixŭxŭ, rŮ guxŭguma meã naga na cuxŭnŭxŭ. ⁴ RŮ guxŭguma chataãëxŭchi i ngëxguma nŭxŭ chaxŭnŭgu na ñuxãcŭ Tupanaãrŭ ore nŭxŭ ixuxŭãcŭma meã namaxëxŭ i chauxacŭgŭ. RŮ aixcŭma nataxuma i to i taãe i ngëmaãrŭ yexera ixŭxŭ. ⁵ Pa Chaueneë i CuxŮ ChangechaŮxëx, mexŭ cuxŭ erŭ nŭxŭ curŭngŭxëe i ngëma togŭ i taeneëgŭ i toxnamana ne ìxŭ i cuxŭtawa ngugŭxŭ. ⁶ RŮ nŭmagŭ rŮ nuã nangugŭ, rŮ torŭ ngutaquëxepataŭwa nŭxŭ nixugŭe na ñuxãcŭ nŭxŭ cungechaŮxŭ rŮ namaã cumecŭmaxŭ. RŮ chanaxwèxe i nŭxŭ curŭngŭxëe i ngëma taeneëgŭ i ngëxguma wena cuxŭtawa nangugŭgu. RŮ ngëxguma cuxna íyaxŭxgu rŮ ñnŭxna naxã i tacŭ i nŭxŭ taxuxŭ i norŭ namawaŭ! Erŭ Tupanaãrŭ me nixŭ na ngëmaãcŭ nŭxŭ rŭngŭxëëxŭ i norŭ orearŭ uruŭgŭ. ⁷⁻⁸ RŮ nŭmagŭ, rŮ Ngechuchu ya Cristuarŭ puracŭ nixŭ i naxŭgŭxŭ, rŮ ngëmacèx norŭ oremaã nanaxŭãne. Natŭrŭ tama nanayauxgŭ i ngëma tama yaxŏgŭxŭãrŭ ngŭxëe, rŮ ngëmacèx name nixŭ i yixema na nŭxŭ rŭngŭxëëgŭxŭ na ngëmaãcŭ yixema rŮ ta wŭxigu namaã naxŭgŭxŭcèx i Tupanaãrŭ puracŭ.

Diótepe rŮ chixexŭ naxŭ natŭrŭ Demétriu rŮ mexŭ naxŭ

⁹ Choma rŮ marŭ chanaxŭmatŭ i wŭxi i popera naxcèx i ngëma tupaucatanŭxŭgŭ i curŭ ããnewa ngëxmagŭxŭ. Natŭrŭ nŭma i Diótepe rŮ tama naga naxŭnŭchaŭ i ngëma nŭxŭ tixuxŭ, erŭ nanaxwèxe na nŭmatama namuãxŭ i ngëma tupaucatanŭxŭ. ¹⁰ RŮ ngëxguma ngëma chaxŭxgu rŮ tá nŭxŭ chaxoregŭ erŭ tochiga i chixexŭmaã inayarŭdexanexŭ. RŮ woo tomaã na ngexŭ nawagŭxŭ, rŮ naetŭwa to i chixexŭ naxŭ, erŭ tama nanayauxchaŭ i ngëma taeneëgŭ i ngëma ngugŭxŭ. RŮ nanachuxu na texé nayaxuxŭ i ngëma taeneëgŭ. RŮ yixema nayauxchaŭxë, rŮ ngutaquëxepataŭwa tŭxŭ ínawoxŭ. ¹¹ Pa Chaueneë i CuxŮ ChangechaŮxëx, ¡Tãxŭ i nŭxŭ cuyadauxŭxŭ i ngëma togŭ i chixexŭ ŭgŭxŭ! Natŭrŭ name nixŭ i nŭxŭ cuyadauxŭ i ngëma mexŭ ŭgŭxŭ. Erŭ yixema guxŭguma mexŭ úxe rŮ Tupanaxãcŭ tixŭ. Natŭrŭ yixema chixexŭ uechaxe rŮ tama Tupanaxŭ tacuèx. ¹² Guxŭma i duŭxŭgŭ nŭxŭ ixuxgu i Demétriu rŮ wŭxi ya mecŭ nixŭ. RŮ toma rŮ ta nŭxŭ tacuèx na meã naga naxŭnŭxŭ i Tupanaãrŭ ore i aixcŭma ixŭxŭ. RŮ ngëmacèx toma rŮ ta nŭxŭ tixu na aixcŭma mecŭ yŭxŭ. RŮ cuma nŭxŭ cucuèx na aixcŭma na yŭxŭ i ngëma nŭxŭ tixuxŭ.

Cuáŭãrŭ ore ga nawa iyacuáxŭ

¹³ Choma choxŭ nangëxmachirëx i muxŭma i chorŭ ore i cumaã nŭxŭ chixuxchaŭxŭ, natŭrŭ tama ñãã poperagu cuxcèx chanaxŭmatŭchaŭ. ¹⁴ Erŭ choma rŮ paxa ngëma chaxŭxchaŭ, rŮ ngëxguma rŮ meã tá yigŭmaã tidexagŭ. ¹⁵ ¡Meã cuxŭ naxŭpetŭ rŮ tãxŭ i cuxoegaãëxŭ! Tamŭcŭgŭ i númacŭãx rŮ moxë cuxcèx ngëma namugŭ. RŮ chanaxwèxe i nŭxŭ curŭmoxë i wŭxichigŭ i

tamüçügü i ngema ngẽxmagüxũ. Rũ ngẽxĩcatama nixĩ i chorü ore i cumaã nüxũ
chixuxũ.

Rũ nuãma cuxna,
Cuáũ

POPERA GA YUDA ÜMATÜXÜ

Yema yaxõgüxüxü narümoxë ga Yuda

¹ Pa Yaxõgüxü i Guxüwama Ngëxmagüxüx, choma i Yuda nixi i pexcèx chanaxümatüxü i ñaã popera. Rü choma nixi i Chaütiágueneë chiixü, rü Ngechuchu ya Cristuarü duixü chixi. Rü pexcèx chanaxümatü i pema na Tanatü ya Tupana pexü dexü rü pexü ngechaüxü rü Ngechuchu ya Cristu pexna dauxü. ² Rü pexcèx chayumüxë na guxüguma Tupanaãxü pengechaütümüügüxcèx, rü pexü nataãxëëgüxcèx, rü pexü nangechaüxcèx.

Duixügü i doramaã ngüxëëtaegüxüchiga

³ Pa Chaueneëgü ya Pexü Changechaügüxex, noxri rü poraãcü choxü nangüchaü na pexcèx chanaxümatüxü nachiga i ngëma maxü i taguma gúxü i tüxü ngëxmaxü. Natürü ñuxma na petanügu nachocuxü i ñuxre i duixügü i íyatoxëëgüchaüxü i Tupanaãrü ore, rü ngëmacèx chanaxwëxe na pexcèx chanaxümatüxü na pexü chaxucüxëxcèx rü ípenapoxüxcèx i ngëma ore i aixcüma ixixü ga nuxcüma wüxicanatama Tupana norü duixügüna äxü. ⁴ Rü ngëma duixügü i pexü nawomüxëëcüma petanügu chocuxü nixi i pexü ngüxëëxü rü ñaxü:

“Tupana rü namecümaxüchi rü ngëmacèx täütáma pexü napoxcue ega woo chixri pemaxëgu”, ñaxü. Rü ngëxgumarüü ta tama nüxü nacüxgüchaü ya tórü Cori ya Ngechuchu ya Cristu ya tórü yora ixicü. Natürü ngëma duixügü i ngëmaãcü maxëxü, rü woetama nuxcü mama Tupanaãrü ore i ümatüxüwa rü marü nüxü nixu na Tupana tá napoxcuxü. ⁵ Rü woo na marü nüxü pecuáxü natürü pexna nüxü chacuëxächixëëchaü na ñuxãcü namaã nangupetüxü ga yema nuxcümaügüxü ga Yudíügü ga Moíchéwe rüxixü. Rü tórü Cori ya Tupana rü poraãcü nüxü narüngüxëë na Equituanewa ínangüxüxcèx, natürü yixcama rü nanadai ga yema tama naga ñnüëchaüxü. ⁶ Rü ngëxgumarüü ta pexna nüxü chacuëxächixëë na ñuxãcü namaã nangupetüxü ga yema daxücüãx ga orearü ngeruügü ga noxri ixüünechiréxü natürü yixcama nagagutama pecadu ügüxü. Rü yemacèx ga Tupana rü ëänexüwa nanawogü, rü ngëxma nanapoxcue ñuxmatáta nawa nangu i ngëma ngunexü i nagu tüxü yacagüxü. ⁷ Rü yexgumarüü ta nüxü nangupetü ga guma ñänegü ga Chodoma rü Gomora rü guma ñänegü ga norü ngaicamagugüne. Yerü guma ñänecüãxgü, rü poraãcü chixri nügümaã namaxë, rü yemacèx ga Tupana rü üxümaã ínanagu. Rü yemaãcü inayanaxoxëë ga guma ñänegü na yemawa tüxü nüxü nacüxëëxüxcèx na nangëxmaxü i wüxi i poxcu naxcèx i guxüma i ngëma chixexü ügüxü. ⁸ Natürü woo ngëmaxü na nacüxgüxü i ngëma idoraexü i petanügu chocuxü, natürü norü chixexügu narüxñnüëãma. Rü poraãcü chixri nügümaã namaxë, rü tama tórü Cori ya Tupanaga naxñnüëchaü, rü chixri Tupanaãrü orearü ngeruügü i daxücüãxchigagu nidexagü. ⁹ Rü ngëma duixügü rü naëchitamare nidexagü rü tama Tupanaãrü orearü ngeruü ga Miguérerüü nügüna nadau i norü orewa. Rü guma Miguére rü woo guxü i Tupanaãrü orearü ngeruügü i daxücüãxãrü äëxgacü na yíixü, natürü tama ngoxo ga Chatanámaã naguxchiga ga yexguma Moíchéxüncèx yema nügümaã yaporagatanücüxgu, na nüxü nacüxgüxüxcèx na texéarü tá yíixü ga Moíchéxüne. Natürü nüma ga Miguére rü ñanagürümare: “Cori ya Tupana tá cuxü nanga”,

ñanagürümare. ¹⁰ Natürü ngēma duūxügü i doramaã i petanügu chocuxü, rü tama Tupanaxü nacuèxgüäcüma chixri nachiga nidexagü, rü chixri norü orearü ngeruügü i daxüçüâxchiga nidexagü. Rü ñoma naèxügürüü naxüneärü ngúchaüwemare narüxí, rü ngēmaäcü namaxē. Natürü ngēma chixexü i naxügüxüçèx, rü Tupana tá nanapoxcue. ¹¹ Rü wüxi i ngechaüxüchi nixí naxcèx i ngēma duūxügü erü ngēmaäcü namaxē. Rü Caí ga naēneèxü imáxürüü nixígü. Rü äèxgacü ga Baráürüü dīerucèx chixexü naxügü. Rü Corérüü tama Tupanaga naxīnūēchaü, rü ngēmacèx Tupana tá nanapoxcue. ¹² Rü ngēxguma tupaucawa tórü Coriarü ònacèx pengutaquèxegügu, rü wüxi i ñnexüchi nixígü. Erü narücutanüxü, rü poraäcü nachibüe rü naxaxegü, rü nügüguxicatama narüxīnūē. Rü ñoma caixanexü i ngearü pucüäxü i paanexüetüwa üpetüxü natürü tama nanetüxü ixaiyagüxürüü taxuwama nime. Rü ngēma nanetügü i ngēxguma norü owa nanguxgu rü tama ixoxürüü nixígü. Rü ñoma naígü i guxüma i naxchúmèxãmaã napuxü rü yuxuchixürüü taxuwama nime i ngēma duūxügü. ¹³ Rü ñoma yuape i taxü i norü chixixü i äüächixü naxānacüwa yataxürüü nixígü, erü poraäcü chixexü naxügü. Rü ñoma woramacurígü ya nu ne naxīmarecürüü nixígü. Natürü Tupana rü marü namaã nanaxuegu na ngēma waanexüchixüwa guxügutáma nawogüäxü. ¹⁴⁻¹⁵ Rü nuxcümaücü ga Enó ga Adáútaa ixícü rü ngēma duūxügüchiga nidexa ga yexguma Tupana yadexaxēēgu, rü ñanagürü:

“Rü nüxü chadau ya Cori ya Tupana na muxüchixü i norü orearü ngeruügü i daxüçüâxmaã núma ücü na duūxügüna naçaxüçèx i norü maxüchiga rü napoxcueäxüçèx i guxüma i ngēma duūxügü i chixexü ügüxü rü namaã guxchigagüxü”,
ñanagürü. ¹⁶ Rü ngēma duūxügü rü tacüçèx idexagüwèxexüchixü nixígü, rü toguäxü ixuxwèxegüxüchixü nixígü. Rü noxrütama ngúchaüçèx daugüxü nixígü. Rü nügü icuèxüügüxü nixígü. Rü nümaxü meã tümachiga nidexagüneta ya duūxégü, na tümaxütawa tacü na nayauxgüxüçèxmare.

Yuda nayaxucüxégü ga yema yaxögüxü

¹⁷ Pa Chaueneégü ya Pexü Changechaügüxex, ¡nüxna pecuèxāchie ga yema ore ga pemaã nüxü yaxugügüxü ga tórü Cori ya Ngechuchu ya Cristuarü ngúexügü ga imugüxü! ¹⁸ Rü nümagü rü ñanagürügü pexü:
“Ngēxguma nagúxchaügu i naäne rü tá nangēxma i duūxügü i tá nüxü cügüexü i Tupanaärü ore rü noxrütama ngúchaü i chixexügumare maxēxü”,
ñanagürügü pexü. ¹⁹ Rü ngēma duūxügü nixí i pexü itoyexü na tama wüxigu perüxīnūèxüçèx rü tama meã peyaxögüxüçèx. Rü nümagü rü naxüneärü ngúchaüwe narüxí, rü tama nawa nangēxma i Tupanaãe i Üünexü. ²⁰ Natürü pemax, Pa Chaueneégü ya Pexü Changechaügüxex, ¡rü pegü perüngüxēēx na guxüguma yexeraäcü nagu pexixü rü peyaxögüxü i ngēma ore i üünexü i marü peyauxgüxü! ¡Rü guxüguma Tupanaãe i Üünexüärü ngüxēēmaã peyumüxégü! ²¹ ¡Rü guxüguma nagu pexí i ngēma Tupanaärü ngechaxü! ¡Rü meã ípenangüxēēx i ngēma ngunexü i nagu tá núma naxüxü ya tórü Cori ya Ngechuchu ya Cristu na nüxü ingechaütümüügüäcüma tüxna naxāxüçèx i maxü i taguma gúxü! ²² ¡Rü pexü nangechaütümüügü i ngēma tama aixcüma yaxögüxü, rü nüxü perüngüxēēgü na meã yaxögüäxüçèx! ²³ Rü togü, ¡rü paxa norü pecaduwa ípenayaxuchi na namaxèxüçèx rü tama yima üxü ya Tupana mexēnegu yanatauxexüçèx! Rü woo ngēma tama yaxögüchaüxü, ¡rü pexü nangechaütümüügü! ¡Natürü pegüna pedaugü na tama norü chixexügu peyixüçèx! Rü ngēma norü chixexü i pexcèx mexcüraxüxü, ¡rü nüxü pexo!

Tupanaxü yacuèüüäcüma inayacuèxēē ga norü popera

24-25 Rū yima wūxitama ya Tupana ya tórū Maxēxēēruŭ ixīcū, rū nūxŭ nangēxma i pora na pexna nadauxŭcèx na tama pecadugu peyixŭcèx. Rū nūxŭ nangēxma i pora na iyanaxoxēēxŭcèx i guxŭma i perū chixexŭgū na petaāēgūācūma nūgūpēxewa pexŭ nagagūxŭcèx i ngextá āēxgacū íyīxŭwa. Rū ngēmacèx tanaxwèxe i tórū Cori ya Ngechuchu ya Cristuégagu Tupanaxŭ ticuèxŭgū, erū nūma rū guxŭārū yexera name rū naporā, rū guxŭetūwa nangēxma, rū guxŭmaā inacuèx. Rū yemaācū nixī ga nuxcūmaxŭchima, rū ngēmaācū nixī i ñuxmax, rū guxŭgutáma ngēmaācū yī.

Rū nuāma pexna,
Yuda

YEMA CUÁÛ NÜXÛ DAUXÛ I YIXCÛRA TÁ NGUPETÛXÛCHIGA

Ore ga CuáÛxÛ nüxÛ nacuèxêxÛ ga Ngechuchu ga Cristu

¹ Ñã nixĩ i ngẽma ore ga Tupana Ngechuchu ya CristuxÛ nüxÛ cuèxêxÛ na nüxĩ norü duÛxÛgÛxÛ nüxÛ nacuèxêxÛcèx i ngẽma paxa tá ngupetÛxÛ. Rü nüma ga Ngechuchu ya Cristu nixĩ ga norü orearü ngeruÛ ga daxÛcÛãxÛ namuxÛ na norü duÛcÛ ga CuáÛmaã nüxÛ na yaxuxÛcèx. ² Rü choma i CuáÛ chixĩ ga aixcÛma meãma nüxÛ chadauxÛ rü chanaxümatÛxÛ ga guxÛma ga yema TupanaãrÛ ore ga Ngechuchu chauxcèx ngoxêxÛ. ³ Rü tataãe ya yixema duÛxÛgÛpèxewa nawa ngúxe i ñã TupanaãrÛ ore, rü ngèxgumarÛ ta tataãegü ya yixema nüxÛ ñnüèxè rü naga ñnüèxè i ñã ore i ümatÛxÛ, erü paxa tá ningu i ngẽma nüxÛ yaxuxÛ.

CuáÛ nanaxümatü naxcèx ga yema 7 tücumü ga yaxögüxÛ ga Áchiaanewa yexmagüxÛ

⁴ Rü choma i CuáÛ rü chanaxümatü i ñã ore pexcèx i yaxögüxe ya yima 7 ya ñãne ya Áchiaarü naãnewa ngèxmagünewa ngèxmagüxe. Rü chanaxwèxe i pexÛ narüngÛxèè rü pexÛ nataãèxèè ya yima Tupana ya woetama ngèxmaèchacü. Rü ngèxgumarÛ ta chanaxwèxe i pexÛ narüngÛxèè rü pexÛ nataãèxèè i ngẽma Naãe i ÜünexÛ i naxütawa ne üxÛ i perü dauruÛ ixixÛ i pema i yaxögüxe ya yima 7 ya ñãnewa na pengèxmagüxÛ. ⁵ Rü ngèxgumarÛ ta chanaxwèxe na pexÛ nangüxèèxÛ rü pexÛ nataãèxèèxÛ ya Ngechuchu ya Cristu ga aixcÛma meãma nüxÛ ixucü ga TupanaãrÛ ore ga ñoma ga naãnewa. Rü nüma nixĩ ga nüxĩra yuwa ínadauxÛ. Rü nüma rü guxÛma i ñoma i naãnewa ngèxmagüxÛ i nachiüãneãrÛ ãëxgacügüarü ãëxgacü nixĩ. Rü nüma rü tüxÛ nangechaÛ, rü nagümaã tüxÛ inayanaxoxèè i tórü pecadugü. ⁶ Rü ñuxma na guxÛãrÛ ãëxgacü yĩxÛ i nümax, rü tüxÛ naxüchica i ngextá nüma ãëxgacü íyĩxÛwa. Rü paigüxÛ tüxÛ nixĩgüxèè na Nanatü ya TupanaãxÛ ipuracüexÛcèx rü nüxÛ icuèxÛgÛxÛcèx. Rü name nixĩ i guxÛgutáma CristuxÛ ticuèxÛgü, erü nüma rü guxÛgutáma guxÛãrÛ ãëxgacü nixĩ. Rü ngẽmaãcü yĩ. ⁷ ;Rü dücax, marü ningaica na caixanexügu ínanguxÛ ya Cristu! Rü guxÛtáma i duÛxÛgü nüxÛ nadau, rü woo ga yema nacanapacütüügüxÛ rü tá ta nüxÛ nadaugü. Rü guxÛ i duÛxÛgü i guxÛ i nachiüãnecüãx i tama yaxögüxÛ rü norü muümaã rü norü ngechaümaã tá naxauxe i ngèxguma ínanguxgu i nümax. Rü aixcÛma ngẽmaãcü tá nixĩ. ⁸ Rü nüma ya tórü Cori ya Tupana ya guxÛãrÛ ãëxgacü ixĩcü ya woetama ngèxmaèchacü, rü ñanagürü:

“Chowa nixĩ ga inaxügüxÛ ga guxÛma, rü nataxuma i tacü i chorü yexera ngèxmaèchaxÛ”, ñanagürü.

CuáÛcèx nangox ga Cristu ya mexèchicü

⁹ Rü choma i CuáÛ na pexcèx chanaxümatÛxÛ i ñã popera, rü peeneè chixĩ. Rü ngẽma na Ngechuchuna na chaxüxÛ rü chaxãchica i ngextá nüma ãëxgacü íyĩxÛwa. Rü Ngechuchucèx pexrÛ ngúxÛ chinge, natürü nüma pexÛ naporaexèèxÛrÛ choxÛ naporaxèè na yaxna namaã chaxĩnüxÛcèx i guxÛma i ngẽma ngúxÛ i choxÛ üpetÛxÛ. Rü choma rü capaxÛ ga Pátmugu chapoxcu naxcèx na nüxÛ chixuxÛ ga TupanaãrÛ ore ga Ngechuchuchiga. ¹⁰⁻¹¹ Rü wüxi ga yüxüarü ngunexügu rü Tupanaãe i ÜünexÛ chomaã inacuèx,

rü changoxetü rü choweama nüxü chaxĩnü ga wüxi ga naga ga tagaxü ga ñoma cornetagarü ixixü ga ñaxü choxü:

“Chowa nixĩ ga inaxügüxü ga guxüma, rü nataxuma i tacü i chorü yexera ngëxmaëchaxü. Rü ñuxma chanaxwëxe na wüxi i poperagu cunaxümatüxü i ngëma nüxü cudauxü. Rü ñuxüchi chanaxwëxe i ngëma yaxögüxü ya yima 7 ya ñãne ya Áchiaarü naãnewa ngëxmagünewa ngëxmagüxütanüwa cunamu. Rü yima 7 ya ñãne nixĩ ya Epéchiu rü Esmira rü Pérgamu, rü Tiatíra rü Chardi rü Firadérfia rü Laodichéa”, ñanagürü. ¹² Rü chaugü íchidau na nüxü chacuáxcèx na tacü yixü ga yema chomaã idexaxü. Rü yexguma chaugü íchidèuxgu rü nüxü chadau ga 7 ga weraarü üruügü ga uirunaxcèx ixigüxü. ¹³ Rü yema 7 ga weraarü üruügüarü ngãxütanüwa nüxü chadau ga wüxi ga duüxü ga chauxcèx nangechuchu ga duüxüxü ixícüraüxü. Rü wüxi ga naxchiru ga máxümaã naxäxchiru. Rü wüxi ga goyexü ga uirunaxcèxmaã nigoyeremü. ¹⁴ Rü nayae rü nachoxochi ñoma tacü i choxochixürüü. Rü naxëtü rü ñoma üxüemarüü niyauracüü. ¹⁵ Rü nacetü rü ta niyauracüü ñoma cobrexüchi i meãma ípixürüü. Rü yexguma yadexagu rü natagaxüchi ñoma taxü i dexá i chuxchuxü ägaxürüü. ¹⁶ Rü norü tügünemëxëwa nüxü nayexma ga 7 ga woramacurigü. Rü naãxwa nayexma ga wüxi ga tara ga guxücüwawa téxü. Rü nachiwe rü ñoma üèxcü poraãcü nguxetügurüü nixĩ. ¹⁷ Rü yexguma nüxü chadèuxgu, rü napëxegu chayangu ñoma chayuxürüü. Natürü ga nüma rü norü tügünemëxëmaã choxü ningögü, rü ñanagürü choxü:

“¡Tãxü i cumuüxü! Choma nixĩ i chaxira chayexmaxü rü guxügutáma changëxmaëchaxü. ¹⁸ Rü choma nixĩ i yuwa ícharüdaxü rü ñuxma rü chamaxü. Rü üpa rü chayü, natürü i ñuxma rü marü guxügutáma chamaxëcha. Rü choxmëxwa nangëxma na ñuxgu tá nayuxü i wüxichigü i duüxü. Rü ngëxgumarüü ta choma nixĩ i namaã ichacuáxü i ngëma nachica i ngextá ínangëxmagüxüwa i guxüma i duüxügü i yuexü. ¹⁹ Rü ñuxma rü chanaxwëxe i cunaxümatü i ngëma nüxü cudauxü. Rü ngëma nixĩ i ñuxma ngëma yaxögüxümaã ngupetüxü, rü ngëma yixcüra tá ngupetüxü. ²⁰ Rü ñuxma rü tá cuxcèx chanangoxëë i ngëma ëxügüxü i ngëma 7 i woramacurigü i chorü tügünemëxëwa nüxü cudauxüchiga rü ngëma 7 i weraarü üruügü i uirunaxcèxchiga. Rü ngëma 7 i woramacurigü i nüxü cudauxü, rü ngëma äëxgacügü i ngëma 7 tucümü i yaxögüxüetüwa ngëxmagüxüchiga nixĩ. Rü ngëma 7 i weraarü üruügü rü ngëma 7 tucümü i yaxögüxü i yima 7 ya ñãnewa ngëxmagüxüchiga nixĩ”.

2

Ore ga yema 7 tucümü ga yaxögüxüçèx ümatüxü Ore ga yema yaxögüxü ga Epéchiuarü ñãnewa yexmagüxüçèx ümatüxü

¹ “Rü ñuxma chanaxwëxe i ngëma Epéchiuwa ngëxmagüxü i yaxögüxüärü äëxgacüçèx cunaxümatü, rü ñacurügü nüxü: ‘Ñã nixĩ i norü ore ya yima ngëma yaxögüxütanügu yarüxüüçü rü norü tügünemëxëmaã nüxna daucü i ngëma yaxögüxüärü äëxgacügü’.” ² Rü ñanagürü i nümax:

‘Choma nüxü chacuèx i guxüma i ngëma cuxüxü. Rü nüxü chacuèx na ñuxäcü poraãcü choxü cupuracüxü rü ñuxäcü cunaxüamaxü i ngëma puracü woo ngëmacèx muxüma i guxchaxügü cuxcèx ínguxgu. Rü nüxü chacuèx na tama curü me yixü i ngëma duüxügü i chixexü ügüxü. Rü ngëxgumarüü ta nüxü chacuèx na meã cunangugüarü maxüãxü i ngëma duüxügü i nügü ixügüxü na Tupana imugüxü yixigüxü natürü tama aixcüma ixigüxü na Tupana yamugüxü. Rü cuma rü nüxü cucuèxama na idoratèxmaregüxü yixigüxü. ³ Rü woo naguxcha i ngëma puracü i chauxcèx cuxüxü, natürü

cunaxüama. Rü woo chaugagu poraãcü ngúxü na quingexü, natürü yaxna namaã cuxĩnü, rü tama nüxü curüchau. ⁴ Natürü nangëxma i wüxi i cuxüxü i tama chorü me ixixü. Rü ngëma nixĩ na tama noxrirüü choxü cungechaüxü i ñuxmax. ⁵ Rü ngëmacèx i ñuxma na ngëma chixexügu cunguxü, rü name nixĩ i nüxna cucuèxãchi na ñuxãcü choxü cungechaüxü ga noxrix. Rü name nixĩ i nüxü curüxo i curü chixexü rü noxrirüü choxü cungechaüãcüma mexü cuxü. Natürü ngëxguma chi tama nüxü curüxoxgu i curü chixexü, rü paxa tá cuxü íchayadau, rü tá cuxü chaxo na tama ngëma togü i yaxögüxütanüwa cuxãchicaxüçèx. ⁶ Natürü nangëxma i wüxi i cuxüxü i chorü me ixixü. Rü ngëma nixĩ na naxchi cuxaixü i ngëma chixexü i naxügüxü i ngëma Nicoraítägü. Rü choma rü ta naxchi chaxai i ngëma chixexü i naxügüxü'. ⁷ Rü yíxema ãchixexë rü name nixĩ i naga taxĩnü i ngëma Tupanaãe i Üünexü nüxü ixuxü namaã i ngëma yaxögüxütücumügü". Rü ñanagürü:

"Yíxema nüxü rüporamaëxë i chixexü rü tá tüxü nüxü chamuxnetaxëe i norü o i ngëma orix i tüxü maxëxëxü i Tupanaärü orixnecüwa ngëxmaxü", ñanagürü i Naãe i Üünexü.

Ore ga yema yaxögüxü ga Esmiraarü ñãnewa yexmagüxüçèx ümatüxü

⁸ Rü yema chomaã idexaxü rü ñanagürü ta:

"Chanaxwëxe i Esmirawa ngëxmagüxü i yaxögüxüärü ãëxgacüçèx cunaxümatü, rü ñacurügü tá: 'Ñã nixĩ i norü ore ya yima nüxĩra yexmacü rü guxüguma ngëxmaëchacü ga paxaãchi yucü rü wenaxarü maxüçü'. ⁹ Rü ñanagürü i nümax:

'Choma nüxü chacuèx i guxüma i ngëma cuxüxü. Rü nüxü chacuèx na ñuxãcü ngúxü quingexü. Rü nüxü chacuèx na cungearü díëruãxü i ñoma i naãnewa, natürü daxügüxü i naãnewa cuxü nangëxma i ngëma taguma gúxü. Rü nüxü chacuèx na ñuxãcü chixri cuchiga yadexagüxü i ngëma duüxügü i nügü ixugüxü na Yudíugü yixígüxü. Natürü i nümagü rü aixcüma Chatanáärü duüxügümare nixígü. ¹⁰ ¡Rü tãxü i cumuüxü naxcèx i ngëma ngúxü i tá quingexü! Rü ngoxo i Chataná rü tá norü duüxügüxü namu na poxcupataügu pexü napoxcuexüçèx i ñuxre i pema na ngëmaãcü pexü naxüçèx. Rü ñuxre i ngunexü tá ngúxü pingegü. Natürü woo ngëmaãcü ngúxü pingegügu rü chanaxwëxe i choxü cuyaxõõma ñuxmatáta cuyux. Rü choma rü tá cuxna chanaxã i curü ãmare i maxü i taguma gúxü'. ¹¹ Rü yíxema ãchixexë rü name nixĩ i naga taxĩnü i ngëma Tupanaãe i Üünexü nüxü ixuxü namaã i ngëma yaxögüxütücumügü". Rü ñanagürü:

"Yíxema ñoma i naãnewa nüxü rüporamaëxë i chixexü, rü tãütáma Tupana ngoxogüxü ípoxcuexüwa tüxü nawogü", ñanagürü i Naãe i Üünexü.

Ore ga yema yaxögüxü ga Pérgamuärü ñãnewa yexmagüxüçèx ümatüxü

¹² Rü yema chomaã idexaxü rü ñanagürü ta:

"Chanaxwëxe i Pérgamuwa ngëxmagüxü i yaxögüxüärü ãëxgacüçèx cunaxümatü, rü ñacurügü tá: 'Ñã nixĩ i norü ore ya yima nüxü nangëxmacü i ngëma tara i guxüçüwawa téxü'. ¹³ Rü ñanagürü i nümax:

'Choma nüxü chacuèx na yima ñãne ya Chataná poraãcü namaã ícuáxünewa na cumaxüxü. Natürü woo ngëxma na cuxãchiüxü, rü tama choxü ícutèx. Rü woo yexguma chorü orearü uruü ga mecü ga Atípaxü yamëxgügu nagu ga guma ñãne ga nawa Chataná duüxügümaã ícuáxüne, rü tama nüxü curüxo na choxü cuyaxõõmaxü. ¹⁴ Natürü nangëxma i ñuxre i tacü i cuxüxü i tama chorü me ixixü. Rü ngëma nixĩ na cugüxütawa cunangëxmagüxëxü i ñuxre i curü duüxügü i tama nüxü rüxoechaüxü i ngëma nguxëëtae ga nuxcüma Baráü Yudíugüarü ãëxgacü ga Baráxü namaã

ucuxëxü na chixexügu Yudíugüxü nayixëëxüçèx. Rù yema Yudíugü rù yema ucuxëgagu nawa naxí ga yema petagü ga togü ügüxü naxcèx ga norü tupanetachicünèxägü. Rù yexgumarüü ta yema ucuxëgagu nixí ga naí ga ngemaã namaxëxü ga Yudíugü. Rù ñuxma i ñuxre i curü duüxügü i Pérgamuwa ngëxmagüxü rù nagu naxí ga yema nuxcümaüxü ga nguxëëtae ga chixexü, rù tama nüxü narüxoechaü. ¹⁵ Rù ngëxgumarüü ta ngema cunangëxmagüxëë i ñuxre i duüxügü i tama nüxü rüxoechaüxü i ngëma Nicoraítagarü nguxëëtae i Baráüärü nguxëëtaeruü chixexü. ¹⁶ Rù ngëmacèx chanaxwèxe i nüxü curüxo i ngëma chixexü. Rù ngëxguma chi tama nüxü curüxoxgu, rù paxa tá ngema cuxütawa chaxü rù ngëma tara i chauèxwa ngëxmaxümaã tá ngëma duüxügüxü chadai'. ¹⁷ Rù yíxema áchixexë rù name nixí i naga taxínü i ngëma Tupanaãe i Üünexü nüxü ixuxü namaã i ngëma yaxögüxütücumügü". Rù ñanagürü:

“Yíxema nüxü rüporamaëxë i chixexü rù tá tüxna chanaxã i pãu i daxüçüãx. Rù tá tüxna chanaxã ya wüxi ya nuta ya chócü i wüxi i naega i ngexwacaxüxü nagu ümatüxü. Rù yíxema nayaxuxexicatama tixí ya nüxü cuáxe i ngema naéga”, ñanagürü i Naãe i Üünexü.

Ore ga yema yaxögüxü ga Tiatírarü ñanewa yexmagüxüçèx ümatüxü

¹⁸ Rù yema chomaã idexaxü rù ñanagürü ta:

“Chanaxwèxe i Tiatírawa ngëxmagüxü i yaxögüxüärü äëxgacüçèx cunaxümatü, rù ñacurügü tá: ‘Naã nixí i norü ore ya yima Tupana Nane ya ñoma üxüemarüü iyauraxetüçüçü rù nacutügü rù ñoma cobre i meãma ípixürüü ixíxüne’. ¹⁹ Rù ñanagürü i nümax:

‘Choma nüxü chacuèx i guxüma i ngëma mexü i cuxüxü. Rù nüxü chacuèx na ñuxäcü cumüçügüxü cungechaüxü, rù ñuxäcü meãma choxü na cuyaxöxü, rù ñuxäcü nüxü na curüngüxëëxü i ngëma togü i yaxögüxü, rù ñuxäcü yaxna namaã cuxínüxü i guxchaxügü. Rù nüxü chacuèx i ñuxma na noxriarü yexera cunaxüxü i ngëma cuxü chanaxwèxexü. ²⁰ Natürü nangëxma i wüxi i cuxüxü i tama chorü me ixíxü. Rù ngëma nixí na ngema cunangëxmaxëëchaxü i ngëma ngexü i Yechabé i nügü ixuxü na Tupanaärü orearü urü na yíxü, natürü norü nguxëëtaemaã chorü duüxügüxü ngema womüxëëxü na chixri namaxëxüçèx, rù naí i ngemaã inapegüxüçèx, rù nangögüxüçèx i ngëma õnagü i togü norü tupanetachicünèxägüçèx dèixü na ngëmamaã nüxü yacuèxüügüxüçèx. ²¹ Rù choma rù marü ngíxü íchananguxëë rù yaxna ngímaã chaxínü na nüxü naxoxüçèx i ngëma ngícüma i chixexü, natürü tama inaxwèxe na nüxü naxoxü rù ínatáãxü i ngëma ngírü chixexü i naxüxü. ²² Rù ñuxma i ngëma nge rù tá ngíxü chidaawexëë na ngírü ngürücarewa ngúxü yangexüçèx, rù ngëma duüxügü i ngímaã ipexü i ngëma nge rù nümagü rù tá ta ngúxü na yangegüxüçèx ega tama nüxü naxoegu i ngëma chixexü i ngímaã naxügüxü. ²³ Rù tá chanadai i ngíxäçügü i ngëma nge. Rù ngëmawa tá nüxü nacüxgü i guxüma i yaxögüxü na aixcüma nüxü chacuáxü i ngëma naãewa nagu naxínüxü i wüxichigü i duüxü. Rù wüxichigü i pemax rù tá pexü chanaxütanü ngëma na ñuxäcü pemaxëxüäcüma rù ñuxäcü penaxüxüäcüma. ²⁴⁻²⁵ Natürü pemagü i Tiatíracüãx i tama nagu íxë i ngëma ngexüärü nguxëëtae i chixexü rù taguma nawa ngúexe i ngëma ore i togü naxugügu rù Chatanáärü ore i èxügüxü ixíxü, rù pemaã nüxü chixu rù ngëma pexü chanaxwèxexü nixí na meã namaã penguxügüxü rù naga pexínüxü i ngëma chorü ore ñuxmatáta íchangu i chomax. Rù ngëxícatama nixí i pexü chanaxwèxexü. ²⁶ Rù yíxema nüxü rüporamaëgüxe i ngëma chixexü rù naxügüamaxë i ngëma tüxü chanaxwèxexü ñuxmatáta tayuemare,

rü tá chaugüxütawa tüxü chaxüchica na wüxigu chomaã guxüärü ãëxgacü tixüxüçèx. ²⁷ Rü yema Chaunatü ãëxgacüxü choxü na ixüxëxürüü tá tüxna chanaxã i pora na guxü i nachüãnegümaã taporaexüçèx. Rü ngëxguma ñoma i naãnecüãx i duüxügü tama tümaga ñnügü rü ñoma wüxi i tüxü ngüxü ipuxëxürüü tá namaã tixügü rü poraãcü tá tanapoxcue. ²⁸ Rü tá tüxna chanaxã ya yima woramacuri ya pëxmama nüxü idaucü'. ²⁹ Rü yíxema ãchixexë rü name nixü i naga taxüñü i ngëma Tupanaã i Üünexü nüxü ixuxü namaã i ngëma yaxögüxütücumügü" ñanagürü.

3

Ore ga yema yaxögüxü ga Chardiarü ñanewa yexmagüxüçèx ümatüxü

¹ Rü yema chomaã idexaxü rü ñanagürü ta:

"Chanaxwëxe i Chardiwa ngëxmagüxü i yaxögüxüärü ãëxgacüçèx cunaxümatü, rü ñacurügü tá: 'Ñã nixü i norü ore ya Tupana Nane ya Naã i Üünexü nawa ngëxmacü ya yima 7 ya woramacuri nüxü ngëxmacü'. Rü ñanagürü i nümax: 'Choma nüxü chacuèx i guxüma i ngëma cuxüxü. Rü nüxü chacuèx ta rü woo guxüwama duüxügü nüxü ixugügu na Tupanacèx namaxëxü i ngëma yaxögüxü i cuxütawa ngëxmagüxü natürü tama aixcüma nixü i ngëma, erü ngëma yaxögüxü rü tama aixcüma choxü nayaxögü rü tama aixcüma chauxcèx namaxë. ² Rü name nixü i cubaixãchi rü cügü íquicuèx rü cuyangüxëë i ngëma íraxü i mexü i cuxü íyaxüxü i marü iyarüxoxchaüxü. Erü nüxü chadau rü ngëma cuxüxü rü tama Tupanapëxewa name. ³ ;Rü nüxna nacüxãchi ga yema nguxëëtae ga mexü ga noxri nüxü cuxüñüxü rü cuyaxuxü, rü nagu ixü! ;Rü nüxü rüxo i ngëma chixexü i cuxüxü! Natürü ngëxguma tama nüxü curüxoxgu i curü chixexü, rü ñoma wüxi i ngütëxáxü i ngürüãchi ínguxürüü tá cuxütawa chaxü. Rü täütáma nüxü cucuèx na ñuxguacü yüxü. ⁴ Natürü ngëma Chardiwa cuxü nangëxma i ñuxre i duüxügü i mexü i tama ñoma i naãneärü chixexümaã nügü äüãchiarü maxüãxgüxü. Rü nümagü rü tá cómüxümaã nixãxchiru rü ngëmaãcü tá chomaã inaxü, erü nümagü rü duüxügü i mexü i chauxcèx maxëxü nixügü. ⁵ Rü yíxema nüxü rüporamaëgüxe i chixexü, rü tá cómüxümaã tixãxchiru. Rü täütáma nawa tüxü íchapiéga i ngëma chorü popera i nagu chayawügüxü i ngëma duüxügü i nüxü nangëxmaxü i maxü i taguma gúxü. Rü Chaunatüpëxewa rü guxüma i norü orearü ngerüügü i daxüçüãxgüpëxewa tá tüxü chixu na chorü duüxügü tixüxüçèx'. ⁶ Rü yíxema ãchixexë rü name nixü i naga taxüñü i ngëma Tupanaã i Üünexü nüxü ixuxü namaã i ngëma yaxögüxütücumügü".

Ore ga yema yaxögüxü ga Firadérfiarü ñanewa yexmagüxüçèx ümatüxü

⁷ Rü yema chomaã idexaxü rü ñanagürü ta:

"Chanaxwëxe i Firedérfiawa ngëxmagüxü i yaxögüxüärü ãëxgacüçèx cunaxümatü rü ñacurügü tá: 'Ñã nixü i norü ore ya yima Üünecü ya aixcüma Cristu ixüçü ya Dabürüü ãëxgacü ya tacü ixüçü ya nüxü nangëxmacü i pora na yawãxnaãxüçèx rü nawãxnaãxüçèx i daxügüxü i naãne. Rü ngëxguma texéçèx yawãxnaãgu, rü taxucürüwama texé tümachëxwa tanawãxta. Rü ngëxguma texéchëxwa nawãxnaãgu, rü taxucürüwama texé tümacèx tayawãxna'. ⁸ Rü ñanagürü i nümax:

'Choma nüxü chacuèx i guxüma i ngëma cuxüxü. Rü dücax, cuxü chanatauxchaxëë na togümaã nüxü quixuxüçèx i chorü ore, rü taxucürüwama texé cuxna tanachüxu na cunaxüxüçèx i ngëma puracü. Rü choma nüxü chacuèx na tama aixcüma cuporaxüchixü, erü noxretama nixü i ngëma yaxögüxü i cuxütawa ngëxmagüxü. Natürü cuma rü naga cuxüñü i chorü ore,

rü tama icuyacux na chorü duüxü quiixü. ⁹ Rü ngëmacèx i ngëma duüxügü i Chatanárü ixīgüxü i nügü ixugüxü na chorü duüxügü yixīgüxü natürü tama aixcüma choxrü ixīgüxü, rü tá chanamu na cupëxegu nacaxãpüxügüxücèx na nüxü nacuèxgüxücèx na aixcüma cuxü changechaüxü. ¹⁰ Cuma rü meãma cuyanguxëë i ngëma cuxü chamuxü na aixcüma cuyaxõdmaxü naetüwa i ngëma guxchaxügü i cuxü ngupetüxü. Rü ngëmacèx tá cuxü íchapoxü na tama cuxna nanguxücèx i ngëma guxchaxü i taxü i ñoma i naãnewa tá ínguxü na guxüma i ñoma i naãnecüãx i duüxügüxü naxüxücèx. ¹¹ Rü paxa tá ngëma cuxütawa chaxü. Rü chanaxwëxe i ñuxma meã cumaxüürüü meã cumaxecha, na taxüema cuxna napuxücèx i ngëma curü ãmare. ¹² Rü yíxema nüxü rüporamaëgüxe i guxüma i chixexü, rü Chaunatü ya Tupanaxütawa tá tüxü changëxmagüxëë na tagutáma ngëma ítachoxüxücèx. Rü tümagu tá chanaxümatü i naëga ya Chaunatü ya Tupana. Rü ngëxgumarüü tá ta tümagu chanaxümatü i naëga ya Tupanaãrü ñãne ya Yerucharéü ya ngexwacaxüne ya Tupanaxütawa i daxüguxü i naãnewa íruxixüne. Rü ngëxgumarüü tá ta tümagu chanaxümatü i chauéga i ngexwacaxüxü'. ¹³ Rü yíxema ãchixexë rü name nixí i naga taxñü i ngëma Tupanaãë i Üünexü nüxü ixuxü namaã i ngëma yaxõgüxütücumügü".

Ore ga yema yaxõgüxü ga Laodichéawa yexmagüxücèx ümatüxü

¹⁴ Rü yema chomaã idexaxü rü ñanagürü ta:

"Chanaxwëxe i Laodichéawa ngëxmagüxü i yaxõgüxüãrü ãëxgacücèx cunaxümatü rü ñacurügü tá: 'Ñã nixí i norü ore ya yima aixcüma ixícü ya aixcüma yanguxëëcü i ngëma nüxü yaxuxü rü ore i aixcüma ixíxüxüicatama ixucü. Rü nüma nixí ga inaxügüãxü ga guxüma ga yema Tupana üxü'. ¹⁵ Rü ñanagürü i nümax:

'Choma nüxü chacuèx i guxüma i ngëma cuxüxü. Rü nüxü chacuèx na tama wüxi i duüxü i chauxchi aixü quiixü, natürü tama wüxi i duüxü i aixcüma choxü ngechaüxü quixí. Rü chierü noxtacüma wüxi i duüxü i chauxchi aixü quixígu rü ëxna noxtacüma wüxi i duüxü i aixcüma choxü ngechaüxü quixígu. ¹⁶ Natürü ñuxma na írarüwatama choxü cungechaüxü, rü ngëmacèx tá cuxü íchatèx. Erü tama noxtacüma wüxi i duüxü i chauxchi aixü quixí rü tama noxtacüma wüxi i duüxü i aixcüma choxü ngechaüxü quixí. ¹⁷ Rü cuma cügü quixuxgu rü cumuãrü dñeruãx, rü cumuãrü ngëmaxüãx, rü meãma cuxü naxüpetü, rü taxuüma cuxü nataxu. Natürü i cuma rü tama nüxna cucuèxãchi na chopëxewa rü wüxi i taxuwama mexü quiixü, rü wüxi i ngechaüxüchi quiixü, rü wüxi i taxuüma cuxü ngëxmaxë quiixü, rü ñoma wüxi i ngexetüxüürüü quiixü, rü ñoma wüxi i ngexchiruxüürüü quiixü. ¹⁸ Rü ñuxma rü cuxü chaxucuxë na chauxütawa naxcèx cutaxexücèx i uiru i marü üxüwa iguxü i nüxícatama ixíxü. Rü ngëmaãcü tá aixcüma cuxü nangëxma i curü ngëmaxü. Rü ngëxgumarüü ta cuxü chaxucuxë na chauxütawa naxcèx cutaxexücèx i cuxchiru i cómuxü na ngëmagu quicúxücèx na taxüema cuxü dauxücèx na cunxexchiruxü. Rü ngëxgumarüü ta cuxü chaxucuxë na chauxütawa naxcèx cutaxexücèx i curü mëixëtüxü na curümexëtüxücèx na wena quidauchixücèx. ¹⁹ Choma rü tüxü chaxucuxë rü tüxü ichayarüwëxãchixëë ya guxãma ya yíxema tüxü changechaüxë. Rü ngëmacèx name nixí i nüxü curüxo i cucüma i chixexü, rü aixcüma choxü cungechaü rü cunaxü i ngëma cuxü chanaxwëxexü. ²⁰ Rü dücax, choma rü ñãxwa tümacèx chacagüecha. Rü ngëxguma chi texé choxü ñnügü rü chauxcèx tayawãxnagu, rü tá tümaxütagu chaxücu. Rü tümamaã tá chachibü rü tümã i chomaã. ²¹ Rü yíxema nüxü rüporamaëgüxe i chixexü, rü tá chaugüxütawa tüxü charütogüxëë na chomaã ãëxgacü tixīgüxücèx, yexgumarüü ga choma

rü nüxü na charüporamaëxü ga chixexü, rü ñuxüchi Chaunatüxütawa na chayarütöxürü na namaã äëxgacü chiïxücèx'. ²² Rü yíxema ächixexë rü name nixí i naga taxínü i ngëma Tupanaãe i Üünexü nüxü ixuxü namaã i ngëma yaxögüxütücümügü", ñanagürü ga yema chomaã idexaxü.

4

Tupanaxü nataxëëgü i daxüguxü i nañewa

¹ Rü yemawena ga choma ga Cuáü rü nüxü chadau ga wüxi ga ìãx ga iwāxnaxü ga daxüguxü ga nañewa. Rü yema naga ga nacornetagaraüxü ga noxri nüxü chaxínüxü ga chomaã idexaxü, rü ñanagürü choxü:

“¡Nuxã naxínagü! Rü tá cuxü nüxü chadauxëe i ngëma yixcúra tá ngu-petüxü”, ñanagürü. ² Rü yexgumatama ga choma rü Tupanaãe i Üünexü rü chauãemaã inacuèx, rü daxüwa nanaga. Rü yéma daxüguxü ga nañewa nüxü chadau ga wüxi ga tochicaxü ga mexëchixü ga yéma Tupana nawa rütöxü. ³ Rü guma yema tochicaxüwa rütocü, rü ñoma nuta ya mexëchicü ya yasperüü nixí na namexü rü ñoma nuta ya cornalínarüü nixí na namexü. Rü yema tochicaxüetüwa nayexma ga wüxi ga chirapa ga ñoma nuta ga es-merádarüü mexëchicü. ⁴ Rü yema tochicaxücüwawa nayexmagü ga 24 ga togü ga tochicaxügü ga nüxü ínumaëguächixü. Rü yema tochicaxügüwa narütogü ga 24 ga äëxgacügü ga yaxögüxüârü ixígüxü. Rü cómuxümaã nixãxchiru rü uirunaxcèx nixí ga norü ngëxcuerüügü. ⁵ Rü yema nachica ga Tupana írütöxüwa ínaxüxü ga bëixbëxanexü rü duruanexü rü nagagü. Rü yema tochi-caxüpëxewa nayexma ga 7 ga omügü ga yéma naígüxü. Rü yema omügü nixí ga Tupanaãe i Üünexü ga yema 7 ga yaxögüxütücümümaã icuáxü. ⁶ Rü yema Tupanaärü tochicaxüpëxewa rü ñoma dexáétüwarüü ixíxümaã nachaxu rü nichipetü woruarüü. Rü yema tochicaxüxü ínachomaëguächí ga ägümücü ga daxücüãx ga maxëxü ga guxüwama äxëtüxü naweama rü napëxewa. ⁷ Rü wüxi ga yema daxücüãx ga maxëxü rü nanaxairaxü. Rü yema to rü nanawocaraxü. Rü yema norü tomaëxpüx rü nanaduüxüchiweraxü. Rü yema norü ägümücü rü nanaxíyü i gonagüxüraxü. ⁸ Rü yema ägümücü ga daxücüãx ga maxëxü, rü wüxichigü nüxü nayexma ga 6 ga naxpëxatügü. Rü guxüwama ga naxpëxatüetüwa rü naxpëxatütüüwa rü namuxëtü. Rü nguncü rü chütacü rü ñanagürügüecha:

“Naxüüne, naxüüne, naxüüne nixí ya tórü Cori ya Tupana ya guxüetüwa ngëxmacü rü woetama ngëxmaëchacü”, ñanagürügüecha. ⁹⁻¹⁰ Rü yema daxücüãx ga maxëxü, rü yexguma nüxü yacuëxüügüüxgu ga guma tochi-caxüwa rütocü, rü moxë nüxna naxägügu, rü yema 24 ga äëxgacügü ga yaxögüxüârü rü yima woetama ngëxmaëchacüpëxegu nacaxãpüxügü, rü nüxü nicuëxüügü, rü napëxegu nananu ga norü ngëxcuerüügü. ¹¹ Rü ñanagürügü:

“Pa Torü Cori, Pa Torü Tupanax, cuxü nixí i namexü na ticuëxüügüxü rü cuxü tataxëëgüxü, erü guxüetüwa cungëxma. Yerü cuma cunaxü ga guxüma rü curü ngúchaügüga nixí i nangóxü i ñuxmax”, ñanagürügü.

5

Popera ga idixixüchiga rü Tupana Nane ga ñoma wüxi ga carnerurüü imácüchiga

¹ Rü ñuxüchi nüxü chadau ga guma tochicaxüwa rütocü, rü norü tügünemëxëwa nanange ga wüxi ga popera ga idixixü. Rü düxëtüwa rü aixepewa rü naxãmatü ga yema popera. Rü 7 wa niñaxtachipëxe. ² Rü nüxü

chadau ga wüxi ga norü orearü ngeruü ga daxücüâx ga poraxüchixü ga tagaãcü ícaxü rü ñaxü:

“¿Texé tixí ya yíxema mexe na tayagautanüxü i norü ñaxtachipêxexü rü itayadixgüxü i ñaã popera?” ñaxü. ³ Natürü woo ga daxügüxü ga naãnewa rü bai ga ñoma ga naãnewa rü bai ga yuexütanüwa, rü tataxuma ga texé ga mexe na itayadixgüxü rü nüxü tadaumatüxü na ñuxü ñaxü ga yema popera. ⁴ Rü choma rü poraãcü chaxaxu yerü tataxuma ga texé ga mexê na itayadixgüxü rü nüxü tadaumatüxü na ñuxü ñaxü ga yema popera. ⁵ Natürü wüxi ga yema 24 ga âëxgacügü ga yaxögüxüârü, rü ñanagürü choxü:

“¡Tãxü i cuxaxuxü! Erü yima Cristu ya Yudáta ya airüxü poracü ya âëxgacü ya Dabítaa ixícü, rü marü nüxü narüyexera i guxüma i chixexü. Rü ngêmacèx nüma nixí i namexü na yagautanüâxücèx i ngêma 7 i norü ñaxtachipêxexü i ngêma popera rü na íyawêgüâxücèx”. ⁶ Rü ñuxüchi nüxü chadau ga Tupana Nane ga ñoma wüxi ga carneruxacü ga mèxwa írüdaxürüü yexma chicü naxütagu ga guma tochicaxüwa rütocü rü natanügu ga yema âgümücü ga daxücüâx ga maxêxü rü yema 24 ga âëxgacügü. Rü nüxü nayexma ga 7 ga nachatacuxre ga norü poraarü cuèxruü rü 7 ga naxëtü. Rü guma 7 ga naxëtü rü ngêma nixí i Tupanaãe i Ünexü i guxüma i ñoma i naãnewa namuxüârü cuèxruü ixíxü. ⁷ Rü guma pecaduarü ütanücèx yucü rü guma tochicaxüwa rütocücèx nixü, rü nanayaxu ga yema popera ga norü tügünemêxêwa yexmaxü. ⁸ Rü yexguma nayauxâgu ga yema popera, rü yema âgümücü ga daxücüâx ga maxêxü rü yema 24 ga âëxgacügü rü inacaxgüâpüxü napêxegu ga guma pecaduarü ütanücèx yucü. Rü wüxichigü ga yema âëxgacügü rü nüxü nayexma ga wüxi ga norü paxetarüü ga arpa. Rü yexgumarüü ta nüxü nayexma ga copa ga uirunaxcèx ga pumaratêxemaã napagüxü. Rü yema pumaratêxe rü nayixichi ga yexguma yaxaxgu. Rü yema pumaragü, rü ngêma nixí i Tupanaârü duüxügüârü yumüxêgüârü cuèxruügü. ⁹ Rü nagu nawiyaegü ga wüxi ga wiyae ga yexwacaxüxü ga ñaxü:

“Cuma nixí i cumexü na cunayaxuxü i ngêma popera rü cuyagautanüxü i ngêma norü ñaxtachipêxexü. Yerü cuma rü marü quimèxchirêx, rü cugümaã Tupanaãxü naxcèx cutaxe i nagúxüraüxü i duüxügü i nagúxüraüxü i nachiüânecüâx i nagúxüraüxü i nagawa idexagüxü. ¹⁰ Rü ngêmagüxü cuxüchica i ngextá âëxgacü íquiixüwa, rü Tupanaârü ngüxêëruügüxü cuyaxígüxêë na cumaã wüxigu guxü i naãnemaã inacuèxgüxücèx”,

ñanagürügü. ¹¹ Rü yemawena ichadawenü, rü nüxü chaxínü ga naga ga muxüchixüma ga Tupanaârü orearü ngeruügü ga daxücüâx. Rü norü ngäxüwa nayexma ga yema tochicaxü rü yema âgümücü ga daxücüâx ga maxêxü rü yema 24 ga âëxgacügü. Rü namuxüchima ga yema Tupanaârü orearü ngeruügü ga daxücüâx ga yema yexmagüxü. ¹² Rü tagaãcü ñanagürügü:

“Daa nixí ya yima ñoma wüxi i carneruacürüü imácü ga pecaduarü ütanücèx yucü. Rü nüma nixí i namexü na guxüârü âëxgacü yíixü, rü guxüârü yora yíixü, rü guxü i cuèx nüxü ngêxmaxü, rü guxüârü yexera naporaxü. Rü nüma nixí i namexü na guxâma nüxü ngechaügüxü rü nataxêëgüxü rü nüxü icuèxüügüxü”, ñanagürügü. ¹³ Rü nüxü chaxínü ta ga naga ga guxüma ga yema Tupana üxü i daxügüxü i naãnewa rü ñoma i naãnewa rü naãnetüüwa rü taxtü i taxüwa ngêxmagüxü ga ñagüxü:

“Name nixí na guxügutáma guxâma nüxü icuèxüügüxü rü nüxü ngechaügüxü rü nataxêëgüxü ya yima pecaduarü ütanücèx yucü rü yima ngêma tochicaxüwa rütocü, erü nümagü nixí i guxüguma âëxgacügü

yixīgüxü”, ñanagürügü. ¹⁴ Rü yema ägümücü ga daxüçüâx ga maxëxü rü ñanagürügü:

“Ngëmaäcü yî”, ñanagürügü. Rü yema 24 ga äëxgacügü rü inacaxgüäpüxü rü nüxü nicuëxüügü.

6

Yema 7 ga ñaxtachipëxe- ruüchiga

¹ Rü ñuxüchi nüxü chadau ga yexguma guma pecaduarü ütanüçex yucü yagauyegu ga yema nüxïraüxü ga norü ñaxtachipëxexü ga yema popera. Rü nüxü chaxïnü ga wüxi ga yema daxüçüâx ga maxüxü ga tagaäcü ñoma duruanexürü ñaxü choxü:

“¡Nuã naxü!” ñaxü. ² Rü ichadawenü rü nüxü chadau ga wüxi ga cowaru ga cómuxü. Rü yema naetüwa rütoxü rü nüxü nayexma ga wüxi ga norü würa. Rü wüxi ga ngëxcuerü nüxna naxã. Rü poraëëcuma norü cowarumaã inaxüãchi na duüxügüxü nayexeraxüçex. ³ Rü yexguma guma pecaduarü ütanüçex yucü yagauyegu ga yema norü taxre ga yema poperaarü ñaxtachipëxexü, rü nüxü chaxïnü ga yema norü taxre ga yema daxüçüâx ga maxüxü ga ñaxü choxü:

“¡Nuã naxü!” ñaxü. ⁴ Rü yema naxü ga wüxi ga cowaru ga dauxü. Rü yema naetüwa rütoxü rü wüxi ga tara ga taxü nüxna naxã. Rü yexgumarü ta pora nayaxu na iyanaxoxëëaxüçex na nügü nangechaügüxü ga duüxügü. Rü yemaäcü nanaxü na nügü nadëixüçex ga duüxügü. ⁵ Rü yexguma guma pecaduarü ütanüçex yucü yagauyegu ga yema norü tomaëxpüx ga yema poperaarü ñaxtachipëxexü, rü nüxü chaxïnü ga yema norü tomaëxpüx ga yema daxüçüâx ga maxüxü ga ñaxü choxü:

“¡Nuã naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naetüwa rütoxü rü naxmëxwa nüxü nayexma ga wüxi ga tacüarü yaruü ga balanza. ⁶ Rü nüxü chaxïnü ga wüxi ga naga ga yema daxüçüâx ga maxëxüärü ngäxütanüwa inaxüxü ga ñaxü:

“Wüxi i ngunexüärü puracütanü rü naxätanü i wüxi i kilo i trigu. Rü wüxi i ngunexüärü puracütanü naxätanü i tomaëxpüx i kilo i chebada. ¡Natürü täxü i cuyanatauxëëxü i ngëma chixü rü yima binu!” ñanagürü. ⁷ Rü yexguma guma pecaduarü ütanüçex yucü yagauyegu ga yema norü ägümücü ga yema poperaarü ñaxtachipëxexü, rü nüxü chaxïnü ga yema norü ägümücü ga yema daxüçüâx ga maxëxü ga ñaxü choxü:

“¡Nuã naxü!” ñaxü. ⁸ Rü ichadawenü rü nüxü chadau ga wüxi ga cowaru ga dexexü. Rü yema naetüwa rütoxü rü Yu nixi ga naega. Rü yema naweama ne üxü, rü Yuexüchica nixi ga naega. Rü yema taxre nanayauxgü ga pora na ñoma ga naãnewa rü wüxi ga yema norü ägümücütücumü ga duüxügümaã inacüxgüxüçex na daimaã rü taiyamaã rü daaweanemaã rü ngoxo idüraexümaã nayuexëëaxüçex. ⁹ Rü yexguma guma pecaduarü ütanüçex yucü yagauyegu ga yema norü wüximëëxpüx ga yema poperaarü ñaxtachipëxexü, rü nüxü chadau ga wüxi ga nachica ga ngextá Tupanacëx naxünagü nawa yagugüxü na nüxna naxägüâxüçex. Rü yema nachicatüüwa nüxü chadau ga naãëgü ga yema duüxügü ga Tupanaärü orexü na yaxugüxüçex nadëixü. ¹⁰ Rü yema naãëgü rü tagaäcü ñanagürügü:

“Pa Torü Cori ya Guxüetüwa Ngëxmacü rü Üünecü rü Ixaixcümäcux, ¿ñuxgura tá ta i nüxna cucaxü rü cunapoxcuexü i ngëma duüxügü i chixexü ga toxü dëixü?” ñanagürügü. ¹¹ Rü ñuxüchi ga Tupana rü wüxichigü ga yema duüxügüna nanaxã ga naxchiru ga máxü rü cómuxü. Rü yema duüxügüäëgüxü ñanagürü:

“¡Paxaãchi iperüngüë ñuxmatáta yangu i peeneëgü i Cristuaxü puracüexü i pexrüü tá dèixü!” ñanagürü. ¹² Rü yexguma guma pecaduarü ütanücèx yucü yagauyegu ga yema norü 6 ga yema poperaarü ñaxtachipèxexü, rü nüxü chadau ga poraãcü na naxiãxãchianexü. Rü üèxcü rü wüxi ga naxchiru ga waxcharaxürüü nixĩ. Rü tauemacü rü guxüwama nagürüü naduema. ¹³ Rü woramacurigü rü èxtagü rü daxüwa narüyi rü ñoma ga naãnegu nayi. Rü ñoma orix i doxüxüma buanecü ya tacü rüyixèëxürüü nixĩ. ¹⁴ Rü guxüma i daxüwa nüxü idauxü rü inayarütaxu. Rü ñoma wüxi i popera i dixcumüãchixü rü iiyarütaxuxürüü nixĩ. Rü guxüma ga mèxpünegü rü capaxügü rü nixĩgachi ga nachicawa. ¹⁵ Rü ñoma ga naãnewa yexmagüxü ga nachiuãnegüarü äëxgacügü, rü mèxpünemagu rü mèxpüneärü nutatanügu nicuxgü. Rü wüxigu yexma namaã nicuxgü ga yema togü ga äëxgacügü ga taxügü ga ñoma ga naãnemaã icuèxgüxü, rü churaragüarü äëxgacügü ga taxügü, rü yema duüxügü ga muärü dīeruãxgüxü, rü yema duüxügü ga ñoma ga naãnewa poraexü, rü guxüma ga duüxügü ga coriãxgüxü, rü guxüma ga duüxügü ga ngearü coriãxgüxü. ¹⁶ Rü guxüma ga nümagü, rü guma mèxpünexü rü guma nutagüxü ñanagürügü:

“¡Toétügu peyi na toxü ipicuxgüxüçèx naxchaxwa ya yima ngëma tochi-caxüwa rütocü, rü naxchaxwa ya yima pecaduarü ütanücèx yucü erü tama tanaxwèxe na toxü napoxcuexü! ¹⁷ Erü marü ínangu i ngëma ngunexü i äücümaxü i nagu napoxcuexü i ngëma duüxügü i tama Tupanaärü ixĩgüxü. ¿Rü texé tá namaã tabora i ngëma?” ñanagürügü.

7

Yema Yudíugü ga nacatüwa cuèxruüãxgüxüchiga

¹ Rü yemawena rü nüxü chadau ga ägümücü ga Tupanaärü orearü ngeruügü ga daxüçüãx ga ñoma ga naãneärü ägümücüpèxegu chigüxü. Rü ínanapoxügü ga gucüma ga buanecügü na tama waixüümüãneëtügu naxüxüçèx, rü tama taxü i taxtüétügu naxüxüçèx, rü bai i tacü rü naítügu naxüxüçèx.

² Rü yexgumarüü ta nüxü chadau ga wüxi ga Tupanaärü orearü ngeruü ga daxüçüãx ga üèxcü íyarügoxüwaama ne üxü. Rü nüxü nayexma ga Tupana ya Maxüçüarü tacüarü üégarü. Rü nüma rü tagaãcü nüxna nacagü ga yema togü ga ägümücü ga Tupanaärü orearü ngeruügü ga nayauxgüxü ga pora na nachixexèëgüãxüçèx ga guxüma ga waixüümü rü guxüma ga taxü ga taxtü.

³ Rü ñanagürü nüxü:

“¡Tãxü i yatacüma penachixexèëxü i waixüümü rü taxtü i taxü rü naĩgü, ñuxmatáta nacatüwa tayaxüarü cuèxruüãxgü i ngëma Tupanaärü duüxügü ixĩgüxü!” ñanagürü. ⁴ Rü nüxü chaxĩnü ga ñuxre na yĩxü ga yema cuèxruüãxgüxü. Rü guxüma ga Yudíugütanüwa rü 144,000 nixĩ. ⁵⁻⁸ Rü yema cuèxruüãxgüxü ga Yudíugü, rü ñaã nixĩ:

Yudátaagü - 12,000

Rubéütaagü - 12,000

Gadutaagü - 12,000

Achetaagü - 12,000

Netarítaagü - 12,000

Manachétaagü - 12,000

Chimeütaagü - 12,000

Lebítaagü - 12,000

Ichacátaagü - 12,000

Chaburãütaagü - 12,000

Yúchetaagü - 12,000

Beyamítaagü - 12,000

⁹ Rû yemawena ichadawenü, rû nüxü chadau ga muxüchixüma ga nagüxüraüxü ga duüxügü ga nagüxüraüxü ga nagawa idexagüxü ga guxüma ga nachiuñanewa ne ixü. Rû yema tochicaxüpëxegu rû guma pecaduarü ütanücëx yucüpëxegu nachigü. Rû yema na namuxüchixü rû taxucürüwa texé tayaxugü na ñuxre yüxü. Rû naxchiru ga icómüxü rû imáxümaã nixäxchiru. Rû naxmëxwa nanangegü ga wairaátügü. ¹⁰ Rû guxüma ga nümagü rû tagaãcü ñanagürügü:

“Yima tórü Tupana ya tochicaxüwa rütocü rû yima pecaduarü ütanücëx yucü nixi ya tüxü maxëxëgücü”, ñanagürügü. ¹¹ Rû guxüma ga Tupanaärü orearü ngeruügü ga daxücüãx rû nüxü inachimaëguãchi ga yema tochicaxü rû yema 24 ga äëxgacügü rû yema ägümücü ga daxücüãx ga maxëxü. Rû yema tochicaxüpëxegu nanangücuchitanü ga yema orearü ngeruügü, rû Tupanaxü nicuëxüügü. ¹² Rû ñanagürügü:

“Rû ngëmaãcü yï. Rû nüma nixi i namexü na guxüguma guxäma nüxü icuëxüügüxü, rû nataxëëgüxü, rû moxë nüxna ixägüxü, rû nüxü ingechaügüxü, erü guxü i cuëx nüxü nangëxma, rû guxüetüwa nangëxma, rû guxüärü yexera napora. Rû ngëmaãcü yï”, ñanagürügü. ¹³ Rû ñuxüchi wüxi ga yema 24 ga äëxgacügü rû choxna naca, rû ñanagürü:

“¿Texëgü tixigü ya yixema cómüchirügüxe, rû ngextá ne taxí?” ñanagürü. ¹⁴ Rû choma chanangãxü, rû ñacharügü:

“Pa Corix, cuma nixi i nüxü cucuáxü na texëgü tixigüxü”, ñacharügü. Rû yexguma ga nüma rû ñanagürü:

“Yixemagü tixigü ga nawa ngupetütanüxë ga yema ngüxü ga taxü rû marü tügü iyauxgüchiruxe nagüwa ga guma pecaduarü ütanücëx yucü. Rû ngëmacëx nixi i ticómüchiruxü. ¹⁵ Rû ngëmacëx nixi i Tupanaärü tochicaxüpëxewa tangëxmagüechaxü rû ngunecü rû chütacü rû Tupana íngëxmaxüwa nüxü tapuracüxü. Rû nümatama ya Tupana ya tochicaxüwa rütocü rû tüxna nadau. ¹⁶ Rû marü tagutáma wenaxärü taiya tüxü nangux, rû tagutáma titawae. Rû marü tagutáma üëxcü tüxü nigu, rû tagutáma üëxcüarü naianexü tüxü nangux. ¹⁷ Erü yima pecaduarü ütanücëx yucü i ngëma tochicaxüxütawa ngëxmacü, rû tá aixcüma meã tüxna nadau ñoma carnerugüna idauxürüü. Rû nawa tá tüxü nagagü i ngëma dexáarü chuxchuxügü i maxëëruü. Rû Tupana tá tüxü ínanapi i guxüma i tümagüüxëtü”, ñanagürü.

8

Yema norü 7 ga ñaxtachipëxeruüchiga rû yema buetare ga uirunaxcëxchiga

¹ Rû yexguma guma pecaduarü ütanücëx yucü yagauyegu ga yema norü 7 ga yema poperaarü ñaxtachipëxexü, rû ngãxü ga ora nachipetüanemare ga daxügüxü ga nañewa. ² Rû ñuxüchi nüxü chadau ga yema 7 ga Tupanaärü orearü ngeruügü ga daxücüãx ga yexma Tupanapëxegu chigüxü. Rû wüxichigü nanayaxu ga norü corneta ga nüxna naxãxüne. ³ Rû yemawena ínangu ga wüxi ga to ga Tupanaärü orearü ngeruü ga daxücüãx. Rû yema nanange ga wüxi ga norü buetare ga uirunaxcëx ga pumaraarü gutëxeruü. Rû yema uirunaxcëx ga pumaraarü gutëxeruütaxmüpëxegu nachi. Rû nanayauxtëxe ga taxü ga pumara ga nüxna naxãxü na yema tochicaxüpëxewa yexmaxü ga pumaraarü gutëxeruütaxmüwa yaguãxücëx, na yemaãcü Tupanana naxãxücëx ga yema pumaratëxe na yema pumaraema rû wüxigu Tupanaärü duüxügüarü yumüxëmaã Tupanaxütawa nanguxücëx. ⁴ Rû yema pumaratëxe ga yema orearü ngeruüãxü yexmaxü rû daxü naxüema wüxigu namaã ga Tupanaärü duüxügüarü yumüxëgü ñuxmata Tupanaxütawa

nangu. ⁵ Rū ñuxũchi ga yema orearũ ngeruũ rũ nanayaxu ga yema buetare ga pumaraarũ gutẽxeruũ. Rũ yema pumaraarũ gutẽxeruũtaxmũwa nanayaxu ga ãwe ga naĩcũ, rũ gumamaã nanaxũãcu ga guma buetare. Rũ ñuxũchi ñoma ga naãneetũgu nanaña. Rũ yexgumatama poraãcũ naduruãchiane, rũ poraãcũ nicuxcuane rũ nibèjxbẽxane rũ naxĩãxãchiane.

Tupanaãrũ orearũ ngeruũgũ ga daxũcũãxãrũ cornetachiga

⁶ Rũ yexguma ga yema ⁷ ga Tupanaãrũ orearũ ngeruũgũ ga daxũcũãx ga icornetaãxũ, rũ nũgũ ínamexẽegũ na nagu yacuegũxũcèx. ⁷ Rũ wũxi ga yema Tupanaãrũ orearũ ngeruũ rũ nũxĩra nayacue ga norũ corneta. Rũ yexgumatama ñoma ga naãneetũgu narũyi ga gáuxũ rũ ùxũema ga nagũmaã ãeũxũ. Rũ wũxi ga yema norũ tomaẽxpũxarũ ùye ga ñoma ga naãne rũ nixa. Rũ yexgumarũũ ta wũxi ga yema norũ tomaẽxpũxarũ ùye ga naĩxnecũ rũ nixa. Rũ guxũma ga natũane rũ nixae. ⁸ Rũ yema norũ taxre ga Tupanaãrũ orearũ ngeruũ rũ nayacue ga norũ corneta. Rũ ñuxũchi wũxi ga tacũ ga taxũchixũ ga namèxpũneraũxũ ga iyauxraxũ, rũ yexma taxtũ ga taxũgu nanaña. Rũ wũxi ga yema norũ tomaẽxpũxarũ ùye ga taxtũ rũ nagũxũ nananguxuchi. ⁹ Rũ wũxi ga yema norũ tomaẽxpũxarũ ùyetũcumũ ga yema taxtũwa maxẽxũ, rũ nayue. Rũ yexgumarũũ ta wũxi ga yema norũ tomaẽxpũxarũ ùyetũcumũ ga wapurugũ, rũ inayi. ¹⁰ Rũ yema norũ tomaẽxpũx ga Tupanaãrũ orearũ ngeruũ, rũ nayacue ga norũ corneta. Rũ ñuxũchi wũxi ga taxũchicũ ga woramacuri ga taemaxũchicũ rũ daxũwa narũngu. Rũ wũxi ga omũ ga ixaxũrũũ nixĩ. Rũ nagu nangu ga wũxi ga yema norũ tomaẽxpũxarũ ùye ga natũgũ rũ natũxacũgũ. ¹¹ Rũ guma woramacuri rũ ùxũxũ nixĩ ga naega. Rũ wũxi ga yema norũ tomaẽxpũxarũ ùye ga guxũma ga dexá rũ naxũxchiũ. Rũ muxũma ga duũxũgũ rũ yema dexáwa nayue yerũ naxũxchiũ. ¹² Rũ yema norũ ãgũmũcũ ga Tupanaãrũ orearũ ngeruũ rũ nayacue ga norũ corneta. Rũ wũxi ga yema norũ tomaẽxpũxarũ ùye ga ùèxcũ rũ nixo. Rũ yexgumarũũ ta wũxi ga yema norũ tomaẽxpũxarũ ùye ga tauemacũ rũ woramacurigũ rũ èxtagũ rũ nixo. Rũ yemaãcũ wũxi ga yema norũ tomaẽxpũxarũ ùye ga guxũma ga yema rũ naxẽãne. Rũ ga ngunecũ rũ ãgũmũcũ ga ora naxẽãne. Rũ ga chũtacũ rũ ãgũmũcũ ga ora nataxuma ga tauemacũ rũ bai ga woramacurigũ rũ bai ga èxtagũ. ¹³ Rũ yemawena ichadawenũ rũ nũxũ chaxĩnũ ga wũxi ga ìyũ ga daxũgu íxexeũxũ ga tagaãcũ ñaxũ:

“Nangechaũtũmũũgũ i ngẽma duũxũgũ i yea pecaduãxũ i naãnewa maxẽxũ i ngẽxguma yacuegũãgu tá ya norũ cornetagũ i ngẽma togũ i tomaẽxpũx i Tupanaãrũ orearũ ngeruũgũ”, ñaxũ.

9

¹ Rũ yema norũ wũximẽẽxpũx ga Tupanaãrũ orearũ ngeruũ, rũ nayacue ga norũ corneta. Rũ nũxũ chadau ga wũxi ga woramacuri ga daxũwa rũngucũ ga ñoma ga naãnegu ngucũ. Rũ guma woramacuri nanayaxu ga yema ãxmaxũ ga taguma iyacuáxũãrũ chawi. ² Rũ nayawãxna ga yema ãxmaxũ ga taguma iyacuáxũ. Rũ yema inayagoema ga caxixũ ñoma wũxi i taxũ i ùxearũ caxixũrũũ. Rũ yema caxixũ rũ nanaxẽẽmaxẽẽ ga ùèxcũ. ³ Rũ yema caxixũwa ínachoxũ ga munũgũ ga naãneetũgu yixũ. Rũ yema munũgũ rũ nanayauxgũ ga pora ga nũxna naxãxũ na ñoma tuxchinawerũũ duũxũgũxũ nachixũcèx. ⁴ Rũ yema munũmaã nũxũ nixu na tama natũanexũ nachixexẽẽxũcèx rũ bai i tacũ rũ nanetũgũ rũ bai i tacũ rũ naĩgũ. Natũrũ nanamu na nachixexẽẽgũãxũcèx ga yema duũxũgũ ga tama Tupanaãrũ cuèxruũ nacatũwa yexmaxũ. ⁵ Natũrũ tama nanamu na yema duũxũgũxũ nadèixũcèx. Natũrũ nanamu na ngũxũ

nüxü yangexêemaregüxcèx ga wüximêxpüx ga tauemacü. Rü yema ngúxü ga nüxü yangexêégüxü, rü ñoma tuxchinawe duüxügüxü chixürüü nixî. ⁶ Rü ngêma ngunexügügu rü duüxügü tá naxcèx nadaugü na nayuexü, natürü täütáma nayue. ⁷ Rü yema munügü rü ñoma cowaru i guerawa ìxürüü nixîgü. Rü naêruwa nüxü nayexma ga tacü ga ñoma ngèxcuerüü ga uirunaxcèxrüü ixîgüxü. Rü nachiwe rü nanaduüxüchiweraxügü. ⁸ Rü nayaegü rü ñoma ngeãxyaerüü nixîgü. Rü napütägü rü ñoma aipütägürüü nixîgü. ⁹ Rü naxünewa nayexma ga norü poxüruü ga fierunaxcèx. Rü naxpèxatügüga rü ñoma muxüchine ya caru ya guerawa cowaru tügünegarüü ixîxü. ¹⁰ Rü nareexügü rü ñoma tuxchinawerüü naxãnegu. Rü yema naneguwa rü naxãguchata na wüximêxpüx ya tauemacü duüxügüxü ngúxü yangexêégüxcèx. ¹¹ Rü yema munügüarü ãêxgacü, rü yema ãxmaxü ga taguma iyacuáxüârü dauruü nixî. Rü Yudiügügawa ga yema munügüarü ãêxgacü, rü Abadóü nixî. Rü Griégügügawa rü Apolióü nixî. Rü ngêma rü: “Chixexêëruü”, ñaxüchiga nixî. ¹² Rü yexma nayacuèx ga yema nüxîraüxü ga chixexü ga taxü, natürü ínayaxüama ga to ga taxre. ¹³ Rü yema norü 6 ga Tupanaârü orearü ngeruü rü nayacue ga norü corneta. Rü nüxü chaxînü ga wüxi ga naga ga yema Tupanapèxewa yexmaxü ga uirunaxcèx ga pumaraarü gutèxeruütaxmüwa inaxüxü. ¹⁴ Rü yema naga rü nanamu ga yema orearü ngeruü ga cornetaãxü, rü ñanagürü nüxü:

“¡Yawêgüxü i ngêma ägümücü i orearü ngeruügü i Chatanáârü ixîgüxü i taxtü i Eufrátegu ngãxügüxü!” ñanagürü. ¹⁵ Rü yemaäcü niwêgüxü ga yema ägümücü ga orearü ngeruügü na nadaiãxüxcèx ga wüxi ga yema norü tomaèxpüxarü üyetücumü ga duüxügü. Yerü ga yema orearü ngeruügü rü woetama yemacèx ínamemaregü na yema ora rü yema ngunexü rü guma tauemacü rü guma taunecü nadaiãxüxcèx ga yema duüxügü. ¹⁶ Rü nüxü chaxînü na ñuxre na yîixü ga yema orearü ngeruügüarü churaragü ga cowaruétügu ìxü. Rü 200 miyónegü nixîgü. ¹⁷ Rü yemaäcü nixî ga nüxü chadauxü ga yema cowarugü ga yexguma changoxetügu. Rü yema churaragü ga yema cowaruétügu ìxü rü nüxü nayexma ga norü ngèxcuxünexü ga poxüruü ixîxü ga ñoma üxüxetürüü iyauraxü. Rü yema poxüruü rü nixãmatü rü nidaumatü rü niyèuxmatü rü nidexmatü. Rü yema cowaruerugü rü ñoma aierurüü nixîgü. Rü naãxgüwa ínaxüxü ga üxüema rü caxixü rü azufre. ¹⁸ Rü wüxi ga norü tomaèxpüxarü üyetücumü ga duüxügü rü nayue namaã ga yema tomaèxpüx ga chixexêëruü ga üxüema rü caxixü rü azufre ga yema cowarugüèxwa íchoxüxü. ¹⁹ Yerü ga yema cowarugü rü naãxwa rü nareexüwa nixî ga nüxü nayexmaxü ga norü pora na duüxügüxü nadèixüxcèx. Yerü ga nareexügü rü ñoma äxtaperüü nixîgü, rü yemamaã nanangõx ga duüxügü rü ngúxü nüxü ningexêë rü nanadai. ²⁰ Natürü ga yema togü ga duüxügü ga tama yema poxcuruügümaã yuexü, rü tama nüxü narüxoe ga yema chixexügü ga naxügüxü. Rü tama nüxü narüxoe na nüxü yacuèxüügüxü ga ngoxogü rü norü tupanenetachicünèxãgü ga uirunaxcèx rü dîërumünaxcèx rü cobrenaxcèx rü nutagünaxcèx rü nañnaxcèx. Rü yemaäcü nüxü nicuèxüügüama ga yema norü tupanenetachicünèxãgü ga ngearü maxüãxü rü tama nüxü dauxü rü tama nüxü ìnüxü rü tama ixüxü. ²¹ Rü tama nüxü narüxoe na namáëtagüxü, rü yayuüexü, rü nangêãégüxü rü nangîteèxgüxü.

10

Orearü ngeruü ga nüxü yexmaxü ga popera ga idixixüchiga

¹ Rū nūxū chadau ga wūxi ga to ga Tupanaārū orearū ngeruū ga daxūguxū ga naānewa írūxīxū. Rū wūxi ga caixanexūārū ngāxūwa nayexma, rū wūxi ga chirapa naétūgu nabo. Rū nachiwe rū ñoma üèxcürüū niyauracüü. Rū naparagū rū ta ñoma üxüemarüū niyauracüü. ² Rū naxmēxwa nūxū nayexma ga wūxi ga poperaxacü ga íwēgūxū. Rū norü tūgūnepara rū taxtū i taxūetūgu nachicutü. Rū norü toxwepara rū waixūmüānegu nachicutü. ³ Rū ñuxūchi ga nūma rū tagaācū aita naxū ñoma wūxi ya ai ya tagaācū aita ücürüū. Rū yexguma aita naxūxgu rū 7 ēxpūxcūna naduruāchiane. ⁴ Rū yexguma yema 7 ēxpūxcūna na naduruāchianexūguwena rū chanaxūmatūchaū. Natürü nūxū chaxīnū ga wūxi ga naga ga daxūguxū ga naānewa inaxūxū ga ñaxū choxū:

“¡Tāxū i cunangoxēēxū i ngēma 7 i duruanexū nūxū ixuxū! ¡Rū ngexrūma na cunaxūmatūxū!” ñaxū choxū. ⁵ Rū ñuxūchi ga yema Tupanaārū orearū ngeruū ga nūxū chadauxū na taxtū ga taxūetūgu rū waixūmüetūgu nachicutūxū, rū daxū naxunagū ga norü tūgūnechacüü. ⁶ Rū inaxuneta naegagu ga Tupana ya yima guxūguma maxūcū ya yima naxūcū i daxūguxū i naāne rū ñoma i naāne rū taxtū i taxū rū guxūma i tacū nawa ngēxmagūxū. Rū ñanagürü ga yema orearū ngeruū:

“Ñuxma rū marü tāūtāma nuxcū ningu i ngēma Tupana nūxū ixuxū. ⁷ Erü ngēxguma nawa nanguxgu na ngēma norü 7 i Tupanaārū orearū ngeruū inaxūgūxū na yacueāxū ya norü corneta, rū ngēxguma tá nixī i yanguxū ga yema noxri ēxūguxū ga Tupanaārū uneta, yema nuxcūmaūgūxū ga norü orearū uruūgūmaā nūxū yaxuxū”, ñanagürü. ⁸ Rū yema naga ga noxri nūxū chaxīnūxū ga daxūguxū ga naānewa inaxūxū, rū wenaxārū chomaā nidexa. Rū ñanagürü choxū:

“¡Naxūtawa naxū i ngēma Tupanaārū orearū ngeruū i taxtū i taxūetūgu rū waixūmüāneetūgu chicutūxū! ¡Rū nūxna nayaxu i ngēma poperaxacü i marü íwēgūxū i naxmēxwa ngēxmaxū!” ñanagürü. ⁹ Rū naxūtawa chaxū ga yema orearū ngeruū, rū nūxna naxcèx chaca ga yema poperaxacü na choxna naxāxūcèx. Rū nūma rū ñanagürü choxū:

“Ñā nixī. ¡Rū nayaxu rū nangōx! Rū cuèxwa rū berurerüū tá namaīcura. Natürü cuanūwa rū tá nanaxūxāchi”, ñanagürü choxū. ¹⁰ Rū yema orearū ngeruūmēxēwa chanayaxu ga yema poperaxacü, rū chanangōx. Rū chauèxwa rū berurerüū namaīcura. Natürü yexguma chanangōxguwena rū chauanūwa rū nanaxūxāchi rū changuxneca. ¹¹ Rū ñuxūchi chomaā nūxū nixu, rū ñanagürü choxū:

“Name nixī na wenaxārū Tupanaārū orexū quixuxū namaā i muxūma i nagūxūraūxū i duūxūgū, rū muxūma i nachiūānecūāxgū i duūxūgū, rū muxūma i duūxūgū i to i nagawa idexagūxū, rū muxūma i nachiūānegūarū āēxgacūgū”, ñanagürü choxū.

11

Taxre ga orearū uruūchiga

¹ Rū yemawena chanayaxu ga wūxi ga dexnemenèxā ga ngugürüū ixīxūne ga choxna naxāxūne. Rū guma choxna naxācū rū ñanagürü choxū:

“¡Inachi rū nangugū ya yima Tupanapata rū ngēma pumaraarū gutēxerūtaxmū! ¡Rū yaxugū rū ñuxre yīxū i ngēma duūxūgū i ngēma Tupanaxū icuèxūūgūxū! ² ¡Natürü ngēma naāxtū ya Tupanapata, rū tāūtāma cunangugū! Erü ngēma duūxūgū i tama Tupanaāxū yaxōgūxūna marü nanaxā. Rū nūmagū rū tomaēxpūx ya taunecūarū ngāxū tá chixexū namaā naxūgū ya yima ñāne ya üünene ya Yerucharéū. ³ Rū choma rū tá chanamu i taxre i chorü orearū uruūgū na 1,260 i ngunexū duūxūgūmaā

nüxü yaxugüxcèx i chorü ore. Rü nümagü i ngēma taxre rü tá niwēxchiru na ngēmawa duüxügü nüxü cuèxgüxcèx na ngechaü nüxü ngüxgüxü”, ñanagürü choxü. ⁴ Rü ngēma taxre i orearü uruügü nixi i norü cuèxruü i ngēma taxre i nanetü i oribu rü ngēma taxre i weraarü üruügü i tórü Cori ya ñoma i naâneärü yora ixícüpēxewa ngēxmagüxü. ⁵ Rü ngēxguma texé chixexü namaã ügüchaügu i ngēma taxre i orearü uruügü, rü nümagü rü üxüema ya naãxwa ínacuexechinemaã tüxü tá ínagu. Rü ngēmaäcü tá inayanaxoxēē i norü uwanügü. Rü ngēmaäcü tá tüxü nadai ya yixema chixexü namaã ügüchaüxē. ⁶ Rü ngēma taxre i orearü uruügü rü nüxü nangēxma i pora na iyachaxächixüxcèx ya pucü na tama napuxüxcèx i guxüma i ngēma 1,260 i ngunexügü i nagu Tupanaärü orexü yaxugüxü. Rü ngēxgumarüü ta nüxü nangēxma i pora na nagüxü yaxixēēgüäxüxcèx i dexá. Rü ngēxgumarüü ta nüxü nangēxma i pora na ñoma i naãnewa namugüäxüxcèx i nagüxüraüxü i poxcuruügü na ngēmaäcü ngüxü duüxügüxü yangexēēgüxcèx i ngēxguma ngēma taxre naxwèxegügu. ⁷ Natürü ngēxguma ngēma taxre i orearü uruügü nagüxēēgügu na nüxü yaxugüxü i Tupanaärü ore, rü ngēma ngoxo i ngēma äxmaxü i taguma iyacuáxüwa íxüxüxü, rü tá ngēma taxrena nayuxu. Rü tá nüxü narüyexera, rü tá nanadai. ⁸ Rü ngēma naxünegü i ngēma taxre rü tá yima ñāne ga tórü Cori nawa curuchawa ipotane ya Yerucharéüärü ítamügüwa nawogü. Rü yima ñāne rü nachixe rü ngēmacèx Chodomaärü ñānemaã rü Equituanemaã nanaxugü. ⁹ Rü tomaēxpüx i ngunexüärü ngäxü rü muxüma i nagüxüraüxü i duüxügü rü muxüma i guxü i nachüüānecüäx i duüxügü rü muxüma i duüxügü i to i nagawa idexagüchigüxü, rü tá nüxü nadaugü i naxünegü. Rü täütāma nanaxwèxegü na texé inatèxgüxü. ¹⁰ Rü ngēma duüxügü i ñoma i naãnewa maxēxü rü tá nataāēgü na marü nayuexü i ngēma taxre. Rü ngēma na poraäcü nataāēgüxüchixü rü tá nügüna āmare naxāgü, yerü yema taxre ga orearü uruügü rü poraäcü nanachixewe rü naāēwa nanangüxēēgü. ¹¹ Natürü yema tomaēxpüx ga ngunexüärü ngäxüguwena, rü Tupana wenaxärü nanamaxēxēē ga yema taxre. Rü wenaxärü ínarüdagü. Rü guxüma ga yema duüxügü ga nüxü daugüxü rü poraäcüxüchi namuüē. ¹² Rü ñüxüchi ga yema taxre ga orearü uruügü, rü nüxü naxüñüē ga wüxi ga naga ga tagaäcü daxügüxü ga naãnewa inaxüxü ga ñaxü:

“¡Nuã daxüwa pexi!” ñaxü. Rü yemaäcü ga nümagü rü wüxi ga caixanexügu daxügüxü ga naãnewa naxi. Rü norü uwanügü rü yēma nüxü narüdaunü.

¹³ Rü yexgumatama poraäcü naxiäxächiane. Rü wüxi ga yema norü 10 arü üye ga guma ñāne, rü niwèxgü. Rü 7,000 ga duüxügü nayue namaã ga yema ñāxächiane. Rü yema togü ga duüxügü ga maxēxü rü poraäcüxüchi namuüē. Rü Tupana ya daxügüxü i naãnewa ngēxmacüxü nicuèxüügü. ¹⁴ Rü yexma nayacuèx ga yema norü taxre ga chixexü. Natürü paxa tá ínangu i ngēma norü tomaēxpüx ixixü.

Guma norü 7 ga cornetachiga

¹⁵ Rü yema norü 7 ga Tupanaärü orearü ngerüü, rü nayacue ga norü corneta. Rü nayexma ga nagagü ga tagaäcü daxügüxü ga naãnewa inaxügüxü ga ñagüxü:

“Ñüxma rü yima mecü na namaã inacuèxgüxü i ñoma i naāne, rü nüma nixi ya tórü Cori ya Tupana rü Nane ya Cristu. Rü nüma rü guxügutāma namaã inacuèxgü”, ñagüxü. ¹⁶ Rü nümagü ga yema 24 ga äēxgacügü ga norü tochicaxügüwa rütogüxü ga Tupanapēxewa, rü yexma nanangücuchitanü, rü Tupanaxü nicuèxüügü. ¹⁷ Rü ñanagürügü:

“Pa Torü Cori ya Tupana ya Guxüärü Yexera Poracüx, cuma rü woetama cuyexmaēcha, rü ñüxma rü ta cungēxmaēcha. Rü moxē cuxna taxāgü, erü

marü cugümëxëwa cunangëxmaxëë i guxüma, rü marü icunaxügü na namaã icucuáxü. ¹⁸ Rü ngëma duüxügü i tama cuxrü ixígüxü rü poraãcüxüchi nanuë, natürü nawa nangu i ngëma ngunexü i nagu tá cunapoxcuexü. Rü ngëxgumarüü ta marü nawa nangu na nüxü quicagüxü i guxüma i duüxügü i yuexü. Rü marü nawa nangu na nüxü cunaxütanüxü i ngëma curü duüxügü i curü orearü uruügü, rü ngëma duüxügü i cupëxewa imexü, rü guxüma i ngëma duüxügü i cuxü muüëxü i yaexü rü buexü. Rü marü nawa nangu na icuyanaxoxëëxü i ngëma duüxügü i nachixexëëxü i ñoma i naãne”, ñanagürügü. ¹⁹ Rü ñuxüchi Tupanapata ga daxügüxü ga naãnewa yexmane, rü niwãxna. Rü yéma norü aixepewa nüxü chadau ga yema baú ga Tupanaärü uneta ga nutagu ümatüxü. Rü nibëixbëxane, rü poraãcü nicuxcuane, rü naxiãxãchiane rü poraãcü gáuxü narüyi.

12

Wüxi ga nge rü wüxi ga coya ga taxü

¹ Rü ñuxüchi daxüwa nangox ga wüxi ga cuëxruü ga taxü. Rü iyexma ga wüxi ga nge ga üëxcürüü iyaaurachirucüücü. Rü ngitüücutüwa nayexma ga tauemacü. Rü yema ngürü ngëxcuerüü ga ngïëruwa yexmaxü, rü 12 ga woramacurigü nixígü. ² Rü yema nge rü itacharaü. Rü poraãcü aita ixü yerü ixíraxacüchaü rü poraãcü ingüxnecaxüchi. ³ Rü yemawena daxüwa nangox ga to ga cuëxruü. Rü yéma nayexma ga wüxi ga coya ga taxüchixü ga dauxü ga 7 ga naëru nüxü yexmaxü rü 10 ga naxchatacuxre. Rü wüxichigü ga naëruwa rü nüxü nayexma ga norü ngëxcuerüü. ⁴ Rü nareexümaã inayatüchigü ga wüxitücumü ga norü tomaëxpüxarü üye ga woramacurigü, rü ñoma ga naãneëtügu nanawogü. Rü yema coya rü ngïpëxegu nayachi ga yema nge ga íraxacüchaücü, yerü tüxü nangöxchaü ga guxema ngixácüxe ga yexguma tabuxgu. ⁵ Rü yema nge rü ixíraxacü, rü nayatü. Rü nüma rü tá guxü i nachüüãneärü äëxgacü nixi, rü tá namaã inacuëx. Natürü ga guma ngïne rü Tupana ngixna nanayaxu rü yema ínatoxüwa nanaga. ⁶ Rü yema nge rü wüxi ga nachica ga ngextá taxüema íxãpataxüwa ñna. Rü yéma Tupana ngixcëx nanamexëë ga wüxi ga ngichica na yéma ngixna nadauxücëx rü ngixü naxüwemüxücëx ga 1,260 ga ngunexü. ⁷ Rü yemawena ga daxüwa rü nügü nadai. Rü Miguere ga Tupanaärü orearü ngeruügüarü äëxgacü ixicü rü guxüma ga natanüxü ga orearü ngeruügü, rü nügü nadai namaã ga yema coya ga taxüchixü rü norü orearü ngeruügü. Rü yema coya rü ñuxüchi norü orearü ngeruügü i chixexü rü poraãcü Tupanaärü orearü ngeruügümaã nügü nadai. ⁸ Natürü ga yema coya rü norü orearü ngeruügü rü tama Tupanaärü orearü ngeruügüxü narüporamaëgü. Rü ñuxüchi ga yema coya rü norü orearü ngeruügü rü nangechica ga daxügüxü ga naãnewa. ⁹ Rü yemaãcü ínatëxüchi ga daxügüxü ga naãnewa ga yema coya ga yema nuxcümaüxü ga äxtape. Rü nüma rü ngoxogu rü Chatanágu naxãega. Rü nüma nixi i guxüma i ñoma i naãnecüãx i duüxügüxü nawomüxëëxü. Rü nüma rü norü orearü ngeruügümaã ñoma ga naãnegu narüwoü. ¹⁰ Rü ñuxüchi nüxü chaxínü ga wüxi ga naga ga daxügüxü ga naãnewa tagaãcü ñaxü:

“Ñuxma rü marü nawa nangu na tórü Tupana rü norü duüxügüxü namaxëëëxü. Rü ñuxma rü nüma tüxü nüxü nadauxëë na guxüärü yexera naporaxü rü guxüärü äëxgacü yixü. Rü Nane ya Cristu rü marü tüxü nüxü nadauxëë na guxümaã inacuáxü. Yerü marü daxügüxü ga naãnewa ínatëxüchi ga Chataná ga ngunecü rü chütacü tórü Tupanapëxewa taeneëgüxü yeücürü ixuechaxü. ¹¹ Rü nümagü ga yema taeneëgü, rü marü Chatanáxü narüyexeragü nagügagu ga guma pecaduarü ütanücëx yucü rü

nagagu ga Tupanaärü ore ga nüxü yaxugüxü. Yerü ga nümagü rü tama nayanuxügü ga norü maxü, rü ínamemaregü na Tupanacèx nayuexü. ¹² ¡Rü ngëmacèx petaãëgü i guxãma i pema i daxüguxü i naãnewa ngëxmagüxe! ¡Natürü pengechaütümüügü i pema i yea naãne i pecaduãxüwa ngëxmagüxe rü taxtü i taxüwa ngëxmagüxe! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i ngunexü nüxü ínayaxü na chixexü naxüxü, erü paxa tá napoxcu”, ñanagürü ga yema naga. ¹³ Rü yema coya ga taxüchixü ga Chataná nagu icüxü rü yexguma nügü yacuèxãchigu ga ñoma ga naãnegu na nataéxü, rü ngíwe ningëchigü ga yema nge ga íraxacücü. ¹⁴ Natürü ga Tupana rü ngixü naxüxpexatü ga yema nge. Rü nanaxíyüpexatügüraxü. Rü yemaãcü nachica ga ngextá taxúema íxãpataxüwa ina naxchaxwa ga yema coya ga Chataná nagu icüxü.. Rü yema nachicawa nixí ga Tupana ngíxna dauxü, rü ngíxü üwemüxü ga tomaëxpüx ga taunecüarü ngãxü. ¹⁵ Rü yema coya ga Chataná rü dexá nügüèxwa ínaxüxüxëe na wüxi ga natü naxüxüçèx, rü yema natümaã ngíxü yachaxëèxüçèx ga yema nge. ¹⁶ Natürü ga waixümü rü ningëx na iyachexëèãxüçèx ga yema dexá ga coya nügüèxwa íxüxüxëèxü. ¹⁷ Rü ñuxüchi ga yema coya ga Chataná, rü poraãcüxüchima ngímaã nanu ga yema nge. Rü ínixü na nügü namaã yadëixüçèx ga yema togü ga ngíxãcügü ga yema nge. Rü ngëma ngíxãcügü i ngëma coyamaã nügü dëixü, rü ngëma nixí i ngëma duüxügü i meã Tupanaärü orega ínüèxü rü meã yaxögüechaxü i Ngechuchu ya Cristuarü ore i aixcüma ixíxü. Rü ñuxüchi ga yema coya rü norü numaã taxtü ga taxüãnacügu nayarüñu.

13

Taxre ga ngoxogüchiga

¹ Rü nüxü chadau ga wüxi ga ngoxo ga taxü ga taxtügu íñuãchixü ga 7 eruxü rü 10 chatacuxrexü. Rü wüxichigü ga naxchatacuxrewa rü nüxü nayexma ga norü ngëxcuerü. Rü naërugügu naxümatü ga ñuxre ga naëgagü ga Tupanamaã guxchigagüxü. ² Rü yema ngoxo ga nüxü chadauxü, rü wüxi ga airü nixí. Rü naxmëxgü rü chatü ga taxümëxëgürü nixí. Rü naãx rü wüxi ga aiëxrü nixí. Rü yema coya ga Chataná rü yema ngoxoxü naporaxëe na naxrü naporaxüçèx rü naxrü ãëxgacü yíxüçèx na ñoma ga naãnemaã inacuáxüçèx. ³ Rü wüxi ga naëruwa ga yema ngoxo, rü nüxü nayexma ga wüxi ga taxü ga norü oxri ga namaã nayuxchaüxü. Natürü ga yema norü oxri rü nüxü nixë, rü naxcèx nitaane. Rü guxüma ga ñoma ga naãnecüãx ga duüxügü rü poraãcü yema ngoxomaã nabaixãchie, rü nawe narüxí. ⁴ Rü ga duüxügü rü yema coya ga Chatanáxü nicuèxüügü yerü yema ngoxoxü naporaxëe na ãëxgacü yíxüçèx. Rü yexgumarü ta yema ngoxoxü nicuèxüügü, rü ñanagürügü:

“¿Texé tangëxma ya ñaã ngoxorü poraxe? ¿Rü texé tabora na namaã tügü tadëixü?” ñanagürügü. ⁵ Natürü ga Tupana rü tama yema ngoxona nanachüxu na nügü yacuèxüxüçèx rü tacü Tupanamaã yaxugüxüçèx rü ãëxgacü na yíxüçèx ga 42 ga tauemacü. ⁶ Rü yemaãcü chixexü naxü ga yema ngoxo. Rü poraãcü tacü Tupanamaã nixügü. Rü Tupanamaã naguxchiga, rü napatamaã rü ta naguxchiga, rü tümamaã naguxchiga ya guxãma ya yíxema daxüguxü i naãnewa ngëxmagüxe. ⁷ Rü yema coya ga Chataná rü yema ngoxoxü naporaxëe na Tupanaärü duüxügümaã nügü nadëixüçèx ñuxmatáta tüxü nayexera. Rü ãëxgacüxü nayaxíxëe na namaã inacuáxüçèx ga nagúxüraüxü ga duüxügü ga guxüma ga nachíüãnecüãx ga nagúxüraüxü ga nagawa idexagüxü. ⁸ Rü tá ngëma ngoxoxü nicuèxüügü

i guxūma i duūxūgü i ñoma i nañewa maxēxū i noxritama nañe üxgu ngeégagūxū nawa i norü popera ya yima pecaduarü ütanüçèx yucü i nagu yawüguāxū i ngēma duūxūgü i marü Tupana nüxna naxāxū i maxū i taguma gúxū. ⁹⁻¹⁰ Rü ngēxguma texé āxchixēgu, rü name nixī i naga taxīnū i ñaã tá pemaã nüxū chixuxū. Rü ngēxguma texé tūmamaã naxuegugu na tūxū yayauxgūxū, rü noxtacūma tá tiyaxu. Rü ngēxguma texé tūmamaã naxuegugu na tūxū yamēxgūxū, rü noxtacūma tá tūxū nimēxgü. Rü ngēmacèx ya yīxema Tupanaärü duūxūgü ixīgūxe, rü woo tacü rü guxchaxū tūxū ngupetügu, rü tanaxwèxe na yaxna namaã taxīnūēxū rü tayaxōgūamaxū. ¹¹ Rü yemawena nüxū chadau ga wūxi ga to ga ngoxo ga taxrechataçuxrexū ga waixūmūānewa íxūxūxū. Rü yema naxchataçuxre rü ñoma carneruchataçuxrerü nixī. Natürü ga naga rü wūxi ga coya ga taxūchixūgarü nixī. ¹² Rü yexguma yema nüxīraūxū ga ngoxopēxewa nayexmagu, rü naxrūütama napora. Rü ñoma ga nañemaã inacuèx, rü nanamu ga ñoma ga nañewa maxēxū ga duūxūgü na yema nüxīraūxū ga ngoxo ga ixēärü oxriáxūxū na yacuèxüügūxūçèx. ¹³ Rü yema ngoxo nanaxü ga taxū ga cuèxruūgü ga duūxūgü tama nüxū cuáxū na naxüguāxū. Rü daxūwa nanayixēē ga üxü, rü ñoma ga nañegu nayi napēxewa ga duūxūgü. ¹⁴ Natürü ga Tupana rü tama yema ngoxona nanachuxu na ñoma ga nañewa maxēxū ga duūxūgūxū nawomüxēēxū namaã ga yema cuèxruūgü ga yema nüxīraūxū ga ngoxopēxewa naxūxū. Rü yemaäcü ga yema ngoxo rü duūxūgūxū namu na naxüguāxūçèx ga naxchicünèxā ga yema nüxīraūxū ga ngoxo ga taramaã chexexū rü poraäcü rüxóxū rü tama yuxū. ¹⁵ Rü Tupana rü tama yema to ga ngoxona nanachuxu na namaxēēāxūçèx ga yema nüxīraūxū ga ngoxochicünèxā. Rü yemaäcü ga yema ngoxo rü nanamaxēē ga yema naxchicünèxā na yadexaxūçèx rü na nadaiāxūçèx ga guxūma ga yema duūxūgü ga tama nüxū icuèxüügūxū. ¹⁶ Rü yexgumarü ta guxūma ga duūxūgūxū namu na norü tūgünemēxēwa rü ēxna nacıtuwa nüxū na nayexmaxūçèx ga wūxi ga cuèxruū ga yema ngoxoéga ixīxū. Rü yemaäcü nanamu ga guxūma ga duūxūgü rü woo buxū rü ēxna yaxū, rü woo duūxūgü i muärü díeruāxgūxū rü ēxna ngearü díerūāxgūxū, rü woo duūxūgü i ngearü coriāxgūxū rü ēxna duūxūgü i ixāärü coriāxgūxū. ¹⁷ Rü taxucürüwa texé tūmaärü tacüçèx tataxe rü ēxna tūmaärü tacūmaã tataxe ga yexguma tūmaärü tūgünemēxēwa rü ēxna tūmacatüwa tūxū natauxgu ga yema ngoxoéga rü ēxna yema ngoxoégarü cuèxruū ga número. ¹⁸ Rü ñaã orexū na icuāxūçèx, rü tanaxwèxe na tūxū nangēxmaxū i tóru cuèx. Rü yīxema tūxū nangēxmaxē i tūmaärü cuèx, rü name nixī i tanangugü i ngēma número i ngēma ngoxoéga ixīxū. Erü ngēma número rü wūxi i yatüégachirēx nixī. Rü ngēma número rü 666 nixī.

14

Yema 144,000 ga duūxūgüarü wiyae

¹ Rü yemawena ichadawenü, rü nüxū chadau ga guma pecaduarü ütanüçèx yucü ga guma mēxpūne ga Siōūgu āeganeetügu chicü. Rü naxūtawa nayexma ga 144,000 ga duūxūgü ga nacıtuwa ixāegaxū namaã ga guma pecaduarü ütanüçèx yucüéga rü Nanatü ya Tupanaega. ² Rü ñuxūchi nüxū chaxīnū ga wūxi ga naga ga tagaxū ga daxūguxū ga nañewa inaxūxū ga ñoma taxū i cotūna i chuxchuxūgarü ixīxū rü ñoma poraäcü yaduruanexürü ixīxū rü ñoma muxūchixū i duūxūgü i arpawa ípaxetagūxūrü ixīxū. ³ Rü yema 144,000 ga duūxūgü rü nagu nawiyaegü ga wūxi ga yexwacaxūxū ga wiyae napēxewa ga Tupanaärü tochicaxū rü napēxewa ga yema āgümücü

ga daxũcũãx ga maxẽxũ rü napẽxewa ga yema 24 ga ãẽxgacũgũ. Rũ taxucürüwama texé ga togue nüxũ tacuèxéga ga yema wiyae. Rũ yema 144,000 ga duũxũgũxicatama nixĩ ga nüxũ cuèxgũxũ. Rũ yema nixĩ ga Tupana ñoma ga naãnewa deixũ na namaxẽxẽãxũcèx. ⁴ Rũ yema nixĩ ga duũxũgũ ga tama ñoma ga naãneãrũ ngúchaũ i chixexũmaã nügũ ãũãchiarũ maxũãxgũxũ rü tama nüxũ rüxoexũ na Tupanaãxũ yaxõgũãxũ. Rũ nümagũ rü yima Tupana Nane ga pecaduarũ ütanüçèx yucüwe narũxĩ i ngextá ínaxũxũwa. Rũ yemagũ nixĩ ga ñoma ga naãnecũãxtanüwa nüxira Tupana naxcèx taxexũ na noxrũ rü Naneãrũ duũxũgũ i üünexũ yixĩgũxũcèx. ⁵ Rũ yematanüwa rü taguma texé nüxũ taxĩnü na doraxũ yaxugũxũ, erü Tupanapẽxewa rü nataxuma i norü chixexũ.

Orearü ngeruũgũ ga daxũcũãxãrũ orechiga

⁶ Rũ ñuxũchi nüxũ chadau ga wüxi ga to ga orearü ngeruũ ga daxũguxũ ga naãnegu íxexeũxũ ga iyangexũ ga Tupanaãrũ ore i guxũgutáma ixĩxũ, na guxũ i nachiũãnecũãxgũmaã rü nagúxũraũxũ i duũxũgũmaã rü guxũma i duũxũgũ i nagúxũraũxũ i nagawa idexagũxũmaã nüxũ yaxuxũcèx. Rũ yemaãcü inayange ga yema Tupanaãrũ ore na guxũma i ñoma i naãnewa maxẽxũ i duũxũgũmaã nüxũ yaxuxũcèx. ⁷ Rũ tagaãcü ñanagürü:

“¡Nüxũ pemuũẽ ya Tupana rü nüxũ picuèxũũgũ! Erü marü nawa nangu na guxũma i duũxũgũna naçaxũ. ¡Rü nüxũ picuèxũũgũ ya yima naxücü i daxũguxũ i naãne rü ñoma i naãne rü taxtũ i taxũ rü guxũma i natüxacũgũ!” ñanagürü. ⁸ Rũ yemawena nangõx ga to ga orearü ngeruũ ga daxũcũãx, rü ñanagürü:

“Marü nagu nayarüchixe ya yima ñãne ya taxũne ya Babiróniã, rü nagu napogüe rü nayawextaũgũxẽẽ ya norü ígũ. Yerü yema ñãnecũãx rü nanachixexẽẽ ga guxũma ga to ga nachiũãnecũãx ga duũxũgũ. Rũ guxũma ga yema duũxũgũxũ namu na naxügũãxũcèx ga yema chixexũ ga guma ñãnewa naxügũxũ ga Tupanapẽxewa poraãcü chixexũ”, ñanagürü. ⁹⁻¹⁰ Rũ yemawena nangõx ga to ga orearü ngeruũ ga tagaãcü ñaxũ:

“Ngẽxguma chi texé nüxũ icuèxũũgu i ngẽma ngoxo rü naxchicünèxãxũ ticuèxũũgu rü tügũ itaxãxgu na tümacatüwa rü êxna tümamèxewa ngẽma ngoxoégamaã tacuèxruũãxũ, rü Tupana rü poraãcüxüchi tá tüxũ napoxcu namaã i ngẽma poxcu i guxũãrũ yexera ixĩxũ i nümatama ya Tupana norü numaã namexẽẽxũ. Rũ üxũmaã rü azufre i iyauraxũmaã tá ngúxũ tüxũ ningexẽẽ napẽxewa i norü orearü ngeruũgũ rü napẽxewa ya yima Nane ga pecaduarũ ütanüçèx yucü. ¹¹ Rũ naẽma ya yima üxü ya nawa Tupana ngúxũ tüxũ ingexẽene, rü guxũgutáma ngema nicaixqueecha. Rũ bai i írarüwa tá tüxũ narüna i ngẽma ngúxũ ya yíxema ngẽma ngoxoxũ rü ngẽma ngoxochicünèxãxũ icuèxũũgũxe rü tügũ ixãxẽ na ngẽma ngoxoégamaã taxãegaxũ. Rũ bai i ngunecü rü bai i chütacü tá tüxũ narüna i ngẽma ngúxũ”, ñanagürü. ¹² Rũ ngẽmacèx ya yíxema Tupanaãrũ duũxũgũ ixĩgũxe rü norü orega ínüèxẽ rü Ngechuchuaxũ yaxõgũxe, rü name nixĩ na yaxna namaã taxĩnüèxũ rü tayaxõgũamaxũ ega woo tacü rü guxchaxũ tüxũ ngupetügu. ¹³ Rũ ñuxũchi nüxũ chaxĩnü ga wüxi ga naga ga daxũguxũ ga naãnewa inaxũxũ ga ñaxũ choxũ:

“¡Naxümatü i ñãã ore i tá cumaã nüxũ chixuxũ! Rũ ñuxmaũcüü tá tataãègũ ya yíxema tórü Coriaxũ meã yaxõgũãcüma yuexe. Erü Tupanaãẽ i Üünexũ rü ñanagürü: ‘Ngũ, ngẽmáãcü tá tataãègũ ya yíxema, erü tá itarüngũẽ nüxna i tümããrũ puracũgũ. Rũ ngẽma mexũ i taxügũxũ rü tümamaã wüxigu daxũguxũ i naãnewa tá naxũ’ ”, ñanagürü.

Ñoma i naãnewa nanade i ngẽma duũxũgũ i Tupanaãrũ ixĩgũxũ

14 Rū ñuxũchi ichadawenü rü nüxũ chadau ga wüxi ga caixanexũ ga cómuxũ. Rū yema caixanexũetüwa narüto ga Tupana Nane ga duũxũxũ ixĩcü. Rū naëruwa nayexma ga wüxi ga norü ngëxcueruũ ga uirunaxcèx. Rū namëxwa nayexma ga wüxi ga cüxchi ga ínapomaguxũ ga tẽxechixũ. 15 Rū Tupanapatawa ínaxũxũ ga wüxi ga to ga orearü ngeruũ ga tagaãcü ñaxũ nüxũ ga guma caixanexũetüwa rütocü:

“¡Inaxũgü na cunadexũ i ngẽma duũxũgü i cuxrü ixĩgũxũ! Erü marü nawa nangu na cugũxũtawa cunagagũxũ, erü ngẽma curü duũxũgü i ñoma i naãnewa ngëxmagũxũ rü ínamemare na cunadexũ”, ñanagürü. 16 Rū ñuxũchi ga guma yema caixanexũetüwa rütocü rü ñoma trigu i buxuxũrũü naãneetügu ngĩmaã nayabuãchi ga norü cüxchi. Rū nanade ga yema norü duũxũgü ga ñoma ga naãnewa yexmagũxũ. 17 Rū ñuxũchi daxũguxũ i naãnewa ngëxmane ya Tupanapatawa ínaxũxũ ga wüxi ga to ga orearü ngeruũ ga nüxũ nayexmacü ga wüxi ga cüxchi ga ínapomaguxcũ ga tẽxechixcũ. 18 Rū yema pumaraarü gutëxeruũtaxmüwa ínaxũxũ ga wüxi ga to ga orearü ngeruũ ga üxümaã icuáxũ. Rū numa rü tagaãcü ñanagürü nüxũ ga yema to ga orearü ngeruũ ga yema cüxchi ga ínapomaguxcũ ga tẽxechixcũ nüxũ yexmaxũ:

“¡Inaxũgü na cunadexũ i ngẽma duũxũgü i yéa naãnewa ngëxmagũxũ i tama Tupanaärü ixĩgũxũ! Erü marü nawa nangu na Tupana napoxcuexũ”, ñanagürü. 19 Rū yema orearü ngeruũ rü ñoma ga naãneetügu ngĩmaã nayabuãchi ga norü cüxchi. Rū nayadexechi ga yema duũxũgü ga tama Tupanaärü ixĩgũxũ ga ñoma ga naãnewa yexmagũxũ. Rū wüxi ga taxũ ga nachicagu nanawocu na yexma Tupana norü numaã nadëixũcèx, ñoma ubagü imëixtũxũrũü. 20 Rū yema nachica ga ñaneärü íxpemawa yexmaxũgu nanadai. Rū guma nagü ga yéa íyaxüchicü, rü 300 ga kilómetru inayarübaichi, rü wüxi ga metruarü ngãxũ nixĩ ga norü mátama ga guma nagü.

15

Tupanaärü orearü ngeruũgü ga nüxũ nayexmaxũ ga 7 ga poxcuruũgü

1 Rū ñuxũchi ga daxũguxũ ga naãnewa rü nüxũ chadau ga wüxi ga to ga taxũ ga cuèxruũ ga namaã íbaixãchixũ. Rū nayexma ga 7 ga orearü ngeruũgü ga daxũcũãx ga nüxũ yexmagũxũ ga 7 ga poxcuruũ. Rū yema poxcugu nixĩ ga yagũxũ ga norü nú ga Tupana. 2 Rū yexgumarü ta nüxũ chadau ga ñoma wüxi ga nanaxtaaétüwaraũxũ ga woruarüü iyauraétücüxũ ga üxüema nawa inachixũ. Rū yéa tayexmagü ga guxema nüxũ rüyexeraxe ga yema ngoxo rü yema ngoxochicünëxã rü yema ngoxoéga rü yema número ga yema ngoxoéga ixĩxũ. Rū yema nanaxtaaétüraũxũgu tachigü. Rū tüxũ nayexmagü ga tümaärü paxetarüũgü ga arpa ga Tupana tüxna ãxũ. 3 Rū nagu tawiyaegü ga Moĩché ga Tupanaärü duũxũ ixĩcüarü wiyae. Rū yexgumarü ta nagu tawiyaegü ga yema wiyae ga guma Tupana Nane ga pecaduarü ütanücèx yucüarü ixĩxũ ga ñaxũ:

“Pa Torü Cori ya Tupana ya Guxũärü Yexera Poracüx, nataxüchi rü namexëchi i guxüma i ngẽma cuxüxũ. Rū cuma rü guxügutáma guxüma i nachiũãnegüarü ãëxgacü quixĩ. Rū cuma rü aixcüma meãma namaã icucuèx rü taguma quidora. 4 ¿Rü texé tãütáma cuxũ tamuũ, Pa Corix? ¿Rü texé tãütáma cuxũ ticuèxüü? Erü cuma rü cuxicatama nixĩ i üünecü quiixũ. Rū guxüma i nachiũãnecüũãx rü nuã tá naxĩ, rü tá cuxũ nicuèxüũgü. Yerü marü nüxũ nadaugü na quixaixcũmaxũ i guxüma i ngẽma nüxũ quixuxüwa rü aixcüma mea cunangugũxũ i guxüma i ngẽma chixexũ ügũxũ rü ngẽma mexũ ügũxũ”,

ñanagürü ga yema wiyae. ⁵ Rû yemawena ichadawenü rû nüxü chadau ga daxüguxü ga nañewa na yawāxnaxü ga yema nachica ga üünexü ga Tupanapataarü aixepewa yexmaxü ga ngexta namaã ínanguxügxüwa ga guma nuta ga Tupanaärü mugü nagu umatücü. ⁶ Rû guma Tupanapatawa ínachoxü ga yema 7 ga orearü ngeruügü ga daxücüāx ga nüxü nayexmagüxü ga yema 7 ga poxcuruügü. Rû naxchiru ga mexēchixümaã rû iyauracüxümaã nixāxchiru. Rû yema norü goyeremüügü rû uirunaxcèx nixĩ. ⁷ Rû ñuxüchi wüxi ga yema āgümücü ga daxücüāx ga maxüxü, rû wüxichigü ga yema 7 ga orearü ngeruügüna nanaxã ga wüxi ga copa ga uirunaxcèx ga Tupana ya guxüguma maxēchacüarü nu i āücümaxümaã ixāācuxü. ⁸ Rû guma Tupanapata rû namaã naxāācu ga yema caixema ga Tupana ya mexēchicü rû poracüwa ne üxü. Rû taxucürüwama texé yexma taxücu ñuxmata nagü ga yema 7 ga poxcuruü ga yema 7 ga orearü ngeruügüaxü yexmaxü.

16

copagü ga Tupanaärü numaã ixāācuxüchiga

¹ Rû ñuxüchi nüxü chaxĩnü ga wüxi ga naga ga tagaācü guma Tupanapatawa inaxüxü ga ñaxü nüxü ga yema 7 ga orearü ngeruügü:

“¡Ngēma pexĩ, rû nañeētüwa peyabagüācu i ngēma 7 i copagü i Tupanaärü nu i āücümaxümaã ixāācuxü!” ñanagürü. ² Rû yema naxü ga wüxi ga Tupanaärü orearü ngeruü, rû nañeētügu nayabaācu ga norü copa. Rû guxüma ga duüxügü ga yema ngoxoégamaã ixāēgaxü rû yema ngoxochicünèxāxü icuèxüügüxü, rû nawa inayarügogü ga taixna ga nguxuchixü ga taguma ixēxü. ³ Rû yema norü taxre ga orearü ngeruü, rû taxü ga taxtüétügu nayabaācu ga norü copa. Rû nagüxü nananguxuchi ga dexá, rû ñoma wüxi i duüxü i texé imáxügürüü nixĩ ga dexá. Rû guxüma ga tacü ga taxtüwa maxēxü rû nayue. ⁴ Rû yema norü tomaēxpüx ga orearü ngeruü rû natügüétügu rû natüxacügüétügu nayabaācu ga norü copa. Rû guxüma ga yema natügü rû natüxacügü, rû nagüxü nanacèxichi. ⁵ Rû ñuxüchi nüxü chaxĩnü ga yema Tupanaärü orearü ngeruü ga guxüma ga dexámaã icuáxü ga ñaxü:

“Pa Torü Cori ya Tupana ya Üünecü ya Woetama Yexmaēchacü rû Ñuxma Ngēmaēchacü, cuma rû wüxi i mexü cuxü na ngēmaācü dexá nagüxü cunacèxichixēxü naxchaxwa i ngēma duüxügü. ⁶ Yerü nümagü rû nanadai ga yema curü duüxügü rû curü orearü uruügü, rû inanaba ga nagü. Rû ñuxma i cuma rû wüxi i mexü nixĩ i cuxüxü na ngēma dexá nagüxü cunacèxichixēxü na nawa naxaxegüxcèx. Yerü yema nixĩ ga yema nanaxwèxegüxü rû yemacèx nixĩ ga curü duüxügüxü nadejxü”, ñaxü. ⁷ Rû nüxü chaxĩnü ga wüxi ga naga ga yema pumaraarü gutēxeruütaxmüwa inaxüxü ga ñaxü:

“Ngü, Pa Cori ya Tupana ya Guxüärü Yexera Poracüx, aixcüma nixĩ i namexü i ngēma cuxüxü”, ñaxü. ⁸ Rû yema norü āgümücü ga orearü ngeruü rû üèxcüétügu nayabaācu ga norü copa. Rû yemaācü poraācü nananaiemaxēē ga üèxcü na yema norü nañēmaxümaã ínaguāxücèx ga duüxügü. ⁹ Rû guxüma ga duüxügü rû poraācü nüxü nanguxema, natürü tama nüxü narüxoe ga nacüma ga chixexü rû tama Tupanaxü nicuèxüügü. Rû naguxchigagüama namaã ga Tupana ya guxüma i ngēma poxcuruümaã icuācü. ¹⁰ Rû yema norü wüximēxpüx ga orearü ngeruü, rû yema ngoxoarü tochicaxüétügu nayabaācu ga norü copa. Rû guxüwama ga ngextá āēxgacü íyixüwa ga yema ngoxo, rû naxēāne. Rû yema na poraācü nüxü nangüxü ga duüxügü, rû nügü nangōörü conüāxgü. ¹¹ Natürü woo yemaācü nüxü na nangupetüxü ga duüxügü, rû tama nüxü narüxoechaü ga yema chixexü ga naxügüxü. Natürü yema na poraācü nüxü nangüxü ga norü taixnagü,

rü naguxchigagüama namaã ga Tupana ya daxügücü. ¹² Rü yema norü 6 ga orearü ngeruü, rü yema taxtü ga Euférateétügu nayabaãcu ga norü copa. Rü inayache ga yema taxtü na wüxi ga nama na yïxücèx naxcèx ga yema nachiuãnegüarü ãëxgacügü ga üèxcü iyarügoxüwa ne ìxü. ¹³ Rü nüxü chadau rü yema coyaãxwa, rü yema nüxüraüxü ga ngoxoèxwa, rü yema to ga ngoxo ga yema orearü uruünetaxwa, rü wüxièxwachigü inaxüxü ga wüxi ga naãe ga chixexü ga ñoma curururüü ixixü. ¹⁴ Rü yema ngoxoãëgü nixi ga naxügüxü ga yema taxü ga cuèxruügü ga duüxügü taxucürüwa ügüxü. Rü yema ngoxogü rü inachoxü na nangutaquëxexëëgüãxücèx i guxüma i ñoma i naãnewa ngëxmagüxü i nachiuãnegüarü ãëxgacügü na Tupana ya Guxüarü Yexera Poracümaã nügü nadaixücèx i ngëxguma nawa nanguxgu i naãneärü gux. ¹⁵ Natürü dücax, rü pexuãëgü erü törü Cori ya Ngechuchu ya Cristu rü ñanagürü:

“Choma rü ngürüãchi taxüetáma choxü inanguxëëyane íchangu, ñoma wüxi i ngítèxáxü ínguxürüü. Rü tataãe ya yíxema ímemarexe ñoma wüxi i duüxü i naxchiru ímexëëxürüü na tama tangexchiruxücèx rü taxánexücèx i ngëxguma íchanguxgu”, ñanagürü. ¹⁶ Rü yema ngoxogü, rü nanangutaquëxexëë ga guxüma ga ñoma ga naãnewa yexmagüxü ga nachiuãnecüãxgüarü ãëxgacügü. Rü yema nachica ga nawa nangutaquëxegüxü, rü Armaguedóügu naxãega i Yudíugügawa. ¹⁷ Rü yema norü 7 ga orearü ngeruü, rü buanecügumare nayabaãcu ga norü copa. Rü guma Tupanapata ya daxügüxü i naãnewa ngëxmanewa inanaxü ga wüxi ga naga ga tagaxü ga yema Tupanaärü tochi-caxüwa inaxüxü ga ñaxü:

“Marü ningu”, ñaxü. ¹⁸ Rü nibëixbëxane, rü poraãcü nicuxcuane, rü niduruane. Rü poraãcü naxiãxãchiane. Rü noxri Tupana duüxügüxü üxgumama rü taguma nayexma ga wüxi ga iãxãchiane ga yemaruü poraxü. ¹⁹ Rü guma iãne ga taxüne ga Babiróniã, rü tomaëxpüxgu ningüxyeane. Rü guma iãnegü ga ñoma ga naãnewa yexmagüne rü niwèxtaügü. Rü Tupana rü nüxna nacuaxãchi ga guma iãne ga Babiróniãärü chixexü. Rü yemacèx norü numaã poraãcü nanapoxcu ga guma iãne, yerü poraãcüxüchi namaã nanu. ²⁰ Rü guxüma ga capaxügü rü guxünema ga mëxpünegü, rü inayarüxogü. ²¹ Rü daxüwa narüyi ga gáuxü ga itapütaxü, rü duüxügüétügu nayi. Rü wüxipütachigü ga yema gáuxü, rü 40 ga kilogu nixi ga nayaxü. Rü ga duüxügü rü Tupanamaã naguxchigagü nagagu ga yema poxcuruü ga gáuxü, yerü poraãcü nüxü nangux ga yema poxcu ga Tupana namaã napoxcuxü.

17

Íãne ga Babiróniã ga wüxi ga nge ga ngëãëxü- chicügu ixuxüne

¹ Rü yema 7 ga orearü ngeruügü ga nüxü yexmagüxü ga 7 ga copagü, rü yematanüwa rü wüxi ga orearü ngeruü, rü chauxcèx nixü, rü ñanagürü choxü: “¡Nuã naxü! Rü tá cuxü nüxü chadauxëë i tacü tá nixi i ngürü poxcu i ngëma nge i ngeãëxüchicü i taxü i dexágüétüwa rütoxcü. ² Rü ñoma i naãnewa ngëxmagüxü i nachiuãnegüarü ãëxgacügü, rü ngímaã namaxë, rü yemaãcü poraãcü chixexü naxügü. Rü guxüma i ñoma i naãnecüãx, rü ngürü chixexü nüxna naxüe”, ñanagürü. ³ Rü yexguma Tupanaãe i Ünexü yemaãcü choxü ngoxetüxëëgu, rü yema orearü ngeruü rü wüxi ga nachica ga ngextá taxüema íxãpataxüwa choxü naga. Rü yema ngixü chadau ga wüxi ga nge ga wüxi ga ngoxo ga dauxüetüwa rütoxcü. Rü yema ngoxo rü guxüwama naxãegaxüne, rü yema naegagü rü Tupanamaã naguxchiga. Rü 7 nixi ga naëru rü 10 ga naxchatacuxre. ⁴ Rü yema nge rü wüxi ga naxchiru ga dauxracharaxü rü dauxümaã ixãxchiru. Rü uirumaã rü nutagü ga mexëchicümaã ingãxãe.

Rü ngĩxmẽxwa ngĩxũ nayexma ga wũxi ga copa ga uirunaxcèx. Rü yema copa rü namaã naxããcu ga nagúxúraũxũ ga yema Tupanapẽxewa chixexũ rü nagúxúraũxũ ga chixexũgü ga yema nge üxũ. ⁵ Rü ngĩcatügu naxümatü ga wũxi ga naega ga taxúema nüxũ cuáxũ na ñuxũ ñaxũchiga yĩxũ. Rü yema naega rü ñanagürü:

“Rü yima Babiróniã rü guxũma i ngema duũxũgü i chixexũ ügũxũ i ñoma i naãnewa maxẽxũarü mamá nixĩ”, ñanagürü. ⁶ Rü ngĩxũ chadau ga yema nge ga na nangãxũxũ namaã ga guma nagü ga yema duũxũgü ga Tupanaãrü ixĩgũxũ rü yema duũxũgü ga Ngechucharü orexũ na yaxugũxũcèx dèixũ. Rü yexguma yemaxũ chadèuxgu, rü chabaixãchi. ⁷ Rü yexguma ga yema orearü ngeruũ rü ñanagürü choxũ:

“¿Tacücèx cubaixãchi? Dücèx, tá cumaã nüxũ chixu na tacüchiga yĩxũ i ngẽma nge, rü tacüchiga yĩxũ i ngẽma ngoxo i 7 eruxũ rü 10 chatacuxrexũ i naetüwa natoxũ. ⁸ Rü ngẽma ngoxo i nüxũ cudauxũ, rü yema nixĩ ga nuxcũmaxũchi maxchiréxũ natürü ñuxma rü marü yuxũ rü ngẽma ãxmaxũ i taxuguma iyacuáxũwa ngẽxmaxũ. Natürü paxa tá ngẽma íxũxũxũ, rü ñuxũchi ngẽma nachica i guxũgutáma nagu napoxcuxũwa tá üxũ. Rü ngẽma ngoxoma ã tá nabaixãchiãgü i ngẽma duũxũgü i ñoma i naãnewa maxẽxũ i tama nawa ngoxégagũxũ i ngẽma Tupanaãrü popera i noxritama naãne ixũgügu Tupana nagu yawügũxũ i ngẽma duũxũgü i nüxũ nangẽxmaxũ i maxũ i taguma gúxũ. Rü nümagü i ngẽma duũxũgü rü aixcũma tá namaã nabaixãchiãgü i ngẽxguma nüxũ nadaugügu i ngẽma ngoxo ga nuxcũmaxũchi maxchiréxũ rü yuxũ natürü wena táxaru ínguxũ. ⁹ Rü ñaã nixĩ i wũxi i ore naxcèx i ngẽma duũxũgü i nüxũ natauxchaxũ na nüxũ nacuèxgũxũ. Rü ngẽma 7 i naeru i ngẽma ngoxo, rü yima nixĩ ya 7 ya mèxpũnechiga. Rü yima 7 ya mèxpũneetüwa nixĩ i natoxũ i ngẽma nge. Rü ngẽxgumarũ ta i ngẽma naerugü, rü 7 i nachiũãnegüaru ãëxgacügüchiga nixĩ. ¹⁰ Rü wüximèxpũx i ngẽma ãëxgacügü rü marü togü nüxũ narüyexeragü, rü ñuxma rü marü tama ãëxgacügü nixĩgü. Rü ngẽma norü 6 i ngẽma ãëxgacügü, rü nüma rü ñuxma rü ãëxgacü nixĩ. Rü ngẽma norü 7 tá nixĩ i yixcũra ínguxũ. Natürü ngẽxguma ínanguxgu i ngẽma norü 7 i nawa iyacuáxũ i ngẽma ãëxgacügü, rü paxaãchimare tá nixĩ i ãëxgacü yĩxũ. ¹¹ Rü ngẽma ngoxo ga nuxcũmaxũchi maxchiréxũ rü ñuxma rü marü yuxũ, rü ngẽma nixĩ i norü 8 i ngẽma ãëxgacügü. Rü nüma rü ngẽma 7 tanüxũ nixĩ. Natürü i nüma rü ngẽma nachica i guxũgutáma nagu napoxcuxũwa naxũ. ¹² Rü ngẽma 10 i naxchatacuxre i nüxũ cudauxũ, rü 10 i nachiũãnegüaru ãëxgacügüchiga nixĩ. Natürü i nümagü rü tauta inanaxügü na duũxũgümaã inacuèxgũxũ. Natürü yixcũra tá nanayauxgü i pora na wüxitátama i ora ngẽma ngoxomaã wüxigu ãëxgacügü yixĩgũxũcèx. ¹³ Rü ngẽma 10 i ãëxgacügü rü wüxigu nagu narüxĩnüe na ngẽma ngoxona naxãgüãxũcèx i norü pora, na ngẽma ngoxo namaã icuáxũcèx. ¹⁴ Rü ñuxũchi i ngẽma ãëxgacügü rü ngẽma ngoxo rü tá nügü nadai namaã ya yima Tupana Nane ga pecaduarü ütãnucèx yucü. Natürü ya yima Tupana Nane rü tá nüxũ narüyexera, erü nüma rü guxũ i corigüaru Cori nixĩ, rü guxũ i nachiũãnegüaru ãëxgacügüaru ãëxgacü nixĩ. Rü yixema namücügü ixĩgũxe, rü yixemagü tixĩgü ya Tupana tüxũ dexe rü tümacèx naçaxe. Rü tümagü rü aixcũma naga taxĩnüe”, ñanagürü choxũ. ¹⁵ Rü yema orearü ngeruũ rü ñanagürü ta choxũ:

“Ngẽma taxũ i dexá i nüxũ cudauxũ i naetüwa natoxũ i ngẽma nge i ngẽãxũchicü, rü nagúxúraũxũ i duũxũgüchiga nixĩ, rü guxũma i duũxũgü i to i nagawa idexagũxũchiga nixĩ, rü guxũma i nachiũãnecũãxgü i duũxũgüchiga nixĩ. ¹⁶ Rü ngẽma 10 i naxchatacuxre i nüxũ cudauxũ i nüxũ ngẽxmaxũ i ngẽma ngoxo, rü tá ngẽma nge i ngẽãxũchicüchi naxaie. Rü tá ngẽma ngena

nanapuxü i guxüma i tacü i ngixü ngëxmaxü, rü ngëmaäcü ngexchiruäcüma tá ngëxma irüxãüx. Rü tá ngixü nangõxgü, rü üxüwa tá ngixü nigugü. ¹⁷ Yerü ga Tupana rü yema 10 ga äëxgacügüxü nagu narüxîñüëxëë na naxügüãxüçèx i ngëma nanaxwèxexü i nüma ya Tupana. Rü ngëmacèx i ngëma äëxgacügü, rü tá wüxigu nagu narüxîñüë na ngëma ngoxoxü naporaxëëgüxü na norü äëxgacü yîxüçèx ñuxmatáta Tupana yanguxëë i ngëma nüxü yaxuxü. ¹⁸ Rü ngëma nge i ngixü cudèxcü, rü yima nixî ya yima ñãne ya taxüne ya guxüma i nachîñãnegüarü äëxgacügümaã icuáxüne”, ñanagürü.

18

Nagu nayarüchixe ga ñãne ga Babiróniã

¹ Rü yemawena nüxü chadau ga wüxi ga to ga orearü ngeruü ga daxüguxü ga naãnewa írüxîxü ga taxü ga äëxgacü ixîxü. Rü yema orearü ngeruüarü yauracüüxümaã nangóone ga ñoma ga naãne. ² Rü tagaäcü ñanagürü:

“Marü nagu nayarüchixe ya yima ñãne ya Babiróniã ya itaégacüxüne. Rü ñuxma rü ngoxogüchiü nixî rü nagúxüraüxü i naãe i chixexügüchiü nixî. Rü ñuxma rü ngëxma naxãchiü i nagúxüraüxü i ngurucugü rü werigü i chixexü i duüxügü naxchi aixü. ³ Yerü guxüma ga nachîñãnecüãxgü, rü guma ñãneärü chixexü nüxna naxüe. Rü norü äëxgacügü, rü yéma poraäcü chixri namaxë. Rü guxüma ga ñoma ga nachîñãnecüãxgü ga taxetanüxügü, rü nügü namuärü dïeruãxëëgü namaã ga yema ñãneärü yemaxügü ga tama Tupanapëxewa mexü”, ñanagürü. ⁴ Rü ñuxüchi nüxü chaxîñü ga to ga naga ga daxüguxü ga naãnewa inaxüxü ga ñaxü:

“¡Düçèx i guxãma i pema ya chorü duüxügü ixîgüxe, rü ípechoxü nawa ya yima ñãne na tama ngëma ñãnecüãxrüü pipecaduãxgüxüçèx rü tama nagu peyixüçèx i ngëma poxcu i tá yima ñãnewa nguxü! ⁵ Erü ngëma ñãnecüãxärü pecadugü, rü nügüétüwa narünucue, rü düxwa marü daxüguxü i naãnewa nangu. Rü ñuxma ya Tupana rü nüxna nacüxãchi i ngëma chixexü i naxügüxü, rü ngëmacèx tá yima ñãnexü napoxcu. ⁶ Rü ngëma poraäcü chixexü na naxügüxürüü, rü ngëxgumarüü tá ta nixî na chixexümaã nüxü penaxütanüxü i pemax. ¡Rü ñuxma na ngëma ñãnecüãx togümaã chixexü naxügüxü, rü taxreëxpüxcüna tá penachixexëë i pemax! ¡Rü ngëma chixexü ga yema ñãnecüãx togüçèx mexëëgüxü, rü pema rü taxreëxpüxcüna tá ngëmaäcü naxçèx penamexëë! ⁷ ¡Rü ngëma na nügü yacuèxüügüxü rü mexëchixüwa na namaxëxü, rü ngëxgumarüü tá ta nixî na ngúxü nüxü pingexëëgüxü rü ngechaü nüxü pingexëëgüxü! Erü ñuxma i ngëma ñãnecüãx rü nügüãewa ñanagürügü: ‘Yixema rü ñoma wüxi i äëxgacürüü mexëchixüwa tangëxmagü. Rü tagutãma wüxi i yutexürüü tangechaügü’, ñanagürügü nügüãewa i ngëma ñãnecüãx. ⁸ Rü ngëmacèx tá nixî i wüxítãtama i ngunexügu ínanguxü i ngëma ñãneärü poxcuruü. Rü ngëma ñãnecüãx rü ngüanemaã tá nayue, rü poraäcü tá nangechaügü, rü poraäcü taiya tá nüxü nangux, rü norü ñãne rü üxümaã tá nigu. Erü naporaxüchi ya yima Tupana ya guxüarü Cori ixîcü i ngëma ñãnexü poxcucü”, ñanagürü ga yema naga. ⁹ Rü ngëma nachîñãnegüarü äëxgacügü ga yema ñãnewa poraäcü chixri maxëxü rü mexëchixüwa yexmagüxü, rü tá poraäcü norü ngechaümaã yima ñãnecèx naxauxe i ngëxguma nüxü nadaugügu i ngëma üxüema i namaã yaxaxü. ¹⁰ Natürü ngëma äëxgacügü rü ngëma poxcuxü na namuüëxüchëxwa rü tá yaxüwa nüxü narüdaunü, rü ñanagürügü tá:

“Cungechaütümüü, Pa Itaégacüxüne ya ñãne ya Babirónia ya Guxü i Nachîñãnegümaã Porachirénex. Erü wüxítama i oragu cuxçèx ínangu i curü poxcu”, ñanagürügü tá. ¹¹ Rü guxüma i ñoma i naãnecüãx i taxetanüxü, rü

tá poraãcü norü ngechaũmaã naxcèx naxauxe ya yima ããne. Erü marü taxúetáma naxcèx nüxũ tataxe i norü ngẽmaxũgü i ngema nangegüxũ. ¹² Rü marü taxúetáma naxcèx nüxũ tataxe i norü uiru, rü norü dñerümü, rü norü nutagü i mexẽchixũ, rü naxpügü i mexẽchixũ i dauxracharaxũ rü idauxcharaũ i ngema nangegüxũ. Rü ngẽxgumarüũ ta taxúetáma naxcèx nüxũ tataxe i nagúxũraũxũ i norü naĩxchipanügü i yixixũ, rü norü ngẽmaxũgü i marfílnaxcèx rü mürapewa i mexẽchixũnaxcèx rü cobrenaxcèx rü fierunaxcèx rü nutanaxcèx i ngema nangegüxũ. ¹³ Rü taxúetáma naxcèx nüxũ tataxe i norü canela rü togü i norü üexũwemüxũgü i yixixũ, rü pumaratẽxe i guruũ ixĩxũ, rü togü i pumaragü i yixixũ, rü binugü rü chixũgü, rü arina i mexẽchixũ, rü trigu i ngema nangegüxũ. Rü ngẽxgumarüũ ta ngema nana-gagü i wocagü, rü carnerugü, rü cowarugü, rü autugü i cowaru itúchigüxũ, rü duũxũgü i puracüruũgü. Rü ngẽmaãcü woo duũxẽgü rü ngema tüxũ nagagü na tümamaã nataxegüxũcèx. ¹⁴ Rü ngẽma taxetanüxũ, rü ñanagürügü tá nüxũ ya yima ããne:

“Cuwa rü marü nataxuma i ngẽma orix i curü duũxũgüarü me ixĩxũ. Rü marü nataxuma i guxũma i ngẽma meruũgü ga noxri cuxũ yexmaxũ, rü tagutáma wenaxãrü cuxũ nangẽxma”, ñanagürügü tá. ¹⁵ Rü ngẽma taxetanüxũ i guxũma i ngẽma orixgümaã rü ngẽma meruũgümaã taxegüxũ rü guma ããnegu nügü muãrü dñeruãxẽxũchigüxũ, rü yaxüwa tátama nüxũ narüdaunü ya yima ããne, erü nüxũ namuũẽ i ngẽma poxcu i yima ããnexũ üpetüxũ. Rü tá poraãcü norü ngechaũmaã naxauxe. ¹⁶ Rü ñanagürügü tá:

“Nangechaũtümüũ ya yima ããne ya itaxégacüxüne. Erü noxri rü ñoma wüxi i nge i mexẽchixũ i naxchiru i dauxracharaxũ rü dauxcharaxũmaã ãxchirucü i uirumaã rü nutagü ya mexẽchicümaã ngẽxãexcürüũ nixĩ. ¹⁷ Natürü ngürüãchi nagux i guxũma i ngẽma ããneãrü meruũgü”, ñanagürügü tá. Rü guxũne ya wapurugüarü ãẽxgacügü, rü guxũma i norü duũxũgü ya yima wapuruwa puracüexũ, rü guxũma i duũxũgü ya yima wapurugu ãxũ, rü guxũma i taxetanüxũgü i wapurugu yarüxũũxũ, rü yaxüwa tátama nayachaxgütanüãchi, rü ngema tá nüxũ narüdaunü. ¹⁸ Rü ngẽxguma nüxũ nadaugügu i norü caxixũ na yaxaxũ ya yima ããne, rü tagaãcü tá ñanagürügü:

“Nataxuma ya náĩ ya ããne ya daa ããne ya itaxégacüxünerüũ ixĩxũne”, ñanagürügü. ¹⁹ Rü norü ngechaũmaã nügüétügu tá waixũmü nagünagügü, rü tá poraãcü naxauxe, rü tagaãcü ñanagürügü tá:

“Nangechaũtümüũ ya yima ããne ya itaxégacüxüne. Rü noxri rü norü yemaxũgümaã nügü nimuãrü dñeruãxẽxũgü ga guxũne ga wapurugüarü yoragü. Natürü i ñuxma rü ngürüãchi wüxi i oragutama rü inayarüxo i guxũma i ngẽma. ²⁰ Natürü ñuxma na napoxcuxũ ya yima ããne, rü name nixĩ i petaãegü i pema i daxũguxũ i naãnewa ngẽxmagüe, rü pema i Tupana pexũ imugüe, rü pema i Tupanaãrü orexũ ixugüe, rü guxãma i pema i Tupanaãrü duũxũgü ixĩgüe. Erü ñuxma na napoxcuxũ ya yima ããne, rü ngẽmaãcü Tupana pexũ naxütanü naxcèx ga yema chixexũ ga pemaã naxügüxũ ga guma ããnecũãx”, ñanagürügü. ²¹ Rü ñuxũchi wüxi ga Tupanaãrü orearü ngeruũ ga daxũcũãx rü nanangenagü ga wüxi ga nuta ga taxüchicü ga ñoma ãacüarü caruũrũ ixĩcü. Rü yema orearü ngeruũ rü taxtü ga taxũgu nanaña ga guma nuta ga taxüchicü, rü ñanagürü:

“Ngẽxgumarüũ tá quixĩ na icuyarüxoxũ, Pa ããne ya Itaxégacüxüne ya Babiróniãx, rü tagutáma texé wena cuxũ nadau. ²² Rü tagutáma wena curü ãtamügüwa texé nüxũ taxĩnü i paxetarüũgü i arpagü rü quenagü rü cornetagü. Rü ngẽxgumarüũ ta cuwa nataxütáma i puracütanüxũgü i ãacüwa puracüexũ, rü tagutáma texé nüxũ taxĩnü na cuwa ínapuracüexũ i çawüarü caruũgü.

²³ Rû marü tagutáma texé nüxü tadau i cuwa i omü. Rû marü tagutáma texé nüxü taxĩnü i ngĩgüchigaarü petagüarü cuxcuane. Rû ngẽmaãcü tá cumaã nangupetü woo ga noxri rü yema taxetanüxü ga cuwa taxegüxü rü guxüma ga togü ga taxetanüxüãrü yexera nixĩgü. Rû ngẽmacèx tá poraãcü cupoxcu nagagu ga yema chixexü ga namaã cunawomüxẽxü ga guxüma ga togü ga nachiuãnecüãx ga duüxügü”, ñanagürü. ²⁴ Yerü guma ñanecüãx ga duüxügü nixĩ ga nadèixü rü inabaxẽegüxü ga nagü ga Tupanaãrü orearü uruügü rü yema duüxügü ga Tupanaãrü ixĩgüxü rü guxüma ga duüxügü ga ñoma ga naãnegu Tupanaarü oregagu nadèixü.

19

¹ Rû yemawena nüxü chaxĩnü ga muxüma ga duüxügüga ga daxügüxü ga naãnewa tagaãcü ñagüxü:

“¡Ngĩxã Tupanaxü ticuèxüügü! Erü nüma nixĩ i tüxü namaxẽxẽxü. Rû nüma ya tórü Tupana nixĩ i guxüãrü yexera namexẽchixü rü naporaxüchixü.

² Rû nüma rü aixcüma meãma nanangugü i guxüma i duüxügüarü maxü, rü aixcüma tá nanapoxcu i ngẽma chixexü ügüxü. Rû ngẽmacèx marü nanapoxcu ya yima ñane ya itaxégacüxüne ya chixene ya norü chixexümaã nachixexẽene i guxüma i ñoma i naãnecüãx i duüxügü. Rû ñuxma i nüma ya Tupana rü norü duüxügü ga guma ñanecüãx dèixüxü naxütanü”, ñanagürügü.

³ Rû ñuxüchi wenaxãrü ñanagürügü:

“¡Ngĩxã Tupanaxü ticuèxüügü! Erü ngema norü caxixü na yaxaxü ya yima ñane, rü tagutáma ngẽma nayarüxo”, ñanagürügü. ⁴ Rû yema 24 ga ãexgacügü rü yema ägümücü ga daxücüãx ga maxèxü rü yexma nanangücuchitanü, rü Tupana ya norü tochicaxüwa rütocüxü nicuèxüügü. Rû ñanagürügü:

“Rü ngẽmaãcü yĩ. ¡Rü ngĩxã nüxü ticuèxüügü ya tórü Cori!” ñanagürügü.

⁵ Rû ñuxüchi yema tochicaxüütawa inanaxü ga wüxi ga naga ga ñaxü:

“Name nixĩ i tórü Tupanaxü picuèxüügü i guxãma i pemax Pa Buxügü rü Pa Yaxügüx i norü duüxügü na pixĩgüxü rü nüxü na pemuẽxü”, ñaxü.

Tupana Nane ga pecaduarü ütanücèx yucüarü ngĩgüarü petachiga

⁶ Rû ñuxüchi nüxü chaxĩnü ga tacü ga ñoma muxüchixü ga duüxügü idex-agüxürüü ixĩxü ga ñoma taxü i dexá i chuxchuxürüü ixĩxü ga ñoma poraãcü yaduruanexürüü ixĩxü ga ñaxü:

“¡Ngĩxã Tupanaxü ticuèxüügü! Erü nüma ya tórü Cori ya Tupana ya guxüãrü yexera poracü, rü marü ningucuchi na guxümaã inacuáxü. ⁷ ¡Rü ngĩxã tataãgü rü guxü i tórü taãemaã nüxü ticuèxüügü! Erü marü nawa nangu na iyangĩxü ya yima Tupana Nane ga pecaduarü ütanücèx yucü. Rû ngẽma norü duüxügü i ñoma namèxüü ixĩgüxü rü marü nügü ínimexẽegü.

⁸ Rû yima Tupana Nane rü ngẽma nüxü yaxögüxüxü namu na mexẽchixü rü cómuxü rü iyauracüxü i naxchirumaã na yaxãxchiruxü. Rû ngẽma naxchiru i mexẽchixü rü ngẽma nixĩ i ngẽma duüxügüarü maxü i mexüchiga”, ñanagürügü. ⁹ Rû ñuxüchi ga Tupanaãrü orearü ngeruü, rü ñanagürü choxü:

“Chanaxwèxe i cunaxümatü i ñaã ore i cumaã tá nüxü chixuxü: ‘Tataãgü ya yixema tüxna naxuxe i norü ngĩgüarü petawa ya yima Tupana Nane ga pecaduarü ütanücèx yucü’”, ñanagürü. Rû ñuxüchi ñanagürü ta:

“Ngẽma ore i cumaã nüxü chixuxü, rü Tupanaãrü orexüchitama nixĩ”, ñanagürü. ¹⁰ Rû choma rü yema orearü ngeruüpèxegu chacaxãpüxü na nüxü chicuèxüxücèx. Natürü ga nüma rü ñanagürü choxü:

“¡Tãxü i ngẽma cuxüxü! Erü choma rü ta Tupanaãrü duüxü chixü, ngëxgumarüü i cuma rü cueneëgü i Ngechucharü ore i aixcüma ixĩxü ixögüechaxürüü ta chixü. Rû name nixĩ i Tupanaxü quicuèxüü”, ñanagürü. Erü

ngēma ore i Ngechuchuchiga ixīxū, rü yematama ore nixī ga Tupanaärü ore-arü uruügü nüxū ixugüexū ga yexguma Tupanaãe i Üünexū nawa ideaxgu.

Guma Tupana Nane ga cowaru ga cómüxüetügu tonagücüchiga

¹¹ Rü ñuxūchi nüxū chadau ga daxūguxū ga naāne na yawāxnaxū. Rü yéma nangox ga wüxi ga cowaru ga cómüxū. Rü guma naetüwa rütocü rü Ixaixcūmacü rü Aixcūma Yanguxēcū nixī i naega. Rü nüma rü aixcūma guxūma i duūxügüarü maxūxū nacuèx, rü aixcūma tá guxūma i ngēma chixexū ügüxūmaã nügü nadai rü tá nanapoxcue. ¹² Rü naxētügü, rü ñoma üxüemarüü niyauracüü. Rü naēruwa rü namu ga norü ngèxcueruügü. Rü nacetügu naxümatü ga wüxi ga naega ga nüxīcatama nüxū nacuáxū. ¹³ Rü wüxi ga naxchiru ga ducharaxūgu nicux. Rü naega rü Tupanaärü Ore nixī. ¹⁴ Rü nawe narüxī ga guxūma ga norü churaragü ga daxūcüāx. Rü nümagü rü naxchiru ga imexēchixū rü cómüxūmaã nixāxchiru. Rü cowarugü ga icómüxüetügu naxī. ¹⁵ Rü naāxwa nayexma ga wüxi ga tara ga tēxechixū na yemamaã napíexēãxúcèx i guxūma i ngēma duūxügü i tama nüxū yaxōgüxū. Rü tá nüma nanaxwèxexūácūma ngēma duūxügümaã inacuèx. Rü nüma rü tá poraãcü ngēma duūxügü i tama yaxōgüxūxū napoxcu namaã i ngēma poxcu ya Tupana ya Guxūxū Rüporamaēcü norü numaã mexēexū. Rü ñoma ubagü i norü maixruüwa imèixtüüxürüü tá nixī na napoxcueãxū. ¹⁶ Rü naxchirugu rü naperemagu naxümatü ga wüxi ga naega ga ñaxū:

“Guxūma i nachiüānegüarü āēxgacügüarü Āēxgacü, rü guxūma i corigüarü Cori ixīcü”, ñaxū. ¹⁷⁻¹⁸ Rü ñuxūchi nüxū chadau ga wüxi ga Tupanaärü orearü ngeruü ga daxūcüāx ga üèxcügu chixū. Rü nüma rü tagaãcü ñanagürü nüxū ga guxūma ga ngurucugü ga yexma ixexexütanüxū:

“¡Nuã pexī rü pengutaquēxegü naxcèx i òna i taxū i Tupana pexcèx mexēexū na penangōxúcèx i nachiüānegüarü āēxgacügümachi, rü churaragüarü āēxgacügümachi, rü yatügü i poraxüchixümachí, rü cowarugümachi, rü ngēma cowaruétügu íxū i duūxügümachi, rü ngēma duūxügü i coriāxgüxümachi rü ngēma ngearü coriāxgüxümachi rü ngēma buxügümachi rü ngēma yaxügümachi!” ñanagürü. ¹⁹ Rü ñuxūchi nüxū chadau ga yema nüxīraüxū ga ngoxo rü guxūma ga nachiüānegüarü āēxgacügü ga norü churaragümaã yéma ngutaquēxegüxū na nügü nadèixúcèx namaã ya yima cowaruétügu íxücü rü norü churaragü. ²⁰ Rü yema nüxīraüxū ga ngoxo rü niyaxu. Rü wüxigu namaã niyaxu ga yema to ga ngoxo ga orearü uruüneta ixīxū ga yema nüxīraüxū ga ngoxopēxewa naxūxū ga cuèxruügü ga duūxügü tama nüxū cuáxū na naxügüāxū. Rü yema cuèxruügümaã nixī ga nawomüxēēãxū ga yema duūxügü ga nüxū icuèxüügüxū ga naxchicünèxã ga yema nüxīraüxū ga ngoxo rü nügü ixāgüxū na yema ngoxoégamaã na yaxüégagüxū. Rü yema nüxīraüxū ga ngoxo rü yema to ga ngoxo ga orearü uruüneta ixīxū, rü wüxigu maxēxūma nawa nawoü ya yima naxtaa ya üxūmaã iyaurachiüne ya azufremaã ixaxüne. ²¹ Rü yema tara ga tēxechixū ga guma cowaruétüwa rütocüèxwa yexmaxūmaã nanadai ga yema ngoxogüarü ngüxēeruügü ga āēxgacügü rü norü churaragü. Rü guxūma ga ngurucugü, rü yemamachimaã nangāxcharaügü.

20

Chataná rü 1,000 ga taunecü ninèix

¹ Rü yemawena nüxū chadau ga wüxi ga Tupanaärü orearü ngeruü ga daxūguxū ga naānewa íruxīxū. Rü naxmēxwa nayexma ga yema āxmaxū i taxuguma iyacuáxūärü chawi rü ñuxūchi wüxi ga cadena. ² Rü yema

Tupanaärü orearü ngeruũ rü yema coyaxũ niyaxu. Rü yematama coya nixĩ ga yema nuxcũmaũxũ ga ãxtape ga ngoxo ga Chataná ixĩxũ. Rü yema orearü ngeruũ rü 1,000 ga taunecügücèx nayanèix. ³ Rü yema orearü ngeruũ rü yema ãxmaxũ i taxuguma iyacuáxũgu nayatèxcuchi. Rü ñuxũchi yexma meãma nanawãxtaũ na nüma ga Chataná rü marü taguma wenaxãrũ duũxũgũxũ nawomüxèèxücèx ñuxmatáta 1,000 ya taunecü ngèxma yangeã. Rü ngèxguma marü yanguxèèãgu ya yima 1,000 ya taunecü, rü tá paxaxãchi nayangèx. ⁴ Rü ñuxũchi nüxũ chadau ga ñuxre ga tochicaxũgü. Rü yema tochicaxũwa tarütogü ga guxema Tupanaxũtawa nayauxgũxe ga pora na duũxũgũxũ ticagũxücèx. Rü yexgumarüũ ta nüxũ chadau ga naãègü ga yema duũxũgü ga Ngechuchuarü orexũ na yaxugũxücèx nadaũnaãgũxũ. Rü yema nixĩ ga duũxũgü ga meãma nüxũ ixugũxũ ga Tupanaärü ore rü tama yema ngoxoxũ icuèxüũgũxũ rü bai ga yema ngoxochicünèxãxũ icuèxüũgũxũ, rü tama nügü ixãgũxũ na nacatüwa rü èxna naxmèxwa yema ngoxoégamaã yaxægaxũ. Rü nüxũ chadau ga wena na namaxèxũ, rü 1,000 ga taunecü Cristumaã wüxigu ãèxgacü nixĩgü. ⁵ Rü yemagü nixĩ ga nüxĩrama írüdagũxũ. Natürü ga yema togü ga yuexũ rü tãütáma namaxè ñuxmatáta yima 1,000 ya taunecüguwena. ⁶ Rü tataãègü ya yixema tũxira írüdagũxe erü Tupanaärü duũxũgü tixĩgü. Rü ngèma Tupanaärü poxcu rü marü tãütáma tümacèx nixĩ. Rü tá Tupanaärü rü Cristuarü ngũxèèruũgü tixĩgü. Rü 1,000 ya taunecü tá Cristumaã ãèxgacügü tixĩgü.

ngoxo i Chataná rü marü nagu nayarũchixe

⁷ Rü ngèxguma marü nangupetügu ya yima 1,000 ya taunecü, rü Chataná rü tá ningèx i ngèma ínapoxcuxũwa. ⁸ Rü nüma i Chataná rü tá ínaxũxũ na yawomüxèèãxücèx i guxũma i ñoma i naãnecũãx i duũxũgü rü Goga rü Magoga na ngèmagũxũ nangutaquèxèèxücèx na Tupanaärü duũxũgũmaã nügü nadèixücèx. Rü ngèma Chatanáärü churaragü, rü ñoma taxtũ i taxtũärü naxnecũchicutèxerüũ tá namuxũchi. ⁹ Rü ngèmaãcü i Chatanáärü churaragü rü tá ñoma i naãneärü tagu ninguchü. Rü tá Tupanaärü duũxũgũxũ rü yima ñãne ya Tupana nüxũ ngechaxũne ya Yerucharéũxũ ínachoeguãchi. Natürü Tupana rü daxũwa tá nanayixèè ya üxü, rü yimamaã tá nixae i guxũma i ngèma namaã rüxuanügũxũ. ¹⁰ Rü ngèma ngoxo i ngèma duũxũgũxũ womüxèèxũ, rü nawa tá natáe ya yima naxtaa ya üxũmaã iyaurachiüne ya azufremaã ixaxũne. Rü yima nixĩ ya naxtaa ga marü nawa nawoũne ga yema nüxĩraũxũ ga ngoxo rü yema to ga ngoxo ga orearü uruũneta ixĩxũ. Rü yima naxtaawa tá nixĩ i guxũgutáma ngunecü rü chütacü ngúxũ yangegũxũ.

Ngèma taxtũ i tochicaxũ i cómüxũwa rütocüpèxewa nangugü i duũxũgü

¹¹ Rü ñuxũchi nüxũ chadau ga wüxi ga taxtũ ga tochicaxũ ga cómüxũ, rü nüxũ chadau ga guma nawa rütocü. Rü gumachaxwa nibuxmü ga ñoma ga naãne rü guxũma ga daxũwa nüxũ idauxũ, rü inayarütauxe. ¹² Rü nüxũ chadau ga yema yuexũ ga yaexũ rü buexũ ga Tupanapèxegu chigũxũ. Rü ningena ga poperagü. Rü yexgumarüũ ta ningena ga yema Tupanaärü popera i nagu yawügũxũ i ngèma duũxũgü i nüxũ nangèxmaxũ i maxũ i taguma gúxũ. Rü yema yuexũ rü yexgumarüũ ga ñuxãcü na namaxèxũ ga wüxichigü rü yexgumarüũ ga ñuxãcü na yema poperawa ínaxũmatüxũrüũãcũma Tupana namaã nüxũ nixu na ngextá tá naxĩxũ. ¹³ Rü yema yuexũ ga taxtũ ga taxtũwa yexmagũxũ rü wenaxãrũ ínarüdagü. Rü yema yuexũ ga tauquewa yexmagũxũ rü wenaxãrũ ínarüdagü. Rü yemaãcü ínarüdagü ga guxũma ga duũxũgü ga yuexũ. Rü guxũma ga yema yuexũ rü Tupana nüxna nicachigü rü yexgumarüũ ga ñuxãcü na namaxèxũ ga wüxichigü rü namaã nüxũ

nixu na ngextá tá naxĩxũ. ¹⁴ Rũ yemawena rũ guma naxtaa ga üxũmaã iyaurachiünewa nawoũ ga yu guxũma ga norũ poramaã. Rũ guma naxtaa ga üxũmaã iyaurachiüne, rũ ngẽma nixĩ i poxcu i taguma iyacuáxũ i tũmacèx ixĩxũ ya yĩxema tama Tupanaãrũ duũxũgũ ixĩgũxe. ¹⁵ Rũ guma naxtaa ga üxũmaã iyaurachiünewa tawoũ ga guxema ingeégaxe nawa i ngẽma Tupanaãrũ popera i nagu tiwũgũxũ ya yĩxema tũxũ nangẽxmaxẽ i maxũ i taguma gũxũ.

21

Ngexwacaxũxũ i ñoma i naãne rũ guxũma i daxũwa ngẽxmaxũ

¹ Rũ yemawena nüxũ chadau na nayexwacaxũxũ ga ñoma ga naãne rũ guxũma ga tacũ ga daxũwa yexmagũxũ. Yerũ yema nüxĩra yexmagũxũ rũ marũ nangupetũ, rũ yema taxũ ga taxtũ rũ marũ nataxuma. ² Rũ nüxũ chadau ga guma ñane ga mexũne ga Yerucharéũ ga yexwacaxũne ga daxũgũxũ ga naãnewa Tupanaxũtawawa írũxĩxũne ga guxũwama mexẽchine ñoma wũxi i pacũ i ngẽxguma iyangĩxgu rũ ngĩtecèx ngĩgũ mexẽxcürũũ ixĩxũne. ³ Rũ nüxũ chaxĩnũ ga wũxi ga naga ga yema tochicaxũwa inaxũxũ ga tagaãcũ ñaxũ:

“Tupana rũ duũxũgũtanũwa nangexma i ñuxmax. Rũ natanũwa tá namaxẽcha. Rũ nümagũ rũ norũ duũxũgũ tá nixĩgũ. Rũ nüma ya Tupana rũ natanũwa tá nangẽxmaẽcha, na guxũguma norũ Tupana yĩxũcèx. ⁴ Rũ nüma tá ínanapi i naxgũũëtũ i guxũma i ngẽma duũxũgũ. Rũ marũ tãütáma texé tayu, rũ texé tũmaãrũ ngechaũmaã taxaxu, rũ texé ngũxũ tingegũ. Erũ guxũma i ngẽma ngũxũ rũ marũ inayarũxo”, ñanagürũ. ⁵ Rũ guma yema tochicaxũwa rütocũ rũ ñanagürũ:

“Dücèx, choma rũ chanangexwacaxũxẽ i guxũma i tacũ i ngẽxmaxũ”, ñanagürũ. Rũ ñuxũchi ñanagürũ ta:

“¡Naxũmatũ i ñaã ore! Erũ ñaã ore rũ aixcũma nixĩ, rũ ñaã nixĩ i ore i mexũ na yaxõxũ”, ñanagürũ. ⁶ Rũ yemawena rũ ñanagürũ choxũ:

“Ñuxma rũ marũ ningu i guxũma. Rũ chowa nixĩ ga inaxũgũxũ ga guxũma, rũ nataxuma i tacũ i chorũ yexera ngẽxmaẽchaxũ. Rũ yĩxema itawaxe, rũ choma rũ tá nangetanũãcũma tũxũ chaxaxẽmare nawa i ngẽma dexá i maxẽerũ. ⁷ Rũ yĩxema nüxũ rũporamaẽgũxe i chixexũ, rũ tá tanayauxgũ i guxũma i ngẽma mexũgũ i nüxũ chixuxũ. Rũ choma rũ tá tũmaãrũ Tupana chixĩ, rũ tũma i chauxacũgũ. ⁸ Natürũ ngẽma muũexũ i nüxũ rũxoexũ na chowe naxĩxũ, rũ nawa tá nawoũ ya yima naxtaa ya üxũmaã iyaurachiüne ya azufremaã ixaxũne. Rũ ngẽxgumarũ ta i ngẽma tama yaxõgũxũ, rũ ngẽma chixexũ ügũxũ, rũ ngẽma máetagũxũ, rũ ngẽma naĩ i ngemaã ipexũ, rũ ngẽma iyuũxũ rũ ngõxwèxegũxũ, rũ ngẽma tupananetachicünèxãxũ icuèxũügũxũ, rũ ngẽma idoratèxegũxũ, rũ nawa tá nawoũ ya yima naxtaa ya üxũmaã iyaurachiüne ya azufremaã ixaxũne. Rũ ngẽma nixĩ i poxcu i taguma iyacuáxũ i nüxũ inanguxẽexũ i ngẽma tama yaxõgũãcũma yuexũ”, ñanagürũ.

Yexwacaxũne ga Yerucharéũchiga

⁹ Rũ yema 7 ga orearũ ngeruũgũ ga nüxũ yexmagũxũ ga 7 ga copagũ ga yema 7 ga poxcuruũmaã ixããcuxũ, rũ yematanũwa rũ wũxi ga orearũ ngeruũ rũ chauxcèx nixũ, rũ ñanagürũ choxũ:

“¡Nuã naxũ! Rũ tá cuxũ nüxũ chadauxẽ i ngẽma yaxõgũxũ i ñoma namèxrüũ tá ixĩgũxũ ya yima Tupana Nane ga pecaduarũ ütanücèx yucũ”, ñanagürũ. ¹⁰ Rũ yexguma yemaãcũ Tupanaã i Üünexũ choxũ ngoxetũxẽegu, rũ yema orearũ ngeruũ rũ wũxi ga mèxpũne ga taxũnewa choxũ naga. Rũ choxũ nüxũ nadauxẽ ga guma ñane ya üünene ga Yerucharéũ ga daxũgũxũ

ga naãnewa Tupanaxütawa íruxĩtũne. ¹¹ Rũ guma ããne rũ Tupanaãrũ yauracũxũmaã nangóone. Rũ yema norũ yauracũxũ ga guma ããne rũ ñoma wũxi ya nuta ya mexẽchicũrũũ nixĩ. Rũ ñoma nuta ya yasperũũ nixĩ na yachipetũxũ. ¹² Rũ guma ããne rũ guxũwama ínapoxegu. Rũ nataxũchi rũ namáchanexũchi ga yema norũ poxeguxũ. Rũ yema norũ poxeguxũ rũ nũxũ nayexma ga 12 ga norũ ããx. Rũ wũxichigũ ga yema ããxwa nayexma ga wũxi ga Tupanaãrũ orearũ ngerũũ. Rũ wũxichigũ ga yema ããxwa nangoxéga ga wũxichigũ ga yema 12 ga Acobu nane ga Yudiũgũ nawa ne ãxũ. ¹³ Rũ tomaẽxpũx ga norũ ããx rũ napẽxewaama nayexma, rũ yema to ga tomaẽxpũx rũ norũ toxwecũwawa nayexma, rũ yema to ga tomaẽxpũx rũ norũ tũgũnecũwawa nayexma, rũ yema to ga tomaẽxpũx rũ naweama nayexma. ¹⁴ Rũ guma ããneãrũ poxeguxũ, rũ 12 ga nuta ga taxũchicũétũwa inaxũgũ. Rũ wũxichigũ ga guma nutagũwa nangoxéga ga wũxichigũ ga norũ ngũexũgũ ga guma Tupana Nane ga pecaduarũ ũtanũcèx yucũ. ¹⁵ Rũ yema orearũ ngerũũ ga chomaã idexaxũ, rũ nũxũ nayexma ga wũxi ga norũ ngugũxũ ga uirumenèxãnaxcèx na yemamaã nangugũãxũcèx ga guma ããne, rũ norũ ããxgũ, rũ norũ poxeguxũgũ. ¹⁶ Rũ guma ããne rũ nawũxigumare ga guxũcũwawa. Rũ norũ mèx rũ nawũxigumare namaã ga norũ tatachinũ. Rũ yema orearũ ngerũũ rũ yema uirumenèxãmaã nanangugũ ga guma ããne. Rũ 2,200 kilómetru nixĩ ga norũ mèx. Rũ yexgumarũũ ta 2,200 kilómetru nixĩ ga norũ tatachinũ. Rũ 2,200 kilómetru ta nixĩ ga norũ máchane. ¹⁷ Rũ yemawena rũ inanangu ga yema norũ poxeguxũ ga guma ããne. Rũ 65 metru nixĩ ga norũ máchane. Rũ yemaãcũ duũxũgũarũ ngugũxũmaã nanangugũ. ¹⁸ Rũ yema norũ poxeguxũ ga guma ããne, rũ nuta ga mexẽchicũ ga yaspnaxcèx nixĩ. Rũ nũmatama ga guma ããne rũ uirunaxcèx nixĩ. Rũ ñoma woruarũũ niyauracũũ. ¹⁹ Rũ guma nutagũ ga itacũ ga norũ poxeguxũpara ixĩgũcũ, rũ nagũxũraũcũ ga nuta ga imexẽchicũmaã nangèxãẽ. Rũ guma nũxĩraũcũ ga napara rũ nuta ga yaspemaã nangèxãẽ. Rũ guma norũ taxre ga napara rũ nuta ga safirumaã nangèxãẽ. Rũ guma norũ tomaẽxpũx ga napara rũ nuta ga ágatamaã nangèxãẽ. Rũ guma norũ ágũmũcũ ga napara rũ nuta ga esmerádamaã nangèxãẽ. ²⁰ Rũ guma norũ wũximẽxpũx ga napara rũ nuta ga onichemaã nangèxãẽ. Rũ guma norũ 6 ga napara rũ nuta ga cornalínamaã nangèxãẽ. Rũ guma norũ 7 ga napara rũ nuta ga crisólitumaã nangèxãẽ. Rũ guma norũ 8 ga napara rũ nuta ga berilumaã nangèxãẽ. Rũ guma norũ 9 ga napara rũ nuta ga topásiumaã nangèxãẽ. Rũ guma norũ 10 ga napara rũ nuta ga crisoprásamaã nangèxãẽ. Rũ guma norũ 11 ga napara rũ nuta ga yachĩtumaã nangèxãẽ. Rũ guma norũ 12 ga napara rũ nuta ga amatístamaã nangèxãẽ. ²¹ Rũ yema 12 ga norũ ããx ga guma ããneãrũ poxeguxũ rũ perlanaxcèx nixĩ. Rũ wũxichigũ ga yema ããx rũ wũxitama ga perla nixĩ. Rũ yema norũ ítamũ ga guma ããneãrũ ngãxũwa dapetũxũ, rũ uiruxicanaxcèx nixĩ. Rũ ñoma woruarũũ niyauracũũ. ²² Rũ guma ããnewa rũ taxũnema ga ngutaquẽxepataxũ ga ngextá Tupanaxũ nawa yacuèxũtũgũnèxũ chadau, yerũ nũmatama ga Tupana ya poracũ rũ Nane ga pecaduarũ ũtanũcèx yucũ rũ yema nayexma na duũxũgũ nũxũ icuèxũtũgũxũcèx. ²³ Rũ yima ããne rũ taxucèxma uèxcũ rũ tauemacũ nũxũ nabaxi, erũ Tupanaãrũ ngóonexũtama nixĩ i nangóonexẽèxũ. Rũ yima Tupana Nane ga pecaduarũ ũtanũcèx yucũ nixĩ ya norũ omũ ixĩcũ. ²⁴ Rũ ngẽma Tupanaãrũ ngóonexũ i yima ããnèxũ ngóonexẽèxũ tá nixĩ i nangóonexẽèxũ naxcèx i guxũma i ñoma i naãnecũãx i duũxũgũ. Rũ ngẽma tá nangugũ i guxũma i nachĩũãnegũarũ ãẽxgacũgũ i yaxõgũxũ rũ tá Tupanana nayana i norũ mexũgũ. ²⁵ Rũ norũ ããxgũ rũ tagutáma narũwãxtagũ erũ ngẽma rũ guxũguma nangunexecha rũ taguma nachũta. ²⁶ Rũ ngẽma

tá nanana i guxūma i ñoma i naãneârū mexūgū. ²⁷ Natürū tagutáma ngēxma naxūcu i tacū i Tupanapēxewa chixexū, rü bai ya texé ya chixexū úxe rü éxna idoratèxáxe. Rū yíxema Tupana Nane ga pecaduarū útanücèx yucüarū poperawa ngoxégagūxexicatátama tixīgū ya ngēxma chocuxe.

22

¹ Rū ñuxūchi ga yema orearū ngeruū rü choxū nüxū nadauxēē ga wūxi ga natū ga metacūchiūxū rü ichipetūchiūxū ga dexá ga maxēeruū. Rū yema tochicaxū ga nawa natogūxū ga Tupana rü Nane ga pecaduarū útanücèx yucü, rü nawa nixī ga ne nadaxū ga yema natü. ² Rū guma ñãneârū ngāxūwa dapetūxū ga ítamūarū ngāxūgu nida ga yema natü. Rū norū guxūcutūwa narūxūgū ga naīgū ga maxēeruū. Rū yema naīgū rü wūxicanatama naxo ga wūxichigū ga tauemacūgu rü yemaãcū 12 ēxpūxcūna naxo ga wūxi ga taunecūgu. Rū naātūgū ga yema naīgū, rü guxū i nachiūñecūñax i duūxūgū i yaxōgūxūârū taãxēēruū nixī. ³ Rū ngema rü nataxūtáma i tacū i Tupana chixexū namaã naxuxuchixū. Rū yima ñãnewa tá nangēxma i norū tochicaxū ya Tupana rü Nane ga pecaduarū útanücèx yucü. Rū norū duūxūgū rü tá nüxū nicuèxūgū. ⁴ Rū ngēma norū duūxūgū rü tá nachiwexūchixū nadaugū, rü tá naegamaã nixãegacatü. ⁵ Rū ngema rü tagutáma nachūta. Rū ngēma norū duūxūgū, rü taxucèxtáma nanaxwèxe i daparina rü éxna üèxcü na nangónexūcèx. Erü nūmatama ya tórü Cori ya Tupana rü tá nüxū nabaxi. Rū nūmagū i ngēma duūxūgū rü guxūgutáma wūxigu Tupanamaã ãëxgacūgū nixīgüecha.

Marü ningaica na wena núma naxūxū ya Ngechuchu ya Cristu

⁶ Rū ñuxūchi ga yema Tupanaârū orearū ngeruū rü ñanagürü choxū:

“Ñãã ore rü aixcūma ixīxū nixī, rü ñãã nixī i ore i mexū na yaxōxū. Rū nūma ya tórü Cori ya Tupana ga nuxcūma norū orearū uruūgūmaã nüxū ixucü ga tacū tá na ngupetūxū, rü nūmatama nixī i ñuxma inamuãxū i norū orearū ngeruū i daxūcūñax na norū duūxūgūxū nüxū nadauxēēxūcèx na tacū tá paxa nangupetūxū”, ñanagürü. ⁷ Rū nūma ya tórü Cori ya Ngechuchu rü ñanagürü:

“Paxa tá íchangu. Rū tataãe ya yíxema naga ñnuxē i ngēma Tupanaârū ore i ñãã poperagu ümatūxū”, ñanagürü. ⁸ Rū chomatama i Cuáñ rü nüxū chaxīnū rü nüxū chadau i guxūma i ngēma nüxū chixuxū. Rū yemaxū chaxīnūguwena rü nüxū chadèuxguwena, rü yema orearū ngeruū ga yemaxū choxū dauxēēxūpēxegu chacaxāpūxū na nüxū chicuèxūñxūcèx. ⁹ Natürü ga nūma rü ñanagürü choxū:

“¡Tāxū i ngēma cuxūxū! Erü choma rü ta Tupanaârū duūxū chixī, ngēxgumarū i cuma rü cueneēgū i Tupanaârū orexū ixugūxū rü ngēma duūxūgū i naga ñnuxēxū i ngēma ore i ñãã poperagu ümatūxū. Rū name nixī i Tupanaxū quicuèxū”, ñanagürü. ¹⁰ Rū ñanagürü ta choxū:

“Tama name na icuyacūxū i ngēma Tupanaârū ore i ñãã poperagu ümatūxū, erü marü ningaica na yanguxū i ngēma ore. ¹¹ Natürü ngēma chixexū ügūxū, rü chixexū tá naxūgüecha. Rū ngēma Tupanapēxewa chixri maxēxū, rü chixri tá namaxēēcha. Natürü yíxema mexū ügūxe, rü name nixī na mexū taxūgüechaxū. Rū yíxema Tupanapēxewa ixūñexē, rü name nixī na Tupanapēxewa tixūñeēchaxū”, ñanagürü. ¹² Rū ñanagürü ga Ngechuchu:

“Dücèx, paxa tá íchangu namaã i ngēma ãmare i wūxichigūna tá chaxāxū ngēxgumarū na ñuxācū tanaxūxū i tūmax. ¹³ Choma nixī i norū ügū i guxūma, rü chowa nixī i yacuáxū erü nataxuma i tacū i choweama üxū. ¹⁴ Rū tataãēgū ya guxāma ya yíxema yima pecaduarū útanücèx yucūgūwa tūgū iyauxgūchiruxe na Tupanapēxewa timexūcèx na yima ñãneârū ñãxwa tichocuxūcèx rü nüxū

tangõxnetagüxcèx i ngẽma norü o i ngẽma naĩ i maxẽẽruũ. ¹⁵ Natürü tãütáma yima ñãnewa nichocu i ngẽma tama yaxõgüxü, rü ngẽma iyuüxü rü ngõxwèxegüxü, rü ngẽma naĩ i ngemaã ipegüxü, rü ngẽma máétagüxü, rü ngẽma tupananetachicünèxãxü icuèxüügüxü. Rü ngëxgumarüü ta i ngẽma idoratèèxgüxü i norü me ixixü na togüxü nawomüxèègüxü, rü tãütáma nawa nichocu ya yima ñãne. ¹⁶ Rü choma i Ngechuchu, rü guxãma i pema i yaxõgüxütanüwa chanamu i chorü orearü ngerü na pemaã nüxü yaxuxüxcèx i guxüma i ngẽma chorü ore. Rü choma nixĩ i Dabítaa chiixü. Rü choma nixĩ ya yima woramacuri ya pèxmama poraãcü nangónexèècürüü chiixü”, ñanagürü. ¹⁷ Rü Tupanaãe i Üünexü rü guxüma i yaxõgüxü, rü Ngechuchuxü ñanagürügü:

“¡Nuã naxü!” ñanagürügü. Rü yíxema nüxü ñnuxè i ñãã ore, rü:

“¡Nuã naxü!” ñatagügü. Rü yíxema itawáxe rü tüxü nachixégaxe, rü name nixĩ i nuã taxü rü tüxü nangetanüácüma nawa taxaxe i ngẽma dexá i maxẽẽruũ. ¹⁸ Rü guxãma ya yíxema irüxñnùèxè i ñãã Tupanaãrü ore i ñãã poperagu ümatüxü, rü tümamaã nüxü chixu rü ngëxguma chi texé íyatóxèègu i ngẽma Tupanaãrü ore i ñãã poperagu ümatüxü, rü Tupana rü tá tümacèx nanayexeraxèè i ngẽma poxcuruügü i ñãã poperawa nachiga naxümatüxü. ¹⁹ Rü ngëxguma chi texé nüxü üpetügu i wüxitama i ñãã Tupanaãrü ore i ñãã poperagu ümatüxü, rü Tupana rü tãütáma tüxü nüxü nangõxnetaxèè i ngẽma norü o i ngẽma naĩ i maxẽẽruũ i ñãã poperawa nachiga naxümatüxü. Rü ngëxgumarüü tá ta tãütáma tüxü nimucuchi nawa ya yima ñãne ya üünene i ñãã poperawa nachiga naxümatüne. ²⁰ Rü yima nüxü ixucü i ñãã ore, rü ñanagürü:

“Ngẽmaãcü, paxa tá íchangu”, ñanagürü. Rü ngẽmaãcü yĩ. Rü choma i Cuáü rü ñacharügü:

“¡Nuã naxü Pa Cori ya Ngechuchu!” ñacharügü. ²¹ Rü chanaxwèxe i tórü Cori ya Ngechuchu ya Cristu poraãcü pexü narüngüxèè i guxãma i pemax. Rü ngẽmaãcü yĩ.